


Bëngbe Bëtsa  
Cabëngaftaca  
Entsoyebuambna



New Testament in Camsá

**Bëngbe Bëtsa Cabëngaftaca Entsoyebuambna  
New Testament in Camsá**

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Camsá

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2016-05-05

## Contents

San Mateo . . . . .	1
San Marcos . . . . .	68
San Lucas . . . . .	109
San Juan . . . . .	176
Hechos . . . . .	226
Romanos . . . . .	290
1 Corintios . . . . .	324
2 Corintios . . . . .	357
Gálatas . . . . .	378
Efesios . . . . .	391
Filipenses . . . . .	403
Colosenses . . . . .	411
1 Tesalonicenses . . . . .	419
2 Tesalonicenses . . . . .	426
1 Timoteo . . . . .	430
2 Timoteo . . . . .	440
Tito . . . . .	447
Filemón . . . . .	451
Hebreos . . . . .	453
Santiago . . . . .	480
1 San Pedro . . . . .	488
2 San Pedro . . . . .	497
1 San Juan . . . . .	503
2 San Juan . . . . .	511
3 San Juan . . . . .	512
San Judas . . . . .	514
Apocalipsis . . . . .	517

## San Mateo

### *Jesusbe bêts taitanga*

*(Lc 3.23-38)*

<sup>1</sup> Quemënga immamna Jesucristbe bêts taitanga: Jesucristna Rey David y Abrahám bentsána entsá inamna.

<sup>2-6</sup> Abraham yojamna Isaache taitá;

Isaacna Jacobëbe taitá

y Jacob, Judá y chabe catsátangbe taitá.

Judá, Fares y Zarabe taitá; y chatbe mamá Tamar yojamna;

Fares Esrombe taitá

y mua Arambe taitá.

Aram Aminadabëbe taitá;

Aminadab Naasonbe taitá

y Naasón Salmonbe taitá.

Salmón Boozbe taitá y muabe mamá Rahab yojamna;

Booz Obedbe taitá y muabe mamá Rut yojamna;

y Obedna Isaíbe taitá.

Isaí Rey Davidbe taitá;

David Salomonbe taitá y muabe mamá yojamna chë Uríasbe shema inamná.

<sup>7-11</sup> Salomón Roboambe taitá;

Roboam Abíasbe taitá

y Abíasna Asabe taitá;

Asa Josafatbe taitá;

Josafat Jorambe taitá

y Joramna Uzíasbe taitá.

Uzías Jotambe taitá,

Jotam Acazbe taitá

y Acazna Ezequíasbe taitá.

Ezequías Manasesbe taitá;

Manasés Amonbe taitá

y Amón Josíasbe taitá.

Josíasna Jeconías y chabe catsátangbe taitá yojamna.

Chë Babilonioca entsanga chë israelitënga tmojánishëche y choca imojanëtámena ora, Josías chë básenga yojánabamna.

<sup>12-16</sup> Ya Babilonioca ndutámenënga ora;

Jeconías Salatielbe taitá;

Salatiel Zorobabelbe taitá.

Zorobabel Abiudbe taitá;

Abiud Eliaquimbe taitá

y Eliaquimna Azorbe taitá.

Azor Sadoche taitá;

Sadoc Aquimbe taitá

y Aquimna Eliudbe taitá.

Eliud Eleazarbe taitá;

Eleazar Matanbe taitá

y Matán Jacobëbe taitá.

Jacob Josebe taitá yojamna y Josena Mariybe boyá.

María Jesusbe mamá, Jesús chë Bëngbe Bëtsabe Uámana Uabuayaná, chë Cristo ca uabainá.

17 Chcasna, Abrahám bentsana David bentscoñe bnétsana canta bêts pamíllanga imojéftsemna. Davídbentsana y chë israelitënga Babilonioca imojanëtaménentscuana inye bnétsana canta bêts pamíllanga; y inye bnétsana canta bêts pamíllanga chë Israeloca entsanga imojanëtaménentsana, chë Cristo tojanonýnántscóñe.

*Jesucristo tojanonýná*  
(Lc 2.1-7)

18 Jesucristo jónýnanamna mëntsá tojanopasá: María tbojanšbuachená Joséftaca jobouamayama, pero cabá ndoñe cánýiñe ibontsiyena ora, tojanopasá Mariyna ngomaná yojoquéda chë Uámana Espíritbe obenánaca.

19 José, Mariybe boyá, canye nyetsca soyënguiñe tšabá jamama bošá inamna. Cha ndoñe yontseboše entsangbe delante cha mal jaquédana; chíyecna tojanjuabó nye iytëcana Maríybentsana jtsojuánañana.

20 Y chca yojtsejuabnantscuana, mo otjenayoquécá canye Bëngbe Bëtsabe ángel tbojáninye y chana Josébioye tbojanianyana: “José, Davídbentsana entsá, ndoñe matenócochinýenana Mariáftaca jobouamayama, er chë bochántsebmna šešona chë Uámana Espíritbe obenánaca cha bochántsebmna.

21 María canye šešona bochántsebmna y cha Jesús ca cochjuabaye. Chca echantsabaina er cha chabe entsanga chëngbe bacna soyënguentšana echanjâtsebacaye ca” –chë ángel tbojanianyana.

22 Lempe chca tojanochñëngo, cachcá chaotsemnama ntšamo Bëngbe Bëtsá chabe juabna oyebuambnayëngbiajana tojanayancá. Chë oyebuambnayá mëntsá tojánayana:

23 Chë cabá boyabása nduabuátmá ngomamaná echanjoquéda

y canye šešona boyabásetema bochántsebmna,

y cha mochanjuabaye Emanuel ca.

(Emanuel endayana “Bëngbe Bëtsá bëngaftaca ca”.)

24 José chë otjénayentsana tojanofšená ora, tojanma ntšamo chë Bëngbe Bëtsabe ángel tbojanmandacá y Mariáftaca tojanobouamá.

25 Pero ndoñe cánýiñe ibontsaniyena, sinó nye chë šešonatema tojanonýná orscana. Chë šešonatema tojanonýná orna, José chábioye Jesús ca tbojanabaye.

## 2

*Reyes Magos Jesúsbioye tmojána*

1 Herodes judiëngbe rey yojamna ora, canye pueblo Judeoca, Belén ca uabáinentše Jesús tojanonýná. Chentsana, báseftanga, estrellënga uatsjëndayënga, magos ca uabáinënga, canye bêts pueblöye Jerusalén ca uabáinoye tmojánashjajna. Chënga tmojánabo shinýe bocanoye luarëngocana.

2 Jerusalenocna chënga, Heródesbioye tmojána y tmojanënoticiá: “¿Ndayentše yojtsemna chë judiëngbe rey jtsemnama tojonýná cha ca? Bëngbe luarëngoca shinýe bocanoye chabe onýnana estrella fsënjinýe y as muentše cha jaboadorama tifjabo ca.”

3 Rey Herodes chca tojanuena ora, corente yojtsenócochinýena, y nyetsca chë Jerusalemntše oyenëngnaca.

4 Chentsana chë rey tojánachembo nyetsca chë judiëngbe bachnangbe amëndayënga y chë judiëngbe ley abuátambayënga jenoyeunayëngama. Mëntsá tojanatjá: —¿Ndayentše chë Bëngbe Bëtsabe Uámana Uabuayaná, chë Cristo ca uabainá, jónýnama ibomna ca?

5 Chënga tmojanjuá: —Judeoca, Belén pueblentše ca. Bayté entsemna chë Bëngbe Bëtsabe juabna oyebuambnayá Miqueas mëntsá tojanábema:

6 Y tšëngaftanga, Judeoca Belenentše oyenënga,

canye mandayá tšëngaftangbentsana echanjabo.

Cha nyetsca chë Judeoca mándayëngbiama más uamaná echántsemna,

y atšbe entsanga Israeloca echántsanyëna.

Chíyeca tsëngaftangbe pueblo ndoñe nyë batsá uámana pueblo quenátsmëna ca.

<sup>7</sup> Chora Herodes iytëcana chë maguënga tojánachembo y cuedádoca tojanatjá ntseco ora chë estrella tmojáninyama.

<sup>8</sup> Herodes chë soyënga yojtsetátšëmbo ora, Belenoye chë maguënga tojanichamó, y mëntsá tojanëyana: “Choye motsajna y tsabá chë šešona šmochjánguango. Chašmojínëna ora, šmochjabëuenaye, as átsnaca chayobená jama chë šešona jadórama ca.”

<sup>9</sup> Rey Herodes chë soyënga tojánëyanentsana, chë maguënga tmojtsatanoñe. Chora cachiñe tmojtandinë chë chëngbe luarëngoca tmojáninye estrella y yojtsanebnatsana chë šešona yojtsemnëntscoñe. Chentša juatsbuacá chë estrella yojójayiye.

<sup>10</sup> Chë maguënga chë estrella tmojáninye orna, corente oyejuayënga imojtsemna.

<sup>11</sup> Chë yebnoye tmojánamashjna ora, chë šešona tmojáninye chabe mamá Maríaftaca. Chorna, tmojanoshamentšé y chë šešonatema tmojanadorá. Chora chëngbe cajontémënga tmojanëtsécaca y tmojanatštá castellano, inciense y canye botamana uanguëtse soye, mirra ca uabáiniye.

<sup>12</sup> Chentšana, mo canye otjenayoquëcá Bëngbe Bëtsá chë maguënga tojanabuayená rey Herodesbiajana ndoñe chamondesshëcuanama. As chënga chentšana inye benachëjana cachëngbe luarëngoye tmojésanshëcuana.

### *Egipto luaroye tmojtsanachá*

<sup>13</sup> Chë maguënga tmojtsatanoñe ora, otjénayoca José canye Bëngbe Bëtsabe ángelbioye tbojáninye y cha mëntsá tbojaninyana: “Motsbaná, chë šešonatema y chabe mamá mesëbiatše y Egiptoye motsachá. Herodes chë šešonatema bochanjánguango jtsóbama, chíyeca choca cochtsoquedañe atše chacbochjábuaenantscuana ca.”

<sup>14</sup> As José tojantsbaná, chë šešonatema y chabe mamá tojesanëbiatše y ibeta Egipto benache tojëftsanbocna.

<sup>15</sup> Y choca imojtsanomñe Herodes tojanóbanëntsacuana. Chca tojanopasá, cachcá chaotsemnama ntšamo Bëngbe Bëtsá chabe juabna oyebuambnayabiajana tojanayancá. Chë oyebuambnayá mëntsá tojánayana: “Egiptocana atšbe uaqiñá sënjanchembo ca.”

### *Herodes tojanmandá basetémënga jtsëbáyama*

<sup>16</sup> Chë maguënga tmojtsaningñema Herodes tojántatšëmbona ora, puerte tbojánetna, y tojanmandá lempe jtsëbáyama base boyabásetemënga uta uata bomnënga y cabá uta uata ndbomnënga, Belén y chë juachañe pueblënguentsënga. Uta uatama cha tojanjuabó, er uta uata yojtsemna chë maguënga chë estrella tmojáninyama.

<sup>17</sup> Ntšamo chë Bëngbe Bëtsabe juabna oyebuambnayá Jeremías tojanoyebuambacá, cachcá tojanochnëngo:

<sup>18</sup> Ramá ca uabaina pueblentše canye oyebuambnayana tmojanuena,

ngménaca ošachiyana y becá tsetšanánaca oyebuambnayana.

Raquel yojamna chabe básengbiama ošachiyiñe,

pero ndoñe yontseboše chamuatebiajuama,

chabe básenga ya obanënga causa ca —cha tojanábema.

<sup>19</sup> José cabá Egiptoca yojtsomñe ora, Herodes tojanóbana. Chentšana, otjénayoca José canye Bëngbe Bëtsabe ángelbioye tbojáninye y cha mëntsá tbojaninyana:

<sup>20</sup> “Motsbaná, chë šešonatema y chabe mamá mesëbiatše y Israeloye cochtá. Chë šešonatema jóbama bošënga ya obanënga montsemna ca.”

<sup>21</sup> As José tojantsbaná y chë šešonatema y chabe mamá Israel luaroye tojtésanëbiatše.

<sup>22</sup> Arquelao Judeoca yojanmánda chabe taitá Heródesbe cuentiñe, y José chca tojántatšëmbona orna, yojtsauatja choye jama. Pero otjénayoca Bëngbe Bëtsá Josébioye tbojanbuayená; chíyeca Josena Galilea ca uabaina luaroye tojána.

<sup>23</sup> Choye tojánashjango ora, José tojána canye pueblo Nazaret ca uabáinoye chentše joyéanama. Chca tojanochnëngo cachcá chaotsemnama ntšamo chë Bëngbe Bëtsabe juabna oyebuambnayënga tmojanayancá. Chënga tmojánayana: “Nazaretocá ca Jesús mochantsábobaina ca.”

### 3

#### *Juan chë Ubayaná entsanga yojanabuayiná (Mc 1.1-8; Lc 3.1-9, 15-17; Jn 1.19-28)*

<sup>1</sup> Chë tempo, Juan chë Ubayaná, entsanga ndoyena luaroye Judeoca tojánbocna, Bëngbe Bëtsabe soyëngama jábuayenama.

<sup>2</sup> Mëntšá cha yojanëtsësnaye: “Bëngbe Bëtsabe amëndayana ya echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná y Bëngbe Bëtsabe benache šmochtishache ca.”

<sup>3</sup> Juan yojamna canya ndabiama chë Bëngbe Bëtsabe juabna oyebuambnayá Isaías mëntšá tojánayana:

Entsanga ndoyena luaroca canya enduáyebuache:

“Bëngbe Utabná echanjabo ca;

mo nda canye benache tojtseprontacá canye uámana entsá jashjanguama, tšëngaftángnaca cachcá, Bëngbe Utabná jabama ainaniñe tšabe juabnëngaca šmochtseprontana ca” –cha tojánayana.

<sup>4</sup> Juanbe entsáyá inaupormana camellbe stjénasheca y bobache yojanasnana. Cha inasaye chapulinatémënga y tjoca tjouangbe méloye.

<sup>5</sup> Jerusalemoca entsanga, nýetsca Judea luarentša entsanga y chë Jordán ca uabaina béjaye béconana oyenënga imojánbocana Juan joyeunayama.

<sup>6</sup> Bëngbe Bëtsábioye chëngbe bacna soyëngama jaimpáda chentšana, Juan chë Jordán béjayañe chënga yojanëbáyana.

<sup>7</sup> Pero Juan tojáninýe ba fariseunga y saduceunga cha chaubáyama tmojánama. Chënga imojamna chë judiëngbeñe uánatsanënga Bëngbe Bëtsá ndoñe corente ntseyeunanama; as chora tojanéyana: “¡Mëtšcuaye entsanga! ¿Nda tcmënjáuyana chë echanjóshjango uabouana castigüentsana šmochjotsbocá ca?

<sup>8</sup> Bëngbe Bëtsábeñe ndegombre ošbuáchiyënga šmochtsemna, as chca chaotsinýna chë bacna soyënga amana tšëngaftanga ndegombre šmojtšajbanama.

<sup>9</sup> Y ndoñe šmattsejuabnaye cach tšëngaftangbiamna jayanama: ‘Abrahámbentšana entsanga fsëndmëna ca’. Er atše šcuayana, Bëngbe Bëtsá quem ndëtšbéngacnaca Abrahámbentšana entsanga nanjábiamna.

<sup>10</sup> Chë tatšná ya entsaprontana chë betiyeshënga tbëtëjëngocana jtse-shatëtsetšama. Ndaye betiye ndoñe tontseshajo, jtse-shatëtšana y iñoye jtse-shatëtšana. Tšëngaftangftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye.

<sup>11</sup> “Ndegombre, atšna béjayeca cbondubáyana Bëngbe Bëtsabe benache chašmuatishachama. Pero chë atšbe ústonoye echanjabá, atšbiamna más obenana bomná comna, y atše merecido taitatobuajoñe ni mo chabe shecochëtjonëshe jtšambañama. Chë chabe benache aíñe chamojtishachëngbiamna Bëngbe Bëtsá echanjama chë echanjabábeyeca, chë Uámana Espiritu chëngbe ainaniñe cháumashënguama. Pero chë benache ndoñe chamontishachëngbiamna, Bëngbe Bëtsá echanjama chë echanjabábeyeca, corente castigánënga chamotsemnama, mo iñeshequécá.

<sup>12</sup> Canye entsá chabe mëtštá cucuatšinë jiyëbana, chabe trigo jtšóbobemana y chë ndoserverna shácuanënga jtsejashtsësnana. Chabe trigo chë grano uaquëcjnaye tsañe jtšabuájua, y chë ndoserverna shácuanëngna iñoye jtse-shatëtšana. Cachcá, chë atšbe

ústonoye echanjabana, chë tšabe entšanga echanjúbuaja, y chë bacna entšangna canÿe iñeshiñe echantsacastígaye, y chë iñe ndocna te queochátsfsana ca” –cha tojanéyana.

*Juan, Jesúsbioye tbojanabaye*

*(Mc 1.9-11; Lc 3.21-22)*

<sup>13</sup> As Jesús, Galileocana tojána Jordán béjayoye, Juan yojtsemnoye, cha chabuábayama.

<sup>14</sup> Pero Juan ndoñe yontseboše Jesús juabáyama, y mēntšá tbojaniyana: –Atše šontsemna aca chašcuabaye, y ¿más atše aca cbochjuabaye ca?

<sup>15</sup> Chora Jesús tbojanjuá: –Morna chca chaotsemna. Entsemna lempe ntšamo Bēngbe Bētsá tojamandacá jobedésana ca.

As Juan yojouena Jesús juabáyama.

<sup>16</sup> Jesús ya uabainá yojtsemna ora, chë buyeshoicana tojtanshēbēbocna. Chorna Jesús tsbanánoye yojontješiye y tojáninÿe chë celoca atēfjniñe y chë Uámana Espíritu mo canÿe palomatemcá chábioye yojtsastjajuana.

<sup>17</sup> Chora celocana Bēngbe Bētsá mēntšá tojánayana: “Mua atšbe bonshana uaquiñá endmēna. Chabiamana corente sēntsoyejuá ca.”

## 4

*Jesús tojanobená Satanás jayēnjanama*

*(Mc 1.12-13; Lc 4.1-13)*

<sup>1</sup> Chentšana chë Uámana Espíritu entšanga ndoyena luaroye Jesús tbojanánatse, as Satanás chauábama cha jisháchichiyama.

<sup>2</sup> Chentše canta bnētsana te y canta bnētsana ibeta ntjascá tbojanjétana; chíyeca chora tbojaneshēntsena.

<sup>3</sup> As Satanás tbojanobobeconá y tbojaniyana: –Aca ndegombre Bēngbe Bētsabe Uaquiñá tcomnēse, momandá quem ndētsbenga tandēse chaobiamana ca.

<sup>4</sup> Pero Jesús tbojanjuá: –Bēngbe Bētsabe uabemana palabrēnguiñe mēntšá endayana: “Entšá nÿe tandēseca ndoñe vida ntsebomnana, sinó entšá endobena jtsiyenana lempe ntšamo Bēngbe Bētsá tojayancá tbojtseyeunanēse ca.”

<sup>5</sup> Chentšana Satanás, Jerusalén, chë uámana bēts pueblo ca uabáinoye Jesús tbojanánatse, y chë Bēngbe Bētsabe bēts yebnentse chë más tsbanánoca tbojanatsá.

<sup>6</sup> Chentše Satanás mēntšá tbojaniyana: –Aca ndegombre Bēngbe Bētsabe Uaquiñá tcomnēse, muentšana fshantsoye montsēnja, er Bēngbe Bētsabe uabemana palabrēnguiñe endayana:

Bēngbe Bētsá chabe angelēnga echanjichamuá, chacmotsinÿenama.

Chēnga buacuatšēngaca cmochanjishache, shecuatše ndētsbeñe ndocá chacondomama ca –cha tbojaniyana.

<sup>7</sup> Chora Jesús tbojanjuá: –Cach Bēngbe Bētsabe uabemana palabrēnguiñe mēntšá endayana: “Ndoñe matsbošana acbe Bētsá chë Utabná bacna soyēngama jacocheñguama ca.”

<sup>8</sup> Cabana, Satanás tbojanánatse canÿe bēts tjoye y betesco nÿetsca quem luarentša amēndayēngbenache y chentša nÿetsca uámana soyēnga Jesúsbioye tbojaninÿinÿé.

<sup>9</sup> As Satanás tbojaniyana: –Aca chacojoshēntsamentšé y chašcojadorase, lempe chë soyēnga cbochjatštaye ca.

<sup>10</sup> Y Jesús tbojanjuá: –¡Satanás, átšbentšana mojuaná! Bēngbe Bētsabe uabemana palabrēnguiñe mēntšá endayana: “Bēngbe Bētsá cochtsadorana y nÿe cha cochtseservena ca.”

<sup>11</sup> As Satanás cachcá tbojanonÿá. Cachora Bēngbe Bētsábicocana angelotémēnga tmojánabo Jesús jtseeservénama.

*Jesús tojanontšé Galileoca chabe trabajo jamana*

*(Mc 1.14-15; Lc 4.14-15)*



<sup>12</sup> Juan chë Ubayaná cárceloye tmojanëtámíama Jesús tojanuena ora, Galilea luaroye cha tojtaná.

<sup>13</sup> Pero ndoñe tonjanoquedá Nazaret pueblentse, sinó Capernaumoca, uafjajónaye tsachañe; choye tojána joyénanama, chë uámana bëts taitata Zabulón y Neftalibe luariñe.

<sup>14</sup> Chca tojanochnëngo, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Isaías tojánayana:

<sup>15</sup> Zabulón y Neftalibe luare, Jordán béjaye chenguánoica, uafjajónaye tsachañe; Galilea luariñe, ndoñe judío entsanga oyenentse.

<sup>16</sup> Chë mo ibetiñe cuaftsiyencá imojoyena entsanga, Bëngbe Bëtsabe soyënga nduabuatma causa, tmojinÿe canÿa entsangbe juabnënga binÿnayá.

Chë chëngbe juabnënga binÿnayá entsebuashinÿinÿana chë Bëngbe Bëtsábíoye nduabu-atmëngbiama,

y chë causa chabiama imomna mo obanëngcá, ndoñe binÿniñe jtsiyenëse ca –cha tojanábema.

<sup>17</sup> Cach orscana Jesús tojanontsé entsanga jábuayenama: “Bëngbe Bëtsabe amëndayana ya echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná ca.”

*Jesús tojánachembo canta boyabásenga beonga ashebuánayënga cha chamuastama (Mc 1.16-20; Lc 5.1-11)*

<sup>18</sup> Canÿe te, Jesús chë Galilea uafjajónaye tsachajana yojsaye y ndeolpe uta boyabásata tojanÿe: canÿa yojamna Simón, chë Pedro cánaca uabainá, y chabe uabentsá Andrés. Chatna atarraiëshangá ibnetsashbuétsetšañe, er beonga ashebuánayata ibnamna.

<sup>19</sup> Jesús tojanëyana: “Atšeftaca mabata; atše cbochanjábíama Bëngbe Bëtsabiama entsanga anguayata, y morscana nÿe beonga ashebuánayata ya ndoñe quešochátsmëna ca.”

<sup>20</sup> Cachora chatbe atarraiëshangá cachcá tbojésanaboshjuana y Jesús tmojanasto.

<sup>21</sup> Y más chcoye, Jesús inÿe uta catsátata tojánanÿe: Santiago y Juan, chë Zebe-deobe uaquiñata. Chata ibojtsomñe canÿe barquëshañe, chatbe taitáftaca, chëngbe atarraiëshangá atapórmayñe. Jesús tojánachembo,

<sup>22</sup> y cachora chë barquëshá tbojésanaboshjona, chë taitá cachentse imojéseboshjona y Jesús tmojanasto.

*Jesús ba entsanga yojanabuatambá y yojánashnaye (Lc 6.17-19)*

<sup>23</sup> Jesús nÿets Galilea luarëjana yojánana, chentse judiëngbe enefjuana yebnënguenache abuátambaye. Chë tšabe noticiënga Bëngbe Bëtsabe amëndayama entsanga yojanabuayiná y nÿetsca šocanëngama y tsetšanëngama yojánashnaye.

<sup>24</sup> Nÿets Siria luarëjana entsanga cha imojtsebáyana. As entsanga nÿetsca šocana bomnënga Jesúsbiyoye imojtsënachaye: šoquënga y tsetšanana bomnënga, bacna bayëjbe juabna uambayënga, ataque osháchichanënga y jama ndobenënga. Jesús nÿetscanga yojánashnaye.

<sup>25</sup> Mallajta entsanga Galileocana, Decápolis luarocana, Jerusalenocana, Judeocana y chë Jordán béjaye chenguanoicana Jesús imojústona.

## 5

*Ndayá Jesús tjoca tojanabuatambá*

<sup>1</sup> Jesús chë mallajta entsanga tojánanÿe ora, batsjoye tojántsjua y tojanótbema. Chabe ústonënga tmojanobobeconá y

<sup>2</sup> Jesús tojanontsé mëntšá jabuátambana:

*Ndëmuanyënga imomna chë ndegombre oyejuayana bomnënga  
(Lc 6.20-23)*

<sup>3</sup> “Puerte oyejuayënga mochántsemna chë Bëngbe Bëtsabe soyënga tša imuajaboto ca juabnayënga. Chca entsanga mochántsemna chë Bëngbe Bëtsabe amëndayoca mochtsiyenënga.

<sup>4</sup> “Puerte oyejuayënga mochántsemna chë mondbétsošachiyënga; chënga Bëngbe Bëtsá entsëjabuáchana ngménaca ndoñe chamondëtsemnama.

<sup>5</sup> “Puerte oyejuayënga mochántsemna chë uámanënga ndoñe mondbétsenobiamnayënga, er chënga mo chëngbe otocana soycá quem luare mochanjójyëngacñe.

<sup>6</sup> “Puerte oyejuayënga mochántsemna chë nyetsca soyënguiñe tšabá jamama bošënga. Chëngbe bošana entsemna mo chë oshëntsiyá y uajuendayabe bošancá. Chë nyetsca soyënguiñe tšabá jamama bošënga mochanjobenaye jëftsinýana lempe ntšamo tmojtsebošcá.

<sup>7</sup> “Puerte oyejuayënga mochántsemna chë ínýengbiamna ongmiayënga, er Bëngbe Bëtsá chëngbiamna bochanjóngmia.

<sup>8</sup> “Puerte oyejuayënga mochántsemna chë nye tšabe juabnënga ainaniñe bomnënga; chënga Bëngbe Bëtsá mochanjinýe.

<sup>9</sup> “Puerte oyejuayënga mochántsemna chë nyetscanga natjëmbana chamotsiyenama amënga, er chënga Bëngbe Bëtsabe básenga ca mochantsabaina.

<sup>10</sup> “Puerte oyejuayënga mochántsemna chë ínýenga tmojama chamotsesufrínënga, ntšamo Bëngbe Bëtsá yobošcá bétsamama; chca entsanga mochántsemna chë Bëngbe Bëtsabe amëndayoca mochtsiyenënga.

<sup>11</sup> “Puerte oyejuayënga tšëngaftanga šmochtsemna, entsanga chacmojoyánguango y chacmojtšécamena ora y nyetscna soyëngaca chacmojtšëbuayatsenaye ora, atšbe ústonënga bétsemnama.

<sup>12</sup> Móyejuanga, puerte móyejuanga, tšëngaftanga celoca becá šmochanjójyëngacñe. Er ntšamo entsanga tšëngaftanga cmécamena, cachcá chë Bëngbe Bëtsabe juabna oye-buambnayëngbioye, chë tšëngaftangbe natsana monjaniyenëngbioye entsanga mon-janécamena ca” —Jesús tojánayana.

*Ošbuáchiyënga jtsemnana mo tamocá y binýnayënga quem luarentša entsangbiamna  
(Mc 9.50; Lc 14.34-35)*

<sup>13</sup> “Tšëngaftanga, quem luarentša entsanga jtsëjabuáchanëse šmojtсийena, Bëngbe Bëtsabe soyënga chamotsetatšëmbuama, as chëngbiamna šmochántsemna mo chë mëntšena ndoñe chaondóndbemama tcojatboto tamocá. Pero chë tamó fténana tojtšóbemëse, ndoñe ntsopodénana tempcá sanana cachiñe jtëtsmënanana. Chca, ya tondayama ntsoservénana; chíyeca chë tamó tsáshenoye jtsëtšenanana y entsanga jtsebotájayana.

<sup>14</sup> “Tšëngaftanga, ntšamo tšabá yomncá šmojtсийenëse, as quem luarentša entsangbiamna šmochántsemna mo chë ibetiñe tojtsebínýna soycá. Canýe bëts pueblo batsjo juatsbuañe tomnëse, ndoñe ntsopodénana iytëmencá jtsemnama.

<sup>15</sup> Canýe uajuinýanëshá tcojuajuinýena ora, ndoñe cajonëshe tajsoye jtsabuájjuama, sinó tsbanánoca juajájuama, chca, nyetsca entsanga chë yebnentše tmojtsemnëngbiamna chaotsebínýnama.

<sup>16</sup> Cachcá tšëngaftanga, entsangbe delante mo binýnayëngcá šmochtsemna, as chënga tšëngaftanga tšabe soyënga šmuamama chamuinýama, y chca, chënga chamuinýanyé chë Taitá, Bëngbe Bëtsá celoca endmëná, corente uamaná y obená bétsemnama ca” —Jesús tojánayana.

*Chë Moisesbe leyama Jesús tojanabatambá*

<sup>17</sup> “Ndoñe šmattsejuabnaye, ntšamo Moisesbe leyiñe iuayancá y chë Bëngbe Bëtsabe juabna oyebuambnayënga tmojanayancá jabétsepochocama atše tijabo ca. Atše ndoñe

chiyátabo chë soyënga jabétsepochochama, sinó jabábuayenama ndayá chë soyënga ndegombre bétsayanama.

<sup>18</sup> Ndegombre šcuayana: Celoca y quem luare chaojëftsemnëntscuana, ndocná queochatobenaye ni canýe punto, ni canýe letra chë leyënguentsana jtsejuánana, lempe ntšamo jochnënguama yomncá chaojtsemnëntscuana.

<sup>19</sup> Chíyeca, nda nýe mo canýe mando chë leyënguñe ndoñe tonjoyeuná cha, masque nýe base soye chë mando tojtsemna, y chë ínýenga cachcá tojtsabuatambá, cha Bëngbe Bëtsabe amëndayoca chë más nduamaná echántsemna. Pero ndëmuanýenga tmojt-sama ntšamo Bëngbe Bëtsá tojamëndacá y chë ínýenga cachcá chamotsamama tmojtsabuátabase, chënga Bëngbe Bëtsabe amëndayoca uámanënga mochántsemna.

<sup>20</sup> Chë soyëngamna mëntšá šcuayana: Tšëngaftanga chë ley abuatambayënga y fariseúngbioye ndoñe šmontsayënjanase, jtsamama ntšamo Bëngbe Bëtsá tcmojamëndacá, ndocna te Bëngbe Bëtsabe amëndayoye quešmochátamashjna.

### *Ndayá chë ínýengaftaca tbojetnama Jesús tojanabuatambá*

<sup>21</sup> “Tšëngaftanga šmojouena ntšamo Bëngbe Bëtsá tšëngaftangbe bëts taitanga tojanamëndacá: ‘Ndoñe catjóba ca. Chca ochjajnyá bontsemna jobuambayana chë entsangbiamama tšabá o ndoñe tšabá tmonjamama endbayanabe delante, ndáyeca chca ca.’

<sup>22</sup> Pero atše šcuayana, nda cachabe catsátaftaca tbojetna, chánaca bontsemna jobuambayana chë entsangbiamama tšabá o ndoñe tšabá tmonjamama endbayanabe delante, ndáyeca chca ca. Nda cachabe catsátbioye puerte tbojtsáboyënja, cha bontsemna chë Sanedrín ca uabaina mándayëngbe delante jobuambayana ndáyeca chca ca; y nda cachabe catsatbiamama opjema ca tojayana, ntšamo cha bétsamama, cha bontsemna chë infiernoca íñeshoye jama.

<sup>23</sup> “Chíyeca, nderado ndayá Bëngbe Bëtsabe bëts yebnoye tcojuamba Bëngbe Bëtsá jëtschuayama y chora tcojenojuabó acbe catsata ácaftaca etonaná yojtsemna ca,

<sup>24</sup> as chë tcojiyëbo soye chë altarentša natsanoica cochjéseboshjona, cochtá y acbe catsátaftaca cochtenoyántsia. Chentšana cocayé altaroye cochjá y chë tcojuamba sóyeca Bëngbe Bëtsá cochjëtschuaye.

<sup>25</sup> “Nderado nda tcmojademanda y cabildoye jotsánama cmojtsemna, cabá choye ndáshjango ora, betesco cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandado josticiëngbe cucuatšíñe cmochanjáboshjona y chënga cárceloye cmochanjutame.

<sup>26</sup> Ndegombre cbëyana: Chentšana ndoñe quecochtétsbocna lempe candesopagantscuana ca” —Jesús tojánayana.

### *Chë boyá o shémbioye ínýaftaca íngñayama Jesús tojanabuatambá*

<sup>27</sup> “Tšëngaftanga šmojouena ntšamo Bëngbe Bëtsá tojanmandacá: ‘Acbe boyá o acbe shémbioye ínýaftaca ndoñe catjaíngña.’

<sup>28</sup> Pero atše cbëyana: Nderado canýe boyabása ndëmuanýe shembásabioye tbojinýe y tojajuabó ‘malaye cha ca’, chë boyabása chca tojajuabose, ainanoca ya chë ínýe shembásaftaca cachabe shémbioye tbojtseingñé.

<sup>29</sup> “Chíyeca, nderado acbe catsábioica bomínýeca bacna soye tcojinýe y cachca soye tcojamëse, más tšabá nántsemna chë bomínýe cochtsenobuchjatsëca y cochtsëtšena. Nýets cuerpo jtsebomnana y lémpca infiernoye jama chacmotsëtšenamna, acbiamama más tšabá nántsemna nýe canýe soye acbe cuerpentsana chacoperdé.

<sup>30</sup> Nderado acbe catsábioica cucuatšëca bacna soye tcojamëse, más tšabá nántsemna chë cucuatšë cochtsenástjango y cochtsëtšena. Nýets cuerpo jtsebomnana y lémpca infiernoye chacmotsëtšenamna, acbiamama más tšabá nántsemna nýe canýe soye acbe cuerpentsana chacoperdé ca” —Jesús tojánayana.

*Chë bouamnata enëtšanama Jesús tojanabuatambá*  
(Mt 19.9; Mc 10.11-12; Lc 16.18)

<sup>31</sup> “Mëntšánaca leyiñe enduábemana: ‘Ndëmuanÿe boyá chabe shémaftaca tbojt-senëtšena, chë boyá bontsemna chabe shema canÿe tsbuanácha juiiyana, ndayëchañe chaotsayana cha ya ndoñe chabe shema yontsemna ca.’

<sup>32</sup> Pero atše cbëyana: Nda chabe shémaftaca tbojt-senëtšena y chca tojopasá ndoñe chë shema ínÿaftaca tbontseingñé causa, as chë boyá jtsamana cha chabotseingñema, chë shema ínÿaftaca tojtóbouamase. Y nda chë útšena shémaftaca tojtobouamá, chana canÿe uabuatmá jtsebomnana, y chca, chë tsëm boyánaca canÿe bacna soye jamana ca” —Jesús tojánayana.

*Chë entsanga júrayama Jesús tojanabuatambá*

<sup>33</sup> “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado tcojyana: De Dios chë soye chanjama ca; ojal chë soye ndoñe catjama ca.’

<sup>34</sup> Pero atše cbëyana: Tondayama šmattsejúraye; ni celocama, er chocha Bëngbe Bëtsabe tbemaniñe endmëna.

<sup>35</sup> Ni quem luarama, er Bëngbe Bëtsabiana mo tšenëtemcá endmëna, chiñe chabe shecuatsënga jacjayama; ni Jerusalenama, er chë pueblo endmëna Bëngbe Bëtsá chë Bëts Reybe bëts pueblo.

<sup>36</sup> Ni tšëngaftangbe bestšašama cach ndoñe, er tšëngaftanga ndoñe quešmátobena ni mo canÿe stjénashe ftsenguëshe o fjantsëshe jabemana.

<sup>37</sup> Tšëngaftanga aíñe ca jayanama šmojtsebošëse, nÿe aíñe ca šmochjayana, y ndoñe casna nÿe ndoñe. Ndayá chentšana más šmojatichamo soye, Satanásbiocana jtsóbocanana ca” —Jesús tojánayana.

*Chë entsanga mondbátenachnënguama Jesús tojanabuatambá*  
(Lc 6.29-30)

<sup>38</sup> “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado nda tcmojtsebuchjatsëca, ácnaca derecho contsebomna canÿebé cha jëtsbuchjatsëcama ca; y nderado nda canÿe juatsaše tcmojtsásiye, ácnaca derecho contsebomna cánÿëše cha jtašiyama ca.’

<sup>39</sup> Pero atše cbëyana: Ndoñe matsbošana chë ndayánaca tcmojaborlábioye jtachnënguama; chamna, ndánaca catsbioica tcmojajuebjantšetase, cochjomiye chë ínÿoica cachcá chacmomama.

<sup>40</sup> Nderado nda tcmojademanda y tojtseboše acbe shabuanguanëjua jtsabocñama, cha molesenciá acbe quëfsaiyanaca chauetsácñama.

<sup>41</sup> Nderado nda tcmojuasmá y tcmojamanda bnëtsana cuadroca juyambama, inÿe bnëtsana cuadro cochjuyamba.

<sup>42</sup> Nda ndaye soye tcmojotjañëse, cochjatštaye; y nda ndaye soye tcmojuátjase, cha ndoñe stëtšoye catjaquéda ca” —Jesús tojánayana.

*Chë uayayëngbiana bonshánana jtsebomnana*  
(Lc 6.27-28, 32-36)

<sup>43</sup> “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Acbe amigo cochtsebobonshana y acbe uayayá cochtsaboyënja ca.’

<sup>44</sup> Pero atše cbëyana: Tšëngaftangbe uayayënga šmochtsababuánÿeshana, y chë cmëcamenëngbiana Bëngbe Bëtsá šmochtseimpadana.

<sup>45</sup> Chca tšëngaftanga, chë Taitá, Bëngbe Bëtsá, chë celoca endmënabe básenga šmochántsemna; Bëngbe Bëtsá endbétsama tsabe y bacna entsángbeñe chabe shinÿe chaotsebinÿayama, y endbétsama chë nÿetsca soyënguiñe tsabá jamama bošënga y ndoñe chca entsángbeñe chauaftema.

<sup>46</sup> Tšëngaftanga nÿe chë tšëngaftanga tcmojtsababuánÿeshanënga šmojtsababuánÿeshanëse, ¿Bëngbe Bëtsábiocana ndayá šmochjuacaná? Romocama crocénana entšángbioye atjanayëngnaca chca monduamana.

<sup>47</sup> Y nÿe chë amiguëngbioye šmojtsacheuanase, ¿ndaye bëts soye šmojtsama? Chë ndoñe judiëngnaca chca mondbëtsama.

<sup>48</sup> Tšëngaftangbe Taitá, Bëngbe Bëtsá celoca endmëná, nÿetsca tšabe soyënga bomná y amá endmëna. Tšëngaftángnaca cachcá šmochtsemna ca” —Jesús tojánayana.

## 6

### *Jesús tojanabuatambá ntšamo tšabe soyënga ínÿengbiamana jamana*

<sup>1</sup> “Cuedado šmochtsebomna ndoñe ntsamama entšángbeñe tšëngaftangbe tšabe soyënga, nÿe chënga chca chamuinÿama. Chca šmojamëse, tšëngaftangbe Taitá, Bëngbe Bëtsá, celoca endmëná ndocna uacanana soye quecmochtétatšataye.

<sup>2</sup> “Chcasna, nderado nda caridá tcojábemëse, chca ndoñe šmatjama chë ntšamo šmojtsamama nÿetscanga chamotsetatšëmbuama, mo canÿe trompetëfjua cuaftsajatëtancá, chë caridá šmojábemama chaotsótatšëmbuama; chca monduamana chë bacna entšanga chë ntšamo ndegombre tmojuabnacá ndinÿinÿayënga, chë judiëngbe enefjuana yebnënguenache y tsáshenañe. Ndegombre cbëyana, chë chca amënga ya chëngbe uacanana soye tmojóyëngacñe, ntšamo chënga tmojamama entšanga tšabá chëngbiamana tmojtsoyebuambná ora.

<sup>3</sup> Chcasna, nda caridá tcojábema ora, ndocná más chaondëtsetatšëmbo, mo chë uañicuayoica cucuatše ndoñe queondbatstatšëmbcá ndayá chë catšbioica cucuatše tojtšamama,

<sup>4</sup> chca, acbe caridá iytëcana chaotsemnama. As, tšëngaftangbe Taitá, nda bominÿe endbëtsequëcjnaye chë iytëmencá tcojtsama soye, acbe uacanana soye cmochántatštaye ca” —Jesús tojánayana.

### *Jesús tojanabuatambá ntšamo Bëngbe Bëtsáftaca jencuéntana*

*(Lc 11.2-4)*

<sup>5</sup> “Bëngbe Bëtsáftaca šmojtsencuénta ora, ndoñe šmattsama chë bacna entšanga ntšamo ndegombre tmojuabnacá ndinÿinÿayëngcá. Chënga corente jtsogusetánana chë judiëngbe enefjuana yebnënguenache tsanana y tsashená tsëntsaca Bëngbe Bëtsáftaca jtsencuéntayana, chca, nÿe entšanga chë soye chamuinÿama. Ndegombre šcuayana: chënga nÿe morscama ya montsábouacanana, chënga tšabá imojtsama ca entšanga tmojayana ora.

<sup>6</sup> Pero aca Bëngbe Bëtsáftaca jencuéntama orna, acbe tsoye cochtamáshëngo, bësáša cochtatame y cháftaca cochjencuénta. Chánaca chë iytëmenentše ácaftaca echántsemna. Bëngbe Taitá lempe bominÿe endetsequëcjná, masque cánÿënga šmojtsemna ora šmojtsama soyëngnaca. As Bëngbe Bëtsá, chca cháftaca chacojtsencuénta ora, cachá acbe uacanana soye cmochántatštaye.

<sup>7</sup> “Bëngbe Bëtsáftaca šmojtsencuénta ora, ndoñe nÿe cachcá ndoservena palabrënga ba soye šmattsichamo. Chca mondbëtsama chë Bëngbe Bëtsábioye nduabuátmënga. Chënga jtsejuabnayana becá chca tmojtsichámëсна, Bëngbe Bëtsá chënga más yochjóyaunaye ca.

<sup>8</sup> Ndoñe chëngcá šmattsemna. Cabá nduyana ora, Bëngbe Bëtsá ya jtsetatšëmbuana ntšamo tšëngaftanga cmojtsëjbotcá.

<sup>9</sup> Chamna tšëngaftanga mëntšá cmontsétocana Bëngbe Bëtsáftaca jencuéntana:

Bëngbe Taitá, celoca icotsomñe.

Acbe uabaina chë más uámana uabainana chauesomñe.

<sup>10</sup> Acbe amëndayana chaóshjango.

Celoca yojtsemna ntšamo icobošcá;

quem luaríñnaca cachcá chaotsemna.

11 Mënté šmiyatšatá cada te šnetsëjaboto tandëse.

12 Bacna soyënga bënga fsënjama: šmotsaperdónaye; cachcá ntšamo chë bëngbiamana bacna soyënga amënga fsëndbetsaperdonaycá.

13 Bacna soyënga jamama šojocochëngo ora, šcochjubahuache chca ndenobuíyama. Nÿetsca bacna soyënguentshana šmatsebacaye.

14 “Chë tšëngaftangbiamana bacna soyënga amënga šmojtsaperdónasna, Bëngbe Taitá chë celoca endëtsomñá, tšëngaftanga cmochanjáperdonaye.

15 Pero chë tšëngaftangbiamana bacna soyënga amënga ndoñe šmotsaperdónasna, Bëngbe Taitá cachcá, tšëngaftanga ndoñe quecmochátaperdonaye ca” —Jesús tojánayana.

### *Chë Bëngbe Bëtsáftaca jencuéntama tondaye ntjascá*

16 “Y nderado tšëngaftanga inÿe ora tondaye ntjascá šmojtsemna Bëngbe Bëtsáftaca jencuéntama, juebëngménënga ndoñe šmattsemna, ntšamo chë bacna entsanga chë ndegombre tmojuabnacá ndinÿinÿnayënga mondbetsamcá, as chca, chënga imojtsayúnama entsanga chamuinÿama. Ndegombre šcuayana, chëngbe uacanana soye ya tmojóyëngacñe, chënga tmojayunáyeca entsanga tšabá chëngbiamana tmojtsoyebuambná ora.

17 Aca nderado tcojtsayúna ora, cochtsojuebjabebiyey y aceitíyeca botamana cochtenochquëca,

18 as chca, entsanga ndoñe chamondëtsetatšëmbo aca tondaye ntjascá cojtsemnama. Nÿe acbe Taitá, lempe chë mo iytëmencá yomna soyëngama tatsëmbuá, chama echántsetatšëmbo. Y cha, chë iytëmencá tcojama soye bominÿe endbetsequëcjnyá, acbe uacanana soye cmochántatštaye ca” —Jesús tojánayana.

### *Chë celoca bomnana (Lc 12.33-34)*

19 “Bomnana quem luarentše ndoñe šmattsëjuabayey. Muentšna chë mejojón y inÿe pochócayey soyënga lempe jtsendbiamana, chë atbëbanënga jtsamashjnana y chë juabana soyënga jesatbëbana.

20 Más tšabá tšëngaftangbiamana entsemna, mora quem luarentše tšabe soyënga šmojtsamamna, uacanana soyënga celoca chaotsójuabayey. Chentše ni chë mejojón, ni chë inÿe pochócayey soyënga acbe soyënga quemochatspochóca, ni atbëbanënga quemochátamashjna jatbëbama.

21 Er chë ndayentše acbe bomnana tojtsemnentša soyëngama acbe ainánaca cochántsejuabnaye ca” —Jesús tojánayana.

### *Chë cuerpama uajuinÿanësha (Lc 11.34-36)*

22-23 “Acbe bominÿe tšabá totsomñëse, mo canÿe uajuinÿanëshacá acbe cuerpama jtsemnana, chíyeca aca jtsobenana ntšamo tcojtsamcá chë bominÿyeca jtsönÿayana. Chë bominÿe ndoñe tšabá tontsemnësna, chë bominÿe tondaye ntsoobenana jamana, ntšamo tcojtsamcá chacobená jinÿama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnësna, lempe ntšamo chacojtsamcá ndoñe tšabá queochátsmëna. Y chca, aca cochantsiyena soyënga jtsamëse mo puerte ibetiñcá ca” —Jesús tojánayana.

### *Chë Bëngbe Bëtsabiamana bonshánana o chë nÿe quem luarentša soyënga jtsebošana (Lc 16.13)*

24 “Ndocná ntsoobenana uta mandayata jtsaservénana: cánÿabioyey bochantsáboyënja y chë inÿabioyna bochántsebobonshana, o cánÿabiamana tšabá echántsetrabajayey y chë inÿabiamna ndoñe tšabá. Ndoñe quecátobena Bëngbe Bëtsá jtsebobonshánana, nÿe quem luarentša soyënga jtsebomnana yapa tcojtsebošëse ca” —Jesús tojánayana.

*Bëngbe Bëtsá chabe básenga jtsanÿenana  
(Lc 12.22-31)*

<sup>25</sup> “Chcasna atše šcuayana: Ndoñe šmattsenócochinÿena ndayá šmochjase o šmochjofsiye vida jtsebomnama, ni ndaye entšayá šmochjuíchëtjuama cach ndoñe. Ndegombre, vida chë sanama más enduámana y cuerpo chë entšayama más.

<sup>26</sup> Smochjanÿe chë shloftšënga jtsongüefjnayana. Chënga tondaye ntjájena, ni jaja saná ntjátbanana, ni chë grano uaquëcjnaye yebnënguiñe quemnatsquëcjná; pero Bëngbe Bëtsá, celoca endmëná, chënga saná jtsatšatnayana. ¡Y tšëngaftanga chë shloftšetëmëngbiama puerte más šmondúamana!

<sup>27</sup> Masque chca endmëna, canÿa masque tša tojtsenócochinÿena, ¿ntšamo nanjobenaye jamana chë ntsachetšá vida yochtsebomnentšana, canÿe hora vida más jabotiyana?

<sup>28</sup> “Y ndayá šmochjuíchëtjuama, ¿ndáyeca šmojtsenócochinÿena? Smochjinÿe chë jajañe lirio uantšefjushangá jtsajuajnana: ndoñe ntsetrabájayana, ni ntshabiannayana.

<sup>29</sup> Pero atše cbëyana, ndegombre ni mo Rey Salomón nÿetsca chabe bomnánaca nÿetšá botamana mo chë lirio uantšefjushangacá quenjatspormana.

<sup>30</sup> Bëngbe Bëtsá tša botamana shácuana tojuama, y chë shácuana mënté jajoca jtsam-nana, yëfsana iñoca. Chca chë shácuana cha tojamëse, ndegombre tšëngaftangbiámnaca Bëngbe Bëtsá echanjama entšayá chašmotsábomnama, ¡entšanga nÿe batšá Bëngbe Bëtsábeñe ošbuáchiyënga!

<sup>31</sup> Ndoñe šmattsenócochinÿena, mëntšá jtsichámëse: ‘¿Ndayá mochjase?’ o ‘¿Ndayá mochjofsiye?’ o ‘¿Ndayá mochtichëtjo ca?’

<sup>32</sup> Chë soyëngama, chë Bëngbe Bëtsábioye nduabuátmënga mondbétsenocochinÿena, pero tšëngaftanga ndoñe. Tšëngaftangbe Taitá, Bëngbe Bëtsá, ndayá cmojtsëjabotama endétatšëmbo.

<sup>33</sup> Chíyeca, tšëngaftangna natsana šmochjshétseboše Bëngbe Bëtsá tšëngaftangbe ainaniñe chaotsemándama y lempe ntšamo cha tojamandacá šmochtsama. Chca šmojamëse, Bëngbe Bëtsá lempe ntšamo cmojtsëjabotcá cmochanjátšataye.

<sup>34</sup> Ndoñe matenócochinÿenana ndayá yëfse yochjochnënguama. Yëfse luare cochántsebomna chë soyënga jinÿama y jamama. Cada tescama endbétsemna yapa totcá soyënga jájandmanama ca” —Jesús tojánayana.

## 7

*Ndoñe ntsichámuana chë ínÿenga tšabá o ndoñe tšabá tmonjamama  
(Lc 6.37-38, 41-42)*

<sup>1</sup> “Ndocá ínÿengbiama šmattsichamo chë ndoñe tšabá tmontsamama. Chca, Bëngbe Bëtsá ndoñe queochátichamo tšëngaftanga ndoñe tšabá šmonjama ca.

<sup>2</sup> Chë ntšamo tšëngaftanga ínÿengbiama šmojtsichamcá tšabá o ndoñe tšabá tmontsamama, cachcá Bëngbe Bëtsá tšëngaftangbiama chë ntšamo šmojamama echántichamo. Y ntšamo ínÿengbioye chašmojábiamama, uabouana o ndoñe jabuache soyënga, cachcá Bëngbe Bëtsá tšëngaftangbioye cmochanjábiamama.

<sup>3-5</sup> “Nderado canÿa chabe bominÿiñe canÿe niñëfja tojtsebomnëse, cha ndoñe ntsoebenana chabe catšata jauyanama: ‘Acbe bominÿentšana canÿe polvështema jtsebuchjátsëcama šmolesenciá ca’. Natsana cha bontsemna cachabe bominÿentšana chë niñëfja jtsenobuchjátsëcana tšabá jinÿama jobenayama, chabe catšatbe bominÿentša polvështema jtsebuchjátsëcama. Cachcá entsemna acbiama, ¡bacna entšá chë ntšamo ndegombre tcojuabnacá ndinÿinÿnayá!, chë tša bacna soye cojtsama ca acbe catšata tcojauyana ora, cach aca tša bëts bacna soyënga cojtsamama ntjenuabuoycá; y chca, aca jamana canÿe bacna soye. Natsana cmontsemna chë cach aca ndoñe tšabe soyënga cojtsamama ngmënacá jshatenójuaboyana y chca amana jtsajbanana, y chentšana cocayé cochantsobena acbe catšata juajabuáchana ntšamo tšabá yomncá chaotsamama.

6 “Chë Bëngbe Bëtsabe soyëngama josértama ndëboše entsanga ndoñe šmattsabuayiynaye. Aíñese nántsemna mo chë Bëngbe Bëtsabe bëts yebnoca uátšëmbona mëntsena quešënga cuaftsëbuajocá; chorna chënga jobuértanana, jobotjajuana y jtsáshantsana. O mo chë uámana ndëtsëtëmënga cotsëngbioye cuaftsëtšancá, chënga nÿe jtsebotájayana ca” —Jesús tojánayana.

*Smochjotjañe, smochjáanguango y smochjachembo*  
(Lc 11.9-13; 6.31)

7 “Smochjotjañe y Bëngbe Bëtsá cmochanjátšataye; smochjáanguango y smochanjínÿena; smochjachembo y bëšáša cmochanjébëtafjo.

8 Er ndánaca tojtsotjanañá, jóyëngacñana; y nda tojtsenguá cha, jónÿenana; y nda tojtsechembuanábioye jebiatëfjuana.

9 “¿Ndëmuanÿe boyabása tšëngaftanguentsá, canÿe tandëse chabe uaquiñá tbojtsotjanañe ora, canÿe ndëtšbé chábioye buanjatštaye?

10 ¿O canÿe mëtscuaye buanjatštaye, beona tbojtsotjanañe ora?

11 Y chca, tšëngaftanga, bacna soye amënga, tšëngaftangbe basetëmënga tšabe soyënga jatšatayama šmojtsamanëse, ¡más tšëngaftangbe Taitá, Bëngbe Bëtsá celoca endmëná, chë tmojtsotjanañënga tšabe soyënga echanjátšataye!

12 “Inÿëngaftaca smochtsama ntšamo chë ínÿënga tšëngaftangaftaca chamotsamama smojtsebošcá. Chca endmëna ntšamo Moisesbe leyíne y chë Bëngbe Bëtsabe juabna oyebuambnayëngbe buatëmbana soyënguiñe endayancá ca” —Jesús tojánayana.

*Chë base utëntšá bëšáša*  
(Lc 13.24)

13 “Chë base utëntšá bëšásajana smochjámashjna. Chë utëntšá bëšásajana y chë paselo jóyënama benache, infiernoye cmochanjuánatse y banga chëjana mondámashjuana.

14 Chë tšabe vida binÿnoye jamna base utëntšá bëšásajana endmëna y ndoñe paselo jóyënama benache, y chiñe báseftanga mondbínÿena.

*Chë Bëngbe Bëtsabe ndoñe ndegombre juabna oyebuambnayënga*  
(Lc 6.43-44)

15 “Cuedado smochtsebonna chë Bëngbe Bëtsabe ndoñe ndegombre juabna oyebuambnayëngbiana. Chëngna mo oveshëngcá tšëngaftangbioye mochanjabo, pero ndegombre chënga mondmëna mo tšátjaye tjañe quešëngcá.

16 Tšëngaftanga betiyënga jtsabuátmana ntšamo cada ona tojtseshajcá; cachcá tšëngaftanga chcanga smochantsëbuátma, ndayá chënga mochtsamama. Uchmašëshe betiyentsana ndoñe uvas ntjuátabebiana, ni higuëbé cardo betiyentsana.

17 Chca, nÿetsca tšabe betiyíne tšabe soye jashájonana; y chë ndoñe tšabeshiñna podesca soye.

18 Canÿe tšabe betiyíne quenátopodena podesca soyënga jashájonana, ni canÿe ndoñe tšabe betiyíne tšabe soyënga jashájonana.

19 Ndaye betiye podesca shajuanëshe jtseshatëtšana y iñoye jtsatmetšana.

20 As chca tšëngaftanga chënga smochantsëbuátma, ndayá chënga mochtsamama ca” —Jesús tojánayana.

*Bëngbe Bëtsabe amëndayoye ndoñe nÿetscanga jamashjnana*  
(Lc 13.25-27)

21 “Ndoñe nÿetscanga chë ‘¡Utabná! ¡Utabná ca!’ atše smojtsatsëtšnanga, Bëngbe Bëtsabe amëndayoye quemochátamashjna. Nÿe ntšamo atšbe Taitá, celoca endmëná, tojtsebošcá amëngna aíñe.

22 Quem luare jopochócama te banga atše smochanjauyana: ‘¡Bëngbe Utabná! ¡Bëngbe Utabná! Aca jótšëmbonëse, ácbëñe betsošbuáchema, bënga fsëndoyebuambná, y ácbeyeca



bacna bayëjngbe juabna entsángbentsana fsëndëtabocana, y ácbeyeca bëts soyënga fsëndama ca.’

<sup>23</sup> Chora atse chanjójuaye: ‘Ndocna te checbaisëbuátmana. Atsbentsana mojuánanga, bacna soye ama entsanga ca’ ” —Jesús tojánayana.

*Chë uta ucuatjoniñe*

*(Mc 1.22; Lc 6.47-49)*

<sup>24</sup> “Chcasna, nda atse šojoyeuná y chë ntšamo sentsichamcá tojtsama, endmëna mo canye tšabá juabnaye boyabasacá. Chë boyabásana ndëtsbeñe chabe yebna yojajebo.

<sup>25</sup> Uaftena yojuáshjango, chë béjayënga yojóftjajna, chë yebnoye puerte yojtsebinýiaye, pero chë yebna ndoñe ntjuáshajayana, chë yebna ndëtsbeñe inajéboyeca.

<sup>26</sup> Pero nda atšbe palabra tojouena y ntšamo sentsichamcá ndoñe tontsama, endmëna mo canye ndëjuabnaye boyabasacá. Chë boyabásana chabe yebna cascajuiñe yojajebo.

<sup>27</sup> Uaftena yojuáshjango, chë béjayënga yojóftjajna, chë yebnoye puerte yojtsebinýiaye y chë yebna uabouancá yojtsáshajaye ca’ ” —Jesús tojánayana.

<sup>28</sup> Jesús chë soyënga jóyebuambayama tojanpochocá ora, chë entsanga ojnánënga imojtsemna ntšamo cha tojánabuatambama.

<sup>29</sup> Jesús tojanabuatambá nýets obenánaca, mo canya mando bomnacá y ndoñe nýe mo chë ley abuatambayëngcá.

## 8

*Jesús, canya bacna nguayanánaca šocábioye tbojanshná*

*(Mc 1.40-45; Lc 5.12-16)*

<sup>1</sup> Jesús tjoicana tojtantsmá ora, ba entsanga tmojanasto.

<sup>2</sup> Chora canye boyabása bacna nguayanánaca šocá Jesúsbioye tojanobeconá, chabe delante yojoshamentšiye y tbojanianyana: —Utabná, aca tcojtsebošëse, catjobenaye atšbe šocana jtsebojuánana ca.

<sup>3</sup> As Jesús tojanacuenyanëjaná, chë boyabásabioye tbojánbojajo y tbojanianyana: —Aíñe, sëntseboše. Socana cbotsebojuaná ca.

Y cachora chabe šocana tbojtsanóbojuanañe.

<sup>4</sup> Jesús chë shnanábioye tbojanianyana: —Mouena, ndocnábeñe cattsecuëntaye; nýe chë Jerusalemoca báchnëbioye motsa, y cha cochjinýinýiye mora aca ya tšabá cojtsatsmënama. Bayá cochtsambaye, Bëngbe Bëtsá chama jëtschuayama, ntšamo Moisés tojëftsanmandacá, as chca nýetscanga chamotatšëmbona mora aca ya ndoñe šocá contsemnama ca —Jesús tbojanianyana.

*Jesús canye Romano soldadëngbe amëndayabe bochichnayábioye tbojanshná*

*(Lc 7.1-10)*

<sup>5</sup> Jesús Capernaumoye tojánamashëngo ora, canye Romano soldadëngbe amëndayá Jesúsbioye tojanobeconá canye pavorama jaimpádama.

<sup>6</sup> Jesúsbioye tbojanianyana: —Utabná, atšbe bochichnayá yebnocá šocá entsemna, jama ndoñe quenátobena y jabuache tsetšanánaca entsobësná ca.

<sup>7</sup> Chora Jesús tbojanjuá: —Cha jáshnama chanjá ca.

<sup>8</sup> As chë soldadëngbe amëndayá tbojanianyana: —Señor, atšbe merecido taitsatobuañoñe atšbe yebnentšë chacuamashënguama; nýe mayana y atšbe bochichnayá tšabá echántsmëna.

<sup>9</sup> Atšbioye mándayënga atšë sëndábamna y átsnaca soldadëngbe amëndayá sëndmëna. Atšë canye soldado stjauyana “motsa ca”, cha cachora jana; y inya stjauyana “mabo ca”, cha cachora jabana; y nderado atšbe bochichnayá ndayánaca chaomama stjamánda, chánaca cachora chë soye jamana ca —cha tojánayana.

<sup>10</sup> Jesús chca tojanuena ora, tojanenjnaná y chë ústonënga tojanëyana: —Ndegombre cbëyana, ni mo nyets Israelentse ni canya quem boyabasacá Bëngbe Bëtsábeñe nyetsá ošbuachiyá chiyátinyena.

<sup>11</sup> Y šcuayana, shinje bocanoicana y shinje uenatjëmbambanoicana bëtscá entsanga mochanjabo, y Abraham, Isaac y Jacob, chë judiëngbe tempsca uámana bëtš taitángaftaca mochanjotbiama Bëngbe Bëtsabe amëndayoca, cányiñe juasama.

<sup>12</sup> Ba Israeloca entsanga, chë ndëmuanjengbiama Bëngbe Bëtsabe amëndayana natsana yochtsanmëna, chocana mochantëbuacana chë ndëbinýna luaroye, infernoye. Chentše puerte mochanjenóbošachna y chë tsetšanama juatsašënga mochantsenoftëšjojnaye ca —Jesús tojánayana.

<sup>13</sup> Chora Jesús chë soldadëngbe amëndayábioye tbojanianyana: —Acbe yebnoye motsatá y chë ntšamo cojtsošbuachecá cachcá chaotsemna ca.

Cachora chë bochichnayá tšabá yojtsatsmëna.

*Jesús, Pédrëbe uambén mamábioye tbojanshná*

*(Mc 1.29-31; Lc 4.38-39)*

<sup>14</sup> Chentšana Jesús, Pédrëbe yebnoye tojána. Chentše Pédrëbe uambén mamá šocá calentóraca yojtsejutsnajona.

<sup>15</sup> Chora Jesús chë uambén mamabe cucuatše tojánbojajo y cachora chë calentora tbojtsanóbojuanañe. Chorna chë uambén mamá tojtantsbaná y tojanontsé chënga jobuácuedana.

*Jesús ba šoquënga tojanashná*

*(Mc 1.32-34; Lc 4.40-41)*

<sup>16</sup> Chë te jaibétatama ora, Jesús yojtsemnoye banga bacna bayëjëngbe juabna uambaye entsanga tmojanënatse. Chora, nye canye Jesús jóyebuambayëse chë bacna bayëjënga imojtsaisëbocana y nyetsca šoquënga tojanashná.

<sup>17</sup> Chca Jesús tojanma, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana: “Cha bëngbe šocanënga tonjaftsanca y bëngbe nyetsca tsetšanana chábeñe tonjanoquedá ca.”

*Chë Jesús juastama bošënga*

*(Lc 9.57-62)*

<sup>18</sup> Jesús tojánanyë mallajta entsanga chabe šhéconana; as tojanmandá uafjajónaye chenguana jama.

<sup>19</sup> Chorna, canye ley abuatambayá Jesúsbioye tbojanobobeconá y tbojanianyana: —Buatëmbayá, atše sëntseboše aca juastama, ndëmoye chacojtsá choye ca.

<sup>20</sup> As Jesús tbojanianyana: —Chë zorrënga mondbomna cuevëshënga ndayentše jtsiyenama y chë shloftšëngna uajajonëshangá, pero chë Bëngbe Bëtsá Entšá tbojanbemá ndoñe quenátšbomna ndayentše jóchnama ca.

<sup>21</sup> Chora inya, cach uatsjendayënguentsá, Jesúsbioye tbojanianyana: —Bëngbe Utabná, šmolesenciá atšbe taitá chjšhesabotbontsañe ca.

<sup>22</sup> Chora Jesús tbojanjuá: —Nye šmasto. Chë Bëngbe Bëtsabiama mo obanëngcá, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsëtebuantsañe ca.

*Jesús chë binýia y chë béjaye bonguana yojëtsbema*

*(Mc 4.35-41; Lc 8.22-25)*

<sup>23</sup> Chentšana Jesús canye barquëshoye tojánamashëngo y chabe uatsjendayënga imojtsetjëmbambnaye.

<sup>24</sup> Ndeolpe tša jabuache binýia chë uafjajónaye béjayiñe yojóshjango; nyetsá jabuachana yojtsemna, chë olëshënga barquësha imojtsëtsbotsana. Y Jesús chora inétsomañe.

<sup>25</sup> As chabe uatsjédayënga tmojána Jesús jetsefšenama y tmojanianyana: —¿Bëngbe Utabná, šmatsebacá. Montsenatjémbambana ca!

<sup>26</sup> Chora Jesús tojanéyana: —¿Ndáyeca tša šmojtsauatja? ¿Tša batšatema šmojtsošbuaché, Bëngbe Bëtsá tšëngaftanga jujuabuáchama yobenama ca?

Chca tojanéyana y tojantsbaná. Chora tojanmandá chë binýia y chë búyeshe bonguana chaotsatsmënama, y lempe natjémbana yojtsatsmëna.

<sup>27</sup> Chabe uatsjédayënga ojanánënga imojtsemna y mëntsá imojtsichamo: “¿Nda quem boyabása yomna? Cha tonjayana y chë binýia y chë búyeshe tmonjoyeuná ca.”

*Chë Gadara luaroca entsata, bacna bayëjbe juabna uambayata*

*(Mc 5.1-20; Lc 8.26-39)*

<sup>28</sup> Jesús uafjónaye chenguana tojánashjango, canýe luare Gadara ca uabáinentše. Chorna chë utabuantsánëngbentsana útata, bayëjbe juabna uambayata, tbojánbocna y Jesúsbioye tbojanobobéconata. Puerte tšatjayata ibnamna, chíyeca entsanga ndoñe ntsobenana chëjana jtsachnějuanana;

<sup>29</sup> y chora tbojanontsé chë bacna bayëjëngbeyeca mëntsá uayebuáchana: —¿Ndayá bëngaftaca cojtseboše, Jesús, Bëngbe Bëtsabe Uaquiñá? ¿Moye tcojabo bënga chafsufrima, chama cabá ndoñe chë tempo yontsemna ora ca?

<sup>30</sup> Chentša béconana ba cotšënga imnajena y chënga imnëtsosañe.

<sup>31</sup> Y chë bayëjënga Jesús tmojanimpadá: —Muentšana jésebocanama aca tcojamëse, cochjama bënga chë cotšëngbeñe fchayamashjnama ca.

<sup>32</sup> Y Jesús tojanéyana: —Motsajna ca.

Chora chë bayëjënga chë boyabásatbentsana tmojésanbocana y chë cotšëngbeñe tmojánamashjna; cachora chë cotšënga batsjocana penëšëjana uafjónayoye imojtsosh-buetše y yojtsatajo.

<sup>33</sup> Chora chë cotšënga anýenënga tmojtsanacheta, y chë puebløye tmojánashjajna ora, tmojanontsé lempe ntšamo yojochnëngcá jacuéntana y ntšamo chë bayëjbe juabna uambayátaftaca tojanopasámnaca.

<sup>34</sup> Chora nýetsca entsanga chë pueblentsana tmojánbocana y Jesús yojtsemnoye tmojána. Chë entsanga Jesús tmojáninýe ora, tmojanimpadá chë luarentšana chauese-bocnama.

## 9

*Jesús, canýe jama ndobenábioye tbojanshná*

*(Mc 2.1-12; Lc 5.17-26)*

<sup>1</sup> Chca tojanopasá chentšana, Jesús canýe barquëshoye tojánamashëngo, uafjónayoye chenguana tojána y cachabe puebløye Capernaumoye tojtashjango.

<sup>2</sup> Chora, canýe jama ndobená, tjuashiñe jajoná, Jesús yojtsemnoye básefta boyabásenga tmojanamba. Jesús tojáninýe chënga tša imojtsošbuáchema chë šocábioye jáshnama cha bétsobenama; as chë šocábioye tbojanianyana: “Sobreno, añemo matsca; acbe bacna soyënga tcbontseboperdoná ca.”

<sup>3</sup> Chca causa, báseftanga ley abuátambayënga chentše imojtsemnënga imojtsejuabnaye: “Chca jayanëse, ndoñe tšabá quenátichamo Bëngbe Bëtsabiamá; mo chábioye cuafjoyengucá entsemna ca.”

<sup>4</sup> Pero Jesús yojtsetátšëmbo ntšamo chënga imojtsejuabnaycá; chíyeca tojanéyana: “¿Ndáyeca nýetsá bacna juabnënga ainaniñe šmojtsebomna ca?”

<sup>5</sup> ¿Tšëngaftangbiama ndayá más paselo nántsemna tšëngaftangbe delante jayanama: ‘Acbe bacna soyënga tcbontseboperdoná’ o ‘Matëtsbaná y motsa ca’?

<sup>6</sup> Atše cbochanjínýanýiye ntšamo chë Bëngbe Bëtsá Entšá tbojanbemá quem luarentše mando yobomnama, entsanga bacna soyëngama jáperdonama ca” —Jesús tojanéyana.

As chë jama ndobenábioye tbojanianana: “Matëtsbaná, acbe tjuashe mesocñe y acbe yebnoye motsatoñe ca.”

<sup>7</sup> Chorna chë jama ndobená tojtantsbaná y cachabe yebnoye yojtatoñe.

<sup>8</sup> Chca tmojáninñama chë entsanga auatjanánënga imojtsemna y Bëngbe Bëtsá imojtsatschuanaye, cha chca obenana entsanga tojánatšatama.

*Jesús, Matéobioye tbojanchembo chabuastama*

*(Mc 2.13-17; Lc 5.27-32)*

<sup>9</sup> Jesús chentšana tojtsanoñe y canñe entsábioye tbojáninñe, Mateo ca uabainá, chë Romocama impuesto entsángbioye atjanayentše inétsotbemañe. Chora Jesús tbojanianana: “Smasto ca.” As Mateo chentšana tojëftsantsbaná y tbojanasto.

<sup>10</sup> Jesús cach Mateobe yebnentše yojtseye ora, banga Romocama impuesto entsángbioye atjanayënga y ínñenga bacna soye amënga tmojánashajna y mesëshentše Jesús y chabe uatsjëndayëngaftaca imojotbiama.

<sup>11</sup> Chë fariseunga chca tmojáninñe ora, Jesusbe uatsjëndayëngbioye tmojanatjá: — ¿Ntsamo chca yojtsemna, tsëngaftangbe buatëmbayá chë impuesto atjanayënga y bacna soye amëngaftaca entsesá ca?

<sup>12</sup> Jesús chca tojanuena y chë fariseunga tojanëyana: —Chë salud bomnënga ashnayá ndoñe ntsëjabótana, pero chë šoquënga aiñe.

<sup>13</sup> Smochjá y ntsamo ndegombre iuayancá šmochjuatsjinñe quem Bëngbe Bëtsabe uabemana palabrënguiñe:

Atše sëntseboše tsëngaftanga lastemadënga chašmotsemna,

y ndoñe nñe bayënga chašmotsëbánaye Bëngbe Bëtsá jëtschuayama ca.

Atše ndoñe chiyátabo chë Bëngbe Bëtsabe bominiñe tsabá amënga jabáchembuama, sinó chë bacna soye amënga imomna ca juabnayënga jabáchembuama ca —Jesús tojánayana.

*Jesús tmojantjá chë Bëngbe Bëtsáftaca jencuëntama tondaye saytescama*

*(Mc 2.18-22; Lc 5.33-39)*

<sup>14</sup> Chentšana, Juan chë Ubayanabe ústonënga tmojanobeconá y Jesús tmojantjá: —Bënga y chë fariseunga fsënduamana ba soye tondaye ntjascá jtsemnana, Bëngbe Bëtsáftaca jencuëntama. ¿Ndáyeca acbe uatsjëndayënga ndoñe chca ca?

<sup>15</sup> As Jesús tojanëjua: —Chë casamentoye ófjanënga chë boyabása bouamná chëngaftaca tojtsemnëntscuana, chëngbioye saná ndoñe ntsabuáshebenana y ngménaca ndoñe ntsemnëngana. Pero ora echanjobuache y chë boyabása bouamná chentšana mochantsánatseñe; chora cocayé chë ófjanënga tondaye más jasama quemochátsbomna. Ntsamo chë tojobouamá cha y chë ofjanëngaftaca endmëncá, cachcá endmëna atše y atšbe uatsjëndayëngaftacnaca.

<sup>16</sup> “Ndocná canñe uatanguá entsayá base tsëm entsëjuaca jtarmëndana. Er chë tsëm entsëjua jtsabéconana y chë uatanguá entsayá más jtsatanëcanana, y chca chë uátanëcniñe más bëtsiñe jtsabemana.

<sup>17</sup> Y cach ndoñe chë tojtseshayana vínoye tanguá jasabenguiñe ntjataftsuámayana. Tcojuaftsuamasna, chë jasabenga jtseshëbëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juaftsuámana; y chca, chë jasabenga y chë vínoye jtsoservénana ca” —Jesús tojánayana.

*Jesús canñe shembásabioye tbojanshná y tojanma Jairëbe bembetema cháuatayenama*

*(Mc 5.21-43; Lc 8.40-56)*

<sup>18</sup> Jesús entsanga yojtsetsëtsnantscuana, chë judiëngbe enefjuana yebnentša canñe mandayá tojánashjango y Jesusbe shecuatšentše yojoshamentšiyë. Chë mandayá tbojanianana: “Atšbe bëmbe tontsóbana. Diosmanda atšbe yebnoye mabo; cochjabojajo y cha echántayena ca.”

<sup>19</sup> Chentšana Jesús y chabe uatsjéndayënga chë mandayá tmojanasto.

<sup>20-21</sup> Imojtsaye ora, canye shembása stëtsoicana Jesúsbioye yojobeconá. Bnëtsana uta uatama oboftjajuanánaca cha inapadecena. Chë šocá Jesúsbioye yojobeconá ora, yojtse-juabnaye: “Masque nýe mo chabe entšayá sibiájua chaijuábojajo, salud chantinýena ca.” Chentšana chë šocá Jesusbe entšayá tojanábojajo.

<sup>22</sup> Tojanábojajo ora, Jesús tojanobuértana, chë shembásabioye tbojáninýe y tbojanianyana: “Añemo matsca, shembása. Bëngbe Bëtsábeñe icošbuachéyeca, mora tšabá contsatsmëna ca.” Y cach orscana cha tšabá yojtsatsmëna.

<sup>23</sup> Chënga tmojtëtanontšë ayana y chora chë mandayábioca chënga tmojánashjajna. Chentše Jesús tojánanýe, ínýengna chë veloriamama imojtsanflautaye y ínýengna tša imojtsošachiye.

<sup>24</sup> Chora Jesús tojanëyana: “Muentšana mobocnënga. Chë shembásetema cabá ndoñe obaná quenátsmëna; nýe endëtsomañe ca.”

Pero chë entšanga Jesúsbioye nýe imojtsáfchaye.

<sup>25</sup> Pero Jesús pronto chënga chë yebnentšana tojanëbuacna. Chora Jesús tojánamashëngo chë shembásetema yojtsemnoye; cucuatše tbojanábuacueshache y cachora chë shembásetema tojtantsbaná.

<sup>26</sup> Y nýets chë luarëjana ndayá Jesús yojamama nýetsca entšanga imojátatsëmbona.

### *Jesús uta jtanata tojanashná*

<sup>27</sup> Jesús chentšana tojëftsanbocna ora, uta jtanata tbojanasto y mëntšá ibojtsaiuáyebuache: —¡Davídbentšana Entšá, bëndata šmotsalastemá ca!

<sup>28</sup> Jesús chë yebnoye tojánamashëngo ora, chë jtanata tbojanóbobeconata. As Jesús tojanatjá: —¿Tsëndata šojtsošbuaché atše chca jamama chjobenaye ca?

Y tmojanjuá: —Arseñor. Aíñe ca.

<sup>29</sup> Chora Jesús tojánabuchbojajo y tojanëyana: —Ntšamo tsëndatbe ošbuáchiyana yomncá, cachcá chaotsemna ca.

<sup>30</sup> Y cachora jinýama ibojtsobena. Jesús bëtscá chata mëntšá tojanamëndá: —Ndocná más quem soye chaondëtsetatšëmbo ca.

<sup>31</sup> Pero chata chentšana tojëftsanbocna y cachora tbojanontšë ndayá Jesús chátaftaca tojanmama nýets chë luarëjana jacúntana.

### *Jesús, canye ndëbiábioye tbojanshná*

<sup>32</sup> Chë jtanata ibojtsebocanëntscuana, básefta entšanga canye ndëbiá, bacna bayëjbe juabna uambayá, Jesúsbioye tmojanamba.

<sup>33</sup> Jesús chë bacna bayëja chárentšana tbojtánabocna y cachora chë ndëbiá tojtanontšë oyebuambnayana. Entšanga ojanánënga imojtsichamo: “¡Ndocna te Israelentše chca bëts soye chemuáisinýe ca!”

<sup>34</sup> Pero chë fariseunga imojtsichamo: “Cach bacna bayëjëngbe amëndayá, Satanás, muábioye obenana tbojatštá chë bayëjënga entšángbentšana jtëbuacanama ca.”

### *Jesús entšangbiama tbojanongmé*

<sup>35</sup> Jesús nýetsca pueblënguëjana y luarënguëjana yojtsachnëjuana y chë judiëngbe enefjuana yebnënguenache entšanga yojtsabuátambaye. Yojanabuayiná chë tšabe noticiënga Bëngbe Bëtsabe amëndayama, y nýetsca šocanëngama y tsetšanama yojánashnaye.

<sup>36</sup> Y chë entšanga tojánanýe ora, puerte tbojanongmé. Er chënga imojtsemna mo abujëñya ndbomna oveshëngcá, puerte uamëntšnayënga ba soyëngama padecena causa, y chauájabuachama ndocná ntsebonncá.

<sup>37</sup> Chora chabe uatsjéndayënga tojanëyana: “Canye bëts jajañe bëtscá játbanama entsemna, pero peonga nýe báseftanga. Cachcá quem luarentše, bëtscá entšanga Bëngbe Bëtsábioye nduabuátmënga montsemna, y chëngbioye chabiamama abuayinayënga nýe báseftanga.

<sup>38</sup> Peonga tmojtsashbenëse chë nduíñbioye jaimpádana ba peonga chauichamoma chë jaja saná játbanama. Cachcá, Bëngbe Bëtsábioye moimpadanga ba abuyayinayënga chauichamoma, quem entšanga chábioye chamúbuajama cá” —Jesús tojanéyana.

## 10

*Jesús chë bnëtsana uta uatsjédayënga tojanabacacá*

*(Mc 3.13-19; Lc 6.12-16)*

<sup>1</sup> Chentšana Jesús tojánachembo chabe bnëtsana uta uatsjédayënga, y obenana tojanatšatá bacna bayëjëngbe juabna entšángbentšana jtabocnama y nyetsca šocanëngama y tsetšanama jashnayama.

<sup>2</sup> Chë bnëtsana uta uatsjédayënga mëntšá imojanabaina: chë natsaná Simón, Pedro cánaca uabainá y chabe uabentsá Andrés; Santiago y chabe uabentsá Juan, Zebedeobe uaquiñata;

<sup>3</sup> Felipe y Bartolomé; Tomás y Mateo, chë Romocama impuesto entšángbioye atjanayá; Santiago, Alfeobe uaquiñá y Tadeo;

<sup>4</sup> Simón, chë celote ca uabobainá y Judas Iscariote, chë uayayëngbe cucuatšife Jesúsbioye boshjuaná.

*Jesús, chabe bnëtsana uta uatsjédayënga tojanichamó, Bëngbe Bëtsabe amëndayama jábuayenama*

*(Mc 6.7-13; Lc 9.1-6)*

<sup>5</sup> Jesús chë bnëtsana uta boyabásenga tojanichamó chë tšabe noticiënga entšanga jabuátambama, y mëntšá tojanabuayená: “Chë ndoñe judiëngbeñe ndoñe šmattsana y ndaye pueblentše Samaria luaroca ndoñe šmatjéftsamashjna.

<sup>6</sup> Nye Israeloca pueblëngoye šmochjá. Choca entšanga mo ótsena oveshëngcá montsemna, Bëngbe Bëtsábioye corente nduabuatma causa.

<sup>7</sup> Smochjá y entšanga šmochjábuayenaye Bëngbe Bëtsabe amëndayana echanjóshjanguama.

<sup>8</sup> Chë šoquënga šmochjáshnaye, šmochjama chë obanënga chámuatayenama, bacna nguayanánaca šoquënga šmochjáshnaye y bacna bayëjëngbe juabna entšángbentšana šmochtábocna. Chë obenana šmonjójyëngacñe tondaye ntjëtšajuacá; cachcá, chë soyënga šmojtsamama tondaye entšanga šmattsayëngacaye.

<sup>9</sup> “Ndoñe šmattsambaye crocénana uasnanëchiñe.

<sup>10</sup> Ni shecnaja sanaca benachiñama, ni inye entšayá jtsenomódama, ni shecohëtjonëshënga, ni jatjonëfja, er chë tšabe trabajayá jtsomercénana ntšamo tbojtsajabotcá jójyëngacñama.

<sup>11</sup> “Nderado canye bëts pueblentše o base pueblentše chašmojášhajna ora, šmochjáanguango canye tšabe entšá, ínÿengbioye ndaingñayá, y chabe yebnentše šmochtsoquedañe, inye puebloye játantscuana.

<sup>12</sup> Canye yebnoye chašmojámashjna ora, nyetsca chentša oyenënga mëntšá šmochjácheuaye: ‘Chë bëngbe ainaniñe tšabe ebionana tšëngaftangbe ainaniñe chaotsemna ca.’

<sup>13</sup> Chë yebnentša entšanga ainaniñe tšabe ebionana jtsebomnama merecido tmojtsebuajonëse, chë tšëngaftangbe ainaniñe tšabe ebionana chëngaftaca chaotsemna. Ndóñesna, nye cach tšëngaftangaftaca chaotsonñe.

<sup>14</sup> Y nderado canye pueblentše o bëts pueblentše chë entšanga ndoñe tcmonejúbujaja y ndoñe tcmonejóyaunase, chentšana šmochjésebocana y chë shecuatšentša polvëshe šmochjésenstoto. Chca, chë entšanga mochántsetatšëmbo chënga tšëngaftangaftaca ndoñe tšabá tmonjamama.

<sup>15</sup> Ndegombre šcuayana, quem luare jopochócama te, chë ndoñe chacmonjúbujaja y ndoñe chacmonjoyauná entšanga Bëngbe Bëtsá puerte jabuache echantsacastígaye,

y chë bacna entsanga Sodoma y Gomorra luaroquëngna ndoñe nÿa nÿetsá jabuache queochatacastígaye ca” —Jesús tojánayana.

*Ntsamo chë uatsjëndayënga mochjansúfria*

<sup>16</sup> “Smochjouena. Atše cbontsachamná mo oveshënga cuenta tjañe quešëngbeñe. Chíyeca studio bomnënga mo mëtscuayëngcá šmochtsemna y uamanënga mo palomatemëngcá.

<sup>17</sup> Entšangbiamá cuedado šmochtsebomna, chëngbe pueblentsa amëndayëngbe cucuatšíñe tšëngaftanga cmochanjábashejuana y chëngbe enefjuana yebnënguenache cmochanjátsetšenaye.

<sup>18</sup> Atšbe ústonënga bétsemnama, mandadëngbioye y reyëngbioye cmochanjuntse. Y chca, tšëngaftanga šmochanjobenaye chëngbeñe y chë ndoñe judiëngbeñe ntšamo atšbiamá šmotatšëmbcá jóyebuambayama.

<sup>19</sup> Pero chë mandadëngbe cucuatšíñe chacmojábashejuana ora, ntšamo o ndayá šmochjayanama ndoñe šmattsenócochinÿena. Chca orna, Bëngbe Bëtsá tšëngaftanga cmochanjabuayená ntšamo o ndayá jóyebuambayama.

<sup>20</sup> Tšëngaftanga ndoñe chë oyebuambnayënga quešmochátsmëna, sinó chë tšëngaftangbe Taitá, Bëngbe Bëtsabe Espíritu, tšëngaftangbiajana echantsóyebuambnaye.

<sup>21</sup> “Y canÿe entsá cachabe catsátbioye uayayëngbe cucuatšíñe bochanjábošhiona chamotsóbama; y canÿe taitá cachabe uaquiñábioynaca. Y chë básenga chëngbe bëtšëtsangbe contra mochántsemna y uayayëngbe cucuatšíñe mochanjábashejuana chamotsëbáyama.

<sup>22</sup> Tšëngaftanga atšbe ústonënga bétsemnama, nÿetsca entsanga cmochantsëbuayënja; pero nda nÿets tempo átšbeñe ošbuachiyá chaotsomñá, atsbocaná echántsemna.

<sup>23</sup> Canÿe pueblentsë chacmojsëcamena ora, inÿe pueblöyë šmochtsacheta. Ndegombre cbéyana, Israelentsa nÿetsca pueblëngoye cabá nda ora, chë Bëngbe Bëtsá Entšá tbojanbemá ya quem luaroye echanjabáshjango.

<sup>24</sup> “Ni canÿe uatsjëndayá chabe buatëmbayabiamá más uamaná ntsemnana, ni chë oservená chabe nduiñbiamá más uamaná.

<sup>25</sup> Chë uatsjëndayá ya cachabe buatëmbayacá jtsemnama tojashjáchëse, ndayá más nanjátsboše. Cachcá endmëna chë oservenáftaca, cachabe nduiñcá tojtsemnëse. Atše sëndmëna mo canÿe yebnentsa taitacá y tšëngaftangna mo cach yebnentsa basengcá. Entšanga jtsichámuana atšna Beelzebú o chë bacna bayëjëngbe amëndayá tsmëna ca. ¿Ntsamo chënga tšëngaftanga cmochtsëbobuatma ca?” —Jesús tojanëyana.

*Nda ndegombre cuantsebiauatja*  
(Lc 12.2-7)

<sup>26</sup> “Chíyeca entsangbiamá ndoñe matauatjëngana. Chë yoiytëmena soyentsana tondaye ntjinÿcá queochaisoquéda, y chë ndótatšëmbo soye, ntstotatšëmbcá queochaisoquéda.

<sup>27</sup> Chë mora cbontsëtsësná soyënga, chë entsangbiamá mo ibetiñe cuaftsemncá soyënga, tšëngaftanga šmochjama entsanga botamana chama chamotsetatšëmbuama. Y chë iytëcana cbontsëtsësná soyënga nÿetsca entsanga šmochtsabuayiynaye, mo nda canÿe yebnentsa tsbanánocana noticiënga tojtsayebuachcá.

<sup>28</sup> Ndoñe matauatjëngana nÿe chë tšëngaftangbe cuerpo japochócama imobenëngbiamá y ainana jtsepochócama ndoñe ntsoyëngana. Más šmochtsebiauatja chë nda endobena tšëngaftangbe cuerpo y tšëngaftangbe ainana jtsepochócama, nÿetsca tescama infernoca.

<sup>29</sup> “Uta jaja shloftsetëmata nÿe canÿe denario crocenánama mondbétsena. Masque chca, ni cánÿetema obanatema fshantsoye jotsatšana, tšëngaftangbe Taitá, Bëngbe Bëtsá ndoñe tontsebošëse.

<sup>30</sup> Y tšëngaftangbiama, Bëngbe Bëtsá botamana jtsantješnana, y chca, cha lempe tšëngaftangbiama jtsetatsëmbuana, bueta stjënashënga tšëngaftangbe bestšašiñe yomnámnaca.

<sup>31</sup> Chíyeca ndoñe matauatjëngana, tšëngaftanga ba jaja shloftsetémëngbiama corente más šmonduámána ca” —Jesús tojánayana.

*Ndabiama Jesucristo yochjayana chabe entsá yomna ca*  
(Lc 12.8-9)

<sup>32</sup> “Nda atšbe entsá yomna ca entsangbe delante tojayanabiama, átšnaca, atšbe Taitá, chë celoca endmënabe delante chanjayana cha atšbe entsá yomna ca.

<sup>33</sup> Pero nda entsangbe delante atšbe entsá ndoñe yondmëna ca tojayanabiama, átšnaca, atšbe Taitá, chë celoca endmënabe delante chanjayana cha atšbe entsá ndoñe yondmëna ca” —Jesús tojanëyana.

*Jesube causa, entsángbeñe más jtsentsjanayana*  
(Lc 12.51-53; 14.26-27)

<sup>34</sup> “Ndoñe šmattsejuabnaye atše quem luaroye tijabo nyetsca entsanga natjëmbana chamotsiyenama. Atše chama ndoñe chiyátabo; atše sënjabo causa, entsanga más mochántsejtsjanaye.

<sup>35</sup> Atše sënjabo chë uaquiñá cachabe taitabe contra chaotsemnama, chë bembe cachabe mamabe contra y chë bebincuá chabe uambén mamabe contra chaotsemnama.

<sup>36</sup> Y chca, ba entsangbe uayayënga cachëngbe pamíllanga mochántsemna.

<sup>37</sup> “Nda cachabe taitá o mamábioye atšbiama más tbojtsebobonshánëse, cha ndoñe ntsomerecénana atšbe entsá jtsemnama. Nda cachabe uaquiñá o bémbëbioye atšbiama más tbojtsebobonshánëse, cha cach ndoñe.

<sup>38</sup> Y nda nyetsca chabe quem luare soyënga ndoñe tonjëseboshjona atše juastama, y atšbiama jasúfriama ndoñe tontseprontana y cruciñe jobanámnaca, cha ndoñe ntsomerecénana atšbe entsá jtsemnama.

<sup>39</sup> Nda tojtsentsëna quem luarentše bëtscá soyënga jtsebonnama y atšbiama jasúfriama ndoñe tontseprontana, chë nyetsca tescama yomna tšabe vida echanjobuetše. Pero nda quem luarentša soyënga cachcá tojesonyá atše juastama, masque chaóbana, chë nyetsca tescama yomna tšabe vida echántsebonna ca” —Jesús tojánayana.

*Chë uacanana soyënga*  
(Mc 9.41)

<sup>40</sup> “Nda tšëngaftanga chacmojúbuaja, átšnaca cha šochanjofja; y nda atše chašojofja, chë nda šojichmóbioynaca cha bochanjofja.

<sup>41</sup> Nda canye Bëngbe Bëtsabe juabna oyebuambnayábioye tbojoyeuná, cha chca bëtsemnama, chábioye Bëngbe Bëtsá canye uacanana soye bochantatšetaye, mo cach Bëngbe Bëtsabe juabna oyebuambnayabe uacanana soycá. Y nda canye nyetsca soyënguiñe tšabá amábioye tbojofja, cha chca uamanama, chábioye Bëngbe Bëtsá canye uacanana soye bochantatšetaye, mo cach nyetsca soyënguiñe tšabá amabe uacanana soycá.

<sup>42</sup> Y ndánaca, tšëngaftanguentsá canye nduamanábioye masque nje mo base búyeshtema tbojuabuatšetá, atšbe ustoná bëtsemnayeca, ndegombre Bëngbe Bëtsá canye uacanana soye chábioye bochantatšetaye ca” —Jesús tojánayana.

## 11

*Juan chë Ubayanabe ichmónënga*  
(Lc 7.18-35)



<sup>1</sup> Jesús tojanpochocá chabe bnétsana uta uatsjéndayénga jábuayenama, y chentšana tojtsanoñe chë luariñe pueblënguenache oyena entsanga Bëngbe Bëtsabe palabra jabuátambama y jábuayenama.

<sup>2</sup> Chë tempo Juan chë Ubayaná cárceloye tmojanëtame. Choca cha yojouena ndayá Jesús yojtsamama. Y as, Jesús yojtsemnoye, básefta chabe ústonénga tojanichamó,

<sup>3</sup> mēntšá jatjayama: —¿Aca ndegombre cojtsemna chë jabama ibojanmēná, chë Uámana Uabuayaná, o šojtsamna ínÿabiama jatobátmama ca?

<sup>4</sup> Chca tmojantjá orna, Jesús tojanējua: —Smochjá y Juan šmochjauyana ntšamo šmojouena y šmojinÿcá.

<sup>5</sup> Cha šmochjacuénta: Chë jtanénga tšabá entsatëbinÿna, chë cosheténga tšabá montsata, chë bacna nguayanánaca šoquénga shnánénga montsatsmēna y chë tēsménga montsuenana, chë obanénga tmontayena y chë ndbomnējémēngbioye chë tšabe noticiénga montsabuayiná ca.

<sup>6</sup> ¡Puerte oyejuayá chaotsemna chë nda atše bacna soye ndoñe stsama ca jtsejuabnayēse, átšbeñe ošbuáchiyana ndoñe tontsajbaná cha ca! —Jesús tojanējyana.

<sup>7</sup> Chénga tmojtsatanoñe ora, Jesús tojanontsé Juanbiamama chë entsanga jáuyanana, mēntšá: “Juan jinÿyama šmojánbocana ora, ¿ndayá jinÿyama chë entsanga ndoyena luaroye šmojánbocana? ¿Canÿe entsá ainaniñe tondaye añemo ndbomná, mo canÿe šēše bínÿiaca shatiyeynēscá?

<sup>8</sup> Y ndóñese, ¿ndayá jinÿyama choye šmojánbocana? ¿Canÿe boyabása uámana entsayaca bopormaná? Ndoñe. Tšēngaftanga šmondétatšēmo chë boyabásenga uámana entsayaca bopormánēngna chë mándayēngbe yebnēnguiñe mondbétsiyenama.

<sup>9</sup> Y asna, ¿ndayama choye šmojánbocana? ¿Canÿe Bëngbe Bëtsabe juabna oyebuambnayá jinÿyama? Ndegombre, aíñe; y cbéyana, ndegombre cha canÿe Bëngbe Bëtsabe juabna oyebuambnayabiama más bētsá endmēna.

<sup>10</sup> Cha, Juan, endmēna ndabiamama Bëngbe Bētsá chabe uabemana palabrēnguiñe tojánayana mo chabe ichmonacá, mēntšá tojánayana ora:

Cristo, atšbe entsá natsana sēnjichmó acbiamama chaóyebuambama, entsanga jábuayenama aca jabama ainaniñe tšabe juabnēngaca chamotseprontánama ca.

<sup>11</sup> Ndegombre cbéyana: Nÿets tempo entsángbeñe, ndocná quenátsmēna Juan chë Ubayanabiamama más bētsá; masque chca, Bëngbe Bëtsabe amēndayoca chë más batšá uamaná, más bētsá echántsemna ntšamo mora Juan yomnama.

<sup>12</sup> “Juan chë Ubayaná tojánabo orscana mēntscóñama, bētsá entsanga tša mondboše Bëngbe Bëtsabe amēndayoye jamashēnguama, y chë Bëngbe Bëtsabe amēndayama contra imomnēngna, chēngbe nÿets añémoca montseboše chë mándayana jtsepochócama.

<sup>13</sup> Juan candabēntscuana, nÿetsca Bëngbe Bëtsabe juabna oyebuambnayénga y Moisesbe Ley nÿe Bëngbe Bëtsabe amēndayama tmonjanobuambá.

<sup>14</sup> Y tšēngaftanga chë soyénga jóyēngacñama šmojtsebošēse, Juan entsemna chë Bëngbe Bëtsabe juabna oyebuambnayá Eliascá, chë jabama ibojamná.

<sup>15</sup> Chë jouenama tmojtsobenénga, chamouena ca” —Jesús tojánayana.

<sup>16</sup> Mēntšánaca Jesús tojánayana: “¿Ndayacá morsca entsanga imomna? Chénga mondmēna mo chë plazēngoca mondbetsetbiámama basetemēngcá; chénga chēngbe enutēngbioye jtsayebuáchana

<sup>17</sup> y mēntšá jtsichámuana: “Tšēngaftangbiamama fsēnjaflautá y ndoñe chešmatslantsá; ngmēnaca fsēnjaversiá y ndoñe chešmatošachna ca.’

<sup>18</sup> Juan tonjánabo, y bētsá entsángbeñe ndoñe quenjatamana ni jasana, ni jofšiyana, y entsanga montsanichamo chana bacna bayējbe juabna uambayá yojamna ca.

<sup>19</sup> Morna, chë Bëngbe Bētsá Entšá tbojanbemá tonjabo, y chana aíñe entsamana bētsá entsángbeñe jtsesayana y jtsofšēšnayana, y entsanga montsichamo chana yapa uasayá y vínoye tmojá entsemna ca y Romocama impuesto entsángbioye atjanayénga y bacna soye

amëngbe amigo ca. Pero Bëngbe Bëtsá endbétsinÿanÿnaye cha nÿets osertánana bomná yomnama, chë ndayá cha tojama ora ndayá chentšana tojóbcna soyëngaca ca” —Jesús tojánayana.

*Chë nduauenana entsanga  
(Lc 10.13-15)*

<sup>20</sup> Chentšana Jesús tojanontsé jucácanana chë entsanga, ndëmuanÿenga imojoyena chë publënguine ndayenache ba chabe bëts soyënga tojanma, chënga bacna soyënga amana ndoñe tmontsanajbanama y Bëngbe Bëtsabe benache ndoñe tmontanishachama. Mëntsä yojsichamo:

<sup>21</sup> “¡Tša lastema, Corazín puebloca entsangbiamá! ¡Tša lastema, Betsaida puebloca entsangbiámna! Chë chentše sënjama bëts soyënga, Tiro y Sidón bëts publënguentše matënjochnënguse, chentša bacna entsanga ya tempo ngménaca matmëntenojuabó chëngbe bacna soyëngama y Bëngbe Bëtsabe benache matmëntishache; y chca tmojamama chaotsótatsëmbuama uajojësha entsayangaca matmëntopormanga y chëngbe bestšašine jatinyá matmënjenotbótoto.

<sup>22</sup> Pero ndegombre cbëyana, ntšamo entsanga tmojamama, tšabá o ndoñe tšabá bëtsemnama jayanama chaojobuache ora, tšëngaftanga más bëts castigo šmochántsebmna, chë Tiro y Sidonoca bacna entsangbe castiguama.

<sup>23</sup> Y tšëngaftanga, Capernaumoca entsanga, ¿šmojtsejuabná celóntscoca atsebánanënga šmochtsemna ca? ¡Chë uabouana infierno ye cmochantsésetjango! Chë muentše sënjama bëts soyënga Sodomoca matënjochnënguse, choca entsanga ya tempo ngménaca chëngbe bacna soyëngama matmëntenojuabó y Bëngbe Bëtsabe benache matmëntishache, y chë bëts pueblo cabá cachcá mëntscuana mantsonne.

<sup>24</sup> Pero ndegombre cbëyana, quem luare jopochócama te, Bëngbe Bëtsá puerte jabuache cmochantsacastígaye, y chë Sodoma luaroca entsángbioye ndoñe nÿetsá jabuache quemochatacastígaye ca” —Jesús tojánayana.

*“Atšbioye mabënga y šmochjóchna”  
(Lc 10.21-22)*

<sup>25</sup> Chë tempo, Jesús tojánayana: “Atše cbatschuá, Taita, celoca y quem luarentša Utabná. Aca, chë nÿe batsá tatsëmbënga tcojanÿanÿé, chë tša tatsëmbënga y osertánëngbiamá tcojaiytëme soyënga.

<sup>26</sup> Aíñe, chama cbontsadorana, Taita, chca chaotsemnama tcojábošenayeca.

<sup>27</sup> “Atšbe Taitá lempe chca šonjatštá. Chë Uaquiñábioye ndocná corente quebnatábuatma; nÿe chë Taitá aíñe. Y chë Taitábioye ndocná corente quebnatábuatma; nÿe chë Uaquiñá aíñe, y ndábioye chë Uaquiñá tojtseboše nda chë Taitá yomnama jinÿanÿiyama, chánaca chë Taitábioye bochantšábuatma.

<sup>28</sup> “Atšbioye mabënga nÿetsca tšëngaftanga uamëntšnayënga y bëtscá trabajo uangménënga, y atše chanjama tšëngaftanga chašmochnama.

<sup>29</sup> Ntšamo canÿe entsá, uacná yuguëšine juabatsëcana juanatsama, cachcá, tšëngaftanga atše šmochjaleséncia jobnatsayama y jabuátambama. Atšbentšana šmochjuatsjinÿe: atše uantado mëná sëndmëna y ndoñe quetsatamana yapa uamaná jatenobiamnayana. Y chca, tšabá jóchnama šmochantsobena y ainaniñe más añemo šmochántsebmna.

<sup>30</sup> Mo canÿe uacnacá, ndoñe tishuta yuguëseca o ndoñe uauta uasmanëshaca, paselo jama jobenayana, cachcá tšëngaftanga šmochántsemna atše cbojtsabnatsana y cbojtsabuátambase; y chca, tšëngaftanga más oyejuayënga šmochántsemna y más paselo nÿetsca soyënga jamama echántsemna ca” —Jesús tojánayana.

## 12

*Jesusbe uatsjéndayënga ochnayté trigo tmojanátabebe  
(Mc 2.23-28; Lc 6.1-5)*

<sup>1</sup> Chë tempo, Jesús canÿe ochnayté canÿe jajajana yojsachnëjuana. Chabe uatsjéndayëngna shëntseca imojtsemna, chíyeca tmojanontsé trigo juatabebiana y chë meshënga jasana.

<sup>2</sup> Chë fariseunga chca tmojáninÿe ora, Jesús tmojanianyana: —Minÿe, acbe uatsjéndayënga canÿe soye montsama y chë soye ochnayté jamama ndoñe quenátslesenciana ca.

<sup>3</sup> As Jesús tojanëyana: —¿Ndoñe šmëndualía y šmondétatšëmbo ndayá David y chabe enutënga tmojanmama, shëntseca imojtsemna ora?

<sup>4</sup> Chca orna, David, Bëngbe Bëtsabe bëts yebnoye yojámashëngo y chë Bëngbe Bëtsá chentše yojamna inÿinÿnaye tandëšënga yojase. Chë tandëše nÿe ndánaca jasama ndoñe yonjalesenciana, ní Davidbiana, ni chabe enutëngbiana. Nÿe bachnangbiana belesenciana chë tandëše jasama. Masque David chca tojanma, Bëngbe Bëtsá chora ndoñe tonjánayana David canÿe bacna soye tojanma ca.

<sup>5</sup> ¿O ndoñe šmëndualía y šmondétatšëmbo, Moisesbe leyiñe, chë bachnanga ochnayté Bëngbe Bëtsabe bëts yebnentše jtsetrabájayana, pero ndoñe bacna soye ntsemnana chë bachnanga ochnayté ndoñe mondbóchnama?

<sup>6</sup> Y atše šcuayana: Muentše canÿa entsemna, cha chë Bëngbe Bëtsabe bëts yebnentša bachnangbiana más uamaná endmëna y chabe amëndayoca soyënga más entsámána chë bachnangbe mándayentša soyëngama.

<sup>7</sup> Bëngbe Bëtsabe uabemana palabrenguiñe mëntšá endayana:

Atše sëntseboše tšëngaftanga lastemadënga chašmotsemna,  
y ndoñe nÿe bayënga chašmotsëbánaye Bëngbe Bëtsá jëtschuayama ca.

Ntšamo chiñe entsayancá ndegombre cmojtsësertánëse, tšëngaftanga ndoñe chëngbe contra šmattsichamo, chë ochnayté chca tmojtsamëngbiana.

<sup>8</sup> Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca —Jesús tojánayana.

*Chë buashana cucuatše bomna entšá  
(Mc 3.1-6; Lc 6.6-11)*

<sup>9</sup> Chentšana Jesús tojtsanoñe y chentša judiëngbe enefjuana yebnoye tojánamashëngo.

<sup>10</sup> Chentše yojtsemna canÿe boyabása buashana buacuatše bomná. Chë fariseunga imojtsenguaye ndayánaca, as chca chënga jtsebomnama ndaye sóyeca Jesús mal jaquédama. Chcasna, chora chënga Jesús tmojantjá: —¿Queojtselesenciana canÿe ochnayté šocá jáshnama ca?

<sup>11</sup> Y Jesús tojanëjua: —¿Nda tšëngaftanguentšá, canÿe oveshá tbojtsebomna y nÿa chë ochnayté canÿe fshantsentše atëfjnoye chë oveshá tojtsótsatše, chora chë boyabása nanjá o ndoñe chë oveshá jatábocnama?

<sup>12</sup> ¡Entšá oveshabiana puerta más uamaná endmëna! Chcasna, entselesenciana chë ochnayté tšabe soye jamama ca —Jesús tojanëyana.

<sup>13</sup> Chora Jesús chë buashana buacuatše bomnábioye tbojanianyana: “Macuenÿanëjaná ca.” Y chë boyabásana tojanacuenÿanëjaná y chora chëtša tšabá yojtsatamna mo cach inÿetšacá.

<sup>14</sup> Pero chë fariseunga tmojésanbocana ora, tmojanontsé juabnayana ntšamo jamëse Jesús jóbama.

*Ndayá chë Bëngbe Bëtsabe juabna oyebuambnayá Jesusbiana tojánayana*

<sup>15</sup> Jesús chë soye tojántatšëmbona ora, chentšana tojtsanoñe y ba entšanga tmojanasto. Nÿetsca šoquënga tojanashná,

16 y tojanamëndá chabiama entsángbeñe ndoñe chamondëtsóyebuambnama.

17 Chca tojanamëndá, cachcá chaotsemnama ntšamo chë Bëngbe Bëtsabe juabna oyeambuayá Isaías tojanayancá. Cha mëntsá tojánayana:

18 Muentše atšbe oservená entsemna. Atše cha sënjabocacá, atšbe bonshaná, y atše corente chabiama sëntsoyejuá.

Atše chanjama atšbe Espíritu chabe ainaniñe chaotsemnama y entsanga echanjabuayená, Bëngbe Bëtsá nyetsca luarënguentsana entsangbiana yoch-jayanama chënga tšabá o ndoñe tšabá tmonjamama.

19 Cha ndoñe queochátayajuatsana, ni queochátschembumbuana.

Chabe oyeambuayana tsáshenañe ndocná queochatuena.

20 Mo nda chë atcana šëse ndoñe más jatsndbemana, chë ndobenënga cha ndoñe queochátapochocaye.

Mo nda chë quinýenëfjua nýe uabojátsena uajuinýnëfjua ndoñe ntsafsanana, chë Bëngbe Bëtsábeñe jtsošbuáchiyama imojtsebojátšangbe obatmanana chábeñe, cha ndoñe queochátabuajuanaye.

Cha nyets añémoca echanjëftsetrabája, entsanga chëngbe ainaniñe Bëngbe Bëtsabe ndegombre soyënga chamóyëngacñëntscuana.

21 Y nyetsca luarënguentsana entsanga chábeñe mochantsobátmana ca —cha tojánayana.

*Fariseunga tmojánayana Jesús Satanásbentsana obenana tojanóyëngacñe ca (Mc 3.20-30; Lc 11.14-23; 12.10)*

22 Chora, Jesús yojtsemnoye canýe boyabása jtaná y ndëbiá tmojanánatse. Chana bacna bayëjbe juabna uambayá inamna; y Jesús chábioye tbojanshná, chabuatabinýnama y chabuatauénanama.

23 Y nyetsca entsanga ojanánënga imojtsichamo: “¿Mua yojtsemna chë Davídbentsana Uámana Entsá, chë Cristo ca?”

24 Pero chë fariseunga chca tmojanuena ora, imojtsichamo: “Beelzebú, cach Satanás, chë bacna bayëjëngbe amëndayá, quem boyabásabioye obenana tbojatštá chë bayëjënga chauatëbuacnama ca.”

25 Y Jesús yojtsetátšëmbo ntšamo chënga imojtsejuabnayama; as tojanéyana: “Canýe amëndayentše entsanga tmojtsenojatá y tmojtsenáyase, cachënga jenpochócana. Cachcá, canýe bëts pueblentša entsanga o canýe yebnentša pamíllanga tmojtsenojatá y ndoñe tmontsenëyeunanëse, chënga ndoñe tšabá nyets tempo quemochátsmëna.

26 Cachcá, Satanás cachabe bayëjënga jtëbuacnama tojtsebošëse, chana tojtsenojatá y cachabe contra yojtsemna. Y chca, ¿ntšamo nantsobena chabe mándayana quem luarentše jëftsebomnana?

27 Tšëngaftanga šmontsichamo atše Beelzebube obenánaca chë bayëjënga stsatëbuacana ca; pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebomna chë bacna bayëjënga jtëbuacnama? Chiyecna, chënga montsinýinýná ntšamo ndegombre yomnana y tšëngaftanga ndoñe ndegombre soye šmontsichámuama.

28 Y atšna, chë Bëngbe Bëtsabe Espíritbeyeca chë bayëjënga entsángbentsana sëndëtëbuacana; y chë soye entsinýinýná Bëngbe Bëtsabe amëndayana tšëngaftangbioye tojóshjanguama.

29 “¿Ntšamo nda nanjobenaye canýe corente añemo bomna entsabe yebnoye jamashënguana y chabe soyënga jtsebocana, ndoñe natsana chábioye tconjshëtsebatsëquëse? Nýe tcojshëtsebatsëquësna aïñe cuanjobenaye cha jefcana. Atše ya chca Satanásoftaca sënjama.

30 “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana.

31 “Chiyeca cbéyana, Bëngbe Bëtsá entsanga echanjáperdonaye nyetsca chëngbe bacna soyënga y chë Bëngbe Bëtsabiana puerte bacá oyeambuayana, mo chábioye

cuafjoyenguangcá; pero ndoñe queochátaperdonaye chë Uámana Espíritbiamana puerte bacá ichámënga.

<sup>32</sup> Bëngbe Bëtsá bochanjaperdóna chë Cha Entsó tbojanbemabiamana ndoñe tšabá ichamuábioye; pero chë Uámana Espíritbiamana ndoñe tšabá ichamuábioyna, ni quem luarentše, ni ndocna te quebochatsperdóna ca” —Jesús tojánayana.

*Tšabe betiye o ndoñe tšabe betiye tondmënana, jtsotatsëmbuana ntšamo tojashajoncá*  
(Lc 6.43-45)

<sup>33</sup> “Canye betiye tšabá mobocuedanga y botamana echanjashájona; ndoñe tšabá matscuedánana y tšabe shajuana ndoñe queochátsbomna. Chë betiye tšabe betiye o ndoñe tšabe betiye tondmënana, jtsotatsëmbuana ntšamo chëshe tojashajoncá.

<sup>34</sup> ¡Mëtscuaye entsanga! ¿Ntšamo šmattsobena tšabe soyëngama jtsóyebuambnayana, cach tšëngaftanga bacna entsanga šmojtsemnëse? Er ndayá ainanoca becá tomnama entsá jtsóyebuambnayana.

<sup>35</sup> Chë tšabe entsá, chë ainanoca tšabe juabnënga bomnentsana jtsóyebuambnayana, y chë bacna entsana chë ainanoca bacna juabnënga tobomnentsana jtsóyebuambnayana.

<sup>36</sup> Y ndegombre cbëyana, chë entsangbiamana tšabá o ndoñe tšabá tmonjamama jayanama tempo chaojobuache ora, ndaye ndoservena palabra šmojóyebuambama, Bëngbe Bëtsabe delante šmochanjayana ndáyeca chca ca.

<sup>37</sup> Er ntšamo tcojtsóyebuambnama Bëngbe Bëtsá echanjayana tšabá o ndoñe tšabá tconjamama, y cmochanjauyana aíñe o ndoñe cmontsemna castiganá jtsemnana ca” —Jesús tojánayana.

*Chë bacna entsanga Jesús tmojanimpadá canye bëts soye chaoma, chabe obenana jinÿama*  
(Lc 11.29-32)

<sup>38</sup> Chentšana, básefta fariseunga y Moisesbe ley abuátambayënga Jesús tmojanjáj: —Buatëmbayá, bënga fsëntseboše aca canye bëts soye chacoma, acbe obenana chašcuinÿanÿema ca.

<sup>39</sup> As Jesús tojanëjua: —Quem puerte bacna entsanga y ndošbuáchiyënga montseboše atše canye bëts soye chaima, atšbe obenana jinÿanÿiyama; pero chca soye ndoñe quemochátinÿe, sinó nÿe chë ndayá yomna mo chë Bëngbe Bëtsabe juabna oyebeuambnayá Jonásoftaca tojanopasá soycá.

<sup>40</sup> Ntšamo Jonás unga te y unga ibeta chë bëts beonbe uafsbioye yojëftsemncá, cachcá chë Bëngbe Bëtsá Entsó tbojanbemá unga te y unga ibeta fshantse jashenoye echanjëftsemna.

<sup>41</sup> Morsca entsanga tšabá o ndoñe tšabá tmonjamama Bëngbe Bëtsá yochjayana te, Nínive bëts puebloca entsanga mochanjotsaye y morsca entsangbiamana mochanjayana ndoñe tšabá tmonjama ca; er chënga, Jonás yojtsabuayiyayana ora, tmojanoyeuná y chë tšabe benache tmojtanishache, y chë mora muentše entsemnana, Jonasbiamana más uamaná endmëna.

<sup>42</sup> Morsca entsanga tšabá o ndoñe tšabá tmonjamama Bëngbe Bëtsá yochjayana te, chë Sur luaroca reinánaca echanjotsaye y morsca entsangbiamana echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrenga jouenama, y chë mora muentše entsemnana, Salomonbiamana más uamaná endmëna ca —Jesús tojánayana.

*Ndayá inopása chë bacna entsángaftaca*  
(Lc 11.24-26)

<sup>43</sup> Jesús mëntšánaca tojánayana: “Canye bacna bayëja canye entsábentsana tojësebocna ora, chë bayëjna bojojo luarënguenache jtsanana ndayentše jóchnama onguayiñe, y canye luare ndoñe tonjínÿena ora cha jenójuaboyana:

<sup>44</sup> ‘Atsbe oyenoye, chë ndayentshana sënjëftseboynoie chanjesshëcona ca’. Y choye tojtashjango orna, jinÿenana lempe tšabá cha jtesamashënguama, mo chentse ndocná tontsiyencá, tsajniñe y lempe botamaniñe cuaftsemncá.

<sup>45</sup> Chorna chë bayëjna jana y inÿe canÿsëfta bayëjenga chabiamá más opëjenga jobiatšana y nÿetscanga choye jamashjnana chë boyabásabeñe joyéanama. Y chca, chë boyabása tempscama más bacna entšá jtsemnana, chora chë natsanama más bayëjenga abamna causa. Morsca puerte bacna entšángaftaca cachcá echanjochnëngo ca” —Jesús tojánayana.

*Chë Jesusbe ndegombre pamillanguentsënga*  
(Mc 3.31-35; Lc 8.19-21)

<sup>46</sup> Jesús cabá entšanga yojsëtsëtsnaye ora, chabe mamá y catšátanga tmojánashjajna y imojtseboše Jesúseftaca jóyebuambayama. Nÿe shjoca imojtsemna;

<sup>47</sup> asna, canÿe boyabása Jesúsbioie tbojanbuayená: —Acbe mamá y acbe catšátanga shjoca montsemna y montseboše ácaftaca jóyebuambayama ca.

<sup>48</sup> Pero Jesús chë jauenayama tojánabioie tbojanianyana: —¿Nda atsbe mamá yomna, y ndëmuanÿenga atsbe catšátanga ca?

<sup>49</sup> Y cachora chabe cucuatše tojanatsbaná, chabe uatsjëndayënga tojanënÿanÿé y tojánayana: —Quemënga montsemna mo atsbe mamá y mo atsbe catšatangcá.

<sup>50</sup> Er ndánaca, ntšamo atsbe Taitá, celoca endmëná yobošcá tojtsama, jtsemnana atsbe catšata, atsbe uabena y atsbe mamá, atsbe ndegombre pamillanguentsá ca —Jesús tojánayana.

## 13

*Chë jenabe cuento*  
(Mc 4.1-9; Lc 8.4-8)

<sup>1</sup> Cach te, Jesús yebnentshana tojëftsanbocna y uafjajónaye tsachoca tojanótbema.

<sup>2</sup> Mallajta entšanga choye tmojanobeconá; as Jesús, chë uafjajónayentše yojanamna canÿe barquëshoye tojánašëngo, tojanótbema; y chë entšangna tsachoca imojtsemna.

<sup>3</sup> Chorna ba soyëngama cuentëngaca chënga tojanabuatambá.

Mëntšá tojanëyana: “Canÿe jená chë jënaye jaujquëshama yojëftsebocona.

<sup>4</sup> Yojsëjquëshaye orna, básefta jënaye benache juachañe yojuatquécjana, pero chë jaja shloftšënga imojástjajna y lempe imojtsósañe.

<sup>5</sup> Inÿe meshëngna ndëtšbenguiñe yojuatquécjana, ndoñe yapa fshantse binÿnentše. Chiñna betscó yojuábocna, fshantse ndoñe jashenocana yonjanmëna causa,

<sup>6</sup> pero shinÿe yojábocna ora, puerte yojojënyána y yojsancta; y yojsábojo, bëtscá tbëtëjenga tondaye causa.

<sup>7</sup> Inÿe meshëngna uchmëshangañe yojuatquécjana, y chë uchmëshangá yojuájua orna, lempe yojsatscué.

<sup>8</sup> Y inÿe meshëngna, uanguanëshiñe yojuatquécjana y puerte botamana chiñe yojuashajo: ínÿenache nÿe canÿe jënayentshana mo patse meshënga yojuashájona, ínÿeñna mo chnënguana bnëtsana meshe y ínÿeñna mo unga bnëtsana meshe.”

<sup>9</sup> Jesús chca jacuéntama tojanpochocá ora, mëntšá tojánayana: “Chë jouenama tmojt-sobenënga, šmochjouena ca.”

*Ndáyeca Jesús cuentëngaca yojánabuatambaye*  
(Mc 4.10-12; Lc 8.9-10)

<sup>10</sup> Chora chë uatsjëndayënga tmojanobeconá y Jesús tmojantjá: —¿Ndáyeca entšanga cuentëngaca cojtsabuatambá ca?

<sup>11</sup> As Jesús tojanëjua: —Bëngbe Bëtsá tšëngaftanga cmontsinÿanÿná nÿetsca chë mo iytëmencá yomna soyënga chabe amëndayama, pero chë ínÿengbioyna ndoñe.

<sup>12</sup> Nda tojtsebomnábioye más jatštayana y chca cha corente bëtscá jtsebomnana; pero chë tondaye tondbomnábioyna, chë batšatema tobomna sóynaca mochántseboca.

<sup>13</sup> Chíyeca atše cuenténgaca chënga sentsëtsësná. Chca, masque corente chamotsafšna, ndoñe chamondobená Bëngbe Bëtsabe soyënga jinÿama; y masque becá chë soyënga chamouena, ndoñe tšabá quemochátuenana, ni queochátësertana.

<sup>14</sup> Chcáyecna, chëngbeñe entsemna cachcá ntšamo chë Bëngbe Bëtsabe juabna oye-buambnayá Isaías tojanayancá:

Masque becá chamouena, ndoñe queochátësertana.

Masque puerte chamotsantješna, ndoñe quemochátinÿe

<sup>15</sup> Quem entšanga ndoñe quemátsboše botamana jajuaboyana;

chënga uamatsáchttonënga montsemna

y chëngbe bominÿnaca cachcá.

Chca ndóñesna, chënga muantsobena jinÿama, jouenama y ainaniñe josértama;

y chca, chënga bacna soyënga amana muantsajbaná y atšbe benache muantishache,

as atše chënga chayatsebacama ca —cha tojëftsanbema.

<sup>16</sup> “Tšëngaftangna oyejuayënga šmochanjoyena, er šmondobomna bominÿe y matscuašënga Bëngbe Bëtsabe soyënga jinÿama y jouenama.

<sup>17</sup> Ndegombre cbëyana, banga Bëngbe Bëtsabe juabna oyebuambnayënga y nyetsca soyënguiñe tšabá amënga tmonjánbošena chë tšëngaftanga šmontsonÿá soyënga jinÿama, y ndoñe chemátaninÿe; tmonjánbošena chë tšëngaftanga šmontsuenana soyënga jouenama, y ndoñe chemátanuena ca” —Jesús tojanëyana.

### *Jesús chë jenabe cuentama tojanabuayená*

*(Mc 4.13-20; Lc 8.11-15)*

<sup>18</sup> “Chcasna, oído šmochjajajo; chë jenabe cuento mëntšá endayana:

<sup>19</sup> Chë Bëngbe Bëtsabe amëndayama tmojouena y ndoñe tontsësertana entšanga mondmëna mo chë benache juachañe yojuatquécjana jenaycá; Satanás jabana Bëngbe Bëtsabe palabra chëngbe ainanentsana jabétsabuajuanama, chënga chiñe ndoñe chamondëtsošbuáchema.

<sup>20</sup> Y chë ndëtšbenguiñe yojuatquécjana jénaye entsemna mo chë aíñe Bëngbe Bëtsabe palabra tmojouena y Bëngbe Bëtsabeñe jtšošbuáchiyama oyejuayënga tmojtsemna entšangcá;

<sup>21</sup> pero ndoñe nyets tempo chana jocháchajuana, y chca, ndoñe bayté Bëngbe Bëtsáftaca ntjëftsemnëngana, ndoñe yapa tmontsašbuaché causa. Inÿenga chëngbioye mochantsëbuayënja y Bëngbe Bëtsabeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonÿaye.

<sup>22</sup> Chë uchemëshangañe yojuatquécjana jénaye entsemna mo chë Bëngbe Bëtsabe palabra tmojouena entšangcá, pero quem luarentša soyëngaca oyejuayënga jtsemnana yapa mochántsenojuabnaye y mallajta crocénana y ba soyënga jtsebomnana mochántseboše. Chíyeca chënga Bëngbe Bëtsabe palabra jtsebnëjtombana y ntšamo cha tojayancá ndoñe ntsamana.

<sup>23</sup> Pero chë uanguanëshiñe yojuatquécjana jénaye entsemna mo chë Bëngbe Bëtsabe palabra tmojouena y botamana jósertana entšangcá. Mo canÿe betiye puerte tšabá tojtshajuancá, chënga bëtscá tšabe soyënga Bëngbe Bëtsabiama mochántsama. Inÿengna ínÿengbiama más bëtscá soyënga mochántsama, y chca, ínÿenga jtsemnana mo chë patse meshënga tojanshajo jenaycá, ínÿenga mo chë chnënguana bnëtsancá y ínÿengna mo chë unga bnëtsana meshënga tojanshajo jenaycá ca” —Jesús tojanabuayená.

### *Chë tríguañe bacna shacuanama cuento*

<sup>24</sup> Jesús mëntšánaca tojanacuntá: “Bëngbe Bëtsabe amëndayana endmëna mo chë tšabe jenaycá, canÿe boyabása chabe jajañe yojáje.

<sup>25</sup> Pero n̄yetscanga imojtsomañe orna, chabe uayayá yojáshjango y chë trigo jeniñe bacna shácuana yojesejé y yojtsatoñe.

<sup>26</sup> Y chë trigo yojuájua y ya yojtseshajuana orna, chë bacna shácuanënaca yojuábocna.

<sup>27</sup> As chë peonga imojá chë nduiño jauyanama: ‘Bacó, chë jajañe tsabe jénaye tconjanjé y as, ¿ndáyeca chë bacna shácuana chiñe tojuábocna ca?’

<sup>28</sup> Y chë nduiño yojáuyana: ‘Atsbe uayayá chca tojama ca.’ Chora chë peonga imojatjaye: ‘¿Quectseboše bēnga fchayá chë bacna shácuana jetsejashtsētsama ca?’

<sup>29</sup> Pero chë nduiño yojáuyana: ‘Ndoñe. Chë bacna shácuana šmojtsejashtsētsana ora, chë trígnaca šmattsejashtse ca.

<sup>30</sup> Más tsabana, cachcá mochjon̄yaye cán̄yiñe chaójuama, chë jaja saná játbanama tempo chaojobuáchēntscuana. Chora chë trabájayēnga chanjichamuá y chanjámēndaye natsana chë bacna shácuana chamotsejashtsētse y chamotsentsacuacjuá jtsejuin̄yiyama, y chentšana chë shajuana chamuatbaná y atsbe grano uaquēcnaye yebniñe chamotsatsuamá ca’ ” —Jesús tojánayana.

### *Chë mostaztiye jenayama cuento*

*(Mc 4.30-32; Lc 13.18-19)*

<sup>31</sup> Jesús mēntšanaca tojanacuntá: “Bēngbe Bētsabe amēndayana endmēna mo can̄ye mostaza betiye jenaycá, can̄ye boyabása chabe jajañe yojáje.

<sup>32</sup> Ndegombre, n̄yetsca jenayēngama chë mostaza jénaye chë más bāsetema endmēna, pero tojójua orna, chë jajañentse chë más bēts betiye jóbemana. Tša bēts betiye jtsemnana, chíyeca ba buacuashangá jtsabomnana y chë jaja shloftšēnga jana y chiñe uajajonētemēngá jauábopormana ca” —Jesús tojánayana.

### *Chë levadura cuento*

*(Lc 13.20-21)*

<sup>33</sup> Quem in̄ye cuétnaca tojanēyana: “Bēngbe Bētsabe amēndayana endmēna mo levadurcá; can̄ye shembása chana jenájuabana unga medida arnin̄yañe, n̄yetsana chauabochama ca.”

### *Ndáyeca Jesús entšanga cuentēngaca yojanabuayiyá*

*(Mc 4.33-34)*

<sup>34</sup> Jesús n̄yetsca chë soyēngama lempe cuentēngaca entšanga jtsētsētsnayana, y cuentēngaca ndóñesna ndoñe yonjanoyebuambná.

<sup>35</sup> Chca yojamna ndayá cachcá chaochnēnguama ntšamo chë Bēngbe Bētsabe juabna oyebuambnayá tojanayancá, mēntšá:

Jabuátambamna cuentēngaca chanjóyebuambaye;

chanjayana chë iytēmena soyēngama y chë entšanga ndoñe mondētatsēmo soyēngám̄naca;

Bēngbe Bētsá quem luare tojanma orscana chë soyēnga yomna ca —cha tojánayana.

### *Chë tríguañe bacna shácuana cuentama Jesús tojanabuayená*

<sup>36</sup> Chentšana Jesús chë entšanga tojtanichamó y yebnoye tojtanamáshēngo. Chentšana chabe uatsjēndayēnga tmojanimpadá ndayá chë bacna shacuanama cuento betsayancá chauabuayenama.

<sup>37</sup> As Jesús tojanēyana: “Chë tsabe jénaye jená endmēna chë Bēngbe Bētsá Entšá tbojanbemá,

<sup>38</sup> y chë jajañna, quem luare. Chë tsabe jénaye entsemna chë Bēngbe Bētsabe amēndayoye mochjámashjna entšanga, y chë bacna shácuana entsemna chë bacna bayējēngbe amēndayabe entšanga,

<sup>39</sup> y chë uayayá, chë bacna shácuana yojáje chana, Satanás. Chë jaja saná atbanayana entsemna chë quem luare jopochócama chaojobuache ora, y chë trabájayēngna chë angelotēmēnga.



<sup>40</sup> Ntšamo chë bacna shácuana jtsejashtsëtsana y iñoye jtsatmetšana jtsejuinýiyama, cachcá echántsemna quem luare jopochócama te.

<sup>41</sup> Chorna, chë Bëngbe Bëtsá Entšá tbojanbemá chabe angelotémënga echanjichamuá chë ínýënga bacna soye chamomama amënga y chë bacna soyënga amënga chabe amëndayentsana chamotsajuanayama.

<sup>42</sup> Y chora chëngbioye chë uabouana íñeshoye mochantsësetjango y chentše puerte mochanjenóbošachna y chë tsetšanama juatsašënga mochantsenoftësjojnaye.

<sup>43</sup> Chora, chë ntšamo Bëngbe Bëtsá yomandacá amëngna corente mo shinýcá mochantsebuashinýinýana chëngbe Taitá, Bëngbe Bëtsabe amëndayoca. Chë joudenama tmojtsobenënga, šmochjouena ca” —chora Jesús tojánayana.

### *Chë fshantsiñe uaiytëmena bomnanama cuento*

<sup>44</sup> “Bëngbe Bëtsabe amëndayana endmëna mo chë fshantsiñe uaiytëmena bomnancá. Canýe boyabása chë bomnana yojuinýëna y chentšana iytëcana cachentše yojesatbontsá. Corente oyejuayá yojtá, nýetsca chabe bomna soyënga yojetsatobuiye y chentšana chë fshantse yojtobuámiñe ca” —Jesús tojánayana.

### *Chë corente uámana fiantse ndëtsëtémama cuento*

<sup>45</sup> “Mo canýe entšá uámana fiantse ndëtsëtémënga obuamnañacánaca endmëna chë Bëngbe Bëtsabe amëndayana.

<sup>46</sup> Chana, canýe corente uámana ndëtsëtëma yojínýëna ora, yojtá y lempe chë inabomna soyënga yojetsatobuiye y chë ndëtsëtëma yojtobuámiñe ca” —Jesús tojánayana.

### *Chë atarraiëshama cuento*

<sup>47</sup> “Bëngbe Bëtsabe amëndayana endmëna mo canýe atarraiëshacá, buyeshoye jutšenana y nýetsca beonga jashebuáyana.

<sup>48</sup> Chë atarraiëshá jútjena tojtsamna orna, chë beonga ashebuánayënga jtsashëbjátsëcana, tsachoye juyambana y chentše juatbemana chë beonga jabocacayama; chë tsábënga sbarëquënguiñe juatsuámana y chë ndoñe tsábënga jtsëtsanana.

<sup>49</sup> Cachcá echanjochnëngo quem luare jopochócama tempo chaojobuache ora. Chë angelotémënga mochanjábocana chë tsábe entšángbentsana bacna entsanga jaluárama,

<sup>50</sup> y chë bacna entsangna chë uabouana íñeshoye mochántsatquëcjaye, y chentše puerte mochanjenóbošachna y chë tsetšanama juatsašënga mochantsenoftësjojnaye ca” —Jesús tojanacuntá.

### *Anteo y tsëm uámana bomnana*

<sup>51</sup> Chora chabe uatsjëndayënga Jesús tojanatjá: —¿Lempe chama quecmojtsësertana ca? Y chënga tmojanjuá: —Arseñor, aíñe ca.

<sup>52</sup> As Jesús tojanéyana: —Canýe ley abuatambayá jtsetatšëmbuana ndayá Bëngbe Bëtsá tempo Moisesbiajana yojanoyebuambná soyëngama. Ntšamo Bëngbe Bëtsabe amëndayana bëtsemnama cha tojtsatsjendá orna, mo canýe yebnentsa nduiñcá cha jtsemnana. Chë nduiñna chabe grano uaquëcjnaye yebnocana anteo y tsëm uámana bomnana juabocnana. Cachcá chë ley abuatambayá, Bëngbe Bëtsabe soyëngama jtsabuátambayana chë tempo Bëngbe Bëtsá tojanoyebuambá soyëngama y chë tsëm soyëngnaca Bëngbe Bëtsabe amëndayama ca —tojanéyana.

### *Jesús Nazaretoca*

*(Mc 6.1-6; Lc 4.16-30)*

<sup>53</sup> Jesús chë soyënga jacuéntama tojanpochocá ora, chentšana tojtsanoñe.

<sup>54</sup> Y cachabe luaroye tojtanashjango y chentša judiëngbe enefjuana yebnentše tojanontsé jabuátambama. Entšanga ojnánënga imojtsichamo: —¿Chë lempe yojtsetatšëmbcá ndëmoca mua tojuatsjinýe ca? ¿Ntšamo nantsobena chca bëts soyënga jamama ca?

<sup>55</sup> ¿Mua ndoñe yondmëna chë calpinterbe uaquiñá y chabe mamá ndoñe María? ¿Mua ndoñe yondmëna Santiago, José, Simón y Júdasbe catšata,

<sup>56</sup> y chabe uabénanga ndoñe muentše bëngaftaca mondoyena? ¿Ndayentsana lempe chca mua yojtsebomna ca? —chënga imojtsichamo.

<sup>57</sup> Y chë causa chë entšanga tmojanotjayaná y ndoñe imontseboše cha joyeunayana. Pero Jesús tojanëyana: —Nýetsquénache canýe Bëngbe Bëtsabe juabna oyebuambnayá bëtsá jabemëngana, pero cachabe luarentše, cachabe yebnentše ndoñe ca.

<sup>58</sup> Chíyeca chentše Jesús ndoñe tonjëftsanma ba bëts soyënga Bëngbe Bëtsabe obenánaca, chë entšanga chábeñe ndoñe montsanošbuaché causa.

## 14

### *Ntšamo Juan chë Ubayaná tojanóbana*

*(Mc 6.14-29; Lc 9.7-9)*

<sup>1</sup> Chë tempo, Rey Herodes, chë Galileoca mandayá tojanuena ntšamo nýetsca entšanga Jesucristbiana imojtsichamcá.

<sup>2</sup> As cha chabe oservénënga tojanëyana: “Mua Juan chë Ubayaná ctsemna, obanënguentšana tojtayena, chíyeca chca obenana bëts soyënga jamama yojtsebomna ca.”

<sup>3</sup> Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámíama. Herodes chca tojanma Herodíasbe causa, chabe catšata Felipbe shema.

<sup>4</sup> Juan Heródesbioye mëntšá ibnauácacana: “Ndoñe quenátslesenciana aca acbe catšatbe shémaftaca jobouamayama, acbe catšata cabá ainá yotsomñe ora ca.”

<sup>5</sup> Y chama Herodes yojtseboše Juan jóbana, pero entšangbiana yojtsauatja, er chënga innajuabnaye Juan ndegombre Bëngbe Bëtsabe obenánaca yojanoyebuambná ca.

<sup>6</sup> Pero Heródesbe cumpleaño oboyejuaye ora, Herodíasbe bembe entšangbe delante tojanlantsá y Herodes puerte chama yojtsóyejuaye.

<sup>7</sup> Chíyeca Herodes, jajúrase, tbojanšbuachená ndayánaca jatšetayana, ntšamo tbojotjañcá.

<sup>8</sup> Y Herodíasna lempe bémbëbioye ibojabuayená ntšamo Herodes jojuama. As chë bembe tbojaníyana: “Canýe šcneniñe Juan chë Ubayanabe bestšaše šmatšetá ca.”

<sup>9</sup> Herodes chë soyama tbojanongmé, pero chë ófjanëngbe delante jajúrase tbojanšbuachená causa, yojamánda chca chaotsemnama.

<sup>10</sup> Y as tojanmandá chë Juan yojanëtámenoca chabe bestšaše chamuetséstjanguama.

<sup>11</sup> Chentšana, canýe šcneniñe chë bestšaše tmojanamba y chë tobiáše tmojanëntšabuaché y chana, chabe mamábioye.

<sup>12</sup> Chentšana, Juanbe ústonënga tmojánashjajna, chabe cuerpo tmojésanocñe y tmojána jauátbontsama. Y chora, Jesús yojtsemnoye chënga tmojána y chë soyëngama tmojan-cuentá.

### *Jesús shachna uaranga boyabásenga saná tojanacaredadó*

*(Mc 6.30-44; Lc 9.10-17; Jn 6.1-14)*

<sup>13</sup> Jesús chca tojanuena ora, canýe barquëshañe tojtsanoñe canýe bën luaroye, entšanga ndoyena luaroye. Pero entšanga chama imojátatšëmbona y chë publënguentšana tmojánbocana shecuátšëca cha juastama.

14 Chentšana, chë barquëshoicana tojtanastjango ora, Jesús ba entšanga tojánanÿe, chë cha tmojánguanguënga. Chëngbiamá tbojanongmé y chë entšanguentsana ba šoquënga tojanashná.

15 Ya jetiñe yojtsemna, chíyeca chë uatsjéndayënga Jesúsbioye tmojanobeconá y tmojanianyana: —Ya jetiñe entsemna y quem luariñe ndocná quenatiyena. Entšanga cuantichamuá, pueblotémëngoye chamotsoñama, saná chamobuámiñama ca.

16 As Jesús tojanéjua: —Ndoñe quenátsiyta chënga chamotsatoñama. Tsëngaftanga saná smochjacaredádaye ca.

17 Y chënga tmojanjúá: —Muentše tondaye queftsátsbomna; nÿe shachna tandëse y uta beónata ca.

18 As Jesús tojanéyana: —Chë soyënga moye miyëbo ca.

19 Chentšana Jesús tojanmandá entšanga chamoshëntsjatbiamama. Chorna, chë shachna tandëse y chë uta beónata tojanca, celoye tojanontješé y Bëngbe Bëtsábioye chama tbojtanchuá. Chora chë saná tojanjatá, chabe uatsjéndayënga tojanëjátaye, y chëngna nÿetsca entšanga tmojanacaredadó.

20 Nÿetsca entšanga tmojanse jtoshachaye nÿetsá y cabá chë ojamnëtémëngaca bnëtsana uta sbarëcua tmojanajutjé.

21 Chë tmojansënga imojamna mo shachna uaranga boyabásenga, shembásenga y básenga ntjacuntacá.

*Jesús béjaye juatsbuacá yojtsaye  
(Mc 6.45-52; Jn 6.16-21)*

22 Chentšana, Jesús chabe uatsjéndayënga tojanamëndá chë barquëshoye jtamashj-  
nama y chë uafjónaye chenguánoica chabe natsana jashjajnana. Chëntscuana Jesús  
entšanga yojtichamuá.

23 Nÿetscanga tojtanichamó orna, Jesús canÿe tjoye tojántsjua canÿa jtsemnama, Bëngbe  
Bëtsáftaca jencuéntama. Yojaibétata ora, cha canÿa chentše yojtsemna,

24 y chë barquëshana tsachocana bënoca yojtsamna. Y chë olëshënga chë barquëshá  
yojtsájantšetaye, chë binÿia chëngbe contra yojtsemna causa.

25 Ya bínÿanoyna, Jesús chëngbioye yojobeconá; béjaye juatsbuacá yojtsaye.

26 Chabe uatsjéndayënga chca cha tmojáninÿe orna, tša imojochauatjaná y puerte  
auatjanánënga tmojanoyó: —¡Canÿe añemëse entsemna ca!

27 Pero chora Jesús tojanéyana: —¡Añemo smochtsebomna, atše Jesús sëndmëna; ndoñe  
matauatjëngana ca!

28 Chora Pedro, Jesúsbioye tbojanianyana: —Bëngbe Utabná, ndegombre aca tcojt-  
semnëse, momandá atše béjaye juatsbuacá ácbioye chayá ca.

29 Y Jesús tbojanianyana: —Mabo ca.

Chora Pedro chë barquëshoicana tojánastjango y tojanontšé béjaye juatsbuacá  
Jesúsbioye jama.

30 Pero chë binÿia tša jabuache yojtsemnama tojáninÿe ora, Pedro puerte yojtsauatja y  
tbojanontšé jtsenatjëmbambana. Chíyeca cha jabuache tojanchembo: —¡Bëngbe Utabná,  
šmatsbocá ca!

31 Y cachora Jesús tbojtanobuácuëtëntsiye y tbojanianyana: —¡Tša batšatema ošbuachiyá!  
¿Ndáyeca ndoñe bëtscá átšbeñe contsošbuaché ca?

32 Chentšana chë barquëshoye chata tbojtanamáshëngo y cachora chë binÿia  
bonguana yojtsatsmëna.

33 Y chora, chë barquëshoye imojtsemnënga Jesusbe shecuatšentše tmo-  
janoshamentšé y tmojanianyana: —¡Aca ndegombre Bëngbe Bëtsabe Uaquiñá comna  
ca!

*Genesaret ca uabáinoca, Jesús ba šoquënga tojanashná  
(Mc 6.53-56)*

<sup>34</sup> Chë uafjájónaye tmojánenashbuachengo y canÿe luare Genesaret ca uabáinoeye tmojánashjajna.

<sup>35</sup> Chentša entšanga Jesús tmojantëmbá ora, chë luarentša nÿetsca entšanga chama tmojántatšëmbona. As chë entšanga chëngbe šoquënga Jesúsbioeye tmojanënatse.

<sup>36</sup> Y imojtseimpadana nÿe mo chabe entšayá sibiájuanaca juabojajuama chë šoquënga chaualesenciama. Y nÿetscanga chabe entšayá sibiájua tmojanábojajënga, shnánënga imojtsatoquédaye.

## 15

*Ndáyeca canÿe entšá Bëngbe Bëtsabe delante ndoñe tšabia nántsemna  
(Mc 7.1-23)*

<sup>1</sup> Chora básefta fariseunga y judiëngbe ley abuátambayënga, Jerusalenocana tmojánabënga, Jesúsbioeye tmojanobeconá y tmojanianyana:

<sup>2</sup> —¿Ndáyeca acbe uatsjëndayënga ndoñe montsama chë ntšamo bëngbe bëts taitanga monjanamancá ca? ¿Ndáyeca ndoñe ntsacuentšabiana ndayá jasama ora, ntšamo bënga chë judiënga fsënduamancá, Bëngbe Bëtsabe delante tšábënga jtsatsmënema ca?

<sup>3</sup> As Jesús tojanëjua: —¿Y ndáyeca tšëngaftanga ndoñe šmontsama ntšamo Bëngbe Bëtsá tojanmandacá, nÿe cach tšëngaftangbe bëtsëtsanga imnétsama soyënga jtsamama ca?

<sup>4</sup> Bëngbe Bëtsá mëntšá tojanmandá: “Acbe bëtsëtsata stëtsoye ndoñe catjáquedaye”, y “nda cachabe bëtsëtsatbiana podesca tojóyebuambase, chana jóbanama jtsemnana ca.”

<sup>5</sup> Pero tšëngaftanga šmondbétsichamo canÿe entšá canobena chabe taitá o chabe mamá jauyanana: “Lempe ntšamo sëndbomncá Bëngbe Bëtsá jasérviana entsemna, chíyeca tondaye quetsátsbomna aca juajabuáchama ca”;

<sup>6</sup> y šmondbétsichamo nÿe ndánaca chca tojayanëse, ya ndoñe ntsemnana chabe taitá o chabe mamá stëtsoye ndoñe ntjaquédana, ni ntjuajabuáchana ca. Y chca, tšëngaftangbiana tondaye ntsámanana ntšamo Bëngbe Bëtsá tojanmandacá, y aïñe šmontsama ntšamo tšëngaftangbe bëtsëtsanga imojanamancá.

<sup>7</sup> ¡Bacna entšanga, ntšamo ndegombre šmojuabnacá ndinÿinÿayënga! Nÿe tšabá chë Bëngbe Bëtsabe juabna oyebuambayá Isaías tšëngaftangbiana tojanoyebuambá, mëntšá tojánayana ora:

<sup>8</sup> Bëngbe Bëtsá tonjayana: “Quem entšanga mondbétsichamo Bëngbe Bëtsá tša tšabia yomna ca; chca nÿe uayásaca, pero chëngbe ainanentše atšbiana ndocna tšabe juabnëngaca.

<sup>9</sup> Chënga nÿe bonamente mondbétsichamo: Bëngbe Bëtsá tša tšabia yomna ca; chënga nÿe entšangbe mandënga jtsabuátambayana y Bëngbe Bëtsabe mandënga ndoñe ca” —cha tojánayana.

<sup>10</sup> Chentšana Jesús entšanga tojánachembo y tojanéyana: —Smochjouena y chacmësertá.

<sup>11</sup> Ndayá entšá tojtsesacá, ndoñe quebochátsbema Bëngbe Bëtsabe delante ndoñe tšabia. Inÿetšá comna: ndayá entšá tojtsejuabná y tojtsoyebuambnacá endobena cha jabemana Bëngbe Bëtsabe delante ndoñe tšabia ca.

<sup>12</sup> Chora chë uatsjëndayënga Jesúsbioeye tmojanobeconá y tmojanianyana: —¿Quéctsetatšëmbo, ntšamo tconjayanama chë fariseunga ndoñe tšabá chenatëúnana ca?

<sup>13</sup> As Jesús tojanëjua: —Ndaye betiye atšbe Taitá celocá ndoñe tonjájese, tbëtëjocana mochántsejashtse. Cachcá echanjama chë nÿe entšangbe buatëmbana soyëngaca.

14 Cachcá mónjaye; chënga montsemna mo jtanënga inye jtanënga unachayëngcá. Y canye jtaná inye jtaná tbojtsánachase, nyets útata canye tbuabentse bochanjetsótsatse ca —Jesús tojánayana.

15 Chora Pedro, Jesúsbiowe tbojanियana: —Ntšamo chë cuento bétsayanama šmabuayená ca.

16 As Jesús tojanějua: —¿Tšëngaftángnaca cabá ndoñe cmontsësertana ca?

17 ¿Cabá ndoñe cmontsësertana lempe ntšamo šmojascá uafsbioye jomashënguana y chentšana cuerpentšana jtabocnana?

18 Pero ntšamo šmojtsoyebuambnacana lempe ainanocana jtsóbocanana y chë soye endobena tšëngaftangbioye Bëngbe Bëtsabe delante ndoñe tšábenga jábiamana.

19 Ainanocana jtsóbocanana bacna juabnënga: jenóbama, shema o boyábioye ínÿaftaca jaíngñama, shembása o boyabásaftaca bacna soye jamama, jatbëbama, jobostërama y ínÿabiama jtsayátsenayama.

20 Chë soyënga cocayé jtsobenana entšábioye Bëngbe Bëtsabe delante ndoñe tšabia jabemama; pero chë ndoñe ntsacuentšabiana ndayá jasama ora, ndoñe ntsoobenana Bëngbe Bëtsabe delante ndoñe tšabia jabemama ca —Jesús tojánayana.

*Canye shembása inye luarocana ashjargoná Jesúsbeñe yojtsošbuaché  
(Mc 7.24-30)*

21 Jesús chentšana, Tiro y Sidón luarëngoye tojtsanoñe.

22 Canye shembása Caná luarocá chentše inoyena; cha Jesúsbiowe yojobeconá y mëntšá yojtsáyebuache: —¡Utabná, Rey Davidbentšana Entšá, šmotselastemá! ¡Atšbe bembe puerte entsesufrina, bacna bayëjbe juabna entsebomna causa ca!

23 Jesús ndocá tbonjanjuá. As chabe uatsjëndayënga tmojanobobeconá y tmojanimpadá: —Chë shembása mëyana chaotsatoñe; bëngbe ústonoye yapa entsáyebuache ca.

24 As Jesús tojánayana: —Bëngbe Bëtsá atše šonjichmó jtsanÿenama nÿe chë entsanga, chë mo ótsena oveshëngcá imomnënga Israeloquënga, y chë ndoñe judiëngna ndoñe ca.

25 Pero chë shembása tojána, Jesusbe shecuatšentše tojanoshamentšé y tbojanियana: —¡Utabná! Diosmanda pavor šmotsebema. ¡šmotsajabuache ca!

26 Y Jesús tbojanjuá: —Chë judiënga mondmëna mo Bëngbe Bëtsabe basengcá y atše ácbioye tbojuajabuache y chëngbioye ndóñesna, nántsemna mo chë básengbe saná chënga cuaftsëbaquëcá y quešënga ftsëbuajocá. Chca jamana ndoñe tšabá quenátsmëna ca.

27 As cha tbojanjuá: —Arseñor. Pero chë quešëgnaca chëngbe nduiñëngbe mesëshentšana tmojatquëcjanatemënga mondbase, chë nduiñënga tmojtsesá ora. Chcasna, Diosmanda šmotsajabuache ca.

28 Chora Jesús tbojanियana:

—¡Shembása, Bëngbe Bëtsábeñe tša ošbuachiyá comna! Ntšamo cojtsebošcá chca chaotsemna ca.

Y cach orscana chabe bembe tšabá yojtsatsmëna.

*Jesús ba šoquënga tojanashná*

29 Jesús chentšana tojëftsanbocna y chë Galilea uafjajónaye tsachoye tojána. Chentšana, canye batsjoye tojántsjua y choca tojanótbema.

30 Mallajta entsanga Jesús yojtsemnentše tmojánashjajna, y coshetënga, jtanënga, tšabá jobónjuama ndobenënga, ndëbianga y ba šocana bomnënga imojtsënachaye. Jesusbe shecuatšentše tmojanëshejango y cha nÿetscanga tojanashná.

31 Y chca orna, chë entsanga tmojáninÿe: chë ndëbianga imojtsatoyebuambná, chë tšabá jobónjuama ndobenënga tšabá imojtsatsmëna, chë coshetënga tšabá imojtsatana y chë jtanëngna yojtsëbinÿna; y chama chënga corente ojnanánënga imojtsemna. Chora chënga tmojanontšé jëtschuayana chë Israelentša entsanga imojánadorana Bëngbe Bëtsá.

*Jesús canta uaranga boyabásenga saná tojanacaredadó  
(Mc 8.1-10)*

<sup>32</sup> Chentsana Jesús, chabe uatsjédayënga tojánachembo y tojanéyana: —Quem entšangbiana šontsengmena, er ya unga te chënga átšeftaca muentše montsemna y jasama tondaye quemátsbomna. Atše ndoñe quetsátsboše ntjascá cachëngbe yebnoye chënga jtichamuana, er benachiñe shëntsama nantsabuatëcja ca.

<sup>33</sup> As chabe uatsjédayënga tmojantjá: —¿Ntsámo muatjobenaye quem luarentše, ndocna entšá ndoyenentše, chëfta entšangbiana saná jinýenama ca?

<sup>34</sup> Y Jesús tojanatjá: —¿Bueta tandëse šmojtsebomna ca?

Y chënga tmojanjuá: —Canýsëfta tandëse y básefta beonatémënga ca.

<sup>35</sup> Chora Jesús tojanamëndá nýetsca entšanga fshantsiñe chamotbiamama.

<sup>36</sup> As chë canýsëfta tandëse y chë beonatémënga tojanca; Bëngbe Bëtsábioye chama tbojtanchuá, chë saná tojanjatá y chabe uatsjédayënga tojanëjatá. Chentsana nýetsca entšangbioye tmojanacaredadó.

<sup>37</sup> Nýetsca entšanga tmojanse jtoshachaye nýetšá. Y chentsana cabá canýsëfta bëts sbarëcua tmojanajutjé chë tojanójamëtemëngaca.

<sup>38</sup> Chë tmojansënga imojamna canta uaranga boyabásenga, shembásenga y básenga ntjacuntacá.

<sup>39</sup> Chentsana Jesús, chë entšanga tojtanichamó, barquëshoye tojánamashëngo y Magadán luaroye tojtsanoñe.

## 16

*Chë fariseunga y saduceunga tmojánbošena Jesús chaoma canýe bëts soye  
(Mc 8.11-13; Lc 12.54-56)*

<sup>1</sup> Fariseunga y saduceunga tmojána Jesús jinýama, y jisháchichiyama imojtseimpadana canýe bëts soye chaoma, as jtsetatšëmbuama Jesusbe obenana ndegombre Bëngbe Bëtsábiocana tainóbocanama.

<sup>2</sup> Pero Jesús tojanëjua: “Tšëngaftanga jetiñoye šmondbétsichamo: ‘Yëfse tšabe te echántsemna, er celoca buánganiñe entsemna ca.’

<sup>3</sup> Y cachëse šmondbétsichamo: ‘Mënté echanjuafté, er celoca buánganiñe y ibetiñe entsemna ca.’ Tšëngaftanga celoye jontješiyëse, ntšamo chë tempo yochtsemnama tša tšabá jayanama šmojtsobenëse, ¿ndáyeca ndoñe šmontsobena jtsetatšëmbuana ndaye bëts soye Bëngbe Bëtsá quem tempo cmojtsinýanýnama?

<sup>4</sup> Quem puerte bacna entšanga y ndošbuáchiyënga montseboše atše canýe bëts soye chaima, obenana jinýanýiyama; pero ndoñe chca quemochátinýe, sinó nýe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soycá ca” —Jesús tojánayana.

Chora Jesús tojésanabashejuana y chentsana tojtsanoñe.

*Jesús tojanabuayená chë fariseungbe buatëmbana soyëngama  
(Mc 8.14-21)*

<sup>5</sup> Chë uafjajónaye chenguanocana chënga tmojtanabo ora, chë uatsjédayënga yojësebnëjtjomba tandëse jesocñana.

<sup>6</sup> Chora Jesús tojanéyana: —Smochtsantješna; cuedado smochtsebomna chë fariseunga y saduceungbe levadurama ca.

<sup>7</sup> Pero chë uatsjédayëngna imojtsenatsëtsnaye: —Chca entsichamo, bënga tandëse ndoñe tmonjesocñama ca.

<sup>8</sup> Jesús chë soye yojtsetátšëmbo; chíyeca mëntšá tojanéyana: —¿Ndáyeca tandëšama šmojtsenatsëtsná ca? ¡Tša batšatema ošbuáchiyana šmobomna!

<sup>9</sup> ¿Cabá ndoñe cmontsësertana y ndoñe šmontsabouínýna chë shachna tandëšentšana shachna uaranga entšanga sënjanëjuatšema y bnëtsana uta sbarëcua šmonjánajutjema?

10 ¿Y ndoñe šmontsabouínÿna chë canÿsëfta tandësentšana canta uaranga entšanga sënjanëjuatšema y canÿsëfta sbarëcua šmonjánajutjema?

11 ¿Ndáyeca ndoñe cmontsësertana atše tandëšama ndoñe sëntsóyebuambnama? Cuedado šmochtsebomna fariseunga y saduceungbe levadurama ca —Jesús tojanéyana.

12 As chora chë uatsjéndayënga tojanësertá, Jesús ndoñe tonjánayana chë tandësentša levadurama cuedado jtsebomnana ca, sinó ndayá chë fariseunga y saduceungbe bu-atëmbana soyëngama.

*Pedro tojánayana, Jesús chë Cristo bétsemnama  
(Mc 8.27-30; Lc 9.18-21)*

13 Jesús, Cesarea de Filipo luaroye tojánashjango ora, chabe uatsjéndayënga tojanatjá: —¿Nda ca entšanga imojtsichamo chë Bëngbe Bëtsá Entšá tbojanbemá yojtsemna ca?

14 Chënga tmojanjuá: —Báseftanga montsichamo Juan chë Ubayaná ca, ínÿengna Elías ca, ínÿengna Jeremías y ínÿengna tempsca inÿe Bëngbe Bëtsabe juabna oyebuambnayá ca.

15 As Jesús tojanatjá: —Y tšëngaftangna, ¿nda atše bétsemnama ntšamo šmochjayana ca?

16 Chora Simón Pedro tbojanjuá: —Acna chë Bëngbe Bëtsabe Uámana Uabuayaná condmëna, chë Bëngbe Bëtsá Ainabe Uaquiñá ca.

17 Y Jesús tbojanayana: —Simón, Jonasbe uaquiñá, oyejuayá cochanjoyena. Ndocna quem luarentša entšá chë soye checmatinÿinÿé, sinó atšbe Taitá, celoca endmënë.

18 Y mëntšánaca cbëyana: Mora acna Pedro o chë ndëtšbecá contsemna, y chë ndëtšbeñe atšbe bëtš yebna chanjajebo, y ni Satanás, chabe obenánaca entšá jóbanama, queochato-benaye jtsepochócama.

19 Atše chochanjátšetaye obenana, mo llavëfjá, entšanga Bëngbe Bëtsabe amëndayoye jamashënguama chamobenama. Bëngbe Bëtsáftaca chacojtsencuënta ora, canÿe soye ndoñe chaondëtsemna ca chacojayanëse, Bëngbe Bëtsá cachcá echanjayana. Y cháftaca chacojtsencuënta ora, canÿe soye aíñe chaotsemna ca chacojayanëse, Bëngbe Bëtsá echanjayana aíñe chca chaotsemna ca —Jesús tbojanayana.

20 Chentšana chabe uatsjéndayënga tojanamëndá ndocnábeñe ntsecuëntayana cha, Jesús, chë Bëngbe Bëtsabe Uámana Uabuayaná, chë Cristo bétsemnama.

*Jesús tojánayana cha ibojamna jóbanana y jtayenana ca  
(Mc 8.31-9.1; Lc 9.22-27)*

21 Chorscana Jesús tojanontsé chabe uatsjéndayënga jábuayenana cha ibojtsemna Jerusalenoye jama, y chocna chë bëtšëjemëngcá mándayënga, chë judiëngbe bachnangbe amëndayënga y chë ley abuátambayënga mochjanma cha puerte chaopadecema ca. Tojanéyana cha mochjanóba, pero unga tianoye yochtanayena ca.

22 Chora Pedro, Jesúsëftaca tojanoluaré y tojanontsé mëntšá uatsëtsnayana: —¡Atšbe Utabná, Bëngbe Bëtsá ndoñe chaondëlesenciá chca chaopasama! ¡Ndocna te quenaisopodena chca ácaftaca jopásana ca!

23 As Jesús tojanobuértana y Pédrëbioye tbojanayana: —¡Satanás, átšbentšana mojuaná! ¡Aca contseboše atše canÿe bacna soye chaócochënguama! Pedro, acbe juabnënga Bëngbe Bëtsábiocana ndoñe quenatóbocana, sinó nÿe entšángbentšana ca.

24 Chentšana Jesús chabe uatsjéndayënga tojanéyana: —Nda atšbe uatsjendayá jtsemnama tojtseboše, cháuyana nÿe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonÿá atše juastama, y atšbiama jasúfriama chaotseprontana y cruciñe jobanámnaca.

25 Nda tojtsama quem luarentše bëtscá soyënga jtsebomnama y atšbiama jasúfriama ndoñe tontseprontana, chë nÿetsca tescama yomna tšabe vida echanjopérdia. Pero nda quem luarentša soyënga cachcá tojëftsonÿá atše juastama, masque chaóbana, chë nÿetsca tescama yomna tšabe vida echántsebomna.

<sup>26</sup> ¿Ndayama entsá buanjóservia nyetsca quem luarentša soyënga jtsebomnana, chë nyetsca tescama yomna tšabe vida tojtsoperdese? Ndegombre, canye entsá chë nyetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nyetsca tescama yomna tšabe vida jtsebomnana.

<sup>27</sup> Chë Bëngbe Bëtsá Entšá tbojanbemá, chabe Taitabe obenánaca y puerte buashinÿinÿaniñe echanjabo chabe angelotémëngaftaca, y chora cada cánÿabioye bochantatšetaye cachcá ntšamo cada ona tojëftsemcá.

<sup>28</sup> Ndegombre šcuayana: Báseftanga muentše montsemnënga ndoñe quemochatóbana, Bëngbe Bëtsá Entšá tbojanbemá amëndayacá jabana ntjëftsinÿcá ca —Jesús tojánayana.

## 17

### *Jesús inÿetsá tojanobinÿná* (Mc 9.2-13; Lc 9.28-36)

<sup>1</sup> Chentšana chnënguana tianoye, Jesús tojëftsanëbiatše Pedro, Santiago y chabe catsata Juan, y inÿoye tojanënatse nÿe chënga, canye bëts tjoye.

<sup>2</sup> Chentše, chëngbe delante inÿetsá cha tojanobinÿná. Chabe jubiá shinÿcá yojtsebuashinÿinÿana, y chabe uichëtjonëjuangana mo binÿiniñcá uafjantsëjuangá yojtsamna.

<sup>3</sup> Chca orna, chabe uatsjëndayënga tmojáninÿe Moisés y Elías tbojanobinÿná, Jesúseftaca encuëntaye.

<sup>4</sup> Chora Pedro, Jesúsbioye tbojanianya: “Bëngbe Utabná, jtša tšabá bëngbiana cuanmëna muentše jtsemnana ca! Tcojtsebošëse, unga tambotémënga atše chjapórma: cánÿetema acbiana, inÿetema Moisesbiana y inÿetemna Elíasbiana ca.”

<sup>5</sup> Pedro chca yojtsóyebuambnantscuana, canye buashinÿinÿana jantšetëshe nyetscanga yojáutsbotse. Y chë jantšetëshoicana canye oyebuambnayana tmojanuena mëntšá: “Mua atšbe bonshana Uaquiñá endmëna, atše chabiana sëntsoyejuá. Cha šmochtseyeunana ca.”

<sup>6</sup> Y chë uatsjëndayënga chca tmojanuena ora, tmojanoshamentšé y jubiaca fshantsóntscoñe tmojanotsejbéna, puerte auatjanánënga.

<sup>7</sup> Chora Jesús chabe uatsjëndayëngbioye tojanobeconá, tojánabojajo y tojanëyana: “Matëtsbananga; ndoñe matauatjëngana ca.”

<sup>8</sup> Y tsbanánoye tmojanontješé ora, Jesús nÿe canya tmojáninÿe, ndocná inÿa más.

<sup>9</sup> Chë tjocana imojtsatstsmaye ora, Jesús tojanamëndá: —Bëngbe Bëtsá Entšá tbojanbemá obanënguentsana candëtayenëntscuana, ndocnábeñe chë šmonjinÿe soyama šmattsecuëntaye ca.

<sup>10</sup> As chë uatsjëndayënga Jesús tmojantjá: —¿Ndáyeca chë ley abuatambayënga mondbétsichamo, canmëna Elías jabana chë Bëngbe Bëtsabe Uámana Uabuayanabe natsana ca?

<sup>11</sup> Chora Jesús tojanëjua: —Ndegombre canya Eliascá natsana echanjabo y ntšamo jtsemnana yomncá, lempe echánjabatsma ca.

<sup>12</sup> Pero atše cbëyana, canya mo Eliascá ya tonjabo, entsanga ndoñe chematanotëmbá y cháftaca entsanga tmonjanma lempe ntšamo tmojanbošencá. Y cachcá, chë Bëngbe Bëtsá Entšá tbojanbemá entsangbe cucuatšiniñe echanjasúfria ca —Jesús tojánayana.

<sup>13</sup> Chora chë uatsjëndayënga tojanësertá, Juan chë Ubayanabiana Jesús chca yojtsëtsëtsnama.

### *Jesús, canye bacna bayëja tbojanbojuaná* (Mc 9.14-29; Lc 9.37-43)

<sup>14</sup> Entšanga imojtsemnoye chënga tmojtanashjajna ora, canye boyabása tojanobeconá, Jesusbe natsanoica yojshamentšiyey y tbojanianya:

<sup>15</sup> —Utabná, atšbe uaquiñá motselastemá. Cha ataque bontsësháchichana y puerte entsesufrina, er cha inÿe ora iñoye jtseshajayana y inÿe orna, buyeshoye jtsoshbuetšana.



<sup>16</sup> Acbe uatsjéndayëngbioye cha sënjuánatse y ndoñe chematobená jtseboshnama ca — cha tbojaniana.

<sup>17</sup> As Jesús tojánayana: —¡Nÿetsá ndošbuáchiyënga y bacna entsanga ca! ¿Bue-tayté šojtsemna tsëngaftangaftaca jëftsemnana? ¿Buetayté uantado tsëngaftangaftaca chjëftsemna? Moye chë básetema mánatse ca.

<sup>18</sup> Chora Jesús, chë basetémbeñe bacna bayëjbioye tbojanácacana y chábentsana cha tojésanbocna. Cach orscana chë básetema tsabá yojsatsmëna.

<sup>19</sup> Chentsana, chë uatsjéndayënga luaroca Jesúseftaca tmojanoyebuambá y tmo-janiyana: —¿Ndáyeca bënga ndoñe fsënjobená chë bacna bayëja jtabocnama ca?

<sup>20</sup> Y Jesús tojanëyana: —Tsëngaftanga tša batsatema ošbuáchiyana bomna causa. Ndegombre šcuayana: tsëngaftanga batsatema ošbuáchiyana šmojtsebomñese, masque nÿe mo canÿe mostaza betiye jenaycá, quem tjoye šmatjayana: “Muentšana mojuaná y choye motsa ca”, quem tjañe chca nanjama, y tsëngaftanga lempe jamama šmattsobena.

<sup>21</sup> Pero chca bayëjënga jtëbuacnamna jobenayana nÿe Bëngbe Bëtsáftaca jencuéntase y chama tondaye ntjascá jtsemnëse ca —Jesús tojanëyana.

*Jesús cachiñe tojánayana cha ibojamna jóbana y jtayenana ca*  
(Mc 9.30-32; Lc 9.43-45)

<sup>22</sup> Jesús y chabe uatsjéndayënga cánÿiñe Galilea luaroye imojétsaye ora, cha tojanëyana: “Chë Bëngbe Bëtsá Entsá tbojanbemá entsangbe cucuatšinë mochanjáboshjona,

<sup>23</sup> mochanjóba, pero unga tianoye echántayena ca.” Chë causa chë uatsjéndayënga puerte ngmënaca imojtsemna.

*Chë Bëngbe Bëtsabe bëts yebnama impuesto jtsatsquëcjnyama*

<sup>24</sup> Jesús y chabe uatsjéndayënga Capernaumoye tmojánashajna ora, chë Bëngbe Bëtsabe bëts yebnama entsángbioye impuesto atjanayënga Pédrëbioye tmojána y tmojantjá: — ¿Acbe buatëmbayá Bëngbe Bëtsabe bëts yebnama impuesto queonÿbetsatsquëcjnyaye ca?

<sup>25</sup> Y Pedro tojanëjua: —Añe, cha endbetsatsquëcjnyaye ca.

Chentsana, Pedro chë yebnoye tojánamashëngo ora, Jesús natsana mëntsá chábioye tbo-janiyana: —Simón, ¿ntšamo catjájuaboye? ¿Quem luarentša reyënga ndëmuanyëngbioye impuesto imnétsayëngacaye y crocénana imnétsatjanaye: cach luarentše oyenëngbioye o chë inÿe luarocana ashjajnëngbioye ca?

<sup>26</sup> As Pedro tbojanjúá: —Chë inÿe luarocana ashjajnëngbioye ca.

Y Jesús tbojaniana: —Chcasna, ndoñe quešnátsmëna chë atšbe Taitabe bëts yebnama impuesto jtsatsquëcjnyana ca.

<sup>27</sup> Pero ndocná mal chabonduínÿnanamna uafjajónayoye motsa, anzuelëfjua cochjútšena y chë natsana chaojuásjana beona cochjuábocna. Cochjuayetëfjoná y choye crocénana cochanjínÿena y chánaca echanjoshjache atšbiana y acbiana jëtsjájua. Cochjëftsejatsëca y cochjatsboshjona ca —Jesús tbojaniana.

## 18

*¿Nda chë más uamaná yomna?*

(Mc 9.33-37; Lc 9.46-48)

<sup>1</sup> Chentsana chë uatsjéndayënga Jesúsbioye tmojanobeconá y tmojantjá: —¿Chë Bëngbe Bëtsábeyeca mandánëngbeñe nda chë más uamaná yomna ca?

<sup>2</sup> Chora Jesús canÿe basetëmbioye tbojanchembo y chëngbe tsëntsaca tbojanatsá.

<sup>3</sup> Y tojánayana: —Ndegombre chëyana, nda mo basetemcá ndoñe tontóbema y ndoñe chacá Bëngbe Bëtsabe soyënga tonjóyëngacñe, cha ndocna te queochatobenaye Bëngbe Bëtsabe amëndayoye jamashënguama.

<sup>4</sup> Chca, nda tojtsejuabná canÿe nduamaná yomna y quem basetemcá yomna ca, cha chë Bëngbe Bëtsabe amëndayoca chë más uamaná echántsemna.

<sup>5</sup> Y nda átšbeñe ošbuachiyá bétsemnayeca, tbojofja canya mo quem basetembioycá, chana atše jofjana ca —Jesús tojánayana.

*Resjo yomna, nderado bacna soyënga cuanjama*  
(Mc 9.42-48; Lc 17.1-2)

<sup>6</sup> “Nda canye bássetema átšbeñe ošbuachiyábioye tbojaingñé bacna soye jamama, chabiama más tšabá nántsemna canye bêts nantsnëbé chamotsetamošëntsëbua y chë mar béjaye shbuatsëntsoye chamotsashbuetše chabotsenatjëmbama.

<sup>7</sup> ¡Tša lastema quem luarentša entsangbiama, chë ínÿenga bacna soye jamama chaócochënguama tmojtsamëngbiama! Nÿets tempo chca amënga mochanjëftsemna. Pero, ¡payajema chë inÿa bacna soye chaomama tojtsamá ca!

<sup>8</sup> “Chíyeca, acbe cucuatšeca o acbe shecuaátšeca bacna soye tcojamëse, cochtsenástjango y bënoye cochtsëtšena. Acbiama más tšabá nántsemna celoye jamashënguana chë nÿetsca tescama yomna tšabe vida jtsebomnana, cucuatše ndbomná o cosheto, y ndoñe nÿets uta cucuatšeca o shecuaátšeca chë nÿets tempo echanjesomñe íñeshoye chacmotsëstjango.

<sup>9</sup> Nderado acbe bomínÿeca bacna soye tcojinÿe y cachca soye tcojama, chë bomínÿe cochtsenobuchjatsëca y bënoye cochtsëtšena. Acbiama más tšabá nántsemna, celoye jamashënguana nÿe canye bomínÿeca, y ndoñe nÿets uta bomínÿeca infierno ye chacmotsëstjango, chë bêts íñeshoye ca” —Jesús tojánayana.

*Chë ótsëna oveshabiama cuento*  
(Lc 15.3-7)

<sup>10</sup> Mëntsánaca Jesús tojánayana: “Ni mo cánÿabioye quem tsëm ošbuáchiyënguentšana, chë mo basetemëngcá mondmënënga, mo nduamanacá šmattsonÿaye. Ndegombre cbëyana, chëngbe angelotëmënga celoca, sempre atšbe Taitá celocáftaca mondetsemna ca.

<sup>11</sup> Er chë Bëngbe Bëtsá Entšá tbojanbemá tonjabo chë pochocánënga jtsemnana imojtsajnënga jabátsebacama.

<sup>12</sup> “¿Ntšamo tsëngaftanga šmatjájuaboye? Canye boyabása patse oveshënga tojtsabamna y ndeolpe canye chentša oveshá tojtsotše. ¿Chë boyabása ndoñe chë inÿe esconëfta bnëtsana y esconëfta oveshënga tjoca cachcá nanjesënÿaye, jama chë ótsëna oveshá jetsenguanguama?

<sup>13</sup> Y chë oveshá jetsinÿenama tojobenase, ndegombre chë boyabása más oyejuayá jtsemnana chë ótsëna oveshabiama, y ndoñe nÿa chca chë inÿe esconëfta bnëtsana y esconëfta oveshëngbiama chë ndoñe tmonjanotšëngbiama.

<sup>14</sup> Cachcá, tsëngaftangbe Taitá, Bëngbe Bëtsá, chë celoca endmëná, ndoñe quenátsboše ni canya quem basenguentšana mo otšenacá chaotsemna, bacna soyënga jtsamëse oyena causa ca” —Jesús tojánayana.

*Ntšamo cuanjama inÿa japerdónama*  
(Lc 17.3)

<sup>15</sup> “Nderado acbe catsata, bacna soye tcmojaborlase, cochjá, cánÿata šochjencuénta y cochjama cha chauenójuaboma, ndegombre bacna soye tcmojaborlama. Cha chacmojóyeunasna, acbe catsata cachiñe tšabá ácaftaca echántsmëna.

<sup>16</sup> Pero ndoñe tcmojóyeunasna, inÿe útata cochjáchembo chacmotjëmbambama, chca, chata chabouena ntšamo cochjauyanama y chamuayana ndegombre chca yomnama.

<sup>17</sup> Y chata ndoñe tonjóyaunase, chentša Bëngbe Bëtsábeñe ošbuáchiyënga macuntá. Y chënga ndoñe tonjóyaunasna, cochjayana cha yomna mo canya Bëngbe Bëtsábioye nduabuatmacá, mo canye ndoñe judiycá ca o canye bacna entšá mo canya Romocama impuesto entsangbioye atjanayacá yomna ca.

<sup>18</sup> “Ndegombre cbëyana: Tsëngaftanga Bëngbe Bëtsáftaca chašmojtsencuénta ora, chašmojayana canye soye ndoñe chaondëtsemna ca, Bëngbe Bëtsá cachcá echanjayana.

Y cháftaca chašmojtsencuénta ora, chašmojayana canye soye aíñe chaotsemna ca, Bëngbe Bëtsá echanjayana aíñe chca chaotsemna ca.

<sup>19</sup> “Mëntsánaca cbéyana: Nderado útata tšëngaftanguentsana quem luarentse tbojenoyeuná Bëngbe Bëtsáftaca jencuéntama ndayánaca jótjañama, Bëngbe Bëtsá chë celoca endmëná pronto chë soye cmochanjátšataye.

<sup>20</sup> Ndayentse útata o únganga tmojénefjna, átšbeñe ošbuáchiyënga bétsemnama, chentše atše chëngbe tsëntsaca chántsemna ca” —Jesús tojánayana.

<sup>21</sup> As Pedro tojána y Jesúsbioye tbojantjá: —Bëngbe Utabná, ¿atšbe catšata bacna soye sojaborlase, bueta soye šojtsemna cha japerdónana? ¿Canysëfta soye ca?

<sup>22</sup> Y Jesús tbojanjuá: —Ndoñe nye canysëfta soyama quecbatatsëtsná, sinó canysëfta bnëtsana soye canysëfta ca.

### *Ndayá inopása chë japerdónama ndëbošëngaftaca*

<sup>23</sup> Mëntsánaca Jesús tojanëyana: “Cbochanjáuyana ntšamo Bëngbe Bëtsabe amëndayana yomnana. Endmëna ntšamo canye réyefraca tojanopasacá. Cha yojábošena chabe oservënënga crocénana jtsëtjañana.

<sup>24</sup> Jtsëtjañama yojóntša orna, canye boyabása imojuánatse, chë réybioye mallajta crocénana ibnandebena.

<sup>25</sup> Chë oservená tondaye yonjábomna chë ndebénama jëtsjájua; asna chë rey yojamánda cha chamotsiye nyets tempo nye ínÿabiana chaotsoservénama, chabe shema y chabe básengnaca, y lempe ntšamo yojanbomncánaca, y chca chë ndebénama jtopágama.

<sup>26</sup> Chora chë oservená chë reybe shecuatšentse yojoshamentšiyey y ibojtseimpáda: ‘Taita, Diosmanda šmotsëuantajema. Atše lempe cbochanjëtsëntšabuachiye ca.’

<sup>27</sup> Chë reyna chë boyabásabiana ibojóngmia; as chë ndebénana ibojtseperdóna y ibojëtsboshjona.

<sup>28</sup> “Chë oservenana chentšana yojésebocna y benachiñe inye oservenáftaca ibojenbetše, cach mandadbiama trabajayá. Chë inye oservenana nye batšatema crocénana chábioye ibnandebena. Chora chë oservená chë enutábioye tamošajentsana ibojishache y ibojóntša jtsëtajuashbebiana y mëntsá ibojauyana: ‘¡Ndebénana šmatsëntšabuaché ca!’

<sup>29</sup> Chora cha chë oservenabe shecuatšentse yojoshamentšiyey y ibojtseimpáda: ‘Diosmanda šmotsëuantajema. Atše lempe cbochanjëtsëntšabuachiye ca.’

<sup>30</sup> Pero chë oservená ndoñe yonjábošena, sinó yojama chë inye oservenábioye cárceloye chamotsëtámiamana, chë ndebénana candëtsjájëntscuana.

<sup>31</sup> Chë inye oservënënga chca imojinÿe ora, puerte yojóngmia y imojá lempe ntšamo yojopasacá chëngbe rey jacuéntama.

<sup>32</sup> As chë rey yojamánda chë boyabása jobetšana, y ibojauyana: ‘¡Puerte bacna oservená! Sconjaimpadáyeca, nyets ndebénana tcbontseperdoná.

<sup>33</sup> Acnaca cachcá cmondmëna chë cach aquécá muentša trabájayabiana jóngmiana, ntšamo atše acbiama šonjongmecá ca.’

<sup>34</sup> Y tša chë rey ibojtsetna; as yojamánda jabuache chamotsetsetšená nyets ndebénana candëtsjájuantscuana ca” —Jesús tojanacuntá.

<sup>35</sup> Chora Jesús tojánayana: “Atšbe Taitá, celoca endmëná, cachcá tšëngaftangaftaca echanjama, tšëngaftangbe catšata ndoñe ndegombre nyets ainánaca šmonjaperdonase ca.”

## 19

### *Ndayá Jesús tojanabatambá chë bouamnënga tmojtsenëtsenama (Mc 10.1-12; Lc 16.18)*

<sup>1</sup> Chë soyënga tojánayanentsana, Jesús Galilea luarentšana tojtsanoñe y Judeoye tojánashjango, Jordán chenguánoica.

<sup>2</sup> Ba entsanga tmojanasto y chentše šoquënga tojanashná.

<sup>3</sup> Básefta fariseunga Jesúsbioye tmojanobeconá y jisháchichiyama mēntšá tmojantjá: —¿Queojtselesenciana canýe boyá nýe ndayámnaca chabe shémbioye cachcá jesonýayama ca?

<sup>4</sup> As Jesús tojanéjua: —¿Tšēngaftanga ndoñe chē Bēngbe Bētsabe uabemana palabrenguiñe šmēndualía, Bēngbe Bētsá, chē entšanga tojanabiamá, quem luare jobojátšama ora “boyá y shema tojánabiamama”?

<sup>5</sup> Y Bēngbe Bētsá tojánayana: “Chíyeca boyabása chabe taitá y chabe mamá echanjésabashejuana, chabe shémaftaca jenútanama, y chē útata mo canýacá bochántsemna ca.”

<sup>6</sup> Y chca, ya ndoñe útata quebochátsmēna, sinó mo nýe canýacá. Chcasna, entšá ndoñe chaondēndbema ndayá Bēngbe Bētsá mo canýiñcá tojéftsema soye ca —Jesús tojánayana.

<sup>7</sup> Chora chē fariseunga tmojanianana: —¿As, ndáyeca Moisés tojanmandá, chē shémbioye canýe uabemana tsbuanácha juiyiyana jtsenētšenama y cachcá jesonýayana ca?

<sup>8</sup> Y Jesús tojanéyana: —Tšēngaftanga Bēngbe Bētsabe mandēnga jójēngacñama ndoñe quešmátsboše causa, Moisés tmojanalesenciá shémbioye jesētšenana. Pero quem luare jobojátšama orna, ndoñe chca quenjatsmēna.

<sup>9</sup> Atše cbéyana, nda chabe shémaftaca tbojtsenētšena y chca tojopasá ndoñe chē shema chabe boyábioye ínýaftaca tbontseingñé causa, y chē boyá ínýaftaca tojtóbouamasna, cha chē natsana shémbioye ínýaftaca jtseíngñayana ca —Jesús tojánayana.

<sup>10</sup> Chora chabe uatsjéndayēnga tmojanianana: —Chca chē boyá y shémaftaca tojtsemnēsna, ndoñe tšabá yontsemna jobouamayana ca.

<sup>11</sup> Y Jesús tojanéyana: —Nýetscanga ndoñe quemátobena chē palabrenga jójēngacñana, nýe chē Bēngbe Bētsá tojama jójēngacñama chamobenama, chēngna aíñe.

<sup>12</sup> Ba soyēnga comna ndaye causa chē boyabásēnga ndoñe ntsobenana jobouamayana. Inýēnga jónýnana jobouamayama ndobenēnga, ínýēngbioye cach entšanga jábiamana jobouamayama ndobenēnga y ínýēngna, nýets tempo nýe Bēngbe Bētsabe amēndayama oservena causa ca —tojanéyana.

*Jesús, basetémēngbiana Bēngbe Bētsábioye tbojanimpadá  
(Mc 10.13-16; Lc 18.15-17)*

<sup>13</sup> Entšanga basetémēnga Jesúsbioye tmojanēnatse, cha chauabojajuama y Bēngbe Bētsábioye chēngbiana chaboimpadama. Pero chē uatsjéndayēngna tmojanontšé chē basetémēnga unachayēnga jtsēcácanana.

<sup>14</sup> Chora Jesús tojanéyana: “Cachcá mónýaye chē basetémēnga átšbioye chamuabo y ndoñe matéuyanana; er Bēngbe Bētsabe amēndayana endmēna mo quem basetémēngcá imomnēngbiana ca.”

<sup>15</sup> As chē basetémēnga tojánabojajo, Bēngbe Bētsá jaimpádase; y chentšana cha tojt-sanoñe.

*Canýe bomna bobontse Jesúsbioye tojána  
(Mc 10.17-31; Lc 18.18-30)*

<sup>16</sup> Chentšana, canýe boyabása tojána Jesús jinýama y mēntšá tbojantjá: —Buatēmbayá, ¿ndaye tšabe soye chjama chē nýetsca tescama yomna tšabe vida jtsebomnama ca?

<sup>17</sup> Y Jesús tbojanjúá: —¿Ndáyeca chē tšabe soye ndayá bétsemnama šcojtsetjaná ca? Tšabia nýe canýa endmēna: Bēngbe Bētsá. Aca chē nýetsca tescama yomna tšabe vida jtsebomnama tcojtsebošese, mandēnga cochtsobedecena ca.

<sup>18</sup> Chora chē bobontse tbojantjá: —¿Ndaye mandēnga ca?

Y Jesús tbojanjúá: —“Ndoñe catjóba, acbe shema ínýaftaca ndoñe cattseíngñaye, ndoñe catjatbēba, ndoñe catjuaboínýena.

<sup>19</sup> Acbe bētsétsata stētsoye ndoñe catjáquedaye y ndēmua entšánaca cochtsebobonshana ntšamo cach aca cuenobobonshancá ca” —Jesús tbojanianana.

<sup>20</sup> Chora chē bobontse tbojanjúá: —Atše lempe chca nýets tempo sēndocumplina. ¿Ndayá más šojtsebuáshbena ca?

<sup>21</sup> As Jesús tbojaniyana: —Aca lempe tšabá jamama tcojtsebošëse, motsa, acbe bomna soyënga cochjetsatobuiye y chë crocénana, ndbomnjémënga cochtsatsataye; chca, bëts uacanana soye celoca cochántsebomna. Chentšana cochjabo y šcochjuasto ca.

<sup>22</sup> Chë bobontse chca tojanuena ora, ngménaca yojsatoñe, cha corente bomná bemna causa.

<sup>23</sup> Chora Jesús chabe uatsjéndayënga tojanëyana: —Ndegombre cbëyana, puerte totcá entsemna canye bomnabiamá Bëngbe Bëtsabe amëndayoye jamashënguama ca.

<sup>24</sup> Chë bomnabiamá cachiñe šcuatayana: Más paselo entsemna canye camello chë coshufjentša atëfjnëjana chauachnëngo, y ndoñe canye bomná Bëngbe Bëtsabe amëndayoye jamashënguana ca.

<sup>25</sup> Chabe uatsjéndayënga chca tmojanuena ora, puerte ojnanánënga imojtsemna y imojtsichamo: —As, ¿nda yochjobenaye atsbocaná jtsemnama ca?

<sup>26</sup> Jesús chënga tojanënyanyé y tojanëyana: —Entšanga ndoñe quemátobena jamama canya atsbocaná chaotsemnama, pero Bëngbe Bëtsá aíñe, er cha nyetsca soyënga jamama endobena ca.

<sup>27</sup> Chora Pedro tbojaniyana: —Aca contsonyá, bënga lempe chë fsëndbomna soyënga fsënjéseboshjona y ácaftaca fsëntsajna. As, ¿ndayá bënga fchjójyëngacñe ca?

<sup>28</sup> As Jesús tojanëyana: —Ndegombre cbëyana, nyetsca quem luarentša soyëngama mo tsmécá jtsemnama tempo chaojobuache ora, chë Bëngbe Bëtsá Entšá tbojanbemá chabe buashinÿinÿana bëts tšenësiñe reycá echanjót bema jtsemándayama; y tšëngaftanga, chë atše šmëstonëngna, chora bnëtsana uta uámana tbemaniñe šmochanjotbiama mo reyëngcá, chë Israeloca bnëtsana uta bëts pamillentsa entsangbiama jayanama tšabá o ndoñe tšabá tmonjamama.

<sup>29</sup> Y ndëmuanÿënga, atše jaserviama tmojëftseboshjona cachëngbe yebna, catšátanga o uabëంగా, befta o bebmá, básënga o fshantsënga, chë soyëngama patse soye más mochanjójyëngacñe y chë nyetsca tescama yomna tšabe vídnaca.

<sup>30</sup> Pero banga mora uámanënga imomnënga, nduámanënga mochántsemna; y banga mora nduámanënga imomnëngna, uámanënga mochántsemna ca —Jesús tojánayana.

## 20

### *Chë trabájayëngbiama cuento*

<sup>1</sup> Mëntšánaca Jesús tojánayana: “Bëngbe Bëtsabe amëndayana endmëna mo canye bëts jajañe nduiñcá. Chë nduiñna canye te cabá cachëse yojábocna peonga janguanguama, chabe uvas betiyënga jajañe chamotrabajama.

<sup>2</sup> Chë nduiño peonga yojánÿena orna, imojenóyeunaye canye tescama canye denario crocénana jtëbuénayama. As chora yojichamuá chë uvas betiyënga jajoye jatrabájama.

<sup>3</sup> Mo base mošenana ora, chë nduiño cachiñe yojábocna y plazoca atsanënga ínÿënga yojanÿe, tondaye ntsamcá.

<sup>4</sup> As yojáuyana: ‘Tšëngaftángnaca atšbe uvas betiyënga jajoye motsajna jatrabájama y ntšamo chašmojamcá cbochtëbuénaye ca.’ Y chë entsanga imojá.

<sup>5</sup> Nyetsto ora y bëts mošenana ora, chë nduiño cachiñe yojábocna y cachiñe cachcá yojopása.

<sup>6</sup> Mo la cinco ora, chë nduiño cachiñe yojábocna y chenache ínÿënga yojánÿena, tondaye ntsamcá. As yojátjaye: ‘¿Ndáyeca tšëngaftanga nyets día ntjatrabajacá muentše šmotsomñe ca?’

<sup>7</sup> Y chënga imojojuá: ‘Ndocná bënga chešnataimpadá causa ca.’ As chë nduiño yojáuyana: ‘Tšëngaftángnaca atšbe uvas betiyënga jajoye motsajna jatrabájama y cbochtëbuénaye ca.’

<sup>8</sup> “Y ya bien jetiñe yojtsemna orna, chë nduiño chabe caporálbioye ibojauyana: ‘Peonga metsachembo y cochtëbuénaye. Chë ústonoye tmojáshjajnënguentsana cochjabojátša y chë natsana tmojáshjajnënga ústonoye ca.’

<sup>9</sup> Y chë mo la cinco ora imojáshjajnënga imojobeconá, y cada ona canye denario crocénana yojtáyentsbuachiye.

<sup>10</sup> Chentšana, chë natsana jatrabájama imojáshjajnënga yojtsamna jobéconama y chënga imojétsejuabnaye más crocénana mochjanóyëngacñe ca. Pero chëngnaca cach canye denario crocénana yojtëbuénaye.

<sup>11</sup> Chca imojóyëngacñe orna, chënga imojóntša chë nduiñbiama bacá ichámuana,

<sup>12</sup> mëntša: ‘Quemënga chë ústonoye tmonjáshjajnënga nÿe canye horatema tmonjatrabajá; ntšamo bënga šcontëbuenacá, cachcá chënga contëbuená y bëngna nÿets día jabuache fsënjatrabajá y corente jënÿá fsënjauantá ca.’

<sup>13</sup> “Pero chë nduiño canÿa chca yojtsichamuábioye ibojojuá: ‘Sobreno, acbiama ndocna ndoñe tšabe soye chiyatsma. ¿Ndoñe canye denario crocénana canye tescama tbonjenoyeuná ca?’

<sup>14</sup> Chcasna, acbe uacanana crocénana mesocñe y motsatoñe. Atše sëntseboše chë ústonoye jatrabájama tojashjanguá jtabuénayana, cachcá ntšamo aca tcojtabuenacá.

<sup>15</sup> Chca entsemna, er atše sëndobena atšbe crocénanaca nÿe ndayánaca jamana. ¿O aca envidia cojtsebomna, atše tšabia tsmënacaca?’ ” —cha yojayana.

<sup>16</sup> Chora Jesús tojánayana: “Y chca, chë mora nduámanënga imomnënga, uámanënga mochántsemna; y chë mora uámanënga imomnënga, nduámanënga mochántsemna ca.”

*Jesús cachiñe tojánayana cha jóbanama y jtayenama*  
(Mc 10.32-34; Lc 18.31-34)

<sup>17</sup> Chënga Jerusalenoye imojtsaye ora, Jesús barie tojánachembo chabe bnëtsana uta uatsjéndayënga y tojanëyana:

<sup>18</sup> “Tšëngaftanga šmontsonÿá mora bënga Jerusalenoye montsajnama. Chocna chë Bëngbe Bëtsá Entšá tbojanbemá, chë bachnangbe amëndayënga y ley abuátambayëngbe cucuatšine mochanjáboshjona, y chënga mochanjayana jóbanama cha ibojtsemna ca,

<sup>19</sup> y chë ndoñe judiëngbe cucuatšine mochanjáboshjona chënga chamotsáboyejuanama, chamotjanjama y chamocrucificama. Pero unga tianoye cha echántayena ca” —Jesús tojánayana.

*Chë Santiago y Juanbe mamabe impadana soye*  
(Mc 10.35-45)

<sup>20</sup> Chentšana, Zebedeobe uaquiñatbe mamá chabe uaquiñátaftaca Jesúsbioye tojanobeconá, chabe shecuatšentše yojoshamentšiyey canye pavorama jaimpádama.

<sup>21</sup> As Jesús tbojantjá: —¿Ndayá cojtseboše ca?

Y chë shembása tbojaniyana: —Aca reycá chacojtsemánda ora, cochjamánda atšbe uaquiñata chabótbema canÿa acbe catšbioica y chë inÿa acbe uañicuayoica, ácaftaca chabotsemándama ca.

<sup>22</sup> Y Jesús tojanëjua: —Ntšamo šmontsotjanañama, tsëndata ndoñe quešnátstatšëmbo ca. Ntšamo atše chjasufriacá, ¿tsëndátnaca cachcá jasúfriama tašatjobenaye ca?

Y chata tbojanjuá: —Aíñe, fchanjobenaye ca.

<sup>23</sup> Chora Jesús tojanëjua: —Ndegombre, tsëndátnaca atšcá šochanjasúfria, pero atše ndoñe quetsátobena jamándana atšbe catšbioica o atšbe uañicuayoica chašótbemama. Chë útentše entsemna ndëmuanÿengbiama atšbe Taitá tojaprontacá ca.

<sup>24</sup> Chë inÿe bnëtsana uatsjéndayënga chca tmojanuena ora, chë uta catšátaftaca tmojanotjyaná.

<sup>25</sup> Chora Jesús chë uatsjéndayënga tojánachembo y tojanëyana: —Tšëngaftanga šmondétatšëmbo, chë ndoñe judiëngbeñe chë reyënga lempe jtsemándayana nÿa mo

nduiñenga cuaftsemncá; y chë bëtsëtsa entsangna chëngbe obenánaca jtsemándayana, ndayánaca jtsamëse, chë inye entsanga sempre chamotsayaunanama.

<sup>26</sup> Pero tsëngaftangbeña ndoñe chca chaondëtsemna. Inyetsá; masna, nda tsëngaftanguentse chë más uamaná jtsemnama tojtsebošá bontsemna chë inyenga jtsaservénana.

<sup>27</sup> Y ndánaca tsëngaftanguentsá chë más uamaná jtsemnama tojtsebošá bontsemna jtsemnana mo nye inyabiama nyets tempo oservenacá.

<sup>28</sup> Cachcá, chë Bëngbe Bëtsá Entšá tbojanbemá ndoñe chenátabo cha chamot-seservénama, ndayá inyenga jabáserviama. Y mo nda inyenga játsebacama cuafjëtšajocá, cha echanjóbana, ba entsanga atsebácanënga chamotsemnama ca —Jesús tojánayana.

### *Jesús uta jtanata tojanashná*

*(Mc 10.46-52; Lc 18.35-43)*

<sup>29</sup> Chënga, Jericó bëts pueblentsana tmojánbocana ora, ba entsanga Jesús imojtsëstona.

<sup>30</sup> Uta jtanata benache juachañe ibnatbemana. Jesús chëjana yojtšachnëjuanama chata tbojanuena ora, tbojanontšé uayebuáchana: —¡Utabná, Davídbentsana Entšá, šmotsalastemá ca!

<sup>31</sup> Entšanga chë jtanátbioye tmojtšancácana iytëca chabotsemnama, pero chatna más ibojtsáyebuache: —¡Utabná, Davídbentsana Entšá, šmotsalastemá ca!

<sup>32</sup> As Jesús yojtšaye, chë jtanata tojánachembo y tojanatjá: —¿Ndayá šojtseboše atše tsëndatbiama chjamama ca?

<sup>33</sup> Y chata tbojanjá: —Utabná, bëndata chabuatëbínynama ca.

<sup>34</sup> Jesús chatbiana tbojanongmé y tojánabuchbojajo. Cachora chë jtanata tsabá yo-jtëbinýna y Jesús tmojanasto.

## 21

### *Jesús Jerusalenoje tojánashjango*

*(Mc 11.1-11; Lc 19.28-40; Jn 12.12-19)*

<sup>1</sup> Ya Jerusalenoca béconana imojtsemna y canye pueblo Betfagé ca uabáinoca tmojánashjango, canye tjashe Olivos ca uabáinentse. Chora Jesús uta chabe uatsjëndayata tojanichamó,

<sup>2</sup> y mëntsá tojanëyana: “Tsëndatbe natsana entsemna base pueblotémoye motsata. Cachora canye burrá utsbuaná šochanjínýena y cháftaca canye burrotema echántsemna. Sochjuajafjoná y šochjuánatse.

<sup>3</sup> Nderado nda ndayánaca chacmojáuyanëse, šochjauyana: ‘Bëngbe Utabná bontsájaboto y chentšana camuentse echanjabáisabashejuana ca.’ ”

<sup>4</sup> Chca tojanopasá, cachcá chaotsemnama ntšamo chë Bëngbe Bëtsabe juabna oye-buambnáyá tojanayancá. Cha mëntsá tojanábema:

<sup>5</sup> Jerusalén bëts pueblentse oyenënga mëyana:

“Minýënga, tsëngaftangbe Rey chentše tsëngaftangbioye entsabó, ndoñe mo canya cachá bëtsá enobiamnayacá; canye búrrbeñe enjaquená; canye burrotémiñe, canye uatrabájaye bayabe šešónbeñe ca.”

<sup>6</sup> Chora chë uatsjëndayata tbojána y tbojanma ntšamo Jesús tojanamëndacá.

<sup>7</sup> Chë uatsjëndayatna chë burrá y chë burrotema tmojanënatse, entsáyëjuangá chátbeñe tbojanájtse y chora Jesús chábeñe tojanenojayé.

<sup>8</sup> Bëtscá entsanga chëngbe entsáyá chë benachëjana imojtsëtëtsatsana, y inyengna betiyeshënguiñe buacuafjënga imojtsetcoye y chiñe imojtsequëcñá.

<sup>9</sup> Y chë natsana imojtsajnënga y chë ústonoyënga mëntsá imojtsaiuáyebuache: “¡Rey Davídbentsana Entšá matschuanga ca! ¡Corente bendición bomná, chë Bëngbe Utabnabe obenánaca tojabá! ¡Bëngbe Bëtsá celocá matschuanga ca!”

<sup>10</sup> Jesús Jerusalenoye tojánamashëngo ora, nyetsca entsanga imojtsenbouenana y banga imojtsenotíciaye: —¿Nda mua yojtsemna ca?

<sup>11</sup> Y chë entsanga imojtsëjuana: —Chë Bëngbe Bëtsabe juabna oyebuambnayá Jesús, chë Galileoca pueblo Nazaretocá ca.

*Jesús, Bëngbe Bëtsabe bëts yebnentsana enënga y obuámnayënga tojtanëbuacna  
(Mc 11.15-19; Lc 19.45-48; Jn 2.13-22)*

<sup>12</sup> Chentsana Jesús, Bëngbe Bëtsabe bëts yebnoye tojánamashëngo y chë entsanga chentse imojtsena y imojtsobuámnayënga chentsana tojtanëbuacna. Chéntsnaca imojtsemna entsanga canye crocénana enënga, y chë crocénana nye Bëngbe Bëtsabe bëts yebnentsama inoservená. Chëngbe mesëshangá tojtsanenásatajchquëca y chë palomatema enëngbe tšenëshëngnaca.

<sup>13</sup> Y tojanëyana: “Bëngbe Bëtsabe uabemana palabrénguiñe cha mëntśá tojánayana: ‘Atšbe bëts yebna echantsabaina átšeftaca encuéntaye yebna ca’; pero tšëngaftangna, atbëbanëngbe oyeniñe chë yebna šmojtsebema ca” —Jesús tojanëyana.

<sup>14</sup> Chentsana, Jesús yojtsemnoye Bëngbe Bëtsabe bëts yebnentsë, jtanënga y coshetënga tmojanobeconá, y cha tojanashná.

<sup>15</sup> Chë bachnangbe más uámana amëndayënga y ley abuátambayënga, Jesús bëts soyënga yojtsamama tmojáninye ora, y chë baseté mënga Bëngbe Bëtsabe bëts yebnentsë imojtsayebuáchama tmojanuena ora, tša tmojanotjáyananga. Chë baseté mënga mëntśá imojtsáyebuache: “¡Chë Rey Davídbentsana Entśá matschuanga ca!”

<sup>16</sup> As Jesús tmojanianyana: —¿Ntsámo chë baseté mënga montsichamcá quectsuenana ca? Y Jesús tojanëjua: —Aíñe, sentsuenana. Pero, ¿tšëngaftanga Bëngbe Bëtsabe uabemana palabrénguiñe chë soyama ndoñe šmëndualía? Chiñe mëntśá endayana: Chë baseté mënga y ochóchaye šešonatémëngbe cantëngaca aca tcojama entsanga chacmotsatschuanama ca.

<sup>17</sup> Chora Jesús chënga tojésanabashejuana y Jerusalenentsana Betania puebloye tojtanoñe; y chentse chë ibeta tbojánbobinýna.

*Jesús tojánayana canye higo betiye ndoñe más chaondëshájona ca  
(Mc 11.12-14, 20-26)*

<sup>18</sup> Chë te cachëse, Jesús cach bëts puebloye yojtésa ora, tbojánishëntsena.

<sup>19</sup> Chora canye higo betiye benache juachaca yojinye; as choye yojobeconá, pero nye ena tsbuanáchënga chiñe yojinyena. As Jesús chë higo betiyoje tojánayana: “¡Ndocna te más chaondëshájona ca!” Y betesco chë higo betiye tojtsanbuashá.

<sup>20</sup> Chë uatsjédayënga chca tmojáninye ora, imojenjnaná y Jesús tmojantjá: —¿Ntsámo chca chë higo betiye canye ora tojtsebuashá ca?

<sup>21</sup> Y Jesús tojanëjua: —Ndegombre cbëyana, tšëngaftanga Bëngbe Bëtsabeñe ošbuáchiyana šmojtsebomna y chabiamá ainaniñe ndoñe inyetsá šmonjátsjuabnase, šmochantsobena jamama ndoñe nye ntsámo atše quem higo betiyeca sënjamcá, sinó quem tjoye, “muentšana mojuaná y uafjájónayoye moshbuetše ca” šmojayanëse, chca jochnënguana.

<sup>22</sup> Y Bëngbe Bëtsáftaca chašmojtsencuénta ora, chábeñe jtsošbuáchiyëse, lempe ntsámo chašmojtjañcá šmochanjóyëngacñe ca —Jesús tojánayana.

*Jesusbe obenana  
(Mc 11.27-33; Lc 20.1-8)*

<sup>23</sup> Chca tojanopasá chentsana, Jesús Bëngbe Bëtsabe bëts yebnoye tojánamashëngo. Chentse yojtsabuátambantscuana, bachnangbe amëndayënga y judiëngbeñe bëtsëjemëngcá amëndayënga tmojanobobeconá y tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda mando tcmënjatśá ca?



<sup>24</sup> As Jesús mēntšá tojanējua: —Atšnaca canye soye sēntsebomna tšēngaftanga jat-jayama, y quešmojuase, átšnaca cbochjáuyana ndaye deréchoca atše chca stsama.

<sup>25</sup> ¿Nda Juan chē Ubayaná tbojanichmó entšanga jubáyama, Bēngbe Bētsá o entšanga ca? —Jesús tojanējua.

Chama chēnga tmojanontšé mēntšá enatsētsnayana: “ ‘Bēngbe Bētsá ca’ chamo-juuase, cha šochanjáuyana: ‘As, ¿ndáyeca chē tmojanabuayená soyēnguiñe ndoñe šmonjanošbuaché ca?’

<sup>26</sup> Pero ndoñe quemuátobena jayanana ‘entšanga ca’; muentša entšangbiamia bēnga montsauatja, er nýetscanga mondējuabná Juan ndegombre Bēngbe Bētsabe juabna oye-buambnayá yomna ca.”

<sup>27</sup> Chcasna chēnga Jesús tmojanjúá: —Bēnga ndoñe queftsátstatšēmbo ca.

Y as Jesús tojanējua: —Atše cach ndoñe quebochatéyana ndaye deréchoca chca stsama ca.

### *Chē uta uaquiñátbiamia cuento*

<sup>28</sup> Chora Jesús entšanga tojanatjá: —¿Ntšamo tšēngaftanga quem soyama šmatjayana? Canye boyabása uta uaquiñata yojánabamna, y cánýabioye ibojauyana: “Uaquiñá, mēnté motsa atšbe uvas betiyēnga jajoye jatrabájama ca.”

<sup>29</sup> Chē uaquiñá ibojujúá: “¡Jama ndoñe quetsátšboše ca!” Pero botamana yojenójuaboye y pronto choye yojá.

<sup>30</sup> Chentšana chē taitá chē inye uaquiñábioye cachcá ibojauyana. As cha ibojujúá: “Arseñor, aíñe chanjá ca.” Pero ndoñe yonjá.

<sup>31</sup> ¿Chē útatentšana ndēmuanýá tojanma ntšamo chē taitá yojabošcá ca? —Jesús tojanatjá.

Y chēnga tmojanjúá: —Chē natsaná ca.

Chora Jesús tojanējua: —Ndegombre cbéyana, chē Romocama entšángbioye impuesto atjanayēnga y chē bacna vida bomna shembásenga, tšēngaftangbiamia más montse-prontana Bēngbe Bētsabe amēndayoye jamashēnguama.

<sup>32</sup> Juan chē Ubayaná tonjánabo tšēngaftanga jábuayenama ntšamo jtsiyenana cmam-nama, ntšamo Bēngbe Bētsá yobošcá, y tšēngaftanga chē tmojanabuayená soyēnguiñe ndoñe chešmatanošbuaché; y chē cuenta, chē Romocama entšángbioye impuesto atjanayēnga y bacna vida bomna shembásengna aíñe chábeñe montsanošbuaché. Y tšēngaftanga, masque ntšamo chēnga Bēngbe Bētsábeñe imojtsošbuáchema lempe šmojinýēse, chē juabnayana ndoñe šmonjatrocá, chábeñe jtsošbuáchiyama ca —cha tojanējua.

### *Chē puerta bacna trabájayēngbiamia cuento*

*(Mc 12.1-12; Lc 20.9-19)*

<sup>33</sup> Mēntšánaca Jesús tojánayana: “Inye cuento šmochjatuena chašmuatsjínýama: Canye jajañe nduiño uvas betiyēnga yojáje y chē shēconana yojajétja. Chē uvasēsangá juantsētetjiamna canye base luare yojajutjo y canye tsbanana jebna soye yojapórma chentše jtsaishanýama. Chentšana, inye trabájayēnga chē jajañe yojárrendaye y chana inye luaroye yojtsoñe.

<sup>34</sup> Chē uvasēsangá juashacama tempo yojobuache orna, chē jajañe nduiño básefta oservénēnga yojichamuá chē arréndayēnga jáuyanama ntsachetšá chē nduiño ibojtso-tocánama.

<sup>35</sup> Pero chē arréndayēngna chē oservénēnga imojishēche: ínýēngbioyna imojtsa-jantšetaye, ínýēngbioye imojtsēbaye y chē ínýēngbioyna ndētsbēngaca imojtsatēchēnganja.

<sup>36</sup> As chē jajañe nduiño chē natsanama más ba oservénēnga yojichamuá. Pero chē arréndayēngna, ntšamo chē natsanēngaftaca imojamcá, cachcá chora imojama.

<sup>37</sup> “Cabana, chē jajañe nduiño cachabe uaquiñá ibojíchmua; as mēntšá yojtsejuabnaye: ‘Atšbe uaquiñá cocayé mochanjóyeunaye ca.’

<sup>38</sup> Pero chë arréndayënga chë uaquiñá imojinýe orna, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga y lempe chabe otocana soyënga bëngbiama echanjoquéda ca.’

<sup>39</sup> As chë uaquiñá imojishache, chë uvas betiyënga jajañentsana imojtsábocna y imojtsóba.”

<sup>40</sup> Chca jacuéntama tojanpochocá orna, Jesús tojánayana: —Y morna, chë jajañe nduiño chaojabo ora, ¿ntšamo šmojtsejuabná chë arrendayëngaftaca cha yochjama ca?

<sup>41</sup> Y chënga tmojanjuá: —Chë puerte bacna arréndayënga ni mo batšatema ntjalastemaycá echantsëbaye. Chë jajañe ínýënga echanjárrendaye y chë uvasëšangá juashacama tempo chaojobuache ora, ntšamo chë nduiño chabojtsotocancá chënga mochantíyie ca.

<sup>42</sup> Chora Jesús tojánayana: —¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntsá endayana:

Chë yebna jebuanënga tmojtsanaboté ndëtšbé,  
mora chë más bëts uashacuanëšentše entsejájona.  
Chë soye Bëngbe Utabná, Bëngbe Bëtsá chca tojama,  
y bënga chama ojnánánënga fsëntsemna ca.

<sup>43</sup> Ntšamo chë nduiño chë arréndayënga chë fshantse echántsabaca y ínýënga echantsatšataye y chënga chabiama bëtská shajuana mochanjatbanacá, cachcá, Bëngbe Bëtsabe amëndayana tšëngaftangbentšana mochantsejuána y ínýëngbioye mochántsatšataye. Chënga Bëngbe Bëtsabe soyëngama mochanjouena y chë soyëngama ínýëngbioye mochanjabuayená, Bëngbe Bëtsabe amëndayoye jamashënguama.

<sup>44</sup> Ndánaca chë ndëtšbeñe chaojotsatšá, chëbé bochantatcacaye; y chë ndëtšbé ndábeñnaca chaojótsatše, polvëshe bochantsebema ca —Jesús tojánayana.

<sup>45</sup> Chë bachnangbe amëndayënga y fariseunga, Jesús chë jabuátambama cuentënga yojtsëtsëtsnama, tmojanenótatšëmbona chëngbiama chca yojtsóyebuambnama.

<sup>46</sup> Chora chënga tmojánbošena Jesús jishachana, pero entšangbiama imojtsauatja; chënga imojanjuabná Jesús Bëngbe Bëtsabe juabna oyebuambnayá yojamna ca.

## 22

### *Chë casamento fiestama cuento*

*(Lc 14.15-24)*

<sup>1</sup> Chentšana Jesús tojanontšé cachiñe cuentëngaca chënga jabuátambana. Mëntsá tojánayana:

<sup>2</sup> “Cbochanjúyana ntšamo Bëngbe Bëtsabe amëndayana yomnana. Endmëna mo ntšamo canýe réyefraca tojanopasacá. Chë rey yojamánda canýe bëts fiesta jamama, chabe uaquiñabe casamentama.

<sup>3</sup> Chora chë rey chabe oservénënga yojichamuá chë ófjanënga jobiatšama, pero chë ófjanëngna ndoñe imonjouena jama.

<sup>4</sup> As chë rey inýe oservénënga yojichamuá y mëntsá yojámëndaye: ‘Chë ófjanënga šmochjúyana, ya saná stseboprontana ca. Sënjamandá, atšbe uacnënga y uamna bayënga minýicánënga jobáyama y lempe entseprontana; y chamuabo chë casamento fiestama ca.’

<sup>5</sup> “Pero chë ófjanënga ndoñe imonjouena. Canýa, cachabe fshantse inabomnoye yojtsoñe; ínýana chabe obuámnayíñe trabajuama yojtsoñe;

<sup>6</sup> y ínýengna, chë reybe oservénënga imojishëche, jabuache imojtsatsetšenaye y imojtsëbaye.

<sup>7</sup> Y chë rey chë soyama yojouena ora, corente ibojtsetna. As chabe soldadënga yojichamuá chë oservénënga obánayënga chamuetsëbáyama y chëngbe bëts pueblo jetsángbotjuama.

<sup>8</sup> Chora chabe oservénënga yojáuyana: ‘Lempe entseprontana chë casamento fiestama, pero chë ófjanënga ndoñe quenjatëmerecena moye jabama.

<sup>9</sup> Motsajna tsashenangoye y ndëmuanýéngnaca chašmojánýenënga, chë casamento fiestama šmochjúbuaja ca.’

<sup>10</sup> As chë oservénënga tsashenangoye imojábocana y nyetscanga imojánýenënga imojáchembo, cánýiñe tšabe y bacna entšanga, y chca, chë tsbocnanoica jútjena yojtsemna entšángaca.

<sup>11</sup> “Chë ófjanënga jánýama chë rey yojámashëngo ora, chentše cánýabioye ibojinýe y chana ndoñe yontsemna ntšamo canýe casamento fiestama endbetsemncá uichëtjona.

<sup>12</sup> As chë rey ibojauyana: ‘Sobreno, ntšamo canýe casamento fiestama endbetsemncá ndoñe quecatichëtjona. ¿Ntšamo chca moye tcojamáshëngo ca?’ Pero chë boyabásana nýe iytëca yojtsemna.

<sup>13</sup> As chë rey chë fiestentše ujuatšnayënga yojámëndaye: ‘Shecuatše y cucuatše motsebatsëca y chë ndëbinýna luaroye, infiernoye motsábocna. Chentše puerte echanjenóbošachna y chë tsetšanama juatsašënga echantsenoftëšjojnaye ca’ –cha yojayana.”

<sup>14</sup> Jesús chca jacuéntama tojanpochocá ora, mëntšá tojánayana: “Chë fiestama ófjanënga banga montsemna, pero chë bocacánënga choca jtsemnama nýe báseftanga. Er Bëngbe Bëtsá banga jáchembuana chabe amëndayoye jamashënguama, pero nýe báseftanga choca mochántsemna ca.”

*Chë Romoca bëts mandadbiama impuesto jtsatsquëcjnyama  
(Mc 12.13-17; Lc 20.20-26)*

<sup>15</sup> Chentšana chë fariseunga tmojtsatanoñe y tmojanenoyeuná ntšamo Jesús tojayaniñe cha jisháchichiyana, as chca, mandadëngbeñe cha mal jaquédama.

<sup>16</sup> Chama chënga tmojanichamó básefta cachëngbe usetonënga y ínýengna Heródesbe ústonënga, Jesús jauyanama: –Buatëmbayá, bënga fsëndétatšëmbo aca ndegombre soyënga cnetsabuátambama y contsabuatambá ndegombre tšabe vida jtsebomnama, ntšamo Bëngbe Bëtsá yomandacá, y ndoñe jatuenanana nýe ntšamo entšanga tmojatichamcá, er acbiama tondaye quenatámana nda más uamaná o nduamaná tomnana.

<sup>17</sup> Chcasna, ¿ntšamo catjájuaboye? ¿Tšabá tajojtsemna, César, chë Romoca bëts mandadbiama, bënga impuesto jtsatsquëcjnyana o ndoñe ca?

<sup>18</sup> Jesús yojtsetátšëmbo chëngbe bacna juabnëngama; chíyeca tojanéyana: –Bacna entšanga, ntšamo ndegombre šmojuabnacá ndinýinýayënga. ¿Ndáyeca tšëngaftanga šmojtseboše chë sóyeca atše jisháchichiyama?

<sup>19</sup> Chë šmatsquëcñá crocénana šminýinýé ca.

As canýe crocénana tmojanoyé.

<sup>20</sup> Jesús tojanatjá: –¿Ndabe jubiá quem crocenániñe yojtsemna, y ntšamo muentše entsabemancá nda chca iuabaina ca?

<sup>21</sup> Y chënga tmojanjuá: –Césarbe jubiá; cha chca enduabaina ca.

As Jesús tojanéyana: –Césarbioye šmochtoyiye cha ibotocana soye; y Bëngbe Bëtsana cha ibotocana soye ca.

<sup>22</sup> Chënga chca tmojanuena ora, ojnánënga imojtsemna. As chënga cachcá Jesús tmojanonýá y tmojtsatanoñe.

*Obanënga jtayenama Jesús tmojantjá  
(Mc 12.18-27; Lc 20.27-40)*

<sup>23</sup> Báseftanga judiëngbe amëndayënga, saduceos ca uabáinënga, imojanjuabná chë obanënga ndocna te ntayenana ca. Cach te, chë impuestama Jesús tojanoyebuambá te, básefta saduceunga tmojána y mëntšá tmojantjá:

24 –Buatëmbayá, Moisés tojánayana nderado canye boyá tojóbana básenga ntjétsabashejuancá, ana chabe uabentsá jtsemnana chë shémaftaca jtobouamayana, chca, chabe uabochená obanabiamama básenga jtsabamnana ca.

25 Chcase, canye bëngbentse canyësëfta catsátanga monjamna. Chë natsaná tonjanobouamá y tontsanóbana. Básenga ndoñe quenjátabamna, chíyeca chë shemna chë uabentsáftaca tontanobouamá.

26 Y cháftaca cachcá tonjanopasá, chë inye uabentsáftaca cachcá, y cachcá chë ínÿengaftaca y chë ústonoca uabentsáftacnaca.

27 Y chentsana chë shembásanaca tontsanóbana.

28 Y morna, chë obanënga chamojtayena ora, ¿ndabe chë canyësëfta catsatanguentsabe shema chë shembása yochtsemna, nyetscanga cháftaca tmojanobouamase ca? –chënga tmojantjá.

29 As Jesús tojanējua: –Ntšamo tšëngaftanga šmonjayancá ndmëncá šmontsoyebuambná, Bëngbe Bëtsabe uabemana palabra, ni chabe obenanama ndoñe quecmátësertana causa.

30 Chë obanënga chamojtayena ora, ni boyabásenga, ni shembásenga quemochatóbouamnaye, y chca, chënga mochántsemna mo celoca angelotemëngcá.

31 Y chë obanënga jtayenamna, ¿ndoñe šmëndualía ntšamo cach Bëngbe Bëtsá chabe uabemana palabrenguiñe tojánayanama? Cha tonjánayana:

32 “Atse sëndmëna Abraham, Isaac y Jacobëbe Bëtsá ca.” Bëngbe Bëtsá chca jayanëse entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca –Jesús tojánayana.

33 Chë entsanga chca tmojanuena ora, ojnánanënga imojtsemna ntšamo Jesús yojtsabuátambama.

*Chë más bëts uámana mando  
(Mc 12.28-34)*

34 Jesús chë saduceúngbioye iytëca tojánabiamama fariseunga tmojántatšëmbona ora, chënga tmojánenefjna,

35 y canya chënguentsá, ley abuatambayá, Jesúsbioye jisháchichiyama tbojantjá:

36 –Buatëmbayá, ¿Moisesbe leyiñe ndayá chë más bëts uámana mando yomna ca?

37 As Jesús tbojanjuá: –“Utabná Bëngbe Bëtsá cochtsebobonshana nyets acbe ainánaca, nyets espíritoca y nyets juábnaca.”

38 Chë soye endmëna chë más bëts uámana mando y nyetsca mandëngama chë natsanoca entsemna.

39 Y quem inye soye, chë natsana mandcá endenoparecena. Endayana: “Ndëmua entsánaca cochtsebobonshana, ntšamo cach aca cuenobobonshancá ca.”

40 Chë uta mandentsana endóbocana lempe ntšamo Moisesbe leyiñe endayancá y ntšamo chë Bëngbe Bëtsabe juabna oyebuambnayënga mondbetsabuátambacá ca –Jesús tbojanayana.

*¿Cristo, ndabe entsábentsana yomna?  
(Mc 12.35-37; Lc 20.41-44)*

41 Chë fariseunga cabá cachentse imojtsemnëntscuana,

42 Jesús tojanatjá: –¿Ntšamo šmojtsejuabná chë Bëngbe Bëtsabe Uámana Uabuayanabiamama, chë Cristo? ¿Ndábentsana cha iuabó ca?

Y chënga tmojanjuá: –Davídbentsana ca.

43 As Jesús tojanējyana: –¿Ntšamo chca nántsemna, cach David, chë Uámana Espíritbe mándoca, Crístbioye Utabná ca tbojtsabobuátmëse? David mëntšá tojánayana:

44 Bëngbe Bëtsá, atšbe Utabná Crístbioye tbojanayana: atšbe catsbioica mótbema,

atsbe obenánaca acbe uayayënga acbe cucuatšifne chamoquedama chjamëntscuana ca.

<sup>45</sup> ¿Ntšámose Cristo, Davidbentsana Entšá nántsemna, cach David “Utabná ca” chábioye tbojtsabobuátmëse ca? —Jesús tojanatjá.

<sup>46</sup> Chora ndocná tonjanobená ni mo canýe palabra jojuana. Y chë tescana ndocná yonjenñémua Jesús más jatstjanayama.

## 23

*Jesús chë fariseungbiana y ley abuatambayëngbiana tojánayana, chënga ndoñe tšabá montsama ca*

*(Mc 12.38-40; Lc 11.37-54; 20.45-47)*

<sup>1</sup> Chora Jesús, entsanga y chabe uatsjéndayënga mëntšá tojanéyana:

<sup>2</sup> “Chë fariseunga y chë ley abuatambayënga cmondbétsabuatambaye ntšamo Moisesbe leyënguiñe iuayancá.

<sup>3</sup> Chcasna, tšëngaftanga cmontsamna chënga joyaunayana y ntšamo tcmojauyancá, cachá jtsamana. Pero ndoñe šmattsama ntšamo chënga mondbetsamcá, er chënga ndoñe ntsamana ntšamo mondbetsabuatambacá.

<sup>4</sup> Mo canýe entšá, couáybioye uauta uasmanésha juasmayana y cachá tondaye tontsamancá, chënga entsanga jtsamëndayana bëtscá mandënga chamotsocumplínama, pero cachënga ni mo batšatema ntsamana chë mandënga jtsocumplínama.

<sup>5</sup> Chënga lempe jtsamana nýe entsanga chamotsënyama. Chënga chë ínýengbiana más Bëngbe Bëtsá imobobonshana ca chamotsejuabnama, chënga monduamana tëntša sëndachëjënguiñe juabemana ntšamo Bëngbe Bëtsabe uabemana palabrënguiñe endayancá, y juentsaca y buacuatšifne chëjënga jenábatsëcana y sibiajana nýa tëntša uasebtotonanëjuangá jtsichëtjonana.

<sup>6</sup> Chënga jtsebošana chë fiestënguiñe nýa quëfseroca jtsetbiámanama, y chë judiëngbe enefjuana yebnënguenache chë más uámana luarënguiñe.

<sup>7</sup> Chënga jtsebošana tsáshenañe entsanga nýa respétoca chamotsacheuanama, y ‘abuatambayënga ca’ chamotsachembuanámnaca chënga jtsebošana.

<sup>8</sup> “Pero tšëngaftangna ndoñe šmattseboše entsanga ‘abuatambayënga ca’ chacmotsachembuanama, er nýetsca tšëngaftanga mo catšatangcá šmondmëna, Bëngbe Bëtsábeñe betsošbuachéyeca, y nýe canýa endmëna tšëngaftangbe Buatëmbayá.

<sup>9</sup> Tšëngaftanga ‘taitá ca’ chë ley abuatambayënga šmondbétsachembuana, pero tšëngaftanga ndocna quem luarentšá ‘taitá ca’ šmattsechembuana; tšëngaftanga nýe canýe Taitá šmondbomna, chë celoca endmëna.

<sup>10</sup> Ndoñe šmattseboše entsanga ‘mándayënga ca’ chacmotsachembuanama; er nýe canýe Mandayá endmëna y cha Cristo endmëna.

<sup>11</sup> Nda tšëngaftangbeñe chë más uamaná tojtsemná bontsemna chë ínýenga jt-saservénana.

<sup>12</sup> Nda cachá bëtsá tojtšenobiamná, nduamaná mochántsebema; y nda cachá nduamaná tojtšenobiamnana, más bëtsá mochanjábema.

<sup>13</sup> “¡Tša lastema tšëngaftangbiana, bacna entsanga ntšamo ndegombre šmojuabnacá ndinýinýayënga fariseunga y ley abuatambayënga! Tšëngaftanga šmontsama entsangbiana puerte totcá chaotsemna Bëngbe Bëtsabe amëndayoye jamashënguama, mo bëšáša cuaftsebiatamiancá. Pero ni cach tšëngaftanga choye quešmátamashjuana, ni ínýenga choye jamashënguama bošëngbioye chama quešmátalesenciana.

<sup>14</sup> ¡Tša lastema tšëngaftangbiana, ntšamo ndegombre šmojuabnacá ndinýinýayënga fariseunga y ley abuatambayënga! Tšëngaftanga chë viudángbioye chë tmobomna soyënga jtsabacayana, y entsangbe delante tšabá chacmotsënyama y chënga šmojtsaíngñayama ndoñe chamondëtsetatšëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá tšëngaftanga más jabuache ínýengbiana cmochanjácastigaye.

15 “¡Tša lastema tsëngaftangbiana, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga ba luarënguenache jtsajnana canÿa tsëngaftangbe ustoná onguayiñe, y šmojinÿena ora, tsëngaftanga jamana cha chaotsemna tsëngaftangbiana uta soye más merecido buajoná infiernoye chaotsama.

16 “¡Tša lastema tsëngaftangbiana; tsëngaftanga šmondmëna mo jtanënga entsanga unachayëngcá! Tsëngaftanga šmondbëtsichamo: ‘Nda ínÿabioye tbojašbuachená ndayánaca jamama y tojayana chë Bëngbe Bëtsabe bëts yebnama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabe bëts yebnentša castellanama cha tojajurasna, aiñe jtsemnana chë tbojašbuachená soye jamama ca.’

17 ¡Obëjëmënga y nduabínÿnënga! ¿Ndayá más uámana soye yomna, chë castellano o Bëngbe Bëtsabe bëts yebna? Chë castellano Bëngbe Bëtsabiana josérviana jtsemnana, nÿe Bëngbe Bëtsabe bëts yebnocha chë castellano tojtsemnayeca.

18 Tsëngaftanga mëntšánaca šmondbëtsichamo: ‘Nda ínÿabioye tbojašbuachená ndayánaca jamama y tojayana chë altarama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabiana altaroca tojtsejájona soyëngama tojajurasna, aiñe jtsemnana chë tbojašbuachená soye jamama ca.’

19 ¡Nduabínÿnënga! ¿Ndayá más uámana soye yomna, chë Bëngbe Bëtsabiana tmojacjá soyënga o chë altar? Chë tmojacjá soyënga Bëngbe Bëtsabiana josérviana jtsemnana, nÿe chë altaroca chë soyënga tmojacjáyeca.

20 Nda chë altarama tojajurá, ndoñe nÿe chë altarama ntsejúraryana. Lempe chë altar juatsboca tojtsemnámna cha jtsejúraryana.

21 Nda Bëngbe Bëtsabe bëts yebnama tojajurá, ndoñe nÿe Bëngbe Bëtsabe bëts yebnama ntsejúraryana. Bëngbe Bëtsabiana cha jtsejúraryana, cha chë chentše oyená.

22 Ynda celocama tojajurá, chentše reycá Bëngbe Bëtsabe tbemaniñama cha jtsejúraryana y cachora Bëngbe Bëtsabiámna, chentše yotbemanabiana.

23 “¡Tša lastema tsëngaftangbiana, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga Bëngbe Bëtsabiana jtsequëcñayana chë jajañentša sananga bnëtsanentsana canÿe soye; chë binche matatëmënga menta, anis y chë cominentša sanángnaca. Pero tsëngaftanga nÿe batšá jtsamana chë leyentša más uámana soyënga, mo chë nÿetsca entsanga cachca derechënga chamotsebomna, ínÿenga jtsalastemánana y chë tsabe soyënguiñe jtsiyenana, chca, entsanga tsëngaftangbeñe chamotsošbuáchema. Chë soyënga cocayé cmontsamna jtsamama, chë inÿe tsabe soyënga amana ntjajbanacá.

24 ¡Jtanënga entsanga unachayënga! Tsëngaftanga chë base soyënga jamama puerta jtsenócochinÿenana, pero jtsebnëtjombana uámana soyënga jamama, Bëngbe Bëtsá tojanmandá soyënga. Y chca, tsëngaftanga šmontsemna mo canÿe entsá ndayá tojtsabuchetjácá bayëfja jtsejuánama, ndoñe ntjasama, jasama ndoñe yondëlesenciana ca chë leyiñe iuayana causa. Pero šmondmëna mo entsangcá ndëmuanÿenga camellbe mëntšena jasana, y chë leyiñe endayana chcana jasama ndoñe yondëlesenciana ca.

25 “¡Tša lastema tsëngaftangbiana, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga šmondmëna mo entsangcá ndëmuanÿenga platillëjënga y tazëšënga shjoicajana jtsóbojabiana, pero tsoyna nÿe cachcá jonÿayana. Tsëngaftanga tša jtsentsénana entsangbiana mo tsabengcá jtsinÿnama, pero tsëngaftangbe ainanentše jútjena entsemna nÿe jtsatbëbanama y nÿe bëtscá soyënga jésebomna juabnëngaca.

26 ¡Nduabinÿna fariseo! Cochshetsajbaná ainaniñe bacna soyënga bomnana. Chamna nÿe tsabe juabnënga chentše cochtsebomna, y lempe ntšamo chacojtsamcá y entsanga chamojtsonÿacá tsabá echántsemna.

27 “¡Tša lastema tsëngaftangbiana, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga šmondmëna

mo obanëngbe cuevëshënga botamana uafjantsenëshëngcá; shjoicajana puerta botamanëshënga, pero tsoyna jútjena obanëngbe betashëngaca y janjuana soyëngaca.

<sup>28</sup> Tšëngaftanga chca šmondmëna: entšangbe delante tšëngaftanga jtsinÿnana mo nÿetsca soyënguiñe tšabá amëngcá, pero ndoñe chca quešmátsmëna. Tšëngaftangbe ainanentšna chë bacna entšanga ntšamo ndegombre tmojuabnacá ndinÿinÿnayëngcá y chë bacna soye amëngcá šmontsejuabná.

<sup>29</sup> “¡Tša lastema tšëngaftangbiana, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entšanga chamotsemnama, chëngbe cuevëshënga jtsatspórmayëse. Tšëngaftanga cachcá jtsamana chë nÿetsca soyënguiñe tšabá amëngaftaca, chë chëngbiana jtenójuaboyama pormániñe jtsatsbótamnyëse;

<sup>30</sup> y chentšana šmondbëtsichamo: ‘Bënga chë bëngbe bëtsëjémëngbe tempo mafts-janiyenëse, chëngbioye ndoñe matmënjanéjabuache chë Bëngbe Bëtsabe juabna oyebuambnayënga jobáyama ca.’ Pero mo chëngcá canÿe buayenana sóyeca tmojabëngbioyna ndoñe ntsayaunanana.

<sup>31</sup> Pero ntšamo šmojtsamcá jtsamëse, tšëngaftanga šmontsinÿanÿná ndegombre chë Bëngbe Bëtsabe juabna oyebuambnayëngbioye tmojanëbayëngbe entšanguentšana šmomnama. Y mora cach tšëngaftangbe bëts taitangcá tšëngaftanga šmontsama.

<sup>32</sup> ¡Mopochocanga jamama chë bacna soyënga, chë tšëngaftangbe bëts taitanga tmojanbo-jatšé jamama soyënga!

<sup>33</sup> “¡Mëtšcuayënga, mëtšcuaye entšanga! ¿Ndayá šmochjama chë infiernoca uabouana castigüentšana jótšbocama?

<sup>34</sup> Chíyeca atše tšëngaftangbioye chanjichamuá Bëngbe Bëtsabe juabna oyebuambnayënga, tšabe soye tatšëmbënga y abuátambayënga. Pero tšëngaftangna, ínÿengbioye šmochantsëbaye y šmochanjácrucificaye; ínÿengbioyna chë enefjuana yebnënguenache šmochanjátsetšenaye y nÿetsca bëts pueblënguenache chënga šmochandúcama.

<sup>35</sup> Chíyeca, tšëngaftangbiana nÿets castigo echántsemna chë nÿetsca soyënguiñe tšabá amënga tmojëftsóbanama; Abel, chë jóbanama chabotsemnama tondaye tonjanmá, tmojanóba orscana y Zacarías tmojanóbantscoñe. Zacarías, Berequíasbe uaquiñana, Bëngbe Bëtsabe bëts yebnentše tmojanóba, altar y chë entšanga Bëngbe Bëtsábioye imojánadorana luariñe.

<sup>36</sup> Ndegombre cbëyana, lempe chë soyëngama castigo morsca entšangbiana echántsemna ca” —Jesús tojánayana.

### *Jesús tojanošachna Jerusalenoca entšangbiana*

*(Lc 13.34-35)*

<sup>37</sup> Mëntsánaca Jesús tojánayana: “¡Jerusalenentša entšanga, Jerusalenentša entšanga! Tšëngaftanga chë Bëngbe Bëtsabe juabna oyebuambnayënga jtsëbáyana y chë Bëngbe Bëtsabe ichmónënga ndëtšbëngaca jtsatëchénganjana jtsëbáyama. Bueta soye atše sënjábošena tšëngaftanga átšbioye júbuajana, mo canÿe tuamba chabe bolletotémënga chabe juatëngmiáša tajsoye cuaftajayecá, pero tšëngaftanga ndoñe chešmátsbošena.

<sup>38</sup> Y šmochjinÿe, atše mora cachcá cbochanjesëñÿaye, y chca, atšna enánanga cbochanjésabashejuana, mo canÿe yebna cachcá tcojesonÿá y énañe tcojeseboshjoncá.

<sup>39</sup> Y atše cbëyana, ndegombre tšëngaftanga morscana atše ndoñe más quešmochátinÿe; y atše šmochántinÿe mëntsá chašmojtsichamo ora: ‘¡Corente bendición bomná, Bëngbe Utabnabe obenánaca tojabá ca!’ ”

## 24

*Jesús tojánayana chë Bëngbe Bëtsabe bëts yebna lempe mochjánpochocama*

*(Mc 13.1-2; Lc 21.5-6)*

<sup>1</sup> Jesús Bëngbe Bëtsabe bëts yebnentšana tojëftsanbocna y ya yojtsaye. Chorna chë uatsjëndayënga chábioye tmojanobeconá y tmojanontsé nyetsca chentša bëts yebnënga cha jinÿinÿiyana.

<sup>2</sup> Chora Jesús tojanëyana: “Tšëngaftanga lempe šmontsonÿá. Ndegombre šcuayana, quem Bëngbe Bëtsabe bëts yebnentše ndoñe queochaisoquéda ni mo canÿe ndëtsbé inÿe ndëtsbé juatsboye. Lempe mochantsepochoá ca.”

*Ntšamo yochtsemna quem luare jopochócama tempo chaojtsobeco ora  
(Mc 13.3-23; Lc 21.7-24; 17.22-24)*

<sup>3</sup> Chentšana chënga Olivos tjashoye tmojána. Jesús choca yojtsetbemana; as, chë uat-sjëndayënga tmojanobobeconá nÿe chëngbiama jatjayama, mëntsá: —Smëyana. ¿Mocna ora chë soyënga Bëngbe Bëtsabe bëts yebnocá yochjochnëngo ca? ¿Ndayá yochjochnëngo bënga jinÿanÿiyama aca jésabama ora ya yojtsemnama y quem luare jopochócama tempo yojtsobecuama ca?

<sup>4</sup> As Jesús tojanjuá: —Cuedado šmochtsebomna ndocná chacmondáingñema.

<sup>5</sup> Banga mochanjabo y mochantsabíchamo chënga atše imomna ca. Mochántsichamo: “Atše chë Cristo sëndmëna ca” y chca, ba entšángbioye mochanjáingñaye.

<sup>6</sup> Tšëngaftanga šmochanjouena canÿe luarentša entsanga inÿe luaroca entšángaftaca imojtsentsjanama y nderado mochjentsjámna. Ndoñe matauatjëngana, er chca jochnënguama endmëna; pero masque chcase, quem luare jopochócama cabá ndoñe queochátsmëna.

<sup>7</sup> Canÿe luarentša entsanga inÿe luaroca entšángaftaca mochántsentsjanaye, y canÿe amëndayábentša entsanga inÿe amëndayábioca entšángaftácnaca; y ba luarënguine shëntsana echanjóshjango y chentša fshantsënga echanjuangmëmana.

<sup>8</sup> Masque chca jasúfriase, más chcoye cabá más mochanjatssúfria.

<sup>9</sup> “Chora, entsanga inÿengbe cucuatšiñe cmochanjábashejuana chacmatsetšenama y cmochantsëbaye; y atšbe ústonënga bëtsemnayeca nyetsca luarënguentša entsanga cmochantsëbuayënja.

<sup>10</sup> Chë tempo, banga mora átšbeñe ošbuáchiyënga, ošbuáchiyana mochantsajbaná y mochantsenáboyënja y jóbanama inÿengbe cucuatšiñe mochántsensboshjuana.

<sup>11</sup> Banga Bëngbe Bëtsabe ndoñe ndegombre juabna oyebuambnayënga mochanjábocana y ba entsanga mochanjáingñaye.

<sup>12</sup> Nyëtsá bacna juabnënga entsangbe ainaniñe echanjësemna, y chë causa banga ndoñe quemochátenbobonshana.

<sup>13</sup> Pero nda nyets tempo átšbeñe ošbuachiyá totsomñe, atsbocaná echántsemna.

<sup>14</sup> Y quem tšabe noticiënga Bëngbe Bëtsabe amëndayama nyets quem luariñe entšángbioye mochántsabuayinaye, chca, chë ndegombre soyënga Bëngbe Bëtsabiama chënga chamotsetatšëmbuama. Chentšana cocayé quem luare jopochócama tempo echántsemna.

<sup>15</sup> “Chë Bëngbe Bëtsabe juabna oyebuambnayá Daniel chë puerte uabouana soye tojëftsanabema chë pochócaye soyama. Tšëngaftanga chë puerte uabouana soye chë uámana ca uabaina luarentše chašmojinÿe ora (nda tojtsalía, chabosertá), šmochántsetatšëmbo chë puerte ngménana tempo tojóshjanguama;

<sup>16</sup> entsanga Judeoca chamojtsemnënga, batsjabengoye chamotsacheta.

<sup>17</sup> Y nda cachabe yebnentša tsbanánoca chaojtsemna, chaotsachá chocana ntjast-jangcá ndayá tsoicana jëftsábocnama.

<sup>18</sup> Y nda jajoca chaojtsemna, yebnoye ndoñe chaondëta ni mo chabe quëfsaíya jesácñama.

<sup>19</sup> ¡Tša lastema chë tempo ngomámanënga chamojtsemnëngbiama o ochóchaye šešonga chamojtsabamnëngbiama!



<sup>20</sup> Bëngbe Bëtsá šmochtseimpadana chë tsëngaftanga jachetama, uaftena tempo ora o canÿe ochnayté ndoñe chaondëtsemnama.

<sup>21</sup> Chca, chora puerte ngménana echántsemna. Tša jabuache ngmenancá, quem luare jabojátšama orscana y méntscoñama y más chcoye, cachcá ngménana ndoñe ntjamnana.

<sup>22</sup> Chë puerte ngménana tempo yapa bën ndoñe chaondëtsemnama Bëngbe Bëtsá ndoñe tonjalesenciase, ndocná quentatsbocá; pero chabe ubuáyanënga cha corente endábabuanÿeshanayeca, echanjama yapa bën tempo ndoñe chaondëtsemnama.

<sup>23</sup> “Chora nderado nda cmochanjáuyana: ‘Minÿënga, muentse chë Cristo entsemna’, o ‘Choca cha entsemna ca’, chë soyëngama ndoñe šmattsayaunana.

<sup>24</sup> Chora mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuamb-nayëngnaca; y chënga mochanjama bëts soyënga chëngbe obenana jinÿanÿiyama, entšanga jáingñama, y tmojobenase, chë Bëngbe Bëtsabe bocacánëngnaca.

<sup>25</sup> Atše ya chama tcbonjabuayená chë tempo cabá ndóshjango ora.

<sup>26</sup> Chíyeca, nderado chënga chacmojáuyana: ‘Minÿënga, chentše chë Cristo entsemna, entšanga ndoyenoca ca’, choye ndoñe šmatjá; o chacmojáuyana: ‘Cha canÿe tsoca entsemna ca’, chama ndoñe šmattsayaunana.

<sup>27</sup> Er ntšamo chë tojatcuinÿe ora, shinÿe bocanoicana y shinÿe ue-natjëmbambanëntscoñe jabuashinÿinÿenancá y ba luarënguenache entšanga jobenayana jinÿama, cachcá, Bëngbe Bëtsá Entšá tbojanbemá quem luaroye chaojésabo te, entšanga nÿets luarentše mochanjobenaye cha jinÿama.

<sup>28</sup> Canÿe obanabe cuerpo tojtsemnama chë gallinacënga tmojátatšëmbona y cachora chë béconana jojtana. Cachcá, chë castigo echántsemna nÿa chama chë tempo chaojtsemna ora ca” —Jesús tojánayana.

*Bëngbe Bëtsá Entšá tbojanbemá quem luaroye echanjésabo*

*(Mc 13.24-37; Lc 21.25-33; 17.26-30, 34-36)*

<sup>29</sup> Mëntsánaca Jesús tojánayana: “Chë puerte ngménana tempo chaojochnëngüentšana, shinÿe ndoñe queochátsbuashinÿinÿana, juashcona ndoñe queochátsbinÿnaye, celocana estrellënga echanjatquécjana y quem luarentša tsbanánoca espíritënga obenana bomnënga echanjángmëmana.

<sup>30</sup> Chora canÿe soye celoca echanjónÿna entšanga jinÿanÿiyama Bëngbe Bëtsá Entšá tbojanbemá ya iuaisaboma, y nÿets luarenache entšanga mochanjenóbošachna, y Bëngbe Bëtsá Entšá tbojanbemábioye mochanjinÿe celoca jantšetëshiñe echántsaboye, puerte obenánaca y corente buashinÿinÿaniñe.

<sup>31</sup> Y canÿe trompetëfjua jabuache chaojuénana ora, cha chabe angelotëmënga echanjichamuá Bëngbe Bëtsabe ubuáyanënga júbuajama, nÿets luarëngocana, celoca cánÿoica juachoicana y chë ínÿoica juachóntscoñe.

<sup>32</sup> “Ntšamo higo betíyeca endbétsopasanama šmochjuatsjinÿe: Tojtsaisabuacuana y tojtsaiséjotsana ora, chë tsabe tempo ya tojtsaisobecuama jtsotatšëmbuana.

<sup>33</sup> Cachcá, lempe chë ndayama tsëngaftanga tcbonjauyancá chašmojinÿe ora, šmochántsetatšëmbo Bëngbe Bëtsá Entšá tbojanbemá ya jésabama yojtsemnama.

<sup>34</sup> Ndegombre cbëyana, lempe chca echanjochnëngo, morsca entšanga cabá ndóbana ora.

<sup>35</sup> Celoca y quem luare echanjopochóca, pero atšbe palabra ndocna te queochaisopochóca.

<sup>36</sup> “Pero ndayté y ntseco ora Bëngbe Bëtsá Entšá tbojanbemá yochjésabama, ndocná quenátstatšëmbo, ni chë celoca angelotëmënga, ni Bëngbe Bëtsabe Uaquiñá. Nÿe chë Taitá chama yotátšëmbo.

<sup>37</sup> “Ntšamo Noé yojëftsiyena ora tojanopasacá, cachcá echanjopása chë Bëngbe Bëtsá Entšá tbojanbemá chaojésabo ora.

<sup>38</sup> Noebe tempo, chë uabouana uaftena cabá nduáshjango ora, entšanga imnasaye, innofšësnaye y inmóbouamnaye; natjëmbana imojtsiyeñe, y chca imojtsomñe Noé chë barquëshoye tojánamashënguentscuana.

<sup>39</sup> Chënga tondaye imonjántatsëmbo, nÿe chë uabouana uaftena tojánashjango y nÿetscanga tojtsanéyamba ora cocayé. Cachcá echántsemna Bëngbe Bëtsá Entšá tbojanbemá chaojésabo ora; ya chaojochnëngo ora, entšanga chama mochanjátatsëmbona.

<sup>40</sup> Chora uta boyabásata jajoca bochántsemna; canÿa mochanjesbetše y chë ínÿana ndoñe.

<sup>41</sup> Uta shembásata bochántsejanÿcoye; canÿa mochanjesbetše y chë ínÿana ndoñe.

<sup>42</sup> “Chíyeca cuedado šmochtsebomna y yejuana šmochtsantješna, er ndoñe quešmátstatšëmbo ndayté tšëngaftangbe Utabná yochjésabama.

<sup>43</sup> Pero quem soye tšabá chacmësertá: Chë yebnentša nduiño, ntseco ora ibeta atbëbaná yochjabama tojtsetatšëmbëse, cha nantsefšna y ndocnábioye buanjaleséncia jushañe chaotsembemama tsoye jtsamashënguama y jtsatbëbama.

<sup>44</sup> Chíyeca, tšëngaftángnaca šmochtseprontana, er Bëngbe Bëtsá Entšá tbojanbemá echanjésabo, entšanga chama tondaye chamontsejuabná ora ca” —Jesús tojánayana.

### *Chë tsabe oservená y chë ndoñe tsabe oservená (Lc 12.41-48)*

<sup>45</sup> “¿Nda yomna chë oservená ntšamo chë nduiño tojtsebošcá amá y nÿets juábnaca amá? Cha jtsemnana nda chë nduiño bochjëftsebošhona chë yebnentšënga chaot-sanÿenama y jasama tojtsemna ora chaújuatšema.

<sup>46</sup> Chë nduiño tojtashjango ora, chë oservenábioye tbojínÿena ntšamo ibomncá jtsamëse, chë oservená puerte oyejuayá echántsemna.

<sup>47</sup> Ndegombre cbëyana, chë nduiño chábioye bochanjaimpáda lempe chabe soyënga chabotsinÿeñama.

<sup>48</sup> Pero chë oservená bacna entšá tomñësna, jajuaboyana chë nduiño ndoñe betesco yochantabo ca,

<sup>49</sup> y as, cha jóntšana chë inÿe oservénënga jtsajantšetayana, becá jtsesana y jtsetmuana inÿe tëmiëngaftaca.

<sup>50</sup> Y chabe nduiño jtashjanguama ndoñe tontsejuabná te y ndoñe tontsetátšëmbo ora, cha echántashjango.

<sup>51</sup> Chora chë nduiño jabuache bochantsecastíga, y ntšamo chë bacna entšanga ndayá ndegombre tmojuabnacá ndinÿinÿnayënga jasúfriama entsamncá, cha echanjasúfria. Chora cha puerte echanjenóbošachna y chë tsetšanama juatsašënga echantsenoftëšjojnaye ca” —Jesús tojánayana.

## 25

### *Chë bnëtsana tobiasëngbiama cuento*

<sup>1</sup> Mëntšánaca Jesús tojánayana: “Chë te chaojóshjango ora, Bëngbe Bëtsabe amëndayana echántsemna mo ntšamo canÿe casamento fiestentše tojanopasacá. Mëntšá yojopása: Bnëtsana tobiasënga chëngbe querosine uajuinÿanëshangá imojëftsájaca y imojábocana chë casamentero boyabása jajëbenguama.

<sup>2</sup> Chë bnëtsana tobiasënguentsšana, shachnënga sempre enójuabnayënga imnamna, y chë inÿe shachnëngna, ndenójuabnayënga.

<sup>3</sup> Chë ndenójuabnayëngna chëngbe uajuinÿanëshangá imojëftsájaca, pero querosine ndoñe imonjuabuyamba chë uajuinÿanëshangañe cachiñe jtaftsuámama.

<sup>4</sup> Pero chë sempre enójuabnayëngna chëngbe uajuinÿanëshangá imojëftsájaca y querosínënaca botellëšënguiñe imojuabuyamba.

5 Chë casamentero boyabásana ndoñe betesco yonjabo, chíyeca nyetsca tobiasënga ocnayana yojubuache y imojtsomaná.

6 Mo tséntseto orna, chënga imojouena mëntšá uayebuáchana: ‘¡Chë casamentero boyabása ya endabó! ¡Jajébenguama mobocana ca!’

7 Asna, nyetsca tobiasënga imojotsbaná y imojóntša chë uajuinÿanëshangá juabopróntana.

8 Chorna, chë shachna ndenójuabnaye tobiasënga chë inÿe shachnënga sempre enójuabnayëngbioye imojáuyana: ‘Diosmanda tšëngaftangbe querosinentšana baseytema šmëbuatšatá, bëngbe uajuinÿanëshangá tojontsé jtsafsanana ca.’

9 Pero chë sempre enójuabnayëngna imojayana: ‘Ndoñe. Tcbojubuatšatase, tšëngaftangbiana y bëngbiámnaca querosine echántsashbe. Más tšabá entsemna, chë querosine mondbétsenoye chašma y tšëngaftangbiana chašmauábuamiñe ca.’

10 “Chorna, chë shachna ndenójuabnaye tobiasënga imojá chë querosine jauabuámiyama; pero chëntscuana chë casamentero boyabása yojáshjango y chë sempre enójuabnayënga cháftaca chë casamento fiestoye imojámashjna, y chentša bësása imojtatame.

11 Chentšana chë inÿe tobiasënga imojáshjajna y mëntšá imojtsichamo: ‘¡Taita, Taita, šmëbëtafjo ca!’

12 Pero chë casamentero boyabása yojójua: ‘Ndegombre cbëyana, tšëngaftanga ndoñe quechatëbuatma ca.’

13 “Cachcá echántsemna Bëngbe Bëtsá Entšá tbojanbemá chaojésabo ora; chíyeca šmochtseprontana, tšëngaftanga ndoñe quešmátstatšëmbo ndayté, ni mocna ora chca yochjopásama ca” —Jesús tojánayana.

### *Chë crocenánama cuento (Lc 19.11-27)*

14 “Bëngbe Bëtsabe amëndayana endmëna mo ntšamo canÿe boyabásaftaca tojanopasacá. Cha ibojtsemna inÿe luaroye jtsoñama; as chabe oservénënga yojáchembo y yojaimpádaye chabe crocénana chamotsinÿenama.

15 Cánÿabioye ibojántšabuachiye shachna uaranga crocénana, ínÿabioyna uta uaranga y ínÿabioyna canÿe uaranga. Chca yojamna ntšamo cada ona ibojobiashjachcá. Y as chë boyabása yojtsoñe.

16 Cachora chë shachna uaranga yojoyëngacñá yojá trato jabemama, y chca, inÿe shachna uaranga crocénana yojábotiye.

17 Chë uta uaranga yojoyëngacñá cachcá yojama y inÿe uta uaranga yojábotiye.

18 Pero chë canÿe uaranga yojoyëngacñana, yojá, fshantsiñe yojajutjo y chabe mandayabe crocénana chentše yojtseitëme.

19 “Chentšana baytese chë oservénëngbe amëndayá yojtashjango y yojóntša chë crocénánama chënga jatjayana.

20 Natsana yojáshjango chë shachna uaranga yojoyëngacñá y chabe mandayábioye inÿe shachna uaranga crocénana ibojántšabuachiye y mëntšá ibojauyana: ‘Taita, aca shachna uaranga šconjanoyé y muentše entsemna inÿe shachna uaranga sënjaboté ca.’

21 As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tcbojamandacá tcojámayeca, atše cbochanjaimpáda más bëtscá chašcotsinÿeñama. Mamáshëngo y átšeftaca cochjóyejuaye ca.’

22 Chentšana chë uta uaranga yojoyëngacñá yojáshjango y chë mandayábioye ibojauyana: ‘Taita, aca uta uaranga šconjanoyé y muentše entsemna inÿe uta uaranga sënjaboté ca.’

23 As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tcbojamandacá tcojámayeca, atše cbochanjaimpáda más bëtscá chašcotsinÿeñama. Mamáshëngo y átšeftaca cochjóyejuaye ca.’

24 “Pero chë canÿe uaranga yojoyëngacñe oserverná yojáshjango orna, chabe mandayábioye ibojauyana: ‘Taita, atše sëndétatšëmbo aca canÿe tšátjaye entšá comnama; acna chë ndoñe tconjajé chentše saná jocñana y chë ndoñe tconjujqüeshe luarentše jobuátbanana.

25 Chama atše uatjana šjuábuache, chíyeca atše sënjá y fshantsiñe chë crocénana sënjetseitëme. Pero muentše acbe crocénana entsatsmëna ca.’

26 As chë mandayá ibojujú: ‘¡Bacna oserverná y oyënjayá! Chë ndayentše ndoñe tijajé chentše saná jocñana y chë ndoñe tijujquëshe luarentše jobuátbanana atše tsuamanama icojátatšëmbëse,

27 aca cmonjamna atšbe crocénana bancoca jetsobuájua y atše matijtabo ora, atšbe crocénana matijtóyëngacñe y chë chentšana tojoboté crocénanënaca ca.’

28 Y as yojamënda: ‘Chë uaranga motseboca y chë bnëtsana uaranga entsebomnábioye chana motsatšetá ca.

29 Er nda tojtsebomnábioye, más jatšetayana, y chca cha corente bëtscá jtsebomnana; pero tondaye tondbomnábioyna, chë batšatema tobomna sóynaca jtsebocana ca.’

30 “Y chora cha yojayana: ‘Quem ndoserverna trabajayá shjoca ibetoye matábocna; choca puerte echanjenóbošachna y chë tsetšanama juatsašënga echantsenoftëšjojnaye ca’ ” –Jesús tojanëyana.

*Ntsamo chë quem luare jopochócama ora, nyëtsca entsangbiama mochjayana*

31 Mëntšánaca Jesús tojánayana: “Chë Bëngbe Bëtsá Entšá tbojanbemá chabe obenánaca, buashinÿinÿaniñe y nyëtsca chabe angelotëmëngaftaca chaojésabo ora, chë reybiama puerte buashinÿinÿana tbemaniñe echanjótbema.

32 Chora nyëts luarëngoca entsanga chabe natsanoica mochanjénefjna, y cha, entsanguentsana ínÿenga echanjábacacaye, mo chë oveshënga abujajënÿa oveshënga chivëngbentsana endbetsabacacnycá.

33 Chë abujajënÿana, oveshënga chabe catšbioica echanjáchembo y chivëngna chabe uañicuayoica. Bëngbe Bëtsá Entšá tbojanbemá cachcá echanjama: chë ubuáyanënga chabe catšbioica echanjúbuaja y chë bacna entsangna chabe uañicuayoica echanjátsaye.

34 “Chorna chë Rey, Bëngbe Utabná, chabe catšbioica chamojtsemna entsanga echanjáuyana: ‘Tšëngaftanga, Atšbe Taitá tšábeñe cmëtabna, mabënga ca; atšbe amëndaye luare mo tšëngaftangbiama otocana soycá mosháchiñënga; tšëngaftangbiama endëprontana, Bëngbe Bëtsá quem luare tonjanma orscana.

35 Er atše šonjanishëntsana y tšëngaftanga saná šmonjancaredadó; šonjanajuendá y tšëngaftanga šmonjanafšé; inÿe luarocana ashjanganocá sënjánana y posada šmonjanántšame.

36 Enašá sënjánana y entsayá šmonjanëtšetá jtichëtjuama; šocá sënjanjájona y šmonjanatsëtsaye; cárceloca sënjanëtámëna y jabëuatsëtsayama šmonjánabo ca.’

37 “As chë Bëngbe Bëtsá chabe bominÿiñe tšábënga tojábiamënga mochanjatjaye: ‘Bëngbe Utabná, ¿ntseco shëntseca tcbënjáninÿe y tcbënjajuatšé? ¿Ntseco uajuendayá tcbënjáninÿe y tcbënjanafšé?

38 ¿O ntseco inÿe luarocana ashjanganocá tcbënjáninÿe y posada tcbënjánántšame, o enašá y entsayá jtichëtjuama tcbënjánëtšetá?

39 ¿O ntseco šocá o cárceloca utamená tcbënjáninÿe y jauatsëtsayama tifjána ca?’

40 “As chë Utabná echanjóju: ‘Ndegombre cbëyana, lempe ntsamo chë atšbe catšátanguentsana chë más batšá uámanëngaftaca šmojamcá, cach átšeftaca šmonjanma ca.’

41 “Chentšana chë Utabná chabe uañicuayoica chamojtsemna entsanga echanjáuyana: ‘Atšbentsana mojuánanga atšbe Bëtsabe uabotënënga. Infiernoye motsajna, chë ndocna te queochátsfsana íñeshoye; choca endëprontana Satanás y chabe ustonëngbiama.

<sup>42</sup> Er atše shěntseca sěnjánana y tšěngaftanga saná ndoñe chešmatancaredadó; šonjanajuendá y ndoñe chešmatanafsé;

<sup>43</sup> inye luarocana ashjargonacá sěnjánana y ndoñe posada chešmatanántsame. Enasá sěnjánana y ndoñe entsáyá chešmatanětšetá; šocá sěnjanjájona y cárceloca sěnjaneťámena y ndoñe chešmatanatsětsá ca.'

<sup>44</sup> “As chěnga mochanjatjaye: ‘Běngbe Utabná, ¿ntseco tcběnjáninye shěntseca o uajuendayá, o inye luarocana ashjargonacá, o enasá, o šocá o cárceloca utamená y ndoñe tcběnjanajabuache ca?’

<sup>45</sup> “Y chě Utabná echanjójua: ‘Ndegombre cběyana, tšěngaftanga ntšamo chě atšbe catsátanguentšana chě más batšá uámaněngaftaca, ndoñe šmonjanmca, átseftaca cach ndoñe chešmátanma ca.’

<sup>46</sup> “Chěngna infernoye nyetsca tescama mochantsěsetjango, y chě Běngbe Bětsá chabe bominyiñe tšábenga tojábiaměngna chě nyetsca tescama yomna tšabe vida mochántsebomna ca” —Jesús tojánayana.

## 26

### *Entšanga tmojanjuabó ntšamo jaměse Jesús jishachama (Mc 14.1-2; Lc 22.1-2; Jn 11.45-53)*

<sup>1</sup> Lempe chca tojánayanentšana, Jesús chabe uatsjédayěnga tojaněyana:

<sup>2</sup> “Tšěngaftanga šmondětatsěmbo, uta te y chě Bashco fiesta echántsemna y Běngbe Bětsá Entšá tbojanbemá inyěngbe cucuatšifne mochanjáboshjona chamocrucificama ca.” Chě fiesta inamna jtenójuboyama Běngbe Bětsá chě judiěngbe běts taitanga Egiptocana tojánatsebacama.

<sup>3</sup> Chěntscuana, chě bachnangbe aměndayěnga y chě judiěngbeñe bětsějeměngcá mándayěnga tmojánenefjna, Caifás, chě bachnangbe más uámama aměndayabe běts yebnentše.

<sup>4</sup> Tmojanenojuabó y tmojanenoyeuná jtseíngñase Jesús jishachama, y jtsóbama.

<sup>5</sup> Pero imojtsichamo: “Quem fiestěntscuana ndoñe, entšanga yapa muanjontša enbouenanana ca.”

### *Canye shembása botamana uanguětše bėjaye Jesusbe bestšasiñe tbojanbuešcja (Mc 14.3-9; Jn 12.1-8)*

<sup>6</sup> Jesús Betania pueblentše yojtsemna, Simón chě bacna nguayanánaca šocá ca uabobu-atmabe yebnentše.

<sup>7</sup> Chěntscuana canye shembása Jesúsbiye tojanabeconá. Chě shembásana tojanamba canye alabastro jarrětema, jútjena canye puerta uámama botamana uanguětše bėjayeca. Jesús mesěshentše yojtsemněntscuana, chě shembása chabe bestšasiñe chě botamana uanguětše bėjaye tbojanbuešcja.

<sup>8</sup> Chě uatsjédayěnga chca tmojáninye orna, tmojanotjayaná y tmojanontsé ichámuana: —¿Ndáyeca nye bonamente chě soye chca yojtsemna ca?

<sup>9</sup> Chamna, matměnjobenanga chě bėjaye becá crocenánama juiyana y chánaca ndbomnějéměnga matměnjújabuache ca.

<sup>10</sup> Jesús chě soye tojanuena; as tojaněyana: —¿Ndáyeca ndoñe cachcá quem shembása šmochanjonjaye ca? Ntšamo tonjamcá tšabá entsemna.

<sup>11</sup> Er chě ndbomnějéměngna nyets tempo tšěngaftangbeñe mochanjěftsemna, pero atše tšěngaftangaftaca ndoñe nyets tempo quicháisemna.

<sup>12</sup> Ntšamo chě shembása tojamcá, chě botamana uanguětše bėjaye atšbe cuerpiñe jabuěšcjěse, cha šontsepróna atše juatbontsa tescama.

<sup>13</sup> Ndegombre cběyana, quem luariñe ndayěntšnaca Běngbe Bětsabe soyěngama chamojtsabuayiyná chentše, ntšamo quem shembása tojamámna becá

mochanjëftsóyebuambaye, chca, entsanga chabiamá chamotsenójuabnama ca —Jesús tojanëyana.

*Judas tojána bachnangbe amëndayëngbioye, Jesús chamuishachama  
(Mc 14.10-11; Lc 22.3-6)*

<sup>14</sup> Canya chë bnëtsana uta uatsjendayënguentsá, Judas Iscariote ca uabainá, tojána bachnangbe amëndayëngaftaca jencuéntama.

<sup>15</sup> Y tojanatjá: “¿Ntsachetsá šmatjtabuénaye y Jesús tsëngaftangbe cucuatšinë cboch-jayentsbashejuana ca?”

As chëngna, unga bnëtsana ralbenga tmojtanabuená.

<sup>16</sup> Y cach orscana Judas yojsenguaye ntšámose y ntseco ora, Jesús chëngbe cucuatšinë jayentsbáshejuana.

*Jesús chabe uatsjéndayëngaftaca Bashco saná tojanse  
(Mc 14.12-25; Lc 22.7-23; Jn 13.21-30; 1 Co 11.23-26)*

<sup>17</sup> Chë Bashco fiesta bojatsenté, chë levadúraca ndëpormana tandëse jasama fi-estëntscuana, chë uatsjéndayënga Jesúsbioye tmojanobeconá y tmojantjá: —¿Ndémoca aca cojtseboše bënga fchauptontama Bashco saná chacosama ca?

<sup>18</sup> Y Jesús tojanëyana: —Chë bëts puebloye motsajna canye bacobe yebnoye y cha šmochjauyana: “Buatëmbayá tonjayana: ‘Atšbe ora ya echanjobuache, y atšbe acbe yebnoye sentsá, Bashco fiesta jamama atšbe uatsjéndayëngaftaca ca.’ ”

<sup>19</sup> As chë uatsjéndayënga tmojanma ntšamo Jesús tojanamëndacá y chë Bashco fiesta saná tmojanprontá.

<sup>20</sup> Y tojanibétata orna, Jesús chë bnëtsana uta uatsjéndayëngaftaca mesëshentše yojtsemna.

<sup>21</sup> Y imojtsesantscuana, Jesús tojanëyana: —Ndegombre cbëyana, canya tsëngaftanguentsá uayayëngbe cucuatšinë šochanjáboshjona ca.

<sup>22</sup> Chora chë uatsjéndayënga puerte ngménaca imojtsemna y tmojanontsé canyánya Jesús jatjayama: —Bëngbe Utabná, ¿nderado atšbe cha chtsemna ca?

<sup>23</sup> As Jesús tojanëjua: —Canya nda chabe tandëse entsefchecuacná cach atšbe sëntsefchecuacná šcnenentše, cha uayayëngbe cucuatšinë šochanjáboshjona.

<sup>24</sup> Ndegombre, Bëngbe Bëtsá Entšá tbojanbemáftaca echanjopása ntšamo Bëngbe Bëtsabe uabemana palabrenguiñe chabiamá iuayancá; pero, itša lastema chë bochjáboshjonabiamá! Más tsabá chabiamá manjamna ndoñe ntjónýnana ca.

<sup>25</sup> As Judas, chë boshjuaná, Jesúsbioye tbojantjá: —Buatëmbayá, ¿nderado atšbe chtsemna ca?

Y Jesús tbojanjuá: —Ndegombre tcjayana ca.

<sup>26</sup> Imojtsesantscuana, Jesús tandëse tojanca, Bëngbe Bëtsábioye chama tbojtanchuá, tojanjatá y chë uatsjéndayënga tojanatsatá. Y mëntsá tojánayana: “Mocñënga, mosënga. Atšbe cuerpo entsemna ca.”

<sup>27</sup> Chentsana, canye coptema vínoyeca tojanaca, Bëngbe Bëtsábioye tbojtanchuá y chë uatsjéndayënga tojanëfsašé. Y mëntsá tojánayana: “Nýetscanga quem coptémentšana mofšenga.

<sup>28</sup> Quem vínoye atšbe buiñe entsemna. Atšbe buiñe echanjuábuashana entsanga chamotsetatsëmbuama ntšamo Bëngbe Bëtsá entsanga tojanašebuachenacá añe yochjochnënguama. Chë buiñe bëtsca entsangbiamá echanjuábuashana, chëngbe bacna soyëngama perdonánënga chamotsemnama.

<sup>29</sup> Y ndegombre cbëyana, morscana atšbe ya ndoñe más chë uvasentsana obocniye quichaisofsiye. Chë tsëm vínoye tsëngaftangaftaca chanjofsiye, atšbe Taitabe amëndayoca chamojtsemna ora ca” —Jesús tojánayana.

*Jesús tojánayana, chábioye ndoñe bonjanabuátma ca Pedro yochjánayanama  
(Mc 14.26-31; Lc 22.31-34; Jn 13.36-38)*

<sup>30</sup> Bëngbe Bëtsá jëtschuayama tmojancantá chentšana, Olivos tjashoye tmojëftsanbocana.

<sup>31</sup> Choca Jesús tojanëyana: —Tšëngaftanga nyetscanga quem ibeta átšbeñe ošbuáchiyana šmochantsobuetše y šmochántsacheta, er Bëngbe Bëtsabe uabemana palabrenguiñe, cha mëntšá tojánayana: “Chë oveshëngbe abujénÿa chanjóba y chë oveshënga mochantsáshana ca.” Chca tšëngaftangaftaca echanjopása, uayayënga chašmojishache ora.

<sup>32</sup> Pero obanënguentshana chaitayenentshana, tšëngaftangbe natsana Galileoye chanjá ca —cha tojanëyana.

<sup>33</sup> Chora Pedro tbojanjuá: —Masque nyetscanga ábeñe ošbuáchiyana chamotsobuetše y chamotsacheta, ntšamo ácaftaca yochjopása causa, atše ndocna te ca.

<sup>34</sup> As Jesús tbojaniyana: —Ndegombre cbëyana, cam ibeta, ngallo cabá ndécánta ora, aca unga soye cochanjayana ndoñe šconduabuatma ca.

<sup>35</sup> Pero Pedro tbojaniyana: —Masque chašotsemna ácaftaca jóbanama, atše ndoñe quichátayana ndoñe cbonduabuatma ca.

Y nyetsca uatsjëndayëngnaca cachcá imojtsichamo.

*Getsemaní luarentše Jesús Bëngbe Bëtsáftaca tbojanencuentá  
(Mc 14.32-42; Lc 22.39-46)*

<sup>36</sup> Chentšana, Jesús chabe uatsjëndayëngaftaca canÿe luare Getsemaní ca uabáinoye tojána. Choca tojanëyana: “Muentše motbiamá, chëntscuana atše choye chanjá Bëngbe Bëtsáftaca jencuéntama ca.”

<sup>37</sup> Y Pedro y chë Zebedeobe uta uaquiñata tojëftsanébiatše. Choca yojóntša puerte ngmënaca y corente cochtsetšenaná jtsemnana.

<sup>38</sup> Jesús tojanëyana: “Atšbe ainana puerte ngmënaca entsemna, mo jobanamcá. Muentše moquedanga y átšeftaca šmochtsefšna ca.”

<sup>39</sup> Chora Jesús más natsanoye tojána, tojanoshamentšé y fshantsóntscoca yojotsejbéna, y mëntšá Bëngbe Bëtsáftaca tbojanencuentá: “Atšbe Taitá, jopódianëse moma atše japadésama ndoñe chašondëtsemnana. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

<sup>40</sup> Chentšana, Jesús chabe unga uatsjëndayëngbioye tojtanabo y chëngna inmëtsomañe. Chca tojánanÿena ora, Pédrëbioye tbojaniyana: “¿Ni mo canÿe horatema tšëngaftanga šmonjobená átšeftaca jtsefšnana ca?”

<sup>41</sup> Smochtsefšna y Bëngbe Bëtsáftaca šmochtsencuéntaye, chca, bacna soye jamama ndoñe chacmondócochënguama. Tšëngaftanga ndegombre šmontseboše espíritoca Bëngbe Bëtsá joyeunayama, pero cuerpiñe añemo ndoñe quešmátsbomna ca” —Jesús tojanëyana.

<sup>42</sup> Uta soyama tojtesaná y mëntšá Bëngbe Bëtsáftaca tbojanencuentá: “Atšbe Taitá, atše japadésama ndoñe chašondëtsemnana jamama ndoñe jopódianësna, nÿe ntšamo aca cojtsebošcá chaotsemna ca.”

<sup>43</sup> Y tojtanabo ora, chë uatsjëndayënga cachiñe inmëtsomañe; yapa ocnye causa nÿe imojtsefshétana.

<sup>44</sup> As Jesús cachcá yojëftsënÿaye, y ungama cachiñe tojtesaná Bëngbe Bëtsáftaca jencuéntama, y cach palabrenga tojánayana.

<sup>45</sup> Chora chë uatsjëndayëngbioye tojtanabo y tojanëyana: “¿Cabá šmotsomañe y šmotsochnañe ca? Ya ora tocjobuache, Bëngbe Bëtsá Entšá tbojanbemá bacna soye amëngbe cucuatšinë mochanjáboshjona.

<sup>46</sup> Motsbananga, cuajna. Minÿënga, chë boshjuaná ya entsebeconá ca.”

*Uayayënga Jesús tmojánishache**(Mc 14.43-50; Lc 22.47-53; Jn 18.2-11)*

<sup>47</sup> Jesús cabá yojtsóyebuambnantscuana, Judas, canÿe chë bnëtsana uta uatsjendayënguentsá, tojánashjango, y cháftaca imojtsemna ba entsanga espadëjangaca y ngarotbéngaca prontánënga. Chënga imojamna chë bachnangbe amëndayënga y chë judiëngbeñe bëtsëjemëngcá amëndayëngbe ichmónënga.

<sup>48</sup> Judas, chë boshjuaná, tojanjuabó ntšamo jamana entsanga jinÿanÿiyama ndëmua Jesús bëtsemnana. Chíyeca yojáuyana: “Nda chajiauámocho, cha echántsemna. Smochjishache ca.”

<sup>49</sup> Cachora Judas Jesúsbioye tojanobeconá y tbojanchuá: —Buajtana, Buatëmbayá ca. Y tbojtanámocho.

<sup>50</sup> Jesús tbojaniyana: —Enutá, moma chë ndayá jabomama tcojabo ca.

Chorna, chë entsanga tmojanobeconá, Jesús tmojánishache y tmojanánatse.

<sup>51</sup> Chca orna, canÿe enutá Jesúseftaca yojtsemná, chabe espadëja tojanenosëngbotëntsena, y chë bachnangbe más uámana amëndayabe oservenábioye canÿe matscuaše tbojtsanëštjango.

<sup>52</sup> As Jesús tbojaniyana: “Espadëja matosëngbuajonÿá. Nda espadëjaca tbojóba chana, cach espadëjaca echanjóbana.

<sup>53</sup> ¿Aca ndoñe condëtatšëmbo, atše atšbe Taitábioye stjaimpádase, cha cachora atšbiana nanjichamuá bnëtsana utama más ejércitënga angelotëmëngaca?

<sup>54</sup> Pero chcasna, ¿ndayá Bëngbe Bëtsabe uabemana palabrënguiñe endayancá ntšamo nanjochnënga? Chiñe endayana ntšamo entsopasancá jochnënguama canmëna ca.”

<sup>55</sup> Cachora Jesús entsanga tojanatjá: “¿Ndáyeca šmojabo espadëjangaca y ngarotbéngaca atše jishachama, mo atše canÿe bacá uamana entsá cuaftsemncá ca? Atše cada te Bëngbe Bëtsabe bëts yebnoca tšëngaftangaftaca sënjántbemana abuátambaye, y choca ndoñe chešmátanishache.

<sup>56</sup> Pero lempe quem soyënga chca entsopasana, cachcá chaotsemnana ntšamo Bëngbe Bëtsabe uabemana palabrënguiñe chë Bëngbe Bëtsabe juabna oyebuambnayënga tmojanayancá ca” —Jesús tojánayana.

Cachora nÿetsca uatsjëndayënga tmojtsanëuatjaná y tmojtsanacheta, y Jesús chë uayayëngaftaca cachcá tmojesanonÿá.

*Jesús tmojanánatse chë judiëngbe más uámana amëndayëngbioye**(Mc 14.53-65; Lc 22.54-55, 63-71; Jn 18.12-14, 19-24)*

<sup>57</sup> Chë Jesús tmojánishachënga, tmojanánatse, Caifás chë bachnangbe más uámana amëndayabe yebnoye. Chentše chë ley abuátambayënga y chë judiëngbeñe bëtsëjemëngcá amëndayënga tmojánenefjna.

<sup>58</sup> Pedro bënocana Jesús tbojanasto, chë bachnangbe más uámana amëndayabe chashjóntscoñe; choye tojánamashëngo y chë Bëngbe Bëtsabe bëts yebnoca josticiëngaftaca yojótbema, chca, jtsetatšëmbuama ntšamo yochjopásama.

<sup>59</sup> Chë bachnangbe amëndayënga, chë bëtsëjemëngcá amëndayënga y ínÿenga judiëngbe amëndayënga imojtsenguaye ndánaca masque uayátsenaye soye Jesusbe contra cháuyanama, as chënga jobenayama cha chaóbana ca jayanama,

<sup>60</sup> pero ndoñe tmonjáninÿena, masque banga tmojánashjajna Jesusbe contra uayátsenaye soyënga jayanama. Cabana, útata tbojánashjango,

<sup>61</sup> y chata tbojánayana: “Quem boyabása tonjayana canobena Bëngbe Bëtsabe bëts yebna jtsenásatajchcana y nÿe unga tese jtëtsjebuana ca.”

<sup>62</sup> As chë bachnangbe más uámana amëndayá tojantsá y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?



<sup>63</sup> Pero Jesús n̄ye iytēca yojtsemna. Ch̄iyeca ch̄e bachnangbe más uámana amēndayá tbojaniyana: —Bēngbe Bētsá Ainabe mándoca cbomandá chašcuyana aca ndegombre ch̄e Cristo, ch̄e Bēngbe Bētsabe Uaquiñá comna o ndoñe ca.

<sup>64</sup> Chora Jesús tbojanjuá: —Aca ndegombre yomncá tcjayana. Y quem sóynaca cbēyana: Tšēngaftanga šmochanj̄n̄ye, atše, Bēngbe Bētsá Entšá tbojanbemá, ch̄e n̄yets obenana bomnabe catsbioica jtsetbemanana y celoca jantšetshiñe jtsaboyana ca.

<sup>65</sup> Chora ch̄e bachnangbe más uámana amēndayá chabe uichētjonējuangá yojt-senántšajatanēca, puerte ibojtsetna causa, y tojánayana: —¡Ntšamo quem boyabása tonjoyebuambacá, Bēngbe Bētsabiamama entsemna mo cha cuafjoyenguangcá, ch̄e chabe Uaquiñá yomna ca cha tonjayana ora! ¿Ndayama más entšanga šochjátējaboto Jesusbe contra chamuayanama?

<sup>66</sup> ¿Ntšamo šmatjayana ca? —cha tojanatjá.

As ch̄e entšanga tmojanjuá: —Ndegombre cha bēts bacna soye entsebomna; jóbanama bontsemna ca.

<sup>67</sup> Chora tmojanontsé Jesús juebēbuashētjnayana, jabuache jantsetayana y ín̄yengna imojtsejuébjantšetaye,

<sup>68</sup> y imojtsatsētsnaye: “Cristo, aca ndegombre Bēngbe Bētsabe juabna oyebuambnayá tcomnēse, ¡momalisiá nda tcmēnjantšetá ca!”

*Pedro tojánayana Jesúsbioye ndoñe bonjanabuátma ca  
(Mc 14.66-72; Lc 22.55-62; Jn 18.16-18, 25-27)*

<sup>69</sup> Chēntscuana Pédrēna shjoca yojtsemna, chashjoca yojtsetbemana. Chora, can̄ye shembása chentša oservená tbojanobeconá y tbojaniyana: —Acnaca, Jesús ch̄e Galileocáftaca conjánana ca.

<sup>70</sup> Pero Pédrēna, n̄yetscangbe delante tojánayana chábioye ndoñe bonjanabuátma ca, mēntšá jayanēse: —Ntšamo contsichamcá, ndoñe quešnátēsertana ca.

<sup>71</sup> Chora Pedro bēsoye yojábocna. Chentšna, in̄ye shembása oservená chábioye tbojánin̄ye y ch̄e in̄ye entšanga tojanéyana: —Cha, Jesús ch̄e Nazaretocáftaca enjánana ca.

<sup>72</sup> Pedro cachiñe tojánayana ndoñe bonjanabuátma ca, y mēntšá yojtsejúrayer: —¡Chē boyabása ndoñe quetsatabuatma ca!

<sup>73</sup> Chentšana, ch̄e chentše imojtsemnēnga Pédrēbioye tmojanobeconá y tmojaniyana: —Ndegombre, ácnaca ch̄e uatsjendayēnguentšá condmēna. Chē contsoyebuambnacá contsoyátēmbana ca.

<sup>74</sup> Chora Pedro tojanontsé ichámuana, Bēngbe Bētsá chašotsecastigá ndoñe ndegombre soye stsichámēse ca; yojtsejúrayer y yojtsichamo: —¡Chē boyabása ndoñe quetsatabuatma ca!

Y cachora can̄ye ngallo yojacánta.

<sup>75</sup> Y Pedro yojenójuaboye ntšamo Jesús tbojaniyanama. Cha mēntšá tbojaniyana: “Cabá ngallo ndēcánta ora, aca unga soye cochanjayana ndoñe šconduabuatma ca.” Y chentšana tojésanbocna y corente ngmēnaca yojtsenóbošachna.

## 27

*Jesús, Pilátbioye tmojanánatse  
(Mc 15.1; Lc 23.1; Jn 18.28-32)*

<sup>1</sup> Tojanbin̄yana ora, n̄yetsca ch̄e bachnangbe amēndayēnga y judiēngbeñe bētsējemēngcá amēndayēnga tmojánenefjna jenóyeunayama ntšamo jamēse Jesús chaóbanama.

<sup>2</sup> As, Jesús tmojanēcuébatsēca y tmojanánatse, y chca, Pilato, ch̄e Judeoca Romano mandadbe cucuatshiñe tmojánboshjona.

*Ntšamo Judas tojanóbana*

<sup>3</sup> Judas, chë boshjuaná, Jesús jóbanama ibojtsemnana tojanuena ora, puerte yojt-senócochinýena ntšamo tojánchjanguama, y chë unga bnëtsana ralbenga chë bachnangbe amëndayënga y bëtsëjemëngbioye tojtanamba,

<sup>4</sup> y mëntšá tojanéyana: —Puerte bacna soye tijama. Atše canýe bacna soye ndbomná tšëngaftangbe cucuatšinë tijáboshjona chaóbanama ca.

Pero chënga tmojanjuá: —¿Chë soye ndayá bëngbiama? Cach aca cochátotatsëmbñe ca.

<sup>5</sup> As Judas chë ralbenga Bëngbe Bëtsabe bëts yebnentše yojesëtsana, y yojá y yojëtsentsešaye.

<sup>6</sup> Chë bachnangbe amëndayëngna chë ralbenga tmojtanatbaná y tmojánayana: —Quem crocenánama buiñe echanjuábuashana; ntšamo leyiñe endayancá, bënga ndoñe quemuátobena chë Bëngbe Bëtsabiama soyënga quëcjnyëtémiñe chana jasegórana ca.

<sup>7</sup> Chcasna, chënga tmojanenoyeuná, chë crocenánacna chë Alfarerbe Luare ca uabaina fshantse jabuámiyana, y chca, canýe luare jtsebomnana ndayentše chë inýe luarëngocana entšanga áshjajnënga jutabuantsama.

<sup>8</sup> Chíyeca, chë fshantse mëntscoñama Buiñe Luare ca iuabaina.

<sup>9</sup> Chca, tojanochnëngo ntšamo Jeremías, chë Bëngbe Bëtsabe juabna oyebuambnayá, tempscá tojanayancá, ndayá yochjanchnënguama. Chana mëntšá tojánayana: “Y chë unga bnëtsana ralbenga tmonjanca, ntsachetsá chë Israeloca entšanga cha tmojanamananá,

<sup>10</sup> y chánaca chë Alfarerbe Luare tmonjanbuamé, ntšamo Bëngbe Bëtsá šonjanmandacá ca.”

### *Jesús Pilatbe delante*

*(Mc 15.2-5; Lc 23.2-5; Jn 18.33-38)*

<sup>11</sup> Chentšana Jesús, chë mandado Pilátbioye tmojanánatse y cha mëntšá tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

<sup>12</sup> Chë bachnangbe amëndayënga y chë bëtsëjemënga Jesús mal imojtsequédantscuana, cha ndocá ntjojuana.

<sup>13</sup> Chíyeca Pilato tbojantjá: —¿Ndoñe contsuenana lempe ntšamo acbe contra montsichamcá ca?

<sup>14</sup> Pero Jesús ni canýe palabra ndoñe ntjojuana. Chë causa, chë mandado ndoñe yontsetátšëmbo ntšamo jajuaboyana.

### *Jesús chaóbana ca tmojánayana*

*(Mc 15.6-20; Lc 23.13-25; Jn 18.38-19.16)*

<sup>15</sup> Bashco fiesta ora, chë mandado yojanamana canýe utamená jëtsboshjonana, nda entšanga tmojuabuayaná.

<sup>16</sup> Chë tempo canýe uachuana utamená inamna, Jesús Barrabás ca uabainá.

<sup>17</sup> Nyetsca entšanga chentše imojtsemna ora, Pilato tojanatjá: “¿Tšëngaftanga nda šmojtseboše atše chjëtsboshjonama, Jesús Barrabás o Jesús, chë Cristo ca monduabobuatmá ca?”

<sup>18</sup> Er chë mandado yojtsetátšëmbo, entšangna envidia causa Jesús chabe cucuatšinë tmojãnboshjonama.

<sup>19</sup> Pilato chë tribunal ca uabáinentše yojtsetbemanëntscuana, chabe shema canýa tbojanichmó mëntšá cha jauyanama: “Chë nyetsca soyënguiñe tšabá ama entšábioye ndocá matsborlánana; chabe causa ibeta otjénayoca puerte sënjasufrí ca.”

<sup>20</sup> Pero chë bachnangbe amëndayënga y chë bëtsëjemënga entšanga tmojanayëñaná, Barrabás jëtsboshjonama y Jesús chaóbana ca chamuayanama.

<sup>21</sup> Chora chë mandado cachiñe tojanatjá: —¿Chë útatentšana nda šmojtseboše atše chjëtsboshjonama ca?

Y chënga tmojanayana: —¡Barrabás ca!

<sup>22</sup> Pilato tojanatjá: —¿As, ndayá Jesús, chë Cristo ca uabobuatmáftaca atše chjama ca?

Y nyetscanga tmojanjuá: —¡Motsecrucificá ca!

<sup>23</sup> Chora Pilato tojtëtanatjá: —¿Ndáyeca? ¿Ntsámo cha tojobuachjanguá ca?

Pero chënga cachiñe tmojanáye buachena: —¡Motsecrucificá ca!

<sup>24</sup> Ndocá jamama yontsobenama y entšanga más jabuache enbouenanama tmojanontšema Pilato tojáninye ora, cha tojanmandá búyeshe juabuíyëboñana y nyetscangbe delante yojsenacuentšabiá. Mëntsá tojánayana: —Atše ndocá chiyátayana, ni chiyatsma quem boyabása chaóbanama. Tšëngaftanga lempe šmonjama ca.

<sup>25</sup> Chora nyetsca entšanga tmojanjuá: —¡Quemuá yochjóbanama, bënga y bëngbe básengbiama castigo chaotsemna ca!

<sup>26</sup> As Pilato, Barrabás tbojtanboshjona; tojanmandá soldadënga Jesús jabuache chamotsetsetšenama y chentšana entšangbe cucuatšinye tbojánboshjona chamocrucificama.

<sup>27</sup> Chentšana, chë mandadbe soldadënga Jesús tmojanánatse chë mandadbe bëts yebnentša chashjoye y choca nyetsca soldadënga chabe shëconana tmojanóoto.

<sup>28</sup> Chorna, entšayá tmojtsanabotsca y shbuenda uafjatsenga entšayá mo reycá tmojanichëtjo.

<sup>29</sup> Canye coronësha tmojanapormá uchmašëfjangaca y tmojanabestšajó, y catšbioica cucuatšinye canye niñëfja. Chorna, chabe shecuatšentše imojtsofshëntsaméntšenaye y imojtsáboyejuana. Mëntsá imojtsichamo: “¡Bayté judiëngbe Rey cochtsemna ca!”

<sup>30</sup> Chëngnaca imojtsanbuashëtjnaye y cach niñëfjaca bestšašentše imojtsëtsjanjnaye.

<sup>31</sup> Y chca imnaftsáboyejuanentšana, chë shbuenda uafjatsenga entšayá tmojtsanabotsca y cachabe entšayá tmojtanichëtjo, y chora, jacrucificama tmojanánatse.

### *Jesús tmojanrucificá*

*(Mc 15.21-32; Lc 23.26-43; Jn 19.17-27)*

<sup>32</sup> Chë entšanga chentšana tmojánbocana ora, tmojánenbetše canye bacóftaca, Simón ca uabainá, Cirene pueblócá. As, cha tmojanmandá Jesusbe cruz chauetsocutsama.

<sup>33</sup> Canye luare Gólgota ca uabáinoca tmojánashjajna ora (hebreo biyañe chca endayana “Obanabe Bestšashe Luare ca”),

<sup>34</sup> Jesúsbioye vínoye hiéloyeca enájubniye tmojanabuiyé chaofšema; pero yojaftántia y ndoñe yonjábosëna chiye jofšiyama.

<sup>35</sup> Ya tmojanrucificá orna, chë soldadënga Jesusbe entšayamna, tsbanánoye tmojanëtšena, chca, jtsetatšëmbuama ndabiama yochjanáquedama.

<sup>36</sup> Y chora chënga chentše tmojanotbiama Jesús jtsebojanýama.

<sup>37</sup> Y chabe bestšaše juatsboicna canye uabemana soye tmojananjo. Chiñe yojétsayana ndáyeca cha tmojanrucificama, mëntsá: MUA JESÚS ENDMËNA, CHË JUDIËNGBE REY ca.

<sup>38</sup> Utata bacna soye ochjajnayátnaca chënga chentše tmojanacrucificá, canya Jesusbe catšbioica y chë ínÿana chabe uañicuayoica.

<sup>39</sup> Y chëjana imojtsachñëjuana entšangna, Jesús imojtsóyenguaye, imojtsobestšfshanenaye

<sup>40</sup> y imojtsatsaye: “¡Aca chë icobena Bëngbe Bëtsabe bëts yebna jtsenásatajchcana y nyë unga tese jëtsjebuana, cach aca mentsbocá! ¡Ndegombre Bëngbe Bëtsabe Uaquiñá tcomnëse, chë cruzocana matastjango ca!”

<sup>41</sup> Chë bachnangbe amëndayënga, ley abuátambayënga y chë judiëngbeñe bëtsëjemëngcá mándayënga cachcá imojtsóyenguaye. Mëntsá imojtsichamo:

<sup>42</sup> “Cha ínÿenga tojëftsatsebacá, pero cachá jëntsbecama ndoñe quenátobena. Cha Israe-loca entšangbe Rey tojtsemnëse, chë cruzocana chauatastjango, y chca, bënga chábeñe fchtsošbuáchiye.

<sup>43</sup> Cha tojayana Bëngbe Bëtsábeñe puerte yojtsošbuaché ca. ¡Mora Bëngbe Bëtsá chabuatsbocá, cha ndegombre muábioye tbobobonshánese!, er cha tonjánayana Bëngbe Bëtsabe Uaquiñá canmëna ca” —chënga imojtsichamo.

<sup>44</sup> Y chë bacna soye ochjajnayata, Jesúseftaca ibojtsecrucificanátnaca cachcá ibojtsóyenguaye.

### *Jesús tojanóbana*

*(Mc 15.33-41; Lc 23.44-49; Jn 19.28-30)*

<sup>45</sup> Njëtsto orscana las treséntscoñe, njëts quem luare yojtseibétata.

<sup>46</sup> Chca orna, Jesús chabe biyañe tojanáyebuachena: “Elí, Elí, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonýa ca?”)

<sup>47</sup> Chca tmojanuena ora, báseftanga chentše imojtsemna entšanguentšana imojtsichamo: “Cha Elías, chë Bëngbe Bëtsabe juabna oyebuambnayá, bontsechembuana ca.”

<sup>48</sup> As chora, chentša canya tojëftsánótjajo canye esponjëshe janguanguama, untja vínoyeca chëshe tojanfchecuacuá, canye niñëfjiñe tojananguësëtjo y Jesúsbioye tojanbeconá chaofšema.

<sup>49</sup> Pero ínýengna tmojánayana: “Cachcá mochjonýaye, er Elías tayochjabo jabátsbocama ca.”

<sup>50</sup> Pero Jesús cachiñe jabuache tojanoyó y tojanóbana.

<sup>51</sup> Y cachora, Bëngbe Bëngbe Bëtsabe bëts yebnoca yojújonýana entšëjua tsëntsaca yojtsenájataye, tsbanánocana fshantsoye. Chëjua bënëjua inauamna y chë tsatsëntsaca inaújonýana. Fshantse yojuangmëmama, ndëtsbenga yojtsashtëtšana,

<sup>52</sup> y chë cuevëshënga obanëngaca yojtsëtëfjo y banga Bëngbe Bëtsabe entšanga tmojtana yena.

<sup>53</sup> Y chënga, Jesús tojtanayenentšana, chë cuevëshënguentshana tmojánbocana, y Jerusalén, chë uámana bëts pueblo ca uabáinoye tmojánamashjna y ba entšángbioye tmojánëbëbuacana.

<sup>54</sup> Chë soldadëngbe amëndayá y chë ínýenga, Jesús jtsebojanýama cháftaca tmojanouedanga, chë fshantse yojuangmëmamanama tmojáninýe ora, y njëtsca chë yojtsëchnëjuana soyëngama, puerte auatjanánënga imojtsemna y tmojánayana: “¡Ndegombre quem boyabása Bëngbe Bëtsabe Uaquiñá yomna ca!”

<sup>55</sup> Ba shembásengnaca chentše imojtsemna y bënocana imojtserreparana. Chëngna, Galileocana Jesús tmojanasto y cha imojanájabuachana.

<sup>56</sup> Chë shembásengbeñe imojtsemna María Magdalena; María, Santiago y Josebe mamá; y Zebedeobe uaquiñatbe mamá.

### *Jesús tmojanatbontsá*

*(Mc 15.42-47; Lc 23.50-56; Jn 19.38-42)*

<sup>57</sup> Ya yojtseibétatana ora, canye bomna boyabása, José ca uabainá, tojánashjango. Cha inamna Arimatea luarocá y Jesusbe ustoná.

<sup>58</sup> José tojána Pilato jinýama, Jesusbe cuerpo jotjañama. As Pilato tojanmandá chë cuerpo chamontšabuáchemama.

<sup>59</sup> José chë cuerpo tojanca y canye nduatsenga lino entšëjuaca tbojanandmaná.

<sup>60</sup> Y canye chabe tsëm cuevëshiñe tbojanajó. Tempo cha inamánda chë cuevëshna ndëtsbenguiñe chamopormama. Canye bëts ndëtsbé tojansjoná y chë cuevëshoye amashjuanentše tojánachto; y chentšana José yojtsatoñe.

<sup>61</sup> Pero María Magdalena y chë inýe Mariyna chentše tbojtsanoquedañe y chë cuevëshne ndirichiñe tbojanótbema.

### *Soldadënga tmojána Jesús yojtsatbontsánentše jtsebojanýama*

<sup>62</sup> Yëfsana, chë ochnayté, chë bachnangbe amëndayënga y chë fariseunga cánýiñe tmojána Pilato jinýama.

<sup>63</sup> Tmojanianana: –Taita, bënga fsëntsejuabná ntšamo chë bostero cabá ainá ora tonjánayanama, chë unga tianoye cha jtayenama ca.

<sup>64</sup> Chiyeca, momandá chë cuevëshe soldadënga chamotsashanjá unga tentscuana. Chca, chabe uatsjédayënga ndoñe ibeta chamondabo chabe cuerpo jabétsatbëbama, y chentsana chënga entšanga chamúyana, Jesús tojtayena ca. Y chca, chabiana quem ústonoye bostero soye, chë cachabiana tojánayana soyëngama puerte más bacá nántsemna ca –chënga tmojanianana.

<sup>65</sup> As Pilato tojanéyana: –Tšëngaftanga cach tšëngaftangbiana soldadënga šmondábamna. Motsajna y chë cuevëshe cuedádoca šmochtsashanjá, ntšamo šmondëtatsëmbcá ca.

<sup>66</sup> Chora chënga tmojána chë cuevëshe jtsashanjá; chë ndëtšbena, tsengájašeca imojuinýnaná, ntšotatsëmbcá ndocná choye chaondámashënguama, y soldadënga chentšë tmojëftsanashejuana.

## 28

### *Jesús tojtayanena*

*(Mc 16.1-8; Lc 24.1-12; Jn 20.1-10)*

<sup>1</sup> Ochnayté chentsana, chë inye semana bojatsenté yojtsebínýana ora, María Magdalena y chë inye María tbojána cuevëshoye jarrepárama.

<sup>2</sup> Ndeolpe fshantse tojanangmëmmana, er Bëngbe Bëtsabe canye ángel celocana tojántsmá, chë cuevëshoye tojanobeconá, chë atamiana ndëtšbé tojtsanjuaná y chiñe tojanótbema.

<sup>3</sup> Chë ángelna mo canye tcuinýëjca yojtsebuashinýinýana, y chabe uichëtjonëjuangá uafjantsëjuangá mo jantsetëshcá yojtsamna.

<sup>4</sup> Chë soldadënga chca tmojáninýe ora, de auatja yojtsangmëmnyaye y mo obanëngcá imojtsemna.

<sup>5</sup> Chora chë ángel chë shembásatbioye tojanéyana: “Ndoñe batauatjana. Atšë sëntsetatsëmbo tšëngaftanga Jesús, chë tmonjancrucificá cha šmojtsenguama.

<sup>6</sup> Cha muentse ndoñe quenátsmëna; cha tontayena, ntšamo cachá tonjanayanacá. Mabata y šochjinýe cha endétsesegoranentšë.

<sup>7</sup> Betsco motsata y chë uatsjédayënga šochjáuyana: ‘Jesús tontayena y tšëngaftangbe natsana Galileoye echanjá; choca šmochanjinýe ca.’ ” Y chora cha tojánayana: “Chca šondmëna tšëngaftanga jauyanana ca.”

<sup>8</sup> Cachora chë shembásata chë cuevëshentsana tbojésanbocna, auatjanánata pero puerte oyejuayata, y tbojëftsannotjajo chë soye chë uatsjendayëngbeñe jobuambayama.

<sup>9</sup> Y ndeolpe Jesús chata tojánëbëbuacna y tojanacheuá. Chatna, chábioye tbojanobéconata, tbojtanadorata y chabe shecuatšë shëconana imojtobojcjuá.

<sup>10</sup> Y Jesús tojanéyana: “Ndoñe batauatjana. Motsata atšbe uatsjédayënga, atšbe catšátanga jáuyanama Galileoye chamotsá y choca atšë šmochjinýe ca.”

### *Ntšamo chë soldadënga tmojánayana ndayá tojanochnënguama*

<sup>11</sup> Chë shembásata ibojtsayëntscuana, básefta soldadënga chë bëts puebloye tmojána y ntšamo tojanopasacá lempe chë bachnangbe amëndayëngbeñe tmojanobuambá.

<sup>12</sup> As chë bachnangbe amëndayënga, chë judiëngbeñe bëtsëjemëngcá mandayëngaftaca tmojánenëfjna jenóyeunayama. Chëngna chë soldadëngbioye bëtscá crocénana tmojtanatšatá,

<sup>13</sup> y mëntšá tmojanabuayená: “Tšëngaftanga šmochjayana, ibeta šmotsomáñëntscuana, Jesusbe uatsjédayënga tmojabo y chabe cuerpo tmojabétsatbëba ca.

<sup>14</sup> Y chë mandado chë soyama chaojåtatsëmbonëse, bënga lempe cháftaca fchenóyeunaye, chca, tšëngaftangafata ndocá chaondopasama ca” –chënga tmojanéyana.

<sup>15</sup> As chë soldadënga chë crocénana tmojanóyëngacñe y tmojanma ntšamo chë mándayënga tmojanabuayenacá. Ba entsanga chë cuento tmojanuena y méntscoñama judiënga cachcá mondbétsichamo.

*Jesús chë uatsjëndayënga tojanichamó, Bëngbe Bëtsabe soyëngama nyëtsquénache jábuayenama*

*(Mc 16.14-18; Lc 24.36-49; Jn 20.19-23)*

<sup>16</sup> Chentšana, chë bnëtsana canye uatsjëndayënga Galileoye tmojána, chë ndëmua tjoye Jesús chënga tojanabuayená choye.

<sup>17</sup> Y Jesús tmojáninye ora, tmojtanadorá. Pero báseftangna imojétsejuabnaye nderado cha ndoñe Jesús yontsemna ca.

<sup>18</sup> Jesús chëngbioye tojanobeconá y tojanëyana: “Bëngbe Bëtsá nyëts mando atše šonjatšetá celoca y quem luarentše.

<sup>19</sup> Chcasna, motsajna, nyëts luarënguenache oyenënga atšbe uatsjëndayënga šmochjábiamá. Entšanga šmochjubaye atšbe Taitá, atše chabe Uaquiñá y chë Uámana Espíritbe uabaina jayanëse, átšbeñe šmošbuachéyeca,

<sup>20</sup> y šmochjabuatambá lempe ntšamo atše tchojamëndacá chënga chamóyeunama. Y ndegombre atše nyëts tempo tšëngaftangaftaca chanjëftsemna, quem luare jopochócantscuana ca” —Jesús tojanëyana.

## San Marcos

### *Juan chë Ubayaná entsanga yojanabuayiná* (Mt 3.1-12; Lc 3.1-9, 15-17; Jn 1.19-28)

<sup>1</sup> Mëntsá tojanobojatsé chë tsabe noticiënga Bëngbe Bëtsabe Uaquiñá Jesucristbiana.

<sup>2</sup> Ntšamo bayté entsemna, chë Bëngbe Bëtsabe juabna oyebuambnayá Isaías chabe librëšaňe yojëftsayancá, ntšamo Bëngbe Bëtsá chabe Uaquiñábioye ibojauyanama cha tojanábema ora:

Minýe, atšbe abuayiyayá acbe natsana sëntsichamná,  
chë aca jabama lempe echanjapróna cha.

<sup>3</sup> Entsanga ndoyena luaroca cha enduáyebuache mëntsá:

“Bëngbe Utabná echanjabo ca;

mo nda canýe benache tojtseprontacá canýe uámana entsá jashjanguama,  
cachcá tšëngaftanga, cha jabama ainaniňe tsabe juabnëngaca šmochtseprontana ca” –  
cha tojanábema.

<sup>4</sup> Chcase, Bëngbe Bëtsá Juan tbojanichmó, y cha tojánbocna entsanga ndoyena luaroca, Bëngbe Bëtsabe soyëngama abuayiyayé y entsanga ubáyana. Cha entsanga yojanëtsësnaye: “Tšëngaftangbe bacna soyëngama ngmënaca šmochtenójuaboye, chca amana šochtsajbaná, y Bëngbe Bëtsabe benache šmochtishache. Chora cbochjúbaye, y Bëngbe Bëtsá tšëngaftangbe bacna soyëngama cmochanjáperdonaye ca.”

<sup>5</sup> Nýets Judea luarocana chábioye entsanga imojánbocana, y Jerusalenentsana nýetsca entságnaca, y Bëngbe Bëtsábioye chëngbe bacna soyëngama jaimpáda chentsana, Juan Jordán ca uabaina bėjayiňe chënga yojanëbáyana.

<sup>6</sup> Juanbe entsayá inauapormana camellbe stjënasheca y bobache yojanasnana; chapulinatëmënga y tjaňe méloye inasaye.

<sup>7</sup> Y mëntsá entsanga yojanëtsësnaye: “Atšbe ústonoye inýa echanjabo, atšbiana más obenana bomná; chíyeca atše mercedo taitsatobuajoňe, ni mo jotsejbiyana chabe shecochëtjonëshentša corriëja jajafjonama.

<sup>8</sup> Atšna búyesheca cbondëubáyana, pero chë echanjabábeyecna, Bëngbe Bëtsá bochanjíchmuá chë Uámana Espiritu tšëngaftangbe ainaniňe cháuamashënguama ca.”

### *Juan, Jesúsbioye tbojanabaye* (Mt 3.13-17; Lc 3.21-22)

<sup>9</sup> Chë tempo, Galilea luarocana Nazaret pueblentsana Jesús yojëftsebocna, y Juan yojtsemnoye tojána; y Jordán bėjayiňe Jesúsbioye cha tbojanabaye.

<sup>10</sup> Bejajoicana yojtashëbëbocna orna, tojáninýe celoca atëfjniňe, y chë Uámana Espiritu chábioye mo palomatemcá yojtsastjajuana.

<sup>11</sup> Y celocana Bëngbe Bëtsá mëntsá tbojanianyana: “Acna atšbe bonshana Uaquiñá condmëna; acbiana corente sëntsoyejuá ca.”

### *Jesús tojanobená Satanás jayëñjanama* (Mt 4.1-11; Lc 4.1-13)

<sup>12</sup> Chentsana chë Uámana Espiritu Jesúsbioye entsanga ndoyena luaroye tbojanánatse.

<sup>13</sup> Canta bnëtsana te chë entsanga ndoyena luaroca tbojanjëtana, y Satanasma yojanabó jisháchichiyama. Chë luarentše tšátjaye bayënga imnajena; chentsana, Bëngbe Bëtsabe angelënga cha imojtseserverna.

### *Jesús tojanontsé Galileoca chabe trabajo jamana* (Mt 4.12-17; Lc 4.14-15)

14 Juan cárceloye tmojanétamentšana, Jesús Galileoye tojesaná; y chiñe cha yojanabuayiyá chë tsabe noticiënga Bëngbe Bëtsabiama.

15 Jesús entšanga yojanëtsëtsnaye: “Ora tojjobuache, Bëngbe Bëtsabe amëndayana echanjóshjango. Tsëngaftangbe bacna soyëngama ngménaca šmochtenójuaboje, y chca amana šmochtsajbaná y Bëngbe Bëtsabe benache šmochtishache; y ainaniñe chë tsabe noticiënga Bëngbe Bëtsabiama šmochjójyëngacñe ca.”

*Jesús tojánachembo canta boyabásenga beonga ashebuánayënga cha chamuastama*

*(Mt 4.18-22; Lc 5.1-11)*

16 Galilea uafjajónaye tsachajana Jesús yojtsaye ora, cha tojánanyë Simón y chabe uabentsá Andrés; chatna atarraiëshangá ibnetsashbuétsetsañe, er beonga ashebuánayata chata ibnamna.

17 Chora Jesús tojanëyana: “Atšeftaca mabata. Atše chochanjábiamna Bëngbe Bëtsabiama entšanga anguayata; y morscana, nýe beonga ashebuánayata ndoñe quešochátsmëna ca.”

18 Y cachora chatbe atarraiëshangá cachcá tbojésanaboshjuana y Jesús tmojanasto.

19 Más chcoye yojátaye orna, Jesús tojánanyë Santiago y chabe uabentsá Juan, Zebedeobe uaquiñata; chatna barquëshañe ibnetsotbemañe, chatbe atarraiëshangá atapórmayñe.

20 Chora Jesús chë útata tojánachembo; as chatna, chatbe taitá Zebedeo chë barquëshañe tmojésanboshjona chabe peóngaftaca y Jesúsëftaca tbojtsanoñe.

*Jesús, bacna bayëjbe juabna cánýabioye tbojanbojuaná*

*(Lc 4.31-37)*

21 Chentšana, Jesús y chabe uatsjëndayënga Capernaum ca uabaina pueblaca tmojánashjajna. Chë ochnayté, Jesús chë judiëngbe enefjuana yebnentše tojánamashëngo y yojóntša entšanga jabuátambama.

22 Entšanga imojtsenjnanaye ntšamo Jesús yojtsabuatambacá, er chama mo canýe mando bomnacá yojtsóyebuambnaye, ndoñe nýe ntšamo Moisesbe ley abuatambayënga imojanabuatambacá.

23 Chë pueblentše judiëngbe enefjuana yebnentše yojtsemna canýe entšá bacna bayëja uambayá, y chábeyeca chë boyabása yojóntša mëntšá uayebuáchana:

24 —¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndétatšëmbo nda aca comnama, aca chë Bëngbe Bëtsabe Uamaná ca.

25 Chora Jesús chë bayëjbioye tbojtsanácacana, y tbojanianyana: —¡lytëca móbema y chábentšana maisebocna ca!

26 Chora chë bacna bayëjna tojanma chë boyabása ataque chaboshachama, jabuache tojanoyó y chábentšana tojésanbocna.

27 Chama, nýetsca entšanga ojnanánënga imojtsemna, y mëntšá imojtsentjanaye: “¿Ndayá chca yojtsemna? ¿Canýe tsëm buatëmbana soye? ¡Quem boyabása mando bomnacá y obenacá entsabuatambá, y chca, chë bayëjënga cha jtsamëndayana y chëngnaca joyeunayana ca!”

28 Y betscó nýets Galilea luarentša pueblënguenache Jesusbiama yojtsótatšëmbo.

*Jesús, Simón Pédrëbe uambén mamábioye tbojanshná*

*(Mt 8.14-15; Lc 4.38-39)*

29 Chentšana, chë enefjuana yebnentšana tmojánbocana y Santiago y Juánoftaca Jesús tojána, Simón y Andresbe yebnoye.

30 Simonbe uambén mamá šocá inajájona, jabuache calentóraca, y Jesúsbioye chë šocabiama tmojanianyana.

31 As chora, Jesús tojanobeconá, chë šocábioye tbojanábuacueshache y tbojanatsbaná. Cachora chë calentora tbojtsanóbojuanañe; y cachora cha tojtantsbaná y tojanontšë chënga jobuácuedana.



*Jesús ba šoquënga tojanashná*  
(Mt 8.16-17; Lc 4.40-41)

<sup>32</sup> Chë te jetiñe, shinÿe ya yojuenatjëmbe ora, chë luarentša nÿetsca šoquënga y bacna bayëjënga uambayënga Jesúsbioye tmojanënatse;

<sup>33</sup> y nÿetsca entsanga bëšoye imojobeconá.

<sup>34</sup> Jesús banga tojanashná, nÿetsca šocana bomnënga, y ba bacna bayëjënga entsanguentsana tojtanëbuacna; y ndoñe tonjanalesenciá chë bayëjënga chamóyebuambama, er chënga imnatátšëmbo cha chë Cristo bëtsemnama.

*Chë judiëngbe enefjuana yebnënguenache Bëngbe Bëtsabe soyëngama Jesús yojanabuayiyiná*  
(Lc 4.42-44)

<sup>35</sup> Yëfsana cabá cachëse, cabá ibetcá, Jesús tojëftsantsbaná, chë pueblentsana tojëftsanbocna y entsanga ndoyena luaroye tojtsanoñe, choca Bëngbe Bëtsáftaca jencuëntama.

<sup>36</sup> Pero Simón y chabe enutëngna tmojána jetsenguanguama;

<sup>37</sup> y tmojtsaninÿena ora tmojanियana: –Nÿetscanga cmontsenguá ca.

<sup>38</sup> Y Jesús tojanëyana: –Inÿoye cuajna, cam béconana pueblëngoye, chíñnaca Bëngbe Bëtsabe soyëngama entsanga chayábuayenama; er chama atše sënjabo ca.

<sup>39</sup> Y chentsana, Jesús yojánana Bëngbe Bëtsabiana entsanga abuayiyenaye chë judiëngbe enefjuana yebnënguenache, nÿets Galileiñe, y entsángbentsana bacna bayëjënga yojtëbuacana.

*Jesús, canÿa bacna nguayanánaca šocábioye tbojanshná*  
(Mt 8.1-4; Lc 5.12-16)

<sup>40</sup> Chentsana, canÿe boyabása bacna nguayanánaca šocá Jesúsbioye tojanobeconá; y joshaméntšase mëntšá tbojanimpadá: –Aca tcojtsebošëse, aca catjobenaye atšbe šocana jtsebojuánama ca.

<sup>41</sup> Jesús chabiana tbojanongmé; cucuátšeca tbojánbojajo y tbojanियana: –Aíñe sëntseboše. ¡Šocana cbotsebojuaná ca!

<sup>42</sup> Y cachora chë šocana tbojtsanóbojuanañe y tšabá yojtsatsmëna.

<sup>43</sup> Chora Jesús chábioye tbojtanichmó, pero puerta mëntšá tbojanmandá:

<sup>44</sup> –Mouena; ndocnábeñe quem soye cattsecuëntaye; nÿe Jerusalenoca báchnëbioye motsa y cha cochjinÿinÿiye aca mora ya tšabá cojtsatsmënama. Chora cochjuátšëmbona ntšamo Moisés chabe leyiñe tojanmandacá, Bëngbe Bëtsábioye chama jëtschuayama, chca, nÿetsca entsanga chamotatšëmbona mora ya tšabá cojtsatsmënama ca.

<sup>45</sup> Pero chë boyabásana, chentsana tojëftsanbocna y cachora yojóntša nÿetsquënache entsanga yapa acúntayana Jesús tbojanshnama. Chë causa, Jesús ndoñe yontsobena entsangbe delante pueblënguenache jtsanana, ndayá nÿe chë pueblënga béconana y nÿetsca chë entsanga ndoyena luarënguiñe yojánana; pero nÿets luarëngocana chábioye entsanga imojánashjuana.

## 2

*Jesús, canÿe jama ndobenábioye tbojanshná*  
(Mt 9.1-8; Lc 5.17-26)

<sup>1</sup> Chentsana, Jesús Capernaumoye tojtanashjango; y entsanga imojátatšëmbona, Jesús yebnentše yojtsatsmënama.

<sup>2</sup> Mallajta entsanga chentše tmojanójoto; chë causa chë yebnentše ya tondaye más luare entsangbiana yontsemna, ni mo chë amashjuanentše, y Jesús Bëngbe Bëtsabe soyëngama yojtsabuayiyenaye.

<sup>3</sup> Chora tojanopasá, canta boyabásenga tmojánashjango, canÿe entšá jama ndobená imojtsaismana.

<sup>4</sup> Pero ndoñe tmonjanobená Jesús yojtsemnoye cha juambana, tša entšanga causa. Chcasna, chë canta boyabásenga yebna tsbanánoca, Jesusbe tatsëtsoca batšá tmojánatëfjo y chëjana chë jama ndobená tjuashiñe tmojanëstjango.

<sup>5</sup> Jesús tojáninÿe chënga tša imojtsošbuaché chë šocá jáshnama cha yojanobenama; as chë jama ndobenábioye tbojanianyana: “Sobreno, mouena; acbe bacna soyënga tcbontseboyperdoná ca.”

<sup>6</sup> Chentše báseftanga judiëngbe ley abuátambayënga imnatbemana; chënga chora mëntsá imojtsejuabnaye:

<sup>7</sup> “¿Ntšámoyeca quem boyabása chca yojtsichamo? Jesús ndoñe tšabá Bëngbe Bëtsabiama quenátichamo; mo chábioye cuafjoyenguangcá entsemna. Ndocna entšá quenátobena inÿabioye bacna soyëngama japerdónana; ñye Bëngbe Bëtsana aíñe ca.”

<sup>8</sup> Pero Jesús cachora lempe yojtsetátšëmbo ntšamo chënga ainanoca imojtsejuabnacá; as tojanëyana: “¿Ndáyeca chca tšëngaftanga ainaniñe šmojtsejuabná?”

<sup>9</sup> ¿Tšëngaftangbiana ndayá más paselo nántsemna tšëngaftangbe delante chë jama ndobenábioye atše jauyanana: ‘Acbe bacna soyënga tcbontseboyperdoná’, o ‘Matëtsbaná, acbe tjuashe mesocñe y motsa ca’?

<sup>10</sup> Y chca, mora atše cbochanjínÿanÿiye Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

Y chë jama ndobenábioye tbojanianyana:

<sup>11</sup> “Atše cbëyana, matëtsbaná, acbe tjuashe mesocñe y acbe yebnoye motsatoñe ca.”

<sup>12</sup> Cachora chë jama ndobená tojtantsbaná, chabe tjuashe yojesocñe, y entšangbiajana chentšana yojésebozna. Chama ñyetsca entšanga imojenjnaná y Bëngbe Bëtsábioye imojtsatschuanaye, y mëntsá imojtsichamo: “Ñya ndocna te tša bëts soye chemuáisinÿe ca.”

### *Jesús, Levíbioye tbojanchembo chabuastama*

*(Mt 9.9-13; Lc 5.27-32)*

<sup>13</sup> Chentšana, Jesús cachiñe chë uafjajónaye tsachoye tojesaná; ba entšanga chábioye imojobeconá, y Jesús yojtsabuátambaye.

<sup>14</sup> Chentšana yojtsataye orna, Jesús tbojáninÿe Levíbioye, Alfeobe uaquiñá, yojtsantobemañe, entšanga impuesto atjanayacá inétsotrabajañe. Chora Jesús tbojanianyana: “Smasto ca.”

Y Leví tojantsbaná y tbojanasto.

<sup>15</sup> Tojanopasá, Jesús Levibe yebnentše yojtsesaye, y banga Romocama entšanga impuesto atjanayënga y inÿe bacna entšanga, mesëshentše cánÿiñe imojtsetbiámana, Jesús y chabe uatsjëndayëngaftaca; er ba entšanga cha imojústona.

<sup>16</sup> Chë fariseunga y chë ley abuátambayënga, chë entšangftaca Jesús yojtsesama tmojáninÿe ora, chabe uatsjëndayëngbioye tmojanatjá: —¿Ndáyeca tšëngaftangbe bu-atëmbayá, entšanga impuesto atjanayëngaftaca y bacna soye amëngaftaca yojtsesá ca?

<sup>17</sup> Jesús chca tojanuena; as mëntsá tojanëjua: —Chë salud tmotsobomñënga, ashnayá ndoñe ntsëjabótana, pero chë šoquëngna aíñe. Y atše ndoñe chiyátabo chë Bëngbe Bëtsabe bominiñe tšabá amënga jabáchembuama, ndayá chë bacna soye amënga imomna ca juabnayënga átšbioye jabáchembuama ca.

### *Jesús tmojantjá chë Bëngbe Bëtsáftaca jencuëntama tondaye saytescama*

*(Mt 9.14-17; Lc 5.33-39)*

<sup>18</sup> Canÿe, Juan chë Ubayanabe ústonënga y chë fariseungbe usetonënga, Bëngbe Bëtsáftaca jencuëntama tondaye ntjascá imojtsemna ora, básefta entšanga Jesúsbioye tmojanobeconá y mëntsá tmojanianyana: —Juanbe ústonënga y chë fariseungbe usetonënga monduamana tondaye ntjascá jtsemnana Bëngbe Bëtsáftaca jencuëntama. ¿Ndáyeca acbe uatsjëndayënga ndoñe chca ca?

19 As Jesús tojanējua: —Chë casamento fiestentše, chë ófjanënga saná ndoñe ntsabuáshebenana. ¿Ntšamo chca ndoñe nántsemna? Chë tojobouamá entšá chëngaftaca tojtsemnëntscuana, chë ófjanënga bëtscá jasana y cháftaca oyejuayënga jtsemnana.

20 Pero ora echanjobuache y chë boyabása chëngbentšana mochantsánatseñe; chora cocayé chë ófjanënga echántsamna tondaye ntjascá jtsemnana. Ntšamo chë tojobouamá boyabása y chë ofjanëngaftaca endmëncá, cachcá endmëna atše y atšbe uatsjendayëngaftacnaca.

21 “Ndocná, canýe tanguá entsáyá, base tsëm entsëjuaca jtarmëndana; chca tcojamëse, chë tsëm entsëjua jtsabéconana y chë tanguá entsáyá más jtsatanëcanana, y chca, chë uátanëcniñe más bëtsiñe jtsabemana.

22 Y cach ndoñe, chë tojtseshayana vínoye tanguá jasabenguiñe ntjataftsuámayana; er chë jasabenga jtseshébëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juaftsuámana; chca, chë jasabenga y chë vínoye josérviana ca” —Jesús tojánayana.

*Jesusbe uatsjëndayënga canýe ochnayté trigo tmojanátabebe*  
(Mt 12.1-8; Lc 6.1-5)

23 Canýe ochnayté, Jesús canýe jajajana yojtsaye; y chabe uatsjëndayënga chëjana imojtsachnëjuana ora, tmojanontsé trigo juatabebiana.

24 Chë fariseunga chca imojinýe ora, Jesúsbioye tmojaniyana: —Minýe. ¿Ntšamo acbe uatsjëndayënga montsamcá, ndoñe quenátslesenciana ochnayté jtsamama ca?

25 Pero cha tojanējua: —¿Ndoñe šmëndualía y šmondëtatšëmbo ntšamo Rey David y chabe enutënga tmojanmama shëntseca imojtsemna ora y jasama yojtsëjaboto ora?

26 Chca ora, Abiatar chë judiëngbe bachnangbe más uámana amëndayá inamna ora, David Bëngbe Bëtsabe yebnoye yojámashëngo, y chë luarentše Bëngbe Bëtsá yojamnana inýinýnaye tandëšënga yojase; y chë cháftaca imojánajna entságnaca yojátšataye. Y chë tandëšna nýe bachnangbiama belesenciana jasama. Masque David chca tojanma, Bëngbe Bëtsá ndoñe tonjánayana David canýe bacna soye tojanma ca.

27 Y Jesús más tojánayana: —Bëngbe Bëtsá ochnayté entsabiama tojama y entšá ndoñe tbonjánbema nýe chë ochnayté ndoñe chaondëtrabajama.

28 Chíyeca, Bëngbe Bëtsá Entšá tbojanbemá, ndayá entšá ochnayté tojtsama sóynaca jtsemándayana ca.

### 3

*Chë buashana cucuatše bomna entšá*  
(Mt 12.9-14; Lc 6.6-11)

1 Chentšana, Jesús cachiñe chë judiëngbe enefjuana yebnoye tojésanamashëngo; y chentše canýe boyabása yojtsemna, buashana cucuatše bomná.

2 Chë fariseunga chiñe imojtserrondana jinýama nderado Jesús chë ochnayté chábioye tabuanjashnama, as chca chënga jtsebomnama ndaye sóyeca cha mal jaquédana.

3 Chora Jesús chë buashana cucuatše bomnábioye tbojaniyana: —Chentše, entsangbe delante motsa ca.

4 Y chë fariseunga tojanatjá: —¿Ndayá yojtselesenciana ochnayté jamama, tšabe soye o ndoñe tšabe soye? ¿Jatsbocama o jtsepochócama ca?

Pero chënga ndocá tmonjanjuá, nýe iytëca imojobiama.

5 Chora Jesús rábiaca y ngmëncá chë fariseunga tojanënyanýé, chënga ainaniñe josértama ndoñe montseboše causa; y chë buashana cucuatše bomnábioye tbojaniyana: —Macuenýanëjaná ca.

As chë boyabása tojanacuenýanëjaná, y chora tšabá chëtša yojtsatamna cach inýetšacá.

<sup>6</sup> Pero chë fariseungna, chentšana tmojésanbocana ora, Rey Heródesbe ustonëngaftaca tmojanenoyeuná Jesusbe contra, y tmojanontsé juabnayana ntšamo jamëse Jesús jóbama.

*Mallajta entšanga Jesúsbioye tmojanobeconá*

<sup>7</sup> Chentšana, Jesús chabe uatsjédayëngaftaca tojanoluaré mar béjaye tsachoye, y Galileocana bëtscá entšanga tmojanasto.

<sup>8</sup> Inye entšángnaca chábioye tmojanobeconá Judeocana, Jerusalenocana, Idumea ca uabaina luarocana, Jordán béjaye chenguanocana, Tiro y Sidón pueblëngocana. Chënga tmojanobeconá, Jesús tša bëtš soyënga yojtšamama tmojanuena ora.

<sup>9</sup> Jesús chabe uatsjédayënga tojanéyana: “Motsajna y canye barquësha atšbiamama smochjuaprónta, tša entšanga ndoñe chašmondëtsatsëntšnama ca.”

<sup>10</sup> Er cha banga tojanashná, y chë causa, nyetscanga šocana bomnënga chábioye tmojanajuatsëntšená cha jabojuama.

<sup>11</sup> Y chë bacna bayëjënga uambayëngna, Jesús tmojinë ora, betscó chabe shecuatšentše imojtsofshëntsamëntšenaye, y chë bacna bayëjëngbeyeca mëntšá imojtsáyebuache: “¡Aca Bëngbe Bëtsabe Uaquiñá condmëna ca!”

<sup>12</sup> Pero Jesús puerte tojanamëndá, nda cha bëtsemnama entšangbe delante ndoñe chamondëtsichámuama.

*Jesús chë bnëtsana uta uatsjédayënga tojanabacacá*  
(Mt 10.1-4; Lc 6.12-16)

<sup>13</sup> Chentšana, Jesús canye batsjoye tojántšjua, y ndëmuanyënga tšabá tbojanínynanënga tojánachembo. Y chëngna chábioye tmojanobeconá.

<sup>14</sup> Chora, chënguentšana bnëtsana útata tojanëbuáyana, chamotsetjëmbambnama, y Bëngbe Bëtsabe soyëngama entšanga chámabuayenama;

<sup>15</sup> y chënga obenana tojanatšatá entšángbentšana bacna bayëjënga jtëbuacanama.

<sup>16</sup> Mënga mondmëna chë bnëtsana uta bocacánënga: Simón, chë ndábioye Pedro ca Jesús tbojanabaye;

<sup>17</sup> Santiago y chabe uabentsá Juan, Zebedeobe uaquiñata, chata tojanëbaye “boanerges ca”, y chca endayana “uajuesayabe uaquiñata ca”;

<sup>18</sup> Andrés, Felipe, Bartolomé, Mateo, Tomás, Santiago, Alfeobe uaquiñá; Tadeo, Simón chë celote ca uabobainá;

<sup>19</sup> y Judas Iscariote, chë chentšana ndoñe baytesna, Jesús uayayëngbe cucuatšinë bochjanboshjoná.

*Ley abuátambayënga tmojánayana, Jesús Satanásbentšana obenana tojanóyëngacñe ca*  
(Mt 12.22-32; Lc 11.14-23; 12.10)

<sup>20</sup> Chentšana, Jesús yebnoye tojtanamáshëngo, y tša entšanga chentše tmojanójoto; chë causa, ni cha ni chabe uatsjédayënga, ni mo jasama luare ndoñe imontsebonna.

<sup>21</sup> Jesusbe pamíllanga ntšamo cha yojtsepásama tmojántatšëmbona ora, tmojána cha jetsbetšama, er entšanga imojtsencuëntaye cha opá tojtšanóbema ca.

<sup>22</sup> Y chë ley abuátambayënga Jerusalenocana tmojánashjajnëngna Jesusbiamama mëntšá imojtsichamo: “Chabe ndegombre mandayá Beelzebú, cach Satanás yojtsemna. Cha, chë bacna bayëjënga amëndayá, Jesúsbioye obenana tbojatšetá entšángbentšana bacna bayëjënga chauatëbuacnama ca.”

<sup>23</sup> Chënga chca imojtsichámuama, Jesús chënga tojánachembo, y cuentëngaca tojanontsé jáuyanana, jinýanýiyama chënga canye ndoñe ndegombre soyinë imojtsemnama, mëntšá: “¿Ntšamo Satanás nantsobena cachá jtenábocnama ca?”

<sup>24</sup> Canye amëndayábentše entšanga tmojtsenojatá y tmojtšenáyase, chë amëndayana ndoñe ntjatotonana.

<sup>25</sup> Cachcá, canye yebnentse pamíllanga tmojtsenojató y tmojtsenáyase, chë pamíllanga ndoñe tšabá nyets tempo quemochátsmëna.

<sup>26</sup> Y cachcá, Satanás y chábenga ndoñe tmontsenëyeunana y cachabe contra tojtsemnëse, chabe amëndayana ndoñe más queochátstotona; y cha ya ndoñe más chëngbe amëndayá queochátsmëna.

<sup>27</sup> “Ndocná quenátobena canye corente añemo bomna entšabe yebnoye jamashënguana y chabe soyënga jtsebocana, ndoñe natsana tconjshétsebatsëquëse. Nye tcojshétsebatsëquëse cocayé cuanjobenaye cha jefcana.

<sup>28</sup> “Ndegombre cbëyana, Bëngbe Bëtsá entšangbe nyetsca bacna soyënga echanjáperdonaye, y ntšamo Bëngbe Bëtsabiana y ínÿengbiana ndoñe tšabá tmontsichamo soyëgnaca;

<sup>29</sup> pero chë Uámana Espíritbiana ndoñe tšabá ichámëngna ndocna te queocháta perdonaye, er nyetsca tescama castigánënga jtsemnana chënga jtsamnana ca” —Jesús tojánayana.

<sup>30</sup> Jesús chca tojanëyana, er chënga imojtsichamo cha bacna bayëja ibojtsambá ca.

### *Chë Jesusbe ndegombre pamíllanguentšënga*

*(Mt 12.46-50; Lc 8.19-21)*

<sup>31</sup> Chëntscuana, Jesusbe mamá y catsátanga choye tmojánashjajna, pero nye shjoca imojtsemna; y canya tmojanichmó cha jachembuama.

<sup>32</sup> Chë ba entšanga chentse chabe shëconana imojtsetbiámanëngna, chora tmojaniana: —Acbe mamá, acbe catsátanga y uabëngana shjoca montsemna; aca cmontsen-guá ca.

<sup>33</sup> Chora cha tojanëjua: —¿Nda atšbe mamá yomna, y ndëmuanÿënga atšbe catsátanga ca?

<sup>34</sup> Chentšana, chë chabe shëconanana tbiamanëngbioye jarrepárase, tojánayana: — Quemënga mondmëna atšbe mamá y atšbe catsátanga.

<sup>35</sup> Er ndánaca, ntšamo Bëngbe Bëtsá yobošcá tojtsamá, jtsemnana atšbe catsata, atšbe uabena y atšbe mamá, atšbe ndegombre pamíllanguentšá ca.

## 4

### *Chë jenabe cuento*

*(Mt 13.1-9; Lc 8.4-8)*

<sup>1</sup> Chentšana, uafjajónaye tsachoca Jesús tojtëtanontsé Bëngbe Bëtsabe soyëngama jabuátambama. Mallajta entšanga tmojanobeconá causa, chë uafjajónayentse yojanamna canye barquëshoye Jesús tojánašëngo y tojanótbema; y chë entšanga tsachoca imojtsemna.

<sup>2</sup> Chora cuentëngaca ba soyëngama tojanabuatambá.

Mëntšá tojanëyana:

<sup>3</sup> “Smochjouena; canye jená chë jënaye jaujquëshama yojëftsebocna.

<sup>4</sup> Yojsëjquëshaye orna, básefta jënaye benache juachañe yojuatquëcjana; pero jaja shloftšënga imojástjajna y lempe imojtsósañe.

<sup>5</sup> Inÿe meshëngna ndëtšbenguiñe yojuatquëcjana, ndoñe yapa fshantse binÿnentse. Chiña betscó yojuábocna, ndoñe yapa jashenocana fshantse yojanmëna causa;

<sup>6</sup> pero yojuábocna orna, puerte yojojënyána y yojsancta; y yojsábojo yapa tbëtëjënga tondaye causa.

<sup>7</sup> Inÿe meshëngna uchmëshangañe yojuatquëcjana; chë uchmashá yojuájua ora, lempe yojsatscué, y chca, chë jënayentšana tondaye yonjuashájona.

<sup>8</sup> Pero inÿe meshëngna, uanguaniñe yojuatquëcjana, y bëtscá tšabe shajuanënga chiñe yojóbocna: ínÿenache, canye meshentšana unga bnëtsana meshënga yojóbocna;

ínÿenachna, chnënguana bnëtsana meshënga; y ínÿenachna patse meshënga ca” –cha tojánayana.

<sup>9</sup> Y chentšana, Jesús más tojánayana: “Chë jouenama tmojtsobenënga, šmochjouena ca.”

*Ndáyeca Jesús cuentëngaca yojánabuatambaye  
(Mt 13.10-17; Lc 8.9-10)*

<sup>10</sup> Chentšana, Jesús canÿa yojoquéda ora, chë chabe béconana imojtsemnënga chabe bnëtsana uta uatsjëndayëngaftaca, tmojantjá ndayá chë cuento bétsayanama.

<sup>11</sup> As Jesús tojanëjua: “Bëngbe Bëtsá tsëngaftanga cmontsinÿanÿná nÿetsca chë mo iytëmencá yomna soyënga chabe amëndayama, pero chë ínÿengbioye ndoñe; chë soyëngama chënga lempe cuentëngaca sëntsëtsëtsná.

<sup>12</sup> Chca, masque becá chamotsafšna, ndoñe chamondobená chë Bëngbe Bëtsabe soyënga jinÿama; y masque becá chë soyënga chamouena, ndoñe queochátësertana, chënga Bëngbe Bëtsábioye ndoñe chamondëtobéconama, y cha ndoñe chaondáperdonama ca.”

*Jesús chë jenabe cuentama tojanabuayená  
(Mt 13.18-23; Lc 8.11-15)*

<sup>13</sup> Chentšana, Jesús tojanëyana: “¿Quem cuentama ndoñe tcmónjósertase, ntšamo chcasa nÿetsca cuentëngama cmochjóserta ca?

<sup>14</sup> Chë jená endmëna chë tsabe noticiëngama abuayiynayá.

<sup>15</sup> Básefta entšanga mondmëna mo chë benache juachañe yojuatquécjana jenaycá. Chëngna Bëngbe Bëtsabiama soyënga jouenana; pero chora Satanás betscó jabana, chëngbe ainaniñe yojtsemna Bëngbe Bëtsabe palabra jabétsabuajuanama, chënga chiñe ndoñe chamondëtsošbuáchema.

<sup>16</sup> Inÿe entšanga mondmëna mo chë ndëtšbenguiñe yojuatquécjana jenaycá; chëngna Bëngbe Bëtsabe palabra jouenana y oyejuayënga jtsemnana;

<sup>17</sup> pero ndoñe nÿets tempo chana jochájuana; y chca, ndoñe bayté Bëngbe Bëtsáftaca ntjëftsemnëngana, ndoñe yapa tmonsasbuaché causa. Inÿenga mochantšëbuayënja, y Bëngbe Bëtsabeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonÿaye.

<sup>18</sup> Inÿenga mondmëna mo chë uchmëshangañe yojuatquécjana jenaycá. Chënga Bëngbe Bëtsabe palabra mochanjouena,

<sup>19</sup> pero quem luarentša soyëngaca oyejuayënga jtsemnana yapa mochantseboše, y nÿe bomnana jëftsebomnana yapa mochanjësenojuabnaye. Chë soyama y inÿe ba soyëngama yapa enócochinÿena causa, Bëngbe Bëtsabe soyëngama echantsebnëtjomba, y ndoñe quemochátama ntšamo Bëngbe Bëtsá tojayancá.

<sup>20</sup> Pero ínÿenga mondmëna mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; nÿets ainánaca mochantseprontana chiñe jtošbuáchiyama. Mo canÿe betiye becá tsabá tojtseshajuancá, chënga bëtscá tsabe soyënga Bëngbe Bëtsabiama mochantšama. Inÿenga ínÿengbiama más bëtscá soyënga mochanjama; y chca, ínÿenga mochantsemna mo chë unga bnëtsana meshe tojanshajo jenaycá, ínÿenga mo chë chnënguana bnëtsancá, y ínÿengna mo chë patse meshënga tojanboté jenaycá ca” –Jesús tojánayana.

*Chë uajuinÿanëshama cuento  
(Lc 8.16-18)*

<sup>21</sup> Mëntšánaca Jesús tojánayana: “Ndocná juiyëbana canÿe uajuinÿanësha cajonëshe o jutsnësha tajsoye juajájuama. Ndoñe; uajuinÿanësha juiyëbana tsbanánoca juajájuama, lempe chaotsebínÿnama.

<sup>22</sup> Ndocna yoiytémēna soye ntjinýencá queochaisoquéda, y chē ndótatsēmbo soye ntsotatsēmbcá queochaisoquéda.

<sup>23</sup> Chē jouenama tmojtsobenēnga, šmochjouena ca.”

<sup>24</sup> Y mēntśánaca Jesús tojaněyana: “Tśabá šmochjājuaboye ntśamo šmojtsuenanama. Nýe batśatema šmojouenēse, nýe batśatema cmochanjósertaye; pero aíñe tśabá šmojouenēse, chama corente cmochanjósertaye; y Bēngbe Bētsá echanjama tšēngaftanga más soyēngama chacmósertama.

<sup>25</sup> Er nda Bēngbe Bētsabe soyēngama tśabá tbojosertá, Bēngbe Bētsá echanjama cha más ba soyēngama chabosertama; pero nda chē soyēngama josértama ndoñe tontsebośá, chē nýe batśá ibosertana soyēngama bochántsebnatjēmba ca” —cha tojánayana.

### *Chē ojuajna jenayama cuento*

<sup>26</sup> Jesús mēntśánaca tojaněyana: “Bēngbe Bētsabe amēndayana endmēna mo ntśamo canýe boyabása jénaye tojuatbontśá ora ehandbopasacá:

<sup>27</sup> masque cha cada ibeta jtsojājuana y bnēté jotsbanama, ibeta o bnēté, chē jénayentśana juabocnana y juājuana, ntśamo chca yojtśājuajnama chē boyabása ntjatstatśēmbcá.

<sup>28</sup> Chē fshantse cachabe ponto jamana ndayánaca chiñe chaójuama; natsana tsbuanachētēma jóbocnana, chentśana chē espiga, y chentśana chē meshēnga jashájonana.

<sup>29</sup> Y chē meshēnga ya tojtsebóchichna orna, játbanama jabocnana, chē saná josháchiñama ora ya tojobuácheyeca ca” —Jesús tojánayana.

### *Chē mostaztiye jenayama cuento*

*(Mt 13.31-32; Lc 13.18-19)*

<sup>30</sup> Jesús mēntśánaca tojaněyana: “¿Ndayacá Bēngbe Bētsabe amēndayana yomna, o ndaye sóyeca nanjopódia chama jábuayenama?

<sup>31</sup> Endmēna mo canýe mostaza jénaye jajoca tcojajecá. Ndegombre, nýetsca quem luarentśa jenayēngama, mostaza jénaye chē más bāsetema endmēna;

<sup>32</sup> pero tcojajé orna, jójuana, y jajañe chē más bēts betiye jóbemana, ba bēts buacuashēngaca; chíyeca chē jaja shloftśēnga jana y chiñe uajajonētemēngá jauábopormana ca.”

### *Ndáyeca Jesús cuentēngaca entśanga yojanabuayiyná*

*(Mt 13.34-35)*

<sup>33</sup> Chca Jesús Bēngbe Bētsabe soyēngama entśanga yojanabuatambá, ba cuentēnguentśana, mo chē tmonjouena cuentcá, ntsachetśá chē entśanga josértama tmojobenacá.

<sup>34</sup> Tondaye yonjanabuatambá ndoñe cuentēngaca ntsemēncá; pero chabe uat-sjéndayēngna lempe yojanabuayiyná, cánýenga tmojtsemna ora.

### *Jesús chē binýia y chē bėjaye bonguana yojětsbema*

*(Mt 8.23-27; Lc 8.22-25)*

<sup>35</sup> Cach te, yojtseibétatana ora, Jesús chabe uatsjéndayēnga tojaněyana: “Uafjajónaye chenguana cuajna ca.”

<sup>36</sup> Chorna, chē entśanga jesabáshejuanēse, chē uatsjéndayēnga Jesús tmojtsanánatseñe, cach yojánenjaquena barquēshañe; y inýe entśāngnaca inýe barquēshangañe tmojanasto.

<sup>37</sup> Chentśana, chē uafjajónaye bėjaiñe tśa jabuache binýia yojóshjango; olēshēnga chē barquēsha imojtsětsbotsana, y chē causa chē barquēsha yojóntśa búyeshca jt-sobuajútjiana.

<sup>38</sup> Y chēntscuana, barquēsha stētsoica, tsēntśenēshañe Jesús yojtśomañe. Chora chē uat-sjéndayēnga tmojtsanfśená y tmojanियana: —¡Buatēmbayá! ¿Tondayana cmontsentśamna bēnga chaśotsēnatjēmbama ca?

<sup>39</sup> As Jesús tojantsbaná, chë binýia tbojanácacana, y chë bëts uafjajónayoye tojánayana: —¡Natjëmbana cochtsemna! ¡Bonguana ca!

Y cachora chë binýia yojëtstëcja, y lempe bonguana yojtsatsmëna.

<sup>40</sup> Chora chabe uatsjëndayënga tojanëyana: —¿Ndáyeca tša šmojtsauatja? ¿Bëngbe Bëtsá tšëngaftanga jujabuáchama yobenama cabá ndoñe šmontsošbuaché ca?

<sup>41</sup> Chama, chënga puerte auatjanánënga imojtsemna y mëntsá imojtsenatsëtsnaye: “¿Nda quem boyabása yomna? Cha tonjayana y chë binýia y chë bëjaye tmonjoyeuná ca.”

## 5

### *Chë Gerasa luaroca bacna bayëja uambayá*

*(Mt 8.28-34; Lc 8.26-39)*

<sup>1</sup> Chentšana, uafjajónaye chenguánoica tmojánashjajna, Geraseno ca uabaina entšangbe luaroye.

<sup>2</sup> Jesús barquëshoicana tojánastjango, y cachora, chë obanëngbe cuevëshënguentsana canýe entšá, bacna bayëjbe juabna uambayá, tojánbocna y tbojanjébingo.

<sup>3</sup> Chë boyabásana, obanëngbe cuevëshënguenache inoyena, y ndocná yonjobena cha jtsebátsëcana, ni mo cadenëjuangaca;

<sup>4</sup> er ba soye cadenëjuangaca y inýe soyëngaca cha nyetsá tmojanbatsëca, pero cha nyetsca soye yojtsátabebe y yojtsenájaca, y ndocná yonjobenaye cha bonguana chaotsemnama.

<sup>5</sup> Nyets tempo, bnëté y ibeta, obanëngbe cuevëshënguenache y tjañenache yojánana yoye, y ndëtšbéngaca enotsetšenaye.

<sup>6</sup> Jesúsbioye bënocana tbojáninýe ora, chábioye tojanótjajo y chabe natsanoica yojshëntsamentšiyé;

<sup>7</sup> y mëntsá yojtsáyebuache: —¿Ndayá átšeftaca cojtseboše, Jesús, celoca Bëngbe Bëtsabe Uaquiñá? ¡Bëngbe Bëtsabe delante cboimpadá, ndoñe šcatjatsetšená ca!

<sup>8</sup> Chca tbojanियana, er Jesús chábioye tbojanियana: —¡Bacna bayëjbe juabna, chábentšana maisebocna ca!

<sup>9</sup> Chentšana Jesús tbojantjá: —¿Ntšamo cabaina ca?

Y chë bacna bayëjëngbe juábnaca cha tbojanjuá: —Atšna Legión ca sënduabaina, bëtsçanga fsëndmëna causa ca.

<sup>10</sup> Y tša Jesús ibojtserruana chë luarentšana ndoñe chaondëtëbuacanama.

<sup>11</sup> Chentša béconana ba cotšënga imnajena, batsjoca imnëtsosañe;

<sup>12</sup> as chë bacna bayëjënga Jesúsbioye tmojanimpadá: —Chë cotšëngbioye šmichamó, chëngbeñe fchayamashjna ca.

<sup>13</sup> Y Jesús aíñe tojanalesenciá; as chë bacna bayëjënga chë entšábentšana tmojésanbocana y chë cotšëngbeñe tmojánamashjna. Cachora chë mo uta uaranga cotšënga batsjocana peñëšëjana uafjajónayoye imojtsoshbuetše y yojtsatajo.

<sup>14</sup> Chora, chë cotšënga anýenënga tmojtsanacheta auatjanánënga, y tmojána chama jacuéntama chë puebloca y chabuenache; y entšanga tmojánabo ntšamo tojanopasacá jinýama.

<sup>15</sup> Jesús yojtsemnoye chë entšanga tmojánashjajna ora, tmojáninýe chë tempo bacna bayëjënga uambayá, inëtsoybemañe, entšayá uichëtjoná y chabe nyets juábnaca. Y chë entšanga chama imojtsëuatjaná.

<sup>16</sup> Chë tmojáninýënga imojtsecuéntaye, ntšamo chë bayëjbe juabna uambayáftaca tojanopasama, y chë cotšëngaftaca ntšamo tojanopasámnaca.

<sup>17</sup> Chora chë entšanga tmojanontšé Jesús impadánana chë luarentšana chaotsatoñama.

<sup>18</sup> Jesús chë barquëshoye tojtanášëngo ora, chë tempo bacna bayëjbe juabna uambayá tbojanimpadá chabolesenciá cháftaca jama ca.



19 Pero ndoñe tbonjanlesenciá, sinó mēntšá tbojanianyana: “Ache yebnoye motsatoñe, ache pamílangbioye, y cochjácuntaye ndayá Bēngbe Utabná ácaftaca tojamama, y ntšamo cha ácbioye tcmojalastemama ca.”

20 Chentšana, chē entšá yojtsatoñe y tojanontšé Decápolis uabaina pueblēnguenache jacúntana lempe ntšamo Jesús cháftaca tojanmcá; y nyetscanga imojtsenjnanaye.

*Jesús canye shembásabioye tbojanshná y Jairēbe bembetémbioye tbojtanayená (Mt 9.18-26; Lc 8.40-56)*

21 Chentšana, Jesús cachiñe chē uafjajónaye chenguana tojesaná barquēshañe. Chocna ba entšanga tmojanobuashconá, y Jesús chē uafjajónaye tsachañe yojtsemna.

22 Chorna, tojánashjango chē judiēngbe enefjuana yebnentša canye mandayá, Jairo ca uabainá. Jesúsbioye tbojáninye ora, chábentše tojanoshēntsamentšé,

23 y tša ibojtseimpadana, mēntšá: —Atšbe bembetema ya echantsóbana; Diosmanda mabo, ache cucuatšēnga chábeñe cochjajájua, salud chauatinyēnama y cháuatayēnama ca.

24 As Jesús cháftaca tojána; pero bētschá entšanga imojtséstona, chábioye imojtsenatsēntšenaye.

25 Chē entšanguentše yojtsaye canye shembása šocá; cha ya bnētsana uta uata oboftjajuanánaca inapadecena.

26 Cha puerte tojansufrí, ba ashnayēngbe cucuatšīñe, y lempe ntsachetšá inabomncá tojanpochocá jenóshnama; pero ndoñe ibontsatstécacjana, nye más peor ibojtsobiannaye.

27 Chē shembása yojouena ntšamo Jesús ba šoquēnga tojánashnama, y as stētsoicana entšangbe tsēntsajana yojobeconá, y Jesusbe entšayá yojauábojajo.

28 Cha chca tojanma, er yojtsejuabnaye: “Masque nye mo chabe entšayá sibiájua chaijuábojajo, y salud chantsatsbomna ca.”

29 Y cachora chē oboftjajuanana ibojtsobojuána; y chabe cuerpiñe ibojebiónana ya tšabá yojtsatsmēnama.

30 Chora Jesús yojaséntia chábentšana obenana yojóbocnama, mo ndábioye tbojashná orcá; as cha tojanobuértana entšángbeñe y tojanatjá: —¿Nda atšbe entšayá tojuabojajo ca?

31 Chabe uatsjéndayēnga tmojanjuá: —Aca contsonyá chē entšanga cmontsatsēntšená, y cabá cochjátsnoticiaye nda entšayá tojuabojajo ca.

32 Pero Jesús cátoye yojtserreparana jinýama nda tbojánbojajuama.

33 As chē shembása, chē ntšamo cháftaca yojopásama jtsetatšēmbēse, tojanobeconá ngmēmnyá y auatjananá, chabe natsanoica tojanoshēntsamentšé, y lempe ntšamo ndegombre cháftaca tojanopasacá Jesúsbioye tbojanianyana.

34 Chora Jesús tbojanianyana: —Bembe, Bēngbe Bētsábeñe icošbuachéyeca shnaná contsatsmēna. Natjēmbana motsatoñe; ache šocana tontsopochocá ca.

35 Jesús cabá yojtsóyebuambnantscuana, báseftanga tmojánashjajna chē judiēngbe enefjuana yebnentša mandayabe yebnocana, y chē shembásetembe taitá tmojanianyana: —Ache bembe tontsóbana; ¿ndayama más Buatēmbayá chama cochjátebēyaboma ca?

36 Y Jesús, ntšamo chēnga imojtsichamcá ntjatuenancá chē judiēngbe enefjuana yebnentša mandayábioye tbojanianyana: —Ndoñe matauatjana. Nye Bēngbe Bētsábeñe cochtsošbuáchiye cha tšabá chaotsatsmēnama ca.

37 Y Jesús ndoñe tonjanalesenciá Jairēbe yebnoye banga chamuastama; nye Pedro, Santiago y Juan, Santiagbe uabentsana, aíñe.

38 Chentšana, chē mandayabe yebnoye tmojánashjajna ora, Jesús tojánanye entšanga tša imojtsenbouenana, entšanga imojtsošachiye y puerte ngmēnaca imojtseyoye.

39 As chē yebnoye tojánamashēngo y chē entšanga tojanéyana: “¿Ndayama tša šmojtsenbouenana y tša šmojtsendēntjana? Chē shembásetema ndoñe chenatóbana, nye endētsomañe ca.”

<sup>40</sup> Pero entsanga n̄ye imojtsáfchaye. As Jesús n̄yetsca entsanga shjoye tojtanébuacna, y tojéftsanébiatše ch̄e basetembe b̄ets̄sata y chabe enut̄enga; y ch̄e shembásetema yojtsemnoye tojánamash̄engo.

<sup>41</sup> Chora Jesús tbojanábuacueshache y cach̄engbe biyañe tbojaniyana: “Talita, cum ca.” (Chca endayana “Shembásetema, mat̄etsbaná ca”.)

<sup>42</sup> Cachora, ch̄e bn̄etsana uta uata bomna shembásetema tojtantsbaná y yojtsobena jama. Y ch̄e entsanga chama imojtsenjnanaye.

<sup>43</sup> Pero Jesús corente tojanam̄endá ndocnábeñe chama ntsecuéntayana ca, y tojanam̄endá ch̄e básetema saná chamuiyé chaosama.

## 6

### *Jesús Nazaret puebloca*

*(Mt 13.53-58; Lc 4.16-30)*

<sup>1</sup> Chentšana Jesús tojéftsanbocna y cachabe luaroye tojtanashjango, y chabe uatsjéndaȳenga cháftaca tmojána.

<sup>2</sup> Ochnayté tojanobuache ora, Jesús tojanontsé ch̄e judīengbe enefjuana yebnentše entsanga jabuátambana.

Ch̄e ba entsanga cha jóyebuambayama tmojanuen̄enga, imojenjnaná y tmojánayana: “¿Nd̄emoca quem boyabása lempe chca tojuatsjin̄ye? ¿Ndaye osertánana mua tmojatšetá, y ntšámoyeca cha yojtsobena chca b̄ets soȳenga jtsamana ca?

<sup>3</sup> ¿Mua ndoñe ch̄e calpintero yondm̄ena, Mariybe uaquiñá, y chabe catsátanga ndoñe mondm̄ena Santiago, José, Judas y Simón; y chabe uab̄enangnaca muentše ndoñe b̄engaftaca mondoyena ca?” –ch̄enga imojtsichamo.

Ch̄e causa ch̄enga tmojanotjayaná, y ndoñe montseboše joyeunayana.

<sup>4</sup> As Jesús tojan̄eyana: “N̄yetsca luar̄enguenache can̄ye B̄engbe B̄etsabe juabna oye-buambnayábioye b̄etsá jabemana, pero ndoñe chca cachabe luarentše, ni cachabe pamíllangbenache, ni cachabe yebnentše ca.”

<sup>5</sup> Ch̄e entsanga chentše chábeñe ndoñe montsanošbuaché causa, Jesús ndoñe tonjanobená ni can̄ye b̄ets soye B̄engbe B̄etsabe obenánaca chentše j̄eftsemana; n̄ye básefta šoqūengbeñe cucuatš̄enga tojanjajó y tojanashná.

<sup>6</sup> Jesús ojnananá yojtsemna cachábentša entsanga chábeñe ndoñe montsanošbuaché causa.

### *Jesús, chabe uatsjéndaȳenga tojanichamó B̄engbe B̄etsabe am̄endayama jábuayenama*

*(Mt 10.5-15; Lc 9.1-6)*

Chentšana, ch̄e chaboye base puebl̄enguenache Jesús yojánana, B̄engbe B̄etsabe soȳengama abuátambaye.

<sup>7</sup> Y ch̄e bn̄etsana uta uatsjéndaȳenga Jesús tojánachembo, y utáta ín̄yoye tojanichamó, entsángbentšana bacna baȳj̄enga jt̄ebuacnama obenana jatšataȳese;

<sup>8</sup> y m̄entšá yojáuyana: “Benachiñama tondaye šmattsambaye, n̄ye can̄ye jatjon̄ēfja; ndoñe šmattsambaye saná, ni shecnaja, ni croc̄enana uasnan̄echiñe.

<sup>9</sup> Nduáman̄eshe šmochjesóshecoch̄et̄jo, y n̄ye can̄yájua šmochjesích̄et̄jo ca.”

<sup>10</sup> M̄entšánaca tojan̄eyana: “Posada chacmojúyentšame yebnentše šmochtsoquedañe in̄ye puebloye j̄atantscuana.

<sup>11</sup> Can̄ye luaroye chašmojáshjajna y ndocná posada chacmonjuyentšame, y joyeunayama ndoñe chamontseboš̄ese, chentšana šmochjésebocana, y shecuatšentša polv̄eshe šmochjésenstoto, chca, ch̄engbioye jin̄yan̄iyama ch̄enga ndoñe tšabá tš̄engaftangaftaca tmonjamama ca.”

<sup>12</sup> Chentšana, ch̄e uatsjéndaȳenga tmojéftsanbocana y entsanga imojánabuayiynaye, ch̄e tšabe benache chámuatishachama, bacna soȳenga amana jtsajbanase.

13 Entšángbentšana ba bacna bayëjënga tmojtanébuacna, y ba šoquënga aceitíyeca tmojananëtotojo y tmojanashná.

*Ntšamo Juan chë Ubayaná tojanóbana  
(Mt 14.1-12; Lc 9.7-9)*

14 Rey Herodes Jesusbiamama yojátatsëmbona, er nyëtsquénache nyëtsca entšanga chabiama imojtsóyebuambnaye. Entšanga Jesusbiamama imojtsichamo: “Juan chë Ubayaná obanënguentsana tojtayena, chíyeca cha chca obenana yojtsebomna ca.”

15 Inyëngna imojtsichamo: “Cha entsemna chë Bëngbe Bëtsabe juabna oyeubuambnayá Elías ca.”

Y inyëngna: “Muana canya Bëngbe Bëtsabe juabna oyeubuambnayá, mo chë temp-squëngcá ca.”

16 Heródesna ntšamo entšanga Jesusbiamama imojtsichamcá tojanuena ora, tojánayana: “Mua Juan entsemna, chë atše sënjanmandá bestšaše chamotsëstjanguamá, mora obanënguentsana tojtayena ca.”

17 Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamama. Herodes chca tojanma Herodíasbe causa, chabe uabentsá Felipe shema. Herodes chë shémaftaca tojanobouamá, Felipe cabá ainá ora.

18 Y chama, Heródesbioye Juan ibojánbuayiynaye: “Ndoñe quenátslesenciana acbe uabentsabe shema acbe shema chaotsemnana ca.”

19 Chë causa, Herodías Juánbioye puerte ibojuáya, y yojánboše jtsóbama; pero ndoñe yontsobena,

20 er Herodes yojántatsëmbo, Juan canye nyëtsca soyënguiñe tšabá amá, nye Bëngbe Bëtsábioye sempre oservená inamnana. Chama cha yojánauatja y ndoñe yonjanalesencia cha chamóbama. Y Juan Bëngbe Bëtsabe soyëngama Heródesbioye tbojtsebuayiyná ora, ntšamo jajuaboyana ndoñe yontsetátsëmbo, pero masque chca, oyejuayá Juánbioye ibnayeunana.

21 Pero Herodías tojáninyëna mocna ora Juan chamóbama. Heródesbe cumpleño oboyejuaye ora, bëtská saná tmojanprontá, y Herodes yojúbuaja chabe amëndayënga, soldadëngbe amëndayënga y Galileoca uámana entšanga.

22 Chora, chë oboyejuaye luaroye Herodíasbe bembe tojánamashëngo, tojanlantsá, y Herodes y nyëtsca ófjanënga chama tša imojtsóyëjuaye. As chë rey, chë tobiásbioye tbojaniyana: —Ndayánaca šmotjañe y atše cbochjátsetaye ca.

23 Y jajúrase, mëntsá tbojanšbuachená: —Ntšamo chašcojotjañcá cbochjátsetaye, masque atšbe amëndayentša bomnanentšana tsëntsañnaca ca.

24 Chentsana, chë tobiáše yojëftsebocna y chabe mamábioye ibojatjaye: —¿Ndayá chjotjañe ca?

Y chabe mamá ibojojuá: —Juan chë Ubayanabe bestšaše ca.

25 Cachora chë tobiáše betscó chë rey yojtsemnoye tojtanamashëngo, y tbojaniyana: —Atše sëntseboše, cam ora Juan chë Ubayanabe bestšaše canye šcnenësiñe chašcuatsetá ca.

26 Herodes chama corente tbojanongmé, pero chë entšangbe delante y jajúrase tbojanšbuachená causa, ndoñe yonjobenaye ntšamo tbojaniyancá jebëbuetámenana.

27 Cachora chë rey canye soldado ibojíchmua, Juanbe bestšaše chauiyëbama.

28 As chë soldado cárceloye tojána, Juánbioye bestšaše tbojtsanëstjango, y canye šcnenësiñe tojanamba. Chë tobiásbioye tbojanëntšabuaché, y chana, chabe mamábioye.

29 Juanbe ústonënga chama imojátatsëmbona ora, choye tmojánashajna, chabe cuerpo tmojésanocñe y jauátbontsama tmojána.

*Jesús shachna uaranga boyabásenga saná tojanacaredadó  
(Mt 14.13-21; Lc 9.10-17; Jn 6.1-14)*

<sup>30</sup> Chë Jesús tojánichamonga chábioye tmojtanashjajna ora, lempe ntšamo tmojanmama y tmojanabuatambama cha tmojancuentá.

<sup>31</sup> Chora Jesús tojanéyana: “Cuajna ínŷoye, entsanga ndoyena luaroye, batsatema jóchnama ca.” Cha chca tojánayana, er tša entsanga imojtsaye y imojtsabëbana; ni mo jasama ndoñe luare imontsebmna.

<sup>32</sup> As cánŷenga barquëshañe tmojtsanoñe, entsanga ndëbínŷnoye.

<sup>33</sup> Pero chënga imojtsoñama entsanga tmojánanŷe, y ndëmuanŷenga imojamnama imojtsetátšëmbo; chcasna, chë entsanga shecuátšeca betesco tmojána, nŷetsca publënguentsana, y chëngbe natsana choye tmojánashjajna.

<sup>34</sup> Chentsana, chë barquëshoicana tojánastjango ora, Jesús ba entsanga tojánanŷe; chëngbiana tbojanongmé, er imojtsemna mo abuañjënŷa ndbmna oveshëngcá; y tojanontsé ba soyëngama jabuátambana.

<sup>35</sup> Ya jetiñe yojtsemna orna, chabe uatsjëndayënga tmojanobobeconá y tmojanianyana: –Ya jetiñe entsemna, y quem luariñe ndocná quenatiyena.

<sup>36</sup> Entsanga cuantichamuá, pueblotëmëngoye y inŷe luarëngoye chamotsoñama, ndayánaca jasama chamobuámiñama ca.

<sup>37</sup> Y Jesús tojanéyana: –Tšëngaftanga saná chëngbioye šmochjacaredádaye ca.

Chora chënga tmojanianyana: –Crocénana queftsátsbmna, uta patse denario nŷetsá, chëfta entsangbiana saná jabuámiyama ca.

<sup>38</sup> As Jesús tojanéyana: –¿Bueta tandëse šmojtsebmna? Marrepárange ca.

Ya imojtsetátšëmbo ora, tmojanianyana: –Shachna tandëse y uta beónata fsëntsebmna ca.

<sup>39</sup> Chora Jesús entsanga tojanamëndá ínŷoca ínŷoca chamoshëntsŷatbiamama.

<sup>40</sup> As chënga tmojanotbiana patse patsënga y shachna bnëtsátsanënga.

<sup>41</sup> Chora Jesús chë shachna tandëse y chë uta beónata tojanca, y celoye jontješiyëse, Bëngbe Bëtsábioye chama tbojtanchuá. Chentsana chë tandëšënga tojanjatá y chabe uatsjëndayënga tojanayentsbuaché chë entsanga jatšatayama. Y chë uta beónatnaca nŷetscanga tojanëjätaye.

<sup>42</sup> Nŷetscanga tmojanse jtoshachaye nŷetsá.

<sup>43</sup> Y chentsana, chë tandëse y chë beonentsana ojamnëtëmënga tmojanatbaná, y bnëtsana uta sbarëcua tmojanajutjé.

<sup>44</sup> Chë saná tmojansënga imojamna shachna uaranga boyabásenga, shembásenga y básenga ntjacuntacá.

*Jesús béjaye juatsbuacá yojtsaye  
(Mt 14.22-27; Jn 6.16-21)*

<sup>45</sup> Chentsana, Jesús chabe uatsjëndayënga tojanamëndá chë barquëshoye jtašnama, chë uafjónaye chenguana jangana y chabe natsana Betsaida ca uabaina pueblaca jashjajnana. Chënga imojtsebocanëntscuana, Jesús chë entsanga yojtichamuá.

<sup>46</sup> Nŷetscanga tojtanadiošoftá ora, tjoye cha tojtsanoñe Bëngbe Bëtsáftaca jencuëntama.

<sup>47</sup> Yojtseibétatana ora, chë barquëshu uafjónaye tsëntsaca yojtsamna, y Jesús, canŷa fshantsoca.

<sup>48</sup> Jesús tojáninŷe chëngbiana totcá yojtsemna, chë barquëshaca natsanoye jtsayana, er binŷia chëngbe contra yojtsemna. Ya binŷana ora, chëngbioye yojobeconá, béjaye juatsbuacá yojtsaye, y ya chëngbiajana nŷe ndericho jachnënguama yojtsemna.

<sup>49</sup> Y chënga, chë béjaye juatsbuacá cha yojtsayama tmojáninŷe ora, tmojanjuabó cha canŷe añemëse yojtsemna ca, y tmojanontsé yoyana;

<sup>50</sup> er nŷetscanga chca tmojáninŷe y cochauatjanánënga imojtsemna. Pero Jesús cachora tojanéyana: “¡Añemo šmochtsebmna; atše Jesús sëndmëna; ndoñe matauatjëngana ca!”

<sup>51</sup> Chorna, chënga imojtsemna barquëshoye cha tojánasëngo, y chë jabuache binŷia tojanëjbana, y nŷetscanga puerte auatjanánënga y ojnanánënga imojtsemna.

<sup>52</sup> Chënga tmojáninÿe chëfta entsanga tandëse jujátayana, pero chëngbe ainanoca cabá ndoñe imontsobena josértana, Jesús lempe jamama obená bétsemnama.

*Genesaret ca uabáinoca Jesús ba šoquënga tojanashná  
(Mt 14.34-36)*

<sup>53</sup> Chë uafjajónaye tmojánenashbuachengo ora, Genesaret ca uabaina luaroye tmojánashajna, y chë uafjajónaye tsachoca chë barquëshha tmojanétsbua.

<sup>54</sup> Chë barquëshhoicana tmojánastjajna y cachora entsanga Jesús tmojantëmbá.

<sup>55</sup> Chíyeca, chë luariñe yebnënguenache betesco chënga tmojána, y tmojanontsé chë šoquënga tjuashënguiñe juyambana, chë ndëmoye tmojanuena Jesús yojtsemna luaroye.

<sup>56</sup> Y ndayentse cha tojámashëngüentse, pueblënguiñe, bëts pueblënguiñe y base pueblotëmënguiñnaca, chë šoquënga benachoye imojtsëbuacana, y Jesús corente imojtseimpadana chë šoquënga chaualesenciá, nÿe mo chabe entsáyá sibuájua juabojajuana. Y nÿetscanga tmojuábojajënga tšabá imojtsatsmëna.

## 7

*Ndáyeca canÿe entsá Bëngbe Bëtsabe delante ndoñe tšabia nántsemna  
(Mt 15.1-20)*

<sup>1</sup> Chentšana, fariseunga Jesúsbioye tmojanobeconá y báseftanga ley abuátambayëngnaca, Jerusalenocana áshjajnënga.

<sup>2</sup> Chënga tmojáninÿe básefta Jesusbe uatsjëndayënga, cabá ndase ora, ndoñe montsacuentšabiá ntšamo chë judiënga imojanamancá.

<sup>3</sup> Er chë fariseunga y nÿetsca judiënga imojanamana jtsacuéntšabiana ba soye, ndayá jasama ora, ntšamo chëngbe bëts taitanga imojanamancá. Chënga imojanjuabná, chca jtsamëse Bëngbe Bëtsabe delante tšábënga jtsatsmënama ca.

<sup>4</sup> Chë sananga enocana tmojtashjango ora, ba soye ndoñe tmonsacuentšabese, tondaye ntjasana; y ba soyëngnaca imojánama, pero nÿe chëngbe bëts taitanga chca jamana imojanamánayeca, mo chë béjayeca juabáyana tazëšënga, matbajënga, calderëshënga y jutsnëshangá.

<sup>5</sup> Chë causa, chë fariseunga y chë ley abuátambayënga Jesús tmojantjá: —¿Ndáyeca acbe uatsjëndayënga ndoñe montsama ntšamo bëngbe bëts taitanga monjanamancá, y montsesá ntsacuéntšabiase, ndoñe ntšamo bënga judiënga fsënduamancá, Bëngbe Bëtsabe delante tšabá jtsatsmënama ca?

<sup>6</sup> Chora Jesús tojanëyana: —Nÿe tšabá chë Bëngbe Bëtsabe juabna oyebuambnayá Isaías tšëngaftangbiana tojánayana, bacna entsanga chë ntšamo ndegombre šmojuabnacá ndinÿinÿnayënga ca, mëntšá enduabemanentse:

Quem entsanga mondbétsichamo Bëngbe Bëtsá tša tšabia yomna ca; chca nÿe uayásaca, pero chëngbe ainanentse ndocna tšabe juabnëngaca.

<sup>7</sup> Pero chënga nÿe bonamente mondbétsichamo Bëngbe Bëtsá tša tšabia yomna ca; chënga nÿe entsangbe mandënga jtsabuátambayana, y Bëngbe Bëtsabe mandënga ndoñe ca —cha tojánayana.

<sup>8</sup> Chora Jesús tojanëyana: —Ntšamo Bëngbe Bëtsá tojanmandacá stëtsoye tšëngaftanga smojtsequedá, nÿe ntšamo entsanga monduamancá jtsamama ca.

<sup>9</sup> Y mëntšánaca tojanëyana: “Tšëngaftanga ntšamo Bëngbe Bëtsá tojanmandacá stëtsoye jtsequédana, nÿe ntšamo tšëngaftangbe anteunga imojanamancá jtsamama. Tšëngaftanga jtsejuabnayana tšabá šmojtsama ca chca šmojtsama ora.

<sup>10</sup> Moisés tonjánayana: ‘Acbe bëtsétsata ndoñe stëtsoye catjáquedaye’, y ‘nda chabe bëtsétsatbiana ndoñe tšabá tonjoyebuambá chana, jóbanama jtsemnana ca.’

<sup>11</sup> Pero tšëngaftanga šmondbétsichamo, canýe entšá yobena chabe taitá o chabe mamá jáuyanana: ‘Lempe sëndbomna soyënga corbán entsemna, chíyeca ndoñe quetsátobena juajabuáchana ca’ (corbán endayana “Bëngbe Bëtsabiana uátšëmbona soyënga ca”).

<sup>12</sup> Tšëngaftanga šmondbétsichamo, nda chca tojayanëse, ya ndoñe obligaciónaca ntsemnana chabe taitá o mamabiana ndayánaca jamama ca.

<sup>13</sup> Chca, tšëngaftanga šmontsama entšanga Bëngbe Bëtsabe palabra stëtsoye chamoquedama, mo tondaye tontsamancá, chë cuenta jtsamama ntšamo anteunga imojanamancá, ntšamo entšángbeñe tempscana y méntscóñama yochnéjuancá. Y ba soyënga tšëngaftanga cachcá šmontsama ca” —Jesús tojánayana.

<sup>14</sup> Chora Jesús, cachiñe entšanga tojtanchembo y tojanéyana: “Nýetscanga šmochjouena y chacmësertá.

<sup>15</sup> Ndayá entšá tojttesacá, ndoñe ntjábemana ndoñe tšabia Bëngbe Bëtsabe delante. Inýetšá comna: ntšamo entšá tojtsejuabná y tojtsoyebuambnacá endobena jabemana ndoñe tšabia Bëngbe Bëtsabe delante.

<sup>16</sup> Chë jouenama tmojtsobenënga, šmochjouena ca” —cha tojánayana.

<sup>17</sup> Jesús entšanga tojéftsanabashejuana y yebnoye tojtanamáshëngo ora, chabe uat-sjëndayënga tmojantjá ntšamo cha tojánayanama.

<sup>18</sup> As cha tojanéyana: “¿Tšëngaftángnaca cabá ndoñe cmontsësertana ca? ¿Cabá ndoñe cmontsësertana, lempe ntšamo entšá tojascá ndoñe ntsobenenana chábioye jabemana ndoñe tšabia Bëngbe Bëtsabe delante;

<sup>19</sup> er ainanoye ndoñe ntjómashënguana, sinó uafsbioye, y chentšana cuerpentšana jtabocnana ca?”

Y chca, Jesús tojánayana nýetsca sananga tšabá jasama yomna ca y chë saná ndoñe ntjamana canýe entšá bacna soye chaotsamama ca.

<sup>20</sup> Y méntšánaca tojánayana: “Ntšamo chë entšá tojtsejuabná y tojtsoyebuambnacá, chë soye cocayé endobena entšá jabemana ndoñe tšabia Bëngbe Bëtsabe delante.

<sup>21</sup> Er ainanocana jtsóbocanana bacna juabnënga: shembásaftaca o boyabásaftaca bacna soye jamama, jatbëbama, jóbama,

<sup>22</sup> bacna juabnënga boyá o shémbioye ínÿaftaca jáingñama, jtsatbomnayama, nýetsca bacna soyënga jamama, ínÿenga jáingñama, nýe cachá jenomándama ntsobencá jtsiyenama, ínÿabioye jtsántšabošama, ínÿabiana jtsayátšenayama, jtsenábotamnayama y nýe opënga jtsobiamnayama.

<sup>23</sup> Nýetsca quem bacna soyënga entšabe ainanocana jóbocnana, y cha jabemana ndoñe tšabia Bëngbe Bëtsabe delante ca” —cha tojánayana.

*Canýe shembása inýe luarocana ashjangoná Jesúsbeñe yojtsošbuaché  
(Mt 15.21-28)*

<sup>24</sup> Jesús chentšana, Tiro ca uabaina luaroye tojtsanoñe, y canýe yebnentše tojánamashëngo. Cha yojtseboše ndocná chama chaondëtsetatšëmbuama; pero ndoñe yonjobenaye iytëmenana jatsmënana.

<sup>25</sup> Ybetsco, canýe shembása, canýe bembe bacna bayëjbe juabna uambayá ibnabomná, Jesusbiana oyebuambnayana yojouena ora, chábioye tojánabo y chabe shecuatšentše tojanoshëntsamentšé.

<sup>26</sup> Chë shembása ndoñe yonjamna judiá, sinó Sirofenicia luarocá. Tojánabo y Jesúsbioye tbojanimpadá chabe bembetëmbentšana bacna bayëja chabuátábocnana.

<sup>27</sup> Pero Jesús tbojanianayana: —Atše šondmëna natsana judío entšangbiana chë soyënga jamana; chentšana cocayé chanjobenaye chca inýe entšangbiana jamana. Atše acbiana, canýe ndoñe judiá, soyënga stjämëse, nántsemna mo chë básengbe saná quešënga cuaftsëbuajocá ca.

<sup>28</sup> Y cha tbojanjuá: —Arseñor, chca jtsemnana. Pero chë quešëgnaca mondbase chë básenga tmojttesá ora tmojatquécjanatemënga. Chcasna, Diosmanda átšnaca šmotsajabuache ca.

<sup>29</sup> As Jesús tbojanianyana: —Tšabá tcjayana; chcasna, acbe yebnoye motsatoñe. Chë bacna bayëja acbe bembetëmbentsana tonjësebocna ca.

<sup>30</sup> Chentšana, chë shembása chabe yebnoye tojtaná, y tbojáninyëna chë bembetema jutsnëshentše yojtsojájoñe, y chë bacna bayëja ya ndoñe chábeñe yontsemna.

*Jesús, canye boyabása tësmá y ndëbiábioye tbojanshná*

<sup>31</sup> Tiro pueblentsana Jesús tojëftsanbocna, y Sidón y Decápolis luarentša pueblënguëjana jachnënguse, Galilea uafjajónayoye tojánashjango.

<sup>32</sup> Cha chentše yojtsemna ora, chábioye tmojanánatse canye entsá tësmá y ndëbiá, y tmojanimpadá chabe cucuatšënga chë šocábeñe chaojájoma, chaboshnama.

<sup>33</sup> Chorna Jesús entsángbentšana luaroye tbojanánatse, cányata. Chora chë šocabe matscuašoye ntšabuafjënga yojajué, cucuatšinë yojabuashëtjo, y chë šocabe bichtaja yojábojajo.

<sup>34</sup> Chentšana, Jesús celoye tojanontješé, jabuache yojáshachna, y hebreo palabriñe tbojanianyana: “¡Efata ca!” (Chca endayana “¡Chacmotsauenana ca!”)

<sup>35</sup> Cachora, chë boyabásabe matscuaše tšabá yojsatsmëna y tšabá yojsuenana; chë bichtaja tšabá yojtóbema y tšabá yojsóyebuambnaye.

<sup>36</sup> Y Jesús chë entsanga tojanamëndá chama ndocnábeñe ntsecuëntayana. Pero masque tša chama yojsamëndaye, entsanga más chabiamama imojsencuëntaye.

<sup>37</sup> Chama chë entsanga puerte imojsenjnanaye, y mëntšá imojsichamo: “¡Lempe tšabá entsama! Chë tësmënga chamouenama, y chë ndëbianga chamóyebuambama entsama ca.”

## 8

*Jesús canta uaranga entsanga saná tojanacaredadó*

*(Mt 15.32-39)*

<sup>1</sup> Chë tempo, ba entsanga Jesúsbioye cachiñe tmojanobeconá, y jasama tondaye imontsebmoma. As Jesús chabe uatsjëndayënga tojánachembo y tojanëyana:

<sup>2</sup> —Quem entsangbiamama šontsengmena, er ya unga te átšeftaca montsemna y mora jasama tondaye quemátsbmoma.

<sup>3</sup> Cachëngbe yebnoye tondaye ntjascá stichamuase, shëntsama benachëjana nantsabu-atëcja; y báseftanga bën luarocana tmojabo ca.

<sup>4</sup> As chabe uatsjëndayënga tmojanianyana: —¿Ntšamo nda nanjobenaye quem luarentše, ndocna entsá ndoyenentše, chëfta entsangbiamama saná jinñenama ca?

<sup>5</sup> Chora cha tojanatjá: —¿Bueta tandëse šmojtsebmoma ca?

Y chënga tmojanjuá: —Canysëfta ca.

<sup>6</sup> Chentšana, Jesús tojanamëndá entsanga chamoshëntsjatbiamama. Chorna, chë canysëfta tandëse tojanca y Bëngbe Bëtsábioye chama tbojtanchuá. Chentšana tojanjatá, chabe uatsjëndayënga tojanëjatá, y chëngna chë entsángbioye.

<sup>7</sup> Básefta beonatëmëgnaca imnabomna; as Jesús, Bëngbe Bëtsábioye chama tbojtanchuá y chabe uatsjëndayënga tojanamëndá entsanga jujátayama.

<sup>8</sup> Nyetscanga tmojanse jtoshachaye nyetsá. Chentšana cabá canysëfta bëts sbarëcua tmojanajutjë chë ojamnëtëmëngaca.

<sup>9</sup> Chë tmojansënga imojamna mo canta uaranga nyetsá. Chentšana Jesús chë entsanga tojtanadiošoftá.

<sup>10</sup> Chora Jesús barquëshañe tojánenojayiye chabe uatsjëndayëngaftaca, y tmojtsanoñe Dalmanuta ca uabaina luaroye.

*Chë fariseunga tmojánbošena, Jesús chaoma canye bëts soye, chabe ndegombre obenana jinÿama*

*(Mt 16.1-4; Lc 12.54-56)*

11 Chentsana, fariseunga tmojánabo y tmojanontsé Jesúseftaca enatsëtsnayana. Y jisháchichiyama, imojtseimpadana canye bëts soye chaoma, as jtsetatšëmbuama Jesusbe obenana Bëngbe Bëtsábiocana ndegombre tainóbocanama.

12 Y Jesús ngménaca, jabuache yojáshachnëse, mëntsá tojánayana: “¿Ndáyeca tšëngaftanga, chë mora oyenënga, šmojtseboše canye bëts soye chaimama tšëngaftanga atšbe obenana jinÿanÿiyama ca? Ndegombre cbëyana, quem entsanga ndocna chca soye quemochátinÿe ca.”

13 Chorna chë entsanga cachcá tojesanënÿá, chë barquëshoye yojtamáshëngo, y uaf-jajónaye chenguana yojtsoñe.

*Jesús tojanabuayená fariseungbe buatëmbana soyëngama*

*(Mt 16.5-12)*

14 Chë uatsjéndayënga yojésebnëtjomba ndaye soye jasama jesocñama, y chë barquëshoye nÿe canye tandëse imojtsebomna.

15 Jesús tojanëyana: —Smochtsantješna; cuedado šmochtsebomna fariseunga y Heródesbe levadurama ca.

16 Chora chë uatsjéndayënga tmojanontsé enatsëtsnayana: —Chca entsichamo, bënga tandëse ndoñe tmonjesocñama ca.

17 Jesús yojtsetátšëmbo, chabe uatsjéndayënga imojtsejuabnaye chana tandëšama yojtsëtsësnaye ca; pero ndegombre chana yojtsóyebuambnaye ndayá ntšamo fariseunga y Herodes bacna soyënga jtsamëse imojoyenama. Chcasna, mëntsá tojanëyana: —¿Ndáyeca tandëšama šmojtsoyebuambná? ¿Cabá ndoñe cmontsësertana, ni šmontsetátšëmbo? ¿Ainanoca ndoñe šmontseboše chacmësertama?

18 Bominÿe šmondobomna, pero ndoñe quešmátobena jinÿana; jouenama šmondobena, y ndoñe quešmátuenana, y ndayá tijamama ndoñe quešmatsjuabná.

19 Chë shachna uaranga entsanga shachna tandëšentsana sënjanëjatá chentsana, ¿bueta sbarëcua chë ojamnëtémëngaca šmënjanajutjé ca? —cha tojanatjá.

Y chënga tmojanjuá: —Bnëtsana utácua ca.

20 —Y chë canÿsëfta tandëšentsana canta uaranga entsanga sënjanëjatá chentsana, ¿bueta bëts sbarëcua chë ojamnëtémëngaca šmënjanajutjé ca?

Y chënga tmojanjuá: —Canÿsëftácua ca.

21 As Jesús tojanëyana: —¿Y cabá ndoñe cmontsësertana ca?

*Jesús canÿe jtanábioye tbojanshná, Betsaida puebloca*

22 Chentsana tmojánashajna Betsaida puebloca; y chora, entsanga canye boyabása jtaná Jesúsbioye tmojanánatse, y tmojanimpadá cha jabojuana chabotseshnama.

23 As, chë jtanábioye tbojanábuacueshache, y chë pueblo chaboje tbojanánatse. Chorna, yebuáyeca ibojabuchanëtjo, y chábeñe cucuatšënga yojajájua, y tbojantjá nderado ndayá jinÿama tajojtsanobena ca.

24 As chë jtaná yojontješiyé y tojánayana: —Boyabásenga sëntsenÿa; mo betiyëngcá montsemna, pero montsobonjná ca.

25 Chora Jesús, chë jtanabe fšnëbeñe cachiñe cucuatšënga yojajájua. Y chë boyabása yojtsobena lempe tšabá jinÿama; ya shnaná yojtoquéda. Y yojtsobena nÿetsca soyënga botamana jinÿana.

26 Chentsana, Jesús cachabe yebnoye tbojtanichmó y mëntsá tbojanianana: —Chë puebloye ndoñe catjëftsamashëngo ca.

*Pedro tojánayana, Jesús chë Cristo bëtsemnama*

*(Mt 16.13-20; Lc 9.18-21)*



<sup>27</sup> Chentšana, Jesús tojánbocna chabe uatsjéndayëngaftaca Cesarea de Filipo luaroca pueblëngoye, y benachiñe chabe uatsjéndayënga tojanatjá: —¿Nda atše bétsemnama ca entšanga imojtsichamo ca?

<sup>28</sup> Y chënga tmojanianyana: —Inyënga montsichamo Juan chë Ubayaná ca, ínÿengna Elías ca, y ínÿengna, canÿe Bëngbe Bëtsabe juabna oyebuambnaya ca.

<sup>29</sup> As Jesús tojanatjá: —Y tšëngaftangna, ¿nda atše bétsemnama ntšamo šmochjayana ca? Y Pedro tbojanjuá: —Acna chë Cristo condmëna, chë Bëngbe Bëtsabe Uamana Uabayana ca.

<sup>30</sup> Chentšana Jesús corente chënga tojanamëndá, chë nda cha yojamnama ndocnábeñe ntsecuéntayana.

*Jesús tojánayana cha ibojamna jóbanana y jtsayenana ca*  
(Mt 16.21-28; Lc 9.22-27)

<sup>31</sup> Y Jesús tojanontsé chabe uatsjéndayënga jabuátambana, cha, chë Bëngbe Bëtsá Entšá tbojanbemá, ibojamna puerta jasúfriana ca; chë judiëngbeñe bëtšëjemëngcá amëndayëngbiama, chë judiëngbe más uamana bachnangbe amëndayënga y ley abuátambayëngbiama uabotená jtsemnana ca. Entšanga mochjanóba, pero unga tianoye yochtanayena ca.

<sup>32</sup> Nÿetscanga catafjosertaycá chama yojtsóyebuambnaye. As Pedro, Jesúsbioye luaroye tbojanánatse, y tojanontsé jtšáuyanana.

<sup>33</sup> Pero Jesús yojobuértana, chabe uatsjéndayënga tojanënÿanÿé, y Pédrëbioye mëntšá tbojtsanbochembo: “¡Satanás, átšbentšana mojuaná! Pedro, acbe juabnënga Bëngbe Bëtsábiocana ndoñe quenatóbocana, sinó nÿe entšángbentšana ca.”

<sup>34</sup> Chentšana, Jesús chabe uatsjéndayënga y chë inÿe entšanga tojánachembo chamouenama, y tojanéyana: “Nda atšbe uatsjendayá jtsemnana tojtseboše, cháuyana nÿe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonÿá atše juastama, y atšbiama jasúfriama chaotseprontana y cruciñe jobanámnaca.

<sup>35</sup> Nda tojtsama quem luarentše bëtscá soyënga jtsebomnama y atšbiama jasúfriama ndoñe tontseprontana, chë nÿetsca tescama yomna tšabe vida echanjopérdia. Pero nda quem luarentša soyënga cachcá tojëftsonÿá atše juastama, y chë tšabe noticiënga atšbiama abuátambaye causa, masque chaóbana, chë nÿetsca tescama yomna tšabe vida echántsebomna.

<sup>36</sup> ¿Ndayama entšá buanjosería nÿetsca quem luarentša soyënga jtsebomnana, chë nÿetsca tescama yomna tšabe vida tojtsoperdese?

<sup>37</sup> Er canÿe entšá chë nÿetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nÿetsca tescama yomna tšabe vida jtsebomnama.

<sup>38</sup> Chcasna, nda mora atšbiama y atšbe buayenana soyëngama tojtsëuatja entšángbeñe, chënga chë Bëngbe Bëtsabiama nduauenanënga y bacna soye amënga, chë Bëngbe Bëtsá Entšá tbojanbemánaca chabiama echantsëuatja, chabe Taitabe bëtš obenánaca y chabe angelëngaftaca chaojésabo ora ca” —cha tojanéyana.

## 9

<sup>1</sup> Mëntšanaca Jesús tojanéyana: “Ndegombre cbëyana, báseftanga muentše montsemnënga ndoñe quemochatóbana, Bëngbe Bëtsá entšángbeñe chabe obenánaca jabomándama jabana ntjëftsinÿcá ca.”

*Jesús inÿetšá tojanobinÿná*  
(Mt 17.1-13; Lc 9.28-36)

<sup>2</sup> Chentšana chnënguana tianoye, Jesús tojëftsanëbiatše Pedro, Santiago y Juan, y ínÿoye tojanënatsē nÿe chënga, canÿe bëtš tjoye. Y chëngbe delante Jesús inÿetšá tojanobinÿná;

<sup>3</sup> chabe uichëtjonëjuangá tša yojtšabuashinÿinÿana; corente uafjantsëjuangá yojtšamna; nÿa chca juafjantsama ndocná quem luarentše quentatobenaye.

<sup>4</sup> Chca orna, chë uatsjéndayënga tmojáninÿe, Moisés y Elías tbojanobinÿná Jesúseftaca encuéntaye.

<sup>5</sup> Chora Pedro, Jesúsbioye tbojanianya: “¡Buatëmbayá, tša tšabá bëngbiama cuanmëna muentše jtsemnana ca! Mora fchanjapórma unga tambotémënga: cánÿetema acbiama, ínÿetema Moisesbiana y ínÿetema Elíasbiana ca.”

<sup>6</sup> Chca tojánayana, chë uatsjéndayënga yapa auatjanánënga imojtsemna causa, y Pedro ndoñe yontsetátšëmbo ntšamo jayanana.

<sup>7</sup> Chora canÿe jantšetēshe yojóbema, y chëngbioye yojáutsbotse; y chë jantšetēshoicana canÿe oyebuambnayana tojanóbocna, mëntšá: “Mua atšbe bonshana Uaquiñá endmëna; cha šmochtseyeunana ca.”

<sup>8</sup> Y ndeolpe, chëngbe shëconana tmojanrrepará ora, ya ndocná más tmonjáninÿe; nÿe Jesús canÿa chëngaftaca yojtsemna.

<sup>9</sup> Chë tjocana imojtsatstsmaye ora, Jesús chë uatsjéndayënga tojanamëndá: — Bëngbe Bëtšá Entšá tbojanbemá obanënguentshana candëtayenëntscuana, chë mënté tjoca šmonjinÿe soyama ndocnábeñe šmattsecuéntaye ca.

<sup>10</sup> Chë uatsjéndayënga aíñe chca tmojanuena; pero chënga imojtsentjanaye ndayá cha yojtšentšáyana, cha yochtanayena ca cha tojánayana ora.

<sup>11</sup> Y Jesúsbioye imojtsetjanaye: —¿Ndáyeca chë ley abuátambayënga mondbétsichamo, canmëna Bëngbe Bëtšabe Uámana Uabuayanabe natsana Elías jabana ca?

<sup>12</sup> As cha tojanëjua: —Ndegombre, canÿa Eliascá natsana echanjabo, y ntšamo jtsemnama yomncá lempe echánjabatsma. Pero ntšamo Bëngbe Bëtšabe uabemana palabrenguiñe endayancana, Bëngbe Bëtšá Entšá tbojanbemá puerta caochjasúfria, y ínÿenga puerta camochtsáboyënja ca.

<sup>13</sup> Ndegombre cbéyana, canÿa Eliascá ya tonjabo, y cháftaca entsanga tmonjanma lempe ntšamo tmojabošencá, ntšamo chaochnënguama Bëngbe Bëtšabe uabemana palabrenguiñe endayancá.

*Jesús, canÿe basa bayëjbe juabna uambayábioye tbojanshná  
(Mt 17.14-21; Lc 9.37-43)*

<sup>14</sup> Chentšana, chënga tmojtaná chë inÿe uatsjéndayëngbioye. Chora, Jesús tojáninÿe ba entsanga chë uatsjéndayëngbe shëconana imojtsemnana, y básefta ley abuátambayëngna chëngaftaca imojtsenatsëtsnaye.

<sup>15</sup> Nÿetsca entsanga cha tmojáninÿe ora, imojenjnaná y tmojanótjajo cha jachuayama.

<sup>16</sup> Chora Jesús chënga tojanatjá: —¿Ndayama chëngaftaca šmenatsëtsná ca?

<sup>17</sup> Y canÿa entsanguentsá tbojanjuá: —Buatëmbayá, muentše ácbioye sënjuánatse atšbe uaquiñá; bacna bayëjbe juabna entsambá, y chë causa, jóyebuambayama ndoñe quenátobena.

<sup>18</sup> Nÿe ndayéntšnaca cha tojtsemnentše, chë bayëja chábioye jishachana y jtse-najuáchesënjana; chentše uayoicana shashiye jtsabocanana, jtseoftšëfjojnayana y obanacá jtsatsjájonana. Acbe uatsjéndayënga sënjaimpadá chë bacna bayëja chamu-atábocnama, pero ndoñe chematobená ca —cha tbojanianya.

<sup>19</sup> As Jesús tojánayana: —¡Nÿetšá ndošbuáchiyënga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? ¡Moye chë básetema mánatse ca!

20 Chora chë básetema chábioye tmojanánatse; y chë bayëja Jesúsbioye tbojáninÿe ora, tojanma chë basa ataque chaboshachama, y chë basa fshantsoye yojashajaye, yojtsojanduounaye y uayoicana shashiye yojtsábocana.

21 As Jesús chë básabe taitábioye tbojantjá: —¿Buetayté chca yojtsepása ca?

Y cha tbojanjuá: —Básetema orscana chca;

22 ba soye, chë bayëja chábioye iñoÿe jtsatmetšana y buyeshoye jtashbuetšana, jtsóbama. Chíyeca, nderado ndayá chabiamama jamama tcojtsobenëse, bënga šmotsalastemá y šmotséjabuache ca.

23 Chora Jesús tbojanianya: —¿Ndayeca “ndayá jamama tcojtsobenëse ca” šcjauyana? Nda Bëngbe Bëtsábeñe tojtsošbuáchebiamama lempe endopodena ca.

24 Y cachora chë básabe taitá tojanáyeubuachena: —Aíñe, Bëngbe Bëtsábeñe sëntsošbuaché; Diosmama, imás jtošbuáchiyama šmajabuache ca!

25 Y bëtsá entsanga imojtsótotoma Jesús tojáninÿe ora, chë bacna bayëja tbojtsanbochembo mëntsá: —¡Bacna bayëja, chë básetema tësmá y ndëbiá biamnayá; chábentšana maisebocna y ndocna te más chábeñe catjésamashëngo ca!

26 Y chë bayëja chábentšana yojésebocna, yojtseyoye y chë básabioye jabuache ibojese-shatyyé; y chë básana mo obanacá tojanoquedá, y chë causa banga imojtsichamo cha obaná yojtsemna ca.

27 Pero Jesús tbojanábuacueshache y tbojtanatsbaná; y chë básana yojtëtsaye.

28 Chentšana, Jesús canÿe yebnoÿe tojánamashëngo, y chabe uatsjéndayëngna luaroca cha tmojantjá: —¿Ndayeca bënga ndoñe fsënjobená chë bayëja jtabocnana ca?

29 Y Jesús tojanëjua: —Chca bayëjënga jtëbuacanamna jobenayana nÿe Bëngbe Bëtsáftaca jencuëntase, chabuájabuachama jaimpádase ca.

*Jesús cachiñe tojánayana cha ibojamna jóbanana y jtayenana ca*

*(Mt 17.22-23; Lc 9.43-45)*

30 Chentšana tmojëftsanbocna ora, Galilea luarëjana imojtsajna; y Jesús yojtseboše chama ndocná chaondëtsetatšëmbuama,

31 er cha chabe uatsjéndayënga yojtsabuátambaye. Mëntsá cachabiamama yojanëtsëtsnaye: “Bëngbe Bëtsá Entsá tbojanbemá entsangbe cucuatšinë mochanjáboshjona; mochanjóba, pero chentšana unga tianoye echántayena ca.”

32 Pero chënga ndoñe yontsósertana ntšamo Jesús yojtsanëtsëtsnacá, y chama jatstjanayamna chënga imojtsauatja.

*¿Nda chë más uamaná yomna?*

*(Mt 18.1-5; Lc 9.46-48)*

33 Chora Capernaum puebloÿe chënga tmojánashjajna; y cach yebnentše imojtsemna ora, Jesús chë uatsjéndayënga tojanantjá: “¿Ndayama benachiñe šmabáyenatsëtsnaye ca?”

34 Chëngna nÿe iytëca tmojanobiamama, er benachëjana chënga imnayénatsëtsnaye, chënguentsá nda chë más uamaná bëtsemnama.

35 As Jesús tojanótbema, chabe bnëtsana uta uatsjéndayënga tojánachembo y tojanëyana: “Ndánaca nÿetscangbiamama chë más uamaná jtsemnama tojtsebošëse, cha chë más nduamaná chaóbema y nÿetscanga chaotsaserverna ca.”

36 Chora Jesús canÿe básetema tbojánishache, chëngbe tsëntsaca tbojanatsá, tbojantbá y chënga tojanëyana:

37 “Ndánaca, átšbeñe ošbuachiyá bëtsemnayeca, tbojofja canÿa mo quem basetemcá, chana atše jofjana; y nda atše šojofja, chora cha nÿe atše ndoñe ntjofjana, sinó chë šojichmó chábionaca jofjana ca.”

*Nda ndoñe bëngbe contra tontsemná, bëngaftaca jtsemnana*

*(Mt 10.42; Lc 9.49-50)*

<sup>38</sup> Juan, Jesúsbiöye tbojaniana: —Buatëmbayá, bënga fsënjinye canye boyabása, y cha aca jótšëmbonëse, bacna bayëjbe juabna entšángbentsana endëtëbuacana; pero cha bëngaftaca ndoñe quenátsmëna causa, chama fsënjesauyaná ca.

<sup>39</sup> As Jesús tbojanjuá: —Ndoñe šmatjuauyaná; er ndocná quenátobena canye bëts soye jamana Bëngbe Bëtsabe obenánaca, atše jótšëmbonëse, y chentšana atšbe contra jatóyebuambnayana.

<sup>40</sup> Ndegombre, nda ndoñe bëngbe contra tontsemná, bëngaftaca jtsemnana.

<sup>41</sup> Y ndánaca, masque nye býeshtema tšëngaftanga tcmojubuatšatá, tšëngaftanga átšbenga bëtsemnayeca, chábiöye Bëngbe Bëtsá canye uacanana soye bochantatšetaye, cha chë tšabe soye tojamama ca.

*Resjo yomna, nderado bacna soyënga cuanjama*

*(Mt 18.6-9; Lc 17.1-2)*

<sup>42</sup> Chentšana Jesús tojánayana: “Canya átšbeñe ošbuachiyábiöye mo quem basetemcá, nda tbojaingñe atše ustonama chaotsajbanama, más tšabá chabiama nántsemna canye bëts nantsnëbé chamotsetamošëntšbua y mar béjayoye asentoye chamotsashbuetše chabotsenatjëmbama.

<sup>43</sup> Nderado acbe cucuátšeca bacna soye tcojama, más tšabá nántsemna chë cucuatše chacotsenacuéstjango. Acbiama más tšabá endmëna celoye jamashënguana nyetsca tescama vida jtsebomnama, nye canye cucuatše bomná, y ndoñe nyets útatšeca infiernoye chacmotocá jama, chë ndocna te yochanjáfsana íñeshoye;

<sup>44</sup> choca útšëñënga puerte nyetsca tescama mochanjasúfria. Chëngbiöye mochtsasaye mamanga ndocna te quemochatóbana, y chë íñeshe ndocna te queochátsfsana.

<sup>45</sup> “Nderado acbe shecuátšeca bacna soye tcojama, acbiama más tšabá nántsemna chë shecuatše chacotsenashecuástjango. Acbiama más tšabá endmëna cosheto celoye jamashënguana nyetsca tescama vida jtsebomnama, y ndoñe nyets útatšeca infiernoye chacmotsëtšena;

<sup>46</sup> choca útšëñënga puerte nyetsca tescama mochanjasúfria. Chëngbiöye mochtsasaye mamanga ndocna te quemochatóbana, y chë íñeshe ndocna te queochátsfsana.

<sup>47</sup> “Nderado acbe bomínýeca bacna soye tcojinýe y cachca soye tcojama, más tšabá nántsemna chë bomínýe chacotsenobuchjátsëca. Acbiama más tšabá endmëna Bëngbe Bëtsabe amëndayoye jamashënguana nye canye bomínýe bomná, y ndoñe nyets útabeca infiernoye chacmotsëtšena;

<sup>48</sup> choca útšëñënga puerte nyetsca tescama mochanjasúfria. Chëngbiöye mochtsasaye mamanga ndocna te quemochatóbana, y chë íñeshe ndocna te queochátsfsana.

<sup>49</sup> “Tamó tšabe soye endmëna. Ntšamo chë tamó canye tšabe soye endmëncá, Bëngbe Bëtsá echanjama nyetsca tšëngaftangbiama tšábënga chašmotsemnama, chë átšbeñe betsošbuáchema šmojtsepadecena ora šmojauantase.

<sup>50</sup> Tamó tšabe soye endmëna. Pero chë tamó fténana tojtsóbemëse, ndoñe quešmátobena jamana cachiñe chabe tempsca sanana chaotsatsbomnama, ni saná jatamuama. Mo tšabe tamocá entšangbiama šmochtsemna, chëngbeñe jtsiyenëse ntšamo Bëngbe Bëtsá yobošcá, y nyetscángaftaca natjëmbana šmochtsiyena ca” —cha tojánayana.

## 10

*Ndayá Jesús tojanabuatambá bouamnënga tmojtsenëtšenama*

*(Mt 19.1-12; Lc 16.18)*

<sup>1</sup> Chentšana, Jesús chë luarentšana tojëftsanbocna y tojána Judea luaroye y Jordán chenguana. Entšanga cachiñe chábiöye tmojánabo, y cha chënga yojtsabuátambaye, chë ntšamo jamana yojanamancá.

<sup>2</sup> Básefta fariseunga chábiöye tmojanobeconá, y jisháchichiyama mëntšá imojtsetjanaye: —¿Queojtselesenciana canye boyá chabe shëmbiöye cachcá jesonýayama ca?

<sup>3</sup> Chora cha tojanējua: —¿Ntšamo Moisés chë soyëngama tcmënjanamëndaye ca?

<sup>4</sup> Y chënga tmojánayana: —Moisés tojanalesenciá chë boyá chabe shémbioye chabuiyé canýe tsbuanácha, ndayéchañe chaotsayana cha ya ndoñe chabe shema yontsemna ca, y chora cachcá chabe shema chabuesonýá ca.

<sup>5</sup> Chora Jesús tojanéyana: —Tšëngaftanga Bëngbe Bëtsabe mandënga ainaniñe jójëngacñama ndoñe quešmátsboše causa, Moisés chca tšëngaftanga tcmojëftsanamëndá.

<sup>6</sup> Pero quem luare jobojátšama orna, “Bëngbe Bëtsá canýe boyabása y canýe shembása tonjánabiama.

<sup>7</sup> Chíyeca, chë boyabása chabe taitá y chabe mamá echanjésabashejuana, chabe shémaftaca jenútanama,

<sup>8</sup> y chë útatna mo canýacá bochántsemna.” Y chca, ya ndoñe útata quebochátsmëna, sinó nýe mo canýacá.

<sup>9</sup> Chcasna, entsá ndoñe chaondëndbema ndayá Bëngbe Bëtsá mo canýiñcá tojéftsema soye ca —cha tojánayana.

<sup>10</sup> Ya cach yebnoca imojtsatsmëna ora, chabe uatsjëndayënga cach soyama imojtëtstjaye.

<sup>11</sup> Y Jesús tojanéyana: “Nda chabe shémbioye cachcá tbojesonýá y ínÿaftaca tojtóbouamase, cha chë natsana shémbioye inýe shembásaftaca jtseíngñayana; chana canýe uabuatmá jtsebomnana.

<sup>12</sup> Y chë shema chabe boyábioye cachcá tbojesonýá, y ínÿaftaca tojtóbouamase, chánaca chë natsana boyábioye ínÿaftaca jtseíngñayana; canýe uabuatmá jtsebomnana ca” —Jesús tojánayana.

*Jesús, basetëmëngbiama Bëngbe Bëtsábioye tbojanimpadá*  
(Mt 19.13-15; Lc 18.15-17)

<sup>13</sup> Entšanga, basetëmënga Jesúsbioye tmojanënatse, chauabájajuama y Bëngbe Bëtsábioye chëngbiama chaboimpadama; pero chabe uatsjëndayëngna tmojanontsé chë basetëmënga unachayënga jtsëcácanana.

<sup>14</sup> Jesús chca tojáninýe ora, tbojánetna y chë uatsjëndayënga tojanéyana: “Cachcá mónýaye chë basetëmënga átšbioye chamuabo y ndoñe matëuyanana; er Bëngbe Bëtsabe amëndayana endmëna chë mo quem basetëmëngcá imomnëngbiama.

<sup>15</sup> Ndegombre cbëyana, nda Bëngbe Bëtsabe soyënga ndoñe tonjójëngacñe mo canýe basetëmcá jtsošbuáchiýese, cha ndoñe queochatobenaye Bëngbe Bëtsabe amëndayoye jamashënguama ca.”

<sup>16</sup> Y chë basetëmënga tojanchebá, y chëngbeñe cucuatšënga jajájuase, Bëngbe Bëtsábioye tbojanimpadá tšabe bendicionënga chëngbeñe chaotsemnana.

*Canýe bomna entsá Jesúsbioye tojána*  
(Mt 19.16-30; Lc 18.18-30)

<sup>17</sup> Jesús jama tojtëtanontsé ora, canýe boyabása chábioye tojanótjajo, chabe shecutšentše tojanoshëntsamentsé, y mëntšá tbojantjá: —Tšabe Buatëmbayá, ¿ndayá šojtsemna jamana chë nýetsca tescama yomna tšabe vida jtsebomnana ca?

<sup>18</sup> Y Jesús tbojanjúá: —¿Ndáyeca “tšabia ca” šcjauyana? Tšabia nýe canýa endmëna: Bëngbe Bëtsá.

<sup>19</sup> Aca icotátšëmbo Bëngbe Bëtsá tojanmandacá: “Ndoñe catjóba, acbe shema ínÿaftaca ndoñe cattseíngñaye, ndoñe catjatbëba, ndoñe catjuaboínýena, ínÿëngbioye ndoñe catjáingñaye ndayánaca jabacama, y acbe bëtsëtsata ndoñe stëtšoye catjáquedaye ca.”

<sup>20</sup> Chora chë boyabása tbojanjúá: —Buatëmbayá, atše lempe chë mandënga básetema orscana sëndocumplina ca.

<sup>21</sup> Jesús bonshanánaca tbojanonýinýe y mëntšá tbojaníyana: —Canýe soye cmontsebuáshbena jamana: Motsa, lempe ntšamo icobomncá cochjetsatobuiye, y chë crocénana,

ndbomnjémënga cochtsatsataye; chca, celoca canye bëts bomnana cochántsebomna. Chentsana, cochjabo y şcochjuasto ca.

<sup>22</sup> Pero chë bobóntsbiöye inyetşá ibojtsínÿnana Jesús chca tbojaniyanama; y puerte ngménaca yojtá, cha puerte bomná inamna causa.

<sup>23</sup> Chora Jesús cátoye tojanrrepará y chabe uatsjéndayënga tojanëyana: —¡Puerte totcá entsemna bomnëngbiama Bëngbe Bëtsabe amëndayoye jamashënguama ca!

<sup>24</sup> Chca imojouena ora, chë uatsjéndayënga ojnanánënga imojtsemna, pero Jesús cachiñe tojanoyebuambá y mëntşá tojanëyana: —Atşbe básënga; ¡puerte totcá entsemna Bëngbe Bëtsabe amëndayoye jamashënguama!

<sup>25</sup> Ndegombre, más paselo endmëna chë coshufjentşa atëfjnëjana canye camello chauachnëngo, y ndoñe canye bomná Bëngbe Bëtsabe amëndayoye jamashënguana ca.

<sup>26</sup> Pero chë uatsjéndayënga nÿe más imojtsenjnanaye y imojtsentjanaye: —¿As, nda yochjobenaye atsbocaná jtsemnana ca?

<sup>27</sup> Chora Jesús tojanënÿanÿé y tojanëyana: —Entşanga ndoñe quemátobena jamana canÿa atsbocaná chaotsemnama, pero Bëngbe Bëtsá aĩñe; er Bëngbe Bëtsá lempe jamama endobena ca.

<sup>28</sup> Chora Pedro tbojaniyana: —Aca contsonÿá, bënga lempe chë fsëndbomna soyënga fsënjéseboshjona y ácaftaca fsëntsajna ca.

<sup>29</sup> As Jesús tojánayana: —Ndegombre cbëyana, ndánaca átşbioye jaserviama y chë tşabe noticiënga jábuayenama, tojëseboshjona chabe yebna, catşátanga o uabënanga, bebmá o befta, o básënga, o fshantsënga,

<sup>30</sup> cha mora quem luarentşe echanjóyëngacñe chama patse soye más yebnënga, catşátanga, uabënanga, bebmanga, básënga y fshantsënga, masque puerte chaosufrima ínÿënga mochántsama; y chë inÿe luarocna, chë nÿetsca tescama yomna tşabe vida echanjónÿena.

<sup>31</sup> Pero banga, mora uámanënga imomnënga, nduámanënga mochántsemna; y banga, mora nduámanënga imomnëngna, uámanënga mochántsemna ca —Jesús tojánayana.

### *Jesús cachiñe tojánayana cha jóbanama y jtayenama*

*(Mt 20.17-19; Lc 18.31-34)*

<sup>32</sup> Chentsana Jerusalenoye imojtsaye, y Jesús yojtsebnatsana. Chë uatsjéndayënga puerte ojnanánënga imojtsemna, Jesús ndauatjácá choye yojtsayama; y inÿe becá entşanga ústonoye imojtsajnëngna, imojtsayáuatja. Jesús cachiñe chabe bnëtsana uta uatsjéndayënga barie tojánachembo y tojanontşé jáuyanana ntşamo cháftaca jopásama yojtsemnana.

<sup>33</sup> Mëntşá tojanëyana: “Tşëngaftanga şmontsonÿá, Jerusalenoye bënga mora montsajnama. Chocna, chë Bëngbe Bëtsá Entşá tbojanbemá, chë bachnangbe amëndayënga y ley abuatambayëngbe cucuatşinë mochanjáboshjona, y chënga mochanjayana cha chaóbana ca; y ndoñe judiëngbe cucuatşinë mochanjáboshjona.

<sup>34</sup> Chënga mochantsáboyejuana, mochántsebuashëttoj, mochántsetjanja y mochanjóba, pero chentsana unga tianoye cha echántayena ca.”

### *Santiago y Juan, Jesús tmojanimpadá canÿe pavor cháuabiamama*

*(Mt 20.20-28)*

<sup>35</sup> Chora, Santiago y Juan, Zebedeobe uaquiñata, Jesúsbiöye tbojanobeconá y tmojaniyana: —Buatëmbayá, bëndata fsëntseboşe pavor chaşcuabiamama ntşamo chacbojaimpadacá ca.

<sup>36</sup> Y Jesús tojanatjá: —¿Ndayá şojtseboşe atşe tsëndatbiama chjamama ca?

<sup>37</sup> Y chata tbojaniyana: —Aca reycá chacojtsemánda ora, cochjaleséncia bëndata fchayobená jótbemana, canÿa acbe catşbioica y inÿa acbe uañicuayoica ca.

<sup>38</sup> As Jesús tojanějua: —Ntšamo šmotsotjanañama tsëndata ndoñe quešnátstatšëmbo. ¿Ntšamo atše chaitsesufrincá, tsëndátnaca cachcá jasúfriama tašatjobenaye? ¿Y entšanga puerte bacá chacmojtsëbuatsená ora, tašochjauánta, ntšamo atše chjauantacá ca?

<sup>39</sup> Y chata tbojanianyana: —Aíñe fchanjobenaye ca.

Y Jesús tojanějyana: —Ndegombre tsëndátnaca atšcá sochanjasúfria, y atšbe causa cmochántsamna bëtscá soyëngama jasúfria.

<sup>40</sup> Pero atše ndoñe quetsátobena jamándana nda atšbe catsbioica y atšbe uañicuayoica chaótbemama. Chë útentse entsemna ndëmuanjengbiana atšbe Taitá tojaprontacá ca.

<sup>41</sup> Chë inye bnëtsana uatsjëndayënga chca tmojanuena ora, tmojanontsé Santiago y Juánoftaca jótjayanana.

<sup>42</sup> Pero Jesús nyetsca uatsjëndayënga tojánachembo y tojanějyana: “Tšëngaftanga šmondétatšëmbo, quem luarentša amëndayënga lempe jtsemándayana, nya mo nduiñënga cuaftsemncá; y chë bëtsetsa entšanga chëngbe obenánaca jtsemándayana, ntšámnaca jtsamëse, chë inye entšanga sempre chamotsayaunanama.

<sup>43</sup> Pero tšëngaftangbeñe ndoñe chca chaondëtsemna. Inyetsá; masna, nda tšëngaftangbeñe chë más uamaná jtsemnama tojtseboše, cha bontsemna chë inyënga jtsaservénana;

<sup>44</sup> y ndánaca tšëngaftanguentsá chë más uamaná jtsemnama tojtsebošá, bontsemna jtsemnana nyetscangbiana, mo nye inyabiana nyets tempo oservenacá.

<sup>45</sup> Cachcá, Bëngbe Bëtsá Entšá tbojanbemá ndoñe chenátabo cha chamotseservénama, ndayá inyënga jabáserviana. Y mo nda, inyënga játsebacama cuafjopagacá, cha echanjóbana ba entšanga atsebácanënga chamotsemnama ca” —cha tojánayana.

*Jesús canye jtanábioye tbojanshná*  
(Mt 20.29-34; Lc 18.35-43)

<sup>46</sup> Chentšana, Jesús y chabe uatsjëndayënga Jericó uabaina pueblöye tmojánashjajna. Y Jesús chabe uatsjëndayëngaftaca y bëtscá entsángaftaca Jericó pueblentsana yojtsaisebocana ora, Timeobe uaquiñá, Bartimeo ca uabainá, canye jtaná lemošna otjanañá, benache juachañe yojtsetbemana.

<sup>47</sup> Y Jesús Nazaretocá chëjana yojtsachnëjuanama cha yojátatšëmbona ora, tojanontsé mëntšá uayebuáchana: —¡Jesús, Davídbentšana Entšá, šmotselastemá ca!

<sup>48</sup> Chorna, banga chë jtaná imojtsácacana iytëca chaótbemama. Pero cha más yojtsáyebuache: —¡Davídbentšana Entšá, šmotselastemá ca!

<sup>49</sup> Chora Jesús tojantsá y chë inyënga tojanějyana: —Chë jtaná mochembo ca.

As chë jtaná tmojanchembo, y mëntšá tmojanianyana: —¡Añemo cochtsebomna; motsbaná! Jesús cmontsechembuana ca.

<sup>50</sup> Y chë jtaná, quefsaíya jtsenátsejquëse, yojontsënja y betscó Jesúsbioye yojobeconá.

<sup>51</sup> Chora, Jesús chë jtanábioye tbojantjá: —¿Ndayá cojtseboše atše acbiana chjamama ca?

Y chë jtaná tbojanjuá: —¡Buatëmbayá, šmolesenciá atše chašuatabínynama ca!

<sup>52</sup> As Jesús tbojanianyana: —Motsatoñe. Tšabá jtsatsmënama Bëngbe Bëtsábeñe icošbuachéyeca, tšabá contsatsmëna ca.

Y cachora cha tšabá ibojtabinyna, y Jesúsbioye benachëjana ibojtsëstona.

## 11

*Jesús Jerusalenoye tojánashjango*  
(Mt 21.1-11; Lc 19.28-40; Jn 12.12-19)

<sup>1</sup> Ya Jerusalenoye imojtsebeconá ora, Betfagé y Betania pueblënga béconana, Olivos ca uabaina tjashe juachañe, Jesús uta chabe uatsjëndayata tojanichamó,

<sup>2</sup> y mēntsá tojanéyana: “Tsēndatbe natsana entsemna base pueplotémoye motsata. Chašojáshjango y cachora šochanjínýena canýe burrotema utsbuaná; chábeñe cabá ndocná tonjenojayé. Sochjuajafjoná y šochjuánatse.

<sup>3</sup> Nderado nda, ¿ndáyeca šmojtsanachá ca? chacmojátjase, šochjojuá: ‘Bēngbe Utabná bontsájaboto y chora bochantabáiseboshjona ca.’ ”

<sup>4</sup> As chata tbojána, y tbojáninýena chē burrotema tsáshenañe, canýe bēsásañe utsbuaná, y imojuajafjoná.

<sup>5</sup> Y básefta entšanga chiñe imojtsemnēnga, chátbioye tmojanéyana: “¿Ndayá šojtsama? ¿Ndayeca chē burrotema šojtsajafjná ca?”

<sup>6</sup> As chata tbojanjuá ntšamo Jesús tojanéyancá; y chē entšanga tmojanalesenciá chē burrotema chamuánatsama.

<sup>7</sup> Chentšana, chē burrotema Jesúsbioye tmojanánatse; chē burrotembeñe chatbe entšayá tbojanátatse, y Jesús chábeñe tojanenojayé.

<sup>8</sup> Bētschá entšanga chēngbe entšayá chē benachējana imojtsanētētsatsana, y ínýengna chē jajoca imojuatētsetše buacuashangá chiñe imojuacjaye.

<sup>9</sup> Y chē natsana imojtsajnēnga y chē ústonoyēnga mēntsá imojtsaiuíyebuache: “¡Bēngbe Bētsá matschuanga! ¡Corente bendición bomná, chē Bēngbe Utabnabe obenánaca tojabá!

<sup>10</sup> ¡Tša tšabá chē echanjóshjango amēndayana, bēngbe bēts taitá David yojēftsemánda orcá! ¡Bēngbe Bētsá celocá matschuanga ca!”

<sup>11</sup> Jesús Jerusalenoye tojánashjango, y Bēngbe Bētsabe bēts yebnoye tojánamashēngo. Chabe shēconana lempe yojēftserrepárase, y ya yojtseibétatana causa, chabe bnētsana uta uatsjēndayēngtafaca tojēftsanbocna, Betania puebloye.

*Jesús tojánayana canýe betiye ndoñe más chaondēshájona ca  
(Mt 21.18-19)*

<sup>12</sup> Yēfsana, Betaniocana Jerusalenoye chēnga imojtēsajna ora, Jesús tbojánishēntsena.

<sup>13</sup> Bēnocana canýe higo betiye yojinýe; as tojána jontješiyama tainashajo o ndoñe. Pero nýe tsbuanáchēnga chiñe yojinýena, chora ndoñe shajo tempo bētsemna causa.

<sup>14</sup> As Jesús chē higo betiyoye tojánayana: “¡Ndocna te más chaondēshájona entšanga chamosama ca!”

Y chabe uatsjēndayēnga imojouena ntšamo cha tojanayancá.

*Jesús, Bēngbe Bētsabe bēts yebnentsana enēnga y obuámnayēnga tojtanēbuacna  
(Mt 21.12-17; Lc 19.45-48; Jn 2.13-22)*

<sup>15</sup> Jerusalenoye tmojánashjajnentšana, Jesús Bēngbe Bētsabe bēts yebnoye tojánamashēngo, y tojanontsé chentšana jtēbuacnana chē chentše imojtsena y imojtsobuámnāñēnga. Chéntšnaca imojtsemna entšanga canýe crocénana enēnga, y chē crocénana nýe Bēngbe Bētsabe bēts yebnentsama inoservenana. Chē entšanga crocénana atrocayēngbe mesēshangá tojtsanenásatajchquēca, y chē palomatēmēnga enēngbe tšenēšēngnaca;

<sup>16</sup> y ndoñe tonjanalesenciá ndocná Bēngbe Bētsabe bēts yebnejana chē soyēnga chaotsēchnējuanama.

<sup>17</sup> Y tojanontsé entšanga mēntsá jabuátambana: “Ndegombre, Bēngbe Bētsabe uabe-mana palabrēnguiñe cha mēntsá tojánayana: ‘Atšbe bēts yebna echantsabaina nýetsca luarentša entšangbiama átšeftaca encuéntaye yebna ca’; pero tšēngtafagna atbēbanēngbe oyeniñe chē yebna šmojtsebema ca” —Jesús tojanéyana.

<sup>18</sup> Chē bachnangbe más uámana amēndayēnga y chē ley abuátambayēnga tmojántatšēmbona ntšamo yojochnēnguama; as tmojanontsé enójuabnayana ntšamo jobenayana cha jóbana, cha imojtsebiauatja causa, er nýetsca entšanga imojtsenjanayana ntšamo cha yojanabuátambana.



19 Pero yojtseibétatana ora, Jesús chabe uatsjéndayëngaftaca chë bëts pueblentšana yojesóbocñe.

*Chë higo betiye tojtsanbuashá*  
(Mt 21.20-22)

20 Yëfsana cachëse, cachëjana imojtésachnëjuana ora, tmojáninýe chë higo betiye parejo tbëtëjëngaca yojtsebuashá.

21 Chora Pedro yojenójuaboye ntšamo yojopásama; as Jesúsbioye tbojanianyana: – ¡Buatëmbayá, minýe; chë tconjayana ndocna te más tšabe betiye chaotsemnana betiye tojtsebuashá ca!

22 Y Jesús tbojanianyana: –Bëngbe Bëtsábeñe šmochtsošbuáchiye.

23 Ndegombre cbëyana, nderado nda quem tjoye tojayana, “¡chentsšana mojuaná y bëts uafjónayoye motsëshbuetše ca!” y chca tojayana ainaniñe inýetsá juabna ntjatsbomncá, y ainaniñe puerte tojtsošbuaché ntšamo tojayancá aiñe yochjochnënguama, ndegombre chca echanjochnëngo.

24 Chíyeca cbochanjáuyana, lempe ntšamo Bëngbe Bëtsáftaca chašmojtsencuénta ora chašmojtsotjanañama, ainaniñe corente šmochtsejuabnaye ya šmojóyëngacñe ca, y ndegombre chca šmochántsebmna.

25 Y Bëngbe Bëtsáftaca chašmojtsencuénta ora, šmochjenójuaboye nderado nda ndaye bacna soye tšëngaftangbiana tojamama, y cháftaca cabá etonánënga šmojtsemnëse, šmochtseperdóna; chca, Bëngbe Bëtsá, celoca endmëná, tšëngaftangbe bacna soyëngama chacmotsaperdonama.

26 Pero inýa ndoñe šmonjaperdonasna, Bëngbe Taitá, celoca endmëná, cach ndoñe tšëngaftanga quecmochátaperdonaye ca –cha tojánayana.

*Jesusbe obenana*  
(Mt 21.23-27; Lc 20.1-8)

27 Chca tojanopasá chentsšana, Jerusalenoye chënga tmojesaná. Jesús Bëngbe Bëtsabe bëts yebnëjana yojtsobuertanëntscuana, chábioye tmojanobeconá bachnangbe amëndayënga, ley abuatambayënga y chë judiëngbeñe bëtsëjemëngcá amëndayënga,

28 y mëntšá tmojantjá: –¿Ndaye deréchoca chë contsama soyënga aca cojtsama ca? ¿Chca jtsamama nda obenana tcmënjatšetá ca?

29 As Jesús tojanëyana: –Atšnaca sëntsebmna canýe soye tšëngaftanga jatjayama. Chašmojuase, átšnaca cbochjáuyana ndaye deréchoca atše chca stsama.

30 ¿Nda Juan chë Ubayaná tbojanichmó entsanga jubáyama, Bëngbe Bëtsá o entsanga? Smëyana ca.

31 Chora chënga tmojanontsé mëntšá enatsëtsnayana: “ ‘Bëngbe Bëtsá ca’ chamojuase, cha šochanjáuyana: ‘As ¿ndáyeca chë cha tmojanabuayená soyënguiñe ndoñe šmonjanošbuaché ca?’

32 Pero ndoñe quemuátobena jayanana ‘entsanga ca’.” Chca tmojánayana, er chënga entsangbiana imojánauatja, er nýetscanga imojanjuabná, Juan ndegombre Bëngbe Bëtsabe juabna oyebuambnayá yojamnana.

33 Chcasna, chënga tmojanjuá: –Bënga ndoñe queftsátstatsëmbo ca.

Y Jesús tojanëyana: –As atše cach ndoñe quechochatëyana ndaye deréchoca atše chca stsama ca.

## 12

*Chë puerte bacna trabájayëngbiana cuento*  
(Mt 21.33-46; Lc 20.9-19)

1 Chora Jesús tojanontsé cuentëngaca jabuatambana. Mëntšá tojanëyana: “Canýe entsá bëtská uvas betiyënga yojáje, y chë shëconana yojajëtja. Chë uvasëšangá

juantsëtetjiamna canÿe base luare yojajutjo; y canÿe tsbanana jebna soye yojapórma chiñe jtsashanÿama. Chentsana, inÿe trabájayënga chë jajañe yojúyentsame, y chana inÿe luaroye yojtsoñe.

<sup>2</sup> Chë uvasësangá juashacama tempo yojobuache orna, chë jajañe nduiño canÿe oservená ibojíchmua chë arréndayënga jáuyanama ntsachetsá chë nduiño ibojtsotocánama.

<sup>3</sup> Pero chëngna, cha imojishache, imojtsejantsetaye, y tondaye ntajatacá imojtichmuá.

<sup>4</sup> Chentsana, chë nduiño inÿe oservená ibojíchmua; pero chana, bestsaše imojtselisia y podesca imojtsóyenguango.

<sup>5</sup> Chentsana inÿa ibojatichmuá, y chana chë arréndayënga imojtsóba. Y bángnaca yojichamuá; pero chëngna, ínÿengna imojtsajantsetaye y ínÿengna imojtsëbaye.

<sup>6</sup> “Chë nduiño cabá canÿa ibojtsábojamna jíchmuama: cachabe bonshana uaquiñá. Cabana, cha ibojíchmua y mëntsá yojtsejuabnaye: ‘Atsbe uaquiñá cocayé mochanjóyeunaye ca.’

<sup>7</sup> Pero chë arréndayënga cha imojinÿe ora, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga, y lempe chabe otocana soyënga bëngbiama echanjoquéda ca.’

<sup>8</sup> Chcasna, cha imojishache, imojtsóba y chë uvas betiyënga jajañentsana más chcoye imojetsëtshena ca” —Jesús tojancuentá.

<sup>9</sup> Jesús chca jacuéntama tojanpochocá ora, tojánayana: “Y asna, ¿ndayá chë fshantse nduiño yochjama ca? Cha có echanjá y chë trabájayënga echanjetsëbaye, y inÿe trabájayënga chë uvas betiyënga jajañe echanjárrendaye.

<sup>10</sup> “¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntsá endayana:

Chë yebna jebuanënga tmojtsanaboté ndëtšbé,

mora chë más bëts uashacuanësentše entsejájona.

<sup>11</sup> Chë soye Bëngbe Utabná, Bëngbe Bëtsá chca tojama, y bënga chama ojnanánënga fsëntsemna ca.”

<sup>12</sup> Chora, chë bachnangbe amëndayënga y chë bëtsëjemëngcá mándayënga tmojánbošena Jesús jishachana, er chënga tmojanenótatšëmbona cha chca tojancuentá jinÿanÿiyama chënga mo chë puerte bacna trabajayëngcá imojanmënama. Pero entsangbiama imojtsauatja, chíyeca cachcá tmojanonÿá y chentsana imojtsóñënga.

### *Chë Romoca bëts mandadbiama impuesto jtsatsquëcjnyama*

*(Mt 22.15-22; Lc 20.20-26)*

<sup>13</sup> Chentsana chënga, básefta fariseunga y Heródesbe ústonënga Jesúsbioye tmojanichamó, ndayá cha tojayaniñe jisháchichiyama, as chca jtsebomnama ndaye sóyeca mandadëngbeñe cha mal jaquédana.

<sup>14</sup> Chënga tmojána y Jesús tmojaniyana: —Buatëmbayá, bënga fsëndëtatsëmbo aca ndegombre soyënga cnetsabuátambama, y ndoñe jatuenanana nÿe ntšamo entsanga tmojatichamcá, er acbiama tondaye quenatámana nda más uamaná o nduamaná tomnana; y contsabuatambá ndegombre tšabe vida jtsebomnama, ntšamo Bëngbe Bëtsá yomandacá. Chcasna, ¿tšabá tanántsemana, César, chë Romoca bëts mandadbiama bënga impuesto jtsatsquëcjnyana? ¿Fchtsatsquëcjnyaye o ndoñe ca? —chënga tmojantjá.

<sup>15</sup> Jesús yojtsetátšëmbo, chënga bacna entsanga ntšamo ndegombre tmojuabnacá ndinÿinÿayënga imojamnama; chíyeca tojanëyana: —¿Ndáyeca tšëngaftanga šmojtseboše chë sóyeca atše jisháchichiyama? Canÿe denario crocénana šmiyëboñe, atše chayobená jinÿyama ca.

<sup>16</sup> As canÿe crocénana tmojanoyé y Jesús tojanëyana: —¿Ndabe jubiá quem crocénaniñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubiá; cha chca enduabaina ca.

17 Chora Jesús tojanéyana: —Chcasna, César šmochtoyiye cha ibotocana soye; y Bëngbe Bëtsana cha ibotocana soye ca.

Y nÿetscanga chama imojenjnaná.

*Obanënga jtayenama Jesús tmojantjá*

*(Mt 22.23-33; Lc 20.27-40)*

18 Chentšana, báseftanga saduceo ca uabaina entsanga tmojána Jesús jinÿama. Chënga imojanjuabná obanënga ndocna te ntayenana ca. Chíyeca, Jesús mentsá tmojanianana:

19 —Buatëmbayá, Moisés tojéftsanabema, nderado canÿe boyá tojóbana y básenga ndoñe tonjëftsabáshejuanësna, canmëna chë uabentsá chë shémaftaca jtobouamayana, chca, chabe uabochená obanabiama básenga jtsabamnana ca.

20 Y chcase, canÿe, canÿsëfta catsátanga monjamna. Chë natsaná tonjanobouamá y tontsanóbana básenga ntjëftsabashejuancá.

21 Chentšana, chë ústona uabentsá chë shémaftaca tonjanobouamá, pero chana tontsanóbana, básenga ntjëftsabashejuancá; chë inÿe uabentsáftaca cachcá tonjanopasá.

22 Chca, nÿetsca canÿsëfta catsátangaftaca cha tonjanobouamá, pero ndocná básenga ntjëftsabáshejuanana. Y chentšana chë shembásanaca tontsanóbana.

23 Y morna, chë obanënga chamojtayena ora, ¿ndabe chë canÿsëfta catsátanguentsábe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

24 As Jesús tojanéyana: —Ntsamo Bëngbe Bëtsabe uabemana palabrënguiñe endayancá ndoñe tcmönjosertá, ni Bëngbe Bëtsabe obenanama. Chíyeca ntsamo ndoñe yondmencá šmongsichamo.

25 Er obanënga chamojtayena ora, ni boyabásenga ni shembásenga quemochatóbouamnaye, y chca, chënga mochántsemna mo celoca angelotemëngcá.

26 Y chë obanënga jtayenama, ¿Moisesbe librësañe ndoñe šmëndualía ntsamo Bëngbe Bëtsá tbojanianama, chë betiyetema yojsángbototjuana ora? Bëngbe Bëtsá mentsá tbojanianana: “Atše sëndmëna Abraham, Isaac y Jacobëbe Bëtsá ca.”

27 Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena. Tsëngaftanga canÿe ndoñe ndegombre soyiñe šmontsemna ca —tojanéyana.

*Chë más bëts uámana mando*

*(Mt 22.34-40)*

28 Chentše yojtsemna canÿe ley abuatambayá. Cha yojouena ntsamo Jesús y chënga imojtsenatsëtsnayana, y yojtsetátsëmbo Jesús tsabá tojanéjuama. As, tojanobeconá y Jesúsbioye tbojantjá: —¿Ndayá chë más bëts uámana mando yomna ca?

29 Y Jesús tbojanjuá: —Chë más uámana mando mentsá endmëna: “Israeloquënga šmochjouena, Utabná, Bëngbe Bëtsá endmëna, y nÿe canÿe Bëngbe Utabná endmëna, ndocná más.

30 Utabná Bëngbe Bëtsá cochtsebobonshana nÿets acbe ainánaca, nÿets espíritoca, nÿets juábnaca y nÿets añémoca.”

31 Y chentšana quem inÿe mándnaca: “Ndëmua entsánaca cochtsebobonshana, ntsamo cach aca cuenobobonshancá.” Ndocna mando quem uta mandama más quenatámana ca —Jesús tojánayana.

32 Chora, chë ley abuatambayá Jesúsbioye tbojanianana: —Buatëmbayá, puerte tsabá tcjayana. Ndegombre yomncá contsichamo, nÿe canÿe Utabná endmëna y ndocná más.

33 Y cha jtsebobonshánana nÿets ainánaca, juábnaca y añémoca, y ndëmua entsánaca jtsebobonshánana cachá cuenobobonshancá, puerte cuámana. Cach nÿetsá ndoñe quenatámana bayënga jtsëbánayana, ni chë uátsembona soyënga Bëngbe Bëtsá jëtschuayama ca.

<sup>34</sup> Cha n̄yets juábnaca tbojanjuama Jesús tojánin̄ye ora, tbojaninyana: —Batšatema cmontsebuáshbena jtseprontánama, Bēngbe Bētsá chacolesenciama acbe ainanentše jtsemándayama ca.

Y chentšana, ya ndocná yonjenñémua Jesús más jatstjanayama.

*¿Cristo ndabe entšábentšana yomna?*

*(Mt 22.41-46; Lc 20.41-44)*

<sup>35</sup> Jesús Bēngbe Bētsabe bēts yebnentše yojsabuátambaye ora, tojánayana: “¿Ndáyeca chē ley abuátambayēnga mondbétsichamo chē Uámana Uabuayaná Davídbentšana iuabó ca?

<sup>36</sup> Cach David, chē Uámana Espíritbe mándoca mēntšá tojánayana: Bēngbe Bētsá, atšbe Utabná Crístbioye tbonjaninyana:

atšbe catšbioica mótbema,

atšbe obenánaca, acbe uayayēnga acbe cucuatšín̄e chamoquedama chjamēntscuana ca.

<sup>37</sup> ¿Ntsámose Cristo Davídbentšana Entšá nántsemna, cach David ‘Utabná ca’ chábioye tbojtsabobuátmēse ca?” —cha tojanéyana.

Y chē bētsca entšanga, oyejuayēnga imojtsuenana.

*Jesús chē ley abuátambayēngbiama tojánayana, chēnga ndoñe tšabá montsama ca*

*(Mt 23.1-36; Lc 11.37-54; 20.45-47)*

<sup>38</sup> Mēntšánaca Jesús chēnga yojsabuátambaye: “Cuedado šmochtsebmna y ndoñe šmattsama chē ley abuatambayēngcá. Chēnga jtsogusetánana bēnēna entšayangaca jtsajnana y jtsebošana tsáshenañe entšanga n̄ya respétoca chamotsacheuanama.

<sup>39</sup> Chē judiēngbe enefjuana yebnēnguenache, chē más uámana luarēnguiñe jtsetbiámanana, y chē fiestēnguenache n̄ya quēfseroca.

<sup>40</sup> Pero chēnga, viudángbioye chē tmobomna soyēnga jtsabacayana, y entšangbe delante tšabá chamotsēnyama, y chēngbioye imojtsaíngñama ndoñe chaondētsótatsēmbuamna, Bēngbe Bētsáftaca tša jtsencuéntayana. Chē causa, Bēngbe Bētsá ín̄yēngbiama más chēnga echanjácastigaye ca” —Jesús tojánayana.

*Jesús yojsēnyaye chē crocénana quēcjnayēnga*

*(Lc 21.1-4)*

<sup>41</sup> Jesús jabuátambama tojanpochocá ora, tojanótbema Bēngbe Bētsabe bēts yebnentše, chē crocénana quēcjnayētema ndirichiñe; y chē crocénana quēcjnayēnga yojsēnyaye. Bētsca bomnēnga becá crocénana imojtsequēcjnaye.

<sup>42</sup> Chora, can̄ye viudá ndbomnējémnaca yojobeconá y n̄ye uta crocénana chētēmiñe yojaftseseGORá.

<sup>43</sup> Chora Jesús chabe uatsjéndayēnga tojánachembo chamobéconama, y mēntšá tojanéyana: “Ndegombre cbéyana, quem viudá ndbomnējema, Bēngbe Bētsabiama n̄yetscangbiama más tonjēftseseGORá.

<sup>44</sup> Chē bomnēnga chē yojsóyentšjamentšana tmonjēftseseGORá, y cabá bomnana imotsóbmñe; y chē viudana tonjēftseseGORá lempe ntsachetšá yobomncá; masque tša ndbomnējema, chē vida jtsebmnama lempe ntsachetšá yobomncá tonjēftseseGORá ca.”

## 13

*Jesús tojánayana chē Bēngbe Bētsabe bēts yebna lempe mochjánpochocama*

*(Mt 24.1-2; Lc 21.5-6)*

<sup>1</sup> Jesús Bēngbe Bētsabe bēts yebnentšana tojēftsanbocna ora, can̄ye chabe uatsjendayá tbojaninyana: —Buatēmbayá, min̄ye, jtša bēts ndētšbēnga, y tša botamana bēts yebnēnga ca!

<sup>2</sup> Chora Jesús tbojaninyana: —Tšabá cochjin̄ye tša botamana bēts yebnēnga. Pero muentše ndoñe queochaisoquéda ni mo can̄ye ndētšbé ín̄yebé juatsboye. Lempe mochantsepochóca ca.

*Ntšamo yochtsemna quem luare jopochócama te chaojtsobeco ora  
(Mt 24.3-28; Lc 21.7-24; 17.22-24)*

<sup>3</sup> Chentšana, Olivos tjashoye chënga tmojána. Bëngbe Bëtsabe bëts yebnentša ndirichiñe vojamna; y Jesús tojanótbema ora, Pedro, Santiago, Juan y Andrés iytëcana tmojantjá,

<sup>4</sup> ntšamo cha tojanayancá ntseco yochjanopásama, y chca jopásama ya tojtsobecuama entšanga chamotsetatšëmbuama, ndayá Bëngbe Bëtsá yochjanma ca.

<sup>5</sup> Chora Jesús tojanějua: “Cuedado šmochtsebmna ndocná chacmondáingñema.

<sup>6</sup> Banga mochanjabo y mochantsabíchamo chënga Jesús imomna ca. Mochántsihamo: ‘Atše chë Cristo sëndmëna ca’, y chca, ba entšanga mochanjáingñaye.

<sup>7</sup> “Entšanga tmojtsentsjanama y nderado mochjentsjámna tšëngaftanga chašmojouena ora, ndoñe šmattsauatja; er chca chaochnënguama entsemna, pero masque chca, chora chë quem luare jopochócama tempo cabá ndoñe queochátmëna.

<sup>8</sup> Canye luarentša entšanga inye luaroca entšangaftaca mochántsihamo, y canye amëndayábentša entšanga inye amëndayábioca entšangaftácnaca; ba luarënguenache fshantse echanjuangmëmana y bëts shëntsana echanjóshjango. Masque chca jasúfriase, más chcoye cabá más mochanjatssúfria.

<sup>9</sup> “Pero tšëngaftangna cach tšëngaftangbiama šmochtsantješna; entšanga cmochanjíshëche y amëndayëngbe cucuatšine cmochanjábashejuana, judiëngbe enefjuana yebnënguenache cmochanjátsetšenaye. Atšbe ústonënga bétsemna causa, mandadëngbioye y reyëngbioye cmochanjuntatse, choca, chëngbe delante ntšamo atšbiama šmotatšëmbcá chašmuayanama.

<sup>10</sup> Er entseyta, quem luare cabá ndopochóca ora, Bëngbe Bëtsabe tšabe noticiënga nyetsca luarënguentša entšangbioye chaóshjanguama.

<sup>11</sup> Y inyëngbe cucuatšine jabáshejuana chacmojtsënachá ora, ndoñe šmatsenócochinýena ntšamo chora šmochjayanama. Chora šmochjayana ntšamo Bëngbe Bëtsá yochjamcá tšëngaftanga chašmuayanama, er tšëngaftanga cánýenga ndoñe chora quešmochátoyebuambnaye, ndayá chë Uámana Espiritu tšëngaftangbiajana echantsóyebuambnaye.

<sup>12</sup> “Canye catšata cachabe catšata inyëngbe cucuatšine bochanjáboshjona chamotsóbama, y bëtsëtsanga cachëngbe básenga mochanjábashhejuana chamotsëbáyama; y chë básengna chëngbe bëtsëtsangbe contra mochántsemna y chamotsëbáyama mochanjábashhejuana.

<sup>13</sup> Atšbe ústonënga bétsemna causa, nyetsca luarënguentša entšanga cmochantsëbuayënja; pero nda nyets tempo átšbeñe ošbuachiyá totsomñe, atsbocaná echántsemna.

<sup>14</sup> “Chë Bëngbe Bëtsabe juabna oyebuambnayá Daniel, chë puerte uabouana soye quem luare jopochócama tojéftsanabema. Chë puerte uabouana soye, chca jtsemnama inýoca tšëngaftanga chašmojinýe ora (nda tojtsalía, chabosertá), šmochántsetatšëmbo chë puerte ngménana tempo tojóshjanguama; chorna, chë Judeoca chamojtsemna entšanga, batsjabengoye chamotsacheta;

<sup>15</sup> chama, nda cachabe yebnentša tsbanánoca chaojtsemna, chocana ndoñe chaondëtamashëngo tsoicana ndayá jesábocnama;

<sup>16</sup> y nda jajoca chaojtsemna, yebnoye ndoñe chaondëta ni mo chabe quëfsáiya jesácñama.

<sup>17</sup> ¡Tša lastema chë tempo ngomámanënga o ochóchaye šëšonga chamojtsabamna shembásengbiama!

<sup>18</sup> Bëngbe Bëtsá šmochtseimpadana chë ngménana tempo ndoñe chaondóshjango uaftena tempo ora,

<sup>19</sup> er chora puerte ngmenancá echántsemna. Tša jabuache ngmenancá, quem luare jobojátšama orscana y mëntscoñama y más chcoye, cachcá ngménana ndoñe ntjamnana.

<sup>20</sup> Chë puerte ngménana tempo, yapa bën ndoñe chaondëtsemnana Bëngbe Bëtsá ndoñe tonjalesenciase, ndocná quentatsbocá; pero cha, chabe ubuáyanënga, chabe bocacánënga corente endábabuanÿeshanayeca, echanjama yapa bën tempo ndoñe chaondëtsemnana.

<sup>21</sup> “Chora nderado nda chacmojáuyana: ‘Minÿe, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana.

<sup>22</sup> Er mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëts soyënga chëngbe obenana jinÿanÿiyama, entšanga jáingñama, y tmojobenase, chë Bëngbe Bëtsabe bocacánëngnaca.

<sup>23</sup> ¡Cuedado šmochtsebomna! Cabá chca ndochnëngo ora, lempe tcbonjabuayená ca” —Jesús tojanëyana.

*Bëngbe Bëtsá Entšá tbojanbemá quem luaroye echanjésabo  
(Mt 24.29-44; Lc 21.25-36)*

<sup>24</sup> Mëntšánaca Jesús tojanëyana: “Pero chë tempo, entšanga puerte chamojasufrí chentšana, shinÿe ndoñe queochátsbuashinÿinÿana, juashcona ndoñe queochátsbinÿnaye,

<sup>25</sup> celocana estrellënga echanjatquécjana, y quem luarentša tsbanánoca espíritënga obenana bomnënga echanjángmëmana.

<sup>26</sup> Y chora, entšanga mochanjinÿe, Bëngbe Bëtsá Entšá tbojanbemá jantšetëshiñe echántsaboye, corente obenánaca y corente buashinÿinÿaniñe.

<sup>27</sup> Chora cha chabe angelënga echanjámëndaye chë Bëngbe Bëtsabe ubuáyanënga júbuajama, nÿets luarëngocana, quem fshantsoca cánÿoica juachoicana, celoca ínÿoica juachóntscoñe.

<sup>28</sup> “Chë higo betiyama šmochjuatsjinÿe: Tsëm buacuafjënga tojtsebomna ora y tojtsaisëjotsana, jtsotatsëmbuana chë tšabe tempo ya tojtsaisobecuama.

<sup>29</sup> Cachcá, chë soyënga ndayama tšëngaftanga tcbonjauyancá chašmojinÿe ora, šmochántsetatsëmbo Bëngbe Bëtsá Entšá tbojanbemá ya jésabama yojtsemnana.

<sup>30</sup> Ndegombre cbëyana, lempe chca echanjochnëngo, morsca entšanga cabá ndóbana ora.

<sup>31</sup> Celoca y quem luare echanjopochóca, pero atšbe palabra ndocna te queochaisopochóca.

<sup>32</sup> “Pero Bëngbe Bëtsá Entšá tbojanbemá ndayté y ntseco ora yochjésabama, ndocná quenátstatsëmbo, ni chë celoca angelënga, ni Bëngbe Bëtsabe Uaquiñá. Nÿe chë Taitá chama yotátšëmbo.

<sup>33</sup> “Chíyeca, cuedado šmochtsebomna y yejuana šmochtsantješna, er ndoñe quešmátstatsëmbo mocna ora yochtsemna Bëngbe Bëtsá Entšá tbojanbemá jésabama tempo.

<sup>34</sup> Echántsemna mo canÿe entšacá; chana inÿe luaroye ya jëftsebocnama ora, chabe oservënënga jëftsamëndana chabe yebna chamotsinÿenama. Cada ona canÿe trabajo jëftsebónÿiyana, y chë shanÿá jëftsemándana botamana chaotsantješnama.

<sup>35</sup> Chcasna, cuedado šmochtsebomna, šmochtsantješna, er ntšamo chë trabajayëngcá chë yebna nduiño ntseco jtashjanguama, ndoñe ntsetatsëmbuana, mo nderado jétatana, tsëntseto ora, bínÿanoye o cachëse, tšëngaftanga cachcá, Bëngbe Bëtsá Entšá tbojanbemá ntseco jésabama ndoñe quešmátstatsëmbo;

<sup>36</sup> ndoñe cuedado šmontsebomnëse, nderado cha nÿe ndeolpe nántashjango, tšëngaftanga ndëprontánënga šmojtsemna ora, mo ftsomañe cuenta.

<sup>37</sup> Chíyeca, ntšamo tšëngaftanga cbochanjauyancá, nÿetscanga chanjáuyana: ¡Puerte cuedado šmochtsebomna ca!” —Jesús tojánayana.

## 14

*Entšanga imojtsejuabnaye ntšamo jamëse Jesús jishachama  
(Mt 26.1-5; Lc 22.1-2; Jn 11.45-53)*

<sup>1</sup> Bashco fiestama uta te yojetsájamna, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama fiesta, chë levadúraca ndëpormana tandëse say-ora. Chë judiëngbe bachnangbe amëndayënga y chë ley abuátambayënga imojtsenguaye ntšamo Jesús jishachana jtseíngñase, y jtsóbama.

<sup>2</sup> Báseftanga imojtsichamo: “Quem fiestëntscuana ndoñe, er nderado entšanga yapa muanjóntša enbouenanana ca.”

*Canye shembása botamana uanguëtse béjaye Jesusbe bestšasiñe tbojanbuešcja  
(Mt 26.6-13; Jn 12.1-8)*

<sup>3</sup> Jesús Betanioca yojtsemna, Simón chë bacna nguayanánaca šocá ca uabobuatmabe yebnentše; mesëshentše Jesús yojtsemna ora, canye shembása tojánashjango. Chë shembása yojúshjango canye alabastro jarrëtema jútjena canye becá uámana y botamana uanguëtse béjaye, ena nardana uanguëtšiyë; chana chë jarrëtema yojátsba y chë béjaye Jesusbe bestšasiñe tbojanbuešcja.

<sup>4</sup> Chca tmojáninyë ora, báseftanga chentše imojtsemnënga tmojanotjayaná y mëntšá imojtsenatsësnaye: —¿Ndáyeca nyë bonamente chë soye yojtsemna ca?

<sup>5</sup> Chamna, matmënjobenanga chë béjaye unga patse denario crocenánama juiyana, y chánaca ndbomnjëmënga matmënjújabuache ca.

Y chë shembásabiamá podésca imojtsichamo.

<sup>6</sup> Chora Jesús tojanéyana: —¿Ndáyeca quem shembása ndoñe cachcá šmochanjonyë ca? ¡Ndocá matatsana! Atšbiamá tšabe soye tonjama.

<sup>7</sup> Er ndbomnjëmënga nyëts tempo tšëngaftangbeñe mochanjëftsemna, ndayténaca šmojábošena ora, šmatjobenaye tšabe soye chëngbiamá jamana; er atše tšëngaftangaftaca ndoñe nyëts tempo quichásemna.

<sup>8</sup> Quem shembása lempe ntšamo tojobenacá atšbiamá tonjama. Chca tonjama ora, atšbe cuerpo tonjaprontá atše juatbontsa tescama, cabá ndoñe obaná sëntsemna ora.

<sup>9</sup> Ndegombre chéyana, quem luaroca ndayéntšnaca Bëngbe Bëtsabe tšabe noticiënga chamojtsabuayiyná chentše, ntšamo quem shembása tojamámnaca becá mochanjëftsóyebuambaye, chca, entšanga chabiamá chamotsenójuabnama ca —cha tojanéyana.

*Judas tojána bachnangbe amëndayëngbioye, Jesús chamuishachama  
(Mt 26.14-16; Lc 22.3-6)*

<sup>10</sup> Chentšana, Judas Iscariote, canye chë bnëtsana uta uatsjendayënguentšá, tojána chë bachnangbe amëndayëngaftaca jencuéntama, Jesús chëngbe cucuatšiyë jaboshjonama.

<sup>11</sup> Chca tmojanuena ora, chënga imojóyejuaye y tmojanšbuachená crocénana jtabuényana. Y cach orscana Judas yojtsenguaye ntšamo jamana y ndëmua ora, Jesús chëngbe cucuatšiyë jaboshjonana.

*Jesús chabe uatsjendayëngaftaca Bashco saná tojanse  
(Mt 26.17-29; Lc 22.7-23; Jn 13.21-30; 1 Co 11.23-26)*

<sup>12</sup> Chë Bashco fiesta bojatšenté, chë levadúraca ndëpormana tandëse sayté, chë uatsjendayënga Jesús tmojantjá: —¿Ndëmoca cojtseboše bënga fchaiprontama, Bashco saná chacosama ca?

Chca te chë judiënga imojanamana, Bëngbe Bëtsá jëtschuayamna canye oveshá jóbana chora jasama, chë Egiptocana chëngbe bëts taitanga Bëngbe Bëtsá tojánatsebacama jtenójuaboyama.

<sup>13</sup> As Jesús uta chabe uatsjendayata tojanichamó y mëntšá tojanéyana: —Chë bëts puebloye motsata. Chašojáshjango ora, canye bacó cmochanjóbiatše, matbajiñe

búyeshe echantsabuyambaye; cha šochjuasto y šochtserreparana ndëmuanyë yebnentše yochjámashënguama;

<sup>14</sup> y chë yebna nduiño šochjauyana: “Buatëmbayá tonjayana: ¿Ndayentše chë tsañe yojtsemna, Bashco saná atše atšbe uatsjëndayëngaftaca jasama ca?”

<sup>15</sup> As cha cmochanjínÿanÿiye canÿe bëts tsañe, tsbanana pisoca, lempe prontániñe; chentše šochjaprónta bënga mochjasama ca.

<sup>16</sup> As chë uatsjëndayata tbojána y tbojáninÿena lempe ntšamo Jesús tojanëyancá; y chentše chë Bashco saná tbojanprontata.

<sup>17</sup> Tojanibétata ora, Jesús chë yebnoca tojánashjango, chabe bnëtsana uta uatsjëndayëngaftaca.

<sup>18</sup> Y mesëshentše imojtsesaye ora, Jesús tojanëyana: —Ndegombre cbëyana, canÿa tšëngaftanguentsá, átšeftaca entsesá cha, uayayëngbe cucuatšinë šochanjáboshjona ca.

<sup>19</sup> Chorna chë uatsjëndayënga ngménaca imojtsemna, y tmojanontšé canÿánÿa cha jatjayana: —¿Atše chtsemna ca?

<sup>20</sup> Y Jesús tojanëjua: —Canÿa chë bnëtsana utatentsá entsemna. Chabe tandëse cach atše sëntsefchecuacná šcnenentše cha entsefchecuacná.

<sup>21</sup> Ndegombre, Bëngbe Bëtsá Entšá tbojanbemáftaca echanjopása ntšamo chabiama Bëngbe Bëtsabe uabemana palabrenguiñe endayancá. Pero, itša lastema chë bochjáboshjonabiamal Chabiama más tšabá manjamna ndoñe ntjónÿnana ca —Jesús tojánayana.

<sup>22</sup> Imojtsesantscuana, tandëse tojanca, Bëngbe Bëtsábioye chama tbojtanchuá, tojanjataye y chabe uatsjëndayënga tojanëjatá, y mëntšá tojánayana: “Mocñënga, mosënga, atšbe cuerpo entsemna ca.”

<sup>23</sup> Chentšana, canÿe coptema vínoyeca tojanaca, Bëngbe Bëtsábioye tbojtanchuá, chabe uatsjëndayënga tojanëfšasé, y nyetscanga tmojanofšé.

<sup>24</sup> Mëntšá tojánayana: “Quem vínoye atšbe buiñe entsemna. Atšbe buiñe echanjuábuashana entsanga chamotsetatšëmbuama ntšamo Bëngbe Bëtsá entsanga tojašebuachenacá ndegombre yochjochnënguama. Chë buiñe bëtská entsangbe tšabiamama echanjuábuashana.

<sup>25</sup> Y ndegombre cbëyana, morscana ya ndoñe más chë uvasësentšana obocniye quichaisofšiyë. Chë tsëm vínoye tšëngaftangaftaca chanjofšiyë, Bëngbe Bëtsabe amëndayoca chamojtsemna ora ca” —tojánayana.

*Jesús tojánayana, chábioye ndoñe bonjanabuátma ca Pedro yochjánayanama (Mt 26.30-35; Lc 22.31-34; Jn 13.36-38)*

<sup>26</sup> Bëngbe Bëtsábioye jëtschuayama tmojancantá chentšana, Olivos tjashoye tmojëftsanbocana.

<sup>27</sup> Jesús tojanëyana: —Nyetsca tšëngaftanga quem ibeta átšbeñe ošbuáchiyana šmochantsobuetše y šmochántacheta, er Bëngbe Bëtsabe uabemana palabrenguiñe, cha mëntšá tojánayana: “Chë oveshënga abujénÿa chanjóba y chë oveshënga mochantsáshana ca.” Chca tšëngaftangaftaca echanjopása, uayayënga chašmojishache ora.

<sup>28</sup> Pero obanënguentshana chaitayenentsana, tšëngaftangbe natsana Galileoye chanjá ca —cha tojanëyana.

<sup>29</sup> Chora Pedro tbojanianyana: —Masque nyetscanga ácebeñe ošbuáchiyana chamotsobuetše y chamotsacheta, atše nÿa ndocna te ca.

<sup>30</sup> Chora Jesús tbojanianyana: —Ndegombre cbëyana, cam ibeta, ngallo cabá uta soye ndëcánta ora, aca unga soye cochanjayana ndoñe šconduabuatma ca.

<sup>31</sup> Pero Pedro más yojtsichamo: —Masque chašotsemna ácaftaca jóbanama, atše ndoñe quichátayana ndoñe cbonduabuatma ca.

Y nyetscanga cachcá imojtsichamo.



*Getsemaní luarentše Jesús, Běngbe Bětsáftaca tbojanencuentá*  
(Mt 26.36-46; Lc 22.39-46)

<sup>32</sup> Chentšana, canye luare Getsemaní ca uabáinoye tmojána. Chocna Jesús tojaněyana: “Muentše motbiana, chěntscuana atše choye chanjá, Běngbe Bětsáftaca jencuéntama ca.”

<sup>33</sup> Y tojěftsanébiatše Pedro, Santiago y Juan. Choca cha yojóntša puerte ngménaca jtsemnama y corente cochtsetšenaná.

<sup>34</sup> Chěngbioye tojaněyana: “Atsbe ainana puerte ngménaca entsemna, mo jobanamcá. Muentše moquedanga y šmochtsefšna ca.”

<sup>35</sup> Chentšana, Jesús más natsanoye tojána, tojanoshěntsamentšé y fshantsóntscoca tojanotsejbéna y Běngbe Bětsábioye tbojanimpadá, jopódianěse, chě tša japadésa ora ndoñe chaondóshjanguama.

<sup>36</sup> Měntšá yojtsichamo: “Atsbe Taitá, aca lempe jamama condobena; tojopodese, cochjama atše japadésama ndoñe chašondětsemnama. Pero ntšamo atše stseboščá ndoñe chaondětsemna, sinó ntšamo aca cojtseboščá ca.”

<sup>37</sup> Chentšana, chabe unga uatsjédayěngbioye tojtanabo, y chěngna imnětsomañe. Chca tojánanyena ora, Pédrěbioye tbojanianyana: “Simón, ¿cotsomañe? ¿Ni mo nye canye hora jtsefšnama ndoñe tconjobená?

<sup>38</sup> Smochtsefšna y Běngbe Bětsáftaca šmochtsencuéntaye, bacna soye jamama ndoñe chacmondócochěnguama. Tšěngaftanga ndegombre šmontseboše espíritoca Běngbe Bětsá joyeunayana, pero cuerpiñe ndoñe añemo quešmátsbomna ca.”

<sup>39</sup> Jesús cachiñe tojesaná y Běngbe Bětsáftaca tbojanencuentá, cach palabrěnga jayaněse.

<sup>40</sup> Yojtabo orna, chě uatsjédayěnga cachiñe imnětsomañe; chěnga imojtsefshétana ocnaye causa, y ndoñe imontsobena ntšamo jojuana.

<sup>41</sup> Chentšana, tojttesaná y tojtanabo ora tojaněyana: “¿Cabá šmotsomañe y šmotsochnañe? Nye nyetšá; hora tojjobuache, Běngbe Bětsá Entšá tbojanbemá bacna soye aměngbe cucuatšine mochanjáboshjona.

<sup>42</sup> Motsbananga, cuajna. Minyěnga, atše boshjuaná ya entsebeconá ca.”

*Uayayěnga Jesús tmojánishache*  
(Mt 26.47-56; Lc 22.47-53; Jn 18.2-11)

<sup>43</sup> Jesús cabá yojtsóyebuambnantscuana, Judas, canye chě bnětsana uta uatsjédayěnguentšá, tojánashjango y cháftaca ba entšanga espadějangaca y ngarotbėngaca prontáněnga. Chěnga imojamna chě bachnangbe aměndayěnga, ley abuátambayěnga y judiěngbeñe bětsějēměngcá mándayěngbe ichmóněnga.

<sup>44</sup> Judas, chě boshjuaná, tojanjuabó ntšamo jamana entšanga jinyaněiyama ndēmua Jesús bětsemnana. Chíyeca, yojáuyana: “Nda chaijauámocho, cha echántsemna; šmochjishache y cuedádoca šmochjuánatse ca.”

<sup>45</sup> Chcasna, Judas Jesúsbioye tojanobeconá y tbojanianyana: “¡Buatěmbayá ca!”

Y tbojanámocho.

<sup>46</sup> Chora chě entšanga tmojánishache y tmojanánatse.

<sup>47</sup> Pero canya chentše Jesúseftaca yojtsemná, chabe espaděja yojenosěngbotěntšena, y chě bachnangbe más uámana aměndayabe oservená canye matscuaše tbojtsaněštjango.

<sup>48</sup> Y Jesús chě entšanga tojanatjá: “¿Ndáyeca šmojabo espadějangaca y ngarotbėngaca atše jishachama, mo atše canye bacá uamana entšá cuaftsemncá ca?”

<sup>49</sup> Atše cada te tšěngaftangbeñe sěndětsemna Běngbe Bětsabe běts yebnoca abuátambaye, y ndocna te choca chešmátanishache. Pero tšěngaftanga chca átseftaca šmontsama, cachcá ntšamo Běngbe Bětsabe uabemana palabrěnguiñe endayancá chaotsemnama ca” —tojánayana.

<sup>50</sup> Chorna, n̄yetsca uatsjéndayēnga tmojtsanēuatjaná y tmojtsanacheta, y Jesús cachcá chē uayayēngaftaca tmojesanonjá.

<sup>51</sup> Can̄ye bobontse Jesúsbioye ibojtsēstona, n̄ye can̄ye uafjantse ents̄ējua uichētjoná. Cha chē ents̄anga tmojánishache,

<sup>52</sup> pero chēngbe cucuats̄iñe chē ents̄ējua jesáboshjonēse, chē bobontsna enasá yojtsachá.

*Jesús tmojanánatse chē judiēngbe uámana amēndayēngbioye  
(Mt 26.57-68; Lc 22.54-55, 63-71; Jn 18.12-14, 19-24)*

<sup>53</sup> Chents̄ana, Jesús tmojanánatse chē bachnangbe más uámana amēndayábioye; y chocna, n̄yetsca chē bachnangbe amēndayēnga, bēts̄ejemēngcá amēndayēnga y ley abuátambayēnga tmojánenefjna.

<sup>54</sup> Pedro bēnocana Jesús tbojanasto, chē bachnangbe más uámana amēndayabe yebnents̄a chashjónscoñe; y chent̄se tojanoquedá. Chē Bēngbe Bēts̄abe bēts̄ yebnoca josticiēngaftaca yojtsetbemana; iñe juachaca yojtsešbonena.

<sup>55</sup> Chē bachnangbe amēndayēnga y chē judiēngbe uámana mándayēnga imojtsenguaye can̄ya, nda ndayánaca Jesusbe contra cháuyana, as jobenayama cha chaóbana ca jayanama; pero ndoñe montsanin̄yana.

<sup>56</sup> Er masque banga Jesusbe contra uayátsenaye soyēnga imojtsichamo, n̄yetscanga ndoñe cachcá soye montsanichamo.

<sup>57</sup> Báseftanga imojtsaye y mēnts̄á Jesusbe contra, ndoñe ndegombre betsemncá tmojánayana:

<sup>58</sup> “Bēnga cha fsēnjoyeuná mēnts̄á: ‘At̄se quem Bēngbe Bēts̄abe bēts̄ yebna, ents̄angbe pormana yebna, chantsepochóca; y unga tese in̄ye Bēngbe Bēts̄abe bēts̄ yebna, ents̄ángbeyeca ndēpormana yebna chanjēts̄jebo ca.’ ”

<sup>59</sup> Pero masque chca imojtsichamo, n̄yetscanga ndoñe cachca soye montsanichamo.

<sup>60</sup> Chorna, chē bachnangbe más uámana amēndayá yojtsbaná, n̄yetscangbe tsēnts̄aca yojtsaye, y Jesúsbioye tbojant̄já: —¿Ndocá cochanjayana? ¿Ndayase yojtsemna chē acbe contra montsichamo soye ca?

<sup>61</sup> Pero cha n̄ye iytēca yojtsemna y ndocá ibontsējuana. Chē bachnangbe más uámana amēndayá cachiñe tbojtētant̄já, mēnts̄á: —¿Aca chē Cristo icomna, Bēngbe Bēts̄á chē nda fsēndadoranabe Uaquiñá ca?

<sup>62</sup> Y Jesús tbojanjuá: —Arseñor, at̄se cha sēndmēna; y tsēngaftanga šmochanjin̄ye, at̄se, Bēngbe Bēts̄á Ent̄s̄á tbojanbemá, chē n̄yets obenana bomnabe cats̄bioica chantsetbemana, y celoca jant̄setēshiñe chántsaboye ca.

<sup>63</sup> Chora, chē bachnangbe más uámana amēndayá chabe uichētjonējuangá yojtsenánt̄sajatanēca, puerte ibojtsetna causa, y tojánayana: —¿Ndayama más ents̄anga šochjátējaboto Jesusbe contra chamuayanama ca?

<sup>64</sup> Tsēngaftanga šmonjouena nt̄samo chē ents̄á ents̄ichamcá, y chca Bēngbe Bēts̄abiana entsemna mo cha cuafjoyenguangcá, chē chabe Uaquiñá yomna ca cha tonjayana ora. ¿Nt̄samo tsēngaftanga šmatjayana ca? —cha tojanéyana.

Y n̄yetscanga tmojánayana, cha ndegombre bacna soye yojtsebmna y jóbanama ibojtsemna ca.

<sup>65</sup> Chorna báseftanga tmojanont̄sé Jesús buashētjnayana; jubiá imojútsbotse, imojtsetant̄setaye y imojtsetjanaye: “¡Momalisiá nda tcmēnjant̄setá ca!” Y chē Bēngbe Bēts̄abe bēts̄ yebnoca josticiēngna imojtsajuebant̄setaye.

*Pedro tojánayana Jesúsbioye ndoñe bonjanabuátma ca  
(Mt 26.69-75; Lc 22.56-62; Jn 18.15-18, 25-29)*

<sup>66</sup> Pédrēna, tsmanoca yojtsemna chashjoca. Chora, can̄ye shembása, chē bachnangbe más uámana amēndayabe oservená yojáshjango;

<sup>67</sup> y Pédrëbioye tbojáninÿe ora, cha iñe juachaca yojtsansbonena, yejuana ibojonÿinÿiye y tbojaniana: —Acnaca, Jesús Nazaretocáftaca conjánana ca.

<sup>68</sup> Pero Pedro tojánayana chábioye ndoñe bonjanabuátma ca; y mëntśá tojánayana: —Ndayama cojtsichámuama ndoñe quetsátstatšëmbo, ni quešnátësertana ca.

Y shjoye, amashjuanóntscoñe yojábocna; y chora canÿe ngallo yojacánta.

<sup>69</sup> Chë oservená cachiñe Pédrëbioye tbojáninÿe y tojanontśé chë ínÿenga jauyanana: —Muánaca Jesusbe uatsjendayënguentsá entsemna ca.

<sup>70</sup> Pero chana cachiñe tojánayana Jesúsbioye ndoñe bonjanabuátma ca. Chentšana, chë chentše imojtsemnënga Pedro tmojátaniyana: —Ndegombre aca chënguentsá contsemna; ácnaca Galileocá contsemna ca.

<sup>71</sup> Pero Pedro tojanontśé ichámuana: —¡Bëngbe Bëtsá chašotsecastigá ndoñe ndegombre soye stsichámëse ca! —y yojóntśa júrayana— ¡Atše chë entśá ndoñe quetsatabuatma, ndabiana tšëngaftanga šmontsatsëtsná ca!

<sup>72</sup> Y cachora chë ngallo uta soyama yojacánta, y Pedro yojenójuaboye ntšamo Jesús tbojanianama: “Ngallo cabá uta soye ndëcánta ora, aca unga soye cochanjayana ndoñe sconduabuatma ca.” Y tojanontśé enóbošachiyana.

## 15

### *Jesús Pilátbioye tmojanánatse*

(Mt 27.1-2, 11-14; Lc 23.1-5; Jn 18.28-38)

<sup>1</sup> Tojanbinÿna ora, chë bachnangbe amëndayënga, chë judiëngbeñe bëtsëjemëngcá amëndayënga y ley abuatambayënga cánÿentše tmojánenefjna, nÿetsca chë luarentśa más uámana mandayëngaftaca, jenóyeunayama ntšamo jamëse Jesús jóbama. Jesús tmojanëcuébatśe ca y tmojanánatse, y Pilato, chë Judeoca mandadbe cucuatśiñe tmojánboshjona.

<sup>2</sup> Pilato Jesúsbioye tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

<sup>3</sup> Chë bachnangbe amëndayënga bëtscá soyënga Jesusbe contra imojtsichamo;

<sup>4</sup> chíyeca Pilato cachiñe Jesúsbioye tbojantjá: —¿Ndocá šcochanjojuá ca? Minÿe; bëtscá soyënga acbe contra montsichamo ca.

<sup>5</sup> Pero Jesús ndoñe más tbonjanjuá; chë causa, Pilato ndoñe yontsetátśëmbo ntšamo jajuaboyana.

### *Jesús chaóbana ca tmojánayana*

(Mt 27.15-31; Lc 23.13-25; Jn 18.38-19.16)

<sup>6</sup> Cada Bashco fiesta ora, Pilato yojanamana canÿe utamená jëtsboshjonana, ndánaca entšanga tmojuabuayaná.

<sup>7</sup> Chë tempo yojamna canÿa Barrabás ca uabainá; cárceloye inautámëna chabe enutëngaftaca. Chëngna entšanga tmojtsanëbaye, mandadëngbe entšángaftaca imojentsjaná ora.

<sup>8</sup> Chora, entšanga tmojánashjajna y tmojanontśé Pilátbioye jauyanana, ntšamo Bashco fiesta ora jamama yojanamancá chaomama.

<sup>9</sup> Y Pilato tojanëjua: —¿Tšëngaftanga šmojtseboše tšëngaftangbe rey atše chjëtsboshjona ca?

<sup>10</sup> Chca tojánayana, er Pilato yojtsetátśëmbo, chë bachnangbe amëndayëngna envidia causa Jesús chabe cucuatśiñe tmojánboshjonama.

<sup>11</sup> Pero chë bachnangbe amëndayëngna entšanga tmojanañemó chamuenbouénanama, Pilato jauyanama chëngbiana Barrabás chabuatsboshjona ca.

<sup>12</sup> Y Pilato tojanatjá: —¿Y ntšamo chjama chë “judiëngbe Rey ca” šmondubobuatmáftaca ca?

<sup>13</sup> Y chënga tmojanáyebuachena: —¡Motsecrucificá ca!

14 Y Pilato entšanga tojanéyana: —¿Ndáyeca? ¿Ntšamo cha tojobuachjanguá ca?

Pero chëngna más añémoca tmojtétanayebuachena: —¡Motsecrucificá ca!

15 As Pilato, entšángaftaca tšabá joquédama yojtsebóseyecna, Barrabás tbojtanboshjona. Yojámëndaye soldadënga jabuache Jesús chamotsetšenama; y chentšana soldadëngbe cucuatšinë tbojánboshjona, chamocrucificama.

16 Chentšana, chë soldadënga Jesús tmojanánatse chë mandadbe bëts yebnentša chashjoye, y nyetsca soldadënga tmojánachembo chamobéconama.

17 Shbuenda uafjatsenga uinýna entšayá mo reycá tmojanichëtjo; canýe coronësha tmojanapormá uchmašëfjangaca y tmojanabestšajó.

18 Y chentšana tmojanontšë jachuayana: “¡Bayté judiëngbe Rey cochtsemna ca!”

19 Canýe niñëfjaca Jesús bestšašinë imojtsëtsjanjnaye, imojtsebuashëtjnaye, y chabe delante imojtsofshëntsaméntšenaye.

20 Y chca imnaftsaáboyejuanentšana, chë shbuenda uafjatsenga entšayá tmojtsanabotsca y cachabe entšayá tmojtanichëtjo, y pueblo chaboye tmojanánatse jacrucificama.

### *Jesús tmojan crucificá*

*(Mt 27.32-44; Lc 23.26-43; Jn 19.17-27)*

21 Chora, canýe entšá chëjana yojsatashjajuana, Simón ca uabainá, Cirene pueblóca, Alejandro y Rufbe taitá; jajocana yojsatachnëjuana; y chë soldadëngna imojuatária Jesusbe cruz jëftsocutsayama.

22 Jesús tmojanánatse Gólgota ca uabaina luaroye (hebreo biyañe endayana “Obanabe Bestšashe Luare ca”);

23 y tmojanabuiyé vínoye mírraca enájuañiye, pero Jesús ndoñe yonjuáyëngacñe.

24 Y chentšana tmojan crucificá; y chabe entšayangamna, tsbanánoye tmojanëtšena jinýama ndayá cada ona yochjëftsanácnama.

25 Cachëse, base mošenana ora Jesús tmojan crucificá.

26 Y chabe bestšaše juatsboicna canýe uabemana soye tmojananjo. Chiñe yojétsayana ndáyeca cha tmojan crucificama, mëntšá: MUA CHË JUDIËNGBE REY ENDMËNA ca.

27 Y cháftaca útata bacna soye ochjajnayátnaca tmojanacrucificá, canýa chabe catsbioica, y ínýana chabe uañicuayoica.

28 Chca cháftaca tmojanma, chaochnënguama ntšamo Bëngbe Bëtsabe uabemana palabrënguiñe chabiamá iuayancá, mëntšá: “Y chábioye tmonjáninýe mo chë puerta bacna soye amënguentšá canýa cuaftsemncá ca.”

29 Y chëjana imojtsachnëjuana entšanga, Jesús imojtsóyenguaye, imojtsobestšfshanenaye y imojtsatsaye: “¡Aca chë Bëngbe Bëtsabe bëts yebna cochtsánenasatajchca y nýe unga tese cochtanjebo,

30 cach aca mentsbocá y cruzocana matastjango ca!”

31 Cachcá chë bachnangbe amëndayënga y chë ley abuátambayënga imojtsáboyejuana, y chënga imojtsenatsëtsnaye: “Cha ínýenga tojëftsatsebacá, pero cachá jénts bocama ndoñe quenátobena.

32 ¡Chë Cristo, chë Israelóca Rey! ¡Cruzocana chauatastjango, bënga jinýama y chábeñe chaftsošbuachema ca!”

Y cháftaca ibojtsecrucificanátnaca ibojtsóyenguaye.

### *Jesús tojanóbana*

*(Mt 27.45-56; Lc 23.44-49; Jn 19.28-30)*

33 Nyetsto orscana y las tresëntscoñe, nyets quem luare yojtseibétata.

34 Chca orna, Jesús chabe biyañe tojanáyebuachena: “Eloi, Eloi, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonýa ca?”)

35 Chca tmojanuena ora, báseftanga chentšë imojtsemnënga imojtsichamo: “Mouenënga, chë Bëngbe Bëtsabe juabna oyebuambnayá Elías bontsechembuana ca.”

<sup>36</sup> As chora, canya tojanótjajo, untja vínoyeca canye esponjéshe tojanfchecuacua, canye niñefjiñe tojananguésétjo y Jesúsbioye tojanbeconá chaofšema; y tojánayana: “Cachcá mochjonýaye, er Elías tayochjabo jabátéstjanguama ca.”

<sup>37</sup> Pero Jesusna, jabuache tojanoyó y tojanóbana.

<sup>38</sup> Y chë Bëngbe Bëtsabe bëts yebnoca yojújonýana entsějua tsëntsaca yojtsenájataye, tsbanánocana fshantsoye. Chējua bënëjua inauamna y chë tsatsëntsaca inaújonýana.

<sup>39</sup> Chë romano soldadëngbe amëndayá, Jesusbe ndirichiñe yojtsemna; y ntšamo cha tojanobancá tbojáninýe ora, tojánayana: “¡Ndegombre quem boyabása Bëngbe Bëtsabe Uaquiñá yomna ca!”

<sup>40</sup> Básefta shembásengnaca chentše imojtsemna, bënocana imojtserreparana; chënguentše imojtsemna María Magdalena; María, Santiago chë más basa y Josebe mamá; y Salomé.

<sup>41</sup> Chë shembásengna Jesús tmojanasto y tmojanájabuache cha Galileoca yojamna ora; y inýe ba shembásengnaca chentše imojtsemna, chë cháftaca Jerusalenoye tmojánanga.

### *Jesús tmojanatbontsá*

*(Mt 27.57-61; Lc 23.50-56; Jn 19.38-42)*

<sup>42</sup> Chë yëfsana ochnayté yojtsémnayeca, cach te yojánamna saná japróntana chë yëfsana jasama. Ya yojtseibétatana ora,

<sup>43</sup> Pilato yojtsemnoye tojána canye boyabása, José ca uabainá, Arimatea pueblócá; cha inamna canye chë luarentša uámana mandayënguentsá. Cha Bëngbe Bëtsabeñe yojtsošbuáchiye y yojanobátmana chabe amëndayana chaóshjanguama. Ndauatjá Pilátbioye Jesusbe cuerpo tbojanotjañe.

<sup>44</sup> Pilato yojenjaná Jesús tša betsko yojóbanama; as tojanmandá chë soldadëngbe amëndayá chamuachembo, jatjayama Jesús ya bën obaná tayojétsemnama.

<sup>45</sup> Chë soldadëngbe amëndayana Pilátbioye ibojauyana Jesús ya obaná yojtsemna ca; y as chora, Josébioye tbojanlesenciá Jesusbe cuerpo chabotsámbañama.

<sup>46</sup> Chora, José canye uafjantse lino entsějua tojanabuamé, Jesusbe cuerpo cruzocana tbojanéstjango, chë lino entsėjua tbojanandmaná, y canye cuevëshiñe ndëtsbeñe pormánëshiñe tbojanajó; chentšana canye ndëtsbé tojansjoná, y chë cuevëshoye amashjuanentše tojánachto.

<sup>47</sup> María Magdalena y María, chë José y Santiagbe mamá, tbojáninýe ndayentše Jesusbe cuerpo tbojanájoma.

## 16

### *Jesús tojtanyena*

*(Mt 28.1-10; Lc 24.1-12; Jn 20.1-10)*

<sup>1</sup> Ochneyté tojanopasá ora, María Magdalena, María Santiagbe mamá, y Salomé, botamana uanguëtše béjaye tmojanabuamé, chíyeca jama Jesusbe cuerpo janëtjuama;

<sup>2</sup> y tmenguse, chë semana bojatséntena, cabá cachëse, shinýe yojábocna ora, chë cuevëshoye tmojána.

<sup>3</sup> Imojtsaye ora imojtsayénatsëtsnaye: “¿Chë cuevëshoye amashjuanentša ndëtsbé nda bochtsabuajuána ca?”

<sup>4</sup> Pero imojontješiyé ora, tmojáninýe chë cuevëshoye amashjuanentša bëts ndëtsbé, chentšana juanániñe.

<sup>5</sup> As chënga choye tmojánamashjna y choye tmojáninýe canye bobontse bën uafjantse entsějua uichëtjoná, chë cuevëshentša catšbioica inétsotbemañe; y chë shembásenga imojouatjaná.

<sup>6</sup> Pero chë bobontse tojanéyana: “Ndoñe matauatjëngana; tšëngaftanga šmondënguá Jesús Nazaretocá, chë tmonjancrucificá cha. Cha ya tontayena; muentše ndoñe quenátsmëna. Minyënga cha enjëftsejajonentše.

<sup>7</sup> Motsajna, y Pedro y chë inye uatsjëndayënga šmochjáuyana: ‘Jesús tšëngaftangbe natsana Galileoye echanjá. Choca cha šmochanjinye, ntšamo cachá tmojanéyancá ca.’”

<sup>8</sup> As chë shembásenga betsko chë cuevëshentšana tmojésanbocana, er puerte auatjanánënga imojtsemna y ngmëmnyënga imojtsemna; y chë causa, chë soyama ndocná tmonjaninyana.

*Jesús, María Magdalénbioye tbojánëbëbocna*  
(Jn 20.11-18)

<sup>9</sup> Jesús tojtanayenentšana, chë semana bojatsenté, Jesús natsana María Magdalénbioye tbojánëbëbocna. Tempo Jesús chábentšana canyšëfta bacna bayëjënga tojtanébuacana.

<sup>10</sup> Cha Jesúsbioye ainá tbojáninjëntšana, tojána Jesúseftaca imojánajnënga chama jaúnayama; chëngna ngménaca y šachénaca imojtsemna.

<sup>11</sup> Pero chënga tmojanjuabó nderado mo ndoñe ndegombre yontsemna ca, chë Jesús ainá yojtsemna ca, y María Magdalena chábioye tbojáninje ca tmojanuena ora.

*Uta ustonata Jesúsbioye tbojáninje*  
(Lc 24.13-35)

<sup>12</sup> Chentšana, uta ustonátbioye, básefta yebnënga yojamna luaroye ibojétsaye ora, Jesús tojánëbëbuacna, mo inya cuaftsemncá.

<sup>13</sup> Chora chata tbojésanshëcona chë ínënga chama jacúntama; pero chëngna cach ndoñe ndegombre ca tmojanjuabó.

*Jesús chë uatsjëndayënga tojanichamó, Bëngbe Bëtsabe soyëngama nyëtsquénache jábuayenama*  
(Mt 28.16-20; Lc 24.36-49; Jn 20.19-23)

<sup>14</sup> Cabana, Jesús chë bnëtsana canye uatsjëndayënga tojánëbëbuacna, chënga imojt-sesaye ora; y tojanécácana chë cha ainá yojtsemnama ndoñe ndegombre yontsemna ca tmojánjuaboma y nyëts ainánaca chábeñe ndoñe montsanošbuachema, er cha ainá tmojáninjënga chama tmojanacuntá ora, chca ndoñe ndegombre yontsemna ca chë uatsjëndayënga tmojánayana.

<sup>15</sup> Chentšana Jesús tojanéyana: “Nyëts luarëngoye motsajna, y nyëtsca entšanga chë tšabe noticiëngama šmochtsabuayiynaye.

<sup>16</sup> Nda chiñe chaojtsošbuaché y tšëngaftanga chašmojuabayé, cha atsbocaná echántsemna; pero nda ndoñe tontsošbuaché, cha nyëts tempo castiganá echántsemna.

<sup>17</sup> Chë átšbeñe ošbuáchiyënga ndegombre soyënga imojtsabuayiynama, entšanga mëntšá mochántsetatšëmbo: atše jótšëmbonëse, átšbeñe betsošbuachéyeca, entšángbentšana bacna bayëjëngbe juabna mochántábocna; tempo chënga ndmabiyañe mochantsóyebuambnaye.

<sup>18</sup> Masque nderado cucuatšinë mëtšcuayënga tmojishache o veneno tmojofšenga, ndocá quemochatspása; y šoquëngbeñe cucuatšënga chamojacjá ora, chënga shnánënga mochántatsmëna cá” –Jesús tojanéyana.

*Jesús Bëngbe Bëtsábioye tojtaná*  
(Lc 24.50-53)

<sup>19</sup> Bëngbe Utabná Jesús jóyebuambayama tojanpochocá chentšana, celoye cha tmojt-anatsbaná, y uámana luarentše, Bëngbe Bëtsabe catšbioica yojtóbema jtsemándayama.

<sup>20</sup> Y chë uatsjëndayëngna tmojánbocana y Bëngbe Bëtsabe soyëngama nyëtsquénache entšanga tmojanabuayená. Cach Bëngbe Utabná chënga yojanéjabuáchana, y yojánama entšanga chamotsetatšëmbuama chë buayenana soye ndegombre Bëngbe Bëtsabe soyënga

bétsemnama, chë uatsjéndayënga bëts soyënga jamama obenana chamotsebomnama cha jtsamëse.

## San Lucas

### *Jabojátšama*

<sup>1</sup> Ba entšanga Jesusbe historia tmojuábema, ntšamo bēngbeñe ndegombre tojopasacá.

<sup>2</sup> Chē historia juabemamna, chēnga tmojanuena ntšamo Jesusbe uatsjéndayēnga y inye entšanga chabiamna innencuentaycá. Chē entšangna tmojáninye y tmojanuena ndayá Jesús tojanmama y ntšamo tojanayancá, y chentšana chabe tšabe noticiēnga entšángbioye tmojanabuayená.

<sup>3</sup> As, átšnaca sēnjontšé cuedádoca juanotíciana lempe ntšamo Jesusbiamna imojtsichamcá, tojanobojatsentšana mēntscoñe. Mora šontsinýana tšabá yojtsemna acbiamna juabemana ntšamo ndegombre yomncá, uámana taitá Teófilo, chē tijuannoticiá soyēngama, ntšamo ndegombre bēngbeñe tojopasacá.

<sup>4</sup> Ba soyēnga Jesusbiamna tcmojabuátēmbanga, y atše sēntseboše aca chacotsetátšēmo, ntšamo tcojouencá ndegombre yomnana.

### *Canýe ángel tojanabuayená Juan chē Ubayaná jónýnama*

<sup>5</sup> Herodes Judea luaroca rey inamna ora, yojamna canýe judiēngbe bachna, Zacarías ca uabainá. Cha yojamna Abíasbe bachnanguentša pamillo. Chabe shemna, Isabel ca yojanabaina, y chana Aarónbentšana entšá inamna (Aarón, chē más uámana bachnangbe natsana amēndayá).

<sup>6</sup> Chatna tšabá amata ibnamna Bēngbe Bētsabe bominyiñe, y ntšamo Bēngbe Bētsá yomandacá ibojoyena; y chca, ndocná yonjanobena jayanana chata ndoñe tšabá ibonjánama ca.

<sup>7</sup> Básenga tondaye ibonjánabamna, Isabel šešona jtsebomnana ndobena causa, y chatna ya bētsanánata ibojtsemna.

<sup>8-9</sup> Chē bachnanga Bēngbe Bētsabe bēts yebnentše tmojtsoSERVERENA ora, sempre imojjanamana jabocacayana, nda tšabá tbojtsonyená, Bēngbe Bētsábioye atschuanaye luaroje cháuama incienso jajuinýiyama. Canýe, Zacaríasbe entšanga Bēngbe Bētsabe bēts yebnoca, Bēngbe Bētsábentše imojtsoSERVERENA orna, Zacaríasbioye tšabá ibojonýena; y chca, cha ibojotóca jana incienso jajuinýiyana.

<sup>10</sup> Zacarías, incienso yojtsejuinýnantscuana, ba entšanga shjoca imojtsemna, Bēngbe Bētsáftaca encuéntaye.

<sup>11</sup> Nýe ndeolpe, Bēngbe Utabnabe canýe ángel tojanonýná chē incienso jajuinýiyama altarentša catšbioica.

<sup>12</sup> Zacarías chábioye tbojáninye ora, tojanenjananá y corente uatjana tbojanábuache.

<sup>13</sup> Chora chē ángel tbojanianana: –Zacarías, ndoñe matauatjana. Bēngbe Bētsá tonjouena ntšamo tconjaimpadacá. Acbe shema Isabel canýe šešona bochantsebomna, boyabásetema, y chana Juan ca cochjuabaye.

<sup>14</sup> Chama aca corente oyejuayá cochántsemna, y bētscá entšanga mochanjóyejuaye acbe uaquiñá tojonýnama.

<sup>15</sup> Er cha, Bēngbe Bētsabiamna canýe uámana entšá echántsemna. Ndocna te queochaisofsiye vínoye, ni jabuáchiye. Chē Uámana Espiritu chabe ainaniñe echantsemándaye, cha cabá ndonýna orscana.

<sup>16</sup> Banga Israeloca entšanga, ntšamo cha chaojayanama mochanjontšé joyeunayana Bēngbe Bētsá, chēngbe Utabná.

<sup>17</sup> Cha echanjášhango chē Bēngbe Bētsabe Uámana Uabuayanabe natsana, y echántsebomna obenana y canýe espíritu ntšamo chē Bēngbe Bētsabe juabna oyebuambnayá Elías inabomncá. Chabe natsana echanjášhango, bētsétsanga chēngbe básengaftaca ndoñe chamondétsentsjanama, y chē nduauenanēnga



cachiñe chamotsatsjuabnama ntšamo chë Bëngbe Bëtsabe bominyiñe tšabá amënga mondbetsejuabnaycá. Y chca, entsanga cha echantsapróntaye Bëngbe Utabná jabama orscama ca —chë ángel tbojaniana.

<sup>18</sup> As Zacarías chë ángelbioye tbojantjá: —¿Ntšamo atše stjobenaye jtsetatšëmbuana chë šcontsatsá soye ndegombre bétsemnama? Er atše ya bëtsëjema sëntsemna y atšbe shémnaca cachcá ca.

<sup>19</sup> Chora chë ángel tbojanjuá: —Zacarías, atše ángel Gabriel sëndmëna; atše Bëngbe Bëtsábioca sëndoserverna. Cha šonjichmó chë tšabe noticiënga aca jauyanama y jue-nayama.

<sup>20</sup> Morna, chë cbontsatsá soyiñe ndoñe quecatošbuaché causa, ndëbiá cochanjo-quéda, y ntšamo cbontsatsacá chaojopasá ora, chama tempo chaojtsemna ora, chora jóyebuambayama cochantobenaye ca.

<sup>21</sup> Chë ángel Zacaríaseftaca yojtšóyebuambnantscuana, entsanga shjoca Zacaríasbiana imojtsobátmana, y mëntšá imojtsejuabnaye: “¿Ndáyeca tša bën Bëngbe Bëtsabe bëts yebnentše ibojtsobiamná ca?”

<sup>22</sup> Zacarías tojtanbocna ora, ndoñe yontsobena chë entsángaftaca jóyebuambayana. Chënga tmojántatšëmbona, chë Bëngbe Bëtsábioye atschuanayentše Zacarías mo otjenayoquécá Bëngbe Bëtsábiocana canye soye tojáninyama, er chëngbioye jatšëmbombonana vojáuyana, ndëbiá yojoquéda causa.

<sup>23</sup> Chabe tempo, chë Bëngbe Bëtsabe bëts yebnentše jtsetrabájayama tojanpochocá ora, Zacarías cachabe yebnoye tojtaná.

<sup>24</sup> Chentšana baseftaytese, chabe shema Isabel ngomamaná yojoquéda, y chë causa, chë shema shachna ishinye cach tsoca yebnentše totanoquedá.

<sup>25</sup> Cha mëntšá yojtsichamo: “Bëngbe Utabná mora atšbiana tojtenujabó, entsángbentše atšbe ngménana jtsebojuánama, básenga tondaye béntsabamna causa ca.”

### *Canye ángel tojanabuayená Jesús jónynama*

<sup>26</sup> Isabel chñënguana ishinye ngomamaná yojtsemna ora, Bëngbe Bëtsá, ángel Gabriel tbojanichmó Galilea luaroye, Nazaret ca uabaina puebloye,

<sup>27</sup> canye shembása María ca uabainá jauatsëtsayama. Mariyna cabá boyabása ndu-abuatmá inamna, pero Joséftaca jobouamayama tbojanšbuachená. Y Josena, rey Davídbentšana entsá inamna.

<sup>28</sup> Chë ángel Mariybioye tojána y mëntšá tbojanчуá: —¡Mouena. Bëngbe Bëtsá tšabe bendición acbiana tonjama! ¡Bëngbe Utabná ácaftaca entsemna ca!

<sup>29</sup> Chca tojanuena ora, María yojenjnaná chë soyama, y yojtsejuabnaye ndáyeca chë ángel chca tbojanчуama.

<sup>30</sup> Chora chë ángel tbojaniana: —María, ndoñe matauatjana, Bëngbe Bëtsá entsama tšabe bendicionënga chacotsebomnama.

<sup>31</sup> Aca ngomamaná cochanjoquéda y canye šešona boyabásetema cochántsebomna, y chana Jesús ca cochjuabaye.

<sup>32</sup> Cha puerta echantsámana, y entsangna Bëngbe Bëtsabe Uaquiñá ca chábioye mochantsábobuatma. Y Bëngbe Bëtsá chë Utabná, chábioye canye rey bochanjábema, ntšamo David vojamncá,

<sup>33</sup> y Jacóbëbentšana entsanga nyetsca tescama echántsamëndaye, y chabe mándayana ndocna te queochaisopochóca ca —chë ángel tbojaniana.

<sup>34</sup> Chentšana María chë ángelbioye tbojantjá: —¿Ntšamo chca yochjopása, cabá ndoñe boyá sëntsebomnëse ca?

<sup>35</sup> Y chë ángel tbojanjuá: —Chë Uámana Espíritu echanjabo nyets ácheñe, y Bëngbe Bëtsabe obenánaca ngomamaná cochanjoquéda. Chabe obenana mo jantšetëshcá cmochan-jaboušbotse; chíyeca chë echanjónyná šešona Uamaná echántsemna, y chábioye Bëngbe Bëtsabe Uaquiñá ca mochantsábobuatma.

<sup>36</sup> Mouena, Isabel, acbe primá, canye šešona bochántsebmna, masque ya bêtsananá cha entsemna; chë “šešona ndbomná ca” monjanabobuatmá, mora ya chnënguana ishinye ngomamaná entsemna,

<sup>37</sup> er Bëngbe Bëtsá lempe jamama endobena ca —cha tojánayana.

<sup>38</sup> Chora María chë ángelbioye tbojaniyana: —Bëngbe Bëtsabe oservená atše sëntsemna. Bëngbe Bëtsá átseftaca chaoma ntšamo šojauyancá ca.

Y chentšana chë ángel tojtsatanoñe.

### *María tojána Isabel jabuáchama*

<sup>39</sup> Chentšana, María tojanoprontá y tojanochëmo canye puebloye, Judeoca tjañenache luariñe.

<sup>40</sup> Chocna cha, Zacaríasbe yebnentše tojánamashëngo y Isabélbioye tbojanchuá.

<sup>41</sup> Isabel ntšamo María tbojanchuama tojanuena ora, Isabelbe šešona chabe uafsbioye tojanobonjó, y chë Uámana Espíritu Isabélbeñe tojánamashëngo chabe ainaniñe jtsemándayama.

<sup>42</sup> Chcasna, Isabel jabuache tojánayana: —¡Bëngbe Bëtsá acbiamá más tšabe bendicionënga entsama nyetsca shembásengbiamá, y chë cochántsebmna šešonbiámna cachá!

<sup>43</sup> Atše merecido taitatobuajoñe, atšbe Utabnabe mamá chašuabobuáchama;

<sup>44</sup> er atše sënjouena ntšamo šconjachuá, y cachora atšbe šešona oyejuayá atšbe uafsbioye tonjobonjó.

<sup>45</sup> ¡Aca Bëngbe Bëtsábeñe tcojošbuaché; cojtsetátšëmbo Bëngbe Bëtsá ntšamo tcmojašbuachenacá yochjamama; chíyeca puerte oyejuayá cochántsemna ca!

<sup>46</sup> Chora María tojánayana:

“Nyets ainánaca Bëngbe Utabná chantsadorana,

<sup>47</sup> y Bëngbe Bëtsá, atšbe Atsbocayabiamá corente chanjóyejuaye.

<sup>48</sup> Bëngbe Bëtsá atšbiamá tojtenujuabó, atše chabe oservénjema.

Er morscana muentša entšanga nyetscanga puerte oyejuayá ca šmochantsábobuatma.

<sup>49</sup> Bëngbe Bëtsá, chë nyets obenana bomná, chabe obenánaca bëts soyënga atšbiamá tonjama.

¡Bëngbe Bëtsá puerte Uamaná ca entsabaina!

<sup>50</sup> ¡Morsca entšanga y más chcoyënga, chábioye yeunanëngbiamá, cha sempre bochántsebmna!

<sup>51</sup> Cha, chabe obenánaca bëts soyënga tojama,

y chë nye cachënga bëtsëtsanga enobiamnayëngbe juabna tojtsepochohá;

<sup>52</sup> reyëngbioye chëngbe mándayentsana tojtsatsatše;

pero chë nye cachënga bëtsëtsanga ndenobiamnayëngbioye, uámanënga tojábiamá.

<sup>53</sup> Chë shëntseca imomnëngbioye, chamosama bëtscá cha tojatšatá,

pero chë bomnëngbioyna tondaye tonjatšatá.

<sup>54</sup> Cha tojanéjabuache chabe entšanga Israeloca, chabe oservénënga,

y ndoñe tbonjánebnatjëmbo jtsalastemánana,

<sup>55</sup> nyetsca tescama chë Abraham y chábentsana entšángbioye,

ntšamo bëngbe bëts taitanga Bëngbe Bëtsá tojanašebuachenacá ca” —cha tojánayana.

<sup>56</sup> Mariyna unga ishinye Isabélaftaca tojanoquedá, y chentšana cachabe yebnoye tojtaná.

### *Juan chë Ubayaná tojanonýná*

<sup>57</sup> Isabel jtsešócanama tojanóntsabuache ora, canye šešona boyabásetema tojanonýná.

<sup>58</sup> Isabelbe juachañe oyenënga y chabe pamíllanga tmojántatšëmbona ntšamo Bëngbe Bëtsá chábioye ibojalastemama, y chama corente Isabélaftaca tmojanoyejuanga.

<sup>59</sup> Chë šešona posuftayté yojtsebomna ora, tmojánashjango y chëtémbioye chë más delicadentše base bobachtema tmojantëtše, ntšamo chë judiënga imojanamancá. Chënga imojétseboše chë šešónbioye Zacarías ca juabáyana, cach beftcá;

<sup>60</sup> pero chabe mamá tojanëyana: —Ndoñe. Quem šešona echantsabaina Juan ca.

<sup>61</sup> As chënga Isabélbioye tmojanianyana: —Acbe pamíllangbeñe ndocná chca quenatabaina ca.

<sup>62</sup> Chora chënga jatšëmbombonana Zacaríasbioye tmojantjá, ntšamo chë šešona chaotsabainama cha yojtseboše ca.

<sup>63</sup> Zacaríasna jatšëmbombonana canye tablëbé tojanëyá y chiñe tojanábema: “Cha entsabaina Juan ca”. Y chë causa, nyetscanga ojnánänënga imojtsemna.

<sup>64</sup> Y cachora Zacarías jóyebuambayama yojtobenaye, y yojontsé Bëngbe Bëtsábioye jëtschuayana.

<sup>65</sup> Chë juachañe oyenënga nyetscanga tmojanëuatjaná, y Judeoca nyetsca chë tjañenache luariñe entsanga chë soyëngama imojtsencuëntaye.

<sup>66</sup> Nyetscanga chë soyëngama tmojántatšëmbona ora, chëngnaca corente chama imojtsejuabnaye y mëntšá imojtsichamo: “¿Chë básetema, bëtsá ora nda yochtsemna ca?” Y ndegombre, Bëngbe Bëtsabe obenana cháftaca yojtsemna.

### *Zacarías, Bëngbe Bëtsábioye jëtschuayama*

<sup>67</sup> Chë Uámana Espíritu tbojanmandá ora, Zacarías, chë basetembe taitá, Bëngbe Bëtsabe mándoca jtsóyebuambnayëse, mëntšá tojánayana:

<sup>68</sup> “¡Chë Utabná, chë Israeloca entsangbe Bëtsá matschuanga, er cha tonjabo chabe entsanga jabújabuachama y jabátsebacama!

<sup>69</sup> Cha bochanjíchmuá canye atsebacayá puerte obenana bomná, y cha echántsemna Bëngbe Bëtsabe oservená Davídbentšana entsá;

<sup>70</sup> ntšamo Bëngbe Bëtsá bayté entsemna, chë chabe juabna oyebuambnayëngbiajana, chë chábenga imomnëngbiajana bënga šojanašebuachenacá, mëntšá:

<sup>71</sup> Cha canya bochanichmuá bëngbe uayayënga y nyetsca uaboyënjëngbiama bënga jabátsebacama;

<sup>72</sup> bëngbe bëtsétsangbioye jálastemama, y jenójuaboyama y jamama chabe uámana trato,

<sup>73</sup> ntšamo Bëngbe Bëtsá, bëts taitá Abrahámbioye tbojanšbuachenacá.

<sup>74</sup> Cha tbojanšbuachená bëngbe uayayëngbiama bënga jabátsebacama, chca, bënga ndauatjcá Bëngbe Bëtsá jaserviama,

<sup>75</sup> y chabe entsangcá, nyetsca soyënguiñe tšabá amënga, Bëngbe Bëtsabe delante nyetsca te bëngbe vidënguiñe jëftsiyenama.

<sup>76-77</sup> Y aca, atšbe básetemna, Bëngbe Bëtsabe juabna oyebuambnayá ca cmochantsábobuatma,

entsángbioye Bëngbe Bëtsabe soyëngama cochtsabuayiynama,

Bëngbe Utabná cabá ndáshjango ora, bacna soyënga amana chamuajbanama;

as Bëngbe Bëtsá chëngbe bacna soyënga echanjáperdonaye, y Bëngbe Utabná jabama mochantsopróntaye.

<sup>78-79</sup> Bëngbe Bëtsá bënga puerte šualastemánayeca,

canya bëngbe juabnënga binynayá bochanjíchmuá,

bënga chë bacna soyënga causa mo ibetiñcá y obanëngbe luarentšcá vida bomnëngbioye jabátsebacama,

y jabuátambama ntšamo natjëmbana jtsiyenana ca” —cha tojánayana.

<sup>80</sup> Chë básetema yojontsé jobóchana y chabe espíritnaca puerte. Bayté, entsanga ndoyena luarënguenache cha yojëftsiyena, Bëngbe Bëtsá Israeloca entsángbioye cha tojáninñanýentscuana. Chentšana, chamuábuatmanamna tojanontsé Israeloca entsángbeñe jóyebuambayana.

## 2

*Jesucristo tojanonýná*  
(Mt 1.18-25)

<sup>1</sup> Chë tempo yojamna canýe Romoca bëts mandado, Augusto ca uabainá; y cha, chë natsanama tojanmandá nýetsca entšanga chamuenábemama.

<sup>2</sup> Chë soye tojanochnëngo Cirenio ca uabainá Sirioca mandado yojamna ora.

<sup>3</sup> Chamna, nýetscanga tojanotocá jtangana jenábemëngama, cada ona ndëmoca chëngbe bëts taitanga imojëtsiyena puebloye.

<sup>4</sup> As, Josénaca Galilea luarentšana Nazaretocana yojëftsebocna y Judeoye, Belén puebloye, tojtaná. Tempo, Josebe bëts taitá rey David, Belenoca inoyena. Y José, Davidbentšana entšá inámnayecna, choye jenábemama tojtaná.

<sup>5</sup> Mariáftaca tojána jenábemama, y muana tbojansbuachená Joséftaca jobouamayama. María ngomamaná yojtsemna,

<sup>6</sup> y Belenoca ibojtsemnëntscuana, chë ora tbojanóntšabuache jtsešócanama.

<sup>7</sup> Y chentše Mariá ibojtsebomna chabe natsana šešona, canýe boyabásetema. Posadoca tondaye luare yontsemna causna, chata nýe uacnëngbe átana tambuentše tbojanoquedá. Y Jesús tojanonýná orna, Mariá tbojtanëntsacjuá y canýe bachetémiñe tbojanjajó.

*Chë angelotëmënga y chë oveshënga abujënyënga*

<sup>8</sup> Belén béconana, chë ibeta, oveshënga abujënyënga shëntsjoça cachëngbe oveshëngaftaca imojtsemna.

<sup>9</sup> Nýe ndeolpe, Bëngbe Bëtsábíocana canýe ángel tojánebëbuacna, y Bëngbe Bëtsábentšana corente yojtsebuashinýinýana chëngbe shëconániñe. Chama chënga puerte imojocochau-atjaná.

<sup>10</sup> Chora chë ángel tojanéyana: “Ndoñe matauatjëngana. Sënjabo tšabe soyënga tonjopasama jábuayenama, nýetscanga chamóyejuama.

<sup>11</sup> Mora chë David tonjanonýná pueblentše canýe šešona tonjonýná. Cha tšëngaftangbe atsebacayá echántsemna y tšëngaftangbe entšangbiámnaca. Cha endmëna chë Bëngbe Bëtsabe Uámana Uabuayaná, Cristo ca uabainá, y Bëngbe Utabná.

<sup>12</sup> Ndegombre chca entsemnama mëntšá šmochanjátatšëmbona: canýe šešona ntsacjuaná y uacnëngbe bachetémiñe jajoná šmochanjínýena ca” —cha tojanéyana.

<sup>13</sup> Cachora, celocana mallajta angelënga chë natsana ángelbentše tmojánbocana y Bëngbe Bëtsábíoye mëntšá imojtsatschuanaye:

<sup>14</sup> “¡Bëngbe Bëtsá, celoca entsemná matschuanga!

Bëngbe Bëtsábíoye yeunanëngbiama, Bëngbe Bëtsá corente entsoyejuá; quem luariñe chëngbeñe puerte tšabá chaotsemna ca.”

<sup>15</sup> Chentšana chë angelënga celoye tmojésanshëcuana. Y chora chë oveshënga abujënyënga tmojanontšé jeniyanana: “Belenoye cuajna, chë quem tojopasá soye jinýama. Ndegombre, Bëngbe Bëtsá chë soye šojanýanyé ca.”

<sup>16</sup> As betsco tmojána y tmojánanýena Mariá, José y chë šešonatema bachetémiñe jajoná.

<sup>17</sup> Chë šešona tmojáninýe ora, chënga tmojanacuntá Jesusbe bëtsëtsata y chë ínýengbioye, ntšamo chë šešonbiama chë ángel tojanéyancá.

<sup>18</sup> Nýetscanga chë tmojanuenënga tmojanenjaná ndayá chë oveshënga abujënyënga imojtsacúntama.

<sup>19</sup> Pero Mariyna nýe cachabe ainanoca quem soyëngama más bën inétsenojuabnañe.

<sup>20</sup> Chentšana, chë oveshënga abujënyënga tmojtaná Bëngbe Bëtsá atschuanaye, ndayá tmojáninýama y tmojanuenama. Nýetsá tojanopasá lempe ntšamo chë ángel tojanéyancá.

*Bëngbe Bëtsabe bëts yebnoye Jesús tmojanamba*

<sup>21</sup> Posufta te tojánashjache ora, chë basetémbíoye chë más delicadentše base bobachtema tmojantëtše, Bëngbe Bëtsabe entšá bëtsemnama chaotsinýnama, ntšamo

judiënga imojanamancá; y Jesús ca tmojanabaye, ntšamo chë ángel tbojaniancá, María cabá ndoñe ngomamaná yontsemna ora.

<sup>22</sup> Y chë tempo tojanóshjango, ndaye ora José y María yojtsamna jamana ntšamo Moisesbe leyiñe iuayancá, ndayá jamama yojanmëncá, canye shembása Bëngbe Bëtsabe delante tšabia jtsatsmënama, canye šešona tbojtsebomntšana. Asna, Jerusalenoye tbojánata y chë básetema tmojanamba, Bëngbe Bëtsabe bëts yebnoca jinÿinÿiyama,

<sup>23</sup> ntšamo chë Bëngbe Utabná Moisésbioye tbojaníyë leyënguiñe iuayancá, mëntšá: “Canye yebnentše chë natsana šešona boyabása tojtsemnësna, Bëngbe Bëtsábioye cha jinÿinÿiyana chábioye chabotseservénama ca.” Chcasna, chë básetema Bëngbe Bëtsabe bëts yebnoye tmojanamba.

<sup>24</sup> Y tmojanamba janshana uta shloftše, Bëngbe Bëtsá jëtschuayama, ntšamo Bëngbe Utabnabe leyiñe yomandancá. Chiñe mëntšá endayana: “Chë natsana šešona chaojonÿná ora, boyabásetema tojtsemnëse, janshana šmochjuamba uta fchetnatémata o uta šešona palomatémata, Bëngbe Bëtsá jëtschuayama ca.”

<sup>25</sup> Jerusalenoca inamna canye bacó, Simeón ca uabainá; cha inamna nÿetsca soyënguiñe tšabá amá, y yojaniyena ntšamo Bëngbe Bëtsá yomandacá. Cha yojanóbátmana chë tempo ndaye ora, Bëngbe Bëtsá bochjanichmuá canÿa Israeloca entšanga cháuatsebacama. Y chë Uámana Espíritu chabe ainaniñe yojtsemna;

<sup>26</sup> chíyeca, cabá lempe chca ndopása ora, cha yojtsetátšëmbo cha ndoñe yochjanóbanama, chë Bëngbe Bëtsabe Uámana Uabuayaná ntjëftsinÿcá.

<sup>27</sup> Chë Uámana Espíritu tbojanmandáyeca, Simeón Bëngbe Bëtsabe bëts yebnoye tojána; y Jesusbe bëtsëtsata chë básetema tmojanamba ora, ntšamo Moisesbe leyiñe iuayancá chabiamama jamama ora,

<sup>28</sup> Simeón tbojanocutsá y Bëngbe Bëtsábioye tbojtanchuá. Cha mëntšá tojánayana:

<sup>29</sup> “Bëngbe Utabná, mora šmoleseñcá, atše acbe oservená natjëmbana jóbanana, er ya tconjama ntšamo šconjanšbuachenacá;

<sup>30</sup> atše chë entšangbe Atsebacayá sënjinÿe.

<sup>31</sup> Aca cha tcojichmó nÿets luarenache entšangbiama.

<sup>32</sup> Cha chë ndoñe judiëngbe juabnënga binÿnayá echántsemna;

y chábeyeca, nÿets quem luarentše mochanjátatsëmbona, chë acbe entšangbiama, Israeloquëngbiama ca” –cha tojánayana.

<sup>33</sup> José y María ibojenjanata ntšamo Simeón Jesusbiama yojtsichámuama.

<sup>34-35</sup> Chentšana, Simeón Bëngbe Bëtsábioye tbojanimpadá tšabe bendicionënga chata chabotsebomnana chaomama; y María, chë Jesusbe mamábioye tbojaniancá: “Quem soyënga corente cmochanjacochtsetšenaná, mo ainana espadëjaca cuafjenëchnëngcá. Cha Israeloca banga echanjápochoyaye y banga echanjátsebacaye; y chca, ntšamo banga ainaniñe imojuabnacá echantsótatsëmbo. Israeloca banga quem básetema mochantsábotena y chabe palabrëngnaca ca” –cha tbojaniancá.

<sup>36</sup> Chéntšnaca yojtsemna canye shembása Bëngbe Bëtsabe juabna oyebuambnayá, Ana ca uabainá; cha yojamna Fanuelbe bembe y Aserbe pamillentsá; ya bëtsananá cha inamna. Nÿe canÿsëfta uata cha yojëftsebouamna;

<sup>37</sup> y chabe boyá tojanóbanentsana, cha posufta bnëtsana y canta uata viudá inamna. Ndocna te Bëngbe Bëtsabe bëts yebnentšana yonjábocana, y chentše tojanoquedá bnëté y ibeta, Bëngbe Bëtsáftaca encuëntaye y cha atschuanaye; y chama, ba soye yojanamana tondaye ntjascá jtsemnana.

<sup>38</sup> Simeón, María y Josébioye yojtsëtsësnaye ora, Ana chëngbioye yojobeconá, y chë Atsebacayá tojanonÿnama Bëngbe Bëtsábioye tbojtanchuá chentšana, Jerusalenoca entšangbioye, chë canye atsebacayá Israeloca entšangbiama imojanobatmanëngbioye tojanëyana, chana Jesús yojtsemna ca.

*Jesús Nazaret puebloca*

<sup>39</sup> José y María lempe ntšamo chë Utabnabe leyënguine iuayancá tbojanma ora, Galilea luaroye tbojtánata, cachëngbe puebloye, Nazaretoye.

<sup>40</sup> Y chë básetema yojtsobóchaye, y más añemo yojtsejacana y más osertánana yojtsebomna. Y Bëngbe Bëtsá yojánama cha bëtsá tšabe bendicionënga chaotsebomnama.

*Jesús Bëngbe Bëtsabe bëts yebnoca*

<sup>41</sup> Chabe bëtsëtsata ibojanamana cada uata Jerusalenoye jana Bashco fiestama, chë Bëngbe Bëtsá chë judiëngbe bëts taitángbioye Egiptocana tojánatsebacama jtenójuaboyama fiesta.

<sup>42</sup> Jesús bnëtsana uta uata tojánashjache ora, Jerusalenoye tmojána, ntšamo imojanamancá.

<sup>43</sup> Chë fiesta tojanopochocá chentšana, chabe bëtsëtsata yebnoye ibojtsataye, y chata ntsetatšëmbcá, Jesusna Jerusalenoca yojtsoquedañe.

<sup>44</sup> Chata ibojëtsejuabnaye Jesús chë inye entšángaftaca yojtsataboye ca; chcasna, canye te nyetsá benachëjana tbojánata ora, tbojanontsé chabe pamíllangbeñe y ubuatmëngbeñe jtsenguanguana,

<sup>45</sup> pero ndoñe ibonjobenaye jtsinyenana. As, chata chora Jerusalenoye tbojésanshëcona choca cha jetsenguanguama.

<sup>46</sup> Unga tianoye chata tbojanobená Bëngbe Bëtsabe bëts yebnentše cha jetsinyenana. Chana chë Moisesbe ley abuátambayëngbe tsëntsaca inétsotbemañe, chëngbioye inayau-nana, inatjanaye.

<sup>47</sup> Nyetsca ouenanënga imojtsenjnanaye Jesús tša osertaná inamnana, y tša tšabá jojuama cha yojtsobenama.

<sup>48</sup> Chabe bëtsëtsata chca tbojáninye ora, chátnaca ibojenjnaná. Chora, chabe mamá tbojaniana: —Uaquiñá, ¿ndáyeca chca bëndátaftaca tcojama? Taitá y atše corente enócochinyenata cbondënguá ca.

<sup>49</sup> As Jesús tojanëyana: —¿Ndáyeca atše šmonguá? ¿Ndoñe šondëtatšëmbo atše šomna atšbe Taitabe yebnentše jtsemnana ca?

<sup>50</sup> Pero chë bëtsëtsata ndoñe tonjanësertá ntšamo cha tojanëyancá.

<sup>51</sup> Chentšana Jesús chë bëtsëtsataftaca Nazaretoye tojtáná y chata yojtsayaunana. Y chabe mamana nye cachabe ainanoca chë soyëngama más bën inétsenajuabnañe.

<sup>52</sup> Jesús yojtsobóchaye y más juabna yojtsebomna; y Bëngbe Bëtsá y nyetsca entšanga corente oyejuayënga chabiana imojtsemna.

**3***Juan chë Ubayaná entšanga yojanabuayiyá*

(Mt 3.1-12; Mc 1.1-8; Jn 1.19-28)

<sup>1</sup> Bnëtsana shachna uatama Tiberio César Romoca bëts mandado yojamna ora, Poncio Pilato yojamna Judeoca mandado, Heródesna Galileoca rey, chabe catšata Felipe Iturea y Traconitoca rey, y Lisániasna Abilinioca rey.

<sup>2</sup> Anás y Caifás chë bachnangbe más uámana amëndayata ibojamna. Cach tempo, canye luare entšanga ndoyenentše Bëngbe Bëtsá tbojanatsëtsá Juánbioye; Juan, Zacaríasbe uaquiñá.

<sup>3</sup> As Juan nyetsca luarënguëjana Jordán béjaye béconana tojánachnëngo, entšanga mëntšá utsëtsnaye: “Tšëngangbe bacna soyëngama ngmënaca šmochtenójuaboye, chca amana šmochtsajbaná y Bëngbe Bëtsabe benache šmochtishache. Chora cbochjúbaye, y Bëngbe Bëtsá tšëngangbe bacna soyëngama cmochanjáperdonaye ca.”

<sup>4</sup> Chë soye tojanopasá, cachcá ntšamo chë Bëngbe Bëtsabe juabna oyebuambnayá Isaías chabe librëšañe yojëftsabemcá. Cha mëntšá tojanábema: Entšanga ndoyena luaroca canya enduáyebuache:

“Bëngbe Utabná echanjabo ca; mo nda canÿe benache tojtseprontacá canÿe uámana entšá jashjanguama,  
cachcá, tšëngaftángnaca, Bëngbe Utabná jabama ainanentse tšabe juabnëngaca šmochtseprontana.

<sup>5</sup> Nÿetsca jachañe echantojútjia, y tjañe y batsjabenga mochantenájachibiaye. Chë scundma benachënga ndirichëjënga echántsatsmëna, y chë bacá mana benachënga mochantenájachibiaye.

Mo chë chca tmojtsamëngcá, canÿe benache japróntana canÿe rey cháúashjanguama, tšëngaftángnaca bëtscá šmochtseprontana tšëngaftangbe ainaniñe, Bëngbe Utabná jabama.

<sup>6</sup> Y nÿetsca entsanga mochanjinÿe chë Atsebacayá Bëngbe Bëtsábentsana jabana ca” —cha tojanábema.

<sup>7</sup> Chë entsanga Juan chaubáyama imojánbocana ora, Juan yojanëtsëtsnaye: “¡Mëtscuaye entsanga! ¿Nda tcmënjáuyana chë echanjóshjango uabouana castigüentsana šmochjotsbocá ca?

<sup>8</sup> Bëngbe Bëtsábeñe ndegombre ošbuáchiyënga šmochtsemna, as chca chaotsinÿna, tšëngaftanga chë bacna soyënga amana ndegombre šmojtsajbanama. Y ndoñe šmattsejuabnaye cach tšëngaftangbiama jayanama: ‘Bëngna Abrahábentsana entsanga, Bëngbe Bëtsabe entsanga fsëndmëna ca’. Er atse chanjayana, Bëngbe Bëtsá quem ndëtšbéngacnaca Abrahábentsana entsanga nanjábiamana.

<sup>9</sup> Tatšniá ya entsaprontana chë betiyeshënga thëtëjëngocana jtseshatëtsetšama. Ndaye betiye ndoñe tonjashájona, jtseshatëtšana y iñoye jtsatmetšana; tšëngaftangaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye ca” —cha yojanëtsëtsnaye.

<sup>10</sup> —¿Y as, ndayá jamama šojtsamna ca? —chora chë entsanga tmojantjá.

<sup>11</sup> Y Juan tojanéjua: —Chë uta quëfsaíya uabomná bontsemna canÿiyá jutstayana chë tondaye tonduabomná. Saná bomná bontsemna juajatayana chë tondaye saná tondbomnábioye ca.

<sup>12</sup> Romocama entšángbioye impuesto atjanayëngnaca jenábayama tmojánabo. Chënga Juánbioye tmojantjá: —Buatëmbayá, ¿ndayá jamama šojtsamna ca?

<sup>13</sup> Y Juan tojanéyana: —Nÿe ntšamo chë leyiñe yomandancá entšángbioye crocénana šmochtsayëngacaye ca.

<sup>14</sup> Básefta soldadëngnaca chábioye tmojantjá: —¿Ndayá jamama šojtsamna ca?

Y Juan tojanéyana: —Ndocnábioye tondaye šmatjáboca, ni jauátjanase, ni nÿe ndayámnaca bonamente jobuáchëse; y nÿe ntsachetšá šmacaná crocénánaca oyejuayënga šmochtsomñe ca.

<sup>15</sup> Entšanga chë Bëngbe Bëtsabe Uámana Uabuayanabiama imojtsobátmana, y chëngna Juanbiama imojëtsejuabnaye nderado cha chë Bëngbe Bëtsabe Uámana Uabuayaná nanjamna ca;

<sup>16</sup> pero Juan tojanéyana: “Ndegombre, atse béjayeca cbondubáyana. Pero chë echanjabá atšbiama corente más obenana endbomna, y atse merecido taitatobuañoñe ni mo jotsejbiyana chabe shecochëtjonëshentsa corriëja jajafjonama. Chë Bëngbe Bëtsabe benache chamojtishachëngbiama, Bëngbe Bëtsá echanjama chë echanjabábeyeca, chë Uámana Espíritu chëngbe ainaniñe cháúamashënguama. Pero chë ndoñe chamontishachëngbiama, Bëngbe Bëtsá echanjama chë echanjabábeyeca, chënga corente castigánënga chamotsemnama, mo iñeshequëcá.

<sup>17</sup> Canÿe entšá chabe mëtštá cucuatšinë jiyëbana, chabe trigo jtsóbobemama, y chë ndoservena shácuanënga jtsejashtsëtsana. Chabe trigo chë grano uaquëcjnaye tsañe jtsabuájua, y chë ndoservena shácuanëngna iñeshoye jtsatmetšana. Cachcá, chë átšbentsana echanjabá, chë tšabe entsanga echanjúbuaja, y chë bacna entsangna iñeshiñe echantsacastigaye, y chë iñe ndocna te queochátsfsana ca” —cha tojanéyana.

<sup>18</sup> Chca y inye palabrëngaca Juan chë tšabe noticiëngama yojanabuayiyná.

<sup>19</sup> Tempo, Juan Heródesbioye tbojanácacana, cha tojanobouamama cachabe catšata Felipe shémaftaca, Felipe cabá oyena ora; chana Herodías ca uabainá. Chama Juan tbojanácacana y nyëtsca bacna soyënga Herodes tojanmámna.

<sup>20</sup> Pero Herodes Juánbioye joyeunaye luariñna, cabá inye más bëts bacna soye tojátanma: Juánbioye cárceloye tbojtsanëtame.

*Juan, Jesúsbioye tbojanabaye*

*(Mt 3.13-17; Mc 1.9-11)*

<sup>21</sup> Pero Herodes Juánbioye cabá ndutame ora, Juan ba entšanga tojanëbaye, y Jesúsnaca tojánabo jenábayama. Ibojtsabayanëntscuana, Jesús Bëngbe Bëtsáftaca ibojtsencuëntaye; y chora celoca yojotëfjo,

<sup>22</sup> y chë Uámana Espiritu mo canye palomatemcá Jesúsbioye yojtsastjajuana; y celocana Bëngbe Bëtsá tbojaniyana: “Acna atšbe bonshana Uaquiñá condmëna. Acbiam corente sëntsoyejuá ca.”

*Jesusbe bëts taitanga*

*(Mt 1.1-17)*

<sup>23-38</sup> Jesús unga bnëtsana uata yojtsebomna, entšangbeñe Bëngbe Bëtsabe soyëngama jóyebuambayama yojontšé ora. Entšanga imojanjuabná Jesús Josebe uaquiñá yojamna cá.

José yojamna Elibe uaquiñá.

Elí Matatbe uaquiñá

y Matatna Levibe uaquiñá.

Leví yojamna Melquibe uaquiñá,

Melqui Janabe uaquiñá

y Jana Josebe uaquiñá.

José yojamna Matatíasbe uaquiñá,

Matatíasna Amosbe uaquiñá.

Amós Nahumbe uaquiñá,

Nahúm Eslibe uaquiñá

y Esli yojamna Nagaiibe uaquiñá.

Nagai yojamna Maatbe uaquiñá,

Maatna Matatíasbe uaquiñá.

Matatías Semeibe uaquiñá,

Semei Josecbe uaquiñá

y Josec yojamna Judabe uaquiñá.

Judá yojamna Joananbe uaquiñá

y Joanán Resabe uaquiñá.

Resa Zorobabelbe uaquiñá,

Zorobabel Salatielbe uaquiñá,

y Salatielna Neribe uaquiñá yojamna.

Neri yojamna Melquibe uaquiñá,

Melqui Adibe uaquiñá.

Adi Cosambe uaquiñá,

Cosam Elmadambe uaquiñá,

y Elmadamna yojamna Erbe uaquiñá.

Er yojamna Jesusbe uaquiñá

y Jesús Eliezerbe uaquiñá.

Eliezer Jorimbe uaquiñá

y Jorimna Matatbe uaquiñá.

Matat yojamna Levibe uaquiñá,



Leví Simeonbe uaquiñá  
 y Simeón Judabe uaquiñá.  
 Judá Josebe uaquiñá,  
 José Jonambe uaquiñá,  
 y Jonamna yojamna Eliaquimbe uaquiñá.  
 Eliaquim yojamna Meleabe uaquiñá,  
 Melea Menabe uaquiñá.  
 Mena Matatbe uaquiñá,  
 y Matata yojamna Natanbe uaquiñá.  
 Natán yojamna Davidbe uaquiñá,  
 David Isaíbe uaquiñá  
 y Isaína Obedbe uaquiñá.  
 Obed Boozbe uaquiñá,  
 Booz Salabe uaquiñá  
 y Sala yojamna Naasonbe uaquiñá.  
 Naasón yojamna Aminadabëbe uaquiñá,  
 Aminadab Adminbe uaquiñá  
 y Admin Arnibe uaquiñá.  
 Arni Esrombe uaquiñá,  
 Esrom Fáresbe uaquiñá  
 y Fáresna yojamna Judabe uaquiñá.  
 Judá yojamna Jacobëbe uaquiñá,  
 Jacob Isaacbe uaquiñá  
 y Isaacna Abrahambe uaquiñá.  
 Abraham Tarebe uaquiñá  
 y Taré yojamna Nacorbe uaquiñá.  
 Nacor yojamna Serugbe uaquiñá,  
 Serug Ragaube uaquiñá  
 y Ragauna Pelegbe uaquiñá.  
 Peleg Heberbe uaquiñá,  
 y Heber yojamna Salabe uaquiñá.  
 Sala yojamna Cainanbe uaquiñá,  
 Cainán Arfaxadbe uaquiñá  
 y Arfaxadna Sembe uaquiñá.  
 Sem Noebe uaquiñá  
 y Noé yojamna Lamecbe uaquiñá.  
 Lamec yojamna Matusalenbe uaquiñá,  
 Matusalén Enocbe uaquiñá  
 y Enocna Jaredbe uaquiñá.  
 Jared Mahalaleelbe uaquiñá,  
 y Mahalaleelna yojamna Cainanbe uaquiñá.  
 Cainán yojamna Enosbe uaquiñá,  
 Enós Setbe uaquiñá,  
 Set Adanbe uaquiñá  
 y Adán Bëngbe Bëtsabe uaquiñá.

#### 4

*Jesús tojanobená Satanás jayëñjanama*  
*(Mt 4.1-11; Mc 1.12-13)*

<sup>1</sup> Juan, Jesúsbioye tbojanabáyentšana, chë Uámana Espiritu Jesusbe ainaniñe yojt-semándaye. Jesús Jordán bejajoícana tojtaná y chë Uámana Espiritna entšanga ndoyena luaroye tbojanánatse.

<sup>2</sup> Chentše canta bnětsana te tbojanjétana, y Satanasma yojanabó Jesús jisháchichiyama. Chë canta bnětsana tentscuana Jesús tondaye tonjanse, y cabana ibojeshětsena.

<sup>3</sup> Chora Satanás tojésanabo y tbojanianyana: —Aca ndegombre Běngbe Bětsabe Uaquiñá tcomněse, momandá quem ndětsbenga tanděse chaobiama ca.

<sup>4</sup> As Jesús tbojanjuá: —Běngbe Bětsabe uabemana palabrěnguiñe měntšá endayana: “Entšá nýe tanděseca ndoñe vida ntsebomnana ca.”

<sup>5</sup> Chentšana, Satanás canýe běts tjoye tbojanánatse y betesco nýetsca quem luarentša aměndayěngbenache tbojaninýinýé.

<sup>6</sup> Chora Satanás tbojanianyana: —Atše nýets obenana cbochjátsetaye y lempe quem aměndayěngbenache yobinýna soyěngnaca. Atše lempe chca sěnjóyěngacñe y sěntsobena jatšetayama nda stsebošábioye.

<sup>7</sup> Aca chacojoshěntsamentšé y chašcojadorase, lempe nýetšá acbiama echántsemna ca.

<sup>8</sup> Chora Jesús tbojanjuá: —Běngbe Bětsabe uabemana palabrěnguiñe měntšá endayana: “Acbe Bětsá, chë Utabná cochtsadorana y nýe cha cochtseserverna ca.”

<sup>9</sup> Chentšana, Satanás Jerusalemoye tbojanánatse y Běngbe Bětsabe běts yebnentše chë más tsbanánoca tbojanatsá, y tbojanianyana: —Aca ndegombre Běngbe Bětsabe Uaquiñá tcomněse, muentšana fshantsoye montsěnja,

<sup>10</sup> er Běngbe Bětsabe uabemana palabrěnguiñe endayana:

Běngbe Bětsá chabe angelěnga echanjichamuá, chacmotsinýenama.

<sup>11</sup> Chěnga buacuatšěngaca cmochanjishache, shecuatše ndocá ndětsbeñe chacondomama ca —cha tbojanianyana.

<sup>12</sup> Chora Jesús tbojanjuá: —Běngbe Bětsabe uabemana palabrěnguiñe měntšá endayana: “Ndoñe matsbošana acbe Bětsá chë Utabná bacna soyěngama jacochěnguama ca.”

<sup>13</sup> Cabana, Satanás tojanajbaná bošana Jesúsbioye bacna soyěngama jacochěnguama, y bēnama Jesúsbenšana tojtsanojuánañe.

### *Jesús tojanontšé Galileoca chabe trabajo jamana*

*(Mt 4.12-17; Mc 1.14-15)*

<sup>14</sup> Chentšana, Jesús Galileoye tojesaná chë Uámana Espiritbe obenánaca, y nýetsca entšanga chë luariñe chabiama imojtsencuéntaye.

<sup>15</sup> Jesús yojtšabuátambaye chë judiěngbe enefjuana yebněnguenache, y nýetscanga cha imojtsatschuanaye.

### *Jesús Nazaret puebloca*

*(Mt 13.53-58; Mc 6.1-6)*

<sup>16</sup> Chentšana Jesús Nazaretoye tojtanashjango, chë pueblentše cha tojanoboché, y ochnayté, ntšamo cha yojanamancá, chë judiěngbe enefjuana yebnentše tojánamashěngo. Y chocna tojantsbaná Běngbe Bětsabe palabra jualíama.

<sup>17</sup> Chë Běngbe Bětsabe juabna oyebuambnayá Isaíasbe librěša tmojaniyé chauliama. Chë librěša yojutěfjona orna, tojáninýena měntšá uábemanentše:

<sup>18</sup> “Chë Utabnabe Espiritu átšeftaca entsemna,

er atše uabuayaná stsemna chë Běngbe Bětsabe tšabe noticiěnga chë ndbomněngbeñe jóyebuambayama.

Cha šonjichmó jábuayenama, chë utámeněnga chentšana ya chamuáisebocanama;

jamama chë jtaněnga chamobenama tšabá jubínýnama;

jamama chë inýěngbe causa imosufríněnga, tempcá cachcá tšabá chamotsatsmēnama;

<sup>19</sup> y entšanga jáuyanama ndēmua ora chë Utabná chabe entšanga yochjatsebacye ca.”

<sup>20</sup> Jesús jualíama tojanpochocá y chora chë uajabuachanábioye chësa tbojtaniyé y tojtanoíbema. Nÿetsca entsanga chë enefjuana yebnentše imojtsemnënga Jesúsbioye imojtsobuáuatja.

<sup>21</sup> Chora Jesús tojanontsé mëntsá jayanana: —Camënté tšëngaftangbeñe tonjopasá ntšamo quem librëšañe iuabemancá ca.

<sup>22</sup> Nÿetscanga Jesusbiamá tšabá imojtsencuëntaye y ojnanánënga imojtsemna tša botamana cha vojtsóyebuambnama. Y chënga imojtsentjanaye: —¿Quem boyabása ndoñe Josebe uaquiñá yondmëna ca?

<sup>23</sup> Jesús vojtsatátšëmbo ntšamo cha tojánayaniñe chënga ndoñe tmonjanóšbuachema. As tojanëyana: —Ndegombre tšëngaftanga ntšamo entsanga mondëntšayancá atše šmochanjauyana: “Ashnayá, cach aca menoshná ca”. Y tšëngaftanga šmojtsejuabná atše jauyanama: “Bënga fsënjouena chë bëts soyënga Bëngbe Bëtsabe obenánaca Capernaumoca tcojamama. Ntšamo contsichamcá ndegombre tojtsemnëse, cach acbe puebléntšnaca cachcá moma ca”.

<sup>24</sup> Y cachora Jesús más tojanoyebuambá, mëntsá: “Ndegombre cbëyana, ni canÿe Bëngbe Bëtsabe juabna oyebuambnayábioye cachabe pueblentše tšabá quematonjá.

<sup>25</sup> Ndegombre cbëyana, Elías, chë Bëngbe Bëtsabe juabna oyebuambnayá, Israeloca inamna ora, ba viudanga chentše imojamna. Chë tempo, unga uata y tsëntsañe nÿetsá ndoñe tonjanafté y bëts shëntsana chë luariñe vojtsëbinÿna.

<sup>26</sup> Pero Bëngbe Bëtsá, Elíasbioye ndoñe tbonjanichmó ni mo canÿe Israelentša viudábioye, y aiñe tbojanichmó ínÿoye, Sarepta ca uabáinoye, Sidón béconana, canÿe chentša viudábioye.

<sup>27</sup> Eliseo, chë Bëngbe Bëtsabe juabna oyebuambnayá, Israeloca inamna ora, chentše banga imojamna bacna nguayanánaca šoquënga, y ni mo canÿa chentša šocábioye tbonjanshná, pero aiñe canÿe šocábioye, Naamán ca uabainá, cach bacna nguayanánaca, Sirocá ca” —cha tojánayana.

<sup>28</sup> Chë judiëngbe enefjuana yebnentše imojtsemna entsanga chca tmojanuena ora, puerte tojánëtëna.

<sup>29</sup> As, chora chënga tmojantsbaná, chë pueblentsana Jesús imojtábocna y más tsjuanoye canÿe peñëšëjana imojuanatse. Chënga imojanajebna cach peñëšiñe, y chë entsanga imojtseboše Jesús chocana jtsajuatsëntšana.

<sup>30</sup> Pero Jesusna chëngbe tsëntsajana tojánachnëngo y ínÿoye tojtsanoñe.

*Jesús, bayëjbe juabna cánÿabioye tbojanbojuaná  
(Mc 1.21-28)*

<sup>31</sup> Chentšana, Jesús cach Galileoye tojesaná, Capernaum puebioye, y choca tojanontsé, chë ochnayté, chë judiëngbe enefjuana yebnentše entsanga jabuátambana.

<sup>32</sup> Entsanga imojtsenjnanaye ntšamo Jesús vojtsabuátambama, er chamna mo canÿe mando bomnacá vojtsóyebuambnaye.

<sup>33</sup> Chë enefjuana yebnentše, canÿe boyabása bacna bayëja uambayá vojtssemna, y chabe causa chë boyabása tojanontsé mëntsá uayebuáchana:

<sup>34</sup> —¡Cachcá šmonÿá! ¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndëtatsëmbo nda aca comnama, aca chë Bëngbe Bëtsabe Uamaná ca.

<sup>35</sup> Chora Jesús chë bacna bayëjbioye tbojtsanácacana y tbojanianyana: —¡lytëca móbema y chábéntšana maisebocna ca!

As chora chë bayëja entsanguentše chë boyabásabioye tbojanshajayé, y ndocá ntjëftsemcá chábéntšana yojësebocna.

<sup>36</sup> Chë soyama nÿetsca entsanga imojénjnanaye y mëntsá imojtsenatsëtsnaye: “¡Tša chca palabrënga! ¡Quem entsá mandayacá y obenacá chë bayëjënga entsamënda, y chënga montsaisebocana ca!”

<sup>37</sup> Y Galileoca nyetsca pueblënguine Jesusbiamama yojtsótatsëmbo.

*Jesús, Simón Pédrëbe uambén mamábioye tbojanshná*

*(Mt 8.14-15; Mc 1.29-31)*

<sup>38</sup> Chentsana, Jesús chë judiëngbe enefjuana yebnentsana tojëftsanbocna y Simonbe yebnentsë tojánamashëngo. Simonbe uambén mamá šocá inajájona jabuache calentóracá, y chë chentsë imojtsemna entsanga chabiamama Jesúsbioye tmojanimpadá.

<sup>39</sup> Chora Jesús chë šocábioye yojotsejbéna y tojánayana: “¡Calentora mojuaná ca!” Y chë calentora tbojtsanóbojuanañe. Y cachora, cha tojtantsbaná y tojanontsé chënga jobuácuedana.

*Jesús ba šoquënga tojanashná*

*(Mt 8.16-17; Mc 1.32-34)*

<sup>40</sup> Shinÿe yojuenatjëmba ora, banga inÿe y inÿe šocana bomnënga Jesúsbioye tmojanënatse, y cha nyetsca šoquëngbeñe cucuatšënga tojanajá y tojanashná.

<sup>41</sup> Chora, ba šoquëngbentsana bacna bayëjënga imojtsaisebocana y mëntšá imojtsanchembumbuana: “¡Aca chë Bëngbe Bëtsabe Uaquiñá condmëna ca!” Pero Jesusna yojtsécácana y ndoñe tonjanalesenciá chamóyebuambama, er chë bayëjënga imnatátšëmbo cha chë Cristo bëtsemnama.

*Chë judiëngbe enefjuana yebnënguenache, Bëngbe Bëtsabe soyëngama Jesús entsanga yojanabuayiná*

*(Mc 1.35-39)*

<sup>42</sup> Yëfsana tojanbinÿna ora, Jesús chë pueblentsana tojëftsanbocna, y canÿe luaroye, entsanga ndoyenoye tojtsanoñe. Pero entsanga tmojána cha jetsenguanguama, y cha yojtsemnoye tmojánashjajna. Chënga imojétseboše Jesús cach pueblentsë chaotsoquedáñama,

<sup>43</sup> pero Jesús tojanëyana: “Atšë šontsemna chë tšabe noticiënga Bëngbe Bëtsabe amëndayama inÿe pueblënguenáchnaca jábuayenana. Chama Bëngbe Bëtsá šonjichmó ca.”

<sup>44</sup> Y chentsana, Jesús yojánana Bëngbe Bëtsabiamama entsángbioye abuayinayeye, chë judiëngbe enefjuana yebnënguenache Judeoca.

## 5

*Canÿe te mallajta beonga ashebuánaye te*

*(Mt 4.18-22; Mc 1.16-20)*

<sup>1</sup> Canÿe te, Jesús, Genesaret ca uabaina uafjajónaye tsachañe yojtsemna ora, ba entsanga tmojánashjajna, y chënga tša imojtsenajuatsëntšnaye Bëngbe Bëtsabe palabra jouenama.

<sup>2</sup> Jesús, chë uafjajónaye tsachañe bécoñe tojáninÿe uta ena barquëshá; chë beonga ashebuánayëngna barquëshanguentsana tmojëftsanbocna atarraiešhangá jetsáboshabiamama.

<sup>3</sup> Jesús canÿe barquëshañe tojánamashëngo; chësha Simónbesha inauamna. Chora Simónbioye mëntšá tbojanianana: “Quem tsacháñentsana chcoye mëyamba ca.”

<sup>4</sup> Tojanótbema ora, Jesús chë barquëshoicana tojanontsé entsanga jabuátambama. Jabuátambama tojanpochocá orna, Simónbioye tbojanianana: —Shbuatsëntsoye barquëshá mëyamba y tšëngaftangbe atarraiešhangá šmochjushbuetše, beonga jashebuáyama ca.

<sup>5</sup> Pero Simón tbojanjuá: —Buatëmbayá, nyets ibeta fsëndanguá y tondaye chibiátashebuaye. Pero aca chca tcjayánayecna, cachiñe atarraiešha chantëtëshbuetše ca.

<sup>6</sup> Tmojanëshbuetše orna, bëtscá beonga tmojánishëche y chëngbe atarraiešhangá tojanontsé jtsatanëcanana.

<sup>7</sup> As, chë inye barquëshañe imojtsemna enutëngbioye tmojánefjatsëmbo, jabújabuachama chamuábama. Chora chënga tmojánabo, y nyets uta barquësha beóngaca tmojanajutjé. Tša chëftanga causa, tojanontsé chë uta barquësha jtsenatjëmbambana.

<sup>8</sup> Simón Pedro chca tojáninye ora, Jesús bentse tojanoshëntsamentsé y tbojaniyana: — ¡Bëngbe Utabná, atše bacna soye amá sëndmëna, chíyeca átšbentsana mojuaná ca!

<sup>9</sup> Chë tša beonga jashebuáyama Jesús tojanmama, Simón y chë cháftaca imojtsemnënga imojouatjaná.

<sup>10</sup> Santiago y Juan, chë Zebedeobe uaquiñata y Simonbe enutata, chátnaca auatjanánata ibojtsemna. Chora Jesús Simónbioye tbojaniyana: —Ndoñe matauatjana. Morscana, entšanga Bëngbe Bëtsabiamá cochántsanguaye, y nye beonga ashebuanayá ndoñe que-cochátsmëna ca.

<sup>11</sup> As chora chë barquëshangá tsachoye tmojtanyamba y lempe jéseboshjonëse, Jesús tmojanasto.

*Jesús, canya bacna nguayanánaca šocábioye tbojanshná*  
(Mt 8.1-4; Mc 1.40-45)

<sup>12</sup> Jesús canye pueblentse yojtsemna ora, chentse tojánashjango canye entšá bacna nguayanánaca šocá. Chë šocá Jesúsbioye tbojáninye ora, tojanoshëntsamentsé y jubiaca fshantsóntsoñe yojotsejbéna y tbojanimpadá: —Bëngbe Utabná, aca tcojtsebošëse, aca catjobenaye atšbe šocana jtsebojuánana ca.

<sup>13</sup> As Jesús cucuátšëca tbojánbojajo y tbojaniyana: —Aíñe, sëntseboše. ¡Šocana chotsebojuaná ca!

Y cachora chë šocana tbojtsanóbojuañe.

<sup>14</sup> Chora Jesús tbojanmandá: —Ndocnábeñe chë soye cattsecuëntaye; nye Jerusalenoca báchnëbioye motsa, y cha cochjinýinýiye aca mora ya tšabá cojtsatsmënama; y chora cochjuátšëmbona ntšamo Moisés chabe leyiñe tojanmandacá, Bëngbe Bëtsábioye chama jëtschuayama, chca, nyetsca entšanga chamotatsëmbona mora ya tšabá cojtsatsmënama ca.

<sup>15</sup> Pero ndayá Jesús yojtsamama más entšanga imojátatsëmbona, y ba entšanga imojtsojotoye chábioye joyeunayama y chëngbe šocanëngama chauashnama.

<sup>16</sup> Pero Jesús yojanamana jtsoñana entšanga ndoyena luarëngoye y choca Bëngbe Bëtsáftaca ibnéncuentaye.

*Jesús, canye jama ndobenábioye tbojanshná*  
(Mt 9.1-8; Mc 2.1-12)

<sup>17</sup> Canye te, Jesús yojtsabuatambá ora, chentse básefta fariseunga y ley abuátambayënga imojtsetbiámama, Galileoca nyetsca pueblënguentsana áshjajnënga, Judeoquënga y Jerusaleñoquënga. Y chora Jesús šoquënga yojtsashnaye, Bëngbe Bëtsabe obenánaca.

<sup>18</sup> Chora tojanopasá, básefta boyabásënga canye šocá, jama ndobená, tjuashiñe choye imojuamba. Chënga imojétseboše tsoye cha juambana, Jesús yojtsemnoye,

<sup>19</sup> pero jamashjnama ndoñe tmonjanobená, tša entšanga causa. Chcasna, gradasëšënguëjana chë yebnentša tsbanánye tmojánasëngo y batšá tejëshe tmojtsanjuaná. Chorna, chë atëfjnëjana chë šocá tjuashiñe tmojanëštjango, entšangbe tsëntsaca, Jesusbe natsanoica.

<sup>20</sup> Jesús tojáninye cha chë šocá jáshnama bëtsobenama chënga puerte imojtsošbuáchema. As, chë jama ndobenábioye tbojaniyana: “Bacó, acbe bacna soyënga tcbontsebooperdoná ca.”

<sup>21</sup> Chora chë ley abuátambayënga y chë fariseunga mëntšá tmojanontsé juabnayana: “Quem boyabása ndoñe tšabá Bëngbe Bëtsabiamá quenátichamo; mo chábioye cuafjoyenguangcá entsemna. Ndocna entšá quenátobena bacna soyëngama inya japerdónana; nye Bëngbe Bëtsá aíñe ca.”

<sup>22</sup> Pero Jesús yojtsetátšëmbo ntšamo chënga imojtsejuabnayama; as tojanëyana: “¿Ndáyeca tšëngaftangbe ainaniñe chca šmojtsejuabná?”

<sup>23</sup> ¿Tšëngaftangbiamá ndayá más paselo nántsemna tšëngaftangbe delante jayanama: ‘Acbe bacna soyënga tcbontseperdoná’, o jayanana: ‘Matëtsbaná y motsa ca’?

<sup>24</sup> Y chca, morna atše cbochanjínÿanÿiye, chë Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

As Jesús chë jama ndobenábioye tbojanianyana: “Atše cbëyana, matëtsbaná, tjuashe mesocñe y acbe yebnoye motsatoñe ca.”

<sup>25</sup> Cachora chë jama ndobená tojtantsbaná entšangbe delante, chë cha inajájona tjuashe yojescñe y Bëngbe Bëtsábioye atschuanaye chentšana yojsatoñe.

<sup>26</sup> Chama nÿetsca entšanga imojénjnayaye y Bëngbe Bëtsá imojtsatschuanaye. Y corente auatjanánënga imojtsichamo: “Mënté bëts soyënga tmonjinÿe ca.”

*Jesús, Levíbioye tbojanchembo chabuastama*

*(Mt 9.9-13; Mc 2.13-17)*

<sup>27</sup> Chca yojochnëngüentšana, Jesús chentšana tojëftsanbocna y canÿe entšábioye tbojáninÿe, Leví ca uabainá, chë entšángbioye impuesto Romocama atjanayentše inétsofbemañe. Chora Jesús tbojanianyana: “Smasto ca.”

<sup>28</sup> Y Leví lempe tojésanboshjona, tojantsbaná y Jesús tbojanasto.

<sup>29</sup> Chentšana, Levina bëts fiesta chabe yebnentše Jesusbiamá yojama. Y chë fiestentše imojtsemna banga impuesto atjanayënga; y inÿe entšángnaca mesëshentše imojtsetbiámama.

<sup>30</sup> Chora, chë fariseunga y chë ley abuátambayënga tmojanontsé chë Jesusbe uatsjëndayëngbiamá podesca oyebuambnayana; y chëngbioye mëntsá tmojanëyana: —¿Ndáyeca tšëngaftanga impuesto atjanayëngaftaca y bacna soye amëngaftaca šmojttesá y šmojtsofsšësná ca?

<sup>31</sup> Y Jesús tojanëjua: —Salud bomnënga ashnayá ndoñe ntsëjabótana, pero šoquëngna aíñe.

<sup>32</sup> Y atše ndoñe chiyátabo chë Bëngbe Bëtsabe bominÿiñe tšabá amënga jabáchembuama, sinó chë bacna soye amënga imomna ca juabnayënga Bëngbe Bëtsábioye jabáchembuama ca.

*Jesús tmojantjá chë Bëngbe Bëtsáftaca jencuéntama tondaye saytescama*

*(Mt 9.14-17; Mc 2.18-22)*

<sup>33</sup> Chora chënga Jesúsbioye tmojanianyana: —Juan chë Ubayanabe uatsjëndayënga y chë fariseungbe usetonënga monduamana ba soye Bëngbe Bëtsáftaca jtsencuéntayana, y chama ba soye tondaye ntjascá jtsemnana; pero acbe uatsjëndayënga nÿe nÿets tempo jesosañana y jesofšëšnañana ca.

<sup>34-35</sup> Chora Jesús tojanëjua: —Chë boyabása bouamná chë ofjanëngaftaca tojtsemnëntscuana, chëngbioye saná ndoñe ntsabuáshebenana. ¿Ntsámo chca ndoñe nántsemna? Chë tojobouamá cha chëngaftaca tojtsemnëntscuana, chë ófjanënga bëtská jasana y cháftaca oyejuayënga jtsemnana. Pero ora echanjóshjango y chë boyabása chëngbentšana mochantsánatseñe; chora cocayé chë ófjanënga echántsamna tondaye ntjascá jtsemnana. Ntsámo chë tojobouamá cha y chë ofjanëngaftaca endmëncá, cachcá endmëna atše, atšbe uatsjëndayëngaftacnaca ca —cha tojanëjua.

<sup>36</sup> Jesús mëntsánaca tojanacuntá jabuátambama: “Ndocná queonÿbatatëtše basájua tsëm entšayañe, tanguá entšayá jtarmëndama. Chca tcojamëse, chë tsëm entšayá jtsandbemana, y chë tcojuatëtše entšëjua chë tanguájuañe ndoñe tšabá ntsinÿnana.

<sup>37</sup> Y cach ndoñe, chë tojtseshayana vínoye tanguá jasabenguiñe ntjataftsuámayana. Tcojuaftsuamasna, chë jasabenga jtseshëbëfjuana y chë vínoye jtsabuáshanana; y chca, chë vínoye y chë jasabenga tondayama ntjatoservëna.

<sup>38</sup> Chíyeca co, chë tojtseshayana vínoyna tsëm jasabenguiñe juaftsuámama.

<sup>39</sup> Ndocná, chë bóchena vínoye tojatëmo y chentšana játsbošana chë tojtseshayana vínoye jatofšiyana; cha jayanana: ‘Chë bóchena vínoye tša tšabeye ca’.

## 6

### *Jesusbe uatsjéndayënga ochnayté trigo tmojanátabebe* (Mt 12.1-8; Mc 2.23-28)

<sup>1</sup> Canýe ochnayté, Jesús canýe jajajana yojtsaye; chabe uatsjéndayënga trigo imojtsaiu-atabnaye, imojtsaiúshenëcaye, y imojtsaiuasaye.

<sup>2</sup> Chë causa, básefta fariseunga tmojanatjaye: —¿Ndáyeca šmojtsama chë ochnayté jamama ndoñe quenátslesenciana soye ca?

<sup>3</sup> Y Jesús tojanējua: —¿Ndoñe šmëndualía y šmondétatšëmbo, ntšamo rey David y chabe enutënga tmojanmama shëntseca imojtsemna ora y jasama yojtsëjaboto ora?

<sup>4</sup> Chca orna, David Bëngbe Bëtsabe bëts yebnentse yojámashëngo y chë Bëngbe Bëtsá chentše yojamnama inýinýnaye tandësënga yojase, y chë cháftaca imojánajna entšágnaca yojátsataye. Y chë tandëšna nýe bachnanga belesenciana jasama. Masque David chca yojama, Bëngbe Bëtsá chora ndoñe tonjánayana David canýe bacna soye tojanma ca — Jesús tojanējua.

<sup>5</sup> Y Jesús más tojanéyana: “Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca.”

### *Chë buashana cucuatše bomna entšá* (Mt 12.9-14; Mc 3.1-6)

<sup>6</sup> Inýe ochnayté, chë judiëngbe enefjuana yebnoye Jesús tojánamashëngo y tojanontsé jabuátambana. Y chentše yojtsemna canýe entšá, catšbioica cucuatše buashanëtše bomná;

<sup>7</sup> y chë ley abuátambayënga y fariseunga chiñe imojtserrondana jinýama nderado Jesús chë ochnayté chábioye tabuanjashna, as chca chënga jtsebomnama ndaye sóyeca Jesús mal jaquédana.

<sup>8</sup> Pero Jesús chëngbe juabna yojtsetátšëmbo; asna chë buashana cucuatše bomna boyabásabioye tbojaniyana: “¡Motsbaná y chentše tsëntsaca motsa ca!” Y chë entšá yojotsbaná y entšangbe tsëntsaca yojotsaye.

<sup>9</sup> Chora Jesús chë inýengbioye tojanéyana: “¿Ndayá yojtselesenciana ochnayté jamana, canýe tšabe soye o canýe ndoñe tšabe soye? ¿Jatsbocana o jtsepochócana ca?”

<sup>10</sup> Y nýetscanga chabe chabuajana imojtsemnënga tojanënyanjé, y chë buashana cucuatše bomnábioye tbojaniyana: “Macuenýanëjaná ca.” Y chë boyabása tojanacuenýanëjaná, y tšabá chëtša yojtsatamna.

<sup>11</sup> Pero chë inýengna puerte tmojanotjayaná, y tmojanontsé enatsësnayana ndayá muanjobenaye Jesusbe contra jamana ca.

### *Jesús chë bnëtsana uta uatsjéndayënga tojanabacacá* (Mt 10.1-4; Mc 3.13-19)

<sup>12</sup> Chë tempo, Jesús tjoye tojána Bëngbe Bëtsáftaca jencuéntama; y nýets ibeta cháftaca tbojanencuentá.

<sup>13</sup> Tojanbinýna ora, chabe ústonënga tojánachembo, y chënguentsana tojanëbuáyana bnëtsana uta uatsjéndayënga, chë ndëmuanýenga “chabe ichmónënga cánaca” tojanëbobaye.

<sup>14</sup> Chënga imojamna: Simón, chë Pedro cánaca Jesús tbojanabobayá; Andrés, Simonbe catšata; Santiago y Juan, Felipe y Bartolomé,

<sup>15</sup> Mateo y Tomás, Santiago, Alfeobe uaquiñá; Simón, chë celote ca uabobainá;

<sup>16</sup> Judas, Santiagbe uaquiñá; y Judas Iscariote, chë más chcoye, Jesús uayayëngbe cucuatšifne bochjanboshjoná.

*Jesús ba entsanga yojanabuatambá y yojánashnaye*

*(Mt 4.23-25)*

<sup>17</sup> Chentsana, Jesús chëngaftaca chë tjocana tojtantsmá y canye jachañe tojanoquedá ba chabe ustonëngaftaca y ba inye entsángaftaca. Ba entsanga choye tmojánabo Judeocana, Jerusalenocana y Tiro y Sidón, chë mar béjaye béconana pueblënguentsana, Jesúsbioye oído jabuájua y chëngbe šocanëngama chauashnama.

<sup>18</sup> Y chábeyeca chë bacna bayëjbe juabna uambayënga tšabá imojtsatsmëna.

<sup>19</sup> Nyetsca entsanga tša imojtseboše y ndayánaca imojtsama Jesús jabojuama, er chábentsana bëts obenana yojtsóbocana y nyetscanga yojtsashnaye.

*Chë ndegombre oyejuayana bomnënga y ndëmuanjengbiana tša lastema yochtsemna*

*(Mt 5.1-12)*

<sup>20</sup> Jesús chabe uatsjëndayëngbioye tojanontješé y tojanëyana: “Puerte oyejuayënga tšëngaftanga, chë quem luarentša soyënga ndbomnënga, er Bëngbe Bëtsabe amëndayentša soyënga tšëngaftangbiana entsemna ca.

<sup>21</sup> “Puerte oyejuayënga tšëngaftanga chë mora oshëntsiyënga, er becá šmochantóshachaye ca.

“Puerte oyejuayënga tšëngaftanga chë mora šmošachenga, er chentsana šmochántsatenbiajuaye ca.

<sup>22</sup> “Puerte oyejuayënga šmochtsemna, entsanga chacmojtšëbuayënja ora, chacmojtšatëbuacana ora, chacmojtšëyanguá ora, y tšëngaftanga ndoñe tšabá šmontsama ca chënga chamojtsichamo ora, tšëngaftanga atšbe ústonënga bëtsemnama.

<sup>23</sup> Chë te puerte šmochjóyejuaye, er celoca canye bëts uacanánana šmochántsebomna. Chëngbe bëts taitanga, cachcá chë Bëngbe Bëtsabe juabna oyebuambnayëngaftaca tmonjanma ca.

<sup>24</sup> “Pero jtša lastema tšëngaftanga bomnëngbiana, er mora oyejuayënga jtsemnama ya bëtscá šmojóyëngacñe ca!

<sup>25</sup> “¡Tša lastema tšëngaftanga chë mora shachanëngbiana, er shëntsana šmochántsebomna ca!

“¡Tša lastema tšëngaftanga chë mora oyejuayëngbiana, er ngménama šmochanjenóbošachna ca!

<sup>26</sup> “¡Tša lastema tšëngaftangbiana nyetsca entsanga tšabá chamojtsoyebuambná ora; er cachcá chëngbe bëts taitanga monjánama chë Bëngbe Bëtsabe ndoñe ndegombre juabna oyebuambnayëngaftaca ca!” —Jesús tojanëyana.

*Chë uayayëngbiana bonshánana jtsebomnana*

*(Mt 5.38-48; 7.12)*

<sup>27</sup> “Pero tšëngaftanga, átšbioye ouenanënga cbëyana: Tšëngaftangbe uayayënga šmochtsababuánjeshana; chë tcmojtsëbuayënjëngbiana tšabe soyënga šmochtsama;

<sup>28</sup> chë tšëngaftangbiana bacna soyënga bošëngbiana, Bëngbe Bëtsá šmochtseimpadana tšabe bendicionënga chamóyëngacñama; chë tcmojóyanguanguëngbiana, Bëngbe Bëtsá šmochtseimpadana.

<sup>29</sup> Nderado ndánaca cányoica tcmojajuebjantsetase, cochjomiye chë ínyoica cachcá chacmomama; nderado ndánaca quëfsaíya tcmojuábocana, cachcá cochjonjaye acbe shabuanguañjuanaca chauetsacñama.

<sup>30</sup> Ndánaca chacmojtjañábioyna, jatšetayana; y nda ndayánaca chacmojeffcábioyna, ndoñe catjontšínjena chacmatoyema.

<sup>31</sup> Inyëngaftaca šmochtsama, ntšamo chë ínýenga tšëngaftangaftaca chamotsamama šmojtsebošcá.

<sup>32</sup> “Tšëngaftanga, nye chë tcmojtsababuánjeshanënga šmojtšababuánjeshanëse, ¿ndaye tšabe soye chca šmattsama?; er chë bacna entsángnaca chca mondbëtsama.



<sup>33</sup> O nderado, n̄ye ch̄e t̄s̄engaftangbiana t̄sabe soȳenga tmojtsam̄engbiana t̄sabe soȳenga ſmojtsam̄ese, ¿ndaye t̄sabe soye chca ſmattsama?; er bacna ent̄s̄angnaca chca mondb̄etsama.

<sup>34</sup> O n̄ye ch̄e cmocht̄echenanguama ſmojtsejuabn̄angbioye ſmojúyentsam̄ese, ¿ndaye t̄sabe soye chca ſmattsama?; er ch̄e bacna ent̄s̄angnaca mondbetsen̄antsamiana, ch̄engbentsana cachcá jt̄oȳengac̄ñama jtsobátman̄ese.

<sup>35</sup> Pero t̄s̄engaftangna cmontsamna ch̄e uayaȳenga jtsababuán̄yeshanana; y t̄sabe soȳenga ch̄engbiana jtsamana y júyentsamiana, ch̄engbentsana ndayánaca jt̄oȳengac̄ñama ntjato-batmancá. Chca, t̄s̄engaftanga uacanána cuenta can̄ye b̄ets soye ſmochanj̄oȳengac̄ñe, y celoca endm̄ena B̄engbe B̄etsabe básenga ſmochántsemna; B̄engbe B̄etsá ch̄e ndochuanaȳengaftaca y bacna ent̄sangaftácnaca t̄sabria comna.

<sup>36</sup> In̄yengbiana lastemad̄enga ſmochtsemna, nt̄samo t̄s̄engaftangbe Taitá yomncá ca” — Jesús tojánayana.

*Ndoñe ntsichámuana ch̄e ín̄yenga t̄sabá o ndoñe t̄sabá tmonjamama  
(Mt 7.1-5)*

<sup>37</sup> “Ndocá ín̄yengbiana ſmattsichamo ch̄e ndoñe t̄sabá tmontsamama, y B̄engbe B̄etsá ndoñe queochátichamo t̄s̄engaftanga ndoñe t̄sabá ſmonjama ca. In̄yengbiana ndoñe ſmattsichamo ndoñe t̄sabá tmonjama ca, y B̄engbe B̄etsá ndoñe queochátichamo t̄s̄engaftanga ndoñe t̄sabá ſmonjama ca. In̄yenga ſmochjáperdonaye y B̄engbe B̄etsá cmochanjáperdonaye.

<sup>38</sup> In̄yengbioye ſmochjatsataye y B̄engbe B̄etsá cmochántatsataye. Mo nda can̄ye biaco medidiñe b̄etscá tojajutjé, uash̄eshe y cmojtiyecá, B̄engbe B̄etsá cachcá cmochántatsataye. Nt̄samo t̄s̄engaftanga ín̄yengbioye chaſmojábiana, uabouana o ndoñe jabuache soȳenga, B̄engbe B̄etsá cachcá t̄s̄engaftangbioye cmochanjábiana ca” — Jesús tojánayana.

<sup>39</sup> Jesús quem cuéntnaca tojánayana jabuátambama: “¿Can̄ye jtaná nantsobena in̄ye jtaná jtsanachayama? ¿Chca ndoñe n̄yets útata ndaye t̄buabent̄se buanjótsat̄se?

<sup>40</sup> Ch̄e uatsjendayá ndoñe ntsemnana ch̄e buat̄embayabiama más b̄etsá. Pero chabe uatsjendayana chaojapochocá ora, cach buat̄embayacá jtsemnana.

<sup>41-42</sup> “Can̄ya chabe bominyiñe can̄ye niñ̄éfja tojtsebom̄n̄ese, cha ndoñe nt̄sobenana chabe catsátbioye jauyanana: ‘Acbe bominyentsana can̄ye polv̄eshtema jt̄sebuchjáts̄ecama ſmoleſenciá ca’. Natsana cha bontsemna cachabe bominyentsana ch̄e niñ̄éfja jt̄senobuchjáts̄ecana, t̄sabá jin̄yama jobenayama, chabe catsatbe bominyentsana ch̄e polvotema jt̄sebuchjáts̄ecama. ¡Cachcá entsemna acbiana, bacna ent̄sá ch̄e nt̄samo ndegombre tcojuabnacá ndin̄yin̄yayá! Ch̄e t̄sa bacna soye cojtsama ca acbe catsátbioye tcojauyana ora, cach aca t̄sa b̄ets bacna soȳenga cojtsamama ntjenujuaboycá; y chca, aca jamana can̄ye bacna soye. Natsana cmontsemna ch̄e cach aca ndoñe t̄sabe soȳenga cojtsamama ngm̄enaca jshatenójuaboyana y chca amana jsh̄étsajbanana, y chent̄sana cocayé cochantsobena acbe catsata juajabuáchana nt̄samo t̄sabá yomncá chaotsamama ca” — Jesús tojánayana.

*T̄sabe betiye o ndoñe t̄sabe betiye tondm̄enama, jtsotats̄ẽmbuana nt̄samo tojashajoncá  
(Mt 7.17-20; 12.34-35)*

<sup>43</sup> “Ndoñe queon̄ybat̄sm̄ena, ch̄e can̄ye t̄sabe betiyiñe podesca soye jashájonana; ni can̄ye ndoñe t̄sabe betiyiñe t̄sabe soye jashájonana.

<sup>44</sup> Betiȳenga jtsabuatumana nt̄samo cada betiye tojtseshajcá. Uchmaš̄eshentsana quenátopodena higūébé jocñana; ni uvaš̄esa, sh̄esh̄entsa betiyentsana.

<sup>45</sup> Ch̄e t̄sabe ent̄sana, chabe ainanoca t̄sabe juabn̄enga bomnentsana jtsóyebuambnayana; y ch̄e bacna ent̄sana, chabe ainanoca ndoñe t̄sabe juabn̄enga bomnentsana jtsóyebuambnayana. Er ndayá becá ainanoca tomnama ent̄sá jtsóyebuambnayana ca” — Jesús tojánayana.

*Chë uta ucuatjoniñe**(Mt 7.24-27)*

<sup>46</sup> “¿Ndáyeca tšëngaftanga atše šmnétsatsaye, ‘Utabná, Utabná ca’, y ntšamo atše stsichamcá ndoñe ntsamana?

<sup>47</sup> Cbochanjáuyana ndacá yomna nda átšbioye tojabo, atšbe palabra tojouena y ntšamo stsichamcá tojtsama:

<sup>48</sup> Cha endmëna mo canye entšacá, nda canye yebna jajebuamna becá fshantse jashenoye yojajutjo y ndëtsbenguiñe yojúcuatjoye. Béjayënga yojtsóftjajna ora, chë yebnëjana yojobuachnëngo, pero ndoñe yonjobenaye juashajayana, er chë ndëtsbenguiñe jabuache yojaúcuatjona.

<sup>49</sup> Pero nda atšbe palabra tojouena y ntšamo stsichamcá ndoñe tontsama, endmëna mo canye entšacá, nda canye yebna yojajebo nye fshantsiñe, tondayiñe ntjucuatjoycá. Béjaye yojóftjango y jabuache chë yebnoye yojobuá ora, chë yebna yojtsáshajaye y lempe yojtsopochóca ca” —Jesús tojánayana.

**7***Jesús canye Romano soldadëngbe amëndayabe bochichnayábioye tbojanshná**(Mt 8.5-13)*

<sup>1</sup> Entšángbioye chca jáuyanana tojanpochocá ora, Jesús Capernaum puebloye tojána.

<sup>2</sup> Chentše yojoyena canye romano soldadëngbe amëndayá. Cha ibnabomna canye bochichnayá puerta bonshaná, y chora cha šocá yojtsemna, ya jtsóbanama.

<sup>3</sup> Jesús ba šoquëngbioye yojáshnama encuëntayana chë amëndayá yojouena ora, báseftanga bëtsëjemëngcá amëndayënga cha tojanichamó, chauábama Jesús jaimpádama y chabe bochichnayábioye chabotseshnáñama.

<sup>4</sup> Chënga Jesúsbioye tmojánashjango y tša imojtseimpadana, mëntsá: “Quem soldadëngbe amëndayá merecido entsebuájona chacotsájabuachama;

<sup>5</sup> er cha bëngbe luarentša entšángbioye corente endábabuanyëshana, y cachá chë bëngbe enefjuana posada šonjayentšjebo ca.”

<sup>6</sup> Jesús chëngaftaca tojána. Pero chë mandayabe yebnoye imojtsebeconá ora, chë soldadëngbe amëndayá básefta amiguënga yojichamuá, Jesúsbioye mëntsá chamuauyanama: “Atšbe Utabná, ndoñe yapa matenócochinÿenana átšbioye jabama. Atše merecido tait-satobuajoñe aca atšbe yebnoye chacuamashënguama;

<sup>7</sup> chíyeca ni mo añemo chiyatentšetá jama aca jajëbenguama. Morna nye cochjayana y atšbe bochichnayá tšabá echántsatsmëna.

<sup>8</sup> Er atše sëndábamna átšbioye mándayënga y átšnaca soldadëngbe amëndayá sëndmëna. Atše canye soldádbioye stjauyana ‘motsa ca’, cha cachora jana; y ínÿabioye stjauyana ‘mabo ca’, cha cachora jabana; y nderado atšbe bochichnayábioye ndayánaca chaomama stjamánda, chánaca cachora chë soye jamana ca” —cha yojáuyana.

<sup>9</sup> Jesús chca tojanuena ora, chë mándayabiama yojenjnaná, y jobuértanëse chë ba entšanga cha ustonëngbioye tojanëyana: “Ndegombre cbëyana, ni mo nÿets Israelentše, ni canya quem boyabasacá tša ošbuachiyá chiyátinÿena ca.”

<sup>10</sup> Y chë ichmónënga yebnoye tmojtaná orna, tmojáninÿena chë bochichnayá ya tšabá yojtsatsmëna.

*Jesús tojanma canye viudabe uaquiñá cháuatayenama*

<sup>11</sup> Chca tojanopasá chentšana, Jesús yojétsaye Naín ca uabaina puebloye, y cháftaca chabe uatsjëndayënga y ba entšanga imojtsaye.

<sup>12</sup> Chë pueblo amashjuanoye yojtsebeconá orna, entšanga chë pueblentšana canye obaná imojtsábocana jauátbontsama; chë obaná canye viudabe uaquiñá inamna y nye cha uaquiñá. Bëtscá entšanga chë obanabe mamá imojtsetjëmbambnaye.

13 Bëngbe Utabná chë viudábioye tbojáninÿe ora, chabiamá tbojanongmé y tbojaniyana: “Ndoñe matošachena ca.”

14 Y jobéconase, chë ataúše tojánbojajo, y chë obaná atambayënga tmojantsá. Y Jesús chë obanábioye tbojaniyana: “Bobontse, atše cbëyana: ¡Matëtsbaná ca!”

15 Chora chë obaná tojtantsbaná y tojanontsé oyebuambnayana; y chabe mamábioye Jesús chë bobontse tbojtánatse.

16 Nÿetsca entšanga tša uatjana yojubuache chca tmojáninÿe ora, y Bëngbe Bëtsá imojtsatschuanaye, mëntšá jayanëse: “Bëngbentše canÿe Bëngbe Bëtsabe juabna oye-  
buambnayá cuatënjonÿná ca.” Y mëntšánaca: “Bëngbe Bëtsá tojabo chabe entšanga jabújabuachama ca.”

17 Y nÿets Judea luarëjana y chë chábuañe luarenache entšanga imojátatšëmbona ndayá Jesús tojanmama.

*Juan chë Ubayanabe ichmónënga  
(Mt 11.2-19)*

18 Juan, lempe ntšamo Jesús yojtsamama yojátatšëmbona; er chabe ústonënga chama tmojancuentá. As Juan, chënguentšana útata tojánachembo,

19 y Jesúsbioye yojichamuá jatjayama cha tayojamna chë Cristo, chë jabama ibo-  
janmëná, chë Uámana Uabuayaná, o ínÿabiamá jatobátmama tayojétsamna ca.

20 As chë Juanbe ichmónënga Jesúsbioye tmojanobeconá y tmojaniyana: —Juan chë Ubayaná šonjichamo jatjayama, aca ndegombre cojtsemna chë Cristo, chë jabama ibojanmëná, o šojtsamna ínÿabiamá jatobátmana ca.

21 Chë ichmónata tbojánashjango ora, Jesús banga yojtsashnaye, šocanëngama y tsetšanëngama; bacna bayëjbe juabna uambayënga tšabá imojtsatsmëna, y jtanënga tšabá yojtsatëbinÿna.

22 Chora Jesús mëntšá tojanëjua: —Motsata y Juánbioye šochjauyana ntšamo šojinÿe y šojouencá: Chë jtanënga tšabá entsatëbinÿna, chë coshetënga tšabá montsatana, chë bacna nguayanánaca šoquënga shnánënga montsatsmëna, chë tësmënga montsue-  
nana, chë obanënga tmontayena, y chë ndbomnjëmëngbioye chë tšabe noticiënga montsabuayiná.

23 ¡Puerte oyejuayá chaotsemna, nda atše ndoñe bacna soye stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanëyana.

24 Chë Juanbe ichmónata chentšana tbojésanbocnentšana, Jesús tojanontsé Juanbiamá entšanga jáuyanana, mëntšá: “Juan jinÿama šmojánbocna ora, ¿ndayá jinÿama šmojánbocana entšanga ndoyena luaroye? ¿Canÿe entšá ainaniñe tondaye añemo ndbomná, mo canÿe šëse bínÿiaca shatiyeynëscá?

25 Y ndoñese, ¿ndayá jinÿama choye šmojánbocana? ¿Canÿe boyabása uámana entšayaca bopormaná? Ndoñe. Tšëngaftanga šmondëtatšëmbo chë uámana entšayaca bo-  
pormánënga y chë bëtsá bomnánaca nÿe tondayama ntsecochinÿencá vida bomnënga, reyëngbe yebnënguiñe mondbëtsiyenama.

26 Asna, ¿ndayá jinÿama choye šmojánbocana? ¿Canÿa Bëngbe Bëtsabe juabna oyebuamb-  
nayá? Ndegombre; y cbëyana, canÿa Bëngbe Bëtsabe juabna oyebuambnayabiamá más bëtsá.

27 Cha, Juan, endmëna ndabiamá Bëngbe Bëtsá chabe uabemana palabrënguiñe tojánayana mo chabe ichmonacá, mëntšá tojánayana ora:

Cristo, atšbe entšá natsana sënjichmó acbiamá chaóyebuambama, entšanga jábuayenama aca jabama ainaniñe tšabe juabnëngaca chamotseprontánama ca.

28 Ndegombre cbëyana: Nÿets tempo entšángbeñe, ndocná quenátsmëna Juan chë Ubayanabiamá más bëtsá; masque chca, Bëngbe Bëtsabe amëndayoca chë más batšá uamaná, cha más bëtsá echántsemna ntšamo mora Juan yomnama ca” —Jesús tojánayana.

<sup>29</sup> “Nÿetsca entšanga chca Juánbioye tmojanóyeunanga y chë Romocama entšángbioye impuesto atjanayëgnaca, nÿets ainánaca tmojánayana Bëngbe Bëtsá nÿetsca soyënguiñe tšabá amá yomna ca; er tmojánenabaye ntšamo jubáyama Juan yojanamancá.

<sup>30</sup> Pero chë fariseunga y ley abuátambayënga, ntšamo jubáyama Juan yojanamancá jóyëngacñama ndoñe tmonjánbošena ora, tmojtsanaboté ndayá Bëngbe Bëtsá chëngbiana jamama yojanjuabnacá.”

<sup>31</sup> Jesús mëntšánaca tojánayana: “Cbochanjáuyana ndayacá morsca entšanga imomna, y ndayëngcá chënga imomna.

<sup>32</sup> Chënga mondmëna mo chë plazëngoca mondbetsetbiámana basetemëngcá; chëngna mëntšá jabuache jtsenatsayana: ‘Tšëngaftangbiana fsënjaflautá y ndoñe chešmatslantsá; ngmënaca fsënjaversiá y ndoñe chešmatenóbošachna ca.’

<sup>33</sup> Juan chë Ubayaná tonjánabo y ndoñe quenjatamana bëtscá entšángbeñe jtsemnana, ni tandëse jasana, ni vínoye jofšiyana; y tšëngaftanga šmotsichamo chana bacna bayëjbe juabna uambayá inamna ca.

<sup>34</sup> Morna, chë Bëngbe Bëtsá Entšá tbojanbemá tonjabo y chana aíñe entsamana bëtscá entšángbeñe jtsesayana y jtsofšëšnayana, y tšëngaftanga chabiana šmotsichamo: ‘Chana yapa uasayá y vínoye tmoyá entsemna y Romocama entšángbioye impuesto atjanayënga y bacna soyënga amëngbe amigo ca’.

<sup>35</sup> Pero Bëngbe Bëtsá endbëtsinÿinÿnaye cha nÿets osertánana bomná yomnama, chë ndayá cha tojama ora ndayá chentsana inobocna soyëngaca ca” —cha tojánayana.

### *Jesús, chë fariseo Simonbe yebnentše*

<sup>36</sup> Canÿe fariseo Jesúsbioye tbojanofja saná jauasama, y Jesús chabe yebnoye tojána y mesëshentše yojótbema.

<sup>37</sup> Chë pueblentše yojamna canÿe shembása, bacna vida bomná. Jesús chë fariseobe yebnentše yojtsesama chë shembása yojátatšëmbona; as cha chë yebnoye tojánashjango y tojanamba canÿe alabastro botellëše, jútjena canÿe botamana uanguëtše béjayeca.

<sup>38</sup> Jesusbe shecuatšentše yojoshëntsamentšiyë, šachénaca; shëchbuiyeca chabe shecuatšënga yojtsefcheacuacná y cachabe stjënashaca ibojtsatsshéchojuaye. Chabe shecuatšënga yojtonguëtsëntšiyë y chë botamana uanguëtše béjaye ibojtashecbuëscacja.

<sup>39</sup> Chë fariseo Jesúsbioye ofjaná chca tojáninÿe ora, mëntšá Jesusbiana yojtsejuabnaye: “Cha ndegombre canÿe Bëngbe Bëtsabe juabna oyebuambnayá tojtsemnëse, nantsetátšëmbo nda y mocna shembása yomna chë bontsebana shembása: canÿe bacna vida bomna shembása ca.”

<sup>40</sup> As Jesús chë farisëobioye tbojanianya: —Simón, cuentado palabra šmotsoyeuná ca.

Y chë fariseo tbojanjuá: —Arseñor, Buatëmbayá ca.

<sup>41</sup> Y Jesús tojánayana: —Canÿe entšá crocénana uyentšamianá, uta ndebénata yojánabamna. Canÿa shachna patse denario crocénana ibojandebena, y chë ínÿana, shachna bnëtsana.

<sup>42</sup> Pero chë útata tondaye ibontsebomna ndayentšana cha jëtsëntšabuáchiyama; as chë uyentšamianá nÿets útata chë ndebénana yojtsaperdónaye.

Chora chë farisëobioye tbojanianya: —Mora šmëyana, ¿chë útatentšana nda más chë uyentšamianábioye buantsebobonshana ca?

<sup>43</sup> Y Simón tbojanjuá: —Atše šontsinÿana chë más bëtscá ndebená ca.

Y Jesús tbojanianya: —Ndegombre, ntšamo endmëncá tcjayana ca.

<sup>44</sup> Jesús, chë shembásabioye jontješiyëse, Simónbioye tbojanianya: —Minÿe quem shembása. Atše acbe yebnoye sënjamashëngo y aca búyeshe ndoñe chešcatabuatsëtá atšbe shecuatšëngama. Y quem shembásana, cachabe shëchbuiyeca šontseshecjabebé y chabe stjënashaca šontseshecbójó.

<sup>45</sup> Ndoñe chešcatámocho, pero cha tonjamashëngo orscana ndoñe ntjájbanana atšbe shecuatšënga onguëtsëntšnaye.

46 “Aca bestšašañe aceitiye ndoñe chešcatsbuešcja, y chana aĩne botamana uanguëtše bėjaye šonjashecbuešcja.

47 Chcasna atše cbëyana, cha šonjinÿanÿe atšbiamna corente bonshánana yojtsebomna, er atše chabe bëtscá bacna soyënga sëntsebooperdoná; pero nda nÿe básefta bacna soyëngama stjaperdoná chana, nÿe batšatema bonshánana jtsebomnana ca.”

48 Y chora Jesús chë shembásabioye tbojaniana: “Acbe bacna soyëngama perdonaná contsemna ca.”

49 Chora chë ófjanënga chentše imnatbiámanëngna tmojanontsé enatsëtsnayana: “¿Nda quem entšá yojtsemna, chë bacna soyëngámnaca entšángbioye jtsaperdonayana ca?”

50 Y Jesús más chë shembásabioye tbojaniana: “Aca átšbeñe icošbuachéyeca, atsbo-caná cochántsemna; natjëmbana motsatoñe ca.”

## 8

### *Chë Jesúsbioye imojanájabuachana shembásenga*

1 Chca tojanopasá chentšana, Jesús bëtš y base pueblënguëjana yojánana, tšabe noti-ciënga Bëngbe Bëtšabe amëndayama entšanga abuátambaye y abuyiynaye. Chë bnëtsana uta uatsjëndayëngna cháftaca imojtsajna.

2 Básefta shembásengnaca imojtsetjëmbambnaye; chëngbentšana Jesús bacna bayëjënga tojtanëbuacna y šocanëngama tojanashná. Chënga imojamna, María chë Magdalena ca uabobainá, ndábentšana Jesús canÿsëfta bacna bayëjënga tojtanëbuacna;

3 Juana, Cuzbe shema (Cuza yojamna rey Heródesbe canÿe uajabuachaná); Susana y inÿe shembásenga; chëngna chë imojánbomna soyëngaca chëngbioye imojanëjabuáchana.

### *Chë jenabe cuento*

*(Mt 13.1-9; Mc 4.1-9)*

4 Ba pueblënguentsana mallajta entšanga tmojánbocana Jesús jinÿama. Ba entšanga jouenama tmojanobeconá ora, Jesús mëntšá tojanacuntá:

5 “Canÿe, canÿe jená jénaye jaujquëshama yojëftseboconna. Yojtsëjquëshaye orna, básefta jénaye benache juachañe yojuatquécjana; chiñna entšanga imojtsebotájaye, y jaja shloftšënga imojástjajna y imojtsósañe.

6 Inÿe meshëngna ndëtsbenguiñe yojuatquécjana. Yojuábocna orna, betesco yojtsábojo, chë fshantsiñe ndoñe yapa búyeshe yonjamna causa.

7 Inÿe meshëngna uchmëshangañe yojuatquécjana y chë uchmëshangá lempe yojtsatscué, chë jénayeca cánÿiñe yojuábocna ora.

8 Inÿe meshëngna, uanguaniñe yojuatquécjana. Yojuájua orna, bëtscá yojuashájona; canÿe jénayentsana nÿa mo patse meshënga yojuashájona.”

Jesús chca jacuéntama tojanpochocá ora, tojanáyebuachena: “Chë jouenama tmojt-sobenënga, šmochjouena ca.”

### *Ndáyeca Jesús cuentëngaca yojánabuatambaye*

*(Mt 13.10-17; Mc 4.10-12)*

9 As chora chabe uatsjëndayënga tmojantjá: —¿Ntšamo chë cuento yojtsayana ca?

10 Y Jesús tojanëyana: —Bëngbe Bëtšá tšëngaftanga cmontsinÿanÿná nÿetsca chë mo iytëmencá yomna soyënga chabe amëndayama, pero chë inÿëngbioyna ndoñe; chë soyëngama chënga lempe cuentëngaca sëntsëtsëtsná. Chca, masque corente chamot-safšna, ndoñe chamondobená Bëngbe Bëtšabe soyënga jinÿama; y masque becá quem soyënga chamouena, ndoñe queochátësertana ca.

### *Jesús chë jenabe cuentama tojanabuayená*

*(Mt 13.18-23; Mc 4.13-20)*

11 “Chë cuento mëntšá endayana: Chë jénaye Bëngbe Bëtšabe palabra entsemna.

12 Chë benache juachañe yojuatquécjána básefta jénaye endayana chë básefta entšanga Bëngbe Bëtsabiana soyënga tmojouenënga; pero chora Satanás betsko jabana chënga Bëngbe Bëtsabe palabra jabétsabuajuanama, chca, chënga ndoñe chamondëtsošbuáchema y bacna soyënguentshana ndatsebácanënga chamotsemnana.

13 Inye entšanga mondmëna mo chë ndëtsbenguiñe yojuatquécjána jenaycá. Chë entšangna Bëngbe Bëtsabe palabra jouenana y oyejuayënga jtsemnana. Pero ndoñe nyets tempo chana jocochájuana; y chca, ndoñe bayté Bëngbe Bëtsáftaca ntjëftsemnëngana, cha ndoñe yapa tmonsasbuaché causa. Inyënga mochantsëbuayënja y Bëngbe Bëtsabeñe betsošbuáchiyama mochanjasúfrianga; chë causa, Bëngbe Bëtsabe palabra cachcá chënga mochanjesonýaye.

14 Inye entšanga mondmëna mo chë uchmëshangañe yojuatquécjána jenaycá. Chëngna Bëngbe Bëtsabe palabra jouenana, pero quem luarentša soyëngaca oyejuayënga jtsemnana yapa jesenójuabnayana, y mallajta crocëna y ba soyënga jtsebomnana yapa jésebošana; chama y ba soyëngama yapa enócochinýena causa, Bëngbe Bëtsabe soyëngama echantsebnëtjomba y ndoñe quemochátama ntšamo Bëngbe Bëtsá tojayancá.

15 Inye entšangna mondmëna mo chë uanguaniñe yojuatquécjána jenaycá. Chëngna Bëngbe Bëtsabe palabra botamana mochanjouena; tšabe ainánaca Bëngbe Bëtsabe palabriñe jtsošbuáchiyama jtseprontánëngana. Mo canye betiye puerte tšabá tojtseshajuancá, chënga bëtscá tšabe soyënga Bëngbe Bëtsabiana mochántsama. Chca mochántsama, Bëngbe Bëtsabeñe jtsošbuáchiyëse y nyetsca soyënguiñe puerte uantadënga jtsemnëse ca” —Jesús tojanabuayená.

### *Chë uajuinýanëshama cuento*

*(Mc 4.21-25)*

16 “Ndocná canye uajuinýanëshama juajuinýenana, chentšana ndaye sóyeca chëshama jtsëstama o jtsnëshama tajsoye jtsajájuama; juajuinýenana ndayá tsbanánoca juajájuama, chë luarentše amashjuanëngbiana chaotsebínýnana.

17 Er ndocna yoiytëmena soye, ntjinýcá queochaisoquéda, y chë entšangbiana ndótatšëmbo soye, ntsotatšëmbcá queochaisoquéda.

18 “Chcasna, botamana šmochjouena, er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama ndoñe tontsebošá, chë nye batsá ibosertana soyëngama bochantsebnatjëmbo ca” —Jesús tojánayana.

### *Chë Jesusbe ndegombre pamíllanguentsënga*

*(Mt 12.46-50; Mc 3.31-35)*

19 Chora, chabe mamá y chabe catsátanga chë Jesús yojtsemnentše tmojánashjajna, pero ndoñe imontsobena chábioye jobéconana, yapa entšanga causa.

20 As canya Jesúsbioye mëntsá tbojanianana: —Acbe mamá y acbe catsátanga shjoca montsemna y montseboše aca jinýama ca.

21 As Jesús tojánayana: —Chë Bëngbe Bëtsabe palabra tmojouenënga y ntšamo tmojouencá tmojtsamënga jtsemnana atšbe mamá y atšbe catsátanga, atšbe ndegombre pamíllanguentsënga ca.

### *Jesús chë binýia y chë béjaye bonguana yojëtsbema*

*(Mt 8.23-27; Mc 4.35-41)*

22 Canye te, Jesús chabe uatsjëndayëngaftaca canye barquëshoye tojánamashëngo y chënga tojanéyana: “Uafjajónaye chenguana cuajna ca.”

As tmojána;

23 y imojtsenachnëjuanëntscuana Jesús yojtsomaná. Ndeolpe, chë béjayiñe corente jabuache binýia yojóshjango y yojontsé béjaye chë barquëshoye jtsobuajútjiana. Y chca, chëngbiana puerte resjo yojtsemna.

24 Chora chë uatsjédayënga tmojána Jesús jetsefšenama y mëntšá tmojanianyana: — ¡Buatëmbayá! ¡Buatëmbayá! ¡Montsenatjëmbambana ca!

Chora Jesús tojantsbaná y chë binýia y chë bêts olëshëngoye tojanmandá: “Bonguana sochtsemna ca.” Y chë binýiayana tojanëjbana y lempe bonguana yojsatsmëna.

25 Chentšana Jesús chabe uatsjédayënga tojanëyana: —¿Bëngbe Bëtsá tšëngaftanga jujabuáchama yobenama, cabá ndoñe šmontsošbuaché ca?

Y chënga auatjanánënga y ojanánënga mëntšá imojtsenatsëtsnaye: —¿Nda quem boy-abása yomna? ¡Cha tojamandá ora, masque chë binýia y chë béjaynaca joyeunayana ca!

*Chë Gerasa luaroca bacna bayëja uambayá*

*(Mc 8.28-34; Mc 5.1-20)*

26 Chentšana Gerasa ca uabaina luaroye tmojánashjajna, Galilea ndirichiñe.

27 Jesús fshantsoye tojánastjango ora, chë pueblucana canýe entšá chábioye tojánabo. Cha ya bayté bayëjbe juabna yojtsebomna, ndocna entšayá yonjanichëtjona; y yebniñe ndoñe yonjaniyena, sinó obanëngbe cuevëshënguenache.

28 Chë entšá, Jesúsbioye tbojáninýe ora, chabe natsanoica yoJoshëntsamentšiyë y mëntšá yojsáyebuache: —¿Ndayá átšeftaca cojtseboše, Jesús chë celoca Bëngbe Bëtsabe Uaquiñá? ¡Diosmanda ndoñe šcatjatsetšená ca!

29 Chca tbojanianyana, er Jesús tojanmandá chë bacna bayëjbe juabna chábensana chauese bocnama. Ba soye chë bayëja yojánama chë entšá ndoñe tšabá chaotsemnama. Chë entšanga imojuamana cucuatšentsana y shecuatšentsana cha jtsëtsbuayana bonguana chaotsemnama, pero chana jtsatabebiana, y chë bacna bayëjbe mándoca entšanga ndoyena luarëngoye yojánachana.

30 Jesús chë boyabásabioye tbojantjá: —¿Ntšamo cabaina ca?

Y cha tbojanjuá: —Atše sënduabaina Legión ca.

Cha chca tojánayana, er chábeñe ba bacna bayëjënga tmojánamashjna.

31 Y chë bayëjënga Jesús tmojanimpadá, chë corente uabouana tboye ndoñe chaondíchamuama.

32 Chentša béconana ba cotsënga imnajena, tjoca imnétsosañe; as chë bayëjënga Jesús tmojanimpadá chë cotsëngbeñe jamashjna chaulaesciama, y Jesús aíñe chca tojanalesenciá.

33 As chë bayëjënga chë entšábentsana tmojésanbocana y chë cotsëngbeñe tmojánamashjna; y chentšana, chë cotsënga batsjocana peñësëjana uafjajónayoye imojtsoshbuetše y yojsatajo.

34 Chë cotsënga anýenënga chca yojobásama tmojáninýe ora, chentšana tmojtsanacheta y tmojána chë soye jacuéntama chë puebluca y chiñe luarenache.

35 Entšanga tmojánbocana ndayá tojanopasacá jinýama, y Jesús yojtsemnoye tmojánashjajna ora, tmojáninýe chë entšá chë ndábentsana bayëjënga tmojtanbocna, Jesúsbe shecuatšentše yojsótbemañe, entšayá uichëtjoná y chabe nýets juábnaca. Y chë entšanga chama corente imojouatjaná.

36 Ntšamo yojobasacá tmojáninýëngna entšángbioye tmojanacuntá ntšamo chca chë bacna bayëjbe juabna uambayá chora ya tšabá yojsatsmënana.

37 Chentšana, nýetscanga chë Gerasa luarentše oyenënga Jesúsbioye imojtseimpadana chë luarentšana ínýoye chaotsoñama, er chënga corente imojtsauatja. As Jesús chë barquëshoye tojtanamáshëngo y chentšana tojtsanoñe.

38 Chë entšá chë ndábentsana bacna bayëjënga tmojtanbocana, Jesúsbioye tbojanimpadá cháftaca jama chabolesenciama; pero cha ndoñe tbonjanlesenciá. Jesús tbojanmandá chauatoquedama y mëntšá tbojanianyana:

39 “Ache yebnoye motsatoñe y cochjácuntaye lempe ntšamo Bëngbe Bëtsá acbiama tojamcá ca.”

Chentšana chë boyabása yojsatoñe, y nyets pueblëjana tojanacuntá ntšamo Jesús chabiamá tojanmá

*Jesús canye shembásabioye tbojanshná y tojanma Jairëbe bembetema cháuatayenama (Mt 9.18-26; Mc 5.21-43)*

<sup>40</sup> Jesús chë uafjajónaye chenguánoica tojtashjango ora, nyetsca entsanga oye-juayënga tmojtanojja, er nyetscanga chabiamá imojanobátmana.

<sup>41</sup> Chora tojánashjango canye entsá, Jairo ca uabainá. Cha inamna chë pueblentse chë judiëngbe enefjuana yebnentša mandayá. Jesusbe shecuatšentše yoJoshëntsamentšiyey y ibojtseimpadana chabe yebnoye cháuama;

<sup>42</sup> er chë nye canye bembe cha ibnabomná, bnëtsana uta uata bomná, chora ya jóbanama yojtsemna.

Y Jesús yojsayëntscuana, chë entsanga chábioye imojtsojuatsëntšenaye.

<sup>43</sup> Chë entsanguentše yojsayey canye shembása, oboftjajuanánaca šocá; cha ya bnëtsana uta uata chca inapadecena. Lempe ntšamo yojanbomncá ashnayëngbioye atóbocayinë yojtsepochóca, y ndocná yonjobenaye cha jáshnana.

<sup>44</sup> Chë shembásana stëtšoicana Jesúsbioyey yojobeconá y chabe entsáyá sibuájua tojanábojajo. Y cachora chë oboftjajuanana ibojtsobojuána.

<sup>45</sup> Chora Jesús tojanatjá: —¿Nda šjabojajo ca?

Nyetscanga imojtsichamo ndoñe ca; as Pedro tojánayana: —Buatëmbayá, entsanga cmontsatsëntšená y cmontsayájuatsëntšenaye ca.

<sup>46</sup> Pero Jesús cachiñe tojánayana: —Pronto nda šojábojajo, er atše sënjasenté obenana átšbentšana jóbcnana, mo nda stjashna orcá ca.

<sup>47</sup> Chë shembása tojáninye Jesús yojtsetátšëmbo cha tbojánbojajuama. As chora, ngmëmnayá tojána y Jesusbe shecuatšentše yoJoshëntsamentšiyey; y nyetscangbe delante tojanobuambá, ndáyeca tbojánbojajuama, y ntšamo cachora tšabá tojtanoquedama.

<sup>48</sup> Chora Jesús tbojaniyana: —Bembe. Bëngbe Bëtsábeñe icošbuachéyeca shnaná contsatsmëna. Natjëmbana motsatoñe ca.

<sup>49</sup> Jesús cabá yojsóyebuambnantscuana, chë judiëngbe enefjuana yebnentša mandayábocana canya tojánashjango, y chë mandayábioyey tbojaniyana: —Acbe bembe ya tontsóbana; ndoñe más chë Buatëmbayábioyey matébëyabomana ca.

<sup>50</sup> Pero Jesús chë soyey tojanuena; as chë mandayábioyey tbojaniyana: —Ndoñe matauatjana. Nye Bëngbe Bëtsábeñe cochtsošbuáchiyey y acbe bembe tšabá echántatsmëna ca.

<sup>51</sup> Chë yebnoyey tmojánashjajna ora, Jesús ndoñe tonjanalesenciá banga choyey jamashjnama, nye Pedro, Juan y Santiago y chë shembásetembe bëtsëtsatna aïñe.

<sup>52</sup> Nyetscanga imojtsenóbošachiye y ngmënaca imojtsóyebuambnaye, pero Jesús tojanëyana: “Ndoñe matenóbošachengana. Cha ndoñe chenatóbana; cha nye endëtsomañe ca.”

<sup>53</sup> Chë entsanga Jesúsbioyey nye imojtsáfchayey, er chënga imojtsetátšëmbo chë shembásetema obaná yojtsemnana.

<sup>54</sup> Chora Jesús chábioyey tbojanábuacushache y jabuache tbojaniyana: “¡Shembásetema, matëtsbaná ca!”

<sup>55</sup> Y cha tojtanyena y cachora tojtantsbaná; y Jesús tojanamëndá chë shembásetema saná chamuajuatšë, chaosama.

<sup>56</sup> Chë shembásetembe bëtsëtsata puerte ojnanánata ibojtsemna; y Jesús tojanamëndá, ndayá tojanopasama ndocnábeñe ntsecuëntayana.

## 9

*Jesús, chabe uatsjëndayënga tojanichamó, Bëngbe Bëtsabe amëndayama jábuayenama (Mt 10.5-15; Mc 6.7-13)*



<sup>1</sup> Chentšana, Jesús chabe bnětsana uta uatsjėndayėnga tojánachembo, y mando y obenana tojanatsatá bacna bayějėnga entšángbentšana jtėbuacanama y šocanėngama jashnayama.

<sup>2</sup> Tojanichamó Bėngbe Bėtsabe amėndayama jábuayenama y entšángbioye jashnayama.

<sup>3</sup> Y mėntšá tojanėyana: “Benachińama tondaye šmattsambaye: ni jatjonėfja, ni shecnaja, ni saná, ni crocėnana; ni inje entšėjua jenotrócama cach ndońe.

<sup>4</sup> Canje yebnentše posada chacmojúyentšame ora, chentše šmochjoquėda inje puebloye játantscuana.

<sup>5</sup> Nderado ndayentše posada ndońe chacmonjuyentšame, chentšana šmochjėsebocana y shecuatšentša polvėshe šmochjėsenstoto, chca, chėngbioye jinjanjıyama chėnga ndońe tšabá tšėngaftangaftaca tmonjamama ca” —Jesús tojanabuayená.

<sup>6</sup> Asna chė uatsjėndayėnga tmojėftsanbocana y tmojana, njeťsca chė base pueblotėmėnguenache chė tšabe noticiėnga abuyayınaye y entšanga šocanėngama áshnaye.

### *Herodes y Jesús*

*(Mt 14.1-12; Mc 6.14-29)*

<sup>7</sup> Jesusbiana y ntšamo yojtsanopasánama rey Herodes tojántatšėmbona; y ndońe yontsetátšėmbo ntšamo jtsejuabnayana, er báseftanga imojtsanichamo Juan chė Ubayaná obanėnguentšana tojtanayena ca,

<sup>8</sup> Injėnga imojtsanichamo chė Bėngbe Bėtsabe juabna oyebuambnayá Elías cachińe tojánbocna ca, y injėngna canja chė tempo imojanmėna Bėngbe Bėtsabe juabna oyebuambnayėnguentšá obanėnguentšana tojtanayena ca.

<sup>9</sup> Pero Herodesna tojánayana: “Cach atše sėnjanmandá Juanbe bestšaše chamotsėťjanguama. ¿As, nda cha nántsemna, chė ndabiana chca soyėnga jťsóyebuambnayana sėntsuenana ca?”

Chıyeca Herodes yojtsenguaye ntšamo jamėse Jesús jinjama.

### *Jesús shachna uaranga boyabásenga saná tojanacaredadó*

*(Mt 14.13-21; Mc 6.30-44; Jn 6.1-14)*

<sup>10</sup> Chė Jesús tojánichamonga chábioye tmojtanashjango ora, lempe ntšamo chėnga tmojanmama tmojancuentá. Y Jesús, nje chėnga jėťsėbiatšese injıoye tojťsanońe, Betsaida ca uabaina puebloye.

<sup>11</sup> Pero chė entšanga chė soye tmojántatšėmbona, y as tmojanasto; y Jesusna tšabá chėnga tojanėbuaja, y Bėngbe Bėtsabe amėndayama yojťsėťsėťsnaye, y chė šoquėnga imojťsemnėngbioye tojanashná.

<sup>12</sup> Ya jetińe yojťsobiamná orna, chė bnětsana uta uatsjėndayėnga Jesusbioye tmojanobeconá y mėntšá tmojanıyana: —Chė entšanga cuantichamuá, jóchnama y saná jonguangońama chamotsama chė bėconana pueblotėmėnguenache y luarėnguenache; er quem luarińe ndocná quenatıyena ca.

<sup>13</sup> Jesús chora tojanėyana: —Tšėngaftanga saná chėngbioye šmochjacaredádaye ca.

Pero chėnga tmojanjuá: —Nje shachna tandėse y uta beónata fsėntsebomna; njeťscangbiana saná jábuámıyama nderado nda tojasna, aíńe cuanjacaredádaye ca.

<sup>14</sup> Er mo shachna uaranga boyabásenga imnamna. Pero Jesusna chabe uatsjėndayėnga tojanėyana: —Mamėndá njeťscanga chamotbiamama shachna bněťsáťsanėnga ca.

<sup>15</sup> As chėnga chca tmojanma y njeťsca entšanga tmojanotbiana.

<sup>16</sup> Chora, Jesús chė shachna tandėse y chė uta beónata tojanca, y celoye tojanontješė, Bėngbe Bėťsábioye chama tbojtanchuá, tojanjatá y chabe uatsjėndayėnga tojanantregá entšángbioye chamuatšatama.

<sup>17</sup> Njeťsca entšanga tmojanse jťoshachaye njeťsá, y cabá bnětsana uta sbarėco tmojanajutjė chė ojamnėťmėngaca.

*Pedro tojánayana, Jesús chë Cristo bétsemnama*

*(Mt 16.13-19; Mc 8.27-29)*

<sup>18</sup> Canye te, Jesús canya Bëngbe Bëtsáftaca ibojtsencuéntaye ora, chabe uatsjédayënga cháftaca imojtsemna. Chora tojanatjá: —¿Nda atse bétsemnama entsanga imojtsichamo ca?

<sup>19</sup> Y chënga tmojanjuá: —Báseftanga montsichamo Juan ca, ínÿengna Elías ca, y ínÿengna canye Bëngbe Bëtsabe juabna oyebuambnayá tempscá mora tojtayena ca.

<sup>20</sup> As Jesús tojanatjá: —Y tšëngaftangna, ¿nda atse bétsemnama ntšamo šmochjayana ca? Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

*Jesús tojánayana cha ibojamna jóbanana y jtayenana*

*(Mt 16.20-28; Mc 8.30-9.1)*

<sup>21</sup> Pero Jesús corente chënga tojanamëndá ndocnábeñe chama ntsecuéntayana.

<sup>22</sup> Y mëntšá cachabiana tojánayana: —Chë Bëngbe Bëtsá Entšá tbojanbemá bontsemna puerte jasúfriana, chë judiëngbeñe bëtsëjemëngcá amëndayëngbiana, chë judiëngbe bachnangbe más uámana amëndayëngbiana y ley abuátambayëngbiana uabotená jtsemnana. Entšanga mochanjóba, pero unga tianoye cha echántayena ca.

<sup>23</sup> Chentšana nÿetsca entsanga tojanéyana: “Nda atšbe uatsjendayá jtsemnama tojtseboše, cháuyana nÿe Bëngbe Bëtsá yobena sempre chabe vidiñe jtsemándayama, chabe quem luarentša soyënga cachcá chauesonÿá atse juastama, y cada te chaotseprontana átsbeyeca jasúfriana, y cruciñe jobanámnaca.

<sup>24</sup> Nda tojtsama quem luarentše bëtscá soyënga jtsebomnama y atšbiana jasúfriana ndoñe tontseprontana, chë nÿetsca tescama yomna tšabe vida echanjobuetše. Pero nda quem luarentša soyënga cachcá tojëftsonÿá atse juastama, masque chaóbana, chë nÿetsca tescama yomna tšabe vida echántsebomna.

<sup>25</sup> Er ¿ndayama entšá buanjosería nÿetsca quem luarentša soyënga jtsebomnana, cha pochocaná jtsemnama tojtsá y chë nÿetsca tescama yomna tšabe vida tojtsoperdese?

<sup>26</sup> Er ndëmuanÿe entšá, atšbiana o atšbe buayenana soyëngama tojtsëuatja, chë Bëngbe Bëtsá Entšá tbojanbemánaca chabiana echantsëuatja, cha chabe bëts buashinÿinÿaniñe chaojésabo ora, chabe Taitabe bëts obenánaca y chabe angelotémëngaftaca adoraná.

<sup>27</sup> Ndegombre cbëyana, báseftanga muentše montsemnënga quemochatóbana, Bëngbe Bëtsá chabe obenánaca entšángbeñe jabomándama jabana ntjëftsinÿcá ca” —cha tojánayana.

*Jesús inÿetsá tojanobinÿná*

*(Mt 17.1-8; Mc 9.2-8)*

<sup>28</sup> Mëntšá tojanopasá: Chca palabrënga tojanoyebuambá chentšana posuftaytese, Jesús tojëftsanëbiatše Pedro, Santiago y Juan, y canye tjoye tojántsua, Bëngbe Bëtsáftaca jencuéntama.

<sup>29</sup> Bëngbe Bëtsáftaca ibojtsencuéntantscuana, chabe jubiá inÿetsá yojtsinÿna, y chabe uichëtjonëjuangá tša uafjantsëjuangá yojtsamna y tša yojtsabuashinÿinÿana.

<sup>30</sup> Chora uta boyabásata tbojanonÿná, Jesúsftaca ibojtsencuéntaye. Chata ibojamna Moisés y Elías;

<sup>31</sup> corente buashinÿinÿaniñe ibojtsemna, y chënga imojtsencuéntaye ntšamo Jesús Jerusalenoca jasúfriana y jóbanana.

<sup>32</sup> Masque Pedro y chabe enutata tša ocnayënga imojtsemna, nÿe imojtsefšna y tmojáninÿe Jesúsbe juachañe tša yojtsebuashinÿinÿana y chë uta boyabásata cháftaca ibojtsemna.

<sup>33</sup> Chë uta boyabásata Jesúsbentšana ibojoluára ora, Pedro, Jesúsbioye tbojaniana: “Bu-atëmbayá, itša tšabá bëngbiana cuanmëna muentše jtsemnana ca! Mora fchanjapórma

unga tambotémenga: cányetema acbiana, ínyetema Moisesbiana y ínyetemna Elíasbiana ca.”

Pero Pedro ndoñe yontsetátšëmbo ntšamo yojtichámuama.

<sup>34</sup> Y chca yojtsoyebuambnantscuana, canye jantšetěshe yojóbema, y chěngbioye yojáutsbotse, y chěnga chě tsoye imojtsemnama tmojáninye ora, chě uatsjéndayěnga chama imojtsauatja.

<sup>35</sup> Chora chě jantšetěshoicana canye oyebuambnayana tojanóbocna, měntšá: “Mua atšbe Uaquiñá endmēna, atšbe uabuayaná; cha šmochtseyeunana ca.”

<sup>36</sup> Chě oyebuambnayana tmojanuentsšana, tmojáninye Jesús canya yojtsemna. Chě uatsjéndayěnga iyťeca imojtsemna, y chě tempo ndocnábioye chama imonjuenaye.

*Jesús, canye basa bacna bayějbe juabna uambayábioye tbojanshná*

*(Mt 17.14-21; Mc 9.14-29)*

<sup>37</sup> Yěfsana, chě tjocana tmojtantsmá ora, ba entsanga tmojánbocana Jesús jajébenguama.

<sup>38</sup> Chora, chě entsanguentsšana canye boyabása tojanontšé měntšá uayebuáchana: — Buatěmbayá, Diosmanda atšbe uaquiñá minye. Nye cha atšbe uaquiñá endmēna;

<sup>39</sup> y mora, bayějbe juabna chábioye bontsěsháchichana, y nye ndeolpe jóntšana yoyana, ataque joshachana y uayoicana shashiye jtsabocanana. Y chábentsšana chě bayěja ndoñe betscó ntjésebocnana, y cuerpiñe corente maltrataná jeseboshjonana.

<sup>40</sup> Acbe uatsjéndayěnga sěnjaimpadá chě bayěja chábentsšana chamuatábocnama, pero ndoñe chematobená ca.

<sup>41</sup> As Jesús tojánayana: —¡Nyětšá ndošbuáchiyěnga y bacna entsanga! ¿Buetayté šojtsemna tšěngaftangaftaca jěftsemnana y jtsěuantánana ca?

Chora chě boyabásabioye tbojanianyana: —Moye chě uaquiñá mánatse ca.

<sup>42</sup> Chě basa yojtsebeconá ora, chě bacna bayěja chábioye tbojanshajayé y inye ataque tbojaněshache. Pero Jesús chě bayějbioye tbojanácacana, chě basetěmbioye tbojanshná y chabe taitábioye tbojtaněntregá.

<sup>43</sup> Y nyětscanga puerte ojanáněnga imojtsemna, Běngbe Bětsá tša obenana bomná inamnama.

*Jesús cachiñe tojánayana cha ibojamna jóbana y jtayenana ca*

*(Mt 17.22-23; Mc 9.30-32)*

Nyětscá entsanga, ndayá Jesús yojtšamama ojanáněnga imojtsemněntscuana, chabe uatsjéndayěnga cha tojaněyana:

<sup>44</sup> “Quem soye tšabá šmochjouena y ndoñe chacmonděbnětjomba: Chě Běngbe Bětsá Entšá tbojanbemá entsangbe cucuatšine mochanjáboshjona ca.”

<sup>45</sup> Pero chěnga ndoñe yontsósertana ntšamo Jesús yojtšětsětnacá, er Běngbe Bětsá ndoñe tonjanalesenciá chama chaósertama; y imojtsauatja Jesús jaimpádana chama chauabuayenama.

*¿Nda chě más uamaná yomna?*

*(Mt 18.1-5; Mc 9.33-37)*

<sup>46</sup> Chě tempo, chě uatsjéndayěnga tmojanontšé enatsětsnayana, nda chě más uamaná bětsemnama.

<sup>47</sup> Jesús yojtsetátšëmbo ntšamo chěnga imojtsejuabnayama; asna, canye básetema tbojánishache, chabe juachaca tbojántbema,

<sup>48</sup> y chěngbioye tojaněyana: “Nda átšbeñe ošbuachiyá bětsemnama, quem basetěmbioye tbojofja, chana atše jofjana; y nda atše šojofja, chana chě nda šojichmó chábioynaca jofjana. Chíyeca, tšěngaftanguentše chě más nduamaná, cha chě más uamaná entsemna ca.”

*Nda běngbe contra ndoñe tontsemná, běngaftaca jtsemnana*

*(Mc 9.38-40)*

<sup>49</sup> Juan, Jesúsbiöye tbojaniana: —Buatëmbayá, bënga fsënjinye canye boyabása y cha aca jótšëmbonëse, entšangbentsana bacna bayëjbe juabna endëtëbuacana; pero cha bëngaftaca ndoñe quenátsmëna causa, chama fsënjesauyaná ca.

<sup>50</sup> As Jesús tbojanjuá: —Ndoñe šmatjuauyaná; er nda bëngbe contra ndoñe tontsemná, bëngaftaca jtsemnana ca.

### *Santiago y Juánbiöye Jesús tojanëcácana*

<sup>51</sup> Jesús celoye jtama yojtsobeco ora, nyets añémoca cha yojtsejuabnaye Jerusalenoye jama.

<sup>52</sup> Natsana báseftanga tojanichamó, y chënga tmojána canye base pueblotémoye Samaria luaroca, posada chabiamana janguangoñama;

<sup>53</sup> pero chë luarentša entšanga ndoñe tmonjánbošena posada juantšamiana, er tmojántatšëmbona cha Jerusalenoye yojétsayama, chë chëngbe uayayëngbe uámana pueblöye.

<sup>54</sup> Chabe uatsjëndayata, Santiago y Juan, chë soye tbojáninye ora, Jesús tmojaniana: “Bëngbe Utabná, ¿quetseboše bëndata fchaimandá celocana íñeshe chaótsatše y quem entšanga chaotsapochóca ca?”

<sup>55</sup> Pero Jesús yojobuértana y chátbiöye tojtsanëcácana, chca juabna bomna causa.

<sup>56</sup> Chentšana chënga inye pueblotémoye tmojtsanoñe.

### *Chë Jesús juastama bošënga*

*(Mt 8.19-22)*

<sup>57</sup> Benachëjana imojtsajna ora, canye boyabása Jesúsbiöye tbojaniana: —Atšbe Utabná, atše sëntseboše aca juastana ndémoye chacojtsá choye ca.

<sup>58</sup> Y Jesús tbojanjuá: —Chë zorrënga cuevëshënga mondbomna ndayentše jtsiyenama y chë shloftsetëmëngna uajajonëshangá; pero chë Bëngbe Bëtsá Entšá tbojanbemá ndoñe quenátšbomna ndayentše jóchnama ca.

<sup>59</sup> Jesús inye entšábioye tbojaniana: —Smasto ca.

Pero cha tbojanjuá: —Atšbe Utabná, šmolesenciá atšbe taitá chjshesabotbontsañe ca.

<sup>60</sup> As Jesús tbojaniana: —Chë Bëngbe Bëtsabiamana mo obanëngcá imomnënga, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsëtebuantsañe. Acna, motsa y Bëngbe Bëtsabe amëndayama entšanga cochabuayená ca.

<sup>61</sup> Inyana Jesúsbiöye tbojaniana: —Atšbe Utabná, atše sëntseboše aca juastama, pero šmolesenciá natsana atšbe pamíllangbiamana jaisodiósoftama ca.

<sup>62</sup> As Jesús tbojaniana: —Nda cachabe soyëngama tbojtsengmena, Bëngbe Bëtsabe amëndayocama ndoñe ntososervénana; er cha jtsemnana mo canye arayacá, chë tojtse-trabája ora, stëtšoye tojtsaisantješncá ca.

## 10

### *Jesús canyësëfta bnëtsana y uta entšanga tojanichamó Bëngbe Bëtsabe soyëngama jábuayenama*

<sup>1</sup> Chë soyënga chentšana, Bëngbe Utabná Jesús inye canyësëfta bnëtsana y úatnaca tojanabacacá, y utáta chabe natsana tojanichamó, chë cha ibojtsemna jama pueblëngoye y luarëngoye.

<sup>2</sup> Mëntšá chënga tojanëyana: “Canye bëts jajañe bëtská játbanama entsemna, pero peonga báseftanga; chíyeca, chentša nduñbiöye jaimpádana ba peonga chauichamó chë jaja saná játbanama. Cachcá, quem luarentše bëtská entšanga montsemna Bëngbe Bëtsábioye nduabuátmënga, y chëngbiöye chabiamana abuayiynayënga nje báseftanga. Chíyeca, Bëngbe Bëtsá moimpadanga ba abuayiynayënga chauichamó quem entšanga chábioye jábuajama.

<sup>3</sup> Motsajna; šmochjinÿe, atše tšëngaftanga cbontsichamná mo oveshënga cuenta, tjañe quešëngbeñe.

<sup>4</sup> Ndoñe šmattsambaye shecnaja, ni crocénana šmattsaiuábuenana, ni shecochëtjonëshe; y nda chacmojacheuá ora, ndoñe yapa bën chentše šmatjáisenobiamnaye.

<sup>5</sup> “Ndaye yebnentše chašmojámarshjna ora, natsana šmochjayana: ‘Lempe tšabá quem yebnentše chaotsomñe ca’.

<sup>6</sup> Y chë yebnentše chca juabna bomna entšanga tmomnësna, chë tšabiana ndegombre chentše echántsemna; pero ndoñese, chca tšabiana chentše ndoñe queochátsmëna.

<sup>7</sup> Canÿe yebnentše šmochjoquéda, y šmochjase y šmochjofsiye ntšamo chentše chacmojacaredadaycá; er chë trabajayá merecido jtsebuájonana chca juacánama. Canÿe pueblentše nÿe inÿe y inÿe yebnënguenache ndoñe matajnana.

<sup>8</sup> “Ndaye pueblentše chašmojámarshjna y tšabá chacmojúbuajentše, šmochjase ntšamo chentše chacmojacaredadaycá;

<sup>9</sup> chentša šoquënga šmochjáshnaye y šmochjáuyana: ‘Bëngbe Bëtsabe amëndayana tšëngaftangbeñe entsemna ca’.

<sup>10</sup> Pero canÿe pueblentše chašmojáshjango y ndoñe chacmonjúbuaja, chentša tsashenangoye šmochjábocana y mëntšá šmochjayana:

<sup>11</sup> ‘¡Chë tšëngaftangbe pueblentša polvëshe, chë bëngbe shecuatsënguiñe tojuanjëshe, camuentše fscuesenstëtoná, chca, tšëngaftanga chašmotsetatšëmbuama ndoñe tšabá šmonjamama! Pero masque chca, šmochtsetatšëmbo chë Bëngbe Bëtsabe amëndayana tšëngaftangbeñe entsemnama ca.’

<sup>12</sup> Ndegombre cbëyana, quem luare jopochócama te, chë luarentša entšángbioye Bëngbe Bëtsá puerte jabuache echantsacastígaye, y Sodoma puebloca bacna entšángbioye ndoñe nÿa nÿetsá jabuache ca” —Jesús tojánayana.

### *Chë nduauenana entšanga*

*(Mt 11.20-24)*

<sup>13</sup> “¡Tša lastema Corazín puebloca entšangbiamama! ¡Tša lastema Betsaida puebloca entšangbiamama! Er chë muentše Bëngbe Bëtsabe obenánaca sënjama soyënga, chë bëts pueblënga Tiro y Sidonoca chca matënjochnënguse, chentša bacna entšanga ya tempo chëngbe bacna soyëngama ngmënacama matmëntenójuabonga y Bëngbe Bëtsabe benache matmëntishache, y chca tmojamama chaotsótatšëmbuama, uajojësha entšayangaca matmëntopormanga y jatinyashiñe matmënjotbiamama.

<sup>14</sup> Pero ntšamo entšanga tmojamama, tšabá o ndoñe tšabá bëtsemnama jayanama chaojobuache ora, tšëngaftanga más bëts castigo šmochántsebmoma, chë Tiro y Sidonoca bacna entšangbe castiguama.

<sup>15</sup> Y tšëngaftanga, Capernaum pueblentša entšanga, ¿celóntscoca atsebánanënga šmochtsemna ca šmojtsejuabnanga? ¡Chë uabouana infiernoye cmochantsësetjango!

<sup>16</sup> “Nda tšëngaftanga tcmojoyauná, chana atše joyeunayana; y nda tšëngaftanga tcmo-jtsëbaté, chana atše jtsabotena; y nda atše šojtsaboté, chana chë nda šojichmó chábioye jtsabotena.”

### *Chë canÿsëfta bnëtsana y uta entšanga tmojtanashjajna*

<sup>17</sup> Chë canÿsëfta bnëtsana y úatna Jesús yojtsemnoye tmojtanashjajna, puerte oyejuayënga; y chábioye mëntšá tmojaniyana: —¡Bëngbe Utabná, aca jótšëmboñe, chë bacna bayëjëngnaca šonjoyauná ca!

<sup>18</sup> Y Jesús tojanéyana: —Ndegombre. Y tšëngaftanga Satanásbioye chca šmontseyëñjaná ora, entsemna mo Satanás celocana canÿe tcuinÿcá jtsotsatšana stjinycá.

<sup>19</sup> Atšna obenana tcbonjatšatá mëtscuayënga y alacranëngbeñe chašmotsajnama, y bëngbe uayayá Satanasbe nÿets obenana jáyëñjanama, tšëngaftanga ndocá ntjapasacá.

<sup>20</sup> Pero móyejuanga, ndoñe chë bacna bayëjenga chacmóyaunama obenana šmojtsebomnama, sinó tšëngaftangbe uabaina celoca ya yojtšábemanama, er tšëngaftanga chë nyetsca tescama yomna tšabe vida šmochántsebomna ca —cha tojanéyana.

*Jesús puerte tojanoyejuá*  
(Mt 11.25-27; 13.16-17)

<sup>21</sup> Chora Jesús, chë Uámana Espíritbeyeca, corente oyejuayá tojánayana: “Atše cbatschuá, Taita, celoca y quem luarentša Utabná. Aca, chë nýe batšá tatsëmbënga tconjanýanyé, chë tša tatsëmbënga y osertánëngbiama tcojaiytëme soyënga. Aíñe, chama cbontsadorana, Taita, aca chca chaotsemnama tcojábošenayeca.

<sup>22</sup> “Atšbe Taitá lempe chca šonjatšetá. Chë Uaquiñábioye ndocná corente quebnatábuatma; nýe chë Taitá aíñe. Y chë Taitábioye ndocná corente quebnatábuatma; nýe chë Uaquiñá aíñe, y ndëmuanýengbioye chë Uaquiñá tojtseboše nda chë Taitá yomnama jinýanyiyama, chëngnaca chë Taitábioye mochantsábuatma ca.”

<sup>23</sup> Chentsana, Jesús chabe uatsjédayëngbioye tojanobuértana y nýe chëngbioye tojanéyana: “¡Puerte oyejuayënga chë ntšamo tšëngaftanga šmontsonýacá jinýama tmojt-sobenënga!

<sup>24</sup> Er atše cbéyana, banga Bëngbe Bëtsabe juabna oyebuambnayënga y reyënga tmojánbošena chë tšëngaftanga šmontsonýá soyënga jinýana, pero ndoñe tmonjáninýe; y tmojánbošena chë šmontsuenana soyënga jouenana, pero ndoñe tmonjanuena ca” —cha tojánayana.

*Chë Samarioca tšabe entsabiama cuento*

<sup>25</sup> Canýe judiëngbe ley abuatambayá yojontsé Jesúseftaca jóyebuambayama, y jisháchichiyamna mëntšá tbojantjá: —Buatëmbayá, ¿ndayá šojtsemna jamana chë nyetsca tescama yomna tšabe vida jtsebomnama ca?

<sup>26</sup> Y Jesús tbojanjuá: —¿Ntšamo leyiñe iuábemana? ¿Ndayá chiñe condbétsaliaye ca?

<sup>27</sup> Chë ley abuatambayá tbojanjuá: —“Chë Utabná Bëngbe Bëtsá cochtsebobonshana nyets ainánaca, nyets espíritoca, nyets añémoca y nyets juábnaca”; y “ndëmua entsánaca cochtsebobonshana, ntšamo cach aca cuenobobonshancá ca.”

<sup>28</sup> Chora Jesús tbojanijana: —Tšabá šconjojuá. Chca cochtsama y chë nyetsca tescama yomna tšabe vida cochántsebomna ca.

<sup>29</sup> Pero chë ley abuatambayá tšabá jenoquédamna Jesúsbioye tbojantjá: —Y ¿ndase chë ndëmua entsánaca yomna ca?

<sup>30</sup> As Jesús tbojanjuá: —Canýe, Jerusalenocana Jericó benache canýe entsá yojtsetsmá, y básefta salteadorënga imojébëbocna. Lempe imojtsefca, chë entsáyánaca; imojtsejantšetaye y chentsana imojtsatónënga, y chë entsá batšá obaná imojéseboshjona.

<sup>31</sup> Ndeolpe, chë benachëjana canýe judiëngbe bachna yojtšachnëjuana. Chë entsábioye ibojinýe ora, nýe chabuacá yojtšëchnëguañe.

<sup>32</sup> Cachcá, canýe Levita, chë canýe Bëngbe Bëtsabe bëts yebnoca trabajayá chëjana yojtšachnëjuana; y chë entsábioye ibojinýe orna, nýe chabuacá yojtšëchnëguañe.

<sup>33</sup> “Chorna, cach benachëjana canýe samaritano ináboye. Chë entsábioye ibojinýe orna, ibojóngmia.

<sup>34</sup> Chábioye yojobeconá, aceitiye y vínoyeca ibojáshna, y lisianënguiñe entsëjuaca ibojuantsacjuá. Chabe couayiñe ibojëftsensajayiye, canýe yebnoye posada uyentsamianoye ibojuánatse, y chentše chábioye ibojëftsinyena.

<sup>35</sup> Yëfsana, chë samaritano uta denario crocénana yojenóbojatsëca, chë mo uta tesca trabajuama crocénana nyetsá, y chë posada nduíñbioye ibojesabuenaye, y mëntšá ibojauyana: ‘Quem boyabása cochtsinýena, y nderado más crocénana muabiana chacojenábojafjonasna, mëjana chaitísachnëjuana ora, chochjabáisabuenaye ca.’

<sup>36</sup> Y chcasna, ¿chë unganguentšana nda cmojtsinÿana chë entsabiamama yojtsejuabnaye cha cachacá entsá inamnama ca?”

<sup>37</sup> Y chë ley abuatambayá tbojanjuá: —Chë entsabiamama tbojanongmé cha ca.

Y Jesús tbojaniana: —Asna, motsa y cachcá cochjama ca.

### *Jesús, María y Martbe yebnentse*

<sup>38</sup> Chentshana, Jesús benachëjana yojtsaye y canÿe base pueblotémoye tojëftsanamashëngo; y canÿe shembása Marta ca uabainá, chabe yebnentse tbojanofja.

<sup>39</sup> Martna canÿe quenata ibnabomna, María ca uabainá. Cha Jesusbe shecuatšentse yojótbema chabe palabra jouenama;

<sup>40</sup> y chëntscuana Marta ba soyënga yojtsama. Cha Jesúsbioye tojanobeconá y tbojaniana: —Utabná, ¿tondayana cmontsentšamna, atšbe quenata nÿe canÿa chašonÿá lempe jamama ca? Mëyana chašúájabuache ca.

<sup>41</sup> Chora Jesús tbojanjuá: —Marta, Marta, bëtscá soyëngama contsenócochinÿena y contsenomantšná;

<sup>42</sup> pero nÿe canÿe soye endmëna chë yoiyta soye jamama. María chca jamama tojobuáyana, chë más tšabe soye, y ndocná queochatsma cha chaotsajbanama ca.

## 11

### *Ntšamo Bëngbe Bëtsáftaca cuanjencuénta*

*(Mt 6.9-15; 7.7-11)*

<sup>1</sup> Canÿe, Jesús Bëngbe Bëtsáftaca ibojtsencuéntaye canÿe luarentse. Tojanpochocá orna, canÿa chabe uatsjendayënguentsá tbojaniana: —Bëngbe Utabná, Bëngbe Bëtsáftaca jencuéntama šmabuatambá, ntšamo Juan chabe uatsjëndayëngaftaca tojanmcá ca.

<sup>2</sup> Y Jesús tojanëyana: —Bëngbe Bëtsáftaca chašmojtsencuénta ora, šmochjayana: Bëngbe Taitá, acbe uabaina chë más uámana uabainana chauesomñe.

Acbe amëndayana chaóshjango.

<sup>3</sup> Mënté šmiyatšatá, cada te šnetsëjaboto tandëse.

<sup>4</sup> Bacna soyënga fsënjama: šmotsaperdónaye;

er bëngnaca nÿetscanga chë bëngbiamama bacna soyënga amëngbioye fsëndbetsaperdónaye.

Bacna soyënga jamama šojocohëngo ora, šcochjujabuache chca ndenobuíyama.

<sup>5</sup> Jesús mëntšánaca tojanëyana: “Nderado aca acbe bacóbioye tsëntseto ora tcojá y tcojauyana: ‘Bacó, Diosmanda unga tandëse šmotsemná,

<sup>6</sup> er canÿe atšbe amigo yebnoca tonjáshjango y tondaye quetsátsbomna cha jonánjama ca.’

<sup>7</sup> Ndegombre, cha tsocana tcmojojuá: ‘Ndoñe šmatébyabomana. Bëšáša ya entsatámena y atše y atšbe básenga ya fsëntsocjá; ndoñe quetsátobena mora jotsbanana y chë tandëse jámnana ca.’

<sup>8</sup> Ndegombre, chë bacó ndoñe tonjotsbaná chë tandëse jámnama, cháftaca šuenatsëtsnámase, cha pronto jotsbanana chca uébëyabomana ndoñe tconjajbaná causa, y lempe ntšamo cmojtsajabotcá cha cmochanjoyiye.

<sup>9</sup> Chcasna, atše cbëyana: Šmochjotjañe y Bëngbe Bëtsá cmochanjátšataye; šmochjúanguango y šmochanjínÿena; šmochjachembo y cmochanjébëtafjo.

<sup>10</sup> Er ndánaca ndayá tojtsotjanañá, jóyëngacñana; y tojtsenguá cha, jónÿenana; y nda tojtsechembuanábioye jebiatëfjuana ca.

<sup>11</sup> “¿Nda tšëngaftanguentsana nantsobena, taitá tojtsemnëse, cachabe uaquiñábioye canÿe mëtšcuaye jatštayana, beona tbojtsotjanañe ora;

<sup>12</sup> o canÿe alacránashe joyiyana, shëmnëbé tbojtsotjanañe ora?

<sup>13</sup> Y chca, tšëngaftanga, bacna soyënga amënga, tšëngaftangbe basetemëngbioye tšabe soyënga jatšatayama šmojtsamanëse, ¡más chë celoca Taitá, chë Uámana Espiritu echanjátšataye, chca tmojtsotjanañëngbioye ca!” —Jesús tojánayana.

*Fariseunga tmojánayana Jesús Satanásbentsana obenana tojanóyengacñe ca*  
(Mt 12.22-30; Mc 3.20-27)

<sup>14</sup> Jesús canye entsábentsana canye bacna bayëja tbojtanábocna. Chë bayëja ndëbiá chë entsábioye tbojánbema, y chábentsana tojésanbocna ora, chë ndëbiá tojtanontsé oye-buambnayana. Y chë entsanga chama imojenjnaná;

<sup>15</sup> pero báseftanga imojtsichamo: “Beelzebú, cach Satanás, chë bacna bayëjengbe amëndayá, quem boyabásabioye obenana tbojatsetá chë bayëjenga chauatëbuacnama ca.”

<sup>16</sup> Y inyënga, Jesús jisháchichiyamna tmojanimpadá canye bëts soye chaoma, jinyan'yiyama cha celoca obenana inabomna o ndoñe.

<sup>17</sup> Pero Jesús yojtsetátšëmbo ntšamo chëngbe juabna bétsemnana. As tojanéyana: “Canye amëndayábentse entsanga tmojtsenojatá y tmojtsenáyase, cachënga jtsenpochócana; y canye yebnentse oyenënga tmojtsenojatá y tmojtsenáyase, chë pamíllanga tšabá nyets tempo ndoñe quemochátsmëna.

<sup>18</sup> Cachcá, Satanás tojtsenojatá y cachabe contra tojtsemnëse, ¿ntšamo nantsobena chabe mándayana quem luarentse jëftsebomnana? Chca séntsichamo, er tšëngaftanga šmotsichamo Beelzebube obenánaca chë bayëjenga stsatëbuacana ca;

<sup>19</sup> pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebomna chë bacna bayëjenga jtëbuacnama? Chíyecna, cachënga montsin'yin'ná ntšamo ndegombre yomnana, y tšëngaftanga ndoñe ndegombre soye šmotsichámuama.

<sup>20</sup> Y atšna, Bëngbe Bëtsabe obenánaca entsángbentsana chë bayëjenga sëndëtëbuacana; y chë soye entsin'yin'ná, Bëngbe Bëtsabe amëndayana tšëngaftangbioye tojóshjanguama.

<sup>21</sup> “Canye corente añemo bomna entsá, bëtscá ármangaca chabe yebna tojtsin'yenëse, chë tsoca tomna soyënga ndoñe ntjotšana.

<sup>22</sup> Pero inya chabiamá más añemo bomná tojabo y tbojabetseyëñaná, chë cha yojanašbuaché armangá jtsabocana y chë tobomna sóynaca; y ntšamo chë inya tojtsebošcá chë soyëngaca jamana.

<sup>23</sup> “Nda ndoñe átseftaca tontsemná, atšbe uayayá jtsemnana. Y nda átseftaca ndoñe tontsetrabája, chana atšbe contra jtsetrabájayana ca” —Jesús tojánayana.

*Ndayá inopása chë bacna entsángaftaca*  
(Mt 12.43-45)

<sup>24</sup> “Canye bacna bayëja canye entsábentsana tojésebocna ora, bojojo luarënguenache chë bayëja jtsanana, ndayentse jóchnama onguayiñe. Ndoñe tonjín'yena ora, jenójuaboyana: ‘Atšbe oyenoye, chë ndayentšana sënjëftsebocnoye chanjesshécona ca.’

<sup>25</sup> Y choye tojtashjango ora, jin'yenana lempe tšabá cha jtesamashënguama, mo tsjajniñe y prontániñe cuaftsemncá.

<sup>26</sup> Chora chë bayëja jana y inye cany'sëfta bayëjenga, chabiamá más opëjenga jobiatšana, nyetscanga choye jamashjnama, chë boyabásabeñe joyéñanama. Y chca, chë boyabása tempscama más bacna entsá jtoquédana, chora chë natsanama más bayëjenga abamna causa ca” —Jesús tojánayana.

*Chë ndegombre oyejuayana*

<sup>27</sup> Jesús chë soyënga yojtsichamëntscuana, entsanguentse canye shembása yoyuayebuáchena: —¡Puerte oyejuayá chë quem luaroye tcmojúshjango y tcmojëftseboché shembása ca!

<sup>28</sup> As Jesús tbojanayana: —Más oyejuayana bomnëngna, chë Bëngbe Bëtsabe palabra tmojouena y chca tmojtsamënga ca.

*Chë bacna entsanga Jesús tmojanimpadá canye bëts soye chaoma, chabe obenana jin'yama*  
(Mt 12.38-42; Mc 8.12)



<sup>29</sup> Entšanga más imojtsójotoye Jesús yojtsemnentše, y Jesús tojanontsé jáuyanana: “Morsca entšanga puerte bacna entšanga; chënga montsotjanañe atše canye bëts soye chaima atšbe obenana jinÿama, pero ndoñe chca quemochátinÿe, sinó nÿe chë ndayá yomna mo chë Jonásoftaca tojanopasá soycá.

<sup>30</sup> Er chca, ntšamo Jonás Nínive puebloca entšanga canye bëts soye tojaninÿanÿé Bëngbe Bëtsá obená yomnama chamotsetatšëmbuama, chë Bëngbe Bëtsá Entšá tbojanbemánaca entsinÿanÿná morsca entšángbioye, Bëngbe Bëtsabe amëndayana tojóshjanguama.

<sup>31</sup> Bëngbe Bëtsá ntšamo morsca entšanga tmojanmama yochjayana te, chë Sur luaroca reiná echanjotsaye y morsca entšangbiama echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrënga jouenama, y chë mora muentše entsemnana, Salomonbiama más uamaná endmëna.

<sup>32</sup> Chë entšanga tšabá o ndoñe tšabá tmonjamama jayanama te, chë Nínive bëts puebloca entšángnaca mochanjotsaye y mochanjayana morsca entšanga ndoñe tšabá tmonjama ca; er chënga, Jonás yojtsabuayiynaye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiama más uamaná endmëna ca” —Jesús tojánayana.

### *Chë cuerpama uajuinÿanësha*

*(Mt 5.15; 6.22-23)*

<sup>33</sup> “Ndocná canye uajuinÿanësha juajuinÿenana, canye iytëmena luaroye juajájuama, ni canye cajonëshe tajsoye, sinó canye tsbanana luaroca juajájuama, chca, chë luaroye amashjuanëngbiama chaotsebínÿnama.

<sup>34</sup> Acbe bominÿe tšabá totsomñëse, acbe cuerpama mo canye uajuinÿanëshacá jtsemnana; chíyeca aca jtsobenana, ntšamo tcojtsamcá chë bomínÿeca jtsonÿayana. Chë bominÿe ndoñe tšabá tontsemnësna, chë bominÿe tondaye ntsoobenana jamana, ntšamo tcojtsamcá chacobená jinÿama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnësna, lempe ntšamo chacojtsamcá ndoñe tšabá queochátsmëna.

<sup>35</sup> Cuedado šmochtsebomna, tšëngaftangbe ainaniñe nÿe tšabe juabnënga chaotsemnama, chca, lempe ntšamo chašmojtsamcá tšabá chaotsemnama, y bacna juabnënga ndoñe chaondëtsemnama.

<sup>36</sup> Chcasna, lempe ntšamo šmojtsamcá tšabá tojtsemnëse y ndocna bacna sóyesna, tšëngaftanga bëtscá tšabe soyënga šmochántsama; y chca, tšëngaftanga šmochántsemna mo canye uajuinÿanësha puerte tšabá tojtsebinÿnacá ca” —Jesús tojánayana.

### *Jesús chë fariseungbiama y ley abuátambayëngbiama tojánayana, chënga ndoñe tšabá montsama ca*

*(Mt 23.1-36; Mc 12.38-40; Lc 20.45-47)*

<sup>37</sup> Jesús chca jayanama tojanpochocá ora, chábioye canye fariseo tbojanofja chabe yebnoye jauasama. As Jesús tojánamashëngo y mesëshentše tojanótbema.

<sup>38</sup> Chë fariseo tojanëuatjaná, Jesús ntsacuentšabiacá jasama yojontsé causa, ndoñe ntšamo chë judiënga imojanamancá, Bëngbe Bëtsabe delante tšábenga jtsatsmënama.

<sup>39</sup> Pero Bëngbe Utabná tbojaniyana: “Tšëngaftanga fariseunga šmondmëna mo entšangcá ndëmuanÿenga chë tazëšënga y šcnenënga shjoicajana jtsóbojabiana, pero tsoyna nÿe cachcá jonÿayana. Tšëngaftanga becá jtsamana entšangbiama mo tšabengcá jtsinÿnama; pero tšëngaftangbe ainanentše jútjena entsemna nÿe jtsatbëbanama y bacna soyënga jtsamama juabnëngaca.

<sup>40</sup> ¡Juabna ndbomnënga! Tšëngaftanga ndoñe šmondëtatsëmbo, chë tšëngaftangbentsana entšanga ndayá jinÿama imobencá tojamá, chë tšëngaftangbe tsoye yomna soyëngnaca tojamama; y chíyeca, chabiama cachcá enduámama ndayá tšëngaftangbe ainanoye yomna soyënga, y chë entšangbe delante šmojama soyënga.

41 Tšëngaftanga cmontsamna, chë soyënguiñe ndayá ainaniñe yomnentšana ínÿengbioye jatšatayana, y chca, lempe ntšamo chašmojtsamcá Bëngbe Bëtsabe delante tšabá echántsemna ca.

42 “¡Tša lastema tšëngaftangbiana fariseunga! Tšëngaftanga Bëngbe Bëtsabiana jtsequëcnayana chë jajañentša sananga bnëtsanentšana canÿe soye nÿetsá, y chë binche matatëmënguentsana menta, ruda y nÿetsca binche matatëmënguentsánënaca; pero nÿe batsá jtsamana chë nÿetscanga cachca derechënga chamotsebomnama y cha jtsebomshánama. Quem soyënga cocayé cmontsamna jtsamana, chë inÿe tšabe soyënga ntjajbanacá ca.

43 “¡Tša lastema tšëngaftangbiana fariseunga! Tšëngaftanga tša jtsebošana chë judiëngbe enefjuana yebnënguenache chë más uámana luarënga jtsebomnama, y benachiñe nÿa puerte respétoca entšanga chacmotsacheuanayama ca.

44 “¡Tša lastema tšëngaftangbiana! Smondmëna mo obanënga uatbontsaniñcá, ndoñe ntsinÿnana, y entšanga ntsetatšëmbcá chiñe jtsebotájayana. Chca šmondmëna, er tšëngaftangbe ainana entsemna jútjena bacna juabnëngaca, pero entšangbiana ndoñe chca quešmátinÿna ca.”

45 Jesús chca tojánayana ora, canÿe ley abuatambayá tbojanianana: —Buatëmbayá, chca palabrënga contsoyebuambná ora, bëngbiámñaca ndoñe tšabá quecátichamo ca.

46 Pero Jesús tojánayana: —¡Tša lastema tšëngaftangbiámñaca, chë ley abuátambayënga! Mo canÿe entšá, couáybioye canÿe uauta uasmanësha tbojuasmá, y chësha ndoñe yapa chaondëtsautama tondaye tontsamcá, tšëngaftanga entšángbioye jtsamëndayana bëtscá mandënga chamotsocumplínama, pero cach tšëngaftanga ni mo batšatëmnaca jtsamana chë mandënga jtsocumplínama ca.

47 “¡Tša lastema tšëngaftangbiana! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entšanga chamotsemnama, chëngbe cuevëshënga jtsatspórmayëse; pero chë mo chëngcá, canÿe buayenana sóyeca tmojabëngbioye ndoñe ntsayaunanana. Y chë tempsquënga chca oyebuambnayëngbioye tšëngaftangbe bëts taitanga tmojtsanëbaye.

48 Chca jtsamëse, tšëngaftanga šmontsinÿanÿná, ntšamo chë bëts taitanga tmojanmca tšabá yomna ca tšëngaftanga šmojtsejuabnama, er chënga chë oyebuambnayëngbioye tmojtsanëbaye y tšëngaftangna chëngbe cuevëshënga jtsatspórmayana.

49 “Chíyeca, Bëngbe Bëtsá chabe bëts osertanánaca tojánayana: ‘Atše chëngbioye chanjichamuá atšbe juabna oyebuambnayënga y atšbiana abuayinayënga, y báseftangbioye mochantsëbaye y ínÿengbioyna mochantsécamiye ca.’

50 Y chca, nÿets castigo morsca entšángbeñe echántsemna, nÿetsca Bëngbe Bëtsabe juabna oyebuambnayënga tmojóbanama, Bëngbe Bëtsá quem luare tojanma orscana;

51 Abëlbioye tbojanóba orscana, Zacarías tmojanóbantscoñe. Zacaríasna Bëngbe Bëtsabe bëts yebnentse tmojanóba, altar y chë entšanga Bëngbe Bëtsábioye imojánadorana luariñe. Chcasna, Bëngbe Bëtsá echanjama chë oyebuambnayënga tmojanóbanama, morsca entšángbeñe nÿets castigo chaotsemnama ca.

52 “¡Tša lastema tšëngaftangbiana, chë ley abuátambayënga! Tšëngaftanga jtsamana, Bëngbe Bëtsabe soyëngama jtsetatšëmbuama entšangbiana yapa totcá chaotsemnama. Cach tšëngaftanga ndoñe quešmátobena chë soyëngama tšabá jtsetatšëmbuana, y chama jtsetatšëmbuama tmojtsebošëngbioyna ndoñe quešmatalesénciaye ca” —Jesús tojánayana.

53 Jesús chë soyënga tojánayanama, chë ley abuátambayënga y fariseunga puerte tojánetëna, y cha chentšana yojtšaisebocana ora, tmojanontsé chábioye becá tjanayana, y imojtsama ba soyëngama chaóyebuambama,

54 chca, jisháchichiyama jtsebošëse, cachá ntšamo tojayana sóyeca chënga jtsebomnama ndáyeca chábioye mal jaquédana.

## 12

*Jesús, chë bacna entsanga ntšamo ndegombre tmojuabnacá ndinÿinÿnayëngbiana tojanabaatambá*

<sup>1</sup> Chëntscuana, ba uaranga entsanga chentše tmojanójoto; tša entsanga causa, nÿetscanga imojtsenatsëntšenaye. Chora Jesús tojanontsé jóyebuambayama, y natsana chabe uatsjédayëngbioye tojanéyana: “Chë fariseungbe buatëmbana soyëngama cuedado šmochtsebomna, chënga mondmëna bacna entsanga, ntšamo ndegombre tmojuabnacá ndinÿinÿnayënga. Ntšamo chë levadura jamana nÿetsana chauábochema, cachcá chëngbe buatëmbana soyëngaca, chë fariseunga montsobena jamana bëtscá entsanga ntšamo ndoñe tšabá tontsemncá chamotsamama.

<sup>2</sup> Er ndocna yoityémëna soye, ntjinÿcá queochaisoquéda; y chë ndótatsëmbo soye, ntsotatsëmbcá queochaisoquéda.

<sup>3</sup> Chíyeca, chë mora nÿe tšëngaftangbiana šmojtsichamo soyënga, chë entsangbiana mo ibetiñcá cuaftsemna soyënga, entsanga chama botamana mochanjátatsëmbona. Y chë iytëcana šmojtsichamo soyënga, nÿetsca entsángbioye mochántsabuyiynaye, mo nda canÿe yebnentša tsbanánocana noticiënga tojtsayebuachcá ca” —cha tojanéyana.

*Nda ndegombre cuantsebiauatja*

*(Mt 10.26-31)*

<sup>4</sup> “Tšëngaftanga, atšbe amiguënga, cbochjáuyana: Ndoñe matauatjëngana nÿe chë tšëngaftangbe cuerpo japochócama imobenëngbiana, pero chentšana más jamana ndoñe ntsobenana.

<sup>5</sup> Cbochanjabuayená ndábioye cmojtsamna jtsebiauatjana: šmochtsebiauatja chë nda vida jtsabuajuánama y chentšana infiernoje jtsichámuama obenana endbomnábioye; chábioye cocayé šmochtsebiauatja ca.

<sup>6</sup> “¿Shachna jaja shloftšetémënga ndoñe nÿe uta denario crocenánama mondbétsena? Pero masque chca, Bëngbe Bëtsá chëngbiana sempre jesenójuabnayana.

<sup>7</sup> Y tšëngaftangbiana Bëngbe Bëtsá lempe endétatsëmbo, y bueta stjënëjënga tšëngaftangbe bestšašinë yomnámna. As ndoñe matauatjëngana; tšëngaftanga ba jaja shloftšëngbiana corente más šmonduámna ca” —Jesús tojánayana.

*Ndabiana Jesucristo yochjayana chabe entsá yomna ca*

*(Mt 10.32-33; 12.32; 10.19-20)*

<sup>8</sup> “Atše cbëyana, nda atšbe entsá yomna ca entsangbe delante tojayanabiana, chë Bëngbe Bëtsá Entšá tbojanbemánaca, Bëngbe Bëtsabe angelëngbe delante echanjayana chë entsá chabia yomna ca;

<sup>9</sup> pero nda entsangbe delante, atšbe entsá ndoñe yondmëna ca tojayanabiana, chë Bëngbe Bëtsá Entšá tbojanbemá, Bëngbe Bëtsabe angelëngbe delante echanjayana, cha chabe entsá ndoñe yondmëna ca.

<sup>10</sup> “Bëngbe Bëtsá bochanjaperdóna, nda chë Bëngbe Bëtsá Entšá tbojanbemabiama ndoñe tšabá tontsichamuábioye, pero chë Uámna Espíritbiana ndoñe tšabá tontsichamuábioyna ndoñe.

<sup>11</sup> “Tšëngaftanga chë judiëngbe enefjuana yebnëngoye, ntšamo entsanga bétsamama ichámëngbioye y mandadëngbioye chacmojunatse ora, ndoñe šmattsenócochinÿena ntšamo o ndáyeca šmochjenëuyanama, o ndayá šmochjayanama;

<sup>12</sup> er chë Uámna Espíritu cmochanjabuayená ntšamo jayanama tojtsemncá, jóyebuambayama chacmojtsamna ora ca” —Jesús tojánayana.

*Entšabiana resjo yomna, nÿe yapa bomnana jesejuabayana*

<sup>13</sup> Chentšana, canÿa entsanguentšá Jesúsbioye tbojanianyana: —Buatëmbayá, atšbe catšata momandá chë átšbioye otocana soyënga chašuatoyé ca.

<sup>14</sup> Y Jesús tbojanianyana: —Bacó, ¿nda atše šojábema tsëndatbe ujananayá ca?

15 Y entsángbioye tojanéyana: —Smochjinýe y cuedado smochtsebomna chë nýe yapa soyënga jtsebomnama bošama; er masque bëtscá soyënga chašmotsóbomñe, chca ndoñe quešmochátstatšëmbo aíñe tšabe vida taišmochjónýenama ca.

16 Y chora mëntšá tojanacuntá: “Inamna canýe bomna entsá, y chabe fshantsënguiñe tša jaja saná yojtsopodena.

17 Chë bomná chora mëntšá yojtsejuabnaye, ‘¿Y morna, ntšamo chjama? er ndoñe quetsátsbomna ndayentše atšbe jaja saná jtsobocjayama ca.’

18 Y mëntšá yojeniyana: ‘Chë grano uaquëcjnaye yebnënga chantsendbiama, y inýe más bëtš yebnënga chanjëtšjebo, y chiñe nýetsca atšbe jaja saná chantsóbocjaye y nýetsca atšbe soyëgnaca.

19 Y chora atše chjeniyana: Bacó, bëtscá soyënga contsebocjana, ba uatama cmochanjuáshjache. Morna, cochjóchna, cochjase, cochjatëmo, cochjóboyejuaye ca.’

20 Pero Bëngbe Bëtšá chábioye ibojauyana: ‘Obëjema, cach quem ibeta cochanjóbana; y asna, chë contsebocjana soye, ¿ndabiama yochtsemna ca?’ ”

21 Y Jesús chora tojánayana: “Chca endbopása chë nýe chabiama bomnana tojtsejuabá y bëtscá Bëngbe Bëtšabe soyënga ndoñe tonjëftsashjacháftaca ca.”

*Bëngbe Bëtšá chabe básenga jtsanýenana*  
(Mt 6.25-34)

22 Chentšana, Jesús chabe uatsjédayënga tojanéyana: “Quem soye cbéyana: Ndoñe šmattsenócochinýena ndayá smochjase o smochjofšiyë vida jtsebomnama, ni ndaye entsáyá smochjuíchëtjuama cach ndoñe.

23 Ndegombre, vida chë sanama más enduámana y cuerpo chë entsáyama más.

24 Chë ftsenga shloftšënga smochjanýe: tondaye ntjájena, ni jaja saná ntjátbanana, ni grano uaquëcjnaye yebnënga ntsebomnana; pero Bëngbe Bëtšá chënga saná jt-satšatnayana. ¡Y tšëngaftanga chë ftsenga shloftšëngbiama puerte más šmonduámana!

25 Masque chca endmëna, masque canýa tša tojesenócochinýena, ¿ntšamo nanjobenaye jamana, chë ntsachetšá vida yochtsebomnentšana canýe hora vida más jabotiyana?

26 Chcasna, nýe chë base soye jamama ndoñe šmontsobenëse, ¿ndayama chë inýe soyëngama smochjatenócochinýena?

27 “Smochjuinýe chë lirio uantšefjushangá jtsajuajnana: ndoñe ntsetrabájayana, ni ntseshabiamnayana. Pero atše cbéyana, ndegombre ni mo rey Salomón, nýetsca chabe bomnánaca, chë lirio uantšefjushangacá nýetšá botamana quenjatspormana.

28 Bëngbe Bëtšá tša botamana shácuana tojuama, y chë shácuana mënté jajoca jtsam-nana y yëfsana iñoca. Cha chë shácuanaca chca tojamëse, ndegombre tšëngaftangbiám-naca Bëngbe Bëtšá echanjama entsáyá chašmotsábomnama, ¡entšanga Bëngbe Bëtšabeñe nýe batšá ošbuáchiyënga!

29 Chíyeca, ndoñe šmattsenócochinýena ndayá jasama o jofšiyama onguayíñe;

30 er chë soyëngama quem luarentša entsanga mondbétšenocochinýena, pero tšëngaftanga ndoñe. Tšëngaftangna canýe Taitá šmondobomna, y cha endétatšëmbo ndayá cmëjabótama.

31 Más tšabana, tšëngaftanga smochtseboše Bëngbe Bëtšá tšëngaftangbe ainaniñe chaot-semándama, y chë cmojtsëjaboto soyënga nýe smochanjóyëngacñe ca” —Jesús tojánayana.

*Chë celoca bomnana*  
(Mt 6.19-21)

32 “Ndoñe matauatjëngana atšbe ústonënga, atšbe básefta oveshënga, er Bëngbe Bëtšá tšabá tbonjuínýnana chabe amëndayana tšëngaftanga jatšatayama.

33 Lempe ntšamo smobomncá smochtsatobuiye y chë ujabotëngbioye smochtsatšataye. Mo ndotanguánaye shecnajiñe crocénana cuafjacjacá, celoca tšabe

soyënga šmochjobuajo. Choca ndocna te queochaisopochóca, atbëbanënga choye ndoñe quemochátamashjna jatbëbama, y mejojón ndoñe queochatspochóca;

<sup>34</sup> er chë ndayentse tšëngaftangbe bomnana tojtsemnentša soyëngama, ainánaca tšëngaftanga šmochántsejuabnaye ca” —Jesús tojánayana.

*Bëngbe Utabná yochjésabama jtseprontánana*

<sup>35</sup> “Mo chë oservénënga, chë entsáyá uichëtjonënga y uajuinýananëshangaca chëngbe nduiño yochtashjanguama cuaftsobatmancá, tšëngaftanga šmochtseprontana Bëngbe Utabná yochjésabama.

<sup>36</sup> Chca, tšëngaftanga šmochántsemna mo chë oservénënga, tšabe entsáyaca bo-pormánënga y uajuinýananëshangaca chëngbe amëndayá casamentocana yochtashjanguama cuaftsobatmancá; y chca, chë nduiño tojabochembo ora, cachora chë oservénënga jtebiatëfjuama.

<sup>37</sup> Puerte oyejuayënga chë oservénënga, chë nduiño tojtashjango ora tmojtsefšnënga. Ndegombre cbëyana, chora chë mandayá sëndorëche echantásnaye, mesëshentse chë oservénënga echanjátbiama, y saná echanjuuatšiye.

<sup>38</sup> Puerte oyejuayënga chënga, chë tmojtsefšnënga cha tojtashjango ora, masque tsëntseto ora o bínýanoye.

<sup>39</sup> Quem soye tšabá chacmësertá: chë yebnentša nduiño, ntseco ora atbëbaná yochjabama tojtsetatšëmbëse, cha ndoñe nanjaleséncia ndocná jushañe chaondbemama, chë yebnoye jtsamashënguama y jtsatbëbama.

<sup>40</sup> Tšëngaftángnaca šmochtseprontana, er chë Bëngbe Bëtsá Entšá tbojanbemá echanjésabo, entsanga chama tondaye tmontsejuabná ora ca” —Jesús tojánayana.

*Chë tšabe oservená y chë bacna oservená*

*(Mt 24.45-51)*

<sup>41</sup> Pedro, Jesúsbioye tbojanayana: —Utabná, ¿chë tconjayana cuento nýe bëngbiana o nýetscangbiana yochtsemna ca?

<sup>42</sup> Y Bëngbe Utabná tbojanjuá: —¿Nda yomna chë oservená, ntšamo chë nduiño tojtsebošcá amá y nýets juábnaca amá? Cha jtsemnana nda chë nduiño bochjëftsebošhona chë yebnentšënga chaotsanýenama, y jasama tojtsemna ora chaújuatšema.

<sup>43</sup> Puerte oyejuayá chë oservená, chë nduiño tojtashjango ora, cha tbojínýena jtsamëse ntšamo tbojtsemncá.

<sup>44</sup> Ndegombre cbëyana, chë nduiño chábioye bochanjaimpáda nýetsca chabe soyënga chabotsinýeñama.

<sup>45</sup> Pero chë oservená, chabe nduiño betseco ndoñe yochantabo ca tojtsejuabná, y tojontsé chë inýe oservénënga, boyabásenga y shembásenga jtsajantsetayana, becá jtsesana, jofšiyana y jtsótmenana,

<sup>46</sup> cha ndoñe tontsejuabná te y tontsetátšëmbo ora, chabe nduiño echántashjango y puerte jabuache bochantsecastíga, y echanjama cha jasúfriama chabotsemnana, mo chë Bëngbe Bëtsábeñe ndošbuáchiyënga mochanjasufriacá.

<sup>47</sup> “Chë oservená, nda tojtsetátšëmbo ndayá chë nduiño tojtsebošama, pero ndoñe tontseprontana y ndoñe tontsobedecena, cha ba soye mochántsetjanja.

<sup>48</sup> Y chë oservená, ntsetatšëmbcá ntšámnaca tojabuachjuanguá, y chë causa chamotsetjanjama tbojtsemnëna, chana más batšá mochántsetjanja. Nda bëtscá soyënga tmojstábioye jauyanana, bëtscá soyënga chaoma ca; y nda bëts trabajo tmojabonýébioyna jauyanana, más bëts trabajo chaoma ca.”

*Jesusbe causa, entsángbeñe más jtsentsjanayana*

*(Mt 10.34-36)*

<sup>49</sup> “Atše sënjabo quem luariñe jabojuinýiyama, y jtša sëntseboše malaye ya ctsangbototjuana!

<sup>50</sup> Atše šontsemna puerte jasúfriana, y ¡puerte ngménaca sentsobátmana chca chaotsemnama!

<sup>51</sup> ¿Tšëngaftanga šmojtsejuabná atše tijabo quem luarentše entsanga natjëmbana chamotsiyenama? Ndegombre ndoñe chca queochátmëna; atše sënjabo causa, entsanga más mochántsejanye.

<sup>52</sup> Er mëntescana, canye yebnentše, shachnënga ndoñe quemochátenëyeunana, únganga útatbe contra y útata úngangbe contra mochántsemna.

<sup>53</sup> Taitá uaquiñabe contra echántsemna, y uaquiñá taitabe contra; bebmá, bembëbe contra, y bembe bebmabe contra; uambén mamá, bebincuabe contra, y bebincuá uambén mamabe contra ca” —cha tojánayana.

*Ndaye tempo yochtsemnama ntšamo inétsotatsëmbo*

*(Mt 16.1-4; Mc 8.11-13)*

<sup>54</sup> Mëntšánaca Jesús entsanga tojanëyana: “Tšëngaftanga, chë jantsetëshënga shinye uenatjëmbambanoicana tojóbcnoma šmojinye ora šmondbétsichamo ‘echanjuafté ca’, y ndegombre chca jopásana.

<sup>55</sup> Y tsmanoicana tojtsebínýia orna, tšëngaftanga šmondbétsichamo ‘echanjojënyana ca’, y ndegombre chca jopásana.

<sup>56</sup> ¡Bacna entsanga, chë ntšamo ndegombre šmojuabnacá ndinýinýayënga! Ntšamo quem luarentše yochtsemnama, ndayá celoca šmojinýama tša tšabá šmojtsetatšëmbëse, ¿ndáyeca ndoñe šmontsobena jtsetatšëmbuana ndaye bëts soye quem tempo Bëngbe Bëtsá cmojtsinýanýnama ca?” —Jesús tojánayana.

*Chë uayayáftaca natjëmbana jtenbemana*

*(Mt 5.25-26)*

<sup>57</sup> “¿Ndáyeca cach tšëngaftanga ndoñe šmondbáyana ndayá tšabá bëtsemnana?

<sup>58</sup> Nderado nda tcmojtsedemandá y cabildoye jotsánama cmojtsemna, cabá choye ndáshjango ora, betesco cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandadna josticiëngbe cucuatšiñe cmochanjáboshjona, y chënga cárceloye cmochanjutame.

<sup>59</sup> Ndegombre cbëyana, chentšana ndoñe quecochtétsbocna, nyëts ndebénana candesopagantscuana ca” —Jesús tojánayana.

## 13

*Bëngbe Bëtsabe benache jtishachana*

<sup>1</sup> Cach ora, báseftanga tmojána Jesús jinýama, y tmojancuentá ndayá chë mandado Pilato tojanmama; chana básefta Galileoca boyabásenga tojtsanëbaye, y chëngbe buiñe yojenajuabó chë Bëngbe Bëtsábioye jëtschuayama tmojanóba bayëngbe buiñeca.

<sup>2</sup> Y Jesús chënga tojanëyana: “¿Tšëngaftanga šmojtsejuabná, chë Galileoca entsanga chca tmojapasá, chë luarentša inye boyabásengbiana chënga más bacna soye amënga imojamna causa ca?

<sup>3</sup> Ndegombre cbëyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana.

<sup>4</sup> O, ¿tšëngaftanga šmnétsejuabnaye, chë Jerusalenentša bnëtsana posufta entsanga tmojanóbanënga, chë Jerusalenoca binche uafjajónaye Siloé béconana tsbanana jebna soye tojtsanáshajaye ora, chënga imojamna chë inýenga Jerusalenentše oyenëngbiana más bacna soyënga amënga ca?

<sup>5</sup> Ndegombre cbëyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana ca” —Jesús tojanëyana.

*Chë ndëshajona higo betiyama cuento*

<sup>6</sup> Jesús mëntšá tojanacuntá jabuátambama: “Canÿe entšá jajoca canÿe higo betiye inabomna, y yojá nderado nantseshájonama, pero tondaye yonjínÿena.

<sup>7</sup> Chcasna, chë jajañe bojanÿábioye cha ibojauyana: ‘Mouena, ya unga uata tsabó quem higo betiyoye jaborrepárama, nderado nantseshájonama, pero ndocna te tondaye chiyátinÿena; chíyeca, motsetëtše. ¿Ndayama quem jajañe yochjátsjena ca?’

<sup>8</sup> Pero chë jajañe inÿená ibojauyana: ‘Bacó, inÿe uata cachcá monÿá, fshantse chanjáboplojua y uanguanéshe chanjabotboto.

<sup>9</sup> Nderado chca jamëse, nanjashájona; y ndoñesna, chora cocayé cuantsetëtše ca.’ ”

*Jesús canÿe ochnayté, canÿe tséstjona shembásabioye tbojanshná*

<sup>10</sup> Canÿe, canÿe ochnayté Jesús yojontsé entšanga jabuátambana, chë judiëngbe enefjuana yebnentše,

<sup>11</sup> y chentše yojtsemna canÿe shembása; cha ya bnëtsana posufta uata yojtsešoca. Canÿe bacna bayëja chábeñe tojánamashëngo y chca tseštjoná tbojtsanbema, y tondayama yontsobena jtondiríchana.

<sup>12</sup> Jesús chábioye tbojáninÿe ora, tbojanchembo y mëntšá tbojanianyana: “Batá, mora ya ndoñe šocá quecátsmëna ca.”

<sup>13</sup> Chora Jesús chabe cucuatšënga chábeñe tojanjajó, y cachora chë shembása yojtondirícha, y tojanontsé Bëngbe Bëtsábioye jëtschuayama.

<sup>14</sup> Pero chë enefjuana yebnentša mándayana tbojánetna, Jesús chë shembása ochnayté tbojanshnama, y entšanga tojanëyana: —Chnënguana te comna jatrabájama; chora šmochjabo jenóshnama; ochnaytese ndoñe ca.

<sup>15</sup> Y Bëngbe Utabná tbojanjuá: —¡Bacna entšanga, ntšamo ndegombre šmojuabnacá ndinÿinÿnayënga! ¿Tšëngaftanguentšá ndocná chë ochnayté chabe uacná o chabe burrotema buanjuajafjoná, juanatsama béjaye chaofšema?

<sup>16</sup> Chcasna, quem shembása, canÿa Abrahámbentšana entšá, y Satanasbe causa bnëtsana posufta uata šocá yojtsemna, ¿ndoñe tšabá yondmëna canÿe ochnayté chë bayëja jtsebojuánana ca?

<sup>17</sup> Jesús chca tojánayana ora, chabe uayayënga imojtsëuatja, y nÿetsca entšanga imojtsóyejuaye Jesús tša bëts soyënga yojtsamama.

*Chë mostaztiye jenayama cuento*

*(Mt 13.31-32; Mc 4.30-32)*

<sup>18</sup> Jesús mëntšánaca tojánayana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenana ca?”

<sup>19</sup> Endmëna mo canÿe mostaza jénaye, canÿe entšá jajañe tojajecá; chiyna jójuana y canÿe bëts betiye jóbemana; tša bëtsashe jóbemana, chíyeca chë jaja shloftšënga chë buacuashënguiñe uajajonëtemëngá jauábopormana ca.”

*Chë lewadurama cuento*

*(Mt 13.33)*

<sup>20</sup> Mëntšánaca Jesús tojánayana: “¿Ndaye sóyeca chjobenaye Bëngbe Bëtsabe amëndayama jábuayenama ca?”

<sup>21</sup> Endmëna mo lewadurcá; canÿe shembása chana jenájuañana unga medida arninÿañe, nÿetsana chauabochama ca.”

*Chë base utëntšá bësása*

*(Mt 7.13-14, 21-23)*

<sup>22</sup> Jerusalenoye benache, Jesús entšanga yojtsabuátambaye bëts pueblënguiñe y base pueblotëmënguiñe.

<sup>23</sup> Canÿa chábioye tbojantjá: —Bëngbe Utabná, ¿nÿe báseftanga imomna chë atsebácanënga mochtsemnënga ca?

Y Jesús tbojanjuá:

<sup>24</sup>—Puerte šmochtsentsena chë base utëntšá bësásajana jamashjnama; er ndegombre cbëyana, banga mochántseboše chëjana jamashjnama, pero ndoñe quemochatobenaye.

<sup>25</sup> Chë yebnentsa nduiño chaojotsbaná y chë bësása chaojtatámentsana, tšëngaftanga chë shjoca chašmojtsemnënga, šmochántsechembuana, mëntšá jtsichámëse: “Utabná, šmebëtafjo ca.” Pero cha cmochanjáuyana, “Atše ndoñe quetsátstatsëmbo ndëmoquënga tšëngaftanga šmomnana ca.”

<sup>26</sup> Chora tšëngaftanga šmochanjontsé ichámuana: “Acaftaca cánýiñe fsënjase y fsënjofsé, y aca bëngbe tsáshenañe tconjabuatambá ca.”

<sup>27</sup> Pero cha cmochanjójuaye: “Ya tcbonjáuyana, ndëmoquënga šmomnana ndoñe tstátšëmbo ca. ¡Atšbentsana mojuánanga, bacna soyënga amënga ca!”

<sup>28</sup> “Chora chentše puerte šmochanjenóbošachna y tsetšanama juatsašënga šmochantsenoftëšjojnaye, Abraham, Isaac, Jacob y nýetscanga Bëngbe Bëtsabe juabna oyebuambnayënga Bëngbe Bëtsabe amëndayoca imojtsemnana chašmojinýe ora, y tšëngaftanga chentšana cmochtëbuacanama.

<sup>29</sup> Y shinýe bocanoicana y uenatjëmbambanoicana, tsmanoicana y tsjuanoicana entšanga mochanjabo y juasama mochanjotbiana Bëngbe Bëtsabe amëndayentše.

<sup>30</sup> Y banga mora nduámanënga imomnënga, chora uámanënga mochántsemna; y banga mora uámanënga imomnënga, chora nduámanënga mochántsemna ca” —Jesús tojánayana.

### *Jesús tbojanongmé Jerusalenentsa entsangbiana*

*(Mt 23.37-39)*

<sup>31</sup> Jesús chë soyënga tojanëyana ora, básefta fariseunga tmojánashjajna y tmojanianyana: —Muentšana motsatoñe; Herodes entseboše aca jtsóbama ca.

<sup>32</sup> Y Jesús tojanëjua: —Motsajna y šmochjauyana chë corente studio bomná, mo tjañe mesetcá: “Minýe, mënté y yëfse entšángbentsana bacna bayëjënga sëndëtëbuacana y šoquënga sëndáshnaye, y baseftaytesna chanjapochóca ca.”

<sup>33</sup> Pero atše šontsemna mënté y yëfse jtsayana, y baseftaytesna Jerusalenoye jana, er ndoñe tšabá ntsemnana canýa Bëngbe Bëtsabe juabna oyebuambnayá Jerusalenentsa chábuañe chaóbana ca.

<sup>34</sup> “¡Jerusalenentsa entšanga, Jerusalenentsa entšanga, tšëngaftanga chë Bëngbe Bëtsabe juabna oyebuambnayënga jtsëbáyana, y chë Bëngbe Bëtsabe ichmónëngbioye ndëtšbëngaca jtsatëchënganjana jtsëbáyama! ¡Bueta soye atše sënjábošena tšëngaftanga átšbioye júbuajama, mo canýe tuamba chabe bolletotëmënga juatëngmiáša tajsoye cuaftajayecá, pero tšëngaftanga ndoñe chešmátsbošena!

<sup>35</sup> Y šmochjinýe, mora atše cachcá cbochanjesënyäye, y chca, atšna enánanga cbochanjésabashejuana, mo canýe yebna cachcá tcojesonýá y énañe tcojeseboshjoncá. Y ndegombre, tšëngaftanga morscana ndoñe más atše quešmochátinýe; y atše šmochántinýe, chë: ‘¡Corente bendición bomná, Bëngbe Utabnabe obenánaca tojabá ca!’ chašmojtsichamo ora ca” —Jesús tojánayana.

## 14

### *Jesús, canýe uafshachanánaca šocábioye tbojanshná*

<sup>1</sup> Canýe ochnayté, Jesús tojána jasama fariseungbe canýe amëndayabe yebnoye; y chë fariseunga yejuana imojtserreparana, er ndayá Jesús nanjama.

<sup>2</sup> Chéntšnaca, chabe delante yojtsemna canýe entšá uafshachanánaca šocá.

<sup>3</sup> As Jesús chë ley abuátambayënga y fariseunga tojanatjá: “¿Quenlesenciana canýe ochnayté canýe šocá jáshnama o ndoñe ca?”

<sup>4</sup> Chëngna ndocá tmonjanjuá. As Jesús chë šocábioye tbojánishache, tbojanshná y tbojanianyana chaotsatoñe ca.



<sup>5</sup> Y chë fariseunga tojanéyana: “¿Nda tšëngaftanguentsá, nderado chabe uaquiñá o uacná canye tboye tojtsótsatše, cachora ndoñe nanjá jetsejátsécama, masque ochnayté totsomñëse ca?”

<sup>6</sup> Y chënga ndocá tmonjanobená cha jojuana.

### *Chë casamentoye ófjanënga*

<sup>7</sup> Jesús tojáninýe ntšamo chë ófjanënga quëfseroye imojtsachnëjuana jotbiamama; as mentsá chënga tojanabuayená:

<sup>8</sup> “Canyë casamentama nda chacmojojfa ora, quëfseroca ndoñe catjót'bema, er nderado inýe ofjaná acbiama más uamaná ústonoye nandaboye;

<sup>9</sup> y nderado chë tsëndatbe ofjjaná nanjabo y cmatjauyana: ‘Mua chentše chaótbema, maluaré ca’, y chora cmatjotóca ouatjentše chafjoca jana jatótbemana.

<sup>10</sup> Chamna, nda chacmojojfa ora, chafjoca cochjót'bema, chca, chë ofjjaná chaojabo ora chacméyana: ‘Taita, quëfseroye motsëchnëngoñe ca’. Y chca, aca chë chentše tmojtsetbiámanëngbiama uamaná cochántsemna.

<sup>11</sup> Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, aíñe bëtsá mochanjábema ca.”

<sup>12</sup> Y chë tbojanofja entšábioynaca Jesús mentsá tbojanianyana: “Fiesta chacojama o sananga chacojtsebomna ora, ndoñe cattsëbuájajana acbe amiguënga, catsátanga, ni pamíllanga, ni acbe juachañe oyenënga bomnënga; er chëngnaca, fiesta chamojtsebomna ora, aca cmochantétofja, y chca ya acbe uacanana soye cochántsebomna.

<sup>13</sup> Chamna, canýe fiesta chacojama ora, cochjúbuaja ndbomnjémënga, jama ndobenënga, coshetënga y jtanënga,

<sup>14</sup> y aca corente oyejuayá cochántsemna; er chënga ndoñe quemochatobenaye cachcá aca jtëtofjana, pero acna acbe uacanana soye cochántsebomna, chë Bëngbe Bëtsabe bom-inýiñe tšábenga imomnënga chamojtayena ora ca” —cha tbojanianyana.

### *Chë bëts sanama cuento (Mt 22.1-10)*

<sup>15</sup> Chca tojanuena ora, canýa chë mesëshentše tbemaná tojánayana: —¡Puerte oyejuayá echántsemna Bëngbe Bëtsabe amëndayoca juasama chaojtsemná ca!

<sup>16</sup> Chora Jesús tbojanianyana: —Canyë bacó canýe bëts saná yojaprónta y ba entšanga yojúbuaja.

<sup>17</sup> Juasama ya yojobuache ora, canýe oservená ibojíchmua chë ófjanënga jáuyanama chamotsajna, ya lempe yojtseprontana ca.

<sup>18</sup> Pero chorna nýetscanga imojontsé jtsoyátšëmbuana. Canýa yojayana: “Cabá mora canýe fshantse sënjobuámiñe, y šontsemna jana jarrepárama. Chcasna, aslëpaye šmotsepacenciá ca.”

<sup>19</sup> Inýa yojayana: “Bnëtsana toronga sënjobuámiñe, y šontsemna jana jányama, jaárama taimochjosérvia. Chcasna, aslëpaye šmotsepacenciá ca.”

<sup>20</sup> Y inýa yojayana: “Cabá mora sëntsobouamá, y chë causa, ndoñe quichatobenaye jama ca.”

<sup>21</sup> Chora chë oservená yojesshëcona y lempe chabe nduíñbioye ibojauenaye. Chë nduíño tša ibojtsetna, y chë oservenábioye ibojauyana: “Cam ora motsa tsashenangoye y benachëngoye, y moye cochjunatse ndbomnjémënga, jama ndobenënga, jtanënga y coshetënga ca.”

<sup>22</sup> Chentša bënëntscose, chë oservená chë nduíñbioye ibojauyana: “Bacó, ya sënjama ntšamo šconjamandacá, y cabá inýengbiama luare entsemna ca.”

<sup>23</sup> As chë nduíño ibojauyana: “Motsa benachëngoye y betiyetemëngaca jetjaniñëngoye, y entšanga cochjautáriaye moye chamuábama, atšbe yebna chaojtjijama;

<sup>24</sup> er ndegombre cbéyana, chë natsana sënjobuajënguentsá ndocná atšbe saná queochatsse ca.”

*Ntšamo yomna Cristbe ustoná jtsemnama*  
(Mt 10.37-38)

<sup>25</sup> Mallajta entšanga Jesús imojtsëstona; as cha tojanobuértana y tojanéyana:

<sup>26</sup> “Nderado nda átšbioye tojabo, y ntšamo chabe taitá, chabe mamá, chabe shema, chabe básenga, chabe catšátanga y uabénanga tuababuánÿeshanama, y ntšamo cachá tuenobobonshánama, atšbe ndoñe más corente šontsebobonshánëse, cha ndoñe ntsoberenana atšbe uatsjendayá jtsemnana.

<sup>27</sup> Y nda, atšbiamana ndoñe tontseprontana jasúfriama y cruciñe jobanámnaca, y nÿetsca chabe quem luare soyënga ndoñe tonjëseboshjona atšbe juastama, cha ndoñe ntsoberenana atšbe uatsjendayá jtsemnana.

<sup>28</sup> “Nderado nda tšëngaftanguentsá tojtsejuabná canÿe tsbanana jebna soye japórmama, ¿cha natsana ndoñe nanjót'bema jinÿama ntsachetšá crocénana chentše yochjuába, y japochócama nÿetšá crocénana tayojtsebonnama?

<sup>29</sup> Chca ndoñese, nderado chë uajatsana ucuatjoniñe tojapormá y lempe jajebuama ndoñe tonjobenase, nÿetscanga chca tmojinÿënga, muantsáfchaye y mëntšá muantsichamo:

<sup>30</sup> ‘Quemëjema jajebuama tonjontsé, y japochócama ndoñe chenatobená ca.’

<sup>31</sup> “O ¿ndaye rey inÿe réyefraca jéntsama tbojotocase, natsana ndoñe nanjót'bema jajebuoyama, nderado nanjobenaye bnétsana uaranga soldadëngaftaca chë ínÿabioye jayëñjanana, chë inÿa uta bnétsana uaranga soldadëngaftaca tojtsabose?

<sup>32</sup> Y ndoñesna, chë inÿe rey cabá bënoca tojtsemna ora, básefta entšanga echanjichamuá, cha jauyanama más tšabá yomna ndoñe jatentsjanayana ca.

<sup>33</sup> “Chcasna, ndánaca tšëngaftanguentsá, lempe ntšamo tobomncá ndoñe cachcá tonjesonÿá, cha ndoñe ntsoberenana atšbe uatsjendayá jtsemnana ca” —Jesús tojánayana.

*Chë tamó fténana tojtsebocna ora*  
(Mt 5.13; Mc 9.50)

<sup>34</sup> “Tamó tšabe soye endmëna; pero chë tamó fténana tojtsóbemëse, tšëngaftanga ndoñe quešmátobena jamana tempcá sanana cachiñe chaotsatsmënama, ni saná jatamuama. Chë ftëna tamó tondayama ntososervénana, cachcá, chë atšbe uatsjëndayënga jtsemnana tmojtsebošënga, pero lempe jéseboshjonama ndoñe tmontseboše, cach ndoñe chama ntososervénana.

<sup>35</sup> Chë ftëna tamó ndoñe ntososervénana ni fshantsama, ni uanguanëshama. Nÿe jtsëtšenana. Chë jouenama tmojtsobenënga, šmochjouena ca” —Jesús tojánayana.

## 15

*Chë ótsëna oveshabiama cuento*  
(Mt 18.10-14)

<sup>1</sup> Nÿetsca chë Romocama impuesto entšángbioye atjanayënga y inÿe bacna soyënga amënga, Jesúsbioye imojánajna chabe palabra jouenama;

<sup>2</sup> y chë fariseunga y ley abuátambayënga chama Jesusbiamana podësca imojtsoyebuambná, mëntšá: —Mua bacna soyënga amëngaftaca entsenuta y chëngaftaca entsesá ca.

<sup>3</sup> As Jesús mëntšá tojanacuntá, chënga jabuátambama:

<sup>4</sup> —¿Nda tšëngaftanguentsá, canÿe patse oveshënga tojtsabamna, y canÿa tbojtsobuëtsëse, chë inÿe esconëfta bnétsana y esconëfta oveshënga shëntsjañe ndoñe cachcá nanjesëñÿaye, y nanjá chë otšená jetsenguanguama candëtsónÿeñëntscuana?

<sup>5</sup> Y tbojtsinÿëna ora, oyejuayá chë oveshá jesotantšajúana;

<sup>6</sup> y yebnoye tojtashjango orna, chabe amiguënga y juachañe oyenënga jáchembuana y mëntśá jáuyanana: “Atšeftaca móyejuanga, er chë sentsanobuetše oveshá sentsinÿena ca.”

<sup>7</sup> Atše cbëyana, cachcá, celócnaca más oyejuayana jtsebínÿnana, canÿe bacna soyënga amá tšabe benache tojtishachabiama, y ndoñe nÿa yapa, esconëfta bnëtsana y esconëfta tšabe soyënga amëngbiama, chë ndoñe yondujaboto bacna soyënga amana jtsajbanana ca.

### *Chë crocénana tojetsónÿena shembásabiama cuento*

<sup>8</sup> “O mëntśá, ¿ndëmua shembása, bnëtsana uámana crocénana tojtsebmna y cánÿana tojtsobuétsëse, chora ndoñe canÿe uajuinÿanësha nanjuajuinÿená, y cuedádoca chë yebna nantsetsjajo y botamana chë crocénana nantsenguango candëtsónÿeñëntscuana?”

<sup>9</sup> Y tojtsinÿena ora, chabe amiguënga y juachañe oyena shembásenga jáchembuana, y mëntśá jáuyanana: ‘Atšeftaca móyejuanga, er chë sentsanobuetše crocénana sentsinÿena ca.’

<sup>10</sup> Atše cbëyana, cachcá, chë Bëngbe Bëtsabe angelotëmëngbeñe oyejuayana jtsebínÿnana, nÿe canÿe bacna soyënga amá chë tšabe benache tojtishachabiama ca” – Jesús tojánayana.

### *Chë uaquiñá bacna benachiñe ayá*

<sup>11</sup> Jesús mëntśánaca tojanacuntá: “Canÿe entśá uta uaquiñata yojánabamna;

<sup>12</sup> y canÿe, chë ngomënche uaquiñá chabe taitábioye ibojauyana: ‘Taita, atšbe otocana soyënga šmatatšetá ca.’ As chë befta lempe chë uta uaquiñata yojtëjåtaye.

<sup>13</sup> “Chentšana baseftaytesna, chë más bobontse uaquiñá lempe ntšamo ibojobuachcá yojtsatobuiye y chë crocénánaca bën luaroye yojtsoñe, y chocha, cha nÿe ntšamo ibojochëngcá, mocá yojenobuiye, y chca, lempe yojtsepochóca.

<sup>14</sup> Lempe crocénana yojtsoshañe orna, bëts shëntsana chë luarentše yojóshjango, y chë causa chá ibojotóca shëntseca jtsejétanana.

<sup>15</sup> As, cha yojá trabajo jonguangoñama y yojínÿena chë luarentša canÿe entśábentše; chana, chabe jajoye ibojíchmua cotšënga jtsanÿenama.

<sup>16</sup> Chë bobontsna yojtseboše chë cotšbe saná jtsesana, pero ndocná tondaye ibonjanájuatšnaye.

<sup>17</sup> “Cabana, botamana yojinÿe ntšamo yojtsepasacá, y mëntśá yojenójuaboye: ‘¡Bueta trabájayënga atšbe taitabe yebnentše bëtscá saná mondëtsóbomñe, y atše muentše shëntsama chanjóbana ca!’

<sup>18</sup> Chantá atšbe taitabe yebnoye y mëntśá cha chanjauyana: Taita, šmotseperdoná. Atše tijama ndayá Bëngbe Bëtsá ndoñe yondbošcá, y ntšamo aca ndoñe condbošcá.

<sup>19</sup> Mora ya merecido taitatobuajoñe acbe uaquiñá jtsabáinama; nÿe canÿe acbe trabajayacá Diosmanda šmatofja ca.’

<sup>20</sup> Chca jëftsenójuaboyëse, yojontsé cachabe yebnoye jtana.

“Cabá bënoca yojtsemna ora, chabe taitá chábioye ibojinÿe, y chabe uaquiñabiama ibojóngmia, y jajëbenguama betscó yojá; ibojajebengo, ibojtosejcjuá y tša yojtsóyejuayayama chë uaquiñábioye ibojtámocho.

<sup>21</sup> Chora chë uaquiñá ibojauyana: ‘Taita, šmotseperdoná. Atše tijama ndayá Bëngbe Bëtsá ndoñe yondbošcá, y ntšamo aca ndoñe condbošcá; mora ya merecido taitatobuajoñe acbe uaquiñá jtsabáinama ca.’

<sup>22</sup> Pero chë Taitana chabe oservënënga yojámëndaye: ‘Betsco chë más tšabe entśayá mauaca y matspormanga, montšabuechëtjo y matsshecochëtjo.

<sup>23</sup> Mora chë más minÿica uacná šmochjuánatse y šmochjáshbua. ¡Mochjase y mochjóboyejuaye ca!’

<sup>24</sup> Quem atšbe uaquiñá mo obanacá endánmëna y mora bënga montsetátšëmbo cha ainá yotsomñama. Quem atšbe uaquiñá mo otšenacá endánmëna y mora tmontsinÿena ca.’ Y chentšana imojontsé joboyejuyama.

<sup>25</sup> “Chë yebnoca fiesta yojtsemnëntscuana, chë mayor uaquiñana jajoca inétsomñe. Yebnoye yojtsataye y ya béconana yojtsemna orna, cha yojouena imojtsabuastoye y imojtselántsaye.

<sup>26</sup> As chora cha canye oservernábioye ibojachembo y mëntsá ibojatjaye: ‘¿Ndayá bēngbe yebnentše yojtsopasana ca?’

<sup>27</sup> “As chë oserverná ibojojuá: ‘Acbe uabentsá tontashjango y chama acbe taitá šonjutarié chë más minyica uacná jáshbuama, cha tšabá tojtashjanguama ca.’

<sup>28</sup> Pero chë uabóchena catšatna corente ibojtsetna y ndoñe yontseboše tsoye jta-mashēnguana. As cach befta yojábocna chë catšátbioye jaimpádama chauatamashēnguama.

<sup>29</sup> Chora cha chë taitábioye ibojauyana: ‘Taita, aca condétatšēmo bueta uata cbetsa-jabuáchanama, nyets tempo cbetseyeunanama, pero ndocna te ni mo canye chivotema chešcaisatštá atšbe amiguēngaftaca joboyejuayama.

<sup>30</sup> Y masna, acbe uaquiñá chë bacna vida bomna shembásengaftaca acbe crocénana pochocayá tojtashjango ora, chë más minyica uacná chabiama tcojášbua ca’ –chë uaquiñá ibojauyana.

<sup>31</sup> “Chora chë befta ibojojuá: ‘Atšbe uaquiñá, aca sempre átšeftaca condétsemna y lempe ntšamo atše tsbomncá acbiámnaca endmēna.

<sup>32</sup> Pero mora tšabá entsemna joboyejuayama y joyejuayēngama; er acbe uabentsá mo obanacá endánmēna, y mora bēnga montsetátšēmo cha ainá yotsomñama; mo otšenacá endánmēna, y mora tmontsinyēna ca.’ ”

## 16

### *Chë nduiñbe ndoñe tšabe uajabuachanábiama cuento*

<sup>1</sup> Jesús mēntšánaca chabe uatsjéndayēnga tojanacuntá: “Inamna canye bomna entšá, y cha ibnabomna canye uajabuachaná chabe soyēnga chaotsinyenama; y chë nduiño imojuenaye chë uajabuachaná chabe soyēngaca ndoñe tšabá yontsamama.

<sup>2</sup> Asna, chë nduiño ibojachembo y mēntšá ibojauyana: ‘¿Ntšamo acbiama šmontsatsētsnacá ndegombre yojtsemna ca? Mora cuenta šmatatštá ntšamo atšbe soyēngaca tcojamama, er morscana ya ndoñe atšbe soyēnga inyēná quecochátsmēna ca.’

<sup>3</sup> Chë uajabuachaná yojontsé jenójuaboyana, y mēntšá yojeniyana: ‘¿Y mora ntšamo chtsemana, chë nduiño atšbe trabajuentšana šojtabocna ora? Ndoñe añemo quetsátsbomna fshantse jatrabájama, y lemošna jótjañamna sēntsēuatja.

<sup>4</sup> Ya sēntsetatšēmo ndayá chjama, chca, atšbe trabajuentšana chašojtábocna ora, atše jtsabamnama ndēmuanyēnga chēngbe yebnentše chašmofjama ca.’

<sup>5</sup> “Chentšana, canyánya chë chabe nduiñbioye ndebēngga yojáchembo. Cányabioye ibojatjaye: ‘¿Ntsachetšá atšbe nduiño icondebena ca?’

<sup>6</sup> Y cha ibojojuá: ‘Canye patse barrilēšangá aceitiye ca.’ As cha ibojauyana: ‘Muentše acbe recibēcha entsamna; mora mótbema y inyácha nye shachna bnētsana barrilēšangama matapormá ca.’

<sup>7</sup> Chentšana ínñabioye ibojatjaye: ‘Y acna, ¿Ntsachetšá icondebena ca?’ Y cha ibojojuá: ‘Canye patse medida trigo ca.’ As cha ibojauyana: ‘Muentše acbe recibēcha entsamna; chiñe nye posufta bnētsanama mábema ca.’

<sup>8</sup> Chentšana, chë nduiño tšabá yojayana chë ndoñe tšabá ama mayordombiama, cha stúdioca yojamama. Chë nye quem luarama enójuabnaye entšanga, cachēngbe soyēngaca puerte studio bomnēnga mondmēna; y chë entšangbe juabnēnga binynayábenga ndoñe nya yapa ca.

<sup>9</sup> “Atše cbabuayená, quem luarentše, chë bacna soyēnga amēngbe luarentša bomnánaca amiguēnga šmochjábiama, ínñyēnga jtsējabuáchanēse. Chca, chë bomnana tojtsopochocá ora chašmotsabamna ndēmuanyēnga chë nyetsca tescama oyenoye chacmúbuajama ca.

10 “Nda básefta soyënguiñe lempe tšabá tojama, bëtscá soyënguíñnaca lempe tšabá echanjama; y nda básefta soyënguiñe ndoñe tšabá tonjama, bëtscá soyënguíñnaca cach ndoñe tšabá queochatsma.

11 Chcasna, quem luarentse, chë bacna soyënga amëngbe luarentša bomnánaca ndoñe tšabá šmonjamëse, ¿nda chë ndegombre bomnana, chë Bëngbe Bëtsabe soyënga cmochjábanyïye?

12 Y chë ndoñe tšëngaftangbe sóyeca ndoñe tšabá šmonjamëse, ¿nda cmochjantšabuáchiye ndayá tšëngaftangbiam yomncá ca?

13 “Ndocná ntobenanana uta mandayata jtsaservénana; er cánÿabioye bochantšáboyënja y chë ínÿabioyna bochantšebobonshana, o cánÿabiam tšabá echántsetrabajaye, y chë ínÿabiamna ndoñe tšabá. Ndoñe quecátobena Bëngbe Bëtsá jtsebobonshánana, nÿe quem luarentša soyënga jtsebmomnama tcojtsebošëse ca” —Jesús tojánayana.

14 Chë fariseunga, becá crocénana jtsebmomnama bošënga imnamna, lempe chca chënga tmojanuena, y Jesúsbioye imojtsáboyejuana.

15 As Jesús tojanëyana: “Tšëngaftanga entšangbe delante mo tšábenga cuaftsemncá jtsebmomnamayana, pero Bëngbe Bëtsá endëtatšëmbo ndayá tšëngaftangbe ainaniñe yomnama; er ndayá entšanga más tojtsebošcá, Bëngbe Bëtsá jtsáboyënjana ca.

### *Moisesbe ley y Bëngbe Bëtsabe amëndayana*

16 “Moisesbe ley y chë Bëngbe Bëtsabe juabna oyebuambnayënga tšëngaftanga cmonjanabuayiyná, Juan chë Ubayaná quem luaroye tonjánabëntscuana. Cha tonjánabo orscana montsabuaiyná chë tšabe noticiënga Bëngbe Bëtsabe amëndayocama, y nÿetscanga tša montseboše choye jamashënguama ca.

17 “Más paselo endmëna, celoca y quem luare chaopochocá, y ndoñe chë ntšamo leyiñe iuayancá, chë ndayá jopásama yomnama, ni mo canÿe punto ndoñe chca chaondëtsemnama ca” —Jesús tojánayana.

### *Ndayá Jesús tojanabuatambá chë bouamnënga tmojtseñtšenama (Mt 19.1-12; Mc 10.1-12)*

18 “Nda chabe shëmbioye cachcá tbojesonÿá y ínÿaftaca tojtóbouamase, cha chë natsana shëmbioye ínÿaftaca jtseíngñayana; y nda chë útsena shembásaftaca tojobouamá chana, canÿe uabuatná jtsebmomnana, y chca, chana canÿe bacna soye jtsamana ca” —Jesús tojánayana.

### *Chë bomná y chë ndbomnjëjema Lázaro*

19 “Canÿe bomna entšá inamna; cha yojanamana uámana y botamana shbuenda uafjatsenga y lino entšayangá jtichëtjuana, y cada te bëtš fiestënga yojánama.

20 Canÿe ndbomnjëjëmna inamna, Lázaro ca uabainá, bacna nguayanánaca šocá; y cha yojanamana chë bomnabe bësásentše fshantsiñe jótbemana.

21 Quem ndbomnjëjema yojtseboše chë bomná yojtsesayentšana yojatquëcjana sanángaca jtoshachayana; y chë quešënga imnaboye chabe nguaye cuerpo jajáfjuama.

22 Canÿe te Lázaro yojtsóbana, y Bëngbe Bëtsabe angelënga Abrahámioye cha imojtamba, chë nÿetscanga oyejuayënga mondmëna luaroye. Chë bomnánaca yojóbana y imojuátbontsa.

23 “Chë bomná infernoca puerte ngmëniñe yojtsesufrina ora, tsbanánoye yojontješiye y bënoca Abraham ibojinÿe, y Lázaro cháftaca yojtsemna.

24 As chë bomná yojuayebuáchena: ‘¡Taita Abraham, šmolastemá! Lázaro michmó chabe ntšabuafja chaofchecuacuá y atšbe bichtaja chauabofchecuacuaye, er quem iñeshoca tša sëntsesufrina ca.’

25 Pero Abraham ibojauyana: ‘Uaquiñá, menojuabó, aca fshantsoca vida conjánbomna ora, lempe ntšamo icojabošcá tconjanóyëngacñe, y Lázaro chë cuenta tondaye

quenjátsbomna; pero morna, cha tšabá y oyejuayá entsemna, y aca jabuache ngménana contsebomna.

<sup>26</sup> Y inye soye, canye bëts tũañe entsemna tšëngaftangbiocana mëntscoñe; chca, chë tšëngaftangbioye muentšana jenachnënguama tmojtsebošënga ndoñe chamondëtsobena, ni chocana bëngbioye cach ndoñe ca.'

<sup>27</sup> “Y chë bomná ibojauyana: ‘Masque chca, Taita Abraham, Diosmanda Lázaro michmó atšbe taitabe yebnoye;

<sup>28</sup> choca sëndábamna shachna catšátanga; as chaúyana ntšamo moca atše stsepasana y ntšamo jamëse chënga ndoñe chaondëtsamna quem ngménënga luaroye jabama ca.’

<sup>29</sup> Chora Abraham ibojauyana: ‘Chënga ya mondbomna ndayá Moisés y chë Bëngbe Bëtsabe juabna oyebuambnayënga tmojëftsaná bema soyënga; ichëngbioye chamoyauná ca!’

<sup>30</sup> Chë bomná ibojujá: ‘Ndoñe, Taita Abraham; nderado obanënguentshana canya chëngbioye tojase, aíñe chë tšabe benache muantishache ca.’

<sup>31</sup> Pero Abraham ibojauyana: ‘Chënga ni mo Moisés, ni chë Bëngbe Bëtsabe juabna oyebuambnayëngbioye ndoñe tmonjóyaunase, Bëngbe Bëtsabeñe ndoñe quemochatošbuáchiye, masque canye obaná chauatayenëse, chëngbioye jábuayenama ca’ ” —Jesús tojancuentá.

## 17

### *Resjo yomna, nderado bacna soyënga cuanjama*

(Mt 18.6-7, 21-22; Mc 9.42)

<sup>1</sup> Jesús chabe uatsjëndayënga tojanëyana: “Sempre echanjëftsemna juabnënga bacna soyënga jamama; pero, itša lastema chë entsabiama ndabe causa ínÿenga bacna soyënga tmojama!

<sup>2</sup> Más tšabá chabiamá nántsemna canye nantsnëbé chamotsetamošëntsãua y mar bëjayoye chamotsashbuetše, y ndoñe chë canya Bëngbe Bëtsabeñe ošbuachiyá bacna soye chaomama juanatsana.

<sup>3</sup> Cuedado šmochtsebomna.

“Acbe catšata bacna soye tojamëse, cochjuácacana; y yochtsajbaná ca cha tojayanëse, cochtseperdóna.

<sup>4</sup> Masque nÿe canye te, canysëfta soye ntšámnaca tcmojaborlá, y canysëfta soye ‘chca ndoñe más quebochatsbórla ca’ tcmojauyanëse, aca cmontsemna cha jtseperdónana ca” —Jesús tojánayana.

### *Bëngbe Bëtsabeñe jtsošbuáchiyëse, corente obenana jtsebomnana*

<sup>5</sup> Chë uatsjëndayënga Bëngbe Utabnábioye tmojanianana: —Ošbuáchiyana šmababuaté ca.

<sup>6</sup> Y chë Utabná tojanëjua: —Tšëngaftanga ošbuáchiyana, batšatema masque nÿe mo mostaza jenaycá šmojtsebomnëse, quem sicomoro betiyoye šmatjauyana: “quemuentšana mojashtse y mar bëjayoca mojë ca”, y quem betiye chca nanjama ca.

### *Chë oserverná ndayá ibomna jamana*

<sup>7</sup> “Nderado canya tšëngaftanguentsá canye bochichnayá tbojtsebomna, cha jajocana tojtashjango jajañe arayocana o uacnënga anÿenocana, ¿chábiyoye bochjauyana: ‘Matabo y mabose ca’?

<sup>8</sup> Ndoñe, chamna mëntsá bochanjauyana: ‘Jetiñe juasama cochjuábua, y moprontá atše jaserviama atše candëse y candofšentscuana; y chentšana aca cochjase y cochjofsiye ca.’

<sup>9</sup> Y chë bochichnayábiyoye ndoñe quebochtëtschuaye ndayá tbojuatarieca cha tojamama.

<sup>10</sup> Tšëngaftángnaca cachcá, lempe ntšamo Bëngbe Bëtsá tcmojutarieca chašmojama ora, cmontsamna jayanana: ‘Nduámana oservernënga fsëndmëna; er nÿe ntšamo jamama šuamncá tifjama ca’ ” —Jesús tojánayana.

*Jesús, bnětsaněnga bacna nguayanánaca šoquěnga tojanashná*

<sup>11</sup> Jerusalenoye benache, Jesús tojánachněngo Samaria y Galilea luarějana.

<sup>12</sup> Y canye pueblotémoye tojánashjango ora, bnětsana boyabásenga bacna nguayanánaca šoquěnga chábioye tmojána; chábentšana bēnoca chěnga tmojanouquedá,

<sup>13</sup> y mēntšá imojtsáyebuache: —¡Jesús, Buatěmbayá, šmotsalastemá ca!

<sup>14</sup> Jesús chěnga tojánanye ora, tojaněyana: —Jerusalenoca bachnángbioye motsajna, y chěnga šmochjínjanye tšěngaftanga mora nděšoquěnga šmojtsemnama ca.

Y tojanopasá, chě bnětsaněnga cabá imojétsayěntscuana, ya shnáněnga imojtoquédaye.

<sup>15</sup> Canya chěnguentšá, shnaná yojtsemnama tojáninye ora, yojesshēcna Běngbe Bětsábioye jabuache atschuanaye;

<sup>16</sup> y Jesusbe delante yojshěntsamentšiyē, jubiaca fshantsóntscōne yojotsejbéna, y chábioye ibojtsatschuanaye; y chě boyabásana Samarioca entšá inamna.

<sup>17</sup> Chora Jesús tbojaniyana: —Bnětsaněnga mondmēna chě shnáněnga tmontoquedanga. ¿Ndayentšē chě inye esconěftanga imojtsemna?

<sup>18</sup> ¿Nye quem boyabása, inye luarocana ashjanganá, tojesshēcna Běngbe Bětsá jětschuayama? ¿Ndáyeca chě inyēnga ndoñe ca?

<sup>19</sup> Y chě entšábioye tbojaniyana: —Matětsbaná y motsatoñe; Běngbe Bětsábeñe aca icošbuachéyeca shnaná contsatsmēna ca.

*Ntšamo Běngbe Bětsabe aměndayana yochjóshjango  
(Mt 24.23-28, 36-41)*

<sup>20</sup> Canye, chě fariseunga Jesús tmojantjá, mocna ora chě Běngbe Bětsabe aměndayana yochjanóshjanguama; y cha tojanějua: “Běngbe Bětsabe aměndayana chaojóshjango ora, tšěngaftanga ndoñe quešmochatobenaye chca jinýana.

<sup>21</sup> Chora ndoñe quemochátichamo ‘Muentšē entsemna’ o ‘Choca entsemna ca’; er Běngbe Bětsabe aměndayana ya tšěngaftangbeñe entsemna ca” —cha tojánayana.

<sup>22</sup> Jesús chabe uatsjéndayěnga tojaněyana: “Canye tempo echanjóshjango, y chora tšěngaftanga šmochántsebošē canye te jtsebomnana, ntšamo chě Běngbe Bětsá Entšá tbojanbemá tšěngaftangbeñe enjěftsemna orcá; pero chora ndoñe chca queochatóshjango.

<sup>23</sup> Chora báseftanga mochántschamo: ‘Muentšē entsemna’ o ‘Choca entsemna ca’; pero choye ndoñe šmatjá, ni šmatjúseto.

<sup>24</sup> Er chě tojatcuinye ora, ntšamo celoca catoica juachoica tojabuashinýinýenacá, chca echántsemna chě Běngbe Bětsá Entšá tbojanbemá quem luaroye chaojésabo te.

<sup>25</sup> Pero natsana cha bontsemna puerta jasúfriana, y morsca entšangbiana uabotená jtsemnana.

<sup>26</sup> “Ntšamo Noé yojaniyena ora tojanopasacá, cachcá echanjopása chě Běngbe Bětsá Entšá tbojanbemá quem luaroye chaojésabo ora.

<sup>27</sup> Chě tempo, entšanga imnasaye, imnofšěšnaye, imnóbouamnaye; natjěmbana imojt-siyeñe, y chca, natjěmbana imojtsomñe, Noé chě barquěshoye tojánamashěnguěntscuana; pero chora uabouana uaftena tojánashjango y chě entšanga tojtsanapochocá.

<sup>28</sup> Cachcá ntšamo Lot yojaniyena ora tojanopasacá: entšanga imnasaye, imnofšěšnaye, imnóbouamnaye, imojtsena, sananga imnajena y imnajebuana;

<sup>29</sup> pero Lot Sodoma běts pueblentšana tojěftsanbocna ora, Běngbe Bětsá tojanma celocana íñeshe y azufre chauaftema, y chentša entšanga tojtsanapochocá.

<sup>30</sup> Cachcá echántsemna chě Běngbe Bětsá Entšá tbojanbemá chaojtonýná ora.

<sup>31</sup> “Chě tena, nda cachabe yebnentša tsbanánoca chaojtsemna, y chabe soyěnga cach tsoca tojtsebomněse, chocana ndoñe chaondětastjango chě soyěnga jesabobocnama; y nda jajoca chaojtsemna, yebnoye ndoñe chaonděta.

<sup>32</sup> Menójuabonga ntšamo Lotbe shěmaftaca tojanopasama.

<sup>33</sup> Nda tojtsentšena quem luarentše bëtscá jtsebomnama y atšbiamá jasúfriama ndoñe tontseprontana, chë nyetsca tescama yomna tšabe vida echanjobuetše. Pero nda quem luarentša soyënga cachcá tojonýá atše juastama, masque chaóbana, chë nyetsca tescama yomna tšabe vida echántsebomna.

<sup>34</sup> “Atše cbëyana, chë ibeta, chë Bëngbe Bëtsá Entšá tbojanbemá chaojtonýná ora, útata canýe jutsnëshañe bochántsemna; canýa mochanjesbetše y chë ínýana ndoñe.

<sup>35</sup> Uta shembásata cánýiñe bochántsejanýcoye; canýa mochanjesbetše y chë ínýana ndoñe.

<sup>36</sup> Uta boyabásata jajoca bochántsetrabajaye; canýa mochanjesbetše y chë ínýana ndoñe ca” –cha tojanéyana.

<sup>37</sup> Chora chë uatsjédayënga Jesús tmojantjá: –Utabná, ¿ndémoca chca yochjopása ca? Y cha tojanjúá: –Chë obanabe cuerpo tojtsemnentše chë gallinacënga jojotana ca.

## 18

### *Chë viudá y chë mandadbiama cuento*

<sup>1</sup> Jesús mëntšá tojanacuntá, entšanga jabuátambama, Bëngbe Bëtsáftaca nyets tempo jtsencuéntayana yomnama, ainaniñe añemo jtsebomnama ndocna te ntjajbanacá.

<sup>2</sup> Mëntšá tojánayana: “Canýe pueblentše canýe mandado inamna; chana ni Bëngbe Bëtsábioye ndoñe bonjánebiauatja, ni entšanga yonjánayaunana.

<sup>3</sup> Chë pueblentše canýe viudánaca inamna; chana canýe demanda yojánbomna. As chë mandádbioye yojobeconá y mëntšá ibojauyana: ‘Diosmanda atšbe uayayá motsecastigá ndayá šojaborlama ca.’

<sup>4</sup> Bayté chë mandado ndoñe yonjábošena chë viudábioye joyeunayama; pero chentšana cha yojenójuaboye: ‘Masque Bëngbe Bëtsá ndoñe quetsátebiauatja, ni entšanga ndoñe quetsátayaunana,

<sup>5</sup> pero quem viudá cada ora endabó causa, aíñe chanjóyeunaye, chabe uayayá chanjastigá; ndóñesna cada te nandaboye y cabana ya šochanjanamëntša ca.’ ”

<sup>6</sup> Chentšana Bëngbe Utabná tojánayana: “Smonjouena ntšamo chë ndoñe tšabá ama mandado yojayancá.

<sup>7</sup> Y chca, ¿Bëngbe Bëtsá chabe bocacánënga ndoñe yochanjátsebacaye? Chënga mora ínýengbe causa montsesufrina y cada te Bëngbe Bëtsá mondbétseimpadana chaújabuachama. ¿Más chamuatobatmá ca yochjáuyana?

<sup>8</sup> Atše cbëyana, Bëngbe Bëtsá betscó tšëngaftanga cmochanjátsebacaye, tšëngaftanga chë ínýengbe causa mora šmojtseufrínënga. Pero chë Bëngbe Bëtsá Entšá tbojanbemá chaojésabo ora, ¿cabá Bëngbe Bëtsábeñe ošbuáchiyënga quem luarentše entšanga yochjánýena ca?” –Jesús tojánayana.

### *Chë fariseo y chë Romocama impuesto atjanayabiama cuento*

<sup>9</sup> Báseftanga imojtsanjuabná chënga tšabe entšanga inmamna ca, pero chë ínýengbioye imojtsëbuayënja; chíyeca Jesús mëntšá tojanacuntá jabuátambama:

<sup>10</sup> “Uta boyabásata Bëngbe Bëtsabe bëtš yebnoye tbojána Bëngbe Bëtsáftaca jencuéntama; canýa yojamna fariseo, y chë ínýana, canýe Romocama entšángbioye impuesto atjanayá.

<sup>11</sup> Chocna chë fariseo, tsanana Bëngbe Bëtsábioye mëntšá ibojtsecuéntaye: ‘Bëngbe Bëtsá, cbontsatschuaná atše chë ínýengcá ndoñe quetsatsmënama: atbëbanënga, puerta bacna soye amënga y shémbioye ínýaftaca íngñayënga; y ni quem Romocama impuesto atjanayacá ndoñe quetsatsmënama.

<sup>12</sup> Atše sënduamana, ácaftaca jencuéntamna, canýe semaniñe uta soye tondaye ntjascá jtsemnana; y lempe stjonýenentšana, bnëtsanentšana canýe soye acbiama sëndëquëcñá ca.’



13 Pero chë Romocama impuesto atjanayana, bënoca yojtsemna, ni celoye ntjon-tješiyca, yojtsenócochjantšetaye y mēntšá yojtsichamo: “¡Atšbe Bětsá, šmotselastemá, atšajema bacna soye amá tsmēna causa ca!” ”

14 Chentšana Jesús tojánayana: “Atše cběyana, quem Romocama impuesto atjanayá chabe yebnoye tojtaná chabe bacna soyēngama perdonaná, pero chë fariseo ndoñe. Er nda cachá bētsá tojtsenobiamná, nduamaná mochántsebema; y nda cachá nduamaná tojtsenobiamná, aínne bētsá mochanjábema.”

*Jesús, basetémēngbiana Bēngbe Bētsábioye tbojanimpadá  
(Mt 19.13-15; Mc 10.13-16)*

15 Entšanga imojanamana Jesúsbioye basetémēnga junatsana chauabájajuama, y Bēngbe Bētsábioye chēngbiana chaboimpadama; pero chë uatsjēndayēnga chca tmojáninýe ora, tmojanontšé chë basetémēnga unachayēnga jtsēcácanana.

16 Pero Jesusna chë basetémēnga tojánachembo, y mēntšá tojánayana: “Cachcá mónýaye chë basetémēnga átšbioye chamuabo, y ndoñe matéuyanana; er Bēngbe Bētsabe amēndayana endmēna chë mo quem basetémēngcá imomnēngbiana.

17 Ndegombre cběyana, nda Bēngbe Bētsabe soyēnga ndoñe tonjóyēngacñe mo canýe basetémcá jtsošbuáchiyēse, cha ndoñe queochatobenaye Bēngbe Bētsabe amēndayoye jamashēnguama ca.”

*Canýe bomna entšá Jesúsbioye tojána  
(Mt 19.16-30; Mc 10.17-31)*

18 Canýe mandayá Jesúsbioye tbojantjá: —Tšabe Buatēmbayá, ¿ndayá šojtsemna jamana chë nýetsca tescama yomna tšabe vida jtsebomnama ca?

19 Y Jesús tbojanjuá: —¿Ndáyeca šcjayuana “tšabia ca”? Tšabia nýe canýa endmēna: Bēngbe Bētsá.

20 Aca condētatsēmbo ntšamo Bēngbe Bētsá tojanmandacá: “Acbe shema ínýaftaca ndoñe cattseíngñaye, inýa ndoñe catjóba, ndoñe catjatbēba, ndoñe catjuaboínýena y acbe bētsétsata ndoñe stētšoye catjáquedaye ca.”

21 Chora chë boyabása tbojanjuá: —Atše lempe chca básetema orscana sēndocumplina ca.

22 Jesús chca tojanuena ora, tbojaniana: —Cabá canýe soye cmontsebuáshbena jamana: lempe ntšamo icobomncá cochjetsatobuiye, y chë crocénana, ndbomnējémēnga cochtsatsataye; chca, celoca canýe bēts bomnana cochántsebomna. Chentšana, cochjabo y šcochjuasto ca.

23 Chë entšá chca tojanuena ora, puerte ngménaca yojtsemna, er cha corente bomná inamna.

24 Chca ngmená tojáninýe ora, Jesús tojánayana: —¡Yapa totcá bomnēngbiana entsemna Bēngbe Bētsabe amēndayoye jamashēnguama!

25 Ndegombre, más paselo endmēna canýe camello chë coshufjentša atēfjnējana chauachnēngo, y ndoñe canýe bomná Bēngbe Bētsabe amēndayoye jamashēnguana ca.

26 Chora, chë chca imojouenēnga tmojánayana: —¿As nda yochjobenaye atsbocaná jtsemnana ca?

27 Y Jesús tojanējua: —Ndayá entšanga ndoñe mondobena jamana, Bēngbe Bētsá aínne endobena jamana ca.

28 Chora Pedro, Jesúsbioye tbojaniana: —Bēngbe Utabná, aca contsonýá, bēnga lempe chë fsēndbomna soyēnga fsēnjésebošhona, y áaftaca fsēntsajna ca.

29 Jesús chora tojanéyana: —Ndegombre cběyana, ndánaca Bēngbe Bētsábioye jasérviana, chabe amēndayama jtsabuayiynayēse, cachcá tojēftseboshona chabe yebna, shema, catsátanga, bētsétsanga o básenga,

30 cha mora quem luarentše chë soyēngama más echanjóyēngacñe, y chë inýe luarocna, chë nýetsca tescama yomna tšabe vida ca.

*Jesús cachiñe tojánayana cha jóbanama y jtayenama**(Mt 20.17-19; Mc 10.32-34)*

<sup>31</sup> Jesús chabe bnétsana uta uatsjéndayënga barie tojánachembo, y mëntśá tojanéyana: “Smontsetátśëmbo mora Jerusalenoye bënga montsajnama, y choca lempe echanjochnëngo ntšamo chë Bëngbe Bëtsabe juabna oyebuambnayënga, chë Bëngbe Bëtsá Entśá tbojanbemabiama tmojanabemcá;

<sup>32</sup> er choca cha chë ndoñe judiëngbe cucuatšinë mochanjáboshjona, y mochantśáboyejuana, mochanjójyenguango, mochántsebuashëttojjo;

<sup>33</sup> y chamojátjanjentsana, mochanjóba, pero unga tianoye cha echántayena ca.”

<sup>34</sup> Chë uatsjéndayënga tondaye tonjanësertá, ni montsetátśëmbo ndayá bétsemnana ntšamo Jesús yojtśetsëtsnacá, er chëngbiana yojamna josértama ndopodena soyënga.

*Jesús, Jericó puebloca canye jtanábioye tbojanshná**(Mt 20.29-34; Mc 10.46-52)*

<sup>35</sup> Tojanopasá, Jesús Jericó puebloye yojtsebéconaye ora, canye jtaná benache juachañe inatbemana, lemošna otjanañe.

<sup>36</sup> Entšanga chëjana imojtsachnëjuanama tojanuena ora, yojanotícia ndayá yojt-sopasana ca,

<sup>37</sup> y chë entšanga tmojanianyana, —Jesús Nazaretocá entsebeconá ca.

<sup>38</sup> As cha yojontśé uayebuáchana: —¡Jesús, Davídbentśana Entśá, šmotselastemá ca!

<sup>39</sup> Chë natsana imojtsajnénga chë jtaná imojtsácacana, iytëca chaóbemama; pero cha más yojtsáyebuache: —¡Davídbentśana Entśá, šmotselastemá ca!

<sup>40</sup> As Jesús tojantsá y tojanmandá cha chamobetśama. Cha ya bécoñe yojtsemna ora, Jesús tbojantjá:

<sup>41</sup> —¿Ndayá cojtseboše atše acbiana chjamama ca?

Y chë jtaná tbojanjuá: —Atśbe Utabná, atše sëntseboše chašuatabínñnama ca.

<sup>42</sup> Chora Jesús tbojanianyana: —Matinye, Bëngbe Bëtsábeñe betsošbuachéyeca shnaná contsatśmëna ca.

<sup>43</sup> Y cachora cha tśabá ibojtabinñna, y Jesúsbioye ibojtsëstona, Bëngbe Bëtsá atschuanaye. Y nyetsca entšanga, chca tmojáninye ora, Bëngbe Bëtsá imojtsatschuanaye.

**19***Jesús y Zaqueo*

<sup>1</sup> Jesús Jericó puebloca tojánashjango ora, chë pueblëjana cha yojtsachnëjuana.

<sup>2-3</sup> Chora, canye bomna entśá, chë Romocama entšanga impuesto atjanayëngbe amëndayá, Zaqueo ca uabainá, yojtseboše Jesús jinñama. Pero ndoñe yontsobena jinñama, bëtscá entšanga causa y cha becuca inamna causa.

<sup>4</sup> Chcasna, cha betesco natsanoye tojaftsantjajo y canye sicomoro betiyeshoye tojánashëngo, chca, Jesús chëjana tojtsachnëjuana ora, jinñama jobenayama.

<sup>5</sup> Jesús chë betiyeshoye tojánashjango ora, tsbanánoye tojanontješé y Zaquéobioye tbojáninye. As Jesús tbojanianyana: “Betsco chocana matastjango, Zaqueo, er mënté chanjá acbe yebnoye jatema ca.”

<sup>6</sup> Chora Zaqueo betesco tojtastjango y chentśana puerte oyejuayá Jesúsbioye tbojanofja.

<sup>7</sup> Entšanga chca tmojáninye ora, tmojanontśé Jesusbe contra mëntśá ichámuana: “Jesús tonjá canye bacna soyënga amabe yebnentše jatema ca.”

<sup>8</sup> Chora Zaqueo tojantsá, Bëngbe Utabná Jesús bentše, y mëntśá tbojanianyana: —Mouena, atśbe Utabná, atśbe bomna soyënguentsana tsëntsañe ndbomnëjëmënga chanjátśataye y nda más crocénana tijëftseyëngacá, chë ntsachetśá tijëftsefcama canta soye más chan-toyie ca.

<sup>9</sup> As Jesús tbojanianyana: —Mënté, aca acbe bacna soyënguentsana atsbocaná contsemna, er Zaqueo, ácnaca Abrahámbentsana entsá condmëna.

<sup>10</sup> Er chë Bëngbe Bëtsá Entsó tbojanbemá tojabo chë pochocánënga jtsemnama imojt-sajnënga jabétsanguanguama y jabátsebacama ca.

*Chë crocenánama cuento*  
(Mt 25.14-30)

<sup>11</sup> Entsanga chë soyënga imojtsuenana, y Jesús inye soye tojanacuntá jabuátambama, er cha ya Jerusalén béconana yojtsemna, y entsanga imojtsejuabnaye chë Bëngbe Bëtsabe amëndayana ya yochjanóshjango ca.

<sup>12</sup> Jesús tojanëyana: “Canye luarentsa uamana entsá inye bën luaroye yojá, cachabe luarentsa rey chamobemama y chentsana cachábioye jtama.

<sup>13</sup> Cabá nda ora, chabe bnëtsana oservénënga yojáchembo y bëtscá crocénana cada cánÿabioye yojéftsayentšbuachiye, y mëntsá yojéftsëyana: ‘Quem crocenánaca trato šmochjábema atše candëtabëntscuana ca.’

<sup>14</sup> Pero cachabe luarentsa entsanga cha imojuáya, as chëngna básefta entsanga imojchamuá chë inye bën luaroca mëntsá chamuayanama: ‘bënga ndoñe queftsátsboše cha bëngbe rey chaotsemnama ca’.

<sup>15</sup> “Pero pronto chë luarentsa rey cha imojábema. Y chë luaroye yojtá orna yojamánda chë crocénana yojéftsayentšbuáchenga chamobéconama, jtsetatšëmbuama ntsachetšá cada ona chë crocenánaca yojongánama.

<sup>16</sup> Chë natsaná yojáshjango y yojayana: ‘Taita, acbe crocénana bnëtsana soye más tonjoboté ca.’

<sup>17</sup> Y chë rey ibojojuá: ‘Tša tšabá, tšabe oservená. Aca quem base soyiñe ntšamo tbojamandacá tšabá tcojámayeca, bnëtsana pueblentša mandado chacotsemnama cbojayé ca.’

<sup>18</sup> Chentsana inÿa yojáshjango y yojayana: ‘Taita, acbe crocénana shachna soye más tonjoboté ca.’

<sup>19</sup> Y chë rey ibojauyana: ‘Acnaca shachna pueblentša mandado cochántsemna ca.’

<sup>20</sup> “Chorna inÿa yojobeconá y mëntsá yojayana: ‘Taita, muentše acbe crocénana entsatsmëna; canye pañueléjuañe bonguana sëntsejajo.

<sup>21</sup> Atše acbiama uatjana šonjuábuache, er aca canye tšátjaye entsá condmëna; aca chë ndoñe condbuajonentšana jocñana y chë ndoñe tconjajé luarentšana jaja saná jobuátbanana ca.’

<sup>22</sup> As chë rey ibojauyana: ‘Bacna oservená, cach acbe palabréngaca chanjínÿanÿiye aca ndoñe tšabá tconjamama. Atše chë ndoñe sëndbuajonentšana jocñana y chë ndoñe sënjajé luarentšana jobuátbanana tsuamanama icojátatšëmbëse,

<sup>23</sup> ¿ndáyeca ndoñe tconjá chë crocénana bancoca jetsobuájuama, y atše camoye matijtabo ora, mašctoyé chë crocénana y chë chentsana tojoboté crocénanënaca ca?’

<sup>24</sup> Y chë chentše imojtsemna entsanga yojáuyana: ‘Chë crocénana motseboca y chë bnëtsana soye más tojabotébioye chana motsatšeta ca.’

<sup>25</sup> As chënga imojojuá: ‘¡Pero cha ya bnëtsana soye más entsebomna ca!’

<sup>26</sup> Y chë rey yojójua: ‘Atše chëyana, nda tojtsebomnábioye, más mochanjátšetaye; pero nda tondaye tondbomnábioye, chë tojtsejuabná batsatema yobomna sóynaca mochántseboca ca.

<sup>27</sup> Y chë atše uayayënga, chë chëngbe rey atše chaitsemnama ndoñe monjánbošëngna, moye mënatse y atšbe delante šmochtsëbaye ca’ ” —cha chora yojayana.

*Jesús Jerusalenoye tojánashjango*  
(Mt 21.1-11; Mc 11.1-11; Jn 12.12-19)

28-29 Chca tojéftsanayana chentšana, Jerusalenoye yojétsaye ora, Jesús tojánashjango canye tjashoye, Olivos ca uabáiniñe, Betania y Betfagé pueblënga béconana. Chora, uta chabe uatsjédayata tojanichamó,

30 mëntsá jáuyanëse: “Tsëndatbe natsana entsemna base pueblotémoye motsata. Chašojáshjango ora, canye burrotema utsbuaná šochanjínýena. Chábeñe cabá ndocná tonjenojayé. Sochjuajafjoná y šochjuánatse.

31 Y nderado nda ndáyeca šojtsajafjná ca chacmojátjasna, šochjauyana: ‘Bëngbe Utabná bontsájaboto ca.’ ”

32 Chë uatsjédayata tbojána y lempe ntšamo Jesús tojanëyancá tbojáninýena.

33 Y chë burrotema imojtsajafjná orna, chë burrotema nduiñënga tmojanëyana: — ¿Ndáyeca chë burrotema šojtsajafjná ca?

34 Chora chata tbojánayana: —Bëngbe Utabná bontsajabótoyeca ca.

35 Chentšana Jesúsbioye chë burrotema tmojanánatse, y chë burrotémbeñe chatbe entšayá tojanájatse, y chábeñe Jesús tmojanenjayé.

36 Y cha yojtsachñëjuana ora, entšanga chëngbe entšayá benachëjana imojtsëtétsatsana.

37 Olivos tjashe tsmanoye yojtsebeconá ora, chë bëtská entšanga, Jesúsbeñe ošbuáchiyënga, tmojanontsé uayebuáchana y Bëngbe Bëtsá oyejuayënga jëtschuayana, Bëngbe Bëtsabe obenánaca bëts soyënga Jesús tojanmama.

38 Chënga mëntsá imojtsichamo: “¡Corente bendición bomná chaotsemna, chë Bëngbe Utabnabe obenánaca tojabo Rey ca! ¡Celoca tšabá entsemna! ¡Bëngbe Bëtsá matschuanga ca!”

39 Chë entsanguentše básefta fariseunga imojtsemnënga, Jesús tmojanianyana: — Buatëmbayá, acbe ústonënga mëcácana chca ndoñe chamondëtsáyebuachama ca.

40 Pero Jesús mëntsá tojanëjua: —Ndegombre cbëyana, mënga iytëca tmojobiamëse, chë ndëtsbënga muanjuayebuáchena ca.

41 Jesús Jerusalén béconana tojánashjango, y chë bëts pueblo tojáninýe ora, chentša entsangbiama tojánenobošachna.

42 Y mëntsá tojánayana: “¡Malaye šmëntsetátšëmbo, nýe mo mënténaca, ndayá yojtseita tšëngaftangbeñe lempe tšabá chaotsomñama! Pero mora chë soye tšëngaftangbe bom-inýama entsëitëmena.

43 Er Jerusalenoca bacna tenga echanjóshjango; chora uayayënga chentša shëconánëjana canye tapiëse mochantsepórma, mochantsejëtja y nýetsca juachoicana mochanjontsé tšëngaftanga jtsatsejana,

44 y lempe mochantsepochoáca. Muentša oyenënga mochantsëbaye, y ni mo canye ndëtsbé inýebé juatsboca quemochaiseboshjona, chë Bëngbe Bëtsá tšëngaftanga jätsebacama tojabo ora, ndoñe chešmatoyeuná causa ca” —Jesús tojánayana.

*Jesús, Bëngbe Bëtsabe bëts yebnentsana enënga y obuámnayënga tojtanëbuacna  
(Mt 21.12-17; Mc 11.15-19; Jn 2.13-22)*

45 Chentšana, Bëngbe Bëtsabe bëts yebnoye Jesús tojánamashëngo y tojanontsé chë chentše imojtsenënga chentšana jtëbuacnana,

46 y tojanëyana: “Bëngbe Bëtsá chabe uabemana palabrënguiñe tojayana: ‘Atšbe bëts yebna echántsemna átšeftaca encuëntaye yebna ca’, pero tšëngaftangna, atbëbanëngbe oyeninñe chë yebna šmojtsebema ca.”

47 Y cada te, Bëngbe Bëtsabe bëts yebnentsë Jesús entšanga yojtsabuátambaye; y bachnangbe amëndayënga, ley abuátambayënga y chë pueblentša mandayëngnaca imojtsenguaye ntšamo jamëse cha jóbana.

48 Pero ndoñe tmonjáninýena ntšamo, er nýetsca entšanga corente imojtseyeunana ntšamo cha yojtsoyebuambnacá.

## 20

### *Jesusbe obenana*

*(Mt 21.23-27; Mc 11.27-33)*

<sup>1</sup> Canye te, Bëngbe Bëtsabe bëts yebnentše Jesús yojsabuátambaye, y chë tšabe noticiëngama yojsabuayiyná ora, tmojánashjajna bachnangbe amëndayënga, ley abuátambayënga, judiëngbeñe bëtsëjemëngcá mandayëngaftaca cányiñe;

<sup>2</sup> y Jesús tmojanianyana: —Smëyana; ¿ndaye deréchoca chë contsama soyënga aca cojt-sama ca? o ¿chca jtsamama nda obenana tcmënjatšetá ca?

<sup>3</sup> Chora Jesús tojanëjua: —Atšnaca canye soye sëntsebmoma tšëngaftanga jatjayama. Smochjojuanga.

<sup>4</sup> ¿Nda Juan chë Ubayaná tbojanichmó entsanga jubáyama, Bëngbe Bëtsá o entsanga ca?

<sup>5</sup> Chora chënga tmojanontšé enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As ¿ndáyeca chábeñe ndoñe šmonjanošbuaché ca?’

<sup>6</sup> Y ndoñe quemuátobena jayanana ‘entsanga ca’; entsanga ndëtsbéngaca buattsëbaye, er nyetscanga becá mondëjuabná Juan ndegombre Bëngbe Bëtsabe juabna oyebuambnayá yojamnama.”

<sup>7</sup> Chcasna, chënga tmojanjuá ndoñe monjántatsëmbo nda Juan tbojanichmó entsanga jubáyama ca.

<sup>8</sup> Y Jesús tojanëyana: —Asna atše cach ndoñe quebochatëyana ndaye deréchoca chca stsama ca.

### *Chë puerte bacna trabájayëngbiama cuento*

*(Mt 21.33-44; Mc 12.1-11)*

<sup>9</sup> Chentsana Jesús tojanontšé entsanga jáuyanana, y quem cuéntoca tojanabuatambá: “Canye entšá uvas betiyënga yojáje y chë fshantse inye trabájayënga yojúyentsame, y baytescama bën luaroye yojtsoñe.

<sup>10</sup> Chë uvasëšangá juashacama tempo yojobuache orna, chë jajañe nduiño canye oservená ibojícmua chë trabájayënga jáuyanama ntsachetšá cha ibojtsotocánama. Pero chëngna cha imojtsejantšetaye, y tondaye ntoyiycá imojtichmuá.

<sup>11</sup> Chentsana inya ibojícmua; pero chë trabájayënga cha imojtsejantšetaye, imojtsóyenguango, y tondaye ntoyiycá imojtichmuá.

<sup>12</sup> Chë nduiño inya ibojatichmuá; pero chánaca chënga imojtsejantšetaye, imojtselísia, y chentsana imojtábocna.

<sup>13</sup> “Chora chë nduiño yojeniyana: ‘¿Y mora ntšamo chjama ca? Cach atšbe bonshana uaquiñá chanjíchmuá; nderádose cha aíñe mochanjóyeunaye ca.’

<sup>14</sup> Pero chë trabájayënga, chë uaquiñá imojinye orna imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe; motsóbanga y nyetsca chabe otocana soyënga bëngbiama echanjoquéda ca.’

<sup>15</sup> Chcasna, chë uvas jajañentsana cha imojtsábocna y imojtsóba.”

Chora Jesús tojanatjá: —Y asna, ¿ntšamo šmojtsejuabná, ndayá chë jajañe nduiño chë trabájayëngaftaca yochjama ca?

<sup>16</sup> Cha co echanjá y chë trabájayënga echanjetsëbaye, y chë uvas betiyënga jajañe inye trabájayënga echanjárrendaye ca.

Chë entsanga chca tmojanuena ora, tmojánayana: —¿Bëngaftaca ndocna te chca chaondopasá ca!

<sup>17</sup> Pero Jesús tojanënyanýe y tojánayana: —As ¿ndayama Bëngbe Bëtsabe uabemana palabrënguiñe iuayana?:

Chë yebna jebuanënga tmojtsanaboté ndëtsbé, mora chë más bëts uashacuanësentše entsejájona ca.

<sup>18</sup> Ndánaca chë ndëtsbeñe chaojotsatšá, chëbé bochántsatcacaye; y chë ndëtsbé ndábeñnaca chaojótšatše, polvëshe bochántsebema ca —Jesús tojánayana.

19 Chë bachnangbe amëndayënga y ley abuátambayënga tmojanenótatsëmbona Jesús chca tojanacuntá jinÿanÿiyama, chënga mo chë puerte bacna trabajayëngcá imojam-nama; asna tmojánbošena cachora jishachana, pero entšangbiana imojtsauatja.

*Chë Romoca bëts mandadbiama impuesto jtsatsquëcjnayama  
(Mt 22.15-22; Mc 12.13-17)*

20 Chentšana chënga báseftanga tmojanichamó, mo ndegombre tšabe entšanga cuaft-semncá chamobiamëse, Jesús jisháchichiyama, nderado ndayá cha tojayaniñe; y chca chënga jobenayama cha jishachana y chëngbe mandádbioye juanatsama.

21 As chënga tmojantjá: —Buatëmbayá, bënga fsëntsetatsëmbo ntšamo aca cojtsoye-buambná y cojtsabuatambacá ndegombre tšabá yomnama, ntšamo ndegombre Bëngbe Bëtsá yobošcá, y acbiana tondaye quenatámana nda más uamaná o nduamaná tom-nana. Aca contsabuatambá ndegombre tšabe vida jtsebomnama, ntšamo Bëngbe Bëtsá yomandacá.

22 Chcasna, šmëyana, ¿tšabá tayojtsemna bënga, César, chë Romoca bëts mandad-biama, impuesto jtsatsquëcjnayana o ndoñe ca?

23 Jesús yojtsetátsëmbo, ntšamo cha tojayaniñe jisháchichiyama chënga imojtsebošama; as tojanëyana:

24 —Chë šmatsquëcjná crocénana šminÿinÿënga ca; ¿ndabe jubíá chë crocenániñe yojt-semna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubíá; cha chca enduabaina ca.

25 Y Jesús tojanëyana: —César šmochtöyie cha ibotocana soye; y Bëngbe Bëtsana cha ibotocana soye ca.

26 Y chca, chë ichmónënga ndoñe imonjobenaye jisháchichiyana, ndayá cha entšangbe delante tojayaniñe. Masna, ntšamo tojanëjuama, ojnánänënga iytëca imojbiana.

*Obanënga jtayenama Jesús tmojantjá  
(Mt 22.23-33; Mc 12.18-27)*

27 Chentšana, báseftanga saduceo ca uabaina entšanga tmojána Jesús jinÿama. Chënga imojanjuabná obanënga ndocna te ntayenana ca. Jesús mëntsá tmojantjá:

28 —Buatëmbayá, Moisés bëngbe leyënguiñe tojëftsanabema, nderado canÿe boyá to-jtsóbana y básënga ndoñe tonjëftsabáshejuanësna, canmëna chë uabentsá chë shémaftaca jtobouamayana, chca, chë chabe uabochená obanabiama básënga jtsabamnama ca.

29 Chcase, canÿe bëngbentše canÿsëfta catšátanga monjamna. Chë natsaná ton-janobouamá y tontsanóbana, básënga ntjëftsabashejuancá;

30 chentšana chë inÿa chë shémaftaca tonjanobouamá, y cachcá tonjanopasá.

31 Chë inÿe uabentsá chora cháftaca tonjanobouamá, pero tontsanóbana básënga ntjëftsabashejuancá; y cachcá, chë inÿe uabentsëgnaca cháftaca tmonjanobouamá, pero nÿetscanga tmonjanóbana básënga ntjëftsabashejuancá.

32 Cabana, chë shembásanaca tontsanóbana.

33 Y chcasna, chë obanënga chamojtayena ora, ¿ndabe chë canÿsëfta catšatanguentšabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

34 Chora Jesús tojanëjua: —Quem luarentše boyabásënga y shembásënga mondbétsobouamnaye;

35 pero chë echanjóshjango luaroye jama y obanënguentšana jtayenama mercedo jtsebuájonama chamojobenangna, masque boyabásënga o shembásënga, ya ndoñe que-mochatóbouamnaye,

36 ni queochátópodena chënga chamóbanama, y chca, chënga mochántsemna mo an-gelëngcá, y Bëngbe Bëtsabe básënga mochántsemna, obanënguentšana mochtayënyeca.

37 Y Moisésnaca, chë yojsángbototjuana betiyetémama tojanábementse, bënga šontsinÿanÿná chë obanënga imnátayenama; chentse Bëngbe Bëtsá tojánayana cha yomna Abraham, Isaac y Jacobëbe Bëtsá ca.

38 Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

39 Chora básefta ley abuátambayënga Jesús tmojaninyana: —Buatëmbayá, tšabá tcjayana ca.

40 Y ya ndoñe más montsenñémua inÿe soyëngama jatstjanayana.

*¿Cristo ndabe entsábentsana yomna?*

*(Mt 22.41-46; Mc 12.35-37)*

41 Jesús tojanatjá: “¿Ndáyeca tšëngaftanga šmnëtsichamo chë Uámana Uabuayaná, chë Cristo, Rey Davídbentsana iuabó ca?

42 Er cach David, chabe librëšañe Salmos ca uabainëšañe, tojánayana: Bëngbe Bëtsá, atšbe Utabná Crístbioye tbojaninyana:

‘Atšbe catšbioica mótbema,

43 atšbe obenánaca, acbe uayayënga acbe cucuatšinë chamoquedama chjamëntscuana ca.’

44 ¿Ntšámose, Cristo, Davídbentsana nántsemna, cach David ‘Utabná ca’ chábioye tbojtsabobuátmëse ca?” —cha tojanatjá.

*Jesús chë ley abuátambayëngbiana tojánayana chënga ndoñe tšabá montsama ca*

*(Mt 23.1-36; Mc 12.38-40; Lc 11.37-54)*

45 Nÿetsca entsanga imojtsuenana, y Jesús chabe uatsjëndayënga tojanëyana:

46 “Cuedado šmochtsebomna, y ndoñe šmattsama chë ley abuatambayëngcá; chënga jtsogusetánana bënëna entsayangaca jtsajnana, y jtsebošana tsáshenañe entsanga becá respétoca chamotsacheuanayama. Chënga chë judiëngbe enefjuana yebnënguenache chë más uámana luarënguiñe jtsetbiámanana, y fiestënguiñe nÿa quëfseroca.

47 Pero chë viudángbioye chë tmobomna soyënga jtsabacayana; y entsangbe delante tšabá chacmotsënyama y chënga imojtsaíngñama ndoñe chaondëtsótatšëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá ínÿengbiana más chënga echanjácastigaye ca” —Jesús tojánayana.

## 21

*Jesús yojsënyaye chë crocénana quëcnyayënga*

*(Mc 12.41-44)*

1 Bëngbe Bëtsabe bëts yebnentse, Jesús yojsënyaye chë bomnënga crocénana jtse-quëcnyayana chë crocénana quëcnyayëtémiñe;

2 y canÿe viudá ndbomnëjémnaca tbojáninÿe, uta crocénana chëtémiñe yojaftsesegóra.

3 Chora Jesús tojánayana: “Ndegombre cbëyana, quem viudá ndbomnëjema, Bëngbe Bëtsabiana nÿetscangbiana más becá tonjëftsesegorá;

4 er nÿetscanga tmonjëftsesegorá chë yojsóyentsjamentšana, pero chana, masque tša ndbomnëjema, cha vida jtsebomnama lempe ntsachetšá yobomncá tonjëftsesegorá ca.”

*Jesús tojánayana Bëngbe Bëtsabe bëts yebna lempe mochjápochocama*

*(Mt 24.1-2; Mc 13.1-2)*

5 Báseftanga imojtsichamo chë Bëngbe Bëtsabe bëts yebnama, tša yojtsebotamanana puerte uámana ndëtsbéngaca y chë entsanga imojanamana juambana Bëngbe Bëtsábioye uátšëmbona soyëngaca ca. As Jesús tojánayana:

6 —Canÿe tempo echanjóshjango, y lempe ntšamo mora muentse šmontsonÿacá ton-daye queochatoquéda, ni mo canÿe ndëtsbé inÿebé juatsboye. Lempe mochantsepochóca ca.

*Ntšamo yochtsemna quem luare jopochócama te chaojtsobeco ora  
(Mt 24.3-28; Mc 13.3-23)*

<sup>7</sup> Chora chënga tmojantjá: —Buatëmbayá, ¿ntseco chca yochjopása? ¿Y ndayá Bëngbe Bëtsá yochjama, chca jopásama yojtsobecuama entsanga chamotsetatšëmbuama ca?

<sup>8</sup> Y Jesús tojánayana: —Cuedado šmochtsebomna ndocná chacmondáingñema. Er banga mochanjabo y mochantsabíchamo chënga atše imomna ca. Mochántsi chamo: “Atše chë Cristo sëndmëna”, y “Mora chë tempo entsemna ca”. Pero ndoñe šmatjóyaunaye.

<sup>9</sup> Y tšëngaftanga, entsanga imojtsentsjanama y entsanga mandadëngbe contra imojtsemnama chašmojtsuenana ora, ndoñe šmattsauatja, er entseyta natsana chë soyënga chaohnëngo; pero masque chca, chë quem luare jopochócama tempo cabá ndoñe queochátsmëna ca.

<sup>10</sup> Y mëntsánaca Jesús tojanëyana: “Canye luarentša entsanga, inye luaroca entsángaftaca mochántsientsjanaye; y canye amëndayábentša entsanga, inye amëndayábioca entsángaftácnaca.

<sup>11</sup> Ba luarënguñe jabuache echanjuangmëmëmana, bëts shëntsana, y entsanga pochócaye šocanënga echanjóshjango; y celoca echántsemna puerte uabouana soyënga y bëts soyënga, entsanga jinÿanÿiyama quem luare ya yochtsopochócama.

<sup>12</sup> “Pero cabá ndoñe chca chaonchoñëngo ora, tšëngaftanga cmochanjíshëche y chašmosufrima mochántsama; bënga judiëngbe enefjuana yebnëngoye cmochanjunatse jätsetšenama y cárceloyñaca cmochanjáutame, y reyënga y mandadëngbióynaca cmochanjunatse, atšbe ústonënga bëtsemna causa.

<sup>13</sup> Chca šmochanjapása, ntšamo atšbiamá smotatsëmbcá chënga chašmëyanama.

<sup>14</sup> Natsana ndoñe šmatjátsjuabnaye jenëuyanama ntšamo chora jóyebuambayana,

<sup>15</sup> er atše chanjama puerte tšabá y osertanánaca tšëngaftanga chašmóyebuambama; y chca, tšëngaftangbe uayayënga ndoñe quemochatobenaye jayanana ndoñe tšabá šmontsi chamo ca, y ndocá jojuama quemochatobenaye.

<sup>16</sup> Pero uayayëngbe cucuatšinë cmochanjábashejuana cach tšëngaftangbe bëtsëtsanga, catsátanga, pamíllanga y amiguënga; y tšëngaftanguentsana báseftanga cmochantsëbaye.

<sup>17</sup> Y nyetsca entsanga cmochantsëbuayënja, atšbe ústonënga bëtsemna causa.

<sup>18</sup> Pero tšëngaftangbe bestšašentsana ni mo canye stjënëja quecmochátabajajo.

<sup>19</sup> Tšëngaftanga nyets tempo átšbeñe ošbuáchiyënga chašmojtsemnëse, chë nyetsca tescama yomna tšabe vida šmochántsebomna ca.

<sup>20</sup> “Jerusalén nyets shëconana soldadënga chašmojanÿe ora, šmochtsetátšëmbo Jerusalén jopochócama tojobuáchama.

<sup>21</sup> Chorna, chë Judeoca oyenënga batsjabengoye chamotsacheta; Jerusalemëntše chamojtsemnënga, chentšana chamuaisebocana; y chë jajenache chamojtsemnëngna, Jerusalemoye ndoñe chamondésamashjna.

<sup>22</sup> Er chora echántsemna chë entsangbe jabuache castigo; lempe ntšamo Bëngbe Bëtsabe uabemana palabrenguñe endayancá chora echanjochnëngo.

<sup>23</sup> ¡Tša lastema chë tempo shembásënga ngomámanëngbiamá o ochóchaye básënga chamojtsabamnëngbiamá! Er chora corente ngmënaná quem luarentše echántsemna, y quem luarentša entsangbiamá chë uabouana castigo.

<sup>24</sup> Inyënga espadëjaca mochanjóbana, y ínÿengbiöyë nyetsca luarënguëjana utámenënga mochanjunatse; y chë ndoñe judiëngna, Jerusalemoca entsángbiöyë mochántsiatsejaye y mochantsëbaye, chca chaotsemnama Bëngbe Bëtsá tojalesenciantscuana ca” —Jesús tojánayana.

*Bëngbe Bëtsá Entšá tbojanbemá quem luaroye echanjésabo  
(Mt 24.29-35, 42-44; Mc 13.24-37)*



<sup>25</sup> Měntsánaca Jesús tojánayana: “Chora bėts soyėnga echantsinyna shinysiñe, juashconisiñe y estrellėnguisiñe; y quem luarentsa entsanga tsa mochantsauatja, ndayá jamama ntsetatsėmbcá, chė mar bėjaye y olėshėnga corente echantsefshauenana causa.

<sup>26</sup> Entsanga echantsabuatėcja tsa auatja causa y ndayá quem luariñe yochjopásama enócochinyna causa; er chė quem luarentsa tsbanánoca espíritėnga obenana bomnėnga echanjángmėmana.

<sup>27</sup> Y chora entsanga mochanjinye, chė Bėngbe Bėtsá Entsá tbojanbemá jantsetėshiñe echantsaboye, puerte obenánaca y corente buashinyniñe.

<sup>28</sup> Chė soyėnga jochnėnguama chaojobojatsė ora, añemo smochjentsetaye y bestsaše jatsbanase smochjarrepára, er chora echántsemna chė tšėngaftangbe atsebacayana ca” – Jesús tojánayana.

<sup>29</sup> Měntsánaca Jesús tojanėyana jabuátambama: “Smochjinye canye higo betiye o ndaye inye betinaca.

<sup>30</sup> Tojtsaisėjotsanama smojinye ora, jtsetatsėmbuana chė tšabe tempo ya yojtsaisobecuama.

<sup>31</sup> Cachcá, chė soyėnga yojtsėchnėjuanama chašmoinye ora, smochtsetatsėmbo chė Bėngbe Bėtsabe amėndayana ya yojtsobecuama.

<sup>32</sup> “Ndegombre chėyana, lempe chca echanjochnėngo, morsca entsanga cabá ndóbana ora.

<sup>33</sup> Celoca y quem luare echanjopochóca, pero atšbe palabra ndocna te queochaisopochóca.

<sup>34-35</sup> “Cuedado smochtsebomna y ndoñe šmatjalesėncia tšėngaftangbe ainana bacna juabnėngaca chaotsemnama, jenomándama ntsoyencá mocá enobuena causa, tmoye causa y nye quem luarentsa soyėngama enócochinyna causa; y tšėngaftanga prontánėnga smochtsemna, nye ndeolpe chė te chaojobuache ora; y tšėngaftanga ndėprontánėnga ndoñe chašmondėtsemna, mo tšėngaftangbiana canye uachmaniñe cuaftsemncá. Er nyetsca quem luarentsa entsangbiana chca echántsemna.

<sup>36</sup> Cuedado smochtsebomna y yejuana smochtsantješna; nye ntseco órnaca Bėngbe Bėtsáftaca smochtsencuėntaye, chca, chė echanjopása soyėngama jótsbocama chašmobenama, y chė Bėngbe Bėtsá Entsá tbojanbemabe delante jashjanguama ca” – Jesús tojanėyana.

<sup>37</sup> Jesús, bnėté Bėngbe Bėtsabe bėts yebnentše yojánabuatambaye, y ibetna, Olivos uabaina tjashoye yojánaye joquėdama.

<sup>38</sup> Y nyetsca entsanga cabá cachėse Bėngbe Bėtsabe bėts yebnoye imojánajna Jesús joyeunayama.

## 22

### *Entsanga tmojanjuabó ntšamo jamėse Jesúsbioye jishachama (Mt 26.1-5, 14-16; Mc 14.1-2, 10-11; Jn 11.45-53)*

<sup>1</sup> Ya yojėtsobeco Bashco fiesta, chė levadúraca ndėpormana tandėše saye fiesta, chė Bėngbe Bėtsá Egiptocana judiėngbe bėts taitanga tojánatsebacama jtenójuaboyama.

<sup>2</sup> Chė bachnangbe amėndayėnga y ley abuátambayėnga imojtsenguaye ntšamo jamėse Jesús jóbana, pero entsangbiana imojtsauatja.

<sup>3</sup> Chora Satanás, Judas chė Iscariote ca uabobuatmabe ainaniñe bacna juabnėnga tojanjáj. Chánaca yojamna chė bnėtsana uta uatsjendayėnguentšá;

<sup>4</sup> y tojána, chė bachnangbe amėndayėnga y Bėngbe Bėtsabe bėts yebnoca soldadėngbe amėndayėngaftaca jencuėntama, ntšamo Jesús chėngbe cucuatšisiñe jayentšbáshejuanama.

<sup>5</sup> As chėnga imojóyejuaye, y Judas tmojanšbuachená crocėnana chama jtatsėtayana.

<sup>6</sup> Y Júdasna aiñe ca tojánayana; y cach orscana cha yojtsenguaye ntšamo jamana y ndėmua ora Jesús chėngbiyoye jayentšbáshejuanama, ndocna entsanga ora.

*Jesús chabe uatsjédayëngaftaca Bashco saná tojanse  
(Mt 26.17-29; Mc 14.12-25; Jn 13.21-30; 1 Co 11.23-26)*

<sup>7</sup> Chë Bashco fiesta ora tojanóshjango, chë levadúraca ndëpormana tandëse sayté; chë te vojamna, Bëngbe Bëtsá jëtschuayamna canye oveshá jóbana chora jasama.

<sup>8</sup> As Jesús, Pedro y Juánbioye tojanéyana: —Motsata y saná šochjaprónta Bashco fiestama bënga mochjasama ca.

<sup>9</sup> Chora chata tbojantjá: —¿Ndëmoca cojtseboše chë saná fchjapróntama ca?

<sup>10</sup> Y Jesús tojanéjua: —Jerusalenentse chašojámashëngo ora, canye bacó cmochanjóbiatse, matbajiñe búyeshe echantsabuyambaye. Cha šochjuasto, y šochtsonyaye ndëmuanye yebnentse cha yochjámashënguama;

<sup>11</sup> y chentša nduiño šochjauyana: “Chë Buatëmbayá šonjichamó aca jauyanama: ‘¿Ndayentse chë tsañe yojtsemna, Bashco saná atše atšbe uatsjédayëngaftaca jasama ca?’”

<sup>12</sup> As cha cmochanjínyanýiye canye bëts tsañe, tsbanana pisoca; ya lempe echántseprontana, y chentše, Bashco fiestama saná šochjaprónta ca.

<sup>13</sup> As chë útata tbojána, y tbojáninýena lempe ntšamo Jesús tojanéyancá, y chentše chë Bashco saná tbojanprontata.

<sup>14</sup> Jasama tojanobuache ora, Jesús mesëshentše tojanótbema chabe uatsjédayëngaftaca, chë cachënga más chcoye chabe ichmónënga ca uabáinënga.

<sup>15</sup> Chora Jesús tojanéyana: “Tša sëndánboše quem Bashco saná tšëngaftangftaca jasama, atše cabá ndoñe chandësufrí ora.

<sup>16</sup> Muentšana ndoñe más quemëntša saná quicháisesse, Bëngbe Bëtsabe amëndayana candóshjanguëntscuana. Chora echantsótatsëmbo ntšamo quem fiesta ndegombre iuayancá ca.”

<sup>17</sup> Chorna canye coptema vínoyeca tojanaca, Bëngbe Bëtsábioye tbojtanchuá y mëntšá tojánayana: “Quem coptema vínoye menáfsenga; y cbëyana,

<sup>18</sup> chë uvas betiyentša shajuanentšana obocniye ndoñe más quichaisofsiye, Bëngbe Bëtsabe amëndayana candóshjanguëntscuana ca.”

<sup>19</sup> Chentšana, tandëse tojanca y Bëngbe Bëtsábioye tbojtanchuá; tojanjatá, tojanatšatá y mëntšá tojánayana: “Quem soye, atšbe cuerpo entsemna, y chanjóbana tšëngaftangbe tšabiama. Ntšamo mora bënga montsamcá šmochtsama, atšbiama jtenójuaboyama ca.”

<sup>20</sup> Tmojansentšana, chë coptémaca tojanma cachcá ntšamo chë tandëšeca tojanmcá y mëntšá tojánayana: “Quem coptema vínoye entsemna chë Bëngbe Bëtsabe tsëmtrato entšàngaftaca. Atšbe buiñe echanjuábuashana, tšëngaftanga chašmotsetatsëmbuama ntšamo Bëngbe Bëtsá entšanga tojanašebuachenacá ndegombre yochjochnënguama. Chë buiñe tšëngaftangbe tšabiama echanjuábuashana.

<sup>21</sup> Pero chë uayayëngbe cucuatšinë šochjaboshjoná, mesëshentše átšeftaca entsemna.

<sup>22</sup> Ndegombre, chë Bëngbe Bëtsá Entšá tbojanbemáftaca echanjopása, ntšamo Bëngbe Bëtsá chabiama tojanjuabocá. ¡Pero tša lastema chë bochjáboshjonabiama ca!” —Jesús tojánayana.

<sup>23</sup> Chorna chë uatsjédayënga tmojanontsé entjanayana, chënguentšá nda chë boshjuaná bëtsemnana.

*Nda chë más uamaná yomna*

<sup>24</sup> Chë uatsjédayënga imojtsenatsësnaye chënguentšá nda chë más uamaná bëtsemnana.

<sup>25</sup> As Jesús tojanéyana: “Chë ndoñe judiëngbeñe, chë reyënga chëngbe entšàngbioye nyë ntšámna jtsamëndayana, y chentša amëndayënga jtsamana, entšanga chëngbioye tsabe soye amënga ca chamotsëbobuátmama.

<sup>26</sup> Pero tšëngaftangbeñe ndoñe chca chaondëtsemna; chamna, tšëngaftangbeñe chë más uamaná mo chë más basacá chaóbema, y chë mandayá mo chë oservenacá.

<sup>27</sup> Er, ¿ndase chë más uamaná yomna, chë mesëshentše jasama tojotbemá o chë uajuatšnáyá? Ndegombre co chë mesëshentše tojotbemá; pero atšna tšëngaftangbeñe sëntsemna mo chë oservenacá.

<sup>28</sup> “Atšbe padecéniñe tšëngaftanga sempre átšeftaca šmondétsemna.

<sup>29</sup> Chiyeca, atšbe bariëna, canye amëndayana cbochanjátšataye, ntšamo atšbe taitá canye amëndayana šojatštacá;

<sup>30</sup> chca, atšbe amëndayoca mesëshentše átšeftaca šmochanjase y šmochanjofšiyey, y uamana tbemaniñe mo reyëngcá šmochanjotbiama, chë Israeloca bnëtsana uta pamíllanga entšangbiama chašmuayanama tšabá o ndoñe tšabá chënga tmonjamama ca” –Jesús tojánayana.

*Jesús tojánayana, chábioye ndoñe bonjanabuátma ca Pedro yochjánayanama (Mt 26.31-35; Mc 14.27-31; Jn 13.36-38)*

<sup>31</sup> Jesús mëntšánaca tojánayana: –Simón, Simón; cochtsetátšëmbo, Satanás obenana ton-jotjañe tšëngaftangaftaca nýe ntšámnaca jamama, mo chë trigo matënga tcojtsashatiyey-nacá;

<sup>32</sup> pero atšna Bëngbe Bëtsá sënjaimpadá, átšbeñe ošbuáchiyana ndoñe chacmondëtsebuáshbenama. Y aca, nýets ošbuáchiyana átšbeñe chacojtsatsbomna ora, chë inye ošbuáchiyënga cochjújabuache átšbeñe sempre chamotsošbuáchema ca.

<sup>33</sup> Chora Simón tbojaniyana: –Bëngbe Utabná, atše sëntseprontana ácaftaca cárceloye jámnaca y jobanámnaca ca.

<sup>34</sup> Y Jesús tbojaniyana: –Pedro, atše cbëyana, cam ibeta bínýanoye, ngallo cabá ndécánta ora, aca unga soye cochanjayana ndoñe šconduabuatma ca.

*Chë más jabuache ora yojtsobeco*

<sup>35</sup> Chentšana Jesús tojanatjá: –¿Chë ni shecnájaca, ni crocenánaca, ni shecochëtjonësheca tcbonjanichamó ora, nderado ndayá tcmojanabuáshebena ca?

Y chënga tmojanjuá: –Tondaye ca.

<sup>36</sup> Chora tojanéyana: –Mora ndoñe chca; shecnaja tobomná, chëja chauesocñe y crocenánama shecnëbénaca; y nda ndoñe espadëja tondbomna, chabe quëfsaiya chaot-satábuiye y canye espadëja chauatobuámiñe.

<sup>37</sup> Er cbëyana, entseyta átšeftaca chaopasá, ntšamo Bëngbe Bëtsabe uabemana pal-abrënguiñe atšbiama iuayancá, mëntšá: “Y chábioye tmonjáninýe mo chë puerte bacna soye amënguentšá canya cuaftsemncá ca.” Y lempe ntšamo atšbiama iuabemancá, mora ya echanjochnëngo ca –Jesús tojanéyana.

<sup>38</sup> As chënga tmojaniyana: –Bëngbe Utabná, muentše uta espadëja entsemna ca.

Y japochócamna cha tojánayana: –Nýe nýetsá ponto ca.

*Getsemaní luarentše, Jesús Bëngbe Bëtsáftaca tbojanencuentá (Mt 26.36-46; Mc 14.32-42)*

<sup>39</sup> Chentšana, Jesús tojánbocna y ntšamo yojanamancá Olivos tjashoye tojána, y chabe uatsjëndayënga tmojanasto.

<sup>40</sup> Choca tmojánashjajna ora, Jesús tojanéyana: “Bëngbe Bëtsá moimpadanga, bacna soye jamama ndoñe chacmondócochënguama ca.”

<sup>41</sup> Y chë uatsjëndayëngbentšana yojoluára, mo canye ndëtšbé jutšenëntscoca nýetsá, y yojoshëntsamentšiyey Bëngbe Bëtsáftaca jencuéntama.

<sup>42</sup> Jesús mëntšá tojánayana: “Taita, aca tcojtsebošëse, moma atše ndoñe chašondëtsemna chca jasúfriana. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

<sup>43</sup> Chca orna celocana canye ángel tbojánëbëbocna, añemo chaotsebomnama jua-jabuáchama.

<sup>44</sup> Jesús tša ngméniñe yojtsemna, y Bëngbe Bëtsáftaca más ibojtsencuéntaye. Y chabe boseseyojtsemna mo fshantsiñe buiñe cuaftsebuastëtjuancá.

<sup>45</sup> Bëngbe Bëtsáftaca jencuéntama tojanpochocá ora, tojtantsbaná y chabe uatsjédayënga imojtsemnoye tojána; y chënga imnétsomañe, tša ngménaca imojtsemna causa.

<sup>46</sup> Chora tojanéyana: “¿Ndáyeca šmotsomañe? Motsbananga y Bëngbe Bëtsá šmochtseimpadana, bacna soye jamama ndoñe chacmondócochënguama ca.”

*Uayayënga Jesús tmojánishache*

*(Mt 26.47-56; Mc 14.43-50; Jn 18.2-11)*

<sup>47</sup> Jesús cabá yojtsóyebuambnantscuana, ba entšanga chentše tmojánashjajna. Chë Judas ca uabainá, canya chë bnëtsana uta uatsjendayënguentšá, chë entšangbe natsana yojtsaye. Cha yojobeconá Jesús juamóchama;

<sup>48</sup> pero Jesús tbojaniana: “Judas, ¿canye juamochëse chë Bëngbe Bëtsá Entšá tbojanbemá uayayëngbe cucuatšine cochjaboshjona ca?”

<sup>49</sup> Chë Jesúsftaca imojtsemnënga tmojáninye ntšamo chora yochjanopásama; as tmojaniana: —Bëngbe Utabná, ¿espadéjaca fšcotsatsejaye ca?

<sup>50</sup> Y canya chënguentšá, chë bachnangbe más uámana amëndayabe bochichnayábioye catšbioica matscuaše tbojtsantëtše, y tbojtsanëstjango.

<sup>51</sup> Chora Jesús tojanéyana: —Cachcá monyá; nye nyetsá ponto ca.

Y chë bochichnayábioye chë matscuaše tbojánbojajo y tbojanshná.

<sup>52</sup> Chentšana, chë bachnangbe amëndayënga, chë Bëngbe Bëtsabe bëts yebnentša soldadëngbe amëndayënga y chë judiëngbeñe bëtsëjemëngcá amëndayënga, chë cha juanatsama tmojánabënga, Jesús tojanéyana: “¿Ndáyeca espadéjangaca y ngarotbéngaca šmojabo atše jishachama, mo atše canye bacá uamana entšá cuaftsemncá ca?”

<sup>53</sup> Atše cada te tšëngaftangaftaca sënjamna Bëngbe Bëtsabe bëts yebnentše, y ni chešmátanbojajo. Pero ora tojjobuache tšëngaftanga chca chašmomama, y Satanás ntšamo yojtsebošcá tšëngaftangbeñe echantsemándaye ca” —Jesús tojanéyana.

*Pedro tojánayana Jesúsbioye ndoñe bonjanabuátma ca*

*(Mt 26.57-58, 69-75; Mc 14.53-54, 66-72; Jn 18.12-18, 25-27)*

<sup>54</sup> Chentšana Jesús tmojánishache, y chë bachnangbe más uámana amëndayabe yebnoye tmojanánatse. Y Pedro bënocana ibojtséstona.

<sup>55</sup> Choca, chashja tsëntsaca, canye iñeshe tmojanangbotjó y entšanga chë shëconana imojtsetbiámana; y Pédrënaca chentše chëngaftaca yojótbema.

<sup>56</sup> Chora, canye shembása chentša oservená, Pédrëbioye tbojáninye chë iñe juachaca yojtsetbimana; tbojanonýinýe y tojánayana: —Muánaca cháftaca endánmëna ca.

<sup>57</sup> Pero Pedro ndoñe ca tojánayana, y chë shembásabioye mëntsá tbojaniana: —Sobrená, atše cha ndoñe quetsatabuatma ca.

<sup>58</sup> Ndoñe yapa bën y inya chábioye tbojataninye y tbojaniana: —Acnaca chë uatsjendayënguentšá condmëna ca.

Pero Pedro tbojanjuá: —Bacó, atše ndoñe quetsátsmëna ca.

<sup>59</sup> Chentša benëntscosna, inya más yojátayana: —Ndegombre, muánaca cháftaca enjánana; muánaca Galileocá entsemna ca.

<sup>60</sup> Y Pedro tojánayana: —Bacó, ndayama cojtsichámuama ndoñe quetsátstatšëmbo ca.

Cachora, y Pedro cabá yojtsóyebuambnantscuana, canye ngallo yojacánta.

<sup>61</sup> Chora Bëngbe Utabná yojobuértana y Pédrëbioye tbojanonýinýe; y Pedro chora yojenójuaboye ntšamo Bëngbe Utabná tbojanianama: “Cam ibeta bínýanoye, ngallo cabá ndëcánta ora, aca unga soye cochanjayana ndoñe šconduabuatma ca.”

<sup>62</sup> As Pedro shjoye tojánbocna, y corente ngménaca yojtsenóbošachna.

*Jesús imojtsáboyejuana*  
(Mt 26.67-68; Mc 14.65)

<sup>63</sup> Chë Jesús imojtsebojanýa entsanga cha imojtsáboyejuana y imojtsejantsetaye;

<sup>64</sup> y jtsabuchëntsacjuase, imojtsetjanaye: “¡Momalisiá, nda tcmënjajantsetá ca!”

<sup>65</sup> Y imojtsóyenguaye, nýe mocá soyënga jtsatsëtsnayëse.

*Jesús, chë judiëngbe uámana mándayëngbe delante*  
(Mt 26.59-66; Mc 14.55-64; Jn 18.19-24)

<sup>66</sup> Tojanbinýna ora, chë bëtsëjemëngcá amëndayënga, bachnangbe amëndayënga y ley abuátambayënga tmojánenefjna, y chëngbioye Jesús tmojanánatse. Choca tmojantjá:

<sup>67</sup> —Sméyana, ¿aca Bëngbe Bëtsabe Uámana Uabuayaná, chë Cristo comna ca?

Y Jesús tojanéjua: —Aíñe ca tchojáuyanëse, tšëngaftanga chama átsbeñe ndoñe quešmochatošbuáchiye.

<sup>68</sup> Y nderado tchojátjasna, tšëngaftanga ndoñe quešmochatojuá ca.

<sup>69</sup> Pero cam orscana, chë Bëngbe Bëtsá Entšá tbojanbemá, chë Bëngbe Bëtsá nýets obenana bomnabe catsbioica echántsatsbemana ca.

<sup>70</sup> Chora nýetscanga tmojantjá: —¿As, aca chë Bëngbe Bëtsabe Uaquiñá comna ca?

Y Jesús tojanéjua: —Cach tšëngaftanga chca šmontsichamo; atše cha sëndmëna ca.

<sup>71</sup> As chora chënga tmojánayana: —¿Ndayama más entsanga šochjátëjamoto Jesusbe contra chamuayanama? Er cach bënga chabe uayásentsana chca tmonjouena ca.

## 23

*Jesús, Pilatbe delante*

(Mt 27.1-2, 11-14; Mc 15.1-5; Jn 18.28-38)

<sup>1</sup> Nýetsca mándayënga tmojëftsantsbaná, y Pilátbioye, chë Judeoca mandádbioye Jesús tmojanánatse.

<sup>2</sup> Y chentše tmojanontsé cha mal jaquédana, mëntšá: —Bënga fsënjínýena mua entsabuatambá bacna soyënga, quem luarentša entsangbe amëndayëngbioye ndëtsayaunanama. Cha entsichamo bënga ndoñe šontsamna Césarbiama impuesto jtsatsquëcjnyana ca; y entsichamo cha yomna chë Cristo, chë Bëngbe Bëtsabe Uámana Uabuayaná, mo canýe reycá ca.

<sup>3</sup> Chora Pilato Jesúsbioye mëntšá tbojantjá: —¿Aca chë judiëngbe Rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

<sup>4</sup> As Pilato, chë bachnangbe amëndayënga y entsanga tojanéyana: —Atše ni mo canýe soye chiyátinýena, quem boyabása castiganá chaotsemnana jayanama ca.

<sup>5</sup> Pero chënga más tmojanáyebuachena: —Nýets Israel luarëjana entsabuatambá, Galilea entsangbe amëndayëngbe contra jtsemnana. Galilea luaroca chca tonjabojatšë y mora moca Judeócnaca cachcá entsama ca.

*Jesús Rey Heródesbe delante*

<sup>6</sup> As Pilato, Galilea luarama yojouena ora, tojanatjá Jesús Galileocá tayojamnama.

<sup>7</sup> Y Jesús aíñe Galileoca yojamnama cha tojántatšëmbona ora, Rey Heródesbioye cha tbojanichmó. Herodes inamna Galileoca mandado y chora Jerusalenentše cha yojtsemna.

<sup>8</sup> Herodes Jesúsbioye tbojáninýe ora, corente tojanoyejuá. Chana tempscana inaboše Jesús jinýama. Cha ba soyënga Jesusbiama tojanuena, y yojtseboše jinýama Jesús jamana canýe bëts soye, Bëngbe Bëtsabe obenánaca.

<sup>9</sup> Heródesna ba soyënga tbojantjá, pero cha ndocá tbonjanjuá.

<sup>10</sup> Y chéntšnaca, chë bachnangbe amëndayënga y judiëngbe ley abuátambayënga imojtsemna, y Jesús corente mal imojtsequédaye.

11 Chora, Herodes y chabe soldadenga Jesúsbioye corente imojtsáboyënja, y jtsaboye-juanamna, botamana entsayangá tmojanichëtjo, mo canye reycá; chentsana cachiñe Pilátbioye tmojesanichmó.

12 Cach te Herodes y Pilato tbojtananatsëtsaye; tempna chata ibojenáyata.

*Jesusbiana chaóbana ca tmojánayana*

*(Mt 27.15-26; Mc 15.6-15; Jn 18.39-19.16)*

13 Chentsana Pilato, chë bachnangbe amëndayënga, chë pueblentsa amëndayënga y nyetsca entsanga tojánachembo,

14 y mentsá tojanëyana: –Tšëngaftanga quem entsá átšbioye šmojuánatse, mo bacna soye entsángbeñe abuatambayacá, mandadënga ndëtsayaunanama ca; tšëngaftangbe delante lempe sënjatjá, tšëngaftanga ba soyënga muabiana šmonjayana, pero atšna ni mo canye soye chiyátinÿena, quem boyabása castiganá jtsemnama ibojtsemna ca jayanama.

15 Herodes cach ndoñe, chíyeca cachiñe bëngbioye cha tbojesichmó. Quem boyabása ni mo canye ndoñe tonjobuachjanguá jóbanama chabotsemnama.

16 Chcasna, jabuache chamotsecastigá y chentsana chanjëtšboshjona ca –cha tojánayana.

17 Yojamna canye utamená jëtšboshjonana, ntšamo Bashco fiesta ora jamana imojanamancá.

18 Pero chora entsanga cánÿiñe tmojanáyebuachena: –¡Jesús chaóbana! ¡Barrabás matsboshjona ca!

19 Barrabás inautámena, mandadëngbioye ndëtsayaunanama chë bëts pueblentsë entsanga tojánenautanama y entsá óbanaye causa.

20 Pilato cachiñe tojánayana Jesúsbioye jëtšboshjonama yojtsanboše ca;

21 pero entsangna más tmojtétanayebuachena: –¡Motsecrucificá! ¡Motsecrucificá ca!

22 Pilato ya unga soyama tojtétanayana: –¿Ntšamo bacna soye mua tojobuachjanguá ca? Ni mo canye bacna soye chiyátinÿena, mua jóbanama chabotsemnama. Chcasna, chanjacastíga y chora chanjëtšboshjona ca.

23 Pero chëngna más imojtsechembumbuana Jesús chamotsecrucificama. Cabana, chë bachnangbe amëndayënga y chë entsangbe jabuache chembumbuanánaca, Pilato tmojanëyëñaná Jesús chamóbama.

24 As Pilato tojanmandá ntšamo chë entsanga imojtsotjanañcá chaotsemnama;

25 as chora Pilato, Barrabásbioye cachcá tbojtanboshjona, chë nda inautámena mandadëngbioye ndëtsayaunanama entsángbioye tojánenautanama y entsá óbanaye causa. Y Jesusna entsangbe cucuatšiče tbojánboshjona, ntšamo chënga tmojtsebošcá chamomama.

*Jesús tmojancrucificá*

*(Mt 27.32-44; Mc 15.21-32; Jn 19.17-27)*

26 As jacrucificama Jesús tmojanánatse. Chora jajocana inátaboye canye boyabása, Simón ca uabainá, Cirene luarocá; y cha Jesusbe cruz tmojancutsá, Jesusbe ústonoye chaotsambama.

27 Y banga chë pueblentsa entsanga imojtsëstona; y chë shembásenga imojtsëstonëngna imojtsayošachiye y ngménaca imojtsanioye, Jesús chca yojtsepásama.

28 As Jesús chëngbioye tojanobuértana y tojanëyana: “Jerusalenentsa shembásenga, atšbiana ndoñe matošachena; cach tšëngaftangbiana y tšëngaftangbe básengbiana šmochjenóbošachna.

29 Canye te echanjóshjango y chë te šmochántichamo: ‘Tša tšabá chë shembásenga šešona ndbomnëngbiana, chë quem luaroye šešonga ndoñe tmonjëftsëshejajnëngbiana, y chë šešonga ndoñe tmonjëftsabachengbiana ca.’

30 Chora entsanga jetsóitanama mochántseboše y mochanjontsé ichámuana: ‘¡Tjashënga šmotsëtebuantsá y batsjabenga šmotsaitame ca!’

31 Atše, chë ndocna bacna soye amá, chíyeca puerte obená, chca šmojaborlase, ¿ntšamo mochjama chë ndegombre bacna soye amëngaftaca, chíyeca ndobenënga? O mëntšá, ¿chë nguëfshna betíyeca chca tmojtsamëse, ntšamo chë tojtsebuashá betíyeca mochjama ca?” —cha tojanéyana.

32 Jesúseftaca cruciñe jóbanama, útata bëts bacna soyënga ochjajnayatnaca imojtsënachaye.

33 Chë “Obanabe Bestšashe ca” uabaina luaroye tmojánashjajna ora, Jesús tmojancrucificá y chë bëts bacna soyënga ochjajnayatnaca, canya chabe catšbioica y chë ínÿana chabe uañicuayoica.

34 Chora Jesús mëntšá tojánayana: “Taita, mëngbe bacna soye motsaperdónaye, er ntšamo montsamama chënga ndoñe quemátstatšëmbo ca.”

Chë soldadënga Jesusbe entsayamna, tsbanánoye tmojanëtsena, chënga jtenájatayama.

35 Entšanga chentše imojtsemnënga chca imojtsonÿaye, y chë pueblentša mandayëngnaca Jesús imojtsáboyejuana y mëntšá imojtsenatsëtsnaye: “Inÿengna aíñe tojëftsatsëbacá; mora cachá chautsibocá, cha ndegombre Cristo, chë Bëngbe Bëtsabe Uámana Uabuayaná tomnëse ca.”

36 Soldadëngnaca Jesús imojtsáboyejuana; tmojanobeconá y untja vínoye imojtsefšësnaye,

37 y mëntšá imojtsatsaye: “¿Chë judiëngbe Rey tcomnësna, cach aca mentsbocá ca!”

38 Jesusbe bestšaše juatsboicna canye uabemana soye tmojananjo; chiñe mëntšá vojtsanábemana: MUA CHË JUDIËNGBE REY ENDMËNA ca.

39 Canye bëts bacna soyënga ochjajnayá yojtsecrucificaná, Jesúsbioye mëntšá tbojanóyenguango: —Chë Bëngbe Bëtsabe Uámana Uabuayaná tcomnësna, mentsbocá y bëndátnaca šmatsebocá ca.

40 Pero chë inÿe bëts bacna soyënga ochjajnayana mëntšá tbojanácacana: —¿Ni mo Bëngbe Bëtsá ndoñe condërrespectana? Bëndátnaca bontsamna chacá jóbanama.

41 Ndegombre bëndata muentše bontsemna bëts bacna soyënga ochjajnaye causa, y chíyeca chca jasúfriama bontsamna. Pero quem boyabása ni mo canye bacna soye ndoñe tonjobuachjanguá ca.

42 Y chorna, quem bëts bacna soyënga ochjajnayá Jesúsbioye tbojanianya: —Jesús, atšbiamna cochtenójuaboye aca reycá jabomándama chacojtabo ora ca.

43 Y Jesús tbojanjuá: —Ndegombre cbëyana, mënté átseftaca celoca, chë nÿetscanga oyejuayënga mondbetsemnoca, aca cochantsatsmëna ca.

### *Jesús tojanóbana*

*(Mt 27.45-56; Mc 15.33-41; Jn 19.28-30)*

44 Nÿetsto orscana las tresëntscoñe nÿets quem luare yojtseibétata.

45 Y shinÿe yojtsajbaná binÿnayana, y Bëngbe Bëtsabe bëts yebnentše yojújonÿana entsějua tsëntsaca yojtsenájataye. Chējua bënëjua inauamna y chë tsatsëntsaca inaujonÿana.

46 As Jesús tojanáyebuachena: “Taita, atšbe espíritu acbe cucuatšñe šcoboshjona ca.”

Y chca jayanama tojanpochocá ora, tojanóbana.

47 Chë romano soldadëngbe amëndayá chca tojáninÿe ora, Bëngbe Bëtsábioye tbojanadorá, mëntšá jayanëse: “Ndegombre, quem boyabása ainaniñe tsabe juabnënga bomná inamna ca.”

48 Nÿetsca entšanga chë soye jinÿama tmojánabënga, chca tojanopasama tmojáninÿe ora, tmojanontsé jtangana enocochjantšetaye, ngmënama.

49 Pero Jesusbe nÿetsca ubuátmënga y chë shembásenga Galileocana tmojanastëngna, chaboca tmojanoquedá chë soyënga onÿayiñe.

*Jesús tmojanatbontsá**(Mt 27.57-61; Mc 15.42-47; Jn 19.38-42)*

<sup>50</sup> Yojanmäna canye boyabása, José ca uabainá, canye Judeoca pueblócá, Arimatea ca uabaina; cha inamna canya chë pueblentša uámana amëndayënguentsá y canye tšabe entsá y nyetsca soyënguiñe tšabá amá.

<sup>51</sup> Chánaca yojanobátmana chë Bëngbe Bëtsabe amëndayana chaóshjanguama, y tondaye tbonjanogustá ntšamo chë inye amëndayënga tmojanjuabó y Jesúseftaca tmojanmcá.

<sup>52</sup> Cha Pilátbioye tojána y Jesusbe cuerpo tbojanotjañe.

<sup>53</sup> José chë cruzocana Jesusbe cuerpo tbojtantjango, canye lino entsëjuaca tbojanandmaná y canye cuevëshiñe, peñëshiñe pormániñe, tbojanjajó. Chentše cabá ndocná mondëjajo.

<sup>54</sup> Yëfsana ochnayté bëtsemnayecna, cach te yojanotocana saná japróntana chë yëfsana jasama; y chë ochnayté ya yojtsebínýana.

<sup>55</sup> Chë shembásenga, Galileocana Jesús tmojantjembabanga, tmojána y chë cuevëshe tmojáninýe, y tmojanrrepará ntšamo Jesusbe cuerpo tmojanjajoma.

<sup>56</sup> Yebnoye tmojtaná orna, tmojanprontá botamana uanguëtše béjayënga y soyënga chë cuerpiñe janëtjuama.

Chë ochnaytena chënga tmojanochná, ntšamo Moisesbe leyíñe yojanmandancá.

**24***Jesús tojtanyena**(Mt 28.1-10; Mc 16.1-8; Jn 20.1-10)*

1 Y tmengo, chë inye semana bojatšéntena, cabá cachëse, Jesús tmojanatbontsá cuevëshoye chë shembásenga tmojána, y tmojanamba chë tmojanprontá botamana uanguëtše soyënga.

2 Pero choye tmojánashjajna orna, tmojáninýena chë cuevëshoye amashjuanentša ndëtšbé chentšana juanáñe,

3 y choye tmojánamashjna ora, Bëngbe Utabná Jesusbe cuerpo ndoñe tmonjáninýena.

4 Chë shembásengna ndoñe imontsetátšëmbo ntšamo jajuaboyana chë soyama; chora, uta boyabásata, uabuashinýinýana entsáyá uichëtjonata chentše tbojabántsaye.

5 Y chë shembásenga tmojanëuatjanama y fshantsoye imojtsatsejbénama, chata tbojanéyana: “¿Ndáyeca obanëngbentše chë vida totsobomñá šmojtsenguá ca?”

6 Muentše cha ndocná quenátsmëna, er cha ya tontayena. Menójuabonga ndayá cha tmojanéyanama, cha cabá Galileoca enjamna ora. Cha tonjánayana:

7 ‘Chë Bëngbe Bëtsá Entsá tbojanbemá bontsemna bacna soye amëngbe cucuatšíñe chamoboshjonama, chamocrucificama y unga tianoye cháuatayenama ca’ ” –chata tbojánayana.

8 Chora chë shembásenga Jesusbe palabrëngama imojtenójuaboye,

9 y chë cuevëshentšana tmojtaná ora, chë tšabe noticiënga chë bnëtsana canye uatšjëndayënga y inye entsángbioye tmojanacuntá.

10 Chë uatšjëndayëngbioye chca cuentayëngna imojamna María Magdalena, Juana, y María, chë Santiagbe mamá, y chë inye shembásenga chëngaftaca imojamnënga.

11 Pero chë uatšjëndayëngna mëntšá chë shembásengbiana imojëtsejuabnaye: “Chënga montsoyebuambná mo corente juabna ndbomñëngcá ca.” Y chca, chënga chë soyíñe ndoñe montsanošbuaché.

12 Pero chentšana, Pedro tojëftsantsbaná y ochamanana chë Jesús tmojanjajó cuevëshoye tojána. Y choca yojtsemna ora, yojtsejbéna tsoye jontješiyama, pero nýe ena entsëjuangá yojuinýe, chë Jesús tmojanbochmëjuangá. As Pedro ojnana yebnoye yojtá, chca tojanopasama.



*Chë Emaús puebloye benachiñe  
(Mc 16.12-13)*

<sup>13</sup> Cach te, uta uatsjéndayata Emaús puebloye ibojtsaye. Emaús yojamna Jerusalenocana bnétsana canye kilómetroca.

<sup>14</sup> Chata ibojtsayencuéntaye lempe ntšamo tojanopasama.

<sup>15</sup> Y tojanopasá, ibojtsencuéntaye y ibojtsenatsëtsnayëntscuana, cach Jesús tojanobeconá y chátaftaca cányiñe yojtsaye;

<sup>16</sup> masque imojtsonyaye, ndoñe ibontsobena cha jótëmbana.

<sup>17</sup> Jesús tojanëyana: —¿Ndayama benachiñe šuabanencuéntaye ca?

As chata ngménaca ibojotsaye,

<sup>18</sup> y canya, Cleofás ca uabainá, tbojaniana: —¿Nyë aca cojtsemna, inye luarocana ashjanganá Jerusalenentše oyená, ndayá chentše quem diënga yopasánama ndëtatsëmbuá ca?

<sup>19</sup> Chora cha tojanëyana: —¿Ndaye soyënga ca?

Y chata tbojaniana: —Chë Jesús Nazaretocáftaca tonjopasá soyëngama. Cha enjamna canye Bëngbe Bëtsabe juabna oyebuambnayá, puerte obenana bomná ndayá jamama y jayanama, Bëngbe Bëtsabe delante y nyetsca entšangbe delante.

<sup>20</sup> Y ntšamo, chë bachnangbe amëndayënga y chentša mandadënga ínëngbe cucuatšiñe tmonjáboshjona, jóbanama ibojtsemna ca entšanga chamuayanama y chamocrucificama.

<sup>21</sup> Bënga chabiamana fsënjanobátmana, Césarbe cucuatšentšana Israeloca entšangbe atsebacayá chaotsemnana; pero morna ya unga te entsemna chca tonjopasá.

<sup>22</sup> Y mora ndayá, básefta shembásenga bëngbe enutënga ójnanana soyënga šonjáuyana. Chënga cabá cachëse chë Jesusbe cuerpo tmonjanjajó cuevëshoye tmonjá,

<sup>23</sup> y chabe cuerpo ndoñe tmonjínÿena; as chora chënga bëngbioye tmontabo y montsabíchamo angelënga tmojëftsanye y chënga catmënjayana cha ainá yojtsatsmëna ca.

<sup>24</sup> Bëngbentšana baseftángnaca chentšana chë cuevëshoye tmonjá, y tmojínÿena ntšamo chë shembásenga tmonjayancá, pero Jesús ndoñe tmonjëftsinye ca —chata ibojtsichamo.

<sup>25</sup> As Jesús chata tojanëyana: —¡Tša juabna ndbomnënga y tša uenana jošbuáchiyama, chë Bëngbe Bëtsabe juabna oyebuambnayënga tmojánayana soyëngama!

<sup>26</sup> ¿Mo ndoñe yonjamna chë Uámama Uabuayaná chë soyënga chaosufrima, y chentšana nyetsca entšanga corente cha chamuatschuama ca?

<sup>27</sup> Chentšana Jesús tojanontsé chata jábuayenana, lempe ntšamo chabiamana yojanoyebuambnacá chë Bëngbe Bëtsabe uabemana palabrenguiñe; yojontsé Moisesbe librëšangañe y chë Bëngbe Bëtsabe juabna oyebuambnayëngbe librëšangáñnaca.

<sup>28</sup> Chë ibojétsaye puebloye imojtsebeconá ora, Jesús tojanma mo más chcoye cuaftsacá.

<sup>29</sup> Pero chatna tmojanatarié chentše chaotsoquedáñama, mëntšá jauyanëse: — Bëndátaftaca motsoquedáñe; ya jetiñe entsemna y ya echanjaibétata ca.

As Jesús chátaftaca tojtsanoquedáñe.

<sup>30</sup> Chentšana tojanopasá, juasama mesëshentše imojtsetbiámana ora, Jesús chë tandëse tojanca, Bëngbe Bëtsábioye tbojtanchuá, chë tandëse tojanjatá, y chata tojanatšatá.

<sup>31</sup> As, chora chë uatsjéndayata ibojobenaye Jesús jótëmbana; pero chana nyë ndeolpe yojuenatjëmbe.

<sup>32</sup> Chora chata ibojtsenatsëtsnaye: “Chë benachiñe Bëngbe Bëtsabe uabemana palabrengama šondabuayiyiná ora, ndegombre bëngbe ainaniñe más bontseboše cha más chašotsabuayiyinama, ¿ndoñe chca ca?”

<sup>33</sup> As, cachora tbojëftsantsbanata y Jerusalenoye tbojtanata; choca tmojáninÿena chë bnétsana canye uatsjéndayënga cánÿentše imojtsemna y chëngbe enutëngnaca;

34 y mēntśá imojtsichamo: —¡Ndegombre Bēngbe Utabná tojtayena; Simónbioye tbojébēbocna ca!

35 As chata tbojanontśé jacúntana, ntśamo benachiñe tbojanpasacá, y ntśamo Jesúsbioye imojótēmba, chē tandēse tojanjatá ora.

*Jesús chabe uatsjéndayēnga tojánēbēbuacna*  
(Mt 28.16-20; Mc 16.14-18; Jn 20.19-23)

36 Chē uatsjéndayēnga chē soyēngama cabá imojtsencuéntantscuana, Jesús chēngbe tsēntsaca tojabántsaye y mēntśá tojanēyana: “Chē atśbe ainaniñe tśabe ebionana tśēngaftangaftaca chaotsemna ca.”

37 Pero chēnga tśa auatjanánēnga imojtsemna, y canye añemēse imojétsonyaye ca imojtsejuabnaye.

38 Pero Jesús tojanēyana: “¿Ndáyeca auatjanánēnga šmojtsemna? y ¿ndáyeca tśēngaftangbe ainaniñe chca šmojtsejuabná ca?”

39 Atśbe cucuatśēnga y atśbe shecuatśēnga minyēnga; šmobjajo y šmochanjinye. Cach atśe séntsemna. Canye añemēsna, ni mēntśena ni betaśēnga ntsebomnana; pero tśēngaftanga šmontsonyá, atśna aiñe ca” —tojanēyana.

40 Chca yojtsichámēse, chabe cucuatśēnga y chabe shecuatśēnga tojaninyānyé.

41 Y chēnga cabá ndoñe montsanošbuaché, chca noticiama corente imojtsóyejuama y tśa ojanánēnga imojtsemna causa; as Jesús tojanatjá: “¿Muentse ndayá jasama quešmēbomna ca?”

42 As canye tabena buana beonbiana tmojanoyé;

43 Jesús tojanocñe y chēngbentse tojanse.

44 Chentśana Jesús tojanēyana: “Quem palabrenga entsemna ntśamo cabá tśēngaftangaftaca sēnjamna ora tchbonjanēyancá: Entsemna, lempe chaopasá ntśamo atśbiamá iuabemancá, Moisesbe leyēnguiñe, chē Bēngbe Bētsabe juabna oyebuambnayēngbe uabemana librēšangañe y Salmos librēšañnaca ca.”

45 Y chora chē uatsjéndayēnga, Jesúsbeyeca tmojanobená chē Bēngbe Bētsabe uabemana palabrengama josértana.

46 Chentśana Jesús tojanēyana: “Ntśamo atśbiamá iuabemancana yomna, chē Bēngbe Bētsá Entśá tbojanbemá chaosufrí y unga tianoye chauatayena ca.

47 Y morna atśbe uabaina jayanēse, átśbeñe betsošbuáchema, nyets quem luarentse šmochjontśa entśanga atśbiamá jábuayenama, bacna soyēnga amana chamuajbanama, as chca, Bēngbe Bētsá chēngbe bacna soyēngama cháuaperdonama; chē soyēnga Jerusale-  
nentse chaobojatśé.

48 Tśēngaftanga atśbiamá soyēnga šmonjinye y šmondétatśēmbo.

49 Atśbe Taitabe šbuachenaná, tśēngaftangbiamá chanjíchmuá. Pero morna camuentse Jerusale-  
nentse moquedanga, Bēngbe Bētsabe obenana chašmóyēngacñēntscuana ca” —  
cha tojanēyana.

*Jesús celoye tojtantsjuá*  
(Mc 16.19-20)

50 Chentśana, Jesús chabe uatsjéndayēnga ínyoje tojanēnatse, Betania pueblo béconana. Y chabe buacuatśēnga játsbanase, Bēngbe Bētsá tbojanimpadá chē uatsjéndayēnga tśabe bendicionēnga chamóyēngacñama.

51 Chca yojtsamēntscuana, cha chēngbentśana tojanoluaré y tojanontśé celoye játsjuana.

52 Chē uatsjéndayēngna, Jesús tmojtanadorá chentśana, Jerusalenoye oyejuayēnga tmojtaná;

53 y cada te, Bēngbe Bētsabe bēts yebnoye imojánajna, Bēngbe Bētsá jētschuayama.

## San Juan

### *Cristo, chë Bëngbe Bëtsabe Uámana Oyebuambnayana ca Uabainá*

<sup>1</sup> Quem luare ndobojátša ora, Cristo, chë Bëngbe Bëtsabe Uámana Oyebuambnayana ya yojtsemna; chora cha, chë chca uabainá, Bëngbe Bëtsáftaca yojtsanmëna, y cachá Bëngbe Bëtsá inamna.

<sup>2</sup> Ndegombre cha, chë tempšana Bëngbe Bëtsáftaca yojtsanmëna.

<sup>3</sup> Cháftaca, Bëngbe Bëtsá lempe tojanma; cháftaca ndóñesna, lempe ntšamo mora yomncá, Bëngbe Bëtsá tondaye matënjanma.

<sup>4</sup> Cachábeñe nÿets vida inamna, y quem vídaca tojánabo quem luarentša entsangbe juabnënga jabuábinÿnayama.

<sup>5</sup> Cha tonjánabo moye, chë entsangbe juabnënga ndoñe binÿniñe yonjamnoye, chiñe jabobinÿnayama. Cha sempre chca yobinÿna, y Satanás chë entsangbe juabnënga ndoñe binÿniñe chaondëtsemnama amá, ndoñe yondobena chë binÿnayabe obenana jtsejuánana.

<sup>6</sup> Inamna canÿe boyabása, Juan ca uabainá; y Bëngbe Bëtsá tbojanichmó,

<sup>7</sup> binÿnayabiamá chaóyebuambama; entsángbeñe binÿnayabiamá cháuyanama, chca, ntšamo Juan chë binÿnayabiamá tojayana soyëngaca, nÿetscanga Jesúsbeñe chamot-sošbuáchema.

<sup>8</sup> Juan ndoñe yonjamna chë binÿnayá. Cha inamna canÿe ichmoná, chë nda binÿnayá yomnabiamá entsángbeñe chauabáyanama.

<sup>9</sup> Chë ndegombrá quem luaroye tonjánabo chë entsangbe juabnënga jabuábinÿnayama.

<sup>10</sup> Chë Bëngbe Bëtsabe Uámana Oyebuambnayana quem luariñe yojtsanmëna; masque cháftaca Bëngbe Bëtsá quem luare tojanma, nda cha yojamnama muentša oyenënga ndoñe monjántatšëmbo.

<sup>11</sup> Cachabe luare entsángbioye tonjánabo, y entsanga ndoñe tmonjánbošena cha jofjana.

<sup>12</sup> Nÿetscanga, ndëmuanÿenga cha tmojanëbuaja y chábeñe tmojtsošbuáchenga, cha derecho tonjanatšatá jtobenama Bëngbe Bëtsabe básenga ca jtsabáinama.

<sup>13</sup> Quem ošbuáchiyënga, chca jtsemnama ndoñe tmonjanobená entsangbe buiñentsana tmojanonÿnáyeca, o ndaye entsabe juabnentsana. Nÿe Bëngbe Bëtsábeyeca chca chabe básenga imojtsabaina.

<sup>14</sup> Cha, chë Bëngbe Bëtsabe Uámana Oyebuambnayana, entsá tojanóbema, y quem luare bëngaftaca yojëftsiyena. Cha yomna chë Bëngbe Bëtsabe nÿe canÿe Uaquiñá; chíyeca bënga tifjáninÿe chabe bëts obenana y chabe tsabe juabna, chë Bëngbe Bëtsábentsana tojanóyëngacñana. Cha corente jtsababuánÿeshanëse šojánanÿena y yojëftsiyena ntšamo ndegombre inamncá.

<sup>15</sup> Juan mëntsá chabiamá yojanáyebuache: “Chabiamá sënjanoyebuambná, chë ndabiamá chora atše sënjánayana, chë átšbentsana jabamana atšbiamá más uamaná endmëna, er atše cabá ndonÿna orna, cha ya yojtsemna ca.”

<sup>16</sup> Cha tša tsabe ainana bómnyeca, bënga nÿetscanga mallajta tsabe bendicionënga tmojóyëngacñe.

<sup>17</sup> Moisesbiajana tifjanóyëngacñe chë Bëngbe Bëtsá tojanmandá soyënga. Pero Jesucristbeyeca, Bëngbe Bëtsá tsabe bendicionënga bëngbiamá tojama y chë ndegombre soyënga bënga tmojëftsashjache.

<sup>18</sup> Ndocná, ndocna te Bëngbe Bëtsábioye tbonjinÿe. Chë nÿe canÿe Uaquiñá ibobomná, cach Bëngbe Bëtsá yomna; y cha, Bëngbe Bëtsá chë Taitáftaca cánÿiñe mo canÿacá yomna. Mua, chë Uaquiñá, bëngbiamá tojama, Bëngbe Bëtsá juabuátmanama chaotsopodënama.

*Juan chë Ubayaná Jesucristbiana tojanabuayená*

(Mt 3.11-12; Mc 1.7-8; Lc 3.15-17)

<sup>19</sup> Canye te, Jerusalenoca judiënga tmojanichamó básefta chëngbe bachnanga y lev-itënga, chë Bëngbe Bëtsabe bëts yebnoca trabájayënga, Juan yojtsemnoye, cha nda bëtsemnama chamuatjayama.

<sup>20</sup> Chocna, Juan chëngbeñe ndegombre tojanobuambá: —Atše, chë Bëngbe Bëtsabe Uámana Uabuayaná ndoñe quetsátsmëna ca.

<sup>21</sup> As chora, cachiñe tmojantjá: —As, ¿ndase cojtsemna? ¿Chë Bëngbe Bëtsabe juabna oyebuambnayá Elías ca?

Y Juan tojanëjua: —Atše cha ndoñe quetsátsmëna ca.

Chora chënga tmojantjá: —As, ¿chë Bëngbe Bëtsabe juabna jabóyebuambayama jabamá ca?

Y Juan tojanëjua: —Ndoñe ca.

<sup>22</sup> Chora chënga tmojaniana: —Asna, ¿aca ndase cojtsemna? Bënga šontsamna nda aca cojtsemnama jtsetatšëmbuana, as chë šonjadespachenga jacúntama. ¿Ndayá cojtsobena cach acbiana jayanama ca?

<sup>23</sup> Y Juan mëntsá tojanëjua: —Atše sëntsemna chë ndabiana Bëngbe Bëtsabe juabna oyebuambnayá Isaías mëntsá tojanábema: “Entšanga ndoyenoca canye abuyayinayá echántsemna, y entšanga mëntsá echántsbuayinaye: Bëngbe Utabná echanjabo ca. Mo nda canye benache tojtseprontacá, tšëngaftángnaca cachcá, cha jabama tšabe juabnëngaca šmochtseprontana ca.”

<sup>24</sup> Chorna, báseftanga chë fariseungbe ichmónënguentšana,

<sup>25</sup> Juan tmojantjá: —Chë Bëngbe Bëtsabe Uámana Uabuayaná, Cristo ca uabainá, ndoñe tcontsemnésna, ni Elías, ni chë Bëngbe Bëtsabe juabna jabóyebuambayama jabamá ndóñesna, ¿ndáyeca entšanga cojtsëbayana ca?

<sup>26</sup> Chora Juan tojanëjua: —Atšna, béjayeca entšanga sëndëubáyana. Pero tšëngaftangbeñe canya entsemna; cha ndoñe quešmatábuatma;

<sup>27</sup> y cha atšbe ústonoye echanjášhango. Atše merecido taitatobuajoñe, ni mo jotsejbiyama, chabe shecochëtjonëshentša corriëja jajafjonama ca.

<sup>28</sup> Chca tojanopasá, canye pueblo Betania ca uabáinentše, Jordán béjaye chenguana. Cach béjayañe, Juan entšanga yojanëbáyana.

*Jesús chë Bëngbe Bëtsabe Oveshatema ca uabainá*

<sup>29</sup> Yëfsana, Juan yojtsemnoye Jesús yojtsebëconaye, y chë cháftaca imojtsemna entšanga tojanëyana: “Smochjinye. Chë nda Bëngbe Bëtsá tbojichmó y iytanana Oveshatemcá entsobiamná cha, entsashjajuana ca. Cha jóbanëse, quem luarentša entšanga bacna soyëngama perdonánënga mochántsemna.

<sup>30</sup> Atše chabiana cbonjutsëtsná, mëntsá sënjanayana ora: ‘Atšbe ústonoye canya echanjášhango. Cha atšbiana más uamaná endmëna, er atše cabá ndonyna ora, cha ya yojtsemna ca.’

<sup>31</sup> Tempna, cach atše ndoñe quetsjátantatšëmbo nda cha bëtsemnana. Pero atšna ínënga béjayeca ubáyana sëndabó, Israeloca entšanga quem boyabása chamuábuatmanama ca” — Juan tojanëyana.

<sup>32</sup> Chentšana Juan mëntsánaca tojanobuambá: “Chabiana mëntsá bominye sënjanajó: chë Uámana Espíritu, mo canye palomatemcá, celocana tonjánastjango y quem boyabásabe juatsbuañe tonjanototoná.

<sup>33</sup> Atše cabá ndoñe quetsjátantatšëmbo nda cha bëtsemnana, pero chë béjayeca jubáyama šonjanichmó cha, mëntsá šonjaniana: ‘Nda chacojinye, chë Uámana Espíritu jastjan-guana y chabe juatsbuañe jototonana, chábeyeca atše chanjíchmu chë Uámana Espíritu entšangbe ainaniñe cháuamashënguama ca.’

<sup>34</sup> Y morna, atše aíñe chca tijinÿe, y ndegombre tšëngaftanga cbëyana, cha chë Bëngbe Bëtsabe Uaquiñá entsemna ca” —cha tojanéyana.

*Chë Jesusbe natsana ústonënga*

<sup>35</sup> Yëfsana, Juan chabe uatsjédayënguentsana útataftaca cachoca yojtésemna.

<sup>36</sup> Jesús yojtsachnëjuanama, Juan tbojáninÿe ora, tojanéyana: “Sochjinÿe. Mua entsemna nda Bëngbe Bëtsá tbojichmó y iytanana Oveshatemcá entsobiamná cha ca.”

<sup>37</sup> Chora chë Juanbe uta uatsjédayata, chca tbojanuena ora, Jesús tmojanasto.

<sup>38</sup> Jesús tojesanontješé y tojánanÿe chata imojétsëstonama. As, tojanatjá: —¿Ndayá sojtsenguá ca?

Y chata tbojanianyana: —¿Rabí, ndayentše icoyena ca? (Rabí endayana “Buatëmbayá ca”.)

<sup>39</sup> Chora Jesús tojanéjua: —Mabo y sochjinÿe ca.

As chata tbojána y tbojáninÿe ndayentše cha yojaniyenana. Y chentše cháftaca tojéftsana jetana, ya jetiñe mo las cuatro ora yojtsemna causa.

<sup>40</sup> Chë Jesusbiamna oyebuambnayana Juánbioye tbojanóyeunata y Jesús tbojanasto útatentsana cánÿana Andrés ca yojanabaina; cha yojamna Simón Pédrëbe catšata.

<sup>41</sup> Andrés, cabá ndocna inÿe soye ndëma ora, tojána chabe catšata Simón janguanguama. Y tbojáninÿena ora, Simónbioye tbojanianyana: “Chë Bëngbe Bëtsabe Uámana Uabuayaná, Cristo, fsënjínÿena ca.”

<sup>42</sup> Chentšana Andrés, Simónbioye tbojanánatse Jesús yojtsemnoye. Jesús, Simónbioye tbojáninÿe ora, tbojanianyana: “Aca condmëna Simón, Jonasbe uaquiñá, pero Cefas ca cochantsabaina ca.” (Chcana endayana “Pedro o ndëtšbé ca”.)

*Jesús, Felipe y Natanael tojánachembo chamuastama*

<sup>43</sup> Yëfsana, Jesús tojanjuabó Galilea luaroye jama. Benachiñe Felípbioye tbojáninÿena y tbojanianyana: “Smasto ca.”

<sup>44</sup> Chë boyabása Felipe, Betsaida pueblóca inamna. Andrés y Pédrëna cach pueblócata ibnamna.

<sup>45</sup> Chentšana Felipe tojána Natanael janguanguama; y tbojanianyana: —Chë ndabiamna leyënga librëšangañe Moisés tojanábema cha fsënjínÿena ca. Cachabiamna, Bëngbe Bëtsabe juabna oyebuambnayëngnaca tmojanábema. Cha Jesús entsemna, Josebe uaquiñá, chë Nazaretocá ca.

<sup>46</sup> Chora Natanael tbojanianyana: —¿Ndaye tšabe soye Nazaretocana nanjopódia jóbocnama ca?

Y Felipe tbojanjuá: —Mabo y cochjinÿe ca.

<sup>47</sup> Natanael yojtsebëconama, Jesús tbojáninÿe ora tojánayana: —Moye canÿe entšá entsabó; cha ndegombre endomerecena Israelbentsana entšá jtsemnama. Cha tšabe entšá endmëna; ndocnábioye quebnatsíngña ca.

<sup>48</sup> Chora Natanael Jesúsbioye tbojantjá: —¿Ntšamo atše šcuabuatma ca?

Y Jesús tbojanjuá: —Felipe cabá aca ndëchembo ora, atše tcbonjinÿe, chë higo betiye tēchetsoye condëtsomñe ora ca.

<sup>49</sup> As, Natanael tbojanianyana: —Buatëmbayá, ¡aca chë Bëngbe Bëtsabe Uaquiñá comna! ¡Aca, chë Israeloca entšangbe Rey ca!

<sup>50</sup> Chora Jesús tbojanjuá: —¿Aca átšbeñe cojtsošbuaché, nÿe chë higo betiye tēchetsoye tcbonjinÿe ca tcbouyanama? Ndegombre, chë soyama más bëts soyënga cochanjínÿe ca.

<sup>51</sup> Chentšana Jesús tojanéyana: —Ndegombre šcuayana: Tšëngaftanga šmochanjínÿe celoca atëfjniñe, y Bëngbe Bëtsabe angelotëmënga jtsetsjuajnana y jtsastjajuanana Bëngbe Bëtsá Entšá tbojanbemabe tatsëtsoca.

## 2

*Canÿe casamento Galilea luaroca, Caná pueblentše*

<sup>1</sup> Chentšana unga tianoye, canye casamento inamna, canye pueblentse Caná ca uabáinentse, Galileoca. Chë oboyejuayoca Jesusbe mamá yojtsemna.

<sup>2</sup> Jesús y chabe uatsjéndayëgnaca chë casamentoca ófjanënga imojtsemna.

<sup>3</sup> Chë oboyejuayentse, vínoye yojtsopochóca y Jesusbe mamá tbojanianyana: —Ya ton-daye vínoye quemátsbomna ca.

<sup>4</sup> As, Jesús tbojanjuá: —Mama, ¿ndáyeca chca atše šcojtsatsá? Atšbe ora cabá ndoñe ntjoshjanguana ca.

<sup>5</sup> Chentšana, chabe mamá, chentša oservénënga tojanéyana: —Lempe šmochjama, ntšamo cha chacmojuayancá ca.

<sup>6</sup> Chocna, chnënguana ndëtšbé matbaja inamna. Chca matbajënguentsä bėjayeca, judiënga imojanamana jtsacuéntšabiana cabá ndëse ora, ntšamo tempo entsanga imojanamancá, Bëngbe Bëtsabe delante tšábënga jtsatsmënema. Cada matbajiñe, mo shachna o canýsëfta bnëtsanájuá bėjaye yojanába.

<sup>7</sup> Chora Jesús chë oservénënga tojanamëndá: “Quem matbajënga bėjayeca mobuajutetjé ca.” Y chënga, chora lempe tmojanbuajutetjé.

<sup>8</sup> Y Jesús tojanéyana: “Morna, báseye mobuatsjo y chë fiesta otocanábioye mabuyamba ca.” Y chënga chca tmojanma.

<sup>9</sup> Chora, chë fiesta otocaná, chë bėjaye Jesús vínoye tojanbemiye tojanftantiá, ndémocana yojóbocnama ntsetatšëmbcá. Pero chë oservénëngna aífne imojtsetátšëmbo ndémocana, er cachënga chë bėjaye tmojanbuatsjo. As, chë fiesta otocanana, chë bobontse bouamnábioye tbojanchembo,

<sup>10</sup> y tbojanianyana: “Nýetscanga monduamana natsana chë más uámana vínoye jushebëcana, y chë ófjanënga beca tmojatëmo ora, chë más batšá uámaniye. Pero acna, chë más uámana vínoye morscama tcojtsabofjajó ca.”

<sup>11</sup> Ntšamo Jesús tojanmcá Caná pueblentse, Galileoca, yojamna chabe natsana bëts soye Bëngbe Bëtsabe obenánaca. Y chca, chabe bëts obenana y uámanana cha tojaninýanýe; y as, chabe uatsjéndayënga chábeñe imojtsošbuaché.

<sup>12</sup> Chca tojanopasá chentšana, Jesús canye pueblo, Capernaum ca uabáinoye tojt-sanoñe. Chorna, chabe mamá, chabe catšátanga y chabe uatsjéndayënga cha tmojan-tjëmbambá, y choca baseftatescama tmojanoquedá.

*Jesús Bëngbe Bëtsabe bëts yebnentšana bacna entsanga tojtanëbuacna*

*(Mt 21.12-13; Mc 11.15-18; Lc 19.45-46)*

<sup>13</sup> Ya canye judiëngbe bëts fiesta, chë Bashco fiesta yojétsobeco, chë ntšamo Bëngbe Bëtsá chëngbe bëts taitanga Egiptocana tojánatsebacama jtenójuaboyama. Chë fiestama Jesús Jerusalenoye tojána.

<sup>14</sup> Jerusalenoca, Bëngbe Bëtsabe bëts yebnentse, Jesús tojánanýena uacnënga, oveshënga y paloma enënga, y entsángbioye crocénana atrócyënga, chëngbe luarënguenache imojtset-biámana.

<sup>15</sup> Jesús chca tojánanýe ora, biajënga tojanaca, tjanjanëja tojanobopormá, y Bëngbe Bëtsabe bëts yebnentšana nýetscanga tojtanëbuacna, chëngbe oveshënga y uacnéngaca. Chentšana Jesús, Bëngbe Bëtsabe bëts yebnentšama yojanoserverna crocénana atrocayëngbe crocénana tojtsanëjquësheshe, y chë mesëshangá tojtsanenásatajchquëca.

<sup>16</sup> Chë paloma enëngna Jesús tojanéyana: —¡Quem soyënga lempe muentšana matábocana! ¡Ndoñe matsbuamnana ni mátenana atšbe Bëtsabe yebnentse, mo cánýentse jiyama luarentse cuaftsemncá ca!

<sup>17</sup> Y as, chabe uatsjéndayënga tmojanenojuabó ntšamo Bëngbe Bëtsabe uabemana palabrënguiñe iuayanama: “Bëngbe Bëtsabe yebna jtseboguianama juabna, nýets átšbeñe entsemna ca.”

<sup>18</sup> Chora, judiënga Jesús tmojantjá: —¿Ndaye bëts soye cochjama bënga chašcuinýanýema, aca ndaye deréchoca bëngaftaca chca cojtsobenama ca?

<sup>19</sup> As Jesús tojanějua: —Quem Bëngbe Bëtsabe yebna menásatajchca, y atše unga tese chtëtsbaná ca.

<sup>20</sup> Chora chë judiënga tmojanianyana: —Canta bnëtsana chnënguana uatiñe, quem Bëngbe Bëtsabe yebna tmojanjebo. ¿Y aca, nÿe unga tese lempe cochtëtsjebo ca?

<sup>21</sup> Pero Bëngbe Bëtsabe yebna, ndayama chora cha chca tojánayana, cachabe cuerpo yojtsemna, ndoñe chë jebna soye.

<sup>22</sup> Chama, Jesús obanënguentsana tojtanayena ora, chabe uatsjëndayënga tmojanenoyuabó ntšamo muentše cha tojanéyanama. Chca ora, Bëngbe Bëtsabe uabemana palabrënguñe y Jesús chora tojánayana palabrënguñe más chënga imojtsošbuaché.

### *Jesús nÿetsca entsangbe juabna iuábuatma*

<sup>23</sup> Jesús Jerusalemoca chë Bashco fiestama yojtsemnëntscuana, entsanga tmojáninÿe Jesús jamana bëts soyënga Bëngbe Bëtsabe obenánaca. Chíyeca, ba entsanga chábeñe imojtsošbuaché.

<sup>24</sup> Pero Jesús chëngbeñe ndoñe yontsošbuaché, cha nÿetscanga yojanëbuatma causa.

<sup>25</sup> Y Jesús ndoñe bonjanájaboto chë entsangbe soyëngama chabotsebuayiynama, er cachá entsangbe ainaniñe nÿetsca juabnënga yojanábuatma.

## 3

### *Jesús y Nicodemo*

<sup>1</sup> Inamna canÿe boyabása Nicodemo ca uabainá. Cha yojamna fariseunguentšá y judiëngbe canÿe amëndayá.

<sup>2</sup> Chana ibeta Jesúsbioye tojána y tbojanianyana: —Buatëmbayá, bënga fsëntsetatšëmbo aca canÿe buatëmbayá comnama, Bëngbe Bëtsabe ichmoná. Ndocná quenátobena jamana quem bëts soyënga, aca contsama soyënga, Bëngbe Bëtsá cháftaca ndoñe tontsemnëse. Chíyeca bënga chca fsëntsetatšëmbo ca —cha tbojanianyana.

<sup>3</sup> Chora Jesús tbojanjuá: —Ndegombre cbëyana, nda ndoñe cachiñe tontonÿná, cha ndoñe quenátobena Bëngbe Bëtsabe amëndayana jinÿama ca.

<sup>4</sup> Y Nicodemo tbojantjá: —¿Ntšamo, canÿe entsá ya bëtsá tojtsemna ora, nantsobena cachiñe jtónÿnama ca? Ndegombre, cha ndoñe ntsoobenana cachabe mamabe cuerpiñe jtamashënguana cachiñe jtónÿnama ca.

<sup>5</sup> Chora Jesús tbojanjuá: —Ndegombre cbëyana, béjayeca y chë Uámana Espíritbeyeca ntjonÿnacá, ndocná quenátobena Bëngbe Bëtsabe amëndayoye jamashënguama.

<sup>6</sup> Nda bëtsëtsabentsana tojonÿná cha, quem luarentša entsangcá jtsemnana; pero chë Uámana Espíritbeyeca tojonÿná chana, jtsemnana canÿa chë Uámana Espiritu ainaniñe bomná.

<sup>7</sup> Ndoñe matenjnanana ntšamo tcbonjauyanama: “Nÿetscanga entsamna cachiñe jtónÿnama”.

<sup>8</sup> Chë binÿia ndëmuajana tojtseboše jtsemnana, chëjana jtsanana. Masque entsanga, chë binÿiayama jtsuenanana, ndoñe ntsetatšëmbuana ndëmocana yobama y ndëmoye yojtsoma. Cachcá, tšëngaftanga ndoñe quešmátstatsëmbo ntšamo entsanga chë Uámana Espíritbeyeca tmojtsónÿnama; pero tšëngaftanga šmontsetátšëmbo aiñe chca yomnama ca —Jesús tbojanianyana.

<sup>9</sup> Chora Nicodemo tbojantjá: —¿Ntšamo chca nántsemna ca?

<sup>10</sup> Y Jesús tbojanjuá: —Aca, canÿe Israeloca abuatambayá, ¿chë soyëngama ndoñe condëtatšëmbo ca?

<sup>11</sup> Ndegombre cbëyana, bëngna chë fststátšëmbo soyëngama fsëntsoyebuambná, y chë tifjinÿe soyëngama ndegombre bëtsemnana fsëntsichamo. Pero tšëngaftanga, chë cbontsëtsësná soyënguñe ndoñe quešmatošbuaché.

<sup>12</sup> Atše, quem luarentša soyëngama sënjoyebuambá y tšëngaftanga átsbeñe ndoñe chešmatošbuaché. Y as, ¿ntšamo átsbeñe šmochtsošbuáchiye, celoca soyëngama cbojtsëtsësnase?

<sup>13</sup> “Ndocná, nÿe cachábeyeca Bëngbe Bëtsábioye tonjátsjua. Nÿe chë celocana tojabá aíñe, chë Bëngbe Bëtsá Entšá tbojanbemá.

<sup>14</sup> Y chcase, ntšamo Moisés entšanga ndoyenoca bronce mëtšcuaye tsbanánoca tbojananguësëtjca, šoquënga tšabá chamotsatsmënama; cachcá entsemna, Bëngbe Bëtsá Entšá tbojanbemá entšanga chamuatsbanama;

<sup>15</sup> chca, nÿetscanga chábeñe tmojtsošbuáchenga, chë nÿetsca tescama yomna tšabe vida chamotsebomnama ca” —Jesús Nicodémbioye tbojaniana.

### *Ntsachetšá Bëngbe Bëtsá entšanga iuababuánÿeshana*

<sup>16</sup> Mëntšánaca Jesús tojánayana: —Bëngbe Bëtsá quem luare entšangbioye tša yojánababuanÿeshanayeca, chë nÿe canÿe Uaquiñá ibobomná, bëngbioye tbojichmó, nÿetsca chábeñe ošbuáchiyënga ndoñe chamondóbanama, y aíñe chë nÿetsca tescama yomna tšabe vida chamotsebomnama.

<sup>17</sup> Er Bëngbe Bëtsá chabe Uaquiñá quem luaroye ndoñe tbonjichmó quem luare entšangbiana jabáyanama ntšamo tmojamama castigánënga chaotsamnama ca, sinó, entšanga chábeyeca atsebácanënga chamotsemnama.

<sup>18</sup> “Nda Bëngbe Bëtsabe Uaquiñábeñe tojtsošbuáchebiana, Bëngbe Bëtsá ndoñe queochátayana ntšamo cha tojamama, castiganá chaotsemna ca. Pero chë Uaquiñábeñe ndoñe tontsošbuáchebiana, mora Bëngbe Bëtsá ya tojayana, ntšamo tojamama cha castiganá chaotsemna ca, chë Bëngbe Bëtsá nÿe canÿe Uaquiñá ibobomnábeñe ndoñe yontsošbuaché causa.

<sup>19</sup> Chca, chë ndoñe tmontsošbuáchengbiamna cha ya tojayana, ntšamo tmojamama castigánënga chamotsemna ca; er chë entšangbe juabnënga binÿnayá quem luaroye tojabo, pero ba entšanga tmojábošena jtsomñana, chë entšangbiana bacna juabnëngaca chamotsebomnama amáftaca. Chënga sempre bacna soyënga jtsamana; chíyeca chënga jtsebošana cháftaca jtsomñana.

<sup>20</sup> Chë bacna soyënga tojtsamá ndoñe ntsebošana, chë binÿnayá chabe bacna soyënga chabuinÿinÿema, ni chabe bacna soyëngama chabuácacanama. Chíyeca, chë bacna soyënga jtsamëse oyená, chë binÿnayábioye jtsáboyënjana, y chë binÿnayábioye ndoñe ntjabana.

<sup>21</sup> Pero nda sempre tojtsiyena ntšamo ndegombre yomncá jtsamëse, chana aíñe chë binÿnayábioye jabana, chë binÿnayá chabiana chabuinÿinÿema, chë tojama soyëngna, ntšamo Bëngbe Bëtsá tojtseboščá tojamama ca” —Jesús tojánayana.

### *Juan chë Ubayaná cachiñe Jesucristbiana tojanabuayená*

<sup>22</sup> Chca tojanopasá chentšana, Jesús chabe uatsjëndayëngaftaca básefta Judeoca pueblëngoye tojtsanoñe. Chiñe, baseftatescama chë uatsjëndayëngaftaca tojanoquedá, entšanga ubáyana.

<sup>23</sup> Cach tempo, Juanënaca entšanga yojanëbáyana Enonoca, Salim béconana, er choca bëtscá béjaye inabinÿna. Ba entšanga choye imojtsaye, y Juan chënga yojanëbáyana.

<sup>24</sup> Chca tojanopasá, chë Heródesbe soldadënga Juan cabá ndutame ora.

<sup>25</sup> Chë tempo, básefta Juanbe ústonënga tmojanontšé inÿe judíoftaca enatsëtsnayana ntšamo tempo judiënga chë jtsacuëntšabiana imojanámanama.

<sup>26</sup> Chora, chënga Juánbioye tmojánabo y tmojaniana: —Buatëmbayá, chë Jordán chenguánoica ácaftaca enjanná, ndabiana tša tšabá conjanoyebuambná, mora entšanga entsëbayana y nÿetscanga cha montséstona ca.

<sup>27</sup> As Juan tojanëyana: —Ndocná quenátobena tondaye ntsebomnana, Bëngbe Bëtsá ndoñe tbonjatsetase.



<sup>28</sup> Cach tšëngaftanga tšabá šmonjanuena y šmontsobena ndegombre yomnama jayanana, atše ndoñe chë Bëngbe Bëtsabe Uámana Uabuayaná tsjanmëna ca sënjánayanama; sinó, Bëngbe Bëtsá atše šojanichmó chë Uabuayanabe natsana, chabiama entšanga jabábuayenama.

<sup>29</sup> Chë tobiaše tojtsobouamá ora, chë bobontse chábioye jtsebomnana; y chabe amigna, chabiama jtsobátmanana y chë bobontse bouamnabe oyebuambnayana jtsuenanana; y chca tojtsuenana ora, tša oyejuayá cha jtsemnana. Cachcá, ntšamo chë Uabuayaná vojtsamama y yojtsóyebuambnama sëntsuenana ora, átšnaca corente oyejuayá sëntsemna.

<sup>30</sup> Cha bontsemna más uamaná jtsemnana, pero atše šontsemna más nduamaná jtsemnana ca —Juan tojanéyana.

### *Ntšamo yomna chë celocana tojabá*

<sup>31</sup> Mëntšánaca Juan tojánayana: “Chë tsbanánocana tojabá, nÿetsca entšangbiama más uamaná endmëna. Chë quem luare oyená quem luare entšangcá jtsemnana y quem luarentša soyëngama jtsóyebuambnayana, pero chë celocana tojabana, nÿetsca entšangbiama más uamaná endmëna.

<sup>32</sup> Cachá ntšamo tojinÿe y tojouencá entsoyebuambná, pero chë entsichamo soyënguiñe ndocná quenatošbuaché.

<sup>33</sup> Nda ntšamo cha tojtsóyebuambnañe tojtsóšbuaché y chca tojtsama, jtsinÿanÿnayana Bëngbe Bëtsá ndegombre soyënga inetsichámuama.

<sup>34</sup> Chcasna, Bëngbe Bëtsabe ichmonana, jtsóyebuambnayana ntšamo Bëngbe Bëtsá tojtsichamcá. Bëngbe Bëtsana chë ichmonábioye tbojichmó chë Uámana Espíritu, nÿets tempo corente chabotsájabuachanama, ntšamo cach Bëngbe Bëtsá tojtsichamo y cachcá chaotsichámuama.

<sup>35</sup> Chë Taitá Uaquiñábioye bondbobonshana, y chë Uaquiñábioye obenana tbojatšetá nÿetsca soyënguiñe jtsemándayama.

<sup>36</sup> Nda chë Uaquiñábeñe tojtsóšbuaché, chë nÿetsca tescama yomna tšabe vida echántsebmna; y nda chë Uaquiñábioye ndoñe tbontsašbuaché, chana chë vida ndoñe queochátsbmna, y chë Bëngbe Bëtsabe uabouana castigo nÿetsca tescama chábeñe echántsemna ca” —cha tojánayana.

## 4

### *Jesús y chë Samaria luaroca shembása*

<sup>1</sup> Chë fariseunga tmojanuena Jesús, Juanbiamá más ústonënga yojtsabamnana, y más entšanga yojtsébáyanama.

<sup>2</sup> Pero ndegombre, cach Jesús ndocnábioye bonÿanábayana, sinó chabe uatsjédayënga.

<sup>3</sup> Bëngbe Utabná Jesús, ntšamo chë fariseunga tmojanuena tojántatsëmbona ora, Judea luarocana tojéftsanbocna y Galileoye tojtaná.

<sup>4</sup> Choye jtamna ibojamna Samaria luarëjana jachnënguana.

<sup>5</sup> Samariocna, canÿe pueblo Sicar ca uabáinoye Jesús tojánashjango. Chë pueblo yojamna, chë Jacob chabe uaquiñá Josébioye tbojéftsanlargá fshantse béconana.

<sup>6</sup> Choca yojamna cánÿentše atëfjóniñe, búyeshe jobuatsjuama, Jacobëbe atëfjóniñe ca uabáiniñe. Mo nÿetsto ora, chentše Jesús yojtsemna, aniñe uamëntšnaya, chë atëfjóniñe batsjaca yojótbema.

<sup>7-8</sup> Chabe uatsjédayëngna chë pueblöye tmojána saná jobuámiñama. Chora, canÿe shembása Samariocá, chë atëfjónoye tojánashjango, búyeshe jauafcama; as Jesús tbojanayana: —Búyeshema šmabuatšetá ca.

<sup>9</sup> Y chë shembása tbojanjuá: —Aca canÿe judío condmëna y atšna canÿe samaritaná. ¿Ntšamo cojtsobena atše búyeshe juabuátjañama ca? (Cha chca tojánayana, er canjanopasana, judiëngna samaritanëngaftaca ndoñe monjanenatsëtsná.)

10 Chora Jesús tbojanjuá: —Aca mo cojtsetátšëmbo nýe ntšamo Bëngbe Bëtsá aca jatšetayama yojtsebošcá, y nda chë búyeshe cmojtsábuatjanañama, acna más cha catjuábuatjañe, y chana béjaye vida bomniye cmatjuabuátšetaye ca.

11 Y chë shembása tbojaniana: —Señor, tondaye quecátsbomna nýe mo ndayecnaca búyeshe jabuatsjuama, y chë atëfjóniñe corente tboca endmëna; y as, ¿ndayentšana cochjobenaye béjaye vida bomniye atše juabuátšetayama?

12 Bëngbe tempsca bëts taitá Jacob, quem atëfjóniñe bëngbiama tojëftsanboshjona. Cachá, chabe básenga y chabe bayënga muentšana búyeshe tmojëftsanofšé; y ¿aca chabiama más bëtsá comna ca? —chë shembása yojtsichamo.

13 As Jesús tbojanjuá: —Nýetscanga chë quem búyeshentšana tmojofšenga, chënga cachiñe echantëtëjuendaye.

14 Pero chë chanjuabuátšetaye búyeshentšana tojofšé chana ndocna te cachiñe quebochëtajuendaye. Cha chanjuabuátšetaye búyeshna, chábeñe echántsemna mo cánýentšé béjaytema obocaniñcá, chë nýetsca tescama yomna tšabe vida jtsebomnama ca —cha tbojaniana.

15 Chora chë shembása tbojaniana: —Señor, chca búyeshe šmabuátšetá, as atše ndoñe cachiñe chašondetsajuendama, ni búyeshe juafcama moye jtsaboyama ndoñe chašondëtsemnama ca.

16 As Jesús tbojaniana: —Motsa acbe boyá jachembuama y cochjésabo ca.

17 Chora chë shembása tbojanjuá: —Boyá ndoñe quetsátsbomna ca.

As Jesús tbojaniana: —Tšabá tcjayana boyá ndoñe condbomna ca.

18 Er, aca shachna boyanga conjánabamna, y chë mora contsebomnana, acbe boyá ndoñe quenátšmëna. Ntšamo tconjayancá ndegombre entsemna ca.

19 Chë shembása chca tojanuena ora, Jesúsbioye tbojaniana: —Señor, mora atše sëntsetatšëmbo, aca canýa Bëngbe Bëtsabe juabna oyebuambnayá comnama.

20 Bëngbe tempsca bëts taitanga quem tjoca Bëngbe Bëtsá monjánadorana; pero tšëngaftanga, judiënga šmondbétsichamo, bënga Bëngbe Bëtsá jadóramna, Jerusalenoca chë luare canmëna ca.

21 Chora Jesús tbojanjuá: —Shembása, šmoyeuná; canýe tempo echanjóshjango y chora tšëngaftanga ndoñe quecmochátamna Bëngbe Bëtsá jadóramna, ni quem tjoye jabana, ni Jerusalenoye jana.

22 Tšëngaftanga samaritanënga ndoñe quešmatábuatma nda šmetsadoránama; pero bënga aíñe fsënduábuatma, er chë atsebacayá judiënguentšana endabó.

23 Pero ora entsoshjajuana, ya chë tempo tocjobuache, ndaye ora chë Bëngbe Bëtsá chë Taitá ndegombre atschuanayënga, chë Espíritbeyeca y ndegombre juabnëngaca chábioye mochántšadorana. Er chë Taitá entseboše chë chábioye adórayënga chca chamotsamama.

24 Bëngbe Bëtsá, Espiritu endmëna; y chë chábioye adórayënga entsamna, chë Uámana Espiritbeyeca y ndegombre juabnëngaca cha jtsadoránana ca —Jesús tbojaniana.

25 Chora chë shembása tbojaniana: —Atše sëndëtatsëmbo, canmëna chë Bëngbe Bëtsabe Uámana Uabuayaná, chë Cristo jabana ca; y cha chaojášhjango orna, cha nýetsca soyëngama cašochjabuayená ca.

26 As Jesús tbojaniana: —Atše, chë ácaftaca entsoyebuambná cha, cha entsemna ca.

27 Chëntscuana, Jesusbe uatsjëndayënga tmojtanashjajna, y tmojtsanëuatjaná, Jesús canýe shembásaftaca yojtsoyebuambná causa. Pero ndocná Jesús tbonjantjá: ¿Ndayá cháftaca cojtseboše? o ¿Ndáyeca cháftaca cojtsoyebuambná ca?

28 Chorna, chë shembása chabe uafcanëja tojésanboshjona, y chë puebloye betesco tojtaná. Chocna, entšanga tojanëyana:

29 “Mabënga canýe boyabása jinýama ca. Cha atše šonjauyana lempe ntšamo tijamcá. ¿Chë boyabása, chë Cristo tanántsemna ca?” —cha yojtsichamo.

30 As chë entšanga chë pueblocana tmojánbocana y Jesús yojtsemnoye tmojánashjajna.

<sup>31</sup> Chca yojtsopasánentscuana, chë uatsjéndayënga Jesúsbioye imojtseimpadana: —Buatëmbayá, batšatema mose ca.

<sup>32</sup> Pero cha tojanéyana: —Atše canye soye jasama sëntsebomna. Tšëngaftanga chë soyama ndoñe quešmátstatsëmbo ca.

<sup>33</sup> Chora chë uatsjéndayënga tmojanontšé entjanayana: —¿Nderado nda jasama chabiama tojiyëbo ca?

<sup>34</sup> Y Jesús tojanéyana: —Chë šonjichmó cha ntšamo yojtsebošcá jamana, y chabe trabajo japochócana, chë soyënga mo sanacá atšbiana entsemna.

<sup>35</sup> Tšëngaftanga šmondbétsichamo: “Cabá canta ishinýe entsashbena jaja saná chaotsebínýnama ca”; pero atše cbéyana: Minýënga tša entsanga moye montsabëbana; chënga montsemna mo jajañe saná játbanama tojtseprontacá.

<sup>36</sup> Tšëngaftanga šmontsemna mo chë saná atbanayëngcá. Chëngna jajañe jtse-trabájayana, y chëngbe uacanánana jtsësháchiñana. Cachcá, tšëngaftanga cmontsamna atšbiana entsanga júbuajana, chë nýetsca tescama yomna tsabe vida chamotsebomnama. Chë jaja saná átbanaye ora, jenënga y chë atbanayënga cánýiñe oyejuayënga jtsemnana. Cachcá, chë entsanga átšbeñe chamojtsošbuaché ora, nýetscanga, chë atšbiana obuájajanënga y chë atšbiana trabájayëngnaca cánýiñe oyejuayënga mochántsemna.

<sup>37</sup> Quem entsangbe ichámuana, canye ndegombre soye endmëna: “Chë jená canya jtsemnana, y atbanayana inya ca.”

<sup>38</sup> Atše tšëngaftanga cbonjichamó canye soye játbanama, y tšëngaftanga tondaye chešmatsma chca chaotsebínýnama. Inýënga chiñe bëtscá tmonjëftsetrabája, y tšëngaftangna, chëngbe trabajënguentsana šmojolograñe ca —Jesús tojánayana.

<sup>39</sup> Bëtscá entsanga, Samarioca pueblentsënga Jesúsbeñe imojtsanošbuaché, ntšamo chë shembása tojanéyanama. Chë shembása tojanéyana: “Lempe ntšamo atše tijamcá cha šonjauyana ca.”

<sup>40</sup> As chë samaritanënga, Jesús yojtsemnentše tmojánashjajna ora, tmojanimpadá chëngaftaca chaotsoquedáñama. Y as Jesús, uta te chentše tbojëftsanjétana.

<sup>41</sup> Y más entsanga, cach ntšamo Jesús yojtsanëtsëtsnacá tmonjanuena ora, chábeñe imojtsanošbuaché.

<sup>42</sup> Y chë shembása chë entsanga tmojanianyana: “Mora cocayé fsëntsošbuaché, ndoñe nýe ntšamo aca šcojáuyanama, sinó cach bënga chábioye oído fsënjabuajóyeca; y mora fsëntsetatsëmbo ndegombre cha yojtsemna chë quem luare entsangbiana Atsebacayá ca.”

### *Jesús, canye mandado uajabuachanabe básabioye tbojanshná*

<sup>43</sup> Uta te chentšana, Jesús Samariocana tojáisanbocna y Galileoye tojataná.

<sup>44</sup> Cach Jesús mëntšá tojánayana: “Canya Bëngbe Bëtsabe juabna oyebuambnayá, cachabe luarentše oyenënga ndoñe bëtsá ntjabemëngana ca.”

<sup>45</sup> Galileoca oyenënga Jerusalenoye tmojána, y tmojáninýe nýetsca bëts soyënga ntšamo Jesús Bashco fiesta ora choca tojanmcá. Chíyeca, Jesús Galileoye tojtashjango ora, chënga tšabá tmojtanojfa.

<sup>46</sup> Galileocna, Jesús cachiñe Caná puebloye tojéshanashjango, chë béjayeca vínoye cha tojábementše. Choca yojtsemna canye mandadbe uajabuachaná, y chabe uaquiñana Capernaum puebloca šocá yojtsejájona.

<sup>47</sup> Jesús Judeocana Galileoye tojánashjanguama, chë uajabuachaná tojanuena ora, Jesúsbioye tojána y ibojtseimpadana chabe yebnoye cháuama, chabe uaquiñá chabuet-seshnáñama, er ya jtsóbanama yojtsemna ca.

<sup>48</sup> As Jesús tbojanianyana: —Tšëngaftanga, Bëngbe Bëtsabe obenana jinýanýiyama bëts soyënga atše jamama ndoñe šmonjinýëse, átšbeñe ndocna te ntsošbuáchiyana ca.

<sup>49</sup> Chora, chë mandadbe uajabuachaná Jesúsbioye tbojanianyana: —Taita, betesco mabo, atšbe uaquiñá cabá ndóbana ora ca.

<sup>50</sup> As Jesús tbojaniana: —Acbe yebnoye motsatá. Acbe uaquiñá ainá endëtsomñe ca. Chë boyabásana tojanošbuaché ntšamo Jesús tbojaniancá y tojtaná.

<sup>51</sup> Cha yojtsataye orna, chabe oservénënga tmojánbocana jajëbenguama y tmojaniana: —Acbe uaquiñá tšabá entsatsmëna ca.

<sup>52</sup> As cha tojanatjá: —¿Ntseco orscana tbënjatëcja ca?

Y chënga tmojanjuá: —Tonjopasá yëfse, mošenana orscana chë calentora tbonjábosana ca.

<sup>53</sup> Chora chë taitá tojanenojuabó, cachca ora Jesús tbojaniana: “Acbe uaquiñá ainá endëtsomñe ca”. Y cha y nyëtscanga chabe yebnentše oyenënga Jesúsbeñe imojtsanošbuaché.

<sup>54</sup> Ntšamo Jesús chora, chë uajabuachanabe uaquiñabiamana tojanmca, Judeocana Galileoye yojtsataye orna, yojamna chabe utama chca bëts soye jamama, Bëngbe Bëtsabe obenana jinÿanÿiyama, Galilea luaroca.

## 5

### *Jesús canÿe jama ndobenábioye tbojanshná*

<sup>1</sup> Baseftayté chentšana, chë judiënga canÿe oboyejuaye te imojtsebomna ora, Jesús Jerusalenoye tojána.

<sup>2</sup> Choca, chë Oveshëngbe amashjuana ca uabáinentše yojamna canÿe binche uafajónaye, entsangbe pormániñe. Chë béjayna judiëngbe biyañe Betzata ca inauabaina. Chë béjaye juachañe shachna amashjuana otsbojebniñe inamna.

<sup>3</sup> Chiñna ba šoquënga jtanënga, coshetënga y jama ndobenënga imojtsecjana; chë béjaye chamobonjoma imojtsobátmana.

<sup>4</sup> (Nderado nderado, Bëngbe Bëtsábioca canÿe ángel yojanamana jastjanguana chë béjaye jabónjuama. Chca ora, chë béjayoye natsana tojamashënguá, chabe šocanama tšabá jtsatsmënana.)

<sup>5</sup> Chë šoquënguiñe canÿe boyabása inamna, unga bnëtsana y posufta uatama jama ndobená.

<sup>6</sup> Jesús chë jajonábioye tbojáninÿe ora y ba uatama chca yojamna tojántatšëmbona ora, tbojantjá: —¿Quecojtseboše tšabá jtsatsmënama ca?

<sup>7</sup> Y chë šocá tbojanjuá: —Taita, ndocná quetsátsbomna nda chašuájabuache béjayoye jamashënguama, chë béjaye tojtsobonjná ora. Y atše béjayoye jamashënguama stseboše ora, inÿa atšbe natsana jtsamashënguana ca.

<sup>8</sup> Y Jesús tbojaniana: —Matëtsbaná, acbe tjuashe mesocñe y matontsé jóyenana ca.

<sup>9</sup> Cach ora chë boyabása tšabá yojtsatsmëna, chabe tjuashe tojésanocñe y tojanontsé jtsanana. Chca tojanopasá ora, chë ochnayté inamna.

<sup>10</sup> Chíyeca, chë tbojanshnábioye chë judiënga tmojaniana: —Mëntena ochnayté. Mënté ndoñe quenátopodena aca tjuashe jtsecutsnana ca.

<sup>11</sup> Y chë boyabása tojanëyana: —Chë šonjashná cha mëntšá šonjauyana: “Acbe tjuashe mesocñe y montsé jóyenana ca”.

<sup>12</sup> As chënga tmojantjá: —¿Nda yojtsemna chë “acbe tjuashe mesocñe y montsé jóyenana ca” tmojauyaná ca?

<sup>13</sup> Pero chë shnaná ndoñe yontsetátšëmbo nda tbojanshnama. Chocna bëtská entsanga imojtsemna; chcasna, Jesús chëngbe tsëntsajana tojanenatjëmbo.

<sup>14</sup> Chentšana, Jesús Bëngbe Bëtsabe bëts yebnentše chë boyabásabioye tbojáninÿena y tbojaniana: —Mouena; mora aca ya ndoñe šocá quecátsmëna; bacna soyënga ndoñe cachiñe cattsama. Aíñese, acbiamana puerte mal echanjopása ca.

<sup>15</sup> Chë boyabása tojtsanoñe y chë judiënga tojanëyana: —Chë šonjashná cha Jesús entsemna ca.

<sup>16</sup> Chë causa, chë judiënga imojtsenguaye ntšamo Jesús ndayánaca jabórlana, cha ochnayté chë soyënga tojanmama.

17 Pero Jesús tojanéyana: “Atsbe Taitá nyets tempo tsabe soyenga endbetsama; cachcá, átsnaca tsabe soyenga séntsama ca.”

18 Jesús tojanma ntšamo ochnayté ndoñe yonjanapodencá, y Bèngbe Bètsabiana tojánayana “Atsbe Taitá ca”. Mèntsá Jesús yojsanobiamná cach Bèngbe Bètsacá. Chama, chë judiënga más imojtseboše Jesús jóbama.

### *Bèngbe Bètsabe Uaquiñabe obenana*

19 Chentsana Jesús tojanéyana: “Ndegombre šcuayana: Bèngbe Bètsabe Uaquiñá, nye cachabe cuenta tondaye quenátobena jamana. Cha jtsonyayana ntšamo chabe Taitá tojtsamcá. Ntšamo chë Taitá tojtsamcá, chë Uaquiñánaca jtsamana.

20 Er Bèngbe Taitá chabe Uaquiñábioye bondbobonshana, y lempe ntšamo cha tojtsamcá chábioye bondinýinýná; y más bëts soyenga bochanjinýinýiye, chë soyëngama tsëngaftanga chašmenjanama.

21 Chë Taitá endama obanënga chámuatayenama y tsabe vida chamotsebomnama; cachcá, chë Uaquiñá entsama tsabe vida chamotsebomnama, ndëmuanýenga cha tojtseboščá.

22 Chë Taitá ndocnabiana jatichámuana tsabá o ndoñe tsabá yontsama ca. Chabe Uaquiñábioye nyets obenana tbonjatšetá nyetscangbiana jayanama tsabá o ndoñe tsabá tmontsamama.

23 Chca, chënga chamuinýinýé Bèngbe Bètsabe Uaquiñá puerte uamaná yomnama, ntšamo Bèngbe Bètsá puerte uamaná yomnama nyetscanga mondbetsinýinýnáyca. Nda chë Uaquiñábioye ndoñe más uamaná tbontsebiamná, cach ndoñe más uamana ntsebiamnayana chë Taitábioye, nda chë Uaquiñá tbojichmóbioye.

24 “Ndegombre šcuayana: Nda ntšamo atše séntsichamcá šojoyeuná, y chë muentše šonjichmó chábeñe tojtsošbuaché, chë nyetsca tescama yomna tsabe vida jtsebomnana. Chabiana chë Uaquiñá ndoñe queochátayana castiganá chaotsemna ca. Chca, Bèngbe Bètsabiana cha ya ndoñe más mo obanacá queochátsmëna, chábeñe ndošbuáchiye causa; y ya ndoñe nyetsca tescama castiganá queochátsmëna. Y aíñe, chë nyetsca tescama yomna tsabe vida echántsebomna.

25 “Ndegombre šcuayana: Chë jobuáchama te ya tocjobuache. Chë te, chë Bèngbe Bètsabiana mo obanëngcá imomnënga mochanjouena Bèngbe Bètsabe Uaquiñá jtsóyebuambnayana. Nda chca tsabá chašojoyeuná cha, tsabe vida echántsebomna.

26 Er ntšamo Bèngbe Taitá obenana endbomncá, cachá jamama entsanga vida chamotsebomnama, chabe Uaquiñábioynaca obenana tbojatšetá entsanga vida chamotsebomnama jamama.

27 Chë Uaquiñá endmëna nda Bèngbe Bètsá Entšá tbojánbema; chíyeca chë Taitá chábioye obenana tbojatšetá nyetscangbiana jayanama tsabá o ndoñe tsabá tmontsamama.

28 Chama ndoñe matenjnanana. Er canýe tempo echanjobuache, y chora chë Uaquiñá obanënga echántsachembuana; chënga mochanjouena y cach ora, chëngbe oyenocana mochanjésebocana.

29 Tsabe soyënga tmojëftsemënga, obanënguentsana mochántayena, chë nyetsca tescama yomna tsabe vida jtsebomnama. Pero bacna soyënga tmojëftsemëngna obanënguentsana mochántayena nyetsca tescama castigánënga jtsemnana ca” —Jesús tojanéyana.

### *Jesús, ndegombre Bèngbe Bètsabe ichmoná inamna*

30 Mèntsánaca Jesús cachatbiana tojánayana: “Nye átsbeyeca tondaye quetsátobena jamana. Chë Taitá šontsemánda ntšamo nyetscangbiana jayanama tsabá o ndoñe tsabá tmontsamama. Nye chca atše séntsobena chë soye jamama. Ndoñe quetsátsboše jamana nye ntšamo cach atše stseboščá; pero sempre sëndbétseboše jamama, ntšamo Taitá, chë šonjichmó cha tojtseboščá. Chíyeca atše nyetscangbiana séntsichamo tsabá o ndoñe tsabá tmontsamama; y ntšamo nyetscangbiana séntsichamcá, ndegombre endmëna.

<sup>31</sup> “Ntšamo cach atšbiana tijayanama, ndegombre entsemna ca stsihámese, ntšamo stsihamcá, nyetscangbiana tondaye ntsámanana.

<sup>32</sup> Pero inya entsemna. Cha endétatsëmbo y entsichamo ntšamo ndegombre atšbiana yomncá; y sentsetatsëmbo ntšamo cha atšbiana yojtsichamcá, nyetscangbiana aïne yojtsámanama.

<sup>33</sup> Tšëngaftanga ínÿenga šmojanichamó atšbiana Juan jatjayama; y ntšamo cha tcmojuayancá ndegombre endmëna.

<sup>34</sup> Masque chë soyënga cha tcmojáuyana, ndoñe quešnatájaboto ndocna entšá atšbiana chaotsichamo ‘cha aïne chca endmëna ca’. Atše quem soyënga séntsichamo ndayá nÿe tšëngaftanga atsebácanënga chašmotsemnama.

<sup>35</sup> Juan enjamna mo canÿe uajuinÿanësha tojtsajuinÿana y tojtsabuashinÿinÿancá. Tšëngaftanga chabe buashinÿinÿanana šmonjinÿe, y šmonjábosena rato cháftaca oyejuayënga jtsemnama.

<sup>36</sup> Pero chë atše sënjama soyëngacna más entsinÿinÿena ntšamo atšbiana ndegombre yomncá, chë ntšamo Juan atšbiana tojánayanama. Ndayá atšbe Taitá šojabonÿé jamama, ntšamo atše séntsamcá, entsinÿinÿná ndegombre chë Taitá šojichmoma.

<sup>37</sup> Atšbe Taitá, chë šojichmó chánaca entsichamo ntšamo atšbiana ndegombre yomncá, masque ndocna te chabe oyebuambnayana chešmatuena, ni ntšamo cha yomncá chešmátinÿe.

<sup>38</sup> Pero tšëngaftangbe ainanoye chabe palabra ndoñe tonjómarshëngo, cha tbojichmóbeñe tšëngaftanga ndoñe quešmatošbuaché causa.

<sup>39</sup> Tšëngaftanga, Bëngbe Bëtsabe palabra tša jtsatsjédayana, er šmondobátmana, chca jtsamëse chë nyetsca tescama yomna tšabe vida jónÿenama. Y Bëngbe Bëtsabe uabemana palabrënguiñe atšbiana endayana ntšamo ndegombre yomncá;

<sup>40</sup> pero masque chca, tšëngaftanga ndoñe quešmátsboše atše jtséstonana, y chca, tšabe vida jtseboznama.

<sup>41</sup> “Atše ndoñe quetsátsboše entsanga yapa tšabá atšbiana chamotsichámuama.

<sup>42</sup> Y inÿe soye, atše puerte cbondëbuatma, y sëndétatsëmbo tšëngaftanga Bëngbe Bëtsá ndoñe šmondbobonshánama.

<sup>43</sup> Atšna atšbe Taitabe cuenta sënjabo, y tšëngaftanga ndoñe quešmátsboše atše jofjana. Pero inya, cachabe cuenta tojabábioye cocayé aïne šmatjofja.

<sup>44</sup> Tšëngaftanga corente jésebošana, ínÿenga tšëngaftangbiana tšabá chamotsichámuama, y ínÿengbiana tšabá jtsichámuama; pero ndoñe ntsebošana chë nÿe canÿe Bëngbe Bëtsá tšëngaftangbiana cachcá chaotsichámuama. Chca šmojtsamëse, ¿ntšamo šmochsobena Bëngbe Bëtsábeñe jtsošbuáchiyana?

<sup>45</sup> Ndoñe šmattsejuabnaye, atšbe Taitabe delante tšëngaftangbe contra atše chjayana ca ntšamo tšëngaftanga šmojtsamama. Tšëngaftanga tša jtsobátmanana atsebácanënga jtsemnama, chë ntšamo Moisesbe leyinÿe endayancá šmojtsamama; pero ndegombre, ntšamo cha tojayancá, cach tšëngaftangbe contra entsemna.

<sup>46</sup> Tšëngaftanga, chë Moisés tojéftsanabema soyinÿe šmojtsošbuachese, átsbeñnaca šmattsošbuáchiye, er cha atšbiana tojanábema.

<sup>47</sup> Pero chë tojanábema soyinÿe tšëngaftanga ndoñe šmontsošbuachesna, ¿ntšamo šmochjobenaye chë atše séntsichamo soyënguiñe jtsošbuáchiyana ca?” —Jesús tojanëyana.

## 6

*Jesús shachna uaranga boyabásenga saná tojanacaredadó*

*(Mt 14.13-21; Mc 6.30-44; Lc 9.10-17)*

<sup>1</sup> Chë soyënga tojanopasá chentšana, Jesús chabe uatsjédayëngaftaca tojána Galilea uafjajónaye chenguana. Chë uafjajónayna Tiberias cánaca inauabaina.

<sup>2</sup> Ba entsanga imojtséstona, er chënga tmojáninÿe cha bëts soyënga jtsamana, šoquënga jtsashnayëse.

<sup>3</sup> As Jesús tjoye tojántsua, y choca chabe uatsjéndayëngaftaca tojanótbema.

<sup>4</sup> Ya judiëngbe canÿe fiesta, chë Bashco fiesta, yojétsobeco.

<sup>5</sup> Jesús tojanótbema ora, tojanontješé y tojánanÿe ba entsanga chábioye imojet-sebéconaye. As Felípbioye tbojaniyana: —¿Ndayentše saná cuanjabuámiye nÿetsca quem entsanga chamosama ca?

<sup>6</sup> Jesús chca tbojaniyana, ana Felípbioye jinÿama ntšamo cha tabuanjojuama; er cach Jesús tšabá inatátšëmbo ndayá jamama.

<sup>7</sup> Y Felipe tbojanjuá: —Ni mo uta patse denario crocenánaca nanjopódia tandëse jabuámiyama, nÿetsca entsanga nÿe mo batšatémnaca chamuétsesama ca.

<sup>8</sup> Chorna, Jesusbe canÿe uatsjendayá, Andrés ca uabainá, Simón Pédrëbe catšata, Jesúsbioye tbojaniyana:

<sup>9</sup> —Muentše entsemna canÿe básetema y cha shachna cebada tandëse y uta beónata entsebmna. Pero, ¿ndayase nÿe nÿetšatema chëfta entsangbiama ca?

<sup>10</sup> As Jesús tojánayana: —Entsanga mëyana chamotbiama ca.

Becá shácuana chë luariñe inamna, y nÿetsca entsanga chiñe tmojanoshëntsjatbiama. Chë entsanguentše shachna uaranga boyabásenga imojtsemna.

<sup>11</sup> Chora Jesús, chë tandëse chabe cucuatšinë tojanca, y Bëngbe Bëtsábioye chë tandëšama tbojtanchuá; y chabe uatsjéndayënga tojanëjatá, y chë uatsjéndayëngna nÿetsca entsanga imojtsetbiámanënga tmojanatšatá. Cachcá Jesús chë beónaca tojanma, y ntšamo entsanga imojanbošcá tmojanatšatá.

<sup>12</sup> Nÿetscanga tmojanse y tmojtanoshachá ora, Jesús chabe uatsjéndayënga tojanëyana: —Chë ojamnëtemënga šmochtsatbananga, tondaye nÿe cachcá ntjëftsonÿayama ca.

<sup>13</sup> As chënga tmojanatbaná, y chë tmojanse shachna cebada tandësentšana tojanójamëtemëngaca, bnëtsana uta sbarëcua tmojanajutjé.

<sup>14</sup> Chë entsanga quem bëts soye Jesús jamama tmojáninÿe ora tmojánayana: “Ndegom-bre quem boyabása, chë quem luaroye jabama Bëngbe Bëtsabe juabna jabóyebuambayama cha entsemna ca.”

<sup>15</sup> Jesús yojtsetátšëmbo entsanga chëngbe rey jabemama imojetsebošama. Chíyeca cach tjoye tojtsaisanoñe canÿa jtsomñama.

*Jesús béjaye juatsbuacá yojtsaye  
(Mt 14.22-27; Mc 6.45-52)*

<sup>16</sup> Tojanibétata ora, Jesusbe uatsjéndayënga chë uafjajónayoye tmojantsmá;

<sup>17</sup> barquëshañe tmojtanenojayé, y tmojanontsé jenashbuachénguana, chca, Capernau-moca jenbocnama. Ya ibeta yojtsemna, y Jesús cabá ndoñe chëngbioye ntashjanguana.

<sup>18</sup> Chca imojtsenashbuachnëjuana orna, chë béjayiñe jabuache binÿia tojanóshjango y bëts olëshënga chë barquëshoye yojtsójtantšetaye.

<sup>19</sup> Shachna o chnënguana kilómetro chënga tmojána ora, tmojáninÿe Jesús chëngbioye yojtsebëconaye, béjaye juatsbuacá yojtsaye. Chënga chca tmojáninÿe ora tša tmojanocochauatjaná,

<sup>20</sup> pero Jesús tojanëyana: “Atše sëndmëna; ndoñe matauatjëngana ca.”

<sup>21</sup> Chora chë uatsjéndayënga oyejuayënga imojtseboše Jesús chë barquëshoye jofjana, y ndoñe bënëts cose ya chë imojtsaye luaroye tmojánashjajna.

*Entsanga Jesús tmojánguango*

<sup>22</sup> Yëfsana, nÿetsca entsanga, chë uafjajónaye chenguánoica tmojanoquedanga tmojáninÿe, chë inÿe yëfsana chë nÿe canÿe barquësho yojuamnëšañe Jesusbe uatsjéndayënga tmojtsanoñama, y Jesús chëngaftaca ndoñe tonjánama.

<sup>23</sup> Pero chëntscuana, Tiberias pueblentsana inye barquëshangá tojanáshjajna canye luarentse, chë Bëngbe Utabná Jesús chabe Taitábioye tbojtanchuá chentsana, entsanga saná tmojanse luare béconana.

<sup>24</sup> Asna, ni Jesús ni chabe uatsjédayënga chentse ndoñe montsemnama chë entsanga tmojáninÿe ora, chë barquëshangañe tmojtanenojayé y Capernaumoye tmojána Jesús jetsenguanguama.

*Jesús, chë nÿetsca tescama yomna tšabe vida jtsebomnama tandëse*

<sup>25</sup> Chë uafjónaye chenguánoye tmojánashjajna ora, Jesús tmojáninÿena y mëntsá tmojantjá: —¿Buatëmbayá, ntseco ora muentse tcojášjango ca?

<sup>26</sup> Y Jesús tojanéyana: —Ndegombre cbéyana, tšëngaftanga ndoñe atse quešmatsnguá, chë bëts soyënga tijamama, sinó nÿe chë jtoshachaye nÿetsá tandëse šmojasama.

<sup>27</sup> Ndoñe matenángmenana chë nÿe ndoñe bën y jopochócana sanama; chë ndmopochócaye saná, chë nÿetsca tescama yomna tšabe vida jtsebomnama saná šmochjánguango. Chë saná, Bëngbe Bëtsá Entsó tbojanbemá cmochanjátšataye, er Bëngbe Bëtsá chë Taitá tonjinÿanÿé, tšabe soyëngaca, cha chábioye tbojuábuayanama ca —tojánayana.

<sup>28</sup> Chora chë entsanga tmojantjá: —¿Ndayá fchjama ntšamo Bëngbe Bëtsá yojtsebošcá chaotsemnama ca?

<sup>29</sup> Chca tmojantjá ora, Jesús tojanéyana: —Chë Taitá entseboše tšëngaftanga chabe ichmonábeñe chašmotsošbuáchema ca.

<sup>30</sup> Chora chënga tmojanianyana: —¿Ndaye tšabe soye cochjama acbe obenana bënga jinÿanÿiyama ca? Chë soye chaftsjinÿëse, ácebeñe fchantsošbuáchiye. ¿Bëngbiama taicochjama ca?

<sup>31</sup> Bëngbe tempsca bëts taitanga entsanga ndoyenoca maná ca uabaina saná tmojanse. Bëngbe Bëtsabe uabemana palabrënguiñe mëntsá endayana: “Cha celoca tandëse tonjanatšatá chamosama ca” —chënga tmojánayana.

<sup>32</sup> Chora Jesús tojanéyana: —Ndegombre cbéyana, Moisés chënga ndoñe chë celoca tandëse tonjanatšatá; Bëngbe Bëtsá Bëngbe Taitá chëngbioye tojanatšatá chë maná ca uabaina tandëse; y cha endmëna nda celocana chë ndocna te ndmopochócaye tandëse ndegombre cmondatsatná.

<sup>33</sup> Er Bëngbe Bëtsábíocana tandëse entsemna chë celocana tojastjanguá; y cha quem luare entsangbiama entsama chë nÿetsca tescama yomna tšabe vida chamotsebomnama ca —cha tojanéyana.

<sup>34</sup> Chora chënga tmojanimpadá: —Taita, chë tandëse sempre šcochtsatšatnayé ca.

<sup>35</sup> Y Jesús tojanéjua: —Atse sëndmëna entsanga chë nÿetsca tescama yomna tšabe vida jtsebomnama tandëse. Nda atse chašojtsëstona, sempre oyejuayá echanjëftsemna y Bëngbe Bëtsabe soyënga nÿets tempo echanjesóbomñe, mo nda nÿets tempo saná totsobomñcá, y ndocna te tbontsishëntsancá.

<sup>36</sup> Pero ntšamo ya tcbonjauyancá, tšëngaftanga atse šmonjinÿe y cabá ndoñe átšbeñe quešmatošbuaché.

<sup>37</sup> Nda atšbe Taitá atšbiama tbojabocacá, cha atse šochantsëstona; y nda átšbioye šojtsëstona, átšbentsana quichtëtábocna.

<sup>38</sup> Er atšna celocana sënjabo chë šojichmó cha ntšamo yojtsebošcá jamama, y ndoñe nÿe ntšamo atšbe stsebošcá.

<sup>39</sup> Y chë šojichmó cha entseboše, ni mo canÿa chë atšbiama tojabacacá chentsana, atšbe chailesenciá pochocaná chaotsemnama; y quem luare jopochócama tena, nÿetscanga atšbiama tojabacacangbiama chámuatayenama atšbe chaimama.

<sup>40</sup> Er atšbe Taitá entseboše, nda chabe Uaquiñábioye tbojinÿe y chábeñe tojtsošbuaché, chë nÿetsca tescama yomna tšabe vida chaotsebomna, y quem luare jopochócama tena, cha cháuatayenama atšbe chaimama ca —Jesús tojanéyana.



<sup>41</sup> “Atše sëntsemna chë celocana tojóshjango tandëse ca” Jesús tojanéyana causa, chë judiënga tmojanontsé chabiana podasca ichámuana.

<sup>42</sup> Chënga mëntśá imojtsichamo: —¿Mua ndoñe Jesús yondmëna, chë Josebe uaquiñá? Chabe bëtsétsata bënga tmotsábuatmñe. ¿Ntśamo cha mora yochjátichamo celocana tojástjango ca?

<sup>43</sup> As Jesús tojanéyana: —Atśbiana ndoñe podasca matichámuana.

<sup>44</sup> Ndocná quenátobena atše juastana, chë Taitá, chë šojichmó cha, ainaniñe chca chaotseboşama ndoñe tbonjuajabuáchëse; y atše chanjama cha cháuatayenama quem luare jopochócama te.

<sup>45</sup> Chë tempsquënga Bëngbe Bëtsabe juabna oyebuambnayënga mëntśá tmojanábema: “Cach Bëngbe Bëtsá nyetscanga echanjabuatambá ca.” Chcasna, nda atśbe Taitábioye tbojoyeuná, y ntśamo chë Taitá tbojabuatëmbacá tojuatsjinýe, cha atše šochanjuasto.

<sup>46</sup> “Ndocná atśbe Taitá tbonjinýe. Nýe chë Bëngbe Bëtsábiocana tojabá aiñe.

<sup>47</sup> Ndegombre šcuayana: Nda átśbeñe tojtsošbuaché, chë nyetsca tescama yomna tśabe vida echántsebmoma.

<sup>48</sup> Atše sëndmëna entśanga chë nyetsca tescama yomna tśabe vida chamotsebmomna tandëse.

<sup>49</sup> Masque tšëngaftangbe bëts taitanga, entśanga ndoyenoca chë maná ca uabaina saná tmojanse, pronto tmojanóbana.

<sup>50</sup> Pero atše sëntsoyebuambná ndayá chë celocana tojóshjango tandëşama. Nda chë tandëse tojase, ndoñe queochatóbana.

<sup>51</sup> Atše sëntsemna entśanga chë nyetsca tescama yomna tśabe vida jtsebmomna tandëse, chë celocana tojóshjanguëse. Nda quem tandëse tojase, nyetsca tescama nýe ainá echanjesomñe. Chë chanjátśataye tandëşna, cach atśbe cuerpo entsemna. Chca chanjama quem luare entśanga chë nyetsca tescama yomna tśabe vida chamotsebmomna ca” —Jesús tojánayana.

<sup>52</sup> Chora chë judiënga tmojanontsé enatsëtsnayana: —¿Ntśamo cha yochjobenaye cachabe cuerpo jatśatayana bënga jasama ca?

<sup>53</sup> As Jesús tojanéyana: —Ndegombre šcuayana: Tšëngaftanga Bëngbe Bëtsá Entśá tbojanbemabe cuerpo ndoñe šmonjase y chabe buiñe ndoñe šmonjofşese, ndegombre tśabe vida ndoñe queşmochátsbmoma.

<sup>54</sup> Nda atśbe cuerpo tojase y atśbe buiñe tojofşé, chë nyetsca tescama yomna tśabe vida echántsebmoma, y quem luare jopochócama te atše chanjama cha cháuatayenama.

<sup>55</sup> Atśbe cuerpo ndegombre saná endmëna, y atśbe buiñe ndegombre ofşëşnayıye.

<sup>56</sup> Nda atśbe cuerpo tojase y atśbe buiñe tojofşé, átşeftaca cánýiñe mo canýacá echántsemna, y átśnaca cháftaca.

<sup>57</sup> Atśbe Taitá, chë šojichmó cha, vida endbmoma, y atše chábeyeca vida sëndbmoma; cachcá, nda atśbe cuerpo tojase, chana átśbeyeca vida jtsebmomna.

<sup>58</sup> Chë ndaye soyama atše sëntsoyebuambná, atśbe cuerpo y atśbe buiñe, entsemna chë celocana tojóshjango tandëse. Masque tšëngaftangbe bëts taitanga chë maná ca uabaina tandëse tmojanse, pronto tmojanóbana; pero quem tandëse ndoñe cachcá quenátsmëna. Nda quem tandëse tojase, nýe nyets tempo vida echanjesóbomñe ca —Jesús tojánayana.

<sup>59</sup> Chë soyëngna Jesús tonjanabuatambá Capernaum pueblentşe, chë judiëngbe enefjuana yebnentşe.

*Chë nyetsca tescama yomna tśabe vida jtsebmomna palabrënga*

<sup>60</sup> Chca tmojanuena ora, banga Jesusbe ústonënga imojtsichamo: —Ntśamo cha entsichamcá yapa totcá entsemna mo ndegombre cuaftsemncá joyeunayama. ¿Nda buanjóyeunaye ca?

<sup>61</sup> Jesús yojtsetátşëmbo chënga ndoñe tśabá imontsichámuama; as, chënga tojanatjá: —¿Ntśamo cbontsëtsësnacá ndoñe tśabá cmontsëuenana ca?

<sup>62</sup> Y chcasna, Bëngbe Bëtsá Entšá tbojanbemá, chë cha tempo inamna luaroye tojëtstsjuama šmojinýëse, ¿ntšamo šmattsejuabnaye?

<sup>63</sup> Bëngbe Bëtsabe Espiritu entsama entsanga chë tšabe vida chamotsebomnama. Chë cuerpo ndoñe uámana soye quenátsmëna; chë tcbonjáuyana soyënguiñe entsemna chë Uámana Espiritbe uajabuáchenana y chë tšabe vida.

<sup>64</sup> Pero masque chca entsemna, tšëngaftangbentšana banga átšbeñe ndoñe quešmatošbuaché ca —Jesús tojánayana.

Er Bëngbe Bëtsabe soyëngama entsanga jábuayenama Jesús tojanbojatsé orscana, cha inatátšëmbo ndëmuanýenga chábeñe ndoñe mochanjanošbuáchiye, y nda chë uayayëngbe cucuatšíñe yochjéftsayentšbashejuana.

<sup>65</sup> Y Jesús yojtëtóntša oyebuambnayana: —Chíyeca, atše tšëngaftanga tcbonjáuyana: “nda atše juastama ainaniñe chaotsebošama atšbe Taitá ndoñe tbonjuájabuache, cha ndoñe quešochatasto ca”.

<sup>66</sup> Chë causa, chentšana, ba chabe ústonënga cachcá tmojesanonýá, y cháftaca ya ndoñe imontsajna.

<sup>67</sup> Chora Jesús, chë bnëtsana uta uatsjëndayënga tojanéyana: —¿Y tšëngaftángnaca, jtsoñama y atše jéseboshjonama šmojtseboše ca?

<sup>68</sup> Chora Simón Pedro tbojanjuá: —Bëngbe Utabná Jesús, ¿chcasna ndábioye fchjanga ca? Nýe aca šcontsëtsësná chë nýetsca tescama yomna tšabe vida jtsebomnama palabrënga.

<sup>69</sup> Aceñe fsëntsošbuaché, y mora fsëntsetatšëmbo aca chë Bëngbe Bëtsabe Uamaná comnama ca.

<sup>70</sup> Chora Jesús tojanéyana: —Atše tcbonjabacacá, chë bnëtsana útata; pero canýa tšëngaftanguentšana, mo Satanasbe canýe trabajayacá entsemna ca.

<sup>71</sup> Judas Iscariote, chë Simonbe uaquiñabiama chca Jesús tojánayana. Er chana masque canýa chabe bnëtsana uta uatsjëndayënguentsá inamna, Jesús uayayëngbe cucuatšíñe yochjáftsayentšbashejuana.

## 7

### *Jesusbe catšátanga chábeñe ndoñe montsanošbuaché*

<sup>1</sup> Chë soyënguentsana, Jesús Galilea luarëjana yojánana. Chë tempo, judiënga imojtsanjuabnaye ntšamo jamëse cha jóbama. Chíyeca, Jesús ndoñe yontseboše Judeoye jama.

<sup>2</sup> Chora, judiëngbe canýe bëts fiesta semana yojtsobeco. Quem fiestënguëntscuana, chë judiënga imojanamana tambënguiñe jtсийenana.

<sup>3</sup> As chora Jesusbe catšátanga tmojaniyana: —Muentše ndoñe catjoquéda; Judeoye motsa, choca condbomna ústonënga, ntšamo contsamcá chócna chaminýama.

<sup>4</sup> Er nda tojtseboše chamotsábuatmama, chabe soyënga ndoñe iytëcana ntsamana. Aca bëts soyënga Bëngbe Bëtsabe obenánaca contsamësna, motsa y nýetscangbe delante chca cochjama ca —chënga tmojaniyana.

<sup>5</sup> Er ni mo cach Jesusbe catšátanga chábeñe ndoñe montsanošbuaché. Chíyeca chënga chca tmojaniyana.

<sup>6</sup> Chora Jesús tojanéjua: —Atšbe ora cabá ndoñe quentóshjango, pero tšëngaftangbiama mocna órnaca tšabá endëtsomñe.

<sup>7</sup> Chë nýe quem luarama enójuabnaye entsanga ndoñe quemátobena tšëngaftanga jtsëbuayënjana, pero átšbioyna aiñe, er atše puerte tšabá sëntsinýanýná ntšamo chënga imojtsamcá ndoñe tšabá yontsemnama.

<sup>8</sup> Tšëngaftanga chë fiestama šmochjá. Atšbe ora cabá ndoñe quentóshjango. Chíyeca atše choye ndoñe quicháta ca —cha tojánayana.

<sup>9</sup> Jesús chë soyënga tojanéyana y cach Galileoca tojtsanoquedañe.

*Chë tambënguiñe jtсийenama fiesta*

<sup>10</sup> Chabe catšátanga chë fiestoye tmojána chentšana, Jesúsna tojána, masque ndoñe entšangbeñe, sinó mo iytęcana cuenta.

<sup>11</sup> Chë fiestocna, judienga Jesús imojtsenguaye y imojtsichamo: —¿Ndayentše chë boyabása yojtsemna ca?

<sup>12</sup> Entšangbeñe ba soyenga chabiamia iytęcana imojtsichamo. Inyenga chabiamia imojtsichamo: “Cha tšabia endmëna ca”; pero ín्यengna: “Cha entsanga entsaingña ca”.

<sup>13</sup> Pero ndocná Jesusbiamia becá añémoca yontsoyebuambná, chë judiengbe amëndayëngbiamia imojtsauatja causa.

<sup>14</sup> Chë fiesta semana tsëntsañe yojtsó ora, Jesús Bëngbe Bëtsabe bëts yebnentše tojánamashëngo, y tojanontšë jabuátambana.

<sup>15</sup> Chentše chë judienga, ntšamo Jesús tojanabuatambacá tmojanuena ora, ojanánënga imojtsichamo: —Bëtsca ntjuatsjinýcá, ¿ntšamo nyetsá nantsetátšëmbo ca?

<sup>16</sup> As Jesús tojanéjua: —Atšbe buatëmbayana ndoñe nye átšbentšana quenatóbocana, ndayá chë šonjichmó chá bentšana.

<sup>17</sup> Nda tojtseboše jamama ntšamo chë šojichmó cha yojtsebošcá, cha echántsetatšëmbo atšbe buatëmbayana Bëngbe Bëtsábocana yóbocanama o nye átšbentšana.

<sup>18</sup> Nda nye cachabe juábnaca tojtsoyebuambná, jtsebošana entsanga más bëtsá chamobemama; pero nda bëtscá tojtsama, chë tbojichmóbioye entsanga más bëtsá chamobemama, cha cocayé ntšamo ndegombre yomncá jtsóyebuambnayana, y ndocnábioye ntseingñayana.

<sup>19</sup> “Ndegombre, Moisés tšëngaftangbiamia ley tojëftsanaboshjona. Pero masque chca, tšëngaftanguentšá ndocná quenátama ntšamo cha tojëftsanmandacá. Y ¿ndáyeca šmojtseboše atše jóbama ca?” —Jesús tojanatjá.

<sup>20</sup> Chora entsanga tmojanjúá: —¿Ndegombre aca bacna bayëjbe juabna contsambá! ¿Nda yojtseboše aca jóbama ca?

<sup>21</sup> Chora Jesús tojanéyana: —Nyetsca tšëngaftanga ojanánënga atše šmontsonýá, atše canýe ochnayté canýe entšá tijashnama.

<sup>22</sup> Pero, Moisés tcmonjanamëndá básetema base bobachtema chë más delicadentše jatëtšana, chaotsinýnama (ndoñe nye Moisésbeyeca chca, sinó Moisesbiamia más temp-sca bëts taitanga chca jamama imojanamánayeca); y tšëngaftanga canýe básetema base bobachtema chë más delicadentše jatëtšana, masque chë te canýe ochnayté totsomñëse.

<sup>23</sup> Y mora, ntšamo Moisés tcmojëftsanamëndacá ndoñe cachcá ntjonýayama, canýe básetema chca jatëtšana masque ochnayté; as, ¿ndáyeca atše šmojtsayaná, atše ochnayté canýe entšabe nyets cuerpo tijashnama?

<sup>24</sup> Nye batšá jinýëse, ín्यengbiamia ndoñe matichámëngana tšabá o ndoñe tšabá tmonjama ca. Ntšamo chë soyenga ndegombre bëtsemnama natsana lempe tšabá jshëtsetatšëmbëse, šmochjayana tšabá o ndoñe tšabá tmonjama ca —Jesús tojánayana.

### *Jesús tojánayana ndëmocana cha tojánabama*

<sup>25</sup> Chora báseftanga Jerusalenoca oyenënga tmojanontšë ichámuana: —¿Mua ndoñe yontsemna chë jóbama montsenguá cha ca?

<sup>26</sup> Masque ba entsangbe delante entsoyebuambná, ndocná chábioye ndocá ntjauyanana. ¿Nderado mo chë bëngbe amëndayënga imojtsejuabná cha chë Cristo, chë Uámana Uabuayaná yojtsemna ca?

<sup>27</sup> Pero bënga mondëtatšëmbo ndëmocá quem boyabása yomnana; y chë cuenta, chë Cristo chaojabo ora, ndocná queochátstatšëmbo ndëmocana cha yochjabama ca —chënga imojtsichamo.

<sup>28</sup> Chca tojanuena ora, Bëngbe Bëtsabe bëts yebnentše Jesús yojtsabuátambayëntscuana, cha jabuache tojánayana: —¿Tšëngaftanga šmojtsejuabná atše ndegombre šmabuatma, y ndëmocana tijabama šmojtsetátšëmbo ca! Pero nye atšbe cuenta, ndoñe chiyátabo,

ndayá canya šojichmóyeca, nda ntšamo ndegombre yomncá nyetsca soyëngama endbétsoyebuambnaye; y tšëngaftanga cha ndoñe quešmatábuatma.

<sup>29</sup> Atšna aíñe cha sënduábuatma, er atše chábtšana sënjabo y cha quem luaroye šonjichmó ca —Jesús tojánayana.

<sup>30</sup> Jesús chca tojánayana ora, chënga tmojánbošena cha jishachama, pero ndocná tbonjánishache, er cha chca japásama cabá ndoñe ora tonjanóshjango.

<sup>31</sup> Banga chentše Jesúsbeñe imojtsanošbuaché y tmojánayana: “Chë Uámana Uabuayaná chaojabo ora, ¿quem boyabásabiama más tšabe soyënga yochjama ca?”

### *Chë fariseunga tmojánbošena Jesús jishachama*

<sup>32</sup> Chë fariseunga tmojántatsëmbona ntšamo entšanga Jesusbiana iytëcana imojtsencuëntaye. As, chënga y chë bachnangbe amëndayënga tmojanichamó báseftanga Bëngbe Bëtsabe bëts yebnoca josticiënga, Jesús chamuishachama.

<sup>33</sup> Chora Jesús tojánayana: “Muentšana nye baseftayté tšëngaftangaftaca chanjëftsemna; chentšana, chë šojichmó chábioye chanjëtspadésa.

<sup>34</sup> Chora tšëngaftanga atše šmochántseguaye, pero ndoñe quešmochátinyëna; y ndayentše chántsemnoca ndoñe quešmochatobenaye jashjanguama ca.”

<sup>35</sup> Chora chë judiënga tmojanontšé entjanayana: “¿Ndëmoye quem boyabása yochjá, y bënga ndoñe mochanjobenaye jinýenama ca? ¿Inýe fshantsëngoye, judiënga tmojuashanëngbioye yochjá, y choca chë ndoñe judiënga yochjabuatambá?

<sup>36</sup> ¿Ntšamo yojtseñšáyana cha šonjauyancá, chë ‘tšëngaftanga atše šmochántseguaye, pero ndoñe quešmochátinyëna; y ndayentše chántsemnoca ndoñe quešmochatobenaye jashjanguama ca?’” —chënga imojtsichamo.

### *Béjayënga vida bomniye*

<sup>37</sup> Chë fiesta jopochócama te yojamna chë más uámana te. Chë te, Jesús entšángbentše tojantsá y jabuache tojánayana: “¡Nda tbojtsajuendá, átšbioye chauabo y chaofsé!

<sup>38</sup> Ntšamo Bëngbe Bëtsabe uabemana palabrenguiñe endayancá: ‘Nda átšbeñe tojtsošbuaché, cha echántsemna mo ndabe ainantšana vida bomna béjayënga tojtsobocancá.’ Chca echántsemna átšbeñe ošbuáchiyëngbiama ca” —cha tojánayana.

<sup>39</sup> Chë sóyeca, Jesús yojtseboše jayanana, chábeñe ošbuáchiyënga chë Uámana Espíritu mochjanóyëngacñe ca; er chë Uámana Espíritu cabá ndoñe tonjánabo, Jesús corente bëtsá yojamnana cabá ndoñe tmonjaninýinýe causa.

### *Nyetsca entšanga ndoñe cachcá Jesusbiana imontsejuabnaye*

<sup>40</sup> Chca tmojanuena ora, ínýenga imojtsichamo: —Quem boyabása ndegombre chë Bëngbe Bëtsabe juabna oyebuambnayá entsemna, chë Cristbe natsana jabamá ca.

<sup>41</sup> Inýenga imojtsichamo: —Ndegombre cha chë Cristo, chë Uámana Uabuayaná entsemna ca.

Pero ínýengna: —Ndoñe, er chë Cristo Galileocana ndoñe queochátabo.

<sup>42</sup> Ndegombre, Bëngbe Bëtsabe uabemana palabrenguiñe endayana, chë Cristna rey Davídbentšana entšá canmëna, y Belenocana caochjabo ca, cach puebllocana ndayentšá David inamna ca —chënga imojtsichamo.

<sup>43</sup> Y chca, ínýengna Jesusbe pavor imojtsemna, y ínýengna chabe contra.

<sup>44</sup> Inýenga imojtseboše Jesús jishachama, pero ndocná tbonjánishache.

### *Chë amëndayënga Jesúsbeñe ndoñe montsanošbuaché*

<sup>45</sup> Chë fariseunga y bachnangbe amëndayënga imojtsemnoye chë Bëngbe Bëtsabe bëts yebnoca josticiënga tmojtashhajna ora, tmojanatjá: —¿Ndáyeca ndoñe Jesús šmonjuánatse ca?

<sup>46</sup> Chora chë josticiënga tmojanëjua: —Ndocná quenatoyebuambná ntšamo chë boyabása tonjyebuambacá ca.

47 Chora chë fariseunga tmojanéyana: —¿Tšëngaftángnaca šmojalesenciá cha chacmaingñema ca?

48 ¿Nderado bëngbe amëndayënguentsá o bënga fariseunguentšá nÿe mo canÿa chábeñe tayojtsošbuaché?

49 Pero quem entšanga, ntšamo leyiñe iuayancá nduabuátmënga, bacna soyëngaca sempre mochanjëftsemna ca —chënga imojtsichamo.

50 Chora Nicodemo, canÿa fariseunguentšá, chë Jesúseftaca jencuéntama ibeta tojána cha, tojánayana:

51 —Ntšamo bëngbe leyiñe endayancá, bënga ndoñe quemuátobena jayanana canÿe entšá castiganá jtsemnama ibojtsemna ca, cha cabá ntjoyeunaycá, ndayá cha tojamama jtsetatšëmbuama ca.

52 Chora chënga Nicodemo tmojanjuá: —¿Acnaca chábeñe cojtsošbuaché y mo canÿe Galileoca entšacá cojtsejuabná ca? Bëngbe Bëtsabe uabemana palabrënguiñe cochjuatsjinÿe, y cochanjinÿe ni canÿa Bëngbe Bëtsabe juabna oyebuambnayá Galileocana yochjabo ca.

### *Chë shema boyábioye ínÿaftaca ingñayá*

53 Fariseunga y bachnangbe amëndayënga chë josticiëngbioye tmojanëcácanentšana, cada ona cachabe yebnoye imojtsatónënga.

## 8

1 Pero Jesusna canÿe tjoye, Olivos ca uabáinoye tojtsanoñe.

2 Y chë yëfsana cachëse, Jesús cachiñe Bëngbe Bëtsabe bëts yebnoye tojesaná. Nÿetsca entšanga tmojanobeconá jouenama, y Jesús tojanótbema y tojanontšé jabuátambama.

3 Chorna, báseftanga ley abuatambayënga y fariseunga tmonjánashajna, y canÿe shembása tmojanëshjango. Chana tmojáninÿena chabe boyábioye ínÿaftaca ibnetsoíngñañëntscuana; nÿetscangbe tsëntsaca tmojanatsá,

4 y Jesús tmojanianyana: —Buatëmbayá, quemuá fsënjínÿena chabe boyábioye ínÿaftaca bondëtsoíngñañëntscuana.

5 Leyiñe Moisés šonjanamëndá mëntšá uamana shembásengna ndëtšbéngaca jtsëbáyama. ¿Aca ntšamo catjayana ca?

6 Jesús chca tmojanianyana ana jisháchichiyama, chca chënga jtsebomnama ndáyeca chabe contra jayanana. Pero Jesús nÿe fshantsoye yojtsejbéna y yojóntša ntšabuáfjaca fshantsiñe juabemama.

7 Chënga nÿe imojtsetjanaye causa, Jesús tojantsbaná y tojanéyana: —Nda tšëngaftanguentsá tondaye bacna soyënga tondbomná, chaobojatšé ndëtšbeca jatëchënjama ca.

8 Chentšana Jesús cachiñe fshantsoye yojtotsejbéna, y yojtëtóntša fshantsiñe jtëtabemama.

9 Chca tmojanuena ora, entšanga tmojanontšé canÿánÿa chentšana jésebocanana; natsana chë más bëtsanánënga y chë ínÿengna ústonoye. Canÿa Jesús tonjanoquedá y chë shembásanaca.

10 As, Jesús tojtantsá y tbojantjá: —¿Shembása, ndayentše chë acbe contra ichámënga imojtsemna? ¿Ndocná acbiama tonjayana castiganá chacotsemna ca?

11 Ndoñe, Taita, ndocná ca —chë shembása tbojanjuá.

Chora Jesús tbojanianyana: —Atše cach ndoñe acbiama quichátayana castiganá chacotsemna ca. Morna, motsatoñe, pero ndoñe más bacna soye cattsama ca.

### *Jesús yomna quem luarentša entsangbe juabna binÿayá*

12 Jesús cachiñe Bëngbe Bëtsabe bëts yebnentše yojtsabuátambaye, y entšanga mëntšá tojanéyana: —Atše sëndbínÿna quem luare entsangbe juabnënga. Nda atše chašojtsëstona,

cha echantsiyena atše chë binÿnayáftaca; y ndoñe mo ibetiñcá queochátaye, y chca, tšabe vida echántsebomna ca.

<sup>13</sup> Chora chë fariseunga Jesús tmojanianyana: —Aca nÿe cach acbiama chca contsoyebuambná; chcana, chë ntšamo contsichamcá tondaye quenatámana ca.

<sup>14</sup> As chora Jesús tojanějua: —Ntšamo cach atšbiama sentsichamcá aíñe entsámana, masque nÿe atše stsichamo ntšamo atšbiama ndegombre yomncá. Er atše sëndétatšëmbo ndëmocana tijabo y ndëmoye tštsá. Pero tšëngaftanga ndoñe chca quešmátstštšëmbo.

<sup>15</sup> Tšëngaftanga šmondbétsichamo ínÿengbiama tšabá o ndoñe tšabá tmontsamama, chca, nÿe ntšamo entšanga mondbetsejuabnycá. Pero atšna ndocnabiama chca quetsátichamo.

<sup>16</sup> Atše ndoñe nÿe canÿa quetsátsmëna ínÿabiama jayanama tšabá o ndoñe tšabá tontsamama; ndayá atšbe Taitá, chë šonjichmó cha, átšeftaca chca jayanana. Chíyeca, atše ínÿabiama tšabá o ndoñe tšabá tonjama ca stsichamo ora, ntšamo stsichamcá ndegombre jtsemnana.

<sup>17</sup> Tšëngaftangbe leyíñe enduábemana, uta entšata ndayámnaca cachcá tbojayanëse, ntšamo chata tbojayancá puerte jtsámanana ca.

<sup>18</sup> Y morna, atše sentsichamo chë ntšamo cach atšbiama ndegombre yomncá, y atšbe Taitá, chë šonjichmó chánaca entsichamo ntšamo atšbiama ndegombre yomncá ca — Jesús tojánayana.

<sup>19</sup> Chora chënga tmojantjá: —¿Ndayentše acbe Taitá yojtsemna ca?

Y Jesús tojanějua: —Tšëngaftanga ndoñe quešmatábuatma ni atše ni atšbe Taitá. Atše šmojtsábuatmësna, atšbe Taitánaca šmattsábuatma ca.

<sup>20</sup> Bëngbe Bëtsabe bëts yebnoca, chë crocénana jacjayama luarentše yojtsabuátambaye ora, Jesús chca tojánayana. Pero masque cha chentše yojtsemna, ndocná tbonjánishache, er chca japásama cabá ndoñe ora tonjanóshjango.

*“Chë chanjá luaroye, tšëngaftanga ndoñe quešmátobena jama”*

<sup>21</sup> Chora Jesús yojtétóntša oyebuambnayanana: —Atše chantá, y chora tšëngaftanga atše šmochántseenguaye. Masque chca, šmochanjóbana tšëngaftangbe bacna soyëngama ndëperdonánënga. Chë chanjá luaroye, tšëngaftanga ndoñe quešmátobena jama ca — Jesús tojánayana.

<sup>22</sup> Chora chë judiënga tmojanontsé enatsëtsnayanana: —¿Mo nderado yojtsejuabná jt-senóitanama, y chíyeca yojtsichamo chë cha yochjá luaroye bënga ndoñe montsobena jama ca?

<sup>23</sup> Chora Jesús tojanéyana: —Tšëngaftanga quem luaroquënga šmondmëna; atšna tsbananocá, celocá sëndmëna. Tšëngaftanga nÿe quem luarama enójuabnayënga šmondmëna, pero atše ndoñe.

<sup>24</sup> Chíyeca atše chca tcbonjáuyana, chë “tšëngaftangbe bacna soyëngama ndëperdonánënga šmochanjóbana ca”. Er, nda atše ndegombre bétsemnana ndoñe chašmontsošbuachese, tšëngaftangbe bacna soyëngama ndëperdonánënga šmochanjóbana ca.

<sup>25</sup> Chora chënga tmojantjá: —¿As aca ndase cmëna ca?

Y Jesús tojanéyana: —Entšanga jabuátambama sënjanbojatsé orscana chama tcbonjáuyana.

<sup>26</sup> Atše ba soyënga sëntsebomna tšëngaftangbiama jayanama, tšëngaftangbe contra jayanama; pero chë šonjichmó cha nÿetsca soyëngama ndegombre endbétsichamo, y atšna ntšamo chábentsana tijouencá, cachcá quem luare oyenënga sentsëtsëtsná ca — cha tojanéyana.

<sup>27</sup> Pero chënga ndoñe tonjanësertá Jesús cachabe Taitabiama chca tojanéyanama.

<sup>28</sup> As Jesús tojanéyana: —Bëngbe Bëtsá Entšá tbojanbemá chašmojatsbaná ora, šmochántsetatšëmbo nda sëndmëná atše bétsemnana. Cachcá, tšëngaftanga

šmochántsetatsëmbo, nÿe cach atšbe juábnaca atše tondaye jamama sëndobenama. Nÿe ndayá atšbe Taitá šojabuatëmbacá atše sëndoyebuambná.

<sup>29</sup> Y chë šonjichmó cha ndoñe nÿe canÿa quešnátshjuana. Chca endmëna, er atše sempre sëndbëtsama ntšamo cha oyejuayá jabemama tojtsemncá ca —Jesús tojánayana.

<sup>30</sup> Jesús chca tojánayana ora, banga chábeñe imojtsanošbuaché.

*Bëngbe Bëtsabe básenga y chë nÿe bacna soye jtsamama vida bomnënga*

<sup>31</sup> Chora Jesús, chë chábeñe imojtsošbuaché judiënga tojanëyana: —Ntšamo cbontsëtsëtsnacá tšëngaftanga sempre šmojtšamëse, ndegombre atšbe uatsjëndayënga šmochántsemna.

<sup>32</sup> Ntšamo ndegombre yomncá šmochántsetatsëmbo; y ntšamo ndegombre yomncá jtsetatšëmbëse, atsebácanënga šmochántsemna ca.

<sup>33</sup> Chora chënga tmojanjuá: —Bëngna Abrahámbentšana entšanga fsëndmëna, y ndocná ndocna te chešnáisishëche nÿe chabiamana nÿets tempo jtsoservënama. As, ¿ndáyeca šcojtsëtsëtsná bënga atsebácanënga fchtsemna ca?

<sup>34</sup> Chora Jesús tojanëyana: —Ndegombre šcuayana: Nda bacna soyënga tojtsama, cha nÿe bacna soyënga jamama juabnëngaca mandaná jëftsemnana.

<sup>35</sup> Canÿe oservená ndoñe nÿets tempo chë pamillentšá ntjëftsemnana, ntšamo canÿe uaquiñá sempre chë pamillentšá jesomñancá.

<sup>36</sup> Y chca, Bëngbe Bëtsabe Uaquiñá chacmojátsebacase, tšëngaftanga ndegombre atsebácanënga šmochántsemna bacna soyënga juabnënguentšana.

<sup>37</sup> Atše sëndëtatšëmbo tšëngaftangna Abrahámbentšana entšanga šmomnana; pero tšëngaftanga šmontseboše atše jóbama, ntšamo atše cbontsëtsëtsnacá ainaniñe jýëngacñama ndoñe quešmátshboše causa.

<sup>38</sup> Ntšamo atšbe Taitábioca tijinÿcá, cach soyëngama atše sëntsoyebuambná. Tšëngaftangnaca, cachcá ntšamo tšëngaftangbe taitábentšana šmojouencá šmontsama ca —tojanëyana.

<sup>39</sup> Chora chënga tmojanjuá: —Bëngbe uámana bëts taitá, Abraham endmëna ca.

As Jesús tojanëyana: —Tšëngaftanga Abrahambe básenga ca jtsabáinama merecido šmojtsebuajónëse, chë ntšamo Abraham tojëftsema y cachcá tšëngaftanga šmattsama.

<sup>40</sup> Atšna ntšamo ndegombre yomncá sëndoyebuambná, ntšamo Bëngbe Bëtsábentšana tsouenancá. Pero mora tšëngaftanga šmontseboše atše jóbama; Abraham ndocna te chca chenaisobuachjanguá.

<sup>41</sup> Tšëngaftangna, ntšamo tšëngaftangbe taitá tojëftsemcá y cachcá jtsamana ca —Jesús tojánayana.

Chora chënga tmojaneyana: —Bënga nÿe enaquëcana básenga ndoñe queftsátsmëna. Chë nÿe canÿe taitá fsëndbomná, Bëngbe Bëtsá endmëna ca.

<sup>42</sup> Chora Jesús tojanëyana: —Bëngbe Bëtsá ndegombre tšëngaftangbe taitá tojtsemnëse, tšëngaftangna atše šmattsebobonshana. Er atšna, Bëngbe Bëtsábiocana sënjabo y muentšë sëntsemna. Nÿe atšbe ponto ndoñe chiyátabo; Bëngbe Bëtsá šonjichmó.

<sup>43</sup> ¿Ndáyeca tšëngaftanga ndoñe šmontsobena atšbe palabrënga josértana? Co, ntšamo cbontsëtsëtsnacá joyeunayama ndoñe quešmátshboše causa chca.

<sup>44</sup> Tšëngaftangbe taitá Satanás endmëna. Tšëngaftangna chabe entšanga šmondmëna; chíyeca, tšëngaftanga šmontseboše jamama cachcá ntšamo cha tojtsebošcá. Quem luare jobojátšama orscana, Satanás entšá obanayá endmëna. Satanabe juabnoca, ndocna tšabe soyënga ni ndegombre soyënga ntsebínÿnana. Chíyeca, ndocna te cha ntšamo ndegombre yomncá ntsamana. Cha canÿe bostero endmëna, y chábertšana nÿetsca bostero soyënga jtsóbocanana. Chíyeca, cha tojtsebostero ora, nÿe ntšamo cachá yomnana jtsichámuana.

<sup>45</sup> Atšna sempre ntšamo ndegombre yomncá cbondutsëtsná; chíyeca, chë sëntsichamo soyiñe tšëngaftanga ndoñe quešmatošbuaché.

<sup>46</sup> ¿Nda tšëngaftanguentsá nanjobenaye jinñanñiyana atše ndaye bacna soye tijamama? Y atše, nñe ntšamo ndegombre yomncá stsichámëse, ¿ndáyeca chë tijayaniñe ndoñe šmontsošbuaché?

<sup>47</sup> Nda Bëngbe Bëtsabe entsá tomna, ntšamo Bëngbe Bëtsá tojtsichamcá jtsuenanana. Pero tšëngaftangna ndoñe Bëngbe Bëtsabe entsanga quešmátsmëna. Chíyeca, ntšamo Bëngbe Bëtsá entsichamcá ndoñe quešmátsboše jouenama ca —Jesús tojanéyana.

### *Cristo Abrahambiana más natsana ya yojtsemna*

<sup>48</sup> Chora chë judiënga tmojaniana: —Ajá, bënga co ndegombre fstsichamo, aca nñe samaritano y bacna bayëjbe juabna uambayá comna ca fstsichamo ora ca.

<sup>49</sup> Y Jesús tojanéjua: —Atše ni mo canñe bayëjbe juabna quetsatambá. Ntšamo atše sëntsamcá, endmëna jinñanñiyama atšbe Taitá Bëngbe Bëtsá uamaná yomnana; pero tšëngaftangna, atše chca tsmënama ndoñe quešmatinñinñá.

<sup>50</sup> Atše ndoñe quetsátsboše ínñenga atše más uamaná chašmobemama. Pero inña endmëna; cha aiñe endboše atše bëtsá bëtsemnama chaminñanñema. Y chánaca endmëna chë ínñengbiana tšabá o ndoñe tšabá tmontsamama endbetsichamuá.

<sup>51</sup> Ndegombre šcuayana, nda ntšamo atše sëntsichamcá tojouena y chca tojama, ndocna te queochatóbana ca —Jesús tojánayana.

<sup>52</sup> Chora chë judiënga tmojaniana: —Mora cocayé fsëntsetatšëmbo aca ndegombre bacna bayëjbe juabna uambayá comnama. Abraham tojanóbana, y cachcá, nñetscanga Bëngbe Bëtsabe juabna oyeuambnayëngnaca. ¿Y mora aca cochjátichamo, “Nda ntšamo atše sëntsichamcá tojouena y chca tojama, cha ndocna te queochatóbana ca”?

<sup>53</sup> ¿O aca, bëngbe bëts taitá Abrahambiana más bëtsá comna? Cha tojanóbana, y Bëngbe Bëtsabe juabna oyeuambnayëngnaca. ¿Ndase cojátsmëna ca aca cojatsjuabná ca? —chënga imojtsichamo.

<sup>54</sup> Chora Jesús tojanéjua: —Atše nñe cach atše más bëtsá stsenobiamnasna, chë soye tondaye nantsámama. Pero chë más bëtsá šojtsebiamná cha, atšbe Taitá endmëna, cach ndabiana tšëngaftanga šmondbétsichamo tšëngaftangbe Bëtsá canmëna ca.

<sup>55</sup> Pero tšëngaftanga cha ndoñe quešmatábuatma; atše aiñe. Y atše, “cha ndoñe quetsatabuatma ca” stsichámëse, átsnaca cach tšëngaftangcá canñe bostero stsemna. Pero ndegombre atše cha sënduábuatma, y ntšamo cha tojtsichamcá, atše sëndouenana y cachcá sëndbétsama.

<sup>56</sup> Tšëngaftangbe uámama bëts taitá Abraham, chë atše jabama te jinñama yojtsejuabnaye ora, puerte oyejuayá yojtsemna. Y pronto tojëftsaninñe, y puerte tojanoyejuá ca —Jesús tojánayana.

<sup>57</sup> Chora chë judiënga tmojaniana: —Aca cabá ndoñe shachna bnëtsana uata quecátsbomna; y as, ¿ntšamo cochjátichamo, Abraham tcojëftsaninñe ca?

<sup>58</sup> Chora Jesús tojanéjua: —Ndegombre cbëyana, Abraham cabá ndoñe ainá quen-jatsmëna ora, atše ya sënjëtsemna ca.

<sup>59</sup> Jesús chca tojanéjua ora, chënga ndëtsbënga tmojanájaca cha jtsatëchënganjama. Pero Jesusna oitanánana, Bëngbe Bëtsabe bëts yebnentšana tojésanbocna.

## 9

### *Jesús tojanma, canñe boyabása jtaná onñanán chabuabínñnama*

<sup>1</sup> Canñe luarëjana yojtsachnëjuana ora, Jesús canñe boyabásabioye tbojáninñe. Chë boyabásana jtaná inónñna.

<sup>2</sup> Chë uatsjëndayënga Jesús tmojantjá: —Buatëmbayá, ¿ndáyeca quem boyabása jtaná inónñna? ¿Camuá bacna soyënga tojamama, o chabe bëtsëtsangbe bacna soyënga causa ca?



<sup>3</sup> Chora Jesús tojanējua: —Ni cachabe bacna soyëngama, y ni chabe bëtsëtsangbe bacna soyënga causa. Chca endmëna ndayá entsanga jinÿanÿiyama ntšamo Bëngbe Bëtsá yobencá.

<sup>4</sup> Cabá yojtsësháchena ora, šontsamna jamana ntšamo chë šonjichmó cha yojtsebošcá. Ndoñe usháchena tempo echanjóshjango; chora ndocná tondaye jamama queochatobeyaye.

<sup>5</sup> Quem luariñe chjëftsemnëntscuana, atše quem luare entsangbe juabnënga binÿnayá chanjëftsemna ca —tojanëyana.

<sup>6</sup> Chca tojánayanentšana, Jesús fshantsiñe tojanbuashëtjo, y chë yebuáyeca batšá ngüiche tojánbema, y chë jtaná chë ngüicheca tbojanbuchanëtjo.

<sup>7</sup> Chora chë jtaná tbojanियana: —Motsa y metsobúchjabebiyë, chë binche uafjajónaye entsangbe pormániñe, Siloé ca uabáiniyoca ca. (Siloé, judiëngbe biyañe endayana “Ichmoná ca”).

Y chë jtaná tojána; choca yojetsobúchjabebiyë, y yebnoye tojtaná ora, ya ibojtsabinÿna.

<sup>8</sup> Chë juachañe oyenënga y chë jtaná tempo lemošna otjanañana tmojáninÿënga, imojtsetjanaye: —¿Mua ndoñe yondmëna chë enjanamana jótbemana lemošna jótjañama ca?

<sup>9</sup> Inÿënga imojtsichamo: —Cha entsemna ca.

Y ínÿënga: —Cha ndoñe quenátsmëna, pero chacá entsábona ca.

Y cach shnaná yojtsichamo: —Atše cha sëndmëna ca.

<sup>10</sup> As chë entsanga tmojantjá: —¿Ntšamo chca mora cmojtsabinÿna ca?

<sup>11</sup> Y cha tojanējua: —Chë boyabása, Jesús ca uabainá, ngüiche yebuáyeca tonjábema, šonjabuchanëtjo y šonjauyana: “Motsa y Siloé uafjajónayiñe metsobúchjabebiyë ca”. Chcasna, atše sënjá, sënjetsobúchjabebiyë y cachora šontsabinÿna ca.

<sup>12</sup> Chora chënga tmojantjá: —¿Ndayentše cha yojtsemna ca?

Y chana: —Atše ndoñe quetsátstatsëmbo ca —tojanējua.

### *Chë jtana shnanábioye fariseunga imojtsetjanaye*

<sup>13</sup> Chora chë entsanga, chë jtaná inamná fariseúngbioye tmojanánatse.

<sup>14</sup> Chë Jesús batšá yebuáyeca ngüiche tojánbema, y chë jtaná tojanma te, canÿe ochnayté inamna.

<sup>15</sup> As chë fariseunga chë boyabása tmojantjá: —¿Ntšámoyeca mora cmojtsabinÿna ca?

Chora cha tojanējua: —Cha ngüiche yebuáyeca tonjábema y šonjabuchanëtjo. Sënjetsobúchjabebiyë, y cachora šonjuabinÿna ca.

<sup>16</sup> As chora básefta fariseunga imojtsichamo: —Chë jtaná chabotsabinÿnama tojamá ndoñe tonjochná, y ochnayté tojatrabajá. Chíyeca cha Bëngbe Bëtsabe entsá ndoñe quenátsmëna ca.

Inÿënga imojtsichamo: —Cha canÿe bacna soyënga amá tojtsemnëse, ¿ntšamo nantsobena canÿe bëts soye Bëngbe Bëtsabe obenánaca jamama ca?

Y chca, ínÿënga Jesusbe pavor imojtsemna, y ínÿënga chabe contra.

<sup>17</sup> Chama chënga cachiñe chë jtaná inamná tmojtëtantjá: —Er aca mora chacmotsabinÿnama cha tojamëse, ¿chabiamana ntšamo catjayana ca?

Chora cha tojanējua: —Chana canÿa Bëngbe Bëtsabe juabna oyebuambnayá entsemna ca.

<sup>18</sup> Pero chë judiënga ndoñe montsanošbuaché, cha chë jtaná inamnana y chora ibojtsabinÿnama. As chënga, ínÿënga tmojanichamó chë boyabásabe bëtsëtsata jobiatšama.

<sup>19</sup> Chë bëtsëtsata tbojánashjango ora, chë judiënga tmojanatjá: —¿Quem boyabása tsëndatbe uaquiñá yomna ca? ¿Ndegombre tašojtsichamo cha jtaná inonÿnama? Chcase, ¿ntšamo mora cha ibojtsabinÿna ca?

<sup>20</sup> Chora chë bëtsëtsata tmojanējua: —Aíñe fsëndëtatšëmbo cha bëndatbe uaquiñá endmënama y jtaná tonjanonÿnama.

<sup>21</sup> Pero ndoñe queftsátstatsëmbo ntšámoyeca mora chca ibojtsabinýnama, ni bëndatbe uaquiñá chabotsabinýnama nda tojamama cach ndoñe. Cachá motjanga. Ya bëtsá entsemna, y cachá entsobena tsëngaftanga razón jatšatayama ca —chata tbojánayana.

<sup>22</sup> Tempo, chë judiënga imojenóyeunaye, chëngbe enefjuana yebnënguentsana jtëbuacanana chë Jesús ndegombre chë Uámama Uabuayaná, chë Cristo yojamna ca tmojanýnga. Chë bëtsétsatna chama ibojtsauatja;

<sup>23</sup> chíyeca tmojanéyana: “Cha ya bëtsá entsemna. Cachá motjanga ca”.

<sup>24</sup> As cachiñe chë judiënga chë jtaná inamná tmojanchembo y tmojanianyana: —Bëngbe Bëtsabe delante cach acbiamama ndegombre mobuambá. Bënga fsëndétatsëmbo chë boyabása canýe bacna soyënga amá yomnama ca.

<sup>25</sup> Chora cha tojanéjua: —Cha canýe bacna soyënga amá o ndoñe tondmënama, atše ndoñe quetsátstatsëmbo. Atše nýe mëntsá sëntsetatsëmbo: Atše jtaná sënjanmëna, pero mora šontsabinýna ca.

<sup>26</sup> Chora chënga cachiñe tmojatantjá: —¿Ntsámo tcmënjama? ¿Ntsámo cha tënjama chacmotsabinýnama ca?

<sup>27</sup> Y cha tojanéjua: —Ya tcbonjáuyana y ndoñe chešmatoyeuná. ¿Ndáyeca cachiñe šmojtseboše jatuenama? ¿Tsëngaftángnaca šmojtseboše chabe ústonënga jtsemnama ca?

<sup>28</sup> Chora chënga cha tmojtsanóyenguango y tmojanianyana: —Acna canýe chabe ustoná cojtsemna, pero bënga ndoñe; bëngna Moisesbe ústonënga fsëndmëna.

<sup>29</sup> Bënga fsëndétatsëmbo, Bëngbe Bëtsá Moisésbioye tbojanatsétsama, pero chë boyabásabiamama ndoñe queftsátstatsëmbo ni mo ndëmocana cha tojabama ca —chënga imojtsichamo.

<sup>30</sup> Chora chë boyabása tojanéjua: —¡Ntsámo chca nántsemna! Tsëngaftanga ndoñe šmontsetatsëmbo ndëmocana cha tojabama; pero chašuabinýnama cha tonjama.

<sup>31</sup> Bënga tsábá mondétatsëmbo, bacna soyënga amënga Bëngbe Bëtsá ndoñe queondbátayaunanama. Chana, nýe chábioye adorayá y ntsámo cha tojtsebošcá amábioye joyeunayana.

<sup>32</sup> Quem luare jobojátsama orscana ndocna te quenaisótatsëmbo canýe jtaná onýnanabiama ndánaca cha chabotsabinýnama tojéftsemama.

<sup>33</sup> Quem boyabása, Bëngbe Bëtsabe ichmoná chabe soyënga jamama ndoñe tontsemnëse, tondaye nantsobena jamama ca —chë entsá tojánayana.

<sup>34</sup> As chë fariseunga tmojanianyana: —¡Ndayá! Aca tcojanonýná orscana, corente bacna soyënga amá tcomnëse, ¿ntsámo mora bënga šcochjátabatambaye ca?

Y chora chë judiëngbe enefjuana yebnentsana cha tmojtanábocna.

### *Chë Bëngbe Bëtsabe soyëngama mo jtanëngcá imomnënga*

<sup>35</sup> Chë jtaná tmojtanábocnama Jesús tojanuena ora, tojána cha janguanguama. Tbojáninýena ora tbojanianyana: —¿Aca Bëngbe Bëtsá Entsá tbojanbemábeñe quecojtsošbuaché ca?

<sup>36</sup> Y cha tbojanjuá: —¿Taita, nda cha yojtsemna, as atše chábeñe jtsošbuáchiyama ca?

<sup>37</sup> As Jesús tbojanianyana: —Aca ya tconjinýe; chë ácaftaca entsoyebuambná cha entsemna ca.

<sup>38</sup> Chora, chë boyabása Jesús bentše tojanoshamentsé jëtschuayama y tbojanianyana: —Atšbe Utabná, aíñe sëntsošbuaché ca.

<sup>39</sup> Chora Jesús chë entsanga tojanéyana: —Atše quem luaroye tijabo ndayá entsanga jinýanýiyama ntsámo cachënga Bëngbe Bëtsabe soyëngama imojuabnama. Chë Bëngbe Bëtsabe soyëngama ndosertánënga, chë soyënga atše chanjínýanýiye ora, mo jtanëna shnanëngcá mochántsemna; y chë Bëngbe Bëtsabe soyëngama corente imotatsëmbo ca juabnayënga chanjínýanýiye, nýe batšá Bëngbe Bëtsabe soyëngama imotatsëmbuama. Y chca, chënga, masna mo jtanëngcá mochántsemna y ndoñe mo chë jinýama obenëngcá.

<sup>40</sup> Básefta fariseunga Jesúseftaca imojtsemnënga chca tmojanuena ora, cha tmojaniana: —Ndegombre bënga ndoñe mo jtanëngcá queftsátsmëna ca.

<sup>41</sup> Chora Jesús tojanëjua: —Tsëngaftanga Bëngbe Bëtsabe soyëngama ndëtatšëmbënga šmojtsemna ca, y ndegombre chë soyëngama ndoñe cmontsësertana ca šmojobuambase, ndayá šmojtsamcá Bëngbe Bëtsá mo bacna soyënga cuenta ndoñe queochátonÿaye. Pero tsëngaftanga corente Bëngbe Bëtsabe soyëngama cmojtsësertana ca šmojtsichámësna, Bëngbe Bëtsá ndoñe queochatobenaye tsëngaftangbe bacna soyëngama jáperdonana ca — Jesús tojanëyana.

## 10

### *Chë oveshënga abujajënyä y chabe oveshënga*

<sup>1</sup> As Jesús tojanëyana: “Ndegombre šcuayana: Nda chë oveshëngbe luaroye bëšáshajana ndoñe tonjámashëngo, pero aíñe inÿajana tojtsamáshëngo, chana canÿe atbëbaná y abacayá jtsemnana.

<sup>2</sup> Pero chë bëšáshajana tojamashënguana, chë oveshënga anÿená jtsemnana.

<sup>3</sup> Chë bëšásha ebtajuaná, chë bëšásha jebëtafjuana, y chë oveshënga abujajënyä ntšamo cada ona tmabaincá chë oveshënga jáchembuana. Y chë oveshënga jtsetatšëmbuana chëngbe abujajënyä yojtsachembuanama; y chë luarentšana cha jubuacnana.

<sup>4</sup> Nÿetsca oveshënga tmojábocana ora, chë abujajënyä chënga jtsebënatsanana, y chë oveshënga jtsëstonana, er chabe oyebuambnayana chënga joyátëmbana.

<sup>5</sup> Pero chë tmonduabuatmábioyna chë oveshënga ndoñe ntjuastana; nÿe chábensana jtsachetëngana, chë oveshënga chabe oyebuambnayana ndoñe ntjoyátëmbana causa ca” —Jesús tojanayana.

<sup>6</sup> Jesús entšanga chca tonjanacuntá, pero chënga ndoñe ntjosértana ntšamo yojtsentšayancá.

### *Jesús, chë oveshënga tsabe abujajënyä*

<sup>7</sup> As Jesús cachiñe tojanëyana: “Ndegombre cbëyana: Atše sëndmëna chë bëšásha oveshënga mondbëtsamashjuanëjana.

<sup>8</sup> Nÿetscanga chë atšbe natsana tmojánabënga, atbëbanënga y abacayënga imnamna, pero chë oveshënga ndoñe chëngbioye ntjóyaunayana.

<sup>9</sup> Atše chë bëšásha sëndmëna. Nda quem bëšáshajana tojamashënguá, atsbocaná echántsemna. Canÿe oveshá jamashënguana y jabocnana, y shácuana jónÿenana. Cachcá, chë quemëjana tojamashënguá, lempe echanjónÿena.

<sup>10</sup> “Chë atbëbaná jabana nÿe jatbëbama, jóbama y lempe jtseepochócama; pero atšna, entšanga vida chamotsebonnama y átseftaca bëtscá tsabe vida chamotsebonnama tijabo.

<sup>11</sup> “Atše sëndmëna chë oveshënga tsabe abujajënyä. Chë oveshënga tsabe abujajënyä sempre jtseprontánana chëngbiama jóbana, chabe oveshënga ababuánÿeshanayeca.

<sup>12</sup> Pero nda nÿe crocenánama totrabáya y chë oveshënga ndoñe chábinga tmontsemna, cha nderado tojinÿe canÿe tjañe queše chë oveshëngbioye tojtsobécocnama, cachora nÿe cachcá jesënyayana y jtsachana. Chë tjañe queše oveshënga jtsacamiyana, y chë oveshëngna nÿe cátoye jtsachetana.

<sup>13</sup> Cha jtsemnana nÿe crocenánama trabajayá; chabiama nÿe chë uacanánana más uámana soye jtsemnana, y chë oveshëngbiama tondayana ntsentšamnana; chíyeca cha jtsachana.

<sup>14</sup> “Atše sëndmëna chë oveshënga tsabe abujajënyä. Atše chënga sëndëubuatma, y chëngnaca atše šmonduábuatma.

<sup>15</sup> Cachcá, chë Taitá Bëngbe Bëtsá atše šonduábuatma y atše chábioye. Atše sempre sëndëtseprontana jóbana, atšbe oveshënga sëndababuanÿeshánayeca.

<sup>16</sup> Atše inýe oveshënga sëndábamna, pero chënga ndoñe quem luariñe oveshënga quemátsmëna. Atše šontsemna chëngnaca moye junatsana. Chëngnaca atšbe oye-buambnayana mochanjouena, y muentša oveshëngaftaca cányiñe mochántsemna, y atšna nyetsca chë oveshëngbiama chë abujénja chántsemna.

<sup>17</sup> “Atše sempre sëndétseprontana jóbanama, chora jtayenama. Chíyeca chë Taitá šondbobonshana.

<sup>18</sup> Ndocná atšbe vida quešochatsbojuána, pero chënga sëndababuanýeshánayeca sempre sëndétseprontana jóbanama, cach atše chca sëndbošeyeca. Derecho sëndétsóbomñe chëngbiama jóbanama, y chora jtayenama. Chca endmëna ntšamo atšbe Taitá šonjamandacá ca” —Jesús tojánayana.

<sup>19</sup> Chë soyënga chë judiënga tmojanuena ora, cachiñe banga Jesusbe contra y ínýengna Jesusbe pavor imojtsemna.

<sup>20</sup> Banga imojtsichamo: —Chana bacna bayëjbe juabna uambayá y corente juicio ndbomná entsemna. Y as ¿ndáyeca cha mochjátsyeunana ca?

<sup>21</sup> Pero ínýengna imojtsanichamo: —Ndocna bacna bayëjbe juabna uambayá ntsoobenana chca jóyebuambayama. ¿Canýe bayëja nantsobena jamama canýe jtaná chabotsabinýnama ca?

*Chë judiënga ndoñe imontsošbuáchiye Jesús Bëngbe Bëtsabe Uaquiñá bétsemnama*

<sup>22</sup> Canýe uaftena tempo inamna, y Jerusalenentše canýe fiesta imojtsebomna. Chë fiesta inamna cada uata, Bëngbe Bëtsabe bëts yebna tempo cachiñe tmojtanjebuama entšanga jtenójuaboyama.

<sup>23</sup> Jesús Bëngbe Bëtsabe bëts yebnoca yojétsana, canýe amashjuana otsbojebniñe, Salomonbe Amashjuana ca uabáinentše.

<sup>24</sup> Chora, chë judiënga tmojanóbobuashcona, y tmojantjá: —¿Buetaytentscuana bënga fchjéftsemna achiamo ndegombre soye ntsetatšëmbcá? Aca chë Cristo cojtsemnëse, chama lempe tšabá šmanýanýé ca.

<sup>25</sup> As Jesús tojanéjua: —Ya tcbonjáuyana y tšëngaftanga átšbeñe ndoñe ntsošbuáchiyana. Chë atše sëndama soyënga, atšbe Taitá Bëngbe Bëtsabe obenánaca, cmontsinýanýná nda atše bétsemnana.

<sup>26</sup> Pero tšëngaftanga átšbeñe ndoñe quešmatošbuaché, er tšëngaftanga atše ndoñe quešmatéstoná, ntšamo chë oveshënga chë tšabe abujénja mondbetsëstoncá.

<sup>27</sup> Chë atše šmondústonënga, atše šmondbóyeunaye y šmondbëuasto. Atše chënga sëndëubuatma.

<sup>28</sup> Atše chanjama, quem entšanga chë nyetsca tescama yomna tšabe vida chamotsebomnama; chënga ndocna te pochocánënga quemochátsmëna, y ndocná quenátobena átšbentšana chënga jefcana.

<sup>29</sup> Atšbe Taitá Bëngbe Bëtsá, chë entšanga atše chašmuastama tojamá, nyetscangbiama más bëtsá endmëna, chíyeca ndocná quenátobena chá bentšana chënga jefcana.

<sup>30</sup> Chë Taitá y atše canýa fsëndmëna ca —Jesús tojánayana.

<sup>31</sup> Chora, chë judiënga cachiñe ndëtšbënga tmojanájaca Jesús jtsatëchënganjama.

<sup>32</sup> Pero Jesús tojanéyana: —Atše tšëngaftangbeñe, ba bëts soyënga sënjama atšbe Taitá Bëngbe Bëtsabe obenánaca. ¿Ndëmua chentša soyama atše šmochtsatëchënganja ca?

<sup>33</sup> Chora chë judiënga tmojanjúá: —Ni canýe quem bëts soyëngama bënga queftsátšboše aca jtsatëchënganjama. Aca Bëngbe Bëtsabiama ndoñe tšabá quecátichamo; mo chábioye cuafjoyenguangcá entsemna. Aca nýe canýe entšá condmëna, pero acna contsichamo cach aca Bëngbe Bëtsá comna ca; chíyeca bënga fsëntseboše ndëtšbéngaca aca jt-satëchënganjama ca —chënga tmojanijana.

<sup>34</sup> Chora Jesús tojanéyana: —Bëngbe Bëtsabe uabemana palabrenguiñe mëntšá endayana: “Atše sënjayana tšëngaftanga diosënga šmomna ca.”

<sup>35</sup> Bëngbe Bëtsá chca tojánayana chë chabe palábraca y cha chamotseservénama tojánamandangiama; ndocná quenátobena jinÿanÿiyana ni mo canÿe soye Bëngbe Bëtsabe uabemana palabrenguiñe, ndoñe ndegombre soye yomnama.

<sup>36</sup> Y atsbiama, Bëngbe Bëtsabiacá uabuayaná y quem luare ichmoná, ¿ntsamo tsëngaftanga šmojtobena jayanama, “aca Bëngbe Bëtsabiama ndoñe tsabá quecátichamo ca”, chë Bëngbe Bëtsabe Uaquiñá sëndmëna ca atše tijayanama?

<sup>37</sup> Ntsamo atsbe Taitá endamcá atše ndoñe sentsamëse, tsëngaftanga átsbeñe ndoñe šmattsošbuáchiye.

<sup>38</sup> Pero, ntsamo atsbe Taitá endamcá atše aiñe stsamëse, masque ndoñe átsbeñe šmونتsošbuaché, nÿe chë Taitabe obenánaca soyënga tijamama šmochtsošbuáchiye. As, canÿe ora chašmotsetátšëmbo y chacmësertá, chë Taitá átsbeñe yomnama y atše chábeñe tsmënama ca —Jesús tojanëyana.

<sup>39</sup> Chora chënga cachiñe tmojánbošena Jesús jishachama, pero cha chëngbentšana tojanotsbocá.

<sup>40</sup> Chentšana, Jesús Jordán béjaye chenguana tojesaná y choca tojtsanoquedañe. Chentše Juan tempo entšanga yojanëbáyana.

<sup>41</sup> Ba entšanga tmojána Jesús jinÿama, y mëntsá imojtsichamo: “Ndegombre, masque Juan ni mo canÿe bëts soye Bëngbe Bëtsabe obenánaca tonjëftsema, lempe ntsamo quem boyabásabiama tonjanoyebuambacá, ndegombre yojamna ca.”

<sup>42</sup> Y chentše, ba entšanga Jesúsbeñe imojtsanošbuaché.

## 11

### *Lázaro tojanóbana*

<sup>1</sup> Inamna canÿe boyabása šocá, Lázaro ca uabainá. Cha inoyena canÿe pueblo Betania ca uabáinentše, Marta y Maríaftaca, chabe uabénata.

<sup>2</sup> Quem María inamna nda Bëngbe Utabná Jesusbe shecuatšiñe botamana uanguëtsiye tbojanáshecbuešcja, y chabe stjënashaca tbojtanshechojó cha.

<sup>3</sup> Chë uta uabénatna ínÿenga tmojanichamó Jesús jauenayama: —Bëngbe Utabná, chë aca condbobonshaná šocá entsemna ca.

<sup>4</sup> Jesús chca tojanuena ora, tojánayana: —Quem šocana ndoñe quenátsmëna Lázaro chaóbanama. Pero aiñe entsemna Bëngbe Bëtsabe obenana entšanga jinÿanÿiyama, y Bëngbe Bëtsabe Uaquiñá chamuatschuama ca.

<sup>5</sup> Jesús corente yojánababuanÿeshana Marta, María y chatbe uaftše Lázaro.

<sup>6</sup> Masque chcasna, Lázaro šocá yojtsemna ca Jesús tmojanianyana ora, cabá uta te más cha yojésemna luarentše tojtsanoquedañe.

<sup>7</sup> Chentšana, chabe uatsjëndayënga tojanëyana: —Judeoye cachiñe cuajna ca.

<sup>8</sup> As chë uatsjëndayënga tmojanianyana: —Buatëmbayá, baseftayté entsemna chë luaroca judiënga cmonjanbuachetá ndëtšbéngaca jtsóbama; y mora, ¿cabá choye jtésama cojtseboše ca?

<sup>9-10</sup> Chora Jesús tojanëyana: —Bnëtsana uta hora bnëté endmëna. Nda bnëté tojtšana, ndoñe ntjojéstjiana, binÿniñe bëtsemnayeca. Cachcá átseftaca endmëna, tondaye quenátopodena átseftaca jopásana, atše jóbanama cabá ndoñe tonjobuache ora. Pero íbeta tojtsanëse, cha jtsojéstjiana, ndoñe binÿniñe causa. Cachcá, bënga šontsamna yojtsësháchenëntscuana jatrabájana. Atšbe jóbanama tempo chaojóshjango ora, ya ndoñe queochátëshachena jatrabájama ca —tojánayana.

<sup>11</sup> Chentšana tojanëyana: —Bëngbe amigo Lázaro tojtsomaná, pero atše choye chanjá jetsefšenama ca.

<sup>12</sup> Chora chë uatsjëndayënga tmojanjuá: —Bëngbe Utabná, tojtsomanase yojtsayana chana tsabá yochtsatsmëna ca.

<sup>13</sup> Pero Jesús yojtšanëtsësná ndayá Lázaro tojtšanóbana ca, y chabe uatsjëndayënga imojtsejuabnaye Lázaro ndegombre yojtsumáñama.

<sup>14</sup> As Jesús tšabá tojanëyana: —Lázaro tontsóbana.

<sup>15</sup> Atše sëntsoyejuá choca atše ndoñe tsmënama, tšëngaftangbe tšabiama chaotsemnama; chca, tšëngaftanga más átšbeñe chašmotsošbuáchema. Pero cuajna cha jinÿama ca.

<sup>16</sup> Chora Tomás, chë Gemelo ca uabobainá, chë inÿe uatsjëndayënga tojanëyana: “Bëngnaca cuajna, cháftaca mochjóbana ca.”

*Jesús iuama entsanga chámuatayenama y chë nÿetsca tescama yomna tšabe vida chamotsebmnama*

<sup>17</sup> Jesús chë béconana tojánashjango ora, tojántatšëmbona Lázaro ya canta te uatbontsána yojtsemnama.

<sup>18</sup> Betania pueblo yojamna Jerusalén béconana, mo unga kilómetroca.

<sup>19</sup> Ba judiënga tmojána Marta y María jautsëtsayama y jatjëmbambayama ndoñe tša ngmënaca chabondëtsemnama, chatbe uaftše tojanóbana causa.

<sup>20</sup> Jesús yojtšashjauanama Marta tojántatšëmbona ora, tojánbocna cha jajébenguama, pero María cach yebnentše tojanoquedá.

<sup>21</sup> Chora Marta Jesúsbioye tbojaniyana: —Bëngbe Utabná, aca muentše macmënëse, atšbe uaftše ndoñe matënjóbana.

<sup>22</sup> Pero atše sëntsetatšëmbo, masque ndayánaca mora Bëngbe Bëtsá chacojotjañe, y cha lempe chca cmochjátsetaye ca.

<sup>23</sup> Y Jesús tbojanjuá: —Acbe uaftše echántayena ca.

<sup>24</sup> Chora Marta tbojaniyana: —Aíñe, atše sëndëtatšëmbo cha yochtayenama, pero quem luare jopochócama te, nÿetsca obanënga mochtayena ora ca.

<sup>25</sup> As Jesús tbojaniyana: —Atše sëndmëna chë entsanga chámuatayenama y chë nÿetsca tescama yomna tšabe vida chamotsebmnama endamá. Nda átšbeñe tojtsošbuaché, masque chaóbana, echántayena.

<sup>26</sup> Y nda cabá ainá totsomñe y átšbeñe tojtsošbuaché, ndocna te queochatóbana. ¿Chë cbontsatsá soyiñe quecojtsošbuaché ca? —Jesús tbojantjá.

<sup>27</sup> Chora Marta tbojaniyana: —Aíñe, Bëngbe Utabná, atše ábeñe sëntsošbuaché, aca chë Cristo, chë Bëngbe Bëtsabe Uaquiñá y chë quem luaroye jabamá comnama ca.

*Jesús, Lázaro yojtšátbontsana cuevëshentše yojenóbošachna*

<sup>28</sup> Chca tojánayanentšana, Marta tojtšaná chabe quenata María jachembuama, y iytëcana tbojaniyana: “Buatëmbayá tonjášhango y entseboše aca jinÿama ca.”

<sup>29</sup> María chca tojanuena y cachora tojëftsanbocna y tojána Jesús jinÿama.

<sup>30</sup> Jesús cabá ndoñe chë puebløye tonjánamashëngo; yojëtsemna Marta tbojanjébengo luarentše.

<sup>31</sup> Chë yebnentše imojtsemna judiënga, María tša ngmënaca ndoñe chaondëtsemnama tjëmbambayënga, tmojánbocana María juastama; er chë tojëftsantsbaná y tojëftsanbocna ora, chë judiënga imojtsejuabnaye, Lázaro yojtšátbontsana luaroye María yojtšaye, choca jošachnama ca.

<sup>32</sup> Jesús yojtsemnentše María tojánashjango ora, chábentše tojanoshamentšé y tbojaniyana: —Bëngbe Utabná, aca muentše macmënëse, atšbe uaftše ndoñe matënjóbana ca.

<sup>33</sup> María y cháftaca tmojánashjajna judiënga, nÿetscanga imojetsenóbošachiye; y Jesús chca tojáninÿe ora, corente tbojancochtsetšena y puerte ngmënaca yojtsemna.

<sup>34</sup> Chora Jesús tojanatjá: —¿Ndayentše cha šmojuatbontsá ca?

Y chënga tmojanjuá: —Bëngbe Utabná, mabo y cochjinÿe ca.

<sup>35</sup> Chora Jesús tojánenobošachna.

<sup>36</sup> As chë judiënga tmojánayana: —¡Minÿënga, tša ibnabobonshana ca!

<sup>37</sup> Pero inye judiënga imojtsichamo: —Chë jtaná chabuabínýnama tojamá, ¿tondaye tonjobená jamama, Lázaro ndoñe chaondóbanama ca?

*Lázaro tojtanyena*

<sup>38</sup> Jesús, cachiñe puerte cochtsetšenaná, chë uatbontsánoye tojanobeconá. Chë luarna cuevëshe inamna, y amashjuanentse canye bëts ndëtsbéca yojtsatámëna.

<sup>39</sup> Chora Jesús tojanéyana: —Chë ndëtsbé mojuánanga ca.

Chora Marta, chë obanabe uabena tbojaniyana: —Bëngbe Utabná, mora ya bacá yojtsonguëtsé, er ya canta te entsemna cha tontsóbana ca.

<sup>40</sup> Y Jesús tbojanjuá: —Ndegombre, ya tbonjauyana, aíñe átšbeñe tcojtsošbuáchese, cochjinye Bëngbe Bëtsá puerte obená y bëtsá bëtsemnama ca.

<sup>41</sup> Chora chë ndëtsbé tmojanjuaná; Jesús celoye yojontješiyë y Bëngbe Bëtsábioyë tbojaniyana: “Taita, cbatschuá atšbe opresido tcojouenama.

<sup>42</sup> Atše sëndëtatšëmbo aca sempre šcondbëtseyëunanama; atše chca tbonjauyana, muentše montsemna entšangbe tšabíama, chca, aca atše šcojichmoma, chënga chamotsošbuáchëma ca.”

<sup>43</sup> Chca tojánayanentšana, jabuache tojánayana: “¡Lázaro, chentšana matsbocna ca!”

<sup>44</sup> Y cachora chë obaná tojtanbocna, cucuatšënga y shecuatšënga entšëjuaca batsëcná, y chabe jubiá base entšëjuaca uamochëcyaná. As Jesús tojanéyana: “Motsejafjoná y jama chaotsobena ca.”

*Chë judiëngbe amëndayënga tmojanenoyeuná Jesúsbioyë jóbama*

*(Mt 26.1-5; Mc 14.1-2; Lc 22.1-2)*

<sup>45</sup> Chë soyëngama, banga chë judiënguëntšana, María jatjëmbambayama tmojánanga, y ntšamo Jesús tojanmcá tmojáninýënga, Jesúsbeñe imojtsošbuaché.

<sup>46</sup> Pero inye judiënga fariseúngbioyë tmojána, ntšamo Jesús tojanmama chënga jacúntama.

<sup>47</sup> As, chë fariseunga y chë bachnangbe amëndayënga tmojánenefjna inye judiëngbe amëndayëngaftaca, y tmojánayana: —¿Ndayá mochjobenaye cháftaca jamama? Quem boyabása bëts soyënga entsama.

<sup>48</sup> Nye cachcá chamojonýase, nyetsca entšanga chábeñe mochantsošbuáchiye; chë romanëngbe amëndayënga mochanjabo y lempe mochantsepochoá, Bëngbe Bëtsabe bëts yebna y bëngbe luare Israel ca —chënga imojtsichamo.

<sup>49</sup> Pero canya chënguëntšá, Caifás ca uabainá, chë uata chë bachnangbe más uámana amëndayá inamná, tojanéyana: —Tšëngaftanga tondaye quešmátstatšëmbo.

<sup>50</sup> Y ndoñe quešmatsjuabná, tšëngaftangbiamá más tšabá yojtsemna nye canye boyabása Israeloca entšangbiamá chaóbana, y ndoñe nyets bëngbe luare chamotsepochoá ca —cha tojanéyana.

<sup>51</sup> Pero Caifás chë soye nye cachabe juábnaca ndoñe chca tonjánayana. Cha, chë uata chë bachnangbe más uámana amëndayá inámnayeca, Bëngbe Bëtsabe Espiritbe obenánaca tojánayana Jesús ibojamna Israeloca entšangbiamá jóbana ca.

<sup>52</sup> Y ndoñe nye Israeloca entšangbiamá, sinó chë inye luarënguiñe Bëngbe Bëtsabe básënga tmojanáshanënga chamuatábama, as chca, nyetscanga nye canye luarentša entšanga chamotsemnama.

<sup>53</sup> Chcasna, cach tescana judiëngbe amëndayënga tmojanenoyeuná Jesús jóbama.

<sup>54</sup> Chíyëca Jesús entšángbeñe, Judea luariñe ya ndoñe yontsana. Chë luarentšana tojëftsanbocna y canye luaroyë tojtsanoñe, entšanga ndoyeniñe béconana, canye pueblo Efraín ca uabáinoye. Y chentše chabe uatsjëndayëngaftaca tojtsanoquedañe.

<sup>55</sup> Judiëngbe Bashco fiestama batšá yojtsájamna, y ba entšanga pueblënguëntšana Jerusalenoyë imojtsajna, soyënga choca jamama ntšamo tempo inamncá, chca, Bëngbe Bëtsabe bominyáma tšábënga jtsemnama, chë Bashco fiesta cabá ndobuache ora.

<sup>56</sup> Chocna, judiënga Jesús imojtsenguaye, y Bëngbe Bëtsabe bëts yebnentşe imojtsentjanaye: “¿Ntşamo şmojtsejuabná, cha tayochjabo o ndoñe quem fiestama ca?”

<sup>57</sup> Chë fariseunga y chë bachnangbe amëndayënga tmojanmandá, nderado nda Jesús ndayentşe tojtsemnama tojtsetatşëmbësna, chaobuambá ca, as Jesús jishachama.

## 12

*María, botamana uanguëtsiye Jesúsbeñe tbojanáshecbueşcja*  
(Mt 26.6-13; Mc 14.3-9)

<sup>1</sup> Chnënguana te chë Bashco fiestama yojtşájamna ora, Jesús Betania puebloye tojtaná. Lázaro, chë Jesús tbojtanayená cha, choca inoyena.

<sup>2</sup> Chentşna bëts saná Jesusbiamama tmojanábua. Marta tojanëjuatşé, y Lázaro yojtsemna chë Jesúseftaca juasama mesëshañe imojtsetbiámanënguëntşe.

<sup>3</sup> As María canye jarrëtema tojanaca; chiñe yojanaftsuamna canye botamana uanguëtsiye, bëtsca uámaniye, ena nárdoca pormániye. Chë uanguëtsiye, María, Jesusbe shecuatşënguiñe tbojanáshecbueşcja, y cachabe stjënashaca tbojtanshechojó. Chora, chë yebnentşe ena nardiyana yojtşonguëtsiye.

<sup>4</sup> Chora, canya Jesusbe uatsjendayënguëntşá, Judas Iscariote, chë Jesús uayayëngbe cucuatşine yochjanayentşbashejuaná, tojánayana:

<sup>5</sup> —Quem botamana uanguëtsiye unga patse denario crocénana enduámama. ¿Ndáyeca ndoñe şmonjuiye y ndbomnjëmënga chë crocénana maşmëntsatsatá ca?

<sup>6</sup> Pero Judas chca tojánayana, chë ndbomnjëmëngbeñe ntsejuabnaycá, sinó cha atbëbaná inamna causa. Judas chëngbe crocénana shecnëşine yojánatbëna, y ba soye, chë shecnëşoye imojanatsuáma crocénánentşana cha yojánatbëbana.

<sup>7</sup> As Jesús tbojanjuá: —Cachcá monyá. María mëntscoñe chë botamana uanguëtsiye iuabofjájona, cha jobenayama átşbeñe jabuéşcjama, er ndoñe bën y atşe şmochanjaitëme.

<sup>8</sup> Chë ndbomnjëmëngna tşëngaftangbeñe sempre mochanjesomñe, pero atşe ndoñe ca —tojánayana.

*Judiënga tmojanenoyeuná Lázaro jóbama*

<sup>9</sup> Ba judiënga tmojántatşëmbona Jesús Betanioca yojtsemnama, y choye tmojána, ndoñe nyë Jesús jinýama, sinó Lázarnaca, chë Jesús tbojtanayená cha.

<sup>10</sup> As chë bachnangbe amëndayënga tmojanenoyeuná Lázarnaca jóbama.

<sup>11</sup> Chabe causa, ba judiënga chëngbioye cachcá tmojesanënyä y Jesúsbeñe imojtsoşbuaché.

*Jesús Jerusalenoye tojánashjango*

(Mt 21.1-11; Mc 11.1-11; Lc 19.28-40)

<sup>12</sup> Chë yëfsana, mallajta entşanga, Jerusalenoca fiestama tmojánashjajnënga, tmojántatşëmbona Jesús choye yochjánashjanguama.

<sup>13</sup> As chëngna palma betiye buacuafjënga tmojanatëtsetşe, y Jesús jajëbenguama tmojánbocana, y mëntşá imojtsáyebuache: “¡Bëngbe Bëtsá matschuanga! ¡Corente bendición bomná chë Bëngbe Utabnabe obenánaca tojabá! ¡Corente bendición bomná chë Israeloquëngbe Rey ca!”

<sup>14</sup> Jesús canye burrotema tbojáninýena y chábeñe tojanenoyayé. Ntşamo Bëngbe Bëtsabe uabemana palabrenguiñe iuayancá, cachcá tojanopasá. Chiñe mëntşá endayana Jerusalenoca entşangbiamama:

<sup>15</sup> Sión bëts puebloca oyenënga, ndoñe matauatjëngana.

Minýënga, tşëngaftangbe Rey burrotëmiñe enjaquená entsabó ca.

<sup>16</sup> Chca orna, Jesusbe uatsjëndayënga chë soyëngama ndoñe tonjanësertá; pero chentşana, Jesús corente bëtsá yomnama Bëngbe Bëtsá tojaninýanyé ora, chë uatsjëndayënga chama



tmojanenujuabó, lempe ntšamo Bëngbe Bëtsabe uabemana palabrenguiñe iuayancá y cachcá Jesúseftaca tojanopasama.

<sup>17</sup> Chë Jesúseftaca imojtsemna entsanga, Lázarbioye uatbontsánoye tbojanchembo ora y chentsana tbojtanayená ora, ntšamo tmojáninýama chora imojtsecuéntaye.

<sup>18</sup> Chíyeca, ba entsanga tmojánbocana Jesús jajébenguama, chë bëts soye Bëngbe Bëtsabe obenánaca cha tojanmama tmojanuénayeca.

<sup>19</sup> Pero chë fariseunga imojtsenatsëtsnaye: “Tšëngaftanga šmontsonýá bënga tondaye jamama quemuátobenama y más, inýetscanga cha montsëstona ca!”

### *Básefta Grecia luaroca entsanga Jesús tmojánanguango*

<sup>20</sup> Bashco fiestama, chë Bëngbe Bëtsá jadórama Jerusalenoye tmojánangbeñe, básefta griego entsángnaca imojtsemna.

<sup>21</sup> Chëngna, Felipe chë Galilea luarocá, chë Betsaida pueblócábioye, tmojanobeconá y tmojanimpadá: “Señor, bënga fsëntseboše Jesús jinýama ca.”

<sup>22</sup> Chora Felipe tojána Andrés jauyanama, y chë útatna Jesúsbioye tbojána, chë grieguëngbiana jauenayama.

<sup>23</sup> Jesús chata tojanéyana: “Chë Bëngbe Bëtsá Entšá tbojanbemá corente bëtsá yomnama jinýanýiyama te ya tocjobuache.

<sup>24</sup> Ndegombre šcuayana: Canýe trigo jénaye ndoñe fshantsiñe tmonjuatbontsá y ndoñe tonjóbanëse, nýe cach canýe trigo jénaye jesomñana. Pero tmojuatbontsá y tojóbanase, bëtscá jashájonana.

<sup>25</sup> Cachcá, nda nýe cachá tojtsenóbobonshana, cha chabe vida echanjëftsobuetše. Pero nda nýe cachá ndoñe tontsenóbobonshana y ntšamo atše stsemandacá, quem luariñe vida tojtsebomnëntscuana cha tojtsamëse, chë nýetsca tescama yomna tšabe vida echántsebomna.

<sup>26</sup> Nda ntšamo stsemandacá jamama tojtseboše, atše chašotsëstona. Chca, ndayentše atše chaitsemna, chánaca, chë atše oservená, chentše chaotsemna. Atše šojtseservénabiana, atšbe Taitá Bëngbe Bëtsá echanjínýanýiye bëtsá yomnama ca” —Jesús tojánayana.

### *Jesús tojánayana cha yochjanóbanama*

<sup>27</sup> Y más Jesús tojánayana: “¡Mora tša cochtsetšenaná sëntsemna! ¿Atše chjayana: ‘Taita, chë átseftaca echanjopása soyënga šmotsebojuaná ca?’ Ndoñe; er más chama atše quem luaroye tijabo.

<sup>28</sup> Taita, šminýanýé aca puerta bëtsá y obená comnama ca.”

Y cachora, celocana canýe oyebuambnayana tojanóbocna mëntsá: “Ya tcbonjinýanýé atše puerta bëtsá y obená tsmënama, y mora cachiñe cachcá chanjama ca.”

<sup>29</sup> Entsanga chca tmojanuena ora, inýenga imojtsichamo nýe tojanjuésase ca; pero inýengna imojtsichamo: —Canýe ángel chábioye tbonjuatsëtsá ca.

<sup>30</sup> Chora Jesús tojanéyana: —Ntšamo šmonjouencá, atšbiana ndoñe quenátsmëna, sinó tšëngaftangbiana.

<sup>31</sup> Mora chë tempo entsemna, chë quem luare entsanga tmojëftsema bacna soyënga jinýanýiyama y chëngbe castiguama jayanama. Y mora, chë nýetsca bacna soyënga mandayá, quem luarentšana mochantábocna.

<sup>32</sup> Pero atše fshantSOCANA atsbananá chaitsemna ora, nýetsca entsanga átšbioye chanjúbuaja ca —Jesús tojánayana.

<sup>33</sup> Chca cha yojtsichamo, ana jinýanýiyama ntšamo jóbana ibojamnama.

<sup>34</sup> Chora chë entsanga tmojanjuá: —Bëngbe Bëtsabe uabemana palabrenguiñe endayana, y chíyeca bënga fsëndétatsëmbo chë Cristo nýetsca tescama vida yochtsebomna ca. As, ¿ndáyeca cojtsichamo, Bëngbe Bëtsá Entšá tbojanbemá chamuatsbanama yojtsemna ca? ¿Nda yojtsemna Bëngbe Bëtsá Entšá tbojanbemá ca? —chënga imojtsichamo.

<sup>35</sup> Y Jesús tojanéyana: —Nýe baseftatescama chë entsangbe juabnënga binýnaya tšëngaftangbeñe entsemna. Chë binýnaya cabá tšëngaftangbeñe yojtsemnëntscuana, cháftaca šmochtsajna. Chca, mo ibetiñcá ndoñe quešmochátajna. Nda ndoñe binýniñe tojtsana, cha ndoñe ntsetatšëmbuana ndëmuajana yojtsana.

<sup>36</sup> Chë binýnaya cabá tšëngaftangftaca endëtsemnëntscuana, chábeñe šmochtsošbuáchiye; as, tšëngaftangbe juabnënga binýniñe echántsemna ca —Jesús tojánayana.

Chë soyënga tojánayanentšana, Jesús tojtsanoñe y entsangbiama yojetsóitana.

*Ndáyeca chë judiënga Jesúsbeñe ndoñe montsanošbuaché*

<sup>37</sup> Masque Jesús, judiëngbe delante ba bëts soyënga Bëngbe Bëtsabe obenánaca tojëftsema, chënga ndoñe chábeñe ntsošbuáchiyana,

<sup>38</sup> ntšamo Bëngbe Bëtsabe juabna oyebuambnaya Isaías tojanabemcá, cachcá chaotsemnama. Isaías mëntšá tojánayana:

Bëngbe Utabná, ¿nda bëngbe buayenana soyiñe yojtsošbuaché?

Y ¿nda tbojosertá, acbe obenana tcojinýinýe ora ca?

<sup>39</sup> Chíyeca chënga ndoñe montsobena Jesúsbeñe jtsošbuáchiyama, er Isaías mëntšánaca tojëftsanabema:

<sup>40</sup> Bëngbe Bëtsá tojama chënga chabe soyëngama ndoñe botamana chamondëtsejuabnama y chabe soyënga ainaniñe ndoñe chamondóyëngacñama, as ndoñe chaondëtsësertánama ca.

Y Bëngbe Bëtsá entsichamo: “Chca entsemna, chënga atšbe benache ndoñe chamondishachama,

y atše ndoñe ntjätsebacama;

y chca, chënga mochántsemna mo ndëshnana entsangcá ca.”

<sup>41</sup> Isaías chca tojánayana, er tojáninýe Jesús puerte bëtsá y obená yojamnama, y chca chë uabemaniñe Jesusbiama yojanoyebuambná.

<sup>42</sup> Pero masque chca iuábemanëse, ba judiënga imojtsanošbuaché, y banga judiëngbe amëndayëgnaca Jesúsbeñe imojtsanošbuaché. Pero chëngna, Jesúsbeñe imojtsošbuáchema entsángbeñe ndoñe montsichamo. Chca imojánama chë fariseungbiama auatja causa, chë judiëngbe enefjuana yebnënguentsana ndoñe chamondëtëbuacnama.

<sup>43</sup> Chëngbiama más yojanámana, entsanga chëngbiama chamotsichamo tša uámanënga imojamna ca, y ndoñe, Bëngbe Bëtsá chca chaotsamama.

*Jesusbe palabrëngaca yochtsótatšëmbo entsanga tšabá o ndoñe tšabá tmonjamama*

<sup>44</sup> Chora Jesús mëntšá jabuache tojánayana: “Nda átšbeñe tojtsošbuaché, ndoñe nýe átšbeñe ntsošbuáchiyana; chë nda šojichmó chábeñnaca cha jtsošbuáchiyana.

<sup>45</sup> Cachca, nda atše šojtsonýá, chë šojichmó chábioynaca cha jtsonýayana.

<sup>46</sup> Atše quem luaroye tijabo entsangbe juabnënga jacobínýnama, chca, nda átšbeñe tojtsošbuaché, mo ibetiñcá ndoñe chaondëtsemnama.

<sup>47</sup> Pero nda atšbe soyëngama tojouena, pero ntšamo sëntsichamcá ndoñe tontsama, atše chabiama ndocá quichátayana tšabá o ndoñe tšabá tonjama ca. Atše ndoñe chiyátabo, ntšamo quem luarentša entsanga tmojamama tšabá o ndoñe tšabá yontsemna ca jatichámuama; quem luaroye sënjabo ndayá chënga jabátsebacama.

<sup>48</sup> Nda atše šojtsaboté y atšbe palabrëngama ndoñe šonjoyeuná, ya entsebmna nda chabiama yochjayana bëts castigo jtsebmnama ibojtsemna ca. Atše tijanoyebuambá palabrëngaca, quem luare jopochócama te chabiama chca echántsayana.

<sup>49</sup> Er atše ndoñe nýe atšbe juábna quetsatoyebuambná. Chë Taitá, chë šonjichmó cha, šonjamandá ntšamo jayanana y ndayá jabuátambana.

<sup>50</sup> Atše sëndétatšëmbo, atšbe Taitá tojamandá orna, cha jamándana entšanga chë nyetsca tescama yomna tšabe vida chamotsebomnama. Chíyeca, ndayá sentsichamcá, endmëna ntšamo atšbe Taitá Bëngbe Bëtsá šojamandacá ca” —Jesús tojánayana.

## 13

### *Jesús chabe uatsjéndayënga tojanashecjabebé*

<sup>1</sup> Bashco fiesta cabá ndobuache ora, Jesús yojtsetátšëmbo chabe tempo tojanóshjanguama, quem luarentšana jëftsebocnama y chabe Taitábioye jtama. Ntšamo Jesús chábenga yojanababuanÿeshancá, chë quem luare imojamnënga, chórna yojtseboše chë bëts bonshánana puerte más jinÿanÿiyana.

<sup>2</sup> Pero Satanás, Júdasbe ainaniñe bacna juabnënga tojanjajó, uayayëngbe cucuatšinë Jesús jayentšbáshejuanama. Judas Iscariote, Simonbe uaqiñá.

<sup>3</sup> Jesús yojtsetátšëmbo chabe Taitá Bëngbe Bëtsá nyets obenana tbojánatšetama. Cachcá, Jesús yojtsetátšëmbo, Bëngbe Bëtsábíocana cha tojánabama y cachábioye jtama ibojtsemnama.

<sup>4</sup> Chcasna, chë ibeta jasama tmojanpochocá ora, mesëshentšana tojantsbaná, chabe juatsboye uichëtjoníya tojanenátsejca y canÿe tuallëjua tojanenasná.

<sup>5</sup> Chentšana, canÿe bachešinë búyeshe tojanbuešcja y tojanontsé chabe uatsjéndayënga jushecjabebiyana y jtëshechojuana cha yojtsasnana tuallëjuaca.

<sup>6</sup> Pero, Simón Pedro tbojanobuache ora, Jesúsbioye tbojaníyana: —Atšbe Utabná, ¿aca šcochjuashecjabiá ca?

<sup>7</sup> Chora Jesús tbojanjuá: —Atše sentsama soye mora ndoñe quecmátësertana; pero más chcoye aíñe cmochanjósérta ca.

<sup>8</sup> As Pedro tbojaníyana: —¡Ndocna te šcatjuashecjabiá ca!

Pero Jesús tbojaníyana: —Ndoñe chacbonjuáshecjabese, atšbia ndoñe quecochátsmëna ca.

<sup>9</sup> Y Simón Pedro tbojaníyana: —¡Atšbe Utabná, as nÿe atšbe shecuatšënga ndoñe, ndayá atšbe cucuatšënga y bestšášnaca ca!

<sup>10</sup> Pero Jesús tbojanjuá: —Nda bebená tojtsemna, nÿe shecuatše jtsashecjabíama jtsajabótana, ndoñe nyetšá cachiñe. Nda tojtsobebé, ndoñe tsengá ntsemnana. Cachcá, mo bebënga cuenta tšëngaftanga šmontsemna; pero canÿa muentše entsemna, y cha mo bebenacá ndoñe quenátsmëna.

<sup>11</sup> Jesús yojtsetátšëmbo nda chë uayayëngbe cucuatšinë boshjuaná yochtsanmënama, chíyeca tojánayana: “Tšëngaftanguentšá canÿa entsemna, cha mo bebenacá ndoñe quenátsmëna ca”.

<sup>12</sup> Jushecjabebiyama tojanpochocá ora, chabe juatsboye uichëtjoníya tojtaníchëtjo, y mesëshentše tojtanótbema. Chora tojanéyana: —¿Chë tcbonjábíama soyama quecmo-jtsësertana ca?

<sup>13</sup> Tšëngaftanga atše šmondbauyana Buatëmbayá y Bëngbe Utabná ca; tšabá chca šmontsichamo, er atše ndegombre chca sëndmëna.

<sup>14</sup> Atše, tšëngaftangbe Buatëmbayá y Utabná, tcbonjushecjabebé; chcasna, tšëngaftángnaca cmontsamna jenáshecjabebiyana.

<sup>15</sup> Ntšamo quem sóyeca tcbonjanÿanÿecá, tšëngaftanga cachcá šmochtsama.

<sup>16</sup> Ndegombre šcuayana, chë oservená chabe nduiñbíama ndoñe más uamaná ntsemnana. Cachcá, chë ichmoná chë tbojichmobíama ndoñe más uamaná quenátsmëna.

<sup>17</sup> Quem soyënga chašmojuatsjinÿe y chca chašmojamëse, tšëngaftanga puerte oyejuayënga vida šmochanjëftsebomna.

<sup>18</sup> “Atše sëndétatšëmbo chë tijábacangbíama, chíyeca atše nyetscangbíama ndoñe chca quetsatoyebuambná. Y ntšamo Bëngbe Bëtsabe uabemana palabrengüñe endayancá

cachcá chaotsemnama, chë ‘canÿa átseftaca tandëse tonjasá, atšbe contra echántsemna ca’, cachcá echanjopása.

<sup>19</sup> Mora, cabá ndoñe chca tonjopasá ora, lempe chë soyënga sentsichamo. As, chca chaojopasá ora, átšbeñe šmochantsošbuáchiye, y as šmochántsetatšëmbo atše tsmëna chë nda sëndmëná.

<sup>20</sup> Ndegombre šcuayana: Nda atše tijichmóbioye tbojofja, cha atše šochanjofja; y nda atše šojofja, cha chë nda šojichmóbioye bochanjofja ca” —Jesús tojánayana.

*Jesús tojánayana uayayëngbe cucuatšinë Judas bochjáboshjonama  
(Mt 26.20-25; Mc 14.17-21; Lc 22.21-23)*

<sup>21</sup> Chë soyënga tojánayanentsana, Jesús corente cochtsetšenaná yojtsemna, y tojánayana: —Ndegombre šcuayana, canÿa tšëngaftanguentsá uayayëngbe cucuatšinë šochanjáboshjona ca.

<sup>22</sup> Chora, chabe uatsjëndayënga tmojanontšë enonÿinÿayana, y ndoñe montsetátšëmbo ndabiana Jesús chca tojánayanama.

<sup>23</sup> Canÿe uatsjendayá, chë Jesús puerte ibnabobonshaná, Jesusbe juachaca inatbemana.

<sup>24</sup> As, Simón Pedro chábioye tbojánefjatšëmbo, ndabiana Jesús chca tojánayanama Jesúsbioye chabotjama.

<sup>25</sup> Chë puerte bonshana uatsjendayá, Jesúsbioye batšatema más tojanosjoná y tbojanjá: —Bëngbe Utabná, ¿nda cha yojtsemna ca?

<sup>26</sup> Chora Jesús tbojanjuá: —Atše canÿe base tandëtema chanjafchécuacuaye y ndábioye chajoyé, cha entsemna ca.

As Jesús canÿe base tandëtema tojanfchecuacuá, y Judas, Simón Iscariotbe uaqiñábioye, tbojanoyé.

<sup>27</sup> Tandëse tojanóyëngacñe y cach ora, Satanás Júdasbe ainaniñe bacna juabnënga tbojáncochëngo. As Jesús tbojaniana: “Chë cochanjama soye, cam ora moma ca.”

<sup>28</sup> Pero ni canÿa chë jasama imojtsetbiamanënguentsá tbojanësertá, ndayama Júdasbioye chca tbojanianama.

<sup>29</sup> Judas inamna chëngbe crocénana shecnëšinë uambayá; chíyeca ínÿenga tmojanjuabó Jesús chca ibojtsatsaye, ana ndayá yojtseita soye chë fiestama chauabuámiyama, o ndbomnjémënga ndayánaca chauatšatama ca.

<sup>30</sup> Júdasna chë base tandëtema tojanóyëngacñe, y cachora chentšana tojëftsanbocna. Chora ya ibeta yojtsemna.

### *Chë tsëm mando*

<sup>31</sup> Judas tojëftsanbocnentsana, Jesús tojánayana: —Ora tocjobuache, Bëngbe Bëtsá Entšá tbojanbemá corente bëtsá y obená yomnama jinÿanÿiyama; y mua echanjínÿanÿiye Bëngbe Bëtsá corente bëtsá y obená yomnama.

<sup>32</sup> Cha echanjínÿanÿiye Bëngbe Bëtsá chca yomnama, chíyeca Bëngbe Bëtsánaca echanjínÿanÿiye corente bëtsá y obená yomnama, y mora entsemna chë ndaye ora Bëngbe Bëtsá chca chabiana yochjínÿanÿiye.

<sup>33</sup> Atšbe básenga, baseftatescama tšëngaftangaftaca sëntsemna. Chora šmochántseguaye, pero ntšamo judiënga sënjauyancá, mora cachcá tšëngaftanga cbëyana: Chë chanjá luaroye, tšëngaftanga ndoñe quešmátobena jama ca.

<sup>34</sup> Canÿe tsëm soye cbetsamëndá: Nÿetscanga šmochtsenbobonshana. Ntšamo atše tšëngaftanga chondábabuanÿeshana, cachcá tšëngaftanga šmochtsenbobonshana.

<sup>35</sup> Tšëngaftanga šmojtsenbobonshánëse, nÿetsca entsanga mochántsetatšëmbo, tšëngaftanga atšbe uatsjëndayënga šmomnama ca —Jesús tojanéyana.

*Jesús tojánayana, chábioye ndoñe bonjanabuátma ca Pedro yochjánayanama  
(Mt 26.31-35; Mc 14.27-31; Lc 22.31-34)*

<sup>36</sup> Chora Simón Pedro tbonjantjá: —Bëngbe Utabná, ¿ndémoye cochjá ca?

As Jesús tbojanjuá: —Atše sentsá luaroye, mora aca ndoñe quecátobena atše juastana, pero más chcoye aíñe šcochanjuasto ca.

<sup>37</sup> As Pedro tbojaniyana: —Atšbe Utabná, ¿ndáyeca ndoñe sentsobena mora aca juastama? ¡Atše sëntseprontana acbiama jóbanama ca!

<sup>38</sup> Chora Jesús tbojaniyana: —¿Ndegombre cojtseprontana atšbiama jóbanama? Ndegombre cbëyana, cabá ngallo ndécánta ora, aca unga soye atšbiama cochanjayana: “Chandoñe quetsatabuatma ca”.

## 14

### *Jesús beyeca entsanga jobenayana Bëngbe Bëtsábioye jama*

<sup>1</sup> Mëntsánaca Jesús tojánayana: —Ndoñe ainana tsetšanënga matsmënana. Tšëngaftanga Bëngbe Bëtsábeñe šmondošbuaché; átšbeñnaca šmochtsošbuáchiye.

<sup>2</sup> Atšbe Taitá Bëngbe Bëtsá endmënoca, ba luarënga joyéanama endmëna. Ndoñe chca tontsemnëse, atše chca matchbënjáuyana. Morna, cha endmënoye atše chanjá tšëngaftangbiamá canye luare joyéanama jabuáprontama.

<sup>3</sup> Atše chajá y chë luare chachobabuaprontá ora, cachiñe moye chanjésabo, tšëngaftanga átšeftaca junatsama. As, atše chaitsemnoye, tšëngaftangnaca chašmotsá joyéanama.

<sup>4</sup> Atše chanjá choye ntšamo jama y jashjanguama ya šmontsetátšëmbo ca —Jesús tojánayana.

<sup>5</sup> Chora Tomás Jesúsbioye tbojaniyana: —Bëngbe Utabná, ndémoye cochjama ndoñe queftsátstatšëmbo. As, ¿ntšamo bënga fchtsetátšëmbo ntšamo choye jama ca?

<sup>6</sup> Chca tbojaniyana ora, Jesús tbojanjuá: —Atše sëndmëna benachcá; chëjana tcojtsase, pronto jashjanguana. Atše sëndmëna ntšamo ndegombre yomncá sempre oyebuambnáyá, y entsanga chë nyetsca tescama yomna tšabe vida chamotsebomnana endamá. Nye átšbeyeca endopodena ndayëjana jama, y atšbe Taitá Bëngbe Bëtsábioca jashjanguama.

<sup>7</sup> Tšëngaftanga atše šmojtsábuatmëse, atšbe Taitánaca šmattsábuatma. Morscana ya cha šmontsábuatma y cha šmontsonyá ca —tbojaniyana.

<sup>8</sup> Pero Felipe tbojaniyana: —Atšbe Utabná, nye chë Taitá šmanyanyé, ndayama más ca.

<sup>9</sup> Chora Jesús tbojaniyana: —Chëfta te tšëngaftangaftaca sëntsemna, y ¿cabá ndoñe atše šcontsábuatma, Felipe? Nda atše šojinye, chë Taitá Bëngbe Bëtsábioynaca jinýana. As, ¿ntšamo atše šcojtsatsá, chë Taitá šmanyanyé ca?

<sup>10</sup> ¿Ndoñe condošbuaché, atšbe Taitá átšbeñe y átšnaca chábeñe nye canyáca ftsmënana? Chë cbontsëtsësná soyënga, ndoñe nye atšbe juábnaca chca quetsatoyebuambná. Atšbe Taitá, chë átšbeñe vida endbomná jtsamana lempe ntšamo stsamcá.

<sup>11</sup> Muiñe šmochtsošbuáchiye: Atšbe Taitá átšbeñe endmëna, y átšnaca chábeñe mo nye canyáca sëndmëna. Chama ndoñe šmontsošbuachese, as nye chë tijama soyëngámnaca átšbeñe šmochtsošbuáchiye.

<sup>12</sup> Ndegombre šcuayana, nda átšbeñe tojtsošbuaché, ntšamo atše tijamcá y cachcá cha echántsama. Atšbe Taitá entsemnoye atše chanjá, chíyeca, chë átšbeñe ošbuachiyá, chama más bëts soyënga echanjama.

<sup>13</sup> Tšëngaftanga ndaye sóynaca Bëngbe Bëtsábioye šmojotjañe, y chca šmojama atše jótšëmbonëse, átšbeñe šmošbuachéyeca, lempe šmochanjóyëngacñe; chca, chë Uaquiñá echanjinyanýiye chë Taitá corente bëtsá y obená yomnana.

<sup>14</sup> Tšëngaftanga ndaye sóynaca atše šmojotjañe, y chca šmojama atše jótšëmbonëse, átšbeñe šmošbuachéyeca, atše chë soye chanjama ca —Jesús tojánayana.

### *Jesús tojanašebuachená chë Uámana Espíritu jíchmuama*

15 Měntsánaca Jesús tojánayana: “Tšəngaftanga atše šmojtsebobonsháněse, ntšamo cbontsaměndacá cachcá šmochanjama.

16 Chca chašmojaměse, atšbe Taitá Běngbe Bětsá tšəngaftangbiamā chanjaimpáda, tšəngaftanga jabújabuachama y jabáñemuayama inya cha chabuichmoma, chě Uajabuachaná nýetsca tescama tšəngaftangaftaca chauétsemnama.

17 Cha, chě Uámana Espíritu endmēna chě nýetsca soyěnguiñe ntšamo ndegombre yomncá oyebuambnayá. Chě nýe quem luarama enójuabnaye entšanga, chě átšbeñe ndošbuáchiyěnga ndoñe quematonýá, ni quematábuatma. Chiyeca chěnga ndoñe quemátobena cha jóyěngacñana. Pero tšəngaftanga aíně cha šmontsábuatma. Cha tšəngaftangaftaca entsemna, y tšəngaftangbe ainaniñe sempre echanjěftsiyena.

18 “Atše ndoñe quebocháisabashejuana, mo uajchonga cuenta chašmotsemnama. Tšəngaftangbioye chanjésabo.

19 Muentšana baseftaytese, chě nýe quem luarama enójuabnaye entšanga ndoñe más quešmochátónýaye; pero tšəngaftangna aíně, atše cachiñe šmochántinýe. Atše ainá chántsemna, chiyeca tšəngaftanga átšeftaca tšabe vida šmochántsebomna.

20 Chě Uámana Espíritu tšəngaftangbe ainaniñe chašmojóyěngacñe ora, tšəngaftanga šmochántsetatšěmbo, atše atšbe Taitábeñe nýe canýacá tsměnama; cachcá, tšəngaftanga šmochántsetatšěmbo, tšəngaftanga átšeftaca cachcá nýe canýacá šmomnama y átšnaca tšəngaftangaftaca.

21 Nda totátšěmbo ntšamo atše tijamandacá y siempre chca tojtsama, cha ndegombre šojtsebobonshana. Nda átšbioye šojtsebobonshana, chábioye atšbe Taitánaca bochántsebobonshana. Atšnaca cha chántsebobonshana, y nda atše tsměnama cha chanjinýinýiye ca” —Jesús tojánayana.

22 Chora, inýe Judas, ndoñe Judas chě Iscariote, Jesúsbioye tbojanियana: —Běngbe Utabná, ¿ntšamo chca yojtsemna, nýe běnga šcochjínýanýiye ntšamo cach aca comnama, y nýetsca quem luarentšěngbioye ndoñe ca?

23 Chora Jesús tbojanjuá: —Nda atše šojtsebobonshana, ntšamo atše sěntsoyebuambnacá echanjama. Atšbe Taitánaca chábioye bochántsebobonshana, y běndata chábioye fchanjabo y chábeñe vida fchantsebomna.

24 Nda ndoñe šontsebobonshana, ndoñe queochátama ntšamo sěntsoyebuambnacá. Ntšamo sěntsoyebuambnacá ndoñe nýe atšbe juábnaca quenátsměna, sinó chě Taitá, chě šonjichmó chabe juábnaca.

25 “Atše cabá tšəngaftangaftaca sěntsemněntscuana, lempe quem soyěngama sěntsoyebuambná.

26 Chě Uajabuachaná, chě Uámana Espíritu, atšbe impadanánaca atšbe Taitá bochanjíchmua. Cha lempe cmochántsabuatambaye, y echanjama nýetsca chě tcbonjúuyana soyěngama chašmuatenójuaboma.

27 “Chě atšbe ainaniñe puerte tšabe ebionana tšəngaftangbiamā šcuétseboshjona, cbetsatšatá. Chě nýe quem luarama enójuabnaye entšanga cmondbėtsatšatnaye soyěngcá ndoñe quenátsměna, chě atše cbontsatšatná ainaniñe puerte tšabe ebionana. Ainana tsetšaněnga ndoñe matsměnana, ni matauatjěngana.

28 Ya šmonjouena ntšamo tcbonjúuyancá: ‘chanjá y tšəngaftangbioye chanjésabo’. Tšəngaftanga atše šmojtsebobonsháněse, šmattsóyejuaye atše chě Taitábioye jama šojtsemnama, er chě Taitá atšbiamā más bětsá endmēna.

29 Quem soyěnga tcbonjúuyana, cabá ndoñe chca tonjopasá ora; as, chca chaojopasá ora, chiñe jenójuaboyěse átšbeñe chašmotsošbuáchema.

30 “Chě quem luarentša bacna soyěnga mandayá endabó; chiyeca atše ya ndoñe bėtscá tšəngaftangaftaca quichaisóyebuambaye. Pero cha tondaye quenátobena atše jabórlana.

<sup>31</sup> Masque cha chca endmëna, chca entsemna, atše chë Taitábioye tsbobonshánama quem luarentša entsanga chamotsetatšëmbuama. Ntšamo atšbe Taitá šojamandacá, atše cachcá tsámama chamotsetatšëmbuama.

“Motsbananga. Muentšana cuajna ca” —Jesús tojanéyana.

## 15

### *Jesús yomna mo chë tšabe uvas betiyká*

<sup>1</sup> Mëntšánaca Jesús tojánayana: “Atše sëndmëna mo chë tšabe uvas betiyká, y atšbe Taitá Bëngbe Bëtsá chë tšabe uvas betiye inýenacá.

<sup>2</sup> Chë inýená, chë uvas betiyentša buacuafjënga ndëshajuanëfjënga jtsebuácuetëtsetšana; pero chë uvas betiyentša buacuafjënga shajuanëfjënga jtsobolímpiana, bëtská chaotse-shájuanama. Nda ndoñe tontsama ntšamo Bëngbe Bëtsá tojtsebošcá, jtsemnana mo chë ndëshajuana buacuafjëngcá; y chë causa, chë Taitá chábioye corente bochantsecastíga.

<sup>3</sup> Tšëngaftanga šmonjouena ntšamo tijayancá; bëtská chca šmontsama. Chíyeca mora tšëngaftanga šmontsemna mo chë limpiana y shajuana buacuafjëngcá.

<sup>4</sup> Atšeftaca cánýiñe mo canýacá šmochtsemna y atše tšëngaftangaftácnaca. Chë buacuafja uvas betiyentšana juanánëfja ndoñe ntsoberenana nýe cachabe ponto jashájonana. Cachcá, tšëngaftanga átšeftaca ndoñe cánýiñe mo canýacá šmontsemnëse, ndoñe šmattsobena Bëngbe Bëtsabiana bëtská soyënga jamama.

<sup>5</sup> “Atše chë tšabe uvas betiyká sëndmëna y tšëngaftanga chë buacuafjëngcá. Nda átšeftaca cánýiñe mo canýacá tojtsemna y atše cháftacnaca, cha Bëngbe Bëtsabiana bëtská soyënga echanjama, mo canýe buacuafja becá tojtseshajuancá. Er, tšëngaftanga atšbe uajabuáchenana ndoñe šmontsebomnëse, átšeftaca cánýiñe mo canýacá ndoñe šmontsemna causa, tondaye šmattsobena jamama.

<sup>6</sup> Canýa átšeftaca cánýiñe mo canýacá ndoñe tontsemnëse, cha jtsemnana mo canýe buacuetëtšena buacuafja, utšenëfja y buashánëfjácá. Chca buacuafjënga, entsanga jtsatbanana, íñeshoye jtsëtšenana y chentše jtsejuinýiyana. Cachcá, nda ndoñe átšeftaca cánýiñe mo canýacá tontsemna, ndoservená jtsemnana y luaroca cha mochantsesegóra.

<sup>7</sup> “Tšëngaftanga átšeftaca cánýiñe mo canýacá šmojtsemna y ntšamo atše tijayancá šmojtsamëse, lempe ntšamo šmojtsebošcá šmochjotjañe, y lempe šmochanjóyëngacñe.

<sup>8</sup> Chë shajuana buacuafjëngcá tšëngaftanga chašmojtsemna ora, šmochanjínýanýiye atšbe Taitá corente bëtsá y obená yomnama. Y chca, tšëngaftanga atšbe ndegombre uatsjéndayënga šmochántsemna.

<sup>9</sup> Ntšamo chë Taitá šondbobonshancá, átšnaca cachcá tšëngaftanga cbondábabuanýeshana. Chíyeca, šmochtsiyena atšbe bonshánama jtsejuabnayëse.

<sup>10</sup> Atše sëndama ntšamo atšbe Taitá šondëmandacá. Chíyeca atše sëndoyena chabe bonshánama jtsejuabnayëse. Cachcá tšëngaftángnaca, ntšamo atše cbontsamëndacá šmojtsamëse, atšbe bonshánama jtsejuabnayëse šmochantsiyena.

<sup>11</sup> “Atše chca cbontsëtsëtsná, chë atše sëntsebomna oyejuayana tšëngaftángnaca chašmotsebomnama, y tšëngaftanga puerte chašmotsóyejuama.

<sup>12</sup> Mëntšá cbetsamëndá: Ntšamo atše cbondababuanýeshancá, cachcá šmochtsenbobonshana.

<sup>13</sup> Chë chabe amiguëngbiana tojóbanabiana, ndocna quenátobena chabiana más bonshánana jtsebomnana.

<sup>14</sup> Ntšamo atše tijamandacá tšëngaftanga šmojtsamëse, atšbe amiguënga šmochántsemna.

<sup>15</sup> Chë oservená ndoñe ntsetatšëmbuana ndayá chabe nduiño tojtsamama. Chíyeca atše tšëngaftanga oservëngca ndoñe quechatëtsëtsná. Morscana mëntšá cbontsëtsëtsná: ‘Tšëngaftangna atšbe amiguënga šmontsemna ca’, er lempe ntšamo atšbe Taitábentšana tijuatsjinýcá, tšëngaftanga tcbonjinýané.

<sup>16</sup> Tšëngaftanga ndoñe atše chešmatábuayana, pero atše aíñe tšëngaftanga tcbonjabacacá y tcbonjubuáyana, Bëngbe Bëtsabe trabajo jamama; y chca, mo canye betiye sempre tojt-seshajuana y chë shajuana ndocna te tontsopochocacá, tšëngaftanga chašmotsemnana. Chca, lempe ntšamo atšbe Taitá šmojtjañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye.

<sup>17</sup> Mëntšá atše cbetsamëndá: Smochtsenbobonshana ca” —Jesús tojanëyana.

*Jesús y chabe entsanga, chë nÿe quem luarama enójuabnayëngbiama uaboyëñjanënga*

<sup>18</sup> Mëntšánaca Jesús tojánayana: “Pero chë nÿe quem luarama enójuabnaye entsanga tcmojtsëbuayëñjëse, šmochjenójuaboye, natsana chënga atše šmonjanáboyëñjama.

<sup>19</sup> Tšëngaftanga, chë nÿe quem luarama enójuabnaye entsanguentsana šmojtsemnëse, chënga cmattsababuánÿeshana cachëngbengbioycá. Pero tšëngaftanga ndoñe chë nÿe quem luarama enójuabnaye entsanguentsana quešmátsmëna, y atšna, chë quem luare oyenënguentšana tšëngaftanga tcbonjabacacá. Chíyeca chë nÿe quem luarama enójuabnaye entsanga tšëngaftanga cmontsëbuayëñja.

<sup>20</sup> Smochjenójuaboye ntšamo tcbonjáuyanama: ‘Chë oserverná chabe nduiñbiama ndoñe más uamaná quenátsmëna ca’. Chënga monjánama atše chaisufrima; tšëngaftángnaca chašmotsesufrínama mochántsama. Entšanga ntšamo atše tijayanentsana ntsachetšá tmojtsamcá, cachcá chënga mochántsama ntšamo tšëngaftanga chašmojtsëtsëtsná chentšana.

<sup>21</sup> Chë chacmojtsëbuayëñjënga, chë šojichmó cha ndoñe quematábuatma. Chíyeca chënga lempe chca cmochanjáborlaye, atšbe causa.

<sup>22</sup> “Atše ndoñe matijabo y chënga ndoñe matijáuyanëse, ndegombre ndoñe bacna soye mattsebmoma. Pero mora, chëngbe bacna soyëngama chënga ndoñe quemátobena jayanana, ‘¡Chca fsëñjama ntsetatšëmbcá ca!’

<sup>23</sup> Nda atše šojtsáboyëñja, atšbe Taitábioynaca jtsáboyëñjana.

<sup>24</sup> Atše chë bëts soyënga Bëngbe Bëtsabe obenánaca chëngbeñe ndoñe matijamëse, ndegombre chënga ndoñe bacna soyënga mattsebmoma. Pero mora, masque ntšamo sënjamcá tmonjinÿëse, chënga atše šmontsáboyëñja y atšbe Taitábioynaca.

<sup>25</sup> Chca chënga montsama, ntšamo chëngbe leyënguiñe enduabemancá cachcá chaopasama. Chiñe mëntšá endayana: ‘Nÿe tondayama chënga šmonjanáboyëñja ca.’

<sup>26</sup> “Atše, atšbe Taitábentšana chë Uajabuachaná y añemuayá tšëngaftangbioye chanjíchmuá. Cha chë Uámana Espíritu endmëna, chë nÿetsca soyënguiñe ntšamo ndegombre yomncá oyebuambnayá. Cha endmëna chë Taitábentšana ichmoná; y cha lempe atšbe tšabe soyënga cmochantsëtsëtsnaye.

<sup>27</sup> Chorscana, tšëngaftángnaca atšbiamá entsanga šmochantsëtsëtsnaye, er tšëngaftanga átšeftaca šmondëtsemna, entsanga jábuayenama atše sënjanbojatšë orscana ca” —Jesús tojánayana.

## 16

<sup>1</sup> Mëntšánaca Jesús tojánayana: “Atše quem soyënga cbontsëtsëtsná, tšëngaftanga átšbeñe ošbuáchiyana ndoñe chašmondájbanama, atšbe causa chašmojtsesufrina ora.

<sup>2</sup> Chëngna, chë judiëngbe enefjuana yebnënguentšana cmochantëbuacana. Chca tempo chaojobuache ora, chë tšëngaftanga chacmojtsëbáyënga mëntšá mochántsejuabnaye: ‘Bënga tšabá tmonjama ca. Ntšamo Bëngbe Bëtsá yojtsebošcá, cachcá bënga tmonjama ca.’

<sup>3</sup> Chënga, chë Taitá Bëngbe Bëtsá ndoñe quematábuatma, y átšbioye cach ndoñe. Chíyeca, chca cmochanjáborlaye.

<sup>4</sup> Atše chca tšëngaftanga cbontsëtsëtsná, ntšamo tcbonjáuyanama chašmuenójuaboma, chca tempo chaojobuache ora ca” —Jesús tojánayana.

*Ndayá chë Uámana Espíritu inétsama*



Mëntśánaca tojánayana: “Entśanga jábuayenama sēnjanbojatsé orscana, chē echanjopása soyēngama ndoñe quecbēnjatanētsētsná, er atše tšēngaftangaftaca sēnjētsemna.

<sup>5</sup> Pero morna, chē šojichmó cha yomnoye chantá; y tšēngaftanguentśá ndocná sochanjatjaye, ‘¿ndēmoye cojtsá ca?’

<sup>6</sup> Mora, tšēngaftangbe ainana ngmēnaca entsemna, atše chca tcbonjáuyana causa.

<sup>7</sup> Pero ndegombre šcuayana: Atše chanjá y chca tšēngaftangbe tšabiamá echántsemna. Atše ndoñe quetsjase, chē Uajabuachaná y añemuayá ndoñe tšēngaftangbioye queochátabo. Pero aínē chanjá, y chora cha tšēngaftangbioye chanjíchmuá.

<sup>8</sup> Cha chaojášhango ora, echanjama quem luarentśa entśanga corente chamotsetátśēmbo ndayá ndegombre yomna bacna soyēnga jtsamana, ndayá ndegombre yomna chē Bēngbe Bētsabe bominiñē tšabia jtsemnana, y ndayá yomna chē Bēngbe Bētsá entśangbiama jayanana tšabá o ndoñe tšabá tmonjamama.

<sup>9</sup> Entśanga átśbeñe ndoñe quematošbuaché. Chíyeca chē Uajabuachaná echanjama chēnga corente chamotsetátśēmbo ndayá ndegombre yomna chē bacna soyēnga jtsamana.

<sup>10</sup> Chē Taitábioye chanjá y atše ndoñe más quešmochátinje. Chíyeca chē Uajabuachaná echanjama chēnga corente chamotsetátśēmbo ndayá ndegombre yomna Bēngbe Bētsabe bominiñē tšabia jtsemnana.

<sup>11</sup> Quem luarentśa bacna soyēnga mándayabiamá Bēngbe Bētsá ya tonjayana, ntśamo cha tojamama ndoñe tšabá yontsemna ca y nyetsca tescama castiganá chaotsemna ca. Chíyeca chē Uajabuachaná echanjama entśanga corente chamotsetátśēmbo, ndayá ndegombre yomna chē Bēngbe Bētsá entśangbiama jayanana tšabá o ndoñe tšabá tmonjamama.

<sup>12</sup> “Atše cabá ba soyēnga sēntsebmoma tšēngaftanga jáuyanama. Masque chcasna, mora tšēngaftanga ndoñe quešmátobena chē soyēngama josértana.

<sup>13</sup> Pero chē Uámana Espíritu, chē nyetsca soyēnguiñe ntśamo ndegombre yomncá oyebuambnayá, chaojášhango ora, lempe ntśamo ndegombre yomncá cmochanjabuatambá. Cha ndoñe nye cachabe juábnaca queochátoyebuambnaye. Ntśamo chē Taitá chábioye tbojauyancá, tšēngaftanga cachcá cmochanjáuyana, y cha cmochanjábuayenaye ntśamo yochjopásama.

<sup>14</sup> Atśbe soyēnguentsána cha echanjójyēngacñe, y cach soyēngama cmochanjabuatambá. Chcase cha cmochanjínñanñiye atše bētsá y obená bētsemnana.

<sup>15</sup> Lempe ntśamo chē Taitá endbmncá, atśbe soyēngnaca endmēna. Chíyeca atše tcbonjáuyana, chē Uámana Espíritu atśbe soyēnguentsána yochjójyēngacñe y cach soyēngama cmochjabuatambá ca.”

<sup>16</sup> “Baseftayté y atše ndoñe más quešmochátinje. Inje baseftayté y cachiñe šmochantétinje ca” —Jesús tojanēyana.

*“Tšēngaftangbe ngmēnana, oyejuayana echanjóbema”*

<sup>17</sup> Chora Jesusbe básefta uatsjēndayēnga imojtsentjanaye: —¿Ntśamo yojtsentśáyana, chē “baseftayté y atše ndoñe más quešmochátinje, y inje baseftayté y cachiñe atše šmochantétinje, er atše chē Taitábioye chanjá ca”?

<sup>18</sup> ¿Ntśamo yojtsentśáyana, chē “baseftayté ca”? Ndoñe quemuátstatśēmbo ntśamo yojtsentśáyana ca —chēnga imojtsichamo.

<sup>19</sup> Jesús yojtsetátśēmbo chēnga chca jatjayama imojtsebošama, y tojanēyana: — Atše tcbonjáuyana: “Baseftayté y atše ya ndoñe más quešmochátinje, y inje baseftayté y cachiñe atše šmochantétinje ca.” ¿Chē soyēngama šmojtjentjaná ntśamo stsentśáyana?

<sup>20</sup> Ndegombre šcuayana: Tšēngaftanga šmochanjenóbošachna y puerte ngmēnēnga šmochántsemna, pero chē nye quem luarama enójuabnaye entśanga corente oyejuayēnga

mochántsemna. Masque tša ngménënga šmochántsemna, chentšana tšëngaftangbe ngménana, oyejuayana echanjóbema.

<sup>21</sup> Canye shembása tbojontšabuache šešona jónýnama ora, tša ngménaca cha jésemnana, puerte tbojtsetsetse causa. Chë šešona ya tojonýná ora, cha ndoñe ntsenójuabnayana chë tša ibuántsetsama. Canye šešona quem luaroye cháuashjanguama chë shembása tojámayeca, chora cha tšabá y oyejuayá jtsemnana.

<sup>22</sup> Ndegombre, tšëngaftángnaca cachcá, chora tša ngménaca šmochántsemna. Pero atše tšëngaftangbioye chaijésabo ora, atše šmochantétinýe y corente oyejuayënga šmochántsmëna. Y ndocná queochatobenaye chë oyejuayana jabuajuánana.

<sup>23</sup> “Chë te chaojóshjango ora, tšëngaftanga ndocá atše quešmochatstjaye. Ndegombre šcuayana, lempe ntšamo atšbe Taitá šmojtotañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye.

<sup>24</sup> Mëntscoñama, atšbe Taitá tondaye chešmatotjañe atše jótšëmbonëse. Cha motjañënga y šmochanjóyëngacñe, y chca, bëtscá oyejuayana šmochántsebmna ca” —Jesús tojanéyana.

### *Jesucristo, quem luarentše mandayábioye yëñjanayá*

<sup>25</sup> Mëntsánaca Jesús tojánayana: “Chë soyëngama lempe cuentëngaca tšëngaftanga tcbonjáuyana; pero tempo echanjobuache, chora atše ya ndoñe más cuentëngaca quebochátëtsësnaye; chë cuentna, puerte botamana lempe atšbe Taitabiana cbochanjáuyana.

<sup>26</sup> Chë tena, atše jótšëmbonëse, átšbeñe šmošbuachéyeca, atšbe Taitábioye šmochanjotjañe. Y atše cbéyana; chca, chë te ndoñe quešochatájaboto tšëngaftangbiama atšbe Taitá jatsimpadánana.

<sup>27</sup> Atše ndoñe quichatsimpadana, er cach Taitá tšëngaftanga cmondábabuanýeshana. Tšëngaftanga atše šmondobobonshánama, y Bëngbe Bëtsábíocana atše tijabama šmojtsošbuáchema, chë Taitá cmondábabuanýeshana.

<sup>28</sup> Atše chë Taitábíocana sënjabocna y quem luaroye sënjabo. Pero mora quem luare chanjëftseboshjona atšbe Taitábioye jtama ca” —Jesús tojánayana.

<sup>29</sup> Chora chabe uatsjëndayënga tmojanियana: —Mora ya ndoñe cuentëngaca quecatoyebuambná, chíyeca lempe paselo josértama bëngbiama entsemna.

<sup>30</sup> Mora fsëntsetatšëmbo aca nýetsca soyëngama cotatšëmbuama, y ndoñe quenátsiyta ndocná aca chacmátstjanama, er aca chëngbe juabnënga jtsabuatmana, chënga cabá aca ndëtjaye ora. Chíyeca bënga fsëntsošbuaché aca Bëngbe Bëtsábíocana tcojabama ca —chënga tmojanियana.

<sup>31</sup> As Jesús tojanéyana: —¿Mora chiñe šmojtsošbuaché ca?

<sup>32</sup> Ya tempo tocjobuache y cam ora entsemna, tšëngaftanga nýetsquénache šmochanjuáshana y atše nýe canya šmochanjéseboshjona. Pero atše ndoñe nýe canya quichátsmëna, chë Taitá átšeftaca entsëmnyayeca.

<sup>33</sup> Atše lempe quem soyënga cbontsëtsësná, tšëngaftangbe ainaniñe tšabe ebionana chašmotsebmnama, átšeftaca cánýiñe mo canýacá jtsemnëse. Quem luarentše šmochanjasufrina; pero añemo šmochtsebmna, atše ya chë quem luarentša mandayá sënjayëñjaná ca —Jesús tojánayana.

## 17

### *Jesús chabe uatsjëndayëngbiama Bëngbe Bëtsábíoye tbojanimpadá*

<sup>1</sup> Jesús chë soyënga tojánayanentšana, celoye tojanontješé y Bëngbe Bëtsábíoye tbojanियana: “Taita, atšbe te ya tocjobuache. Minýanjé, atše acbe Uaquiñá, corente bëtsá y obená bëtsemnama. As, atše acbe Uaquiñá, aca corente bëtsá y obená comnama chainýanjëma.

<sup>2</sup> Mora aca nyets obenana šconjatšetá nyetsca entsángbeñe, nyetscanga chë atšbiama tcojábacacanga chë nyetsca tescama yomna tšabe vida chamotsebomnama atše chaimama.

<sup>3</sup> Chë nyetsca tescama yomna tšabe vida jtsebomnana endmëna aca, chë nye canye y ndegombre Bëngbe Bëtsá jtsabuatmana, y atše Jesucristo, acbe ichmoná.

<sup>4</sup> “Lempe ntšamo šconjamandacá atše sënjapochocá, y chca quem luariñe sënjama aca corente bëtsá y obená comnama jinñanñiyama.

<sup>5</sup> Taita, quem luare cabá ndoñe quenjatsmëna ora, aca tconjaninñanyé atše corente bëtsá y obená ácaftaca bëtsemnama. Mora moma atše cachcá ácaftaca chaitsemnama.

<sup>6</sup> “Aca quem luarentša entsanguentsana quem boyabásenga tconjabacacá y atšbiama šconjinñinyé. Atše chënga sënjanñanyé ntšamo ndegombre aca comnama. Chënga acbe entsanga mondmëna; y acna, chë atšbiama chënga šconjinñinyá. Chënga acbe palabra tmonjouena y tšabá tmonjoyeuná.

<sup>7</sup> Chíyeca chënga mondëtatšëmbo, lempe ntšamo atše tsbomncá ácbentšana tijóyëngacñama.

<sup>8</sup> Atše chënga sënjáuyana ntšamo aca šcojauyancá, y chënga montsošbuaché chë atše sënjauyaniñe. Chíyeca, chënga ndegombre mondëtatšëmbo atše acbiocana tijabama, y montsošbuaché aca chë atše šcojichmó cha comnama.

<sup>9</sup> “Atše chëngbiana cbontseimpadana. Chë nye quem luarama enójuabnaye entsangbiana ndoñe quecbátsimpadana, pero aíñe chë atšbiama šcojinñinyiyëngbiana, er chënga acbe entsanga mondmëna.

<sup>10</sup> Lempe ntšamo atše tsbomncá, acbiámnaca endmëna; y cachcá, lempe ntšamo cobomncá, atšbiámnaca endmëna. Acbengbe vidëngaca aca tcojinñanyé atše corente bëtsá y obená bëtsemnama.

<sup>11</sup> “Atše ndoñe quem luarentše quešocháisetotona, pero chënga aíñe cabá camuentše mochanjëftsemna. Atše chantá ácaftaca jtsatsmënama. Uámana Taitá, chë atšbiama šconjinñinyiyënga acbe obenánaca cochtsanñena. Chca ntšamo bëndata mo canyacá bondmëna, chëngnaca cachcá chamotsemnama.

<sup>12</sup> Atše chëngaftaca sëntsemnëntscuana, chënga sëntsanñena, aca šconjatšetá obenánaca. Atše chënga sëndánñena, y ni canya queochátsmëna infiernoca pochocaná, nye chë infiernoca pochocaná jtsemnama ibomná chana aíñe, ntšamo acbe uabemana palabrënguñe endayancá, cachcá chaotsemnama.

<sup>13</sup> “Morna chë aca condmënoye chantá; pero atše cabá quem luariñe sëntsemnëntscuana chca chënga sëntsëtsëtsná, chca, chë atše sëntsebomna puerte bëtscá oyejuayana chëngnaca chamotsebomnama.

<sup>14</sup> Atše chënga sënjáuyana ntšamo aca šconjauyancá. Ntšamo atše ndoñe quetsátsmëna chë nye quem luarama enójuabnaye entsanguentsá, cachcá, chënga cach ndoñe quemátsmëna. Chíyeca, chë nye quem luarama enójuabnaye entsanga chënga montsëbuayënja.

<sup>15</sup> Atše ndoñe quecbátsimpadana, chënga quem luarentšana chacúbuacanama; pero aíñe, nyetsca bacna soyënguentsana chacuatsebacama.

<sup>16</sup> Ntšamo atše ndoñe quetsátsmëna chë nye quem luarama enójuabnaye entsanguentsá, cachcá, chënga cach ndoñe quemátsmëna.

<sup>17</sup> Cochjama chënga acbe entsanga chamuëtsemnama, y chca, nye acbiana vida chamotsebomna. Chca cochjama, ntšamo ndegombre yomncá chënga imoyenama. Ntšamo aca condbetsichamcá, ndegombre endmëna.

<sup>18</sup> Ntšamo aca quem luaroye šconjanichmocá, cachcá átšnaca chënga sëntsachamná, quem luare entsanga jábuayenama.

<sup>19</sup> Chëngbiana atše cachiñe mëntsá cbëyana: Atše nye acbiana sëndmëna. Y chca, chëngnaca, ntšamo acbiana ndegombre yomncá jtsóyebuambnayëse acbe entsanga

chamotsemna, y chca, nÿe acbiama vida chamuétsebomna, ntšamo ndegombre yomncá chënga imoyenama.

<sup>20</sup> “Pero nÿe chëngbiama ndoñe quecbátsimpadana, sinó chë átšbeñe mocht-sošbuáchiyëngbiamnaca, chë atšbiama šconjínÿinÿiyënga, chëngbioye atšbiama ínÿenga chamojtsabuayiyná ora;

<sup>21</sup> as chënga nÿetscanga cánÿiñe mo canÿacá chamotsemnana. Ntšamo aca, Taita, átšeftaca cánÿiñe mo canÿacá bondmëna y átšnaca ácaftaca, cachcá chëngnaca cánÿiñe mo canÿacá bëndátaftaca chamotsemnana cbontseimpadana. Y chca, quem luarentša nÿetsca entšanga, atše šcojichmoma chamotsošbuáchemá.

<sup>22</sup> Ntšamo chë obenana y uámanana šconjatšetacá, cachcá átšnaca chënga sënjatsatá. As, ntšamo bëndata cánÿiñe mo canÿacá bondmëna, chëngnaca cachcá cánÿiñe mo canÿacá chamotsemnana.

<sup>23</sup> Atše chëngbe ainaniñe sëntsemna, y aca átšeftaca cánÿiñe mo canÿacá bondmëna; as, chëngnaca nÿetsca soyënguiñe cánÿiñe mo canÿacá chamotsemnana. Y chca, quem luarentša entšanga chamotsetátšëmbo aca šcojichmoma, y chamotsetátšëmbo ntšamo atše šcondbobonshancá, chëngnaca cachcá condábabuanÿeshanama.

<sup>24</sup> “Taita, atšbiama chënga šconjínÿinÿiye. Atše mëntšá sëntseboše: chë atše chántsemnoca, chëngnaca chamotsemna, y chentše, chë šconjatšetá obenana y uámanana chënga chámuinÿe. Quem luare cabá ndoñe quenjatsmëna orscana, šconjánbobonshana; chíyeca, cachora tconjaninÿanÿé atše corente bëtšá y obená bëtsemnana.

<sup>25</sup> Taita, nÿetsca soyënguiñe tšabá amá, masque chë nÿe quem luarama enójuabnaye entšanga ndoñe quecmatábuatma, atše aíñe cbonduábuatma, y quem boyabásenga montsetátšëmbo, aca comna chë šcojichmó cha.

<sup>26</sup> Atše chënga sënjinÿanÿé ntšamo ndegombre aca comnana, y más chanjínÿanÿiye; chca, ntšamo šcondbobonshancá, chëngnaca cachcá chamotsenbobonshánama y atše chëngbe ainaniñe chaitsemnana ca” —Jesús tojánayana.

## 18

### *Uayayënga Jesús tmojánishache*

*(Mt 26.47-56; Mc 14.43-50; Lc 22.47-53)*

<sup>1</sup> Chë soyënga Jesús tojëftsanayanentšana, chabe uatsjéndayëngaftaca tojëftsanbocna, chë binche béjaye Cedrón ca uabáiniye chenguana jama. Chentše inamna canÿe tjashetema; y Jesús chabe uatsjéndayëngaftaca choye tojánamengo.

<sup>2</sup> Y Judas, chë Jesús uayayëngbe cucuatšíñe boshjuaná, tšabá chë luare yojanábuatma, er Jesús y chabe uatsjéndayënga ba soye chentše imojánenefjuana.

<sup>3</sup> Chora Judas tojánashjango, y cháftaca ba soldadënga y básefta Bëngbe Bëtsabe bëtš yebnoca josticiënga; chënga imojamna chë bachnangbe amëndayënga y fariseungbe ichmónënga; nÿetscanga uajuinÿanëshangaca, lamparëshangaca y espadëjangaca uajátënga.

<sup>4</sup> Jesusna yojtsetátšëmbo lempe ntšamo cha yochjanpásama; chíyeca, natsanoye tojánbocna y chë entšanga tojanëyana: —¿Nda šmojtsenguá ca?

<sup>5</sup> Y chënga tmojanjuá: —Jesús, chë Nazaretocá fsëntsenguá ca.

As Jesús tojanëjua: —Atše cha sëndmëna ca.

Y Judas, chë boshjuaná, chánaca chë entšángaftaca yojtsemna.

<sup>6</sup> Jesús tojanëyana: “Atše cha sëndmëna ca”, y cachora chë entšanga tmojtanostëtšánanga y fshantsoye tmojánshajaye.

<sup>7</sup> Chora Jesús cachiñe tojanatjá: —¿Nda šmojtsenguá ca?

Y chënga tmojanjuá: —Jesús, chë Nazaretocá ca.

<sup>8</sup> As Jesús tojanëyana: —Ya tcbonjáuyana: “Atše cha sëndmëna ca.” Atše šmojtsenguasna, mënga cachcá šmochjónÿaye chamotsóñëngama ca.

<sup>9</sup> Chca tojanopasá, ana ntšamo Jesús tojanayancá cachcá chaotsemnama, chë “Atšbe Taitá Bëngbe Bëtsá, chë šconjínjinyiye entsanguentsana ni canya pochocaná queochátsmëna ca”.

<sup>10</sup> Simón Pedro canye espadëja inasëngbuájonÿana; asna, tojanenosëngbotëntšena y chë bachnangbe más uámana amëndayabe canye oservenábioye catšbioica matscuaše tbojtsanëštjango. Chë oservená Malco ca inauabaina.

<sup>11</sup> As Jesús, Pédrëbioye tbojanianyana: “Acbe espadëja matosëngbuajonÿá. Ntšamo atšbe Taitá Bëngbe Bëtsá tojanmandacá, chë atše puerte ngménana jtsebonnama, ¿ndoñe chca chaondëtsemna ca?”

*Jesús, Anasbe yebnoca*

*(Mt 26.57-58; Mc 14.53-54; Lc 22.54)*

<sup>12</sup> Chentšana chë soldadënga, chëngbe amëndayá y Bëngbe Bëtsabe bëts yebnoca josticiënga Jesús tmojánishache y tmojanëcúebatsëca.

<sup>13</sup> Natsanëna, Anás, Caifasbe uambén taitábioye Jesús tmojanánatse. Caifás chë uata inamna chë bachnangbe más uámana amëndayá.

<sup>14</sup> Caifás yojamna nda judiënga tojanëyana: “Tšëngaftangbiana más tšabá entsemna canye boyabása Israeloca entsangbiana chaóbana ca.”

*Pedro tojánayana Jesúsbioye ndoñe bonjanabuátma ca*

*(Mt 26.69-70; Mc 14.66-68; Lc 22.55-57)*

<sup>15</sup> Simón Pedro y inÿe uatsjendayá Anasbe yebnoye Jesús imojtsëstona. Chë inÿe uatsjendayábioyna, chë bachnangbe más uámana amëndayá ibnauábuatma; chíyeca, cha tojanobená Jesúseftaca chabe chashjóntscoñe jashjanguana.

<sup>16</sup> Pero Pédrëna ñe shjoca, amashjuanentše tojanoquedá. Chcasna, chë inÿe uatsjendayá tojánbocna y chë bëšáša ebtafjuana shembásaftaca tojanoyebuambá. Chora Pedro tbojanëmashëngo.

<sup>17</sup> As chë shembása Pédrëbioye tbojanianyana: —¿Acnaca ndoñe chë boyabásabe uatsjendayá condmëna ca?

Y Pedro tbojanjuá: —Ndoñe; atše cha ndoñe quetsatabuatma ca.

<sup>18</sup> Tša yojtsesësna causna, chë oservënënga y chë josticiënga shjoca tmojanniñé y chentše imojtósboniye. Y Pédrënaca chëngaftaca yojtšëšbonena.

*Ntšamo chë bachnangbe más uámana pasado amëndayá, Jesúsbioye tbojantjá*

*(Mt 26.59-66; Mc 14.55-64; Lc 22.66-71)*

<sup>19</sup> Chora, chë bachnangbe más uámana pasado amëndayá tojanontšé Jesús jatjayama chabe uatsjëndayëngbiana y ndayá cha entsanga yojánabuatambamnaca.

<sup>20</sup> Y Jesús tbojanjuá: —Atše ñyetsca entsangbe delante sënjoyebuambá. Sempre chë entsangbe enefjuana yebnënguenache sëndabuatambá, y Bëngbe Bëtsabe bëts yebnócnaca, ñyetsca judiënga mondbétsenefjuanentše; y chca, iytemencá tondaye chiyatoyebuambá.

<sup>21</sup> ¿Ndáyeca chca šcojtsetjaná? Atšbe palabra tmojouenënga májtjaye, as chënga chacmëyana ntšamo atše tijáuyanama. Chënga mondëtatšëmbo ntšamo atše tijayancá ca —Jesús tbojanjuá.

<sup>22</sup> Jesús chë soyënga tojánayana ora, canye josticio chentše yojtsemná, Jesúsbioye tbojanjuebjantšetá y tbojanianyana: —¿Chca chë bachnangbe más uámana amëndayá cuanjojuá ca?

<sup>23</sup> Y Jesús tbojanjuá: —Ndoñe tšabá tijayanësna, šmëyana ndayentše chë podesca palabra yojtsemna; y tšabá tijóyebuambasna, ¿ndáyeca šcojajuebjantšetá ca?

<sup>24</sup> Chentšana, Anás tojanmandá, chë bachnangbe más uámana amëndayá Caifasbe yebnoye, Jesús batsëcná chamuánatsama.

*Pedro cachiñe tojánayana Jesúsbioye ndoñe bonjanabuátma ca*

*(Mt 26.71-75; Mc 14.69-72; Lc 22.58-62)*

<sup>25</sup> Chëntscuana, Pedro yojtsešbonena, tsanana chë iñe juachaca. Chora chë entšanga tmojanjtá: —¿Aca ndoñe chabe uatsjendayënguentsá condmëna ca?

Y Pedro ndoñe ca tojánayana: —Atše ndoñe quetsátsmëna ca —cha tojánayana.

<sup>26</sup> Chora, chë bachnangbe más uámana amëndayabe canye oservená Pédrëbioye tbojanianyana: —¿Atše ndoñe cháftaca chë tjashetémoça tcbonjinye ca?

Chë oservená inamna chë Pedro tbojtsanmatstëtšabe pamillo.

<sup>27</sup> Y Pédrëna cachiñe ndoñe ca tojánayana, y cachora canye ngallo yojacánta.

### *Jesús Pilatbe delante*

*(Mt 27.1-2, 11-14; Mc 15.1-5; Lc 23.1-5)*

<sup>28</sup> Chentšana, Caifasbe yebnentšana Jesús tmojanánatse chë romano mandadbe yebnoye. Ya yojtsebínjyana, y chë bëts yebnoye chë judiënga ndoñe tmonjánamashjna, er chënga imojtseboše chë Bashco saná jasama. Judiënga ndoñe imonjobena Bashco saná jasana, chca tempo canye ndoñe judiëbe yebnoye nda tojámashënguse.

<sup>29</sup> Chíyeca Pilato tojánbocna y chënga tojanëyana: —¿Ndayá quem boyabásabe contra šmochjayana ca?

<sup>30</sup> Chora chë entšanga tmojanjuá: —Bacá uamaná ndoñe tontsemnëse, ndoñe matifjuánatse ca.

<sup>31</sup> As Pilato tojanëyana: —Tšëngaftanga matánatse, y ntšamo cach tšëngaftangbe leyíñe iuayancá muabiyama šmochjayana tšabá o ndoñe tšabá tonjamama ca.

Y chë judiënga tmojanjuá: —Bënga derecho queftsátsbomna ndocná jóbama ca.

<sup>32</sup> Chca tojanopasá, ana ntšamo Jesús cachá jóbana tojanayancá cachcá chaotsemnama.

<sup>33</sup> As Pilato cach yebnoye tojtanamáshëngo, Jesús tbojanchembo y tbojanjtá: —¿Aca chë judiëngbe Rey cojtsemna ca?

<sup>34</sup> Y Jesús tbojanjuá: —¿Ntšamo šconjatjacá, cach aca chca cojtsejuabnýyeca chca yojtsemna o ínÿenga atšbiamama tcmojacuentáyeyca ca?

<sup>35</sup> Chora Pilato tbojanianyana: —¿Mo atše judío quetsmëna? Cach ácbioca entšanga y chë bachnangbe amëndayënga muentše tcmonjúshjango. ¿Ndayá tcojama ca?

<sup>36</sup> Chora Jesús tbojanjuá: —Atšbe jamándama luare ndoñe quem luarentše quenátsmëna. Aíñe tojtsemnësna, atšbe ústonënga muantsatsejaye atše chë judiëngbe cucuatšíñe ndoñe chašmondboshjonama. Pero atšbe jamándama luare ndoñe quem luarentše quenátsmëna ca —Jesús tbojanjuá.

<sup>37</sup> As Pilato tbojanianyana: —¿As aca rey cojtsemna ca?

Y Jesús tbojanjuá: —Tšabá tcjayana; atše rey sëndmëna. Chama atše tijonjñá y quem luaroye tijabo; y atše sënjabo ndegombre soyëngama jabóyebuambayama. Y chca soyënga jtsamëse tmoyenënga, atše jtseyeunanana ca.

<sup>38</sup> Chora Pilato tbojanianyana: —¿Y ndayase chë ndegombre soye yomna ca?

### *Jesusbiamama tmojánayana chaóbana ca*

*(Mt 27.15-31; Mc 15.6-20; Lc 23.13-25)*

Chca tbojanjtá chentšana, Pilato cachiñe tojánbocna judiëngaftaca jóyebuambayama, y tojanëyana: —Atše ni mo canye soye chiyátinjyena, quem boyabása castiganá chaotsemna ca jayanama.

<sup>39</sup> Pero tšëngaftanga šmondëtatšëmbo, Bashco fiestama atše canye utamená cachcá jëtsboshjonama. ¿Šmojtseboše chë judiëngbe Rey chjëtsboshjona ca?

<sup>40</sup> Chorna njyetsca entšanga cachiñe tmojanáyebuachena: —¡Ndoñe, cha ndoñe! ¡Barrabás matsboshjona ca!

Barrabasna canye bacá uamana entšá inamna.

## 19

<sup>1</sup> Chora Pilato, Jesús tbojanánatse y tojanmandá chamotsetjanjama.

<sup>2</sup> Y canÿe coronëshsha uchmašëfjangaca chë soldadënga tmojanapormá y Jesús tmojanabestšajó; y canÿe shbuenda uafjatsenga entšayá mo reycá tmojanichëtjo.

<sup>3</sup> Chorna chënga imojtsóbobecocnaye y jtsafchayama imojtsatsëtsnaye: “¡Bayté judiëngbe Rey cochtsemna ca!” Y imojtsejuebantšetaye.

<sup>4</sup> Pilato cachiñe tojánbocna y entšanga tojanëyana: —Smochjouena; cha chanjuábocna, chë boyabása castiganá chaotsemna ca jayanama atše ni mo canÿe soye ndoñe sënjínÿenama chašmotsetatšëmbuama ca.

<sup>5</sup> As Jesús tojánbocna chë uchmašëfjangaca coronëshsha uabestšajoná y chë shbuenda uafjatsenga entšayá mo reycá uichëtjoná. Y Pilato tojanëyana: —¡Muentše chë boyabása entsemna ca!

<sup>6</sup> Chë bachnangbe amëndayënga y chëngbe josticiënga cha tmojáninÿe ora, tmojanontšé uayebuáchana: —¡Motsecrucificá! ¡Motsecrucificá ca!

Chora Pilato tojanëyana: —Cach tšëngaftanga mánatse y šmochjacrucificá; atše ni mo canÿe soye chiyátinÿena quem boyabása castiganá chaotsemna ca jayanama ca.

<sup>7</sup> Chora chë judiënga tmojanjuá: —Bënga canÿe ley fsëndbomna, ntšamo chiñe endayancana, quem boyabása jóbanama bontsemna, Bëngbe Bëtsabe Uaquiñá entsenobiamná causa ca.

<sup>8</sup> Pilato chca tojanuena ora, más yojtsauatja.

<sup>9</sup> Cachiñe chabe yebnoye tojtanamáshëngo y Jesús tbojantjá: —¿Ndëmocá aca cmëna ca? Pero Jesús ndocá tbojanjuá.

<sup>10</sup> Chora Pilato tbojaniana: —¿Ndoñe šcochanjojuá ca? ¿Ndoñe condëtatšëmbo, aca jacrucificama o jëtsboshjonama atše tsobenama ca?

<sup>11</sup> As Jesús tbojanjuá: —Acbe obenana Bëngbe Bëtsá ndoñe macmënjánatšetase, ton-daye cattsobena átšeftaca jamama; chíyeca, acbe cucuatšinë šonjaboshjoná, acbiama más bëts bacna soye tonjama ca.

<sup>12</sup> Cach orscana Pilato yojtsenguaye ntšamo jamana, jobenayama Jesús jëtsboshjonama; pero chë judiënga imotsáyebuache: —¡Chacojëtsboshjonësna, Césarbe amigo ndoñe condmëna! ¡Nda rey tojtsenobiamná chana, Césarbe uayayá jtsemnana ca!

<sup>13</sup> Pilato chë soyënga tojanuena ora, chashjoye Jesús tbojanábocna. Pilato tojanótbema chabe puententše tribunaloca. Chë tribunaloca chashjañna hebreo biyañe Gabata ca inauabaina, y endayana “ndëtsbéngaca pormániñe ca”.

<sup>14</sup> Bashco fiestama canÿe te yojtsájamna, y mo nÿetsto ora yojtsemna. Chora Pilato chë judiënga tojanëyana: —¡Muentše tšëngaftangbe rey entsemna ca!

<sup>15</sup> Pero chënga tmojanáyebuachena: —¡Chaóbana! ¡Chaóbana! ¡Motsecrucificá ca!

As Pilato tojanatjá: —¿Tšëngaftangbe rey atše chjacrucificá ca?

Y chë bachnangbe amëndayënga tmojanjuá: —Bëngbe rey nÿe César endmëna, ndocná más ca.

<sup>16</sup> Chentšana Pilato, chëngbe cucuatšinë Jesús tbojánboshjona chamocrucificama y chë judiënga cha tmojanánatse.

### *Jesús tmojanrucificá*

*(Mt 27.32-44; Mc 15.21-32; Lc 23.26-43)*

<sup>17</sup> Jesús tojánbocna chabe cruz tantšajónana y tmojanánatse canÿe luaroye, “Obanabe Bestšashe ca” uabáinoye (hebreo biyañe Gólgota ca inauabaina).

<sup>18</sup> Chentše cha tmojanrucificá y inÿe útatnaca cátoicoa tmojanrucificá; Jesusna tsëntsaca.

<sup>19</sup> Pilato tojanmandá canÿe uabemana soye chë cruciñe chamuanjuama. Chiñe yojetsábemana: JESÚS NAZARETOCÁ, JUDIËNGBE REY ca.

<sup>20</sup> Y ba judiënga chë uabemana soye tmojanalía, er chë Jesús tmojanrucificá luare Jerusalenó béconana inamna, hebreo, latín y griego biyañe yojetsábemana.

<sup>21</sup> Chca juabemama tojanmandáyeca, chë bachnangbe amëndayënga Pilato tmojaniana: —Ndoñe matabiamnana “Judiëngbe Rey” sinó ntšamo cachá tojayancá, “Judiëngbe Rey atše sëndmëna ca”.

<sup>22</sup> Pero Pilato tojanëjua: —Ntšamo tijuábema cachcá chaotsábemana ca.

<sup>23</sup> Chë soldadënga Jesús tmojancrucificá chentšana, chabe entšayangá tmojanájaca y cántañe tmojanajatá, nyetsca canta soldadëngbiama. Chabe cmešëjua tmojanaca; chëjuana yojanamna nduajonanëjua, nyetsëjua uabianánëjua.

<sup>24</sup> As chë soldadënga tmojáneniyana: “Ndoñe matjuátanëca; más tšabana tsbanánoye mochjútšena, ndabiama yochjuáquedama chaotsotatsëmbuama ca.”

Chca tojanopasá ana ntšamo Bëngbe Bëtsabe uabemana palabrenguiñe endayancá cachcá chaotsemnana, chë “Atšbe entšayangá tmojatenájataye; atšbe cmešëjuamna tsbanánoye tmonjanëtšena, ndabiama jauquédama jtsotatsëmbuama ca.” Y lempe chca chë soldadënga tmojanma.

<sup>25</sup> Jesusbe cruz juachaca imojtsemna chabe mamá; chë mamabe quenata María, Cleofasbe shema; y María Magdalena.

<sup>26</sup> Jesús chabe mamábioye tbojáninÿe, y chabe juachacna chë Jesusbe bonshana uatsjendayá yojtsemna. Chora chabe mamá tbojaniana: “Mama, chentše acbe uaquiñá entsemna ca.”

<sup>27</sup> Y chë bonshana uatsjendayá tbojaniana: “Chentše acbe mamá entsemna ca.”

Cach orscana, chë uatsjendayá chabe yebnentše Jesusbe mamábioye tbojanofja.

### *Jesús tojanóbana*

*(Mt 27.45-56; Mc 15.33-41; Lc 23.44-49)*

<sup>28</sup> Jesús yojtsetátšëmbo ya lempe tojanchnënguama, chíyeca chentšana y ntšamo Bëngbe Bëtsabe uabemana palabrenguiñe endayancá cachcá chaotsemnana, tojánayana: “Sontsajuendá ca.”

<sup>29</sup> Chentše inamna canÿe matbaja buajútjena untja vínoyeca. As, chë soldadënga canÿe esponjëshe chë vínoyeca tmojanfchecuacué, canÿe hisopo niñëfjiñe tmojananguësëtjo y játsbanase, Jesusbe uayásoye tmojanbeconá.

<sup>30</sup> Chë untja vínoye Jesús tojanofšé ora, tojánayana: “Ya lempe tocjochnëngo ca.”

Tojanotsejbé y tojanóbana.

### *Canÿe soldado chabe lanzësaca costillaca Jesúsbioye tbojanashacuá*

<sup>31</sup> Bashco fiestama canÿe te yojtsájamna, y chë judiënga ndoñe imontseboše chë crucificánënga cachentše chë ochnayté chamotsemnana, chë te puerta uámana te bëtsemnayeca. As Pilato tmojanimpadá chë crucificánënga shecuatšënga jetsatcacayama y chë cuerpënga chentšana jtsejuánama chaomandama.

<sup>32</sup> As chë soldadënga tmojána y shecuatšënga imojtsatcacaye, natsana canÿa y chentšana chë inÿa, Jesúsëftaca yojtsecrucificaná.

<sup>33</sup> Pero Jesúsbioye tmojanobeconá ora, ya obaná tmojáninÿe; chíyeca chabe shecuatšënga ndoñe tmonjanatcacá.

<sup>34</sup> Masque chca, canÿe soldado Jesúsbioye costillaca canÿe lanzësaca tbojanashacuá. Y cachora buiñe y búyeshe chentšana tonjanóbocna.

<sup>35</sup> Chë mëntšá cuentayá chentše enjamna y tonjáninÿe, y ndegombre entsichamo; cha endëtatsëmbo ndegombre yojtsichámuama, chca, tšëngaftángnaca chiñe chašmotsošbuáchema.

<sup>36</sup> Chë soyënga chca tojanopasá, ntšamo Bëngbe Bëtsabe uabemana palabrenguiñe endayancá cachcá chaotsemnana. Chiñe endayana: “Ni mo canÿe betaše cha quemochatsëntšátca ca.”

<sup>37</sup> Y inÿoca, Bëngbe Bëtsabe uabemana palabrenguiñe endayana: “Chë tmojenachentšá bominÿe mochanjabuájua ca.”



*Jesús tmojanatbontsá**(Mt 27.57-61; Mc 15.42-47; Lc 23.50-56)*

<sup>38</sup> Chë soyënga tojanopasá chentšana, José Arimateocá, Pilátbioye tbojanimpadá Jesusbe cuerpo jesocñama chabolesenciama. José inamna Jesusbe canye ustoná, masque nÿe iytëcana, chë judiëngbiama auatja causa. Pilato aiñe tbojanlesenciá; as José tojána y Jesusbe cuerpo yojtsámbañe.

<sup>39</sup> Nicodemo, chë ibeta Jesúsbioye tbojanbuachá, chánaca tojánashjango y tojanëyamba unga bnëtsana kilo mirra y áloe enájuabnana.

<sup>40</sup> As José y Nicodemo Jesusbe cuerpo tbojanca y tmojanandmaná chë botamana uanguëtse soyëngaca unëtjona entšëjuangaca. Judiënga chca imnauamana, obaná juatbontsama ora.

<sup>41</sup> Jesús tmojanrucificá luarentse canye base jajañe inamna, y chiñe canye tsëm cuevëshe, entšangbe pormánëshe, obanëngbiama; chëshiñe cabá ndocna obaná mondëjajo.

<sup>42</sup> Asna, nÿe chentse Jesusbe cuerpo tmojansegorá, chë Bashco fiestama canye te yojtsájamna causa, y chë cuevëshe chë béconana inámnayeca.

**20***Jesús tojtanyena**(Mt 28.1-10; Mc 16.1-8; Lc 24.1-12)*

<sup>1</sup> Chë inÿe semana bojatsenté, cabá cachëse, cabá ndëbinÿna ora, María Magdalena chë cuevëshoye tojána y tojáninÿe ínÿoca yojtsemna chë cuevëshoye amashjuanentša ndëtšbé.

<sup>2</sup> Asna, tojëftsantójtajo y tojána chë Simón Pedro y chë inÿe uatsjendayá, ndábioye Jesús tša ibnabobonshana ibojtsemnoye. Chora tojanëyana: “Bëngbe Utabnabe cuerpo chë cuevëshentšana tmojtsámbañe y ndayentse tmotsejájoma ndoñe queftsátstatšëmbo ca.”

<sup>3</sup> Chora Pedro y chë inÿe uatsjendayá chentšana tbojëftsanbocna y chë cuevëshoye tbojánata.

<sup>4</sup> Nÿets útata ibojtsëchamana, pero chë inÿe uatsjendayá Pédrëbiama más betscó tojanótjajo y natsana chë cuevëshoye tojánashjango.

<sup>5</sup> Tojanotsejbé y chë chentse tmojanacjá entšëjuangá tojáninÿe, pero choye ndoñe tonjánamashëngo.

<sup>6</sup> Chentšana, Simón Pedro chabe ústonoye tojánashjango y chë cuevëshoye tojánamashëngo, y tojáninÿe chë chentse tmojanacjá entšëjuangá.

<sup>7</sup> Y chë Jesús juabestšëntsacjuama tojanaservé entšëjuana ndoñe chë inÿájuangaca yontsamna, sinó ínÿoca botamana uandmanánëjua.

<sup>8</sup> Chora chë inÿe uatsjendayá, chë cuevëshoye natsana tojanashjanguá, choye tojánamashëngo. Tojáninÿe y Jesús tojtanyenama yojtsanošbuaché.

<sup>9</sup> Chëntscoñe chë útata cabá ndoñe yontsósertana ntšamo Bëngbe Bëtsabe uabemana palabrënguiñe endayancá, chë Jesús obanënguentšana jtayenama ibojamnama.

<sup>10</sup> Chentšana chë uatsjéndayata chatbe oyenoye tbojtaná.

*Jesús, María Magdalénbioye tbojánëbëbocna**(Mc 16.9-11)*

<sup>11</sup> Pero María chentse tojanoquedá, chë cuevëshe juachaca šachénaca; yojtsošachentscuana tojanotsejbé cuevëshoye jarrepárama.

<sup>12</sup> Y tojáninÿe uta angelotémata uafjantsëjua uichëtjonata, Jesusbe cuerpo yojëftsejajóntse ibojtsetbemana. Canÿa tsëntsénëshoica y chë ínÿana matsëskoica.

<sup>13</sup> Chora chata tmojanianya: —Shembása, ¿ndayama cošaché ca?

As cha tojanjuá: —Atšbe Utabná tmojtsámbañe, y ndayentse tmojtsejájoma ndoñe quetsátstatšëmbo ca.

14 Chca tojánayana ora, tojanostëtšantješé y tojáninýe chentše Jesús yojtsemna, pero María ndoñe yontsetátšëmbo cha Jesús bétsemnama.

15 Chora Jesús tbojaniyana: —Shembása ¿ndayama cošaché? ¿Nda congua ca?

María yojtsejuabnaye chë boyabásana yojtsemna chentša base jajañe uaishanyá ca; chíyeca tbojantjá: —Bacó, aca tcojuambësna, šmëyana ndayentše cojtsejajó, as atše cha jesocñama ca.

16 As Jesús tbojaniyana: —¡María ca!

Chora María chábioye tojanontješé y tbojaniyana: —¡Rabuni ca! (hebreo biyañe chca endayana “Buatëmbayá ca”).

17 Chora Jesús tbojaniyana: —Ndoñe šcatábojajo, er atše cabá ndoñe atšbe Taitábioye quetstëtstsjua. Pero motsa atšbe catsátangbioye y cochjáuyana, atše stsetsjuá atše y tšëngaftangbe Bëtsábioye, atše y tšëngaftangbe Taitábioye ca.

18 As María Magdalena tojána y Jesusbe uatsjédayënga tojanéyana cha chë Utabnábioye tbojáninýe ca y cha chë palabrenga tojánayana ca.

*Jesús chabe uatsjédayënga tojánebëbuacna*

*(Mt 28.16-20; Mc 16.14-18; Lc 24.36-49)*

19 Tojanibétata ora, cach semana bojatsenté, chë uatsjédayënga tmojánenefjna canýe luarentše, pero lempe tmojtanatame, chë judiëngbiamama auatja causa. Chora Jesús tojánamashëngo, chëngbe tsëntsaca tojantsá y mëntšá tojanacheuá: “Chë atšbe ainaniñe tšabe ebionana tšëngaftangaftaca chaotsema ca.”

20 Y chca tojanéyana ora, chabe cucuatšënga y costillaca tojaninýanyé. Chora chë uatsjédayënga oyejuayënga imojtsemna, chëngbe Utabná tmojáninýama.

21 As Jesús cachiñe tojanéyana: “Chë atšbe ainaniñe tšabe ebionana tšëngaftangaftaca chaotsema. Ntšamo atšbe Taitá Bëngbe Bëtsá šojichmocá, átsnaca cachcá tšëngaftanga cbontšachamná ca.”

22 Chca tojánayana ora, chëngbioye tojangouo y tojanéyana: “Chë Uámana Espiritu šmochjóyëngacñe.

23 Ndëmuanýënga chëngbe bacna soyëngama chašmojáperdonanga, perdonánënga mochántatsmëna; y ndoñe chašmonjáperdonasna, ndëperdonánënga mochántsemna ca.”

*Tomás, Bëngbe Utabnábioye ainá tbojáninýe*

24 Pero Tomás, chë Gemelo ca uabobainá, canýa chë bnëtsana uta uatsjendayënguentsá, chë uatsjédayëngaftaca ndoñe yontsemna, Jesús tojánashjango ora.

25 Chíyeca, “bënga chë Utabná fsënjinye ca”, chë inýe uatsjédayënga tmojaniyana ora, Tomás tojanéjua: “Atše chabe cucuatšiniñe chë uajabonjana uinýniñe ndoñe sënjinýe, y chiñe atšbe ntšabuafja ndoñe sënjajué y atšbe cucuatše chabe costillaca ndoñe, ndoñe quichátošbuachiye ca.”

26 Canýe semana tojanochnëngo ora, chë uatsjédayënga cachiñe canýe luarentše tmojánenefjna. Y Tomásnaca chëngaftaca yojtsemna. Masque chentše atámeniñe yojtsemna, Jesús tojánamashëngo, chëngbe tsëntsaca tojantsá y tojanéyana: —Atšbe ainaniñe tšabe ebionana tšëngaftangaftaca chaotsema ca.

27 Chora Tomásbioye tbojaniyana: —Acbe ntšabuafja muentše mojué y atšbe cucuatše minýe; acbe cucuatše miyëbo y atšbe costillaca mojué. Y ndošbuachiyá ndoñe matsmënana, sinó atše tijtayanama cochtsošbuáchiye ca.

28 As Tomás tbojaniyana: —¡Atšbe Utabná y atšbe Bëtsá ca!

29 Chora Jesús tbojaniyana: —Tomás, nýe šconjínýeyeca cojtsošbuaché. ¡Bëngbe Bëtsá chaoma puerte oyejuayënga chamotsemna chë nýe ntjinýcá tmojošbuachenga ca!

*Ndayama quem librëša tmojanábema*

30 Jesús, chabe uatsjédayëngbe delante inýe bëts soyënga Bëngbe Bëtsabe obenánaca tonjëftsema, pero quem librëšañe ndoñe quenatábemana.

31 Y quem librëshañe soyëngna, entsábemana tšëngaftanga chašmotsošbuáchema, Jesús, chë Cristo y Bëngbe Bëtsabe Uaquiñá bétsemnama; y chcace, chábeñe chašmojtsošbuachese, chábeyeca chë nÿetsca tescama yonna tšabe vida chašmotsebomnama.

## 21

*Jesús, canÿsëfta chabe uatsjéndayënga tojánëbëbuacna*

1 Chca tojanopasá chentsana, Jesús inÿe soye chabe uatsjéndayënga tojánëbëbuacna, Tiberias mar béjaye tsachañe. Chora mëntsá tojanopasá:

2 Cánÿentšë imojétsemna Simón Pedro; Tomás, chë Gemelo ca uabobainá; Natanael, chë Galilea luarocá, Caná pueblócá; Zebedeobe uaquiñata y Jesusbe inÿe uta uatsjéndayata.

3 Simón Pedro chënga tojanëyana: —Sëntsá beonga jashebuáyama ca.

As chënga tmojanjuá: —Bëngnaca ácaftaca fchanjá ca.

As tmojána y canÿe barquëshoye tmojánamashjna; pero chë ibeta tondaye tmonjáninÿena.

4 Ya yojtsebínÿana orna, Jesús chë tsachoca yojtsemna, pero chë uatsjéndayënga ndoñe imontsetátšëmbo cha Jesús yojamnama.

5 Chora Jesús tojanatjá: —Básenga, ¿tondaye šmonjashbuá ca?

Y chënga tmojanjuá: —Tondaye ca.

6 As Jesús tojanëyana: —Barquëshca catšbioica chë atarraiešha mëtsena y beonga šmochanjáshebuaye ca.

As chënga chca tmojanma, y chora chësha jtabocnama ndoñe imontsobena, nÿetšá beonga tmojánishëche causa.

7 As chë Jesusbe bonshana uatsjendayá, Pédrëbioye tbojaniyana: “¡Bëngbe Utabná entsemna ca!”

Simón Pedro chca soye tojanuena y cachora entšayá tojtanihëtjo, er nduichëtjoná yojtsemna, y chë béjayoye tojanoshbuetšë.

8 Chë inÿe uatsjéndayëngna chë barquëshañe tmojána, y chë atarraiešha jútjena beóngaca imojtsásjaye, er chë tsachocama bécoñe imojtsemna, nÿe canÿe patse metroca.

9 Fshantsoye tmojánastjajna ora, chënga tmojáninÿena canÿe chebániñe pormániñe, y chentsna canÿe beona y tandëšnaca yojtsesegorana.

10 Chora Jesús tojanëyana: “Chë šmonjáshebuaye beonguentšana báseftanga miyëbo ca.”

11 Simón Pedro chë barquëshoye tojánamashëngo, y chë atarraiešha jútjena bëts beóngaca, uasjojónana tsachóntscoñe tojanëyamba. Mo canÿe patse y shachna bnëtsana y unga beóngaca; pero masque nÿetšá beonga, chë atarraiešha ndoñe ntjuatanëcanana.

12 Chora Jesús tojanëyana: “Mabënga, šmochjase ca.”

Chë uatsjéndayënguentšana ni canÿa yontsenñëmua cha jatjayama nda cha yojamnama, er nÿetscanga imojtsetátšëmbo cha chë Utabná bétsemnama.

13 Chora Jesús tojanobeconá, chë tandëse tojanca y chënga tojanatšatá, y chë beónacnaca cachcá tojanma.

14 Chóracna, Jesús ya unga soyama chabe uatsjéndayënga yojtsanebëbuacana, obanënguentšana tojtanayenentšana.

*Jesús, Simón Pédroftaca tojanoyebuambá*

15 Jasama tmojanpochocá ora, Jesús, Simón Pédrëbioye tbojantjá: —Simón, Juanbe uaquiñá, ¿quemëngbiama más quešcbobonshana ca?

Y Pedro tbojanjuá: —Atšbe Utabná, aíñe. Aca condëtatšëmbo atšë aíñe cbondbobonshánama ca.

As Jesús tbojaniyana: —Atšbe entsanga, mo oveshatemëngcá imomnënga, cocht-sanÿena ca.

16 Chora cachiñe tbojantjá: —Simón, Juanbe uaquiñá, ¿quešcbobonshana ca?

Y Pedro tbojanjuá: —Atsbe Utabná, aíñe. Aca condétatsëmbo atse aíñe cbondbobonshánama ca.

As Jesús tbojaniana: —Atsbe entsanga, mo oveshëngcá imomnënga, cochtsanyëna ca.

<sup>17</sup> Y unga soyama tbojtëtantjá: —Simón, Juanbe uaqiñá, ¿quešcbobonshana ca?

Pedro puerte tbojanongmé, ya unga soyama “quešcbobonshana ca” tbonjantjá causa; y tbojanjuá: —Atsbe Utabná, aca lempe condétatsëmbo. Aca condétatsëmbo atse aíñe cbondbobonshánama ca.

As Jesús tbojaniana: —Atsbe entsanga, mo oveshëngcá imomnënga, cochtsanyëna.

<sup>18</sup> Ndegombre cbëyana: Más bobontse conjamna ora, conjanamana cach aca jtichëtjuana y ndëmoye jama cojtseboše choye jtsoñana; pero tanguá chacojtsemna orna, buacuatšënga cochanjatsbaná, y inya cmochantichëtjo y ndëmoye jama ndoñe chacontseboše choye cmochanjuánatse ca —Jesús tbojaniana.

<sup>19</sup> Chca tojánayana, ana jtsotatsëmbuama ntšamo Pedro jóbanama ibojamnama, y chë chca jóbanëse, Bëngbe Bëtsá corente bëtsá y obená bëtsemnama Pedro yochjáninñanyiyama. Y chca tojánayanentšana, Pédrëbioye tbojaniana: —Smasto ca.

### *Jesusbe bonshana uatsjendayá*

<sup>20</sup> Pedro tojesanenostëštantješë y tojáninñe, Jesusbe bonshana uatsjendayá ústonoye yojtsaye. Cha enjamna chë monjansá ora, Jesús cabá ndóbana ora, chë Jesúsbioye más tonjanosjoná y tbonjantjá: “Bëngbe Utabná, ¿nda chë boshjuaná yochtsemna ca?”

<sup>21</sup> Pedro chábioye tbojáninñe ora, Jesúsbioye tbojantjá: —Atsbe Utabná, y cháftaca, ¿ntšamo yochjopása ca?

<sup>22</sup> Chora Jesús tbojanjuá: —Atse quem luaroye jesabámëntscuana cha ainá chauesomñama atse stsebošëse, ¿aca ndayá chama cmatjátsëntšamna? Acna nñe šmasto ca.

<sup>23</sup> Chíyeca, chentšana, Jesucristbeñe ošbuáchiyëngbenache nñetscanga imojánichamo, chë uatsjendayá ndoñe yochanjanóbana ca. Pero Jesusna ndoñe chca tonjánayana, sinó “atse quem luaroye jesabámëntscuana cha ainá chauesomñama atse stsebošëse, ¿aca ndayá chama cmatjátsëntšamna? ca”.

<sup>24</sup> Mua endmëna chë uatsjendayá; cha entsichamo quem soyënga ndegombre yojamnama, y camuá quem librëšañe lempe tonjuábema. Y bënga mondétatsëmbo cha ndegombre soye endóyebuambnama.

<sup>25</sup> Jesús inñe ba soyënga tonjëftsema; tša bëtscá soyënga endmëna, nderado lempe cada canñe soye tcojuábema y librëšangá tcojuapormá, atse sëntsejuabná, nñetsca chëšangá quem luarentše ndoñe nanjuába.

## Hechos

### *Jesús tojanašebuachená chë Uámana Espíritu jíchmuama*

<sup>1</sup> Teófilo, atšbe natsana librěšaňe tčbonjuábobema lempe ntšamo Jesús tojanmama y tojánabuatambama, chca tojanbojatsé orscana,

<sup>2</sup> y Běngbe Bětsá celoye tbojtanatsbanantscuana. Cabá celoye nděta orna, chë chabe ichmoněngcá tojanabacacá boyabásengna Jesús tojěftsanaměndá, chë Uámana Espíritbiajana, ndayá jamama yojánamnana.

<sup>3</sup> Jesús cruciňe tojanóbana y tojtanayenentšana, ba soye chë ichmóněnga yojánebėbuacana, chca, chěnga jinŷanŷiyama cha ndegombre tojtanayenama. Canta bnětsana tentscuana cha yojánebėbuacana y Běngbe Bětsabe aměndayama chěnga yojanabuatambá.

<sup>4</sup> Canŷe, Jesús chabe ichmóněngaftaca yojětsemna ora, měntšá tojanaměndá: — Jerusalenentšana ndoňe šmatjábocana. Camuentše šmochjobátma, ntšamo atšbe Taitá tcmonjanašebuachenacá chaóshjanguěntscuana, ndayama atše tčbonjáuyana.

<sup>5</sup> Ndegombre, Juan entšanga bėjayeca tonjanėbaye; pero ndoňe baytesna, Běngbe Bětsá chë Uámana Espíritu bochanjíchmu, tšěngaftangbe ainaniňe jtsemándayama cháuamashěnguama ca.

### *Jesús celoye tojtantsjuá*

<sup>6</sup> Canŷe, chë ichmóněnga Jesúseftaca cánŷiňe imojtsemna ora, chěnga tmojantjá: — ¿César y chë Romoquěngbe aměndayentšana tašcochjatsebacá, y mora běnga, Israeloca entšanga, canŷe Rey quemochtsatsbomna ca?

<sup>7</sup> As Jesús tojaněyana: —Tšěngaftanga ndoňe quecmátamna chë soyěngama jtsetatšěmbuana. Nŷe atšbe Taitá aiňe; y cha, chabe obenánaca echanjamánda mocna ora y ndayté chca chaopasama.

<sup>8</sup> Chë Uámana Espíritu tšěngaftangbe ainaniňe jtsemándayama chaojabo ora, tšěngaftanga obenana šmochanjóyěngacňe. Chentšana, ntšamo atšbiama šmotatšěmbcá, chë tčbonjabuatambá soyěnga, entšanga šmochjáuyana Jerusalenentše, nŷets Judea luariňe, Samarioca y quem luarentša nŷets luarěnguenáchnaca ca.

<sup>9</sup> Chë soyěnga tojánayanentšana y chabe uatsjěndayěnga imojtsonŷaye ora, Běngbe Bětsá, Jesúsbioye tbojtanatsbaná y canŷe jantšetěshe chábioye ibojútsbotse y ndoňe más tmonjanobená cha jinŷama.

<sup>10</sup> Jesús celoye yojtsetsjuama chěnga bën imojtserreparáněntscuana, nŷe ndeolpe, uta boyabásata uafjantse entšayaca bopormánata chěngbe juachaca tbojabántsaye,

<sup>11</sup> y chěngbioye tmojaněyana: “Galileoca entšanga, ¿ndáyeca celoye šmojtsantješana? Jesús, chë tšěngaftangaftaca enjamná celoye tontá y ntšamo mora šmonjinŷcá cha celoye jtama, cachcá quem luaroye cha echanjėsabo ca.”

### *Júdasbe cuenta Matías tmojanábuayana*

<sup>12</sup> Jesusbe ichmóněnga chë Olivos tjashocana Jerusalenoye tmojtaná. Chë tjocana Jerusalenóntscóňna bécoňe inamna, ndayěntscoca canŷe ochnayté jama yojanlesenciana nŷetšá.

<sup>13</sup> Jerusalenoye tmojtanashajna orna, chë yebnentša tsbanánoca tsoye tmojtanášěngo. Chentše yojánatana Pedro, Juan, Santiago, Andrés, Felipe, Tomás, Bartolomé, Mateo, Santiago chë Alfeobe uaquiňá, Simón chë Celote ca uabobainá, y Judas, chë Santiagbe uaquiňá.

<sup>14</sup> Chěnga sempre imojanamana jtnefjnana Běngbe Bětsáftaca jencuěntama básefta shembásengaftaca, María Jesusbe mamá y Jesusbe catšátangaftaca.

<sup>15</sup> Chë tempo tmojánenefjna canÿe patse y uta bnétsana Jesucristbeñe ošbuáchiyënga, y canÿe, Pedro tojantsá y tojanéyana:

<sup>16</sup> “Jesucristbeyeca atšbe catšátanga, endánëyta ntšamo Bëngbe Bëtsabe uabemana palabrënguiñe iuabemancá chaochnënguama, y tempo, David chë Uámana Espíritbeyeca chiñe tojanábema ntšamo Júdaseftaca yochjanopásama; chcasna, Judas uayayënga tojanënatse Jesús chamuishachama.

<sup>17</sup> Júdasnaca bëngbe enutá enjamna y Jesús chábioynaca tbonjanábuayana bëngcá chabe trabajuiñe jtsoservénama.

<sup>18</sup> Tšëngaftanga šmondétatšëmbo, chë Judas bacna soye tojanmama tmojtanabuená crocenánacna fshantse tmojánbuamema. Chentšana cha tojtsanótsatše y chabe bestšaše tsëntsaca tbojtsanashtëtšena y chabe uafsbentšana nyetsca chabe chunchullëjuangá tojtsanáshana.

<sup>19</sup> Jerusalemntše oyenënga chë soyama tmojántatšëmbona ora, chë fshantse chëngbe biyañe Acéldama ca tmojanabaye. Acéldama endayana ‘Buiñe Luare ca’.

<sup>20</sup> Salmos librëšañe, Jesucristo uayayëngbe cucuatšiče boshjuanabiama mëntšá enduábemana:

Chabe yebna éñañe chaotsemna  
y ndocná chentše chaondëtsiyena ca.

Y mëntšánaca endayana:

Chabe cuenta inÿa chabe trabajo chaoma ca.

<sup>21</sup> “Chcasna, mora muentše montsemna taitanga bëngaftaca mondenutënga, Bëngbe Utabná Jesús bëngaftaca enjamnëntscuana,

<sup>22</sup> Juan Jesúsbioye tbonjanabaye orscana y Bëngbe Bëtsá Jesúsbioye bëngbentšana celoye tbonanatsbanantscuana. Y mora šontsamna canÿa mënguentšá juabuáyanama, Jesús tojtanayenama entšángbioye bëngaftaca jábuayenama ca.”

<sup>23</sup> As chora útata tmojanabocacá: José, nda Barsabás ca imojanábobuatma y ínÿengna Justo ca; y chentšana Matías.

<sup>24</sup> Chora Bëngbe Bëtsáftaca mëntšá tmojanencuentá: “Bëngbe Utabná, aca nyetscangbe ainana icuabuatma; chcasna, šminÿanyé nda quem útatentšana cochjuábuayanana,

<sup>25</sup> canÿe ichmonacá Júdasbe cuenta chaotrabajama. Judas ya ndoñe canÿe ichmoná quenátsmëna, bacna soye tojama causa, y cha mora yojtsemna chë ndayentše jtsemnama ibomna luaroca ca” –chënga tmojánayana.

<sup>26</sup> Y nda chë ichmoná yochtsemnama jtsotatšëmbuamna tsbanánoye tmojanëtšena y Matías tbojanobuache; as cach orscana, Jesucristbeñe ošbuáchiyënga chabiama imojanjuabná mo canÿe Jesusbe ustonacá, cachcá ntšamo chë bnétsana canÿe uatšjëndayëngbiama chënga imojanjuabnacá.

## 2

### *Chë Uámana Espiritu ošbuachiyëngbeñe tojánamashëngo*

<sup>1</sup> Pentecostés ca uabaina fiesta tojanobuache ora, chë jaja sananga tmojanobuátbanama fiesta te, Jesucristbeñe ošbuáchiyënga nyetscanga cánÿiñe canÿe luarentše imojtsemna.

<sup>2</sup> Ndeolpe, celocana mo canÿe jabuache binÿiëcá yojtsaishauenana y chca, tša jabuache shauenanana tojanóshjango nyets yebnentše, chënga imojtsetbiámanentše.

<sup>3</sup> Y chora bichtajënga mo iñeshcá yojónÿna y canÿánÿabeñe yojojátaye.

<sup>4</sup> Chca chë Uámana Espiritu tojánamashëngo chëngbe ainaniñe jtsemándayama; chora nyetscanga tmojanontsé inÿetšá biyangana, chënga tempo ndmabiyañe, ntšamo chë Uámana Espiritu yojtsamcá chënga inÿetšá chamotsebiyama.

<sup>5</sup> Chë tempo Jerusalemntše imojtsemna ba judiënga, Bëngbe Bëtsá puerte adórayënga, nyets luarëngocana áshjajnënga; chënga tmojánabo Bëngbe Bëtsá jëtschuayama.

<sup>6</sup> Entšanga chë shauenanana tmojanuena ora, tmojanójoto y ndoñe imontsetátšëmbo ntšamo jtsejuabnayana ndayá yojtsopasánama, er chë inýe luarocana áshjajnënga imojtsuenana chë Jesucristbeñe ošbuáchiyënga inýetsá biyangana jtsóyebuambnayana, ntšamo cada ona chënga imojanbiyacá.

<sup>7</sup> Chë soyëngama entšanga puerte imojenjaná y mëntšá imojtsenatsëtsnaye: “Chë chca montsóyebuambnanga Galileoquënga mondmëna.

<sup>8</sup> Chcase, ¿ntšámoyeca bënga imojtsobena chënga joyaunayana cach bënga mondëbiyacá ca?

<sup>9</sup> Muentše montsemna Partioquënga, Medioquënga, Elam, Mesopotamia y Judeoquënga, Capadocia, Ponto y Asia luaroquëngnaca,

<sup>10</sup> Frigioquënga, Panfilia, Egiptó y Libia, chë Cirene béconana luaroquënga. Báseftangna Romoquënga montsemna;

<sup>11</sup> chëngbeñe nderado judiënga camuentše onýnánënga, pero inýengna ndoñe, y chënga Bëngbe Bëtsá mondbëtsatschuanaye cach ntšamo chë judiënga monduamancá. Inýengna Cretocana y Arabiocánëngnaca tmojabo. ¡Y bënga montsobena chë Galileoca judiënga joyaunayana Bëngbe Bëtsá bëts soyënga tojamama cach bënga mondëbiyacá ca!” —chë entšanga imojtsichamo.

<sup>12</sup> Chë causa nýetscanga imojtsenjanaye y ntšamo jtsejuabnayama ntsetatšëmbcá imojtsemna y imojtsentjanaye: “¿Ndayá chë soye yojtsayana ca?”

<sup>13</sup> Pero inýengna, chë soyëngama chëngbioye imojtsëbayajuana y imojtsichamo: “Chënga tëmiënga montsemna ca.”

### *Ntšamo Pedro chora tojanoyebuambá*

<sup>14</sup> Chentšana, Pedro tojantsá chë inýe bnëtsana canýe ichmónëngaftaca y jabuache tojanontsé chë entšanga jáuyanana, mëntšá: “Atšbe entšanga judiënga y nýetscanga Jerusalenentše oyenënga, tšabá šmochjouena. Ntšamo tojopasama cbochanjábuayenaye, as chacmësertama.

<sup>15</sup> Tšëngaftanga šmontsejuabná atše y atšbe enutënga tëmiënga fstsemna ca, pero ndegombre, tëmiënga ndoñe queftsátsmëna; cabá cachëse, base mošenana ora ctsomñe.

<sup>16</sup> Pero ntšamo entsopasánamna, Bëngbe Bëtsabe juabna oyebuambnayá Joel mëntšá tojanábema:

<sup>17</sup> Bëngbe Bëtsá mëntšá tojánayana: ‘Quem luare jopochócama te chaojtsobeco ora, chë soyënga echanjochnëngo.

Atše chanjama, atšbe Espíritu nýetscangbe ainaniñe cháumashënguama.

Chentšana, tšëngaftangbe uaquiñënga y bemianga atšbe soyëngama entšanga mochantsëtsëtsnaye;

tšëngaftangbe bobontsëngna, atše chanjama soyënga mochantsonýaye mo otjenayoquëcá; y tšëngaftangbe bëtsëjëmëngna atšbe soyënga mochantsotjénaye.

<sup>18</sup> Chca ora, atše chanjama nýetsca atšbe oservëngbiama, boyabásenga y shembásenga, chëngbe ainaniñe atšbe Espíritu cháumashënguama, as chënga atšbe soyëngama entšanga mochantsëtsëtsnaye.

<sup>19</sup> Atše chanjama bëts soyënga celoca;

y quem luariñe echántsemna buiñe, iñeshe y ngona mo jantšetëshcá, atšbe obenana jinýanýiyama.

<sup>20</sup> Cabá chë puerte uámana te, chë Bëngbe Utabná bëts soyënga jamama ndobuache ora, shinýe ndoñe queochátsbuashinýinýana y juashcona buánganëtema mo buiñcá echántsemna.

<sup>21</sup> Y as, ndánaca Bëngbe Utabná tbojtsotšëmbuaná, cha bochanjatsbocá.’ Chca Joel tempo tojanábema ca” —Pedro tojánayana.

22 Chora Pedro tojatanéyana: “Israeloquënga, šmochjouena ntšamo chochanjauyancá: Bëngbe Bëtsá ndegombre tcmónjaninýanýé, Jesúsbioye chabe trabajo bi-amnayá cha tbojánbemama. Chë soye Bëngbe Bëtsá tcmónjaninýanýé, Jesús chë Nazaretocáftaca cha tojanma bëts soyéngaca y ójnanana soyéngaca, Bëngbe Bëtsabe obenana jinýanýiyama. Cach tsëngaftanga chë soyéngama šmondétatšëmbo, Bëngbe Bëtsabe obenánaca chë soyënga tsëngaftangbeñe Jesús tonjánmayeca.

23 Ndegombre tsëngaftangbe cucuatšinë Jesús tmonjánboshjona, pero cabá ndëboshjona ora, Bëngbe Bëtsá tojanjuabó ntšamo jopásana yojannama; y ntšamo tsëngaftanga cháftaca šmochjanmámnnaca cha inatátšëmbo. Tsëngaftangna Jesús šmonjanishache y šmonjanma cha chamóbama y chamocrucificama, bacna entšangbe cucuatšinë.

24 Pero Bëngbe Bëtsá tojama cha cháuatayenama; y chë obanëngbe luarentšana tbojatsbocá, er ndoñe yonjopodena cha obaná chaoquedama ca” –cha tojánayana.

25 Chora Pedro tojatanéyana: “Rey David tempo Jesusbiamma mëntšá tojéftsanabema, ntšamo cha Bëngbe Bëtsábioye tbojanianama:

Atšbe Utabná, aca sempre átšeftaca condbétsemna,  
y sempre átšeftaca condboquedá atše juajabuáchama,  
chíyeca ndocná queochatobenaye atše jauátjanama.

26 Chíyeca atše corente oyejuayá sëntsemna,  
y atšbe uayásaca cbontsatschuaná.

Atše masque chanjóbana, tsábá sëndétatšëmbo aca atšbe Bëtsá, atše chaitayenama cochjamama.

27 Aca, Bëngbe Bëtsá, obanëngbe luarentše ndoñe quešcochátšboshjona,  
y ndoñe quecochatsleséncia acbe uámana oservenabe cuerpo chaotsopochocama.

28 Aca chë tsabe benache šconjaninýinýé, ntšamo tsabe vida jtsebonnama.  
Aca átšeftaca condbétsemnama, atše puerte oyejuayá sëntsemna ca –David tojéftsanabema ca.”

29 Chentšana Pedro tojatanéyana: “Baconga y batanga, šontsemna ndegombre tsëngaftanga jábuayenana tsábá chacmésertama. Bëngbe tempsca bëts taitá David tojanóbana y tmojanatbontsá, y bënga montsemna cha tmojanatbontsá luare béconana.

30 Cach David canýe Bëngbe Bëtsabe juabna oyebuambnayá inamna. Cha tsábá inatátšëmbo Bëngbe Bëtsá bëtská tbojanšbuáchenama, Davidbe entšanguentsana canýa, Cristo, cach Davidcá rey jabemama.

31 David inatátšëmbo chë Uámana Uabuayaná, chë Cristo, cháuatayenama Bëngbe Bëtsá yochjanmama. Chama cha tojánayana y tojéftsanabema, obanëngbe luarentše Cristo ndoñe ntjéftseboshjonana y Bëngbe Bëtsá ndoñe ntjalesénciana chabe cuerpo chaotsopochocama ca.

32 Bëngbe Bëtsá tojama Jesús cháuatayenama y bënga cha fsënjinye. Chíyeca bënga fsëntsetatšëmbo chca ndegombre bétsemnama.

33 Bëngbe Bëtsá, Jesús celoye tbontanatsbaná chabe catsbioica jtsatsmënama jtsemándayama, y Bëngbe Bëtsá chë Uámana Espíritu Jesúsbioye tbojanëntšabuaché ntšamo chë Taitá tbojanšbuachenacá. Ntšamo tsëngaftanga šmontsonýá y šmontsuenancá entsemna, Jesucrísoftaca chë Uámana Espíritu bëngbe ainaniñe cháuamashënguama Bëngbe Bëtsá tojámayeca.

34 David ndoñe Jesuscá celoye tonjána, pero mëntšá tojéftsanábema:  
Bëngbe Bëtsá atšbe Utabná Crístbioye tbonjanianama:

‘Atšbe catsbioica cochtsetbemana,

35 acbe uayayënga acbe cucuatšinë chamoquedama atšbe obenánaca chjamëntscuana ca.’

36 Chora Pedro tojatanéyana: “Tsëngaftanga nýets Israeloquënga šmochtsetátšëmbo, atše ndegombre cach Jesusbiamma sëntsoyebuambnama. Cha tsëngaftanga



šmonjancrucificá, pero Bëngbe Bëtsá chábioye tbonjábema Bëngbe Utabná y chabe Uámana Uabuayaná, chë Cristo ca.”

<sup>37</sup> Chë soyënga tmojanuena ora, entšanga cochtsetšenánënga imojtsemna, y Pedro y chë inÿe ichmónëngbioye tmojanëyana: —Baconga, ¿ndayá mora jamama šojtsamna ca?

<sup>38</sup> As Pedro tojanëjua: —Ngménaca šmochtenójuaboje bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache. Chca chašmojama ora, cbochanjubaye mo chábeñe ošbuachiyëngcá, Jesucristo atše jótšëmbonëse. Chcase, Bëngbe Bëtsá tšëngaftangbe bacna soyëngama cmochanjáperdonaye y echanjama chë Uámana Espíritu tšëngaftangbe ainaniñe jtsemándayama cháuamashënguama.

<sup>39</sup> Bëngbe Bëtsá chë soyënga tcmonjanašebuachená tšëngaftangbiama, tšëngaftangbe básengbiama y nÿets chë bën luarënguenache imomna entšangbiama, nÿetscanga chë Bëngbe Utabná Bëngbe Bëtsá chábioye jabama chaojubuáyanënga ca.

<sup>40</sup> Inÿe palabréngnaca Pedro tojatanëyana y bëtscá tojanabuayená mëntšá: “¡Bëngbe Bëtsá chë Israeloca bacna entšanga echanjácastigaye. Chašmótsbocamna, chëngbentšana šmochtsojuánañe ca!”

<sup>41</sup> Ba entšanga imojtsanošbuaché ntšamo Pedro tojanëyanama y tmojánenabaye. Cach te mo unga uaranga entšanga nÿetsá tmojanoboté, Jesucristbeñe ošbuáchiyënga jtsemnama.

<sup>42</sup> Chënga corente imojtseboše jtsamama chë Jesusbe ichmónënga imojtsabuatambá soyënga. Tšabá yojtsacochebiona nÿetscanga cánÿiñe jtsemnama y imojanamana mo chë Jesucristbeñe ošbuachiyëngcá cánÿiñe jtseyayana y cánÿiñe Bëngbe Bëtsáftaca jtscuëntayana.

### *Ntšamo chë natsana Crístbeñe ošbuáchiyënga vida imnabomna*

<sup>43</sup> Nÿetscanga imojtsenjnanaye, chë ichmónënga bëts soyënga y inÿe soyënga chabe obenana jinÿanÿiyama chamomama Bëngbe Bëtsá tojánmayeca.

<sup>44</sup> Nÿetsca chë Jesucristbeñe ošbuáchiyënga sempre cánÿiñe mo canÿacá imojtsemna y nÿetsca chëngbe bomna soyënga nÿetscangbiama yojtsemna.

<sup>45</sup> Chënga imojanamana fshantsënga jtsatobuúyana y chë imojánbomna soyëngnaca, y chë crocénana jujátayana ntšamo chë ínÿyenga tojtsëjabotcá.

<sup>46</sup> Cada te imojanamana Bëngbe Bëtsabe bëts yebnentše jénefnana cha jëtschuayama, y yebnënguenache cánÿiñe imojtsesaye oyejuayënga y ndoñe ojëndayënga.

<sup>47</sup> Chënga imojanamana Bëngbe Bëtsá jtsatschuanayana, y nÿetsca entšanga imojtsejuabnaye chë Jesucristbeñe ošbuáchiyëngbiama tšabe entšanga imojamna ca. Y cada te Bëngbe Bëtsá yojtsama más ošbuáchiyënga chamóbotema, chë ndëmuanÿyënga cha yojtsatsebacayënga.

## 3

### *Pedro canÿe coshétbioye tbojanshná*

<sup>1</sup> Canÿe te, Pedro y Juan Bëngbe Bëtsabe bëts yebnoye tbojánata bëts mošenana ora. Chca ora entšanga imojanamana Bëngbe Bëtsáftaca jtscuëntayana.

<sup>2</sup> Bëngbe Bëtsabe bëts yebnentše canÿe cosheto yojtsemna; tojanonÿná orscana chca šocá inamna. Entšanga imojanamana cada te cha juanatsana canÿe luaroye, Bëngbe Bëtsabe bëts yebnoca, Botamana Amashjuana ca uabáinoye, chë tmojtsachnëjuanënga lemošna chaótejañama.

<sup>3</sup> Pedro y Juan Bëngbe Bëtsabe bëts yebnoye jamashënguama chë cosheto tojánanÿe ora, canÿe lemošna chátbioye yojótejañe.

<sup>4</sup> Chatna chë šocá imojtsonÿyaye, y Pedro tbojaniyana: “Scochtsënÿyaye ca.”

<sup>5</sup> As cha yojtsënÿyaye y yojtsejuabnaye ndayá chjójyëngacñe ca.

<sup>6</sup> Chora Pedro tbojaniana: “Quetsátsbomna ni crocénana, ni castellano aca jatsetayama, pero atse chanjama Jesucristbe obenánaca ndayá acbiama jamama atse stsobencá: Jesús chë Nazaretocá obenana endbomna; chíyeca atse cbëyana chabe mándoca, matëtsbaná y cochtsana ca.”

<sup>7</sup> Pedro chca tbojaniana ora, tbojanábuacueshache catšbióicatše y tbojtansbaná, y cachora chë cosheto shecuatšíñe y shëmiabeñe añemo yojsatsbomna.

<sup>8</sup> As chë cosheto, canye jontsënjëse tšabá tojtantsá y tojanontsé tšabá jtsanana, y Bëngbe Bëtsabe bëts yebnoye Juan y Pédroftaca tojánamashëngo; yojsayontsënjnaye y Bëngbe Bëtsá ibojsatschuanaye, tbojanshnama.

<sup>9</sup> Chë Bëngbe Bëtsabe bëts yebnentše imojétsemnënga nyetscanga cha tmojáninye tšabá jtsanana y Bëngbe Bëtsá jtsatschuanayana.

<sup>10</sup> Chënga imnatátšëmbo cha chë cosheto yojamnama, chë nda yojanamana Bëngbe Bëtsabe bëts yebnoca, chë Botamana Amashjuanentše jótbemana, entšanga lemošna jotejañama. Cha tšabá yojsatsmënamna entšanga ojnánënga imojtsemna.

### *Ntšamo Pedro tojanoyebuambá Salomonbe Amashjuana ca uabáinentše*

<sup>11</sup> Chë cosheto ya shnaná ora, ndoñe yontseboše Juan y Pédrëbentšana joluárana. As, nyetsca entšanga ojnánënga tmojanótjajo chë amashjuana otsbojebniñe, Salomonbe Amashjuana ca uabáinoye, chë Juan, Pedro y chë cosheto shnaná imojétsemnoye.

<sup>12</sup> Pedro chë entšanga tojánanye ora, tojanëyana: “Taitanga y mamanga, Israeloquënga, ¿ndáyeca chë soyëngama ojnánënga šmojtsemna? ¿Ndáyeca nye šcojtsëbuátja? ¿šmojtsejuabná nye bëndatbe obenánaca quem boyabása tifjashná ca? ¿O šmojtsejuabná quem boyabása tifjashná bëndata Bëngbe Bëtsá puerte tšabá ftsadoránayeca?”

<sup>13</sup> Bëngbe Bëtsá, ndábeñe Abraham, Isaac y Jacob imojanošbuaché y ndábeñe bëngbe bëts taitanga imojanošbuaché, cha tonjinyanýe chabe oservená Jesús chë más uamaná yomnama. Cha tšëngaftanga chë mándayëngbe cucuatšíñe šmonjáboshjona chamóbama. Pilato enjëtseboše Jesús jëtšboshjonama, pero tšëngaftanga Pilatbe delante šmonjánayana chca ndoñe šmontsanboše ca, y chíyeca Pilato ndoñe tbontanboshjona.

<sup>14</sup> Jesús uamaná y nyetsca soyënguiñe tšabá amá enjamna, pero tšëngaftangna cha šmontsanaboté y Pilato šmonjanimpadá chabe cuenta canye boyabása, entšá obanayá, chabuatsboshjonama.

<sup>15</sup> Y chca, chë ndegombre tšabe vida chašmotsebomnama amábioye tšëngaftanga šmonjanóba. Pero Bëngbe Bëtsá tojanma cha cháuatayenama y bënga chë soye fsënjáninye y chama fsëndëtatšëmbo.

<sup>16</sup> Jesús puerte obená endmënayeca, quem cosheto añémoca entsatsmëna. Ntšamo šmonjinye y šmonjatátšëmboncá ndegombre tonjopasá Jesúsbeñe betsošbuáchema. Chë Jesúsbeñe jtsošbuáchiyana tonjama cha tšabá tšëngaftangbeñe chaotsatsmënama.

<sup>17</sup> “Taitanga y mamanga, atse sëndëtatšëmbo tšëngaftangbe causa y tšëngaftangbe amëndayëngbe causa Jesús tojanóbanama. Pero tšëngaftanga chca šmojanma, ndayá šmojétsamama ntsetatšëmbcá.

<sup>18</sup> Tempo, Bëngbe Bëtsá chë chabe juabna oyeubambayënga tojanamëndá entšanga jábuayenama, chë Bëngbe Bëtsabe Uámana Uabuayaná puerte ngmënanana yochtsanbomnama. Morna, ntšamo Bëngbe Bëtsá tojanayancá ya tonjochnëngo.

<sup>19</sup> Chcasna, ngmënacá menójuabonga bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache, chca, tšëngaftangbe bacna soyënga cha chacmabuajuánama. Chca chašmojamëse, Bëngbe Bëtsá echanjama tšëngaftangbe ainaniñe oyejuayana chašmotsóbomñama,

<sup>20</sup> y tšëngaftangbioye bochanjíchmuá Jesús, chë tempo chabe Uámana Uabuayaná Bëngbe Bëtsá tbojanbemá.

<sup>21</sup> Canÿe te echanjóshjango, Bëngbe Bëtsá lempe tsmëmacá jëtsbemama. Chë tentscuana Jesús bontsemna celoca joquédana. Chca echanjochnëngo ntšamo Bëngbe Bëtsá chabe juabna oyebuambnayëngbiajana entšanga tojanabuayenacá.

<sup>22</sup> Moisés bëngbe bëts taitanga tojanabuayená: ‘Chë Utabná Bëngbe Bëtsá canÿe chabe juabna oyebuambnaya ntšamo atše sëndmëncá, cmochanjayentšíchmua. Cha tšëngaftangbentsana echanjábocna y tšëngaftanga cmontsamna ntšamo chacmojtsëtsësnacá cha jtseyeunanana.

<sup>23</sup> Ndánaca chábioye ndoñe chabonjoyeuná, cha bontsemna chë Bëngbe Bëtsabe entšangbentsana luaroca jtsemnama y chamotsepochocama ca’ –cha tojánayana.

<sup>24</sup> “Y nÿetsca chë Bëngbe Bëtsabe juabna oyebuambnayëngnaca Samuel orscana, entšanga tmojanabuayená ndayá quem tempo yochjanchnënguama, ntšamo mora montsonÿacá.

<sup>25</sup> Chabe juabna oyebuambnayëngaftaca Bëngbe Bëtsá tojanašebuachená bëts soyënga tšëngaftangbiama, y tšëngaftangbe bëts taitangftaca canÿe trato tojánbema; chë soyënga cabá tšëngaftangbiama entsemna. Bëngbe Bëtsá Abrahámbioye mëntsá tbojaniyana: ‘Chë ácbentsana entšangbeyeca tšabe bendicionënga chanjama nÿetsca quem luarentša entšangbiama ca.’

<sup>26</sup> Bëngbe Bëtsá tojama chabe oservená cháuatayenama y natsana tšëngaftangbioye tbojanichmó, bacna soyënga amana chašmotsajbanama. Y chca, Bëngbe Bëtsá jamama tšëngaftangbeñe tšabe bendicionënga chaotsemnama ca” –Pedro tojánayana.

## 4

### *Pedro y Juan Jerusalenentša mandadëngbe delante*

<sup>1</sup> Pedro y Juan cabá entšanga imojtsëtsësnaye; chorna chë chata ibojtsemnoye tmojánashajna judiëngbe bachnanga, Bëngbe Bëtsabe bëts yebnentša soldadëngbe amëndayá y saduceo ca uabaina judiëngbe amëndayënga.

<sup>2</sup> Chatna entšangbioye imojtsabuátambaye Jesús tojtanayenama y chë soye yojánayana obanënga ndegombre mochtayena ca. Chë causa, chë tmojánashajna amëndayënga tojánëtna.

<sup>3</sup> As, Pedro y Juan tmojánishëche y ya jetiñe yojtsemna causa, cárceloye tojanëtame yëfsanëntscuana.

<sup>4</sup> Masque chca, banga entšanguentsana, ntšamo Pedro y Juan tbojanayancá tmojanuenënga, aíñe Jesucristbeñe imojtsošbuáchiye. Chë tentscuana shachna uaranga Jesucristbeñe ošbuáchiyënga imojtsemna, nÿe boyabásenga jacuéntase.

<sup>5</sup> Yëfsana, chë judiëngbe amëndayënga, judiëngbeñe bëtsëjemëngcá amëndayënga y ley abuátambayënga Jerusalenentše tmojánenefjna.

<sup>6</sup> Chéntšnaca imojtsemna, chë bachnangbe más uámana amëndayá Anás ca uabainá, Caifás, Juan, Alejandro y chë bachnangbe más uámana amëndayëngbe nÿetsca pamíllangnaca.

<sup>7</sup> Chora chënga tmojanmandá Pedro y Juan junatsama, y chëngbe tsëntsaca tojanatsá y mëntsá tmojanatjá: –¿Ndabe obenánaca chë soyënga šojtsama, o, nda derecho tcmënjatšatá chë soyënga chašotsamama ca?

<sup>8</sup> As Pedro, chë Uámana Espíritu chabe ainaniñe corente jtsemándayëse, mëntsá tojanëjua: –Israeloca mándayënga y bëtsëjemënga,

<sup>9</sup> mënté šconjatjá chë jama ndobenáftaca tšabe soye tifjamama y ntšamo cha mora jama yojtsatobenama.

<sup>10</sup> Chcasna, ntšamo tojopasama cbochanjabuayená, chca, tšëngaftanga y nÿetsca Israeloca entšanga chë soyënga chašmotsetatšëmbuama. Quem boyabása, chë tšëngaftangbe tsëntsaca entsemná, Jesucristo chë Nazaretocabe bëts obenánaca chca tšabá entsatsmëna.

Y Jesús endmëna nda tsëngaftanga šmonjancrucificá y ndabiama Bëngbe Bëtsá tojanma cháuatayenama.

<sup>11</sup> Jesúsbiama Bëngbe Bëtsabe uabemana palabrenguiñe mëntsá endayana: “Chë yebna jebuanënga tmontsanaboté ndëtsbé, mora chë más bëts uashacuanësentše entsejájona ca”. Tsëngaftanga šmondmëna mo chë yebna jebuanëngcá, er Jesúsbioye šmontsanaboté y mora cha chë más uamaná entsemna.

<sup>12</sup> Nye cha yobena tsëngaftanga játsebacama. Bëngbe Bëtsá ndocna inye entšábioye tbonjatšetá chabe obenana chca jamama; chíyeca quem luarentše ndocná más quenátobena bënga játsebacama. Nye Jesucristbe obenánaca aíñe ca —Pedro tojánayana.

<sup>13</sup> Chënga imojenjnaná Pedro y Juan tša añémoca ibojtsóyebuambnama tmojáninye ora, y chata tempo nduatsjínnyenata y librëša nduabuatmata bëtsemnana tmojántatšëmbona ora. Chca chë mándayënga tmojántatšëmbona chata Jesúseftaca bayté ibojamnama.

<sup>14</sup> Y entšanga imojtsonyaye chë tmojanshná cha chentše chátaftaca yojtsemnana; chë causa, chënga ndocá más tmonjanobená chatbe contra jatichámuana.

<sup>15</sup> As chora tmojanamëndá chentšana chábuaisebocnama y chentše tmojanoquedangna chë soyama imojtsenatsëtsnaye.

<sup>16</sup> Chënga imojtsentjanaye: “¿Ndayá chátaftaca mochjama ca? Jerusalenentše oyenënga montsetátšëmbo chata chë bëts soye Bëngbe Bëtsabe obenánaca tbojamama; chë causa, bënga ndoñe quemuátobena jayanana chata chca ndoñe tbonjama ca.

<sup>17</sup> Pero entšanga chama ndoñe más chamondëtsencuéntamna, chata mochjáuyana: ‘Ndoñe más entšángbeñe Jesús šmattsebáyana; y ndoñe chašmonjouenëse, jabuache castigo šochántsebomna ca.’ ”

<sup>18</sup> As chë mándayënga cachiñe chata tmojánachembo y tmojanamëndá ndoñe más Jesús jtsebáyana, ni chabiama entšángbeñe jtsabuátambayana.

<sup>19</sup> Pero Pedro y Juan tbojánayana: “¿Ntsamo tsëngaftanga šmatjayana ntsamo fchanjayanama ca? Ndegombre, Bëngbe Bëtsabe bominyiñe ndoñe tšabá quenátsmëna tsëngaftangbioye aíñe joyaunayana y chábioye ndoñe.

<sup>20</sup> Er bënga queftsátobena jtsajbanana oyebuambnayana chë tifjinye y tifjouena soyëngama ca.”

<sup>21</sup> Chë mandayëngna chátbioye tojtsanautatjá, pero chentšana tmojtanabáshejuana. Nyetsca entšanga Bëngbe Bëtsá imojtsatschuanaye ntsamo tojanopasama; chíyeca, chë mándayënga ndoñe tmonjanobená tondaye ntjinnyenana ntsamo chata jácastigama.

<sup>22</sup> Chë boyabása, ndáftaca chata chë bëts soye Bëngbe Bëtsabe obenánaca tbojanma, inabomna canta bnëtsana uatama más.

### *Jesucristbeñe ošbuáchiyënga Bëngbe Bëtsá tmojanimpadá más añemo chauatšatama*

<sup>23</sup> Pedro y Juan ya tmojtanabáshejuana ora, tbojánata chë inye ošbuáchiyëngaftaca jateninyenama y lempe ntsamo chë bachnangbe amëndayënga y bëtsëjemëngcá mándayënga chátbioye tmojanëyancá, chëngbioye tmojanacuntá.

<sup>24</sup> Chënga chca tmojanuenentšana, nyetscanga cányiñe tmojanontsé Bëngbe Bëtsáftaca mëntsá jencuéntama: “Bëngbe Utabná, aca chë nda tojama celoca, fshantse, nyetsca béjayënga y lempe ntsamo chenache yomncá,

<sup>25</sup> chë Uámana Espíritbiajana tcojánayana y acbe oservená David, ntsamo tcojanayancá tojanábema, mëntsá:

¿Ndáyeca entšanga yapa imojtsetsátjaye ca?

¿Ndáyeca imojtsejuabná nye bonamentiama soyënga jamana?

<sup>26</sup> Quem luarentša reyënga y amëndayënga imoprontánënga,

nyetscanga tmojenoyeuná Bëngbe Bëtsá y chabe Uámana Uabuayaná chë Cristbe contra jtsemnana ca —cha tojanábema.

<sup>27</sup> “Ndegombre chca tonjopasá. Rey Herodes y Poncio Pilato, quem bëts pueblentše, ndoñe judiëngaftaca y israelitëngaftaca tmonjánenefjna, jenóyeunayama ntšamo jamana, Jesús chë acbe uámana oservená y chë Uámana Uabuayaná tcojabemábioye jóbama.

<sup>28</sup> Tempo, Bëngbe Bëtsá, acbe obenánaca y ntšamo icnabošcá tcojanmandá ntšamo mora chaotsemnama, y chënga chca Jesúseftaca tmonjama.

<sup>29</sup> Morna Bëngbe Bëtsá, mouena ntšamo chënga montsichamo, bënga jasúfriama cašojtsamna ca; chcasna, cochjama bënga fchayobená Jesusbe tšabe noticiënga bëts añémoca entšángbeñe jtsóyebuambnayama,

<sup>30</sup> y cochjama acbe obenánaca šoquënga tšabá chamotsatsmënema y cochjama bënga fchayobená bëts soyënga jamama, Jesús chë uámana oservenabe obenánaca y cha jótšëmbonëse ca” –chënga tmojánayana.

<sup>31</sup> Bëngbe Bëtsáftaca jencuëntama tmojanpochocá orna, chë tmojánenefjntše tojanangmémana; y nyëtscangbe ainaniñe chë Uámana Espíritu tojanontsé más jtsemándayana, y chënga tmojanontsé más añémoca Bëngbe Bëtsabe soyëngama entšanga jábuayenama.

### *Nyëtsca bomna soyënga nyëtscangbiama yojtsemna*

<sup>32</sup> Jesucristbeñe ošbuáchiyënga, nyëtscanga canye juabna imojtsebomna y ainaniñe cach canye ebionana. Ndocná ntjatichamuana chabe soyënga nye chabiamna yojtsemna ca, pero aiñe imojtsichamo, “atše sëndbomna soyënga nyëtscangbiama entsemna ca”.

<sup>33</sup> Chë Jesusbe ichmónëngna puerte obenánaca mëntšá imojtsichamo: “Fsënjinye y fsëntsetatšëmbo Bëngbe Utabná Jesús obanënguentshana tojtayenama ca.” Y Bëngbe Bëtsá yojtsama chë ichmónënga bëtscá tšabe bendicionënga chamotsebomnama.

<sup>34</sup> Jesucristbeñe ošbuáchiyëngbeñe ndocná yonjamna ndayánaca uajabotá, er nyëtscanga fshantse o yebna bomnënga imojanamana jtsatobuíyana, y chë crocénana

<sup>35</sup> chë ichmónëngbiome jayentšbuáchiyana, ntšamo tojtsëjabotcá nyëtscanga jujátayama.

<sup>36</sup> Chca tojanma canya Bëngbe Bëtsabe bëts yebnoca trabajayá, José ca uabainá; cha chë ichmónënga imojanábobuatma Bernabé ca (y chca iuayana “Añemuayá ca”). Bernabé yojamna Chipre luarocá.

<sup>37</sup> Chana, fshantse yojtsatobuiye, y chë crocénana Jesusbe ichmónëngbiome yojáyentšbuachiye, chë uajabótëngbiama chaoservema.

## 5

### *Ntšamo Ananías y Safíraftaca tojanopasá*

<sup>1</sup> Inamna canye bacó, Ananías ca uabainá, y chabe shemna, Safira ca. Chatna canye fshantse tbojániye.

<sup>2</sup> Ananías y Safirna tbojanenóyeunata; chcasna, batsá crocénana cachatbiama tbojanobuajó y chë tojanójama crocénana ichmónëngbiome Ananías tojanamba, pero tojanëyana chana canjamna nyëts crocénana ntsachetšá chë fshantsama tbojanosháchiñe ca.

<sup>3</sup> As Pedro tbojaniyana: “Ananías, ¿ndáyeca tcojalesenciá Satanás acbe ainaniñe bacna juabnënga chacmócochënguama, Uámana Espíritu chë crocénánama jabuambayama ca? Acna chë fshantsama tcmojtabuená crocénánentshana cach acbiama batsá tcontábojama.

<sup>4</sup> Cabá ntsatobuiye ora, chë fshantse ábeshe endánmëna y tcojtsatobuíyentsana chë crocénana acbiana y chánaca condánobena ntšamo tcojtsebošcá jamama. ¿Ndáyeca acbe ainaniñe tcojajuabó chë crocénánama chca jobostérama? Chca jamëse, ndoñe nye entšángbiome quecatabuambná, sinó Bëngbe Bëtsánaca ca” –Pedro tbojaniyana.

<sup>5</sup> Ananías chë palabrënga tojanuena ora, obaná tojánshajaye. Y nyëtscanga chama tmojántatšëmbonënga corente imojtsauatja.

<sup>6</sup> Chentšana, básefta bobontsënga tmojánashhajna y Ananíasbe cuerpo entšëjuaca tmojanandmaná y jauábtontsama tmojanamba.

<sup>7</sup> Mo unga horëntscose, Ananíasbe shema Safira tojánashjango, pero ndoñe yontsetátšëmbo ntšamo chabe boyáftaca tojanopasama.

<sup>8</sup> Chora Pedro tbojantjá: —Ndegombre šmëyana, ¿chë šmonjayana nÿetšnama chë fshantse šmojiye ca?

As chë shema tbojanjuá: —Aíñe, nÿetšnama fsënjiye ca.

<sup>9</sup> Pedro tbojanijana: —¿Ndáyeca tsëndata šojenoyeuná Bëngbe Utabnabe Espíritu jabuambayama, y cabá castigo jtsebmnama ndoñe šontsobatmana ca? Acbe boyá jauátbontsama tmonjuambënga muentše bësoca montsemna y mora ácnaca cmochanjuamba ca.

<sup>10</sup> Cachora Safira Pédrëbe shecuatšentše obaná tojánshajaye. Chë bobontsënga tmojtanamáshjna ora, obaná Safira tmojáninÿena; asna, chentšana tmojanamba y cachabe boyabe juachaca tmojanatbontsá.

<sup>11</sup> Y nÿetsca Jesucristbeñe ošbuáchiyënga chentše imojtsemnënga y nÿetscanga chë soye tmojántatšëmbonënga, corente imojtsauatja.

*Ba bëts soyënga chë ichmónënga tmojanma, Bëngbe Bëtsabe obenana jinÿanÿiyama*

<sup>12</sup> Chë Jesucristbe ichmónëngaftaca ba bëts soyënga entsángbeñe yojtsebinÿna Bëngbe Bëtsabe obenana jinÿanÿiyama; y nÿetsca Jesucristbeñe ošbuáchiyënga imojanamana Bëngbe Bëtsabe bëts yebnoca jénefnana, Salomonbe Amashjuana otsbojebnentše.

<sup>13</sup> Chë inÿenga, chë Jesucristbeñe ndošbuáchiyëngna, imojtsauatja Jesucristbeñe ošbuáchiyëngaftaca jtsenutana; pero entsangna chë ošbuáchiyëngbiana tšabá imojtsencuëntaye.

<sup>14</sup> Bëngbe Utabnábeñe ošbuáchiyënga más imojtsóbotena, bëtscá boyabásenga y shembásengnaca.

<sup>15</sup> Tša bëts soyënga chë ichmónëngaftaca yojtsebinÿna; chíyeca entsanga imojanamana jutsnëshangañe y tjuashënguiñe tsáshenoye šoquënga jubuacnana, chca, Pedro chëjana tojtsachnéjuana ora, nÿe mo chabe sómbrënaca chëngbe cuerpëjana chaochnënguama, shnánënga jtsatsmënama.

<sup>16</sup> Jerusalén chábuañe pueblënguentšana ba entsanga imojanamana jabana, y šoquënga y bacna bayëjbe juabna uambayënga imojtsëyabó; y nÿetscanga shnánënga imojtsatsmëna.

*Bëngbe Bëtsá tojanma Pedro y chë inÿe ichmónënga cárcelocana natjëmbana chámuaisebocnama*

<sup>17</sup> Chë ichmónënga tša tšabá imojtsamama, chë judío bachnangbe más uámana amëndayá y chabe ústonënga, chë saduceunga, puerte envidia imojtsebmna.

<sup>18</sup> As chë ichmónëngbiyoye tmojánishëche y chë bëts pueblentša cárceloye tojtsanëtame.

<sup>19</sup> Pero ibetna, Bëngbe Utabná canÿe ángel tbojanichmó y chë utámenentša bësášangá cha tojánatëfjo, chënga tojtanëbuacna y mëntšá tojanëyana:

<sup>20</sup> “Motsajna, Bëngbe Bëtsabe bëts yebnentše šmochjámashjna, y entsanga šmochjabuayená ntšamo cuanjama chë nÿetsca tescama yomna tšabe vida jtsebmnama, Jesucristoftaca cánÿiñe mo canÿacá jtsemnëse ca.”

<sup>21</sup> Ntšamo tmojanuencá, yëfsana cabá cachëse Bëngbe Bëtsabe bëts yebnoye tmojána y tmojanontšë entsanga jabuátambana.

Chëntscuana, chë bachnangbe más uámana amëndayá y chabe ústonënga, chë Israeloca bëtsëjemëngcá mándayënga y inÿe chentša amëndayënga tmojánachembo jénefnama y jenóyeunayama; as chora chënga tmojanmandá chë utámenocana chë ichmónënga jobiatšama.

<sup>22</sup> Pero chë soldadënga chë utámenoye tmojánashhajna ora, chënga chentše ndoñe tmonjánanÿena. Chcasna, chënga tmojtaná chë mándayënga chca jaúnayama.

23 Y tmojánayana: “Chë utámenoca fsënjínÿena lempe tšabá endëtsëtámeñe y soldadëngna nÿetsca bëšašangá monduabojanÿanga; pero fsënjatëfjo y tsoye fsënjámashjna orna ndocná chibiátinÿena ca.”

24 Chë bachnangbe amëndayënga y chë Bëngbe Bëtsabe bëts yebnentša soldadëngbe amëndayá chca tmojanuena ora, yojtsetëmnana y imojtsentjanaye ndayá chentšana yochjanopásama.

25 Chorna, chënga imojtsemnentše canÿe boyabása tojánashjango y mëntšá tojanëyana: “Chë šmojutámiënga mora Bëngbe Bëtsabe bëts yebnocca montsemna, entšanga montsabuatambá ca.”

26 Chë soldadëngbe amëndayá tojána soldadëngaca, chë Jesusbe ichmónënga junatsama; pero nÿe tšabá tmojanënatse, er chënga entšangbiamma imojtsauatja, nderado cachëngbioye ndëtsbéngaca muantsëbaye.

27 Chëngbioca tmojanëshejajna ora, mandayëngbioye tmojanënatse; chora chë bachnangbe más uámana amëndayá mëntšá tojanëyana:

28 —Bënga jabuachana tcbontsëuyaná y tcbonjúyana ndoñe šmontselesenciana jtsóyebuambnayama chë boyabása Jesús tojánayana yojtsemna jabuátambama soyëngama ca. Masque chcasna, mora tšëngaftanga nÿetsca chë Jerusalenentša oyenënga chabe soyëngama šmojtسابuatambá y šmojtseboše, cha tojanóbanama castigo bëngbeñe chaotsemnáma ca.

29 Chorna, Pedro y chë inÿe ichmónënga tmojánayana: —Bënga šontsamna natsana Bëngbe Bëtsá joyeunayana y chentšana entšángbioye.

30 Chë Taitá, nda bëngbe bëts taitanga monjánadorana, cha tojama Jesús cháuatayenama, chë nda tšëngaftanga šmonjanóba canÿe cruciñe juajabonjëse.

31 Bëngbe Bëtsá tbontatsbaná y chabe catsbioica tbojëtstbema, jtsamëndayama, y tbojábema entšangbe Unachayá y Atsebacayá, chca, Israeloca entšanga ngménaca chamuenójuaboma bacna soyënga imojtsamama y chca amana chamotsajbanama, y chëngbe bacna soyëngama perdonánënga chamotsemnama.

32 Bënga fsëntsichamo ndayá bënga ndegombre tifjinÿe Bëngbe Bëtsá chca jtsamana ca; chë Uámana Espíritnaca chë soyëngama endbëtsoyebuambnaye. Bëngbe Bëtsá endbétsama chë Uámana Espíritu cháuamashëngo chë tmojtseyeunanëngbe ainaniñe jtsamádayama ca —chënga tmojánayana.

33 Chë mándayënga chca tmojanuena ora, puerte tmojanotjayaná y tmojánbošena chë ichmónënga jtsëbáyama.

34 Pero chë mándayënguentše yojtsemna canÿe fariseo, Gamaliel ca uabainá. Chana canÿe ley abuatambayá inamna y entšanga puerte imnarrespetana. As cha tojantsá y tojanmandá chë ichmónënga ratotema chentšana jubuacnama.

35 Chentšana chë inÿe mándayënga tojanëyana: “Israeloca taitanga, puerte cuedado šmochtsebomna ntšamo quem boyabásengaftaca šmochjamama.

36 Quem soyama šmochjenójuaboye: Ndoñe bayté quenátsmëna, Teudas tonjánbocna y cha enjánichamo canÿe uámana entšá canjamna ca, y mo canta patse entšanga cha tmojanasto. Pero chora ínÿenga cha tmontsanóba y chabe ústonënga tmontsanáshana, y chca lempe tontsanopochocá.

37 Chentšana, chë entšanga jenábemama enjamna ora, Judas chë Galileocá tonjánbocna y tonjanma báseftanga cha chamuastama; pero chánaca ínÿenga tmontsanóba y nÿetsca chabe ústonënga tmontsanáshana.

38 Chíyeca atše cbëyana, quem boyabásenga matabáshejuana y ndocá mataborlánana. Ntšamo chënga montsamancá, nÿe entšangbe juabna y nÿe chëngbe trabajo tojtsemnëse, betesco echanjopochóca.

<sup>39</sup> Pero chca Bëngbe Bëtsabe soye tomnëse, tšëngaftanga ndoñe quešmochatobenaye jáyëñjana. Cuedado šmochtsebomna, nderado mo Bëngbe Bëtsabe uayayënga šmuatjanenobiama ca” –cha tojanëyana.

Y as chënga Gamaliel tmojanoyeuná.

<sup>40</sup> Chcasna, chë ichmónëngbioye tmojánachembo, tmojtsanachebuánganja y tmojanëyana Jesusbe uabáinaca entšángbeñe ndoñe chamondëtsoyebuambná ca; y chentšana tmojtanabáshejuana.

<sup>41</sup> Chora chë ichmónënga chë amëndayëngbentšana puerte oyejuayënga tmojésanbocna, er Bëngbe Bëtsá tojanalesenciá jasúfriama, chënga Jesusbiana oservënënga bétsemnayeca.

<sup>42</sup> Chentšana, chënga cada te imojanabuatambá y Jesús, chë Uámana Uabuayaná, chë Cristo bétsemnama entšángbioye imojanabuayiyná, Bëngbe Bëtsabe bëts yebnentše y yebnënguenáchnaca.

## 6

### *Chë ichmónëngbiana ujabuáchanënga tmojanëbuáyana*

<sup>1</sup> Chë tempo, Jesucristbeñe ošbuáchiyënga betesco imojtsóbotena. Chora chë Jesucristbeñe ošbuachiyëngbentše, chë judiënga griego biyanga batšá imojtsetšátjaye y chë judiënga hebreo biyangbiana mëntšá tmojánayana: “Chë griego biyangbe viudángbioye ndoñe cachcá quemnatëjabuáchna ntšamo chë hebreo biyangbe viudángbioye cada te montsëjabuachancá ca.”

<sup>2</sup> Asna, chë bnëtsana uta ichmónënga nyetsca chë Jesucristbeñe ošbuáchiyënga tmojanëbuaja y tmojanëyana: “Ndoñe tšabá quenátsmëna, bënga jtsajbanana Bëngbe Bëtsabe palabra oyeambuayana nýe chë viudanga jtsanýenama chë tojtsëjaboto soyënguiñe.

<sup>3</sup> Chcasna, baconga y batanga, tšëngaftanguentsana canýsëftanga mëbuáyana, tšabá mandbomnëngcá šmëbuátmënga, chamotsemna osertánënga y chë Uámana Espiritu chëngbe ainaniñe chaotsemánda, as chënga chë ujabótënga jtsëjabuáchanama trabajo fchanjábanýiye.

<sup>4</sup> Y bëngna šontsamna nyets tempo Bëngbe Bëtsáftaca jtsencuëntayana y Bëngbe Bëtsabe palabra entšanga jtsabuayiynayana ca” –chënga tmojánayana.

<sup>5</sup> Nyetscanga tojanogusetá ntšamo chë ichmónënga tmojanayancá; as, Esteban tmojanábuayana; canýe boyabása puerte ošbuachiyá cha inamna y chë Uámana Espiritu chabe ainaniñe yojanmánda. Chentšana tmojanëbuáyana Felipe, Prócoro, Nicanor, Timón, Parmenas y Nicolás (cha inamna ndoñe judío entšá, Antioquía bëts pueblócá, y cha yojanamana Bëngbe Bëtsá jtsadoránana mo cach judiëngcá).

<sup>6</sup> Chentšana chënga tmojanënatse Jesucristbe ichmónënga imojtsemnoye; chocna, chë Jesusbe ichmónënga Bëngbe Bëtsá tmojanimpadá chë ichmónëngbe trabajënguiñe chë ubuáyanënga chaujabuachama, chëngbe cucuatšënga chëngbe bestšašentše jajájuase.

<sup>7</sup> Más banga Bëngbe Bëtsabe palabra imojtsuenana, y chca, Jesucristbeñe ošbuáchiyënga más imojtsóbotena, y Jerusalenentše más ošbuáchiyënga betesco imojtsóbotena. Y ba judiëngbe bachnángnaca tmojanontšé Jesucristbeñe jtsošbuáchiyana, ntšamo chë ínýenga imojtsanošbuachecá.

### *Esteban tmojánishache*

<sup>8</sup> Esteban, Bëngbe Bëtsabe obenana y chábentšana tšabe bendicionënga yojtsebomnëse, entšángbeñe bëts soyënga yojtsama.

<sup>9</sup> Báseftanga “Ya Cachcá Atabashejuana Oservënënga ca” uabainëngna tmojanontšé Estebanoftaca enatsëtsnayana. Chënga imojamna judiënga Cirenoquënga, Alejandriokuënga, Cilicia y Asioquëgnaca, y chëngbe enefjuana luare yojanabaina “Ya Cachcá Atabashejuana Oservënëngbe Yebna ca”.



<sup>10</sup> Pero chë Uámana Espiritu tojanma Esteban chaóyebuambama bëtscá osertanacá, y chíyeca chënga ndoñe imontsobena ntšamo cha jojuana.

<sup>11</sup> As chënga báseftanga tmojanëbuénaye Estébanbe contra podesca soye chamuayanama, mëntšá: “Cha fsënjoyeuná Moisesbiana y Bëngbe Bëtsabiana ndoñe tšabá jtsóyebuambnayana, mo cuafjoyanguangca ca.”

<sup>12</sup> Chcase chënga tmojanma entšanga, bëtšëmëngcá mándayënga y ley abuátambayënga Estébanbe contra chamóntša enbouenanana; y as, Esteban tmojanotbá y chë mándayënga imojtsemnoye imojuíchëmo.

<sup>13</sup> Y tmojanënatse básefta entšanga, uayátsenaye soyënga y podesca soyënga Estébanbe contra chamuayanama; as chënga mëntšá tmojánayana: “Mua bacna soyënga entsichamo chë Bëngbe Bëtsá jtsadoránama bëtš yebnama y Moisesbe leyëngama.

<sup>14</sup> Y fsënjoyeuná cha jayanana, Jesús Nazaretocá Bëngbe Bëtsabe bëtš yebna caochtse-pochóca y caochjama bënga nýe chabe mandëngaca mandánënga chamotsiyenama y ndoñe ntšamo Moisés bëngbe bëtš taitanga tojëftsanabatambacá ca.”

<sup>15</sup> Chë mándayënga y nýetscanga chentše imojétsetbiamanënga Esteban tmojanonýinýe ora, tmojáninýe chabe jubíá yojtsebuashinýinýana mo canýe ángelbe jubiacá.

## 7

### *Ntšamo Esteban tojanenëuyaná*

<sup>1</sup> Chora chë bachnangbe más uámana amëndayá, Estébanbioye tbojantjá: —¿Ntšamo acbiana montsichamcá ndegombre yojtsemna ca?

<sup>2</sup> As Esteban tojanëjua: —Taitanga y baconga, mouenënga. Bëngbe Bëtsá, chë corente uamaná endméná, Abrahámbioye tbojánëbëbocna, cha Mesopotamioca yojaniyena ora; tbojánëbëbocna, Harán bëtš puebloca joyéanama cabá nda ora,

<sup>3</sup> y Bëngbe Bëtsá tbojaniyana: “Metseboshjona acbe fshantse y acbe pamíllanga y cbochanjinýinýiye luaroye cochjá ca.”

<sup>4</sup> As Abraham chabe luare Caldea tojëftsanboshjona y tojána Haránoca joyéanama. Chabe taitá tojanóbanentšana, Bëngbe Bëtsá Abrahámbioye chë luaroye tbojanánatse, chë mora tšëngaftanga šmotsiyenentše.

<sup>5</sup> Pero quem luariñe ni mo base fshantse ndoñe tbonjëftsanatšetá, ni mo ndayentše jtsiyenama. Pero aíñe Abrahámbioye tbojanšbuachená chë fshantse jatšetayama, chabiana y chabe básengbiana, Abraham tojóbanentšana. Chca tbojanšbuachená ora, Abraham ni canýe šešona bonjánbomna.

<sup>6</sup> Y Bëngbe Bëtsá mëntšá tbojaniyana: “Chë ácbentšana entšanga, ínýengbe luaroa áshjajnënga mochántsemna, y choca oyenënga chëngbe oservénënga chëngbioye mochanjábiana y canta patse uatëntscuana jabuache mochanjasufrina ca.”

<sup>7</sup> Y mëntšánaca tbojaniyana: “Pero atše chanjácastigaye chca oservénënga chacmojábiana luarentša entšanga; y as, chentšana chë ácbentšana entšanga mochanjésebocana y mora bontsemna luaroye mochanjésabo y muentše atše šmochántšadorana ca.”

<sup>8</sup> Bëngbe Bëtsá Abrahámbioye tbojanšbuachená nýe cha y chabe básengbe Taitá cha jtsemnama y jamama tšabe bendicionënga chëngbeñe chaotsemnama, y chama, chaotsinýnamna tbojanmandá chabe šešona, boyabásetema tojonýná ora, base bobachtema chë más delicadentše jatëtšana. Chíyeca, chabe uaquiñá Isaac tojanonýná ora, posufta tianoye Abraham base bobachtema chë más delicadentše tbojantëtše. Isaac cachcá tojanma chabe uaquiñá Jacóoftaca y Jacob cachcá tojanma chë chabe bnëtsana uta uaquiñëngaftaca. Chënga monjamna chë Israeloca bnëtsana uta bëtš pamíllangbe taitanga.

9 “Quem uaquiñenga bēngbe bēts taitanga monjamna. Chēngna, chēngbe uabentsá Josébioye envidia innabomna y tmojtsatanobuiye, Egiptoye canye oservenacá chamotsánatseñama. Pero Bēngbe Bētsá Josébioye nyets tempo ibnauájabuachana,

10 chíyeca nyetsca chabe ngmenēnguentšana tbojanatsbocá y Bēngbe Bētsá tojanma cha chaotsetatsēmbuama tšabá jóyebuambayama chē Egiptoca réybentše, Faraón ca uabainá. Bēngbe Bētsá tojanma chē Faraón chaoyejuá ntšamo José yojamnama; chíyeca Faraón Josébioye tbojánbema Egiptoca mandado y chabe yebnēnguentše oyenēngbiámnaca.

11 “Chē tempo, Egiptó y Canaán luariñe bēts shēntsana tojanóshjango y puerte ngménana yojtsemna y bēngbe bēts taitanga ndoñe imontsobena saná jónyēnama.

12 Pero Jacob tojántatsēmbona Egiptoca saná yojtsemnama; asna, chabe uaquiñenga, chē bēngbe bēts taitanga choye tojanichamó. Chora yojamna chē natsanama chēnga Egiptoye jama.

13 Uta soyama chēnga tmojtesaná ora, José chabe catsátanga tojanéyana: ‘Atše José sēndmēna, tšēngaftangbe uabentsá ca.’ Chca chē Faraón Josebe pamíllangbiana tojántatsēmbona.

14 Chentsana, José tojanmandá chabe taitá Jacob y nyetsca pamíllanga Egiptoye chamotsama. Canysēfta bnētsana shachnēnga imojamna chē Egiptoye tmojánanga.

15 Chcasna, Jacob Egiptoye tojána choca joyéanama. Choca cha tojanóbana y chē inye bēngbe bēts taitángnaca.

16 Jacob y chabe básēnga, ntšamo imojtsobancá, chēngbe cuerpo Siquem bēts puebloye imojtsatambaye y tmojanētebuantsá, Abraham tojēftsanbuamé cuevëshēnguiñe. Abraham canye crocenánama Hamorbe uaquiñēngbioye, chēshēnga yojtēyentsbuamiñe Siquem puebloa.

17 “Ntšamo Bēngbe Bētsá Abrahámbioye tbojanšbuachenacá jamama yojtsobeco ora, Egiptoca corente tmojanoboté Israeloca entšanga y banga chēnga imojtsemna.

18 Cabana, Egiptoca inye rey tojanoyayé y cha Josébioye ndoñe tbojanabuátmana.

19 Chē reyna, bēngbe entšanga, chē bēngbe bēts taitángbioye tojanaingñé y tojanma chēnga puerte chamosufrima; tojanaméndá, chē tmojtsónyña šešonatémēnga cachcá jtsēnyayana chamotsóbanama.

20 Chē tempo canye básetema tojanonýná y cha Moisés ca tmojanabaye. Bēngbe Bētsá Moisesbiana oyejuayá yojtsemna y chabe bētsétsata cach yebnentše tmojanboché unga ishinýentscuana.

21 Cachcá jonýayama yojtsamna orna, Faraonbe bembe tbojanocñe y mo cachabe uaquiñá cuenta tbojanboché.

22 Chca, chē Egiptoquēnga innatátšēmba soyēnga Moisés tmojanbuatēmbá y canye uámana entšá tojánbocna jóyebuambayama y ndayánaca jamama.

23 “Canta bnētsana uata tojánashjache ora, tojanenojuabó jama jtsetatsēmbuama ntšamo chē Israeloquēnga, chabe entšanga imojtsemnama.

24 Canye, Moisés tojáninye canye Egiptocá canye Israelocábioye ibojtsejantšetaye ora; as Moisés tbojanoboguiyaná y chē Egiptocábioye tbojtsanóba.

25 Moisés yojtsanjuabnaye chē Israeloquēnga yojtsósertana, Bēngbe Bētsá yochjanma cach Moisesbe obenánaca chē Egiptoca mandentsana chēngbioye játsebacama ca. Pero chē Israeloquēnga ndoñe yontsésertana.

26 Yēfsana, Moisés tojánanyēna útata, cach Israelocata, ibojtsentsjanaye; chora cha betscó tojána jetsēuyanama y tojanéyana: ‘Tsēndata catsata šondmēna, ¿ndáyeca šojtsentsjanata ca?’

27 As, chē inyábioye ibojtsetsjanayá Moisésbioye tbojtsanjuatsēntše y tbojaniana: ‘¿Nda bēngbeñe tcmēnjayayé mandado y chē tšabá o ndoñe tšabá fstsamama chacuayanama ca?’

28 ¿Cojtseboše átšnaca jóbama, ntšamo tonjopasá yēfse chē Egiptocábioye tconjobacá ca?’

<sup>29</sup> Moisés chca tojanuena ora, Madián luaroye tojtsanachá y choca yojoyena inye luarocana ashjanganacá. Chentše uta uaquiñata yojéftsabamna.

<sup>30</sup> “Chentšana canta bnětsana uatěse, entšanga ndoyena luariñe, Sinaí tjañe béconana, canye ángel tbojáneběbocna zarzěsha yojtsángbototjuanentše.

<sup>31</sup> Moisés yojenjnaná ndayá yojtsonyama y tšabá jinyama tojanobeconá ora, tojanuena Běngbe Bětsá měntšá ibojtsatsětsnaye:

<sup>32</sup> ‘Atše acbe běts taitangbe Bětsá sěndměna, Abraham, Isaac y Jacoběbe Bětsá ca.’ Moisés chama tojaněuatjaná, ibojtsengměmnaye y añemo ndoñe yontsebomna choye jontješiyama.

<sup>33</sup> As Běngbe Utabná tbojanियana: ‘Motsenóshecbotsca, er aca contsemnentše nye atšbiana luare endměna, er átšnaca chentše sěntsemna.

<sup>34</sup> Ndegombre sěnjinye ntšamo atšbe entšanga Egiptoca montsesufrina y sěnjouena chěngbe oyaboyuayana, y atše sěnjabo chěnga jabátsebacama. Chcasna, mabouena, Egip-toye cbochanjíchmuca ca’ –Běngbe Bětsá tbojanियana.”

<sup>35</sup> Chentšana Esteban tojaněyana: “Quem Moisés entšanga tmojtsanaboté y tmojanियana: ‘¿Nda běngbeñe tcměnjajayé mandado y chě tšabá o ndoñe tšabá ftsamama chacuayanama ca?’ Masque chca, Běngbe Bětsá mo mandayacá y atsebacayacá tbojesanichmó, chě zarzěshentše tojanobinyná ángeloftaca.

<sup>36</sup> As Moisés, běngbe běts taitanga Egiptocana tojěsaněbuacna y běts soyěnga tojanma, y inye soyěnga Běngbe Bětsabe obenana jinyanjyiyama Egiptentše, chě Buángana ca uabaina mar bėjayentše y entšanga ndoyena luarentše, canta bnětsana uatěntscuana.

<sup>37</sup> Cach Moisés Israeloca entšanga měntšá tojaněyana: ‘Běngbe Bětsá tšěngaftanguentšana canya bochanjábema atšcá Běngbe Bětsabe juabna oyebuambnayá ca.’

<sup>38</sup> Moisés Israeloca entšángaftaca yojéftsemna chě entšanga ndoyena luaroca. Choca chě entšanga tmojánenefjna Sinaí tjañe béconana. Chentšana canye ángel Moisésoftaca tojanoyebuambá, běngbe běts taitángbioye chě buayenana soye Moisés chaóyebuambama, chě entšanga tšabe vida jónyěnama palabrěnga; y Moisés chca tojanma, běngnaca chě palabrěnga jouenama jobenayama.

<sup>39</sup> “Pero běngbe běts taitanga ndoñe tmonjánbošena joyeunayama, masna nye tmojtsanaboté y Egiptoye jesshěconama imojtsaiseboše.

<sup>40</sup> Moisés cabá chě tja tsjuanoca chě ángeloftaca yojtsemna ora, chěngbe bachnangbe más uámana aměndayá Aarónbioye měntšá tmojanियana: ‘Běngbe Bětsabe cuenta šmayentšpormá canye buashinjinynana soye jadórama, běnga chašúnatsama. Er běnga quemátstatsěmbo ndayá yojtsopasana Moisés, chě Egiptocana šonjěftsěbuacnáftaca ca.’

<sup>41</sup> As tmojanma canye buashinjinynana soye mo canye uacnabecá y cha jadórama ba bayěnga tmojaněbaye, y tmojanóboyejuanga cachěnga chě soye tmojanpormáyeca.

<sup>42</sup> Chě causa, Běngbe Bětsá chěngbentšana tojtsanojuánañe y cachcá tojesaněnyaye chěngbe bacna soyěnga causa, estrellatéměnga chamotsadoránama. Chca jochněnguama, Běngbe Bětsabe juabna oyebuambayěngbe librěšañe měntšá endayana, ntšamo Běngbe Bětsá tojanayancá:

Israeloca entšanga,

¿Atše jětschuayama bayěnga chešměnjānēbaye y chě soyěnga chešměnjānātšěmbona, chě canta bnětsana uata entšanga ndoyena luarentše tšěngaftanga šmonjěftsemna ora?

<sup>43</sup> Atše jadóra cuentna, chě Molocbiana jebna soye šmonjanacutsá y cha šmonjánadorana,

y chě Refánbe estréllacnaca cachcá šmonjánama.

Chě soyěnga mo Běngbe Bětsá cuenta šmonjánbomna y cach tšěngaftanga šmonjanobopormá jadórama.

Mora chë causa atše chanjama, Babilonientsana más chcoye tšëngaftanga chacmotsënatsama ca” —chiñe endayana.

<sup>44</sup> “Bëngbe tempsca bëts taitanga entšanga ndoyena luaroca, chë jatsjacama opodena yebna innabomna; chë yebnentše Bëngbe Bëtsá chëngaftaca tojanoyebuambá. Inajebna ntšamo Bëngbe Bëtsá Moisésbioye tbojanmandacá, y cha tojanma ntšamo chaojebuama Bëngbe Bëtsá tbojaninÿinÿecá.

<sup>45</sup> Bëngbe bëts taitangna chëngbe taitangbentsana chë jatsjacama opodena yebna chëngbiamna tmojanóyëngacñe, y chënga chë Canaán luaroye Josuéftaca, chë inÿe luaroquëngaftaca jéntsama tmojána ora, chë jebna soye tmojanamba y chocna, Bëngbe Bëtsábeyeca chentša entšangbioye Israeloquëngbentsana tmojtanëbuacna; y chë jebna soyna chë tmojanayëñaná luarentše tojanoquedá, rey David yojëftsienëntscuana.

<sup>46</sup> David tšabá mandbomná inamna, chíyeca Bëngbe Bëtsá cháftaca puerte yotsóyejuaye. David chábioye lesencia tbojanotjañe jajebuama, Bëngbe Bëtsá chë Jacob tbojanadorá cha, chentše chaotsiyenama.

<sup>47</sup> Pero Salomón inamna nda chë Bëngbe Bëtsabe bëts yebna tojanjebuá.

<sup>48</sup> Masque chë celoca Bëngbe Bëtsá, entšangbe jebna yebniñe ndoñe quenatiyena. Ntšamo Bëngbe Bëtsabe juabna oyebuambnayá tojanabemcá, ndayá Bëngbe Bëtsá tojanayancá:

<sup>49</sup> ‘Celoca endmëna chë luare ndayentsana atše tsmánda, y quem luare endmëna nÿe mo canÿe tšenëtemcá ndayentše atšbe shecuatsënga chjaccjaye.

As, ¿ntšamo atšbiamna jebna yebna šmochjajebo ca?’ —chë Utabná jayanana—;

‘o ¿ndaye yebnentše atše jóchnama chjobenaye,

<sup>50</sup> ndegombre cach atše nÿetsca chë soyënga tijamëse ca?’ ”

<sup>51</sup> Esteban mëntsánaca tojanëyana: “Tšëngaftanga nÿets tempo josértama ndëbošënga šmondmëna; šmondbomna ainana mo chë Bëngbe Bëtsábeñe ndošbuáchiyëngbe ainancá, y Bëngbe Bëtsabe soyëngama nduauenanënga šmondmëna. Tšëngaftanga ndocna te quešmátsboše chë Uámana Espíritu joyeunayana. Ntšamo tšëngaftangbe bëts taitanga monjaniyencá, tšëngaftangnaca cachcá.

<sup>52</sup> ¿Bëngbe Bëtsabe juabna oyebuambnayënguentsana, ndábioye tšëngaftangbe bëts taitanga ndoñe monjanacmena? Chë Bëngbe Bëtsá tojanichamó entšanga chënga tmojtšanëbaye, y mëngna entšangbioye imojanabuayiyná Cristo, chë ntšamo Bëngbe Bëtsá yobošcá amá yochjánabama. Pero morna, uayayëngbe cucuatsiñe cha šmojábošhona y šmojóba.

<sup>53</sup> Bëngbe Bëtsabe mandënga angelëngaftaca tšëngaftanga šmonjanóyëngacñe, pero chë soyënga ndoñe quešmátsyeunana ca” —cha tojanëyana.

### *Esteban ndëtsbéngaca tmojanóba*

<sup>54</sup> Chentša mándayënga chca tmojanuena ora, Estébanoftaca tmojanotjayaná y tmojanenaftëšbonzentsé, rábiaca imojtsemnana.

<sup>55</sup> Pero chë Uámana Espíritu Estébanbe ainaniñe corente yojtsemádaye. Celoye yojntješiye y Bëngbe Bëtsabe buashinÿinÿanana yojinÿe, y Jesús, Bëngbe Bëtsabe catšbioica yojtsatsana.

<sup>56</sup> As, Esteban tojánayana: “¡Mouenënga, sëntsonÿá celoca entsatëfjna y Bëngbe Bëtsá Entšá tbojanbemá Bëngbe Bëtsabe catšbioica entsemna jtsamëndayama ca!”

<sup>57</sup> Chora chënga jabuache imojtseyoye, imojtsenamatsachto ndoñe más ntsuenanama y Estébanbioye tmojanontsënja.

<sup>58</sup> Chentšana, chënga chë pueblentsana tmojtšanábocna y ndëtsbéngaca tmojtšanatëchënganja. Chë Estébanbioye mal tmojanquedangna entšayangá

tmojtsanenátsejca y canÿe bobontse, Saulo ca uabainá, tmojesanábonÿiñe chaotsinÿenama.

<sup>59</sup> Ndëtsbéngaca imojtsénanantscuana, Esteban Bëngbe Bëtsáftaca ibojtsencuéntaye y mëntsá tojánayana: “Bëngbe Utabná Jesús, atšbe espíritu šmóyëngaca ca.”

<sup>60</sup> Chentšana Esteban tojanoshamentsé y jabuache tojánayana: “¡Bëngbe Utabná, chëngbe bacna soye motsaperdoná ca!” Y chca tojánayana ora, tojanóbana.

## 8

<sup>1</sup> Saulo chentše yojtsemna y tšabá imojtsama ca yojtsejuabnaye, Esteban tmojanóbama.

### *Saulo yojánama chë Crístbeñe ošbuáchiyënga chamotsesufrínama*

Cach te, ínÿenga tmojanontsé Jesucristbeñe ošbuáchiyënga Jerusalenentše ucamenana y jtsamana puerte chamotsesufrínama; chcasna, chënga tmojtsanacheta y Samarioye y Judeoye tmojanáshana. Nÿe chë Jesucristbe ichmónënga ndócnoye tmonjánacheta.

<sup>2</sup> Básefta boyabásenga, Bëngbe Bëtsá adórayëngna, Esteban tmojanamba jauábtontsama y chabiamana puerte tmojánenobošachna.

<sup>3</sup> Chëntscuana, Saulo yojtsentšena Jesucristbeñe ošbuáchiyënga jtsapochócama y yebnënguenache yojánamashjuana boyabásenga y shembásenga sjojónana ubuacana jutámiamana.

### *Felipe Samaria luaroca tšabe noticiëngama yojanabuayiyiná*

<sup>4</sup> Y Jesucristbeñe ošbuáchiyënga tmojanáshanëngna nÿetsquénache imojánabuayiyinaye Jesusbe tšabe noticiënga.

<sup>5</sup> Chca, Felipe Samarioye tojána y tojanontsé chë Bëngbe Bëtsabe Uámana Uabuayaná, Cristbiamana, chentša entsanga jábuayenama.

<sup>6</sup> Entšanga imojánenefjuana Felipe joyeunayama y tmojáninÿe bëts soyënga cha jtsamana, Bëngbe Bëtsabe obenana jinÿanÿiyama. Chënga nÿetscanga ntšamo Felipe yojtsichamcá tšabá imojtseyeunana.

<sup>7</sup> Banga bayëjbe juabna uambayënga tšabá imojtsatsmëna y chë bacna bayëjënga jabuache jtsaiyoyëse chëngbentšana imojtsaisebocana; y banga jama ndobenënga y coshetënga tšabá imojtsatsmëna.

<sup>8</sup> Chë soyama chë pueblentša oyenënga corente imojtsóyejuaye.

<sup>9</sup> Pero canÿe pueblentše Samarioca inamna canÿe boyabása, Simón ca uabainá; cha tempo inamna canÿe bocjuaná y chë Samarioca entsanga chabe soyëngama imojánenjnanaye. Cha yojánichamo cha canÿe uámana entsá canjamna ca.

<sup>10</sup> Y chábioye corente imnayeunana nÿetscanga, uámanënga y nduámanëngnaca. Entšanga imojánichamo: “Mua entsemna chë Bëngbe Bëtsabe bëts obenana inÿanÿinayá ca.”

<sup>11</sup> Y ndegombre chënga corente imnayeunana, er cha chë bocjuanana soyëngaca bayté chë entsanga ingñénënga y ojnánanënga yojtsabamna.

<sup>12</sup> Pero chë luarentša entsangna, Felipe tmojanoyeuná chë cha yojtsëtsësná tšabe noticiënga Bëngbe Bëtsabe amëndayama y chë Jesucristbiamana tšabe soyënga. Chorna chënga Jesucristbeñe imojtsošbuáchiye, y boyabásenga y shembásenga tmojánenabayë.

<sup>13</sup> Y cach Simónëngnaca Jesucristbeñe yojtsošbuáchiye y tojanenábaye, y chentšana cada te Felípeftaca cha yojtsanmëna. Cha tojáninÿe Felipe chë bëts soyënga Bëngbe Bëtsabe obenánaca jamana, y chama ojnananá yojtsemna.

<sup>14</sup> Chë Jerusalenoca imojtsemna ichmónënga tmojántatšëmbona Samarioca entsanga Bëngbe Bëtsabe palabra tmojanóyeunama; as, chora Pedro y Juan choye tmojanichamó.

<sup>15</sup> Pedro y Juan Samarioye tbojánashjango ora, chentše Jesucristbeñe ošbuáchiyëngbiana Bëngbe Bëtsá tmojanimpadá, as chë Uámana Espíritu chëngbeñe cháúamashënguama jtsemándayama.

<sup>16</sup> Er cabá ni mo cánÿabeñe chë Uámana Espíritu tonjánamashëngo; chënga tmojánenabaye Bëngbe Utabná Jesús jótšëmbonëse, chábeñe ošbuáchiyënga jtsemnama imojtsebóseyeca.

<sup>17</sup> As Pedro y Juan chëngbe bestšašiče cucuatšënga tbojancjá, y chca, chë Uámana Espíritu tojánamashëngo chëngbe ainaniñe jtsemándayama.

<sup>18</sup> Simón tojáninÿe, chë ichmónënga entšángbeñe cucuatšënga tmojacjá ora, chë Uámana Espíritu chëngbeñe jamashënguana. As chora Simón chë ichmónënga tojanéyana: — Quem crocénana mosháchiñe,

<sup>19</sup> y átšnacá chë obenana šmatšetá, y ndábeñnaca cucuatšënga chaijajajó ora, chábeñnaca chë Uámana Espíritu cháúamashëngo ca.

<sup>20</sup> As Pedro tbojaniana: —¡Acbe crocénana infernoye chaotsá y ácnaca, chë Bëngbe Bëtsabe tšetana soye crocénánaca jobuámiñama yopodena ca tcojajuabó causa!

<sup>21</sup> Ndegombre, aca bëngaftaca ndoñe quecátšmëna, ni bëngbe trabajo acbiana quenátšmëna, Bëngbe Bëtsabe delante acbe ainaniñe tšabe juabnënga ndoñe quecátšbomna causa.

<sup>22</sup> Ngmënacá cochjenójuaboye quem bacna soye tcojamama y chca amana cocht-sajbaná y Bëngbe Bëtsá cochjaimpáda, aca chca tcojajuaboma nderádose cmatjaperdóna.

<sup>23</sup> Atše sëntsetatšëmbo, acbe ainaniñe tša bacna juabnënga ínÿëngbiana yojtsemnama; y bacna soyënga amana jtsajbanama ndoñe quecátobena causa, aca mo canÿe ntsacjuanacá contsemna ca —Pedro tbojaniana.

<sup>24</sup> As chora Simón tojanéyana: —Bëngbe Utabná atšbiana šochjaimpáda, ntšamo šmonjauyancá ndoñe chandëpasama ca.

<sup>25</sup> Pedro y Juan, ntšamo Bëngbe Utabná Jesucristbiana tbojaninÿcá y ibnatatšëmbcá entšanga imojtsëtsësnaye. Chentšana, Jerusalemoye tbojésanata y tbojánachnëngo ba Samarioca pueblënguëjana, tšabe noticiënga entšanga abuayiynaye.

### *Felipe y chë Etiopía luaroca reinabe uajabuachaná*

<sup>26</sup> Chentšana, Bëngbe Utabnabe canÿe ángel Felípbioye tbojaniana: “Moprontá y tsmána luarëngoye motsa, Jerusalementšana Gaza ca uabaina bëts puebloye benachëjana ca.” Chë benachna entšanga ndoyena luarëjana yojanachnëngona.

<sup>27</sup> As Felipe yojëftsëtsbaná y tojána. Benachiñe tbojáneninÿena canÿa Etiopía luarocáftaca. Etiopía luaroca canÿe reiná inamna y chë boyabásana chabe uajabuachaná y chabe crocénana bojanÿá inamna. Chana Jerusalemoye tojánabo Bëngbe Bëtsá jadórama.

<sup>28</sup> Chora Etiopía luaroye yojtsataye, chabe cochëshañe inayësenotbemañe, y chë Bëngbe Bëtsabe juabna oyebuambnaya Isaiásbe uabemana librëša yojtsaiualíaye.

<sup>29</sup> Chora chë Uámana Espíritu Felípbioye tbojaniana: “Mobeconá y chë cochësha juachaca cochtsaye ca.”

<sup>30</sup> As Felipe betscó yojobeconá. Chora yojouena chë Etiopía luarocá, Isaiásbe uabemana librëša yojtsaiualíaye; as tbojantjá: —¿Chë contsalía soye quecmojtsosertana ca?

<sup>31</sup> Y chë Etiopía luarocá tbojanjá: —¿Ntšamo šochjosërta, ndocná šonjabuayenase ca? Y Felípbioye tbojaniana: —Diosmanda, atšbe cochëshoye másëngo y atšbe juachaca mabótbema ca.

<sup>32</sup> Isaiásbe uabemana librëšañe mëntšá yojtsalíaye: Cha tmojanánatse mo canÿe oveshá jóbama cuafjuanatscá; y chë mo canÿe oveshá tmojtsëtsbotjná ora, cha iytëca jtsemnana, chánaca cachcá, chacá tondaye chenátanayana.

<sup>33</sup> Entšanga tmonjanma cha puerte chaosufrima, mo cha canÿe nduamaná cuaftsemncá y ntšamo ndoñe betsomerecencá cháftaca tmonjanma.

Ndocná nanjobenaye chabe básengbiamá jacuéntana,  
quem luarentša chabe vida tmontsanbojuaná causa ca.

<sup>34</sup> Chora chë Etiopía luaroca uajabuachaná Felípbioye tbojanianyana: —Diosmanda, šmobuayená, ¿ndabiamá Bëngbe Bëtsabe juabna oyebuambnayá chca yojsichamo, cachabiamá o ínÿabiamá ca?

<sup>35</sup> As Felipe tojanontšé, chë Isaíasbe librëšaňe yojsayana sóyeca, Jesusbe tšabe noti-ciënga jábuayenama.

<sup>36</sup> Chentša bënëse, canÿe bėjaye obëjniňe juachaňe ibojsachnějuana. Chora chë uajabuachaná tojánayana: —Muentše bėjaye entsemna. ¿Ndáyeca ndoňe nanjopódia atše muentše uabainá jtsemnama ca? Diosmanda, šmabaye ca.

<sup>37</sup> As Felipe tbojanianyana: —Jesucristbeňe nÿets acbe ainánaca tcojtsošbuáchese, aíňe echanjopódia juabáyama ca.

Y chë boyabása tbojanjuá: —Aíňe, sëntsošbuaché Jesucristo Bëngbe Bëtsabe Uaquiňá yomnama ca.

<sup>38</sup> As chë Etiopiocá tojanmandá chë cochësha chauátotonama. Chentšana, nÿets útata chë bėjayoye tbojanashëbëbuástjango y Felipe, chë Etiopioca uajabuachanábioye tbojanabaye.

<sup>39</sup> Chë bėjayentšana tbojtancocna ora, chë Uámána Espíritu Felipe ibojsánatseňe y chë uajabuachaná ya ndoňe más Felípbioye ibontsonÿaye, pero corente oyejuayá yojsatoňe.

<sup>40</sup> Felipe tojántatšëmbona Azoto bëts puebloca yojssemnama, y chentšana tojána nÿetsca pueblënguenache chë tšabe noticiënga abuayiynaye, Cesarea puebloye jashjanguëntscuana.

## 9

### *Ntšamo Saulo Crístbeňe ošbuachiyá tojanóbema (Hch 22.6-16; 26.12-18)*

<sup>1</sup> Saulo chëntscuana cabá Bëngbe Utabnábeňe ošbuachiyënga yojanautatjná jtsëbáyama. Chama cha tojána chë bachnangbe más uámána amëndayábioye,

<sup>2</sup> uabemana tsbuanachangá jauátjaňama, as chëchangaca jobenayama chë Damascoca judiëngbe enefjuana yebnëngoye jama, y chocna, chë Jesucristo tojaninÿanÿé Benache ustoniňe, boyabásenga o shembásenga tojánÿenëse, jótabayama y Jerusalenoye junatsama. Y chca jamama tojánbocna.

<sup>3</sup> Pero ya Damasco béconana yojsyaye orna, nÿe ndeolpe chabe juachaňe celocana canÿe bëts tcuinÿe tojanbuashinÿínÿena.

<sup>4</sup> Chora Saulo fshantsoye tojánshajaye y canÿe oyebuambnayana tojanuena, mëntšá: —Saulo, Saulo, ¿ndáyeca chca šcojsacmena ca?

<sup>5</sup> As Saulo tbojantjá: —¿Nda comna, Bëngbe Utabná ca?

Y chë oyebuambnayana tbojanjuá: —Atše sëndmëna Jesús y aca condama atšbe entšanga chamotsesufrínama.

<sup>6</sup> Pero matëtsbaná y Damascoye mamáshëngo; chentše canÿa cmochanjabuayená ndayá jamama cmojtsemnama ca.

<sup>7</sup> Chë Sáuloftaca imojánajna boyabásenga tša auatjanánënga imojtsemna y chíyeca ndoňe imontsobena jóyebuambayana; er nÿe chë oyebuambnayana tmojanuena, pero ndocná tmonjáninÿe.

<sup>8</sup> As Saulo fshantsentšana tojtantsbaná y tojtanobuchatëfjona ora, tondaye yontsobena jinÿana. Chcasna, chë ínÿenga tmojëftsano buacuetëntšé y chca, Damascoye tmojanánatse.

<sup>9</sup> Chentše yojëftsemna unga te, jinÿama ntobencá, ni ntjascá y tondaye ntjofšiy cá.

<sup>10</sup> Damascoca Jesucristbeñe canye ošbuachiyá inoyena, Ananías ca uabainá. Cha Bëngbe Utabnábioye mo otjenayoquëcá tbojáninýe y Bëngbe Bëtsá tbojaniana: —Ananías ca.

As cha tbojanjuá: —Bëngbe Utabná, ¿ndayá chjama ca?

<sup>11</sup> Y Bëngbe Utabná tbojaniana: —Moprontá y motsa chë “Ndericho tsáshenañe ca” uabáinoe, y Júdasbe yebnentše cochjanotícia canye boyabásabiama, Saulo ca uabainábiami, Tarso pueblócá; cha mora Bëngbe Bëtsáftaca bentsencuénta.

<sup>12</sup> Saulo ya tonjinýe mo otjenayoquëcá, canye entšá Ananías ca uabainá entsamashjuana y chabe cucuatšënga chabe bestšasiñe entsejájua, chca, cha chabuatabínýnama ca.

<sup>13</sup> Ananías chca tojanuena ora, tojánayana: —Bëngbe Utabná, banga ba soyënga chabiama šmonjacuentá; Jerusalenoca tša bacá acbe entšanga imomnënga tojáborye.

<sup>14</sup> Y mora entsebomna mando chë bachnangbe amëndayëngbentsana, muentše aca otšëmbuanënga jótabayama ca.

<sup>15</sup> As Bëngbe Utabná tbojaniana: —Motsa, er atše cha sënjuábuayana atšbiama chaotrabajama; chaóyebuambama ndoñe judiëngbeñe, reyëngbeñe y Israeloca entšangbeñnaca, y chca, chënga atšbiama chamotatsëmbonama.

<sup>16</sup> Atše cha chanjinýinýiye ntsachetšá ibojtsemna átšbeyeca jasúfriama ca.

<sup>17</sup> As Ananías tojána Saulo yojsanmëna yebnoye. Tojánamashëngo ora, Saulëbe bestšasiñe chabe cucuatšënga tojanjajó y tbojaniana: “Jesucristbeyeca atšbe catšata, Saulo, Bëngbe Utabná Jesús, chë benachëjana conjanabó ora cmonjanebëbocná, šonjichmó aca chacmatabínýnama y chë Uámana Espíritu acbe ainaniñe jtsemándayama cháuamashënguama ca.”

<sup>18</sup> Cachora, Sautébe bominjentsana mo beonbe bobachëshëngcá tojantquëcjana, y chca, ibojtsatabinýna; chora tojantsbaná y tojanenábaye.

<sup>19</sup> Chentsana, Saulo tojanse y añemo yojsatsbomna y baseftayté chë Jesucristbeñe ošbuáchiyëngaftaca tbojántotona, Damascoca.

### *Damasco puebloca Saulo entšanga yojanabuayiná*

<sup>20</sup> Saulo cachorscana tojanontšë jábuayenama judiëngbe enefjuana yebnënguenache, Jesús Bëngbe Bëtsabe Uaquiñá bëtsemnama.

<sup>21</sup> Chë imojtsuenanënga nýetscanga imojtsenjnanaye y mëntšá imojtsichamo: “Mua entsemna chë Jerusalenoca Jesúsbioye otšëmbuanënga endanëbanayá, y mora camuá Damascoye tojabo, Jesucristbeñe ošbuáchiyënga jabótabayama y chë bachnangbe amëndayëngbe cucuatšëñe jabáshejuanama.”

<sup>22</sup> Pero Saulo cada ora más añémoca yojsóyebuambnaye y puerte tšabá yojaninýanýná Jesús Bëngbe Bëtsabe Uámana Uabuayaná bëtsemnama. Chíyeca chë Damascoca judiënga ndoñe imontsobena ntšamo cha jojuana.

### *Ntšamo Saulo judiëngbentsana tojtsanachá*

<sup>23</sup> Bayté tojanochnëngo ora, judiënga tmojanenoyeuná ntšamo jamëse Saulo jóbama,

<sup>24</sup> pero Saulo chë soye tojántatsëmbona. Bnëtë y ibeta, chë bëtš pueblentša bëšašanguenache chënga chabiama imojananyá, jtsóbama;

<sup>25</sup> pero chë Jesucristbeñe ošbuáchiyënga, ibeta, cha canye bëtš sbarëcuiñe tmojtsanat-suamá, y chë pueblentša shëconana tapiëšëjana tmojtsanëštjango. Chca cha tojanots-bocá.

### *Saulo Jerusalenoca*

<sup>26</sup> Saulo Jerusalenoye tojánashjango ora, yojtseboše chë Jesucristbe ichmónëngaftaca jenútanama, pero nýetscanga imojtsebiauatja y ndoñe imontsošbuaché Saulo Jesucristbe ustoná yojtsemnama.



27 Chcasna, Bernabé Súlëbioye tbojëftsanbetše y chë Jesucristbe ichmónëngbioye tbojanánatse, y tojanacuntá Saulo benachiñe Bëngbe Utabnábioye tbojáninýama, ntšamo Bëngbe Utabná tbojaniyanama y ntšamo cha Damascoca tša añémoca Jesusbiana entšanga tojánabuayenama.

28 As Saulo Jerusalenentše tojanototoná y chë Jesucristbe ichmónëngaftaca yojánana. Bëngbe Utabnabiana bëts añémoca entšanga yojanabuayiná y

29 yojanoyebuambná y imojanenatsëtsná chë griego biyá judiëngaftaca; pero chëngna imojtsenëyeunana Saulo jtsóbama.

30 Jesucristbeñe ošbuáchiyënga chca tmojántatšëmbona ora, Saulo Cesarea luaroye tmojanánatse, y chentšana Tarso puebloye tmojanichmó.

31 Y chca, Jesucristbeñe ošbuáchiyënga Judeoca, Galilea y Samaria luarentše chora ya ndoñe más montsansufrina y natjëmbana imojtsemna, y nyetscanga más ošbuáchiyana imojtsebomna. Ntšamo Bëngbe Bëtsá yojanbošcá, imojtsaniyena cha jtsatschuanayëse; y chë Uámana Espíritbe uajabuáchenanaca, Jesucristbeñe ošbuáchiyënga más tmojanoboté.

### *Pedro Enéasbioye tbojanshná*

32 Pedro yojánabuache nyetsca chë Jesucristbeñe ošbuáchiyëngbenache. Y chca, Lida puebloca Bëngbe Bëtsabe entšanga jabuachámna tojána.

33 Lida pueblentše canýa tbojáninýena, Eneas ca uabainá. Cha jama ndobená inamna y posufta uata jutsnéshañe chca inajájona.

34 Pedro tbojaniyana: “Eneas, Jesucristo tcmojashná. Matëtsbaná y acbe tjuashe motsejacaná ca.” Y cachora chë jama ndobená tojtantsbaná.

35 Nyetscanga chë Lida pueblentše y Saronoca oyenënga chë entšá shnaná tmojáninýe. Y as, chënga bacna soyënga amana tmojtsanajbaná y cach orscana tmojanontšé Bëngbe Utabnábeñe ošbuáchiyana.

### *Pedro tojanma Dorcas cháuatayenama*

36 Chë tempo, Jope puebloca yojaniyena canýe shembása Jesucristbeñe ošbuachiyá, Tabita ca uabainá, o griego biyañna Dorcas ca. Cha nyets tempo tšabe soyënga yojánama y yojanamana chë tojtsëjabetënga jujabuáchana.

37 Pero chora, šocana tbojanshache y tojtsanóbana. Tmojtsanbebé chentšana, canýe tsoye tsbanana tsañoca chabe cuerpo tmojtanaajajó.

38 Jope inamna Lida béconana, y Lidentše Pedro yojtsemna; y chë Jope pueblentše Jesucristbeñe ošbuáchiyënga tmojántatšëmbona Pedro choca yojtsemnama. Asna, uta boyabásata tmojanichamó Pedro jauyanama: “Diosmanda, betSCO Jope puebloye mabo ca.”

39 As Pedro tojëftsantsbaná y chë uta boyabásaftaca tojána. Choye tmojánashhajna ora, tmojanánatse chë Dórcasbe cuerpo yojtsemnoye, tsbanánoca; chorna, nyetsca viudanga šachénaca Pédrëbioye tmojanóbobuashcona y imojtsinýinýnaye chë Dorcas yojuajonaná entšayangá y cmešëjuangá, cabá chëngaftaca yojëftsemna ora.

40 Pedro tojanmandá nyetscanga chentšana chamotsebocanama; chora Pedro yojshëntsamentšiyey Bëngbe Bëtsáftaca ibojencuentá. Chentšana, Pedro chë obanábioye tbojanonýinýe y tbojaniyana: “Tabita, matëtsbaná ca.”

As Dorcas tojtanobuchatëfjona y Pédrëbioye tbojáninýe ora, tojanótbema.

41 Chora Pedro tbojanábuacueshache y tojtanantsbaná. As Pedro tojánachembo nyetsca chë Jesucristbeñe ošbuáchiyënga, chë viudanga y chë ínýenga, y Dorcas ainá tojtaninýanýe.

42 Chë soye nyets Jope pueblentše tojanótatšëmbona y banga Bëngbe Utabnábeñe imojtsošbuáchiye.

43 Y Pedro bayté Jope pueblentše tojanoquedá, Simón chë bobáchëshiñe trabajayabe yebnentše.

## 10

### *Pedro y Cornelio*

<sup>1</sup> Cesarea pueblentse inamna canye boyabása Cornelio ca uabainá; cha inamna chë Italiano ca uabaina soldadëngbe amëndayá.

<sup>2</sup> Cornelio Bëngbe Bëtsábioye ibnarrespetana y nyetsca chabe yebnentša oyenëngaftaca Bëngbe Bëtsá puerte imojánadorana. Becá crocénana inaquëcjnaye chë judiënga nd-bomnëjëmënga jujabuáchama y sempre Bëngbe Bëtsáftaca ibnëncuentaye.

<sup>3</sup> Canye te, mo bëts mošenana ora, cha botamana tojáninye mo otjenayoquëcá, mëntšá: Bëngbe Bëtsabe canye ángel Cornelio yojtsemnoye yojtsamashjuana y tbojaniyana: — ¡Cornelio ca!

<sup>4</sup> Cornelio chë ángelbioye ibojtsonyaye y auatjananá tbojaniyana: —Taita, ¿ndayá yojtsemna ca?

Y chë ángel tbojaniyana: —Bëngbe Bëtsá condbëtseimpadanama y chë ujabótënga condbëtsëjabuachanama, Bëngbe Bëtsá ácaftaca entsoyejuá y lempe cmochanjóyeunaye.

<sup>5</sup> Chcasna, mora básefta boyabásenga Jope bëts puebloye michamó y Simón, chë Pedro ca monduabobuatmá, moye chamuánatse.

<sup>6</sup> Cha posada entsebomna inye Simónbentse, chë bobáchëshiñe trabajayabe yebnentše. Chabe yebna mar béjaye tsachañe endmëna. Cha cmochanjauyana ndayá jamama cmojtsemna ca.

<sup>7</sup> Chë Cornéliëbioye ibojuatsëtsaye ángel tojtsatanoñe ora, Cornelio chabe oser-venënguentshana útata tojánachembo y canye soldádnaca, chabe uajabuachaná, Bëngbe Bëtsá adorayá;

<sup>8</sup> lempe ntšamo yojopasacá chënga tojanacuntá y chentšana Jope puebloye tojanichamó.

<sup>9</sup> Yëfsana mo nyetsto ora, chënga benachiñe Jope béconana imojtsajnëntscuana, Pedro yebnentša tsbanánoye tojánašëngo, Bëngbe Bëtsáftaca jencuëntama.

<sup>10</sup> Becá tbojánishëntsena y jasama yojtseboše; pero imojtsebopróntantscuana, Pedro mo otjenayoquëcá mëntšá tojáninye:

<sup>11</sup> Celoca yojtsatëfjna y mo canye bëts entšayëjuacá yojtsabá y nyets canta sibientšana yojtsëjonyana.

<sup>12</sup> Chë entšayëjuañe imojtsemna nyetscna bayënga, ósjojnaye bayënga y nyetscna shloftšëngnaca.

<sup>13</sup> Y tojanuena canye oyebuambnayana mëntšá: —Motsbaná, Pedro; mobaye y quem bayënga mose ca.

<sup>14</sup> Chora Pedro tojánayana: —Ndoñe, atšbe Utabná. Atše ndocna te chiyáisese Moisesbe leyíñe ndoñe yondëlesenciana jasama bayënga y chë jasama ndoñe tšabá imomna bayënga ca.

<sup>15</sup> Y cachiñe tojtëtanuena chë oyebuambnayana mëntšá: —Bëngbe Bëtsá tojalesenciá y canye bayá tšabá jasama yomna ca tojayanëse, aca ndoñe matsjuabnana chë bayá jasama ndoñe tšabá yontsemna ca.

<sup>16</sup> Chë soye unga soyama chca tojanopasá chentšana, chë entšayëjua celoye tojtanátšjua.

<sup>17</sup> Pero Pedro ndoñe yontsetátšëmbo ntšamo tojaninycá ndayá chabiama yojtsayanama. Chëntscuana, chë Cornéliëbe ichmónënga noticiánana Simónbe yebnoca tmojánashjajna y shjoca bësocca imojtsobátmana.

<sup>18</sup> Tmojanchembo ora, tmojanënoticiá Simón, chë Pedro ca uabobainá, chentše taibojatanama.

<sup>19</sup> Pedro, ndayá tojáninyama chabosertama yojtsenójuabnantscuana, chë Uámana Espiritu tbojaniyana: “Mouena, muentše mora unga boyabásenga cmontsenguá.

<sup>20</sup> Motsbaná, mocana matastjango y yapa ntjatenojuabnaycá chëngaftaca cochjá, er atše chënga sënjichamó ca”.

<sup>21</sup> As Pedro tojtanastjango y chë tmojánashjajnënga tojanëyana: —Atše sëndmëna chë šmongsenguá cha. ¿Ndáyeca moye šmojabo ca?

<sup>22</sup> Chora chënga tmojanjuá: —Cornelio šonjichamó. Cha endmëna chë soldadëngbe amëndayá, canýe tšabá mándbomna entšá y Bëngbe Bëtsábioye adorayá, y nýetsca judiënga chabiamá tšabá mondbëtsoyebuambnaye. Bëngbe Bëtsabe canýe ángel chábioye tbojabuayená ntšamo jamana aca chábioye chacotsama, as chë ndayá cha jauyanama cojtsebomncá cha jouenama ca.

<sup>23</sup> As chënga tojanëmashengo y posada tojanëyentsame. Yëfsana Pedro chë unga boyabásengaftaca tojána. Básefta Jesucristbeñe ošbuáchiyënga Jope pueblentsënga Pedro tmojantjëmbambá.

<sup>24</sup> Chë inýe yëfsana Cesarea puebloye tmojánashjajna. Chentše Cornelio Pédrëbiamá yojtsobatmana, y Cornelio tojanëbuaja pamíllanga y tšabe amiguëngnaca chentše imojtsemna.

<sup>25</sup> Pedro tojánashjango ora, Cornelio tojánbocna jajëbenguama y chabe shecuatšentše vojoshëntsamentšiyë cha jadórama.

<sup>26</sup> Pero Pédrëna tbojtanatsbaná y mëntšá tbojanianyana: —Matëtsbaná, atše cach aquëcá nýe canýe entšá sëndmëna ca.

<sup>27</sup> Pedro Cornélioftaca encuëntaye chë yebnentše tojánamashëngo y ba entsanga tojánanýena, chentše tmojanójetënga.

<sup>28</sup> Chora Pedro tojanëyana: —Cach tšëngaftanga šmondëtatšëmbo chë judiëngbe leyënguiñe endayana ndoñe yondopodena canýe judío ndoñe judío entšángaftaca jenútanama y ni mo chëngbe yebnënguenache jábuachama ca. Pero Bëngbe Bëtsá šonjinýinýe atše ndocna te šondmëna inýabiamá jatsjuabnayana cháftaca jenútanama ndoñe tšabá yondmëna ca.

<sup>29</sup> Chíyeca, šmonjobetše ora, ndocá ntjatichamcá nýe sënjabo ca.

Chora tojanatjá: —¿Ndáyeca šmojobetše ca?

<sup>30</sup> As Cornelio tojánayana: —Canta te entsemna, camëntša ora, muentše sëndánmëna Bëngbe Bëtsáftaca encuëntaye y ndeolpe sënjinýe atšbe delante canýe boyabása uabuashinýinýana entšayaca bopormaná.

<sup>31</sup> Cha šonjauyana: “Cornelio, Bëngbe Bëtsá condbëtseimpadanama y chë ujabótënga condbëtsëjabuachanama, Bëngbe Bëtsá ácaftaca entsoyejuá y lempe cmochanjóyeunaye ca.

<sup>32</sup> Básefta boyabásenga Jope bëts puebloye michamó y Simón chë Pedro ca monduabobuatmá moye chamuánatse ca. Cha posada entsebomna inýe Simónbentše, chë bobáchëshiñe trabajayabe yebnentše, y chabe yebna mar bëjaye tsachañe endmëna. Cha cmochanjauyana ndayá jamama cmojtsemna ca.”

<sup>33</sup> Chcasna, cachora sënjichamó aca jobetšama, y aslëpaye jabama tcojóyaunama. Y as morna, nýetscanga Bëngbe Utabnabe delante fsëntseprontana jouenama lempe ntšamo Bëngbe Bëtsá tcmojamandacá ca —cha tojánayana.

### *Ntšamo Pedro tojanoyebuambá Cornéliëbe yebnentše*

<sup>34</sup> Pedro chora tojanontšë mëntšá jóyebuambayama: —Mora atše šontsosertana, ndegombre Bëngbe Bëtsabiamá nýetscanga cachcá uámanënga imomnana.

<sup>35</sup> Nýets luarënguenache Bëngbe Bëtsá júbuajana cha tmojtsatschuaná y tšabe soyënga tmojtsamënga.

<sup>36</sup> Tšëngaftanga šmondëtatšëmbo, Bëngbe Bëtsá Israeloca entsanga tojánabuayenama, tšabe noticiënga jtsóyebuambnayëse, chënga nýetscanga ainaniñe tšabe ebionana chamotsebomnana, Jesucristbeyeca; y cha endmëna nýetsca entsangbe Utabná.

<sup>37</sup> Tšëngaftanga šmondětatsšëmbo ntšamo nÿets Judeoca tonjanopasama. Chë soye Galilea luaroca tojanobojaťsë, Juan entsanga yojanabuayiyná orscana, chënga bacna soyënga amana chamotsajbanama y chamuenábayama.

<sup>38</sup> Smondětatsšëmbo ntšamo Bëngbe Bëťsá, Jesús Nazaretocábioye tbojanábuayanama y tojanma chë Uámana Espíritu chabe ainaniñe cháúamashënguama, y tojanma Jesús corente obená chaotsemnama; y šmondětatsšëmbo ntšamo Jesús enjánana entsangbiama tšabe soyënga amiñe y nÿetscanga chë Satanás yojánama chamosufrimënga áshnaye, er Bëngbe Bëťsá cháftaca yojtsemna.

<sup>39</sup> “Bënga fsënjáninÿe y fsëndětatsšëmbo lempe ntšamo Jesús tojanmcá Jerusalenoca y nÿets Judea luariñe; y cha tmonjanóba, canÿe cruciñe jacrucificase.

<sup>40</sup> Pero Bëngbe Bëťsá tonjanma unga tianoye cha cháuatayenama y bëngbeñe chaonÿnama.

<sup>41</sup> Cha nÿetsca entsangbe delante ndoñe chenátanbocna, pero aíñe bëngbeñe, chë tempo Bëngbe Bëťsá šojanëbuáyanënga, Jesús tojtanayenama chamuinÿama. Y tojtanayenentsana bënga cháftaca fsënjanse y fsënjanofsë.

<sup>42</sup> Cha šonjichamó entsanga jábuayenama y jayanama ndegombre cha yomna chë Bëngbe Bëťsabe uabuayaná, chë nda obanëngbiama y ainëngbiama yochjayana tšabá o ndoñe tšabá tmonjamama.

<sup>43</sup> Bëngbe Bëťsabe juabna oyebuambnayënga nÿetscanga cach Jesusbiamama tmojánayana, nda Jesúsbeñe tojťsošbuachë, chábioye Bëngbe Bëťsá chabe bacna soyëngama bochan-japerdóna, Jesusbe obenánaca ca.”

### *Ndoñe judiënga chë Uámana Espíritu tmojanóyëngacñe*

<sup>44</sup> Pedro chë palabrenga cabá yojťsoyebuambnantscuana, chë Uámana Espíritu tojánamashëngo nÿetsca chë imojťsuenanëngbe ainaniñe jtsemándayama.

<sup>45</sup> Chë judiënga Jesucristbeñe ošbuáchiyënga Pédroftaca tmojánabënga imojenjnaná, chë Uámana Espíritu ndoñe judiëngbeñnaca cháúamashënguama Bëngbe Bëťsá tojanmama.

<sup>46</sup> Chënga imojťsuenana chënga inÿeťsá jtsebiayangana, chënga tempo ndmabiyañe y jťsichámuana Bëngbe Bëťsá bëťs soyënga tojanmama.

<sup>47</sup> Chora Pedro tojánayana: “Pero mëngna chë Uámana Espíritu tmonjójyëngacñe ntšamo bënga tmonjójyëngacñëcá. Chcasna, ndocná queochatobenaye jamana chënga uabáinënga ndoñe chamondětsemnama ca.”

<sup>48</sup> As Pedro tojanamëndá chënga jubáyama, Jesucristo jótšëmbonëse. Chentšana chënga tmojanimpadá baseftayť chëngaftaca chaoquedama.

## 11

### *Ntšamo Pedro chë Jerusalenoca imojánenefjuana ošbuachiyëngbiyoye tojanëyana*

<sup>1</sup> Jesucristbe ichmónënga y chë Judeoca Jesucristbeñe ošbuáchiyënga tmojánatšëmbona, chë ndoñe judiëngnaca Bëngbe Bëťsabe palabriñe imojťsošbuáchema.

<sup>2</sup> Pero Pedro Jerusalenoye tojesaná ora, báseftanga chabiamama ndoñe tšabá tmonjánayana. Chënga imojamna chë juabnayënga, chë ndoñe judiënga ošbuáchiyënga boyabásenga canjánamna chë más delicadentse base bobachtema tětšëngënga jtsemnama ca, ntšamo chë judiënga imojanamancá, as chënga jobenayama chë judiënga ošbuáchiyëngaftaca jenútanama ca.

<sup>3</sup> As Pedro tmojantjá: —¿Ndáyeca tcojá chë ndoñe judiënga jábuachama y chëngaftaca tcojase ca?

<sup>4</sup> Chora Pedro lempe chënga tojanacuntá ntšamo chë ndoñe judiëngbiyoye cha tojána orscana tojanopasama. Cha tojanëyana:

<sup>5</sup>—Atše Jope pueblaca sënjamna y Bëngbe Bëtsáftaca sënjencuénta ora, mo otjenayoquécá sënjáninÿe celocana mo canÿe bëts entsëjuacá átšbioye enjëtsabeconaye y nÿets canta sibiocana enjëtsëjonÿana.

<sup>6</sup> Y botamana sënjanrrepará ndayá chë tsoye bétsemnama y sënjáninÿe choye monjésemna uamna y tjoca bayënga, ósjojnaye bayënga y nÿetscna shloftšëgnaca.

<sup>7</sup> Y sënjanuena canÿe oyebuambnayana mëntšá: “Motsbaná, Pedro; mobaye y quem bayënga mose ca.”

<sup>8</sup> Chora atše sënjánayana: “Bëngbe Utabná, ndoñe; atše ndocna te chiyáisesese chë Moisesbe leyinë ndoñe yondëlesenciana jasama bayënga y jasama ndoñe tšabá imomnënga ca.”

<sup>9</sup> Chentsana cachiñe sëntëtanuena chë celocana oyebuambnayana mëntšá: “Bëngbe Bëtsá tojalesenciá y canÿe bayá tšabá jasama yomna ca tojayanëse, ndoñe matsjuabnana chë bayá jasama ndoñe tšabá yontsemna ca.”

<sup>10</sup> Chë soye unga soyama chca tonjanopasá y chentsana chë entsëjua celoye ton-tanátsjua.

<sup>11</sup> Y cachora unga boyabásenga Cesarea pueblcana ichmónënga, chë posada sëndbomnentše tmonjánashjajna, atše janguanguama.

<sup>12</sup> Y chë Uámana Espíritu šonjanmandá atše yapa ntjatenoyuabnayscá chëngaftaca jama; y quem chnënguana Jesucristbeñe ošbuachiyëgnaca átšeftaca tmonjána. Nÿetscanga canÿe entsá Cornelio ca uabainabe yebnoye fsënjánamashjna;

<sup>13</sup> y chana bënga šonjanacuntá ntšamo tojáninÿe, cachabe yebnentše canÿe ángel ibo-jtsebiatsana y mëntšá tbojaniyana: “Básefta boyabásenga Jope bëts puebloye michamó y moye chamuánatse Simón, chë Pedro ca monduabobuatmá,

<sup>14</sup> y cha cmochanjabuayená ntšamo aca y acbe yebnentša oyenënga šmochjotsbocá ca.”

<sup>15</sup> As, atše jóyebuambayama sënjanbojatsé orna, chë Uámana Espíritu tonjánamashëngo chëngbe ainaniñe jtsemándayama, ntšamo bëngbeñe natsana tonjanamashëngcá.

<sup>16</sup> “Chora sënjanenoyuabó ntšamo Bëngbe Utabná tonjánayanama: ‘Ndegombre, Juan entsanga béjayeca tonjanëbaye; pero Bëngbe Bëtsá chë Uámana Espíritu bochanjíchmuá, tšëngaftange ainaniñe jtsemándayama cháumashënguama ca.’

<sup>17</sup> Chcasna, chëngnaca Bëngbe Bëtsá chë Uámana Espíritu tonjatšatá, ntšamo bënga, chë Utabná Jesucristbeñe ošbuáchiyënga, šonjanatšatacá. Y chca, atše ndoñe quetsásmëna canÿe tša uamaná, Bëngbe Bëtsá jauyanama ntšamo cha yobošcá ndoñe chaondëtsemna ca.”

<sup>18</sup> Jerusalenoca Jesucristbeñe ošbuáchiyënga chë soyënga tmojanuena ora, ndocá más tmonjantjá y Bëngbe Bëtsá tmojtanchuá, mëntšá: —¡Asna, Bëngbe Bëtsá chë ndoñe judiëngnaca tojalesenciá chëngbe bacna soyëngama ngmëncaca chamuatenójuaboma y chca amana chamotsajbanama, chë nÿetsca tescama yomna tšabe vida chamotsebom-nama ca!

### *Ntšamo Antioquía pueblaca tojanobojatsé, entsanga Jesucristbeñe ošbuáchiyana*

<sup>19</sup> Esteban tmojanóba chentsana, tmojanontsé chë Jesucristbeñe inÿe ošbuachiyëgnaca jatëcamiyama. As chentsana báseftanga yojtsamna bën luarëngoye jtsachetëngana Fenicioye, Chipre y Antioquía luarëngoye, y chenache chënga Jesucristbe soyëngama imojanoyebuambná, pero nÿe judiëngbiama.

<sup>20</sup> Pero báseftanga imojamna Chipre y Cirene luaroquënga, y chënga Antioquía bëts puebloye tmojánashjajna orna, chë ndoñe judiëngbeñnaca tmojanoyebuambá, Jesús, chë Utabnabe soyëngama jabuayenase.

<sup>21</sup> Bëngbe Utabnabe obenana chëngaftaca yojtsemna, y chca, ba entsanga tmojanabnaná bacna soyënga amana y tmojanontsé Bëngbe Utabnábeñe jtsošbuáchiyana.

<sup>22</sup> Jerusalenoca Jesucristbeñe ošbuáchiyënga chë soye tmojántatsëmbona ora, Antioquía luaroye Bernabé tmojanichmó.

<sup>23</sup> Bernabé choye tojánashjango orna, tojáninýe ntšamo Bëngbe Bëtsá tšabe ben-dicionënga chëngbeñe tojanmama y chama corente tojanoyejuá. Nýetscanga to-janabuayená chamotsiyena nýets ainánaca Bëngbe Utabnábeñe jtsošbuáchiyëse.

<sup>24</sup> Bernabé inamna canýe entšá tšabe soyënga amá, chë Uámana Espiritu chabe ainaniñe yojtsemándaye y bëtská ošbuachiyá inamna. Y banga tmojanontsé Bëngbe Utabnábeñe jtsošbuáchiyana.

<sup>25</sup> Chentšana, Bernabé Tarso puebløye tojána Saulo janguanguama,

<sup>26</sup> y tbojáninýena ora, Antioquía luaroye tbojëftsanbetše. Antioquía luarentšna canýe uata nýetsá Jesucristbeñe ošbuáchiyëngaftaca cánýiñe ibojëftsemna y ba entšanga tmojanabuatambá. Antioquioca inamna chë ndayentše natsanama Jesucristbeñe ošbuáchiyënga Cristbe ústonënga ca imojtsëbuatma.

<sup>27</sup> Chë tempo, básefta Bëngbe Bëtsabe juabna oyebuambnayënga Jerusalenocana Antio-quía luaroye tmojána.

<sup>28</sup> Chënguentšana canýa Agabo ca uabainá tojantsá y chë Uámana Espiritbeyeca tojánayana, mëntšá: “Nýets luariñe entšanga oyeniñe bëts shëntsana echanjóshjango ca.” Y ndegombre chca tojanopasá, Claudio Romoca bëts mandado inamna ora.

<sup>29</sup> Chcasna, chë Antioquía bëts pueblentša Jesucristbeñe ošbuáchiyënga imojenóyeunaye ntsachetšá crocénanëñaca juíchmuana, ntšamo cada ona tojobenacá, Judeoca Jesu-cristbeñe ošbuáchiyënga jujabuáchama.

<sup>30</sup> Chca tmojanma, y Bernabé y Sáuloftaca chë crocénana tmojanichmó chë Judeoca Jesucristbeñe ošbuáchiyënguentše bëtsëjemëngcá amëndayëngbioye.

## 12

### *Santiago tmojanóba; Pedro tmojanëtame*

<sup>1</sup> Chë tempo, rey Herodes básefta Jesucristbeñe ošbuáchiyënga tojánishëche jutámia y jätsetšenama.

<sup>2</sup> Tojanmandá espadëjaca chamóbama Santiago, Juanbe catsata;

<sup>3</sup> y Herodes tojántatsëmbona judiënga chë soye tojanogúsetama; as, cha tojanmandá Pédrëñaca chamutámia. Chca tojanopasá chë levadúraca ndëpormana tandëse sayté, Bashco fiesta ora.

<sup>4</sup> Pedro tmojánishache orna, Herodes tojanmandá chamutámia, y chë cárceloca soldadënga cantátanga tmojanenojatá cántentše cha chamotsebojanýama. Herodes yojëtsejuabnaye, Bashco fiesta tojochnëngo ora Pedro juabocnama, entšangbe delante jayanama cha chaóbanama.

<sup>5</sup> Chcasna, Pedro yojtsëtámëna y chë soldadëngna corente imojtsebojanýá. Pero Jesucristbeñe ošbuáchiyënga bëtská Bëngbe Bëtsá imojtseimpadana Pédrëbiama.

### *Bëngbe Bëtsá tojanma Pedro natjëmbana cárcelocana cháuaisebocnama*

<sup>6</sup> Canýe te yojtsájamna Herodes entšangbe delante Pedro juabocnama. Chë te ibetna, Pedro yojtsomañe y cátaoica canýe soldado yojtsemna; uta cadenëjuaca yojtsabatsëcna y inýe soldadëngna bësócana chë utámëniñe imojtsebojanýá.

<sup>7</sup> Ndeolpe, Bëngbe Utabnabe canýe ángel tojánbocna, y lempe chë utámëniñe yo-jtsebuashinýinýana. Chora chë ángel tēchañe Pédrëbioye tbojánbojajo, tbojanfšená y tbojanianyana: “Betsco motsbaná ca.” Y cachora chë cadenëjuangá Pédrëbe buacu-atšënguentšana tojanatquécjana,

<sup>8</sup> y chë ángel tbojanianyana: “Matichëtjo y matóshecochëtjo ca.” Pedro tojanma ntšamo chë ángel tbojaniancá, y chora chë ángel tbojátaniyana: “Mataquëfsayé y šmasto ca.”

9 Pedro utámenocana chë ángel ibojtsëstona, pero ndoñe yontsetátšëmbo aíñe ndegombre o ndoñe bentsemna chë ángel yojtsama cha chocana cháuaisebocnama; masna, ibojtsinÿana mo canÿe otjénayoca cuaftsemncá ca.

10 Y útentše chë soldadënga imojtsebojanÿajana chata tbojánachnëngo y yerëša bësásoye tbojánashjango, chë ndayëša yojanamna tsáshenoye jabocnama; y chë bësásana nÿe cachabe ponto yojotëfjo. Chentsana tbojëftsanbocna ora, canÿe tsáshenëjana ibojtsaye, y nÿe ndeolpe chë ángel Pédrëbentsana yojtsojuánañe.

11 Nÿa chora Pedro tbojanosertá y tojánayana: “Mora tšabá šjosertá, ndegombre Bëngbe Utabná chabe ángel tbojichmó atše jatsbocama Heródesbe cucuatšentsana y lempe ntšamo judiënga átšeftaca jamama imojuabnámna ca.”

12 Pedro chë soyama juicio tojanca ora, tojána María, Juanbe mamabe yebnoye; Juan, Marcos ca imojanábobaina. Y chë yebnentše banga cánÿiñe imojtsemna, Bëngbe Bëtsáftaca encuéntaye.

13 Pedro chë tsashenoica bësásoca tojanchembo ora, canÿe oservená, Rode ca uabainá, tojánbocna jarrepárama.

14 Chë oservená Pédrëbioye tbojanoyatëmbá ora, corente oyejuayá yojtsemna y cha, jebiatëfjo cuentna, cach tsoye tojesaná chë tšabe noticia jaúnayama, Pedro bësoca yojtsemna ca.

15 Chë tsoca imojtsemnëngna chora tmojanianana: “¿Opá chectsebocna ca?”

Pero chë oservená yojtsichamo ndegombre ca. Y chënga tmojanianana: “¡Chabe ángel ctsemna ca!”

16 Chëntscuana Pedro cabá yojtsechembuana; tmojánebiatëfjo y tmojáninÿe ora, chënga puerte imojenjaná.

17 Pero Pedro tojánëfjatsëmbo iytëca chamobiamama y tojanacuntá ntšamo Bëngbe Utabná utámenocana tbojánatsbocama. Chentsana tojanëyana: “Ntšamo tonjopasama Santiago y chë Jesucristbeñe inÿe ošbuáchiyënga šmochjaúnaye ca.”

Chora Pedro chë yebnentšana tojtáisebocna y inÿoye yojáta.

18 Tojanbinÿna ora, chë soldadënga puerte imojóntša enbouenanana, ntšamo Pédroftaca tojanopasama ndoñe imontsetátšëmbo causa.

19 As Herodes tojanmandá Pedro chamotsenguanguama; pero jtsinÿenama ndoñe imonjobenaye orna, Herodes chë soldadënga tojanatjá ndayá Pédroftaca tojanopasana y chentsana tojanmandá chë cha imojanbojanÿá soldadënga jtsëbáyama. Chë soyënga tojanochnëngo chentsana, Herodes Judea luarentšana tojëftsanbocna y Cesarea luaroye tojtsanoñe, y choca tojtsanoquedañe.

### *Herodes tojanóbana*

20 Herodes corente yojtsetšátjaye Tiro y Sidonoquëngaftaca; as chënga tmojanenoyeuná Heródesbioye jama. Canÿe uámana uajabuachaná, Blasto ca uabainábioye tmojanayeuananá, y chana tojanašebuachená Herodes jauyanama ndoñe más entjayánanënga chamondëtsemnama, er Tiro y Sidonoca entšanga vida imnabomna Heródesbe luaroca sanángaca.

21 Chcasna, rey Herodes inÿe tescama tojánachembo. Chë tena, jóyebuambayama Herodes uámana entšayaca yojtopórma y yojótbema chabe mándaye tbemanentše; chentsana tojanonguamé.

22 Chora entšanga tmojanontsé mëntšá uayebuáchana: “¡Chë entsoyebuambná cha entšá ndoñe quenátsmëna! ¡Chana canÿe dios entsemna ca!”

23 Cachora, Bëngbe Bëtsabe canÿe ángel tojanma Herodes šocana chaboshachama, chabe cuenta Bëngbe Bëtsá chamuatschuama entšanga ndoñe yonjáuyana causa. Herodes tojanóbana mamángaca sasná.

24 Pero chë tempo más bëtská entšanga Bëngbe Bëtsabe palabra imojtsuenana y Jesucristbeñe imojtsošbuáchiye.

<sup>25</sup> Bernabé y Saulo chatbe trabajo tbojëftsanma ora, Jerusalenocana Antioquía luaroye tbojësanata y Juan, chë Marcos ca uabobuatmá, chátaftaca tmojëftsanbetse.

## 13

### *Bernabé y Saulo tbojanbojatsé Bëngbe Bëtsabe trabajo jamama*

<sup>1</sup> Antioquía luaroca Jesucristbeñe ošbuáchiyënguentše imojtsemna Bëngbe Bëtsabe juabna oyebuambnayënga y ošbuachiyëngbioye abuátambayënga. Chënga imojanabaina Bernabé, Simón (chë Sibetá ca uabobuatmá), Lucio Cirenocá, Manaén (nda tojanoboché cányiñe Herodes, chë Galileoca réyefraca) y Saulo.

<sup>2</sup> Canye te, Bëngbe Utabná imojtsatschuanaye y chama tondaye ntjascá imojtsemna ora, chë Uámana Espiritu tojánayana: “Mora šmochjaleséncia Bernabé y Saulo tšëngaftangbentšana chabuétsebocnama; chatna canye trabajuama sënjabacacá ca.”

<sup>3</sup> Bëngbe Bëtsá jëtschuayama tondaye ntjascá imojtsemnëntscuana y cháftaca imojtsencuéntantscuana, chëngbe cucuatšënga chatbe bestšaše juatsboica tmojancjá, chatbe trabajuiñe chaújabuachama Bëngbe Bëtsá jtseimpadánëse. Y chentšana chátbioye tmojtana-diošoftá.

### *Bernabé y Saulo Chipre luaroca*

<sup>4</sup> As Bernabé y Saulo, chë Uámana Espiritbeyeca ichmónata, Seleucia ca uabáinoye tbojánata y chentšana bejaycá, Chipre luaroye.

<sup>5</sup> Salamina bëts puebloye tbojánashjango ora, tbojanontsé Bëngbe Bëtsabe palabrama entšanga jábuayenama, chentša judiëngbe enefjuana yebnënguenache. Juan Marcos mo chatbe uajabuachanacá ibojtsebomna.

<sup>6</sup> Nyets chë luarëjana tmojánachnëngo orna, Pafos puebloye tmojánashjajna; y chentše tmojáninýena canye judío tatsëmbuá, Barjesús ca uabainá. Cha yojánichamo cha canjamna canye Bëngbe Bëtsabe juabna oyebuambnayá ca, pero ndoñe chca yonjamna.

<sup>7</sup> Chë tatsëmbuá inatrabájaye chë Chipre luaroca mandadbiama, Sergio Paulo ca uabainá; y chë mandadna corente osertaná inamna. Cha yojtseboše Bëngbe Bëtsabe palabra jouenama; as tojanmandá Bernabé y Saulo jobiatšana.

<sup>8</sup> Pero chë tatsëmbuá, grieguiñe Elimas ca uabainá, Saulo y Bernabebe contra yojtsemna y yojtsama chë mandado ndoñe chaondëtsošbuáchema, ntšamo chë Jesucristbeñe ošbuáchiyënga imojanošbuachecá.

<sup>9</sup> Chora, Saulo chë Pablo ca imojanábobuatmabe ainaniñe chë Uámana Espiritu corente yojtsemándaye; as chë tatsëmbuábioye yejuana ibojonýinýiye,

<sup>10</sup> y tbojanianya: “¡Abuambnayá, puerta bacna entšá, Satanasbe uaquiñá y tšabe soyënga ndoñe chaondëtsebínýnama trabajayá! Bëngbe Utabnabe nyetsca ndegombre soyëngama aca contsichamo uayátsenaye soyënga yojtsemna ca.

<sup>11</sup> Mora, Bëngbe Bëtsá cmochanjacastíga, jtaná cochanjoquéda y baseftayté jinýama quecochatobenaye ca.”

Cachora Elimas mo ibetiñcá yojoquéda y ibojtsonguaye canya buacuetëntšnana chabuánatsama, jtaná yojtsemna causa.

<sup>12</sup> Chë mandado chca tojáninýe ora, Jesucristbeñe yojtsošbuaché y yojenjaná Bëngbe Utabnabe soyënga tojanatsjínýama.

### *Pablo y Bernabé Antioquía pueblentše, Pisidia luaroca*

<sup>13</sup> Pablo y chabe enutënga, Páfosocana, bejaycá Perge puebloye tmojátananga, Panfilia luaroca. Pero Juan tojésanabashejuana y Jerusalenoye tojésanshëcona.

<sup>14</sup> Pergentšana Antioquía puebloye tbojátanata; chë pueblo inamna Pisidia luare béconana. Chentšna, ochnayté, chë judiëngbe enefjuana yebnoye tbojánamashëngo y tbojanótbema.



<sup>15</sup> Moisesbe leyíñe y Bëngbe Bëtsabe juabna oyebuambnayëngbe uabemana librëšangañe tmojanalía orna, chë enefjuana yebnentša mándayënga canya tmojanichmó chënga jáuyanama: –Israeloquënga, bënga fsëntseboše entsanga chašmabuayená, nderado ndayá jayanama šmojtsebomñese, muentša entsanga añemo chamotsebomnama ca.

<sup>16</sup> As Pablo tojantsá y entsángbioye cucuátseca tojánefjatsëmbo iytëca chamobiamama, y tojánayana: –Smochjouena Israeloquënga y ndoñe judiënga Bëngbe Bëtsá adórayënga.

<sup>17</sup> Israeloca entsanga mondadorana Bëtsá, Bëngbe Bëtsá, bëngbe bëts taitanga tojanëbuáyana, y tojanma chënga corente bëtsçanga chamotsemnama, chënga Egiptoca inye luarocana ashjajnëngcá imojoyena ora. Y chentšana, cachabe obenánaca chë luarocana chënga tojésanëbuacana.

<sup>18</sup> Canta bnëtsana uata nyetsá, Bëngbe Bëtsá entsanga ndoyena luaroca chënga yojanëuantana,

<sup>19</sup> y cha tojanma chë Canaán luaroca canysëftentša entsanga chamopochocama y bëngbe bëts taitanga chëngbe fshantsënga nduiñënga tojánabiamama.

<sup>20</sup> Chë tempo, chë Bëngbe Bëtsá Abrahámbioye quem fshantse jatsetayama tbojanšbuachená orscana, y chë tempo, chë bëngbe bëts taitanga chë fshantse tmojanóyëngacñëntscuana, canta patse y shachna bnëtsana uata tojanochnëngo.

“Chentšana, Bëngbe Bëtsá chëngbiamama mandadënga tojánabiamama, Bëngbe Bëtsabe juabna oyebuambnayá Samuel chëngbe mandayá yojëftsemna tempëntscuana.

<sup>21</sup> Chentšana, Israeloquënga Samuel tmojanimpadá canye rey chabojayé chaot-samëndama; as Bëngbe Bëtsá Saúlbioye chëngbe rey tbojábema, canta bnëtsana uatëscama. Saúl inamna Cisbe uaquiñá y Benjaminbe bëts pamillanguentsá.

<sup>22</sup> Más chcoyna, Bëngbe Bëtsá Saúlbioye chë mándayentsana tbojtsanjuaná, y chentšana Davídbioye mo chëngbe reycá tbojábema. Chabiamama Bëngbe Bëtsá tojánayana: ‘Atše sëndëtatšëmbo, David, Isaíbe uaquiñá, canye tšabe entsá yomnama y chama atše sëndoyejuá, y cha sempre endëprontana ntšamo atše stsebošcá jtsamama ca.’

<sup>23</sup> Davídbentsana canye entsá Jesús enjamna, nda Bëngbe Bëtsá tbojanichmó Israeloca entsanga jabátsebacama, ntšamo cach Bëngbe Bëtsá chëngbe bëts taitanga tojanašebuachenacá.

<sup>24</sup> Cabá Jesús ndëbocna ora, Juan nyetsca Israeloquënga tojanabuayená bacna soyënga amana chamotsajbanama y chamuenábayama.

<sup>25</sup> Juanbe trabajo jopochócama yojtsobeco ora, cha tojánayana: ‘¿Nda atše tsmënama tšëngaftanga šmojuabná ca? Chë tšëngaftanga šmontsejuabná atše tsmëna ca cha, atše ndoñe quetsásmëna. Pero átsbentsana echanjabo canya, y atše mercedo taitatobuajoñe ni mo jotsejbiyama chabe shecochëtjonëshentša corriëja jajafjonama ca.’

<sup>26</sup> “Chcase morna, Abrahámbentsana entsanga y ndoñe judiënga Bëngbe Bëtsá adórayënga; bëngbiamama entsemna quem buayenana soye, chë Bëngbe Bëtsá entsanga játsebacana.

<sup>27</sup> Masque cada ochnayté, Bëngbe Bëtsabe juabna oyebuambnayëngbe uabemana palabra monjanalía chëngbe enefjuana yebnentše, Jerusalenentša oyenënga y chentša mándayënga ndoñe quenjatanësertana nda Jesús bëtsemnama, y chë tmojtsalía soyëngama cach ndoñe. Y chca, chënga Jesús chamóbama tmojáboshjona ora, chë chca amënga tmojanma ntšamo Bëngbe Bëtsabe juabna oyebuambnayëngbe librëšangañe iuabemancá.

<sup>28</sup> Y masque ndocna bacna soye tmonjáníyena Jesús jóbanama chabotsemnama, Pilato tmojanimpadá chaomandá chábioye jóbama.

<sup>29</sup> Chentšana, lempe ntšamo Bëngbe Bëtsabe uabemana palabreñguiñe iuayancá Jesúsëftaca tojanochnëngo ora, chabe ústonënga chë cruzocana tmojtanëstjango y tmojanatbontsá.

<sup>30</sup> Pero Bëngbe Bëtsá tojanma Jesús cháuatayenama.

<sup>31</sup> Chë Galileocana Jerusalenoye cháftaca tmojánanga, baytentscuana Jesús yojánebuacana; y morna, lempe ntšamo Jesusbiana tmojaninýcá, chënga entsángbeñe montsoyebuambná.

<sup>32</sup> “Y chca, mora bënga chë tšabe noticiënga cbontsëtsësná. Ntšamo Bëngbe Bëtsá bëngbe bëts taitanga tojanašebuachenacá,

<sup>33</sup> cha tonjama, bënga chë chëngbe entsanguentsëngbiana, chca chaotsemnama. Y Bëngbe Bëtsá chca tojama, Jesús cháuatayenama cha jamëse. Rey David, Bëngbe Bëtsabe uabemana palabrënguiñe, segundo salmentše mëntšá tojanábema, ntšamo Bëngbe Bëtsá Jesúsbiyoye tbojaniyanama:

Aca atšbe uaquiñá condmëna.

Mënté entsanga sënjinýanýé aca atšbe Uaquiñá comnama ca.

<sup>34</sup> Y tempo Bëngbe Bëtsá chabe uabemana palabrënguiñe tojaninýanýé cachá jamama Jesús cháuatayenama y ndoñe cachiñe chaondóbanama, mëntšá tojánayana ora:

Chë ndegombre soyënga y chë tšabe bendicionënga ntšamo David sënjanšbuachenacá, tšëngaftanga cbochanjátšataye ca.

<sup>35</sup> Inýoca Bëngbe Bëtsabe uabemana palabrënguiñe, Salmos librëša uabiamnayá, mëntšá tojanábema ntšamo Jesús Bëngbe Bëtsábioyoye tbojaniyanama:

Aca ndoñe quecochatslesencia atšbe cuerpo,

chë acbe Uámana oservenabe cuerpo chaotsopochocama ca.

<sup>36</sup> David, chabe tempo imojoyenëngbiana tojanma, ndayá cha chaomama Bëngbe Bëtsá tojanjuabocá. Cha tojanóbana y tmojanatbontsá chë chabe bëts taitángbiyoye tmojanëtabuantsá luarentše, y chabe cuerpo tojanopochocá.

<sup>37</sup> Pero chë Bëngbe Bëtsá tojanma chauatayenamabe cuerpna, ndoñe tonjanopochocá.

<sup>38-39</sup> “Asna, baconga y batanga, atše sëntseboše tšëngaftanga quem soye chašmotsetátšëmbo: Ndayá Jesús tojanmama, entsanga chëngbe bacna soyëngama perdonánënga montsemna. Jesúsbeyeca, nyetsca chábeñe tmojtsošbuáchenga, bacna soyëngama perdonánënga mochántsemna. Ntšamo Moisesbe leyíñe iuayancá tmojanmama, chënga ndoñe tmonjanobená chca perdonánënga jtsemnama; nyë Jesúsbeñe jtsošbuáchiyëse chënga perdonánënga jtsemnana.

<sup>40</sup> Cuedado šmochtsebomna, ntšamo Bëngbe Bëtsabe juabna oyebuambnayënga tmojanayancá, tšëngaftangaftaca ndoñe chaondochnënguama.

<sup>41</sup> Bëngbe Bëtsá mëntšá tojánayana:

Smochjouena. Tšëngaftanga chë ntšamo atše tijayancá šmojtšábotenga, ojnánënga šmochántsemna y šmochanjóbana.

Tšëngaftanga cabá vida šmobomnëntscuana, atše bëts soyënga chanjëftsema, y masque ndánaca chë soyëngama chacmojtšacúnta,

tšëngaftanga chiñe ndoñe quešmochatošbuáchiye ca” —Pablo tojanoyebuambá.

<sup>42</sup> Pablo y chabe enutënga chë judiëngbe enefjuana yebnentsana tmojëftsanbocna ora, chë ndoñe judiënga chëngbiyoye tmojanaimpadá, chë inýe ochnaytescama chë soyëngama más jábuayenama.

<sup>43</sup> Chentše chë te jénefnama tempo tojanopochocá ora, ba judiënga y ndoñe judiënga, chë Bëngbe Bëtsábioyoye imojánadorana mo chë judiëngcá, Pablo y Bernabé tmojanéseto. Y chatna chënga tmojanabuayená nyets tempo chamotsejuabnama, Bëngbe Bëtsá chëngbiana tšabe soyënga yojtsamama.

<sup>44</sup> Chë inýe semana, chë ochnaytena, nýa mo nyetsca chë pueblentše oyenënga tmojanobeconá Bëngbe Bëtsabe palabra jouenama.

<sup>45</sup> Pero ba entsanga choye jouenama tmojánama chë judiënga tmojáninýe ora, tmojanotjayaná, ba entsanga Pablo imojtseyeunanama; as chënga tmojanontšé mocá ichámuaana ndayá cha yojtsóyebuambnama, y chábioyoye oyenguayana.

<sup>46</sup> As Pablo y Bernabé más añémoca mēntśá tbojánayana: “Endánēyta, natsana tšēngaftanga, chē judiēnga šmomnēnga, Bēngbe Bētsabe palabra jshabuayenana. Pero tšēngaftangna chē palabra šmontsaboté, y šmontsejuabná tšēngaftangbiamana ndoñe tšabá yontsemna chē n̄yetsca tescama yomna tšabe vida jtsebomnana ca; chē causa, bēnga fchantsoñe chē ndoñe judiēngbeñe Bēngbe Bētsabe palabra jóyebuambayama.

<sup>47</sup> Er Bēngbe Bētsá chama šjanichamó, mēntśá jauyanēse:

Aca tcbonjuábuayana chē ndoñe judiēngbioye tšabe noticiēnga jábuayenama, chaósertama. Y chca, aca chēngbiamana cochántsemna mo can̄ye bin̄ynayacá.

Chca, ácbeyeca n̄yets luarēnguenache entśanga atše chanjatsebacá ca.”

<sup>48</sup> Chē ndoñe judiēnga chca tmojanuena ora, puerte imojtsóyejuaye y tmojanontśé mēntśá ichámuana: “Bēngbe Utabnabe palabra tšabá bēngbiamana entsemna ca.” Y chora, chē n̄yetsca tescama yomna tšabe vida jtsebomnana Bēngbe Bētsá tempo tojánabacacanga, tmojanontśé Jesúsbeñe jtsošbuáchiyana.

<sup>49</sup> Y chca, n̄yets chē luariñe más entśanga Bēngbe Bētsabe palabra imojtsuenana.

<sup>50</sup> Pero chē judiēnga tmojanoyebuambá, shembásengaftaca Bēngbe Bētsá adórayēnga y uámanēnga, y chē pueblentśa uámana taitángaftaca, jamama Pablo y Bernabé chabo-sufrima y chē luarentśana jtēbuacnama.

<sup>51</sup> As, Pablo y Bernabé tbojésanshecstētonata, judiēnga jin̄yan̄iyama chēnga ndoñe tšabá tmojanmama; y chentśana, Iconio pueblöye tbojtsanoñe.

<sup>52</sup> Pero Jesucristbeñe ošbuáchiyēnga corente oyejuayēnga imojtsemna, y chē Uámana Espíritu chēngbe ainaniñe corente yojtsemádaye.

## 14

### *Pablo y Bernabé Iconio pueblöca*

<sup>1</sup> Iconioca, Pablo y Bernabé cán̄yiñe tbojánamashēngo chē judiēngbe enefjuana yebnentše y corente obenánaca Bēngbe Bētsabe palabra tbojanoyebuambá. Chíyeca, ba judiēnga y ndoñe judiēnga Jesucristbeñe imojtsošbuaché.

<sup>2</sup> Pero chē judiēnga Jesucristbeñe ndošbuáchiyēnga, chē ndoñe judiēngbioye tmojanayēnjaná, Pablo y Bernabebiamana podesca chamotsejuabnama.

<sup>3</sup> Chíyeca, Pablo y Bernabé bayté chentše tbojanototoná y ndauatjca Bēngbe Utabná Jesucristbiamana tbojanoyebuambá. Bēngbe Utabná obenana chata tojanatśatá bēts soyēnga jtsamama, y chē soyēngaca Bēngbe Utabná entśanga tojanin̄yan̄yé, ndayá chē ichmónata ibojtsoyebuambnacá ndegombre bētsemnama, chē Bēngbe Bētsá n̄yetscanga iuababuán̄yeshanana.

<sup>4</sup> Pero n̄yetsca chē pueblentśa entśanga ndoñe cachcá imontsejuabnaye; ín̄yēnga chē judiēngaftaca imojtsemna, y ín̄yēngna chē Jesucristbe ichmonátaftaca.

<sup>5</sup> As, chē judiēnga y ndoñe judiēnga chentśa mandayēngaftaca tmojanenoyeuná chata jtsatsetšenama y ndētśbēngaca jtsēbáyama.

<sup>6</sup> Pero Pablo y Bernabé chama tbojántatśēmbona orna, tbojtsanēchañe Listra y Derbe pueblöye, Licaonia luaroca, y choca chábuañe luarēngoye;

<sup>7</sup> y chē luarēnguenáchnaca, chata Jesucristbe tšabe noticiēnga entśanga tmojanabuayená.

### *Listra pueblöca, ndētśbēngaca Pablo tmojtsanatēchēnganja jtsóbama*

<sup>8</sup> Listra pueblöca inamna can̄ye boyabása jama ndobená. Ndocna te yondobena jana, chca cosheto inón̄yna causa. Chē boyabásana yojtsetbemana

<sup>9</sup> ouenana ntśamo Pablo yojtsichamcá. Y Pablo chábioye tbojanon̄yin̄yé ora, tojántatśēmbona chē šocá tša yojtsošbuáchema, shnaná jtsatsmēnama;

<sup>10</sup> as Pablo, juayebuáchenēse tbojanian̄yana: “¡Motsbaná y acbe shecuatśēngaca tšabá motsa ca!”

Chora chë boyabása, canÿe jontsënjëse tojantsá y vojóntša anana.

<sup>11</sup> As chë entsanga, ndayá Pablo tojanmcá tmojáninÿe ora, tmojanontsé uayebuáchana chë Licaonia luarentša biyañe, mëntšá: “¡Bëngbe diosënga bëngbioye tbojátsma mo entsatcá ca!”

<sup>12</sup> Bernabé imojtsábobuatma Zeus ca, mo chë chëngbe diosënga amëndayacá; y Páblëna Hermes ca, mo chë inÿe diosëngbiama oyebuambnayacá. Páblëbioye chca imojtsábobuatma, er cha más yotsoyebuambná.

<sup>13</sup> Zeusbiama chentša bachna inabomna canÿe yebna chë pueblo chaboca, chábioye jadórama. Chë bachna, uacnënga tojanënatse y uantšefjushangá tojanëyamba chë Zeus jadórama yebnentša amashjuanoye; y cha y chë entsanga imojtseboše chë uacnënga jashebuáyana y jajuinÿiyana, chca, chë ichmonátbioye jadórama.

<sup>14</sup> Bernabé y Pablo chama tbojántatšëmbona ora, entsáyá tbojtsanenántšajatanëca, entsanga jinÿanÿiyama, ntšamo chënga imojtsamcá chata tondaye yonjógusetama, y tbojëftsantotjajo entsangbe tsëntsajana y mëntšá ibojtsaychembumbuana:

<sup>15</sup> “Baconga y batanga, ¿ndáyeca chca šmojtsama ca? Bëndata cach tšëngaftangcá entsata fsëndmëna. Muentše bëndata fsëntsemna nÿe jábuayenama Bëngbe Utabná Jesucristbe tšabe noticiënga, tšëngaftanga chë quem ndoservena soyënga, vida ndbomna soyënga adórayana chašmotsajbanama, y Bëngbe Bëtsá Ainabe benache chašmatishachama. Ndegombre, cha tojanma celoca, fshantse, nÿetsca béjayënga y lempe ntšamo chenache yobinÿncá.

<sup>16</sup> Masque tempo, Bëngbe Bëtsá entsanga tojanalesenciá cada ona chaoma ntšamo tojtsejuabnacá, tšabá cachëngbiama yojtsëmnayeca,

<sup>17</sup> Bëngbe Bëtsá ndocna te ntjájbanana tšëngaftanga jtsinÿanÿnayana, cachá tojama tšabe soyëngaca, mocna Bëtsá cha yomnana. Cha endama tšëngaftangbiama chauaftema y chë matënga botamana chaoshájonama, y becá saná cmondatsatná; y cha endama tšëngaftangbe ainaniñe corente oyejuayana chašmotsebmomna ca” —chata tbojánayana.

<sup>18</sup> Masque chë soyënga tbojánayana, nÿe batsatema más bën y ya ndoñe matbënjanobenata chë entsanga jtsëuyanana uacnënga jashebuáyama, chca, chátbioye jadórama.

<sup>19</sup> Chca ora, básefta judiënga tmojánashjajna Pisidioca, Antioquíocana y Iconiocana, y chentša entsángbioye tmojanayënjaná, Jesucristbe ichmonatbe contra chamotsemnana. Chcasna, Pablo ndëtšbëngaca imojtsënanaye y chabe cuerpo chë pueblo chaboye tmojtsansjojó, er chënga imojtsejuabnaye Pablo ya obaná yojtsemna ca.

<sup>20</sup> Pero Jesucristbeñe ošbuáchiyënga Pablo tmojanóbobuashcona orna, cha tojtantsbaná y cachiñe chë puebloye tojtesaná; y chë yëfsana, Bernabéftaca Derbe puebloye tojána.

<sup>21</sup> Derbe puebloca Jesucristbe tšabe noticiënga entsanga tmojanabuayená, y chca, entsanga Jesucristbeñe imojtsošbuáchiye. Chentšana chata tbojésanshëconca Listra, Iconio y Pisidioca Antioquiöye.

<sup>22</sup> Chë luarënguenache chata ibojánana chë Jesucristbe ustonëngbioye atañémuaye, cada te chábeñe más chamotsošbuáchema. Y entsángbioye tmojanëyana: “Bëngbe Bëtsabe amëndayoye jamashënguamna, bënga šontsamna quem luarentše bëtscá jëftsepadecánana ca.”

<sup>23</sup> Nÿetsca ošbuachiyëngcá enefjuanenache, bëtsëjemëngcá mándayënga tmojanabacacá, chentša Jesucristbeñe ošbuáchiyënguentsana, cachënga chentša ošbuachiyëngbioye jtsamëndayama. Bëngbe Bëtsá jëtschuayama tondaye ntjascá imojtsemna y cháftaca imojtsencuënta ora, cha tmojanimpadá, chë ošbuáchiyënga Bëngbe Utabnabe cucuatšifne chamotsemnana, ndábeñe chënga imojtsošbuaché.

*Pablo y Bernabé, Sirioca Antioquia puebloye tbojtanata*

<sup>24</sup> Pisidia luarëjana tbojánachnëngo ora, Panfilia luaroye tbojánashjango.

<sup>25</sup> Perge pueblentše Jesucristbe tšabe noticiënga entsángbioye tmojanabuayená, y chentšana Atalia puebloye tbojánata.

<sup>26</sup> Chentšana, Bernabé y Pablo, bejaycá tbojtánata Siroca Antioquía puebloye. Chentša entsanga Bëngbe Bëtsá tmojanimpadá chata chabe cucuatsiñe chabotsemnama, chë trabajuiñe chaotsanñenama; y chorna, chë trabajo ya tbojanpochocá.

<sup>27</sup> Choye tbojtánashjango ora, nyetsca Jesucristbeñe ošbuachiyëngbioye tmojánachembo, y tmojanacuntá ntšamo Bëngbe Bëtsá tšabe soyënga chátaftaca tojanmama, y ntšamo Bëngbe Bëtsá tojaninñanýé, chë ndoñe judiëngnaca chamotsobenama Jesucristbeñe jtsošbuáchiyama.

<sup>28</sup> Y Pablo y Bernabé bayté chentše tbojanototoná Jesucristbeñe ošbuáchiyëngtaftaca.

## 15

### *Ichmónënga y bëtsëjemëngcá mándayënga Jerusalenoca tmojánenefna jencuéntama*

<sup>1</sup> Chë tempo, báseftanga Judeocana áshjajnënga tmojanontsé, Antioquía pueblentše, chentša Jesucristbeñe ošbuáchiyënga mëntsá jabuátambana: “Base bobachtema chë más delicadentše ndoñe šmonjenotëtšëse, ntšamo Moisesbe leyíñe endayancá, ndoñe quenátopodena tšëngtaftanga atsebácanënga jtsemnama ca.”

<sup>2</sup> Chíyeca, Pablo y Bernabé jabuachana chca buatëmbayëngtaftaca imojánenatsëtsnaye. Cabana, tmojanëbuáyana Pablo, Bernabé y ínýenga Jerusalenoye chamotsama, choca chë Jesucristbe ichmónëngtaftaca y chë chentše Jesucristbeñe ošbuachiyëngbeñe bëtsëjemëngcá mándayëngtaftaca chama chamencuentama.

<sup>3</sup> Chcasna, chë Antioquioca imojánenefjuana Jesucristbeñe ošbuáchiyënga Jerusalenoye chënga tmojanichamó. Fenicia y Samaria luarëjana imojtsachñëjuana ora, chënga tmojanacuntá ntšamo chë ndoñe judiënga chëngbe tempsca soyënguiñe ošbuáchiyana tmojtšanajbanama y chora Bëngbe Bëtsábeñe imojtsošbuáchema. Jesucristbeñe chentša ošbuáchiyënga chca tmojanuena ora, puerte oyejuayënga imojtsemna.

<sup>4</sup> Pablo y chë ínýenga Jerusalenoye tmojánashjajna ora, chentša Jesucristbeñe ošbuáchiyënga, Jesucristbe ichmónënga y bëtsëjemëngcá mándayënga chëngbioye tmojanëbuaja. Chentšana, Pablo y Bernabé tbojanacuntá lempe ntšamo Bëngbe Bëtsá chátaftaca yojamcá.

<sup>5</sup> Pero básefta fariseunga, chora ya Jesucristbeñe ošbuáchiyënga, tmojantsá y mëntsá tmojánayana: “Chë ndoñe judiënga entsamna chë más delicadentše base bobachtema tëtšenënga jtsemnana, bënga judiëngcá; y tšëngtaftanga cmontsamna chënga jáuyanana, ntšamo Moisesbe leyënguiñe iuayancá chamotsamama ca.”

<sup>6</sup> As, chë Jesucristbe ichmónënga y bëtsëjemëngcá mándayënga tmojánenefna jencuéntama, chë ndoñe judiënga aiñe o ndoñe yonjánamnama chë más delicadentše base bobachtema tëtšenënga jtsemnama, ntšamo chë judiënga imojanamancá.

<sup>7</sup> Bën y bëtsá chënga tmojanencuentá chentšana, Pedro tojantsbaná y mëntsá tojanéyana: “Jesucristbeyeca catsátanga, tšëngtaftanga šmondëtatšëmbo, ya bayté entsemna Bëngbe Bëtsá tšëngtaftangbentšana atše šonjanábuayana, Jesucristbe tšabe noticiënga chë ndoñe judiënga jábuayenama, chca, chënga Bëngbe Utabnábeñe chamotsošbuáchema.

<sup>8</sup> Bëngbe Bëtsá jtsetatšëmbuana lempe ntšamo entsanga tmojtsejuabnacá. Y cha šonjaninñanýé, chë ndoñe judiëngnaca inmobena chabe entsanga jtsemnama, chábeñe tmojtsošbuáchese, chë Uámana Espíritu chëngbe ainaniñe cháuamashënguama cha tojanma ora, ntšamo cha bëngbe ainaniñe tojanmca.

<sup>9</sup> Y chca, Bëngbe Bëtsabiama nyetscanga cachcá monduámana, judiënga y ndoñe judiëngnaca; y cha tojama chë ndoñe judiëngnaca chëngbe bacna soyëngama perdonánënga chamotsemnama y ainaniñe tšabe juabna chamotsebonnama, Bëngbe Bëtsabe palabriñe jtsošbuáchiyëse.

<sup>10</sup> Y mora, ¿ndáyeca tsëngaftanga ndoñe šmontseboše ntšamo Bëngbe Bëtsá tojamcá? Pero tsëngaftanga šmontseboše, chë ndoñe judiënga Jesucristbeñe ošbuáchiyënga lempe chë leyentša mandënga chamotsocumplínama, mo nda ínÿabioye uauta uasmanësha cuaftsasmëmnacá; pero lempe chë mandënga, ni bëngbe bëts taitanga ni bënga ntsoberenana jocúmpliana.

<sup>11</sup> Y chca ndoñe chaondëtsemna. Bënga mondošbuaché bënga atsebácanënga imomnama Bëngbe Utabná Jesús chabe tsabe juabna šojaninÿanyéyeca, y Bëngbe Bëtsá cachcá chë ndoñe judiëngnaca tojatsebacá ca” —cha tojanëyana.

<sup>12</sup> Chorna, chentše imojtsemna entšanga nÿetscanga iytëca tmojanobiana, y tmojanuena Bernabé y Pablo jtsóyebuambnayana, chë bëts soyëngama, Bëngbe Bëtsabe obenana entšanga jinÿanÿiyama, y inÿe soyëngama chabe obenánaca, ntšamo chë ndoñe judiëngbeñe Bëngbe Bëtsá chátaftaca tojanmcá.

<sup>13</sup> Chë útata jóyebuambayama tbojanpochocá ora, Santiago mëntsá tojánayana: “Jesucristbeyeca catšátanga, šmochjouena:

<sup>14</sup> Simón šonjabuayená ntšamo Bëngbe Bëtsá natsana tojaninÿanÿé, chë ndoñe judiëngnaca cha iuanÿenama, y chíyeca cha chënguentšana banga tojubuáyana chabe entšanga chamotsemnana.

<sup>15</sup> Ntšamo Simón šonjabuayenacá entsemna cachcá ntšamo chë Bëngbe Bëtsabe juabna oyebuambnayënga tmojanayancá, ntšamo yochjanopásama y ntšamo Bëngbe Bëtsabe uabemana palabrenguiñe endayancá, mëntsá:

<sup>16</sup> Chentšana atše chanjésabo

y chë Rey Davidbe pamíllanga cachiñe uámanënga chantabiana; mo nda canÿe uáshajayena yebna tojëtšjebcá, atše, Davidbe pamíllanga cachiñe uámanënga chantabiana;

<sup>17</sup> chca, chë inÿe entšanga chamonguango ndayá jamana atše, tsëngaftangbe Utabná, más chašmotsábuatmama, nÿetsca ndoñe judiënga, chë atšbe entšanga chamotsemnana atše tijábacacanga.

<sup>18</sup> Chca atše, tsëngaftangbe Utabná sentsichamo, nda ya bayté entsemna tonjanma entšanga chë soyënga chamotsetatšëmbuama ca —chiñe endayana.”

<sup>19</sup> Chentšana Santiago mëntsá tojanëyana: “Chíyeca atše sëntsejuabná, bënga ndoñe šontsamna chë ndoñe judiëngbiana jamana más totcá chaotsemnana Jesucristo jtsëstonama.

<sup>20</sup> Chamna, šontsamna chënga juabuábiamana y jáuyanana ndoñe chamondëtsesá, sananga chë ndaye soyënga entšanga tmojuabná diosënga yomna ca jadórama tmojuiyëbana; bacna soyënga shembásenga o boyabásengaftaca ndoñe chamondëtsama y ndoñe chamondëtsesá tšëšana bayëngbe mëntsëna, y buiñe cach ndoñe ca.

<sup>21</sup> Er chë natsana tempënga orscana, nÿetsca pueblënguenache mondmëna chë Moisés tojéftsanayana soyënga entšángbioye abuayiynayënga; y chabe leyënga, nÿetsca ochnayté mondbetsalíaye chë bënga judiëngbe enefjuana yebnënguenache ca” —cha tojanëyana

*Chë Jerusalenoca ichmónënga y bëtsëjemëngcá mándayënga canÿe tsbuanácha tmojanichmó chë ndoñe judiëngbiana*

<sup>22</sup> Chentšana, chë Jesucristbe ichmónënga y bëtsëjemëngcá mándayënga, nÿetsca chë Jesucristbeñe ošbuáchiyëngaftaca tmojanenoyeuná chënguentšana báseftanga jabacacayama, Pablo y Bernabéftaca Antioquía puebloye jíchamuama. Chcasna, tmojanëbuáyana Judas, chë Barsabás ca uabobuatmá, y Silas; chata ibnamna uámanata chë Jesucristbeñe ošbuáchiyënguentše.

<sup>23</sup> Y chëngaftaca canÿe tsbuanácha tmojanichmó, y chiñe mëntsá yojétsayana:

Bënga chë Jesucristbe ichmónënga y chë bëtsëjemëngcá mándayënga, cach tsëngaftangcá Jesucristbeñe ošbuáchiyënga, fsëntseboše Bëngbe Bëtsá salúdoca

chacmotsábouamna, tšëngaftanga chë ndoñe judiënga, Jesucristbeñe ošbuáchiyënga, Antioquía pueblaca y Siria y Cilicia luarëngoca oyenënga.

<sup>24</sup> Bënga fsëntsetatšëmbo bëngbentsana báseftanga choye tmojángama, bënga ntjamëndacá, y fsëntsetatšëmbo mocna soyënga cmojtsabuátambama y chë causa, tšëngaftanga ndoñe šmontsetátšëmbo ntšamo jtsejuabnayana ndayá jamama yomnana, Jesucristbe canye ndegombre ustoná jtsemnama.

<sup>25</sup> Chcasna, bënga fsënjenoyeuná y šonjúnynana tšabá yojtsemna báseftanga bënguentsana jabacacayana tšëngaftangbioye jontješiyama chamotsama, y Pablo y Bernabé, chë Jesucristbeyeca bëngbe bonshana catsátataftaca, choye chamotsama.

<sup>26</sup> Chë úatna ba soye tbojotsbocá vida jáshbiana, Bëngbe Utabná Jesucristbiana oservëniñe.

<sup>27</sup> Chátaftaca Judas y Silas fsënjichamó; y chatna cach tšëngaftangaftaca bochanjóyebuambaye ntšamo quem tsbuanáchañe yojtsábemanama.

<sup>28</sup> Chë Uámana Espíritu y bënga cachcá fsëntsejuabná, bënga ndoñe šontsamna tšëngaftanga jamëndana bëtscá jabuache mandënga Moisesbe leyënguiñe chašmotsocumplínama. Nye quem uámana soyënga chiñe aíñe cmontsamna jtsobedecénana:

<sup>29</sup> Ndoñe šmattsesaye mëntšena, chë ndaye soyënga entšanga tmojuabná diosënga yomna ca jadórana tmojóba bayëngbiana; ndoñe šmatjofšiye buiñe, ni šmatjase tsešana bayëngbe mëntšena; y shembásënga y boyabásëngaftaca bacna soyënga ndoñe šmattsama. Chë soyënga ntšamcá, tšabá šmochanjama.

Bëngbe Bëtsá salúdoca chacmotsábouamna ca —chiñe yojétsayana.

<sup>30</sup> Chcasna, chë quem Jerusalenocana ichmónënga tmojésanodiošoftanentsana, Antioquía pueblaye tmojána; y chocna, nyetsca chë Jesucristbeñe ošbuachiyëngbioye tmojanëbuaja y chë tsbuanácha tmojanayentšbuaché

<sup>31</sup> Chë Antioquía pueblentša Jesucristbeñe ošbuáchiyënga ntšamo chë tsbuanáchañe yojtsabemancá tmojanalía ora, bëtš añemo tmojtanca y corente imojtsóyejuaye.

<sup>32</sup> Judas y Silas Bëngbe Bëtsabe juabna oyebuambnayata ibnamna; as, chátnaca chë chentša Jesucristbeñe ošbuachiyëngbioye ba soyënga tmojanëyana, chënga añemo chamotsatsbomnama y Jesucristbeñe corente chamotsošbuáchema.

<sup>33</sup> Chentšana baseftaytese, chentša Jesucristbeñe ošbuáchiyënga chëngbioye tmojtana-diošoftá, chë ndëmuanýënga tmojanichamóngbioye jtama.

<sup>34</sup> Pero Sílasna tšabá ibojtsinýana cachentše más jëftsajétanama.

<sup>35</sup> Pablo y Bernabé baseftayshinýe Antioquía pueblentše tbojanototoná y ba inýëngaftaca Bëngbe Utabná Jesucristbe tšabe noticiënga entšanga tmojanabuatambá y tmojanabuayená.

### *Pablo cachiñe inýe luarëngoye tojána, Bëngbe Bëtsabe trabajo jamama*

<sup>36</sup> Chentšana baseftaytese, Pablo Bernabébioye tbojaniyana: “Bëngbe Utabnabe palabra tbonjanabuayená luarëngoye bochjésa, choca Jesucristbeñe ošbuáchiyënga jábuachama y jányama ntšamo imojtsemnama ca.”

<sup>37</sup> Bernabé yojtseboše, Juan chë Marcos ca uabobuatmábioye chátaftaca jëftsbetšama.

<sup>38</sup> Pero Páblëna ndoñe tšabá ibontsinýana cha jëftsbetšana, er Juan chátbentsana tojtsanojuánañe Panfilia luarocana, y ndoñe tonjanatjëmbambá, Bëngbe Bëtsabe trabajo japochócantscuana.

<sup>39</sup> Y chë palabrama tondaye tbonjanenóyeunata causna, Pablo y Bernabé cachcá tbojesanenonýaye. Y chca, Bernabé, Marcos tbojëftsanbetše, y bejaycá Chipre luaroye tbojánata;

<sup>40</sup> y Páblëna, Silas tbojanábuayana jëftsbetšama. Chë Antioquía pueblentša Jesucristbeñe ošbuáchiyënga Bëngbe Bëtsá tmojanimpadá Pablo y Silas Bëngbe Utabnabe cucuatšinë

chabotsemnana, chatbe trabajuiñe chaotsanñenama. Chentšana, Pablo Sílasefaca tbojánbocna y

<sup>41</sup> Siria, Cilicia luarënguëjana tojánachnëngo entsanga añemo atšatnaye, chë luarenache enefjuana ošbuáchiyënga Jesucristbeñe más chamotsošbuáchema.

## 16

### *Pablo Timotéobioye tbojáninñena*

<sup>1</sup> Chentšana Pablo tojánashjango Derbe y Listra luaroye, y chentše tbojáninñena canye Jesucristbeñe ošbuachiyá, Timoteo ca uabainá; cha inamna canye judiá Jesucristbeñe ošbuachiyabe uaquiñá y chabe taitana griego entsá inamna.

<sup>2</sup> Chë Listra y Iconioca Jesucristbeñe ošbuáchiyënga Timoteobiana tšabá imojanoyebuambná.

<sup>3</sup> Pablo tojánbošena Timoteo jëftsбетšama; pero cabá ndetsbetše orna, Pablo base bobachtema chë más delicadentše tbojantëtše, ntšamo judiënga imojanamancá. Cha chca tojanma, jobenayama chë judiënga imojoyena luarëngoye cháftaca jama, er nÿetsca judiënga innatátšëmbo Timoteobe taitá griego inamnana.

<sup>4</sup> Chë ibojtsachñëjuana pueblënguenache chata ibojtsana Jesucristbeñe ošbuachiyëngbioye abuyaiynaye, ntšamo Jerusalenoca Jesusbe ichmónënga y bëtsëjemëngcá mándayënga tmojanamëndacá, ndayá chë Jesucristbeñe ošbuáchiyënga ndoñe judiënga jamama yojtsamncá.

<sup>5</sup> Nÿets luarenache enefjuana ošbuáchiyënga, Jesucristbeñe más imojtsošbuáchiye, y cada te Jesucristbeñe ošbuáchiyënga más imojtsóbotena.

### *Pablo mo otjenayoquëcá canye Macedonioca entsábioye tbojáninñe*

<sup>6</sup> Chë Uámana Espíritu, Pablo y Sílasbioye tojaninñanýé, chata ndoñe yontsanamna Asia luaroca Bëngbe Bëtsabe palabra entsanga jábuayenana; asna, tbojánachnëngo Frigia y Galacia luarëjana.

<sup>7</sup> Y Misia luaroca enajébanoye tbojánashjango ora, tmojanjuabó tsjuana jana, Bitinia luaroye; pero chë Uámana Espíritu tojanabuayená choye ndoñe chabondëtsama.

<sup>8</sup> Misia luarëjana tmojánachnëngo ora, Troas luaroye chënga tmojána.

<sup>9</sup> Chë te ibeta, Pablo mo otjenayoquëcá tojáninñe canye Macedonioca boyabása ibojtsebiatsana y mëntsá ibojtseimpadana: “Diosmanda Macedonioye mabo y šmabëjabuache ca.”

<sup>10</sup> Pablo chca tojáninñe y cachora lempe tmonjanprontá Macedonioye jama. Atšnaca, chë quem soyënga uabiamnayá, chënga sënjétsatjëmbambnaye. Bënga fsënjëtsejuabnaye ndegombre Bëngbe Bëtsá šojtsanachembuana choye jama ca, Jesucristbe tšabe notiçiënga choca entsanga jábuayenama.

### *Pablo y Silas Filipos puebloca*

<sup>11</sup> As, Troasentsána bejaycá fsënjána Samotracia luaroye, y yëfsana Neápolis puebloye,

<sup>12</sup> y chentšana Filíposoye. Filipos enjamna canye uámana bëts pueblo Macedonioca y bëtscá romanënga oyeniñe. Chë luarentše baseftayté fsënjanoquedanga.

<sup>13</sup> Canye ochnaytena, chë pueblentsána fsënjéftsanbocna y chë fshájaye tsachoye fsënjána. Fsënjanuena chentše canjamna canye luare Bëngbe Bëtsáftaca jencuëntama ca, y fsënjána janguanguama. Fsënjáninñena ora, chentše fsënjanotbiama y Bëngbe Bëtsabe palabra fsënjanoyebuambá chentše tmojanójoto shembásengbiama.

<sup>14</sup> Enjamna canye shembása, Lidia ca uabainá, Tiatira pueblócá, y cha enjamna uámana uabuángana uafjatsenga entsayá uená. Cha inamna Bëngbe Bëtsábioye adorayá y chentše Páblëbioye ibotseyeunana. Bëngbe Bëtsá tojanma cha chabosertá lempe ntšamo Pablo yojtsoyebuambnacá, Jesucristbeñe chaotsošbuáchema.



15 Cha y chabe yebnentše oyenënga tmonjánenabayora, Lidia mëntšá šonjanaimpadá: “Tšëngaftanga šmonjayana atše Jesucristbeñe ndegombre stsošbuaché ca; chcasna, mabënga yebnoye, átšbentše chašmoquedama ca.”

Y šonjanëtaríe bënga chentše joquédama.

16 Canye te, chë Bëngbe Bëtsáftaca encuëntaye luaroye fsënjétsajna orna, šonjanëbiatše canye tobiáše, oservená, bacna bayëjbe juabna uambayá; chë causa cha malisiayá inamna. Chabe nduiñënga becá crocénana imojanójacañe, chë tobiáše yojanmalísiaye soyëngama.

17 Chë tobiáše tonjanontsé Pablo y bënga usetonana y mëntšá enjétsaychembumbuana: “¡Quem boyabásenga montsemna chë celoca Bëngbe Bëtsabe oservënënga y tšëngaftanga cmontsabuayiyná ntšamo Bëngbe Bëtsá yobena tšëngaftanga játsebacama ca!”

18 Y bayté chca enjanchembumbuana; chë causa, Pablo bonjëtsetana y cabana, tonjanobuértana y chë bacna bayëjbioye mëntšá tbonjaniyana: “¡Jesucristbe obenánaca y cha jótšëmbonëse, cbontsemánda chë tobiášbentšana chacuaisebocnama ca!”

Y cachora chë bacna bayëja chë tobiášbentšana tojésanbocna.

19 Pero, chë bayëjbe juabna chábtentšana tojésanbocnama y chëngbiamá más crocénana jabemama chora chë tobiáše ndoñe yontsobenama, chë tobiáše nduiñënga tmojáninýe ora, Pablo y Sílasbioye tmojánishëche y tmojtsanasjojoye plazoye, mandayëngbioye.

20 Chë mandayëngbioye tmojanënatse ora, chënga mëntšá imojtsichamo: “Quem boyabásata judío entšata bondmëna, y muatbe causa bëngbe pueblentša entšanga montsenbouenana,

21 y bontsabatambá soyënga jamama ntšamo chë judiënga imuamancá y bëngbe leyënguiñe chë soyënga jamama ndoñe quenátslesenciana. Bënga ndoñe quešnátamna ni jouenana, ni jamana chë soyënga, romanënga bëtsemnayeca ca” —chënga imojtsichamo.

22 Chora chë entšanga tmojanontsé uayebuáchana; as, chë mándayënga tmojanamëndá chata entšayá jtsëtsejquëcana y niñëfjëngaca jtsachebuáanganjana.

23 Jabuache tmojanachebuáanganjëntšana, cárceloye tmojanautame y chë utámenënga shanyá tmojanmandá yejuana chaotsabuajënyama.

24 Chca tmojanmandá ora, chë utamianá chata tojanënatse chë más tsoye utámenoye y shecuatšentšana tsbuanëšinë tojanatsebuá.

25 Pero tsëntseto orna, Pablo y Silas ibnétsocantañe Bëngbe Bëtsá jëtschuayama, y cháftaca ibnéncuentaye; y chë inýe utámenëngna chca imojtsuenana.

26 Ndeolpe, corente jabuache yojtsëbánjua y chë utámena yebna fshantsocana yojtsábonjnaye. Cachora, nyetsca chë utámenentša bëšašangá tojantëfjo y nyetsca utámenënga chë cadenëjuangá yojtsayentšjafjona.

27 Pero chë utámenënga shanyá tojanofšená y chë utámenentša bëšašangá yojtsatëfjnama tojáninýe ora, cha tojanjuabó nyetsca utámenënga tmojtsanacheta ca; chë causa, chabe espadëja yojenosëngbotëntšena jtsenóitanama.

28 Pero Pablo tbojánbochembo: —¡Acbe cuerpo ndocá matenábomana; nyetscanga camuentše fsëndëtsomñe ca!

29 Asna, chë utámenentša shanyá canye uajuinýanësha tojanëyá y chë utámenoye ochamanana tojánamashëngo y auatja causa ngmëmnyayá Pablo y Sílasbe shecuatšentše yojoshëntsamentšiyé.

30 Chentšana tojtanëbuacna y tojanëyana: —Señórata, ¿ndayá šojtsemna jamama atše atsbocaná jtsemnama ca?

31 Y chata tbojanjuá: —Bëngbe Utabná Jesúsbeñe cochtsošbuáchiye, y chca, Bëngbe Bëtsá aca cmochanjatsbocá y acbe yebnentše oyenëngnaca ca.

32 Y cha y nyetscanga chë yebnentše imojtsemnënga, Bëngbe Utabnabe palabra tmojanabuayená.

<sup>33</sup> Cach ora chë ibeta, chë utamianá chata tojanënatse chë lisianënguiñe jetsajabiama. Chentšana, cha y chabe pamíllanga tmojánenabaye.

<sup>34</sup> Chentšana, chë utamianá chata tojanënatse chabe yebnoye y saná tojanacaredadó. Cha y nyetscanga chë yebnentše oyenënga oyejuayënga imojtsemna, Bëngbe Bëtsábeñe imojtsošbuáchemá.

<sup>35</sup> Yëfsana cachëse, chë mandayëngna soldadënga tmojanichamó, chë utamianá jamándama Pablo y Silas chauatabáshejuanama.

<sup>36</sup> Chë utamianá Páblëbioye tbojanianyana: —Chë mándayënga šmonjamandá tsëndata jtabáshejuanama. Chcasna, šontsobena natjëmbana jtsatoñana ca.

<sup>37</sup> Pero Pablo chë soldadënga tojanéyana: —Bëndátnaca fsëndmëna mo Romoca onýnanatcá derecho bomnata y šonjáchebuanganja entšangbe delante, bacna soyënga aíñe o ndoñe tatifjamama cabá ndinýanýiye ora, y cárceloye šmonjautame. ¿Y mora imojtseboše iytëcana jtabáshejuanama? Chca ndocna te chaondëtsemna; cach mándayënga chamuabo jabátëbuacnama ca —cha tojánayana.

<sup>38</sup> Chentšana, chë soldadëngna chë mandayëngbeñe tmojanobuambá ntšamo Pablo y Silas tbojanayancá; chca chënga tmojántatsëmbona chatna mo Romoca onýnanatcá derecho bomnata ibnamnama; chë causa, chë mándayënga puerte imojtsauatja.

<sup>39</sup> Chcasna, cach mándayënga tmojána chata perdón jatétejañama; chentšana tmojtanébuacna y tmojanéyana: “Diosmanda, muentšana inýe luaroye motsoñata ca.”

<sup>40</sup> As chata chë utámenentšana tbojéftsanbocna y Lídiëbe yebnoye tbojéftsanata. Chentšna, Jesucristbeñe ošbuáchiyëngaftaca tmojánenefjna y chata tbojánayana soyëngaca chëngbioye tmojanañemó. Y chentšana, chata inýoye tbojtsanoñe.

## 17

### *Tesalónica puebloca, Pablo y Silasbioye ndoñe tšabá tmonjanëbuaja*

<sup>1</sup> Pablo y Silas inýe luaroye ibojtsaye ora, Anfípolis y Apolonia bëts pueblënguëjana tbojánachnëngo y canýe bëts pueblo, Tesalónica ca uabáinoye tbojánashjango. Chentše, chë judiënga canýe yebna imnabomna chënga jénefnama.

<sup>2</sup> Páblëna, ntšamo enjanamancá, cada ochnayté chë jénefnama yebnoye yojánaye, unga semanëntscuana, y chentše chë judiëngaftaca yojanoyebuambná y imojánëtsëtsnaye. Bëngbe Bëtsabe uabemana palabrenguiñe iuayana soyëngaca,

<sup>3</sup> chënga yojanabuayiyná y ndegombre yojaninýanýná, Bëngbe Bëtsabe Uámana Uabuayaná jóbanama y chentšana jtayenama ibojamnama. Y mëntšá yojanëtsëtsná: “Chë Cristo, Jesús endmëna, ndabiama atše cbontsabuyayiná ca.”

<sup>4</sup> Judiënguentšana báseftanga chiñe imojtsošbuáchiye y Pablo y Silas tmojanëseto más jouenama. Ba grieguënga, Bëngbe Bëtsá adórayënga, Jesucristbeñe imojtsošbuáchiye y ba uámana shembásengnaca.

<sup>5</sup> Pero chë judiënga ndošbuáchiyënga chca tmojáninýe ora, puerte envidia imojtse-bomna. Asna, chënga tmojánachembo banga, tondaye amënga y bacna entšanga, y chënga tmojanenutaná jamama nyetsca chë pueblentša entšanga chamotsenbouénanama; y canýe entšá, Jasón ca uabainabe yebna chënga tmojtsanabuache, Pablo y Silas jtsanguanguama, chentšana jesëbuacnama y entšangbe cucuatšifñe jabáshejuanama.

<sup>6</sup> Pero chentše ndocná tmonjáninýena; as chë entšanga Jasón imojtsesjojoye y chentša mándayënga imojëtsemnoye tmojanánatse y Jesucristbeñe inýe ošbuachiyëngnaca choye tmojanënatse, y mëntšá imojtsáyebuache: “¡Chë boyabásata, chë ndëmuanýata ibojtsama nyetsca luarentša entšanga chamuenbouénanama, quem luaróynaca tbojabo,

<sup>7</sup> y Jasón chabe yebnentše chata tojúbuaja ca! ¡Chënga montsama ntšamo chë Romoca bëts mandadbe mandënguiñe ndoñe quenatslesenciancá, er chënga montsichamo inýe rey canmëna, Jesús ca, y cha, César chë Romoca mandadbe cuenta nyetscángbeñe yojtsemánda ca!” —chënga imojtsáyebuache.

<sup>8</sup> Chë entsanga y chë pueblentsa mándayënga chca tmojanuena ora, corente imojenbouénana.

<sup>9</sup> Pero Jasón y chë ínÿenga, cháftaca imojtsemnënga, crocénana tmojtanjajó, y as tmojtanabáshejuana.

### *Pablo y Silas Berea Puebloca*

<sup>10</sup> Ya ibeta yojtsemna orna, chë Jesucristbeñe ošbuáchiyënga tmojanma cachora Pablo y Silas Berea bëts puebloye chabuétsebocnama. Y chata choye tbojánashjango ora, chë judiëngbe enefjuana luaroye tbojánata.

<sup>11</sup> Chentša judiënga imojamna más tšabe ainana bomnënga chë Tesalonicoca judiëngbiamá; chcasna, oyejuayënga chë buayenana soye Jesucristbiamá tmojanóyëngacñe, y cada te Bëngbe Bëtsabe uabemana palabra imojanalía, jtsetatšëmbuama, ntšamo Pablo y Silas ibojtsëtsëtnacá aíñe o ndoñe ndegombre yojtsemnama.

<sup>12</sup> Y chca, ba chentša judiënga chatbe palábraca Jesucristbeñe imojtsošbuáchiye, y Grecia luaroca ba uámana shembásenga y boyabásengnaca.

<sup>13</sup> Pero, Pablo Bereoca chë Bëngbe Bëtsabe buayenana soyama entsanga yojtsabuayiyinama chë Tesalonicoca judiënga tmojántatšëmbona ora, chënga choye tmojána y tmojanma chentša entsanga chamuenbouénanama.

<sup>14</sup> Chcasna, banga Jesucristbeñe ošbuáchiyënga tmojanma cachora Pablo chentšana chauétsebocnama y béjaye tsachoye chaotsoñama; chëntscuana, Silas y Timoteo Bereoca tbojanoquedá.

<sup>15</sup> Pablo tmojantjëmbambá entsangna, Atenas ca uabaina bëts pueblóntscoñe cháftaca tmojána. Chentšana, Pablo chënga tojanabuayená chamuaishéconama Silas y Timoteo jaúnayama betscó jtsayana, Pábloftaca jateninÿenama.

### *Pablo Atenas puebloca*

<sup>16</sup> Pablo Atenas bëts puebloca Silas y Timoteo yojtsëbatmanëntscuana, puerte tbojanongmé, er cha tojáninÿe chentša entsanga imojtsadorana bëtsacá cachëngbe pormana soyënga, ndayama chënga imojanjuabná diosënga yojamna ca.

<sup>17</sup> Chíyeca, chë judiëngbe enefjuana yebnentše, judiënga y ndoñe judiënga Bëngbe Bëtsá adorayëngaftaca imojánenatsëtsnaye, y cada te chentša plazoca chë ndëmuanÿenga chentše imojanashjajuanëngaftácnaca.

<sup>18</sup> Y báseftanga, ntšamo jtsejuabnayama entsanga abuátambayënga, epicureunga y estoiquënga ca uabainëngnaca Pábloftaca imojánenatsëtsnaye. Inÿenga imojtsichamo: “¿Ndayama quem bostero yojtsoyebuambná ca?” Y ínÿengna: “Chana inÿe luarëngoca entsangbe diosëngbiamá muentše entsabóyebuambnaye ca.”

Chënga chca imojtsichamo, er Páblëna Jesusbiamá y chë obanënga jtayenama yojanoyebuambná.

<sup>19</sup> Asna, chentša entsanga cha tmojanánatse canÿe luaroye, entsanga jénefnama y oyeambuambnayënga joyaunayama luare, Areópago ca uabáinoye. Chentše imojanamana uámanënga jénefnana, nderado ndabiamá jayanama tšabá o ndoñe tšabá tonjamama. Chora Pablo tmojantjá: —¿Chë aca contsabuatambá soyënga ndayá bëtsayanana bënga quefstsobena jtsetatšëmbuama ca?

<sup>20</sup> Aca tsëm soyënga šcontsëtsëtná y bënga fsëntseboše jtsetatšëmbuana ndayá chë soyënga bëtsayanana.

<sup>21</sup> Er nÿetscanga Atenasentša oyenënga y inÿe luarëngocana áshjajnëngna, corente yojanogúsetana chë tojtsopasana tsëm soyëngama jtsuenanana y jtsencuëntayana.

<sup>22</sup> As Pablo tojantsá chëngbe tsëntsaca chë Areópago ca uabáinentše y tojánayana: —Atenasentša entsanga: ntšamo bominÿe sënjajacá, atše sëntsetatšëmbo tšëngaftanga ba diosënga puerte šmayaunana y šmadoránama.

<sup>23</sup> Atše sëndánrreparana tšëngaftangbe diosënga šmétsadorana luarënguenache y sënjínÿena canÿe altar y chentše mëntšá iuábemana: “Chë Bëtsá nduabuatmabiama ca”. Y morna, chë Bëtsá chë nda ntsabuatmcá šmadoránabiama, atše cbontsabuaiyná.

<sup>24</sup> “Chë Bëtsá quem luare y lempe ntšamo chentše yomncá tojanma; cha endmëna quem luarentše y celoca Utabná, y cha ndoñe quenatiyena cha jadórama entsangbe jebna yebnënguiñe,

<sup>25</sup> ni quebnatájaboto ndocná chabiama tondaye chaondëtsama, er cha endmëna nda inétsama bënga vida chamotsebomnama y jtseshachnayama chamotsobenama, y cha nÿetsca soyënga šnetsatšatnaye.

<sup>26</sup> “Cha nÿe canÿe boyabásabentšana nÿets luarënguentša entsanga tojánabiama, nÿets quem luarentše chamotsiyenama; y cha quem soyënga cabá ndëma ora, tojanjuabó mocna ora y ndayentše entsanga chamuetsiyenama;

<sup>27</sup> chca, Bëngbe Bëtsá chamonguanguama, masque chabiama ndoñe corente tmontsetátšëmbo, y chamuinÿena y chábeñe chamotsošbuáchema; pero ndegombre, Bëngbe Bëtsá bëngbentše cada cánÿabentšana ndoñe bënoca quenátsmëna.

<sup>28</sup> Ntšamo canÿa tojanayancá: ‘Bënga Bëngbe Bëtsáftaca cánÿiñe mo canÿacá mondmëna; chábeyeca bënga vida mondbomna, jobónjuama mondobena y ainënga mondmëna ca’. Ntšamo tšëngaftanguentša báseftanga bëts soyëngama uabiamnayëngnaca tmojanayancá: ‘Bënga nÿetscanga Bëngbe Bëtsabe básenga mondmëna ca’.

<sup>29</sup> Y chcasna, Bëngbe Bëtsabe pamíllanga bënga tmomñese, ndoñe quešnátamna jtsejuab-nayana Bëngbe Bëtsá yomna mo cach entsangbe castellano, midio o chë ndëtsbeca pormana soyëngcá ca, er chë soyëngna nÿe ntšamo entsanga tmojajuabocá y tmojtsobencá japórmana.

<sup>30</sup> Pero Bëngbe Bëtsá tojanjuabó ndoñe ntjatonÿayana chë entsangbe tempsca ndosertánana, y morna, nÿetsca luarënguentša entsanga entsamënda, ndaye bacna soyënga tmojtsamama ngménaca chamuenojuabó, chca amama chamotsajbaná y Bëngbe Bëtsabe benache chamuatishache ca.

<sup>31</sup> Bëngbe Bëtsá canÿe te tojuinÿyaná, y chë tena, ndocnábioye ínÿabiama más tšabá ntjatonÿaycá, cha echanjayana entsanga tšabá o ndoñe tšabá tmonjamama; lempe chca cha echanjama canÿa cachá tbojabocacá entsáftaca, Jesús; y chca yochtsemnamna, Bëngbe Bëtsá entsanga tojinÿanyé, chë bocacaná Jesús cháuatayenama cachá tojánmayeca ca” –Pablo tojánayana.

<sup>32</sup> Chë obanënga mochtayenama ichámuana chë entsanga tmojanuena ora, báseftanga Pablo imojtsáboyejuana, y ínÿengna mëntšá imojtsichamo: –Bënga fsëntseboše chë contsichamo soyënga más chcoye cachiñe jatuenama ca.

<sup>33</sup> As Pablo chëngbentšana tojésanbocna.

<sup>34</sup> Pero báseftanga aíñe Jesucristbeñe imojtsošbuáchiye y Pablo tmojanasto más jatuenama; chënguentše imojamna Dionisio, canÿa chë Areopagoca tbiamanënguentšá; canÿe shembásanaca, Dámaris ca uabaina, y ínÿenga.

## 18

### *Pablo Corinto puebloca*

<sup>1</sup> Chë soyënga tojanochnëngüentšana, Pablo Aténasentšana Corinto bëts puebloye tojána.

<sup>2</sup> Chocna, canÿe judío Ponto luaroca onÿnanáftaca tbojáneninÿena, Aquila ca uabainá. Cha y chabe shema Priscila, cabá chora cuenta Italia luarocana tbojánabo, nÿetsca judiënga Romocana chamuáisebocanama choca bëts mandado Claudio tojanmandá causa. Pablo tojána chata jautsëtsayama,

<sup>3</sup> y ntšamo chata jamama Páblēnaca jamama inatátšēmboyecna, chátaftaca yojtso-quedañe y cányiñe chēnga imnatrabájaye; chēnga imnatátšēmbo mo tambotemēngcá entšējuaca japórmana.

<sup>4</sup> Y nýetsca ochnayté, Pablo yojanamana chentša judío entsangbe enefjuana yebnoye jana, Bēngbe Bētsabe soyēngama jóyebuambayama, y puerte yojtsentšena judiēnga y ndoñe judiēnga chamotsošbuáchema, ntšamo cha yojtsanētsētsnacá ndegombre bētsemnana.

<sup>5</sup> Silas y Timoteo Macedoniocana choye tbojánashjango ora, Pablo nýets tempo Bēngbe Bētsabe soyēngama entsanga yojtsabuayiynaye y puerte tšabá chē judiēnga yojan-inýanýná, Jesús ndegombre Bēngbe Bētsabe Uámana Uabuayaná bētsemnana.

<sup>6</sup> Pero chē judiēnga Páblēbe contra imojtsemna y tmojanontsé podesca chabiama ichámuana. Asna, Pablo chabe uichētjoniyangá yojtsenántšasjajaye, chēnga jinýanýiyama chēnga ndoñe tšabá tmonjánchjanguama, y tojanéyana: “Tšēngaftanga ndatsebácanēnga chašmojóbanēse, cach tšēngaftanga šmochtsótatšēmbñe; atšna ndoñe. Mēntescana chē ndoñe judiēnga jábuayenama chantsoñe ca.”

<sup>7</sup> Chorna, chē judiēngbe enefjuana yebnentšana tojéftsanbocna y canýe boyabása, Ticio Justo ca uabainábioye tojtsanoñe. Cha Bēngbe Bētsábioye ibojánadorana y chē enefjuana yebnentšana juachaca inoyena.

<sup>8</sup> Y Crispo, canýe chē enefjuana yebnentšana mandayá, Bēngbe Utabná Jesucristbeñe yojtsošbuáchiye y nýetsca chabe pamíllangnaca; y banga chē Corintentsēngnaca Jesucristbeñe imojtsošbuáchiye, Pablo yojtsoyebuambná ora; y chēnga tmojánenabaye.

<sup>9</sup> Canýe ibeta, Bēngbe Bētsá Páblēbioye mo canýe otjenayoquécá tbojanianana: “Ndoñe matauatjana; nýe cochtsana atšbe soyēngama oyebuambnaye y ndoñe iytēca cattsem-ana.

<sup>10</sup> Er atše ácaftaca sēntsemna y ndocná quecmochátsbojajo ntšámnaca jáborlama; atše bētská entsanga quem pueblentše sēndábamna ca.”

<sup>11</sup> Chcasna, Pablo Corintentsē canýe uata y chnēnguana shinýe tojanototoná, Bēngbe Bētsabe palabra entsanga abuátambaye.

<sup>12</sup> Pero, Galión chē Acaya luarentšana mandado inamna orna, chē judiēnga imojenóyeunaye Páblēbe contra; cha tmojánishache y chē tribunaloye tmojanánatse.

<sup>13</sup> Chocna, chē mandado tmojanianana: —Mua entsanga entsētsētsná y entsama chēnga Bēngbe Bētsá chamotsadorana, pero ndoñe ntšamo bēngbe leyēnguiñe endayancá ca.

<sup>14</sup> Pablo jóyebuambayama uatajanóntšana orna, Galión chē judiēnga tojanéyana: —Quem entsá nderado inýabioye matbēnjóba o ndayánaca chca matēnjobuachjanguá, as cocayé atše matijótbema tšēngaftanga judiēnga yejuana joyaunayama;

<sup>15</sup> pero ntšamo šmontsichamcá entsemna nýe buatēmbana soyēngama, nýe tšēngaftanga šmēbuatma entsangbiama y cach tšēngaftangbe leyēngama; chcasna, cach tšēngaftanga cmontsamna jenóyeunayana y jamana ntšamo chašmojenoyeunacá. Atše quem base soyēngama ndoñe quetsátsboše ngoberna jtsemnana ca.

<sup>16</sup> As Galión tojanamēndá chē tribunal luarentšana chē judiēnga jtēbuacnama.

<sup>17</sup> Chorna, chē entsanga tmojánishache chē judiēngbe enefjuana yebnentšana mandayá, Sóstenes ca uabainá, y Galionbe delante imojtsejantšetaye. Pero Galión chē soye tondayana ibontsentšamna.

*Pablo Antioquiye tojtaná y chentšana cachiñe inýe luarēngoye tojána, Bēngbe Bētsabe trabajo jamama*

<sup>18</sup> Pablo cabá bayté Corintentsē tbojántotona. Chentšana, Jesucristbeñe ošbuachiyēngbentšana tojesanodiošoftá y bejaycá Siria luaroye tojána, Priscila y Aquílaftaca. Cabá Sirioye nda ora, Cencrea puebloca nýets stjēnashe yojtsenántšotje, Bēngbe Bētsábioye jinýinýiyama canýe soye tbojanšbuáchenama.

<sup>19</sup> Efeso puebloye tmojánashjajna ora, Páblëna Priscila y Aquila tojésanabashejuana. Chentšana, cha tojána chë chentša judiëngbe enefjuana yebnoye y chentše chë judiëngaftaca yojanoyebuambná y imojánenatsëtsnaye.

<sup>20</sup> Báseftanga Pablo tmojanimpadá inÿe baseftayté chentše chauesomñama, pero chana ndoñe tonjanoyauná;

<sup>21</sup> chentšana, chëngbentšana tojesanodiošoftá, mëntsá jëftsëyanëse: “Nderádose cachiñe chantésabo tšëngaftanga jabábuachama, Bëngbe Bëtsá šojalesenciase ca.”

Chora, Pablo bejaycá Efesocana tojëftsanbocna.

<sup>22</sup> Cesarea puebloye tojánashjango ora, tojána jacheuayama Jesucristbeñe ošbuáchiyënga Jerusalenoca; y chentšana Antioquiouye tojána.

<sup>23</sup> Chentše baseftayté yojëftsemna; y chentšana, Pablo tojesaná Galacia y Frigia luarënguenache, Jesucristbeñe ošbuáchiyënga añemo atšatnaye.

### *Apolos, Efeso puebloca Bëngbe Bëtsabe soyëngama yojanabuayiyná*

<sup>24</sup> Cach tempo, Efesoye tojánashjango canÿe judío, Apolos ca uabainá, Alejandría bëts pueblócá; cha puerte obená inamna jonguamiyama y corente inatátšëmbo Bëngbe Bëtsabe uabemana palabrëngama.

<sup>25</sup> Bëtscá tojánatsjinÿe chë Bëngbe Utabná tojaninÿanÿé benachama; añémoca yojanoyebuambná y Jesusbe soyëngama botamana yojanabuatambá, masque cha nÿe ntšamo Juan entšanga tojánabuatambama y tojanëbáyama inatátšëmbo.

<sup>26</sup> Ndauatjcá Apolos tojanontšé jóyebuambayama chë judiëngbe enefjuana yebnentše. Pero Priscila y Aquila cha imojóyeunaye ora, barie tmojanchembo y más botamana tmojanbuayená, ntšamo Bëngbe Bëtsabe inÿinÿena benache bëtsemnama.

<sup>27</sup> Apolos Acaya luaroye jama yojtseboše orna, Jesucristbeñe ošbuáchiyënga bëtscá tmojanañemó y choca Jesucristbeñe ošbuáchiyëngbiama canÿe tsbuanácha tmojanichmó, chca, Apolos choca tšabá chamofjama. Acaya luaroye tojánashjango ora, Jesucristbeñe ošbuáchiyënga bëtscá tojanëjabuache. Bëngbe Bëtsá chëngbe tšabiama yojanjuabnáyeca, chënga Jesucristbeñe corente imojtsošbuáchiye.

<sup>28</sup> Entšangbe delante chë judiëngaftaca jabuachana imojánenatsëtsnaye y nÿetscanga tojaninÿanÿé, ntšamo ndoñe tšabá inamncá chë judiënga imnatatšëmbuama; y Bëngbe Bëtsabe uabemana palabrëngaca chënga tojaninÿanÿé, Jesús Bëngbe Bëtsabe Uámana Uabuayaná bëtsemnama.

## 19

### *Pablo Efeso puebloca*

<sup>1</sup> Apolos Corintoca yojtsemnëntscuana, Páblëna chë tjañe luarënguëjana tojánachnëngo y Efesoye tojánashjango; chentše básefta ošbuáchiyënga tojánanÿena, pero chëngna nÿe ntšamo Juan chë Ubayaná tojanabuatambacá imnatatšëmbo.

<sup>2</sup> Pablo chënga tojanatjá: —¿Uámana Espíritu chenjánabo tšëngaftangbe ainaniñe jtsemándayama, Jesucristbeñe ošbuáchiyënga šmojanóbiamama ora ca?

Chora chënga tmojanjuá: —Ni mo queftsátstatsëmbo chë Uámana Espíritu yomnana ca.

<sup>3</sup> Y Pablo tojanëyana: —As, ¿ntšamo šmojánenabaye ca?

Y chënga tmojanjuá: —Fsënjánenabaye ntšamo Juan entšanga yojanëbayancá ca.

<sup>4</sup> As Pablo tojanëyana: —Juan tojanëbaye chë bacna soyënga amama ngménaca tmojanenujubó, chca amana tmojanajbaná y chë Bëngbe Bëtsabe benache tmojánishachënga, y entšanga yojanëtsëtsná chë chábensana yochjanashjanguábeñe chamotsošbuaché ca; y cha Jesús endmëna ca —Pablo tojánayana.

<sup>5</sup> Chca tmojanuena ora, chënga tmojánenabaye Bëngbe Utabná Jesús jótšëmbonëse, chábeñe imojtsošbuáchemama.

<sup>6</sup> Pablo chëngbe bestšašīne chabe cucuatšënga tojanjajó ora, Uámana Espíritu chëngbe ainaniñe tojánamashëngo jtsemándayama; tmojanontšë inyetsá biyangana, chënga tempo ndmabiyañe, y Bëngbe Bëtsabe juabna imojtsoyebuambná.

<sup>7</sup> Chentše imojtsemna bnëtsana uta entšanga.

<sup>8</sup> Unga shinjëntscuana Pablo yojánaye chë judiëngbe enefjuana yebnoye y ndauatjca Jesucristbe soyëngama yojanoyebuambná; entšangafaca imojánenatsëtsnaye y entšanga yojanëtsëtsná Bëngbe Bëtsabe amëndayama, chënga chábeñe chamotsošbuáchema.

<sup>9</sup> Pero ba nduauenanënga ndoñe imontsošbuaché y Bëngbe Utabná tojaninýanýé Benachama entšangbeñe bacna soyënga imojtsichamo. Chcasna, Pablo chëngbentšana tojtsanojuánañe y nýe chë Jesucristbeñe ošbuáchiyënga tojanëbuaja canýe scueloye, canýe entšá Tirano ca uabainabe yebnoye. Chentše cada te chë ouenanëngafaca yojanoyebuambná,

<sup>10</sup> y chca yojánama uta uatëntscuana; y chca, nýetscanga Asia luaroca oyenënga Bëngbe Utabnabe palabra tmojanuena, judiënga y ndoñe judiëngnaca.

<sup>11</sup> Y Bëngbe Bëtsá puerte bëts soyënga Pábloftaca yojtsama.

<sup>12</sup> Tša bëts soyënga tojanma; chíyeca, nýetsca chë Pablo tojuabojajo entšayá y pañuelëjuangá, entšanga imojanamana šoquëngbioye juyambana, y chca tmojama orna, chë šocanënga juenatjëmbana y chë bacna bayëjënga entšangbentšana jésebocanana.

<sup>13</sup> Pero básefta judiënga tsáshenañe bacna bayëjënga entšangbentšana imojtanëbuacana. Chë judiënga imojtseboše chë bayëjënga jtëbuacnana, Bëngbe Utabná Jesús jótšëmbonëse. As, chë bacna bayëjëngbioye mëntšá imojtsëtsëtsnaye: “Bëngbe Utabná Jesús, Pablo bondbetsebayaná jótšëmbonëse y chabe obenánaca cbontsamënda muabentšana chašmuaisebocnama ca.”

<sup>14</sup> Chca imojánama chë judío Esceva ca uabainabe canýsëfta uaquiñënga. Esceva inamna bachnangbe amëndayá.

<sup>15</sup> Pero canýe, Escévëbe uaquiñënga chca tmojánayana orna, chë bacna bayëja mëntšá tojanëjua: “Atše Jesús sënduábuatma y sëndétatšëmbo nda Pablo yomnana; pero tšëngafanga, ¿ndëmuanýënga šmomna ca?”

<sup>16</sup> As, cachora chë bacna bayëjbe juabna uambayá chëngbioye tojanontsënja y tša añemo bomná bëtsemnayeca chënga tojtsanayëñaná, jabuache jtsajantšëtayëse; chë causa, chënga chë yebnentšana tmojtsanacheta enašënga y lisiánënga.

<sup>17</sup> Nýetscanga Efesoca oyenënga, judiënga y ndoñe judiënga, chca tmojántatšëmbona y corente imojtsanauatja. Y chca, Bëngbe Utabná Jesús entšanga más imojtsatschuanaye.

<sup>18</sup> Jesucristbeñe imojtsošbuachiyënguentsana, banga imojánashjajuana y entšangbe delante imojtsecompšaye, tempo bacna soyënga tmojanmama;

<sup>19</sup> banga, chë bocjuanana soyënga jamama imojanëntšëñënga, chëngbe bocjuanana librëšangá tmojaniyëbo y entšanga imojtsantješna ora, chëšangá imojtsajuinýiye. Tmojanjuabó ntsachetšá chë librëšangá betsámanama y tojanóbocna shachna bnëtsana uaranga crocénana nýetšá.

<sup>20</sup> Y chca, Bëngbe Utabnabe palabra más ba entšanga imojtsuenana y chiñe imojtsošbuáchiye y Bëngbe Bëtsá chabe obenana entšangbeñe yojtsinýinýnaye.

<sup>21</sup> Chca tojanochnëngüentsana, Pablo tojanjuabó Macedonia y Acaya luarënguëjana jachnënguse, Jerusalenoye jésama. Y yojtsejuabnaye cha ibojtsemna Jerusalenentšana Romoye jama ca.

<sup>22</sup> Asna, chabe uajabuachanënguentsana útata, Timoteo y Erasto, Macedonioye cha tojanichamó. Chëntscuana Pablo baseftayté más Asia luarentše tbojanjëtana.

### *Efesoca entšanga tmojánenbouenana*

<sup>23</sup> Chë tempo, Efesoca entšanga corente tmojánenbouenana, chë Bëngbe Utabná yojtsinýanýná Benache imojtsisháchichanëngbe causa.

<sup>24</sup> Chë entsanga chca tmojanma, er canÿe entsá mídioca soyënga pormayá, Demetrio ca uabainá, chënga tojanayënjaná chca jamama. Cha yojanamana binche soyetémënga japórmana y chëtémënga yojáninÿna mo chë Efeso puebloquëngbe diosá Artemisa jadórmana bëts yebncá. Demétrioftaca imojantrabájangna bëtscá crocénana imojanójacañe chë soyetémënga eniñe.

<sup>25</sup> Demetrio tojanëbuaja cháftaca imojantrabájanga y ínÿenga cach mídioca soyënga pórmayënga, y mëntśá tojanëyana: “Baconga, tsëngaftanga šmondëtatšëmbo, bënga bëtscá crocénana jtsebomnamna quem trabajuentsana chca jopódiana.

<sup>26</sup> Pero tsëngaftanga šmontsonÿá y šmontsuenana ntšamo chë Pablo ca uabainá yojtsichamcá. Cha entsichamo, chë entsangbe pormana soyënga ndoñe yontsemna jtsadoránana ca; y chca ba entsanga tojabuayená y chënga aíñe montseyeunana. Chë soyna ndoñe nÿe muentše Efesentše chca quenátopasana; nÿets Asia luaríñnaca chca entsopasana.

<sup>27</sup> Resjo entsemna; chca causa, entsanga bëngbe trabajuama ndoñe tsabá quemochátichamo y chë uámana Artemisa jadórmana bëts yebnama mochántichamo uámana yebna ndoñe yondmëna ca. Y chca, Artemisbe obenana entsanga mochantsábotena y Artemisa ndoñe bañe quemochátabatma, nda Asientše y nÿets luaríñnaca mondadorana ca.”

<sup>28</sup> Chca tmojanuena ora, chca pórmayënga puerte tojánëtëna y tmojanáyebuachena: “¡Efesoquëngbe Artemisa corente bëtśá endmëna ca!”

<sup>29</sup> Y chca, nÿetsca chë pueblentša entsanga tmojánenbouenana. Tmojanotabá Gayo y Aristarquëbioye, Macedonioca boyabásata, Páblëbe tjëmbambnayata; y sjojónana tmojanënatse chëngbe enefjuana yebnóntscoñe.

<sup>30</sup> Pablo tojánbošena choye jamashënguama chë entsángaftaca jóyebuambayama, pero Jesucristbeñe ošbuáchiyënga ndoñe tmonjanlesenciá.

<sup>31</sup> Chë Asioca mándayëngbentše báseftanga imnamna Páblëbe amiguënga, y chënga Páblëbioye palabra tmojanafja chë jénefnama yebnoye ndoñe chaondámashënguama.

<sup>32</sup> Chëntscuana, entsanga imojtsejotonocna, ínÿenga imojtsechembumbuana canÿe soye y ínÿengna inÿe soye, chënga corente imojtsenbouenana causa, y banga chentše imojtsemnënga ndoñe imontsetátšëmbo ndayama choye tmojanobéconama.

<sup>33</sup> Pero básefta judiënga, canÿe entsá, Alejandro ca uabainá, chë entsangbe natsanoye tmojanajuatsëntše, y báseftanga cha tmojanbuayená ntšamo yojtsopasánama. Asna, Alejandro tojánëfjatsëmbo cucuátšeca iytëca chamobiamama, er cha yojtseboše entsangbe delante chë judiënga jobuauyanama.

<sup>34</sup> Pero, Alejandro judío bemnama chë entsanga tmojántatšëmbona ora, nÿetscanga tmojanáyebuachena uta horëntscuana, mëntśá: “¡Efesoquëngbe Artemisa corente bëtśá endmëna ca!”

<sup>35</sup> Chë pueblentša mándayëngbe uajabuachaná, entsanga iytëca jábiamama tojanobená ora, tojanëyana: “Efesoquënga, nÿets luariñe endótatšëmbo, quem pueblentše oyenënga iuamna jtsinÿenana chë Artemisa jadórmana bëts yebna y chë cha jadórmana celocana otsatšena ndëtšbé.

<sup>36</sup> Ndocná quenátobena chama jayanama ndoñe ndegombre yondmëna ca. Chcasna, natjëmbana motsomñënga y tondaye matamëngana corente tsabá ntjshajuaboycá.

<sup>37</sup> Tsëngaftanga quem boyabásenga moye šmojunatse, masque Artemisbe yebnentše tondaye tmonjatbëba y bëngbe Artemisbiamama ndoñe podesca tmonjoyebuambá.

<sup>38</sup> Demetrio y cháftaca šmotrabájanga, nderado ndabiamama ndaye demanda šmojtsebomnësna, cabildoca endatëfná y chentše mándayënga montsemna chë demandënga jouenama, y chëngbentše cada ona šmochjëftsendemánda.

<sup>39</sup> Y tsëngaftanga inÿe soye šmojtseguasna, cmontsamna ntšamo bëngbe leyënguiñe yomandancá, nÿetsca quem pueblentše oyenëngaftaca jenóyeunayana.



<sup>40</sup> Ndayá mënté tojopasá causa, resjo entsemna bēngbiana chamuayana, ntšamo leyēnguiñe yomncá bēnga ndoñe montsama ca; y bēnga ndoñe quemuátobena ndayá jojuana, ndáyeca quem enbouenanana tojopasá ca šojátjayēse ca” —cha tojanéyana.

<sup>41</sup> Y chca jayanēse, chē entsānga tojtanichamó.

## 20

### *Pablo, Macedonia y Grecia luaroye tojána*

<sup>1</sup> Chē enbouenanana tojanochnēngo ora, Pablo chē Jesucristbeñe ošbuachiyēngbioye tojanēbuaja jábuayenama, añemo chamotsatsbomnana; tojesanodiošoftá y Macedonioye tojēftsānbocna.

<sup>2</sup> Chē luarēnguējana cha tojánachnēngo Jesucristbeñe ošbuáchiyēnga beca añemo atatšatnaye, ba chabe palabréngaca; chentšana, Grecia luaroye tojánashjango,

<sup>3</sup> y chentše unga ishinýe tojanoquedá. Barquēshañe Sirioye játama Pablo yojtseprontana orna, tojántatsēmbona chē judiēnga cha jtsóbama tmojanenóyeunama. Asna, tojanenojuabó jeshēconama, cach Macedonia luarējana jésachnēnguse.

<sup>4</sup> Pablo quem boyabásenga tmojantjēmbambá: Sópater, chē Bereocá, Pirrbe uaquiñá; Aristarco y Segundo, Tesalónicocata; Gayo, Derbe pueblócá; Timoteo; y Tíquico y Trófinnaca, Asia luarocata.

<sup>5</sup> Chēnga tmonjanonatsé y šonjanēbatma Troasoca.

<sup>6</sup> Chē levadúraca ndēpormana tandēse saye fiestentšana, Filíposentšana barquēshañe fsēnjēftsānbocna y shachna tianoye, Troasoca chē tmonjanonatsenga fsēntanishēche, y chentše canýe semana fsēnjanoquedanga.

### *Ntšamo tojanopasá Troas puebloca*

<sup>7</sup> Chē inýe semana jobojátšama te, fsēnjánenefjna Jesucristbeñe ošbuachiyēngcá tandēse jajátayama, cánýiñe jasama; y Pablo entsānga enjétsētsēsnaye. Cha bonjamna yēfsana chentšana jēftsebocnana; chē causa, más bēn chēngaftaca tonjanoyebuambá, tsēntsetēntscuana.

<sup>8</sup> Fsēnjamna canýe tsoye tsbanana tsañoca y chentše ba uajuinýanēshangá enjanamna;

<sup>9</sup> y canýe bobontse, Eutico ca uabainá, ventanentše enjántbemana. Pablo bēn enjanoyebuambná causa, chē bobontse ocnayana tbojanábuache. Cabana, corente tojtsanomaná ora, chē unga tsañocana tontsanótsatše y obaná chora tmontanatsbaná.

<sup>10</sup> As, Pablo tonjánastjango, chē bobóntsbioye tbonjanotsbuajó y tbonjanotsejcuá. Y chē entsānga tonjanéyana: “Ndoñe nýetsá matauatjēngana; ainá cha entsatsemēna ca.”

<sup>11</sup> Chentšana Pablo cach tsbanánoye tonjesaná y tandēse tonjanjatá, jtenójuaboyama ndayá Jesús jóbānēse tojanmama. Chora Pablo chē entsāngaftaca tonjanse y tontētanontsé oyebuambnayana, jabinýnēntscuana. Chora Pablo chentšana tontsanoñe.

<sup>12</sup> Y chē otsatšena bobontsna ainá imojtsatánatseñe, y chama chē entsānga corente oyejuayēnga imojtsemna.

### *Pablo Troasentšana Mileto puebloye tojána*

<sup>13</sup> Bēngna fsēnjanonatsé y barquēshañe fsēnjána Aso pueblóntscōñe, chentšana Pablo jtesbetšama, ntšamo fsēnjanenoyeunacá, er Pablo tonjánbošena fshantscá choye jana.

<sup>14</sup> Asoca Pábloftaca fsēntaneninýena ora, bēngaftaca barquēshañe cha tonjána Mitilene puebloye.

<sup>15</sup> Chentšana fsēnjēftsānbocna y yēfsana Quío luarējana fsēnjánachnēngo, y chē inýe yēfsana Samos luaroye fsēnjánashjajna. Chentšana fsēnjána y yēfsana Mileto puebloye fsēnjánashjajna.

<sup>16</sup> Chca tonjanochnēngo er Pablo ndoñe chenátanbošena Efesoye jama, Asia luariñe ndoñe yapa ndésemnana. Chca tojánbošena er cha enjétsēboše betscó Jerusalenoca jtsatsemēnana, tojopodesna chē judiēngbe fiesta, Pentecostés ca uabaina fiestama.

*Ntšamo Pablo chë Efesoca ošbuachiyëngbeñe bëtsëjemëngcá mándayënga tojanëyana*

17 Miletocana Pablo tonjanmandá chë Efesoca ošbuachiyëngbeñe bëtsëjemëngcá mándayënga jobiatšana.

18 Chënga tmonjánashjajna ora, Pablo tonjanëyana: “Tšëngaftanga šmondëtatšëmbo ntšamo atše quem Asia luaroye sënjabánashjango orscana tšëngaftangbeñe snetsamana.

19 Njÿets tempo Bëngbe Utabná sëndëserveda y cach atše uamaná ndoñe quetsatenobi-amná. Corente shëchbuiye tijëftsoperdé y ba soyënguiñe tijasufri, chë judiënga atše jóbama mondboše causa.

20 Y lempe ntšamo tšëngaftangbe tšabiamá yomncá tcbonjabuayená; tondaye ntjats-buetamencá. Njÿetscangbe delante sënjabuatambá y tšëngaftangbe yebnënguenáchnaca.

21 Judiënga y ndoñe judiënga Bëngbe Bëtsabe soyëngama sënjabuayená, bacna soyënga amama ngmëncá chamuenójuaboma y chca amana chamotsajbanama, Bëngbe Bëtsabe benache chamuishachama y Bëngbe Utabná Jesúsbeñe chamotsošbuáchema.

22 Y mora Jerusalenoye chanjá; Uámana Espiritu chca šontsemánda y ndayá chocha chjapásamna ndoñe quetsátstatsëmbo.

23 Njÿe mëntsá aiñe sëndëtatšëmbo: Njÿetsca bëts pueblënguenache ndayëjana atše chandbétsana, Uámana Espiritu šondbëtsebuayiyayaye entšanga cašmochjutame y puerte chaisufrima camochjama ca.

24 Atšbe vida cach atšbiamá ndoñe yapa quenatámana, chaitsaina o chayóbana. Pero atšbiamá iuámanana endmëna ndayá atše jobenayana atšbe trabajo jëftseepochócana, ndayá Bëngbe Utabná Jesús šojanmandá jamama, chë tšabe noticiënga Bëngbe Bëtsá entšángaftaca tšabia yomnama jábuayenama.

25 “Y mora atše ndegombre sëntsetatšëmbo, tšëngaftangbentšana, chë ndëmuanjÿengbentše Bëngbe Bëtsabe amëndayama sënjabuayená, ndocná atše más quešmochátinjÿe.

26 Chiyeca, atše ndegombre mënté cbetsëyana: Atše tondaye quetsátstatsëmbo nderado nda ndatsbocaná chaojóbanabiamá,

27 er atše ntšamo Bëngbe Bëtsá jamama yojuabnacá lempe tcbonjabuayená, tondaye ntsebuetamencá.

28 Chcasna, cach tšëngaftangbiamá šmochtsantješna y njÿetscanga muentše Jesucristbeñe ošbuachiyëngbiámncá. Chëngbeñe mo chëngbe abujënjÿangcá Uámana Espiritu tcmónjayayé, Bëngbe Bëtsabe entšanga chašmotsanjÿenama, chënga Bëngbe Bëtsá chábenga tojábiamá, chabe Uaquiñabe buiñe juabuáshanëse y jóbánëse, mo bëtsá cuafjopagacá.

29 Atše sëntsetatšëmbo, atše chaitsoñe orna, banga mochanjabo y chënga mochántsemna mo corente tšátjaye tjañe quešëngcá, Jesucristbeñe ošbuáchiyënga chábeñe ošbuáchiyana chamotsajbanama chënga jamama.

30 Y tšëngaftangbentšánëncá báseftanga mochanjábocana y entšángbioye uayátsenaye soyënga mochanjabuatambá, chca, báseftanga Jesucristbeñe ošbuáchiyënga chë injÿengbentšana chamotsoluarema y njÿe chë abuátambayëngbioye chamotsësetonama.

31 Chcasna, sempre šmochtsantješna; ndoñe chacmondëbnëtjomba, atše unga uatëntscuana, bnëté y ibeta, tšëngaftanga cada ona cbondëtsabuayiyayama y chama atše puerte tijasufri.

32 “Y morna, Jesucristbeyeca catšátanga, Bëngbe Bëtsabe cucuatšinë cbëtsabashejuana y ntšamo tšëngaftangbiamá chabe tšabe juabna yomnama palabréngaca, tšabá chašmuesomñe. Cha endobena jamama tšëngaftangbe ainaniñe más chašmotsošbuáchema, y endobena tšabe soyënga tšëngaftanga jatšatayama, ndayá jatšatayama tojanašebuachenacá mo tšëngaftangcá entšángbioye, ndëmuanjÿenga cha tojáchembo chabe entšanga chamotsemnama.

33 Atše ndocnabe crocénana, o castellano o entšayá atšbiamá quetsátántšaboše;

<sup>34</sup> más inyetšá, y tšengaftanga lempe šmondétatšëmbo, atše cach atšbe cucuatšëca tijëftsetrabajama, atšbiamá y átšëftaca imojamnëngbiamá opresido enjamna soyënga janguanguama.

<sup>35</sup> Atše nyets tempo sëndinÿanÿná entšá chca ibomnama, chë jabuache jatrabájana y chë ujabótënga jujabuáchana, quem Bëngbe Utabná Jesusbe palabrëngama sempre jtsejuabnayëse: ‘Canÿe entšá más oyejuayá jtsemnana ndayánaca ínÿabioye tbojtsatšëtná ora, y ínÿabioye tbojtseyëngacá ora ndoñe nÿa nyetšá ca’ ” –Pablo tonjanoyebuambá.

<sup>36</sup> Pablo chë soyënga tonjánayanentšana, tonjanoshamentšé y nyetscanga chentše monjëtsemnëngaftaca Bëngbe Bëtsá tmonjanótšëmbona.

<sup>37</sup> Nyetscanga tmonjánenobošachna y Pablo tmontanotsejcuá y tmontanámochó.

<sup>38</sup> Y entšanga corente ngmënaca monjëtsemna, chënga ndocna te más cha mochántinÿe ca Pablo tojanëyana causa. Chentšana, chënga chë barquësha enjetsamnëntscoñe cha tmonjantjëmbambá.

## 21

### *Pablo Jerusalenoye tojána*

<sup>1</sup> Chë Jesucristbeñe ošbuáchiyënga fsënjëftsanabashejuana ora, barquëshañe fsënjanojayé y ndericho Cos luaroye fsënjána; chë yëfsana Rodasoye y chentšana Pátara puebloye.

<sup>2</sup> Pátara pueblentše canÿe barquësha fsënjáninÿena, Fenicioye enjëtšaye; asna, chëshañe fsënjanojayé y chentšana fsënjëftsanbocna.

<sup>3</sup> Fsëntsachnëjuana ora, fsënjáninÿe Chipre luare; Chipre bëngbe uañicuayoica tonjanoquedá y bëngna Sirioye fsënjëtšaye. Tiro pueblentše chë barquëshentša uasmanëshangá jëftsáboshjonama yojámnyeca, chë puebloye bënga fsënjëftsanamashjna.

<sup>4</sup> Chentšna, Jesucristbeñe ošbuáchiyënga fsënjánanÿena y canÿsëfta te chëngaftaca fsënjanoquedá. Chënga Pablo tmonjanianyana cha ndoñe ibonjamna Jerusalenoye jtsayana ca, er chë Uámana Espíritu tojanabuayená ndayá choca cháftaca jopásama.

<sup>5</sup> Chë canÿsëfta te tonjanochnëngo ora, chentšana fsënjëftsanbocna y nyetscanga parejo chëngbe shëmangaftaca y básengaftaca šonjanatjëmbambá chë pueblo chabóntscoñe; y chentše, chë chënyañe fsënjanošamentšé y Bëngbe Bëtsá fsënjanimpadá.

<sup>6</sup> Chentšana, fsënjesanodiošoftá y chë barquëshoye fsëntanášëngo; chentšana chë ošbuáchiyënga cachëngbe yebnëngoye tmontaná.

<sup>7</sup> Tirentšana fsënjëftsanbocna y Tolemaida puebloye fsënjánashjajna; y chentše tonjanopochocá bëngbiamá bejaycá chë te ayana. Tolemaidentše Jesucristbeñe ošbuáchiyënga fsënjanocheuá y chëngaftaca canÿe te fsënjanoquedanga.

<sup>8</sup> Yëfsana, bënga chentšana fsënjëftsanbocna y Cesarea luaroye fsënjánashjajna. Chocna, bënga fsënjána Felipe chë Jesucristbiamá tšabe noticiënga abuayinayabe yebnoye y cháftaca fsënjanoquedanga. Felipe enjamna canÿa chë Jesucristbe ichmónëngbioye ujabuachanënguentšá, Jerusalenoca ubuáyanënga.

<sup>9</sup> Felipe enjánabamna canta ndëbouamna bëmbianga y chënga monjamna Bëngbe Bëtsabe juabna oyebuambnayënga.

<sup>10</sup> Ya bayté chentše fsënjëtsemna orna, Judeocana tonjánashjango canÿa Bëngbe Bëtsabe juabna oyebuambnayá, Agabo ca uabainá.

<sup>11</sup> Agabo bëngbioye tonjánashjango ora, Páblëbe uasnanëja tonjanca y cucuatšënga y shecuatšënga cachá tonjanenabatsëca y mëntšá tonjánayana: “Uámana Espíritu entsichamo, Jerusalenoca quem uasnanëja nduñbïoye chë judiënga mëntšá camochjama y ndoñe judiëngbe cucuatšëne camochjáboshjona ca.”

<sup>12</sup> Chca fsënjanoena ora, bënga y chentša entšanga Pablo fsënjanimpadá Jerusalenoye ndoñe chaondëtsama.

13 Chora Pablo tonjánayana: —¿Ndáyeca šmojtsošaché y šmojtsama atšbe ainaniñe puerte ngménana chaotsemnama ca? Atše séntseprontana y ndoñe nýe chašmobatsécama; Jerusalenoca jobanámnaca séntseprontana, Bèngbe Utabná Jesusbiamca —cha tonjánayana.

14 Jáyēnjanama ndoñe chibiatanobená ora, ndoñe más chibiatanimpadá; nýe mēntšá fsēnjaniyana: —Ntšamo Bèngbe Utabná yojtsebošcá chaotsemna ca.

15 Chē soyēnga tonjanochngüentšana, fsēnjanoprontá y Jerusalenoye fsēnjána.

16 Cesareoca, básefta Jesucristbeñe ošbuáchiyēnga choye šonjanatjēmbambá y chocna, chēnga šonjanēnatse canýe Chipre luaroca entšabe yebnoye, Mnasón ca uabainá, ndábentše bēnga joquédama. Mnasón tempscana inamna Jesucristbeñe ošbuachiyá.

### *Pablo tojána Santiago jauatsētsayama*

17 Jerusalenoye fsēnjánashajna orna, chentša Jesucristbeñe ošbuáchiyēnga oyejuayēnga šonjanēbuaja.

18 Yēfsana, Pablo bēngaftaca tonjána Santiago jábuachama, y chentše, nýetsca chē ošbuachiyēngbeñe bētsējemēngcá mandayēngnaca monjētsemna.

19 Pablo tonjanacheuá y chentšana tonjanacuntá lempe ntšamo Bèngbe Bētsá Páblēbe trabájoca chē ndoñe judiēngbeñe tojanmama.

20 Chca tmonjanuena ora, Bèngbe Bētsá tmontanchuá y Pablo mēntšá tmonjaniyana: “Morna, Jesucristbeyeca bēngbe catšata, contsonyá ntšamo ba uaranga judiēnga Jesucristbeñe imojtsošbuáchema, y chēnga nýetscanga montsantješna nýetsca Jesucristbeñe ošbuáchiyēnga chē Moisesbe leyentšana nýetsca mandēnga chamotsocumplínama.

21 Y entšanga chēngbioye noticia tmojatšatá, aca chē inýe luarēnguenache imoyena judiēnga cojtsabuatambá, Moisés tojanmandá soyēnga ndoñe ntseyeunanama y basetēmēnga base bobachtema chē más delicadentše ndoñe ntjatētšama, ntšamo bēnga judiēnga fsēnduamancá, y ntšamo bēnga fsēndētatsēmbcá ndoñe chamondētšamana ca.

22 Y morna, ¿ntšamo chē soyēngama cochtsemana? Ndegombre, chēnga mochanjátatsēmbona aca moye tcojabama.

23 Chcasna, ntšamo cbochanjabuayenacá cochjama: Bēngbentše canta boyabásenga montsemna y chēnga entsamna Bèngbe Bētsabiamca canýe šbuachenana soye jamama.

24 Acaftaca cochjunatse, chēngaftaca cochtsemna y chēngcá cochtsama Bèngbe Bētsabe delante tšábenga jtsatsmēnama ntšamo chamojtsama ora, y ntsachetšá jētsájuaama chaojtsamncá, aca cochjētsájua, as chēnga chamobená nýets stjēnashe jtsenátšbotjiamca, jinýanjíyama, ntšamo Bèngbe Bētsábioye tmojašbuachenacá ya tmojamama. Y chca, nýetsca judiēnga mochanjinýe ndoñe ndegombre yontsemna chē ntšamo chēngbioye acbiamca tmojacuntacá; masna, chēnga mochanjátatsēmbona aca ndegombre ntšamo Moisesbe leyíne yomandancá icuamama.

25 Y chē ndoñe judiēnga Jesucristbeñe imojtsošbuachengbiamna, bēnga ya fsēnjubuábiama y fsēnjáuyana ndayá jtsocumplínama chēnga yojtsamnama, mēntšá: ‘Ndoñe chamondētšesá mēntšena, chē entšanga tmojtsejuabná diosēnga imomna soyēnga jadórama tmojiyēbana; ni buiñe, ni tsešana bayēngbe mēntšena; y ndoñe chamondētšama bacna soyēnga shembásenga y boyabásengaftaca ca’ ” —chēnga tmojánayana.

### *Bèngbe Bētsabe bēts yebnentše judiēnga Pablo tmojánishache*

26 As Pablo, yēfsana chē cántanga tonjanēnatse y chēngaftaca tonjanma soyēnga Bèngbe Bētsabe delante tšábenga jtsatsmēnama. Chentšana, Pablo Bèngbe Bētsabe bēts yebnoye tonjánamashēngo chē bachnanga júnayama, ndayténtsoñe yojamna chē cantangbiamca soyēnga jtsamama, Bèngbe Bētsabe delante tšábenga jtsatsmēnama, y jayanama ndayté chēngbiamca yojtsemna ndaye ora cada ona ibojtsemna ndayánaca Bèngbe Bētsabe bēts yebnoye juambana, Bèngbe Bētsabiamca juatšēmbonama.

<sup>27</sup> Chënga tmojanenoyeuná y tmojánayana canýsëfta tentscuana chca jamana ca. Chë canýsëfta te ya jochnënguama yojtsemna orna, básefta judiënga Asioquënga Pablo tmojáninýe Bëngbe Bëtsabe bëts yebnoca y tmojanma entsanga chamuenbouénanama. Y cha tmojánishache,

<sup>28</sup> mëntsá jtsayebuáchëse: “¡Israeloca entsanga, šmabëtsëjabuache ca! Quem boyabása entsemna chë nýets luarënguenache iuana abuátambaye soyënga bëngbe entsangbe contra, y ntšamo bëngbe leyënguine endayanama contra, y quem Bëngbe Bëtsabe bëts yebnama ndoñe tšabá yontsoyebuambná. Y cabana quem Bëngbe Bëtsabe bëts yebnoye grieguënga tojúmashengo, y chca cha tonjama chë Bëngbe Bëtsabe bëts yebna Bëngbe Bëtsabe bom- inýiñe ndoñe tšabá chaondëtsemnama ca” —chënga imojtsichamo.

<sup>29</sup> Chca imojtsichamo, er entsanga Pablo tmojáninýe chë bëts pueblentše Trófimo Efesocáftaca; y imojétsejuabnaye chábioye Bëngbe Bëtsabe bëts yebnoye Pablo tbojanánatse ca.

<sup>30</sup> Nýetsca chë pueblentša entsanga tmojánenbouenana, y ochamanana chë Pablo yojtsemnoye tmojánashjajna. Pablo tmojánishache y Bëngbe Bëtsabe bëts yebnentšana shjoye tmojtsansjojó, y cachora chentša bëšašangá tmojtanatame.

<sup>31</sup> Jtsóbama ya imojtsebuachéta ora, chë Romoca soldadëngbe mandayá tojántatšëmbona nýetsca chë bëts pueblentša entsanga imojtsenbouenana.

<sup>32</sup> Asna, chë mandayá chabe soldadënga y inýe chentša amëndayënga tojánachembo y cánýiñe chë entsanga imojtsemnoye tmojëftsánótjajo. Entsanga, chë mandayá y chë soldadëngbioye tmojánanýe ora, tmojtsanajbaná Pablo jantšetayana.

<sup>33</sup> Chorna, chë soldadëngbe amëndayá tojanobeconá, Páblëbioye tbojánishache y tojan- mandá uta cadenëjuaca cha chamotsebátsëcama y tojanatjá: “¿Nda mua yomna y ndayá tojama ca?”

<sup>34</sup> Pero chë entsángbeñe, ínýenga canýe soye imojtsáyebuache y ínýengna inýe soye; y chca, ntšamo ndegombre tojanopasama jtsetatšëmbuama chë mandayá ndoñe ton- janobená; chcasna, cha tojanmandá Pablo chë soldadëngbe oyenoye chamuánatsama.

<sup>35</sup> Chë soldadëngbe oyenoca grádasbengoye tmojánashjajna ora, chë soldadënga tojan- otocá Pablo cutsnana juambama, chë entsanga tša rábiaca imojtsemna causa,

<sup>36</sup> er chënga ústonoye imojétsaye y “¡Chaóbana ca!” imojtsaiuáyebuache.

### *Ntšamo Pablo entsangbe delante tojanenëuyaná*

<sup>37</sup> Chë soldadëngbe oyenoye ya jamashënguama imojtsemna orna, Pablo chë sol- dadëngbe amëndayábioye tbojantjá: —¿Tašcatjaleséncia ratotema ácaftaca jóyebuambayama ca?

Y chë mandayá tbojanjuá: —¡Aca icobena griego biyañe jóyebuambayama!

<sup>38</sup> As, ¿aca ndoñe condmëna chë Egiptocá, chë ndoñe bayté quenátsmëna entsanga yojanëtsëtsná chë mándayëngbe contra chamotsemnama y chë canta uaranga podesca uamana entsanga puñálaca uajatëngaftaca, entsanga ndoyena luaroye tojanbočná ca?

<sup>39</sup> Chora Pablo tbojanjuá: —Atše judío sëndmëna, Tarso puebloca onýnaná, canýe uámana pueblentše Cilicia luaroca; Diosmanda šmolesenciá entsanga jáuyanama ca.

<sup>40</sup> As, chë soldadëngbe amëndayá chca tbojanlesenciá. Páblëna chë gradasbenguiñe tojantsá y cucuatše tojanatsbaná entsanga iytëca chamobiamama. Nýetscanga iytëca imojtsemna orna, Pablo hebreo biyañe mëntsá entsanga tojanëyana:

## 22

<sup>1</sup> “Baconga y taitanga, mora šmochjouena atše jenëuyanama ntšamo chjayancá ca.”

<sup>2</sup> Pablo cachëngbe biyañe, hebreo biyañe yojtsóyebuambnama entsanga tmojanuena ora, más iytëca tmojanobiama. As Pablo tojanëyana:

<sup>3</sup> “Atše judío sëndmëna. Tarso pueblentše, Cilicia luaroca sënjanonýná, pero muentše Jerusalenentše sënjanoboiché y sëndëtatsëmbo soyëngna Gamaliélbeyeca chca botamana

sënjanatsjinÿe. Cha corente tšabá šonjanbuatëmbá bëngbe bëts taitangbe leyënga; nÿets atšbe ainánaca Bëngbe Bëtsá sëndëserveda, ntšamo nÿetsca tšëngaftanga mora šmontsamancá.

<sup>4</sup> Atše sënjánama chë Jesucristo tojaninÿanÿé Benache ústonënga chamosufrima y chamóbanama; boyabásenga y shembásenga sënjanëtabaye y cárceloye sënjanautame.

<sup>5</sup> Chë judío bachnangbe más uámana amëndayá, nÿetsca chë judiëngbeñe bëtsëjemëngcá mándayënga y inÿe muentša mándayënga mondobena jayanana ntšamo sentsichamcá ndegombre yomnama. Chënga uabemana tsbuanachangá šmonjaninÿé, bëngbe catsátanga judiënga chamotsetatšëmbuama atše mando stsanbomnama, Jesucristbeñe ošbuáchiyënga jótabayama; y Damascoye sënjána choca Jesucristbeñe ošbuáchiyënga jótabayama, moye Jerusalenoye junatsama jacastígayama.”

*Pablo tojanacuntá ntšamo Jesucristbeñe ošbuachiyá tojanóbema (Hch 9.1-19; 26.12-18)*

<sup>6</sup> “Pero canÿe te benachiñe Damasco béconana sënjétsaye orna, mo nÿetsto ora, nÿe ndeolpe atšbe juachañe canÿe bëts tcuinÿe celocana tonjanbuashinÿinÿena.

<sup>7</sup> Y fshantsoye sënjétseshajaye y canÿe oyebuambnayana sënjanuena mëntšá: ‘Saulo, Saulo, ¿ndáyeca šcojtsacmena ca?’

<sup>8</sup> Atše sënjantjá: ‘¿Nda comna, Bëngbe Utabná ca?’ Y chë oyebuambnayana šonjanjuá: ‘Atše sëndmëna Jesús Nazaretocá, y aca condama atšbe entšanga chamotsesufrínama ca.’

<sup>9</sup> Chë átšeftaca monjánajnënga chë bëts tcuinÿe tmojáninÿe y tmojanouatjananga, pero chë oyebuambnayana ndoñe tmonjanuena.

<sup>10</sup> Chora atše sënjantjá: ‘¿Bëngbe Utabná, ndayá jamama šojtsemna ca?’ Y cha šonjaninÿana: ‘Matëtsbaná y mëtëtontsé Damascoye jama. Chentše canÿa cmochanjabuayená ndayá jamama cmojtsemnama ca.’

<sup>11</sup> Chë tcuinÿe yapa tonjanbuashinÿinÿena causa, atše jtaná sënjanouquedá. Chcasna, chë ínÿenga šmontanobuacuetëntsé y chca, Damascoye sënjánashjango.

<sup>12</sup> “Chentše enjamna canÿe bacó Ananías ca uabainá; cha inoyena ntšamo Bëngbe Bëtsá yobošcá y yojánama ntšamo bëngbe leyënguñe iuayancá, y nÿetsca chentša judiënga monjanamana chabiamana tšabá jtsóyebuambnayana.

<sup>13</sup> Cha tonjánabo atše jinÿama y tonjánashjango ora, šonjaninÿana: ‘Jesucristbeyeca atšbe catsata, Saulo, chacmotsatabinÿna ca.’ Cachora y cha sënjáninÿe.

<sup>14</sup> “Chentšana cha tonjánayana: ‘Bëngbe bëts taitangbe Bëtsá aca tmojuábuayana, ntšamo cha acbiamana yobošcá chacotsetatšëmbuama, chë nÿetsca soyënguñe Tšabá Amá chacuinÿama y cachabe uayášentšana chacóyeunama.

<sup>15</sup> Bëngbe Bëtsá chca tojama, aca chë chabe buayenana soyëngama entšángbeñe chacóyeuambama, y chamna nÿets luarentša entšángbeñe cochjacuénta, ntšamo tcojinÿe y tcojouencá.

<sup>16</sup> Y mora, ¿ndoñe más matobátmanana! Motsbaná y cochjenábaye Jesucristo jótšëmbonëse, chca, acbe bacna soyëngama perdonaná chacotsemnama ca’ ” –cha šonjaninÿana.

*Pablo tojanacuntá ntšamo chë ndoñe judiëngbioye tmojánichmoma*

<sup>17</sup> “Jerusalenoye sëntaná ora, Bëngbe Bëtsabe bëts yebnoye sënjána cháftaca jenuéntama, y ndeolpe atše mo otjenayoquëcá sënjanouquedá.

<sup>18</sup> Chca orna, Bëngbe Utabná sënjáninÿe y cha mëntšá šonjaninÿana: ‘Betsco motsa y cam ora Jerusalenentšana métsebozna; quemuentša entšanga ndoñe quecmochatóyeunaye ntšamo atšbiamana condëtatšëmbo y contsëtsëtnacá ca.’

<sup>19</sup> Atše sënjanjuá: ‘Bëngbe Utabná, chënga mondëtatšëmbo atše sënjánana nÿetsca chëngbe enefjuana yebnënguenache y chë áceñe ošbuáchiyënga sënjanëtámiana y sënjanatsetšenaye;

<sup>20</sup> y acbiamana ndegombre oyebuambnaya Esteban tmonjanóba ora, átsnaca chentše sēnjamna y tšabá imojtsama ca chama sēnjétsejuabnaye, y cabá chē monjanóbanangbe entšayējuangá atše chora sēnjanabojanýá ca' —atše sēnjanjuá.

<sup>21</sup> Pero chca sēnjánayana ora, Bēngbe Utabná šonjanijana: 'Motsa; atše bēn luarēngoye, ndoñe judiēngbioye cbochanjíchmuca ca.' "

### *Pablo y chē soldadēngbe amēndayá*

<sup>22</sup> Chē entsanga chēntscoñe tmojanuena; pero chē ndoñe judiēngbiamana tojanoyebuambá orna, chēnga tmojanontšé uayebuáchana: "¡Ndoñe tšabá quenátsmēna cha vídaca chaotsemnama! ¡Motsóba ca!"

<sup>23</sup> Y chēnga más imojtsáyebuache; puerte rábiaca chēngbe uichētjonējuangá tsbanánoye imojtsēbéntaye y tsbanánoye polvēshe imojtsētšana;

<sup>24</sup> chē causa, chē mandayá tojánayana chē soldadēngbe oyenoye Pablo chamotsēmashēngo ca, y tojanmandá chamotsetjanja chaobuambama ndáyeca entsanga chca chabe contra imojtsáyebuache.

<sup>25</sup> Pero jtsetjanjama ya tmojanbatsēca orna, chentše imojtsemna soldadēngbe amēndayábioye Pablo tbojantjá: —¿Tšēngaftanga šmobena canýe entšá derecho bomná mo canýa Romoca onýnanacá jatjanjana, ndegombre tšabá o ndoñe tšabá tonjamama cabá ndayana ora ca?

<sup>26</sup> Chē básefta soldadēngbe mandayá chē soye tojanuena ora, tojána y nyetsca soldadēngbe amēndayábioye chama ibojuenaye, mēntšá: —¿Ndayá cochjama? Chē entšá derecho bomna mo canýa Romoca onýnanacá canmēna ca.

<sup>27</sup> As chē amēndayá tojána Pablo yojtsemnoye y tbojanijana: —Smēyana, ¿aca derecho bomná mo canýa Romoca onýnanacá comna ca?

Y cha tbojanjuá: —Arseñor ca.

<sup>28</sup> Chora chē amēndayá tojánayana: —Atše beca crocénana sēnjétsjajó mo canýa Romoca onýnanacá derecho jtsebomnama ca.

As Pablo tbojanjuá: —Y atšna derecho bomná mo canýa Romoca onýnanacá sēndmēna atše tijanonýná orscana, er atšbe taitá chca derecho bomná inamna ca.

<sup>29</sup> Chcasna, chē jatjanjama imojtseprontanēnga, Páblēbentsana tmojanajuaná; y chē mandayánaca tojanajuaná y yojtsauatja, Pablo derecho bomná mo canýa Romoca onýnanacá yojamnana tojántatsēmbona ora, er cha tojanmandá Pablo chamotsebátsēcama.

### *Pablo, Jerusalemntša uámana mándayēngbe delante*

<sup>30</sup> Chē soldadēngbe amēndayá yojtseboše ndegombre jtsetatšēmbuama ndaye soyama judiēnga Páblēbe contra imojtsichámuama; asna, yēsana tojanmandá cadenējuangá jt-sajafjonana y chē bachnangbe amēndayēnga y nyetsca chē judiēngbe amēndayēnga chamobéconama. Chentšana, Pablo tbojanábocna y chēngbe delante tbojanatsá.

## 23

<sup>1</sup> Chora Pablo, nyetsca chē mandayēngbioye tojanēnyanýé y tojanéyana: —Taitanga, atše mēnténtscoñe tsiyena jtsamēse ntšamo Bēngbe Bētsá yobošcá y chabe delante atšbe ainana natjēmbana endētsomñe ca.

<sup>2</sup> As, Ananías, chē bachnangbe más uámana amēndayá, tojanmandá Páblēbe béconana imojtsemnēnga cha chamotsáyejantšetama.

<sup>3</sup> Pero chora Pablo Ananíasbioye tbojanjuá: —¡Bēngbe Bētsá ácnaca cmochanjétsjantšetá, bacna entšá, ntšamo ndegombre tcojuabnacá ndinýinýnayá! Aca chentše contsetbemana tšabá o ndoñe tšabá tijamama jayanama, ntšamo Moisesbe leyiñe yomandancá; as, ¿ndáyeca cojtsemánda chašmojantšetama? Chca chē leyiñe ndoñe quenátlesenciana ca.

<sup>4</sup> As, chabe béconana imojtsemna entšanga tmojánayana: —¿Chca chë Bëngbe Bëtsabe bachnangbe más uámána amëndayábioye cochjóyenguango ca?

<sup>5</sup> Chora Pablo tojánayana: —Taitanga, atše ndoñe quetsátstatsëmbo cha chë bachnangbe más uámána amëndayá yomnama. Er Bëngbe Bëtsabe uabemana palabrënguiñe mëntšá endayana: “Entšangbe mandayabe contra ndoñe catjayana ca.”

<sup>6</sup> Pablo tojáninýe chë mándayënguëntše báseftanga saduceunga y ínýengna fariseunga imojtsemnama; as, mëntšá tojanáyebuachena: —Taitanga, atše fariseo sëndmëna; atšbe bëtsétsanga fariseunga mondmëna. Atše, jtsošbuáchiyëse chë obanënga mochtayenama tsobátmana causa, atše ndoñe tsabá sentsama ca tsëngaftanga šmochjayana ca.

<sup>7</sup> Pablo chca tojánayana ora, chë fariseunga y saduceunga tmojanontšé enatsëtsnayana, y chë causa nyëtsca entšanga ndoñe cachcá imontsejuabnaye.

<sup>8</sup> Er chë saduceunga jtsichámuana chë obanënga ndoñe ntayenana ca, y ni angelënga, ni espíritënga ndoñe mondmëna ca; pero chë fariseunga aíñe chë soyënguiñe jtsošbuáchiyana.

<sup>9</sup> Y nyëtscanga tša imojtsáyebuache; asna, básefta fariseunga ley abuátambayënga tmojantsbaná y jabuachana mëntšá imojtsáyebuache: “Quem boyabása ndocna bacna soye tonjama. Nderado mo Bëngbe Bëtsabe canýe ángel o espíritu muábioye ndegombre tbojauyana ca.”

<sup>10</sup> Entšanga más imojtsáyebuache y chë soldadëngbe amëndayá yojtsauatja nderado entšanga Pablo muantsatcacaye; as, cha tojanmandá soldadënga chamua Pablo chë entšángbentšana jaisábocnama y chë soldadëngbe oyenoye cachiñe jesánatsama.

<sup>11</sup> Yëfsana ibeta, Bëngbe Utabná Páblëbioye tbojánëbëbocna y tbojaniyana: “Pablo, ainaniñe añemo cochtsebmna. Ntsamo aca atšbiama condëtatšëmbo y muentše Jerusalemntše condoyebuambnacá, cachcá cmontsemna Romoca jamama ca.”

### *Judiënga tmojanenoyeuná Pablo jtsóbama*

<sup>12</sup> Chë inýe yëfsana, judiënguëntšana báseftanga tmojanenoyeuná Pablo jtsóbama, y tmojanjurá tondaye ntjasana, ni ntjofsiyana, cha jóbantscuana.

<sup>13</sup> Chca jamama tmojanjuabó entšanga imojamna canta bnëtsanëngama más.

<sup>14</sup> Chënga tmojána chë bachnangbe amëndayënga y judiëngbeñe bëtsëjemëngcá mandayëngbioye y mëntšá tmojánayana: “Bënga Bëngbe Bëtsá mëntšá fsënjašbuachená y bacna soyënga bëngbeñe chaotsemna chca ndoñe fsënjocumplise: Tondaye ntjasana, ni ntjofsiyana, Pablo jóbantscuana.

<sup>15</sup> Morna, tsëngaftanga y chë inýe muentša mandayëngaftaca chë soldadëngbe amëndayá šmochjaimpáda Pablo moye chabuánatsama; y šmochjauyana chca yojtsemna ana chë ndayá yojtsopasánama más botamana cha jatjayama ca; y bëngna fchtseprontana cha jtsóbama, cabá moye ndáshjango ora ca.”

<sup>16</sup> Pero, Páblëbe uabenbe uaquiñá chë soye tojántatsëmbona; asna, tojána chë soldadëngbe oyenoye, chama Pablo jauenayama.

<sup>17</sup> Chorna, Pablo canýe básefta soldadëngbe mandayábioye tbojanchembo y tbojaniyana: “Diosmanda quem basa mánatse chë nyëtsca soldadëngbe amëndayábioye; canýe soye entsebmna chábioye juenayama ca.”

<sup>18</sup> As, cha chë bobontse tbojëftsanbetše, chë nyëtsca soldadëngbe amëndayábioye tbojanánatse y tbojaniyana: “Chë utamená Pablo šonjachembo y šonjaimpadá quem bobontse ácbioye juanatsana; mua caojtsebmna canýe soye aca jauyanama ca.”

<sup>19</sup> Chë soldadëngbe amëndayá chë bobóntsbioye tbojëftsanobuácuëntsiye, luaroye tbojanánatse y tbojantjá: —¿Ndayá cojtsebmna atše jauyanama ca?

<sup>20</sup> As chë bobontse tbojaniyana: —Judiënga tmojenoyeuná taitá jaimpádama, yëfse chëngbe amëndayëngbioye Pablo chacuánatsama, y chënga cmochanjauyana chca yojtsemna ana chë ndayá yojtsopasánama más botamana cha jatjayama ca.



<sup>21</sup> Pero ndoñe catjóyaunaye; chënguentšana canta bnëtsanëngama más entšanga iytëmenënga Pablëbiana montsanÿá. Chënga tmojajurá, bacna soye chëngbeñe chaotsemna ndoñe tmonjocumplise, tondaye ntjasana, ni ntjofšiyana, Pablo jóbantscuana. Mora chënga montseprontana y montsobátmana ntšamo aca chë soyama cochjáuyanama ca –chë bobontse tbojaniana.

<sup>22</sup> Chentšana, chë soldadëngbe amëndayá chë bobóntsbioye tbojanmandá, ndayá ibojuenayama ndocnábeñe ntsecuéntayana, y chentšana tbojtanichmó.

*Pablo tmojanánatse Félix, chë Cesareoca mandádbioye*

<sup>23</sup> Chentšana, chë soldadëngbe amëndayá tojánachembo útata chë inÿe soldadëngbioye mándayënguentšana, y tojanamëndá chamoprontama uta patse soldadënga, inÿe canÿsëfta bnëtsanënga couayënguiñe y inÿe uta patse lanzëšangaca, Cesarea puebloye ibeta, las nueve ora jabocanama;

<sup>24</sup> y tojanamëndá couayënga chamoprontá Pablo chauenójayema. Y tojanmandá tšabá y ndocá ntjapasacá Pablo chamuánatsama, Félix chë Cesareoca mandádbioye.

<sup>25</sup> Y canÿe tsbuanácha chëngaftaca tojanichmó y chëchañe mëntšá yojtšábemana:

<sup>26</sup> Claudio Lisias, chë bëts uámana mandado Felixbiana: Salud bomná chacotsomñe.

<sup>27</sup> Judiënga quem boyabása tmojishache y montseboše jtsóbama; pero cha mo canÿa Romoca onÿnanacá derecho bomná yomnama sënjátatšëmbona ora, atšbe soldadëngaftaca sënjá y chëngbe cucuatšentšana cha sënjatsbocá.

<sup>28</sup> Atše sëntseboše jtsetatšëmbuana ndaye soyama chënga chabe contra imojtsichámuama; as, cha sënjuánatse nÿetsca chë judiëngbe amëndayënga montsemnoye;

<sup>29</sup> y chentšana, atše sënjátatšëmbona chënga chabe contra imojtsichamo ana cachëngbe leyentša soyëngama, pero cha tondaye tonjobuachjanguá, cha jóbama bënga chašotsamnama, ni mo cárceloye jutámiam.

<sup>30</sup> Pero atše sënjátatšëmbona chë judiënga tmojenoyeuná cha jtsóbama; chíyeca, cam ora cha ácbioye sëntsichamná, y chabe contra ichámëngna sënjáuyana, ndayá muabe contra jayanama imojtsebomncá acbe delante chamuayana ca.

<sup>31</sup> Chentšana, chë soldadënga tmojanma ntšamo tmojanamëndacá, ibeta Pablo tmojëftsanbetše y Antípatris puebloye tmojanánatse.

<sup>32</sup> Yëfsana, chë shecuátšeca tmojána soldadëngna cach soldadëngbe oyenoye tmojësanshëcuana, y chë couayiñe enjaquenënga Pábloftaca tmojána.

<sup>33</sup> Cesareoye chënga tmojánashjajna ora, chë tsbuanácha chë mandádbioye tmojanantšabuaché, y Pablënaca chabe cucuatšinë tmojánhoshjona.

<sup>34</sup> As chë mandado chë tsbuanácha tojanalía; chentšana, cha tojanënoticiá ndaye luarocá Pablo inamnama, y Cilicia luarocá cha inamnama cha tojántatšëmbona ora,

<sup>35</sup> tbojaniana: “Acbe contra ichámënga chamobeconá ora, ácbioye oído cbochjabuájua ca.”

Chentšana, cha tojanmandá Rey Heródesbe bëts yebnoca Pablo chamotsebojanÿama.

## 24

*Ntšamo Pablo chë mandado Félixbe delante tojanenëuyaná*

<sup>1</sup> Shachna tianoye, Ananías, chë bachnangbe más uámana amëndayá, Cesareoye tojána báseftangaftaca chë judiëngbeñe bëtsëjemëngcá mándayënguentšana y canÿa entšanga obuauyayáftaca, Tértulo ca uabainá; y chë mandádbioye chënga tmojána Pablëbe contra jayanama.

<sup>2</sup> Pablo tmojanábocna ora, Tértulo tojanontsé chabe contra jayanama y Félixbioye tbojaniana: “Aslëpaye, taita mandado, ácbeyeca bënga natjëmbana fsëndoyena y aca puerte obiashjachá cómnayeca ba tšabe soyënga quem luarentša entšangbiana yojtsebinÿna.

<sup>3</sup> Nÿets tempo y nÿetsquénache chë soyënga fsëndóyëngacañe, bëts uámana mandado, y bënga chama corente chondetsechuaná.

<sup>4</sup> Pero ndoñe yapa bën jatenbiamnayamna, Diosmanda ratotema šmotsoyauná.

<sup>5</sup> Bënga fsëntsetatšëmbo quem boyabása entšanguentše entsemna mo bacna shacuancá, nÿets luarënguenache yojtsana y yojtsama chë judiënga nÿetscanga cachca soye ndoñe chamondëtsejuabnama, y cha yojtsemna chë Nazaretocabe ustonëngbe uanatsaná.

<sup>6</sup> Y tonjábošena jamama Bëngbe Bëtsabe bëts yebna, Bëngbe Bëtsabe bominÿiñe ndoñe tšabá chaondëtsemnama; chíyeca bënga cha fsënjotbá. Bënga fsënjábošena chabiamna jayanana tšabá o ndoñe tšabá tonjamama, ntšamo bëngbe leyënguiñe endayancá;

<sup>7</sup> pero chë soldadëngbe amëndayá Lisias tonjontremeté y jabuachana bëngbe cucu-atšentšana tbojtsánatseñe,

<sup>8</sup> y tonjayana chë chabe contra ichámëngna caojtsamna ácbioye chama jabana ca. Cach taitá chacojatjá ora, ndegombre soyënga cochántsetatšëmbo ndáyeca bënga muabe contra fstsichámuama ca” –cha tojánayana.

<sup>9</sup> Y chë judiënga chentše imojétsemnëngna imojtsanichamo aíñe chca tojanopasá y lempe ndegombre yojtsemna ca.

<sup>10</sup> Chentšana, chë mandado Páblëbioye tbojánefjatšëmbo chaóyebuambama; as Pablo tojánayana: “Atše sëndétatšëmbo aca ba uatama comna muentša entšangbiama tšabá o ndoñe tšabá tmonjamama ichamuá; chcasna, tondayama ntsauatjca y puerte oyejuayá acbe delante šcuenëuyaná.

<sup>11</sup> Ntšamo cach aca jtsetatšëmbuama contsobencá, cabá bnëtsana uta te entsemna atše Jerusalemoye sënjá, Bëngbe Bëtsá jadórama.

<sup>12</sup> Y quemënga ndoñe chešmátinÿena nderado ndáftaca jabuachana enatsëtsnayiñe, ni entšanga chamuenbouénanama amiñe, Bëngbe Bëtsabe bëts yebnoca, ni chëngbe enefjuana yebnënguenache, ni inÿe luarënguenache chë bëts pueblentše.

<sup>13</sup> Quem entšanga tondaye quemátsbomna ntšamo jayanama, atšbe contra montsichamo soyënga ndegombre yojtsemna ca.

<sup>14</sup> Pero ndegombre endmëna y chanjayana, atše bëngbe taitangbe Bëtsá sëndëservena, jtsiyenëse ntšamo Bëngbe Bëtsá šonjaninÿanÿé benache yomncá; y quem entšanga montsichamo, básefta soyënga ntšamo bënga quem Tsëm Benache ústonënga fst-sošbuachecá, ndoñe ndegombre yondmëna ca. Pero atšna nÿetsca chë Moisesbe leyíñe y Bëngbe Bëtsabe juabna oyebuambnayëngbe uabemana librëšanguentša soyënguiñe sëndošbuaché;

<sup>15</sup> y atše cach chëngcá, puerte jtsošbuáchiyëse Bëngbe Bëtsábeñe sëndobátmana cha yochjama chë mochjóbanënga chámuatayenama, nÿetsca entšanga, lempe tšabá amënga y chë ndoñe tšabá amëngnaca.

<sup>16</sup> Chíyeca, atše nÿets tempo puerte tšabá sëndama, tondayama ntjatenócochinÿenama y atšbe ainana natjëmbana chaotsomñama, Bëngbe Bëtsabe delante y entšangbe delántnaca.

<sup>17</sup> “Básefta uatama inÿe luarënguenache atše sëndánana; ndoñe bayté quenátsmëna cach atšbe luaroye sëntashjango, chentša ndbomnëjémënga jujabuáchama ndayánaca jatšatayama y bayënga jobáyama, Bëngbe Bëtsá jëtschuayama.

<sup>18</sup> Atše sënjama soyënga Bëngbe Bëtsabe delante tšabá jtsatsmënama; chentšana, básefta Asioca judiënga Bëngbe Bëtsabe bëts yebnentše šmonjínÿena, pero ndoñe chešmátinÿena ni ba entšángaftaca, ni enbouenaniñe.

<sup>19</sup> Chë šmonjinÿenënga entsamna ácbioye jabana y acbe delante atšbe contra chamuayana, nderado ndayá tmojtsebomnëse.

<sup>20</sup> O ndóñesna, cach quemënga, muentše montsemnënga chamuayana, chë judiëngbe amëndayëngbioye atše šmonjuánatse ora, atše ndayá tjobuáchjanguama chešmënjínýena, atše castiganá jtsemnama šojtsemna ca chënga chamuayanama;

<sup>21</sup> o nderado nántsemna chë atše chëngbentše séntsemna ora, mëntšá tijuáyebuachenama: ‘Atše chë obanënga mochtayenama puerte jtsošbuáchiyëse sëndobátmana causa, tšëngaftanga atšbe contra šmochjayana ca.’ ”

<sup>22</sup> Félix bëtská inatátšëmbo Bëngbe Utabná tojaninýinýé Benache ústonënga imojanošbuaché soyëngama; as, Pablo chca yojtsoyebuambná ora, cha tojanmandá ndoñe más chë soyama chë te jatóyebuambnayana, y chë entsanga tojanéyana: “Chë soldadëngbe amëndayá Lisias chaojášhango ora, chanjayana ntšamo quem tšëngaftangbe sóyeca jamama ca.”

<sup>23</sup> Y chentša soldadëngbe amëndayábioye tbojanmandá Pablo jtsebojanýama, pero nýe utamená ndoñe chaondëtsemna ca; y tojanmandá, Páblëbe amiguënga jalesénciayana ntšamo tmojtsebošcá cha chamuauájabuachama.

<sup>24</sup> Chentšana baseftaytese, chë mandado Félix Cesareoye tojtashjango, chabe shema Drusíaftaca, canýe judiá. Chorna, cha tojanmandá Pablo jachembuana y tojanuena ntšamo Pablo yojtsichamo, ntšamo canýa nanjobenaye Jesucristbeñe ošbuachiyá jtsemnama.

<sup>25</sup> Pero, nýetsca soyënguiñe tšabá jtšamama, cachá jenomándama jtšobenama y ntšamo tmojamama nýetsca entsangbiana Bëngbe Bëtsá yochjayanama Pablo tojanoyebuambá ora, Félix tojanëuatjaná y Páblëbioye tbojanianama: “Mora, mata; luare quëtstsebozna ora, cbochjachembo ca.”

<sup>26</sup> Jëtsboshjonama Pablo crocénana chabuatabuenámnaca Félix inobátmana; y chca, ba soye ibojanóffajana cháftaca jencuéntama.

<sup>27</sup> Y chca uta uata tojanochnëngo; chentšana, Félix ya ndoñe más chë mandado yontsemna y chabe cuentna Porcio Festo mandadcá tmojántbema. Félix yojtseboše chë judiëngbe delante tšabá joquédama, chíyeca utamená Pablo tbojëftsamboshjona.

## 25

### *Pablo Festbe delante*

<sup>1</sup> Festo chë luaroye tojánashjango y unga tianoye, Cesarea pueblentšana Jerusalenoye cha tojána.

<sup>2</sup> Chocna, chë bachnangbe amëndayënga y chë más uámana judiënga Fëstbioye tmojána Páblëbe contra jayanama.

<sup>3</sup> Y tmojanimpadá, mo chëngbiana canýe bëts pavor cuenta, cha chaomandá Pablo Jerusalenoye chamuánatsama. Chëngna imojëtsejuabnaye Pablo benachiñe chamotsóbama.

<sup>4</sup> Pero Festo tojanéyana, Páblëna Cesareoca utamená yojtsemna y baseftaytese cha choye jtama ca.

<sup>5</sup> Y tojanéyana: “Chamna, tšëngaftangbe amëndayënga átšeftaca Cesareoye chamua y chë boyabása ndaye bëts soye tojobuáchjanguase, choca chabe contra šmochjayana ca.”

<sup>6</sup> Festo Jerusalenentše posufta o bnëtsana te más chëngaftaca tbojëftsanjétana y chentšana Cesareoye tojtaná. Yëfsana, cha tojanótbema chabe puestentše tribunaloca y tojanmandá Pablo choye chamuánatsama.

<sup>7</sup> Pablo choye tojánashjango ora, Jerusalenocana tmojánashjajna judiënga tmojanobobecóna y ba uabouana soyënga chabe contra imojtsichamo, pero ni canýe chë soyëngama tmonjanobená jinýanýiyana chca ndegombre bëtsemnama.

<sup>8</sup> Y Pablo, cachá jenëuyanama mëntšá yojtsichamo: —Atše tondaye chiyatobuachjanuá, ni judiëngbe leyëngama, ni Bëngbe Bëtsabe bëts yebnama, ni Romoca bëts mandadbe contra ca.

<sup>9</sup> Festo yojtseboše chë judiëngaftaca tšabá joquédama; as Páblëbioye tbojantjá: —¿Tacatjábošena Jerusalenoye jama, choca atše quem acbe soyama jayanama ca?

<sup>10</sup> As Pablo tojánayana: —Atše sëntsemna chë Romoca bëts mandado tojichamá amëndayëngbe delante y chënga entsamna jayanama atše tšabá o ndoñe tšabá sënjamama. Ntšamo ndegombre contsetatsëmbcá, judiëngbe contra atše ndocna bacna soye chiyatsma.

<sup>11</sup> Nderado atše ndaye bëts soye tijobuachjanguá y chama atše jóbanama šojtsemnëse, atše tondaye quichátayana atše ndoñe chayóbanama; pero atšbe contra montsichamo soyëngama tondaye ndegombre tontsemnëse, ndocná queochatobenaye chëngbe cucu-atšiñe atše jaboshjonana. Chíyeca, Diosmanda chë Romoca bëts mandado cháuyayana tšabá o ndoñe tšabá sënjama ca —Pablo tojánayana.

<sup>12</sup> As Festo, chë soyama chabe buayiynayënga tojanatjá y chentšana tojánayana: —Chë Romoca bëts mandado quem soyama cháuyayanama tcojábošënsna, chábioye cochjá ca.

*Festo, Rey Agrípaftaca tbojanencuentá ntšamo Pábløftaca jamama*

<sup>13</sup> Chentšana baseftayté tojanochnëngo ora, Rey Agripa y Berenice Cesareoye tbojána, Festo jauatsëtsayama.

<sup>14</sup> Bayté chata chentše tojanajëtana; y chca, Festo chë réybioye tbojancuentá Páblëbe soyama. Cha mëntšá tbojanianya: —Muentše endmëna canÿe entšá, Pablo ca uabainá; Félix utamená tbonjëftseboshjona, atše mandadcá sënjontšé ora.

<sup>15</sup> Jerusalenoca sëndánmëna ora, chë bachnangbe amëndayënga y chë judiëngbeñe bëtsëjemëngcá mándayënga Páblëbe contra demanda tmonjajajó y šmonjaimpadá cha jóbanama ibojtsemna ca atše jayanama.

<sup>16</sup> Y atše sënjáuyana: “Chë romanënga ndoñe quematamana ndocnabiana jayanana cha jóbanama ibojtsemna ca, chabe contra ichámënga chabe delante ndoñe tmontsemnëse, chca, chama jenëuyanama cha chaobenama ca.”

<sup>17</sup> Chíyeca, chënga moye tmonjabo ora, ndoñe yapa bën ntjatenobiamnycá cach yëfsana atšbe puestentše tribunaloca sëntótbema y sënjamandá chë boyabása jobetšana.

<sup>18</sup> Pero chabe contra ichámënga, ntšamo atše sëndanjuabnacá chënga mochjayanamna ni mo canÿe bëts soye chabe contra chemátayana, chënga jóyebuambayama tonjóyentšbuache ora.

<sup>19</sup> Chënga chabe contra montsichamo, nÿe cachëngbe Dios ntšamo jadórama yomnana y canÿa Jesús ca uabainábiana; cha tojanóbana, pero Pablo entsichamo cha ainá yotsomñe ca.

<sup>20</sup> “Chora atše ndoñe quetstëtsetatsëmbo ntšamo chë soyiñe jamana; asna, Pablo sënjantjá Jerusalenoye jama tayojëtseboše ca, choca atše jayanama tšabá o ndoñe tšabá cha tonjanmama.

<sup>21</sup> Pero cha šonjaimpadá camuentše jaboshjonana, cach Romoca bëts uámana mandado chë soyama tojayanëntscuana ca. Chcasna, atše sënjamandá cha chamotsebojanÿama, chë mandádbioye jíchmuama atše jobenayëntscuana ca” —Festo tbojancuentá.

<sup>22</sup> Chca tbojanencuentá ora, Agripa Féstbioye tbojanianya: —Atšnaca sëntseboše chë boyabása joyeunayama ca.

Y Festo tbojanjuá: —Cach yëfse oído chábioye cochanjabuájua ca.

<sup>23</sup> Chë yëfsana, Agripa y Berenice corente uachuanentše chë tribunaloye tbojánamashjna y chátaftaca tmojánamashjna chë soldadëngbe amëndayënga y chë pueblentša uámana taitanga. Chentšana Festo tojanmandá Pablo jobetšana;

<sup>24</sup> y chora cha tojánayana: “Rey Agripa y nÿetsca taitanga bëngaftaca šmojtsemnënga: Chentše entsemna chë boyabása. Nÿetsca judiënga chabe contra átsbentše montsabíchamo, Jerusalenoca y quem Cesarea pueblëntšnaca, y nÿa jtsayebuáchëse tša šmontseimpadana cha chaóbanama;

<sup>25</sup> pero atše sëntsejuabná quem boyabása tondaye tonjama, jóbanama chabotsemnama ca. Y más, cachá šonjaimpadá chë Romoca bëts uámana mandado César chabe soyama cháuyanama; chcasna, chca chanjama, chábioye cha chanjíchmuá.

<sup>26</sup> Pero atše, atšbe bëts uámana mandádbioye quem boyabásabiama juábobemama ndocna serto soye quetsátsbomna causa, tšëngaftangbe delante cha tijatsá, y masna, acbe delante, bëts rey Agripa; chca, lempe chacojatjá chentsana, ndayá juabemama atše chaitsebomnama.

<sup>27</sup> Er atše sëntsejuabná ndoñe corente juabnayabe soye yomna, canye utamená jíchmuana y ndayama chabe contra tmojtsichámuama ndoñe lempe ntjuabemana ca” — cha tojánayana.

## 26

### *Pablo tojanontsé rey Agripbe delante jóyebuambayama*

<sup>1</sup> Chentsana, Agripa Páblëbioye tbojanianana: —Jóyebuambayama contselesenciana, cachaca chacuenëuyanama ca.

As Pablo, chë réybioye jachuayama cucuatše tojanatsbaná y jenëuyanama tojanontsé mëntšá jayanama:

<sup>2</sup> —Atše ndegombre sëntsoyejuá mora chjobenaye acbe delante jóyebuambayama, uámana rey Agripa, chca, atše jenëuyanama nyetsca soyëngama ntšamo judiënga atšbe contra montsichámuama;

<sup>3</sup> y más sëntsoyejuá, taitá conduábuatmama lempe ntšamo judiënga monduamancá y condétatsëmbo chë judiënga ndayama imuenoboyebuambnama. Chcasna, Diosmanda uantádoca šmotsoyeuná.

### *Pablo tojanacuntá ntšamo cha tempo inamnana*

<sup>4</sup> “Nyetsca judiënga mondétatsëmbo ntšamo atše tempšana chëngbeñe tsiyenama, bobontse sënjamna orscana, atše sënjanonyná luarentše y Jerusalenentše.

<sup>5</sup> Chëngnaca mondétatsëmbo y montsobena jayanana, chënga tmojtsebošëse, chca ndegombre yomnama; atše nyets tempo fariseucá vida sëndbomna, y chë fariseunga mondoyena más soyënga jtsamëse chë judiëngbe leyëngaca chë inye judiëngbiana.

<sup>6</sup> Y mora, ntšamo Bëngbe Bëtsá bëngbe bëts taitanga tojanašebuachenacá, chë obanënga jtayenama cha yochjamama puerte jtsošbuáchiyëse atše obatmana causa, šmojuánatse atšbe contra jayanama.

<sup>7</sup> Bëngbe bnëtsana uta Israeloca bëts pamíllanga mondobátmana chë šbuachenana soye chëngbiana chaóshjanguama y chíyeca, cada te bnëtë y ibeta chënga Bëngbe Bëtsá mondadorana y mondëserveda. Y atše cach soyama obatmana causa, bëts rey Agripa, judiënga mora atšbe contra montsabíchamo.

<sup>8</sup> ¿Ndáyeca tšëngaftanga judiënga šmojtsichamo, chë obanënga chámuatayenama Bëngbe Bëtsá yochjamama jtsošbuáchiyama ndoñe šmontsobena ca?

### *Pablo tojanacuntá, ntšamo tempo cha Jesucristbeñe ošbuáchiyënga yojanaborlánana*

<sup>9</sup> “Y cach átsnaca sënjanjuabná atše šojamna lempe ntšamo stjobenacá jamana, Jesús chë Nazaretocábeñe ošbuáchiyënga corente chamosufrima,

<sup>10</sup> y chca Jerusalenentše atše sënjanma. Chë bachnangbe amëndayënga mando šmonjanatšetá, y chca, banga Jesucristbeñe ošbuáchiyënga cárceloye sënjanëtame; y jtsëbáyama ca chëngbiana montsanichamo ora, átsnaca aíñe chca chamoma ca sënjánichamo.

<sup>11</sup> Y ba soye, chë judiëngbe enefjuana yebnënguenache jabuache chënga sënjanatsetšená, chënga Jesucristo ústonana chamotsajbanama, y chëngaftaca tša etonaná sënjetsemna causa, chë inye luarëngoca bëts públënguenáchnaca chënga sënjanëcamena.”

*Pablo tojanacuntá ntšamo cha Jesucristbeñe ošbuachiyá tojanóbema  
(Hch 9.1-19; 22.6-16)*

<sup>12</sup> “Y cachcá jamama canye te Damascoye sënjetsaye; chë bachnangbe amëndayënga uabemanëchangá šmonjanëntšabuaché chca jamama y, cachënga choye šmonjanichmó.

<sup>13</sup> Pero, uámana rey, chë benachëjana mo nyetsto ora, sënjáninye canye bëts tcuinye celocana, shinýama corente más enjëtsebinýnaye, y atše y chë átšeftaca ajnëngbe shëconana corente enjëtsebuashinýinýana.

<sup>14</sup> Nyetscanga fsënjánshajaye y atše sënjanuena canye oyebuambnayana, hebreo biyañe, mëntšá šonjétsatsaye: ‘Saulo, Saulo, ¿ndáyeca chca šcojtsacmena ca? Cach aca bacá contsenabomá, atšbe entšanga chamosufrima tcojtsama ora, mo uacná ngmëche niñëfiñe cha tojtsoscunjná orcá, cachá jenótsetšenana ca.’

<sup>15</sup> As atše sënjánayana: ‘¿Nda comna, Bëngbe Utabná ca?’ Y chë Utabná šonjanjuá: ‘Atše sëndmëna Jesús, y aca condama atšbe entšanga chamosufrima ca.

<sup>16</sup> Pero matëtsbaná y matëtsá. Atše cbonjébëbocna jinýinýiyama aca tchojuábuayanama atše šcochjaserviama, y chacotsetatšëmbuama y entšanga chacuacuntama, mora tconjinýe soyama y más chcoye atšbiama cbochanjinýinýiye soyëngámnaca.

<sup>17</sup> Atše chanjama judiënga y ndoñe judiënga tondaye chacmondëborlama; y morna, ndoñe judiëngbioye cbontsichamná,

<sup>18</sup> chënga atšbe soyëngama josértama aca chacomama. Chca, chënga bacna juabnënga ndoñe chamondëtsebmna, mo ibetiñe cuaftsemnëngcá, sinó mo binýniñcá chamotsemna átšeftaca, atše chë entšangbe juabnënga binýnayá. Satanasbe cucuatšifne ndoñe chamondëtsemnama, sinó Bëngbe Bëtsabe obenánaca chamotsiyenama; chënga átšbeñe chamotsošbuáchema, y chca, chëngbe bacna soyëngama perdonánënga chamotsemnama y chënga chamotsebmnama canye luare entšángaftaca, chë ndëmuanýengbioye Bëngbe Bëtsá tšabe entšanga y chabe entšanga tojábiamá, chënga átšbeñe betsošbuáchiyama ca’ ” —cha šonjanianama.

*Pablo tojanma ntšamo chë mo otjenayoquëcá tojaninýcá*

<sup>19</sup> “Chcasna, bëts rey Agripa, atše sënjanma chë mo otjenayoquëcá sënjáninye ora ntšamo Cristo šonjaniancá;

<sup>20</sup> y natsana, Damascoca entšanga chë tšabe noticiëngama sënjanabuayená; chentšana, Jerusaleñoquënga y nyetsca chë Judea luaroquënga y ndoñe judiëngnaca; chënga sënjánaimpadana bacna soyënga amama ngménaca chamuatenójuaboma, chca amana chamuajbaná y Bëngbe Bëtsabe benache chámuatishachama, y soyënga chamotsama jinýinýiyama chca ndegombre tmojanmama.

<sup>21</sup> Chca sënjánama causa, judiënga Bëngbe Bëtsabe bëts yebnoca šmonjanishache y tmonjánbošena atše jtsóbana.

<sup>22</sup> Pero Bëngbe Bëtsá sempre šonduájabuachana, y chca, cada te mëntscoñama, nyetscanga Bëngbe Bëtsabiamá sëndabuayinýá, uámanëngbioye y nduámanëngbioynaca; nye ntšamo Moisés y Bëngbe Bëtsabe juabna oyebuambnayënga tmojanayancá, ntšamo yochjopásama atše sëndoyebuambná; inýetšá ndoñe.

<sup>23</sup> Chënga tmonjánayana: ‘Bëngbe Bëtsabe Uámana Uabuayaná, Cristo jóbanama bontsemna; pero chaojóbanentšana, cha chë natsaná echántsemna obanënguentšana jtayenama, y cha judiëngbioye y ndoñe judiëngbioye echanjabuayená, y chca, chënga mochántsetatšëmbo nyetscanga chábeñe tmojtsošbuáchenga atsebácanënga mochtsemnama ca.’ ”

*Pablo tojanma rey Agrípbioye jáyëñjanama, Jesucristbeñe ošbuachiyá chaóbemama*

<sup>24</sup> Pablo, cachá jenëuyanama chë soyënga tojánayana ora, Festo mëntšá tojanáyebuachena: —¡Pablo, opá cojtsóbema! Yapa ualíayé causa, opá tcojtsóbema ca.

<sup>25</sup> Pero Pablo tbojanjuá: —Opá ndoñe quetsátsmëna, bëts uámana Festo; inyetsá entsemna; atse sëntsoyebuambná nýets juábnaca, y ndegombre soyënga.

<sup>26</sup> Chentse rey Agripa entsuenana, y cha puerte tsabá chë soyëngama endétatsëmbo, chíyeca, tondayama ntjatauatjca, atse chabe delante sëntsoyebuambná; atse corente sëndétatsëmbo chánaca chë soyëngama yotatsëmbuama, er ndayá Jesús tojanmcá, ndoñe tonjopasá ndaye iytëmena chaboye.

<sup>27</sup> Bëts rey Agripa, ¿Bëngbe Bëtsabe juabna oyebuambnayënga tmojánayana soyënguine aca quecošbuaché? Atse sëntsetatsëmbo aíñe chiñe cošbuáchema ca —Pablo tbojaniana.

<sup>28</sup> Chora Agripa tbojanjuá: —Batšatema más y mašcjayëñaná Jesucristbe ustoná atse jóbemama ca.

<sup>29</sup> As Pablo tojánayana: —Nýe batšatema más o bëts cama más, atse Bëngbe Bëtsá sëntseimpadana, ndoñe nýe bëndatbe barie, sinó nýetscanga chë mora šmojtsuenanënga, atšcá Cristbe ústonënga chašmobiamama, pero utámenënga ndoñe chamondëtsemna, ntšamo mora atse sëntsemncá ca.

<sup>30</sup> Chorna, chë rey, chë mandado, Berenice y chë chëngaftaca imojantbiámanënga tmojantsbaná,

<sup>31</sup> y luaroye tmojána chë soyama jencuëntama. Mëntšá imojtsichamo: —Quem boy-abása ndocna bacna soye tonjama jóbanama chabotsemnama, ni mo utamená jtsemnama ndoñe quebnátsmëna ca.

<sup>32</sup> Y Agripa Féstbioye tbojaniana: —Chë Romoca bëts mandado, quem chabe soyama cháuyanama cachá ndoñe matënjábošenëse, bënga matmënjobená quem boy-abása jëtsboshjonama ca.

## 27

### *Roma bëts puebloye Pablo tmojanichmó*

<sup>1</sup> Italia ca uabaina luaroye Pablo jíchmuama tmojanenoyeuná ora, atse, quem librëša uabiamnayá, cháftaca sënjána. Chora Pablo y chë inýe utámenënga Julio ca uabainabe cucuatšíñe tmonjánabashejuana. Julio enjamna canýa chë Romoca bëts mandadbe soldadënguentša mandayá.

<sup>2</sup> Asna, fsënjánašëngo canýe Adramitio puebloca barcuine; ya chë Asioca bëts pueblëngoye juama enjétsamna. Cesarea pueblentšana fsënjánbocna y Aristárcnaca bëngaftaca enjëtsemna; cha enjamna Tesalónica bëts pueblócá, Macedonia luaroca.

<sup>3</sup> Chë inýe yëfsana, Sidón puebloye fsënjánashjajna. Chentse Julio, tsabá mandbomná Pábloftaca enjëtsemna; tbonjanlesenciá chabe amiguëngbioye chauabuáchama, chënga chamofjama y chamóbocuedama.

<sup>4</sup> Sidonocana fsënjëftsanbocnentšana, bëngbe contra corente enjëtsebinýiaye. Chíyeca, Chipre fshantsënga catšbioicajana, ndoñe yapa quentëtsebinýiayëjana bënga fsënjána.

<sup>5</sup> Cilicia y Panfilia luarënga béconana mar bejaycá fsënjánachnëngo, y Mira bëts puebloye fsënjánashjajna, Licia luaroca.

<sup>6</sup> Chë soldadëngbe amëndayá, canýe Alejandría puebloca barco chentse tonjáninýena, Italia luaroye yojétsaye; asna, šonjanamëndá chë barcuine jenójayiyana.

<sup>7</sup> Baseftaytentscuana uenana fsënjánana y pordonto fsënjánobená Gnido pueblentša ndirichiñe jashjanguana. Cabá bëngbe contra enjëtsebinýiaye causa, Salmón luarëjana fsënjánachnëjna, Creta fshantsënga béconana, ndoñe yapa quentëtsebinýiayëjana.

<sup>8</sup> Y chca, pordonto bejaycá fsënjánana, fshantsënga béconana; chentšana, canýe pueblo, Tsabe Puertënga ca uabáinentše fsënjánashjajna, Lasea ca uabaina pueblo béconana.

<sup>9</sup> Chca, bayté tonjanochnëngo y chora chë bejaycá jama puerte resjo enjëtsemna, er ya chë judiënga bayënga jobáyama te tonjanochnëngo, Bëngbe Bëtsá chëngbe bacna soyëngama cháuperdonama, y chora chë uaftena tempo joshjanguama ya enjëtsobeco.

<sup>10</sup> Chíyeca Pablo chë entsanga mëntsá tonjanabuayená: “Baconga, atše šontsinýana mora puerte resjo entsemna bejaycá játama, y ndoñe tšabá queochátsmëna, ni chë uasmanëshangama, ni chë barcuama y bëngbiamá cach ndoñe, mo nderado muanjanóbana ca.”

<sup>11</sup> Pero chë soldadëngbe amëndayá Páblëbioye ndoñe ntjoyeunayana; más, chë barcuentsa mandayá y chë barco nduíñbioye aíñe.

<sup>12</sup> Ndoñe tšabá yonjamna, chë barco chora enjëtsemnentse chë uaftena tempëntscuana jëftsemnana; chë causa, nýa mo nýetscanga tmonjanenoyeuná cachiñe bejaycá chentšana játama, nderado cuanjobenaye Fenice puebioye jashjanguama y chentše jëftsemnana chë uaftena tempo tojopochocantscuana. Chë pueblo Creta luaroca enjamna; y choye jamashënguamna enjamna shinýe endbetsenatjëmbambana juachoica tsjuanoicajana y tsmoicajana.

*Mar béyayiñe puerte uaftena y binýia tojanóshjango*

<sup>13</sup> Chentšana tonjanontsé tsmoicana batšá binýiayana, chíyeca chë entsanga tmonjanjuabó ya yojtsanopodena jtëtóntsana jama ca. As, chentšana fsënjëftsanbocna y bejaycá fsënjána, Creta fshantsënga beconanëjana.

<sup>14</sup> Pero baseftayté chentšana, chë fshantsëngocana tonjanontsé corente jabuache binýiayana y chë barquëshoye enjëtsohjajuana. Chë binýia yojanabaina Nordeste binýia ca.

<sup>15</sup> Chë barcna nýe chë bínýiëbe ponto tonjanontsé uayana; chë binýia enjëtsohayëjana jama ndoñe quentétsopodena causa, šonjanotocá nýe ntšamo tojtsebinýiacá chašúyambama.

<sup>16</sup> Chentšana fsënjánachnëjna Cauda ca uabaina stëtsoicajana, base fshantsënga mar béjayoca; chiñe ya ndoñe tša jabuache quentëtsebinýiaye y pordonto fsënjánobená buyeshoicana jtabocnana chë barco enjanasjá canouše, ndoñe chaondëtsóndbemama.

<sup>17</sup> Ya chë barquëshoye fsëntanëshëngo orna, chë entsanga lazëjangaca chë barquëshatmonsanabatsécaca, más uamorochëshatchaotsamnama. Pero chënga monjëtsoatja nderado chë barco chë Sirte ca uabaina cascajuentše nanjëtánjua; asna, chë barcuentsa ancla tmonjanashëbëútsëna, chë barco ndoñe betso chaondëtsábonjnama, y ntšamo enjëtsobinýiaycá fsënjána.

<sup>18</sup> Chë inýe yëfsana y chë binýiayana cabá jabuache enjëtsemna causa, chënga tmonjanontsé chë barcuentsa uasmanëshangá jtsëshbuëtsetšana;

<sup>19</sup> y unga tianoye bëngnaca šonjanotocá, cach bëngbe cucuatšeca, chë barcuentsa soyënga buyeshoye jtsëtšanana.

<sup>20</sup> Baytentscuana bënga ndoñe chibiatanobená jinýana ni shinýe, ni estrellatémënga, tša tonjëtseibetata causa; y tša jabuache enjëtsebinýiaye causa, bënga ya ndoñe quëfštëtsanobatmana chentšana jótsbocana.

<sup>21</sup> Ya bayté enjëtsemna y chëntscuana tondaye saná ntjascá fsënjëtsemna. Chentšana, Pablo bëngbe tsëntsaca tonjantsá y tonjánayana: “Baconga, tšabá manjamna atše mašmënjanoeyená y Creta luarocana ndoñe matmënjëftsanbocna; chca mora ndoñe mal mamojtsepasá y ndoñe nýa nýetsá matmënjobuëtše.

<sup>22</sup> Pero mora ngmënaca ndoñe matsmëñëngana; masque chë barco echantsenatjëmbe, tsëngaftanguentsá ndocná queochatóbana.

<sup>23</sup> Ibeta canýe ángel šonjébëbocna; Bëngbe Bëtsá, ndabia atše sëndmëna y nda sëndësverna, cha tbojichmó;

<sup>24</sup> y chë ángel mëntsá šonjauyana: ‘Pablo, ndoñe matauatjana; entseyta aca chë Romoca bëts mandádbioye chacotsama, y aca Bëngbe Bëtsábia cómnayeca, nýetsca quem barcuíñe ajnënga jobanámentsana cha echanjatsebacá ca.’

<sup>25</sup> Chcasna, baconga, ndoñe matauatjëngana, er atše Bëngbe Bëtsábeñe corente sëntsošbuaché y lempe ntšamo chë ángel šonjauyancá echanjóbocna.



<sup>26</sup> Pero mora entseyta canye fshantse mar béjajiñe chašúshejanguama ca” —cha tonjanéyana.

<sup>27</sup> Canye ibeta, uta semana fsenjána chentsana chë Adriático ca uabaina mar béjajiñe fsenjésemna, y nye ínjoye y ínjoye chë binýia šonjétsëyambaye. Y mo tséntseto yojésemna orna, chë barcuentša trabájayënga tmojanjuabó ya fshantse béconana imojésemna ca.

<sup>28</sup> As chënga tmonjanmedidá ntsachetšá chë búyeshe buatjoye inamnama y tonjanóbocna unga bnétsana y chnénguana metro; más chcoye cachiñe tmonjanmedidá y uta bnétsana canýsëfta metro tonjanóbocna.

<sup>29</sup> Chënga monjétsauatja nderado bëts ndëtšbéngaca nanjetsántšëtjiama; asna, chë barco stëtšoicajana canta ancla buyeshoye tmonjanashëbëútsena, chë barco ndoñe más chaondëtsábonjnama, y tša monjétsëboše betesco chaobínýnama.

<sup>30</sup> Chëntscuana, chë barcuentša trabájayënga tmojánbošena chentsana jtsachetana; chamna, chënga tmojanontšé chë canouše buyeshoye justjanguana, pero chca imojétsama, mo chë anclënga chë barco natsanoica cuaftsëstjajuancá.

<sup>31</sup> Pero Pablo chë soye tojáninýe, y chë soldadëngbe amëndayábioye y chë soldadëngbioye tonjanená y mëntšá tonjanéyana: “Chë barcuentša trabájayënga cach quem barcuentše ndoñe chamonjoquedase, tšëngaftanga ndoñe quešmochatobenaye muentšana jótsbocama ca.”

<sup>32</sup> As, chë soldadënga tmonjána y chë canoušentša lazëjënga tmontsantëtsetše y buyeshoye chëse tmontsantsatše.

<sup>33</sup> Enjétsëbinýana ora, Pablo nyetscanga tonjanaimpadá ndayánaca chamosëngama, mëntšá jáuyanëse: “Ya uta semana entsemna y tšëngaftanga ni mo batšatema chešmatamaná, y tondaye chešmatsbmuananga.

<sup>34</sup> Diosmanda, masque nye mo batšatémnaca šmochjase. Chca cmontsamna jamana ndoñe chašmondóbanama, er ndocná ndocá queochatspása ca.”

<sup>35</sup> Pablo, chca tonjánayanentšana, canye tandëse tonjanca y nyetscangbe delante Bëngbe Bëtsábioye tbontanchuá. Chorna, tonjanjatá y tonjanontšé jasama.

<sup>36</sup> Chentsana nyetscanga tmonjanenñemó y chëngnaca tmonjanse.

<sup>37</sup> (Chë barcuentše nyetscanga fsënjamna uta patse y canýsëfta bnétsana y chnénguanënga.)

<sup>38</sup> Ntšamo imnabošcá tmonjansentšana, buyeshoye trigo tmontsanashaná, chca, chë barco ndoñe yapa chaondëtsautama.

### *Chë barco tojtsanenatjëmba*

<sup>39</sup> Ya tonjanbinýna ora, chë barcuentša trabájayënga ndoñe quemëntëtsetatšëmbo ndaye fshantse chentše bëtsemnama, pero tmonjáninýe chë fshantsentše canye luare jachañe, chë béjaye chë luaroye omashjuanentše, y chiñe canye chënyañe enjamna; as chënga tmonjanjuabó jarrepárana nderado cuanjobenaye chëjana chë barco chë fshantsoye juyambana.

<sup>40</sup> Asna, chë anclentša lazëjënga tmontsantëtsetše y chë anclënga buyeshoye tmontsanboshjuana, y chë timón, chë barco juyambama oservena soyentša uabatsëcnëjëngnaca tmontsanjafjoná. Chorna, chë barcuentša natsanoica niñëšiñe entšëjua tsbanánoye tmontanëšëngo, y chë binýia tonjanma chë barco chaontšé chë chënyoye juabéconama.

<sup>41</sup> Pero chë barco canye luaroye tonjánashjango, y chentše chë béjaye catatoicajana enjetsobuá y chë barco cánýentše, bëtscá cascajo buyeshiñe binýnentše tontsananjó. Chë barcuentša natsanoica lado chë cascajuiñe entsanajuena, ndócnoye juabónjuama ntsopodencá, y chë stëtšoica lado puerte entsanashatiyyná y lempe entsanandbiamná, yapa binýia causa y búyeshe chentše enjétsojantšëta causa.

<sup>42</sup> Chora, chë soldadënga tmonjanjuabó chë utámenënga jtsëbáyana, jachbabëse chënga ndoñe chamondëtsachetama.

<sup>43</sup> Pero chë soldadëngbe amëndayá inaboše Pablo jatsbocama, y chíyeca chë soldadëngbioye ndoñe chenatanalesenciá chca jamana; y tojanmandá nyetscanga chë jachbabama obenëngna natsana chë buyeshoye joshbuetšana tsachoye chamuashjanguama,

<sup>44</sup> y chë ínÿengna tablëshënguiñe o chë barcuentsa pedazënguiñe chamoshbuetšana. Y chca, nyetscanga fsënjano bená tsabá y ndocá ntjapasacá fshantsoye jashjanguama.

## 28

### *Pablo Malta luaroca*

<sup>1</sup> Ya nyetscanga fshantsoca tsabá fsënjétsemna ora; fsënjántatsëmbona chë luare Malta ca yojanabaina.

<sup>2</sup> Chë luarentsa entsanga bëngaftaca corente tsabá mándbomnënga monjétsemna; canÿe ñeshe tmonjanangbotjó y šonjanëbuaja choca bënga jatósboniyama, er tša enjétsaftena y yapa enjétsesësna.

<sup>3</sup> Pablo tojanatbaná básefta buashana chamesëfjënga y chë ñeshoye enjétseshacjnaye ora, canÿe mëtscuaye tojánbocna y enjetsachaye, chentše yapa obonÿaye causa, y Páblëbe cucuatšinë tontsanonjónyá.

<sup>4</sup> Chë luarentsa entsanga, chë mëtscuaye Páblëbe cucuatšinë yojtsajonÿanama tmonjáninÿe ora, monjétsenatsëtsnaye: “Quem boyabása ndegombre inÿa obanayá cuanmëna; mar béjayoca jobanámentšana tojotsbocá, pero chca uamana causa, diosá Justicia ndoñe quebnatsleséncia cha vida chaotsebomnana ca.”

<sup>5</sup> Pero Pablo tontsanenacuestëtoná y ñeshoye chë mëtscuaye tbontsantsatše y Pablo ndocá chenatanpasá.

<sup>6</sup> Chë entsanga imojétsejuabnaye chábioye bochtsacuefshachá y nÿe ndeolpe obaná yochjashajaye ca. Pero bën tonjanochnëngo y ndocá chenátanopasama chënga tmonjáninÿe ora, ya ndoñe cachcá quemëntétsanjuabnaye y tmonjanontsé ichámuana Pablo canÿe dios inamna ca.

<sup>7</sup> Chentša béconana inamna chë luarentsa mandayabe fshantsënga. Cha šonjanëbuaja y corente tsabá šonjanacuedá, unga tentscuana. Chë taitana Publio ca inauabaina.

<sup>8</sup> Chë tempo, Públiëbe taitá šocá jutsnëshañe inajájona, calentóracá y buíñeca buamachnëjuanánaca. Pablo tonjána cha jinÿama y tonjánamashëngo; Bëngbe Bëtsábioye tbonjanimpadá y chë šocábeñe chabe cucuatšënga tonjanjajó, y chca, cha shnaná enjétsatsmëna.

<sup>9</sup> Chca tonjanopasá chentšana, chë luarentsa inÿe šoquënga Páblëbioye monjánajna y cha enjánashnaye.

<sup>10</sup> Bëtscá tsabe soyënga chentše bëngbiana tmonjanma, y cachiñe játama ya chë barcuñe fsëntanenojayenga orna, lempe ntšamo bejaycá jama šonjanëjabotcá chënga šonjanatšatá.

### *Pablo Romoye tojánashjango*

<sup>11</sup> Chë fshantsentše mar béjayoca unga ishinÿe fsënjéftsemna, y chentšana canÿe Alejandriocana yojanabá barcuñe fsënjanojayé; chë barco nyets uaftena tempo chë luarentše yojéftsamna y enjanabaina Cástor y Pólux ca, mo chë romanëngbe uta diosata catsatcá.

<sup>12</sup> Chentšana, Siracusa bëts puebloye fsënjánashjajna y chentše unga te fsënjéftsemna;

<sup>13</sup> y chentšana fshantse béconana bejaycá fsënjána, Regio puebloye jashjanguëntscuana. Yëfsana, tsmanoicana tsjuanoye enjétsëbinÿiaye, y chca, chë inÿe yëfsana Puteoli puebloye fsënjánashjajna.

<sup>14</sup> Chentše básefta Jesucristbeñe ošbuáchiyënga fsënjánanÿena, y šonjanëbuaja chëngaftaca canÿe semana chentše jéftsajétanama; y chentšana Romoye fsënjéftsambocna.

<sup>15</sup> Romoca Jesucristbeñe ošbuáchiyënga ya imojétsetatšëmbo bënga choye fchjanashjanama; chcasna, chënga tmonjánbocna bënga jajébenguama canye luare Foro del Apio y Unga Tabernënga ca uabainóntscoñe. Pablo chënga tonjánanyë ora, Bëngbe Bëtsá tbontanchuá y puerte añémoca enjésemna.

<sup>16</sup> Romoye fsënjánashjajna ora, soldadëngbe amëndayá Páblëbioye tbonjalesenciá cánÿabe yebnentše chaotsiyenama, y tonjanmandá canye soldado chabotsebojanÿama.

### *Ndayá Pablo Romoca tojanma*

<sup>17</sup> Choye fsënjánashjajnentšana unga tianoye, Pablo tonjanmandá chentše imnoyena judiënga más uámanënga chamobéconama; y nÿetscanga ya tmojánenefjna ora, cha tojanéyana: —Catšátanga judiënga, masque atše tondaye chiyatsma bënga judiënga mondbétsama soyëngama contra, ni bëngbe bëts taitanga imojanamana soyëngama contra, judiënga Jerusalenoca šmonjanishache y romanëngbe cucuatšišiñe šmonjánboshjona.

<sup>18</sup> Chë romanënga lempe šmonjantjá chentšana, monjétsboše atše jëtsboshjonana, er ndocna bacna soye chemátaninÿena atše jóbanama chašotsemnana.

<sup>19</sup> Pero chë judiënga ndoñe quemtëtsboše atše chašmuatsboshjonama; chíyeca, šonjanotocá jáimpadana cach Romoca bëts uámana mandado cháuyana atše tšabá o ndoñe tijanmama, masque atše tondaye quetsátsbomna, cach atšbe luarentša entšanga, judiëngbe contra jayanama.

<sup>20</sup> Chíyeca, atše tcbonjúbuaja jányama y jáuyanama, er ndayama chë Israeloca entšanga puerte jtsošbuáchiyëse mondobátmanama, chë obanënga mochtayenama, atše mora utamená sëntsemna ca —tojanéyana.

<sup>21</sup> Chora chënga tmojanianyana: —Bënga ni mo canye tsbuanácha Judeocana fchiyatáyëngaca acbiama noticiëngaca, y ni canye catšata judío, chocana moye ashjajnënguentsá, ndocna bacna soye acbiama chešnatacutá.

<sup>22</sup> Bënga fsëntseboše jouenana ntšamo aca cojuabnama, er ntšamo Jesucristbe us-tonëngbiama fstsëtatšëmbcá, entsemna ana nÿets luarenache chëngbe contra entšanga imojtsichamo ca.

<sup>23</sup> Asna, canye tescama Pablo tmojanianyana chca chaotsemnana; y chë tena, ba entšanga chë Pablo posada inabomnoye tmojanobeconá. Y cachëscana tojanjétanëntscuana, Pablo entšanga yojanëtsëtsná Bëngbe Bëtsabe amëndayama, ndayama cha ininÿe y inatátšëmbo; y yojsentšena chënga jáyënjanama Jesúsbeñe chamotsošbuáchema, Moisesbe leyënguentsá soyëngaca y Bëngbe Bëtsabe juabna oyebuambnayëngbe uabemana librëšangañe soyëngaca.

<sup>24</sup> Báseftanga aíñe imojtsošbuáchiye ntšamo Pablo yojsanëtsëtsnacá ndegombre bëtsemnana, pero ínÿengna ndoñe.

<sup>25</sup> Nÿetscanga ndoñe cachcá montsanjuabnaye causa, tmojanontsé chentšana jésecocanana. As Pablo tojanéyana: “Nÿets razónaca chë Uámana Espíritu tšëngaftangbe taitanga tojanéyana, Bëngbe Bëtsabe juabna oyebuambnayá Isaíasbiajana, mëntšá:

<sup>26</sup> Motsa chë entšanga jauyanama:

‘Bëtscá šmochantsuenana, pero tondaye quecmochátësertana; tša šmochantsafšna, pero tondaye quešmochátinÿe.

<sup>27</sup> Muentša entšanga ainánaca josértama ndoñe quemátsboše causa,

chënga nduauenanënga montsemna y nduabinÿnëngnaca;

chënga bomínÿeca ndoñe chamondobená jinÿama,

ni chëngbe matscuašeca jouenama,

ni chëngbe ainánaca josértama ndoñe chamondobená,

chca, atšbe benache ndoñe chamondishachama,

atše ndoñe ntjätsebacama ca.’ ”

<sup>28</sup> Pablo chora mëntšá tojanéyana: “Ndegombre šmochtsetátšëmbo, cach quem Bëngbe Bëtsabe buayenana soyënga entšanga bacna soyënguentsana játsëbacama, chë ndoñe

judiëngbioye mochanjábuayenaye, y ndegombre chënga cocayé aïñe mochanjóyeunaye ca.”

<sup>29</sup> (Pablo chca tojánayana ora, chë judiënga chentšana imojésebocana y tša imojtsen-atsëtsnaye.)

<sup>30</sup> Pablo uta uata chentše tonjanoquedá canye uántšamena yebnentše; y nÿetscanga cha jauatsëtsayama monjánajnënga cha enjanëbuájajana.

<sup>31</sup> Nÿetscangbe delante puerte añémoca entsanga enjanabuayiyná Bëngbe Bëtsabe amëndayama, y enjanabuatambá soyënga Bëngbe Utabná Jesucristbiama, y ndocna Romoca mandayá quebënjatanauyá chca jtsamama.

## Romanos

### *Pablo Romoca ošbuáchiyënga jacheuayama*

<sup>1</sup> Atše Pablo, Jesucristbe oservená, quem tsbuanácha sentsabiamná. Bëngbe Bëtsá šonjanchembo Jesucristbe ichmoná jtsemnama, y šonjanbocacá chabe tsabe noticiëngama entšanga chayábuayenama.

<sup>2</sup> Ya bayté entsemna, Bëngbe Bëtsá chabe juabna oyebuambnayëngaftaca chë tsabe noticiënga entšanga tojanašebuachená, y chënga chca tmojëftsaná bema Bëngbe Bëtsabe uabemana palabrenguiñe.

<sup>3-4</sup> Chë tsabe noticiëngna, chabe Uaquiñá Bëngbe Utabná Jesucristbiana jtsóyebuambnayana. Entšá quetsomñecana, tojanonýná canye rey Davidbentša entšábentšana; pero chabe espíritu sempre uamanáyecna, Bëngbe Bëtsá chabe obenánaca entšanga tojaninýanyé Jesucristo chabe Uaquiñá bëtsemnama. Cha chca tojaninýanyé chë Uaquiñá cháuatayenama cha tojanma ora.

<sup>5</sup> Chábeyeca, Bëngbe Bëtsá atše canye bëtš soyama šojanábuayana, Jesucristbe ichmoná jtsemnama, chabe soyëngama entšanga jábuayenama, y nyets luarënguenache Jesucristbeñe ošbuáchiyënga chamotsemnama, y chca, ntšamo cha yomandacá chënga chamotseyeunanama.

<sup>6-7</sup> Tšëngaftángnaca chëngbeñe šmontsemna, tšëngaftanga chë Romoca šmoyenënga, ndëmuanýënga Bëngbe Bëtsá tcmojáchembo Jesucristbenga chašmotsemnama. Atše tšëngaftangbiana sentsabiamná, tšëngaftanga Bëngbe Bëtsabe bonshánënga y chabe entšanga chašmotsemnama chëmbonënga. Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tsabe bendicionënga chaotsemnama, y chaboma tšëngaftanga ainaniñe tsabe ebionana chašmotsebomnama.

### *Pablo tša inaboše Roma bëtš puebloye jama*

<sup>8</sup> Jabojátšamna, Bëngbe Bëtsá, Jesucristbiajana šcuatschuá, cada ona tšëngaftanguentsabiamna, er nyets quem luariñe entšanga tša monjesoyebuambná tšëngaftanga Jesucristbeñe bëtscá šmojtsošbuáchema.

<sup>9</sup> Bëngbe Bëtsá, nda nyets ainánaca sëndëserveda, tsabe noticiënga chabe Uaquiñabiana abuayinayañe, endétatšëmbo atše nyets tempo Bëngbe Bëtsáftaca stsencuënta ora, tšëngaftangbiana sëndétseimpadanama;

<sup>10</sup> y mora Bëngbe Bëtsá sëntseimpadana, nya mora y cha tojtsebošëse, chašolesenciá jama tšëngaftanga jautsëtsayama.

<sup>11</sup> Er atše tša sënjëseboše tšëngaftanga jányama, chca, atše chayobená jamama chë Uámana Espiritbentšana yóbocana tsabe soyënga tšëngaftanga chašmotsebomnama; y chca, tšëngaftanga ainaniñe bëtš añemo chašmotsebomnama, y Jesucristbeñe corente chašmotsošbuáchema;

<sup>12</sup> o más tsabá jayanamna, tšëngaftanga y átšeftaca mochjenájabuache ainaniñe bëtš añemo jtsebomnama, tšëngaftanga y átšnaca Jesucristbeñe tša imošbuacheyeca.

<sup>13</sup> Y morna, Jesucristbeyeca catšátanga, sëntseboše tšëngaftanga chašmotsetátšëmbo atše ba soye jama tijájuaboma, tšëngaftanga jautsëtsayama, pero méntscóñama ndoñe tsjobenaye. Atše sëntseboše ndayá chayobená jamana ínýënga tšëngaftangbioca Jesucristbeñe chamotsošbuáchema, ntšamo ínýengbeñe ndoñe judiëngbeñe tonjopasacá.

<sup>14</sup> Atše Jesucristbiana canye oservená sëndmëna, y chíyeca nyetscángaftaca obligacionaca sëntsemna, chë pueblënguiñe oyenëngaftaca y bën tjoye oyenëngaftaca, chë uatsjinýenëngaftaca y ndoñe chcangaftácnaca.

<sup>15</sup> Chíyeca atše tša sëntseboše tšëngaftanga chë Romoca šmoyenëngnaca chë tsabe noticiënga jábuayenama.

### *Chë tsabe noticiënga Bëngbe Bëtsabe obenana jtsinÿanÿnayana*

<sup>16</sup> Atse ndoñe quetsátëuatja chë tsabe noticiënga jtsabuayinayama, er chë noticiënga jtsinÿanÿnayana Bëngbe Bëtsabe obenana; y chë obenánaca, nÿetscanga Jesucristbeñe ošbuáchiyënga jtsobenana atsebácanënga jtsemnama, natsana chë judiënga chca ošbuáchiyënga, pero chë ndoñe judiëngnaca.

<sup>17</sup> Er chë tsabe noticiënga jtsinÿanÿnayana ntšamo Bëngbe Bëtsá inétsama entšanga chabe bominiñe tsábenga chamotsemnama. Y entšanga chabe bominiñe tsábenga jábiamana, chënga Jesucristbeñe tmojtsošbuáchema. Ntšamo Bëngbe Bëtsabe uabemana palabrënguiñe endayancá: “Nÿe ndabiamana Bëngbe Bëtsá tojama chabe bominiñe tsabia chaotsemnama, cha Bëngbe Bëtsábeñe betsošbuáchema, cha ndegombre chë nÿetsca tescama yomna tsabe vida echántsebomna ca.”

### *Bëngbe Bëtsabe delante nÿetscanga culpa bomnënga mondmëna*

<sup>18</sup> Bëngbe Bëtsá celocana tojinÿanjé, chë uabouana castigo, tša tbojetnama entšangbiama chaotsemnama, ainaniñe bacna juabnënga bomnëngbiama y chë bacna soyënga amëngbiama y ndëmuanÿengbiama, masque Bëngbe Bëtsabe ndegombre soyënga jtsotatsëmbñana, tša bacna soyënga tmojtsama causa, ndoñe ntjalesénciana cachënga jtsiyenama ntšamo ndegombre yomncá.

<sup>19</sup> Bëngbe Bëtsá echanjácastigaye, er ntšamo entšanga imobencá Bëngbe Bëtsabiama jtsetatsëmbuama soye, chëngaftaca sempre endétsemna. Y chca endmëna, Bëngbe Bëtsá chë soye tojinÿanjéyeca.

<sup>20</sup> Bëngbe Bëtsá quem luare tojanma orscana, entšanga mondetsobena botamana josértana, Bëngbe Bëtsabe obenana ndocna te yochjëftsopochócama y cha ndegombre Bëngbe Bëtsá yomnama. Chë soyënga Bëngbe Bëtsabiama entšanga quemátobena jinÿana; nÿe jtsetatsëmbuamna aíñe. Entšanga mondobena chë soyënga Bëngbe Bëtsabiama jtsetatsëmbuana, cachá tojanma soyëngaca. Chcasna, chënga ndoñe quemátobena jayanana bacna soye tmojama, cha nduabuatma causa ca.

<sup>21</sup> Chënga Bëngbe Bëtsabiama mondëtatšëmbo, pero ndoñe ntsebošana chábioye jadórana, “aca ndegombre Bëngbe Bëtsá condmëna ca” jtsichámëse, ni cha ntsatschuanayana. Pero, ntšamo chënga tmojtsejuabnacá tondaye ntsámanana; ndoservena juabnëngaca y bacna juabnëngaca montsiyena, y chca, chënga montsiyena, jtsamëse ntšamo cachëngbe juabnënga yomncá, mo ibetiñe cuaftsajncá.

<sup>22</sup> Chënga jtsichámuana corente osertánënga imomna ca, pero ndegombrna juabna ndbomnënga mondmëna.

<sup>23</sup> Chënga ndoñe ntsadoránana Bëngbe Bëtsá, chë ndocna te yochjëftsobaná; chë cuenta, soyënga tmojobopormá mo entšangcá, y chëngna aíñe jóbanana; o soyënga shloftšëngcá o bayëngcá, o osjojnayëngcá, y chënga diosënga imomna ca jtsejuabnayëse jtsadoránana.

<sup>24</sup> Chíyeca, Bëngbe Bëtsá cachcá tojónÿa, cachëngbe ainaniñe puerte bacna juabnëngaca mandánënga chamotsiyenama, y chca, bacna soyëngnaca ínÿengaftaca imojtsama; chë soyëngamna jtsëuatjana chënga entsamna.

<sup>25</sup> Chënga chca jtsemnana, er ndoñe tmonjábošena Bëngbe Bëtsabe ndegombre soyënguiñe jtsošbuáchiyana, pero chë ndoñe ndegombre soyënguiñe cocayé jtsošbuáchiyana; chënga jtsadoránana y jtseservénana, Bëngbe Bëtsá quem luarentše tojama soyënga; pero ndoñe ntsadoránana, ni ntseservénana cach Bëngbe Bëtsá, chë nÿetsca chë soyënga tojanmá. Entšanga nÿets tempo cha chamotsatschuaná. Chca chaotsemna.

<sup>26</sup> Entšanga chca ndoñe tsabá tmonjámayeca, Bëngbe Bëtsá cachcá tojónÿa, chënga ínÿengaftaca bacna soyënga jtsamama chamotsebošama; chë soyëngamna jtsëuatjana chënga entsamna. Y chca, chë shembásengnaca tmojtsajbaná boyabásengaftaca jtsamana ntšamo tsabá yomncá, inÿe shembásengaftaca bacna soyënga jtsamama.

<sup>27</sup> Cachcá, boyabásenga tmojtsajbaná shembásengaftaca jtsamana ntšamo tšabá yomncá; y tša imojtseboše inye boyabásengaftaca bacna soyënga jtsamama. Chënga chë inye boyabásengaftaca bacna soyënga imojtsama causa, entsamna jtsëuatjana, y chë soyëngama castigánënga mochántsemna, cachëngbe cuerpënguiñe jasúfriase, ntšamo chëngbe bacna soyëngama yojtsëmerecencá.

<sup>28</sup> Chënga ndoñe tmonjábošena jtsiyenana jtsejuabnayëse, ntšamo entsanga Bëngbe Bëtsabiamama imotatsëmbcá ndegombre bëtsemnama. Chíyeca Bëngbe Bëtsá cachcá tojónya, cachëngbe ndbémana juábnaca chamotsiyenama; y chca, chënga ba soyënga jtsamana, jamama ndoñe yontsamncá.

<sup>29</sup> Chënga nyetscna bacna soye jtsamana: ainaniñe nyetscna bacna juabna jtsebomnana, nye cachëngbiamama bëtscá soyënga jtsebomnana tša jésebošana, y inyëngbioye ntšámnaca jáborlama jtsebošana; chënga nye játsbošana inya tojtsebomna soyënga jtsebomnana, inyënga jtsëbánayana. Mondmëna penzentserënga, inyënga áingñayënga, puerte bacna soyënga inyëngbiamama bošënga, y uayátsenayënga.

<sup>30</sup> Chënga inyëngbiamama podescna jtsóyebuambnayana, Bëngbe Bëtsá jtsáyayana, inyënga jtsóyanguayana, nye cachëngbe soyënga más iuámana ca jésejuabnayana, tša jtsenábotamnayana, jésejuabnayana ntšamo muanjobenaye más bacna soyënga jamana; chëngbe bëtsetsangbioye ndoñe ntsayaunanana.

<sup>31</sup> Chënga ndoñe ntsebošana chë tšabe soyëngama chaósertama, tondayama palabra ndbomnënga, ndocnábioye ntsebobonshánana y ndocnabiamama ntjóngmiana.

<sup>32</sup> Y chënga corente mondëtatšëmbo chca soyënga amëngbiamama, Bëngbe Bëtsá chabe leyinje tojayana jóbanama yojtsëmerecena ca; pero masque chca, chënga nyets tempo chca jtsamana, y oyejuayënga jtsënyayana inyënga cachcá tmojtsama ora.

## 2

### *Bëngbe Bëtsá echanjama chë ndoñe tšabe soye amënga bëtsc castigo chamotsebomnana*

<sup>1</sup> Chcasna tšëngaftanga, chë inyënga ndoñe tšabá montsama ca šmojtsichámënga, ndoñe quešmátobena jayanana ndáyeca chca cach tšëngaftanga šmojama soyëngama. Tšëngaftanga chca inyëngbiamama šmojtsichamo ora, jtsinýanýnayana cach tšëngaftángnaca ndoñe tšabá šmonjamama, y castigánënga jtsemnana cmontsamna, er tšëngaftanga cachëngcá šmojtsiyena.

<sup>2</sup> Bënga mondëtatšëmbo, Bëngbe Bëtsá ntšamo ndegombre yomncá inétsamama, chë chca amëngbiamama ndoñe tšabá tmonjama ca y castigánënga jtsemnana yojtsamna ca cha tojayana ora.

<sup>3</sup> Y tšëngaftanga, chë inyënga ndoñe tšabá montsama ca šmojtsichámënga, y cachca soyënga šmojtsama, ¿šmojatsjuabná Bëngbe Bëtsabe castigüentsana šmochjotsbocá ca?

<sup>4</sup> Bëngbe Bëtsá tšëngaftangbiamama corente tšabe juabna endbomna; mora ndoñe quecmátacastigaye, y tšëngaftangaftacna puerte uantado nye chca endëtsemna. ¿Chama tšëngaftanga cha šmojtsábotena? ¿Ndoñe šmondëtatšëmbo Bëngbe Bëtsá chca corente jtsababuánýeshanëse cmojtsënyá, tšëngaftanga juabna chašmotrocama y chabe benache chašmuishachama cha yobóseyeca?

<sup>5</sup> Er tšëngaftanga ndoñe quešmátsoše chacmotsësertánama, y bacna soyënga amama jtsajbanama ndoñe quešmátsoše causa, šmontsama más bëtsc castigo chašmotsebomnana, chë ndayté Bëngbe Bëtsá ntšamo entsanga tmojamcá tšabá o ndoñe tšabá bëtsemnana yochjayana ora; chë te, Bëngbe Bëtsá echanjamánda chë ndoñe tšabe soye amënga bëtsc castigo chamotsebomnana, y chë tšabe soye amëngna, uacanana soye; y chca echanjama ntšamo ndegombre yomncá, y echanjínýanýiye cha tša tbojetna, entsanga ndoñe tšabá tmonjamama.

<sup>6</sup> Chca, chë te, ntšamo cada ona tojéftsemama, Bëngbe Bëtsábentsana echanjójyëngacñe.

<sup>7</sup> Ndēmuanÿenga nÿets tempo tšabá jtsamëse imoyena, y chca imonguá Bëngbe Bëtsá más uámanënga chauabiama, cha chëngbiama tšabá chaotsoyebuambná y tšabe vida jtsebomnama chaoma; chë te chëngbiama Bëngbe Bëtsá echanjama, chë nÿetsca tescama yomna tšabe vida chamotsebomnama.

<sup>8</sup> Inÿenga imoyena, nÿe cachëngbe juabnëngaca cachënga tšabá jtsomñama; y ntšamo ndegombre tšabá yomncá tmojtsaboté, ntšamo ndoñe tšabá yomncá jtsamama. Y Bëngbe Bëtsá chë te, ndoñe tšabá tmonjëftsobuachjanguamna puerte etonaná echanjayana nÿetsca tescama castigánënga jtsemnana chënga yojsamna ca.

<sup>9</sup> Bëngbe Bëtsá echanjama, chca amëngna puerte chamosufrima y lastemcá chëngbiama chaotsemnana, er yapa tsetšénana chëngbiama echanjëftsemna; chca echántsemna chë chcángbeñe judiënga imomnëngbiama natsana, y ndoñe judiëngbiámna.

<sup>10</sup> Pero chë te, Bëngbe Bëtsá echanjama, ntšamo tšabá yomncá amëngna puerte uámanënga chamotsemnana, chëngbiama corente tšabá echanjóyebuambaye, y echanjama chënga cháftaca tšabá tempcá chamotsatsmënana; y chca echántsemna chë chcángbeñe judiënga imomnëngbiama natsana, pero ndoñe judiëngbiámna.

<sup>11</sup> Er Bëngbe Bëtsabiama nÿetscanga cachcá monduámana.

<sup>12</sup> Chë Moisesbe ley ndoñe monduábomnënga, bacna soye tmojamamna castigo mochántsebomna, masque leyënga ndoñe tmonduábomnëse, ndayá yojsamna jamama chaúyanama; y chë Moisesbe leyënga imuabomnëngbiamna, bacna soye tmojamama, Bëngbe Bëtsá echanjayana chënga ndoñe tšabá tmonjama ca y castigo chamotsebomna ca, chë leyënguiñe iuayana soyëngaca.

<sup>13</sup> Chca endmëna, er Bëngbe Bëtsá ndoñe queonÿbatsma entšanga chabe bominÿiñe tšábenga chamotsemnana, nÿe ntšamo chë leyiñe iuayancá tmojtsuenanama, sinó ntšamo leyënguiñe iuayancá, ndayá jamama yojsamncá tmojtsamëse.

<sup>14</sup> Chë ndoñe judiënga chca leyënga ndoñe quematábomna, pero chëngbe ainantša juabnënga tojtsëtsëtsná ndayánaca jamana, y ndayá chamotsamama ntšamo chë leyënguiñe tomandancá chënga tmojamëse, chënga jtsinÿanÿayana tšabá imotátšëmbo ndayá aíñe o ndoñe inétsamna jamama, masque leyënga ndoñe tmonduábomnëse, ndayá yojsamna jamama chaúyanama.

<sup>15</sup> Ntšamo tmojtsiyencá chënga jtsinÿanÿayana, ndayá leyiñe yomandánama chënga ainaniñe cachcá imojuabnama. Ntšamo chënga ainaniñe imotátšëmbo y imojuabnacá ndayá cachënga tmojamama, jtsinÿanÿayana chënga ntšamo chë leyiñe yomandánama cachcá imojuabnama. Inÿe ora, chëngbe juabnënga echantsëtsëtsnaye aíñe o ndoñe tšabá tmonjama ca; y ndayté, Bëngbe Bëtsá nÿetscangbiama ntšamo tmojamama yochjayana ora, cachëngbe ainaniñe tmojajuabó soyëngaca, cha echanjínÿanÿiye ndayá tšabá o ndoñe tšabá tmonjamama.

<sup>16</sup> Chë te, Bëngbe Bëtsá nÿetscangbiama echanjayana chëngbe juabnëngama y ntšamo tmojamama, ndayá entšanga tempo ndoñe tmonjáninÿama; cha chca echanjama Jesucrísoftaca; y chë atše sëndabuayiná tšabe noticiënga entsichamo ndegombre chca yochtsemnana.

### *Judiënga y Moisesbe ley*

<sup>17</sup> Y mora tšëngaftangbiama, chë judiënga šmomna ca ichámënga, y tša šmojtsejuabná Moisesbe léyeca tšëngaftanga tšabe vida jtsebomnama, y jtsenábotamnayana Bëngbe Bëtsabe ubuáyanama entšanga šmomna ca;

<sup>18</sup> tšëngaftanga chë ntšamo Bëngbe Bëtsá yobošcá tšëngaftanga chašmotsamama tatšëmbënga, y chë leyentšana šmojuatsjinÿe jobocacayana ndayá más tšabá jamama tojtsemncá.



19 Tšëngaftanga tša jésejuabnayana, šmobena ínÿenga chë ntšamo tšëngaftanga cmësertancá ndosertánënga jujabuáchama ca, mo jtanënga unachayënga cuaftsemnëngcá, o mo chë ndoñe binÿniñcá oyenëngbe juabnënga binÿnayëngcá;

20 tšëngaftanga jtsejuabnayana chë ntšamo tšabá yomncá ndosertánëngbiama abuayiy-nayënga šmomna ca, y mo chë basengcá tondaye nduatsjínÿenëngbiama abuátambayënga ca. Tšëngaftanga tša jésejuabnayana chë ley šmobomnama, lempe šmotátšëmbo ca y ntšamo šmojtsichamcá ndegombre yojtsemna ca.

21 Y chcasna, tšëngaftanga chë ínÿenga abuátambayënga, ¿ndáyeca ndoñe cach tšëngaftanga šmondëtsánatsana? Tšëngaftanga ínÿengbioye jtsabuayiy-nayana ndoñe chamondëtsatbëbanama; as, ¿ndáyeca cach tšëngaftanga šmnëtsatbëbana?

22 Tšëngaftanga jtsichámuana, acbe shema o boyábioye ndoñe ínÿaftaca cattseíngñaye ca; as, ¿ndáyeca tšëngaftanga cachcá šmnëtsama? Tšëngaftanga jtsáboyënjana soyënga chë ndayama ínÿenga tmojtsichamo diosënga yomna ca y jtsadórayana; as, ¿ndáyeca chë soyënga chënga jadórama yebnënguentšana uámana soyënga šmnëtsatbëbana?

23 Tšëngaftanga tša jtsenábotamnayana chë ley šmobomnama; as, ¿ndáyeca šmonÿbétsama ínÿenga Bëngbe Bëtsabiama podësca chamotsóyebuambnama, tšëngaftanga chë leyentša mandënga jobedésama ndocna te ntsebošana causa?

24 Chama, Bëngbe Bëtsabe uabemana palabrënguiñe mëntšá endayana: “Tšëngaftanga judiëngbe causa, ndoñe judiëngbeñe Bëngbe Bëtsabiama ndoñe tšabá quematoye-buambná ca.”

25 Tšëngaftanga ntšamo leyiñe yomandancá šmojtsamëse, Bëngbe Bëtsábenga šmomnama jinÿanÿiyama, chë más delicadentse base bobachtema tëtšenënga jtsemnana tšabá nántsemna; pero ntšamo chiñe tomandancá ndoñe šmontsamëse, chca tëtšenënga jtsemnana, tondayama ntososervénana, y chca, tšëngaftanga jtsemnana mo chë más delicadentse base bobachtema ndëtëtšenëngcá.

26 Y chë ndoñe judiënga chë más delicadentse base bobachtema tëtšenënga, judiëngcá ndoñe quemátsmëna; pero chënga ntšamo leyiñe yomandancá tmojtsamëse, ndegombre Bëngbe Bëtsá chënga echanjúbuaja mo cachabe entšangcá.

27 Y chca, tšëngaftanga judiëngbiama Bëngbe Bëtsá echanjayana ndoñe tšabá šmonjama ca, ntšamo leyiñe yomandancá ndoñe šmontsama causa. Cha chca echanjama, er bëtscá ndoñe judiënga mondmëna y chënga ntšamo leyiñe yomandancá mondocumplina, pero chënga ndoñe quemátsmëna tšëngaftangcá tëtšenënga, jtsinÿnama Bëngbe Bëtsábenga šmomnama. Tšëngaftanga, masque Bëngbe Bëtsabe uabemana ley šmonduábomna y chë más delicadentse base bobachtema tëtšenënga šmondmëna, cabá ndoñe šmontsama ntšamo leyiñe iuayancá, ndayá jamama cmojtsamnama.

28 Chcasna, nda chë más delicadentse base bobachtema tmojatëtse ora, chábioye chë soye ndoñe ntjábemana canÿe ndegombre judío. Y canÿe entšá ndoñe Bëngbe Bëtsábia ntsemnana nÿe ínÿenga chë más delicadentse base bobachtema tmojatëtšama.

29 Y canÿe entšá ndegombre judío jtsemnana, ntšamo chabe ainaniñe tomncá, cha Bëngbe Bëtsabe entšá yomnama tojtsinÿanÿnase. Y chca, canÿe ndegombre judío, Bëngbe Bëtsabe entšá yomnama chaotsinÿnamna ndoñe quenátsmëna chë más delicadentse base bobachtema jtsetëtšenana, sinó ntšamo Bëngbe Bëtsá tojamcá chabe ainaniñe chaotsebínÿnama. Bëngbe Bëtsabe Espíritu jamana entšá chca ainana chaotsebomnama, ndayá inëtsinÿanÿnaye cha canÿe ndegombre judío yomnama; y chë uabemana ley ndoñe quenátobena chca jamana. Bëngbe Bëtsá endmëna chë tšabe soye entšabiama ichamuá; entšanga ndoñe.

### 3

1 Chcase, ndánaca šuatjatjaye, as ¿Bëngbe Bëtsabe entšá jtsemnana jëftsashjáchama, más tšabá yojtsemna canÿe judío jtsemnana ca? ¿Base bobachtema chë más delicadentse

tëtšená jtsemnana beca yojtsámama ca?

<sup>2</sup> Aíñe, chca jtsemnana corente enduámama y nyetsca soyënguiñe; natsana chjayana, Bëngbe Bëtsá, judiënga chabe palabra tojanabanýe, nyetscangbiama chamotsinýenama.

<sup>3</sup> Y morna, ¿ndayá yochjopása nderado judiënguentše báseftanga ya ndoñe chca tmontsentšénese? Y chë causa, ¿Bëngbe Bëtsánaca yochtsajbaná ntšamo tojašebuachenacá amana?

<sup>4</sup> ¡Ndoñe, ndegombre ndoñe! Chca ndoñe cha queochatsma; tšëngaftanga šmondétatsëmbo Bëngbe Bëtsá sempre endbëtsama ndayá jamama tojašebuachenacá, masque nyetsca entšanga bosterënga chamotsomñe. Er Bëngbe Bëtsabe uabemana palabrënguiñe Bëngbe Bëtsabiama mëntšá endayana:

Aca ntšamo chacojayana ora, nyetscanga mochanjinýe aca ntšamo ndegombre yomncá cnétsamama;

y chacojtsenëuyaná ora, siempre cochanjínýanýiye acbe contra tmojtsoyebuambnángbioye, chënga ndoñe tšabá montsamama ca.

<sup>5</sup> Pero bënga ndoñe tšabe soye montsama ca báseftanga tmojayana ora, Bëngbe Bëtsá siempre tšabá inétsamama entšanga más tšabá jinýama tmojtsobenëse, ¿ntšamo bënga mochjayana? ¿Bënga imojtsobena jayanana Bëngbe Bëtsá ndoñe tšabá tonjama ca, bëngbiama castigo chaotsemna ca cha tojayana ora? (Morna atše sëntsoyebuambná ntšamo entšanga jóyebuambayama monduamancá.)

<sup>6</sup> ¡Ndoñe, ndegombre ndoñe! Ndoñe quemuátobena chca jayanama. Bëngbe Bëtsá nyets tempo ntšamo ndegombre yomncá ndoñe tontsamëse, ndegombre cha ndoñe nanjobenaye jayanama nyetsca quem luarentša entšangbiama, ntšamo tmojamcá tšabá o ndoñe tšabá bëtsemnama.

<sup>7</sup> Nderado nda tojayana: “Atše ndaye bacna soye stjama y ndoñe ntšamo ndegombre yomncá tojtsemna, y chë soye tojoservé Bëngbe Bëtsá puerta uamaná y bëtsá yomnama jinýanýiyama, y Bëngbe Bëtsá siempre ntšamo ndegombre yomncá tojtsamama jinýama entšanga tmojtsobenëse, ¿ndáyeca Bëngbe Bëtsá cabá iuichamo ntšamo atše tijamcá ndoñe tšabá yontsemna ca y atše canýe bacna soye amá stsemna ca?”

<sup>8</sup> Y chcase, ndánaca mëntšá nanjátayana: “Ntšamo ndoñe tšabá yondmëncá mochjama, chca, entšanga chámuinýe Bëngbe Bëtsá puerta tšabia yomnama ca.” Ndegombre, atše mal jaquédama báseftanga tmojayana atše chca stsabuatambá ca; Bëngbe Bëtsá chca abuatambayënga echanjácastigaye, ntšamo castigánënga jtsemnana imomerecencá.

*Ntšamo entšá tojtsamama, Bëngbe Bëtsabe bominiñe ndocná tšabia ntsemnana*

<sup>9</sup> Y asna, ¿Bëngbe Bëtsá bënga judiënga ínýengbiama más tšabá šonýa? ¡Ndoñe, ndegombre ndoñe! Atše ya sënjinýinýe judiënga y ndoñe judiëngnaca, chë bacna soyënga jamama juabnëngaca mandánënga imomnama.

<sup>10</sup> Er Bëngbe Bëtsabe uabemana palabrënguiñe mëntšá endayana: Ntšamo entšá tojtsamama, ndocná Bëngbe Bëtsabe bominiñe tšabia quenátsmëna. ¡Ndoñe, ndegombre ndoñe, ni mo canýa chca quenátsmëna!

<sup>11</sup> Ndocná quenátsmëna ntšamo ndegombre yomncá chabotsosertánama;

¡Ndocná quenátsmëna nda chaotseboše Bëngbe Bëtsáftaca jtsemnana!

<sup>12</sup> Nyetscanga ndoñe tšabe benache tmojishache y chiñe montsajna.

Chënga nyetscanga Bëngbe Bëtsabe bominiñe tondayama quemátoservena.

Ndocná quenátsmëna ntšamo tšabá yomncá chaotsamama, ¡ni canýa ndoñe!

<sup>13</sup> Ntšamo tmojtsichamcá puerta bëts bacna soye jtsemnana, mo canýe obanabe cuevëshe atëfjnëshe puerta bacá tojtsonguëtsecá.

Chënga tmojtsoyebuambná soyëngaca ínýengbioye jtsaíngñayana.

Chë tmojtsichamo soyëngaca puerta bacna soye ínýengbiama jtsamana, mo canýe mëtscuaye tbojtseftëtše orcá, chë veneno canýe entšábioye jóbana.

14 Chënga, nyets tempo ínÿengbiana podesca jtsichámuana, y sempre jtsóyebuambnayana chë ínÿenga ntšámnaca jáborlama.

15 Sempre jtseprontánana ínÿengbioye ntšámnaca jáborlama y jobáyama.

16 Chënga sempre jtsiyenana ínÿenga chamotsesufrínama jtsamëse, y nÿe ntšámnaca jtsaborlánana.

17 Chënga ndocna te tondaye ntjamana nyetscanga natjëmbana chamotsiyenama;

18 Chënga ndoñe ntsiyenana Bëngbe Bëtsabiana jtsejuabnayëse, cha chë más bëtsá nyetscangbiana yomnama ca —chiñe endayana.

19 Er bënga mondëtatšëmbo, lempe ntšamo leyíñe iuabemancá, chë leyëngaca mandánënga imoyenëngbiana yomnama. Chcasna, chë ley endmëna, Bëngbe Bëtsabe delante ndocná chaondobená jayanama, cha ndoñe tšabá tonjama, chama ndoñe yonjátatšëmbo causa ca; y endmëna jinÿanÿiyama, ntšamo tmojamcá tšabá o ndoñe tšabá bëtsemnama Bëngbe Bëtsá nyetscangbiana yochjayana ora, nyetscanga yojtsamna chabe delante jayanama, ndáyeca ntšamo tšabá yomncá ndoñe tmonjama ca.

20 Er, Bëngbe Bëtsá ndoñe queochatsma ndocná chabe bominyíñe tšabia chaotsemna, ntšamo leyíñe yomandancá cha tojamama; chë ley bëngbiana jamana, nÿe bënga bacna soye tmojamama chamotsetatšëmbuama.

### *Ntšamo Bëngbe Bëtsá inama entšanga chabe bominyíñe tšábenga chamotsemnama*

21 Pero mora, Bëngbe Bëtsá tonjinÿanÿé ntšamo cha inama entšanga tšábenga chabe bominyíñe chamotsemnama; y Bëngbe Bëtsá ndoñe ntjamana canÿa chabe bominyíñe tšabia chaotsemnama, ntšamo ibomncá cha tojtsamama, ntšamo chë leyënguiñe y mandënguiñe yomncá. Pero masque mora chca, Bëngbe Bëtsá tonjinÿanÿé, Moisesbe leyíñe y Bëngbe Bëtsabe juabna oyebuambnayëngbe librëšangañe yopodena jinÿenana chca yochtsemnama.

22 Bëngbe Bëtsá jamana entšanga chabe bominyíñe tšábenga chamotsemnama, chënga Jesucristbeñe tmojtsošbuáchema. Bëngbe Bëtsá nyetscanga Crístbeñe ošbuáchiyëngbiana chca jamana, y chabiana nyetscanga cachcá monduámana;

23 er nyetscanga bacna soye tmojama, y chë causa, ndocna entšá tonjobená jashjáchana ndocna bacna soye ndbomná jtsemnama y puerte bëtsá jtsemnama, ntšamo Bëngbe Bëtsá tojanjuabocá entšanga chamotsemnama.

24 Pero Bëngbe Bëtsá chëngbiana corente tšabe juabna bómnyeyeca, mo ndayá cuafjatšatacá, cha jamana chënga chabe bominyíñe tšábenga chamotsemnama. Bëngbe Bëtsá chca tojanma, Cristo Jesúsbeyeca, entšanga atsebácanënga chamotsemnama y ya ndoñe más bacna soyënga jamama juabnëngaca mandánënga chamondëtsemnama cha tojanma ora.

25 Bëngbe Bëtsá cha tbojanábuayana, chabe buíñe juabuáshanëse y jóbanëse, cha chaotsemna ndábeyeca Bëngbe Bëtsá entšanga bacna soyëngama jáperdonama; Jesucristbeñe jtsošbuáchiyëse entšanga jobenayana perdonánënga jtsemnama. Bëngbe Bëtsá chca tojanma, jinÿanÿiyama cha inétsama entšanga tšábenga chabe bominyíñe chamotsemnama, chë entšanga bacna soyënga tmojanmama chë tempo ntjatonyáycá, er cha chë tempo corente uantado chëngaftaca yojtsemna y chëngbe bacna soyëngama ndoñe yonjánacastigaye.

26 Cha lempe chca tojanma, jinÿanÿiyama cha siempre ntšamo ndegombre yomncá inétsamama, y nyetscanga Jesucristbeñe ošbuáchiyënga chabe bominyíñe tšábenga chamotsemnama inétsamama.

27 Chcáyeca, entšá ndoñe ntsoobenana tondayama ntsenábotamnayana. Chca endmëna, er Bëngbe Bëtsá tšabia chabe bominyíñe jabemana, ndoñe ntšamo leyíñe tomandancá cha tojtsamama, sinó nÿe Jesucristbeñe tojtsošbuáchema.

<sup>28</sup> Y chca jayanëse, mora bënga tšabá montsetátšëmbo, Bëngbe Bëtsá inétsama canÿe entsá tšabia chabe bominiÿiñe chaotsemnama, nÿe Jesucristbeñe tojtsošbuáchema, y ndoñe ntšamo leyiñe yomandancá cha tojtsamama.

<sup>29</sup> ¿O Bëngbe Bëtsá nÿe judiëngbe Bëtsá yomna? ¿Ndoñe judiëngbe Bëtsánaca cha ndoñe yondmëna? Aíñe, chëngbe Bëtsánaca cha endmëna;

<sup>30</sup> er nÿe canÿe Bëtsá nÿetscangbiana endmëna, y cha echanjama chë más delicadentse base bobachtema tëtšenënga imomnëngbiana y ndoñe chcangbiámna, chabe bominiÿiñe tšabënga chamotsemnama, Jesucristbeñe tmojtsošbuáchema.

<sup>31</sup> Chcasna, Bëngbe Bëtsá jamana entsanga chabe bominiÿiñe tšabënga chamotsemnama, Jesucristbeñe tmojtsošbuáchema; ¿chca yojtsayana chë ley nÿe tondayama yondoservena ca? ¡Ndoñe, ndegombre ndoñe! Inÿetsá, chca jamana chë ley más chaotsámanama.

## 4

### *Ntšamo Abrahánoftaca tojanopasá*

<sup>1</sup> Morna Abrahambiana mochjóyebuambaye, bëngbe tempsca bëts taitá, y mochjinÿe ndayá tojánatsjinÿe Bëngbe Bëtsábeñe ošbuáchiyana bomnentsana.

<sup>2</sup> Abraham chabe bominiÿiñe tšabia chaotsemnama, ndayá cha tojanmama Bëngbe Bëtsá matënjanmëse, cha matënjanobená entsángbeñe ndayama jtsenábotamnayana, pero Bëngbe Bëtsabe delante ndoñe;

<sup>3</sup> er Bëngbe Bëtsabe uabemana palabrenguiñe mëntsá endayana: “Abraham, Bëngbe Bëtsábeñe yojtsošbuachiye, y chíyeca Bëngbe Bëtsá tonjánayana cha chabe bominiÿiñe tšabia yojamna ca.”

<sup>4</sup> Canÿe entsá trabajayá, crocénana josháchiñana ndayá tojamama, pero chë crocénana ndoñe nÿe tšetánana ntsemnana, sinó chana jtsemnana ntšamo cha tojtsomerecencá.

<sup>5</sup> Er menójuabonga, nda tondaye tontsama Bëngbe Bëtsá cháuyanama cha chabe bominiÿiñe tšabia yomna ca, pero aíñe tojtsošbuaché Bëngbe Bëtsábeñe, nda endbáyana chë bacna soye tmojamënga mora mo ndoñe chca cuafjamcá chamotsemna ca, chabiana Bëngbe Bëtsá echanjama chabe bominiÿiñe tšabia chaotsemnama, chabe ošbuáchiyama.

<sup>6</sup> Rey David cachcá chabe librësañe tojánayana, chë ndabiana Bëngbe Bëtsá jayanana chabe bominiÿiñe tšabia chaotsemna ca, masque chabiana chca cháuyanama tondaye tonjamëse. David chca entsabiana tojánayana, cha puerte echantsoyejuaye ca.

<sup>7</sup> Chabe librësañe mëntsá tojanábema:

¡Tša oyejuayënga jtsemnana chë Bëngbe Bëtsá chëngbe bacna soyënga tojáperdonanga, chë Bëngbe Bëtsá chëngbe bacna soyënga tojabuajuánanga!

<sup>8</sup> ¡Puerte oyejuayá jtsemnana chë Bëngbe Bëtsá mo ndoñe bacna soye cuafjama cuenta tbojtsonÿá cha ca!

<sup>9</sup> ¿David tojánayana nÿe chë más delicadentse base bobachtema tëtšenënga imomnëngbiana oyejuayana yomna ca? Ndoñe; ndoñe chca mondmënëngbiámna. Y muentse tmonjayana, Abraham Bëngbe Bëtsábeñe yojtsošbuachéyeca, Bëngbe Bëtsá tojánayana cha chabe bominiÿiñe tšabia yojamna ca.

<sup>10</sup> Y ¿ntseco chca tojanopasá? ¿Abraham ya chë más delicadentse base bobachtema tëtšená yojtsemna ora, o cabá ndoñe chca yontsemna ora? Ndegombre, Abraham cabá ndoñe chca tëtšená yontsemna ora.

<sup>11</sup> Y cabá chentsana, Abraham base bobachtema chë más delicadentse tëtšená yojtsemna; y chca yojamna jinÿanÿiyama, Bëngbe Bëtsá tempo ya chabiana tojánayana cha chabe bominiÿiñe tšabia yojamna ca, cha Bëngbe Bëtsábeñe yojtsošbuáchema. Lempe chca tojanopasá, jinÿanÿiyama Abraham mo taitacá yomnama Bëngbe Bëtsábeñe imošbuachëngbiana, masque ndoñe base bobachtema chë más delicadentse tëtšenënga

mondmëna. Y cachcá Bëngbe Bëtsá chë ošbuáchiyëngbiana tojánayana, chënga chabe bominyiñe tšábenga imomna ca.

<sup>12</sup> Y Abrahámnaca endmëna mo chë taitacá, chë más delicadentse base bobachtema tëtšenënga imomnëngbiana, pero aiñe Bëngbe Bëtsábeñe corente jtsošbuáchiyëse imoyenëngbiana, cachcá ntšamo bëngbe bëts taitá Abraham Bëngbe Bëtsábeñe yojtsošbuachecá. Y cha cabá chë más delicadentse base bobachtema ntsetëtšena ora, ya chca yojtsošbuáchiye.

*Jtsošbuáchiyëse, ntšamo Bëngbe Bëtsá tojašebuachenacá jóshjanguana*

<sup>13</sup> Bëngbe Bëtsá tojanašebuachená Abrahambiana y chá bentšana entšangbiana, quem luare chëngbiana yochjëftsemna ca. Y chca tojanašebuachená, ndoñe Abraham ntšamo leyiñe yomandancá betsobedecénama, sinó cha Bëngbe Bëtsábeñe yojt-sanošbuáchema, y chíyeca Bëngbe Bëtsá tojánayana cha chabe bominyiñe tšabia yojamna ca.

<sup>14</sup> Pero, ntšamo Bëngbe Bëtsá tojanašebuachenacá, bënga ntšamo chë leyiñe yomandancá tmojtsamëngbiana yojtsemna ca tmojayanëse, Bëngbe Bëtsábeñe jtsošbuáchiyana tondayama nantsoserverna, y ntšamo Bëngbe Bëtsá tojanašebuachenacá tondaye ntsámanana.

<sup>15</sup> Chë ley juabocnana, Bëngbe Bëtsá puerte etonaná entšanga chá uacastigama, chënga ntšamo chiñe iuayancá ndoñe tmonsamama; pero ndocna mandënga tontsemnëse, ndocná ntso benana chë ndoñe tontsayancá ndoñe ntjamana.

<sup>16</sup> Y chca, Bëngbe Bëtsá Abrahámbioye tbojanšbuachená, cha yojtsanošbuachéyeca, ntšamo Bëngbe Bëtsá tojanašebuachenacá, ndegombre chaotsemnana chë Bëngbe Bëtsábeñe imošbuáchema mo Abrahámbentšana entšangcá imomnëngbiana; y Bëngbe Bëtsá chca tojanašebuachená, cha chëngbe tšabiana iuantjéšnayeca. Chë mo Abrahámbentšana entšangcá imomnëngbeñe, ndoñe quemnatsmëna nye chë ntšamo ley yomandacá inmëtsamënga, sinó nyetscanga chë ntšamo Abraham tojanošbuachecá Bëngbe Bëtsábeñe imošbuachëngnaca. Y Abraham nyetscanga bëngbiana, Bëngbe Bëtsábeñe ošbuáchiyënga, mo taitacá endmëna.

<sup>17</sup> Ntšamo Bëngbe Bëtsábe uabemana palabrenguiñe endayancá, Bëngbe Bëtsá Abrahámbioye ibojtsatsësnaye ora: “Atše sënjama aca ba luariñe entšangbiana atšbe bominyiñe taitá chacotsemnana ca.” Chë ntšamo tojanašebuachenacá ndegombre tšabe soye endmëna, er Bëngbe Bëtsá chca Abrahambiana yojanjuabná; y Bëngbe Bëtsá endmëna ndábeñe Abraham yojtsanošbuaché, y nda inétsama entšanga chámuatayenama, y nda inamánda y entšanga jobenayana jinýama ndayá ndocna te tmonjaninýcá.

<sup>18</sup> Abraham Bëngbe Bëtsábeñe yojtsošbuáchiye y yojtsobatmana ntšamo tbojanšbuachenacá chaotsemnana, masque entšabe juabniñe ndoñe chca ntjátsjuabnayana; y chca, cabana cha tojánashjache jtsemnana “ba luariñe entšangbe taitá”, ntšamo Bëngbe Bëtsá tbojaniancá: “Ac bentšana entšanga tša mallajta mochántsemna, ndocná queochatobenaye jacúntana ca”.

<sup>19</sup> Abraham yojanobatmanëntscuana, cha puerte chábeñe yojtsanošbuaché, ntšamo tbojanšbuachenacá jóyëngacñama, masque Abraham yojtsonýyaye ya bëtšanánëjema yojtsemnana, er ya mo patse uata yojtse bomna, y chabe shema, Sara, ndoñe yonjobena šëšonga jtsabamnana.

<sup>20</sup> Abraham ndocna te tonjanajbaná Bëngbe Bëtsábeñe ošbuáchiyana, y ni mo canýe ndoñe yonjanjuaboye chë ntšamo Bëngbe Bëtsá tbojanšbuachenacá ndoñe joparëjana ca; sinó más corente chábeñe yojtsanošbuaché, y chca Bëngbe Bëtsábioye ibojtsatschuanaye,

<sup>21</sup> er cha tšabá inatátšëmbo, ntšamo tbojanšbuachenacá jamama, ndegombre Bëngbe Bëtsá obená inamnana.

<sup>22</sup> Chíyeca, Bëngbe Bëtsá tojánayana cha chabe bominyiñe tšabia yojamna ca.

<sup>23</sup> Pero, chabe bominyiñe tšabia yojamna ca Bëngbe Bëtsá tojánayana ora, ndoñe nÿe Abrahambiana chca ntsóyebuambnayana;

<sup>24</sup> ndayá bëngbiámna, ndëmuanyëngbiama Bëngbe Bëtsá yochjayana chabe bominyiñe tšábenga imomna ca, bënga Bëngbe Bëtsábeñe imošbuachéyeca; Bëngbe Bëtsá, nda tojanma Bëngbe Utabná Jesús cháuatayenama.

<sup>25</sup> Bëngbe Bëtsá tojanalesenciá entsanga Jesús chamóbama, bënga bacna soyënga tmojanma causa, y Bëngbe Bëtsá tojanma cha cháuatayenama. Bëngbe Bëtsá chca tojanma jobenayama, bënga chabe bominyiñe tšábenga jábiamama.

## 5

### *Mora bënga Bëngbe Bëtsabe bominyiñe tšábenga montsemna*

<sup>1</sup> Er Bëngbe Bëtsá tojama bënga chabe bominyiñe tšábenga chamotsemnama, bënga chábeñe imošbuachéyeca; mora tempcá tšabá Bëngbe Bëtsáftaca bënga montsatsmëna, Bëngbe Utabná Jesucristbeyeca.

<sup>2</sup> Bënga Cristbeñe mondošbuáchema, cha tojama bënga chamotsetatšëmbuama Bëngbe Bëtsá tša tšabia yomnama, y Bëngbe Bëtsábiocana tšabe soyënga jtsebomnëse mora chamotsiyenama. Bënga tša oyejuayënga jésemnana, er Bëngbe Bëtsábeñe jtsošbuáchiyëse mondobátmana cha puerte uámanënga y bëtsetsanga šochjábiamama, batšá ntšamo cachá yomncá.

<sup>3</sup> Y ndoñe nÿe chama bënga oyejuayënga jésemnana, ndayá bënga tmojtsesufrina y padecena soyënguiñe tmojtsajna órnaca. Chca mondbama, er bënga mondetatšëmbo bënga tmojtsesufrina orna, bënga juatsjínÿana ntšamo uantadënga jtsemnama padecena soyënguiñe tmojtsemna ora, Bëngbe Bëtsábeñe jtsošbuáchiyëse.

<sup>4</sup> Bënga padecena soyënguiñe tmojtsemna ora, más tšabá uantadënga jtsemnama mondobénayeca, Bëngbe Bëtsá oyejuayá bëngaftaca jtsemnana, padecena soyënguentšana ndegombre tšabá tmojachnëngo ora. Bëngbe Bëtsá oyejuayá bëngaftaca chaotsemnama bënga tmojama ora, bënga jtsobenana más jtsobátmanana, ntšamo šojašebuachenacá cha yochjamama.

<sup>5</sup> Bënga chca tmojtsobátmanëse, ndocna te nÿe bonamente quemochatobátmana, er Bëngbe Bëtsá šojinÿanyé tša bëtscá cha šuababuánÿeshanama. Bëngbe Bëtsá chca tojama chë Uámana Espíritbeyeca, y cha endmëna nda Bëngbe Bëtsá tbojanichmó bëngbe ainaniñe chaotsemnama jtsemándayama.

<sup>6</sup> Tempo bënga tondaye chemuatanobená jamana Bëngbe Bëtsabe bominyiñe tšábenga jtsemnama, y chora Cristo tojanóbana bënga chë bacna soyënga tmojamëngbe tšabiana, nÿa chama tempo yojamna ora.

<sup>7</sup> Ndoñe paselo quenátsmëna jajuaboyana, ndáyeca canÿa nantseprontana jóbanama canÿa ntšamo chë leyíñe yomandancá jamama tojtsamanabiama; pero, canÿa bëtscá jtsababuánÿeshanëse tšabe soyënga ínÿengbiama tojtsamabiama, nderádose chabiama jóbanama cuantseprontana.

<sup>8</sup> Pero Bëngbe Bëtsá bënga šojanÿanyé tša šuababuánÿeshanama, er bënga cabá bacna soyënga ntsamcá imojoyena ora, Cristo bëngbiama tojanóbana.

<sup>9</sup> Cristo, chabe buiñe juabuáshanëse bëngbiama tojanóbanayeca, Bëngbe Bëtsá tojanma bënga chabe bominyiñe tšábenga jtsemnama. Y chca endmënayeca, ndegombre Cristo šochanjátsebacaye, entsanga ndoñe tšabá tmonjama ca y castigo chëngbiama chaotsemna ca Bëngbe Bëtsá chaojayana ora.

<sup>10</sup> Bënga tempo Bëngbe Bëtsá imojanáya; pero cha tojanma bënga cháftaca tempcá tšabá chamotsatsmënama, chabe Uaquiñá tojanóbanayeca. Y mora, bënga natjëmbana cháftaca chamotsemnama ya tojama ora, ndegombre atsebácanënga mochántsemna, chabe Uaquiñá ainá yómnyayeca.

11 Y ndoñe nÿe chca, ndayá bēnga cháftaca puerte oyejuayēnga chamotsemnámna Bēngbe Bētsá jamana, ndayá Bēngbe Utabná Jesucristo bēngbiama tojánmayeca. Y mora, chábeyeca Bēngbe Bētsá tojama bēnga cháftaca tempcá tšabá chamotsatsmēnama.

### *Adán y Cristo*

12 Canÿe entšá bacna soye tojanma causa, nÿetsca entšanga bacna soyēnga amēnga tmojábcana; y cha tojanóbana, bacna soyēnga tojanma causa. Y chca, nÿetsca entšanga entsamna jóbanama, er nÿetscanga bacna soyēnga tmojama.

13 Bēngbe Bētsá Moisésbioye chē leyēnga cabá nduántšaboshjona ora, entšanga quem luarentše bacna soyēnga tmojanma. Pero ndocna ley tontsemna ora, Bēngbe Bētsá ndoñe ntjatonyayana entšanga bacna soyēnga tmojamama.

14 Nÿetsca entšanga, Adánbentšana Moisésbentscoñe, nÿetscanga yojánamna jóbanama, ntšamo cach Adán tojanmcá ndoñe tmonjanmēngnaca, ntšamo cha ndoñe chaondēmama Bēngbe Bētsá tbojanmandacá cha tojanma ora. Y Adánbeñe entšanga mondobena jinÿama, ntšamo chē jabama ibojamná canÿe soyēnguiñe yochtsanmēna.

15 Pero ntšamo chē útata tbojanmcá ndoñe cachca soye quenátsmēna; er Bēngbe Bētsá entšangbe tšabiama jtsejuabnayēse tšabe soyēnga chēngbiama tojanma ora, ndoñe yonjamna mo ntšamo Bēngbe Bētsá tbojanmandacá ndoñe chaondēmama Adán tojanma orcá. Tšēngaftanga šmondētatsēmbo, nÿe canÿe entšá canÿe bacna soye tojanma causa, cha tojanma nÿetsca entšanga jóbanama chaotsamnana, pero Bēngbe Bētsá entšangbe tšabiama yojuabnáyeca, más bēts soyēnga jamana, chē Adánbe bacna soye entšangbiama bacna soyēnga tojanmama. Chca, Bēngbe Bētsá tojanma ba entšanga bētscá tšabe soyēnga chamotsebmnama; y chca tojama, nÿe canÿe entšá, Jesucristo, tšabe soyēnga tojánmayeca.

16 Chē ba entšanga bētscá tšabe soyēnga chamotsebmnama Bēngbe Bētsá tojanmentšana endóbocana soye, puerte inÿetšá comna, chē entšá Adán, canÿe bacna soye tojanmentšana tojanóbocna soyama. Adán bacna soye tojanmentšana, Bēngbe Bētsá tojánayana chana bacna soye tojanma y castigo jtsebmnama ibojtsemna ca, y nÿetsca entšángnaca chē causa; pero masque nÿetscanga bacna soyēnga tmojama, Bēngbe Bētsá entšangbe tšabiama ndoñe bēndētsebnatjēmbayeyeca, tojanma entšanga chabe bominiñe tšábēnga chamotsemnama y chē bacna soyēngama castigánēnga ndoñe chamondētsemnama.

17 Ndegombre endmēna, canÿe entšá bacna soye tojanma causa, nÿetsca entšanga jóbanama yojtsamna. Pero puerte más, canÿe entšá Jesucristo tojanma. Ndēmuanÿēngbiama Bēngbe Bētsá tojama bētscá tšabe soyēnga chamotsebmnama, ndēmuanÿēngbiama Bēngbe Bētsá tojama chabe bominiñe tšábēnga chamotsemnama, y Bēngbe Bētsábiocana chca tmojóyēngacñēnga, chēnga nÿetscanga mochantsiyena bacna soyēnga jtseyēnjanayēse y nÿetsca tescama mo bētsētsangcá; y chca echántsemna ndayá Cristo tojánmayeca.

18 Y chca, ntšamo canÿe entšá, Adán, canÿe bacna soye tojanmama, Bēngbe Bētsá tojánayana nÿetscanga bacna soye tmojanma y castigánēnga chamotsemna ca; cachcá ntšamo canÿe entšá, Cristo, puerte tšabe soye tojánmayeca, Bēngbe Bētsá jayanana nÿetscanga imojtsobena chabe bominiñe tšábēnga jtsemnama y chē nÿetsca tescama yomna tšabe vida jtsebmnama ca.

19 Y ntšamo Bēngbe Bētsá tbojanmandacá ndoñe chaondēmama canÿe entšá tojanma causa, nÿetsca entšanga bacna soye amēnga tmojanobiama; cachcá, ntšamo Bēngbe Bētsá tbojanmandacá canÿe entšá, Jesucristo, tojánmayeca, Bēngbe Bētsá tojanma bētscá entšanga chabe bominiñe tšábēnga chamotsemnama.

20 Chē ley entšangbe cucuatšiñe tmojanáboshjona, jinÿanÿiyama ntšamo ndegombre yomna bacna soyēnga jtsamana; pero entšanga más bacna soyēnga imojtsama

ora, Bëngbe Bëtsá cabá más chëngbe tšabiama yojtsanjuabnaye y más tšabe soyënga chëngbiamá yojtsama.

<sup>21</sup> Chcasna, mora mochjayana, entsanga bacna soyëngaca puerte mandánënga imo-jamna, y chca, nyetscanga jóbanama yojamna ca. Pero mora, ya ndoñe chca quenátsmëna, er Bëngbe Bëtsá tojama entsanga chabe bominyiñe tšábënga chamotsemnana, Bëngbe Utabná Jesucristbeyeca chë nyetsca tescama yomna tšabe vida chamotsebomnana; chíyeca mora bënga montsobena jtsiyenama, Bëngbe Bëtsá šojatsatá tšabe soyënga lempe bëngaftaca jtsemnëse.

## 6

### *Crístbeyeca bënga tšabe vida jtsebomnana*

<sup>1</sup> Y asna, ¿ntšamo mochjayana? ¿šojtsamna jtsiyenana sempre bacna soyënga jtsamëse, chca, Bëngbe Bëtsá šuababuányëshanama más chašotsinyänynama, cha más bacna soyënga bënga jtsaperdónayëse?

<sup>2</sup> ¡Ndoñe, ndegombre ndoñe! Tempo bënga monjaniyena bacna soyënga jamama juabnëngaca mandánënga, pero mora bënga montsobena jtsiyenana chë juabnënga tondaye bëngbioye ntsamcá, y chca, bënga montsobena mo obanëngcá chë soyëngama jtsemnana; y as, ¿ndáyeca bënga muatjatsjuabnaye ntšamo ndoñe tšabá tontsemncá jatiyenana?

<sup>3</sup> Er ndegombre tšëngaftanga šmondëtatšëmbo, bënga uabáinënga tmojanoquedá ora, tmonjaninyänyé bënga Cristo Jesúseftaca cányiñe mo canyácá bëtsemnana; y bënga uabáinënga tmonjanoquedá ora, enjamna mo bënga cuafjobancá, ntšamo Cristo tojanobancá.

<sup>4</sup> Bënga uabáinënga tmonjanoquedá ora, enjamna mo bëngnaca cháftaca cuafjobancá, y cháftaca uatabuantsanëngcá. Chca yojamna, bënga chamotsobenama mo tsëm entsangcá jtsiyenama, ntšamo Crísoftaca tojanopasacá, cha cháuatayenama Bëngbe Bëtsá tojanma ora, chabe puerte bëts obenánaca.

<sup>5</sup> Bënga Crísoftaca cányiñe mo canyácá jtsemnëse, cha tojanóbana ora mo bëngnaca cháftaca cuafjobancá enjámnayeca, ndegombre bënga cányiñe mo canyácá cháftaca mochántsemna, bënga cachiñe vida nyetsca tescama chamotsatsbomnana Bëngbe Bëtsá jtsamëse, ntšamo Cristo cháuatayenama cha tojanmcá.

<sup>6</sup> Y bënga mondëtatšëmbo, chë ntšamo bëngbe vida enjamncá, bacna juabnëngaca mandánënga, Jesucristbeñe cabá ntsošbuáchiye ora, mora ya ndoñe chca yontsemnana; y chca entsemna mo chë tempsca vida chaóbanama cuafjamcá, Cristo tmojancrucificá ora. Chca yojamna, Bëngbe Bëtsá jobenayama chë bacna soyënga jamama bëngbe juabnënga jtsepochócama; y chca, ya ndoñe más chë bacna soyëngaca mandánënga chamondëtsemnana, mo nyets tempo nye ínÿabiamá oservenëngcá.

<sup>7</sup> Er canye entšá tojóbaná ora, chë bacna soyënga chábioye ya ndoñe más ntsemándayana.

<sup>8</sup> Er Cristo tojanóbana ora, mo bëngnaca cháftaca cuafjobancá endmënayeca, cháftaca jtsiyenámncá bënga montsošbuaché.

<sup>9</sup> Bënga mondëtatšëmbo Cristo cháuatayenama y ndocna te cha cachiñe jatóbanama Bëngbe Bëtsá tojanmama; y ndocna obenana queochatsma cha cachiñe chauatóbanama.

<sup>10</sup> Cha tojanóbana, y chë bacna soye jamama juabnënga ndocna te ntjobenayana chábioye jamándana, y ínÿënga ndoñe imontsobena ntšamo cha jabórlana; y ntšamo mora cha yoyencá, Bëngbe Bëtsá jtsešervénama yomna.

<sup>11</sup> Cachcá, tšëngaftanga cmontsamna jtsejuabnayana, chë ya ndoñe más bacna soyëngaca mandánënga šmojtsemnana, pero vida šmobomna lempe jtsamëse Bëngbe Bëtsá tšëngaftangaftaca oyejuayá chaotsemnana, Cristo Jesúseftaca cányiñe mo canyácá jtsemnëse.



<sup>12</sup> Tšëngaftanga cmontsamna, chë bacna soyënga jamama ainanentše šmobomna juabnëngaca ndoñe más mandánënga ntsemnana, chca, tšëngaftanga ndoñe chašmondëtsamama juabnëngaca nÿe cach tšëngaftanga, tšëngaftangbe cuerpiñe tšabá jtsomñama.

<sup>13</sup> Tšëngaftanga ndoñe quecmátamna jalesénciana ndaye tšëngaftangbe cuerpentša soye, bacna soyënga jamama chaoservema. Chamna, tšëngaftanga cmontsamna Bëngbe Bëtsá jauyanana, lempe ntšamo tšëngaftanga šmomncá, cha jasérviana chaotsemna ca, tšëngaftanga chë šmorna mo ya ndoñe más obanëngcá Bëngbe Bëtsabiama, y tojanma tšabe vida chašmotsebonnama; y jauyanana nÿetsca tšëngaftangbe cuerpentša soyëngna Bëngbe Bëtsá jasérviana yojtsemna ca.

<sup>14</sup> Ndoñe quecmátamna bacna soyëngaca mandánënga jtsemnana, er tšëngaftanga ndoñe quešmátiyena leyiñe iuayana soyëngaca mandánënga, y šmondoyena Bëngbe Bëtsá tšëngaftangbiama tšabá jtsejuabnayëse.

*Ošbuachiyá obligaciónaca jtsemnana ntšamo tšabá yomncá jamama*

<sup>15</sup> Y asna, ¿bënga imojtsobena bacna soyënga jamana, chë leyiñe iuayana soyëngaca ndëmandánënga imomnana, y Bëngbe Bëtsá bëngbiama tšabá jtsejuabnayëse bënga imoyenama? ¡Ndoñe, ndegombre ndoñe!

<sup>16</sup> Tšëngaftanga tšabá šmondétatšëmbo, ínÿabe cucuatšiñe mo nÿets tempo nÿe ínÿabiama oservenëngcá šmojoquedá ora, cha jtsobedecënana, ndegombre tšëngaftanga chë nduiñbiama nÿets tempo oservenënga jtsemnana. Chcasna, cachcá jtsemnana, chë tšëngaftanga šmojabocacá bacna soyëngaca mandánënga jtsemnana, y chca jtsemnana mo Bëngbe Bëtsabe bominiñe tšëngaftanga nÿetsca tescama obanënga cuaftsemncá, o Bëngbe Bëtsá jtsobedecënana, y chca, chabe bominiñe tšábenga jabocanana.

<sup>17</sup> Pero šontsamna Bëngbe Bëtsá jtsatschuanayana, er tempo tšëngaftanga mo nÿe ínÿabiama oservenëngcá šmojamna, bacna soyënga jamama juabnëngaca mandánënga; pero mora nÿets ainánaca šmojoyeuná, ntšamo chë tcmojanabuatambá soyënguñe šmojoyëngacñëcá.

<sup>18</sup> Bëngbe Bëtsá tšëngaftanga cmojatsebacá, bacna soyëngaca ndëmandánënga chašmotsemnana, y morna mo Bëngbe Bëtsabiama oservenëngcá šmojabocna, ntšamo tšabá yomncá jtsamama.

<sup>19</sup> Muentše sënjoyebuambá ntšamo entšanga mondbetsichamcá, er tšëngaftanga ndoñe corente juabna quešmátsbomna toto palabrënga chacmósertama. Tempo, tšëngaftanga šmonjanamana jalesénciana, lempe ntšamo šmojamncá mandánënga jtsemnana, bacna soyënga shembásaftaca o boyabásaftaca jamama juabnëngaca, y nÿe ndaye bacna soyënga jamama juabnëngaca. Cachcá, mora tšëngaftanga cmontsamna jalesénciana tšëngaftanga chašmotsemnana juabnëngaca mandánënga tšabe soyënga jtsamama, chca, ndegombre Bëngbe Bëtsabe entšanga chašmotsemnana.

<sup>20</sup> Tšëngaftanga, cabá bacna soyënga jamama juabnëngaca mandánënga šmonjamna ora, tšëngaftanga ndoñe obligaciónaca quešmënjatsmëna ntšamo Bëngbe Bëtsabiama tšabá yomncá játamama.

<sup>21</sup> ¿Ndaye tšabe soye tšëngaftanga šmojosháchiñe chë tempo šmojánama soyënga amiñe? Tondaye; y mora chë soyëngama šmojtšëuatja. Chca soyënga tcojamentšana jóbocnana, entšá nÿetsca tescama castiganá chaotsemnana, mo Bëngbe Bëtsabe bominiñe nÿetsca tescama obaná cuaftsemncá.

<sup>22</sup> Pero mora, ndoñe quešmátsmëna bacna soyënga jamama juabnëngaca mandánënga, y mora bëtscá šmojtšentšena Bëngbe Bëtsá jtseyeunanana y jtseservénana. Chca jtsamana, tšëngaftangbiama puerte tšabá entsemna, er chca, Bëngbe Bëtsabe entšanga šmochántsemna, y cabana, chë nÿetsca tescama yomna tšabe vida šmochántsebonna.

<sup>23</sup> Bacna soyënga tcojtsamentšana jóbocnana entšá nÿetsca tescama castiganá chaotsemnana, mo Bëngbe Bëtsabe bominiñe nÿetsca tescama obanënga cuaftsemncá; pero,

Bëngbe Bëtsá šojtsatšatná soyënguentsana, jóbocnana chë nyetsca tescama yomna tšabe vida jtseboznana, Cristo Jesús Bëngbe Utabnáftaca cánýiñe mo canýacá jtsemnëse.

## 7

### *Chë bouamnátbentsana ndayá bëngbiama mochjuatsjinýe*

<sup>1</sup> Jesucristbeyeca catsátanga, tšëngaftanga šmotátšëmbo ntšamo chë leyënga entsangbiama inétsemnana; tšëngaftanga šmotátšëmbo, ntšamo chë leyíñe tojtsayancá canýe entsá chaotsamamna, nýe chë entsá tojtsainëntscuana chábioye jtsemándayana.

<sup>2</sup> Chcasna, canýe bouamna shembása, ntšamo chë leyíñe endayancá bontsemna chabe boyáftaca jëftsemnana, chë boyá tuainëntscuana; pero chë boyá tojtsóbanësna, chë leyíñe endayana, chë shemna canýa jtoquédana, chë boyabiama ndëmandaná ca.

<sup>3</sup> Y chca, chë shema inýe boyabásaftaca chabe boyábioye tbojaingñé, chë boyá cabá vida totsóbomñe ora, chë shemna jtsabáinana chabe boyábioye ínýaftaca ingñayá ca. Pero chabe boyá tojtsóbanëse, chë leyíñe endayana chë shemna canýa jtoquédana, chë boyabiama ndëmandaná ca, y cha jtsobenana ínýaftaca jtobouamayana; y chca tojama ora, boyábioye ínýaftaca ingñayana ndoñe ntsemnana.

<sup>4</sup> Tšëngaftanga chë ošbuachiyëngaftácnaca cachcá endmëna; ya ndoñe más chë léyeca mandánënga quešmátsmëna, er Cristo tojanóbana ora šmojánbocna, mo chë soyëngama obanënga cuafjoquedangcá, ínýabe entsanga jtsemnana, Crístbënga, ndabiama Bëngbe Bëtsá tojanma cháuatayenama; y chca jtsemnëse, bënga bëtscá soyënga ntšamo tšabá yomncá chamotsamama, Bëngbe Bëtsá jaserviama.

<sup>5</sup> Bënga chë nýe ntšamo cabënga inmabošcá monjaniyena ora, chë ley enjanoservena bëngbe ainaniñe chamotseboznama bacna soyënga jamama puerte bëts juabnënga, nýe bënga tšabá jtsonñama. Ba bacna soyënga tmonjanma, y chë causa bënga šonjánamna nyetsca tescama castigánënga jtsemnana, mo Bëngbe Bëtsabe bominyiñe nyetsca tescama obanënga cuaftsemncá.

<sup>6</sup> Pero mora Bëngbe Bëtsá šojatsebacá chë léyeca ndëmandánënga chamotsemnana; chë ley tempo enjamna bëngbiama mo canýe amëndayacá. Pero mora bënga chë leyama mo obanëngcá montsemna; chca, bënga ndoñe chamondëtsiyenama ntšamo tempo enjamncá, chë uabemana leyëngaca mandánënga, y aíñe tsmëcá chamotsiyenama, ntšamo chë Uámana Espíritu iuamcá bënga vida chamotseboznama.

### *Bacna soye jamama juabna tcojtseboznëse, chë ley jamana entsá bacna soye chaomama*

<sup>7</sup> Báseftanga muanjayana cach ley bacna soye yomna ca; ndegombre, chë ley ndoñe chca quenátsmëna. Chë léyeca atše tšabá sëndétatšëmbo ndayá yomna bacna soye jamana. Atše ndocna te matijántatšëmbona ndayá yomna chë “ínýabioye jtsántšabošana”, “ínýabioye ndoñe cattsantšaboše ca” chë leyíñe ndoñe matmëñjanábemëse.

<sup>8</sup> Pero bacna soyënga jamama juabnënga atše bomna causa tonjanma, atše puerte chaitsebošana chë ndoñe šonjamna jtsebošana soyënga; y chca chë juabnëngaca tonjanopasá, atše chë leyënguñe ndayá iuayanama jtsejuabnayëse. Er ndocna ley tondmëna ora, entsá ndoñe ntsetatšëmbuana ndayá yomna bacna soye jtsamana.

<sup>9</sup> Canýe tempo enjamna, chora atše sënjananiyena leyëngama ntsetatšëmbcá, pero ntšamo leyíñe iuayancá sënjanabuátmana ora, ndayá jamama ndoñe yonjamnama, atše sënjanontsé chë bacna soyënga jamama juabnëngaca mandaná jtsemnana;

<sup>10</sup> y chora atše sënjántatšëmbona, chë causa šojtsanmëna nyetsca tescama castiganá jtsemnana, mo Bëngbe Bëtsabe bominyiñe nyetsca tescama obaná cuaftsemncá. Bëngbe Bëtsá chë mando tojanma, atše chë nyetsca tescama yomna tšabe vida jtseboznama chayobenama, chë ley jtseyeunanëse; pero ndoñe chiyatanobedecé causa, chë mando tonjanma atše chašotsemna nyetsca tescama castiganá jtsemnana.

11 Chë leyentša mandíne inýe soyënga ndoñe šonjëtsemna jamama ca yojtsayánayeca, chë bacna soyënga jamama juabnënga átšbeñe, šmonjaningñé bacna soyënga jamama; y chë mando bëtsemnama, chë bacna soyënga jamama juabnënga tmonjanma atše chašotsemna nýetsca tescama castiganá jtsemnama, mo Bëngbe Bëtsabe bominiñe nýetsca tescama obaná cuaftsemncá.

12 Pero bënga mëntšá mochjayana: chë leyna tšabe soye endmëna, er Bëngbe Bëtsábiocana tojanóbocna, y chë mandëgnaca Bëngbe Bëtsábiocana tojanóbocna ca; chiñe endayana ndayá tšabá yomna jamana y chca tšabá jtsemnana.

13 Y asna, ¿quem tšabe soye tojanma atše chašotsemna nýetsca tescama castiganá jtsemnama, mo Bëngbe Bëtsabe bominiñe nýetsca tescama obaná cuaftsemncá? ¡Ndoñe, ndegombre ndoñe! Chë bacna soyënga jamama juabnënga atše bomna causa, chca átšeftaca tonjanopasá. Chë tšabá yomna sóyeca, chë bacna soyënga jamama juabnënga tmonjanma atše chašotsemna nýetsca tescama castiganá jtsemnama. Chca chë juabnëngaca tonjanopasá, entšanga jobenayama jtsetatšëmbuama ndayá yomna bacna soye jamana; y chë mando, bacna soye jamama ndoñe yondmëna ca jtsichámuana causa, nýetsca entšanga mondobena jinýana canýe bacna soye, mo canýe puerte bëts bacna soycá.

14 Bënga mondëtatšëmbo chë ley Bëngbe Bëtsabe ley yomnama, pero atšna nýe canýe entšá sëndmëna, canýa nýets tempo nýe bacna soyënga jamama juabnëngaca mandaná.

15 Ndegombre ndoñe quešnátšertana ntšamo sëntsamcá, er ndoñe ntsamana ndayá jamama stsebošcá, pero aíñe jtsamana ndayá jamama ndoñe šontsogustancá.

16 Pero chë atšbe ainaniñe stsejuabná ndoñe tšabá tontsemna soye stsamëse, ndayama leyíñe iuayana ndoñe candmëna ntsamana ca, chca atše jtsinýanýnayana chë ley ndegombre tšabe soye yomnama.

17 Chcasna, atše ya ndoñe ntsemnana chë chca tojtsamá, ndayá chë bacna soye jamama atšbe ainaniñe yomna juabnënga jtsamana atše chca jamama.

18 Atše sëndëtatšëmbo, atšbe ainaniñe tondaye yontsemna ntšamo tšabá yomncá atše jamama. Masque sëntseboše ntšamo tšabá yomncá jamama, ndoñe quetsátobena chca jamama.

19 Atše ndoñe quetsátama chë tšabe soye ndayá jamama sëndbošcá, pero aíñe sëntsama chë bacna soye ndayá jamama ndoñe sëndbošcá.

20 Chë ndayá ndoñe jamama sëntsebošcá stsamëse, chca jtsayanana, atše ya ndoñe stsemna chë chca yojtsamá, sinó chë bacna soye jamama atšbe ainaniñe yomna juabnënga chca yojtsama.

21 Chca, atše tijátatšëmbona ndayá átšeftaca yojtsopasánana; masque, ntšamo tšabá yomncá jamama stseboše, bacna juabnënga sempre jtsemándayana atše bacna soye chaimama.

22 Atšbe ainanoca puerte sëntsoyejuá, Bëngbe Bëtsábiocana yóbocana mandëngama.

23 Pero atše sënjinýena inýe soye átšeftaca yojtsopasánama; chë bacna soye jamama atšbe ainaniñe yomna juabnënga yojtsama atše ndoñe ntjamama ntšamo atšbe juabnoca yomna mo ndegombre soycá, mo chë bacna soyëngaca mandaná cuaftsemncá.

24 ¡Tša lastema atšbiama! Chë bacna soye jamama juabnënga átšbeñe entsemánda, y entsama atše chašotsemna nýetsca tescama castiganá jtsemnama, mo Bëngbe Bëtsabe bominiñe nýetsca tescama obaná cuaftsemncá. ¿Nda nanjobenaye chentšana atše jatsbocama?

25 Nýe Bëngbe Bëtsá endmëna nda yobena atše jatsbocama, Bëngbe Utabná Jesucrístbeyeca. Chábioye chama mochtsatschuanaye. Atšbe ainanoca atše aíñe sëntsejuabná chë ley puerte tšabe soye yomna ca, y jobedésama sëntseboše; pero chë bacna soye jamama átšbeñe yomna juabnëngaca, atše bacna soyënga sëntsama, ntšamo chë juabnënga šontsemnadacá.

## 8

*Ntšamo Bëngbe Bëtsabe Espiritu yomandacá jtsiyenana*

<sup>1</sup> Y chca, Bëngbe Bëtsá ndoñe ntjayanana, Cristo Jesúseftaca cánýiñe mo canýacá imomnënga, chëngbe bacna soyëngama nyetsca tescama castigánënga jtsemnama yojtsamna ca.

<sup>2</sup> Er, chë Uámana Espítoftaca mandánënga mondménayeca, Bëngbe Bëtsá šojatsebacá, bënga chë bacna soye jamama juabnëngaca mandánënga ndëtsemnama, y nyetsca tescama castigánënga ndëtsemnama, mo Bëngbe Bëtsabe bominyiñe nyetsca tescama obanënga cuaftsemncá. Chë Uámana Espiritu jamana bënga ndegombre tšabe vida chamotsebomnama, cánýiñe mo canýacá Cristo Jesúseftaca jtsemnëse.

<sup>3</sup> Bëngbe Bëtsá tojanma ndayá Moisesbe ley ndoñe tonjanobenacá, er entšanga mon-doyena nýe ntšamo cachënga imobošcá, y nýe cánýënga ndoñe ntsoybenana jamana ntšamo tojtsamncá. Bëngbe Bëtsá tojánayana entšángbeñe bacna juabnëngbe mando jtsepochócama ca, y chama chabe Uaquiñá tbojanichmó. Cha quem luaroye mo canýe entšacá tojánabo, canýe ainánaca, mo chë entšanga bacna soye amëngbe ainancá, pero ndocna te ni mo canýe bacna soye ndoñe tonjëftsema; y tojánabo, chábeyeca entšanga bacna soyëngama perdonánënga chamotsemnama.

<sup>4</sup> Bëngbe Bëtsá chca tojanma, bënga chë mora oyenënga jtsamëse ntšamo chë Uámana Espiritu ainaniñe yomandacá y ndoñe nýe ntšamo bënga entšanga tmojtsebošcá, chamobenama tšabá jamana ntšamo chë leyiñe yomandancá, ntšamo šojtsamncá.

<sup>5</sup> Chë nýe cachënga tšabá jtsomñama cachëngbe juabnëngaca imoyenënga, nýe sempre jésejuabnayana bacna soyënga jtsamama, chca bacna juabnëngaca mandánënga; pero ntšamo chë Uámana Espiritu ainaniñe iuamëndacá oyenënga, sempre jésejuabnayana tšabe soyënga jamama, ntšamo chë Uámana Espiritu yobošcá.

<sup>6</sup> Ntšamo chë nýe cachá tšabá jtsomñama juabnëngaca mandaná oyenentšana jóboynana entšá nyetsca tescama castiganá chaotsemnama, mo Bëngbe Bëtsabe bominyiñe nyetsca tescama obaná cuaftsemncá; y ntšamo chë Uámana Espiritu tojtsemandacá oyenentšana jóboynana chë nyetsca tescama yomna tšabe vida jtsebomnama y ainaniñe tšabe ebionana.

<sup>7</sup> Chë nyets tempo oyenënga nýe ntšamo tmojtsebošcá nýe cachënga tšabá jtsomñama jtsejuabnayëse, Bëngbe Bëtsabe uayayënga jtsemnana, er chënga ndoñe ntšamana ntšamo cha tojtsamëndacá, y chca jamama ndoñe ntsoybenana;

<sup>8</sup> y chca, chë nýe chca bacna juabnëngaca oyenënga, ndoñe ntsoybenana jamana ntšamo Bëngbe Bëtsá tšabá tbojtsinýancá.

<sup>9</sup> Pero tšëngaftanga ndoñe quešmátiyena nýe cach tšëngaftanga tšabá jtsomñama cach tšëngaftangbe juabnëngaca, sínó šmojtsiyena ntšamo chë Uámana Espiritu tšëngaftangbe ainaniñe cmamëndacá, er chë Uámana Espiritu sempre tšëngaftangbe ainaniñe iuétsemna. Nda ndoñe quem Cristbe Espiritu tondbomná, ndoñe Cristbia ntsemnana.

<sup>10</sup> Pero Cristo sempre tšëngaftangbe ainanentše vida totsóbomñëse, masque tšëngaftangbe cuerpënga yochjopochóca, quem luarentše entšanga bacna soyënga jtsamana causa, tšëngaftangbe espítoftaca nyets tempo vida echanjesóbomñe, er Bëngbe Bëtsá tojama tšëngaftanga chabe bominyiñe tšábënga chašmotsemnama.

<sup>11</sup> Y Bëngbe Bëtsabe Espiritu, Jesús cháuatayenama tojamabe Espiritu, sempre tšëngaftangbe ainaniñe tojtsemnëse, Bëngbe Bëtsá, chë Cristo cháuatayenama tojamá, echanjama chë tšëngaftangbe yochjóyana cuerpo, cachiñe vida chaotsatsbomnama. Cha chca echanjama chabe Espítoftaca, y mua sempre tšëngaftangbe ainaniñe iuétsemna.

<sup>12</sup> Chcasna, Jesucristbeyeca catšátanga, šontsamna jtsiyenana ntšamo chë Uámana Espiritu ainaniñe šuamëndacá; ndoñe quešnátamna jtsiyenana nýe bënga tšabá jtsomñama cabëngbe bacna juabnëngaca;

13 er nÿe bÿnga tšabá jtsomñama cabÿngbe bacna juabnÿngaca šmojtšiyenÿse, castigánÿnga šmochántsemna, mo Bÿngbe Bÿtsabe bominÿiñe obanÿnga cuaftsemncá; pero Uámana Espírítbeyeca, chca juabnÿngaca nÿetsca bacna soyÿnga jtsamana jtsajbanama šmojobenase, chÿ nÿetsca tescama yomna tšabe vida šmochántsebomna.

14 Ntšamo chÿ Uámana Espírítu yomandacá tmojtsamÿngna, Bÿngbe Bÿtsabe básenga jtsemnana.

15 Er Bÿngbe Bÿtsá ndoñe tonjama bÿnga ainaniñe canÿe espírítu chamotsebomnama, mo nÿe ínÿabíama nÿets tempo oservenÿngcá chašotsamÿndama, y chca cha chaoma bÿnga cachiñe chamotsÿuatjama; sinó chÿ Bÿngbe Bÿtsá tojama bÿnga chamotsebomnama Espírítu jamana bÿnga Bÿngbe Bÿtsabe básenga chamotsemnama, y chÿ Espírítu endama “Atšbe Taitá ca” bÿnga Bÿngbe Bÿtsá chamotsechembuanama.

16 Y chÿ Uámana Espírítu y bÿngbe espírítu canÿe ora jayanana bÿnga Bÿngbe Bÿtsabe básenga imomna ca.

17 Y Bÿngbe Bÿtsabe básenga mondmÿnayeca, bÿngnaca mochanjójyÿngacñe ndayá cha chabe básenga jatšatayama tojašebuachenacá; bÿnga y Cristo cánÿiñe chÿ soyÿnga mochanjójyÿngacñe, er bÿnga inÿe soyÿnguiñe tmojasufrí cachcá ntšamo Cristo tojan-sufricá, Bÿngbe Bÿtsá uámanÿnga y bÿtsÿtsanga chásuabíamama, ntšamo cach Cristo yomncá.

### *Bÿngbe Bÿtsá bÿtsÿtsanga y uámanÿnga šochjábíama*

18 Atše ndegombre sÿndÿtatšÿmbo, ntšamo quem tempo bÿnga imosufrincá, puerte batšatema yomna chÿ bÿngbe tšabíama uámanana y buashinÿinÿanana Bÿngbe Bÿtsá šochjínÿanÿiyama.

19 Lempe ntšamo Bÿngbe Bÿtsá tojamcá endmÿna mo tša cuaftsobatmancá, chaobuache chÿ Bÿngbe Bÿtsá ntšamo chabe básenga imomnama jinÿanÿiyama ora.

20 Er lempe ntšamo Bÿngbe Bÿtsá tojamcá, mora ndoñe yontsoservena ntšamo chaotsemnama cha tojanjuabocá. Chca tojanopasá, ndoñe chÿ lempe ntšamo cha tojanmcá chca chaotsemnama tojánbošenayeca, ndayá cabá chÿ soyÿnga tojanmentšana, Adán bacna soye tojanmentšana, Bÿngbe Bÿtsá tojanjuabó ntšamo cha tojanmcá joserviama ndoñe ndayama ntšamo cha tempo tojanjuabocá. Pero lempe ntšamo Bÿngbe Bÿtsá tojanmcá entsemna mo cuaftsobatmancá canÿe te, ndÿmua ora chÿ soyÿnga chaoservema cha yochjamama jtsetatšÿmbÿse, ntšamo quem luare jobojátšama ora chama cha yojanjuabnacá;

21 Bÿngbe Bÿtsá canÿe te yochjama lempe ya ndoñe más chaondetsopochocama. Y chora, ntšamo Bÿngbe Bÿtsá yochjamcá chabe básenga chamotsemnama, lempe ntšamo cha yojanjuabnacá, chabe uámanana y buashinÿinÿanana jtsebomnama, cachcá yochjama lempe chÿ cha tojanma soyÿngaca.

22 Er bÿnga mondÿtatšÿmbo lempe ntšamo Bÿngbe Bÿtsá tojanmcá mÿntscoñama yomna mo canÿe shembása šešona jtsebomnama ora tbojtsetsetšama tojtsobÿsnacá; er lempe ntšamo cha tojanmcá entsemna mo tša cuaftsebošcá Bÿngbe Bÿtsá chaomama, chÿ soyÿnga chaoservema ndayama cha tempo tojanjuabocá.

23 Pero ndoñe nÿe chÿ lempe ntšamo Bÿngbe Bÿtsá tojanmcá yojtsemna mo chÿ shembasacá, sinó bÿngnaca; y bÿnga ainaniñe mondbomna chÿ Uámana Espírítu, y chÿ soye endmÿna ndayá natsana bÿnga tmojanójyÿngacñe, chÿ Bÿngbe Bÿtsá bÿtscá soyÿnga šochjátšatayentšana; bÿnga bÿngbe ainanoca tša jesobÿsnayana, bÿnga chabe básenga chamotsemnama Bÿngbe Bÿtsá chaomama mondobátmanÿntscuana, y chca, Bÿngbe Bÿtsá chaoma bÿnga ndocna te ndopochócama cuerpÿnga chamotsebomnama.

24 Bÿnga, Bÿngbe Bÿtsábeñe jtsošbuáchiyÿse monjobátmana ntšamo cha tojanayancá chaomama, y chíyeca cha bÿnga šojatsebacá; pero ndayama tmobatmancá, ya to-

jtsëchnëjuanama bënga tmojtsonyase, chora chama ya ndoñe ntjätobatmanëngana. Er ndocná jatobátmanana chë ndayá jinÿama ya tojobenacá.

<sup>25</sup> Pero ndayama bënga tmobatmancá, cabá ndoñe jinÿama tmontsobena soye tojtsemnëse, bënga jtsamnana Bëngbe Bëtsábeñe jtsobátmanana, uantadënga jtsemnëse, ntšamo tojayancá Bëngbe Bëtsá chaomëntscuana.

<sup>26</sup> Uámana Espíritnaca bënga šochandbëtsëjabuachana, er bënga ainaniñe ndoñe corente ntsošbuáchiyana. Bënga ndoñe quemuátstatsëmbo Bëngbe Bëtsáftaca jencuéntana ntšamo ndegombre tšabá yomncá; pero cach Espíritu Bëngbe Bëtsábioye bëngbiana jtsotjanañana, mo chca ora chabe ainanoca tša cuaftsobësnacá; y ndayá chca ora tbojtsotjanañamna, bënga ndoñe ntjobenayana bëngbe palábraca chama jóyebuambayama.

<sup>27</sup> Y Bëngbe Bëtsana, ntšamo entšanga ainanoca tmojtsebošcá yonÿá, y ntšamo chë Espíritu jayanama tojtsebošcá yotátsëmbo, er chë Espíritu chabe entšangbiana ibotjanañe, ntšamo Bëngbe Bëtsá yobošcá.

### *Bënga ayënjanayëngama más tmojábocana*

<sup>28</sup> Y bënga mondëtatšëmbo, Bëngbe Bëtsá nÿetsca soyënguiñe inétsama cha imobobonshánëngbe tšabiana, ndëmuanÿenga cha tojáchembo chabe entšanga chamotsemnana, ntšamo cha jamama yojanjuabnacá.

<sup>29</sup> Jesucrístbeñe imošbuachëngbiamna, Bëngbe Bëtsá quem luare tojanma orscana yojanjuabná y chënga tojanabacacá chca chamotsemnana, y chë tempscana tojaninÿnaná chënga chabe Uaquiñacá chamotsemnana; chca, chabe Uaquiñá chë bëtscá catšátangbeñe chë natsaná chaotsemnana.

<sup>30</sup> Y chë Bëngbe Bëtsá chca tojánabacacangnaca, tojánachembo chabe entšanga chamotsemnana; chëngbiana tojanma chabe bominiñe tšábenga chamotsemnana, y chëngbiámncaca yochjama chabe uámanana y obenanentšana chamotsebonnana.

<sup>31</sup> Y asna, ¿chë soyëngama ntšamo mochjayana? Co Bëngbe Bëtsá bëngaftaca tojtsemnëse, bënga jáyënjanama ndocná queochatobenaye ca.

<sup>32</sup> Cha tondaye tonjanma chabe Uaquiñá jasúfriama ndoñe chabondëtsemnana, sinó tojanalesenciá entšanga chamóba, nÿetsca bëngbe tšabiana. Bëngbe Bëtsá chabe Uaquiñáftaca chca tojanmëse, ndegombre Bëngbe Bëtsá lempe šochanjátšataye.

<sup>33</sup> ¿Nda nanjobenaye jayanama chë Bëngbe Bëtsá tojábacacanga bacna soyënga tmojama y castigánënga chamotsemna ca? Ndocná; er cach Bëngbe Bëtsá endmëna nda tojayana bënga chabe bominiñe tšábenga imomna ca.

<sup>34</sup> Y asna, ¿nda nanjobenaye jayanama bënga castigánënga jtsemnana šojtsamna ca? ¿Cristo Jesús cha yojtsemna? Ndoñe. Cristo, nda bëngbiana tojanóbana, pero cabá más, ndabiana Bëngbe Bëtsá tojanma cháuatayenama, y mora Bëngbe Bëtsabe catšbioica yojtsetbemana, jamándama y puerte bëtsá chentše jtsemnana; y choca, chánaca bëngbiana Bëngbe Bëtsábioye ibotjanañe.

<sup>35</sup> ¿Ndayá nanjobenaye Crístbentšana, chë tša šondababuanÿeshanábentšana bënga jtsajuánayana? ¿Padecena soyënguiñe jtsemnana, tša jtsetsetšana, bënga chamosufrima ínÿenga tmojtsama ora, tondaye saná shëntsana ora, tondaye entšayá tmontsábomna ora, o resjo bëngbiana tojtsemna ora, o bënga jtsëbáyama ínÿenga tmojtseboše ora?

<sup>36</sup> Ntšamo Bëngbe Bëtsabe uabemana palabrënguiñe endayancá, canÿe entšá Bëngbe Bëtsábioye ibojauyana ora:

Acbe causa entšanga cada te šontsëtsësná bënga jtsëbáyama ca;

entšanga bëngbioye nÿe ntšámncaca jtsaborlánana;

bëngaftaca jamana mo chë jobáyama oveshëngaftaca mondbetsamcá ca.

<sup>37</sup> Pero ndoñe; nÿetsca chë soyënguentšana bëngna ayënjanayëngama más tmonjábocana, cha bënga šuababuánÿeshanayeca.

<sup>38</sup> Er atše tšabá sëndétatsëmbo tondaye yondobena, bënga Bëngbe Bëtsábentšana, chë tša šondababuanÿeshanábentšana jtsajuánayana: masque ainënga o obanënga tmojtsemna; ni angelënga, ni amëndayënga chca jamama quemátobena; ni chë mora yojtsëchnëjuana soyënga, ni chë más chcoye yochjopása soyënga; ni ndocna obenana cach ndoñe;

<sup>39</sup> ndocna quem luarentša tsbanánoca soye, ni quem luarentša tajsoica soye; ni ndocna inÿe soye ntšamo Bëngbe Bëtsá tojamcá, quenátobena chca bënga jtsajuánayama. ¡Ndocna soye quenátobena bënga Bëngbe Bëtsábentšana, chë bënga šondababuanÿeshanábentšana jtsajuánayana, chë Cristo Jesús Bëngbe Utabnáftaca Bëngbe Bëtsá šojanÿanÿé bonshánentšana!

## 9

### *Bëngbe Bëtsá Israeloca entšanga tojabacacá, uámanënga chamotsemnama*

<sup>1</sup> Atše, Crísoftaca cánÿiñe mo canÿacá quetsomñecana, ntšamo sentsichamcá ndegombre endmëna; atše ndoñe quetsátsbostero. Atšbe ainanoca juabnënga, Uámana Espíritbeyeca jtsemandánëse, chë šmonybëuyana tšabá o ndoñe tšabá tijamama, šmontsatsëtsná atše ndoñe stsebosterama.

<sup>2</sup> Ndegombre, atše puerte ngménaca atšbe entšangbiamá, chë Israeloquëngbiamá sëntsemna y atšbe ainana tša šontsetsetše, chënga Jesucristbeñe jtsošbuáchiyama ndoñe quemátsboše causa.

<sup>3</sup> Tšabá tojtsemnëse, atše stjobenaye jtsebošana cach atše Bëngbe Bëtsábeyeca nÿetsca tescama castiganá y Crístbentšana luaroca jtsemmama, atšbe entšanga, chë cach atšcá buiñe bomna entšanga jujabuáchama.

<sup>4</sup> Chënga mondmëna chë Israeloca entšanga, chë Bëngbe Bëtsabe bocacana entšanga. Bëngbe Bëtsá chënga chabe basengcá tojánabiamá y chë tša bëtsá y uamaná cha yomnama chënga tojaninÿanÿé. Bëngbe Bëtsá ba soye chënga tojanabuayená ndayá cha chëngbiamá yojánboše y ndayá chëngbiamá jamama, y chë ley chëngbe cucuatšíñe tojanáboshjona. Chënga monjántatsëmbo ntšamo Bëngbe Bëtsábioye ndegombre jadórana, y chënga mondbomna chë Bëngbe Bëtsabe šbuachenánana: chënga cha játsebacana.

<sup>5</sup> Chënga mondmëna chë bëngbe tempsca uámana bëts taitangbentšánënga, y Crístnaca mo canÿe entšacá, mo canÿe Israeloca entšangbentšacá tojánabo; y cha endmëna Bëngbe Bëtsá, nÿetsca soyënguiñe mandayá. Nÿetsca entšanga nÿets tempo cha chamot-satschuaná. Chca chaotsemna.

<sup>6</sup> Atše ndoñe quetsátichamo, ndayá jamama tojanašebuachenacá ndoñe Bëngbe Bëtsá tonjama ca; er, nÿetsca Israeloca entšangbentšënga ndoñe Bëngbe Bëtsabe ndegombre entšanga quemátsmëna.

<sup>7</sup> Ni nÿetsca Abrahámbentšana entšanga, ndoñe chabe ndegombre básenga quemátsmëna; er Bëngbe Bëtsá Abrahámbioye tbojanianá: “Chë ácbentšana entšanga nÿe Isaácbentšana mochanjabo ca.”

<sup>8</sup> Chca entsayana, bëngna ndoñe šontsamna jtsejuabnayana Abrahámbentšana nÿetsca entšangbiamá mo Bëngbe Bëtsabe basengcá; inÿetšá, nÿe chë Bëngbe Bëtsá tbojanšbuachenáyeca Abraham yojánabamna básengbiamá cocayé entsemna jtsejuabnayana, Abrahámbentšana ndegombre entšanga bëtsemnama.

<sup>9</sup> Er mëntšá endmëna ntšamo Bëngbe Bëtsá tojánayana, Abrahámbioye tbojanšbuachená ora: “Camëntšá tempo entsba uata chanjésabo, y Sara canÿe šešona bochántsebmoma ca.”

<sup>10</sup> Pero nÿe nÿetšá ndoñe quenátsmëna. Chë Rebecbe uta básatna canÿe taitá ibnabomna, bëngbe tempsca bëts taitá Isaac.

<sup>11-12</sup> Bëngbe Bëtsá, Rebécbioye tbojanianá: “Acbe mayor uaquiñá, acbe ngomënche uaquiñábioye bochanjasérvia ca.” Cha chca tojánayana jinÿinÿiyama chë básatbentšana canÿa cha tbojánbocacama, Jacob, y ndoñe chë inÿe basa, Esaú, chca jamama tempo

cha tojanjuabóyeca. Rebécbioye chca tbojanियana chë básata cabá ndonýna ora, y ni canýe basa cabá ndocna soye ndama ora. Y chca, ntšamo tojanopasacana, tojanopasá chë básatbentshana canýa y ndoñe chë inýa chca chaotsemnama Bëngbe Bëtsá tbojanábuayanayeca, y ndoñe ndayá chata tbojanmama.

<sup>13</sup> Ntšamo Bëngbe Bëtsá chabe uabemana palabrenguiñe tojanayancá: “Jacob sënjanbobonshana, y Esau sënjanáboyënja ca.”

<sup>14</sup> Y asna, ¿ntšamo mochjayana? ¿Bëngbe Bëtsá ndoñe cachcá nyetscángaftaca endétsemna ca? ¡Ndoñe, ndegombre ndoñe!

<sup>15</sup> Er Bëngbe Bëtsá Moisésbioye tbojanियana: Atše šochanjóngmia nda chaitsebošabiamama, y nda chaitsebošá chanjalastéma ca.

<sup>16</sup> Y chca, Bëngbe Bëtsá canýe entsá jabocacayana, ndoñe ndayá chë entsá tojtsebošama o tojamama, ndayá Bëngbe Bëtsá tbojalastemama.

<sup>17</sup> Er Bëngbe Bëtsabe uabemana palabrenguiñe, Faraón chë Egiptoca réybioye cha tbojanियana: “Atše rey tcbonjábema, tša bëtscá atšbe obenana yomnana nyetscanga áceñe chayinýañyema, y nyets luarentša entsanga atšbiamama chamotatšëmbonama ca.”

<sup>18</sup> Y chca, Bëngbe Bëtsá jalastémama nda tojtsebošábioye, y nda tojtsebošábioye jalesénciana chabiamama nduauenaná chaotsomñama.

<sup>19</sup> Pero ndánaca tšëngaftanguentšá suatjatjaye: “Bëngbe Bëtsá chca tojtsamése, ¿ntšamo cha nantsobena jayanana canýe entsá bacna soye tojama ca? ¿Nda nanjobenaye chë ndayá Bëngbe Bëtsá tojtsebošama corente contra jtsemnana?”

<sup>20</sup> Pero, nye entsá quecotsemñeca, ¿ntšamo catjobenaye tša uamaná comna ca jtsejuabnayana, Bëngbe Bëtsá jatstjanayama ndáyeca canýe soye chca yojtsama ca? ¿Chë pormana soye chë chca tojamábioye buanjauyana: “¿ndáyeca chca šcojama ca?”

<sup>21</sup> Chë fshantse soyënga pormayá jtsoobenana canýe fshantsentshana jamana, canýe matbaja uámana tescama, y inýajna cada te chaotsoservénama. Cachcá, Bëngbe Bëtsá jtsoobenana jamana ntšamo cha tojtsebošcá, ndayá cha tojama sóyeca.

<sup>22</sup> Bëngbe Bëtsá yojáboše jinýañiyama entsángaftaca tbojánetnama, chëngbe bacna soyëngama; y yojáboše cha puerte obená yomnana jinýañiyama. Chíyeca, chënga tša yojanëuantana, chënga chë ndëmuanýengbiamama Bëngbe Bëtsá yochjánayana chëngbe bacna soyëngama castigánënga jtsemnana yojánamna ca, chë ndëmuanýënga jtšapochócama Bëngbe Bëtsá yojtsanprontana.

<sup>23</sup> Y chánaca yojáboše jinýañiyama cha puerte uamaná y bëtscá yomnana. Cha tojama, bënga chë ndëmuanýënga cha šojanalastemá, chabe obenanentshana y uámananentshana chamotsebomnana; y cha tempo chca tojanjuabó bënga uámanënga y bëtscásanga jábiamama.

<sup>24</sup> Bënga mondmëna chë ndëmuanýënga Bëngbe Bëtsá chama šojánachembo, inýengna judío entsanguentšana, y inýengna ndoñe judiëngbentshana.

<sup>25</sup> Ntšamo chabe uabemana palabrenguiñe, Oséasbe librëšañe Bëngbe Bëtsá tojanayancá:

Entsanga ndoñe átšbënga mondmënënga, chënga “atšbe entsanga ca” chantsëbobuatma; y canýe luarentša entsanga ndoñe sënjanababuanýëshanënga, chëngna “atšbe bonshánënga ca” chantsëbobuatma.

<sup>26</sup> Y cach luare ndayentše Bëngbe Bëtsá tojánayana: “Tšëngaftanga atšbe entsanga ndoñe quešmátsmëna ca”,

cachentše Bëngbe Bëtsá ainá chënga echanjáuyana “atšbe básënga ca”.

<sup>27</sup> Israeloca entsangbiamama, Isaías jabuachana tojánayana:

Masque Israeloca entsanga puerte banga chamotsemna, nýa mo chë mar béjayoca chënyañe cascajca,

Bëngbe Bëtsá nye báseftanga chentshana echanjátsebacaye;



<sup>28</sup> er, ndoñe bën y Bëngbe Utabná canye y nyetsca tescama echanjayana, nyets quem luarentsa entsangbiana ndayá chënga tmojamama tsabá o ndoñe tsabá bétsemnama,

y chëngaftaca echanjama ntšamo chaojayancá ca —cha tojánayana.

<sup>29</sup> Ntšamo Isaías tojanayancá, Bëngbe Bëtsá Israeloca entsángaftaca ntšamo jamama tojanoyebuambá ora:

Bëngbe Utabná, nyets obenana bomná,

ínyënga bënga jtsapochócama cha tojanalesenciá ora,

báseftanga bëngbe entsanguentsënga ainënga chamotsomñama ndoñe matënjanmëse,

bënga mora pochocánënga mamojtsemna, mo chë Sodoma y Gomorra pueblëngoca entsangcá ca,

cha nyetscanga y nyetsca tescama tojtsanapochócaye ca.

### *Israeloca entsanga y chë tsabe noticiënga*

<sup>30</sup> Chcasna, mora mëntsá mochjayana: ndoñe judiënga tondaye monjánama Bëngbe Bëtsabe bominyiñe tsábenga jtsemnama, pero cha tojanma chënga chabe bominyiñe tsábenga chamotsemnama, chënga chábeñe imojtsošbuáchiyama.

<sup>31</sup> Pero, Israeloca entsanga imojánboše Bëngbe Bëtsabe bominyiñe tsábenga jtsemnama, ntšamo chë leyiñe iuayancá jtsamëse; pero ndoñe chca tmonjanobená.

<sup>32</sup> ¿Y ndáyeca chca? Co chë Bëngbe Bëtsabe bominyiñe tsábenga jtsemnama, chábeñe jtsošbuáchiyëse, chënga tondaye monjánama causa chca, sinó chca jtsemnama imojánboše nye ntšamo leyiñe iuayancá jtsamëse. Y chca, chëngna Jesús tmojtsanaboté, ntšamo chë Bëngbe Bëtsabe uabemana palabrenguiñe chë tmojtsanábotengbiana endayancá, chëngbiana cha yomna mo chë ndëtsbé ndayiñe chënga jtsojestjiamcá ca.

<sup>33</sup> Bëngbe Bëtsabe uabemana palabrenguiñe cha chca tojánayana:

Smochjinye, atše sënjama Jerusalenentše canya chaotsemna, y cha endmëna mo ndëtsbecá ndayentše chënga mochjojestje,

y canye peñëscá ndayëse yochjama chënga chamotsótsatsama;

pero nda chábeñe tojtsošbuaché, ndocna te nye bonamente queochátobatmana ca.

## 10

<sup>1</sup> Jesucristbeyeca catsátanga, atše nyets ainánaca sëntseboše y Bëngbe Bëtsá sëntseimpadana, cha Israeloca entsanga cháuatsebacama.

<sup>2</sup> Atše sëndétatšëmbo y sëntsobena chëngbiana jayanama, chënga puerte mondboše Bëngbe Bëtsá jaserviama, pero ntšamo chënga yojtsësertancá, ntšamo Bëngbe Bëtsá jaserviama yojtsamnamna, ndoñe quenátsmëna ntšamo ndegombre yomncá.

<sup>3</sup> Chënga ndoñe tonjanësertá ntšamo Bëngbe Bëtsá inétsama entsanga chabe bominyiñe tsábenga chamotsemnama, y cachënga tmojúanguango ntšamo jamëse jobenayama Bëngbe Bëtsabe bominyiñe tsábenga jtsemnama; pero ndoñe chca tmonjanobená, chë entsanga chabe bominyiñe tsábenga chamotsemnama ntšamo Bëngbe Bëtsá inetsamcá ainánaca ntjoyëngacñëcá.

<sup>4</sup> Er Cristo tojama entsanga ndoñe chamondétsama ntšamo leyiñe iuayancá, Bëngbe Bëtsabe bominyiñe tsábenga jtsemnama, chca, chënga chamobenama chabe bominyiñe tsábenga jtsemnama, Cristbeñe jtsošbuáchiyëse.

<sup>5</sup> Chë Bëngbe Bëtsabe bominyiñe tsábenga jtsemnama bošëngbiana, ntšamo leyiñe iuayancá jtsamëse, Moisés mëntsá tojánayana, chëngbiana tojanábema ora: “Nda tojtsama nyetsca mandënga ntšamo leyënguiñe endayancá, tsabe vida echántsebomna, nyets tempo chë leyëngaca mandaná ca.”

<sup>6</sup> Měntšá endmēna ntšamo Běngbe Bětsabe uabemana palabrěnguiñe iuayana, entšanga chabe bominyiñe tšábenga chamotsemnana ntšamo cha inétsamama, Jesucristbeñe jtsošbuáchiyēse: “Ndoñe cattsetjanaye: ‘¿Nda celoye yochjátsjua ca?’ (chca endmēna ndayá Cristo quem luaroye chaotsmama);

<sup>7</sup> o, ‘¿Chě obanēnga imomna luaroye yochjátsma ca?’ (chca endmēna ndayá Cristo chě obanēnga imomna luarentšana chaotsjuama).”

<sup>8</sup> Ntšamo Běngbe Bětsabe uabemana palabrěnguiñe iuayancá mēntšá endmēna: “Tšěngaftanga paselo šmontsobena ntšamo Běngbe Bětsá tojabuayenacá jouenama, tšěngaftanga ya chama palabrěngaca šmojoyebuambá y tšěngaftangbe ainaniñe chama šmojtsejuabná.” Chě buayenánana endmēna ndayá bēnga ftsabuayiynacá, y chiñe endayana Jesucristbeñe jtsošbuáchiyama šojtsamna ca.

<sup>9</sup> Chě buayenana soyěnguiñe endayana, Jesús ndegombre Běngbe Utabná yomna ca aca tcojayanēse, y Jesucristo cháuatayenama Běngbe Bětsá tojanmama, nyets ainánaca tcojtsošbuáchese, Běngbe Bětsá cmochjatsbocá ca.

<sup>10</sup> Er ainanoca bēnga Jesucristbeñe jtsošbuáchiyana y Běngbe Bětsá jamana cachabe bominyiñe tšábenga chamotsemnana; palabrěngaca bēnga jinjanyiyana ndegombre Jesucristbeñe imojtsošbuáchema, y Běngbe Bětsá bēnga játsebacana.

<sup>11</sup> Er Běngbe Bětsabe uabemana palabrěnguiñe mēntšá endayana: “Nda Běngbe Bětsábeñe tojtsošbuaché, ndocna te nyē bonamente queochátobatmana ca.”

<sup>12</sup> Judiēnga y ndoñe judiēnga atsebácanēnga mondmēna cach sóyeca, er canjē Utabná nyetscangbe Utabná endmēna, y cha tmojtsotšěmbuaněngbiama, cha bětscá jtsamana.

<sup>13</sup> Er Běngbe Bětsabe uabemana palabrěnguiñe mēntšá endayana: “Ndánaca Běngbe Utabná tbojtsotšěmbuanábioye, cha bochanjatsbocá ca.”

<sup>14</sup> Pero, ¿ntšamo cha mochjótšěmbona, chábeñe ndoñe tmontsošbuáchese? ¿Y ntšamo chábeñe mochtsošbuáchiye, chabiama jóyebuambayama ndoñe tmonjouenēse? ¿Y ntšamo chabiama mochjouena, chabe buayenana soyēnga chēnga jáuyanama ndocná tontsemnēse?

<sup>15</sup> ¿Y ntšamo chabe buayenánana mochtsabuátambaye, chěngbioye jíchamuama ndocná tontsemnēse? Ntšamo Běngbe Bětsabe uabemana palabrěnguiñe endayancá: “¡Tša tšabá chě buayenánana abuátambayēnga tmojášhjajna ora ca!”

<sup>16</sup> Pero nyetscanga chě tšabe noticiēnga ndoñe ntjoyeunayana. Cach Isaías mēntšá tojánayana: “Utabná, ¿nda chě mondabuayiyná soyěnguiñe yojtsošbuaché ca?”

<sup>17</sup> Chcasna, chě tšabe noticiēnga jouenēse, entšanga jobenayana Jesucristbeñe jtsošbuáchiyana; y nda Cristbiama tojtsabuayiynase, entšanga chabe buayenánana jouenana.

<sup>18</sup> Pero atše šcotjá: ¿ndegombre nandmēna judiēnga chě buayenánana ndoñe tmonjanuena ca? ¡Aíñe, chēnga aíñe tmonjanuena! Ntšamo Běngbe Bětsabe uabemana palabrěnguiñe endayancá, chě Běngbe Bětsabe buayenana soyēngama oyebuambnayěngbiama:

Chěngbe oyebuambnayana nyets quem luariñe tojóshjango,

y chěngbe palabrēnga nyets luarěnguentša entšangbenache tojuášhana ca.

<sup>19</sup> Pero cachiñe šcotjá: ¿Israeloca entšanga chě buayenánana ndoñe tonjanēsertá ca? Natsana, Moisés mēntšá tojánayana, chě ndoñe judiēnga Jesucristbeñe tmojtsošbuaché ora, ntšamo chě judiēnga mochtsanjuabnayama tojanoyebuambá ora:

Atše, Běngbe Bětsá, chanjama, ndayá chě ndoñe judiēnga chamojashjache soyēngama tšěngaftanga chašmotsiyentsbuašama, chēnga chě ndoñe monjamna mo tšěngaftangcá atšbe entšanga.

Atše chca chanjama chěngaftaca, chēnga chě tempo Běngbe Bětsabe soyēngama ndoñe tonjanēsertá ca.

<sup>20</sup> Isaíasnaca, Běngbe Bětsabiama tojanoyebuambá ora, puerte añémoca tojánayana:

Chë atše ndoñe šmondënguanga, šmonjínÿena;  
y chë atšbiana ndoñe mondënotíciangbioye sënjenonÿinÿé ca.

<sup>21</sup> Pero Israeloca entsangbiana mëntšá tojánayana:

Nÿets tempo atše tša sënjánama, chënga átšeftaca tšabá tempcá chamotsatsmënama,  
pero chënga ndoñe chemátanbošena jouenama, y atšbe contra monjëtsemna ca.

## 11

### *Bëngbe Bëtsá, Israeloca entsangbiana tšabe juabna yobomnama tojinÿanÿé*

<sup>1</sup> Y as mora šcotjá: ¿Bëngbe Bëtsá chabe entsanga tojtsanëbaté? ¡Ndoñe, ndegombre ndoñe! Cach atše canÿe Israelocá sëndmëna, Abrahámbentsana entsá y Benjaminbe bëts pamillentšana entsá.

<sup>2</sup> Bëngbe Bëtsá chabe entsanga ndoñe tonjubaté, chë tempšana tojánabacacanga. Tšëngaftanga šmondëtatšëmbo ntšamo Bëngbe Bëtsabe uabemana palabrënguiñe endayancá, Bëngbe Bëtsabe juabna oyebuambnayá Elías, Israeloca entsangbe contra Bëngbe Bëtsábioye cha ibojanatsëtsná ora:

<sup>3</sup> “Bëngbe Utabná, acbe juabna oyebuambnayënga tmojtsëbaye y acbiana pormana altarënga tmojtsepochochá; nÿe atše vídaca tijoquedá, y chënga montseboše átšnaca jóbama ca.”

<sup>4</sup> Y mëntšá Bëngbe Bëtsá tbojanjuá: “Atše canÿsëfta uaranga boyabásenga atšbiana sënjacuedá, Baal ndoñe tmonjadoranga, ndayá entsanga tmojobopormá y imojtsejuabná canÿe dios yomna ca.”

<sup>5</sup> Mórna ca cachcá entsemna, judiënguentše báseftanga monduájamna Jesucristbeñe ošbuáchiyënga, ndëmuanÿenga Bëngbe Bëtsá tojabacacá, cha chëngbiana tšabe juabna bómnyeca.

<sup>6</sup> Bëngbe Bëtsá entsanga jabacacayana chëngbiana tšabe juabna bómnyeca; y ndoñe chca ntjamana ndayá entsanga tmojamama. Er ndayá tmojamama Bëngbe Bëtsá entsanga tojabacacase, cha nanjínÿanÿiye cha chca inétsama, ndoñe nÿe chëngbiana tšabe juabna bómnyeca.

<sup>7</sup> ¿Y asna? Israeloca entsanga ndoñe chemátaninÿena ntšamo Bëngbe Bëtsabe bom-inÿiñe tšábenga jtsemnana, pero chënguentšënga básefta bocacánëngna aíñe tmojanobená. Bëngbe Bëtsá tojanalesenciá chë ínÿenga Israeloquënguentšana chabe buayenana soyënga ainaniñe ndoñe chamondóyëngacñama;

<sup>8</sup> ntšamo Bëngbe Bëtsabe uabemana palabrënguiñe endayancá: “Bëngbe Bëtsá tojama chënga chabe soyëngama jósertama ndoñe chamondëtsobenama, y mëntscoñama chënga ndoñe quemátobena chabe soyëngama ni jinÿana ni josértana, mo nduabínÿnënga o nduauenanënga cuaftsemnëngcá ca.”

<sup>9</sup> Davídnaca chëngbiana mëntšá tojánayana:

Mo chë entsanga canÿe fiestentše oboyejuayënga, chëngbe uayayëngbeyeca nÿe ndeolpe ishëchenëngcá,

y mo chë bayëngbiana uachmaniñe ishëchenëngcá, chënga mal chamopasama chao-mama Bëngbe Bëtsá sëntseimpadana, mo nda ndëtsbeñe cuaftsojestjácá.

Chca Bëngbe Bëtsá chaoma, chëngbe bacna soyëngama;

y cha cháuyana chënga puerte castigánënga jtsemnana yojtsamna ca, bacna soyënga tmojama causa;

<sup>10</sup> Bëngbe Bëtsá chaoma ntšamo mochjapásama chënga ndoñe chamondobená jtsetatšëmbuana,

y chaoma puerte chamosufrima, nÿets tempo padecena soyënguiñe jtsiyenëse ca —cha tojánayana.

### *Bëngbe Bëtsá ndoñe judiënga tojatsebacá*

11 As mora šcotjá: ¿Israeloca entšanga Běngbe Bětsá ndoñe tmonjanoyeuná ora, cha tojánayana chěnga nýetsca tescama castigáněnga jtsemnana yojtsamna ca, ndocna inye soye chěngbiamá ntsemncá? ¿Chěngbiamá yojamna mo chě ndětsbeñe jójěstjiana y jtětsbanama ndoñe más ntjobenayancá? ¡Ndoñe, ndegombre ndoñe! Chca ndoñe quenátsmēna. Chěnga Běngbe Bětsá ndoñe chematanoyeuná causa, ndoñe judiěnga tmonjántatsěmbona ndayá bětsemnana Běngbe Bětsábeyeca atsbocaná jtsemnana; y chě causa, mora, judiěnga, ndayá chě ndoñe judiěnga Běngbe Bětsábentšana tmojoshachiñcá montsiyentšbuaše.

12 Judiěnga bacna soyěnga tmojanma causa, inye entšanga quem luarentše tmojobená ba tšabe soyěnga jtsebomnama. Chě judiěnga tmonjanorrebaá causa, chě ndoñe judiěnga ba tšabe bendicioněnga Běngbe Bětsábentšana tmojoshachiñe. Y chca, chě bětscá judiěnga Běngbe Bětsá játsebacama, chěnga atsebácaněnga chamojtsemna ora, más bětscá tšabe bendicioněnga Běngbe Bětsábentšana nýetsca entšangbiamá echántsemna.

13 Ntšamo mora chanjayancá, tšěngaftanga ndoñe judiěngbiamá entsemna. Běngbe Bětsá šojichmó chabe soyěngama chě ndoñe judiěnga jábuayenama; atše sěntsejuabná puerte uámana trabajo stsebomna ca.

14 Atše sěntsobátmana, quem trabájoca atše jobenayana jamama chě cach atšcá buiñe bomna entšanguentšěnga, ndayá chě ndoñe judiěnga Běngbe Bětsábentšana tmojoshachiñcá chamotsiyentšbuaše, y chca, ndayá tijamama, Běngbe Bětsá chěnguentšana báseftanga cháuatsebacama.

15 Er chě judiěnga Běngbe Bětsá tojtsaněbaté ora, cha tojanma inye entšanga quem luarentše cháftaca tempcá tšabá chamotsatsmēnama; y chěnga cha chamojoyeuná ora, corente tšabá echántsemna, nýa chěnga mo obaněnga cuabmēncá y cuaftsatayaněngcá.

16 Nda canye arninýentšana chě natsana tanděše Běngbe Bětsabiamá joserviama yojtsemna ca tojayaněse, jtsemnana mo nýetsana chabiamá cuaftsemncá. Canye betiyentša tbětějěnga Běngbe Bětsabiamá yojtsemna ca canya tojayaněse, nýetsca chě betiyentša buacuafjěngnaca Běngbe Bětsabiamá jtsemnana.

17 Chě judiěnguentše báseftanga Jesucristbeñe ndoñe montsanošbuaché ora, tšěngaftanga chě ndoñe judiěnga šmonjanobená chábeñe jtsošbuáchiyana. Y chca, judiěnga monjamna mo canye jena olivo betiyentšana entšanga tmojatětse buacuafjěngcá, y tšěngaftangna mo tjoca olivo betiyentša buacuafjěnga, chě jena olivo betiyeshiñe jeněfjěngcá. Mora tšěngaftanga Běngbe Bětsábentšana cachca tšabe soyěnga chě judiěngaftaca šmontsebomna, mo chě jena buacuafjěnga y cachentša buacuafjěnga cach tbětějěntšana lempe cuaftsoyěngacañcá.

18 Ndoñe šmattsenábotamnaye, tšěngaftanga Běngbe Bětsabe tšabe soyěnga šmojtsebomnama, chě Jesucristbeñe ndoñe montsanošbuaché judiěngbiamá yojamna soyěnga. Smochtsejuabnaye, buacuafjěngna chě tbětějěngayeca vida jtsebomnana, y ndoñe tbětějěnga chě buacuafjěngayeca; cachcá, tšěngaftanga nýe Běngbe Bětsábeyeca chě tšabe soyěnga šmojtsebomna.

19 Pero tšěngaftanga šmuatjayana: “Aíñe, pero Běngbe Bětsá básefta judiěnga tojaněbaté, Jesucristbeñe ndoñe montsanošbuaché causa; chíyeca běnga fsěnjánobená mo buacuafjěnga betiyiñe jeněfjěngcá chca tšabe bendicioněnga Běngbe Bětsábentšana jójěngacñana ca.”

20 Ndegombre, chěnga Jesucristbeñe ndoñe montsanošbuaché causa, mo buacuetěšeněfjěngcá tmonjanoquedá, pero Jesucristbeñe šmojtsošbuáchema, tšěngaftanga šmojoquedá Běngbe Bětsábentšana tšabe bendicioněnga jtsoyěngacañcá. Chcasna, chama ndoñe šmattsenábotamnaye; más tšabana cuedado jtsebomnana.

21 Er Běngbe Bětsá, chě Jesucristbeñe ndoñe montsanošbuaché judiěnga, ndoñe tonjanaperdoná, y chěnga chabe entšanga bětsemnamna, monjamna mo cach betiyentša

buacuafjēngcá; tšēngaftanga, chē mo betiyiñe jena buacuafjēngcá šmomnēnga, cha cach ndoñe quecmochátaperdonaye, chábeñe ošbuáchiyana šmojtsajbanase.

<sup>22</sup> Bětscá šmochtsejuabnaye Bēngbe Bětsá puerte tšabia yomnama, pero cha tšatjayá yomnámna šmochtsejuabnaye; tšatjayá endmēna chē bacna soyēnga tmojtsamēngaftaca, pero tšēngaftangaftacna puerte tšabia. Cha tšēngaftangaftaca chca echántsemna, tšēngaftanga chca chašmojtsomerecēnēntscuana; pero ndoñesna, Bēngbe Bětsá echanjama tšēngaftángnaca mo buacuetētšēnjēngcá chašmoquedama, chē tšabe bendicionēnga Bēngbe Bětsábentšana ntsoyēngacañcá.

<sup>23</sup> Y ntšamo mora imojtsejuabnacá chē judiēnga tmojatrocá y tmojontšé Jesucristbeñe jtsošbuáchiyana, chēngnaca cachiñe chē tšabe bendicionēnga Bēngbe Bětsábentšana mochanjójyēngacñe, y mochántsemna mo betiyiñe jena buacuafjēngcá, er Bēngbe Bětsá becá obenana endbomna jamama ntšamo chē judiēnga tempo imojanbomncá cachiñe chamotsatsbomnama.

<sup>24</sup> Chcasna, más paselo jtsemnana canye jena olivo betiyentša buacuatētšēnjē chca betiyiñe jětsjena, y ndoñe, chē tjoca olivos betiyentša buacuafja canye jena olivos betiyiñe chaójuama jájena. Cachcá, más paselo jtsemnana chē Jesucristbeñe ndoñe montsošbuaché judiēngbiama, jontšana jtošbuáchiyana y tšabe bendicionēnga Bēngbe Bětsábentšana jójyēngacñana, tšēngaftanga ndoñe judiēnga chē tempo Bēngbe Bětsá ndoñe šmonjanábuatmēngbiama.

### *Bēngbe Bětsá nyētscāngaftaca puerte tšabia endmēna*

<sup>25</sup> Jesucristbeyeca catsátanga, atše sēntseboše tšēngaftanga chašmotsetátšēmo chē tempo Bēngbe Bětsá entšanga ndoñe tonjaninyanjē soyēngama. Atše sēntseboše tšēngaftanga quem soyēngama chašmotsetátšēmo, chca, tšēngaftanga ndoñe judiēnga chē judiēngbiama más uámanēnga šmomna ca ndoñe chašmondětsejuabnama. Ndayá Bēngbe Bětsá tempo entšanga ndoñe tonjaninyanjēcá, quem soye endmēna: Bēngbe Bětsá tojalesenciá, nje baseftatescama banga Israeloquēnga Bēngbe Bětsabe soyēnga ainaniñe ndoñe chamondóyēngacñama; pero chca echántsemna, chē ndoñe judiēnguentše atsebácanēnga jtsamnama imomnēnga, atsebácanēnga chamojtsemnēntscuana.

<sup>26</sup> Chca chaojopasá ora, nyētsca Israelentša entšanga atsebácanēnga mochántsemna; ntšamo Bēngbe Bětsabe uabemana palabrēnguiñe endayancá:

Entšangbe atsebacayá Israelocana echanjabo,

y echanjama nyētsca Jacóbēbentšana entšanga ndoñe más vida chamondětsebomna, bacna soyēnga jtsamēse ca.

<sup>27</sup> Y mēntšá endmēna ntšamo chēngbiama chjašebuachená:

chēnga játsebacana, chēngbe bacna soyēngama chaijaperdónaye ora ca –chiñe endayana.

<sup>28</sup> Chē tšabe noticiēnga tmojtsanaboté causa, judiēnga Bēngbe Bětsabe uayayēnga mondmēna, chca, tšēngaftangbe tšabiama chaotsemnama. Pero Bēngbe Bětsá tojánabacayeca, chēngnaca Bēngbe Bětsabe bonshánēnga mondmēna, er Bēngbe Bětsá chēngbe tempsca uámana bēts taitanga chca tojanašebuachená.

<sup>29</sup> Chca endmēna, er Bēngbe Bětsá ndocna te juabna ntjatrócana; nyētscanga chabe entšanga chamotsemnama tojáchembēnga, nyēts tempo cha echántsababuanjēshana, y echanjama chēngbeñe tšabe bendicionēnga chaotsemnama.

<sup>30</sup> Tšēngaftanga ndoñe judiēnga tempo ndoñe šmonjánama ntšamo Bēngbe Bětsá inabošcá; y mora, Bēngbe Bětsá tcmojalastemá, judiēnga Bēngbe Bětsá ndoñe tmonjoyeuná causa.

<sup>31</sup> Cachcá, Bēngbe Bětsá tšēngaftanga tcmojalastemama, judiēnga montsemna chē Bēngbe Bětsá ndoñe montsobedecēnēnga, chca, Bēngbe Bětsá chēngnaca cháualastemama.

<sup>32</sup> Er Bēngbe Bětsá tojinjanjē, cha ndoñe ntjoyeunayama juabnēngaca nyētscanga mandánēnga imomnama, chca, nyētscanga jálastemama cha jobenayama.

<sup>33</sup> ¡Ndegombre, Bëngbe Bëtsá nyetscangbiana puerte tšabia endmëna, puerte osertaná y puerte obiashjachá! Ndocná quenátobena ínÿenga jábuayenama ndayá Bëngbe Bëtsá jamama inetsejuabnycá, y ndocná quenátobena corente josértana ntšamo cha inetsamcá.

<sup>34</sup> Ntšamo Bëngbe Bëtsabe uabemana palabrënguiñe endayancá:

Ndocná quenátstatšëmbo ntšamo Bëngbe Bëtsá inetsejuabnycá;  
ndocná quenátobena cha jábuayenama ndayá jamana ibomnama.

<sup>35</sup> Ndocná quenátobena ndayánaca cha natsana jshatšetayana, chë tbojatšetabiana ndebená cha jatsmënana,  
y chë ndebënana ndayánaca jtoyiyama chabotsemnana ca.

<sup>36</sup> Er lempe cha tojama, lempe cha iútabna, y lempe chabiana yomna. ¡Nyetscanga nyetsca tescama cha chamotsatschuaná! Chca chaotsemna.

## 12

### *Ntšamo jtsiyenëse Bëngbe Bëtsá jtseservénana*

<sup>1</sup> Chcasna, Jesucristbeyeca catšátanga, Bëngbe Bëtsá bënga ba soye šojalastemáyeca, puerte cbontsaimpadana, tšëngaftanga Bëngbe Bëtsá chašmëyana tša šmojtseboše lempe jamana chábioye jadórama ca, Bëngbe Bëtsá jadórama mo ndayá cuafjobacá y cuafjuatšëmboncá, mo cabá ainá cuaftsomñcá. Smochjauyana tšëngaftanga sempre šmochtsentšena cha servénana y jtsamëse cha tšabá bëngaftaca chaotsemnana. As, chca chašmojtsama ora, ndegombre oyejuayá Bëngbe Bëtsá šmochántsebiamnaye.

<sup>2</sup> Ndoñe šmattsiyena jtsamëse ntšamo chë nÿe quem luarama enójuabnaye entšanga monduamancá, y šmochjaleséncia Bëngbe Bëtsá mo tsëm entšangcá chácmbiamama, tšëngaftangbe ainana y juabna mo tsëmcá chaomëse. Chca, tšëngaftanga šmochanjobenaye jtsejuabnayana y šmochántsetatšëmbo ntšamo Bëngbe Bëtsá yobošcá: ndayá tšabá yomna, chë ndayá cha oyejuayá ibnabema, y ndayá ya ndoñe yondopodena más tšabá jtsemnana.

<sup>3</sup> Ndayá Bëngbe Bëtsá atšbiana tšabá jtsejuabnayëse šojatšetama, nyetsca tšëngaftanga cbochjáuyana, ndocná cachabiana chaondëtsejuabná más uamaná yomna ca, nÿe ntsachetšá jtsenójuabnayana ibomna nyetšá. Más tšabá, cada ona cachabiana tšabá chaot-senojuabná, y chca chaotsenojuabná ntšamo chabe ošbuáchiyana yomncá, chca, chë Bëngbe Bëtsá tbojatšetá ošbuáchiyana chabiana chaotsetrabájama.

<sup>4</sup> Er, ntšamo bënga cada ona mondbomna canÿe cuerpo y chë cuerpiñe ba soyënga jtsebomnana, y nyetsca soyënga ndoñe cach soyama cuerpiñe ntsoservénana,

<sup>5</sup> cachcá bënga ošbuáchiyënga, masque bëtscanga imomna, Crísoftaca cánÿiñe mo canÿacá mondmënayeca, bënga mondmëna mo chabe cuerpo cuaftsemncá, y cada ona cánÿiñe mo canÿacá nyetscángaftaca.

<sup>6</sup> Bëngbe Bëtsá tojama bënga cada ona chamotsebomnana ndoñe cachca chabe tšetana obenana, ntšamo Bëngbe Bëtsá cada ona bëngbe tšabiana inajuabnycá. Y chabe juábnaca bënga jtsóyebuambnayama jtsobenama Bëngbe Bëtsá tojamëse, chca mochtsama ntsachetšá chábeñe bëngbe ošbuáchiyana yomncá.

<sup>7</sup> Ošbuáchiyënga bëtscá jasérviana bënga chamotsobenama Bëngbe Bëtsá tojamëse, chca mochtsama. Tšabá jtsabuátambayama bënga chamotsobenama Bëngbe Bëtsá tojamëse, chca mochtsama.

<sup>8</sup> Inÿenga jañëmuama bënga chamotsobenama Bëngbe Bëtsá tojamëse, chca šontsamna. Lempe ntšamo bënga tmobomncá inÿengbiámnaca chaotsemnana bënga jamama chamotsobenama Bëngbe Bëtsá tojamëse, nyets ainánaca chca šontsamna. Amëndayënga jtsemnana bënga chamotsobenama Bëngbe Bëtsá tojamëse, šontsamna bëtscá jamana tšabá jtsamëndayama. Inÿenga jálastemama bënga chamotsobenama Bëngbe Bëtsá tojamëse, šontsamna oyejuayënga chca jamana.

*Ntšamo bēnga Jesucristbeñe ošbuáchiyēnga jtsamana šojtsamna*

<sup>9</sup> Inya chašmojtsebobonshana ora, nyets ainánaca chca šmochtsama. Ndayá yomna ndoñe tšabe soye šmochtsaboté y chentšana šmochtsojuánañe; šmochtsentšena ntšamo tšabá yomncá jtsamama.

<sup>10</sup> Cmontsamna nyetscanga puerte jtsenbobonshánana, Jesucristbeyeca catšátanga quet-somñecá, chē ínýenga bēngbiana más uámanēnga imomna ca jtsejuabnayēse.

<sup>11</sup> Ndoñe oyēnjayēnga šmattsemna, ndayá bētsá Bēngbe Utabnabiama šmochtsetrabájaye; ainaniñe corente añemo jtsebomñese, Bēngbe Utabná sempre šmochtseserverna.

<sup>12</sup> Tšēngaftanga Bēngbe Bētsábeñe jtsošbuáchiyēse, chábeñe šmobatmánayeca, puerte oyejuayēnga šmochtsemna; padecena soyēnguiñe chašmojtsachnējuana ora, puerte uantadēnga šmochtsemna, y siempre Bēngbe Bētsáftaca šmochtsencuéntaye.

<sup>13</sup> Bēngbe Bētsabe entšanga opresido bomñēnga šmochjújabuache, y šmochtseprontana tšēngaftangbe yebnentše posada ínýenga júyentšamiana.

<sup>14</sup> Bēngbe Bētsá šmochtseimpadana, chē tšēngaftanga chašmosufrima amēngbiana tšabe bendicionēnga cha chaotsamama; aínē, cha šmochjaimpáda tšabe bendicionēnga chēngbiana chaotsamama, bacna soyēnga ndoñe.

<sup>15</sup> Oyejuayēnga ínýengaftaca šmochtsemna, chēnga oyejuayēnga chamojtsemna ora; ngménaca šmochtsemna, ínýenga ngméniñe chamojtsemna ora.

<sup>16</sup> Smochtsiyena nyetscanga jtsenēyeunanēse. Nye cach tšēngaftanga uámanēnga ndoñe šmattsenobiamnaye, sinó chē nduámanēnga imomñēngaftaca tšabá mándbomñēnga šmochtsemna. Ndoñe šmattsejuabnaye yapa osertánēnga šmomna ca.

<sup>17</sup> Inýenga bacá chacmojtsaborlana ora, ndoñe šmattsatēchénanguaye; corente šmochtsentšena ntšamo nyetsca entšangbiana tšabá yomncá jtsamama.

<sup>18</sup> Ntsachetšá šmojobenacá, lempe šmochtsama natjēmbana nyetsca entšāngaftaca jtšiyenama.

<sup>19</sup> Atšbe bonshánēnga, ínýenga bacá chacmojtsaborlana ora, ndoñe šmatjama chēnga chē causa chamotsesufrínama, ndayá Bēngbe Bētsá šmochjaleséncia chēnga cháucastigama; er Bēngbe Bētsabe uabemana palabrenguiñe cha tojánayana: “Atše chanjama chēnga chamosufrima, ínýenga chamosufrima tmojama causa; y chēnga chanjácastigaye, ínýengbioye bacá tmojaborlá causa ca.”

<sup>20</sup> Chca játamamna, mēntšá šmochjama, ntšamo cachánaca tojanayancá:

Ache uayayá tbojtseshēntsanēse, saná cochjacaredáda,  
y tbojtsajuendase, cochjuáfsiye.

Chca chacojamēse, cochanjama cha puerte chaotsēuatja ntšamo tmojaborlama,  
y ainana corente chabotsetšena, mo chebana iñbenga chabe bestšašiñe cuafjacacá ca.

<sup>21</sup> Ndoñe šmatjaleséncia, ntšamo ndoñe tšabá tontsemncá tšēngaftanga chacmayēnjanama. Chamna, ntšamo tšabá yomncá jtsamēse, chē ndoñe tšabe soye šmochjayēnjaná.

## 13

<sup>1</sup> Nyetsca entšanga entsamna jtsamana ntšamo chē amēndayēnga tmojtsamēndacá, er ndocná obenana ntsebomnana, Bēngbe Bētsá ndoñe chca tbonjalesenciase, y nye Bēngbe Bētsá tojama amēndayēnga obenana chamotsebomnama.

<sup>2</sup> Chca, chē amēndayēngbe contra tmojtsemnēnga, ntšamo chaotsemnama Bēngbe Bētsá tojayancá contra chēnga jtsemnana; y chca contra tmojtsemnēnga, castigánēnga mochántsemna;

<sup>3</sup> er ntšamo tšabá yomncá amēnga, ndoñe quenátamna ndayama chē amēndayēnga jatebēuatjana, nye chē bacna soye amēngna aínē. Tšēngaftanga šmojtseboše jtšiyenama

chë amëndayëngbioye ntjatebëuatjácá; chcasna, ntšamo tšabá yomncá šmochtsama, y chë amëndayëngna tšabe bomínýeca mochantsónýaye ntšamo chašmojtsamcá;

<sup>4</sup> er chë amëndayëngna Bëngbe Bëtsabe trabajo amënga mondmëna, tšëngaftangbe tšabiamana. Pero bacna soyënga šmojtsamëсна, cmontsamna jtsiyenana chë amëndayënga jtsebëuatjëse, er chënga jacastígama obenana mondbomna, y chca mondbétsama. Chënga, Bëngbe Bëtsabe mándoca jayanana chë bacna soye amënga ndoñe tšabá tmonjama ca, y jamana chënga chamosufrima.

<sup>5</sup> Chíyeca, jtseytana ntšamo chë amëndayënga tmojtsichamcá jtsamana, pero ndoñe nýe chë castigo ndoñe chašmondëtsebonnama, ndoñe chca šmotsama causa, sinó chë ainanentša tšabe juabnënga ntšamo tbojtsëtsëtsnacá joyeunayama yómnyayeca.

<sup>6</sup> Cachca soyëngama, amëndayëngbiamana impuesto tšëngaftanga jtsatsquécjnayana; er chë amëndayënga Bëngbe Bëtsabe oservëngna mondmëna, ntšamo chiñe jtsamama tojtsamncá corente tmojtsentšena ora.

<sup>7</sup> Chcasna, tšëngaftanga šmochjáyentšbuachiye ntšamo chënga jtsebomnama tojtsamncá. Chë crocénana entšanga ayëngacayëngbioye, ndaye impuéstnaca šmochtëbuénaye; chëngna šmochtsarrespetana ntšamo yomncá, y chënga uámanënga chamotsemnana šmochtsejuabnaye.

<sup>8</sup> Crocénana inýa jëtsëntšabuáchiyama chacmojtsamnëse, nýe ntoyiyacá ndoñe šmatjoquéda, nýets tempo ndebënënga; nýe quem soye sempre šmochtsama: nýetscanga šmochtsenbobonshana; er nda ndëmua entšábioye tbojtsebobonshana, ya tojama ntšamo leyiñe yomandancá.

<sup>9</sup> Quem mandënga, “acbe shema inýaftaca ndoñe cattseíngñaye, inýa ndoñe catjóba, ndoñe catjatbëba, inýa tojtsebomna soye ndoñe nýe acbiamana cattseboše”, y chë inýe mandënga leyiñe lempe quem mandiñe entsemna: “Ndëmua entšánaca cochtsebobonshana ntšamo cach aca cuenobobonshancá”.

<sup>10</sup> Nda ndëmua entšábioye tbojtsebobonshana, chábioye ndoñe bacá ntjabórlana; chca, ndánaca jtsebobonshánëse, entšá jamana lempe ntšamo leyiñe yomandancá.

<sup>11</sup> Chë soyënga cmontsamna jtsamana, er bënga mondëtatšëmbo ya chë uámana tempiñe imojtsiyenama, chë mocna ora šojtsamna prontánënga jtsemnana, mo ocnayentšana cuafjofšenangcá, Jesucristo jaserviama jtsentšënëse. Chca cmontsamna jamana, er chë Bëngbe Bëtsá bënga játsebacama te, mora ya más bécoñe entsemna, ntšamo chë Jesucristbeñe jtsošbuáchiyama tmonjanontsé ora enjamnama.

<sup>12</sup> Mora bënga mondoyena canýe luarentše bëtscá bacna soyëngaca y ngmenánaca, y chca jtsemnana mo bënga nýets tempo ibetiñe cuaftsajncá. Pero ya entsobeco chë Bëngbe Bëtsá bënga játsebacama te, mo chë ibetiñe ya jtsoPOCHÓCAMA y binýniñe ya jontšamcá. Chíyeca mochtsajbaná bacna soyënga amana, y mochtsiyena tšabe soyënga jtsamëse, Satanás játsjama y jáyënjana bënga jtseprontánëse, mo canýe soldado jenëuyanama y inýa jayënjana ba soyënga tojenocjacá.

<sup>13</sup> Ntšamo šojtsamncá mochtsiyena, ntšamo entšanga ndaye tšabe sóynaca jamana monduamancá, inýëngbiamana lempe chaotsinýnëse. Chcasna, ndoñe quešnátamna yapa tmoyënga ntsemnana, ndoñe fiestënguenache ndoñe tšabe soyënga ntsamana, ndoñe bacna soye boyabása o shembásaftaca ntsamana y jenomándama ntsobencá chca soyënga ndoñe ntsamana, nýetscanga ndoñe cachcá ntsejuabnayama ndoñe ntsamana y ndoñe inýënga yapa ntsiyentšbuášana.

<sup>14</sup> Chca játamamna, šmochtsiyena jtsamëse ntšamo Bëngbe Utabná Jesucristo endbet-samcá, y ndoñe nýe šmatjésejuabnaye jtsamana nýe cach tšëngaftanga tšabá jtsomñama juabnëngaca, ndayá tšëngaftanga chašmotsamama chë juabnënguiñe tojtsemncá.

## 14

*Ndoñe šmattsóyebuambnaye inýe ošbuáchiyënga contra*



<sup>1</sup> Chë Jesucristbeñe nÿe batšatema ošbuáchiyënga tšabá šmochjúbuaja, y chëngaftaca ndoñe šmattsenatsësnaye ndayá aíñe o ndoñe jamana yontsamnama.

<sup>2</sup> Er básefta ošbuáchiyënga corente imotátšëmbo chënga nÿe ndayánaca jasama imobenama, pero chë Jesucristbeñe nÿe batšatema ošbuáchiyëngna, ndocna mëntšena ntsesayana, er chënga jtsejuabnayana aíñe jasana canÿe bacna soye nántsemna ca.

<sup>3</sup> Chë nÿetsca saná sayënga ndoñe chamondëtsejuabná chë inÿe soyënga ndoñe mondëtsesayëngbiama, chë causa chënga más batšá uámanënga imomna ca; y chë ndaye soyënga ndoñe mondëtsesayëngna, chë nÿetsca saná sayëngbe contra ndoñe chamondëtsoyebuambná, er Bëngbe Bëtsá chënga tojúbuaja mo chabe entšangcá.

<sup>4</sup> Tšëngaftanga ndoñe quecmátamna chë ínÿabe oservená ndoñe tšabá tonjama ca jatichámuana. Cachabe nduiño jtsemnana nda yochjayana cha tšabá o ndoñe tšabá tonjamama. Y chë oservená jamana ntšamo tbojtsemncá, er Bëngbe Utabná obenana endbomna cha chca chaotsamama.

<sup>5</sup> Báseftanga mondmëna, chënga jtsejuabnayana canÿe te inÿe tescama más uámana te yomna ca; pero ínÿengna jtsejuabnayana cada te cachcá iuámana ca. Y entsemna ndayá cada ona corente tšabá chaotsetátšëmbo, ntšamo jojuabnacá ndáyeca chca ca.

<sup>6</sup> Nda tojtsejuabná canÿe te inÿe tescama más uámana te yomna ca, chca jamana Bëngbe Utabnábiama jtenójuaboyama. Y nda nÿetsca saná tojtšesá, chca jamana Bëngbe Utabnábiama jtenójuaboyama, er cha Bëngbe Bëtsábioye chë sanama jëtschuayana; y nda tojtsejuabná sananga yomna y ošbuáchiyënga chcana chamotsesama Bëngbe Bëtsá ndoñe yondboše ca, cha chë soyënga ndoñe ntjasana, Bëngbe Utabnabiama jtenójuaboyama, y chánaca Bëngbe Bëtsábioye chë sanama jëtschuayana.

<sup>7</sup> Bënga ošbuáchiyënguentsana ndocná ainá ntsemnana nÿe cachabiama, ni jóbanana nÿe cachabiama.

<sup>8</sup> Bënga tmojtšiyenëse, Bëngbe Utabnabiama jtšiyenana; y tmojóbanësna, Bëngbe Utabnabiama jóbanana. Chca, masque ainënga o obanënga, bënga Bëngbe Utabnábenga jtsemnana.

<sup>9</sup> Chama Cristo tojanóbana y Bëngbe Bëtsá tojanma cha cháuatayenama, cha Bëngbe Utabná chaotsemnama, ainëngbeñe y chë ya tmojóbanëngbeñe chaotsemándama.

<sup>10</sup> As, ¿ndáyeca tšëngaftanguentše báseftanga, catšátangbe contra jtsóyebuambnayana, ndayá chënga tmojtsamama? ¿Y ndáyeca ínÿenga tšëngaftanguentše jtsichámuana, catšátanga ndoñe uámanënga montsemna ca, ndayá chënga tmojtsamama? Er nÿetscanga šontsamna Bëngbe Bëtsabe delante jashjanguana, ntšamo cada ona tojëftsemcá tšabá o ndoñe tšabá bëtsemnama cha cháuyanama.

<sup>11</sup> Er Bëngbe Bëtsabe uabemana palabrenguiñe Bëngbe Utabná mëntšá tojánayana: Ndegombre atše ainá sëndëtsomñe, y chíyeca atše sçojurá, nÿetscanga atšbe delante mochanjoshëntsaméntša atše jadórama, y nÿetscanga šmochanjauyana, “ndegombre aca Bëngbe Bëtsá condmëna ca”.

<sup>12</sup> Chcasna, cada ona bënga šontsamna Bëngbe Bëtsá jauyanana ntšamo tmojamama ndáyeca chca ca.

*Ndoñe šmatjama inÿe ošbuáchiyënga bacna benachiñe chamótsatsama*

<sup>13</sup> Chíyeca, ya ndoñe quešnátamna ínÿengbe contra jtsóyebuambnayana. Chca játamamna, šmochtsejuabnaye y yejuana šmochtsantješna ndocna te tondaye ntjamana, ndayá chaoma Jesucristbeyeca acbe catšata, chaojuabó y bacna soyënga chaoma.

<sup>14</sup> Atše sëndëtatšëmbo, mo canÿa Bëngbe Utabnáftaca cánÿiñe mo canÿacá quetsomñecá, ndocna soye yondmëna, nÿe cachabe ponto chaotsemna ndoñe tšabe soye. Pero canÿe entšá tojtsejuabná ndayánaca ndoñe tšabe soye yondmëna ca, ni jasama, ni jabojuama, chabiama cocayé chë soye nÿets tempo jëftsemnana ndoñe tšabe soye.

<sup>15</sup> Tšëngaftanga inÿa becá šmojtsatsësná, inÿe soyënga tšabá endmëna jasama ca, y cha tojtsejuabná, chca soyënga jasama ndoñe tšabá yondmëna ca, pero tšëngaftanga tša

šmojtsatsá causa, cha chca soyënga tojase, y chentšana tbojtsebiona puerte bacna soye tojamama, chca, tšëngaftanga jtsinÿanÿnayana ndoñe šmondoyena jtsamëse chë ínÿenga jtsababuánÿeshanëse. Nÿe tšëngaftanga inÿe soyënga šmétsesayama ndoñe šmatjaleséncia chë soye chaoma inÿa, ndabiama Cristo tojanóbana, chë ndoñe ndegombre benachiñe chaoquedama.

<sup>16</sup> Ndoñe šmatjaleséncia ndayá tšëngaftanga tšabá šmétsamama, ínÿenga ndoñe tšabá tšëngaftangbiana chamotsóyebuambnama. Chca šmochanjobenaye, ntšamo šmojtsamcá jtsajbanase, ínÿenga ndoñe tšabá tmontsoyebuambná ora.

<sup>17</sup> Bëngbe Bëtsabe amëndayana bëngbeñe ndoñe quenátsmëna inÿe soyënga aíñe jasana o inÿe soyënga ndoñe, canÿe soye aíñe jofšiyana o inÿe soye ndoñe. Pero chabe amëndayana bëngbeñe aíñe endmëna jtsamana soyënga ndayama Bëngbe Bëtsá tojayana aíñe tšabá jamama yomna ca, cháftaca tempcá tšabá jtsatsmënana y ainaniñe oyejuayana jtsebomnana; y Uámana Espíritbeyeca bënga jobenayana chca jamana.

<sup>18</sup> Y nda Crístbioye chca tbojtserverna, jamana Bëngbe Bëtsá cháftaca oyejuayá chaotsemnama, y entšangbe bominiñe tšabia jtsemnama.

<sup>19</sup> Sempre šontsamna tšabe soyënga jtsamana y chë soyëngaca chaopodé jamana nÿetscanga natjëmbana chamotsiyenama, y ndaye sóynaca šmochtsama, ndayá ínÿenga chaújabuache Jesucrístbeñe corente jtsošbuáchiyama y ainaniñe bëtscá añemo jtsebomnama.

<sup>20</sup> Tšëngaftanga ndaye sanánaca jasama šmobénayeca, ndoñe šmatjama chaotsopochocama ndayá Bëngbe Bëtsá ainaniñe tojamcá. Ndegombre, nÿetsca sananga tšabá jasama endmëna; pero ndayá tšëngaftanga šmojasama, inÿa bacna benachiñe chaótsatšama šmojamëse, chë soye cocayé ndoñe tšabá ntsemnana.

<sup>21</sup> Tšabá endmëna mëntšena ndoñe ntjasana, vínoye ndoñe ntjofšiyana o ndayánaca ndoñe ntjamana, pero chë soye aíñe tcojama ora, Jesucrístbeyeca canÿe catšata chaojuaboma y bacna soye chaomama tojoserese.

<sup>22</sup> Asna, ntšamo tšëngaftanga chë soyëngama ndegombre šmošbuachecá, nÿe Bëngbe Bëtsá y tšëngaftangaftaca chaotsemna. Canÿe entšá ndegombre oyejuayá jtsemnana, canÿe soye jamama tšabá yomna ca tojtsejuabnase, y chë soye tojamentšana, ndoñe tšabá chca yonjamna ca juabnënga ainaniñe ndoñe tontsebomnëse.

<sup>23</sup> Pero canÿe entšá ndayá tojamentšana tojayana, bacna soye tojama ca chë ndayá tojasama o tojamama, as Bëngbe Bëtsánaca echanjayana cha ndoñe tšabá tonjama ca, er ntšamo tojamcá ndoñe tonjama chë soye aíñe tšabá yomnama jtsošbuáchiyëse; y ndayánaca chca ora tojtsamëse, chca jamana bacna soye jtsemnana.

## 15

### *Ntšamo ínÿengbiana tšabá tojtsemncá mochtsama, ndoñe nÿe bëngbiana*

<sup>1</sup> Bënga, chë Jesucrístbeñe corente ošbuáchiyënga, šontsamna chë nÿe batšatema ošbuáchiyënga jujabuáchana, chënga bacna soyënga tmojtsama ora, nÿe batšá ošbuáchiyana bomna causa; y ndoñe nÿe jatsënguayana nÿe ndaye soyëngaca yopodena bënga tšabá jtsemnama.

<sup>2</sup> Cada ona bënga šontsamna jamana ntšamo cach bëngcá Jesucrístbeñe ošbuachiyabiana tšabá tojtsemncá, y ndayá cha oyejuayá chaotsemnama tojama soye. Chca šontsamna, cha más bëtscá Jesucrístbeñe chaotsošbuáchema, y ainaniñe más añemo chaotsebomnama.

<sup>3</sup> Er Cristo, ntšamo tojanmcá cach ndoñe tonjanma nÿe cha oyejuayá jtsemnama. Inÿetšá, cháftaca tojanopasá ntšamo Bëngbe Bëtsabe uabemana palabrenguiñe endayancá, mo Cristo Bëngbe Bëtsáftaca cuaftsoyebuambnacá: “Ntšamo entšanga montsichamcá aca joyenguanguama, atše šmontsatsëtsná ca.”

<sup>4</sup> Er lempe ntšamo tempo Bëngbe Bëtsabe uabemana palabrenguiñe tmojanabemcá, bënga jabuátambama endmëna. Ndayá bënga chiñe tmojuatsjínÿama, bënga jtsoobenana padecena soyënguiñe tmojtsachnëjuana ora uantadënga jtsemnana, y ainaniñe más añemo jtsebomnana; y chíyeca bënga montsobena, chábeñe jtsošbuáchiyëse, chábeñe jobátmana, ntšamo tojanayancá chaomama.

<sup>5</sup> Atše, Bëngbe Bëtsá sëntseimpadana, nda inétsama bënga padecena soyënguiñe uantadënga chamotsemnana, y nda inétsama bënga ainaniñe más añemo chamotsebomnana, cha chaoma nyetscanga canÿe juabna chašmotsebomnana, ntšamo Cristo Jesús yojanjuabnacá tsëngaftanga jtsejuabnayëse;

<sup>6</sup> cha chca chaoma, nyetsca tsëngaftanga mo cánÿiñe cuaftsemncá, y mo nyetscanga canÿe ora cuafjayancá, Bëngbe Bëtsá, Bëngbe Utabná Jesucristbe Taitá, puerte bëtsá y uamaná yomnana chašmuinÿanÿema.

*Chë ndoñe judiëngbiámnaca chë tsabe noticiënga jtsemnana*

<sup>7</sup> Nyetscanga oyejuayënga šmochjenofja, ntšamo Cristnaca tsëngaftanga tcmojanëbuajcá, chca, entšanga chamuinÿanÿé Bëngbe Bëtsá puerte bëtsá y obená yomnana.

<sup>8</sup> Atše sëntseboše ndayá jayanana, Cristo tojánabo judiënga jabáserviama ca, chca, jinÿanÿiyama Bëngbe Bëtsá sempre inétsamama ntšamo tojašebuachenacá; tojánabo ntšamo Bëngbe Bëtsá bëngbe tempsca uámana bëts taitanga tojanašebuachenacá chaocumplima;

<sup>9</sup> y Bëngbe Bëtsá puerte bëtsá yomna ca chë ndoñe judiëngnaca chamuayanámnaca, cha chënga inétsalastemanama, ntšamo Bëngbe Bëtsabe uabemana palabrenguiñe endayancá, y chca tojanocumplí:

Chíyeca, atše chë ndoñe judiëngbeñe chaitsemna ora, aca cbochantsatschuanaye, Bëngbe Bëtsá;

y jacántase chanjayana aca puerte bëtsá y uamaná comna ca.

<sup>10</sup> Inÿoca mëntsá endayana:

Puerte oyejuayënga chë ndoñe judiënga šmochtsemna, Bëngbe Bëtsabe bocacana entšángaftaca cánÿiñe ca.

<sup>11</sup> Y ínÿoca mëntsá endayana:

Bëngbe Utabná šmochtsatschuanaye tsëngaftanga ndoñe judiënga, y cha šmochtsatschuanaye nyetsca tsëngaftanga nyets luarënguenache entšanga ca.

<sup>12</sup> Y Isaíasnaca Bëngbe Bëtsabe uabemana palabrenguiñe mëntsá tojanábema:

Canÿa Isaíbe entšanguentsana echanjabo,

y Bëngbe Bëtsá chábioye uamaná bochanjábema, nyets luarënguenache entšanga chaot-samëndama,

y chënga chábeñe jtsošbuáchiyëse, chábeñe mochantsobátmana tsabe soyënga chëngbiamama chaotsamama ca.

<sup>13</sup> Atše, Bëngbe Bëtsá sëntseimpadana, nda inétsama bënga chábeñe chamot-sobátmanama tsabe soyënga bëngbiamama chaomama, cha chaoma tsëngaftanga ainaniñe puerte oyejuayënga chašmotsemnana y ainaniñe tsabe ebionana chašmotsebomnana, chábeñe jtsošbuáchiyëse; y Bëngbe Bëtsá chca tsëngaftangbiamama chaoma, tsëngaftanga cada te más chábeñe chašmotsobátmanama, chë Uámana Espíritbe obenánaca.

<sup>14</sup> Jesucristbeyeca atšbe catšátanga, atše corente sëndëtatšëmbo tsëngaftanga puerte tsábënga šmomnana, ndayá cmamnana corente šmotatšëmbuama, y jtsebuayiy-nayama šmobenámnaca.

<sup>15-16</sup> Quem tsbuanáchañe básefta soyëngama sënjuábema, ntšamo šmatjátsjuabnayama atše ntjatauatjácá; chca sënjama, básefta soyëngama chašmuatenójuaboma; y chca sëntsobena juabemana, er Bëngbe Bëtsá tojama atše chaitsebomna chë uámana trabajo, Cristo jtseeservénana, chë ndoñe judiënga jtsejabuáchanëse. Atše bachnëcá sëntsoservena, Cristo stseservena ora, entšanga tsabe noticiëngama jtsabuayiyayëse; atše chca sëndama

chë ndoñe judiënga Jesucristbeñe chamotsošbuáchema, y ndayánaca chamotsamama Bëngbe Bëtsá oyejuayá chëngaftaca chaotsemnama, mo chabiamana canye uatšëmbonancá. Chcánaca atše sëndama, ndoñe judiënga ndegombre Bëngbe Bëtsábenga chamotsemnama, chë Uámana Espíritbeyeca.

<sup>17</sup> Chca, atše Cristo Jesúséftaca cányiñe mo canyáca quetsomñecá, ndegombre sentsobena jtsejuabnayana ntšamo Cristo jaserviama atše sëndamcá, puerte uámana soye yomnama.

<sup>18</sup> Atše añemo sëntsebmoma nye chë ndayá Cristo átšeftaca tojamama jóyebuambayama, ndoñe judiënga Bëngbe Bëtsá chamóyeunama. Chca tonjopasá, ndayá tijayanama y tijamama,

<sup>19</sup> chë Bëngbe Bëtsabe obenana jinñanñiyama bëts soyëngama, chë chabe obenánaca tojopasá tšabe soyëngama, y chë Uámana Espiritu bëts obenánaca tojama soyëngama. Y chca, Jerusalenocana jabojátšase, nyetsca luarënguëjana Iliria luaróntscoñe, Cristbe tšabe noticiëngama nyets luarënguenache entšanga tijabuayená.

<sup>20</sup> Atše sempre canye soye inye soyëngama más sënjánboše, y enjamna chë tšabe noticiëngama jábuayenana, entšanga ndocna te Cristbiamana oyebuambnayana tmonjanuena luarënguenache; y chca sënjanma, atše ndoñe játamama inya tojanbojatsé trabajo, mo inyabe bojatsena yebnentše jajebuama cuafjatontšecá.

<sup>21</sup> Ntšamo Bëngbe Bëtsabe uabemana palabrënguiñe endayancá, chë tempo Cristbiamana ndoñe tmonjanuenëngbiamana:

Chë ndëmuanyënga tempo ndocná chabiamana tonjanabuayená, chënga tšabá mochanjinye ntšamo cha yomnana;

y chë ndocna te chabiamana tmonjouenënga, chabe soyëngama echanjósertaye ca.

### *Pablo yojanjuabná Roma bëts puebloye jama*

<sup>22</sup> Y nya chë causa, atše ndoñe chiyjobená tšëngaftangbioye jana tšëngaftanga jányama, masque ba soye tsjenojuabná choye jama.

<sup>23</sup> Pero mora atšbe trabajo quem luarënguiñe sënjapochocá y tempscana tšëngaftanga jányama tša sëndánbošeyeca,

<sup>24</sup> sëntsejuabná mora aíñe chjobenaye choye jama, tšëngaftanga jautsëtsayama, chëjana chajachnëngo ora, España luaroye chaitsá ora. Y baseftayté tšëngaftangaftaca chjëftsemna, cbochjányama tšëngaftangaftaca oyejuayá; chentsana Diosmanda šmochjuájabuache, y lempe ntšamo chašojsajabotcá šmochjätsetaye jobenayama Españoloye ayana jtëtóntsama.

<sup>25</sup> Morna Jerusalenoye chanjá, choca entšanga Bëngbe Bëtsábenga imomnënga jaujabuáchama;

<sup>26</sup> er Jesucristbeñe ošbuáchiyënga Macedonia y Acaya luarentsënga, tmonjajuabó tšabá yojtsemna crocénana jájuabana chë Jerusalenoca entšanga, Bëngbe Bëtsábenga imomnënga y ndbomnëjémënga imomnënga jujabuáchama; y oyejuayënga chca tmonjama.

<sup>27</sup> Cachënga chca tmonjajuabó, y chca jamana tšabá endmëna, er judiënga tmonjanma, chë Bëngbe Bëtsábiocana tmojanóyëngacñe soyënga ndoñe judiëngnaca chamotsebmomnama; chíyeca ndoñe judiënga entsamna chë Jerusalenoca judiënga ošbuáchiyënga jujabuáchana, ndaye soyënga jatšatayëse, chënga vida jtsebmomnama chamotsobenama.

<sup>28</sup> Y chca, quem trabajo chajapochocá ora, y chë ndoñe judiënga ošbuáchiyënga lempe tmojätbanana chajáftsayentsbuachiye ora, chanjontsé Españoloye jama, y tšëngaftangbiajana chanjachnëngo tšëngaftanga jáftsanñyama, tšëngaftangaftaca baseftayté jëftsemnama.

<sup>29</sup> Atše corente sëntsetatšëmbo tšëngaftangbioye chajá ora, chjášhango y chjama tšëngaftanga bëtscá tšabe bendicionënga Crísbentšana chašmotsebmomnama, tondaye chacmondëtsabuáshebenëntscuana.

<sup>30</sup> Jesucristbeyeca catsátanga, Bëngbe Utabná Jesucristbeñe ošbuáchiyënga quetsomñecá, y bënga bonshánana chamotsebomnama chë Uámana Espíritu inétsamayeca, tsëngaftanga cbontsaïmpadana, bëtsá chašmotsentšena Bëngbe Bëtsá nyets ainánaca jtseïmpadánama, ntšamo atše sëndbetseïmpadancá, cha atše chašotsinýenama.

<sup>31</sup> Cha šmochtseïmpadana chë Judea luaroca ndošbuáchiyënga ndocá chašmondëborlama, y chë Jerusalemquënga Bëngbe Bëtsábenga, tsábá chamóyëngacñama ndayá chënga jujabuáchama chajáftsayentšbuachiye ora.

<sup>32</sup> Y chentšana, y Bëngbe Bëtsá chca chaojábošenëse, atše chayobená bëtsá oyejuayá tsëngaftangbioca jashjanguana tsëngaftanga jányama, y tsëngaftangaftaca chaitsemna ora, batšá jóchnama chayobená.

<sup>33</sup> Atše, Bëngbe Bëtsá sëntseïmpadana, nda inétsama bënga ainaniñe tsabe ebionana chamotsebomnama, nyetsca tsëngaftangaftaca chaotsemnama. Chca chaotsemna.

## 16

### *Ubuátmënga jacheuayama*

<sup>1</sup> Atše sëntseboše tsëngaftanga jáuyanana Febe, Jesucristbeyeca bëngbe uabena, canýe tsabe entšá endmënama; cha chë Cencrea puebloca enefjuana ošbuáchiyënga endújabuachana.

<sup>2</sup> Tsábá cha šmochjofja, mo canýa Bëngbe Utabnábia quetsomñecá, ntšamo Bëngbe Bëtsabe entšanga entsamncá inýengaftaca jenofjana. Šmochjuájabuache ntšamo tbojtsajabotcá, er cha banga tonjújabuache; átsbioynaca.

<sup>3</sup> Atšbe cuenta Prisca y Aquila šmochjácheuaye, chë átšeftaca tbonjatrabajata, Cristo Jesusbiamama oservéniñe.

<sup>4</sup> Jobanámna bonjanprontana, atše jatsbocama, ndoñe chašmondóbama. Atše chama chata sentsatacheuaná; y ndoñe nýe atše, sinó nyets luarenache enefjuana ndoñe judiënga ošbuachiyëngnaca chca.

<sup>5</sup> Chë ošbuáchiyënga, chë Bëngbe Bëtsá jëtschuayama chatbe yebnentše jénefnama imuanëngnaca, šmochjácheuaye. Atšbe bonshana Epeneto šmochjachuaye; cha endmëna chë natsaná Asia luaroca Jesucristbeñe jtsošbuáchiyama.

<sup>6</sup> María šmochjachuaye; cha tsëngaftangbeñe bëtsá tojatrabajá.

<sup>7</sup> Chë cach atšcá judeocata Andrónico y Junias šmochjácheuaye. Chata canýe ora átšeftaca cárceloye bonjanëtámëna, y Jesucristbe ichmónëngbiamama chata puerta uamanata bonjamna, y atšbiamama más natsana tbojanontšé Jesucristbeñe jtsošbuáchiyama.

<sup>8</sup> Ampliato šmochjachuaye, atšbe bonshaná, er atšcá cha Bëngbe Utabnáftaca cánýiñe mo canýacá bondmëna.

<sup>9</sup> Urbano šmochjachuaye, chë bëngaftaca Cristbiamama oservéniñe trabajayá; y atšbe bonshana Estáquisnaca šmochjachuaye.

<sup>10</sup> Apeles šmochjachuaye; cha ba soye tonjinýanyé Jesucristbeñe puerta yošbuáchema; y Aristóbulbe yebnentšëngnaca šmochjácheuaye.

<sup>11</sup> Chë cach atšcá judeocá Herodión šmochjachuaye, y chë Narcisbe pamillentšana Bëngbe Utabnábeñe ošbuachiyëngnaca.

<sup>12</sup> Trifena y Trifosa šmochjácheuaye; chata Bëngbe Utabnabiamama puerta bondëtrabajá; y bëngbe bonshaná Pérsidnaca šmochjachuaye; cha bëtsá endëtrabajá, Bëngbe Utabnabiamama oservéniñe.

<sup>13</sup> Rufo, chë Bëngbe Utabnabiamama uámana trabajayá, šmochjachuaye, y chabe mamánaca; cha mo atšbe mamacá endmëna.

<sup>14</sup> Asíncrito, Flegonte, Hermes, Patrobas y Hermas šmochjácheuaye, y chë inýenga Jesucristbeñe ošbuáchiyënga chëngaftaca innénutanangnaca.

<sup>15</sup> Filólogo y Julia, Nereo y chabe uabena, Olimpas y nyetsca Bëngbe Bëtsabe entšanga chëngaftaca innénutanangnaca šmochjácheuaye.

<sup>16</sup> Nÿetscanga mo Jesucristbeyeca catšatangá šmochjenchuaye, jtenámochëse, ntšamo cach tšëngaftangbe pamíllanga puerte bonshanánaca šmondetsacheuanaycá. Nÿets luarenache enefjuana Crístbeñe ošbuáchiyënga cmontsacheuaná.

<sup>17</sup> Jesucristbeyeca catšátanga, atše cbontsaimpadana tšabá šmochjuáfšna y cuedado šmochtsebomna chë cányënga ínÿengaftaca contra chamotsemnama y ínÿënga Jesucristbeñe ošbuáchiyana chamotsajbanama imnétsamëngbiama; chëngna, chë tšëngaftanga ndaye šmojóyëngacñe buatëmbana soyëngama contra jtsóyebuambnayana.

<sup>18</sup> Er chca amënga, ndoñe ntsentsénana Cristo Bëngbe Utabná jtseservénana, sinó jtsamana ndayá cachënga tmojtsebošcá, nÿe cachëngbe cuerpama tšabá tojtsemncá; y tšabe y botamana palabréngaca chë paselo jáingñama yomna entšanga jáingñana, chëngbe ainaniñe chëngcá chamotsejuabnama.

<sup>19</sup> Nÿetsca entšanga tmojouena, chë Bëngbe Bëtsabe soyëngama ntšamo ínÿënga tcmo- jabuatambacá, tšëngaftanga corente šmnétsayaunanama, y chíyeca atše puerte oyejuayá tšëngaftangaftaca séntsemna. Atše séntseboše, tšëngaftanga tšabá chašmotsetátšëmbo jtsamana ntšamo tšabá yomncá, y ntšamo bacna soyënga jamamna chašmotsemna mo ndoñe cuaftsetatšëmbcá.

<sup>20</sup> Y Bëngbe Bëtsá, nda inétsama bënga ainaniñe tšabe ebionana chamotsebomnama, ndoñe bën y echanjama tšëngaftanga Satanás chašmoyëñjanama, mo cha tšëngaftangbe cucuatšine cuafjaboshjoncá. Atše séntseimpadana Bëngbe Utabná Jesús, chaoma tšabe bendicionënga tšëngaftangbeñe chaotsemnama.

<sup>21</sup> Timoteo, chë átseftaca trabajayá, tšëngaftanga cmontsacheuaná; y Lucio, Jasón y Sosípater, cach atšcá Judeoquënga, chëngnaca tšëngaftanga cmontsacheuaná.

<sup>22</sup> Atšnaca Tercio, chë Páblëbe cuenta quem tsbuanácha uabiamnayá, tšëngaftanga cbontsacheuaná, tšëngaftanga y átšnaca Bëngbe Utabnáftaca cánÿiñe mo canÿacá quetsomñecá.

<sup>23</sup> Gayo cmontsacheuaná; atše Pablo chabe yebnentše posada séntsebomna, y cha enduamana nÿetsca chë muentša ošbuáchiyënga tšabá júbuajana. Erasto, chë quem pueblentša crocénana bojanÿá, tšëngaftanga cmontsacheuaná, y Jesucristbeyeca bëngbe catšata Cuártënaca.

<sup>24</sup> Atše, Bëngbe Utabná Jesucristo séntseimpadana, cha chaoma tšëngaftangbeñe tšabe bendicionënga chaotsemnama. Chca chaotsemna.

*Quem tsbuanácha juapochócama, Pablo Bëngbe Bëtsábioye tbojtanchuá*

<sup>25</sup> Bënga sempre mochtsinÿanÿnaye Bëngbe Bëtsá puerte uamaná yomnama. Cha endobena jamama tšëngaftanga puerte chašmotsošbuáchema; y chca, cha echanjama ntšamo chë bënga fsëndabuayiná tšabe noticiënguiñe yomncá, ntšamo chë Jesucristbe buayenana soyënga yomncá, y ntšamo chë Bëngbe Bëtsá šojinÿanÿé ndegombre soyënga yomncá. Nÿets tempo mëntscoñama, Bëngbe Bëtsá chë soyënga entšanga ndoñe ton- jinÿanÿé, y chë causa chënga chë soye ndoñe ntsetatšëmbuana.

<sup>26</sup> Pero morna, ntšamo Bëngbe Bëtsabe juabna oyebuambnayënga tmojanabemcá, tojama bëtscá entšanga chë ndegombre soyëngama chamotsetatšëmbuama; Bëngbe Bëtsá, chë nÿets tempo vida bomná, tojanmandá entšanga nÿets luarënguenache chë ndegom- bre soyëngama chamotsetatšëmbuama, chënga chábeñe chamotsošbuáchema y ntšamo cha yobošcá chamotsamama.

<sup>27</sup> Nÿe canÿe Bëngbe Bëtsá endmëna, y cha nÿets osertánana endbomna. ¡Nÿetscanga chamotsinÿanÿná cha puerte bëtsá y uamaná yomnama, ndayá Jesucristo tojanmama! Chca chaotsemna.

# 1 Corintios

## *Pablo chënga jacheuayama*

<sup>1</sup> Atše Pablo, ndábioye Bëngbe Bëtsá tbojanchembo Jesucristbe ichmoná jtsemnama, Bëngbe Bëtsá chca yojánbošeyeca, cánýiñe chë Jesucristbeyeca catšata Sósteneseftaca,

<sup>2</sup> quem tsbuanácha sentsabiamná tšëngaftanga chë Corinto bëts puebloca Jesucristbeñe ošbuáchiyëngbiamama; ndëmuanýenga Cristo Jesúseftaca Bëngbe Bëtsá tojábiamama chabe entšanga nýe chábioye oservénënga, ndëmuanýenga Bëngbe Bëtsá tojáchembo chabe entšanga chašmotsemnama, chë nýe quem luarama enójuabnaye entšanguentšana luarenënga, Bëngbe Utabná Jesucristbioye tmojotšëmbonëngaftaca, Jesucristo nda yomna Bëngbe Utabná y chëngbe Utabná.

<sup>3</sup> Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y tšëngaftangbe ainaniñe tšabe ebionana chašmotsebomnama.

## *Bëngbe Bëtsá Jesucristbeyeca tojama tšëngaftanga ba tšabe bendicionënga chašmotsebomnama*

<sup>4</sup> Bëngbe Bëtsá tšëngaftangbiamama sempre sëndbëtsatschuanaye, er tšëngaftanga cánýiñe mo canýacá Cristo Jesúseftaca šmómnyayeca, Bëngbe Bëtsá tšëngaftangbeñe tojajuabó, tšëngaftangbe tšabiamama.

<sup>5</sup> Chca Crístoftaca šmómnyayeca, Bëngbe Bëtsá tojama tšëngaftanga chašmotsebomnama chábentsana nýetsca tšabe soyënga, tšëngaftanga obenana chašmotsebomnama cha jamëse, Bëngbe Bëtsabe soyëngama jóyebuambayama y chë soyëngama chacmësertama.

<sup>6</sup> Chca, ntšamo cbonjanabuayiynacá mo Jesucristbe ndegombre soyëngcá, tšëngaftángnaca ínýëngbioye tšabá šmojinýanýé ndegombre soyënga bëtsemnama, chë ntšamo jtsiyenama.

<sup>7</sup> Y chca, Bëngbe Bëtsá chabe entšanga inétsatsatnaye tšabe soyënguentsana tondaye quecmochatabuáshebena, Bëngbe Utabná Jesucristo quem luarentše yochtonýna tescama Bëngbe Bëtsábeñe jtsošbuáchiyëse chašmojtsobátmanëntscuana.

<sup>8</sup> Cha echanjama tšëngaftanga chábeñe corente chašmotsošbuáchema y ainaniñe bëts añemo chašmotsebomnama, ndayá tšëngaftangaftaca jamama cha yajuabnacá chaojapochocantscuana; chca, chë Bëngbe Utabná Jesucristo nýetsca entšangbiamama tšabá o ndoñe tšabá tmonjamama yochjayana te, ndocná chaondobená jayanana tšëngaftanga ndoñe tšabá šmonjama ca.

<sup>9</sup> Bëngbe Bëtsá nýets tempo jtsamana ntšamo tojašebuachenacá, y cha endmëna nda tcmojánachembo cánýiñe mo canýacá chašmotsemnama chabe Uaquiñá Jesucristoftaca, Bëngbe Utabná.

## *Choca ošbuachiyëngbeñe nýetscanga ndoñe cachcá montsanjuabná*

<sup>10</sup> Jesucristbeyeca atšbe catšátanga, tša cbontsaimpadana, chë ndayá Bëngbe Utabná Jesucristo nýetsca bëngbiamama yomnama, tšëngaftanga nýetscanga cachcá chašmotsejuabnama, y tšëngaftangbeñe ndoñe más báseftanga canýe soye y ínýenga inýe soye chamuatsjuabná. Y aiñe šmochtsiyena mo canýacá, nýetscanga cachcá jtsejuabnayëse y cachcá jamama jtsebošëse.

<sup>11</sup> Jesucristbeyeca atšbe catšátanga, atše chca sënjayana, er Cloebe yebnentšënga šmonjabëuenaye, tšëngaftangbeñe šmojtsenpenzenterama.

<sup>12</sup> Ntšamo sentsichamcá entsemna ndayá tšëngaftangbentše báseftanga šmojtsichamo: “Atše Páblëbe ustoná sëndmëna ca”; ínýëngna imojtsichamo: “Atšna Apólosbe ustoná

sëndmëna ca”; ínyënga: “Atšna Pédrëbe ustoná sëndmëna ca”, y ínyënga: “Atšna Cristbe ustoná sëndmëna ca” imojtsichamo.

<sup>13</sup> Chca šmojtsamama, jtsóbocanana mo cada básefta ošbuáchiyënga canye Cristo tmojtsebmncá. ¿Pablo yojamna nda tmojancrucificá tšëngaftangbe tšabiama? ¿O tšëngaftanga uabáinënga šmomna, atšë jótšëmbonëse, tšëngaftanga atšbe ústonënga bëtsemnana?

<sup>14</sup> ¡Bëngbe Bëtsá sëndbëtsatschuanaye atšë ndocná tšëngaftanguentsá tijanábayama; nye Crispo y Gáybioye aíñe!

<sup>15</sup> Chca, ndocná quenátobena jayanana, atšë jótšëmbonëse uabainá cha tojanoquedá ca, mo átšbeñe ošbuáchiyënga cuaftsemncá.

<sup>16</sup> Estéfanabe pamillentsëgnaca sënjanëbaye, pero ndoñe quetsatabouínyna inya tijanábayama.

<sup>17</sup> Er Cristo ndoñe chešnatanichmó ínyënga jubáyama, ndayá chë chabe tšabe noticiëngama entsanga jábuayenama. Ndoñe chešnatanichmó chë soyënga jayanama, corente osertana entsangbe soyënga jtsichámëse; chca, entsanga Crístbeñe chamotsošbuáchema, ndoñe chë atšbe osertánentšana palabrëngama, sinó nye chë buayenánama, Cristo cruzoca bëngbiama tojanóbanama.

### *Crístbeñe yomna Bëngbe Bëtsabe obenana y osertánana*

<sup>18</sup> Quem buayenánana, Cristo entsangbiama cruzoca tojanóbanama, chë pochocánënga jtsemnana tmojtsajnëngbioye jtsinyanana mo ndoñe corente juabna bomnëngbe soycá; pero bëngbiama, chë Bëngbe Bëtsá nyetsca tescama šochjátsebacangbiamna, quem buayenánana jtsinyanayana Bëngbe Bëtsabe obenana.

<sup>19</sup> Ntšamo Bëngbe Bëtsá chabe uabemana palabrënguiñe tojanayancá:

Atšë chanjama chë tša osertánëngbe osertánana tondayama chaondëtsoservénama; y chanjama chë ba soyëngama osertánëngbe osertánana tondayama chaondëtsámanama.

<sup>20</sup> ¿Ntsachetsá yojtsámana chë tša osertaná y chë puerte uatsjinýená tbojayana soyënga? ¿Ntsachetsá yojtsámana chë tša tšabá chë soyëngama juabnaya, morscá, y ínyëngaftaca enatsëtsnaye ora chëngbe ayëñjanayá tojayana soyënga? Ndegombre Bëngbe Bëtsá tojinyanýe, chë quem luarentša bëtš osertánánaca tmojayana soyënga tondaye yonduámanama.

<sup>21</sup> Bëngbe Bëtsá, nyets osertánana bomná quetsomñecá y puerte tšabá jtsejuabnaye, ndoñe tonjanalesenciá quem luarentša entsanga cha chamotsábuatmama, chë quem luarentšënga tša osertánënga tmojánayana soyëngama. Chamna, cha tšabá tbojanínynana chábeñe ošbuáchiyënga jätsebacana chë bënga fsëndabuayiyná soyëngama, masque ínyëngbioyna mo ndoñe corente juabna bomnabe soycá jtsinyanana.

<sup>22</sup> Judiënga tša jtsebošana y Bëngbe Bëtsábioye jtsotjanañana bëtš soyënga chaomama, chabe obenana jinyanýiyama; y ndoñe judiënga tša jtsenguayana chë puerte osertánëngbe soyënga jtsetatšëmbuama.

<sup>23</sup> Pero bëngna Crístbiama entsanga fsëndabuayiyná, chë ínyënga tmojancrucificabiama. Quem buayenánana chë judiënga ndoñe tšabá ntjéúananana. Y ndoñe judiënga mondbëtsejuabnaye chca yomna mo canye ndoñe corente juabna bomnabe soycá ca;

<sup>24</sup> pero bëngbiama, nyetscanga Bëngbe Bëtsá chabe entsanga chamotsemnana šojáchembëngbiamna, masque judiënga o ndoñe judiënga, Crístbeñe endmëna nyets Bëngbe Bëtsabe obenana y osertánana;

<sup>25</sup> er ndayá Bëngbe Bëtsá tojanmcá, Cristo cruzoca chaóbanama jalesenciase, banga jtsinyanana mo canye ndoñe corente juabna bomnabe soycá, pero ndegombre endmëna canye puerte más osertaná tojama soye, lempe ntšamo entsanga imotatsëmbuama. Y ndayá cha tojamcá masque bángbioye jtsinyanana mo canye tondaye obenabe soycá, ndegombre chë soye jtsinyanayana Bëngbe Bëtsá puerte más obenana yobomnana, nyets obenana ntšamo entsanga imobomnana.



<sup>26</sup> Jesucristbeyeca atšbe catšátanga, šmochtsejuabnaye ntšamo yojamnama, Bëngbe Bëtsá chabe entsanga chašmotsemnama tcmojánachembo ora. Tšëngaftangbentše nýe báseftanga tša osertánënga šmojamna, ntšamo chë osertánana bomnënga imomnama entsanga mondbetsejuabnaycá; y báseftanga šmojamna becá mando atšetanënga o uámana pamillentšënga.

<sup>27</sup> Pero Bëngbe Bëtsá, quem luarentše ndoñe tša osertánënga tojanabacacá, chca, cha jamama chë quem luarentša soyëngama tša osertánënga chamotsëuatjama; y cha, quem luarentše ndobenënga tojanabacacá, chca, chë obenana bomnënga chamotsëuatjama.

<sup>28</sup> Bëngbe Bëtsá quem luarentšana tojanbocacá ndayá tondaye yonduamancá y ndayá ínýënga imuabotencá; tojanbocacá ndayá tondaye yonduamancá, chca, ndayá quem luarentše tša iuamancá tondaye chaondëtsámanama.

<sup>29</sup> Y chca, Bëngbe Bëtsabe delante ndocná quenátobena jayanana tša bëtsá cha yomna ca.

<sup>30</sup> Bëngbe Bëtsá tojama bënga Crísoftaca cánýiñe mo canýacá jtsemnëse chamotsiyenama, y chábeyeca tojama bënga chamóyëngacñama chabe osertánana bomna soyënga; chábeyeca tojama bënga tšábënga chabe bomínýiñe chamotsemnama, chabe entsanga jtsemnana chamobenama, puerte tšábënga cach Bëngbe Bëtsacá, y atsebácanënga chamotsemnana.

<sup>31</sup> Y chca, ntšamo Bëngbe Bëtsabe uabemana palabrenguiñe endayancá: “Nda tojtseboše jayanama cha canýe uamaná yomna ca, chamna más tšabá cha bontsemna jayanama Bëngbe Utabná puerte uamaná yomna ca.”

## 2

### *Ntšamo Pablo Cristo crucificanábiamana chënga tojanabuayená*

<sup>1</sup> Pero, Jesucristbeyeca atšbe catšátanga, Bëngbe Bëtsabe ndegombre soyëngama tšëngaftanga jábuayenama sënjána ora, chca sënjanma ndoñe chë uámanëngbe palabrengaca, ni chë tša osertánëngbe palabrengaca.

<sup>2</sup> Y tšëngaftangacá sënjamna ora, ndoñe quetstéteboše nýe ndayíñnaca jatsjuabnayana, ndayá nýe Jesucristbeñe, nda bëngbe tšabiamana tmojanrucificá.

<sup>3</sup> Atše tšëngaftangbeñe sënjamna, mo canýa ba soyënga jamama ndobenacá, y mo canýa puerte auatjacá y tbojtsengmëmncá, chabe trabajo jamama ndoñe jobenayama juabnaye causa.

<sup>4</sup> Ntšamo cbonjanëtsësná y cbonjanabuayiyacá atše sënjanoyebuambá ndoñe chë tša osertánëngbe palabrengaca, tšëngaftanga jáyënjanama chiñe chašmotsošbuáchema; pero aíñe tcbonjanayënjaná, Bëngbe Bëtsabe Espíritu y chabe obenana tšëngaftanga jinýanýiyëse,

<sup>5</sup> chca, tšëngaftanga Bëngbe Bëtsabeñe chašmotsošbuáchema, ndoñe nýe entsangbe osertánanaca, sinó Bëngbe Bëtsabe obenanama.

### *Uámana Espíritbeyeca, Bëngbe Bëtsá jamana entsanga cha chamotsábuatmama*

<sup>6</sup> Pero, chë ya tmojashjáchënga Bëngbe Bëtsabeñe puerte jtsošbuáchiyama y chabe soyëngama corente jtsoertánama, chëngbeñe bënga fchandóyebuambaye becá osertánana bomna soyënga. Pero ndoñe quenátsmëna quem luarentša entsanga quem tempo mondbétsichamo soyënga, ni mora quem luarentše amëndayëngbe soyënga, ndëmuanýënga ndoñe bën y ndocna obenana bomnënga mochanjëftsoquéda.

<sup>7</sup> Y aíñe, chë bënga fsëndoyebuambná osertánana bomna soyënga endmëna chë Bëngbe Bëtsá quem luarentša entsángbiöye baytentscuana ndoñe tonjaninýanýé soyënga, y chca, entsanga baytentscuana chë soyënga ndoñe tmonjanábuatmana. Cha yojanjuabná chë soyënga chca yochtsanmënama, quem luare cabá cha ndëma ora, y yojanjuabná, chë soyëngaca bënga mochtsanobena puerte bëtsëtsanga y uámanënga jtsemnana, cháftaca chë nýetsca tescama yomna tšabe vida jtsebomnana.

<sup>8</sup> Quem Bëngbe Bëtsabe puerte osertánana bomna soyënga endmëna canÿe soye ndayá quem luarentša amëndayënga ndoñe ntsësertánana, er chënga aíñe matënjanësértase, Bëngbe Utabnábioye chënga ndoñe matmënjancrucificá, Bëngbe Utabná nda puerte bëtsá y uamaná yomna.

<sup>9</sup> Bëngbe Bëtsabe uabemana palabrënguiñe quem Bëngbe Bëtsabe puerte osertánana bomna soyëngama mëntsá endayana:

Cha imobobonshánëngbiamá Bëngbe Bëtsá tojaprontá soyënga, ndocná tonjinÿe, ni tonjouena y ni mo tonjajuabó ca.

<sup>10</sup> Pero Bëngbe Bëtsá quem soyënga chabe Espíritoftaca bënga šojanÿanÿé, er chë Espiritu lempe jtsetatšëmbuana, chë Bëngbe Bëtsabe soyëngama puerte totcá josértama yomna soyëngámñaca.

<sup>11</sup> Entšángbeñe ndocná quenátobena jtsetatšëmbuana ndayá entsabe ainaniñe tomnama, sinó nÿe chë entsabe espíritu, chë chábeñe yomná. Cachcá, nÿe Bëngbe Bëtsabe Espiritu jtsetatšëmbuana ndayá Bëngbe Bëtsá tojuabnacá.

<sup>12</sup> Y bëngna, Bëngbe Bëtsábíocana Espiritu tmojóyëngacñe, ndoñe canÿe quem luarentša espíritu, chca, bënga chašósertama chë Bëngbe Bëtsá tojama bënga chamotsebomna soyëngama, bëngbe tšabiamá cha jtsejuabnayëse.

<sup>13</sup> Bënga chë soyëngama fsëndoyebuambná, ndoñe chë quem luarentša entšángbentsána tifjuatsjinÿe osertánana bomna palabrëngaca, sinó chë Bëngbe Bëtsabe Espiritu šojabuatambá palabrëngaca. Chca, Bëngbe Bëtsábíocana soyëngama bënga fsëndabuayiná, Bëngbe Bëtsabe Espíritbentsána yóbocana palabrëngaca, chë Uámana Espiritu ainaniñe imobomñëngbioye.

<sup>14</sup> Bëngbe Bëtsabe Espiritu ndoñe tondbomná, chabe ainaniñe ndoñe ntjóyëngacñana chë Bëngbe Bëtsabe Espíritbíocana yóbocana soyënga, er chë entsabiamá chë soyënga jtsemnana mo canÿe ndoñe corente juabna bomnabe soyëngcá, y chabosertama cach ndoñe ntsobenana. Chca endmëna, er entšá jobenayana quem soyëngama jtsetatšëmbuama y josértama, nÿe chabe ainaniñe chë Uámana Espiritu tbojtsájabuachanëse.

<sup>15</sup> Pero nda aíñe chë Espiritu tbojtsebomna jtsobenana nÿetsca soyënga tšabá jinÿama chabosertama, y ndocná chë Espiritu ndoñe tbondbomná ntsobenana josértana ntšamo chë Espiritu bomná yomnama.

<sup>16</sup> Er Bëngbe Bëtsabe uabemana palabrënguiñe mëntsá endayana: “Ndocná quenátabatma Bëngbe Utabnabe juabna, chábioye jabuátëmbama chaotsobenama ca.” Pero bënga, chë ošbuáchiyënga, mondobena jajuaboyana ntšamo Cristo yojuabnacá.

### 3

#### *Jatrabájama enutanánënga Bëngbe Bëtsá jasérviamá*

<sup>1</sup> Pero, Jesucrístbeyeca atšbe catšátanga, atše ndoñe chiyatanobená jóyebuambayama, mo tšëngaftanga chë Uámana Espíritoftaca mandánënga šmojatsmëncá, sinó nÿe cachënga tšabá jtsomñama juabnënga bomna entšangbioycá, mo basetemëngbioycá, Cristbe soyëngama josértama ndobenënga.

<sup>2</sup> Mo canÿe bebmacá, chabe basetëmbioye nÿe létsiye jafšiyana y paselo jabmuánama sananga, chë básetema chcana jasama cabá ndoñe ntsobenana causa, cachcá, atše cbonjanabuatambá Bëngbe Bëtsabiamá nÿe chë más paselo josértama soyëngama, y ndoñe inÿe soyënga más totcá josértama soyënga, er tšëngaftanga ndoñe quešmënjatobena chca soyëngama josértana. Y ni mora, tšëngaftanga quešmátobena Bëngbe Bëtsabe soyëngama josértana, chë josértama más totcá yomna soyëngama;

<sup>3</sup> er tšëngaftanga cabá šmojtsama, nÿe ntšamo cach tšëngaftanga tšabá jtsomñama tšëngaftangbe juabnënga yomncá. Y tšëngaftanga ínÿengaftaca cabá yapa šmojtsenántšaboše y nÿe ínÿëngbioye jayënjanama soyënga šmojtsamëntscuana, tšëngaftanga šmojtsama nÿe ntšamo cach tšëngaftanga tšabá jtsomñama tšëngaftangbe

juabnënga yomncá, y chca, tšëngaftanga šmojtsiyena mo chë nÿe quem luarama enójuabnaye entšangcá.

<sup>4</sup> Er canÿa: “Atše Páblëbe ustoná sëndmëna ca”, y ínÿana: “Atše Apólosbe ustoná sëndmëna ca” tojayana ora, chca jtsamana mo chë nÿe quem luarama enójuabnaye entšangcá.

<sup>5</sup> Tšëngaftanga chca šmojamama, atše šontsemna tšëngaftanga jájtayana: ¿Ndayá Apolos yomna? ¿Ndayá Pablo? Chatna co nÿe Bëngbe Bëtsábioye oservénata bondmëna, ndátbeyeca tšëngaftanga Jesucristbeñe šmojtsošbuaché, y bëndata cada ona fsënjama chë Bëngbe Bëtsá šojanÿanÿé trabajo.

<sup>6</sup> Atšna, mo nda jajañe jénaye cuafjuatbontsacá, tšëngaftangbeñe sënjanbojatsé chë trabajo, Bëngbe Bëtsabe soyëngama jábuayenama; y Apolos, mo nda chë jajañe matënguiñe bėjaye cuaftse buešcñacá, enjantrabája cach atše sënjanbojatsé chiñe; pero Bëngbe Bëtsá, ntšamo matatémënga chauájua endbetsamcá, tojama banga tšëngaftanguentše Jesucristbeñe chamotsošbuáchema.

<sup>7</sup> Ntšamo, chë jená y chë matënguiñe bėjaye buešcñayá ndoñe yapa ntsámanana chiñe shajuanënga chaóboconama, nÿe Bëngbe Bëtsá aíñe, cachcá, nda Bëngbe Bëtsabiana entšanga jábuayenama trabajo tojabojatsé y nda chentšana tojášhango cach trabajuiñe jóntšama, ndoñe ntjamana entšanga Jesucristbeñe chamotsošbuáchema; nÿe Bëngbe Bëtsá chca jamana.

<sup>8</sup> Chë jená y chë matiñe bėjaye buešcñayá cach trabajuiñe jtsentšénana, y chatna mo trabajayatcá jtsámanana; y cada ona juácanana ntšamo chabe trabajo tomncá.

<sup>9</sup> Bëndata fsëndmëna trabájayata Bëngbe Bëtsabiana oservéniñe, y tšëngaftanga šmondmëna mo Bëngbe Bëtsabe jajañcá, ndayentše cha yojtseboše tšabe jaja saná chaóboconama, y šmondmëna mo chë cha yojtsejebuana bëts yebncá.

<sup>10</sup> Er Bëngbe Bëtsá atšbe tšabiana jtsejuabnayëse, chë trabajo šjabonÿé, y atše mo canÿe puerte tšabe jebuanacá, canÿe yebna ndayiñe chaotsécuatjonama tojapor-macá, sënjanbojatsé chë trabajo, Bëngbe Bëtsabe soyëngama tšëngaftangbeñe jábuayenama. Chentšana inÿa, mo chë inÿe yebna jebuaná tojabojatsé jajebuama chiñe más jatsjebuama nda tojatontšecá, cach atše sënjanbojatsé trabajuiñe tojanontšé. Pero cada ona botamana chaotsantješna ntšamo chë trabajo yojtsamama.

<sup>11</sup> Mo chë cánÿabentšana inÿe trabajayacá, ndoñe ntsobenana chë yebna jajebuama tojanbojatsé cha chë yebna chaotsécuatjonama tojanpormañe inÿe soye cachcá chaoservema jatspórmana, cachcá, ndocná chaondëtsabuatambá inÿe soyënga, nÿe ntšamo Jesucristbeñe soyënga yomncá aíñe, chë ntšamo atše natsana sënjanabuatambacá.

<sup>12</sup> Chë Jesucristbiana más uámana soyënga buatëmbayá jtsemnana mo chë castellano, midio y inÿe uámana soyëngaca yebna jebuanacá; y chë Jesucristbiana nÿe nduámana soyënga buatëmbayana mo chë niñëbenga, butšajësha y tëshenjñësheca yebna jebuanacá.

<sup>13</sup> Y Cristo chaojésabo te, Bëngbe Bëtsá echanjínÿanÿiye ntšamo cada cánÿabe trabajo yomnama. Cha chë te íñeshca chca echanjínÿanÿiye, y chë íñeshca, Bëngbe Bëtsá echanjinÿe y echanjínÿanÿiye ndaye trabajo cada ona tojamama.

<sup>14</sup> Ntšamo cada cánÿabe trabajo yojtsámanama jtsetatšëmbuama Bëngbe Bëtsá chaojinÿe ora, cha chabe trabajo aíñe yojtsámana ca queojayanëse, chë tšabe trabajayá Bëngbe Bëtsábiocana canÿe uacanana soye echanjóyëngacñe, er cha jtsemnana mo canÿe entšacá, nda canÿe yebna tojtsejebuana jtsejuinÿama ndoñe paselo tondmëna soyëngaca.

<sup>15</sup> Pero chë te cánÿabe trabajo nÿe batšá yojtsámanama Bëngbe Bëtsá íñeshca chaojinÿanÿese, chora chabe trabajo echántsemna mo chë jtsejuinÿama paselo tomna soyëngaca jebuanabe soyëngcá, chentšana nÿets yebna jtsejuinÿana. Chë jebuaná jtsachana, pero chabe trabajo lempe jobuétsana. Cachcá, chë Bëngbe Bëtsabiana trabajo tojtsamá, nÿe batšá oservena trabajo, cha echanjobenaye atsbocaná jtsemnana, masque lempe ntšamo tojamcá tondaye queochaisoquéda.

16 ¿O tšëngaftanga ndoñe šmondëtatšëmbo nyetscanga cányiñe Jesucristbeñe ošbuachiyëngcá, mo chë Bëngbe Bëtsabe bëts yebncá šmomnama, y tšëngaftanguentšë Bëngbe Bëtsabe Espiritu yomnama?

17 Nderado nda tojama, tšëngaftanga nyetscanga cányiñe Jesucristbeñe ošbuachiyëngcá jtsemnana chaotsopochocama, Bëngbe Bëtsá chábioye bochantsepochoáca, er chë Jesucristbeñe ošbuachiyëngcá cányiñe imomnënga, jtsemnana mo chë Bëngbe Bëtsabe bëts yebncá, chabe entšanga nye chábioye jaserviama; y tšëngaftanga chca šmondmëna.

18 Ndocná cachá chaondëtsenoíngña. Nderado nda tšëngaftanguentšá tojtsejuabná cha tša osertaná yomna ca, ntšamo quem luarentša entšanga mondbëtsejuabnaye ntšamo canye puerte osertaná inëtsemnana, cha bontsemna jóbemama mo canya ndabiama quem luarentša entšanga chamuayana cha corente juabna ndbomná yomna ca, chca, ndegombre corente osertaná jtsemnana chaobenama.

19 Er chë quem luarentša entšanga tša osertánënga imotátšëmbo soyënga, Bëngbe Bëtsabe bominyiñe yomna mo chë corente juabna ndbomnabe soycá. Bëngbe Bëtsabe uabemana palabrënguiñe mëntšá endayana: “Bëngbe Bëtsá chë tša osertánënga jáyëñjanana, ndayá cachënga ínÿenga jáingñama tša osertánánaca tmojtsama soyëngaca ca.”

20 Y mëntšánaca endayana: “Bëngbe Utabná endëtatšëmbo chë tša osertánëngbe juabnënga tondayama yondoservënama ca.”

21 Chíyeca, ndocná chaondëtsichamo corente uamaná yomna ca, ndaye entšabe ustoná tomnama, er lempe ntšamo šmobomncá, Crístbeñe ošbuáchiyënga bëtsemnana, tšëngaftangbe tšabiama endmëna, y nyetscanga chë tcmojujabuachëngnaca cachcá.

22 Lempe tšëngaftangbe soye endëtsomñe: ndayá Páblëbeyeca yomncá, Apólosbeyeca, Pédrëbeyeca, ndayá quem luarentše yomncá, ndayá yomncá ainá tcojtsemna ora, tcojóbana ora, ndayá mora yomncá y chë más chcoye yochtsemncánaca.

23 Y tšëngaftanga Crístbënga šmondmëna, y Cristna Bëngbe Bëtsábia.

## 4

### *Jesucristbe ichmónëngbe trabajo*

1 Entšanga entsamna bëngbiama jtsejuabnayana bënga fstsemna Cristbe uajabuáchanënga y Bëngbe Bëtsabe soyëngama jtsabuátambayama trabajo bomnënga, chë Bëngbe Bëtsá baytentscuana entšángbioye ndoñe tonjaninÿanyé, pero mora aíñe tojinÿanyé soyënga jtsabuátambayama trabajo bomnënga.

2 Chca, nda canye trabajo tojtsebojanÿabiamna, chabe mandayá jtsobátmanana cha aíñe tšabe palabra bomná chaotsemnana.

3 Atšbe bariëna, tondaye quenátamana, ntšamo tijamcá šmojinÿe y ndoñe tšabá tijama ca šmojayanëse, o inÿe entšanga cachcá tmojayanëse mo canye tribunaliñcá. Ni cach atše ndoñe chca quetsátama, jtsetatšëmbuana ntšamo atšbe trabajuama tijayancá ndegombre tayojtsemnana.

4 Atšbe ainaniñe ndocna juabna quetsátsbomna atše chašuyanama bacna soye tijama ca, pero chca ndoñe quenátayana, ndegombre Bëngbe Bëtsabe delante ndocna bacna soye ndbomná atše stsemna ca. Er Bëngbe Utabná endmëna nda atšbe trabajo yonÿá y nda ndegombre yobena jayanama atše tšabá o ndoñe tšabá tijamama.

5 Chíyeca, tšëngaftanga ndoñe quecmátamna jinÿana y jayanana ínÿenga ndoñe tšabá tmonjama ca, chë nÿa chama tempo cabá ndóshjanguëntscuana, Bëngbe Utabná chama chaojésabo ora. Cha chaojésabo ora, puerte tšabá echanjínÿanyÿiye chë iytëmencá yomna soyëngama, mo ibetiñe cuaftsemncá, y botamana echanjínÿanyÿiye, mo binÿniñcá, ndayá jamama nye chëngbe ainanoca entšanga tmojajuabocá. Y chora Bëngbe Bëtsá cada entšabiama echanjayana tšabe soyënga, ntšamo tbojtsomerecencá.

<sup>6</sup> Jesucristbeyeca atšbe catsátanga, chë soyëngama tšabá jábuayenamna, atše sënjama ntšamo Apolos y atše tifjatrabájama botamana chašminyama, y chca sënjama tšëngaftangbe tšabiama, ntšamo bëndata tifjamentsana chašmuatsjinyama jtsiyenana nye ntšamo Bëngbe Bëtsabe uabemana palabrenguiñe iuayancá, y ndocná tšëngaftanguentsá canye entsabiama chaotsenábotamnaye, y ín'yabiama ndoñe tšabá chauátoyebuambnama.

<sup>7</sup> Er, ¿nda chë ín'yengbiama más uámanënga tšëngaftanga cmojtšabiamná? ¿Y ndayá šmobomna, Bëngbe Bëtsá ndoñe tcmonjatsatá soye? Y tšëngaftanga chca chašmotsebmomna cha tojanmëse, ¿ndáyeca šmojtšenabotamná mo Bëngbe Bëtsabe tšetana soyënga ndoñe tontsemncá, y nye cach tšëngaftangbeyeca šmojonyëncá?

<sup>8</sup> Tšëngaftanga šmojtsejuabná ya lempe ntšamo cmëjbotcá Bëngbe Bëtsábicocana šmojtsebmomna ca, y lempe ntšamo jtsebošama šmojtšobencánaca ca. Mo reyënga cuaftsemnëngcá cmojtšabiona, bëngbentsana tondaye ntsëjbotcá. Malaye tšëngaftanga mo reyëngcá šmojtsemna, Crístoftaca cányiñe jtsemándayëse; chca, bëngnaca tšëngaftangaftaca jtsemnama, cányiñe jtsemándayëse.

<sup>9</sup> Atše šontsinyana, bënga chë Cristbe ichmönënga Bëngbe Bëtsá šojábiamna mo chë nyetscangbiama más nduamanëngcá, mo chë jóbanama yojtšamna entsangcá. Nyetscanga chë Bëngbe Bëtsá tojábiamënga bëngbioye jtsënyayana mo ndoñe cachca entsanga fstsemncá; angelënga y entsángnaca cachcá bëngaftaca montsama.

<sup>10</sup> Bënga, Cristbiamna oservena causa, quem luarentša entsangbiama fsëntsinyana mo corente juabna ndbomnëngcá; chë cuenta, tšëngaftanga šmojtsejuabná Cristbe soyëngama corente osertánënga šmomna ca. Bënga fsëndmëna chë entsangbe bominyiñe ndocna obenana ndbomnënga; y tšëngaftangna šmojtsejuabná puerte obenana bomnënga šmomna ca. Tšëngaftangbioye ín'yënga puerte uámanënga y bëtsétsanga jtsabi-amnayana, pero chënga bëngbioye jtsëbuayënjana.

<sup>11</sup> Y mëntscoñama, bënga šontsabuashebebianana saná, ndayá jofšiyama y entsayá. Entšanga bëngbioye bacá jtsaborlánana, y tondaye yebna queftsátsbmomna.

<sup>12</sup> Y bënga puerte jabuache fsëndëtrabája cach bëngbe cucuatšëngaca. Entšanga šojóyanguango ora, Bëngbe Bëtsá fchandbëtseimpadana cha chaoma chënga tšabe bendicionënga chamotsebmomna. Bënga chamosufrima ín'yënga tmojtšama ora, bënga chë soye fchandbëtsoboyaye.

<sup>13</sup> Inyënga bëngbiama bacá tmojtsoyebuambná ora, jtsababuán'yeshanëse fsënduamana jtëjuana. Quem luarentša entsangbe bominyiñe bënga jtsemnana chë puerte nduámanënga, mo chë quem luarentša basurëshëngcá, chë quem luarentša entsanga tondayama ndoservénënga, mo chë quem luarentša tsengacá; y chca endmëna mëntscoñama.

<sup>14</sup> Quem soyënga ndoñe quecbatëbuabiamná tšëngaftanga chašmotsëuatjama, sinó ndayá jábuayenamna mo cach atšbe basëngbioycá, atšbe bonshánënga.

<sup>15</sup> Er masque tšëngaftanga mallajta abuátambayënga chašmotsóbomñe, jacúntama ntjobenaycá, Cristbiamna chacmotsabuátambama, ndoñe banga quešmátabamna tšëngaftangbiama mo taitangcá, Cristo Jesúsbeñe jtsošbuáchiyama tcmojanëjabuachama. Nye atše sëndmëna mo taitacá tšëngaftangbiama, mo ošbuachiyëngcá, er atše natsana tcbonjanabuayená chë tšabe noticiënga Jesucristbiamna, y tšëngaftanga chiñe šmontsanošbuaché.

<sup>16</sup> Chíyecna, cbontsaimpadana ntšamo atše tijamcá chašmotsamama.

<sup>17</sup> Chama Timoteo tšëngaftangbioye sëntsichamná, atšbe bonshaná, canye aíñe tšabe palabra bomná; Bëngbe Utabnábeñe tojanošbuachéyeca, atše Cristbiamna sënjanbuayiyiná ora, mo atšbe uaquiñacánaca cha endmëna, ntšamo chabe ošbuáchiyana yomnama. Cha echanjama tšëngaftanga chašmuatenójuaboma ntšamo atše tšëngaftangbeñe tsjoyenama, Crístbeñe ošbuachiyacá, ndayama atše nyets tempo ošbuáchiyënga sëndbetsabuatambaycá nyets luare ošbuáchiyënga enefjuanenache.

<sup>18</sup> Tšëngaftanguentše báseftanga ya šmojatsjuabná puerte uámanënga šmojtsemna ca, er šmojtsejuabná atše stsauatja tšëngaftangbioye jama jányama ca.

<sup>19</sup> Pero Bëngbe Bëtsá chašojalesenciase, sentsobátmana betesco tšëngaftangbioye jama jányama. As chjinýe ntsache obenana imobomna chë Bëngbe Bëtsabe entsangcá jtsiyenama tša uámanënga imomna ca juabnayënga, y ndoñe nýe ntšamo jayanama imobencá.

<sup>20</sup> Er Bëngbe Bëtsá canýe ošbuachiyabe ainaniñe tojtsemánda ora, chca jtsinýnana ndoñe nýe ntšamo tojtsichámuama, ndayá Bëngbe Bëtsabe obenana chábeñe tojtsemnama.

<sup>21</sup> ¿Tšëngaftanga ndayá más šmattseboše: atše chayá tšëngaftangbioye jaucácanama, o chayá tšëngaftangbioye jányama puerte bonshanánaca y ntsetšatjaycá tšëngaftanga jauyanama?

## 5

### *Ndayá cuanjama canýe boyabása shembásaftaca bacna soye amáftaca*

<sup>1</sup> Ndegombre nýets luariñe entsótatšëmbo tšëngaftanguentše yojtsemna canýa, shembásaftaca bacna soye amá, y ntšamo cha yojtsamcá puerte bacna soye yojtsemna; ni chë Bëngbe Bëtsábioye nduabuátmënga chca ntsamana: canýe entsá cachabe mamamnáftaca bacna soye yojtsama.

<sup>2</sup> Y tšëngaftanga cabá šmojatsjuabná corente tšábenga šmomna ca, masque chca tšëngaftangbeñe yojtsopasánëse. Tšëngaftanga cmontsamna puerte ngménaca jtsemnana, tša uabouana soye cha yojtsama causa. Canýe entsá chca tojamáftacna, tšëngaftanga cmontsamna jamana cha ndoñe más tšëngaftangaftaca chaondenútanama mo ošbuachiyacá.

<sup>3</sup> Y atšna, masque tšëngaftangaftaca choca ndoñe quetsátsmëna, atšbe juabna choca tšëngaftangaftaca entsemna; y chca atšbe espíritoca sëntsemnayeca, Bëngbe Utabná šojëtsanatšetá mándoca, sënjajuabó y sëntsetatšëmbo ntšamo tšëngaftanga cmojtsamnama, chë entsá chca tojamáftaca.

<sup>4</sup> Tšëngaftanga chašmojënefjna ora, chentše atšbe espíritoca tšëngaftangaftaca atše chántsemna, y atšbe espíritu chentše echántsemna Bëngbe Utabná Jesusbe obenánaca.

<sup>5</sup> Y chora tšëngaftanga cmontsamna jamándana chë entsá ya ndoñe más tšëngaftangaftaca mo ošbuachiyacá chaondenútanama, mo Satanasbe cucuatšinë cha cuafjaboshjoncá, chca, chë quem entsá nýe cachá tšabá jtsomñama juabnënga chaotsopochocama, y chca, Bëngbe Utabná cachiñe chaojésabo ora, chabe espíritu atsbocaná chaotsemnama.

<sup>6</sup> Tšëngaftanga šmojtsejuabná puerte tšábenga y uámanënga šmomna ca, pero šmojtseleséncia canýa tšëngaftanguentše chca chaotsamama. Chca ndoñe tšabá quenátsmëna. Tšëngaftanga ya šmondëtatšëmbo, ntšamo chë nýe batšá levadura endbama, nýets arninýá chauábochema; cachcá, tšëngaftanguentše canýa tša bacna soye chca tojama ora, nýetscangbiana ndoñe tšabe soyënga jóbocnana.

<sup>7</sup> Chíyeca, tšëngaftanga cmontsamna, chca uabouana bacna soye tojamá jtabocnana, cha ya ndoñe más tšëngaftangaftaca mo ošbuachiyacá chaondenútanama; y chora tšëngaftanga šmochántsemna mo tsëm arninýacá, ndocna levadúraca, chë bacna juabnëngaca ya ndëmandánënga šmojtsémnayeca. Ndegombre tšëngaftanga chca šmondmëna, er Bëngbe Bëtsá tojama tšëngaftanga tsëm vida chašmotsebmomnama. Bashco fiesta ora, oveshá tmojanóba, Israeloca entsanga perdonánënga chamotsemnama. Cachcá Cristo, mo chë oveshacá, tojanóbana bacna soyënguentsána bënga játsebacama.

<sup>8</sup> Ntšamo chë judiënga chë fiesta ora mondbamcá, nýets levadura ojamnana cachcá jonýayana, cachcá, bënga šontsamna jtsajbanana oyenana bacna soyënga ínýëngbiana jamama jtsebošëse, y ndaye bacna soye jtsamëse, ntšamo tempo imojanamcá. Ntšamo chë judiënga chë fiestiñe nýe levadúraca ndëpormana tandëse mondbetsesaycá, cachcá,

bënga šontsamna jtsiyenana nyetsca soyënga ainaniñe ndocna bacna juábnaca jtsamëse, y ndegombre yomncá jtsóyebuambnayëse y jtsamëse.

<sup>9</sup> Chë inye atšbe tsbuanáchañe tcbonjáuyana, chë boyabása o shembásaftaca bacna soye amëngaftaca tondayama chašmondëtsencuénta ca.

<sup>10</sup> Y chca ndoñe quetstëtseboše jáuyanana nya tondayama chašmondëtsoyebuambná nyetsca chë quem luarentšënga boyabása o shembásaftaca bacna soye amëngaftaca, chë nye cachëngbiana bëtská soyënga jtsebomnana tša bošëngaftaca y atbëbanëngaftaca, y chë cachëngbe pormana soyënga diosënga yomnana jtsejuabnayëse adorayëngaftaca ca; er nya chca jamamna, tšëngaftanga cmattsamna quem luarentšana jëftsebocanana.

<sup>11</sup> Ntšamo chora sënjanayancá endmëna ndayá tondayama ntsencuéntayana, chë Crístbeñe ošbuachiyá yomna ca tojayanáftaca, y boyabása o shembásaftaca bacna soye tojtsama, o nda nye cachabiana bëtská soyënga jtsebomnana tša tojtseboše, o chë cachabe pormana soyënga diosënga yomnana jtsejuabnayëse tojtsadorana, o yapa tojtsayatsená, o yapa tojtsetmó, o tojtsatbëbana. Chca entšángaftacna, ni mo šmuatjótbema chëngaftaca cányiñe jasama.

<sup>12-13</sup> Atse ndoñe quešnátsmëna jayanana chë ndošbuáchiyënga, chë bëngaftaca ndoñe mondbénutananga, aíñe o ndoñe tšabá tmonjamama. Bëngbe Bëtsá echántsemna nda chëngbiana yochjayana ntšamo tmojamcá tšabá o ndoñe tšabá bëtsemnana, tšëngaftanga ndoñe. Ndegombre nye chë ošbuáchiyënga tšëngaftangaftaca imnënutanangbiana cmontsamna chca jayanana. Chcasna, šmochjama ntšamo Bëngbe Bëtsabe uabemana palabrënguiñe endayancá: “Tšëngaftanga cmontsamna, chca bacna soye amá tšëngaftangbentšana jtabocnana ca.”

## 6

### *Ošbuáchiyënga jendemándama tojtsemna ora*

<sup>1</sup> Canye tšëngaftanguentša ošbuachiyá inye ošbuachiyabiana canye demanda tojtsebomna ora, ¿cha nanjá chë ndošbuáchiyënga mandadëngbioye chë soye chamojandmanama? ¿Ndáyeca chca nanjama, y ndoñe chë Bëngbe Bëtsabe entšángbioye nanjá chabe demanda chamouenama?

<sup>2</sup> Tšëngaftanga ndegombre šmondëtatšëmbo, Bëngbe Bëtsabe entšanga mochjayanama quem luarentša entšangbiana tšabá o ndoñe tšabá tmonjamama. Y chënga quem luarentša entšangbiana chca jayanama tmojtsobenëse, ¿ndoñe montsobena más base soyëngama chca jayanama?

<sup>3</sup> Tšëngaftanga ndegombre šmondëtatšëmbo chë angelëngbiámnaca tšabá o ndoñe tšabá tmonjamama bënga mochjayanama. Chcasna, bënga más jtsobenana chë quem luarentše jëftsiyenama soyëngama chca játayanana.

<sup>4</sup> Y chcase, tšëngaftangbeñe chca demandënga chë quem luarentše jëftsiyenama soyëngama tojtsemna ora, ¿ndáyeca šmatjátëbuayana chë ošbuáchiyëngbiana tondaye tmontsámama entšanga, chë soyënga chamojandmanama?

<sup>5</sup> Chca sënjayana tšëngaftanga chašmotsëuatjama: ¿O tšëngaftanguentše ni mo canya yondmëna corente osertaná, ošbuachiyëngbeñe demandënga chamojandmanama?

<sup>6</sup> Pero ndoñe chca: ošbuachiyëngbeñe demandënga tojtsemna ora, mandadëngbioye jana chë soyënga chamojandmanama. Y chca jamana ndošbuáchiyënga mandadëngaftaca.

<sup>7</sup> Y tšëngaftangbeñe nye demandënga jájandmanama tojtsemna ora, tšëngaftangbiana ya canye puerta bacna soye jtsemnana. ¿Ndáyeca ndoñe šmattsóboyaye ínÿenga bacá cmojtsaborlana ora? ¿Ndáyeca ndoñe cachcá šmatjonÿaye ínÿenga cmojtsabiatbëbana ora?

<sup>8</sup> Pero cach tšëngaftangaftacna inÿetšá copasana, ínÿengbioye bacá jtsaborlánana y jtsabiatbëbanana, y tšëngaftangcá Crístbeñe ošbuachiyëngbioynaca.

<sup>9</sup> ¿Tšëngaftanga ndoñe šmondétatšëmbo, chë bacna soye amënga Bëngbe Bëtsabe amëndayoye ndoñe mochanjámashënguama? Ndoñe matenoíngñana. Ni chë boyabása o shembásaftaca bacna soye amënga, ni chë cachëngbe pormana soyënga diosënga yomna ca jtsejuabnayëse adórayënga, ni cachëngbe boyá o shema ínÿaftaca íngñayënga, ni chë boyabásënga mo shembasengcá jtsinÿnama bošënga, ni chë boyabásënga inÿe boyabásengaftaca bacna soye amënga,

<sup>10</sup> ni chë atbëbanënga, ni chë nÿe cachëngbiama bëtscá soyënga jtsebomnama tša bošënga, ni chë tša tmoyënga, ni chë uayátsenayënga, ni chë ínÿengbiama bacna soye jtsamëse imnëtsatbëbanënga, chënga nÿetscanga ndoñe quemochatobenaye Bëngbe Bëtsabe amëndayoye jamashjnama.

<sup>11</sup> Y tempo báseftanga tšëngaftanguentsënga chca šmojamna, pero Bëngbe Bëtsá tšëngaftangbe bacna soyëngama tcmojaperdoná, y chca entsemna mo bebënénga cuaftsemncá; cha tojama tšëngaftanga chabe entšanga chašmotsemnama, nÿe cha chašmotseservénama, y tojama tšëngaftanga mo tšabengcá chabe bominiñe chašmotsemnama. Lempe chca Bëngbe Bëtsá, tojama ndayá Bëngbe Utabná Jesucristo tojanmama y ndayá Bëngbe Bëtsabe Espiritu tojamama.

### *Bëngbe cuerpo chaotsemna Bëngbe Utabná jtseservénama*

<sup>12</sup> Mondbétsichamo: “Atšbiama entselesenciana ndayánaca jamama, ndayama Bëngbe Bëtsá ndocá tonjayana ca.” Pero básefta soyënga jtsamana ndoñe atšbe tšabiama ntsemnana. “Atšbiama entselesenciana ndayánaca jamama ca”, pero ndoñe quichatslesencia ndaye sóyecnaca nÿets tempo mandaná jatsmënana.

<sup>13</sup> Mëntsánaca mondbétsichamo: “Saná uafsbiana y uafsbía saná chaóyëngacñama ca.” Pero Bëngbe Bëtsá canÿe te echanjama chë uta soye chaotsopochocama. Bëngbe Bëtsá entšabiama cuerpo ndoñe tonjanma, boyabása o shembásaftaca bacna soye cha chaotsamama, sinó chë cuérpoca Bëngbe Utabná bënga chamoservema, y Bëngbe Utabná bëngbiama tšabe bendicionënga chaotsamama.

<sup>14</sup> Y Bëngbe Bëtsá, nda tojama Bëngbe Utabná cháuatayenama, bëngbiámna chabe obenánaca echanjama chámuatayenama.

<sup>15</sup> ¿Tšëngaftanga ndoñe šmondétatšëmbo, Crísoftaca cánÿiñe mo canÿacá šmomnama yomna mo tšëngaftangbe cuerpo chabe cuerpentša soye cuaftsemncá? Tšëngaftangbe cuerpo Crísbioye jaserviama endmënayeca, tšëngaftangbe cuerpo jtsemnana mo Cristbe cuerpentša soycá. ¿Ntsamo atše chjátobena atšbe cuérpoca, chë ndayá yomna mo Cristbe cuerpentša soycá, canÿe bacna vida bomna shembásaftaca bacna soye jamana, y chca atšbe cuerpo jabemana mo chë shembásabe cuerpentša soye cuaftsemncá? ¡Ndoñe, ndegombre ndoñe!

<sup>16</sup> ¿O tšëngaftanga ndoñe šmondétatšëmbo, canÿe entšá canÿe bacna vida bomna shembásaftaca tbojéninÿena ora, chë útata jóbemana mo canÿacá? Er Bëngbe Bëtsabe uabemana palabrënguiñe boyabása y shembása tbojéninÿenama mëntsá endayana: “Chë útata mo canÿacá bochántsema ca.”

<sup>17</sup> Pero canÿe entšá Bëngbe Utabnáftaca cánÿiñe mo canÿacá tojtsemna ora, jtsemnana mo chë útata cach canÿe espíritu tbojtsebomncá.

<sup>18</sup> Nÿa ndocna te canÿe boyabása o shembásaftaca bacna soyënga šmattsama. Nderado ndaye inÿe bacna sóynaca nda tojama ora, sempre jamana ndayánaca chabe cuerpentšana shjoye; pero boyabása o shembásaftaca bacna soye jamama, lempe jamana nÿe cachabe cuérpoca, y chë causa, chca jamëse, cachabe cuerpama más bacna soyënga jtsamana.

<sup>19</sup> ¿Tšëngaftanga ndoñe šmondétatšëmbo tšëngaftangbe cuerpo yomna mo canÿe yebncá Uámana Espiritbiana, cha tšëngaftangbe ainaniñe chaotsiyenama Bëngbe Bëtsá



tojánmayeca? Ndegombre tšëngaftangbe cuerpo ndoñe tšëngaftangbe soye quenátsmëna, sinó Bëngbe Bëtsabe soye.

<sup>20</sup> Chca endmëna, er Cristo bënga játsebacama tojanóbana ora, yojamna mo cha bëtsá cuafjopagacá tšëngaftanga Bëngbe Bëtsábenga chašmotsemnama. Chíyeca, chë tšëngaftangbe cuerpëngaca chašmojtsama soyëngaca šmochtsinÿanÿnaye Bëngbe Bëtsá puerte uamaná y bëtsá bëtsemnama.

## 7

### *Jobouamayama jábuayenama*

<sup>1</sup> Mora chanjóyebuambaye ndayá tšëngaftanga átšbioye šmojuábobemama. Ndegombre, canÿe boyabásabiama más tšabá endmëna ndoñe chaondobouamá.

<sup>2</sup> Pero choca banga boyabása o shembásaftaca bacna soye amënga imojtsemna causa, tšabá entsemna cada boyabása chabe shema chabotsóbomñe, y cada shembása chabe boyá.

<sup>3</sup> Boyábioye bontsemna jamana chabe shembiana lempe ntšamo jamama ibomncá, boyá bëtsemnama; y chabe shémnaca cachcá chabe boyabiama chaoma.

<sup>4</sup> Chë shembe cuerpo ndoñe nÿe cha cánÿabiama ntsemnana, sinó chabe boyabiámnaca. Cachcá, chë boyabe cuerpo ndoñe nÿe cha cánÿabiama ntsemnana, sinó chabe shembiámnaca.

<sup>5</sup> Ni boyá, ni shema ndoñe chabondëtsejuabná jtsenbiátšbuana. Aíñe chca copodena, pero nÿe chë útata chca básefta tescama tbojenóyeunase, Bëngbe Bëtsáftaca jencuéntama jtsentšénama. Pero chentšana chë útata entsamna cachiñe cánÿiñe jtëtsmënana, chca, Satanás ndoñe chaondobená jamama bacna soye chaócochënguama, cachënga jenomándama ndoñe tmontsobena causa.

<sup>6</sup> Atše chca sentsichamo, tšëngaftanga jábuayenama, ndayá jamama šmojtselesenciana, y chca ndoñe chašmondëtsamama jamëndama.

<sup>7</sup> Y atšbe bariëna, atšbe juabna entsemna malaye nÿetscanga chë soyënguiñe mo atšcá šmattsemna. Pero Bëngbe Bëtsá cada ona obenana tbojatšetá tšabe soyënga jamama, Crístbeñe ošbuáchiyënga jujabuáchama, ínÿenga canÿe soyama, ínÿengna inÿe soyama.

<sup>8</sup> Chë cabá ndbouamnënga y viudanga sentsëtsëtsná, chëngbiana tšabá yojtsemna ntjobouamaycá joquédana, atšcá.

<sup>9</sup> Pero chca jtsemnama cachënga jenomándama ndoñe tmontsobenëse, chënga entsamna jtsóbouamayana, er más tšabá endmëna jtsóbouamayana, y ndoñe nÿe boyabásabiama o shembásabiama tša nÿets tempo jësejuabnayana.

<sup>10</sup> Pero chë bouamnënga sentsamënda shema chabe boyábioye ndoñe cachcá chabondetsonÿá. Chca ndoñe nÿe atše quetsatamënda, ndayá cach Bëngbe Utabná.

<sup>11</sup> Pero, shema cachcá chabe boyábioye tbojesonÿase, cha bontsemna ntjobouamaycá jtsomñana o chabe boyáftaca cachiñe jtenútanana. Y cachcá, chë boyá ndoñe quebnátsmëna chabe shema cachcá jesonÿayana.

<sup>12</sup> Chë ínÿenga chjáuyana, atšbe juabncá y ndoñe Bëngbe Utabnabe soycá, nderado canÿe ošbuachiyá tbojtsebomna canÿe shema Crístbeñe ndošbuachiyá, pero chë shema tojtseboše cháftaca joquédana jtsiyenama, cha chë shémbioye ndoñe cachcá chabondetsonÿá.

<sup>13</sup> nderado canÿe ošbuachiyá tbojtsebomna canÿe boyá Crístbeñe ndošbuachiyá, pero chë boyá tojtseboše cháftaca joquédana jtsiyenama, chë shema ndoñe chaondëtsejuabná cha cachcá jesonÿayana.

<sup>14</sup> Er Bëngbe Bëtsá tojama, canÿe shembása ošbuachiyá chabe entšá chaotsemnama, nÿe chábioye chabotseservénama, y chca, chánaca jtsejuabnayana chë shembásabe boyá Crístbeñe ndošbuáchiyabiama mo chabiama oservena entšacá, cha chëngbeñe mo canÿe pamillëcá jatrabájama tojtseboše ora; y cachcá, chë boyá ošbuachiyábeyeca Bëngbe

Bětsá jtsejuabnayana chabe shema Crístbeñe ndošbuáchiyabiamá mo chabiamá oservena entšacá, cha chěngbeñe mo canye pamillécá jatrabájama tojtseboše ora. Er chca ndoñe tontsemnēse, chě básenga muántsemna ndošbuachiyatbe básenga, Běngbe Bětsáftaca tondaye ndbomnēga. Ndoñe chca yondménayeca, canya o nyets uta bētsētsatbe ošbuáchiyama, Běngbe Bětsá jtsejuabnayana chě básengbiamá mo chabe entšangcá.

<sup>15</sup> Pero chě boyá o shema Crístbeñe ndošbuachiyá cachcá jtsenónyayama tša tojtsebošese, chca chaboma. Chora, chě ošbuachiyá ndoñe ntsotocánana chě ínŷaftaca cachiñe jtētenútanama, er Běngbe Bětsá tcmojáchembo natjēmbana chašmotsiyenama.

<sup>16</sup> Chca šmochjama, er aca shema ħntšamo cattsetátšēmbó, tacuatjobenaye acbe boyá jayēnjanana Crístbeñe chaotsošbuáchema, y chca, atsboaná chaotsemnana? o aca boyá ħntšamo cattsetátšēmbó, tacuatjobenaye acbe shema jayēnjanana Crístbeñe chaotsošbuáchema, y chca, atsboaná chaotsemnana?

<sup>17</sup> Masque ntšámnaca, cada ona chaotsiyena jtsamēse ntšamo chě Běngbe Utabná tbojatšetá obenana yomncá, cada ona ndayá jamama Běngbe Bětsá tbojachembcá. Chca atše nyets luare ošbuáchiyēga enefjuanenache sēndbētsamēndaye.

<sup>18</sup> Nderado Běngbe Bětsá cánŷabioye tbojachembo, y cha ínŷengbeyeca chě más delicadentše base bobachtema tētšená tojtsemna, ntšamo chě judiēga monduamancá, cha ndoñe chaondētse nobiamná mo ndoñe judío cuafjatsmēncá; y nderado Běngbe Bětsá cánŷabioye tbojachembo, y cha ndoñe chca tētšená tontsemnēse, cha ndoñe chaondētsejuabná tētšená jatsmēnana, ntšamo chě judiēga monduamancá.

<sup>19</sup> Er ndayá iuámána, ndoñe quenátsmēna chca tētšená jtsemnana o ndoñe, ndayá ntšamo Běngbe Bětsá yomandacá jtsamana.

<sup>20</sup> Cada ona bontsemna jtsiyēñana, ntšamo yojoyencá, chabe entšá chaotsemnana Běngbe Bětsá tbojanchembo ora.

<sup>21</sup> Běngbe Bětsá tcmojanchembo ora, nyets tempo ínŷabiamá oservená cojamnēse, chama ndoñe cattsenócochinŷena. Pero nderado tojtsemna ntšámose jashjáchama ndoñe más chca ntsemnana, cach acbiamá jatrabájama, as chca cochjama.

<sup>22</sup> Er chě nŷe ínŷabiamá nyets tempo oservená yojamná, Běngbe Bětsá chabe entšá chaotsemnana tbojanchembo ora, cha mora ošbuachiyacá, jtsemnana canya ya ndoñe más bacna soyēga jamama juabnēngaca mandaná, sinó Běngbe Utabnabiamá oservená. Cachcá, chě nŷe cachabiamá trabajayá yojamná, Běngbe Bětsá tbojanchembo ora, mora cha nyets tempo Crístbe oservená jtsemnana.

<sup>23</sup> Cristo bēngbiamá tojanóbana ora, yojamna mo cha bētscá cuafjopagacá, bēnga Běngbe Bětsabe entšanga chamotsemnana. Ndoñe šmatjaleséncia nŷe entšangbe juabnēngaca nyets tempo mandánēga chašmotsemnana, y Běngbe Bětsabiamá chacmotsebnétjomba.

<sup>24</sup> Chcasna, Jesucristbeyeca atšbe catsátanga, cada ona bontsemna Běngbe Bětsáftaca jtsiyēñana, ntšamo yojoyencá Běngbe Bětsá tbojanchembo ora.

<sup>25</sup> Y chě ndēbouamna shembásengbiamá, chēnga aíñe o ndoñe yontsamna jobouamayamna, atše chama ndoñe Běngbe Utabnabe canye mando quetsátbomna, pero chanjayana ntšamo atše tsjuabnacá. Běngbe Bětsá atšbe tšabiamá tojanjuabóyeca, entšanga montsobena jtsejuabnayana aíñe tšabe palabra bomná chiñe atše tsmēnana.

<sup>26</sup> Atše šontsinŷana, entšá ibojtsemna jtsomñana nŷe ntšamo mora yotsomñcá, er bēnga mora montsiyena puerte padecena soyēnguiñe.

<sup>27</sup> Shema tcobomnēse, ndoñe cachcá catjēftsonŷaye; y ndoñe tcondbomnēsna, ndoñe catjátsēnguaye.

<sup>28</sup> Tcojobouamase, bacna soye ndoñe quecátama; y nderado canye tobiasē tojobouamase, cach bacna soye ndoñe quenátama. Pero chě tmojtsobouamangna padecena soyēnguiñe mochanjoyena quem luarentše chamojēftsemnēntscuana, y atše sēntseboše chēnga jujabuáchama chca jatiyenama ndoñe chaondētsemnana.

<sup>29</sup> Jesucristbeyeca atšbe catšátanga, ntšamo sěntseboše jayanamna měntšá entsemna: Cristo quem luaroye yochjésabo orscama ya nŷe batšá entsájamna. Chíyeca, morscana y nŷets tempo más chcoye, chě bouamněnga entsamna jtsiyenana mo ndoñe bouamněnga tmontsemncá, o měntšá, entsamna jtsentšénana Běngbe Bětsabe soyěnguiñe, y ndoñe nŷe chě bouamná bětsemnama tbojtsemna soyěnguiñe.

<sup>30</sup> Cachcá, chě puerte ngménaca tša ošachiyiñe imomněnga, entsamna jtsiyenana mo ndoñe chca tmontsemncá; y chě puerte oyejuayěnga, chamotsiyena mo ndoñe chca tmontsemncá; chě soyěnga buamnayěnga chamotsiyena mo tondaye chěngbe soye tontsemncá.

<sup>31</sup> Chě quem luarentša soyěngaca jtsiyenama imojtsentšéněnga entsamna jtsiyenana mo ndoñe chca tmontsamcá, er quem luare ntšamo běnga mora monduabuatmncá, pronto echanjochněngo.

<sup>32</sup> Atše sěntseboše tšěngaftanga ndoñe chašmondětsenocochinŷenama. Canŷe entšá ndoñe bouamná tontsemna ora, jtsobenana jtsentšénana Běngbe Utabnabe soyěngama jtsejuabnayama, y ntšamo oyejuayá cha jabemama;

<sup>33</sup> pero chě bouamná nŷets tempo jtsenócochinŷenana quem luarentša soyěngama, jtsiyenama, y ntšamo chabe shema oyejuayá jtsebomnama;

<sup>34</sup> y chca, cha uta soyiñe canŷe ora jtsentšénana. Chě nděbouamna shembása y chě tobiáše bontsobena jtsentšénana Běngbe Utabnabe soyěnguiñe sempre jtsejuabnayama. Chěnga mondobena jtsentšénana Běngbe Bětsá jaserviama, ndayá chěngbe cuérpoca y chěngbe espíritoca tmojamama. Pero inŷetšá, chě bouamna shembásana, nŷets tempo jesenócochinŷenana quem luarentše vida jtsebomnama soyěngama, y ntšamo chabe boyá oyejuayá jtsebomnama.

<sup>35</sup> Atše chca cbontsětsětná tšěngaftangbe tšabiama, y ndoñe jaměndama ba soyěnga jamama ndoñe chašmondětsobenama, ndayá ntšamo tšabá yomncá chašmotsiyenama, y nŷe Běngbe Utabná jtseservénama chašmotsentšénama.

<sup>36</sup> Nderado nda tojtsejuabná chabe uatsěsnaye tobiášeftaca jtsobouamayama ibo-jtsemna ca, chca jamama chě tobiáše ya bětsá tojtsemnayeca, y chca jamama tša tšabá yojtsemna ca tojtsejuabnase, cha bontsemna jamana ntšamo tojtsebošcá. Chaot-sobouamá. Chca tojama ora bacna soye ndoñe ntsamana.

<sup>37</sup> Pero nderado inŷa, tondaye obligacióncaca tontsemna y lempe ntšamo tojtsebošcá cha tojtsobena jamama, cha tšabá tojajuabó y chabe ainaniñe corente tojtsetátšěmbo, ndoñe ntsobouamayana tšabá yomna ca, cha tšabá chca jtsamana.

<sup>38</sup> Chcasna, chě tobiášeftaca tojtsobouamá chana, canŷe tšabe soye jamana; pero chě ndoñe cháftaca tonjobouamá chana, canŷe más tšabe soye jamana.

<sup>39</sup> Chě shembása bouamná jtsotocánana chabe boyáftaca siempre jěftsiyenana, chě boyá vida tojtsebomněntscuana; pero chě boyá tojóbaněse, cha jtsobenana cachiñe jtobouamayana, nda cha tojtsebošáftaca, pero chca chaoma mo canŷa Běngbe Utabnáftaca cánŷiñe mo canŷacá quetsomñecá.

<sup>40</sup> Pero atše jayanamna, cha más oyejuayá nántsemna ndoñe tontóbouamase; y sěntsejuabná, átšnaca tsbomna chě Běngbe Bětsabe Espíritu chašotsebuayiynama.

## 8

### *Uátšěmbona saná entsangbe pormana soyěngama*

<sup>1</sup> Mora chanjóyebuambaye ndayá tšěngaftanga atše šmojatjama, ndayá jtsesayama, chě tempo inŷěnga cachěngbe pormana soyěnga, diosěnga yomna ca jtsejuabnayěse jadórama tmojanátšěmbona soyěngama. Běnga mondětátšěmbo běnga nŷetscanga osertáněnga imomnama. Canŷa tbojtsosertana ora, cha nderado nanjájuaboye, chca bětsemnama puerte uamaná cha yojtsemna ca, pero canŷa, inŷěnga tojtsababuánŷeshana ora, cha jtsobenana chěnga becá jujabuáchana.

<sup>2</sup> Nderado nda tojtsejuabná ndegombre canye soye yotátšëmbo ca, cabá ndoñe yontsetátšëmbo ndayá jtsetatšëmbuama ibojtsemncá.

<sup>3</sup> Pero nderado nda Bëngbe Bëtsábioye tbojtsebbonshana, Bëngbe Bëtsá chábioye jtsabuatmana mo chabe entšacá.

<sup>4</sup> Y chë tempo ínÿenga cachëngbe pormana soyënga, diosënga yomna ca jtsejuabnayëse jadórana uátšëmbona soyëngamna, atše šcuayana: bënga corente mondétatšëmbo chë chënga innétsadorana soyënga, diosënga yomna ca jtsejuabnayëse, ndegombre ndoñe dios quemátsmëna y nÿe canÿa Bëngbe Bëtsá endmëna.

<sup>5</sup> Pero masque celoca y quem luarentše chamomna entšangbiamna “diosënga ca” uabáinënga (ntšamo ndegombre endmëncá, banga quem luarentša tsbanánoca obenánaca mondmëna, entšangbiamna diosënga ca ubuátmënga, y banga bëts mándoca entšangbiamna “utabnënga ca” uabáinënga),

<sup>6</sup> bënga chë ošbuáchiyëngbiamna nÿe canÿa Bëngbe Bëtsá endmëna, Bëngbe Taitá, ndábentšana nÿetsca soyënga yóbocana, y nÿe nda jtsejservénama bënga imoyena. Y nÿe canÿe Utabnánaca endmëna, Jesucristo, ndábeyeca nÿetsca soyënga yomna, y cach bëngnaca imomna.

<sup>7</sup> Pero nÿetsca ošbuáchiyënga ndoñe chca quemátstatsëmbo. Básefta entšanga, Crístbeñe cabá ntsošbuáchiye ora, imojanamana ndaye sanánaca juatšëmbonana, chë chënga imojanjuabná diosënga yojamna ca soyënga jadórana; chënga, chca uatšëmbonana tmojttesá ora, jtsejuabnayana chca uatšëmbonana bëtsemnama, y ainaniñe juabnënga jtsebomnana ndoñe tšabá tmonjamama, chana tmojase causa. Chënga, ndayá tempo imojánamama, ndoñe quemátobena tšëngaftangcá jtsejuabnayana, chcana jasana bacna soye ndoñe yondmëna ca.

<sup>8</sup> Ndegombre, ndayá bënga tmojttesacá ndoñe ntjamana bënga Bëngbe Bëtsábioye más chamuatobéconama. Bënga Bëngbe Bëtsabe bominiñe ndoñe quemochátsmëna más tšábenga aíñe tmojttesama; ni ndoñe chcanga, ndoñe tmontsesá causa.

<sup>9</sup> Pero cuedado šmochtsebomna, ndayá jamana yolesenciánama tšëngaftanga corente tšabá šmotatšëmbuama, ndayánaca jatsmana, y chca causa ínÿenga, chë soyënguiñe más batšá ošbuáchiyënga y osertánënga, ntšamo tšëngaftanga šmojtšamcá chamuatsmama, y chentšana, chëngbe ainaniñe juabnënga chamotsebomna y chëngbioye chaotsëtsësná ndoñe tšabá tmonjama ca.

<sup>10</sup> Er, aca chë soyëngama tatšëmbuá, nderado tcojót'bema jasama canÿe luarentše, canÿe soye ndayama entšanga dios yomna ca jtsejuabnayëse adórayentše, y canÿe Crístbeñe ošbuachiyá tojtsebomna ainaniñe juabnënga ndoñe tšabá tonjamama, chca tojáseyeca, aquëcá chë soyëngama ndoñe yondétatšëmbo causa, y cha nderado chentše cojttesama tcojinÿëse, chë soye nanjobenaye chábioynaca jañëmuana chë saná jasana, chë tempo chë soyëngama tmojanátšëmbona saná.

<sup>11</sup> Y chca aca, chë soyëngama ntšamo betatšëmbuama tcojamama, catjama chë Jesucrístbeyeca acbe catsata, chë ndoñe corente ošbuachiyá, y ndoñe aquëcá chë soyëngama corente tatšëmbuá, cha pochocaná chaotsemnama, er chabe ainanentše echántsemna juabnënga canÿe bacna soye tojamama, chë saná tojasama. Chca nderado cányabioye catjama, ndabiamna Cristo tojanóbana, cha jatsbocama.

<sup>12</sup> Jesucrístbeyeca acbe catsatbiamna chca bacna soye tcojama ora, chca causa cha canÿe soye tojama, ndayama chabe juabnënga ainaniñe chabotsatsësná ndoñe chca chaondétsama ca; y chca, chentšana tša tojesejuabná cha canÿe bacna soye tojamama, acna canÿe bacna soye jamana, ndoñe nÿe chë catsatbiamna, ndayá cach Crístbiámnaca.

<sup>13</sup> Chiyeca, nderado ndayá atše stsesama, atše tsjama Jesucrístbeyeca atšbe catsata chaoma canÿe soye y chca jamama chabiamna canÿe bacna soye tojtsemnëse, más tšabá nántsemna ndocna te chë soye atše ntjasana, chca, atše ndoñe jatsmama cha canÿe bacna soyiñe chaótsatsama.

## 9

*Jesucristbe ichmónëngbe derecho*

<sup>1</sup> Ndegombre endmëna, atše ndayánaca jamana stselesenciánama y Moisesbe leyëngaca ndoñe más mandaná sëntsemnana. Cach ndegombre endmëna, atše canye Jesucristbe ichmoná tsmënama y Jesús Bëngbe Utabná tijinyama; y cach tsëngaftanga mora ošbuáchiyënga jtsemnëse, šmondmëna ndayá tojóbozna Bëngbe Utabnabiama atšbe trabajuentsana.

<sup>2</sup> Masque inyënga atšbiama ndoñe quematsjuabná atše canye Jesucristbe ichmoná tsmëna ca, tsëngaftangbiamna aiñe chca endmëna; er tsëngaftanga Crístbeñe ošbuáchiyënga šmondmënama y Bëngbe Utabnáftaca cányiñe mo canyáca šmondmënama, puerte tsabá šmontsinyanyná atše Jesucristbe canye ichmoná tsmënama.

<sup>3</sup> Mëntšá chanjayana chë atše ndoñe tsabá tijama ca imojtsichámëngbiama:

<sup>4</sup> Ndegombre bënga nyets derecho fsëndëtsóboñe jtsobátmanama tsëngaftangbentsana, chë tchojujabuáchëngbentsana, bëngbe trabajuama saná o ndayá jofšiyama chašcuacaredadama.

<sup>5</sup> Y bëngnaca derecho fsëndëtsóboñe canye shema ošbuachiyá jtsebomnana y bëngaftaca cha jëftsbetšama inye luaroye fstsajna ora, ntšamo chë Jesucristbe inye ichmónënga, Bëngbe Utabnabe catsátanga y Pédrënaca mondbetsamcá.

<sup>6</sup> ¿O nye Bernabé y atše šojtsëtocana cabëndatbe cucuátšeca jatrabájana vida jtsebomnana, y ndoñe derecho fsëntsebomna ošbuáchiyënga chašotsacuédanama, Bëngbe Bëtsabiama trabájayama?

<sup>7</sup> ¿Ndëmua mo canye soldadcá tojtsoservená, ndayá tbojtsájabotama cachá nantsatopagana, vida jtsebomnana? Ndocná canye jajañe uvas betiyënga ntjájena, chentša uvasëšangá ndoñe ntjuasama. Ndocná oveshënga ntsanýenana, chë tojabuatëba létšiyentsana ndoñe ntjofšiyama.

<sup>8</sup> Ntšamo atše muentše sëntsichamcá ndoñe nye entsangbe juabna quenátsmëna; y Moisesbe leyíñnaca cachcá endayana,

<sup>9</sup> er chabe leyíñe mëntšá endayana: “Aca canye toróftaca shajuana tmojtsatbaná luariñe chacojstetrabája ora, ndoñe catjuanguëtšenaye ca.” Y chca ndoñe quenátayana Bëngbe Bëtsá nye toronga inétsanýena ca,

<sup>10</sup> sinó inye más bëts soye; chca endayana ndayá ndegombre bënga, chë Bëngbe Bëtsabiama soyëngama abuyayinayíñe trabájayënga cha šnetsanýena ca. Chca tmojanábema bëngbiama, er chë fshantse arayá y chë meshënga atbanayá, entsamna chca jamana jtsobátmanëse, chë tmojátabe shajuanentsana batsá jójyëngacñama.

<sup>11</sup> Y chca, bënga chë tsabe noticiëngama tchojábuyanase, y chca, Bëngbe Bëtsábiocana tsabe bendicionënga chašmotsebomnana bënga tifjama, ndoñe yapa tanandátsmëna tsëngaftanga jótjañana, chë šmobomna soyënguentsana bënga jëftsiyenama chašcuatšatama.

<sup>12</sup> Inyënga derecho tmojtsebomna tsëngaftanga jótjañana chë šmobomnentsana chašmuacaredadama, tsëngaftangbeñe chëngbe trabajuama, as bënga más derecho fstsebomna chca jamama.

Pero bënga tondaye chechatamëndá, bënga chë derecho bëtsebomnayeca. Chca játamamna, bënga lempe fsëntsoboyá, chca, bënga tondaye ntjátamama, y chë causa entsanga ndoñe chašondëtsayaunana, bënga chë tsabe noticiënga fstsabuayíñá ora.

<sup>13</sup> Tsëngaftanga šmondëtatšëmbo, Bëngbe Bëtsabe bëts yebnoca trabájayënga Bëngbe Bëtsabiama oservëniñe, mondbóyëngacñe chënga jasama, ndayá entsanga Bëngbe Bëtsá jadórana chabe bëts yebnoye tmojiyëbo sananguentsana. Y chë Bëngbe Bëtsá jadórana soyënga amënga, altaroca, chë juatšëmbonama luarentše, chënga jasana ndayá chentše tmojuátšëmbona soyënguentsana.

14 Cachcá, Bëngbe Bëtsá tojamandá, chë tšabe noticiënga abuyaynayëngna, vida jtsebomnamna lempe ntšamo tojtsëjabotcá chamóyëngacñe ca, chë tšabe noticiënga abuyaynayama.

15 Pero atše ndocna te chiyaisemandá ínÿënga chca chašmotsecuedánama, atše chë tšabe noticiënga abuyaynayá bétsemnama chca derecho tsbómnyeyca, y cach ndoñe mora quem soye quechatëbuabiamná, tšëngaftanga ndayánaca atše chašmuatšetama. Atšbiamna más tšabá nántsemna jóbanana, y ndoñe ntjalesénciana ínÿa chaoma atše cach atšbiamna oyejuayá ndoñe ntjátsmënana, ínÿëngbentsana soyënga stjóyëngacñe causa.

16 Atše ndoñe quetsatsjuabná atše canÿe bëtš soye stsama ca, chë tšabe noticiënga stsabuayiyama, er atše obligaciónaca sëntsemna chca jtsamama, Bëngbe Bëtsá chama šojanchémboyeca. ¡Tša lastemcá atšbiamna nántsemna, chë tšabe noticiënga ndoñe sëntsabuyayinasel!

17 Chíyeca, atše chë tšabe noticiënga stsabuayiyá nÿe atše chca jamama stsebóšeyeca, atšbe uacanana soye ya stsebomna; pero atše chca stjama, y ndoñe tontsemna nÿe atše chca jamama stsebóšeyeca, masque chca, atše stsama, ndayá jtsamama Bëngbe Bëtsá šojanbonÿecá.

18 Y chca, atšbe uacanana soye endmëna atše oyejuayá jtsemnana chë tšabe noticiënga abuyaynayama, ošbuachiyëngbentsana atše vida jtsebomnama tondaye ntjatoyëngacñecá; chca, atše tondaye quetsátama chë tšabe noticiënga abuyaynayama tsbomna deréchoca, chë atšbe trabajuentšana vida jtsebomnama.

19 Atše, masque ndocna entsábeyeca nÿets tempo mandaná quetsátsmëna, puerte nduamaná sënjobema, mo canÿa nÿets tempo ínÿabeyeca mandanacá, nÿetscanga jaserviama, chca, atše chca jtsamëse, jobenayama becá entsanga, ntšamo tojopodecá, jayënjanama Crístbeñe chamotsošbuáchema.

20 Chë judiëngbiamna atše sënjama chaitsiyena mo chëngcá jtsamëse y jtsejuabnayëse, chca, atše jobenayama chënga jáyënjanama Crístbeñe chamotsošbuáchema. Y chë Moisesbe léyeca mandánënga imoyenëngbiamna, atše chëngcá sënjobema, masque ndegombre chë Moisesbe léyeca mandaná ndoñe quetsátiyena; chca sëndbama chënga jáyënjanama Crístbeñe chamotsošbuáchema.

21 Pero chë Moisesbe léyeca ndëmandánënga oyenëngbiamna, atše chëngcá sënjobema, chënga jáyënjanama Crístbeñe chamotsošbuáchema, masque ndegombre endmëna, atše šontsemna jamana ntšamo Bëngbe Bëtsá šomandacá y ntšamo Cristo šomandacá.

22 Chë nÿe batšatema ošbuachiyëngbiamna y Bëngbe Bëtsabe soyëngama nÿe batšatema osertánëngbiamna, atše sënjama chaitsiyena mo chëngcá jtsamëse y jtsejuabnayëse, chca, atše jobenayama jamama chënga sempre Crístbeñe chamotsošbuáchema. Y lempe chca, chë atše jamana ntšamo nÿetscanga imomncá atše chaitsemnana, endmëna atše jobenayama báseftanga jáyënjanama Crístbeñe chamotsošbuáchema.

23 Atše lempe chca sëndama, bëtscá entsanga chë tšabe noticiënguiñe chamotsošbuáchema, y chca, atše atsbocaná chaitsemnana y chëngcá atše chayóyëngacñama, chë atsebácanënga Bëngbe Bëtsá yochjatšataye tšabe soyënga.

24 Tšëngaftanga šmondëtatšëmbo, canÿe luaroye jashjanguama entsanga tmojótjajo orna, banga jotjajuana, pero nÿe canÿa chë uacanana soye jóyëngacñana. Chcasna, mo chë uacanana soye jóyëngacñama tmojótjajëngcá, tšëngaftanga cmontsamna jtsiyenana, chë Bëngbe Bëtsábiocana uacanana soye josháchiñama.

25 Nÿetscanga chë tmojótjajënga ínÿënga jáyënjanama, chënga jopróntana nÿetsca soyënguiñe jtsenomándayëse, chca, canÿe uacanana soye, tsbuanachéngaca uapormana coronësha juayëngacñama; y chësha betesco jtsanctana. Pero bënga ndoñe; bënga mondoyena Crístbiamna soyënga jtsamëse, Bëngbe Bëtsábiocana ba tšabe soyënga mo uacanancá jóyëngacñama, y chë soyënga nÿetsca tescama bënga mochanjëftsebomna.

<sup>26</sup> Y atšna, atšbe bariëna sëndëntšena Bëngbe Bëtsá jtseservénama, ndoñe mo canya ínÿengbiöye jáyëñjanama tojotjajuacá, chë ndëmoye jashjanguama yomnama ntsetatšëmbcá; y cach ndoñe mo nda tojtsepeliá orcá, chora, cha nÿe ínÿoye chabe buacu-atšënga tojtsëtsana y chë ínÿabe cuerpoye ndoñe.

<sup>27</sup> Mo canÿe tšabe peliayacá, chabe cuerpo jätsetšenana y chca chë cuerpo corente jtsemándayana, atše ndoñe quetsatsleséncia chë atše tšabá jtsomñama atšbe ainantšsa juabnënga chašotsemándama; y chca, Crístbiöye jtseservénëse chamotsiyenama ínÿengbiöye stjabuayená chentšana, Bëngbe Bëtsá chašotsaboté chabe uacanana soye josháchiñama, cha ndoñe tšabá tijaservé causa.

## 10

### *Cach entsangbe pormana soyënga ndoñe chamondëtsadoránama jábuayenama*

<sup>1</sup> Jesucrístbeyeca atšbe catšátanga, atše sëntseboše tšëngaftanga chašmotsetátšëmbo bëngbe tempsca bëts taitanga judiënga, chënga nÿetscanga Bëngbe Bëtsá canÿe jantsetësheca benache yojaninÿanÿná, y chënga nÿetscanga, chë Buángana ca uabaina mar bejayëjana tmojánachnëjna, chiñe mo bojojuiñe cuaftsomñcá.

<sup>2</sup> Chë jantsetësheca Moisés imojanëstonama, y chë mar bejayëjana tmojánama, chënga tmojanóbema Moisesbe ústonënga.

<sup>3</sup> Chënga nÿetscanga tmojanse cachca saná, chë Bëngbe Bëtsá celocana tojanichmó saná;

<sup>4</sup> y nÿetscanga tmojanofšé chë Bëngbe Bëtsá tojanma chë peñësentšana chaóbozna béjaye. Cristo chëngaftaca yojtsemna jtsanÿenama chënga imojtsajnëntscuana, y ntšamo chë peñësentše chëngaftaca tojanopasacá, yojaninÿanÿná Cristo chënga yojtsanÿenama.

<sup>5</sup> Masque chca, banga chënguentsënga ntšamo tmojanmama Bëngbe Bëtsá ndoñe yontsoyejuaye; y chë causa, Bëngbe Bëtsá tojanma chënga chamóbanama chë entsanga ndoyenentše.

<sup>6</sup> Lempe chca tojanopasá bënga jinÿanÿiyama y jábuayenama ntšamo inopása entsanga bacna soyënga jamama tmojtseboše ora, bënga chca jamama ndoñe chamondëtsebošama.

<sup>7</sup> Chiyeca, tšëngaftanga ndoñe šmattsadorana entsangbe pormana soyënga, ndayama ínÿenga jtsejuabnayana diosënga yomna ca, ntšamo báseftanga israeloquënga tmojanmcá. Ntšamo Bëngbe Bëtsabe uabemana palabrënguiñe chëngbiama endayancá, chënga canÿe ternera castellánoca tmojanpormá ora, mo dios cuaftsemncá jadórama: “Entšanga tmojanotbiama jasama y jatmuama, y chentšana tmojantsbaná joboyeuama ca”.

<sup>8</sup> Boyabása o shembásaftaca bacna soyënga ndoñe šmattsama, ntšamo báseftanga chënguentsënga tmojanmcá, y chë causa, nÿe canÿe te, uta bnëtsana y unga uaranga entsanga tmojanóbana

<sup>9</sup> Bacna soyënga ndoñe šmattsama, jinÿama buetatescama Bëngbe Utabná uantado yochjëftsemnana y ndoñe šochanjacastígayama. Báseftanga chënguentsënga chca tmojanma, y chë causa tmojanóbana mëtscuayëngaca ftëtšenënga.

<sup>10</sup> Bëngbe Bëtsabe contra ndoñe šmattsóyebuambnaye, ntšamo báseftanga chënguentsënga tmojanmcá, y chë causa, chë ángel obanayá tojanma chënga chamóbanama.

<sup>11</sup> Lempe chca bëngbe tempsca bëts taitángaftaca tojanopasá, bënga jinÿanÿiyama ntšamo jtsiyenana šojtsamnama, y Moisés, Bëngbe Bëtsabe uabemana palabrënguiñe chca tojëftsamboshjona bënga jabuátambama, bënga, chë Jesucristo yochjésabo orscama ya batšatema yojtsájamna ora oyenëngbiama.

<sup>12</sup> Chcasna, nda tojtsejuabná Bëngbe Utabnabiama tšabá yojtsama ca y bacna soyënga ndocna te yochanjama ca, cuedado chaotsebomna, bacna soyënga amiñe ndoñe chaondótsatšama.

<sup>13</sup> Ndocna entšá jatócochënguana bacna soyënga jamama, ntšamo tempo ínÿenga ndoñe tonjanocochëngcá cachca bacna soyëngama, pero tšëngaftanga corente šmondëtatšëmbo

Bëngbe Bëtsá sempre cmochtsëjabuachanama chë padecena soyënguifne, y cha ndoñe yochanjalesénciama bacna soyënga jamama chacmócochënguama, tsëngaftanga chca soyënga jamama jtsóboyayama obenana ntsebmncá; pero chë padecena soyënguifne chašmojtsemna ora, cha cmochanjínÿanÿiye ntšamo chë bacna soyënga ora tsábá jabo-canama, y chca, jtsóboyayama chašmotsobenama.

<sup>14</sup> Chíyeca, atšbe bonshánënga, ndocna te šmattsadorana cach entsangbe pormana soyënga, ndayama ínÿenga jtsejuabnayana diosënga yomna ca.

<sup>15</sup> Atše sëntsoyebuambná mo tsëngaftanga corente osertánënga cuaftsemncá. Cach tsëngaftanga šmochjenójuaboje y šmochjayana, ntšamo cbojtsëtsëtnacá aiñe o ndoñe tsábá bëtsemnana.

<sup>16</sup> Ntšamo Jesús chë coptema vinoyama Bëngbe Bëtsábioje tbojtanchuacá, bëngnaca cachcá Bëngbe Bëtsá chama fsëndbëtsatschuanaye. Bënga chca tmojama ora, ndegombre, jtsinÿanÿnayana bënga Crístoftaca cánÿiñe mo canÿacá imomnana, chabe buifne juabuáshanëse bëngbiamá tojanóbanayeca. Y chë mondbajataye tandëse tmojase ora, jtsinÿanÿnayana bënga Crístoftaca cánÿiñe mo canÿacá imomnana, cha bëngbiamá tojanóbanayeca.

<sup>17</sup> Bënga ošbuáchiyënga masque banga mondmëna, chca orna nÿetscanga cach tandësentšana bënga jasana, y chíyeca bënga jtsemnana mo canÿacá, mo Cristbe cuerpcá.

<sup>18</sup> Tsëngaftanga šmochtsejuabnaye ndayá chë Israeloca bachnanga monduamanama: chënga chë altaroca tmojóba y tmojuátšëmbona bayënguentsana jasana, y chca chënga chora jtsinÿanÿnayana chënga cánÿiñe mo canÿacá imojtsemnana Bëngbe Bëtsáftaca, chë chca tmojtsadoranáftaca.

<sup>19</sup> Y chca, atše ndoñe quetsátsboše jayanama chë entsangbe pormana soyënga mo diosënga cuaftsemncá, uámana soyënga yomna ca. Ni chë cach entsangbe pormana soyënga diosënga yomna ca jtsejuabnayëse jadórama uátšëmbona saná inÿe sanama más iuámana ca.

<sup>20</sup> Pero aiñe, entsanga cach entsangbe pormana soyëngama mo diosënga cuaftsemncá, chca tmojuátšëmbona ora, ndegombre chënga Satanás y chabe uajabuachanëngbioje jtsadoránana, y ndoñe Bëngbe Bëtsábioje. Y atše ndoñe quetsátsboše, tsëngaftanga chca uatšëmbonana šmojasama, cánÿiñe mo canÿacá chë bayëjëngaftaca chašmotsemnana.

<sup>21</sup> Tsëngaftanga ndoñe quešmátobena chë vínoye coptémentšana jofšiyana, ntšamo chë ošbuáchiyënga bëtsemnana mondbetsamcá, y chentšana chë cach entsangbe pormana soyënga, mo diosënga cuaftsemncá jadórama vínoye coptémentšánëna. Chca šmojama ora jtsemnana mo chë diablëngaftaca cuaftsesangcá. Y cach ndoñe quešmátobena vínoye jofšiyana y tandëse jasana, ntšamo ošbuáchiyënga bëtsemnana mondbetsamcá, y chentšana cach entsangbe pormana soyënga mo diosënga cuaftsemncá jadórama fiestentša sanánaca jasana, y chca chë bayëjëngbioje jtsadoránana.

<sup>22</sup> Bënga chca tmojtsamama, bënga mochanjama Bëngbe Utabná puerte etonaná bëngaftaca chaotsemnana, er chë bayëjëngaftaca bënga chca jtsamana. ¿O imojtsejuabná bënga chabiamá más obenana bomnënga imomna ca?

*Lempe šmochjama Bëngbe Bëtsá puerte bëtsá y uamaná yomnana jinÿanÿiyama*

<sup>23</sup> Mondbëtsichamo: “Entselesenciana ndayánaca jamana, ndayama Bëngbe Bëtsá ndocá tonjayana ca”, pero básefta soyënga atše stjama ora ndoñe nÿetscangbe tsabiamá ntsemnana. “Entselesenciana ndayánaca jamama ca”, pero nÿetsca soyënga ntšamo bënga tmojamcá, ošbuachiyëngbioje ndoñe ntjujabuáchana Jesucristbeñe más chamotsošbuáchema, y ainaniñe más añemo chamotsebmomnana.

<sup>24</sup> Ndocná chaondëtsama lempe ntšamo tojobenacá nÿe cachabe tsabiamá, ndayá más chaotsama chë ínÿengbe tsabiamá.

<sup>25</sup> Lempe mercadoca tmojtsena soyënguentsana šmochjase, ntjatstjanaycá chë mëntšena aiñe o ndoñe tmonjuátšëmbona chë cach entsangbe pormana soyënga, mo



diosënga cuaftsemncá jadórama ca. Ndoñe chca šmattsetjanaye, ntšamo tšëngaftangbe ainaniñe juabnënga šmojtsebomnama;

<sup>26</sup> er ntšamo Bëngbe Bëtsabe uabemana palabrenguñe endayancá: “Quem luare Bëngbe Utabnabe soye endmëna, y lempe ntšamo chiñe yomncánaca ca.”

<sup>27</sup> Nderado canye ndošbuachiyá tcmojúbuaja chábioca jasama, y tšëngaftanga choye jama tša šmojtsebošëse, lempe ntšamo cha chacmojonanjacá šmochjase, ndayentšana chë saná tojóboconama ndocá ntjatstjanaycá, ntšamo tšëngaftangbe ainaniñe juabnënga šmojtsebomnama.

<sup>28</sup> Pero nderado nda tcmojáuyana: “Quem mëntsena cach entsangbe pormana soyënga mo diosëngcá jadórama tmonjanátšëmbona ca”, as ndoñe chana šmatjase, er canya chca tcmojáuyana, y ainanentše šmojtsebomna juabnënga, chë chca jamama ndoñe tšabá bëtsemnama.

<sup>29</sup> Atše sëntsoyebuambná ndayá chë chca tcmojauyanabe ainaniñe juabnëngama, chë soye jasana ndoñe tšabá yondmënama, ndoñe chë tšëngaftangbe ainanentša juabnëngama.

Pero tšëngaftanga šmatjatjaye: “¿Ndáyeca atše šojtsemna jayanana ndayá atše stsobena jamama, ošbuachiyá bëtsemnama, ntšamo chë ínÿabe ainaniñe juabna yobomnama ca?”

<sup>30</sup> Y atše chë ndayá stsesama Bëngbe Bëtsá tijëtschuase, ¿ndáyeca ínÿa šochjauyana atše ndoñe tšabá tijama ca, chë soye tijasama, chë ndayama Bëngbe Bëtsá tijëtschuá ca?”

<sup>31</sup> Masque ntšámnaca, cachcá, chašmojtšesá, o chašmojtsofsëšná, o ndaye inÿe soye chašmojtšama, ndayama Bëngbe Bëtsá ndocá tonjayana, lempe šmochtsama Bëngbe Bëtsá puerte bëtšá y uamaná yomnama jtsinÿanÿnayama.

<sup>32</sup> Tondaye šmatjama ndayá chaobená jamana, ínÿenga Cristo chamotsábotema. Ndoñe chca šmatjama, ni judiëngbiama, ni ndoñe judiëngbiama, ni chë Bëngbe Bëtsábeñe ošbuachiyëngcá enefjuanëngbiama.

<sup>33</sup> Smochtsama ntšamo atše sëndëntšencá, nÿetscanga nÿetsca soyënguñe oyejuayënga jtsabamnama, lempe ntšamo stjobenacá jtsamëse, ndoñe nÿe atšbe tšabiama, ndayá masna chë ínÿengbe tšabiama, chënga chamotsobenama chëngbe bacna soyënguentšana atsebácanënga jtsemnama.

## 11

<sup>1</sup> Tšëngaftanga šmochtsiyena ntšamo atše sëndamcá jtsamëse, cach ntšamo atše sëndoyencá, ntšamo Cristo inetsamcá jtsamëse.

*Ntšamo yomna shembásenga tšabá jtsemnama, ošbuachiyëngcá tmojénefnj ora*

<sup>2</sup> Atše sëntseboše tšëngaftanga jáuyanana tšabá šmojama ca, tšëngaftanga nÿetsca soyënguñe atšbiama šmnétsenojuabnama, y tšëngaftanga šmojtšabuátambama y šmojtšamama ntšamo tcbonjanabuatambacá, cachcá ntšamo atše sënjëftsanboshjoncá.

<sup>3</sup> Pero atše sëntseboše tšëngaftanga chacmësertá: nda nÿetsca entsanga iuamënda cha, Cristo endmëna; y nda shémbioye ibománda cha, boyá endmëna; y nda Crístbioye ibománda chana, Bëngbe Bëtsá endmëna.

<sup>4</sup> Nderado canye boyabása chabe bestšaše tojtšenátsbotse, inÿe ošbuáchiyëngaftaca cánÿiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana cachá chaotsëuatjama, chabe bestšásëca chca tojama causa.

<sup>5</sup> Pero nderado canye shembása chabe bestšaše ndoñe tontsenátsbotse, inÿe ošbuáchiyëngaftaca cánÿiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana chama cachá chaotsëuatjama; jtsëuatjana mo cha lempe jshetëtšená cuaftsemncá.

<sup>6</sup> Er, nderado canye shembása ndocna te tontseboše chabe bestšaše jtsenátsbotsana, chabiama más tšabá nántsemna lempe chaotsenójshetëtše. Pero tojtsejuabná utsbotjená o chca lempe jshetëtšená jtsemnama cha yochtsëuatja ca, as chabe bestšaše chaot-senátsbotse.

<sup>7</sup> Boyabása ndoñe quebnátsmëna chabe bestšaše jtsenátsbotsana, er Bëngbe Bëtsá tojanma ntšamo cachá yomncá cha chaotsemnana, y chë boyabása chca jtsemnëse, jtsinÿanÿnayana Bëngbe Bëtsá chabe mandayá yomnana. Pero ntšamo chë shembása yomncá, jtsinÿanÿnayana chë boyabása chabe mandayá yomnana;

<sup>8</sup> er Bëngbe Bëtsá, boyabása ndoñe tbonjanma shembásabentšana, ndayá shembása boyabásabentšana.

<sup>9</sup> Y Bëngbe Bëtsá, boyabása ndoñe tbonjanma shembásabeyeca, ndayá shembása boyabásabeyeca.

<sup>10</sup> Chíyeca, y chca jamama angelënga tšabá jtsinÿanánayeca, shembása jtsemnana chabe bestšaše chaotsenátsbotsama, chca, chaotsinÿnana inÿa chábeñe yomándama.

<sup>11</sup> Pero, Bëngbe Utabnábeñe ošbuachiyëngcá jtsiyenamna, boyabásenga y shembásenga cachcá jtseytëtanana.

<sup>12</sup> Er masque Bëngbe Bëtsá, shembása boyabásabentšana tbojanma, mora, shembásabentšana boyabása jóbocnana; y lempe Bëngbe Bëtsábiocana endóbocana.

<sup>13</sup> Cach tšëngaftanga, yejuana chama šmochtsejuabnaye y šmochjayana tšabá o ndoñe tšabá yontsemna, canÿe shembásabiama Bëngbe Bëtsáftaca jencuëntana, bestšaše ntsenatšotscá.

<sup>14</sup> Ntšamo entšanga sempre mondbetsejuabnaycá, ndayá tšabá bëtsemnana, bëngbiöye jtsabuátambayana, boyabása bën stjënësha chabuájuama tojalesenciase, cha jamana cachá chama chaotsëuatjama.

<sup>15</sup> Pero shembásabiama, chë bën stjënësha jtsinÿanÿnayana chabe botamanana y uámanana, er Bëngbe Bëtsá tojanma shembása bën stjënësha chaotsábomnana, chca, cha chaotsebomna ndáyeca chabe bestšaše jtsenátsbotsama.

<sup>16</sup> Masque ntšámnaca, ndánaca tojtseboše quem soyama más jatóyebuambayama, cha bontsemna jtsetatšëmbuana, ni bënga, ni Bëngbe Bëtsábeñe ošbuachiyëngcá enefjuanënga queftsatsleséncia chca ndoñe chaondëtsemnana.

*Bëngbe Utabnabiama jtenójuaboyama jasama ora, chënga ndoñe tšabá imonjánama*

<sup>17</sup> Mora cbochanjaménda soyënguiñe atše ndoñe quetsátobena tšëngaftanga jáuyanana tšabá šmojama ca, er tšëngaftanga Crístbeñe ošbuachiyëngcá šmojénefnja ora, Bëngbe Bëtsá jadórama, atše šontsinÿana chë soye yojtsoserverna tšëngaftanga más bacá chašmotsemnana, y ndoñe tšëngaftangbe tšabiama.

<sup>18</sup> Natsana cbochjáuyana, atše sënjouena tšëngaftanga ošbuachiyëngcá šmojénefnja ora, báseftanga canÿe soye imnëtsejuabnaye y ínÿengna inÿetsá ca, y atše sëntsejuabná batšana ndegombre chca yojtsemna ca.

<sup>19</sup> Ndegombre jtseytana tšëngaftangbeñe chamotsemna báseftanga canÿe soye juabnaye y ínÿengna inÿetsá, chca, nÿetscanga chamotsetatšëmbuama ndëmuanÿenga imojtsemna chë Bëngbe Bëtsá tojayana chënga tšabá tmojama ca.

<sup>20</sup> Tšëngaftanga tandëse jasama y vínoye jofšiyama šmojénefnja ora, ntšamo bënga fsënduamancá, Bëngbe Utabná bëngbiama tojanóbanama jtenójuaboyama, ndayá chora tšëngaftanga šmnetšamcá, ndoñe quenátsmëna ntšamo ndegombre cmojtsamncá, chë Bëngbe Utabnabiama jtenójuaboyama jasama ora;

<sup>21</sup> er chë jasama tojobuache ora, cada ona inóntša jasama ndayá tojiyëbcá, y ndoñe ntjatobátmanana nÿetscanga ndayánaca jasama chamotsebomnëntscuana; báseftanga shëntseca joquédana, y ínÿengna tša jëftsesana y jofšiyana jëftsótmenantscuana.

<sup>22</sup> ¿Tšëngaftanga ndoñe yebna šmondobomna ndayentše jasama y jofšiyama? ¿Ndáyeca tšëngaftanga šmojtsejuabná chë imnénefnja ošbuáchiyënga nduámanënga imomna ca, y šmojama chë chentše tmojtsemnënga, tondaye ndobomnënga, chamotsëuatjama? ¿Tšëngaftanga šmojtsejuabná atše cbochjáuyana tšabá šmojama ca, chë Bëngbe Utabnabiama jasama ora chca šmojamama? ¡Ndegombre ndoñe!

*Bëngbe Utabnabiamá jtenójuaboyama saná  
(Mt 26.26-29; Mc 14.22-25; Lc 22.14-20)*

<sup>23</sup> Er atše cach Bëngbe Utabnábentsana ntšamo cbontsabuátëmbacá sënjanóyëngacñe: Bëngbe Utabná cach uayayëngbe cucuatšíñe tmojánboshjona íbeta, tandëse tojanca,

<sup>24</sup> Bëngbe Bëtsábioye tbojtanchuá chentsana, tojanjatá y tojánayana: “Quem tandëse atšbe cuerpo entsemna; tšëngaftangbe tšabiamá chanjóbana. Ntšamo mora montsamcá šmochtsama, atšbiamá jtenójuaboyama ca.”

<sup>25</sup> Cachcá, chë saná tmojansentsana, coptema tojanaca y tojánayana: “Quem coptema vínoye atšbe buiñe entsemna. Atšbe buiñe echanjuábuashana tšëngaftanga chašmotsetatšëmbuama, ntšamo Bëngbe Bëtsá entsanga tojanašebuachenacá pronto yochtsemnama. Cada vínoye chašmojtsofšëšná ora, chca šmochjama atšbiamá jtenójuaboyama ca.”

<sup>26</sup> Er tšëngaftanga cada quemëntša tandëse chašmojtšesá ora y quem coptementšaycá chašmojtsofšëšná ora, Bëngbe Utabná chaojésabëntscuana tšëngaftanga šmochántsinÿanÿnaye cha entsangbiamá tojanóbanama.

*Ntšamo yomna jamana, Bëngbe Utabnabiamá jtenójuaboyama jasama ora*

<sup>27</sup> Chcasna, Bëngbe Utabnabiamá jtenójuaboyama jasama ora, ndánaca tandësentšana tojase y coptémentšana tojofšë, ndoñe chë ntšamo chaotsemnama Bëngbe Utabná yojanjuabnacá, chabiamá Bëngbe Bëtsá jayanana cha puerte bacna soye tojama ca. Chë entsá chca tojama ora, cha jtsinÿanÿnayana, Bëngbe Utabnabe cuerpo y buiñe chabiamá tondaye yonduámanama.

<sup>28</sup> Chíyeca, entsemna cada ona corente chauenojuabó jtsetatšëmbuama aíñe o ndoñe yontseprontana chca jasama y jofšiyama, cabá ndëse y ndofšë ora.

<sup>29</sup> Er nderado nda tojase y tojofšë, chë Bëngbe Utabnabiamá jtenójuaboyama jasama ora, cach Bëngbe Utabnabe cuerpo yomnama ntjajuaboycá, cha chë sóyeca jamana Bëngbe Bëtsá chabotsecastigama.

<sup>30</sup> Chíyeca, banga tšëngaftanguentsënga šoquënga šmojtsemna, ínÿenga añemo ndbomnënga, y ínÿengna ndoñe nÿe báseftanga tmojóbana.

<sup>31</sup> Pero bënga corente tmojajuabó jtsetatšëmbuama aíñe o ndoñe montseprontana ntšamo šuamncá jasama y jofšiyama, cabá ndëse y ndofšë ora; chca, Bëngbe Bëtsá ndoñe buántsemna bënga játacastigana, ntšamo tšabá yomncá ndoñe tmonjase causa.

<sup>32</sup> Pero, Bëngbe Utabná castígoca chca šojabuayená ora, jtsemnana bënga más tšabá jtsamama chamuatsjínÿama, y chca, bayté chentsana, Bëngbe Bëtsá ndoñe chabondëtsemna játayanana bënga šojtsamna nÿetsca tescama castigánënga jtsemnama ca, cánÿiñe chë nÿe quem luarama enójuabnaye entsángaftaca.

<sup>33</sup> Chca, Jesucristbeyeca atšbe catsátanga, tšëngaftanga chë Bëngbe Utabnabiamá saná jasama chašmojënefna ora, cánÿiñe nÿetscanga šmochjabojátša.

<sup>34</sup> Y nderado nda tbojtšeshëntsana, cachabe yebnoca chauétsese, chca, Bëngbe Bëtsá ndoñe chabondëtsemna tšëngaftanga jácastigana chora ndoñe tšabá šmonjama causa. Chë ínÿe soyëngama ndayama tšëngaftanga šmonjatjá, chamna chanjamánda tšëngaftanga jányama chaijá ora.

## 12

*Bëngbe Bëtsabe tšetana obenana, tšabe soyënga jamama*

<sup>1</sup> Jesucristbeyeca atšbe catsátanga, atše sëntseboše tšëngaftanga chašmotsetatšëmbo Bëngbe Bëtsabe tšetana obenanama tšabe soyënga jamama, Crístbeñe ošbuáchiyënga jujabuáchama.

<sup>2</sup> Tšëngaftanga šmondëtatšëmbo, tšëngaftanga Crístbeñe ndošbuáchiyënga šmonjamna ora, ínÿenga cmonjanabuatambá soyënga, y chora tšëngaftanga šmonjamna ínÿabeyeca

uasjanëngcá, cach entsangbe pormana soyënga mo diosënga cuaftsemncá jadórama; y chë soyëngna ni mo jóyebuambayama ntso benana.

<sup>3</sup> Chiyecca, atse mora sëntseboşe tšëngaftanga chašmotsetátšëmbo, ndocná ntso benana jayanana: “Jesús ndoñe chë Cristo quenátsmëna, ni Bëngbe Utabná ca”, chë Bëngbe Bëtsabe Espíritbe obenánaca cha tojtsóyebuambnase. Y cach ndocná ntso benana jayanana: “Jesús Bëngbe Utabná endmëna ca”, chë Bëngbe Bëtsabe Espíritbe obenánaca cha ndoñe tontsóyebuambnase.

<sup>4</sup> Espíritu jamana bënga ndoñe chamondëtse bomnana cachca tšetana obenana tsabe soyënga jamama, pero lempe jobayana cach canye Espíritbeyeca.

<sup>5</sup> Bënga, Bëngbe Bëtsá mondëserveda, nyetsca soyënguñe jtsetrabájayëse, pero cach Utabná nyets chë trabajënga šojabanjë.

<sup>6</sup> Nyetsca soyënga Bëngbe Bëtsabe obenánaca fsëndbëtsama, pero cach Bëngbe Bëtsá endmëna nda inétsama bënga chë soyënga jamama obenana chamotse bomnana.

<sup>7</sup> Bëngbe Bëtsá inétsama cada ošbuachiyá chaotse bomnana canye tšetana obenana tsabe soyënga jamama, y chë soye jtsinyanñayana Bëngbe Bëtsabe Espíritu chabe ainaniñe yomnana; y chë tšetana obenana jtsemnana nyetscangbe tsabiama.

<sup>8</sup> Bëngbe Bëtsá, Espíritbeyeca, canya obenana jatštayana puerte osertanánaca chaóyebuambama, y inyana obenana cach Espíritbeyeca ndayámnaca corente jtsetatšëmbëse chaóyebuambama;

<sup>9</sup> Inyana cach Espíritbeyeca, obenana Crístbeñe puerte chaotsošbuáchema, y inyabiamna, cach nye canye Espíritbeyeca, obenana jatštayana šoquënga jáshnama;

<sup>10</sup> Inyana, obenana tsabe soyënga Bëngbe Bëtsabe obenánaca jamama, y inyana, obenana Bëngbe Bëtsabe juabna jóyebuambayama. Inyana, obenana corente jajuaboyama y jtsetatšëmbuama ntšamo tmojayancá Bëngbe Bëtsabe Espíritbeyeca o bacna espiritëngbeyeca tojtsemnana, y inyana, obenana chë tempo ndmabiyáñnaca chaóyebuambama, y inyana, obenana josértama ntšamo chë ndaye biyáñnaca jóyebuambayama obenana bomná tojt-sichamcá, y inyengna chama jábuayenama.

<sup>11</sup> Pero cach Espíritu, chë nye canye Espíritu lempe chca jamana, ntšamo tsabá bëtsemnana cha tojtsejuabnacá cada entšábioye jatštayëse.

*Nyetsca ošbuáchiyënga cányiñe, mo Crístbe cuerpcá jtsemnana*

<sup>12</sup> Cuerpo nye canye soye endmëna y chë cuerpna ba soyënga jtse bomnana; masque chë cuerpo ba soyënga jtse bomnana, nye canye cuerpo jtsemnana. Bëngaftácnaca cachcá. Bënga banga mondmëna nyetscanga Crístbeñe ošbuáchiyënga, pero Crístbeyeca, bënga cányiñe mo canyácá jtsemnana.

<sup>13</sup> Er bënga nyetscanga, judiënga o ndoñe judiënga, nye inyabiamna nyets tempo oservénënga o cachëngbiamna trabájayënga šojanëbaye, Crísoftaca cányiñe mo canyácá, jtsemnana mo chabe cuerpcá, y chca yomna cach Espíritbeyeca; y Bëngbe Bëtsá tojama cach Espíritu nyetscangbe ainanoye cháuamashënguama, bënga jtsamëndayama.

<sup>14</sup> Cachcá, canye cuerpo ndoñe nye canye soye ntse bomnana, ndayá ba soyënga.

<sup>15</sup> Nderado shecuatše tojayana: “Cucuatše ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, shecuatše mo chë cuerpentša soye ndoñe cuaftsemncá ndoñe ntjátsmënana.

<sup>16</sup> Nderado matscuaše tojayana: “Bominye ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, matscuaše chë cuerpentša soye ndoñe cuaftsemncá ndoñe ntjátsmënana.

<sup>17</sup> Nyets cuerpo bominye tojtsemnëse, bënga ndoñe muantsobena jouenama. Y nyets cuerpo matscuaše tojtsemnëse, bënga ndoñe muanjobenaye jونغtsetsiyana.

<sup>18</sup> Pero ndegombre endmëna, Bëngbe Bëtsá nyetsca soye cuerpentše tojancjá ndayentše cha tojánbošenentše.

<sup>19</sup> Njetsca cuerpentša soyënga nje canje soye tojtsemnëse, ndoñe canje cuerpo nántsemna.

<sup>20</sup> Pero ndegombre endmëna, masque ba soyënga cuerpentše yomna, nje canje cuerpo jtsemnana.

<sup>21</sup> Bominje quenátobena cucuatše jauyanana: “Ndoñe quecátsiyta ca”; y cachcá, bestšaše quenátobena shecuatše jáuyanana: “Ndoñe quecátsiyta ca”.

<sup>22</sup> Injëtšá, chë cuerpentša soyënga, chë tojtsinjana mo obenana ndbomna y nduámana soyëngcá, jtsemnana chë cuerpama más iyta soyënga.

<sup>23</sup> Chë cuerpentša soyëngama, ndayama bënga tmojtsejuabná más nduámana soyënga yomna ca, bënga jamana más chaotsámanama, chiñe entsayaca jtichëtjese. Y chë cuerpentša soyënga, ndayama bënga jtsëuatjana ínjenja chamotsonyama, bënga jamana ínjenja ndoñe chamondëtsonyama, chiñe entsayaca jtichëtjese.

<sup>24</sup> Pero chë cuerpentša soyëngaca, chë njetscanga jtsonyayana y botamana jinjama jtsemnana soyëngacna, ndoñe ntseytana chca játamana. Bëngbe Bëtsá cuerpo tojama, ntšamo bënga chamotsamama chentša más nduámana soyënga, más chaotsámanama, ntšamo chë soyënga bënga tmojtsinjenama.

<sup>25</sup> Cha chca tojanma, cuerpentša njetsca soyënga chë cuerpama trabajo cányiñe chamotsamama, y chca, cada soye chaotsama trabajo chë cuerpentša njetsca soyëngbe tšabiama.

<sup>26</sup> Nderado canje cuerpentša soyama bacna soye tojopasá, chora njetsca chë cuerpentša soyëngámnaca chca ndoñe tšabe soye jtsebínynana; pero canje cuerpentša soyama tcojama más uámana soye chaotsemnana o ndaye tšabe soye tojopasase, chora njetsca chë cuerpentša soyëngámnaca chca tšabe soye jtsebínynana.

<sup>27</sup> Cachcá, tšëngaftanga Crístbeñe ošbuáchiyënga, cháftaca cányiñe mo canyáca jtsemnëse, mo chabe cuerpcá jtsemnana, y cada ona tšëngaftanguentsá mo chë cuerpentša soyëngcá, jtsemnana mo chabe cuerpentša soyëngcá.

<sup>28</sup> Ntšamo Bëngbe Bëtsá cuerpentše soyënga tojancjá ndayentše inabošcá, cachcá, ošbuachiyëngcá enefjuanëngbeñe Bëngbe Bëtsá tojubuáyana, natsana báseftanga mo Jesucristbe ichmonëngcá, chorna Bëngbe Bëtsabe juabna oyebuambnayënga, chorna Bëngbe Bëtsabiama abuátambayënga, chorna chë bëts soyënga Bëngbe Bëtsabe obenánaca jamama obenana bomnënga, chë šoquënga jáshnama obenana bomnënga, chë ínjenbioye puerte ujabuáchanënga, chë inje ošbuachiyëngbioye amëndayënga, y chë njetsca biyañe jtsóyebuambnayama obenana bomnënga, tempo ndmabiyañe.

<sup>29</sup> Ndegombre, ošbuachiyëngcá enefjuanëngbeñe njetscanga ndoñe Jesucristbe ichmónënga ntsemnana, njetscanga ndoñe Bëngbe Bëtsabe juabna oyebuambnayënga, njetscanga ndoñe abuátambayënga, njetscanga ndoñe Bëngbe Bëtsabe obenana bomnënga, bëts soyënga jamama.

<sup>30</sup> Njetscanga ndoñe šoquënga jáshnama obenana bomnënga; njetscanga ndoñe njetsca biyañe jtsóyebuambnayama obenana bomnënga, tempo ndmabiyañe; ni njetscanga ndoñe obenana bomnënga quemátsmëna, chë tempo ndmabiyañe njetsca biyañe jtsóyebuambnayama obenana bomnënga ntšamo tmojtsichamcá josértama y ínjenbioye chama jtsabuayinayama.

<sup>31</sup> Pero tšëngaftangna puerte šmochtseboše, lempe ntšamo chašmojobenacá šmochjama, chë Bëngbe Bëtsabe más uámana tšetana obenana jëftsashjáchama.

### *Bonshánana jtsebomnana*

Y inje soye más, atše cbochanjínjanjiye ntšamo šmojtsobena cabá más tšabá jtsiyëna, Bëngbe Bëtsá jtseeservënëse.

## 13

<sup>1</sup> Nderado atše stjóyeuambaye entšangbe biyañe y angelëngbe biyañe, pero ínÿengbioye ndoñe sentsababuánÿeshanëse, atše stsemna canÿa tondayama uamaná, mo nÿe canÿe metalëshe tojtsenancá, o mo nÿe canÿe platillëshcá ndoñe tšabá tontsenanëshe.

<sup>2</sup> Y atše obenana stsebmna Bëngbe Bëtsabe juabna jóyeuambayama y nÿetsca soyëngama, y chë Bëngbe Bëtsá tempo entšanga ndoñe tonjaninÿanÿé soyënga šojtsësertana, y Bëngbe Bëtsabe nÿetsca soyëngama stsetátšëmbo, y Crístbeñe puerte stjesošbuáchiye, chca betsošbuáchema nÿa mo chë tjashënga chamobonjoma jamama, pero ínÿenga ndoñe sentsababuánÿeshanëсна, atše tondaye sëntsemna.

<sup>3</sup> Y atše lempe ntšamo stsebmncá ndbomnjëmënga stsëjátaye, y ínÿengbioye stjenontréga atšbe cuerpo chamojuinÿema, pero ínÿengbioye ndoñe sentsababuánÿeshanëse, atše ndocna uámana soye ntjashjáchana.

<sup>4</sup> Canÿe entšá ínÿenga ababuanÿeshaná, uantado jtsemnana masque padecena soyënguiñe tmojtsemna órnaca, y ínÿengaftaca tšabe ainánaca mando jtsebmnnana. Inÿenga ababuanÿeshaná ndoñe ntsántšabošana ntšamo inÿa tojatsbmncá, ni ntsenábotamnayana, ni cachá chë ínÿengbiama más uamaná ntjáténobiamnayana;

<sup>5</sup> ndoñe bacá mandbmncá ínÿengaftaca ntsemnana, ni nÿets tempo ntsebošana y lempe jtsamana nÿe chabiamna tšabe soye jónÿenama; cha nÿe ndayámnaca ndoñe ntjetnana, ntšamo ínÿenga tmojaborlá ora jtsaperdónayana.

<sup>6</sup> Inÿenga ababuanÿeshaná ndoñe ntjóyejuayana chë ndoñe tšabá yondmëna soyëngama; chë ndegombre yomna soyëngamna aiñe.

<sup>7</sup> Inÿenga ababuanÿeshaná, ainaniñe añemo jtsebmnnana nÿetsca padecena soyënguiñe, lempe ntšamo más tšabá yomna soyënguiñe jtsošbuáchiyana, nÿetsca más tšabá yomna soyëngama jtsobátmanana, y jtsóboyayana nÿetsca toto soyënga.

<sup>8</sup> Bonshánana nÿetsca tescama jëftsemnana. Canÿe te echántsemna, chora chë Uámana Espíritu ndoñe más queochátama entšanga Bëngbe Bëtsabe juabna chamotsóyeuambnama, ni chë ndocna te ndmabiyañe chamotsóyeuambnama, ni chë puerte jtsetatšëmbëse jóyeuambayama obenama chamotsebmnnama;

<sup>9</sup> er ntšamo mora bënga imotatšëmbcá y Bëngbe Bëtsabe juábnaca jóyeuambayëse tmojayana soyënga, nÿe batšatema bëngbioye jtsinÿanÿnayana Bëngbe Bëtsabe soyëngama, ndoñe lempe;

<sup>10</sup> pero Jesucristo chaojésabo ora, y chaojama bënga chamotsemna lempe ntšamo Bëngbe Bëtsá bëngbiama yojanjuabncá, quem soyënga, chë nÿe batšatema bëngbioye jtsinÿanÿnayana Bëngbe Bëtsabe soyëngama, ya ndoñe más queochátsbinÿna.

<sup>11</sup> Atše básatema ora, sënjanoyebuambná, sënjanjuabná, y soyëngama tšabá jtsetatšëmbuamna sënjanjuabná mo canÿe basetemcá; pero bëtsá sënjanóbema orna, sëntsanajbaná lempe amana mo canÿe basetemcá.

<sup>12</sup> Cachcá, mora bënga quem luarentše nÿe batšatema Bëngbe Bëtsabe soyëngama jtsetatšëmbuana, mo canÿe espejuiñe tmojtsonÿacá, pero ndoñe nÿa corente tšabá. Pero canÿe te bënga mochántsetatšëmbo lempe nÿetsca soyëngama, bënga Bëngbe Bëtsabe delante chamojtsemna ora. Mora atše sëntsetatšëmbo nÿe batšatema Bëngbe Bëtsabe soyëngama, pero chora lempe chanjuábuatmana, ntšamo Bëngbe Bëtsá corente suabuamncá.

<sup>13</sup> Pero morna, Bëngbe Bëtsábeñe jtsošbuáchiyana, chábeñe jtsobátmanana, y chábioye y ínÿengbioye jtsababuánÿeshanana, chë soyëngna nÿetsca tescama jëftsemnana; pero chentšana chë más uámana soye endmëna ínÿenga jtsababuánÿeshanana.

## 14

*Ndmabiyañe obenana Bëngbe Bëtsabe tšetánana*

1 Bëtsá šmochtsama nyetscanga jtsababuányeshanëse chašmotsiyenama, y puerte šmochtseboše jtsebomnama chë Bëngbe Bëtsabe tšetana obenana tšabe soyënga jamama; pero chentšana masna, chë Bëngbe Bëtsabe juabna jóyebuambayama obenana.

2 Er chë tempo ndmabiyañe mora jóyebuambayama obenana bomná, Bëngbe Bëtsábioye jtsatsëtsnayana y ndoñe entšángbioye, er ndegombre entšanguentše ntšamo cha tojtsoyebuambnacá ndocná ntjosértana; chana chabe espíritoftaca jtsóyebuambnayana y ndoñe nyë chabe juábnaca, chë tempo Bëngbe Bëtsá ndocna entšábioye tbonjaninýinýe soyëngama.

3 Pero chë Bëngbe Bëtsabe juabna oyeambuambnayana entšanga jtsëtsëtsnayana, chënga más chamotsošbuáchema y ainaniñe añemo chamotsebomnama, Bëngbe Bëtsabe soyëngama jábuayenama, y jamama padecena soyënguiñe tmojtsemna órnaca añemo chamotsebomnama.

4 Chë tempo ndmabiyañe mora jóyebuambayama obenana bomná, jtsamana nyë cha más jtsošbuáchiyama y ainaniñe añemo jtsebomnama; pero chë Bëngbe Bëtsabe juabna oyeambuambnayana jtsamana chë ošbuachiyëngcá enefjuanënga chca soyënga chamotsebomnama.

5 Atše sëntseboše nyetsca tšëngaftanga chë tempo ndoñe šmonjanbiyañe mora jóyebuambayama obenana chašmotsebomnama, pero chama atše más sëntseboše tšëngaftanga chë Bëngbe Bëtsabe juábnaca soyënga chašmotsóyebuambnama. Chë Bëngbe Bëtsabe juábnaca soyënga oyeambuambnayá más uamaná jtsemnana chë inýe biyañe oyeambuambnayabiama; chca ndoñe nántsemna, ntšamo canýe biyañe tojayancá chë biyañe oyeambuambnayá tbojtsësertánëse y chë ošbuachiyëngcá enefjuanënga tojábuayenase, y chca, chë soyënga tmojouenama, chënga chamotsobena más jtsošbuáchiyama y añemo jtsebomnama.

6 Y mora, Jesucrístbeyeca atšbe catšátanga, atše nderado tchojábuache y nyë inýe biyañe tchojáuyanëse, ¿chca ntšamo cbatjújabuache? Atše jtsoobenana jujabuáchana, nyë ntšamo chë biyañe tijayancá átšnaca šojtsësertánëse, y ndayá Bëngbe Bëtsá šojinýinýecá entšanga jábuayenama stjobenase, chë Bëngbe Bëtsá tojama atše jtsetatšëmbuama soye, chë Bëngbe Bëtsabe juábnaca stsoyebuambná soye o chë tšëngaftanga jabuátambama cha yoboše soye.

7 Entšanga monduamana ndayánaca juéanana, mo flautëfja o arpa, vida ndbomna soyënga; cada sóyeca inýetšá juéanama ndoñe tontsopodénëse, ndocná nantsobena jtsetatšëmbuama ndayá canýa chë soyëngaca yojtséanama.

8 Y nderado nda trompetëfjua tojuájetëta ora, soldadënga japéliama chamoprontama, chë uajatëtaná inýetšá, nyë chama ndoñe tonjuájetëtëse, ndocná buanjoserá y jenpéliama ndoñe nanjopróna.

9 Tšëngaftangaftácnaca cachcá jtsopasánana. Inýenga paselo josértama jobenaycnana tšëngaftanga ndoñe šmonjóyebuambase, ndocná queochátstatšëmbo ntšamo šmojtsichamcá. Nántsemna mo nyë cánýenga cuaftsoyebuambnacá.

10 Atše sëntsejuabná, ndegombre quem luarentše ba inýe biyañe entšanga innétsoyebuambnayana, y ndaye biyáñnaca tmojoyebuambá ora, sempre jtsemnana inýenga ntšamo chënga tmojtsichamcá osertánënga.

11 Pero ntšamo inýa chabe biyañe šojauyancá atše ndoñe šontsësertánëse, atše stsemna canýe chabiama ndosertana biyañe oyeambuambnayá, y chánaca cachcá atšbiama.

12 Chcasna, chë Uámana Espíritu šondinýanýná obenana jtsebomnama tšëngaftanga puerte šmobóseyeca, lempe ntšamo šmojobenacá šmochtsama chca tšetana obenana jóyëngacñama, chë ošbuáchiyënga más jtsošbuáchiyama y añemo jtsebomnama inétsama obenana.

13 Chíyeca, chë tempo ndmabiyañe mora jóyebuambayama obenana tojtsebomná, Bëngbe Bëtsá chabotseimpadana, cha chaoma ntšamo chë inýe biyañe tojayancá chabosertama y ošbuáchiyënga jábuayenama obenana chaotsebomnama.

<sup>14</sup> Pero atše Bëngbe Bëtsáftaca stjencuénta, chë ndmabiyañe jóyebuambayama cha obe-nana šojanatšetacá jtsóyebuambnayëse, atšbe espíritu cháftaca nantsóyebuambnayë, pero atšbe juabna ndoñe ntsetatšëmbuana ntšamo chë espíritu tojtsoyebuambnacá.

<sup>15</sup> Y asna, ¿ntšamo atše chtsemana? Bëngbe Bëtsáftaca chanjencuénta atšbe espíritoca, pero ntšamo stsichámuama jtsejuabnayësnaca. Bëngbe Bëtsá jëtschuayama chanjavérsia atšbe espíritoca, pero chca chanjama chíñnaca jtsejuabnayëse.

<sup>16</sup> Nderado aca Bëngbe Bëtsá cojtsatschuaná nýe espíritoca, y canya quem Bëngbe Bëtsabe tšetana obenanama ndosertaná tcmojóyeunase, cha ndoñe ntsoobenana jayanana “chca chaotsemna ca”, cach aquécá cha yojtsejuabnama jinýinýiyama, er ntšamo cojt-sichamcá cha ndoñe ntsësertánana.

<sup>17</sup> Aca jtsobenana chca puerte tšabá Bëngbe Bëtsá jëtschuayana, pero ntšamo tcojtsamcá ndoñe ntjamana inya ndaye tšabe soye chaotsebmomnana.

<sup>18</sup> Atše, Bëngbe Bëtsá sentsatschuaná inye biyañe jóyebuambayama tšëngaftangbiana más tsobenama;

<sup>19</sup> pero Crístbeñe ošbuachiyëngcá tmojénefná ora, atše más sëndbétseboše nýe mo shachna palabratémnaca jóyebuambayana, chënga aïñe catafjosertacá, chca, ínýenga jabuátambama, y ndoñe bnëtsana uaranga palabrënga jatóyebuambnayana inye biyañe, chënga chaósertama ndoñe tontsopodénëse.

<sup>20</sup> Jesucrístbeyeca atšbe catšátanga, šmochtsajbaná basetemëngcá juabnayana. Mo šësonatemëngcá šmochtsemna, bacna soyënga jamama ntsetatšëmbcá; pero mo bëtsëtsangcá tšabá šmochtsejuabnayë.

<sup>21</sup> Bëngbe Bëtsabe uabemana palabrënguiñe, Bëngbe Utabná mëntšá tojánayana:

Atše quem entšángbioye chanjáuyana,

ínýenga inye luarëngocana ashjajnëngaftaca, chëngbiana canye ndosertana biyañe oye-buambnayënga;

y chanjáuyana ndayá chëngbe biyañe chamojtsichamo soyëngaca;

pero ni chca, chënga ndoñe quešmochatóyeunaye ca.

<sup>22</sup> Chcasna, inye biyañe jóyebuambayama obenana jtsebmomnana endmëna, Bëngbe Bëtsá ndayánaca chë chábeñe ndošbuachiyëngbioye jinýanýiyama, y chábeñe ošbuachiyëngbioyna ndoñe. Pero, Bëngbe Bëtsabe juabna jóyebuambayama obenana jtsebmomnana endmëna, Bëngbe Bëtsá ndayánaca chábeñe ošbuachiyëngbioye jinýanýiyama, y chábeñe ndošbuachiyëngbioyna ndoñe.

<sup>23</sup> Er tšëngaftanga nýetscanga ošbuachiyëngcá šmojénefná ora, nýetscanga ba biyañe šmojtsoyebuambná, y choye tojámashëngo canya chca Bëngbe Bëtsabe tšetana obenanama ndosertaná o chábeñe ndošbuachiyá, cha nanjájuaboje tšëngaftanga opënga šmojtsóbema ca.

<sup>24</sup> Pero nýetscanga tmojtsichamo, Bëngbe Bëtsabe juábnaca jtsóyebuambnayëse, y choye tojámashëngo canya Bëngbe Bëtsábeñe ndošbuachiyá o canya chca Bëngbe Bëtsabe tšetana obenanama ndosertaná, ntšamo chašmojtsichamcá cha bochanjosérta; y chë soye cha bochanjayëñaná cha bacna soyënga tojamama, y ndayá cha tojamiñe corente echántsejuabnayë, ntšamo nýetscanga tmojtsichámuama.

<sup>25</sup> Y Bëngbe Bëtsá chábioye bochanjinýinýiye ntšamo cha ainaniñe tojajuabó y tojabošencá, ndayá ndocnábioye tbonjinýinýecá, y cha echanjoshëntsamentsiye Bëngbe Bëtsá jadórama, y tšëngaftangbe delante echanjayana Bëngbe Bëtsá ndegombre tšëngaftangbeñe yojtsemna ca.

*Ošbuachiyëngcá šmojénefná ora, ntšamo tšabá yomncá lempe šmochtsama*

<sup>26</sup> Chcasna, Jesucrístbeyeca atšbe catšátanga, šmojénefná ora, cada ona ndayánaca jtsebmomnana nýetscangbiana: ínýengna jtsobenana javérsiama, Bëngbe Bëtsá jëtschuayama, ínýengna jtsobenana jabuátambana o jábuayenama ndayá Bëngbe Bëtsá tojinýanýecá, o tempo ndmabiyañe chora jtsóyebuambnayana, o entšanga jábuayenana ntšamo inya inye



biyañe tojayancá. Pero lempe šmochjama, ošbuáchiyënga más chamotsošbuáchema y más añemo chamotsebomnama Cristo jaserviama.

<sup>27</sup> Nderado inye biyañe jóyebuambayama tojtsemnëse, útata o nya másese únganga chca chamoyebuambá, y canyánya; y jtseytana ndánaca ntšamo tmojtsichamcá chabosertá y nyetscanga chama chauabuayená.

<sup>28</sup> Y chca chabosertama y nyetscanga jábuayenama ošbuachiyëngbeñe ndocná tontsemnëse, as ošbuachiyëngcá chamojénefjna ora chë chca oyebuambnayá bontsemna ndoñe chca biyañe ntsóyebuambnayana, sinó nye canya tojtsemna ora cha jtsoobenana chca Bëngbe Bëtsáftaca jencuéntana.

<sup>29</sup> Utata o únganga entsamna jayanana soyënga, Bëngbe Bëtsabe juábnaca jtsóyebuambnayëse; y chë ínÿenga jtamnana botamana jajuaboyana y jayanana ntšamo chënga tmojayancá aíñe o ndoñe Bëngbe Bëtsábiocana tajojtsóbocanama.

<sup>30</sup> Pero canya Bëngbe Bëtsabe juabna tojtsóyebuambnantscuana, inya chentse ouenana tbemanábioye Bëngbe Bëtsá tbojinÿinÿé ndayánaca yojtsebomna jayanama, as chë nat-sana oyebuambnayá iytëca chaóbema, y chabolesenciá chë inya chaóyebuambama.

<sup>31</sup> Chca, nyetscanga, canyánya jtsoobenana jayanana soyënga, Bëngbe Bëtsabe juábnaca jtsóyebuambnayëse, nyetscanga chamuatsjínÿama y nyetscanga añemo jatšatayama.

<sup>32</sup> Chë Bëngbe Bëtsabe juabna oyebuambnayá endobena jtsemándayana ntšamo tojt-sichamcá, cha cachabe espíritoca tojtsoyebuambná ora;

<sup>33</sup> er Bëngbe Bëtsá endmëna nda inétsama bënga natjëmbana chamotsiyenama, y ndoñe chë bënga nyetscanga cachcá ndoñe chamondëtsejuabnama, y nye ntšamo cada ona tojtsebošcá chaotsamama.

Ntšamo nyets luarënguenache, chë ošbuáchiyënga, chë Bëngbe Bëtsabe entšanga mondbénefjna luarënguenache endbetsemncá,

<sup>34</sup> tšëngaftangbéntšnaca, shembásenga entsamna iytëca jobiamëngana, ošbuachiyëngcá šmojénefjna ora, er ndoñe quenátslesenciana chënga chora chamuátoyebuambnama, y aíñe chënga entsamna chëngbe boyanga jtsayaunanana, ntšamo Moisesbe leyiñe endayancá.

<sup>35</sup> Chënga ndayánaca jtsetatšëmbuama tmojtsebošëse, cachëngbe boyángbioye yebnoca chamotjanga; er ndoñe corente tšabá ntsemnana canye shembása jtsóyebuambnayana tšëngaftanga ošbuachiyëngcá šmojénefjna ora.

<sup>36</sup> ¿Tšëngaftanga šmojatsjuabná, Bëngbe Bëtsabe tšabe noticiënga tšëngaftangbeñe to-janobojatšé ca, o nye tšëngaftanga chë soyënga šmojanóyëngacñe ca? Ndegombre ndoñe chca; chíyeca tšëngaftanga nye cánÿenga ndoñe ntsoobenana jayanama ndayá jamama cmojtsamnana.

<sup>37</sup> Nda tojtsejuabná cha Bëngbe Bëtsabe juabna oyebuambnayá yomna ca, o chabe ainaniñe chë Espiritu jtsemándayama yojtsebomna ca, cha bontsemna tšabá jtsetatšëmbuana, ntšamo Bëngbe Utabná šojamandacá atše stsabiamnama.

<sup>38</sup> Pero cha ndoñe chca tontsetátšëmbo y chca ndoñe yondmëna ca tojayanëse, ndayá cha tojayancá ndoñe šmatjóyëngacñe.

<sup>39</sup> Chcasna, Jesucristbeyeca atšbe catšátanga, puerte šmochtseboše Bëngbe Bëtsabe juábnaca soyënga jtsóyebuambnayama obenana jtsebomnama, y ndoñe šmattsama chë tempo ndmabiyañe ínÿenga ndoñe chamondëtsoyebuambnama;

<sup>40</sup> pero lempe šmochjama ntšamo jamama yomncá, y ndoñe nye ntšamo cada ona tojatsjuabnacá.

## 15

### *Cristo tojtanayenama*

<sup>1</sup> Morna, Jesucristbeyeca atšbe catšátanga, atše sëntseboše tšëngaftanga chašmuatenójuaboma atše tcbonjanabuayená tšabe noticiënguiñe, ndayá tšëngaftanga

šmonjanóyëngacñe, chë ndáyeca tšëngaftanga Jesucristbeñe šmojtsošbuaché y cha jtseservénëse šmojtseyena.

<sup>2</sup> Chca šmobómnyayeca, tšëngaftanga atsebácanënga šmojtsemna, pero tšëngaftanga sempre chiñe šmojtsošbuachese, ntšamo chonjanabuayiynacá; chca ndóñesna, nýe ndoñe corente tšabá ntjajuaboycá chë buayenana soyënguiñe šmojtsanošbuaché.

<sup>3</sup> Er atše tšëngaftangbeñe sënjëftsanboshjona, Bëngbe Bëtsábiocana atše tijanóyëngacñe más uámana buatëmbana soyënga. Atše tcbonjabuatambá: Cristo tojanóbana bënga bacna soyënga tmojamama, ntšamo Bëngbe Bëtsabe uabemana palabrenguiñe chabe juabna oyebuambnayënga chama tmojanayancá;

<sup>4</sup> chë Cristo tmojanatbontsá y unga tianoye cha cháuatayenama Bëngbe Bëtsá tojanmama, ntšamo Bëngbe Bëtsabe uabemana palabrenguiñe chabe juabna oyebuambnayënga chama tmojanayancá;

<sup>5</sup> chë Pédrëbioye tbojánebëbocnama, y chentšana chë bnëtsana útata ca uabobáinëngbioynaca.

<sup>6</sup> Chentšana mo shachna patsama más chábeñe ošbuáchiyënga tojánebëbuacna, chënga cánýentšë imojtsemna ora; chënguentšanga banga cabá vida imotsóbomñe, masque báseftanga ya tmojóbana.

<sup>7</sup> Chentšana Santiágbioye tbojánebëbocna, y chentšana nýetsca chabe ichmónëngbioye.

<sup>8</sup> Y chentšana átšnaca šonjánëbëbocna. Mo canýe šešona cabá shbená tojonýnacá, Cristo chabe ichmoná šonjánbema, chë tempo chama jopróntama ntsebomncá, ndayëntscuana ínýenga cha tojanabuamatambá.

<sup>9</sup> Er atše sëndmëna chë más batsá uamaná Jesucristbe ichmónëngbeñe; y ni mercedo taitatobuajoñe “chabe ichmoná ca” chašmotsábobuatmama, er atše tša sënjánama Jesucristbeñe ošbuáchiyënga chamotsesufrínama.

<sup>10</sup> Pero Bëngbe Bëtsá atšbe tšabiamama yojanjuabná, y chíyeca atše mora tsmëna ntšamo sëndmëncá, y chabe tšabe juábnaca atšbiamama jtsamama, ndoñe nýe bonamente quenátsmëna. Er atše más sënjatrabajá, chë inýe Jesucristbe ichmónëngbiama; pero ndegombre atše ndoñe nýe canýa chca chiyatsma, sinó masna Bëngbe Bëtsá chë trabajo tojama, tšabe juabna atšbiamama jtsebomñese.

<sup>11</sup> Ndayá más yojtšamána ndoñe quenátsmëna, atše o chënga, Jesucristbe soyëngama abuayiynayiñe más tojatrabajá, sinó ndayá chë soyënga bëngbe buayenana soye yojtsemna, y tšëngaftanga chiñe šmojtsošbuaché.

### *Chë obanënga cachiñe vida mochtsatsbomnama*

<sup>12</sup> Pero bëngbe buayenana soye endmëna, Bëngbe Bëtsá tojanma Cristo cháuatayenama; as ¿ndáyeca básefta tšëngaftanga šmnëtsichamo Bëngbe Bëtsá ndoñe yochanjama chë mora obanënga chámuatayenama ca?

<sup>13</sup> Pero chca tojtsemna, chë obanënga ndoñe mochántayenasna, Cristo cach ndoñe tontanayena;

<sup>14</sup> y Cristo ndoñe matenjésayenëse, bënga nýe bonamente chabiamama fstsabuayiyná, y tšëngaftanga nýe bonamente chábeñe šmojtsošbuaché.

<sup>15</sup> Y canýe más bëts soye: chca tojtsemñesna, bënga muanjábocna mo chë Bëngbe Bëtsabiamama soyënga tmojinýe ca ichamëngcá, pero ndoñe ndegombre chca tontsemna; er bënga fsëndbëtsichamo, Cristo cháuatayenama Bëngbe Bëtsá tojanma ca. Pero chë obanënga ndoñe mochántayenasna, Bëngbe Bëtsá ndoñe tonjanma Cristo cháuatayenama.

<sup>16</sup> Pero chë obanënga ndoñe mochántayenasna, Cristo cach ndoñe tontanayena.

<sup>17</sup> Y Cristo cháuatayenama Bëngbe Bëtsá ndoñe matënjänmëse, tšëngaftanga nýe tondayama chábeñe šmojtsošbuaché; tšëngaftanga chë bacna soyëngama cabá ndoñe perdonánënga šmontsemna.

18 Y chca, chë tmojanóbanënga, Crístbeñe ošbuáchiyënga, chënga cach ndoñe chëngbe bacna soyënguentsana atsebácanënga quemochátsmëna, sinó nyetsca tescama castigánënga.

19 Bënga tmojtsobátmana Cristo bëngbiana tšabe soyënga chaotsamama, pero chca nÿe quem luarentše bënga vida tmojtsebomnëntscuana, as bënga nyetscangbiana más muantsomerecena, nyetscanga bëngbiana chaotsangménama.

20 Pero chca ndoñe ndegombre quenátsmëna, er ndegombre Bëngbe Bëtsá tojanma Cristo cháuatayenama. Mo chë uanatsena shajuancá, jtsinÿanÿayana más shajuanënga chentsana yochjóbcnana, cachcá, Cristo tojtanayena ora, cha tojaninÿanÿé Bëngbe Bëtsá yochjanma ínÿenga chábeñe ošbuáchiyënga chámuatayenama vida chamotsatsbomnana.

21 Chca, ndayá canÿe entšá, Adán, tojanmama, nyetscanga jóbanama yojtsamna, cachcá, ntšamo inÿe entšá, Cristo, tojanmama, Bëngbe Bëtsá yochjama entšanga chámuatayenama.

22 Er ntšamo, Adánbentsana entšanga bétsemnayeca jóbanama jtsamnana, cachcá, Crístbeñe ošbuáchiyënga bétsemnayeca, Bëngbe Bëtsá jamana chë nyetsca tescama yomna tšabe vida chënga chamotsebomnana.

23 Pero Bëngbe Bëtsá jamana cada ona cháuatayenama nÿa chama tempo tojtsemna ora. Natsana Cristo, y chentsana, Cristo cachiñe quem luaroye chaojésabo ora, nyetscanga chë Crístbe entšanga imomnënga.

24 Y chentsana, Bëngbe Bëtsá chë Taitábioye, Cristo chabe amëndayana chabojantšabuaché ora, nyetsca mandadënga, mando y obenana bomnënga corente jtsayënjanayëse.

25 Er Cristo bontsemna ínÿenga mo reycá jtsamëndayana, chabe uayayënga chabe cucuatšinë chamoquedama Bëngbe Bëtsá tojamëntscuana.

26 Canÿe uayayá inétsama entšanga jóbanama; pero Cristo último echanjama chabe obenana pronto chaotsopochocama.

27 Er ntšamo Bëngbe Bëtsabe uabemana palabrenguiñe endayancá: “Bëngbe Bëtsá tojama Cristo nyetsca soyënguiñe chaotsemándama ca.” Pero “tojama Cristo nyetsca soyënguiñe chaotsemándama ca” tojayana ora, jtsopodénana puerte tšabá jinÿama, chca ndoñe yontsayana, Bëngbe Bëtsá Crístbeyeca mandaná yojtsemna ca; Bëngbe Bëtsá nda tojanma Cristo nyetsca soyënguiñe chaotsemándama.

28 Y Cristo nyetsca soyënguiñe chaojtsemándama ora, cach Cristo, chë Uaquiñá, echántsemna Bëngbe Bëtsábeyeca mandaná, Bëngbe Bëtsá chë Cristo nyetsca soyënguiñe chaotsemándama tojanmá. Y chca, Bëngbe Bëtsá lempe echántsemna, lempe ntšamo quem luarentše yobínÿniñe.

29 Inÿetsánaca, báseftanga cachiñe uabáinënga imojtsemna, chë ošbuáchiyënga nduabáinënga obanëngbe cuenta. Chca chënga jamana mo chë obanënga uabáinënga chamotsemnana cuafjamcá. Chë obanënga chámuatayenama ndoñe tontsemnëse, ¿ndáyeca entšanga chëngbe cuenta muantenábaye?

30 Obanënga chámuatayenama Bëngbe Bëtsá ndoñe tonjamëse, ¿ndáyeca bënga muántseprontana nyets tempo resjuiñe jtsajnama, Crístbiana oservenana causa?

31 Atšbiana cada te resjo endmëna jóbanama. Jesucrístbeyeca atšbe catšátanga, atše séntsichamo, chca ndegombre yómnayeca, atše oyejuayá stsemna ca, mo Cristo Jesús Bëngbe Utabnabe canÿe oservenacá, tšëngaftanga chábeñe šmojtsošbuáchema.

32 Mo canÿa tšátjaye bayëngaca tojtsentsjaná orcá, atšbiana puerte resjo enjamna jóbanama, Efeso pueblaca; pero nÿe chë entšanga mondbétsejuabnaye jëftsashjáchama soyënga jtsebošëse chca matsjamnëse, ¿ndaye tšabe soye matënjanóbocna, chca atšbiana resjo jóbanama enjamna ora? Obanënga ndoñe mochántayenësna, mochtsama ntšamo entšanga jayanana monduamancá: “¡Mochjase y mochjofsiye, nderado yëfse muatjóbanaca!”

<sup>33</sup> Ndoñe matenoíngñana. Ntšamo canya tojanayancá: “Nderado nda bacna amiguéngaftaca tojtsenutaná, cha jtsajbanana chë tsabe soyënga, ntšamo jtsamëse vojyena.”

<sup>34</sup> Tšabá šmochtenójuaboye, y juabna ndbomnacá ndoñe; y šmochtsajbaná bacna soyënga amana, chë obanënga ndoñe mochántayena ca juabnaye causa, er báseftanga tšëngaftanguentše Bëngbe Bëtsabe soyënga ndoñe quešmatábuatma. Atše chca séntsichamo tšëngaftanga chašmotsëuatjama.

### *Ntšamo chë obanënga mochtayena*

<sup>35</sup> Pero nderado nda nanjatjaye: “¿Ntšamo chë obanënga mochtayena ca? ¿Mocna cuerpo mochtsebomna ca?”

<sup>36</sup> ¡Juabna ndbomna entsá! Ndayá tcojajé orna, jtseytana chë jénaye chaóbanama, chë matatema vida chaotsebomnama.

<sup>37</sup> Ndayá tcojajecá ndoñe ntsemnana chë juábocnama matatema, ndayá nye chë meshe, trigo meshe o ndaye mata méshnaca jtsemnana.

<sup>38</sup> Pero Bëngbe Bëtsá jamana chë jénayentšana mata chauábocnama, ntšamo jamama cha tojajuabocá; y cha jamana cada jénayentšana canye mata chauábocnama, ntšamo chë jénayentšana chauábocnama tojtsemncá.

<sup>39</sup> Njetsca cuerpënga ndoñe cachcá ntsemnana. Entšanga canye cuerpo mondbomna, bayënga inye cuerpo, shloftšënga inye cuerpo, y beongna inye cuerpo.

<sup>40</sup> Chë celoca vida bomnënga inyetšá jtsinynana, y chë quem luarentše vida bomnëngna inyetšá. Pero chë buashinynanana y botamanana ntšamo celoca vida bomnënga jtsinynancá, ndoñe cachcá ntsemnana chë quem luarentše vida bomnëngbe botamanancá.

<sup>41</sup> Cachcá, shinye ndoñe quenátsbomna cachca buashinynana juashconcá, ni estrellëngcá; y estrellënguëntše cach ndoñe cachcá ntsebuashinynanana.

<sup>42</sup> Cachcá, chë obanënga chámuatayenama Bëngbe Bëtsá chaojama ora chamojtsebomna cuerpo, ndoñe queochátsmëna cachcá ntšamo quem luarentše imojaniyena ora imojéftsebomna cuerpcá. Ntšamo chë jénaye tcojuatbontsá ora chiye jóbanana, cachcá, quem luarentše bënga mondbomna cuerpo jóbanana, inyënga juatbontsana y jtsopochócana; pero bënga chámuatayenama Bëngbe Bëtsá chaojama ora, bënga tsëm cuerpo mochántatsbomna y ndocna te queochatopochóca.

<sup>43</sup> Chë óbana cuerpo tmojuatbontsá ora, chë cuerpo tondaye ntsámanana; pero chë obanënga chámuatayenama Bëngbe Bëtsá chaojama ora, chë tsëm cuerpo puerte echántsebuashinynana y echantsámána. Bënga quem luarentše imoyenëntscuana imobomna cuerpo, nye batsá obenana jtsebomnana; pero chë Bëngbe Bëtsá šochjatšataye tsëm cuerpo, puerte obenana bomna cuerpo echántsemna.

<sup>44</sup> Quem luarentše imobomna cuerpo endmëna cam luarentše vida chaotsebomnama; pero bënga chámuatayenama chaojama ora, chë bënga mochtsebomna tsëm cuerpo, puerte chë Espíritbeyeca echántsemandana. Canye cuerpo quem luarentše vida chaotsebomnama yómnyeyeca, canye cuerpënaca, jtsemnana celoca vida chaotsebomnama.

<sup>45</sup> Chca Bëngbe Bëtsabe uabemana palabrenguiñe endayana: “Bëngbe Bëtsá, chë natsana entsá tbojanma chaotsainama ca.” Adánbentšana njetsca entsanga jabocanana, pero Crísbeyeca, Bëngbe Bëtsá tojama banga mo tsmëma entsangcá chamotsemnana; chca, Cristo jtsemnana mo chë ústonoye Adancá; pero Cristna canye espíritu endmëna, y chë espíritu jamana entsanga chë njetsca tescama yomna tsabe vida chamotsebomnama.

<sup>46</sup> Pero chë celoca njetsca tescama vida jtsebomnama cuerpna ndoñe natsana ntjóbcnana, ndayá chë quem luarentše vida jtsebomnama cuerpo; chentšana chë celoca vida jtsebomnama cuerpo.

<sup>47</sup> Bëngbe Bëtsá, chë natsana entsá tbojanma fshántseca, y chca, cha fshantsentšana tojánbocna; Cristna, mo entsángbentsana chë natsaná tsmacá bemanacá, celocana tojánbocna.

<sup>48</sup> Adánbentsana, chë natsana entsá, chë fshántseca tmojanmábentsana tmojábocanënga, ntšamo cha yojamncá jtsemnana. Cachcá, chë mo tsmëmangcá tojábiamëngna, Cristcá jtsemnana; Cristo nda celocana tojánabo.

<sup>49</sup> Ntšamo bënga jtsinýnana chë Bëngbe Bëtsá fshántseca tbojábema entsacá, cachcá bëngnaca mochtsinýna ntšamo chë celocá yomnacá.

<sup>50</sup> Jesucristbeyeca atšbe catšátanga, atšbe cbochjáuyana, nýe quem luarentše vida jtsebomnama cuerpëngaca, bënga ndoñe ntsobenana Bëngbe Bëtsabe amëndayoye jamashënguana; ni ndayá yochjopochóca soye, ntsobenana ndayá ndoñe yochanjopochóca soye jtsebomnana.

<sup>51</sup> Smochjouena, atšbe canýe soye cbochanjáuyana, y chë soye Bëngbe Bëtsá entsanga tempo ndoñe tonjaninýanjé: Bënga ošbuáchiyënga nýetscanga ndoñe quemochatóbana, pero Bëngbe Bëtsá šochanjátrocaye mo tsmëmangcá.

<sup>52</sup> Nýe betesco, mo tcojofshetá y cachora tcojtafšnacá, quem luare ya jopochócama ora, canýe ángel trompetéfjua chaojuájetá ora, er chora trompetéfjua echanjuénana, Bëngbe Bëtsá echanjama obanënga chámuatayenama, nýetsca tescama vida jtsebomnama; y bënga, chë ainënga mochtsemnëngna, cha šochanjátrocaye mo tsmëmangcá jtsemnana;

<sup>53</sup> er jtseytana Bëngbe Bëtsá chaotrocá chë bëngbeñe jopochócama yomna soye, ndocna te yochanjopochóca soyiñe; y ndayá bëngbeñe yochjóbana soye, ndocna te yochanjóbana soyiñe.

<sup>54</sup> Bëngbe Bëtsá chca bëngaftaca chaojama ora, chë cha jatrócana ndayá bëngbeñe yochjopochocacá, ndocna te yochanjopochóca soyiñe, y ndayá bëngbeñe yochjobancá, ndocna te yochanjóbana soyiñe, chora echanjochnëngo ntšamo Bëngbe Bëtsabe uabemana palabrënguiñe chama endayanacá:

Bëngbe Bëtsá tojayënjaná chë entsanga chamóbanama endbétsama obenana; entsanga ndoñe más quemochatóbana ca.

<sup>55</sup> ¡Mora entsanga chamuatóbanama chaotsama obenana ya ndoñe quenátsmëna;

Bëngbe Bëtsá chë obenana nýetsca tescama tojayënjaná ca!

<sup>56</sup> Entšanga bacna soyënga tmojama causa, obenana endmëna entsanga jóbanama chaotsamnama. Ndayá leyíñe iuayanama, entsá jtsetatšëmbuana ndayá yomna bacna soyënga jamana, y chca tátšëmbo causa, chca bacna soyënga jamama juabnëngaca mandaná jtsemnana, y cabana, jóbanama jtsemnana.

<sup>57</sup> ¡Pero Bëngbe Bëtsá mochtsatschuanaye, bënga mo ayëñjanayëngcá cha šojábiamama, er ya ndoñe šontsamna chca jtsemnana, chë Bëngbe Utabná Jesucristo bëngbiama tojanma sóyeca!

<sup>58</sup> Chíyeca, Jesucristbeyeca atšbe catšátanga, atšbe bonshánënga, Jesucristbeñe sempre puerte šmochtsošbuáchiye y ndocna te šmatjaleséncia ndocná ni tondaye chaotsama chábeñe ošbuáchiyana chašmotsajbanama. Sempre šmochtsentšena bëtscá jtsamana Bëngbe Utabnabiama trabájayiñe, er tšëngaftanga šmondëtatšëmbo, Bëngbe Utabnabiama trabájayiñe ndayá šmojamcá, ndocna te nýe bonamente ntsemnana.

## 16

### *Jerusalenoca ošbuáchiyëngbiama crocenánama*

<sup>1</sup> Mora chanjóyebuambaye chë Jerusalenoca Bëngbe Bëtsabe entsanga ndbomnjëmëngbiama tšëngaftanga šmochjuíchmua crocenánama. Atše séntseboše tšëngaftanga chca chašmoma ntšamo chë Galacia luaroca ošbuachiyëngcá enefjuanenache chama atše sënjanabuayenacá.

<sup>2</sup> Cada tmengo, cmontsamna batšá crocénana jaluárana ntšamo chë semaniñe šmojonÿencá, y šmochtsejuabaye; chca atše choye chajjá ora, ndoñe chacmondétsamna quem uajabótama chora crocénana játatbanayana.

<sup>3</sup> Y atše choye chajjáshjango ora, Jerusalenoye chjichamuá chë tsëngaftanga mo tsabengcá šmojubuáyana entsanga, chë Jerusalenoca ošbuachiyëngbioye tsëngaftangbe crocénana chámuayentšbuachema, y tsbuanachangá chanjúyentšbuachiye ndayá imojtsamama chënga jábuayenama.

<sup>4</sup> Y nderado, átšnaca chëngaftaca jama tsabá tojtsemnëse, chënga átseftaca chamua.

### *Ntšamo Pablo yojanjuabná chë luarëngoye jama*

<sup>5</sup> Atše sëntsejuabná tsëngaftangbioye jama jautsëtsayama, Macedonia luarëjana chajachnëngüentsana, chentša ošbuachiyënga jaftsanyëse, er atše sëntsejuabná natsana Macedonia luaroye jëftsana.

<sup>6</sup> Nderado baseftayté tsëngaftangbeñe chašuésetetana, o nderádose nyets uaftena tempo; as tsëngaftanga inÿe luaroye játama chašmuájabuachama, ndëmoye jama chašojtsemnoye.

<sup>7</sup> Atše ndoñe quetsátsboše nÿe betscó tsëngaftanga jáftsanyana, er atše sëntsobátmana más bayté tsëngaftangbeñe jaftsemnana, Bëngbe Utabná chca šojalesenciase.

<sup>8</sup> Pero Efesoca šochanjajétana Pentecostés fiesta chaojobuáchëntscuana.

<sup>9</sup> Er Bëngbe Bëtsá tojama atše jobenayama muentše chë tsabe noticiëngama banga jábuayenama, y chíyeca banga Crístbeñe montsošbuaché; pero bángnaca atšbe contra montsemna.

<sup>10</sup> Timoteo tsëngaftangbioye chaojase, yejuana šmochtsantješna cha tondayama chaondétsauatjama, tsëngaftangbeñe tojtsemnëntscuana, er cha Bëngbe Utabnabiamia endëtrabája, ntšamo atše sëndamcá.

<sup>11</sup> Chcasna, ndocná chábioye chabondétsáboyënja. Bëtscá šmochjama cha natjëmbana átšbioye chauatábama, er atše cha sëntsobátmana, chë inÿenga muentše Crístbeñe ošbuachiyëngaftaca.

<sup>12</sup> Y Jesucrístbeyeca bëngbe catšata Apólosna, atše bëtscá cha sënjaimpadá, chë Jesucrístbeyeca catšátanga tsëngaftanga jányama mochjángaftaca chaotsama, pero cha ndoñe chenátsbošena choye mora jama. Cha choye caochjá, chaojobená ora ca.

### *Pablo chënga jtadióšoftanama*

<sup>13</sup> Sempre šmochtsenocuedana chë Bëngbe Utabná ndoñe chašmondétseservenama tojtsama soyëngama. Nyets tempo, Crístbeñe y chabe soyënguífñnaca šmochtsošbuáchiye. Ainaniñe puerte añemo šmochtsebomna, y bëtscá šmochtsama Bëngbe Bëtsabe obenánaca.

<sup>14</sup> Y nyetsca soyënga ntšamo chašmojtsamcá, bonshanánaca šmochtsama.

<sup>15</sup> Jesucrístbeyeca atšbe catšátanga, tsëngaftanga šmondétatšëmbo, Estéfanas y chabe pamíllanga chë natsanënga monjamnama Jesucrístbeñe jtsošbuáchiyama, Acaya luaroa, y bëtscá imojtsentšena Bëngbe Utabnabiamia jtsetrabájayana, chabe entsanga jtsëjabuáchanëse.

<sup>16</sup> Atše cbaimpadá, tsëngaftanga lempe šmochtsama ntšamo cmojtsamëndacá, chca entsanga mo tsëngaftangbe uanatsanëngcá, y ntšamo nyetsca chë inÿenga mo bëngcá quemuiñe uajabuáchanëse trabájayënga cmojtsamëndacá.

<sup>17</sup> Atše tša oyejuayá sëntsemna tsëngaftangbe pueblentsana Estéfanas, Fortunato y Acaico moye tmojáshjajnama, er atše sëntsobena oyejuayá chëngaftaca jtsemnana, tsëngaftangaftaca choca jtsemnana cabá ndoñe sëntsobenëntscuana.

<sup>18</sup> Er chënga átšbioye tmonjabo y tsëngaftangbiamia šmonjauyana, y chca chënga tmonjama, atše y tsëngaftanga natjëmbana ainánaca chamotsomñama. Chënga šmochtsétabna mo puerte uámana entsangcá.

<sup>19</sup> Asia luaroca ošbuachiyëngcá enefjuanënga cmontsacheuaná. Aquila y Prisca y chatbe yebnentše mondbétsenefjuana ošbuáchiyënga cmontsacheuaná, Bëngbe Utabnábeñe ošbuachiyëngcá, tšëngaftangcá bétsemnayeca.

<sup>20</sup> Muentša ošbuáchiyënga nÿetscanga cmontsacheuaná. Nÿetscanga šmochjenuaye mo Jesucristbeyeca catšatangcá, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá.

<sup>21</sup> Quem palabrënga tšëngaftanga jacheuayama cach atšbe cucuátšeca sentsabiamná.

<sup>22</sup> Nderado nda Bëngbe Utabnábioye ndoñe tbontsebobonshana, Bëngbe Bëtsá nÿetsca tescama chabocastigá. ¡Bëngbe Utabná cachiñe cochjésabo!

<sup>23</sup> Atše, Bëngbe Bëtsá sëntseimpadana, Bëngbe Utabná Jesús chaoma tšëngaftangbeñe tšabe bendicionënga chaotsemnama.

<sup>24</sup> Atše, nÿetsca tšëngaftanga cbondábabuanÿeshana, canÿa mo tšëngaftangcá, Cristo Jesúseftaca cánÿiñe mo canÿacá jtsemnëse.

## 2 Corintios

### *Jacheuayama*

<sup>1</sup> Atše Pablo, Jesucristbe canye ichmoná, Bëngbe Bëtsá atše chca jtsemnama yojánbošeyeca, Jesucristbeyeca bëngbe catsata Timotéoftaca quem tsbuanácha sentsabiamná, Corinto pueblaca Bëngbe Bëtsábeñe ošbuachiyëngcá enefjuanëngbiamna, y nyets Acaya luarentše Bëngbe Bëtsabe nyetsca entsangbiámna.

<sup>2</sup> Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsëngaftangbeñe tsabe bendicionënga chaotsemnama y ainaniñe tsabe ebionana chašmotsebonnama.

### *Ntšamo Pablo tojansufrí*

<sup>3</sup> Bënga mochtsatschuanaye Bëngbe Bëtsá, chë Bëngbe Utabná Jesucristbe Taitá, bëngbe Taitá, chë bëngbiamna lastemado yomná, y ndaye padecena soyënguiñe tmojtsemna ora, bënga šondbetsañemuayá.

<sup>4</sup> Cha bënga jtsañémuayana padecena soyënguiñe tmojtsemna ora, chca, bënga chamotsobenama chë tmojtseufrinënga jañémuayama, ntšamo Bëngbe Bëtsá šojujabuachcá chënga jujabuáchëse.

<sup>5</sup> Er ntšamo Cristo tojansufricá, bënga tša fsëndësufrina chabiamna oservéniñe; cachcá, Cristbeyëcnaca Bëngbe Bëtsá jamana bënga puerte añemo ainaniñe fchaitsebonnama.

<sup>6</sup> Er bënga tmojtseufrinëse, jtsemnana bënga jobenayama tsëngaftanga jañémuayama chë šmojtseufrina ora, y atsebácanënga chašmotsebonnama, Bëngbe Bëtsabe soyëngama jouenëse. Chë padecena soyënguiñe tmojtsemna ora Bëngbe Bëtsá šojañemose, jtsemnana bënga fchayobenama tsëngaftanga jañémuayama, padecena soyënguiñe šmojtsemna ora. Chca, bënga jobenayana tsëngaftanga jujabuáchana, Bëngbe Bëtsábeñe chašmotsobátmanama, chábeñe jtsošbuáchiyëse, y lempe jtsóboyayama, ntšamo bënga fsënjasufricá šmojtseufrina ora.

<sup>7</sup> Bënga sempre fsëndobátmana y tsabá fsëndëtatšëmbo chë padecena soyënguentšana tsabá šmochjábocanama, er bënga fsëndëtatšëmbo, chë ntšamo bënga fsënjasufricá tsëngaftanga šmojasufrima; y cachcá, Bëngbe Bëtsá yochjama tsëngaftanga ainaniñe puerte añemo chašmotsebonnama, ntšamo bënga fchaitsebonnama cha tojamcá.

<sup>8</sup> Jesucristbeyeca atšbe catsátanga, bënga fsëntseboše tsëngaftanga chašmotsetátšëmbo ntšamo bënga Asia luaroca tša fsënjansufrinama. Bënga puerte padecena soyënguiñe fsënjanienya, nya ndoñe más jauantacá, chentšana vídaca jabocanama ntjatobatmancá.

<sup>9</sup> Bënga šontsanënanana mo jóbanama cuaftsamncá. Pero chë soye tonjanoservé, bënga jtsošbuáchiyama Bëngbe Bëtsábeñe, nda inétsama obanënga chámuatayenama, y ndoñe cabëngbeñe ntsošbuáchiyana.

<sup>10</sup> Cha šojatsebacá bënga jóbanama puerte resjo enjamnentšana, y cachcá šochjátsebacaye bëngbiamna cachiñe cachcá tša resjuiñe chamojtsemna ora. Bënga puerte chábeñe fsëndobátmana, puerte padecena soyënguiñe bënga chamojtsemna ora, cha cachiñe šochjátsebacama.

<sup>11</sup> Tsëngaftángnaca cmontsamna bënga jujabuáchana, bëngbiamna Bëngbe Bëtsá jaimpádase; chca, ba entsanga Bëngbe Bëtsá mochanjëtshuaye, er cha tojama bënga chábentšana tsabe bendicionënga fchayóyëngacñama, cha jamëse ntšamo chënga bëngbiamna tmojanimpadacá.

### *Ndáyeca Pablo Corinto puebløye ndoñe tonjána*

<sup>12</sup> Canye soye endmëna ndayá oyejuayënga šojtsabiamná: bënga bëngbe ainanentša juabnéngaca jtsetatšëmbuana puerte tsabá jtsamëse ftsiyena ca, ntšamo chë



Bëngbe Bëtsabe entsanga endbetsamncá, nyetsca quem luarentša entsángbeñe, y más tsëngaftangbeñe, y bënga jtsetatšëmbuana ntšamo tsabá tifjamcá nyets ainánaca tifjamama. Bënga tondaye chibiatsma quem luarentša entsangbe osertanánaca, ndayá Bëngbe Bëtsá tša tsabia bëngaftaca bëtsemnayeca, šojújabuache chca chamotsiyenama.

<sup>13</sup> Er ntšamo fsëntsabiamnamna ndoñe queftsátsboše, ntšamo tsëngaftanga šmojtsalía y cmojtsësertánentsana inyetsá játayanana, y sentsobátmana puerte tsabá lempe chacmósertama.

<sup>14</sup> Mora ndayá atše stsamama ndoñe lempe quecmátësertana. Pero atše sëntseboše tsëngaftanga chama corente chacmósertama; chca, Bëngbe Utabná quem luaroye chaojésabo ora, tsëngaftanga bëngbiamma oyejuayënga chašmotsemnama, ntšamo bëngnaca tsëngaftangbiamma oyejuayënga fchantsemncá.

<sup>15</sup> Chca ndegombre yomnama atše sëndétatšëmboyecá, atše sënjanjuabná tsëngaftangbioye jshétsana jányama, y chca, chë tsabe soye tsëngaftangbiamma uta soye jamana, tsëngaftangbioye uta soye jányëse.

<sup>16</sup> Atše sënjanjuabná tsëngaftanga jshaftsanyana, Macedonioye ayiñe chëjana matijánachnëngo ora; y chentsana, ya camoye ataboye ora, tsëngaftanga cachiñe jáftsanýana. Chca, tsëngaftanga mašmënjanošená atše juajabuáchana Judea luaroye játama.

<sup>17</sup> Atše chca jamama tsjanjuabná ora, ¿chca tijanma ndoñe corente tsabá ntjenouaboycá? ¿Tsëngaftanga šmatjájuaboye, ntšamo nye quem luarama enójuabnaye entsanga monduamancá, cachora canye soyama “aiñe” y “ndoñe ca” jayanëse, atše ndayánaca jamama snëtsejuabnaye ca?

<sup>18</sup> Canye soye ndegombre endmëna: Bëngbe Bëtsá sempre endbama ntšamo tojayancá, y chca puerte ndegombre endmënayeca, atše ndayánaca chjama ca stjayana ora, chca ndoñe questsbatayana chentsana atšbe juabna jatstrócama, mo canya cachora canye soyama “aiñe” y “ndoñe ca” cuafjatichamcá.

<sup>19</sup> Er Cristo Jesús, Bëngbe Bëtsabe Uaquiñá, ndabiamma Silvano, Timoteo y atše tsëngaftangbeñe fsënjanabuayiyiná, ndoñe ntsejuabnayana canye soye jamama y chentsana jatsjuabnayana inyetsá jatsmama, mo canye entsá cachora canye soyama “aiñe” y “ndoñe ca” cuafjatichamcá, ndayá chana nyets tempo ntšamo tojtsejuabnacá jayanana y jamana ntšamo ndegombre yomncá, chentsana ntjatstrocaycá.

<sup>20</sup> Er ndayá cha tojamiñe, lempe ntšamo Bëngbe Bëtsá tojašebuachenacá jocúmpliana, mo chë lempe ntšamo Bëngbe Bëtsá tojašebuachenama cha “aiñe ca” cuaftsichamcá. Chiyeca, Bëngbe Bëtsá bënga tmojtsatschuaná ora, Cristo Jesúsbeyeca bënga jayanana “chca chaotsemna ca”.

<sup>21</sup> Pero Bëngbe Bëtsá endmëna nda inétsama bënga y tsëngaftanga puerte Crístbeñe chamotsošbuáchema, cháftaca cányiñe mo canyáca jtsemnëse; y Bëngbe Bëtsánaca endmëna nda bënga šojabacacá chabe entsanga chamotsemnama.

<sup>22</sup> Cha tojama chë Uámana Espíritu bëngbe ainaniñe cháumashënguama jtsemándayama, y chë soye jtsinýanýnayana bënga Bëngbe Bëtsabe entsanga imomnama. Y bëngbe ainaniñe chë Espíritu imobómnyayeca, bënga corente jtsetatšëmbuana bënga mochjóyëngacñama lempe ntšamo Bëngbe Bëtsá bënga jatšatayama šojašebuachenacá.

<sup>23</sup> Bëngbe Bëtsá entsonýa atše ndegombre stichámuama. Atše Corinto puebløye cabá ndoñe chiyjá, er atše ndoñe quetsátsboše tsëngaftanga jašëchnana, chë bacna soyënga šmojamama, tchojaucácanëse.

<sup>24</sup> Bënga ndoñe queftsátsboše tsëngaftanga jamëndana ndayiñe cmojtsamna jtsošbuáchiyana; er tša šmojtsošbuachéyeca, ndoñe quešmochatajbaná Crístbeñe jtsošbuáchiyana. Bëngbe fsëntseboše ndayá tsëngaftanga jujabuáchana, corente oyejuayënga chašmotsemnama.

## 2

<sup>1</sup> Chíyeca atše ndoñe chiyjá jautsëtsayama, er atše sënjanjuabó y sënjanéniyana choye ndoñe jama ca, bacna soyënga šmojtsanmama jábuayenama, y chca, ngménënga játabiamana, ntšamo chanýe sënjamcá.

<sup>2</sup> Tšëngaftanga ngménënga chašmotsemnana atše stjamëse, ¿nda yochjama atše oyejuayá chaitsemnana, sinó nýe tšëngaftanga, chë atše ngménënga tijábiamënga?

<sup>3</sup> Chíyeca tcbonjanëbuábiana chë ntšamo šmojualiácá, chca, atše choye stjáhjango ora, tšëngaftanga átšbioye ndoñe ngmená chašmondëbemama. Chca játamamna, tšëngaftangbiana más tšabá endmëna oyejuayá atše chašmobema. Atše tšabá sënjántatšëmbo ndayá átšbioye oyejuayá šojabemcá, tšëngaftangnaca chca mašmënjánbošëna y oyejuayënga chë soye matcmënjánabiama. Chíyeca atše ndoñe chiyataná, nýetscanga oyejuayënga jtsemnana ndoñe quenjatopodena ora.

<sup>4</sup> Pero chë tsbuanácha tcbonjanëbuábiana ora, atše corente šonjanongmé y ainana šonjántsetšëna chca jabuache soyënga tšëngaftanga jubuábiamama, y chca jamama shëchbuíynaca sënjanoperdé. Pero atše ndoñe checbátanëbuabiama atše jatsmama tšëngaftanga puerte ngménënga chašmotsemnana, ndayá chašmotsetatšëmbuama atše tša cbababuánýeshanama.

### *Perdón chë bacna soye amabiama*

<sup>5</sup> Y mora, chë tšëngaftangbeñe puerte ngménënga chaotsemnana tojama boyabásabiamna, cha átšbioye ndoñe ngmená chešnátsbema, ntsachetšá tšëngaftanga tcmojabiamcá, ínýengbioye ínýengbiana más. Chca séntsichamo, er atše ndoñe quetsátsboše jayanama ntsachetšá tojamama cha más bacna soye tojama ca.

<sup>6</sup> Banga tšëngaftanguentsënga ntšamo šmojamcá, chë entšabiana ya bëts castigo entsemna. Nýe nýetsá ponto.

<sup>7</sup> Chamna, ndayá mora cmojtsamna jamamna entsemna, cha jtseperdónana y jañëmuana, chca, ndocna tšabe soye jamama ndobená ndoñe chaondëtsemnana, chë castiguama puerte ngménënga bëtsemna causa.

<sup>8</sup> Chíyeca, tšëngaftanga cbaimpadá cachiñe tšabá chašminýinýe chábioye corente šmobobonshánama.

<sup>9</sup> Tempo ya chama tcbonjanëbuábiana, atše jinýama tšëngaftanga aíñe o ndoñe šmontsanprontánama, lempe ntšamo tcbonjanamëndacá jamama.

<sup>10</sup> Chcasna, ndánaca ndayánaca tšëngaftanga chašmojaperdoná ora, átšnaca cha chantseperdóna. Y atše cha chantseperdóna, ndayá japerdónama ndegombre tojtsemnëse. Y chca chanjama tšëngaftangbe tšabiana y Cristbe delante.

<sup>11</sup> Atše tšëngaftangcá, quem entšábioye šcoperdoná chë bëngbiana tojama bacna soye; chca, Satanás ndoñe chaondobenama bënga jáingñama, er bënga mondëtatšëmbo cha inétsëboše ndaye bacna soye entšá chaotsamama.

### *Ndáyeca Pablo ndoñe natjëmbana Troas puebloca tontsanoquedañe*

<sup>12</sup> Atše Troas puebloca sënjánashjango ora, Cristbe tšabe noticiënga jábuayenama, atše sënjáninýe Bëngbe Utabná tojanma chentše banga chë buayenana soye chamouenama y chëngbe ainaniñe chana chamóyëngacñama.

<sup>13</sup> Masque chca enjamna, atše ndoñe quetstëtsobena natjëmbana ainana jtsebomnana, er atše sënjanjuabná Jesucristbeyeca bëngbe catsata Tito chentše jinýenana, pero ndoñe chca. Chíyeca, Troas pueblentša entšanga sëntanadiošoftaná, y Macedonia luaroye sënjána.

### *Crísoftaca cánýiñe mo canýacá jtsemnëse, bënga mo ayëñjanayëngcá jtsemnana*

<sup>14</sup> Atše Bëngbe Bëtsábioye sëndbëtsatschuanaye, bënga bacna soyënga jamama juabnënga cha tojanëyëñjanama, tempo šojanamëndá juabnënga; y chë mora bënga Crísoftaca cánýiñe mo canýacá jtsemnëse, nýets tempo cha šnetsënachayama, mo canýe ayëñjanayacá,

y chë nyets luarenache entsanga Cristbiana soyënga chamotsábuatmama bëngaftaca cha yojtsamama, mo nda canye botamana uanguëtse soye nyets luarënguenache chauáshanama cuaftsamcá.

<sup>15</sup> Er chë incienso tojtsejuínÿinÿana ora, entsábioye tšabá juanguëtšenana; cachcá Cristbe tšabe noticiënga fstsabuayiná ora, Bëngbe Bëtsabiana bënga jtsemnana chë ndëmuanyënga tmojtsama cha oyejuayá chaotsemnana. Incienso tcojtsejuinÿná ora, nyetscángbioye juanguëtšenana. Cachcá, Bëngbe Bëtsabe palabra fstsoyebuambná ora nyetscanga jouenana, Cristo yojtsatsebacanga y chë pochocánënga jtsemnana imojtsajnëngnaca.

<sup>16</sup> Chë pochocánënga jtsemnana imojtsajnëngna, pochocánënga mochanjábocana, er ntšamo bënga fsëndabuayinacá y tmojouencá chënga tmojtsaboté; y chca, chëngbiana chë tšabe noticiënga jtsemnana mo canye obanabe uanguëtšancá. Pero chë Cristo yochjátsebacangna, tšabe noticiënga tmojóyëngacñeyeca, mochanjobenaye tšabe vida nyets tempo jtsebmoma; y chca, chëngbiana chë tšabe noticiënga jtsemnana mo canye puerte botamana uanguëtšancá. Y asna, ¿nda obenana yojtsebmoma chë tšabe noticiënga jábuayenama trabajo jtsamama?

<sup>17</sup> Bënga chë tšabe noticiënga ndoñe queftsatabuayiná, ntšamo ba entsanga imojtsamcá, mo nye batšá uámana soyënga cuaftsemncá, y ndayánaca juacánama, mo nda ndaye nduámana soyënga cuaftsencá. Banga chca mondama; bënga ndoñe. Bënga, Crísoftaca cánÿiñe mo canyacá jtsemnëse, fsëndabuayiná mo Bëngbe Bëtsabe delante cuaftsemnëngcá, ndegombre nye ntšamo tšabá yomncá nyets ainánaca jtsebošëse, y mo Bëngbe Bëtsabe ichmonëngcá.

### 3

#### *Chë Bëngbe Bëtsabe tsëm tratama buayenana soye*

<sup>1</sup> Chca bëngbiana fstsjayana ora, tsëngaftanga cmojtsinÿana ¿bënga cachiñe tiftëtontsé cabënga bëtsétsanga enobiamnayana? ¿O bënga šojtsamna, mo inÿengcá, tsëngaftanga juyentšbuáchiyana o juátjañana tsbuanachangá, bënga tšabá fstsamama chëchangaca jinÿanÿiyama?

<sup>2</sup> Bënga bëngbe ainaniñe puerte tšabá fsëndétatšëmbo, nyetsca entsanga, ntšamo tsëngaftanga jtsamëse šmoyencá tmojinÿe ora, tsëngaftanga jtsinÿanÿayana bënga ndegombre ntšamo tšabá yomncá fstsamama. Chca, tsëngaftanga jtsemnana mo canye tsbuanachacá, nyetscanga jtsabuatmana y jtsobenana jualiana, bënga tšabá fstsamama.

<sup>3</sup> Nyetscanga tšabá mondétatšëmbo Cristo tojanma tsëngaftanga chábeñe chašmotsošbuáchema, y bëngaftaca cha chca tojanmámnaca. Chca, tsëngaftanga šmondmëna mo Cristbe canye tsbuanachacá, ndayëcha quem luarentša entsángbioye tojuyentšbuaché bëngaftaca. Tsëngaftanga ndoñe chešmatanobená Crístbeñe ošbuáchiyënga jtsemnana entsangbe trabájoca, er Crístbeñe šmonjanošbuaché chë Bëngbe Bëtsá Ainabe Espíritbeyeca; y chca, tsëngaftanga šmondmëna mo canye tsbuanácha cháftaca uabemanëchacá, y ndoñe mo entsángbeyeca uabemana tsbuanachacá. Bëngbe Bëtsá chë mandënga ndëtšbé tablëbenguiñe tojanábema, entsanga chamotsobedecénama, pero tsëngaftangna Cristbe buayenana soye tsëngaftangbe ainaniñe šmojóyëngacñe.

<sup>4</sup> Crístbeyeca Bëngbe Bëtsábeñe jtsošbuáchiyëse, bënga corente fsëndétatšëmbo chca ndegombre bëtsemnana.

<sup>5</sup> Ndoñe quenátmëna, nye bënga cánÿënga quem trabajo jamama fstsobena y játayanana bëngbe soye chë trabajo yojtsemna ca, er bënga jtsobenana chca jamama, nye Bëngbe Bëtsabe ujabuáchenanaca;

<sup>6</sup> er cha tojama bënga fchayobenama quem trabajo jamama, chë entsanga jábuayenana Bëngbe Bëtsá chabe entsángbioye tojanašebuachená soyëngama, ndayá Cristo tojanma sóyeca, mo canye tsëm tratcá, Bëngbe Bëtsá y chabe entsángaftaca. Quem soye

ndoñe quenátsmëna mo chë Bëngbe Bëtsá tempo Israeloca entsángbiyoye léyeca tojanašebuachená soyëngcá. Inyetsá; entsanga mondama Bëngbe Bëtsabe tsëm trato, Uámana Espíritbeyeca. Chë natsana trato, chë uabemana ley, ntšamo chiñe iuabemancá ndoñe tconjama causa, entsá jóbanama jtsemnana; pero Cristbe tsabe noticiënga, chë tsëm trato, entsanga ainaniñe tmojóyëngacñe ora, chë Uámana Espiritu jamana, chë nyetsca tescama yomna tsabe vida chënga chamotsebomnana.

<sup>7</sup> Quem Moisesbe ley, chë ndoñe tmonjobedecema entsanga jóbanama jtsamnana, ndëtsbé tablëbenguiñe letrëngaca tmojanábema, y Bëngbe Bëtsá Moisésbiyoye tbojanantsabuaché ora, cha tša buashinýinýaniñe tojánabo. Chë causa entsanga ndoñe imontsobena ni mo jinýana Moisesbe jubiá, er tša ibojtsanjuebëbuashinýinýana, Bëngbe Bëtsáftaca tbojánencuententsana tojtjanabo ora. Pero betscó tojanéjbana chë jubiá chca buashinýinýanana. Chë ley, chë natsana trato, Bëngbe Bëtsá tojanayentsbuaché ora, tša buashinýinýanána cha tojanmëse;

<sup>8</sup> ndegombre, más bën y uámana tempo entsemna chë Bëngbe Bëtsá bënga šojanašebuachená tsëm soyënga yojtsama ora, chë Uámana Espiritu bëngbe ainaniñe cháuamashënguama Bëngbe Bëtsá tojama ora.

<sup>9</sup> Bëngbe Bëtsá chë ley tojanayentsbuaché ora, chë ndáyeca entsanga jóbanama yojánamna, ntšamo chiñe betsayancá ndoñe tmonjama causa, chora cha chca tojanma puerte chabe buashinýinýanana jinýanýiyëse; ndegombre más bën y uámana tempo entsemna chë mocna ora Bëngbe Bëtsá yojtsama entsanga chabe bominiñe tsábenga chamotsemnana.

<sup>10</sup> Er chë Bëngbe Bëtsá ley tojanayentsbuaché ora tojaninýanýé buashinýinýanana, mora jtsinýnana mo ya tondaye cuabndëtsemncá, chë Bëngbe Bëtsá entsangbiamá tsëm soyënga tojtsamama tcojtsónýá ora, chë tša buashinýinýanana yojtsemna ora.

<sup>11</sup> Er chë leyama tempo, chë ya jochnënguama tempo entsemna ora, Bëngbe Bëtsá chabe buashinýinýanana y uámanana tojinýanýese; ndegombre chë Bëngbe Bëtsá tsëm soyënga entsangbiamá jamama ora, chë ndocna te yochanjochnëngo tempo ora, Bëngbe Bëtsá más chabe buashinýinýanana y uámanana echántsinyánýnaye.

<sup>12</sup> Y chca, Bëngbe Bëtsá chca bëts soyënga yochjamama fsëndobatmánayeca, bënga fsëntsobena jóyebuambayama, nyetsca soyëngama jayanëse, tondayama ntjatauatjca.

<sup>13</sup> Y chca, bënga ndoñe Moiscá queftsátama, chë chabe jubiá chaobuashinýinýenama Bëngbe Bëtsá tojanma ora, canýe entsëjuaca yojtsenamochécjua; cha chca tojanma, chë Israeloca entsanga ndoñe chamondobená jinýama chë jubiá buashinýinýanana ya yojtsëchnëjuana ora.

<sup>14</sup> Pero Bëngbe Bëtsá tojanma chënga ndoñe chaondósertama ntšamo Moisesbiajana cha tojanayancá. Y cabá quem tempo, ntšamo Bëngbe Bëtsá Moisésbiyoye tbojanšbuachenacá chëngbiamá jamama, Israeloca entsanga tmojtsalía ora, ndoñe ntsësertánana Bëngbe Bëtsabe ndegombre soyënga, mo chëngbiamá iytëmena soyënga cuaftsemncá, mo chë Moisés yojtsenamochécjua entsëjuacá. Y chca endmëna, er nyë Crísoftaca cánýiñe mo canýacá jtsemnëse, chënga jtsobenana chë soyëngama jósertana, y iytëmencá ya ndoñe ntsemnana.

<sup>15</sup> Y mëntscoñama, Moisesbe librëšangá chënga tmojtsalía ora, ndoñe ntsësertánana Bëngbe Bëtsabe ndegombre soyëngama, ntšamo chiñe tojtsayancá jamama ndoñe montseboše causa.

<sup>16</sup> Pero canýe entsá chë Bëngbe Utabnabe benache tojishache ora, cha jtsobenana chë soyëngama jósertana.

<sup>17</sup> Y Bëngbe Utabná y Espiritu canýa bondmëna, y Bëngbe Bëtsabe Espiritu tojtsemnentše, chë bacna soyënga jamama juabnënga, ni chë ley ndoñe ntsemándayana.

<sup>18</sup> Moisés chabe jubiañe Bëngbe Bëtsabe buashinýinýanana y uámanana tojaninýanýé, y chíyeca, canýe entsëjuaca yojtsenamochécjua, chca, chënga ndoñe chamondinýama.

Pero bēnga ošbuáchiyēnga n̄yetscanga jtsin̄yan̄nayana Bēngbe Utabnabe buashin̄yīn̄yanana y uámanana, mo can̄ye espejo can̄ye soye tojtsin̄yan̄nacá, y ndoñe queftsátsoše ntšám̄naca jamēse chē soye jatsēytamianana. Cha bēngaftaca yojsama cada te más chē ntšamo cha yomncá bēnga chamotsemnama, cada te más bētsétsanga chē ntšamo cha yomncá jtsemnēse. Chca endmēna ntšamo Bēngbe Utabná yojsama; y Bēngbe Utabná y Espíritu can̄ya bondmēna.

## 4

<sup>1</sup> Y chca, Bēngbe Bētsá bēngbiama lastemado yóm̄nayeca, quem trabajo šojaban̄yé, jtsabuayiynayama chē Crísoftaca tojašebuachená soyēnga; y chíyeca bēnga ndocna te ntjájbanana ainaniñe añemo bomnana.

<sup>2</sup> Bēnga fsēntsaboté chē ín̄yēnga iytēmencá innétsama soyēnga, chē ín̄yēnga tmojin̄ye ora chama jtsēuatjana, y chē ín̄yēnga entšanga jáingñama innétsama soyēngnaca, y Bēngbe Bētsabe buayenana soye ndoñe queftsatstróca ndoñe ndegombre soyēngaca. Chamna, bēnga sempre n̄ye chē ntšamo ndegombre yomncá fsēndbétsoyebuambnaye, mo Bēngbe Bētsabe delante cuaftsemnēngcá jtsamēse; y chca, bēnga fsēndbétsama cada entšabe ainanentša juabnēnga chamuayanama, bēnga ndegombre soyēnga fstsoyebuambná ca.

<sup>3</sup> Y nderado bēnga chē tšabe noticiēnga fstsabuayiyná ora, báseftanga chē soyēnga chaósertama ndoñe tontsopodēnēse, n̄ye chē pochocánēnga jtsemnama tmojtsajnēngbiama chca jtsemnana.

<sup>4</sup> Chēngbiama, chē Crístbeñe ndošbuáchiyēngbiama, chē quem luarentše mora mandayá, Satanás, tojama chē buayenana soye ndoñe chaondétsēsertánama; chca, chēnga ndoñe chamondin̄yama chē tšabe noticiēnguentšana puerte bēts y tšabe soyēnga, chē Cristo puerte bētsá y obená yomnama ín̄yan̄naye soyēnga, nda n̄yetsca soyēnguiñe Bēngbe Bētsacá yomna.

<sup>5</sup> Bēnga ndoñe n̄ye cabēngbe soyama queftsatabuayiyná, ndayá Jesucristbiama mo Bēngbe Utabnacá. Bēnga bēngbiama fsēndbáyana mo oservenēngcá fstsmēna ca, tsēngaftanga jujabuáchama; y chca fsēndbétsama Jesús jaserviama.

<sup>6</sup> Er Bēngbe Bētsá, nda quem luare jobojátšama ora tojanmandá bin̄yñiñe ibetentšana chaóbocnama, chánaca tojama bēnga ainaniñe tšabá chabe soyēngama chašotsēsertánama, chca bēnga fchayobená juabuátmanana chē Bēngbe Bētsabe uámanana y obenanentšana inétsobocana osertánana, ndayá Crístbeñe bēnga mondon̄já.

### *Bēnga fsēndoyena Crístbeñe jtsošbuáchiyēse*

<sup>7</sup> Pero chē puerte tšabe y bēts soye, chē Cristbe buayenana soye, bēnga mondbomna cuerpiñe, bēngbe ainaniñe; y chē cuerpēnga jtsemnana n̄ye mo matbajēngcá, ndoñe yapa obenana ntsebomnana, chca, jin̄yan̄iyama tša bēts obenana Bēngbe Bētsábiocana yóbocanama, y ndoñe bēngbentšana.

<sup>8</sup> Y chca, bēnga n̄yetsca padecena soyēnguiñe vida fsēndbomna, pero ndoñe queftsátsmēna ndobenēnga chē padecena soyēnguentšana tšabá jabocanama; ndoñe queftsátstātšēmo ndayá jamama šojtsamna, pero ndoñe queftsátsmēna ntsoyēngcá jtsobátmanama quem padecena soyēnguentšana tšabá jabocnama.

<sup>9</sup> In̄yēnga montsama bēnga puerte fchaisufrima, pero Bēngbe Bētsá ndoñe n̄ye cachcá šontsabashejuana; mo nda ín̄yabioye cuafjutsēncá tmojtsentsjaná ora, ya jóbama jtseprontánana, uayayēnga bēnga jtsēbáyama imojtsejuabnangbe cucuatšīñe fsēntsemna, pero cabá ndoñe ntjobáyana.

<sup>10</sup> In̄yēnga sempre jtsamana bēnga bēngbe cuerpiñe puerte fchaisufrima, y jobanám̄naca resjo jtsemnana, ntšamo Jesúseftaca tmojanm̄cá, cha chaosufrima y chaóbanama. Chca bēngaftaca endopasana, chca, ín̄yēnga chamobená jin̄yama Jesús bēngbeñe vida yobomnama.

11 Er bënga vida fchabomnëntscuana, sempre puerte resjo bëngbiana jëftsemnana jóbana, Jesúsbioye servena causa; y chca endmëna, ínÿenga chamobená jinÿama Jesús vida yobomnama bëngbe cuerpiñe, chë canÿe te yochjopochóca cuerpo.

12 Y chca, bënga tša fsëndesufrina y jobanámnaca resjo endmëna; y tsëngaftanga tsabe noticiënga šmojóÿengacñayeca, Bëngbe Bëtsá tojama chë nÿetsca tescama yomna tsabe vida chašmotsebomnama.

13 Bëngbe Bëtsabe uabemana palabrenguiñe endayana: “Atše sëntsanosbuaché y chíyeca sënjanoyebuambá ca.” Bënga cachca ošbuáchiyana fsëndbomna chë chca tojanayanacá, y chíyeca bëngnaca Bëngbe Bëtsábeñe fsëntsošbuaché y chabiana fsëntsoyebuambná.

14 Er bënga fsëndétatsëmbo, Bëngbe Bëtsá, nda tojanma Bëngbe Utabná Jesús cháuatayenama, chánaca yochjama bënga Crísoftaca cánÿiñe mo canÿacá jtsemnëse, bënga chámuatayenama, y tsëngaftangaftaca cánÿiñe cha yochtsemnoye šochjúshejango.

15 Lempe ntšamo bënga fstsama y fstsesufrincá tsëngaftangbe tsabiana endmëna; chca, más becá entšanga chábeñe chamojtsošbuaché ora, ba tsabe bendicionënga Bëngbe Bëtsá entšangbiana jtsemnëse, más becá entšangnaca chábioye chamotsatschuaná, ndayá chëngbiana cha yochjamama; y lempe chca, Bëngbe Bëtsá puerte uamaná y obená yomnama nÿetsca entšanga chamotsichámuama.

16 Chíyeca bënga ndoñe ntjájbanana ainaniñe añemo bomnana. Masque quem luarentša bëngbe cuerpo cada te jtsopochócyana, Bëngbe Bëtsá jamana chë bëngbentsana nÿets tempo vida yochtsebomna soye, cada te más obenana chaotsebomnama; y chca, bënga jtsemnana mo tsmëma entšangcá.

17 Ntšamo bënga mora fsëndesufrincá endmëna nÿe quem luarentše vida tmojtsebomnëntscuana, y chca, chë soye jtsemnana mo canÿe nduámana soycá; pero ntšamo bënga fsëndesufrincá josérviana bënga jtsebomnama chë Bëngbe Bëtsá šochjatsataye puerte bëts uámanana y obenana, cháftaca nÿets tempo vida jtsebomnama, chë ndayá yomna nÿetsca soyëngama más bëts y uámana soye.

18 Er bënga nÿe chë tojtsopodena jinÿama soyënguiñe ndoñe nÿets tempo queftsatsjuabná, ndayá chë ndoñe yondopodena jinÿama soyënguiñe; er chë bënga imobena jinÿama soyënga ndoñe nÿetsca tescama ntsemnana; pero chë bënga ndoñe mondobena jinÿama soyënga cocayé nÿetsca tescama jtsemnana.

## 5

1 Bënga mora mondbomna canÿe cuerpo quem luarentše vida jtsebomnama. Quem cuerpo yomna mo chë jtsatsjacama yopodena yebncá, cánÿentše ndoñe nÿets tempo ntjëftsemnana. Bënga mondetatsëmbo, quem cuerpo canÿe te tojtsopochocase, Bëngbe Bëtsá yochjama bënga tsmëma cuerpënga chamotsatsbomnama, celoca nÿetsca tescama vida jtsebomnama, Bëngbe Bëtsabe pormana cuerpënga y ndoñe entšangbe pormana cuerpënga.

2 Chíyeca, bënga quem luarentše chca vida tmojtsebomnëntscuana, yapa tmojtseufrina causa, bënga tša jtsebošana betscó Bëngbe Bëtsá celoye chašúyambama, y bënga nÿets tempo celoca jtsiyenama tsëm cuerpo jtsebomnama cha chaomama;

3 chca, Cristo yochjésabo ora, bënga chë tsëm cuérpoca chamotsemnana, y ndoñe nÿe espíritu ndocna cuérpoca.

4 Bënga quem cuerpiñe, chë quem luarentše vida jtsebomnama cuerpiñe chamojtsiyenëntscuana, yapa padecena soyënguiñe sufrina causa, bënga jabuache mochanjáshachna; chca echántsemna ndoñe nÿe chë espíritu ndocna cuérpoca jtsemnana bënga imojtsebóseyeca, ndayá masna, bënga chë tsëm cuerpo chamotsebomnama Bëngbe Bëtsá chaomama imojtsebóseyeca. Bënga fsëntseboše chë bëngbeñe jopochócamo yomna soye Bëngbe Bëtsá lempe chaotrocama, chca, bënga chamotsobenama celoca nÿetsca tescama vida jtsebomnama.

<sup>5</sup> Y Bëngbe Bëtsá endmëna nda tojama bënga chamotseprontánama chë tsëm cuerpo jtsebomnama, y nda tojama Espíritu bëngbe ainaniñe cháuamashënguama, chca bëngbioye jinýanýiyama, bënga ndegombre mochjóyëngacñe ndayá Bëngbe Bëtsá tojašebuachenacá.

<sup>6</sup> Y chca, bënga sempre ainaniñe bëts añemo fchandbëtsebomna. Bënga fsëndétatsëmbo, quem cuerpiñe cabá vida bënga mochjëftsebomnëntscuana, bënga ndoñe mochántsemna Bëngbe Utabná yojtsemnentse.

<sup>7</sup> Er mora bënga fsëndoyena jtsamëse, ntšamo Crístbeñe bënga imošbuachecá, y ndoñe nýe ndayá jinýama tmojtsobenama.

<sup>8</sup> Bëngbe fsëntsemna ainaniñe bëts añémoca, y más fsëntseboše jájbanana quem cuerpiñe vida jtsebomnana, jama Bëngbe Utabnáftaca nýetsca tescama vida jtsebomnama.

<sup>9</sup> Chíyeca bënga bëtscá fsëndëntšena Bëngbe Utabná sempre oyejuayá jabemama, masque bënga quem luarentše quem cuérpoca tmojtsiyena, o ya ndoñe.

<sup>10</sup> Er nýetscanga šontsamna jashjanguana Crístbe puestoca tribunalentše, cada ona ntšamo yomerecencá chaóyëngacñama, ntšamo tšabá o ndoñe tšabá quem luarentše chabe cuerpiñe vida yojjëftsebomnëntscuana tojëftsemcá.

*Jábuayenama ntšamo Bëngbe Bëtsá inama entšanga tempcá tšabá cháftaca chamotsatsmënama*

<sup>11</sup> Chcasna, Bëngbe Utabná nýetscangbiana chë más bëtsá yomnama jtsejuabnayëse, bënga bëtscá fsëndama entšanga jáyëñjanama, bënga tšabá fstsamama chamotsejuabnama. Pero Bëngbe Bëtsá ya endétatsëmbo ntšamo bënga fstmënama, y atše sëntsobátmana tšëngaftángnaca chca tšabá chašmotsetátšëmbo, tšëngaftangbe ainanentša juabnëngaca, chë bëngbiana aíñe ca cmojtsëtsëtsná juabnënga.

<sup>12</sup> Bënga ndoñe cachiñe cabëngbiana queftsatoyebuambná; chca fsëntsichamo ndayá tšëngaftanga oyejuayënga bëngbiana chašmotsemnama, chca, tšëngaftanga jojuama chašmobenama, chë uámana soyënga tmojtsebiamnángbioye ndayá entšanga canýe entšabeñe tmojtsonýacá y ndoñe chca chë entšabe ainaniñe tomna soyëngaca.

<sup>13</sup> Er bënga mo chë ndoñe corente juabna ndbomnëngcá fstsamëse, ntšamo báseftanga mondbetsichamcá, jtsemnana Bëngbe Bëtsá jaserviama; y bënga corente juabna bomnëngcá fstsamëse, jtsemnana tšëngaftangbe tšabiana.

<sup>14</sup> Bënga chca fsëndmëna, Cristo šondábabuanýeshanayeca, y chë soye endama bënga nýe cha fchaitseservénama, er bënga fsëndenojuabná y puerte tšabá fsëndétatsëmbo, canýa, Cristo, nýetscangbiana tojanóbanama; y cha nýetscangbiana tojanóbanayeca, endmëna mo cha tojanóbana ora, nýetscanga cháftaca cuafjobancá.

<sup>15</sup> Y Cristo nýetscangbiana tojanóbana, chë quem luarentše vida bomnënga ndoñe más nýe cachëngbiana chamondëtsiyenama, sinó chabiana, nda chëngbiana tojanóbana y tojtanayena.

<sup>16</sup> Chíyeca, bënga ya ndoñe ndocnabiana queftsatsjuabná ntšamo entšanga quem luarentše jtsejuabnayama monduamancá; masque ndegombre bënga chca Crístbiana fsënjanjuabná, mora ya ndoñe chca chabiana queftsatsjuabná.

<sup>17</sup> Chcasna, nderado nda Crísoftaca cánýiñe mo canýacá tojtsemna, Bëngbe Bëtsá tojama cha mo canýe tsëm entšacá chaotsemnama. Ntšamo chë Crístbioye cabá nduabuátmana ora cha yojamncá, mora ya ndoñe quenátsmëna. Morna cha jtsejuabnayana y jtsamana inýe soyënga y tsëm soyënga.

<sup>18</sup> Bëngbe Bëtsá endmëna nda chca inétsama, entšanga mo tsëm entšangcá jábiamama; y cha Crísoftaca tojama bënga tempcá tšabá cháftaca chamotsatsmënama. Y cha bënga canýe trabajo šonjanabanýé, bënga entšanga jábuayenama, Bëngbe Bëtsá inétsama entšanga tempcá tšabá cháftaca chamotsatsmënama, y entšanga jujabuáchama chca chamotsemnama.

<sup>19</sup> O mëntšá, Cristo tojanma sóyeca Bëngbe Bëtsá yojtsama entšanga chamotsobenama tempcá tšabá cháftaca jtsatsmënama, y chca, chënga chamotsobena chëngbe bacna

soyëngama perdonánënga jtsemnana, y chë soyëngama nyetsca tescama castigánënga jtsemnana ndoñe chaondëtsamnama. Y bënga šonjanabanýe chë trabajo, entšanga jtsabuayiynayama ntšamo Bëngbe Bëtsá inama entšanga tempcá tšabá cháftaca chamot-satsmënana.

<sup>20</sup> Y chca, bënga jtsemnana Cristbe cuenta oyebuambnayënga y amënga, mo cach Bëngbe Bëtsá bëngaftaca cmojtsaimpadancá. Cristbe cuenta cbaimpadá, bëtscá šmochtsentsëna Bëngbe Bëtsáftaca tempcá tšabá jtsatsmënana.

<sup>21</sup> Cristo ndocna bacna soye tonjanma, pero bëngbe bacna soyënga jabuajuánamna, Bëngbe Bëtsá cháftaca tojanma mo cha canýe bacna soyënga amá cuaftsemncá, chca, bënga Crísoftaca cánýiñe mo canýacá jtsemnëse, Bëngbe Bëtsabe bominyiñe tšábënga jtsemnana chamotsobenama.

## 6

<sup>1</sup> Chcáyëca, bënga Bëngbe Bëtsáftaca cánýiñe trabájayënga quetsomñëcana, cbontsaim-padana ndoñe nýe bonamente chašmondóyëngacñe chë Bëngbe Bëtsá yojtsama soyënga, tšëngaftangbiama tšabe juabna jtsebomnëse.

<sup>2</sup> Er Bëngbe Bëtsá chabe uabemana palabrenguiñe mëntsá tojánayana: Chë tšabe soye jamama tšabá šonjaninýana ora, atše tcbonjanoyeuná; chë ácbioye jatsbocama te, tcbonjanájabuache ca.

Smochjinýe. Mora entsemna chë mocna ora Bëngbe Bëtsá tšabá ibojtsinýana tšabe soye jamama; mora entsemna chë mocna ora Bëngbe Bëtsá yojtseboše aca jatsbocama.

<sup>3</sup> Bënga ndocna bacna soye queftsátama, ndayá chaoma entšanga chë tšabe noticiënga chamotsábotema, chca, ndocná podesca chaondëtsóyebuambnama bëngbe trabajuama, Cristbiama.

<sup>4</sup> Inýetsá, bëngna nyetsca soyënguiñe fsënjaniyena mo Bëngbe Bëtsabe oservenëngcá; Bëngbe Bëtsábeñe obatmancá puerte uantadënga jtsemnëse, fstsesufrina ora; puerte padecena soyënguiñe bëtsemna causa, ndayá jamama ndoñe fsëntsetatšëmbo ora; y ainaniñe puerte ngmënaca fstsemna ora;

<sup>5</sup> Inýënga šojtsatsetšená ora; cárceloye šojautame ora; entšanga bëngbe contra tmojtsenbouénana ora; jabuache trabájayiñe puerte uamëntsnayënga fstsemna ora; bayté ntsamanacá fstsemna ora; y jasama tondaye fsëntsebomna ora.

<sup>6</sup> Bëngnaca fsëntsinýanýná Bëngbe Bëtsabe oservenënga fstsmënana, puerte tšabe vídaca, ndocna bacna soye ntjamcá jtsiyenëse; Bëngbe Bëtsabe soyëngama corente jtsetatšëmbëse; inýënga ntšamo šojáborlaye ora puerte uantadënga jtsemnëse; inýëngbioye puerte bonshanánaca jtsénýayëse; Uámana Espíritu bëngbe ainaniñe jtsebomnëse; y ndegombre nyets ainánaca nyetscanga jtsababuánýëshanëse;

<sup>7</sup> ntšamo Bëngbe Bëtsabiama ndegombre yomncá jtsabuayiynayëse; Bëngbe Bëtsabe obenánaca ba soyënga jtsamëse; y mo chë soldadëngcá, uayayënga jáyëñjanama y chëngbiama jenëuyanama soyënga jtsebomnana, chë Satanásbioye jáyëñjanama y chabiama jenëuyanama ndayá Bëngbe Bëtsá šojatšatacá jtsebomnëse; y Bëngbe Bëtsá chca tojama, er cha tojama bënga chabe bominyiñe tšábënga chamotsemnana.

<sup>8</sup> Bënga fsëntsinýanýná Bëngbe Bëtsabe oservenënga fstsmënana, inýënga bëngbiama tšabe soyënga tmojtsejuabná ora y bënga nduámanënga jtsemnana chënga tmojtsama ora; inýënga tšabe soyënga bëngbiama tmojtsoyebuambná ora y chënga bëngbiama podesca tmojtsichamo ora; bënga áingñayënga fstsmëna ca báseftanga tmojtsejuabná ora, pero bënga ntšamo ndegombre yomncá jtsóyebuambnayëse.

<sup>9</sup> Mo nduamanëngcá bënga entšángbeñe jtsénýayana, pero banga corente tšabá bënga šondëubuatma; bëngbiama sempre resjo endmëna jóbanama, pero smochjinýe, bënga sempre vídaca chentšana jatóbocañana; bënga juatsjinýama jobenayama, Bëngbe Bëtsábeyëca castigánënga fchandbëtsemna, pero nýa jóbanana ndoñe.



10 Masque ngménënga fstsemna, ainaniñe sempre oyejuayënga fchandbétsonñe; masque ndbomñejemëngcá, pero fchandbétsama banga Bëngbe Bëtsábíocana bëtscá chamotsebomnama; quem luarentša soyënga tondaye queftsátbomna, pero Bëngbe Bëtsabe entšanga quetsomñecana, ndegombre lempe fsëndétsóbomñe.

11 Tšëngaftangbiamá, Corintoca entšanga, lempe fsënjayana, tondaye ntjaitëmccá; nyets ainánaca, corente cbondábabuanjeshana.

12 Bënga puerte cbondábabuanjeshana, pero tšëngaftangna ndoñe yapa quešcátatabuanjeshana.

13 Atše cbontsaimpadana, mo canye taitá chabe básenga cuaftsaimpadancá, atše puerte chašmotsebobonshánama, er atše corente cbondábabuanjeshana.

### *Bënga mondmëna mo Bëngbe Bëtsabe bëtš yebncá*

14 Crístbeñe ndošbuáchiyëngaftaca ndoñe šmatjenutaná ndayánaca jamama, er chca, chëngaftaca šmatjábocana mo chë jaárama uacnata ndoñe cachénchechata tbontsemncá. Ndegombre, chë tšabe soyënga amá y Bëngbe Bëtsabe bominjñe tšabia mëná, nya tondayama cachcá ntsejuabnayana, chë Bëngbe Bëtsá tojamandacá ndoñe tontsamacá y bacna soyënga amacá. Ndegombre, chë entšangbe juabna binjñayáftaca vida bomná, nya tondaye ntsebomnana chë nye mo ibetiñcá juabnayáftaca.

15 Cristo y Satanás, Belial cánaca uabainá, ndocna te tondayama cachcá ntsejuabnayana; y cachcá copasana, Crístbeñe ošbuachiyá y chábeñe ndošbuachiyáftaca.

16 Ndocna soyiñe cachcá ntsemnana, Bëngbe Bëtsabe bëtš yebna, chë nye canye Bëngbe Bëtsábíoye jadórana yebna, y chë entšangbe pormana soyënga, mo diosënga cuaftsemncá jtsadoránana soyënga; chca endmëna, er bënga, nyetscanga cánjñe Jesucrístbeñe ošbuachiyëngcá, mondmëna mo Bëngbe Bëtsá Ainabe bëtš yebncá, ntšamo Bëngbe Bëtsá chabe uabemana palabrenguiñe chabe entšangbiamá tojanayancá: Chëngbeñe vida chántsebomna y chëngbenache chántšana; atše chëngbe Bëtsá chántsemna y chëngna atšbe entšanga ca.

17 Chiyeca mëntšánaca Bëngbe Utabná chabe entšanga tojanëyana:

“Chë bacna soye amëngbentšana šmochjésevocana, y chëngbentšana šmochtsojuánañe; tondaye šmattsebana, ni šmattsama ndayá Bëngbe Bëtsabe entšangbiamá ndoñe tšabá tontsemncá.

As cbochanjúbuaja,

18 y chántsemna mo canye taitacá tšëngaftangbiamá, y tšëngaftangna mo atšbe uaquiñënga y bemiangcá.

Chca sentsichamo atše, tšëngaftangbe Utabná, nyets obenana bomná ca” —chiñe enduábemana.

## 7

1 Chcasna, atšbe bonshánënga, chca endmëna ntšamo Bëngbe Bëtsá šojašebuachenacá. Chiyeca šontsamna, Bëngbe Bëtsabe delante nyetsca soyënguiñe tšábënga jtsemnana, bëngbe cuerpama o espíritu biamá bacna soye ndoñe más ntsamcá; y Bëngbe Bëtsá nyetscangbiamá más uamaná yomna ca mondëjuabnáyeca, lempe ntšamo tmojobenacá mochtsiyena mo chabe entšangcá, nyetsca soyënguiñe puerte tšábënga jtsemnëse.

### *Ntšamo chë Corintoca entšanga juabna tmojanthroca*

2 Bëngbiamá šmochtsenójuabnaye tšëngaftangbe ainaniñe puerte bonshanánaca. Bënga ndocnabiamá bacna soye chibiatsma, ndocnabiamá chibiatsma más bacna entšá chaotsemnana, y ndocnábíoye chibiatsingñé.

3 Atše chca ndoñe quetsátichamo, ndoñe tšabá šmonjama ca tšëngaftangbiamá jayanama, er ntšamo ya tcbonjauyancá, atše tšëngaftangbiamá sempre ainaniñe puerte

bonshanánaca sēndbétseñojuabnaye; y chca, mo átseftaca canyíñcá šmochántsemna, masque chayóbana o cabá vida chaitsóbomñese.

<sup>4</sup> Atse puerte tsabá sēndétatšēmo, ntšamo tsabá yomncá šmochtsamama; y tsēngaftangbiama puerte oyejuayá sēntsemna. Lempe ntšamo tsēsufriñcá tsiyenama, atšbe ainaniñe bēts añemo sēndētsóbomñe y corente sēntsoyejuá.

<sup>5</sup> Macedonia luaroye fsēnjánashjajna orscana, ndoñe luare queftsátsbomna jóchnama, sinó nyetsca soyēnguiñe fsēndēpadecena: chē bēngbe buayenana soyama contra tmojtsemnēngaftaca jabuachana enatsētsnayese, y bēngbe ainaniñe jtsauatjese.

<sup>6</sup> Pero Bēngbe Bētsá, chē yapa añemo ndbomnēngbioye endbetsañemuayá, tojanma bēnga ainaniñe más añemo fchaitsebomnama, Tito moye tonjánashjango ora.

<sup>7</sup> Y cha tonjánabo ora, bēnga ndoñe más añemo quefstétsebomna nye cha tojánashjanguama, sinó tsēngaftanga šmojanájabuachama y ainaniñe añemo chaotsebomnama šmojanmama. Cha šonjanéyana tsēngaftanga tša šmojánboše bēnga jányama ca, y šonjanacuntá ntšamo tsēngaftanga ngménaca šmojamna, atšbiama ndoñe tsabá šmonjanma causa, y ntšamo tsēngaftangbiama atšbe tsabiana puerte iuámanana; y quem chabe noticiēngaca, cabá más sēntsoyejuá.

<sup>8</sup> Er masque tsēngaftanga tša ngménaca šmojamna chē tcbonjanēbuábiamama tsbuanáchama, mora ndoñe quetsatsjuabná más tsabá yojamna chca ndoñe jatēbuabiamana ca; masque tempo atse chca sēnjanjuabná, er atse sēntsetatšēmo chē tsbuanácha básefta tescama ngménēnga tcmojánabiamama,

<sup>9</sup> mora atse puerte oyejuayá sēntsemna, ndoñe tsēngaftanga ngménēnga šmojamnama, ndayá chē šmojánbomna ngménana tojanmama tsēngaftanga chašmuenójuaboma ndoñe tsabá šmontsamama, y chca amana chašmotsajbanama, tsēngaftangbe juabnēnga jatrócase. Chca enjamna, er tsēngaftanga ngménana šmojánbomna ntšamo Bēngbe Bētsá inabošcá; chíyeca, bēnga ndocna bacna soye tsēngaftangbiama chibiatsma.

<sup>10</sup> Ntšamo Bēngbe Bētsá tojtsebošcá ngménana bomnentsana, jóbocnana chē bacna soyēnga tcojamama jenójuaboyana y juabnēnga jatrócana; y juabna jatrócana entšábioye juanatsana atsbocaná chaotsemnama, y cha ndocna te ntjátsjuabnayana más tsabá yojamna ndoñe chca ntjatstrócana ca. Pero ntšamo chē nye quem luarama enójuabnaye entšanga mondbetsebomncá ngménana bomnentsana, ndoñe ntjóbocnana juabna jatrócana; chentšana jóbocnana nye nyetsca tescama castiganá jtsemnana, mo nyetsca tescama cuafjobancá.

<sup>11</sup> Smochjinnye ndayá tojóbocna, ntšamo Bēngbe Bētsá inabošcá ngménana bomnentsana: tojanma chē šmojanma soyiñe puerte chašmuenójuaboma; y ntšamo jájandmanana bētscá chašmonguanguama; tojanma tsēngaftanga chacmetonama chē bacna soye tojanmáftaca; y castigánēnga jtsemnama jtsauatjámncá. Chentšana, tsēngaftanga tša šmojtsanboše atse jinýama; y šmojtsanprontana lempe jamama chca bacna soye ndoñe más chaondētsemnama y chca tojanmábioye jacastígama. Nyetsca chē soyēnguiñe tsēngaftanga šmonjinýanyé chca bacna soye ndoñe šmonjanmama; y chca, mora tondaye quenátsmēna tsēngaftanga castigo jtsebomnama chacmotsamnama.

<sup>12</sup> Y chca, atse chē tsbuanácha tcbonjanēbuábiamama ora, ndoñe checbátanēbuabiamama chē puerte bacna soye tojanmábeyeca, ni chē bacna soye tojanoyēngacñábeyeca; ndayá tsēngaftanga, mo Bēngbe Bētsabe delante cuaftsemnēngcá, chē šmojanma soyiñe bētscá chašmuenójuaboma, y chca, cha chašminýanyé tsēngaftanga bēngbe tsabiamama puerte šmenójuabnamama.

<sup>13</sup> Chíyeca bēnga más añemo ainaniñe fsēntsebomna.

Pero ntsachetsá añemo fstsbofnama, masna puerte oyejuayēnga fsēntsemna, er bēnga fsēnjinye Tito tša oyejuayá, er chabe ainaniñe lempe natjēmbana yojtsemna nyetsca tsēngaftangbiama.

14 Tito tšëngaftanga jányama cabá nda ora, atše cha sënjaniana tšëngaftanga šmochjanóyeunaye chë atše tcbonjanëbuaja palabra ca; y tšëngaftanga ndoñe chešmatsma atše chaitsëuatjama chca tijánayanama. Inyetsá, lempe ntšamo tchojauyancá ndegombre endmëna; cachcá, ntšamo bënga Títbioye fsënjaniancá ndegombre entsemna, chë tšëngaftangbiama fstsóyejuama.

15 Y mora Tito más cmontsababuányëshana, ntšamo cha tcmojanamëndacá ndayá tšëngaftanga šmojanmama, y ntšamo puerte respétoca y mo uamaná cuaftsemncá chabiama jtsejuabnayëse šmojanofjama tojtenojuabó ora.

16 Atše puerte oyejuayá sëntsemna, er atše sëndétatšëmbo tšëngaftanga ntšamo tšabá yomncá nyetsca soyënguiñe šmochtsamama.

## 8

### *Chënga jañëmuayama, inye ošbuachiyëngbioye nyets ainánaca jujabuáchama*

1 Y mora, Jesucristbeyeca catšátanga, bënga fsëntseboše tšëngaftanga chašmotsetátšëmbo ntšamo Bëngbe Bëtsá bëtscá tšabe bendicionënga tojama Macedonia luarentše ošbuachiyëngcá enefjuanëngbiama.

2 Chënga puerte tmojasufrí, y chora chca, chënga tmojinyanýe becá imošbuáchema y tša imoyejuama; y masque puerte ndbomnjëmënga, chënga nyets ainánaca bëtscá tmojanacaredadó Jerusalenentša ošbuáchiyënga ndbomnjëmëngbiama.

3 Atše sëndétatšëmbo y sëntsobena jayanama chënga ndegombre tmojatšatá ntšamo tmojobenacá, y ntsachetšá imobenentšana cabá más, chënga chca imobóseyeca.

4 Tša šonjánaimpadana chëngbioye jálesenciama ndayánaca jamama, Jerusalenoca ošbuachiyëngbioye jujabuáchama.

5 Bënga ftsjanobatmanama cabá más chënga tmonjanma; natsana, chënga Bëngbe Utabná tmojanianana lempe ntšamo cha tojtsebošcá chënga jamama imojtseboše ca, y chentšana bëngaftácnaca cachcá tmonjanma; y lempe enjamna ntšamo Bëngbe Bëtsá inabošcá.

6 Ndayá Macedonioca ošbuáchiyënga tmojanmama bënga añemo fsënjanóyëngacñeyeca, bënga Tito fsënjaimpadá chë tšabe trabajo chaopochocama, chë tšëngaftangbeñe crocénana játbanana, Jerusalenoca ošbuáchiyënga jujabuáchama, ndayá cha jamama tojanbojatšecá.

7 Y morna, ntšamo tšëngaftanga nyetsca soyënguiñe tša šmomncá —puerte ošbuáchiyënga, becá obenënga Bëngbe Bëtsabe soyëngama jóyebuambayama, puerte osertánënga Bëngbe Bëtsabe soyëngama, corente juabnayënga bëtscá jamama Cristo jasérviamana y bëngbioye corente ababuányëshanënga —cachcá, mórncaca bëtscá šmochjama quem trabajuiñe chë ošbuáchiyënga ndbomnjëmëngbiama, tšëngaftangbe bonshánana jtsinýanýnayëse.

8 Chca ndoñe quechatëtsësná mo canýe mandcá; atše sëntseboše ndayá nyë tšëngaftanga jáuyanana ntšamo inýenga bëtscá tmojatrabajá chë ndbomnjëmëngbiama, tšëngaftángnaca cachcá chašmotsamama; y chca, chašminýanýema chë tšëngaftanga šmobomna bonshánana ndegombre bëtsemnama.

9 Er tšëngaftanga šmondétatšëmbo ntšamo Bëngbe Utabná Jesucristo puerte tšabe soyënga bëngbiama tojamama, bëngbioye puerte jtsababuányëshanëse. Celoca, cha cabá quem luaroye ndabo ora, cha bëtscá inabomna; pero tšëngaftanga ababuányëshanayeca, mo canýe puerte nduamanacá tojanóbema. Y mora, Cristo mo canýe nduamanacá tojobemayeca, Bëngbe Bëtsá puerte tšabe soyënga šojatšatá.

10 Tšëngaftangbe tšabiama mëntsá cbabuayená, ntšamo quem soyiñe šmochjamama. Chë inye uata tšëngaftanga šmonjanbojatšé, ndoñe nyë chë ndbomnjëmëngbiama jacjayama, ndayá chca jamama jtsebošámncaca.

11 Morna, chë ndbomnjémëngbiama trabajo šmochjapochóca; chca, ntšamo tšëngaftanga beca šmonjanprontana y jujabuáchama tša šmonjanbošcá, mórna cachcá chašmomama chë trabajo japochócama, ntšamo šmojobenacá jacjayëse.

12 Er canýe entsá, jatštayama ndegombre tojtsebošëse, ndayá cha tojatštacá Bëngbe Bëtsábioye oyejuayá jabemana, ntšamo cha tojtobencá, y ndoñe ntšamo cha ndoñe tontsobencá.

13 Ndoñe quenátsmëna, tšëngaftanga puerte ujabótënga chašmoquedá, ínýengbioye atšatnaye causa, chënga ndoñe yapa ujabótënga chamondëtsemnama.

14 Atše sentsichamo ndayá nýetscanga chamotsenajabuachana, chca tojtsëjaboto ora ca. Mora, chë bëtscá šmobomnentsana šmontsobena chënga jujabuáchana, ndayá tojtsabuáshebencá jatšatayëse; y inýe orna, chënga entsamna tšëngaftanga jujabuáchana chë cmojtsabuáshebena soyëngaca. Chca, nýetscanga jóyëngacñana ndayá tojtsëjaboto ora.

15 Ntšamo Bëngbe Bëtsabe uabemana palabrénguiñe endayancá:

Chë tša bomnábioye ndoñe chebatanójama;

y chë nýe batsá bomnábioye, ndoñe quebënjatanbuáshbena ca.

### *Tito y chabe enutënga*

16 Bëngbe Bëtsá šcuatschuá, tšëngaftanga jtsanýenama Tito ainaniñe juabnënga chaotse-bomnama cha tojanmama, cachcá ntšamo bënga fsëndbomncá.

17 Er tšëngaftangbioye chaotsama bënga fsënjanimpadá ora, cha oyejuayá aíñe ca tonjánayana choye jama; y chabiamana puerte enduámama tšëngaftangbe tšabiana; chíyeca mora echanjá tšëngaftanga jányama, chca jamama cachá yobóseyeca.

18 Títoftaca, canýa Jesucristbeyeca bëngbe catsata fsëntsichamná; chabiamana puerte tšabá ošbuachiyëngcá enefjuanëngbenache mondoyebuambná, chabe trabajuama chë tšabe noticiënga abuayiynayama.

19 Y ndoñe nýe chë soye, sinó quem luarentse ošbuachiyëngcá enefjuanënga cha tmonjuábuayana bëngaftaca Jerusalenoye jama, y jujabuáchama chë ndbomnjémëngbiama trabajuiñe; chë trabajo endmëna bonshánana jinýanýiyama; chca fsëntsama, Bëngbe Utabná jtsatschuanayama y jinýanýiyama bënga chca jujabuáchama tša fstsbošama.

20 Títoftaca cha fsëntsichamná, chca, ndocná chaondëtsichamo bënga ndoñe tšabá tifjama ca, ntšamo játbana cmojtsamniñe, chë beca juabónana játbana, ndbomnjémënga jujabuáchama;

21 er bënga fsëndama lempe ntšamo fstsobencá, ndoñe nýe ntšamo Bëngbe Bëtsabe bom-inýiñe tšabá yomncá jamama, ndayá ntšamo entsangbe bominýiñe tšabá yomncánaca.

22 Chátaftaca inýa Jesucristbeyeca bëngbe catsátnaca fsëntsichamná; cha bënga ba soyiñe šonjinýanýé cha yojtseboše bëtscá jamama, Cristo jaserviama, y mora más, er cha puerte bëtscá entsejuabná tšëngaftanga puerte tšabá šmochjamama.

23 Y Titbiamna, cha quem trabajuiñe atšbe enutá endmëna, y atšcá tšëngaftangbiama endëtrabája; y chë ínýtata Jesucristbeyeca bëngbe catsatatbiamna, chata bontsemna quemuentša ošbuachiyëngcá enefjuanëngbe ichmónata, chëngbiama chabóyebuambama; y chë bontsama sóyecna, chata Crístbioye corente jtsatschuanayana.

24 Chíyeca, chëngbioca ošbuachiyëngcá enefjuanënga chca chamotsetatšëmbuama, chë ichmona boyabásengbioye šmochjínýanýiye tšëngaftanga ndegombre chënga šmojtsababuánýeshanama, y bënga razón fstsebomnama tšëngaftangbiama oyejuayënga jtsemnama.

## 9

### *Chë inýe ošbuáchiyëngbiama crocénana játbana*

1 Chë Jerusalenoca Bëngbe Bëtsabe entsangbiama crocénana játbanamna ndoñe quenátsiya tšëngaftangbioye jatëbuabiamnayama,

<sup>2</sup> er atše ndegombre sěntsetatšěmbo tšěngaftanga tša šmojtseboše chca jujabuáchama. Macedonioca entsanga puerte oyejuayá sempre sěndbětsětsěsnaye, Acaya luaroquěnga chě inye uatscana quem trabajuiñe jujabuáchama šmoprontánama; y chě jujabuáchama tšěngaftangbe bětsá juabněnga tmojama banga quem luarentšěnga bětsá añemo chamotsebomnama, chěngnaca chě trabajo jamama.

<sup>3</sup> Pero Jesucrístbeyeca quem catšátanga sěntsichamná, ntšamo běnga oyejuayěnga tifjayancá tšěngaftanga chašmotsamama, chě tšěngaftanga quem trabajuiñe bětsá šmochjama ca; chca, ntšamo tijanayancá ndoñe nje bonamente chaondětsemnama, y ntšamo sěnjanayancá tšěngaftanga chašmotseprontánama;

<sup>4</sup> er nderado báseftanga Macedonioquěnga átseftaca tmojá y choca nděprontáněnga tcmojányena chě ndbomnějéměngbiana ujabuáchenanaca, chě soye nanjama běnga fchaitseuatjama, er ba soye fsěnjayana běnga ndegombre fstsětátšěmbo tšěngaftanga prontáněnga šmochtsemna ca; y ndegombre, tšěngaftangbiana cabá más ouatjca nántsemna.

<sup>5</sup> Chíyeca, tšabá šonjuínynana Jesucrístbeyeca quem catšátanga jáimpadana chěnga atšbe natsana chamotsama tšěngaftanga jányama, y chacmějabuachama chě juabónana játbanama, ndayá tšěngaftanga tempo šmonjanašebuachenacá. Chca, atše choca chajáshjango ora, tšěngaftangbe juabónana chaotseprontana. Chca, tšěngaftanga šmochanjínyanýie ndbomnějéměngbiana šmojacjá, chca jamama tša šmobóseyeca, y ndoñe nje batšatema jatšatayama y tšěngaftangbiana bětsá jobuájuama šmojtseboše.

<sup>6</sup> Quemuiñe šmochtsenójuabnaye: Nda nje batšá tojajé, cach batšá chentšana josháchiñana; y nda bětsá tojajé, cach bětsá chentšana josháchiñana.

<sup>7</sup> Cada ona bontsemna jajájuana ntšamo chabe ainaniñe tojajuabocá; ndoñe ngménaca o nje ín्यěnga chca jamama tmojtsemándayeca. Chca chaotsemna, er nda oyejuayá tojajajóbioye, Běngbe Bětsá jtsebobonshánana.

<sup>8</sup> Běngbe Bětsá endobena jamana chábentšana nyetsca tšabe bendicioněnga y bětsá soyěnga tšěngaftanga chašmotsebomnama; chca, ntšamo nyetsca soyěnguiñe cmojtsějabotcá sempre chašmotsóbomñama, y cabá más bětsá chašmotsebomnama, nyetsca tšabe obrěnguiñe ín्यěnga chašmějabuachama.

<sup>9</sup> Běngbe Bětsabe uabemana palabrenguiñe, měntšá endayana chě bětsá tojacjabiana: Cha nyets ainánaca ndbomnějéměnga bětsá jatšatayana;

y chě tšabe soyěnga ntšamo cha tojtsamcá nyets tempo jěftsemnana.

<sup>10</sup> Běngbe Bětsá, nda endbama chaotsemna jénaye jájema y sananga jasama, cmochanjátšataye lempe ntšamo cmojtsějabotcá, y echanjama, tšěngaftanga cabá más tšabe soyěnga chašmotsamama.

<sup>11</sup> Běngbe Bětsá echanjama tšěngaftanga nyetsca tšabe soyěnga chašmotsebomnama, chca, tšěngaftanga nyets ainánaca puerte ín्यěngbioye chašmatšatama, y běngbeyeca, chě mochjójyěngacñěnga Běngbe Bětsá chamotsatschuanama;

<sup>12</sup> er chě ujabuáchenana Běngbe Bětsabe entsanga tcojatsatá ora, ndoñe nje ndayá tojtsějabotcá jatšatayana, ndayá chěnga Běngbe Bětsá chamotsatschuanámna jamana.

<sup>13</sup> Chěnga Běngbe Bětsá mochántatschuanaye, er chě ujabuáchenanaca chěngbioye jinýanýiyana, ntšamo Cristbe tšabe noticiěnguiñe iuayancá tšěngaftanga šmobedecénama, y ntšamo tšěngaftanga tšabá jaměse, nyets ainánaca bětsá soyěnga chěnga y nyetscanga šmojátšatama.

<sup>14</sup> Y chěnga tša mochántseboše tšěngaftanga jányama y tšěngaftangbiana Běngbe Bětsá mochántseimpadana, er cha bětsá tšabe soyěnga tšěngaftangbiana tojama.

<sup>15</sup> Běngbe Bětsá šcuatschuá ndayá cha šojátšatama, canye puerte uámana soye, ndocná jobenayana tšabá jayanama ntšamo chě soye bětsemnana!

## 10

*Ntšamo Pablo tojánayana ínŷenga chabe contra imojtsichamo ora*

<sup>1</sup> Y mora, atše Pablo, cbochanjáimpada, tšëngaftangbioye puerte bonshanánaca jtsënŷayëse, y tšëngaftangbiamá tšabá jamama jtseprontánëse, ntšamo cach Cristo endbetsamcá. Báseftanga tšëngaftangbioquënga imojtsichamo atše puerte nduamaná tsnenóbema atše tšëngaftangaftaca stsemna ora, pero corente añemo bomná tsnenóbema jabuache soyënga jayanama tšëngaftangbentsána bënoca stsemna ora ca.

<sup>2</sup> Tšëngaftanga cbontsaimpadana, tšëngaftanga jányama chaijá ora, atše ndoñe chašondëtsemna puerte añemo bomná jtsemnana, jabuache soyënga tšëngaftanga jáuyanama, ndoñe ntšamo atše puerte tšabá sëntsetatšëmbcá ndayá báseftangaftaca jamama šojtsotocana, chë ndëmuanŷenga imojtsejuabná, nŷe bënga tšabá jtsomñama juabnëngaca bënga fstsiyena ca.

<sup>3</sup> Ndegombre bënga quem luarentše fsëndoyena, pero ndoñe queftsátspelia Cristbiamá, ntšamo quem luarentša entsanga monduamancá;

<sup>4</sup> Er chë ndaye sóyeca bënga Cristbe soyëngama fsëndépélia, ndoñe quenátsmëna mo chë ndaye sóyeca chë nŷe quem luarama enójuabnaye entsanga japéliama monduamancá, ntšamo nŷe chënga tšabá jtsomñama juabnënga yomncá. Inŷetsá, chë ndaye soyëngaca bënga fsëndépélia, Bëngbe Bëtsá jtsinŷanana puerte obenana bomna soyënga yomna ca; y endmëna chë Satanás tojtsemánda soyënga jayënjanama, puerte jabuache soyënga jayënjanama. Mo nda canŷe uayayábioye jtsepochocancá, chë Bëngbe Bëtsabe osertánana ndoñe yonduámana ca jinŷanŷiyama soyënga ichámëngbiamá,

<sup>5</sup> y Bëngbe Bëtsabe osertánana jtsabotema juabnënga bomnëngbiamá, bënga fsëndama ntšamo chënga tmojtsichamcá tondaye chaondëtsámanama. Y chë japéliama fsëndbomna soyëngaca, bënga fsëndbétsama chca juabnayana chamotsajbanama, y chamotsobena ntšamo Cristo yomandacá jtsamana.

<sup>6</sup> Bënga fsëntseprontana chë Cristbiamá nduauenanënga jácastigama, lempe ntšamo Cristo cmojtsamëndacá tšëngaftanga chašmojtsama ora.

<sup>7</sup> Tšëngaftanga ndayánaca jtsonŷayana nŷe ntšamo tbojtsabinŷnëcá. Nderado nda becá tojtsejuabná Cristbia yomna ca, cha bontsemna jtsejuabnayana bëngnaca Crísbenga ftsmënama, ntšamo cha yomncá.

<sup>8</sup> Er atše masque tša sëndbëtsoyebuambnaye chë Bëngbe Utabná šojatšatá mandama, chë ndáyeca bënga jamama tšëngaftanga puerte chašmotsošbuáchema y ainaniñe bëtš añemo chašmotsebomnama, y ndoñe tšëngaftanga ntjapochócama, chama atše ndoñe quetsátëuatja.

<sup>9</sup> Atše ndoñe quetsátšboše tšëngaftanga chacmotsinŷana, tšëngaftanga jaútatjayama atše stseboše ca, ndayá atšbe tsbuanáchangañe tijuábemama.

<sup>10</sup> Er báseftanga mëntšá atšbiamá imojtsichamo: “Chabe tsbuanáchangañe cha šontsamënda bëtscá soyënga jamama, y tša obenacá cha jtsóyebuambnayana; pero cha bëngaftaca tojtsemna ora, cha jtsóyebuambnayana mo canŷe ndocna obenana ndbomnacá, y ntšamo tojtsichamcá tondaye ntsámanana ca.”

<sup>11</sup> Chca entsanga entsamna jtsetatšëmbuana, ntšamo bënga fstsichamcá, tsbuanachangá juíchmuase, tšëngaftangaftaca cabá ndoñe fsëntsemna ora, tšëngaftangaftaca fchaitsemna órnama, bënga chca fchjamama.

<sup>12</sup> Ndegombre bënga ndoñe tša añemo queftsátšbomna jayanama nŷetsá uámanënga ftsmëna ca, mo chë cachënga jtsenábotamnayana uamanëngcá. Chënga jtsejuabnayana y jtsichámuana tšábënga imomna ca, nŷe ntšamo cachëngbeñe ínŷenga imomnama jtsonŷayëse; y chca tmojtsama ora, chënga juabna ndbomnënga jtsemnana.

13 Bënga ndoñe yapa quifchatóyebuambaye cabëngbiana, chca, tša tšábenga bënga imomna ca jtsenábotamnayama; fchanjóyebuambaye ndayá chë bënga tifjama tšabe trabajuama, ndayá Bëngbe Bëtsá šojabanyecá, y chíñnaca entsemna ntšamo tšëngangbeñe Corintoca tifjamcá.

14 Chíyeca, bënga ndoñe queftsatoyebuambná chë bënga ndoñe derecho fsëntsebmomna, ntšamo ndegombre nántsemna bënga tempo tšëngangangftaca ndoñe mafsënjamnëse; er bënga chë natsanënga fsënjamna tšëngangangbioye jama, Cristbiana tšabe noticiënga jábuayenama.

15 Y ndoñe quifchatóyebuambaye tša tšabá bëngbe trabajo yomna ca, chë ndayama ndoñe šontsamna chca jatichámuana, chë trabajo ndoñe bëngbe soye, sinó ínÿengbe soye yómnyeca. Chamna, bënga fsëntsobátmana tšënganganga Crístbeñe más chašmotsošbuáchema, y chca chaojtsemna ora, bënga fchayobená ba luariñe entšanga jábuayenana, ntšamo tšëngangangbeñe fsëntsamcá.

16 Chca, fsëntsobátmana bënga jobenayama tšabe noticiëngama jábuayenama, chë tšëngangangbentšana más chcoye imoyena entšangbioye; chca, bënga ndoñe yapa quifchatóyebuambaye ínÿengbe trabajuama, Cristbe soyënga jábuayenama, mo chë soye bëngbe trabajo cuafjatsmëncá.

17 Ntšamo Bëngbe Bëtsabe uabemana palabrënguiñe endayancá: “Nda tojtseboše jayanama cha canÿe uámana entšá yomna ca, más tšabá cha cháuyana Bëngbe Utabná puerte uamaná endmëna ca.”

18 Er Bëngbe Bëtsá jayanana canÿe entšá ndegombre tšabá tojama ca, ndoñe nÿe cachá tojtseñábotamnabiama, ndayá Bëngbe Bëtsá chca ndegombre tojama ca Bëngbe Bëtsá tojtsejuabnabiama.

## 11

### *Pablo y chë ndoñe ndegombre ichmónënga*

1 Malaye atše šmëntjëuánta, atše básefta soyënga mo canÿe opá tojtsoyebuambnacá stsihámëntscuana, cach atše stsenabotamná ora. Masque ntšámnaca šmochtsëuánta.

2 Bëngbe Bëtsábeyeca atše tša cbondábabuanÿeshana y cbondánÿena, tšënganganga nÿe cha chašmotsëstonama y ndoñe ínÿengbioye. Er atše Cristo sënjašbuachená tšënganganga sempre cha šmochtsëstonama, y sëntseboše, cha quem luaroye yochjésabo ora, chábioye tšënganganga júshejanguana, mo nÿe chábioye sempre ustonëngcá, ntšamo canÿe taitá chabe bembe ndocna boyabása nduabuatmá nÿe canÿe boyabásaftaca chaóbuamama jushjanguancá.

3 Mëtscuaye Evábioye tbojaningñé, y cha tbojanínÿnana puerte osertanabe soyënga cuafstsatsëtnacá, pero ndegombre ndoñe chca yonjamna. Atše sëntsauatja nderado cachcá ínÿenga tšëngangangftaca muanjama y tšëngangangbe juabna chašmotrocá, y chca, tšënganganga chašmotsajbaná sempre jtsejuabnayana nÿe Cristo nÿetsca soyënguiñe jt-seservënama.

4 Atše chama sëntsauatja, er ndánaca jashjanguana y Jesusbiana tojtsabuayiyná, mo cha inÿe entšá cuaftsemncá, ndoñe ntšamo bënga Jesusbiana fsëndabuayiynacá, y tojtsama tšënganganga chašmobená canÿe espíritu jtsebmomna, pero ndoñe ntšamo chë Bëngbe Bëtsá tojama tšëngangangbe ainaniñe cháumashënguama espiritcá, chë Uámana Espíritu, tšënganganga tšabá cha jtsëuántana. Y atše sëntsauatja, tšëngangangbe ainaniñe inÿe buayenana chašmóyëngacñama ndánaca tojtsamama, ndoñe cachcá chë tšabe noticiënga ntšamo ya bëngbentšana šmonjouencá, y chora tšënganganga chábioye becá tšabá jtsëuántana.

5 Pero atše sëntsejuabná tondayiñe más batšá uamaná tsmëna ca, chë Jesucristbe puerte uámana ichmónënga imomna ca juabnayëngbiana.

<sup>6</sup> Atše ndoñe sënjuatsjinÿe ntšamo corente tšabá entšángaftaca jóyebuambayama; pero atše puerte tšabá sëndétatsëmbo ntšamo stsihámuama. Bënga puerte tšabá nÿetsca soyënguifne tšëngaftanga tçbonjanÿanÿé, ndegombre chca osertánana ftsbomnama.

<sup>7</sup> ¿O atše ndoñe tšabá sënjama, tšabe noticiënga çbonjanabuayiyná ora, tšëngaftangbentsana atšbiamá tondaye ntjotjañcá, nduamanacá jenóbemëse; chca, tšëngaftanga puerte uámanënga chašmotsemnama Bëngbe Bëtsá chaomama?

<sup>8</sup> Mo ínÿenache ošbuachiyëngcá enefjuanënga crocénana cuafjabaquécá, crocénana sënjanóyëngacñe chë ošbuachiyëngbentsana, tšëngaftanga jujabuáchama jobenayama.

<sup>9</sup> Y tšëngaftangaftaca sënjamna ora y ndayánaca šojanájaboto ora, atše ndoñe checbátantjañe atšbe opresidama, chca, tšëngaftangbiamá totcá ndoñe chaondëtsemnama; er chë Jesucristbeyeca catšátanga Macedoniocana tmonjánashjajnënga, šmonjanatšetá ntšamo šojanbuashbencá. Chca, atše sënjanma, atšbe causa tšëngaftangbiamá totcá ndoñe chaondëtsemnama; y sempre chca chántsama.

<sup>10</sup> Serto, Cristbe ndegombre soyënga atšbe ainaniñe sëntsebmna; chíyeca, atše corente sëntsetatsëmbo ndocná Acaya luarentše yochjama atše chayajbaná puerte oyejuayá jtsóyebuambnayama, chë tšabe noticiënga stsabuayiyná ora; y chca çanjama atšbe opresidama chašmoyema ínÿënga ntsamncá.

<sup>11</sup> ¿Y ndáyeca chca stsama? ¿Yojtsemna ndoñe çbondábabuanÿeshana causa? Ndoñe. Bëngbe Bëtsá endétatsëmbo tša çbondábabuanÿeshanama.

<sup>12</sup> Pero atše sempre chántsama ntšamo sëndamcá, chca, chë ínÿënga, chë Jesucristbe puerte uámana ichmónënga imomna ca juabnayënga ndoñe chamondëtsebmna ndáyeca jatenábotamnayama, ntšamo bënga ftsamcá chënga imojtsetrabája ca.

<sup>13</sup> Er chënga ndoñe quemátsmëna Jesucristbe ndegombre ichmónënga, mondmëna chë ínÿënga jáingñama imotrabájanga, y mondama entšanga chaotsinÿanama chënga mo Jesucristbe ndegombre ichmónënga cuaftsemncá.

<sup>14</sup> Y çama ndoñe šmatjenjnaná, er cach Satanásnaca endbëtsama mo canÿe buash-inÿinÿana angelcá jtsinÿnama;

<sup>15</sup> chíyeca, ndoñe muatjenjnaná, çabe oservenëngnaca tmojtsamama mo tšabe entšangcá jtsinÿnama. Pero chënga mochanjopochóca, ntšamo tmojtsomerecencá, ndayá tmojamama.

### *Ntšamo Pablo tojansufrí, Cristbe ichmoná bëtsemna causa*

<sup>16</sup> Cachiñe çochtëtëyana: ndocná chaondëtsejuabná atše opá stsemna ca, cach atše stsenabotamná ora; pero chca šmojtsejuabnase, mo canÿe opabioycá šmochtsëuánta, chca, átsnaca jtsenábotamnayama jobenayama.

<sup>17</sup> Chca jayanëse, ndoñe quenátsmëna ntšamo Bëngbe Utabná endbetsamcá, ndayá canÿe opá inetsamcá; atše tšabá jtsetatsëmbëse ndegombre stsebmna ndáyeca jobenayama jtsenábotamnayana.

<sup>18</sup> Banga mondmëna, cachënga jtsenábotamnayana ndayá quem luarentše chënga tmojamama, as átsnaca çantsenábotamnaye.

<sup>19</sup> Tšëngaftanga chë tša osertánënga, oyejuayënga opëngbioye jtsëuantánana.

<sup>20</sup> Atše sëndétatsëmbo tšëngaftanga chë opëngbioye šmnetsëuantánama, er tšëngaftanga šmondbëtsëuantana chë nÿets tempo tšëngaftanga mo chëngbe oservenëngcá tçmojtsamëndayënga, o chë tšëngaftanga bëtscá tçmojtsabacanga, o tçmojtsaingñanga, o chë uámanënga tmojtsenobiamnanga tšëngaftanga mo nduamanëngcá jtsamëndayama, o chë tçmojtsajuebjantšetayënga.

<sup>21</sup> Atše chca sentsichamo masque sentsëuatja chca jayanama. Bënga fsënjamna corente obenana ndbomnënga, ntšamo tšëngaftanga bëngbiamá šmojayancá, tšëngaftangaftaca chca jamama.



Inyenga, chë tšëngaftangbeñe imotrabájanga, ndayama jtsenábotamnayama tmojtsebojnëse, puerte uámana ichmónënga imomna ca jtsichámëse, átšnaca añemo sëntsebojna chama jtsenábotamnayama; chca stjayana ora, mo canye opá tojtsoyebuambnacá sëntsoyebuambná.

<sup>22</sup> Chënga jtsenábotamnayana hebreunga imomnama. Atšnaca hebreo sëndmëna. Chënga jtsenábotamnayana Israeloquënga imomnama. Atšnaca Israelocá sëndmëna. Chënga jtsenábotamnayana Abrahámbentsana entsanga imomnama. Atšnaca Abrahámbentsana entsá sëndmëna.

<sup>23</sup> Chënga jtsichámuana Cristo imoserverna ca. Atše chëngbiamá cabá más tšabe oservená sëndmëna. Chca stjayana ora, mo canye opá tojtsoyebuambnacá sëntsoyebuambná. Atše chëngbiamá más tijatrabajá, más šmojutame, más šmojatsetšená y ba soye atšbiamá resjo endmëna jóbanama.

<sup>24</sup> Shachna soye judiënga šmonjantsetšená chë unga bnëtsana y esconëfta soye jasachënjëse, ntšamo chënga jacastígana monduamancá.

<sup>25</sup> Unga soye niñëbéngaca šmonjanëtsjanganja, y ndëtsbéngaca canye šmonjanatëchënganja. Unga soye chë atše sënjánenjaquena barco tontsanenatjëmbe, y chca ora, canye šonjanotocá, chë mar béjayoca tsachocana bënoca canye ibeta jëftsebobínynana y canye te jëftsejétanana.

<sup>26</sup> Atše becá sënjánana, y chca atšbiamá resjo enjamna bëts fshajayënguiñe y uacucuatsënga chašmuebiatbëbama; resjo cach atšbe entsángbentše, judiënga y ndoñe judiëngbentše; resjo bëts pueblënguëntše, entsanga ndoyenentše y mar béjayoca. Atšbiámna resjo enjamna chë Jesucristbeyeca atšbiamá catšátanga imomna ca jtsichámuana, pero ndegombre chca ndoñe mondmënéngbeñe.

<sup>27</sup> Atše bëts cá tijatrabajá empás uamëntšnaya jóquédantscuana; ba soye tijachnëngo ibeta ntsamanacá y ba soye tijachnëngo shëntseca y uajuendayá; ba soye ndayá jasama ntsebojnncá; tijasufri sësnama y tondaye entsayama.

<sup>28</sup> Quem soyëngama y inye ndoñe chiyátayana soyëngama más, atše cada te natjëmbana ainánaca ndoñe queschbatmëna, er ndoñe quetsátstatsëmbo ntšamo nyetsca ošbuachiyëngcá enefjuanënga imojtsiyenana.

<sup>29</sup> Ndánaca tšabe soye jamama tondaye añemo tontsebojna ora, atše chabiamá šochandbóngmia, mo átšnaca cach tondaye añémoca cuabndëtsemncá. Nderado inyenga tmojama ndánaca bacna soyiñe chaótsatsama, atše ndegombre puerte ngmënaca chandbëtsesufrina.

<sup>30</sup> Nderado nya tojátyta atše ndayama jatenábotamnayama, as chë atše tondaye obenana ndbomná tsmënana ínñanynaye soyëngama chtsenábotamnaye.

<sup>31</sup> Bëngbe Bëtsá y Bëngbe Utabná Jesucristbe Taitá, ndábioye nyetscanga nyetsca tescama jtsatschuanayama entsamna, cha endëtatšëmbo atše ndegombre stsihámua chë sëntsoyebuambná soyënguiñe.

<sup>32</sup> Atše Damasco bëts puebloca sënjamna ora, chë rey Aretasbe uabuáyana mandado tojanmandá chë puebloye amashjuaniñe soldadënga chamotsebojanýama, atše chašmishachama chëjana stsebocana ora;

<sup>33</sup> pero básefta enutënga, canye sbarëcuiñe šmontsanëstjango chë pueblentša shëconana tapiëšiñe canye atëfjnëjana, y chca atše sënjanobená chëngbe cucuatšentšana jótsbocana.

## 12

*Ndayá Pablo mo otjenayoquëcá tojáninye y ndayá Satanás tojanma, Pablo chaosufrima*

<sup>1</sup> Atše šontsemna más jtsenábotamnayana, masque chca tcojamentšana ndocna tšabe soye ntjóbcnana. Mora chanjóyebuambaye, chë mo otjenayoquëcá sënjinýe Bëngbe Bëtsabe soyëngama y Bëngbe Utabná šojinýinye soyëngama.

<sup>2</sup> Atše canýe entšá sēnduábuatma, cha Crísoftaca cányiñe mo canýacá endmēna y nda bnētsana canta uata entsemna, Bēngbe Bētsá tbojanánatse, chē celoca más tsbanánoye, Bēngbe Bētsá yomnoye. Atše ndoñe quetsátstatšēmbō Bēngbe Bētsá cha tbojanánatse chabe cuérpoca o nýe chabe espiritiñe. ¡Nýe Bēngbe Bētsá chama yotátšēmbō!

<sup>3-4</sup> Atše sēndētatšēmbō Bēngbe Bētsá chē entšábioye celoye tbojanánatsama, nýetscanga oyejuayēnga imomnoye (atše ndoñe quetsátstatšēmbō Bēngbe Bētsá tbojanánatse chabe cuérpoca o nýe chabe espiritiñe; nýe Bēngbe Bētsá chama yotátšēmbō), y chentše cha tojanuena palabrénga, ndocná bontsemna jayanama palabrénga, chē ndayama entšangbiama ndoñe yontselesenciana jatichámuana.

<sup>5</sup> Atše chē entšá sēndmēna. Canýe entšá ndáftaca chca tojopasabiama, tšabá nántsemna chama jtsenábotamnayana; pero cach atšbiama jtsenábotamnayana ndoñe tšabá ntsemnana, ndayá nýe chē atše mo obenana ndbomnacá tsmēnama inýinýnaye soyēngama chantsenábotamnaye.

<sup>6</sup> Ynderado jtsenábotamnayama atše stseboše, chca ora atše ndoñe stsama mo canýe opá tojtsoyebuambnacá, er ntšamo ndegombre yomncá atše stsihamo. Pero chca ndoñe quetsátama, chca, ndocná chaondētsejuabná ntšamo atšbiama tbojtsinýanama o ntšamo atšbiama cha tojouenama atše más tsmēna ca.

<sup>7</sup> Chíyeca, tša uamaná tsjamna ca atše ntjátsjuabnayama, atše chē Bēngbe Bētsá tša bēts soyēnga tbojaninýinýe entšá bétsemnayeca, Bēngbe Bētsá tojanma atše chaitsebomna ndáyeca puerte chaisufrima, mo canýe bēts uchmašēfja atšbe cuerpiñe tojtsashacuancá, mo Satanasbe ichmona soycá, atše chaisufrima chaomama.

<sup>8</sup> Unga soye Bēngbe Utabná sēnjaimpadá chca sufrínana chašotsebojuánama;

<sup>9</sup> pero Bēngbe Utabná šonjauyana: “Nýe atšbe bonshánana endmēna lempe ntšamo cmojtsajabotcá; nýetscanga atšbe obenana más tšabá jinýana, chē obenana ndbomna entšángbeñe atšbe obenana stjínýanýiye ora ca.” Chcasna, atše puerte oyejuayá chanjóyebuambaye chē atše mo obenana ndbomnacá tsmēnama inýinýnaye soyēngama, Cristbe obenana átšbeñe sempre chaotsomñama.

<sup>10</sup> Chíyeca, Cristo jasérviamá, oyejuayá chandbétsemna atše mo obenana ndbomnacá stsemna ora, ínýenga šmojtsoyenguá ora, puerte padecena soyēnga causa ndayá jamama ndoñe sēntsetatšēmbō ora, atše puerte chaisufrima ínýenga tmojtsama ora y puerte tšetšena ainánaca stsemna ora; er chca soyēnguiñe stsemna ora, mo canýa obenana ndbomnacá, chora Bēngbe Bētsá jamana atše ainaniñe bēts añemo chaitsebomnama.

### *Nderado ndayá Corintoca ošbuáchiyēnga muanjamama Pablo yojánauatja*

<sup>11</sup> Atše chca chē soyēngama sēntsenabotamná ora sēnjoyebuambá mo canýe opá tojtsoyebuambnacá, pero ndegombre tšēngaftanga šmonjama atše chca chaimama. Er tšēngaftanga šmondmēna ndēmuanýenga yojtsamna atšbiama puerte tšabá jtsichámuana, atše chca jtsenábotamnayama ndoñe chašondētsemnana. Ndegombre, atše tondayiñe más batšá uamaná quetsátsmēna, chē Jesucristbe puerte uámana ichmónēnga imomna ca juabnayēngbiama, masque atše šontsebiona mo atše tondaye cuaftsamancá.

<sup>12</sup> Canýa Jesucristbe ndegombre ichmoná bétsemnama inýinýnaye soyēnga, tšēngaftangbeñe tonjanopasá atše choca sēnjamna ora. Chca, chē Bēngbe Bētsabe obenana inýinýnaye soyēnga y chē tšabe soyēnga ntšamo chora tonjanopasacá, puerte tšabá jtsinýanýnayana atše canýe ndegombre ichmoná tsmēnama; y atše chca sēnjanma, padecena soyēnguiñe puerte uantado jtsemnēse.

<sup>13</sup> ¿Ndayá tšēngaftanga ndoñe cachcá šmonjanóyēngacñe chē inýe luarenache ošbuáchiyēngcá enefjuanēngbiama? Canýe soye aíñe, er tšēngaftangbioye tondaye ntjotjañcá, atše ndoñe chiyatslesenciá tšēngaftanga atšbe opresidama chašmuájabuachama, ntšamo inýe ošbuáchiyēnga aíñe sēnjalesenciácá. Smochtseperdóna chca bacna soye tšēngaftangbiama tijamama.

<sup>14</sup> Atše ya sěntseprontana, móracna unga soyama jama tšěngaftanga jányama, y mora atše cach ndoñe quechochataimpáda atšbe opresidama chašmuatájabuachama. Atše ndoñe quetsátsboše chě tšěngaftanga šmobomna soye jatsbomnana, ndayá puerte sěntseboše tšěngaftanga Cristo sempre chašmotseservénama. Atše chca jamama sěntseboše, er atše tšěngaftangbiamama mo canye taitacá, Crístbeñe šmontsanošbuachéyeca, atše chabiamama tcbonjanabuayená ora; sěntsejuabná chě taitanga inétsamna crocénana jájuabana básenga jtsanyenama, y ndoñe básenga chě taitangbiamama.

<sup>15</sup> Y atše corente oyejuayá lempe ntšamo tsbomncá chanjátšataye, y atše jopochócantscuanēnaca, tšěngaftangbe tšabiamama. Atše cada te más cbojtsababuányeshanēse, ¿tšěngaftanga más batšá atše šmochtsebobonshana?

<sup>16</sup> Ndoñe; tšěngaftanga tšabá šmondětatsěmbo, atše uajabotá sěnjamna ora, atše tondaye tcbonjanótjañama. Masque chca, báseftanga imojtsichamo ntšamo ínýenga ndayíñnaca jáingñama atše tstátšěmbo ca, chěngbentšana crocénana josháchiñama; y atše catijama, ínýenga jáingñase, nýe ntšamo atše tsbošcá chamotsamamama ca.

<sup>17</sup> ¿O nderado atše tchojaingñé, canya chě tšěngaftangbioye sěnjichamó chentšáftaca?

<sup>18</sup> Tito sěnjanimpadá tšěngaftanga jányama chaotsama, y cháftaca sěnjnichmó chě inya bēngcá Crístbeyeca bēngbe catšata. ¿Nderado Tito tcmojaingñé? ¿Ndoñe ndegombre yondmēna, Tito y atše cachcá fstsjuabná y fstsboše y cachca soyēnga jtsamēse ftsiyena? Ndegombre chca endmēna.

<sup>19</sup> Nderado tšěngaftanga šmojatsjuabná bēnga jeněuyanama chca cbojtsětsětsná ca; pero ndoñe chca quenátsmēna. Inyetsá, bēnga Crístoftaca cánýiñe mo canýacá entšangcá, Bēngbe Bětsabe delante fsěntsoyebuambná, y lempe ntšamo tijayancá, Jesu-crístbeyeca atšbe bonshana catšátanga, tšěngaftangbe tšabiamama tijayana, Crístbeñe corente chašmotsošbuáchema y ainaniñe bēts añemo chašmotsebomnana.

<sup>20</sup> Er atše sěntsauatja, atše jányama chajjá ora, ndoñe chachbondányena ntšamo tsbošcá, y tšěngaftanga atše ndoñe chašmondínýena ntšamo šmojtsebošcá. Sěntsauatja nderado bacna soyēnga šmattsama: jtsenpenzentserana, ínýengaftaca yapa jtsenántšabošana, ndayánaca rábiaca jtsamama, nýe tšěngaftangbiamama tšabe soyēnga jtsebomnana jtsebošana, ínýengbiamama podescama ichámuana, uayátsenayēnga jtsemnana, ínýengbiamama cachēnga más uámanēnga jtsenobiamnayana, y nýetscanga ndoñe cachcá ntsejuabnayanama. Chca chachbojánýenēse, tšěngaftanga ndoñe quešmochátšbošana jýēngacñana ntšamo tšěngaftanga jucácanama atše šochtsemncá.

<sup>21</sup> Atše sěntsauatja, cachiñe jányama chajjá ora, atšbe Bětsá chaoma atše chaitsēuatja chca šmojtsamama, y chašotsemna puerte ngmēnaca jošachnama ba tšěngaftangbiamama, ndēmuanýenga ya bayté bacna soyēnga imojtsama y chca juabnayanama ndoñe tmonjatrocá, y ndoñe tmonjajbaná chě bacna soyēnga boyabása o shembásaftaca jtsamama juabnayanama, y chca soyēnga jtsamama y nýetsca bacna soyēnga jtsamama, jenomándama ntsobencá.

## 13

### *Inye soyēngama jábuayenama y jádiošoftama*

<sup>1</sup> Móraca ya unga soyama tšěngaftanga jányama chanjá. Atše chajjáshjango ora, tojtseiytēse chanjayana ntšamo báseftanga tmojamcá tšabá o ndoñe tšabá bětsemnana. Nda bacna soye ntšamo Moisesbe leyiñe endēmmandancá tojama ora, atše chanjayana cha ndoñe tšabá tonjama ca; pero útata o únganga tmojtsemnēse, chēnga chamuayanama cha ndegombre chca tojamama.

<sup>2</sup> Atše tempo sěnjjanabuayená, chě tšěngaftanguentšēnga bacna soye tmojánamēnga y chě ínýenga, atše šojtsanmēna jácastigana, chca soyēnga amana ndoñe tmonjájbananga. Mora, tšěngaftangbentšana bēnoca sěntsemna ora, cachiñe cachcá cbětētabuayená, ntšamo

sënjanamcá chë tšëngaftangaftaca uta soyama sënjamna ora: atše cachiñe jányama chajase, ndoñe quichatsleséncia bacna soyënga chašmotsamama y chama ntjacastigacá jatabáshejuanana.

<sup>3</sup> Atše chca chanjama, er tšëngaftanga šmotsenguá ndayánaca tšabá chacminyanyëma Cristo atšbiajana yoyebuambnama. Cristo ndoñe quenátsmëna mo canya obenana ndbomnacá, ntšamo tšëngaftangaftaca cha tojamama; ndayá chabe bëts obenana tšëngaftangbeñe bëtscá jtsinyanynayana.

<sup>4</sup> Er cha tmojanrucificá mo canya obenana ndbomnacá; pero mora, Bëngbe Bëtsá puerte obená betsómñeyeca, cha tojtayena. Cachcá bëngnaca, cháftaca cányiñe mo canyacá jtsemnëse, mo obenana ndbomnëngcá jtsemnana; pero cháftaca mochantsiyena, Bëngbe Bëtsá puerte obená betsómñeyeca, tšëngaftanga jtsaservënama.

<sup>5</sup> Tšëngaftanga cada ona šmochjshénojuaboye, tšabá jtsetatšëmbuama mocna entšanga bëtsemnana, jtsetatšëmbuama aíñe o ndoñe sempre Crístbeñe puerte tašmuetsošbuáchema. Smochjshénojuaboye chca šmošbuáchema ntšamo šmojtsemnana y tšabá ínÿenga smochjínÿanyiyie. ¿Ndoñe šmondétatšëmbo Jesucristo tšëngaftangbe ainaniñe yoyenama? Ndoñesna, tšëngaftanga ndegombre ndoñe Crístbeñe ošbuáchiyënga šmontsemna.

<sup>6</sup> Pero atše sëntsobátmana tšëngaftanga ndegombre chašmotsejuabnama bënga Jesucristbe ndegombre ichmónënga ftsmënana.

<sup>7</sup> Y Bëngbe Bëtsá fsëntseimpadana bacna soye ndoñe chašmondétsamama, ndoñe chë Jesucristbe ndegombre ichmónënga ftsmënana tšëngaftanga jinÿanyiyama, ndayá ntšamo tšabá yomncá chašmotsamama. Nÿetscanga chca tmojtsamëse, nántsinÿna mo Crístbe ndegombre ichmónënga bënga ndoñe cuabndmëncá, er chca ndoñe tašuatátëjaboto jinÿanyiyana ntšamo bënga bëngbe mándoca ftsmënana mo ichmonëngcá, tšëngaftanga jábuayenama. Pero chë soye tondayana šattsentsamna,

<sup>8</sup> er bënga queftsátobena tondaye jamana Bëngbe Bëtsabe ndegombre soyëngama contra; nÿe ntšamo chabe ndegombre soyënga yomncá aíñe.

<sup>9</sup> Bënga fsëntseboše ntšamo tšabá yomncá tšëngaftanga chašmotsamama, er bënga oyejuayënga fchandbëtsemna, bënga mo chë obenana ndbomnëngcá ftssemna ora, bëngbe mando jácastigama ntjatinÿanyaycá, y tšëngaftanga ainaniñe bëts añémoca šmojtsemna ora y puerte tšabá šmojtsemnanda ora. Bënga Bëngbe Bëtsá fchandbëtseimpadana, chca bacna soyënga amana jtsajbanase, chašmobená jtsemnana nÿetsca soyënguiñe tšábenga, y lempe ntšamo tšëngaftanga chašmotsemnana Bëngbe Bëtsá yobošcá.

<sup>10</sup> Quem tsbuanácha cbontsëbuabiamná tšëngaftangaftaca cabá ndoñe sëntsemna ora; chca, atše choye chajá ora ndoñe chašondëtsemna jabuache jucácanana, mo canya puerte mandayacá, ntšamo Bëngbe Utabná šojanbemcá, tšëngaftanga jujabuáchama chábeñe corente chašmotsošbuáchema y ainaniñe bëts añemo chašmotsebomnana, y ndoñe tšëngaftanga jatapochócama.

<sup>11</sup> Morna, Jesucristbeyeca atšbe catšátanga, tšabá chašmotsomñe, šmochtsajbaná chca bacna soyënga amana y šmochtsemna lempe ntšamo Bëngbe Bëtsá yobošcá. Smochjouena ntšamo tcbonjabuayenacá, nÿetscanga cachcá šmochtsejuabnaye, nÿetscángaftaca natjëmbana šmochtsiyena, y Bëngbe Bëtsá, chë cmondababuanÿeshaná y tšëngaftangbe ainaniñe tšabe ebionana chašmotsebomnana endamá, tšëngaftangaftaca echántsemna.

<sup>12</sup> Nÿetscanga šmochjenchuaye mo Jesucristbeyeca catšatangcá, jtenámochëse, ntšamo cach tšëngaftangbe pamíllanga puerte bonshanánaca šmondetsacheuanaycá.

<sup>13</sup> Nÿetsca quem luaroca ošbuáchiyënga cmontsacheuaná.

<sup>14</sup> Atše, Bëngbe Bëtsá sëntseimpadana, Bëngbe Utabná Jesucristo chaoma, nÿetsca tšëngaftangbeñe tšabe bendicionënga chaotsemnana. Bëngbe Bëtsabe bonshánana sempre chašmotsóbomñe, y Uámana Espíritu sempre chašmotsóbomñe, y chë Uámana Espíritoftaca cányiñe mo canyacá chašmotsomñe.

## Gálatas

### *Pablo Galacia luaroca ošbuáchiyënga jacheuayama*

<sup>1-2</sup> Atše Pablo, quem tsbuanácha sentsabiamná Jesucristbeñe ošbuáchiyëngbiama, chë Galacia luaroca ošbuachiyëngcá enefjuanëngbiama. Jesucristo y Bëngbe Bëtsá, chë Taitá, nda tojanma Jesucristo cháuatayenama, chata šmonjanchembo chatbe ichmoná jtsemnama. Ndocna entšá chešnátanabuayana atše Cristbe ichmoná jtsemnama; ni Jesucristo, ni Bëngbe Bëtsá ndocna entšá tbonjanichmó atše chatbe ichmonacá jabuábuayanama. Atše y chë ínÿenga Jesucristbeñe ošbuáchiyënga átšeftaca montsemnënga, tšëngaftanga cbontsacheuaná.

<sup>3</sup> Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšabe bendicionënga tšëngaftangbeñe chaotsemnama, y chaboma tšëngaftangbe ainaniñe tšabe ebionana chašmotsebonnama.

<sup>4</sup> Cristo chabe derecho vida jtsobomñama cachcá tojanonÿá y tojanóbana, bëngbe bacna soyënguentsana játsebacama, y bënga chamotsobena jtsiyenama ndoñe ntšamo quem tempo entšanga imoyencá, puerte bacna soyënga imojtsama ora. Cristo tojanóbana ora, tojanma ntšamo Bëngbe Bëtsá, Bëngbe Taitá endmëná yojanbošcá.

<sup>5</sup> Nÿetscanga nÿetsca tescama Bëngbe Bëtsá chamotsatschuaná. Chca chaotsemna.

### *Nÿe canÿe ndegombre buayenana soyënga Cristbiamna endmëna*

<sup>6</sup> Atšbe ainanoca inÿetšá šontsebiona, er nda nanjouena, tšëngaftanga nÿe baseftayshinÿe y ya juabna šmojatstrocá y Bëngbe Bëtsá stëtsoye šmojtsequedá, nda tšëngaftanga tcmojáchembo chabe entšanga chašmotsemnama. Cha chca tojanma Crístbeyeca, er mua puerte tšabia tšëngaftangta enjamna. Tšëngaftanga Bëngbe Bëtsá stëtsoye šmojtsequedá, inÿengbe buayenana soye jouenama, y chë ínÿenga jtsichámuana chë buayenana soyënga chë tšabe noticiënga canmëna ca.

<sup>7</sup> Ndegombre, ndoñe quenátsmëna inÿe ndegombre buayenánana. Ntšamo entsopasancá mëntšá entsemna: báseftanga montsama tšëngaftanga ndoñe natjëmbana ainánaca chašmotsiyenama, y becá montsama chë Cristbiamna tšabe noticiënguentsë, ba ndegombre soyënga jtsejuánama, inÿe soyënga jacjayama.

<sup>8</sup> Nderado bënga o canÿe celoca ángel soyënga cmojtsabuayiyiná, y ndoñe tontsemna mo chë tšabe noticiënga bënga tempo tbonjanabuayenacá, as chë chca tojtsamabiama ;Bëngbe Bëtsá chaoma infiernoca becá chaosufrima!

<sup>9</sup> Tempo ya chca sënjánayana; mora cachiñe šcutétayana: Nderado nda soyënga cmojtsabuayiyiná, y ndoñe tontsemna mo chë tšabe noticiënga, ntšamo tempo šmonjanoyëngacñëcá, ;Bëngbe Bëtsá chabiamna chaoma infiernoca puerte chaosufrima!

<sup>10</sup> Atše chca stjayana ora, ¿tšëngaftanga cmojtsinÿana atše soyënga stsama entšanga oyejuayënga átšeftaca chamotsemnama? Ndoñe chca quenátsmëna. Atše sëndboše ndayá Bëngbe Bëtsá átšeftaca oyejuayá chaotsemnama. Entšanga oyejuayënga chamotsemnama, atše cabá soyënga stsamëse, atše ya ndoñe Cristbe canÿe oservená stsemna.

### *Ntšamo Bëngbe Bëtsá Páblëbioye tbojanchembo, Jesucristbe ichmoná jtsemnama*

<sup>11</sup> Atše sëntseboše tšëngaftanga, Jesucristbeyeca atšbe catšátanga, chašmotsetátšëmbo chë tšabe noticiënga ntšamo sëndabuayiyinacá quem luarentša entšangbe juabnentšana ndoñe yondóbocanama.

<sup>12</sup> Ndocna entšá chë tšabe noticiënga chešnatanbuayená, ni chešnatanbuatëmbá, ndayá cach Jesucristo šonjaninÿinÿé.

<sup>13</sup> Tšëngaftanga šmojátatšëmbona ntšamo atše tempo tsjanamana jtsiyenana, ntšamo judiënga Bëngbe Bëtsá mondadorancá atše cha sënjanadorana ora, ntšamo atše becá

tsjánamama chë ošbuachiyëngcá enefjuanënga puerte chamosufrima, y ntšamo atše becá tsjánamama ndocná Jesucristbeñe chaondëtsošbuáchema.

<sup>14</sup> Atše inye judiënga cach atšcá uata bomnëngbiana más sënjánama Bëngbe Bëtsá adórayiñe, ntšamo judiënga cha jadórama monduamancá, y atše nýets añémoca tša sënjantšena jtsamama ntšamo bëngbe bëts taitanga básenga jabuátambama monjana-mancá.

<sup>15</sup> Pero Bëngbe Bëtsá atšbe tšabiana yojanjuabná, y chíyeca, atše cabá ndonýna ora, canye bëts soyama cha šojanbocacá.

<sup>16</sup> Y cha tojánbošena ora, šonjaninýinýe ntšamo ndegombre chabe Uaquiñá yomnana, y šonjanchembo. Cha chca tojanma, atše chë tšabe noticiënga ndoñe judiëngbeñe chayábuayenama. Y atše ndocnábioye chiyataná ndayá jamama šojtsanmënema chašobuayenama;

<sup>17</sup> y Jerusalenoye cach ndoñe chiyataná chë atšbiana más natsana Jesucristbe ichmónënga imojamnëngaftaca jencuéntama. Chamna, cachora Arabia uabaina luaroye sëntsanoye, y chentšana Damasco bëts puebloye sëntaná.

<sup>18</sup> Jesucristbeñe jtsošbuáchiyama sënjanóntša orscana, unga uatëse Jerusalenoye sënjána Pédroftaca jencuéntama, y cháftaca nýe uta semana sënjëftsemna.

<sup>19</sup> Y ndocna chë Jesucristbe inye ichmónënga chiyáisananye; nýe Santiago aíñe, Bëngbe Utabnabe catšata.

<sup>20</sup> Bëngbe Bëtsá šontsonýá, ntšamo tšëngaftanga cbontsëtsëtsnacá ndegombre bëtsemnama.

<sup>21</sup> Jerusalenocana sënjëftsanbocnentsana, Siria y Cilicia luarëngoye sënjána.

<sup>22</sup> Pero chë tempo, chë Jesucristbeñe ošbuáchiyënga Judea luariñe bomínýeca ndoñe quešmënjatanábuatma.

<sup>23</sup> Nýe ínýëngbioye imojtsayaunana: “Nda tempo bënga puerte chamotsesufrínama enjanamá, mora entšanga entsabuayinýá, Jesucristbeñe jtsošbuáchiyama caojtsamna ca. Y tempo cha tša enjánboše jamama entšanga Jesucristbeñe ndoñe chamondëtsošbuáchema ca” –chënga imojtsichamo.

<sup>24</sup> Y entšanga Bëngbe Bëtsá imojtsatschuanaye, ndayá cha atšbiajana tojanmama.

## 2

### *Chë inye ichmónënga tmojánayana Pablo aíñe tšabá yojtsama ca*

<sup>1</sup> Jerusalenoye sënjána orscana bnëtsana canta uatëse, cachiñe choye sënjesaná. Bernabé šonjantjëmbambá, y Tito bëndátaftaca fsënjëftsanbetše.

<sup>2</sup> Choye sënjána, choye jama šojamnama Bëngbe Bëtsá šonjaninýanýeyeca. Atše nýe chë Jesucristbeñe ošbuáchiyëngbiana uámanënga imojamnëngaftaca sënjanencuentá, ínýëngaftaca ndoñe; y chë tšabe noticiëngama chë ndoñe judiëngbeñe sëndabuayinýama chënga sënjanacuntá. Chca sënjanma atše jtsetatšëmbuama, ntšamo tijanma y sënjëftsamcá ndoñe nýe bonamente yonjamnama.

<sup>3</sup> Pero chënga tmonjánayana atše aíñe tšabá tijanma ca, y Tito, chë átšeftaca enjamná, masque Grecia luarocá enjamna, chënga ndoñe chematanmandá base bobachtema chë más delicadentše tëtšená chaotsemnama, ntšamo judiënga monduamancá, Bëngbe Bëtsábenga imomnama chaotsinýnama.

<sup>4</sup> Chca tonjanopasá, masque ínýënga monjánboše Tito base bobachtema chë más delicadentše tëtšená chaotsemnama. Chënga tmonjánayana bëngcá Jesucristbeñe ošbuáchiyënga imojamna ca, pero ndoñe chca quemënjatsmëna. Chënga chë Jesucristbeñe ošbuáchiyëngaftaca tmojanenutaná, ndayá yojtsanopasánama chë ošbuáchiyënga ntsetatšëmbcá, mo chë ošbuáchiyëngbiana bacna soyënga jamama cuafseitëmena cuenta. Chënga tmojánabo jtsetatšëmbuama ntšamo Jesucristo bënga atsebácanënga šojánabiamama, chë judiëngbe leyëngaca ndëmandánënga, cháftaca cánýiñe mo canýacá

jtsepnése. Chénga chca tmojanma, er chénga imojtsanboše jamana, bēnga chē judiēngbe leyēngaca nyēts tempo mandánēnga chamotsiyenama.

<sup>5</sup> Pero bēnga ndocna ora fchiyátanayana aíñe ca chē ntšamo chénga monjánichamo bēnga šojánamna jamama soyēngama, er bēnga becá fsēnjánboše tšēngaftanga nyēts tempo Jesucristbe ndegombre tšabe noticiēnga chašmotsóbomñama.

<sup>6</sup> Pero chē ndēmuanjēngbiama entšanga monjánichamo chē uánatsanēnga imojamna ca (ndayá chénga tempo imojamna atšbiama ndoñe quenatámama; Bēngbe Bētsabiama nyētsanga cachcá monduámama), chēngna tondaye chešmatanbuayená, ntšamo tempo tijanmama inyētšá chaimama.

<sup>7</sup> Masna, chénga tmonjántatsēmbona, Bēngbe Bētsá chē tšabe noticiēnga ndoñe judiēnga jábuayenama trabajo atše jamama šojanēntšabuáchema, ntšamo judiēnga jábuayenama cachcá Pédrēbioye tbojanēntšabuachecá.

<sup>8</sup> Er Bēngbe Bētsá atše chabe ichmoná šonjánbema, ndoñe judiēnga chabiama jábuayenama, ntšamo cachá Pédrēbioye chabe ichmoná tbojanbemcá, judiēnga chabiama jábuayenama.

<sup>9</sup> Santiago, Pedro y Juan, chē ošbuachiyēnguentša uánatsanēnga, atše canye bēts trabajo chaitsebomnama Bēngbe Bētsá tojanmama tmonjántatsēmbona ora, cucuatše šontanatšataye atše y Bernabébioye, jinjinyiyama chénga šojanēbuajama mo cachēngbe trabajo amatcá. Y fsēnjanenoyeuná bēndata jama, masna ndoñe judiēnga jtsabuayiyayama trabajo jamama, y chēngna judiēngbeñe.

<sup>10</sup> Chénga nje šonjanaimpádaye chē ošbuáchiyēnga ndbomnjémēnga Jerusalenoquēngbiama jtsenójuabnayama; y atše bētscá séntsama chénga jujabuáchama.

### *Pablo Antioquioca Pédrēbiama tojánayana cha ndoñe tšabá tojanma ca*

<sup>11</sup> Pero Pedro Antioquia bēts puebloye tonjánabo ora, chabe delante sēnjánayana cha ndoñe tšabá tonjanma ca, er ntšamo enjanamcá ndoñe tšabá quenjatsmēna.

<sup>12</sup> Mēntšá tonjanopasá: Santiago básefta entšanga Antioquiye tojanichmó, pero chénga cabá choca ndáshajna ora, Pedro yojanamana chē ndoñe judiēnga ošbuáchiyēngaftaca jtsesayana. Pero chē entšanga tmojánashajnentšana, Pedro tojtsanajbaná chēngaftaca sayana y encuéntayana. Cha chca tojanma, ntšamo chē ndoñe judiēnga ošbuáchiyēnga, chē base bobachtema chē más delicadentše tētšenēnga jtsepnama yojánamna ca tmojánayanēnga, chabiama muanjájuaoyama yojtsauatja causa.

<sup>13</sup> Chē inye judiēnga ošbuachiyēngnaca tmojanontsé amana cachcá ntšamo Pedro yojtsamcá, jtsamēse ntšamo chénga imojántatsēmbo chca jamama ndoñe yonjanamncá. Y Bernabénaca, ntšamo chénga imojtsamcá jtsonyayēse, chēngcá yojtsama, jtsamēse ntšamo cha yojántatsēmbo chca jamama ndoñe ibonjamncá.

<sup>14</sup> Chénga ndoñe quemēnjátaniyena jtsamēse ntšamo yojanamncá, ntšamo chē Jesucristbe tšabe noticiēnguentša ndegombre soyēnga endmēncá. Chca sēnjáninye ora, Pédrēbioye nyētsca ošbuáchiyēngbe delante sēnjaniyana: “Aca canye judío, mo ndoñe judío bendmēncá cojtsiyena, y ndoñe ntšamo chē judiēnga jamama monduamancá; chcasna, ¿ntšamo catjobenaye jamana chē ndoñe judiēnga ošbuáchiyēnga mo chē judiēngcá chamotsiyenama ca?”

### *Bēngbe Bētsá judiēnga y ndoñe judiēnga játsebacana, Jesucristbeñe tmojtsošbuáchema*

<sup>15</sup> Bēnga judiēnga fsēndmēna, bēngbe bētsétsanga judiēnga monjámnyayeca, y ntšamo judiēnga chē ndoñe judiēngbioye mondubobuatmncá, chē “bacna soye amēnga ca”, ndoñe queftsátsmēna.

16 Y bënga mondétatšëmbo, canÿe entšá Jesucrístbeñe tojtsošbuáchema, Bëngbe Bëtsá jamana cha chabe bominiÿiñe tšabia chaotsemnana, y Bëngbe Bëtsá ndoñe chca ntjamana, ntšamo chë judiëngbe leyënguñe jamama yomna ca iuayancá chë entšá tojamama. Y bëngnaca Jesucrístbeñe imojtsošbuaché, Bëngbe Bëtsá chaomama bënga chabe bominiÿiñe tšábenga chamotsemnana, pero ndoñe ntšamo chë judiëngbe leyënguñe jamama yomna ca iuayancá bënga tmojamama. Er Bëngbe Bëtsá ndocna ora ntjamana canÿe entšá chabe bominiÿiñe tšabia chaotsemnana, ntšamo chë judiëngbe leyënguñe iuayancá jamama ibomna ca cha tojamama.

17 Pero, bënga bëtsá mondënguá, Bëngbe Bëtsá chaomama bënga chabe bominiÿiñe tšábenga chamotsemnana, bënga Crísoftaca cánÿiñe mo canÿacá jtsemnëse, chábeñe imošbuáchema. Chca mondošbuaché, bënga chë bacna soyëngama perdonánënga chamotsemnana. Pero inÿe entšanga jtsichámuana bënga bacna soyënga amënga imomna ca, ntšamo chë Moisesbe leyiñe iuayancá ndoñe montsama causa. ¿Y chca, Cristo bacna soye amënga šuabiamná ca nántsayana? ¡Ndoñe, ndegombre ndoñe!

18 Atše, ntšamo Bëngbe Bëtsá šojaninÿinÿecá, chë šojtsemna jájbanama soyënga, cachiñe jajuaboyama y jamama stëtontšese, mo chë Moisesbe ley jtsocumplínana perdonánënga jtsemnana, atše stsemna mo nda ndayá cachá tojtsembema y cachiñe tojtëtsjebuanacá; y ndegombre, atše stsemna canÿa ntšamo ndoñe tšabá yondmëncá amá.

19 Chë judiëngbe leyëngaca atše sëndétatšëmbo, ntšamo chë leyënguñe iuayancá stsamëse, Bëngbe Bëtsá ndoñe yochanjama atše chabe bominiÿiñe tšabia chaitsemnana; y chca, atše jtsemnana mo obanacá chë castígoca, er chë leyentša mandënga stsamëse, ndoñe quetsátobena atsbocaná jtsemnana. Chë léyeca ndoñe más mandaná ntsemnana jtsebošëse, atše cachcá chë ley sënjanonÿá, Jesucrístbeñe jtsošbuáchiyama; y chca, atše chaitsobena jtsiyenana Bëngbe Bëtsá jtseeservëse. Atše Crísoftaca cánÿiñe mo canÿacá sëndmënayeca, Cristo cruciñe tojanóbana ora enjamna mo átšnaca cuafjobancá;

20 y mora entsemna mo nÿe atše ya ndoñe cuaftsiyencá, Cristo becá vida atšbe ainaniñe entsebómnyeca. Y ntšamo mora atše vida sëntsebomncá, entsemna atše chë Bëngbe Bëtsabe Uaquiñábeñe betsošbuáchiyama, nda šojánbobonshana, y chabe derecho vida jtsobomñama cachcá tojanonÿá y atšbe tšabiamna tojanóbana.

21 Atše ndoñe quetsatábotena ntšamo Bëngbe Bëtsá entšangbe tšabiamna juabna yobomncá. Nderado Bëngbe Bëtsá tojama canÿe entšá chabe bominiÿiñe tšabia chaotsemnana, ntšamo chë leyiñe jamama yomna ca iuayancá cha tojtšamama, as Cristo nÿe tondayama matënjanóbana.

### 3

#### *Ley jtsobedecënëse o Jesucrístbeñe jtsošbuáchiyëse*

1 ¡Tšëngaftanga Galacientša entšanga, yapa ndenójuabnayënga! Entsemna mo nda tcmojtsabocjuanacá, tšëngaftangbe juabna tojtsetrocá. Ndoñe quešnatësertana ntšamo chca nanjopása, er cach atše botamana cbonjanabuayiñá, Jesucristo cruciñe tojanóbana.

2 Atše sëntseboše nÿe canÿe soye atše chašmëyana: ¿Uámana Espíritu tšëngaftangbe ainaniñe tojánamashëngo jtsemándayama, tšëngaftanga ntšamo chë leyiñe jamama yomna ca iuayancá šmojamama, o tšëngaftanga chë tšabe noticiënga šmojanuena y chiñe šmojtsošbuáchema?

3 ¿Ndáyeca tša ndenójuabnayënga šmomna? Bëngbe Bëtsabe Espíritbeyeca tšëngaftanga šmonjanontšé mo tsmëma entšangcá jtsemnana. ¿Y mora šmojtseboše tšëngaftangbe vidënga jachnënguama nÿe entšangbe juabnëngaca jtsiyenëse?

4 ¿Nÿetsca soyënga ndayëjana tšëngaftanga šmojachnëjna, tondayama tonjoservé? Ndegombre chca ndoñe taiuatsmëna.



<sup>5</sup> Bëngbe Bëtsá, chë Uámana Espíritu tsëngaftangbe ainaniñe cháuamashënguama tojanma ora, y tsëngaftangbeñe bëts soyënga chaopasama tojama ora, ¿ndáyeca chca nanjama? ¿Tsëngaftanga ntšamo chë leyiñe jamama yomna ca iuayancá šmojtsamama, o tsëngaftanga Jesucristbe tsabe noticiënga šmojanuena y chiñe šmojtsošbuáchema?

<sup>6</sup> Menójuabonga ntšamo Abraham tojanpasama. Bëngbe Bëtsabe uabemana palabrënguiñe mëntsá endayana: “Cha Bëngbe Bëtsábeñe yojtsošbuáchiye, y chiyecca Bëngbe Bëtsá tonjánayana cha chabe bominiñe tsabia yojamna ca.”

<sup>7</sup> Chiyeca tsëngaftanga cmontsamna jtsetatsëmbuana, Bëngbe Bëtsábeñe ošbuáchiyënga mondmëna mo Abrahámbentšana entsangcá, cachcá ošbuáchiyana bëtsebomnama, chë chábentšana ndegombre entsangbiana más.

<sup>8</sup> Bëngbe Bëtsabe uabemana palabrënguiñe endopodena jualíama, Bëngbe Bëtsá yochjanma chë ndoñe judiënga chabe bominiñe tsábenga chamotsemnama, chábeñe tmojtsošbuáchema ca. Y Bëngbe Bëtsabe uabemana palabrënguiñe, cabá chca ndëma ora, Bëngbe Bëtsá Abrahámbioye quem tsabe noticiënga tbojanbuayená: “Acbeyeca, atše chanjama nyetsca quem luarentša entsanga tsabe bendicionënga chamotsebomnama ca.”

<sup>9</sup> Bëngbe Bëtsá tojanma Abraham ba tsabe bendicionënga chaotsebomnama, cha chábeñe yojtsošbuáchema. Chca, Bëngbe Bëtsá, chábeñe ošbuachiyëngbiámnaca ba tsabe soyënga jamana, cachcá ntšamo Abrahambiana tsabe soyënga tojanmcá.

<sup>10</sup> Chë Bëngbe Bëtsá chabe bominiñe tsábenga yochjábiana ca juabnayënga, ntšamo leyiñe jamama yomna ca iuayancá lempe tmojtsobedecénama, chënga nyets tempo jtsiyenana jtsetatsëmbëse Bëngbe Bëtsá nyetsca tescama chënga yochjácastigayama. Er Bëngbe Bëtsabe uabemana palabrënguiñe mëntsá endayana: “Bëngbe Bëtsá jayanana nyetsca tescama castigo chaotsebomna ca, nda nyets tempo ndoñe tontsama nyetsca mandënga ntšamo chë leyënguiñe iuabemancá ca.”

<sup>11</sup> Ndegombre, puerte tsabá entsinýina, Bëngbe Bëtsá ndoñe yochanjama ndocná chabe bominiñe tsabia chaotsemnama, ntšamo chë leyiñe jamama ibomna ca iuayancá tojtsobedecénëse. Chca ndegombre endmëna, er Bëngbe Bëtsabe uabemana palabrënguiñe mëntsá endayana: “Nyë ndabiana Bëngbe Bëtsá tojama chabe bominiñe tsabia chaotsemnama, cha Bëngbe Bëtsábeñe betsošbuáchema, cha ndegombre chë nyetsca tescama yomna tsabe vida echántsebomna ca.”

<sup>12</sup> Jtsamana ntšamo chë leyënguiñe jamama yomna ca iuayancá, ndoñe quenátsmëna mo Bëngbe Bëtsábeñe cuaftsošbuachecá. Ntšamo Bëngbe Bëtsabe uabemana palabrënguiñe endayancá: “Nda tojtsama nyetsca mandënga ntšamo chë leyënguiñe endayancá, tsabe vida echántsebomna, nyets tempo chë leyëngaca mandaná ca.”

<sup>13</sup> Pero, Cristo jóbanama ibojamna ca tmojánayanama, y cha bëngbe causa chca chamomama chënga tojanalesénciayeyeca, Cristo tojama bënga nyetsca tescama castigánënga ndoñe chamondëtsemnama, ntšamo chë leyiñe iuayancá ndoñe tmontsama causa. Ntšamo Bëngbe Bëtsabe uabemana palabrënguiñe endayancá: “Nyetsca tescama castigo chaotsebomna, nda canye niñësiñe tmojajonýa chaóbanama cha ca.”

<sup>14</sup> Chca tojopasá, Bëngbe Bëtsá chaomama, chë tsabe bendicionënga ntšamo cha Abrahámbioye tbojanšbuachenacá, ndoñe judiëngnaca chamotsebomnama, Cristo Jesúsbeyeca; y Jesucristbeñe ošbuachiyánaca, Bëngbe Bëtsá chaomama chë Uámana Espíritu bëngbe ainaniñe cháuamashëngo jtsemándayama, ntšamo Bëngbe Bëtsá tojanašebuachenacá.

### *Ndocna ley quenátobena Bëngbe Bëtsabe šbuachenana soye jatrócama*

<sup>15</sup> Jesucristbeyeca catšátanga, chë ndayá sentsichamcá endmëna ntšamo nyets tempo entsangbeñe endbetsopasancá. Uta entsata tbojenoyeuná canye trato jënbemama, y ntšamo tbojenšbuachenacá chaotsinýinama chatbe uabaina tsbuanáchañe tbojuábemëse,

ndocná inÿa más ntsoobenana jayanana ntšamo tbojentratacá ndoñe yontsoservenena ca; y inÿe soyënga chiñe jacjayama cach ndoñe.

<sup>16</sup> Chcasna, Bëngbe Bëtsá ba soye Abrahámbioye tbojanšbuachená puerte tšabe bendicionënga chabiamana jamama, y chabe entšanguentsana canÿabiámnaca. Y Bëngbe Bëtsabe uabemana palabrenguiñe ndoñe quenátayana: “chabe entšanguentsëngbiámnaca”, mo Bëngbe Bëtsá ba entšangbiama cuaftsichamcá; sinó mëntšá endayana: “acbe entšanguentsana canÿabiama ca”. Y chca entsayana, nÿe canÿe entšá ca; y cha endmëna Cristo.

<sup>17</sup> Atše ndayá mëntšá cbontsëtsësná: Natsana, Bëngbe Bëtsá Abrahánoftaca canÿe trato tojánbema, y tbojaninyana “aíñe ca”, ntšamo tbojanšbuachenacá jamama. Chentšana canta patse y unga bnëtsana uatëse, Bëngbe Bëtsá Moisesbe cucuatšifne chë leyënga tbojanántšaboshjona; chíyeca, chë leyënga ndoñe ntsoobenana jamana chë Bëngbe Bëtsá Abrahánoftaca tojánbema trato ndoñe chaondëtsoservénama, ni jamana ndayá Bëngbe Bëtsá tojanšbuachenacá ndoñe chaondëtsoservénama.

<sup>18</sup> Er ndayá Bëngbe Bëtsá chabe entšanga tojatšatacá, tojtsemna chënga ntšamo chë leyifne jamama yomna ca iuayancá tmojtsamama, chca, chë tšetana soyënga ya ndoñe nantsóbocana ndayá Bëngbe Bëtsá jamama tojanašebuáchenantsana. Pero ba tšabe bendicionënga Abrahambiamana jamama, Bëngbe Bëtsá tbojanšbuachenáyeca, Bëngbe Bëtsá chë soyënga Abrahambiamana tojanma.

<sup>19</sup> Asna, ¿ndayama chë Moisesbe ley nantsoservenena? Bëngbe Bëtsá chë leyënga tojanáboshjona, ba tšabe soyënga jamama Abrahámbioye tbojanšbuáchenantsana baytese. Bëngbe Bëtsá yojanjuabná chë ley chaoservé entšanga jinÿanÿiyama ndayá tšabá o ndoñe tšabá jamama bëtsemnama, chë Abrahámbentsana Uámana Entšá jashjanguëntscuana, ndabiama Bëngbe Bëtsá Abrahámbioye tbojanšbuachená ba tšabe bendicionënga jamama. Bëngbe Bëtsá angelëngaftaca chë ley Moisesbe cucuatšifne tbojanántšaboshjona, y chë entšá Moisés enjamna chë oyebuambnayá Bëngbe Bëtsáftaca y entšangaftaca.

<sup>20</sup> Uta entšata canÿe trato jénbemamna, jtseytana inÿe entšá chë uta entšátaftaca chaóyebuambama; pero Bëngbe Bëtsá Abrahámbioye ba tšabe soyënga jamama tbojanšbuachená ora, nÿe canÿa chca tojanma, y ndoñe bonjanájaboto inÿa chabiamana Abrahánoftaca chaóyebuambama.

### *Ndayama chë ley yomna*

<sup>21</sup> ¿Chca nántsayana, ntšamo Moisesbe leyifne iuayancá, chë Bëngbe Bëtsá tojanšbuachená soyëngama contra yomna ca? ¡Ndoñe, ndegombre ndoñe! Bëngbe Bëtsá entšangbe cucuatšifne canÿe ley tojanáboshjona, y chë ley tojtsobena jamana entšanga ndegombre tšabe vida chamotsemnana, as Bëngbe Bëtsá nanjama entšanga chabe bominiñe tšábenga chamotsemnana, ntšamo chë leyifne jamama yomna ca iuayancá tmojtsamama.

<sup>22</sup> Pero Bëngbe Bëtsabe uabemana palabrenguiñe endayana, nÿetsca quem luarentša entšanga cachëngbe bacna soyënga jamama juabnëngaca mandánënga imomna ca, chca, Jesucristbeñe ošbuáchiyënga chamobenama ndayá Bëngbe Bëtsá tojašbuachenacá jójëngacñama. Y chënga, Jesucristbeñe imojtsošbuáchema imojtsebomna ndayá Bëngbe Bëtsá tojanašebuachenacá.

<sup>23</sup> Jesucristbeñe jtsošbuáchiyama entšanga chamobenama tempo joshjanguëntscuana, bënga monjamna corente mandánënga chë léyeca, y chca enjamna mo presënga cuaftsemncá, cárceloca utámenënga. Chë ley chca enjamna, ntšamo entšanga Jesucristbeñe muanjobenaye jtsošbuáchiyama Bëngbe Bëtsá jinÿanÿiyama tempo joshjanguëntscuana.

<sup>24</sup> Cristo jabama tempo tonjanoshjanguëntscuana, chë ley bëngbiama enjamna mo canÿe pamillentša oservenacá, cha jtsamana chentša básenga chamotsamama ntšamo tšabá tojtsemncá. Chë ley chca yojamna, bënga Crístbeñe jtsošbuáchiyama chamobenama, y chca, Bëngbe Bëtsá chaoma bënga chabe bominiñe tšábenga chamotsemnana.

<sup>25</sup> Pero Jesucristbeñe jtsošbuáchiyama bēnga chamotsobenama mora ya tonjóshjangoyeca, chē ley ya ndoñe más quenátsmēna mo canye entšacá, ndayá tšabá yomncá bēnga chamotsamama cuafsamcá.

<sup>26</sup> Cristo Jesúsbeñe šmojtsošbuáchemá, nyetsca tšēngaftanga šmojobená Bēngbe Bētsabe básēnga jtsemnana, Cristo Jesúseftaca cányiñe mo canyáca jtsemnēse.

<sup>27</sup> Tšēngaftanga tcmónjanēbaye, y chca, Crístoftaca cányiñe mo canyáca šmontsemna. Y mora šmojobená mo cach Cristcá jtsemnana.

<sup>28</sup> Chíyeca, ndayá Bēngbe Bētsá tojamama, judiēnga y ndoñe judiēnga cachcanga mondmēna; nyets tempo nye ínñabiama oservēngēnga y chē nye cachēngbiama trabájayēnga cachcanga, y boyabásēnga y shembásēngnaca. Nyetsca tšēngaftanga mo canyáca šmondmēna, Cristo Jesúseftaca cányiñe mo canyáca jtsemnēse.

<sup>29</sup> Tšēngaftanga Cristbe entšanga šmondmēnayeca, šmontsemna mo Abrahámbeñsana entšanga cuaftsemncá; y chca, ntšamo Bēngbe Bētsá Abrahámbye tbojašbuachenacá, tšēngaftanga šmochanjóyēngacñe.

## 4

<sup>1</sup> Atšnaca sēntseboše jayanama, chē uaquiñá nda yochjóyēngacñe ntšamo tbojtsotocancá, ntšamo chabe taitá jatšetayama tbojašbuachenacá, cha cabá mo canye basacá tojtsemnēntscuana, ndocna derecho chē soyēnguiñe ntsebmōnana; y chca, cha jtsemnana mo canya nyets tempo nye ínñabiama oservenacá, masque lempe ntšamo chabe taitá tbojašbuachenacá chē uaquiñabiama tojtsemna.

<sup>2</sup> Chē uaquiñá tojtsobóchantscuana, entšanga jtsemnana ndēmuanñyēnga ntšamo cha tbojtsajabotcá jtsoinayana, y ínñyēnga jtsejuabnayana ndayá chē taitabe soyēngaca jamama, chē uaquiñá otocana soyēngaca. Y chca jtsemnana, chē taitá tojayana tempēntscuana.

<sup>3</sup> Mo cachcá cuaftsemncá, bēnga chē ndegombre soyēngama cabá ndosértaye ora, bēngnaca mandánēnga monjamna mo nyets tempo nye ínñabiama oservenēngcá, quem luarentše imománda espiritēngaca.

<sup>4</sup> Pero Bēngbe Bētsá chabe Uaquiñá quem luaroye tbojanichmó, nña chama tempo tojanóshjango ora; cha mo nyetsca entšangcá, canye shembásabentšana tojanonñná, y yojoyena jtsamēse ntšamo judiēngbe leyñe jamama ibojamna ca yojanayancá jtsamēse.

<sup>5</sup> Quem luaroye chca tojánabo bēnga jabátsebacama, y chamotsobenama Bēngbe Bētsabe basēngcá jtsemnana, bēnga chē tempo šonjánamna chē ley jtsobedecēnana.

<sup>6</sup> Y chca, tšēngaftanga ya chabe básēnga šmojtsemnana jinñanñiyama, Bēngbe Bētsá chabe Uaquiñabe Espiritu tbojanichmó, nyetscangbe ainaniñe cháumashēnguama, y chē Espiritu endama bēnga Bēngbe Bētsá chamochembo, “Atšbe Taita ca”.

<sup>7</sup> Mēntšá, cada ona tšēngaftanguentšá ya ndoñe quenátsmēna mo chē nyets tempo nye ínñabiama oservenēngcá, quem luarentše imománda espiritēngaca mandánēnga, y añe Bēngbe Bētsabe basa tojoquedá. Y chabe basa tojoquedáyeca, lempe ntšamo Bēngbe Bētsá chabe básēnga jatšatayama tojašbuachenacá cha echanjóyēngacñe.

### *Pablo, Galacia luaroquēngbiama ngmēnaca yojtsanjuabnaye*

<sup>8</sup> Tempo, Bēngbe Bētsá ndoñe šmonjanábuatma ora, tšēngaftanga šmojamna mo nyets tempo nye ínñabiama oservenēngcá, ndoñe ndegombre diosēnga mondmēna espiritēngaca mandánēnga.

<sup>9</sup> Pero mora, Bēngbe Bētsábye šmonsábuatma ora, o tšabá jayanama, Bēngbe Bētsá cmojtsēbuatma ora, ¿ntšámoyeca tšēngaftanga cachiñe chē quem luarentše imománda espiritēnga šmojtsayaunana? Chēnga ndocna obenana quemátsbomna, y nduámanēnga mondmēna. ¿Ndáyeca tšēngaftanga šmojtseboše cachiñe jtsemnana mo chē nyets tempo nye ínñabiama oservenēngcá, chē espiritēngaca mandánēnga?

<sup>10</sup> Tšëngaftanga tša jtsejuabnayana diënguiñe, shinÿënguiñe, canÿe uatentša tempënguiñe y uatënguiñe, mo uámana tempëngcá Bëngbe Bëtsá tšabá jadórama, y chama bëts fiestënga jtsebomnana.

<sup>11</sup> Atše corente šontsengmena, nderado atšbe trabajo tšëngaftangbeñe tondayama tonjoservé.

<sup>12</sup> Jesucristbeyeca atšbe catšátanga, bëtscá cbontsaimpadana, šmochtsiyena jtsamëse ntšamo atše sëndamcá, er átšnaca sënjobema ntšamo tšëngaftanga ndoñe judiënga šmondmëncá. Tšëngaftanga ndocna bacna soye atše chešatsborlá.

<sup>13</sup> Tšëngaftanga šmondëtatšëmbo, atše sënjanobená chë natsana soyama tšëngaftanga chë tšabe notiënga jábuayenama, canÿe šocana šonjanontšáshjango causa.

<sup>14</sup> Atše canÿe šocana sënjánbomna causa, tšëngaftangbiama ndoñe paselo quenjatsmëna tšëngaftangbeñe atše jofjana; pero masque chca, tšëngaftanga ndoñe chešmatanaboté, ni quešmatanáboyënja; masna, tšëngaftangbeñe tšabá šmonjanofja; šmonjanofja mo canÿe ángel Bëngbe Bëtsabe ichmoná šmojofjá, o cach Jesucristbioycá.

<sup>15</sup> Ndayá chora tšëngaftangaftaca enjanopasancá, puerte oyejuayënga tcmónjábiamama. ¿Y mora ndayá tojopasá? Ndegombre, atše sëndëtatšëmbo y sentsobena jayanama, tšëngaftanga ndaye sóynaca atšbiama mašmënjánmama. Chë más uámana šmojánbomna soyënga atšbe cucuatšinë mašmënjánboshjona, y nÿa mo chë bominÿëngnaca masmënjánenobuchjatsëca atše jatšëtayama.

<sup>16</sup> Y morna, ¿ntšamo ndegombre yomncá cbojtsëtsësnama, atšbiama šmojtsejuabná mo tšëngaftangbe uayayá cuaftsemncá ca?

<sup>17</sup> Chë ndoñe ndegombre soyënga buátëmbayënga montsinÿinÿná mo tšëngaftangbiama ndegombre tšabá chašmotsiyenama cuaftsebošcá, pero chca ndoñe quenátsmëna; ndayá jamama imojtsebošcá, tšëngaftangbiama ndoñe tšabá quenátsmëna. Chënga montseboše atšbe contra y atšbe buatëmbana soyëngama contra chašmotsemnana, chentšana tšëngaftanga chëngaftaca jtsemnana chašmotsebošama y chënga chašmotsababuánÿëshanama.

<sup>18</sup> Puerte tšabá endmëna atše y ínÿënga chafstseboše tšëngaftangaftaca amiguënga jtsemnana, canÿe tšabe soye jamama tojtsemnëse; y sempre chca chauëtsemna, tšabiamama tojtsemnëse, y ndoñe nÿe atše chentše tšëngaftangaftaca stsemna ora.

<sup>19</sup> Tšëngaftanga, chë atšbiama mo atšbe basengcá šmondmëñënga, Jesucristbeñe chašmošbuáchema tcbonjanëjabuácheyeca; atše cachiñe sëntsesufrina tšëngaftangbe causa, ntšamo canÿe šešona jtsebomnana ora canÿe shembása jtsesufrinancá; y atše chca chanjëftsesentina, ntšamo Cristo endmëncá tšëngaftangbe vidiñe ndegombre chaojtsebínÿnëntscuana.

<sup>20</sup> Malaye atše, mora tšëngaftangaftaca stsemna, atše jobenayama jinÿanÿiyama, cach tšëngaftanga jáuyanëse, ntšamo ndegombre atše tšëngaftangbiama tsësentínana. Atše tša šontsecohëngmena tšëngaftangbiama.

### *Ntšamo Agar y Sáraftaca tojanopasá*

<sup>21</sup> Canÿe soye šmochjauyana, tšëngaftanga chë Moisesbe léyeca mandánënga jtsemnana šmojtsebošënga. ¿Ntšamo chë leyinë endayancá tacmojtsësertana?

<sup>22</sup> Chiñe endayana, Abraham uta uaquiñata yojánabamna ca; cánÿana Agárbeñe, canÿa chabe shembiamama nÿets tempo oservená; y chë ínÿana, cachabe shëmbeñe, Sara, y mua ndocnabiamama nÿets tempo oservená yonjamna.

<sup>23</sup> Chë chabe shembiamama nÿets tempo oservenabe šešona, tojanonÿná nÿe Abraham y Agar chca chaotsemnana tbojánbošenayeca; y cachabe shembe šešona tojanonÿná, Bëngbe Bëtsá chë soye jamama Abrahámbioye tbojanšbuachenáyeca.

<sup>24</sup> Ntšamo Agar y Sara, y chatbe šešónataftaca tojanopasacá, bënga canÿe uámana soye šontsabuatambá. Ndayá chë uta shembásataftaca tojanopasacá, uta trato entsinÿinÿná:

chë shembása Agar, chë nyets tempo nye ínÿabiamá oservená yojamná, entsinÿinÿná chë trato Bëngbe Bëtsá y Israeloca entsángaftaca, chë Moisésoftaca Bëngbe Bëtsá leyënga entsangbe cucuatshiñe tojanáboshjona ora. Agar básenga yojtsabamna ora, chëngnaca tmojanonÿná nye ínÿabiamá nyets tempo oservénënga jtsemnama, y chë tratentša leyiñe soyëngaca mandánënga jtsemnama tmojtsebošëngnaca jtsemnana mo nye ínÿabiamá nyets tempo oservenëngcá.

<sup>25</sup> Ndayá Agáraftaca tojanopasacá entsinÿinÿná chë Sináí batsjoca tmojánbema trato, Arabia luaroca; y chë morsca bëts pueblo Jerusalénënaca entsinÿinÿná, er chentša entsanga montsemna chë leyëngaca mandánënga. Ntšamo Agar y chabe básenga nye ínÿabiamá nyets tempo oservénënga monjamncá, Jerusalenentša entsángnaca cachcá chëngcá mondmëna, chë leyëngaca nyets tempo mandánënga bëtsemnayeca.

<sup>26</sup> Ndayá Sáraftaca tojanopasacá, chë nye cachabiamá trabájaye shembása, entsinÿinÿná chë trato, chë tšabe bendicionënga Abrahambiamá jamama chábioye tbojanšbuachená ora. Chánaca entsinÿinÿná chë Bëngbe Bëtsabe bëts pueblo celoca, Jerusalén ca uabaina pueblo, er chë chentše mochjoyénananga, mora ndoñe quemuátiyena chë leyëngaca mandánënga. Chë Crístbeñe ošbuáchiyënga mondmëna chë celoca bëts pueblo Jerusalenentše joyénanama, y chca, ndegombre chënga mondmëna celocama entsanga.

<sup>27</sup> Chë celoca Jerusalén endmëna chë ndegombre bëts pueblo chë Jesucrístbeñe ošbuáchiyëngbiamá, y chca endmëna mo canÿe shembása šešonga ndabamná y aíñe chaotsabamnama Bëngbe Bëtsá cuafjamcá. Quem luarentša Jerusalén endmëna chë uámana luare chë léyeca mandánënga imomnëngbiamá, y chca endmëna mo canÿe shembása aíñe boyaftaquëcá, er Bëngbe Bëtsabe uabemana palabrenguiñe chë shembásatbiamá mëntšá endayana:

Shembása šešonga ndabamná, y ndocna te tsetšanënga ndbomná šešona jtsebomnama, moyejuá y moyó oyejuayá cojtsemnama.

Chca moma, er aca, chë shembása chabe boyabiamá utšená, chë shembása boyá bomnabiamá más básenga cochántsabamna ca.

<sup>28</sup> Chcasna, Jesucrístbeyeca atšbe catšátanga, ntšamo Isaac Abrahambe uaquiñá tojanobemcá, Bëngbe Bëtsá chca Abrahámbioye tbojanšbuachenáyeca; cachcá, tšëngaftángnaca šmjobená Bëngbe Bëtsabe básenga jtsemnama, Bëngbe Bëtsá chca tojanšbuachenáyeca.

<sup>29</sup> Ntšamo chë tempo tojanopasacá, chë Isaac chaosufrima Ismael tojanmcá (Ismael, Abrahambe uaquiñá Agárbeñe, chë nye chata chca tbojánbošenayeca onÿnaná; Isaac, chë Bëngbe Bëtsabe Espíritbeyeca onÿnaná), mórncaca cachcá entsopasana: chë ndoñe ndegombre soyënga buátëmbayënga judiënga montsama bënga chamosufrima, ntšamo Isaac chaosufrima Ismael yojanamcá.

<sup>30</sup> Pero, ¿ndayá Bëngbe Bëtsabe uabemana palabrenguiñe Abrahambe básatbiamá iuayana? Mëntšá endayana: “Moma, chë nyets tempo nye ínÿabiamá oservená y chabe basa acbe yebnentšana chábuaisebocnama, er chë nyets tempo nye ínÿabiamá oservenabe šešona ndoñe quenátobena chabe taitabe soyënga jtsebomnama. Nye chë propio shembe šešona aíñe, er chë shemna ndoñe nye ínÿabiamá nyets tempo oservená quenátsmëna.”

<sup>31</sup> Chcasna, Jesucrístbeyeca atšbe catšátanga, bënga ndoñe quemuátsmëna mo canÿa nye ínÿabiamá nyets tempo oservenabe básenga cuaftsemncá, er mora ya ndoñe más quemuátsmëna chë léyeca nyets tempo mandánënga. Y aíñe montsemna mo canÿe shema ndoñe nye ínÿabiamá nyets tempo oservenabe básenga cuaftsemncá, er Bëngbe Bëtsabe básenga bënga mondmëna.

## 5

<sup>1</sup> Cristo bënga šojatsebacá, ndoñe más mo chë nyets tempo nye ínÿabiamama oservernëngcá chamondëtsiyenama, chë léyeca mandánënga. Nÿa šmochtsentsena nyets tempo chca atsebácanënga chašmoquedama, y ndoñe šmatjaleséncia tšëngaftanga cachiñe chë léyeca mandánënga ínÿënga chácmabiamama.

<sup>2</sup> Tšabá šmochjouena. Atše Pablo cbëyana: Nderado tšëngaftanga ndoñe judiënga, šmojalesenciá ínÿënga chë tšëngaftangbe más delicadentše base bobachtema chamotëtšama, ntšamo judiënga monduamancá, asna, ndayá Cristo tšëngaftangbiama tojanmcá tondayama nantsoserverna.

<sup>3</sup> Ndëmuanyë entsánaca, nda tojalesenciá ínÿënga chabe más delicadentše base bobachtema chamotëtšama, cachiñe cha šcobuayená: Mora aca cmontsemna nyetsca chë judiëngbe leyentša mandënga jtsobedecénana.

<sup>4</sup> Ndëmuanyënga tšëngaftangbentsána šmojtsenguá, Bëngbe Bëtsabe bominyiñe tšábënga jtsemnana, ntšamo leyiñe jamama yomna ca iuayancá jtsamëse, tšëngaftanga chca šmojtsamama, šmojama Crísoftaca cánÿiñe mo canÿacá ndoñe chašmondëtsemnana; Bëngbe Bëtsábentsanënaca šmojtsoluaré, y chca, šmontsinÿanÿná tšëngaftanga ndoñe šmontseboše, Bëngbe Bëtsá tšëngaftangbe tšabiamama jtsejuabnayeše, chácmatsebacana.

<sup>5</sup> Pero bënga, Bëngbe Bëtsabeñe jtsošbuáchiyëse, mondobátmana cha yochjama bënga chabe bominyiñe tšábënga nyets tempo chamotsemnana. Y bënga chca mondobátmana, Jesucristbeñe ošbuáchiyana bómnyeyeca, y chë ošbuáchiyana chë Uámana Espíritbiajana bëngbioye endobá.

<sup>6</sup> Er Crísoftaca cánÿiñe mo canÿacá tmojtsemna ora, aiñe base bobachtema tëtšenënga tmojtsemna o ndoñe, tondaye ntsámanana; ndayá puerte enduámana endmëna chë Jesucristbeñe bënga mondbomna ošbuáchiyana, y chca bëtsebomnamna bënga montsinÿanÿná ínÿënga jtsababuánÿeshanëse.

<sup>7</sup> Tšëngaftanga tšabá šmonjánama, chë jtsiyenana ntšamo Bëngbe Bëtsabe ndegombre soyënga yomncá jtsamëse. Y mora, ¿nda tojama tšëngaftanga chašmotsajbanama chë Bëngbe Bëtsabe ndegombre soyënga jtsuenanama?

<sup>8</sup> Ndegombre, Bëngbe Bëtsá ndoñe quenátsmëna, er cha tšëngaftanga tcmojáchembo chabe entsanga chašmotsemnana.

<sup>9</sup> Ntšamo entsanga mondëntšayancá: “Nÿe base levadura jamana nyetsana chauabochama ca”; cachcá, tšëngaftanga chë judiëngbe básefta leyëngaca mandánënga jtsemnana šmojabojátšese, šmatjábocna nyetsca leyëngaca mandánënga.

<sup>10</sup> Bënga Bëngbe Utabnáftaca cánÿiñe mo canÿacá bëtsemnayece, atše corente sëntsetatšëmbo, ntšamo atšbe juabna yomncá tšëngaftangnaca cachcá šmochtsejuabnayama; y átšnaca corente sëntsetatšëmbo Bëngbe Bëtsá puerte bochjacastíga, nda tšëngaftanga natjëmbana ainánaca ndoñe chašmondëtsiyenama tojtsamábioye, masque ndánaca cha chaotsomñe.

<sup>11</sup> Y atšbiamama chanjayana, Jesucristbeyeca atšbe catšátanga, Jesucristbeñe ošbuáchiyënga base bobachtema chëngbe más delicadentše tëtšenënga chamotsemnana entsanga cabá stsabuayiynase, entsanga ya ndoñe muantsama atše chaitsesufrínama. Atše chca stsamëse, Cristo cruciñe tojanóbanama ntšamo iuayancá entsanga stsabuayiyná ora, chënga ya ndoñe átšeftaca nanjósentiaye.

<sup>12</sup> Pero chë natjëmbana ainánaca ndoñe chašmondëtsiyenama imojtsamëngna, ¡malaye cachënga muanjenocbóna!

<sup>13</sup> Pero tšëngaftanga, Jesucristbeyeca atšbe catšátanga, Bëngbe Bëtsá tcmojáchembo chë judiëngbe léyeca ndëmandánënga chašmotsemnana. Pero chca bëtsemnana, mora ndoñe šmatjátsjuabnaye šmojtsobena jalesénciana, nye tšëngaftangbe cuerpënga tšabá chamotsemnana juabnëngaca mandánënga jatiyenama. Chamna, tšëngaftanga šmuenbobonshánayeca, nyetscanga šmochtsenájabuachana.

14 Er ntšamo Moisesbe leyentša nyetsca mandënguiñe endayancá, nye canye mandíñe lempe chca entsayana. Y chë mando endmëna: “Ndëmua entsánaca cochtsebobonshana ntšamo cach aca cuenobobonshancá.”

15 Pero ínÿenga chamotsesufrínama jtsamëse tsëngaftanga šmojtšiyenëse, mo tsátjaye bayënga tmojtšenashantsná y tmojtšenobanacá, cuedado šmochtsebomna. Ndoñese, nyetscanga šmatjánenpochocaye.

*Ntšamo chë Bëngbe Bëtsabe Espíritbeyeca vida jtsebomnama*

16 Chíyeca cbochjáuyana: Nyets tempo šmochtsiyena ntšamo chë Uámana Espíritu cmojtsamëndacá, y chca, tsëngaftanga ndoñe quešmochátama soyënga, nye cach tsëngaftanga tsábá jtsomñama juabnëngaca.

17 Er ndayá bënga, nye entsangbe juábnaca jamama mondbošcá, jtsemnana ndayá chë Uámana Espíritu bënga chamomama yobošcá contra; y ndayá chë Uámana Espíritu bënga chamomama yobošcá, jtsemnana ndayá bënga, nye entsangbe juábnaca jamama imo-bošcá contra. Chca endmënayeca, ntšamo chë Uámana Espíritu chašmomama yobošcá šmojtšamëse, ndoñe quešmátobena jamana, ndayá cach tsëngaftanga, nye entsangbe juábnaca jamama šmojatsbošcá.

18 Tsëngaftanga, ntšamo chë Uámana Espíritu cmojtsamëndacá šmojtšamëse, ndoñe quecmátamna ntšamo chë leyíñe iuayancá játamama.

19 Ntšamo entsanga, nye entsangbe juábnaca tmojtšamcá, nyetscanga paselo jtsonÿayana: chënga bacna soye boyabása o shembásaftaca jtsamana, nye chca soyëngama jësejuabnayana, y ndoñe ntsoybenana cachënga jenomándama, chca soyënga jtsamëse.

20 Ba uabouana soyënga jtsamana, diosënga yomna ca tmojtsejuabná soyënga jadórana, jtsencjuanayana, ínÿengaftaca jtsenáyayana, nyetscanga ndoñe cachcá chamondëtsejuabnama jtsamana, ínÿengaftaca yapa jtsenántšabošana, soyënga nye rábiaca jtsamana, ínÿengaftaca tša jesenaleganana, y cánÿenga ínÿengaftaca contra chamotsemnama jtsamana.

21 Nye jtsebošana ntšamo inÿa tojatashjachcá jtsebomnama, yapa tmoyënga jtsemnana, fiestënguiñe ndoñe tsabe soyënga jtsamana, y inÿe soyëngnaca mo chë soyëngcá jtsamana. Y mora atše cbabuayená, cach ntšamo tempo sënjanmcá: chca soyënga jtsamëse oyenënga, Bëngbe Bëtsabe amëndayoca ndoñe luare quemochátsbomna.

22 Pero, Uámana Espíritu ainaniñe tojtsemánda ora, quem soyënga chentšana jóbocnana: nyetscanga jtsababuánÿeshanana, jtsóyejuayana, natjëmbana ínÿengaftaca jtšiyenana, puerte uantado nyetsca padecéniñe jtsemnana, nyetscanga corente bonshanánaca jtšénÿayana, tsabe ainana jtsebomnana, y nyetscañe tsabe palabra bomnënga jtsemnana,

23 jtsejuabnayana chë ínÿenga mo chabiamá más uámanënga cuaftsemncá, y cachá nyetsca soyënguiñe jenomándama jtsoybenana. Y ndocna ley quenátsmëna, chca soyënga tmojtsama entsangbiamá contra cháuyanama.

24 Jesucristbenga imomnënga tmojama, chënga chë nye entsangbe juabnëngaca mandánënga ndoñe ntsemnana; ya ndoñe más, chë nye cachënga tsábá jtsomñama bacna juabnëngaca mandánënga quemátsmëna, y chë nye cachëngbiamá soyënga jamama bëtscá juabnëngaca cach ndoñe.

25 Bënga ndegombre tsabe vida chamotsebomnama Uámana Espíritu yojtšamayeca, bënga mochtšiyena jtsamëse lempe ntšamo Uámana Espíritu šojtsamëndacá.

26 Ndoñe šmattsenábotamnaye, uámanënga jatenobiamnayëse, ndoñe soyënga mattsama ínÿenga bëngaftaca chaoséntiyama, y ndoñe nye mochjátsboše ntšamo inÿa tojatashjachcá jatsbomnama.

## 6

<sup>1</sup> Jesucristbeyeca atšbe catsátanga, nderado ndánaca bacna soye tojamama šmojinýe, tšëngaftangbentše ntšamo chë Bëngbe Bëtsabe Espiritu tojtsemandacá tmojtsamënga cmontsamna cha juajabuáchana, chë ndoñe tšabe soye amana chaotsajbanama; pero chca šmochjama becá bonshanánaca jtsonýayëse. Cuedado šmochtsebomna, er ndoñese, tšëngaftángnaca cmatjócochëngo cachcá soye jamama.

<sup>2</sup> Chë soyënguiñe chašmojtsepadecena ora, šmochtsenájabuachana, mo chë uauta uasmanëshangá šmojtsëyambá ora, juyambama šmojtsenajabuachancá. Y chca chašmojtsama ora, ntšamo Cristo tojanmandacá šmochantsocumplina.

<sup>3</sup> Nderado nda tojtsejuabná, cha canýe uámana entšá yomna ca, pero ndoñe chca cha tondmënese, cachá jtsenoíngñayana.

<sup>4</sup> Cada ona chauenojuabó, ntšamo tojamcá tšabá o ndoñe tšabá bétsemnama. Ntšamo tojamcá tšabá tojtsemnëse, chca tojamama oyejuayá chaotsemna; pero cha ndoñe quebnátsmëna jayanana ntšamo tojamcá tšabá yojtsemna ca, chë ndayá ínýenga tmojamama más tšabá yojtsemna ca jatichámëse.

<sup>5</sup> Er cada ona bontsemna jtsenójuabnayana, jtsetatšëmbuama ntšamo tojamcá tšabá o ndoñe tšabá bétsemnama.

<sup>6</sup> Nda Bëngbe Bëtsabe soyëngama tojtsatsjendá, cha bontsemna chabe buatëmbayáftaca nyetsca tšabe soyënga jenájatayana.

<sup>7</sup> Ndoñe matenoíngñana; ndoñe šmattsejuabnaye tšëngaftanga šmojtsobena ntšamo Bëngbe Bëtsá tojamandacá ndoñe ntjamana, castigo ntjoyëngacñëcá, er ndocná quenátobena Bëngbe Bëtsá jaíngñana. Ntšamo entšanga mondëntšayancá: “Ndayá tcojajé y cachcá josháchiñana ca.”

<sup>8</sup> Mo nda ndoñe tšabe fshantsiñe tojajecá, tšabe shajuana ndoñe ntjoshachiñana, cachcá, nda tojtsiyena nýe cachá tšabá jtsomñama bacna juabnëngaca, cha echanjábocna jabuache castiganá nyetsca tescama. Pero mo nda uaba fshantsiñe tojajecá, tšabe shajuana josháchiñana, cachcá nda tojtsiyena ntšamo chë Uámana Espiritu tojtsemandacá jtsamëse, chë nyetsca tescama yomna tšabe vida echántsebomna.

<sup>9</sup> Chcasna, ndoñe chašondëmantšé tšabe soye jtsamama; er masque šojtsëmantšnasna, pero chë tšabe soyënga jtsamama ndoñe tmonjajbanase, canýe bëts te echanjóshjango, bënga bëtscá tšabe soyënga josháchiñama, mo tša tšabe shajuanënga tmojashaquécá.

<sup>10</sup> Chíyeca, tmojtsobena ora, nyetscangbiamna tšabe soyënga mochjama, pero masna chë Jesucristbeñe ošbuáchiyana bómnyeyeca, bëngcá Bëngbe Bëtsabe básenga imomnëngbiamna.

*Quem tsbuanácha juapochócama cach Pablo tojanábema*

<sup>11</sup> ¡šmochjinýe, tša bëts letrëngaca cach atšbe cucuátšeca mora cbontsëbuabiamná!

<sup>12</sup> Ndëmuanýenga imojtseboše, tšëngaftanga chë ndoñe judiënga jamëndama tšëngaftangbe más delicadentše base bobachtema tëtšenënga chašmotsemnama, ntšamo judiënga monduamancá, chënga chca jtsamana nýe chë judiëngaftaca tšabá joquédama. Y chca jtsamëndayana, chënga chamosufrima ínýenga chamotsamama ndoñe mondbóseyeca; er judiënga muanjama chënga chamosufrima, Cristo cruzoca jóbana entšangbiamna puerte iuámana ca chënga tmojtsabuayiynase.

<sup>13</sup> Pero ni mo chë más delicadentše base bobachtema tëtšenënga imomnënga, ndoñe quemátama lempe ntšamo chë leyíñe iuayancá. Pero chënga jtsebošana tšëngaftanga chca tëtšenënga chašmotsemna, chënga jtsenábotamnayama jobenayama, ínýenga base bobachtema chacmatëtšama tšëngaftanga šmojalesenciamna.

<sup>14</sup> Atšeftacna ndocna te chca chaondopasá. Atše nyets tempo y becá chanjéftsóyebuambnaye ndayá atšbiamna Bëngbe Utabná Jesucristo tojanmama, cha cruzoca tojanóbana ora; er ndayá choca tojanma sóyeca, atšbiamna tondaye quenatámana ntšamo entšanga quem luarentše imojuabnacá y chëngbiamna puerte iuámana; y ndayá atšbiamna puerte iuámana, entšangbiamna tondaye quenatámana; y chë causa, atše chëngbiamna mo obanacá sëndmëna.



<sup>15</sup> Chë más delicadentse base bobachtema aíñe tětšená o ndoñe, tondaye quenatámana. Ndayá puerte iuámana endmëna, Bëngbe Bëtsá mo tsmëma entsangcá bënga šojábiana, Uámana Espíritu bëngbe ainaniñe jtsemándayëse.

<sup>16</sup> Chë quem buatëmbana sóyeca jtsamëse šmoyenëngbiana, atše, Bëngbe Bëtsá sëntseimpadana, cha chaoma tsëngaftangbe ainana natjëmbana chašmotsebomnama y becá chacmotsalastemánama; y ndoñe nÿe chëngbiana chca quetsatsimpadana, ndayá nÿetscanga Bëngbe Bëtsabe entsanga imomnëngbiámna.

<sup>17</sup> Y mora, nÿe canÿe soye cbochjáuyana: morcana ndocná chaondëtsama atše jasúfriama chašotsemnama; er atšbe cuerpiñe endëtinÿna ntšamo atše tijasufrí, Jesusbe oservená bëtsemnama.

<sup>18</sup> Jesucrístbeyeca atšbe catšátanga, atše sëntseimpadana Bëngbe Utabná Jesucristo chaoma tsabe bendicionënga tsëngaftangbeñe chaotsemnama. Chca chaotsemna.

## Efesios

### *Jacheuayama*

<sup>1</sup> Atše Pablo, Jesucristbe ichmoná Bëngbe Bëtsá chca yobóseyeca, quem tsbuanácha sentsabiamná Efeso puebloca Bëngbe Bëtsabe entšanga y Cristo Jesúsbeñe ošbuáchiyënga imomnëngbiama.

<sup>2</sup> Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y chata chaboma tšëngaftangbe ainaniñe tšabe ebionana chašmotsebomnama.

*Crísoftaca cányiñe mo canyáca jtsemnëse, bënga mochántsebomna nyetsca tšabe soyënga, ntšamo celoca yobinýncá*

<sup>3</sup> Bëngbe Bëtsá y Bëngbe Utabná Jesucristbe Taitábioye mochjëtschuaye, er bënga Crísoftaca cányiñe mo canyáca mondmënayeca, Bëngbe Bëtsá tojama bënga nyetsca tšabe soyënga chamotsebomnama, ntšamo celoca yobinýncá.

<sup>4</sup> Bëngbe Bëtsá bënga šojanabacacá Crísoftaca cányiñe mo canyáca chamotsemnama, cabá quem luare cha ndama orscana, bënga chabe delante chamotsemnama chabe entšanga, bacna soyëngama perdonánënga y chabe oservénënga, y bënga ainaniñe bacna soye ndbomnënga imomna ca cha cháuyanama.

<sup>5</sup> Bëngbe Bëtsá šuababuánýeshanayeca, tempo cha tojanjuabó y tojánbošena bënga mo cachabe basengcá jábiamama, chë Jesucristo yochjanma sóyeca.

<sup>6</sup> Chíyeca bënga Bëngbe Bëtsábioye sempre jtsatschuanayana, cha bëngbe tšabiamama juabna yobómnyayeca, ndayá chabe Bonshana Uaquiñáftaca bëngbe tšabiamama cha tojamama.

<sup>7</sup> Bëngbe Bëtsá puerte bonshanánaca bëngbe tšabiamama bëtscá yojuabnáyeca, cha bëngbe bacna soyëngama šojtsaperdoná y šojatsebacá, er Jesús bëngbiama tojanóbana, chabe buiñe juabuáshanëse.

<sup>8</sup> Bëngbe Bëtsá tojama bënga nyets osertánana y becá juabna chamotsebomnama, cha becá bonshanánaca bëngbe tšabiamama juabna yobómnyayeca,

<sup>9</sup> y tojama bënga chamotsetatšëmbuama ndayá jamama cha yobošcá, ndayá cachá tempscana yojanjuabná jamama, pero entšanga chca ndoñe tonjaninýanyé. Ndayá jamama Bëngbe Bëtsá tempo yojanjuabnacá, ndayá cha tojama bënga chamotsetatšëmbuama, cachá yojanjuabná chca jamama.

<sup>10</sup> Ndayá jamama Bëngbe Bëtsá yojuabnacá, lempe echanjochnëngo nýa chama tempo chaojóshjango ora, y quem Bëngbe Bëtsabe juabna endmëna jamana, lempe ntšamo cha tojamcá celoca y quem luarentše, Cristo chamotsebomna nyetsca chë soyënguiñe mo chë mandayacá.

<sup>11</sup> Bëngbe Bëtsá sempre jamana nyetsca soyënga ntšamo tojtsejuabnacá y tojtsebošcá. Y Bëngbe Bëtsá bënga šojabacacá, ntšamo cabá chca ndama ora yojanjuabnacá; chca, bënga Crísoftaca cányiñe mo canyáca jtsemnëse, bënga chamóyëngacñama ndayá Bëngbe Bëtsá chabe entšanga jatšatayama tojašebuachená, mo chëngbe otocana soycá.

<sup>12</sup> Y Bëngbe Bëtsá chca tojama, bënga chë Crístbeñe natsana imojtsanošbuachenga, cha bënga šochjánatsebabama, tšabe soyënga jtsamëse chamotsiyenama, chca, chë inýe entšanga Bëngbe Bëtsabe obenanama cha chamotsatschuanama.

<sup>13</sup> Y tšëngaftángnaca, chë ndegombre buayenánana šmojanuena ora, chë Bëngbe Bëtsá bënga játsebacama buayenánana, y Crístbeñe šmojtsanošbuaché ora, Bëngbe Bëtsá tojanma tšëngaftanga Crísoftaca cányiñe mo canyáca chašmotsemnama y tcmojanainýnaná tšëngaftanga chabe entšanga bëtsemnama. Bëngbe Bëtsá chca tojanma,

Uámana Espíritu tšëngaftangbe ainaniñe cháuamashënguama tojanma ora, ntšamo tempo cha tojanašebuachenacá.

<sup>14</sup> Bënga chë Uámana Espíritu bëngbe ainaniñe mondbómnyayeca, corente mondetatšëmbo ndayá Bëngbe Bëtsá chabe entsanga tojašebuachenacá bënga mochjóyëngacñama. Uámana Espíritbeyeca bënga montsobena chca puerte tšabá jtsetatšëmbuama, chë Bëngbe Bëtsá chabe entsanga nyetsca tescama jätsebacama y ntšamo tojašebuachenacá jatšatayama tempo cha ošhjangüentscuana; y lempe ntšamo cha bëngbiana inétsamama, nyetscanga cha mochántatschuanaye, cha bëtsá y obená bëtsemnama.

*Pablo Bëngbe Bëtsá bioye tbojanimpadá, ošbuáchiyënga osertánana chamotsebomnama.*

<sup>15-16</sup> Chcáyeca, atšna, Bëngbe Bëtsá tšëngaftangbiana stseimpadana ora, sempre cha sëndbëtsatschuanaye, er atše sënjatatšëmbona ntšamo tšëngaftanga Bëngbe Utabná Jesúsbeñe tša šmojtsošbuáchema, y ntšamo tšëngaftanga nyetsca chë Bëngbe Bëtsábenga imomnënga šmababuánjeshanama.

<sup>17</sup> Bëngbe Bëtsá, Bëngbe Utabná Jesucristbe Taitá, nda corente iuámana, sëntseimpadana cha chaoma Uámana Espíritu chacmëjabuachama, corente osertánënga chašmotsemnama, y chacminjanyé nda Bëngbe Bëtsá yomnana, chca, más tšabá cha chašmotsábuatmama.

<sup>18</sup> Atše, Bëngbe Bëtsá sëntseimpadana, cha chaoma tšëngaftanga Bëngbe Bëtsabe soyënguiñe corente osertánana chašmotsebomnama, tšëngaftanga chašmotsetatšëmbuama, ndayá Bëngbe Bëtsábeñe jtsošbuáchiyëse tšëngaftanga šmojtsobatmancá cha cmochjätšatayama. Bëngbe Bëtsá tcmojáchembo chábeñe chca chašmotsobátmanama. Atše cha sëntseimpadana, chaoma tšëngaftangnaca chašmotsetatšëmbo tša bëtscá y bëts soyënga yomna ndayá chabe entsanga cha tojašebuachenacá;

<sup>19</sup> y chašmotsetatšëmbo tša bëts soye y ndocna te ntjëftsopochócama chabe obenana yomnana, chë ndayá bëngbe ainaniñe tšabe soyënga yojtsama, bënga chë Crístbeñe ošbuachiyëngbeñe. Cach quem puerte bëts obenana endmëna,

<sup>20</sup> ndáyeca Bëngbe Bëtsá tojanma Cristo cháuatayenama, y chabe catšbioica celoca tbojtantbema chaotsemándama.

<sup>21</sup> Choca Cristo nyetsca soyënguiñe yojtsemánda, y más bëtscá obenana y mando yojtsebomna nyetsca mándayëngbiana, chë mando y obenana bomnëngbiana, y cha yomna más uamaná y bëtsá nyetsca chë entsangbiana mo bëtsëtsangcá utabnëngbiana, chëngbe uabaina respétoca jtsichámëse. Cristo puerte bëtsá endmëna lempe ntšamo quem luarentše yobínynama y Cristo yochjésabentšana yochtsebinýnámna.

<sup>22</sup> Bëngbe Bëtsá tojama Cristo nyetsca soyënguiñe chaotsemándama, y tbojanábuayana nyetsca soyënguiñe chaotsemándama, chábeñe ošbuáchiyëngbe tšabiana.

<sup>23</sup> Cha endmëna nyetsca chábeñe ošbuáchiyëngbe mandayá, y chënga mondmëna mo cachabe cuerpo cuaftsemncá. Chëngbe ainaniñe cha endoyena y nyetsca luarënguifnaca, y lempe cha endëmánda.

## 2

*Atsebácanënga mondmëna, Bëngbe Bëtsá šuababuánjeshanayeca*

<sup>1</sup> Tempo tšëngaftanga Bëngbe Bëtsabiana mo obanëngcá šmonjamna, er tšëngaftanga šmonjaniyena, ntšamo Bëngbe Bëtsá yomandacá ntsamcá, y bëtscá bacna soyënga šmojánama.

<sup>2</sup> Chca, tšëngaftanga šmonjánama mo chë nye quem luarama enójuabnayënga monduamancá, y šmonjanëyeunana Satanás, chë bacna espíritënga obenana bomnënga y quem luarentša tsbanánoca imomnëngbe amëndayá, chë Bëngbe Bëtsá bioye ndëyeunanëngbe ainaniñe yománda espíritu.

<sup>3</sup> Tempo bënga nyetscanga fsënjanijena ntšamo tšëngaftanga šmonjanijencá. Bënga soyënga fsënjánama, nye ntšamo ftsjanbošcá nye bëngbe cuerpëngbe tšabiamá, y nye ntšamo bëngbe juabna enjamncá bacna soyënga jamama. Bënga fsënjanijena soyënga jtsamëse mo chë Bëngbe Bëtsábioye nduabuatma entšanga mondbetsamcá; chë causa bënga fsënjanomerecena jtsebomnana chë Bëngbe Bëtsabe uabouana castigo, cachcá chë Bëngbe Bëtsábioye nduabuatmëngcá.

<sup>4</sup> Pero Bëngbe Bëtsá sempre tša lastemado entšangbiamá endmëna y sempre corente bënga šondábabuanjeshana;

<sup>5</sup> y chíyeca, bënga cabá mo obanëngcá chabiamá fsënjamna ora, bacna soyënga fsënjánama causa, chora cha tojanma bënga tšabe vida chamotsebomnana y Crísoftaca cánjiñe mo canyácá chamotsemnana. Bëngbe Bëtsá tšëngaftangbe tšabiamá juabna bómnayeca, bacna soyënguentšana tcmojatsebacá.

<sup>6</sup> Bënga Jesucrísoftaca cánjiñe mo canyácá bétsemnayeca, Cristo Jesús cháuatayenama Bëngbe Bëtsá tojanma ora y celoca tbojtantbema ora, enjamna mo bëngnaca chámuatayenama Bëngbe Bëtsá cuafjamcá y Cristo Jesúseftaca celoca cuaftatbiamcá.

<sup>7</sup> Chca enjamna, Bëngbe Bëtsá entšanga cháuinyanjema nyetsca joshjanguama tempënguiñe, ntšamo cha bëngbe tšabiamá bëtscá juabna bétsebomnana, cha Cristo Jesúseftaca bëngbioye tšabe juábnaca šojánanje ora.

<sup>8</sup> Er Bëngbe Bëtsá tšëngaftangbiamá tšabe juabna yojánbomnayeca, tcmojatsebacá, Jesucrístbeñe šmojtsanošbuáchema; pero atsebácanënga šmondmëna, ndoñe cach tšëngaftanga ndayá šmojánmayeca, ndayá atsbocaná jtsemnana endmëna Bëngbe Bëtsabe canje tšetana soyé.

<sup>9</sup> Atsebácanënga šmondmëna, ndoñe cach tšëngaftanga ndayá šmojánmayeca; chíyeca ndocná quenátobena jtšenábotamnayana atsbocaná yojtsemnana.

<sup>10</sup> Bëngbe Bëtsá šojtabiamá ntšamo bënga mondmëncá, y Cristo Jesúseftaca cánjiñe mo canyácá bétsemnayeca, Bëngbe Bëtsá mo tsmëma entšangcá cuaftsatsmëncá šojtabiamá, tšabe soyënga jtsamëse jtšiyenama. Y ndayá bënga tšabá mondamcá, Bëngbe Bëtsá tempo tojanprontá bënga chamotsamama.

### *Crístbeyeca tempcá tšabá Bëngbe Bëtsáftaca jtsatsmënaná*

<sup>11</sup> Tšëngaftanga ndoñe judiënga, ndëmuanyënga judiënga cmondubuatma “chë más delicadentse base bobachtema ndëtëtšenënga ca”, chëngcá uinynanánënga ndoñe šmondmënama; chënga cachënga jtšenábobuatmana “chë más delicadentse base bobachtema tëtšenënga ca”, y cachëngbe cuerpënguiñe chca jtsamana. Mëntšá, tšëngaftanga chë ndoñe judiënga,

<sup>12</sup> šmochjenójuaboye ntšamo tempo šmojamnana, Crístbeñe cabá ndošbuáchiye ora. Chora, tšëngaftanga Cristo ndoñe šmonjánbomna, Israeloca entšangbiamá stëtšoye šmonjanquedana, y ndoñe šmonjantátšëmbo lempe ntšamo Bëngbe Bëtsá chabe entšanga tojanašebuachenacá. Tšëngaftanga quem luarentse šmonjanijena ndocnábeñe ntsobatmancá y Bëngbe Bëtsá ntsabuatmcá.

<sup>13</sup> Pero mora tšëngaftanga Cristo Jesúseftaca cánjiñe mo canyácá šmontsemna, chë tempo Bëngbe Bëtsá ndoñe šmonjánabuatmënga, y cha tojama chábioye chašmotsábuatmama; y chca yomna, er Jesús, chabe buiñe juabuáshanëse, tšëngaftangbiamá tojanóbana.

<sup>14</sup> Cach Cristo yojtsama bënga tempcá tšabá Bëngbe Bëtsáftaca chamotsemnana. Cha tojama judiënga y ndoñe judiënga nyetscanga mo cachca entšangcá chamotsemnana, mo nda canje tapiëse tojtsendbemcá, chë ndayëšeca canje luarentša entšanga tmojtsenjáta, chënga enáyaye causa.

<sup>15</sup> Cristo chënga mo cachca entšangcá tojábiamá, judiëngbe leyënga y mandënga ndocna obenana chamondëtsebomnana jamëse. Chca tojama, cha jóbänëse, chë útoica entšanga

mo nÿe canÿe tsmëma entsangcá jábiamama, cháftaca cánÿiñe mo canÿacá jtsemnëse. Cha chca tojanma chënga nÿetscanga tšabá chamotsiyenama;

<sup>16</sup> y Cristo cruciñe tojanóbanayeca, cha tojanma chë útoica entsanga enáyayana chamotsajbanama, y tojanma chë útoica entsanga mo canÿe entsangcá chamotsemnama, chënga tempcá tšabá Bëngbe Bëtsáftaca chamotsatsmënama.

<sup>17</sup> Cristo quem luaroye tojánabo tšabe noticiënga jabábuayenama, tempcá tšabá Bëngbe Bëtsáftaca jtsatsmënama. Cha quem tšabe noticiënga tojanabuayená tšëngaftanga chë ndoñe judiëngbioye, chë Bëngbe Bëtsá ndoñe šmonjanábuatmënga, y chë judiëngbioynaca, chë Bëngbe Bëtsá imojanábuatmënga.

<sup>18</sup> Er chábeyeca, canÿánÿenga y ínÿenga montsobena chë Taitábioye jobéconana, er bënga nÿetscanga cachca espíritu bëngbe ainaniñe mondbomna, chë Uámana Espíritu.

<sup>19</sup> Chiyeca tšëngaftanga, Bëngbe Bëtsabe entsanguentše ndoñe quešmátsmëna mo inÿe luarocana ashjajnëngcá, y ni mo cachëngbe yebnentše ndoyenëngcá, tondayama derecho ndbomnënga. Inÿetsá endmëna; tšëngaftanga derecho šmondbomna cachcá ntšamo Bëngbe Bëtsabe entsanga mondbomncá, y Bëngbe Bëtsabe básenga šmondmëna.

<sup>20</sup> Jesucristo y chabe entsanga mondmëna mo canÿe jebna yebncá. Jesucristbe ichmónënga y chë Bëngbe Bëtsabe juabna oyebuambnayënga mondmëna mo chë ndëtsbënga ndayiñe chë yebna tojtsëcuatjoncá; tšëngaftanga ošbuáchiyënga šmondmëna chë jebna yebnentša soyëngcá, y cach Jesucristo mo chë más uámana luarentše uashacuana ndëtsbecá.

<sup>21</sup> Quem más uámana luarentše uashacuana ndëtsbeñe, nÿetsca chë bëts yebnentša soyënga jtsëcuatjonana, y tsbanánoye más tmojatsjebëse, chë bëts yebnentše tsëm jebna sóynaca chiñe jtsëcuatjonana. Cachcá Cristo, mo chë más uámana luarentše uashacuana ndëtsbecá, jtsamana nÿetsca chábeñe ošbuáchiyënga cháftaca cánÿiñe mo canÿacá chamotsemnama, y ínÿengnaca cachcá chamotsemnama. Y nÿetsca ošbuáchiyënga Crístoftaca cánÿiñe mo canÿacá tmojtsemna ora, chënga jtsemnana mo Bëngbe Utabnabiama canÿe bëts yebna jebncá, chábioye jtsatschuanayama.

<sup>22</sup> Y tšëngaftanga Efesoca ošbuachiyëngbiámnaca Cristo entsama, chë inÿe chábeñe ošbuáchiyëngaftaca mo canÿe entsangcá chašmotsemnama. Y chë Uámana Espíritu bëngbe ainaniñe yojtsiyénayeca, bënga nÿetscanga cánÿiñe mondmëna, mo canÿe bëts yebncá ndayentše Bëngbe Bëtsá yoyena.

### 3

#### *Pablo Jesucristbe trabajo yojanbonÿena, chë ndoñe judiëngbeñe jamama*

<sup>1</sup> Chca, atše Pablo utamená sëntsemna, Cristo Jesusbiamá soyënga entsanga abuyayinayey causa, tšëngaftanga chë ndoñe judiëngbe tšabiama.

<sup>2</sup> Er tšëngaftanga ya cmontsamna jtsetatšëmbuama, Bëngbe Bëtsá tšëngaftangbe tšabiama juabna yobomnama; y chca, chë trabajo atše šojabonÿé, tšëngaftangbe tšabiama jamama.

<sup>3</sup> Tšëngaftángnaca cmontsamna jtsetatšëmbuama ndayá Bëngbe Bëtsá šojinÿinÿé, ntšamo cha jamama tempo tojanjuabocá, pero entsanga chca ndoñe tonjaninÿanÿé, y chë soyama ya batšatema tcbonjubuábiamama.

<sup>4</sup> Chašmojualiá ora, šmochanjátatšëmbona Cristbe soyënga šosertánama, chë tempo ndocná yonjanábuatma soyënga,

<sup>5</sup> chë tempo Bëngbe Bëtsá ndocnábioye tbonjaninÿinÿé soyënga; pero mora cha tojinÿanÿé, Jesucristbe ichmónënga nÿe Bëngbe Bëtsabiamá oservénëngbioye y Bëngbe Bëtsabe juabna oyebuambnayëngbioye; y cha chca tojama chabe Uámana Espíritoftaca.

<sup>6</sup> Ndayá tempo Bëngbe Bëtsá ndoñe tonjaninÿanÿecá mëntsá endmëna: chë ndoñe judiënga Jesucristbe tšabe noticiënguiñe chamojtsošbuaché ora, cachcá ntšamo chë judiënga ošbuáchiyënga Bëngbe Bëtsábiocana mochjoshachiñcá, chëngnaca chábilocana mo otocancá chë soye mochanjóyëngacñe. Chënga mo cach judiënga ošbuachiyëngcá,

Cristo mondbomna mo chëngbe mandayacá. Y chca Cristo endmëna mo bestšašca y chënga nyëtscanga mondmëna mo cachabe cuerpentša soyëngcá. Chë ndoñe judiënga ošbuáchiyënga mochanjójyëngacñe lempe ntšamo Bëngbe Bëtsá chë judiënga ošbuáchiyënga tojašebuachenacá. Chca echántsemna chë ndoñe judiëngaftaca, chënga Cristo Jesúseftaca cányiñe mo canyácá bëtsemnayeca.

<sup>7</sup> Masque ndoñe šonjanomerecena, mo ndayá cuafjatsetacá, Bëngbe Bëtsá šonjanábuayana cha jtseservénama, tšabe noticiënga entsanga jtsabuayiynayëse; y cha átšeftaca chca tojanma chabe obenánaca.

<sup>8</sup> Atše nyëtsca chë Bëngbe Bëtsabe entsanguentše sëndmëna chë más nduamaná; pero Bëngbe Bëtsá bëts pavor šontsebema, šonjalesenciá chë Cristbe bëtscá tšabe soyënga chë ndoñe judiënga jábuayenama. Chë Cristbe soyënga tša bëtscá endmëna, y chca, quenátopodena chë soyënguentšana lempe jtsabuatmana.

<sup>9</sup> Y chë trabajo šonjabonjë jamama, nyëtscanga botamana jinjama chamotsobenama ndayá Bëngbe Bëtsá yochjama, ndayá cachá, chë nyëtsca soyënga tojamá, tempšana yojanjuabnacá. Mëntscoñama Bëngbe Bëtsá chë soye ndocnábioye tbonjinjinyë, pero mora aíñe.

<sup>10</sup> Chca, Crístbeñe ošbuachiyëngbeyeca, mora chë celoca mándayënga y obenana bomnënga, chamobená juabuátmanana nyëts osertánana ntšamo Bëngbe Bëtsá yobomncá.

<sup>11</sup> Bëngbe Bëtsá chca tojama, ntšamo cachá yojanjuabnacá nyëtsca tescama jamama, y chca cha tojama Jesucrísoftaca, Bëngbe Utabná.

<sup>12</sup> Bënga Crísoftaca cányiñe mo canyácá mondmëna, y chábeñe mondošbuachéyeca, bënga montsobena Bëngbe Bëtsábioye jobéconama tondayama ntjatauatjácá, y corente jtsetatšëmbëse cha ndoñe chašondubatema.

<sup>13</sup> Chíyeca atše cbontsaïmpadana ndoñe chašmondëtsajbaná ainaniñe añemo bomnana, atše sëntsesufrina causa, er chë tšëngaftangbe tšabiama tsësufrintšana, tšëngaftangbiana tšabe soyënga endóbocana.

### *Cristbe bonshánana*

<sup>14-15</sup> Y chca, Bëngbe Bëtsá, chë Taitá, ndábentšana nyëtsca pamíllanga celoca y quem luarentše uabaina imóyëngacañe, chabe delante joshaméntšase,

<sup>16</sup> sëntseïmpadana, chabe bëtscá uámana bomnánaca chaoma, tšëngaftanga ainaniñe obenana y bëts añemo chašmotsebomnana, chabe Espíritbeyeca,

<sup>17</sup> y tšëngaftanga Crístbeñe jtsošbuáchiyëse, mua tšëngaftangbe ainaniñe chaotsiyenama. Bëngbe Bëtsánaca sëntseïmpadana, cha y ínÿenga nyëts ainánaca jtsababuánjeshanëse,

<sup>18</sup> tšëngaftanga y nyëtsca Bëngbe Bëtsabe entságnaca tšëngaftangaftaca, chašmotsobena josértama Cristbe bonshánana bëngbiana tša bëtscá yomnana. Nderado nda tojontšë chabe bonshánana jatšëmbonana mo canyë soye cuaftsemncá, cha ndocna te nanjobenaye jtsetatšëmbuana tëntšoye ndayëntscoca yomna y nyanëjoye ndayëntscoca, jashenoye ndayëntscóñe y tsbanánoye ndayëntscóñe yomna.

<sup>19</sup> Atše sëntseïmpadana tšëngaftanga chašmobená chë bonshánana juabuátmanana (chë bonshánana puerte bëtscá endmëna causa, bënga ndocna te quemochatobenaye josértama ntšamo chë soye lempe yomnana). Pero sëntseboše, tšëngaftangbe ainaniñe nyë Bëngbe Bëtsabe soyënga chaotsemna y tšëngaftanga chašmotsiyena jtsamëse, ntšamo tšëngaftanga chašmotsamama Bëngbe Bëtsá yojuabnacá.

<sup>20</sup> Y mora, nyëtscanga Bëngbe Bëtsá chamotsatschuaná. Cha obenana yobomna ntšamo bënga tmojtsojtjanañe o tmojtsejuabnama más soyënga jamama, chabe puerte bëts obenánaca; y chë obenana bëngbe ainaniñe yojtsemánda y yojtsama bënga ainaniñe sempre ošbuáchiyana chamotsebomnana.

<sup>21</sup> ¡Entšanga Bëngbe Bëtsá chamotsatschuaná nyëts tempo y nyëtsca tescama, ndayá Crístbeñe ošbuáchiyënga tmojtsamama y cach Cristo tojamámnaca! Chca chaotsemna.

## 4

*Uámana Espíritbeyeca bēnga cányiñe mo canyáca jtsemnana*

<sup>1</sup> As, atše chē cárceloye utamená, Bēngbe Utabnabiana trabájaye causa, tšēngaftanga cbontsaimpadana, ndēmuanyēnga Bēngbe Bētsá tcmojáchembo chabe entšanga chašmotsemnana, sempre chašmotsiyena mo chē entšangcá ndēmuanyēnga Bēngbe Bētsá cach soyama tojánachembo y chca imomerecena.

<sup>2</sup> Cada ona chamotsenojuabná mo chē ínýenga chabiana más uámanēnga tmojtsemncá, y nyētscángbioye puerte bonshanánaca šmochtsobátmana, y bētscá bonshánana jtsebomñese šmochtsenēuantana;

<sup>3</sup> siempre šmochtsejuabnaye y šmochtsentšena tšēngaftanga nyēts tempo cányiñe mo canyáca chašmotsemnana, nyētsca tšēngaftanga natjēmbana jtsemnēse. Y tšēngaftanga šmontsobena cányiñe mo canyáca jtsemnana chē Uámana Espíritbeyeca.

<sup>4</sup> Bēnga Jesucristbeñe ošbuáchiyēnga bétsemnayeca mondmēna mo cach cuerpentšēngcá, chē Cristbe cuerpo, y cachca Espiritu bēnga nyētscanga ainaniñe mondbomna. Bēngbe Bētsá šojáchembo, bēnga chábeñe jtsošbuáchiyēse, nyētscanga cachcá šochjátšatayama chamotsobátmanama.

<sup>5</sup> Bēnga nyētscanga cach Utabná mondbomna, cachca ošbuáchiyana Jesucristbeñe mondbomna, y bēnga nyētscanga uabáinēnga mondmēna chca betsošbuáchiyama.

<sup>6</sup> Bēnga ošbuáchiyēnga nyētscangbiana cach Bēngbe Bētsá y Taitá endmēna. Cha bēngbe amēndayá endmēna, chabe obenana nyētscángbeñe jtsinýnana, y nyētsca bēngbe ainaniñe chabe Espiritu endmēna.

<sup>7</sup> Pero bēnga, cada ona tšetana obenana tojóyēngacñe, tšabe soyēnga jamama, ntšamo Cristo jatšatayama tojanbošencá, chábeñe ošbuáchiyēnga jujabuáchama.

<sup>8</sup> Chíyeca, Bēngbe Bētsabe uabemana palabreñguñe Jesucristbiana mēntšá endayana: Cha celoye tontantsjuá, y cháftaca tonjanéyamba nyētsca chabe uayayēnga, chē tojánayēnjananga,

y chabe entšángbioye obenana tonjanatšatá, tšabe soyēnga jamama ca.

<sup>9</sup> ¿Y ndayá yojtsayana chē “cha tontantsjuá ca”? Chca entsayana co Cristo natsana, quem luaroye tojánastjango ca.

<sup>10</sup> Y Cristo, chē tojanastjanguá, cachá endmēna nda celoca chē más tsbanánoye tojtantsjuá; chca, canye ora nyētscañe cha chaotsemnana.

<sup>11</sup> Y cachá, chē tšabe soyēnga jamama obenana tojanatšatá ora, tojanma chábeñe ošbuáchiyēnguentše chamotsemna ínýengna chabe ichmónēnga, ínýengna Bēngbe Bētsabe juabna oyebuambnayēnga, ínýengna tšabe noticiēnga Cristbiana abuyayinayēnga, y ínýengna ošbuáchiyēnga anýenēnga y Bēngbe Bētsabe soyēngama abuatambayēnga.

<sup>12</sup> Cristo tojanabacacangna chabe entšángbioye mochjanējabuache, cha tojanabanýe trabajo chēnga chamotsamama, y nyētsca ošbuáchiyēnga, chē nyētscanga cányiñe mondmēna mo Cristbe cuerpcá, cada te más ošbuáchiyana y bonshánana chamotsebomnana,

<sup>13</sup> bēnga nyētscanga chamobenantscuana cachca ošbuáchiyana Jesucristbeñe jtsebomnana, y Bēngbe Bētsabe Uaquiñabiana nyētscanga lempe cachcá jtsetatšēmbuama. Chca, bēnga mochanjashjache jtsemnana lempe ntšamo Cristo yomncá, mo bētsétsanga bētscá juabna bomnēngcá,

<sup>14</sup> y ndoñe nye mo basengcá, Bēngbe Bētsabe soyēngama jtsetatšēmbuama. Chē soyēnguiñe ya ndoñe más nye mo basengcá quemochátsmēna, ndēmuanyēnga paselo jáingñama yomna. Mo canye barquēsha nye ndaye bínýiacnaca tojtsēyambancá, básefta entšanga nye ndaye buatēmbana soye tmojatuencá jatsyeunanana; bēnga ndoñe chca quemochátsmēna, ya ndoñe más bēngbe juabna quemochatstróca, nye ndaye tmojatuena tsēm sóyeca, ínýengbioye áingñayēnga. Chēnga becá montsetátšēmba ntšamo entšanga jáingñana, y montseboše chē montsabuatambá bostero soyēnga bēnga jtseyeunanama.

15 Chamna, chë Bëngbe Bëtsabe ndegombre soyëngama bonshanánaca jtsóyebuambnayëse, šontsamna jashjáchana jtsemnama lempe ntšamo Cristo yomncá. Cha bëngbe amëndayá endmëna, cachcá ntšamo bestšaše chë cuerpentša soyënga jtsemandayancá.

16 Mo canye bestšašcá, chëse jamana nyetsca chë cuerpentša soyënga ndayentše chamueneftnama y chiñe jobónjuama chamotsobenama, chë cuerpo saná chaotse-bomnama jtsamëse, chca, nyets cuerpo tšabá chaóbochema, cachcá Cristo, chë nyetsca ošbuáchiyëngbe amëndayá, chabe obenánaca jamana chënga cada te más ošbuáchiyana y bonshánana chamotsebomnama. Cada cuerpentša soye tojtsama ntšamo chë soye chaotsamama tomncá, as nyets cuerpo tšabá jobóchana; cachcá, ošbuáchiyënguentše cada ona tojtsama ntšamo jamama tbojtsemncá, as nyetsca ošbuáchiyënga cada te más ošbuáchiyana mochántsebomna, puerte jtsebobonshánëse.

*Crístoftaca cányiñe mo canyácá jtsemnëse tsëm vida šmochtsebomna*

17 Mëntšá entsemna ntšamo cbontsëtsësnacá, y Bëngbe Utabná endmëna nda tojama atše mando chaitsebomnama tšëngaftanga chca jáuyanama: Ndoñe más šmattsiyena bacna soyënga jtsamëse, mo chë Bëngbe Bëtsábioye nduabuátmënga mondbetsamcá; chënga jtsiyenana jtsamëse ntšamo cachëngbe ndoservena juabnënga tojtsamëndacá.

18 Chëngbe juabnoca obenana mondbomna nye ndoñe ndegombre soyëngama josértama. Chënga ndoñe quemátsbomna chë Bëngbe Bëtsábioyana yóbocana tšabe vida, er chënga ndoñe quematsleséncia chë Bëngbe Bëtsabe soyënga chëngbe ainaniñe chaómashënguama; y chca endmëna, er chënga tmojajuabó y tmojama chë Bëngbe Bëtsabe buayenana soye chëngbe ainaniñe tondaye chaondómashënguama.

19 Chënga bacna soyënga tmojtsama ora, tondayama ntsenócochinýenana; chënga nyets tempo jesentšénana nyetsca bacna soyënga amana, y chca jtsamana tondayama ntjateno-juabnycá.

20 Pero chca ndoñe quenjatsmëna ntšamo tšëngaftanga Cristbe soyëngama šmojanatsjinýe y ntšamo chábioye šmojanabuatmancá.

21 Ndegombre tšëngaftanga chabiamana šmojanuena y ínýenga tcmojanabuatambá mo chábëne ošbuachiyëngcá y ntšamo chë ndegombre soyënga Jesucristbeñe endbinýncá.

22 Chcasna, ntšamo tšëngaftanga šmojanjuabná, šmojansentina y šmojanamcá Jesucristbeñe cabá ndošbuachená ora, mora lempe stëtsoye šmochjaquéda; ntšamo tempo tšëngaftanga šmojanjuabná, šmojansentina y šmojanamcá, canye ondbiamnaye juabnentšana yojóbocana, tšëngaftanga bacna soyëngama juabnëngaca mandánënga jtsemnëse, y chë juabnënga tšëngaftangbioye cmojáaingñaye.

23 Tšëngaftanga cmontsamna tšëngaftangbe juabniñe tsëm y tšabe juabnënga jtsebonnana.

24 Tšëngaftanga cmontsamna jashjáchana mo tsmëma entšangcá jtsemnama, y chë ntšamo tempo šmojanamcá mora ndoñe cachcá chašmondétsamama. Chca, tšëngaftanga šmochanjashjache jtsemnama ntšamo Bëngbe Bëtsá yomncá. Bëngbe Bëtsá chca tsmëma entšangcá tcmojábiamana, tšëngaftanga chašmotsiyenama jtsamëse Bëngbe Bëtsabe bominýiñe tšabá yomna soyënga y chábioye jadórana soyënga, chë ndegombre soyënguentšana óbocana soyënga.

25 Chcasna, ya ndoñe más šmattsebostero, ndayá cada ona cháuayana ndegombre soyënga cachacá Jesucristbeñe ošbuachiyáftaca, er nyetscanga cányiñe mondmëna mo nye canye entšangcá.

26 Nderado chacmojetëna, tcmojetëna causa ndaye bacna soye ndoñe šmatjama. Pero ndoñe šmatjaleséncia bënama chacmetëna y ndoñe nyets te chacmondetëna.

27 Ndoñe šmatjaleséncia Satanás ndayánaca tšëngaftangaftaca chaomama.



<sup>28</sup> Chë yojanatbëbaná chauajbaná atbëbanama y jatrabájama chaontsé; cachabe cucuatseca tšabe trabajo chaotsóboma, chca, ndayánaca cha chaotsebomnama chë ujabótënga jatšatayama.

<sup>29</sup> Bacna palabrënga ndoñe šmattsichamo, pero aínne tšabe palabrënga y nÿa chorsca uajabótama palabrënga, chë inÿe entšangbioye jujabuáchama más Cristcá chamotsemnama, chënga Bëngbe Bëtsábocana tšabe bendicionënga chamóyëngacñama, chë ndayá chašmojtsëtsëtsná sóyeca.

<sup>30</sup> Ndoñe šmattsama soyënga, Bëngbe Bëtsabe Uámana Espíritu chabongmema. Bëngbe Bëtsá tojama Uámana Espíritu tšëngaftangbe ainaniñe cháumashënguama, y chca, tcmojanainÿnaná chabe entšanga bëtsemnayeca, chë yochjóshjango tescama, Bëngbe Bëtsá chabe entšanga nÿetsca tescama yochjatsebacaye orscama.

<sup>31</sup> Inÿengbiamama bacna juabnënga ainaniñe ndoñe chašmondëtsebmoma, etonánënga ndoñe chašmondëtsemna, ni inÿëngaftaca ndoñe chacmondetëna. Inÿëngbioye ndoñe chašmondëtsabuachembuana, inÿëngbioye ndoñe šmatjoyánguango y ndaye bacna sóynaca ndoñe šmattsama.

<sup>32</sup> Nÿetscángaftaca tšábënga šmochtsemna, nÿetscanga šmochtsenlastemana y šmochjenperdóna, ntšamo Bëngbe Bëtsá, Crístbeyeca tcmojaperdonacá.

## 5

### *Ntšamo yomna Bëngbe Bëtsabe básënga chamotsiyenama*

<sup>1</sup> Tšëngaftanga, Bëngbe Bëtsabe bonshana básënga quetsomñecá, nÿa šmochtsentšëna cachacá jtsemnama.

<sup>2</sup> Smochtsiyëna nÿetsca soyënga bonshanánaca jtsamëse, ntšamo Cristo šojanababuanÿeshancá; chca, cha chabe derecho vida jtsobomñama cachcá tojanonÿá y bëngbiamama tojanóbana. Y ntšamo Cristo tojanmcá, yojamna Bëngbe Bëtsábioye jëtschuayama, y chabe bominÿiñe tša tšabá yojtsemna, mo ndaye ora Bëngbe Bëtsá oyejuayá jóyëngacñana ndayá tcojóba y altaroca tcojajuinÿese, y chë soye botamana jtsonguëtsiyana.

<sup>3</sup> Tšëngaftanga, Bëngbe Bëtsábënga šmomnënga, ndoñe quecmátamna shembása o boyabásaftaca bacna soyënga jtsamana, ni chca játamama jtsejuabnayanana y jtsebošana, y chë nÿe yapa jésebošana más soyënga inÿengbiamama jtsebmomnama cach ndoñe. Ni chë soyëngama ndoñe šmattsóyëbuambnaye.

<sup>4</sup> Bacna soye ndoñe šmattsóyëbuambnaye, ni corente ntjenojuaboycá, ni nÿe ntšámnaca bacna soye jenbotatšëmbonana cach ndoñe, er chë soyënga tšëngaftangbiamama ndoñe tšabá ntsemnana. Chca játamamna, más tšabá, Bëngbe Bëtsá šmochtsatschuanaye.

<sup>5</sup> Er tšëngaftanga ya šmondëtatšëmbo, ndocna chë shembása o boyabásaftaca bacna soye amá, ndocna chë nÿe chabe bacna juabnëngaca soyënga jtsamama oyená, o chë nÿe más soyënga inÿengbiamama jtsebmomnama bošá y amá (chca jtsayanana chabiamama más iuámana soyënga jtsebmomnama, Bëngbe Bëtsábioye jatsbobonshánama), chca amënguentšana ndocná tondaye queochatóyëngacñe ndayá Bëngbe Bëtsá chabe entšangbioye jatšatayama tojašëbuachenantšana, Cristo y Bëngbe Bëtsabe amëndayoca.

<sup>6</sup> Ndocná chacmondaingñe ndoñe ndegombre tondmëna palabrëngaca, bacna soyënga chašmotsamama, er chë causa chë uabouana castigo echanjobaye, ndáyeca Bëngbe Bëtsá chábioye ndëyeunanënga yochjácastigaye.

<sup>7</sup> Chíyeca, chca amëngbe soyënga tondaye šmattsama.

<sup>8</sup> Tempo tšëngaftanga šmojaniyëna bacna juabnënga jtsebmomnëse y bacna soyënga jtsamëse, mo ibetiñe cuaftsiyencá, pero mora Bëngbe Utabnáftaca cánÿiñe mo canÿacá bëtsemnayeca, chabe soyënga šmontsetátšëmbo y sempre šmondëtsemna cháftaca, chë entšangbe juabnënga binÿnayáftaca. Smochtsiyëna jtsamëse mo chë binÿnayabe entšangcá.

<sup>9</sup> Chë binÿnayábeyeca entsanga tšabe soyënga jtsamana, chë Bëngbe Bëtsabe bominiñe tšabá yomna soyënga, y ndegombre soyëgnaca.

<sup>10</sup> Nÿa šmochtsentšena soyënga jamama, Bëngbe Bëtsá oyejuayá chaotsemnana.

<sup>11</sup> Chë mo ibetiñe cuaftsiyencá oyenëngbe bacna soyënga tondayama ntoservénana, y tšëngaftanga chca ndoñe šmattsama. Chamna, chëngbioye šmochjinÿanÿiye chënga ndoñe tšabá tmonjamama.

<sup>12</sup> Ndegombre, ñe chë ndayá chënga mo iytëmencá tmojamama jóyebuambayama ya cuantsëuatja;

<sup>13</sup> pero ñyetsca soyënga binÿniñe tmojacjá ora jtsopodénana tšabá jinÿama ntšamo ndegombre tomncá. Cachcá, ntšamo entsanga tmojamcá chë binÿnayá chaojinÿanÿé ora, echantsopodena jtsotatsëmbuama ntšamo chë soyënga yomnana;

<sup>14</sup> er ndayánaca binÿniñe tojtsinÿinÿena, jtsopodénana jinÿama ntšamo ndegombre chë soye tomncá. Cachcá, ntšamo entsanga iytëmencá tmojtsamcá chë binÿnayá chaojinÿanÿé ora, chënga mochántsetatsëmbo bacna soyënga imojtsamama. Chíyeca mëntšá jtsichámuana:

Botamana cochjájuaboye, aca ndoñe quecátobena jenomándana, mo canÿa cuaftsomañcá; chë bacna soyënga ama causa, Bëngbe Bëtsabe bominiñe mo obanëngcá imomnënguentšana šmochtsojuánañe, y Cristo acbe juabnënga echantsebínÿnaye ca.

<sup>15</sup> Chcasna, šmochtsantješna ntšamo tšabá yomncá jtsamëse chašmotsiyenama. Ndoñe šmattsiyena jtsamëse, mo chë Bëngbe Bëtsabe soyëngama ndosertanëngcá, pero añe chë chca soyëngama osertanëngcá.

<sup>16</sup> Lempe ntšamo chašmojobenacá ñyets tempo tšabe soyënga šmochtsama, er quem tempo entsanga yapa bacna soyënga montsama.

<sup>17</sup> Ntjenojuaboycá ndoñe šmattsama, mo chë ndosertanëngcá. Pero añe bëtscá šmochtsentšena ndayá Bëngbe Utabná jamama yobošcá chacmósertama.

<sup>18</sup> Ndoñe šmattsótmenaye, er chë soye entsábioye juanatsana jenomándama ndoñe chaondëtsobenama; chamna, šmochjama Uámana Espíritu sempre y bëtscá tšëngaftangbe ainaniñe chaotsemándama.

<sup>19</sup> Šmochjenatsëtsaye Salmos librëšañe enduábemana cantënga jacántase, Jesucristbe soyëngama cantëngaca y chë Bëngbe Bëtsabe Espíritu inétsama tšëngaftanga chašmotsobena jacántama soyëngaca; chca, ñyets ainánaca Bëngbe Utabnabiamama šmochjacántaye y cha šmochtsatschuanaye.

<sup>20</sup> Nÿets tempo y lempe ntšamo cha tojamama Bëngbe Bëtsá chë Taitá šmochtsatschuanaye, Bëngbe Utabná Jesucristbiajana.

### *Ntšamo yomna canÿe yebnentšënga chamotsemnana*

<sup>21</sup> Nÿetscanga šmochtsenëyeunana, tšëngaftanga Crístbioye puerte šmorrespetánayeca.

<sup>22</sup> Shémanga, šmochtsetátšëmbo tšëngaftangbe boyanga chë yebnentša mándayënga imomnana; y ñyets tempo chca šmochtsama, Bëngbe Utabná chašmotsobedecénama.

<sup>23</sup> Er boyá endmëna shembe mandayá y inÿená, ntšamo Cristo chë ošbuáchiyëngbe mandayá y inÿená endmëncá. Cha chënga tojatsebacá y mora cha chënga entsamënda, mo chë bestšaše ñyets cuerpo jtsemandayancá;

<sup>24</sup> y chca, ntšamo chë ošbuáchiyënga, Cristo chëngbe amëndayá yomnana imotatsëmbcá y chca jtsamana, cachcá, chë shemángnaca entsamna jtsemnana ñyetsca soyënguiñe chëngbe boyángaftaca.

<sup>25</sup> Boyanga, tšëngaftangbe shémanga šmochtsababuánÿeshana, ntšamo Cristo chábeñe ošbuáchiyënga yojanababuanÿeshancá, y chca, chabe derecho vida jtsobomñama cachcá tojanonÿá y chëngbiamama tojanóbana.

<sup>26</sup> Chca tojanma, chënga chabe entsanga y puerte tšábënga jábiamama; y chënga tmojánenabaye ora, tmojaninÿanÿé Bëngbe Bëtsá chëngbe bacna soyënga tojánabuajuanama,

y chabe delante tšábenga chamotsemnama cha tojanmama. Cha chca tojanma, er chënga chábeñe imojtsanošbuaché, chabiamana buayenana soyënga tmojanuena ora.

<sup>27</sup> Cha chca lempe tojanma, chë ošbuáchiyënga japróntayama corente tšábenga y uámanënga cachabiamana chamotsemnama, ndocna bacna soye ndbomnënga, ni ndocna entšá chaondobená jayanama chënga imomna chë ndoñe tšabá tmonjamënga ca, ni ndocna inye cachca sóyeca.

<sup>28</sup> Ntšamo canye boyá cachabe cuerpo endbetsebobotshancá, cachcá cha bontsemna chabe shémbioye jtsebobotshánana. Nda chabe shémbioye tbojtsebobotshana, cachábioye jtsebobotshánana, er chata cányiñe jtsemnana mo nye canye entšá cuenta.

<sup>29</sup> Er ndocná cachabe cuerpo jtsáboyënjana, ndayá saná janguangoñana y jtsinjenana, ntšamo Cristo bënga chë ošbuáchiyëngaftaca endbetsamcá;

<sup>30</sup> er bënga nyetscanga cányiñe mondmëna mo chabe cuerpo cuaftsemncá, y bënga mo chabe cuerpentša soyënga cuaftsemncá.

<sup>31</sup> Ntšamo Bëngbe Bëtsabe uabemana palabrenguiñe endayancá: “Chíyeca, boyabása chabe taitá y chabe mamá echanjésabashejuana chabe shémaftaca jenútanama, y chë útata mo canyáca bochantsemna ca.”

<sup>32</sup> Chë soyënga josértama puerta totcá comna, pero atše šcuayana, chë soye entsoye-buambná ntšamo Cristo chábeñe ošbuáchiyëngaftaca yomnama.

<sup>33</sup> Pero morna, tšëngaftanga cada ona cachabe shémbioye chabotsebobotshana, ntšamo cachá iuenobobotshancá, y shema boyábioye ndoñe stëtsoye chabondëquedá.

## 6

<sup>1</sup> Básenga, Bëngbe Utabnáftaca cányiñe mo canyáca bëtsemnayeca, tšëngaftangbe bëtšëtsangbioye šmochtsayaunana, er chca jamana tšabá endmëna.

<sup>2</sup> Moisesbe leyiñe canye mando endmëna, y chentše endmëna chë Bëngbe Bëtsabe natsana mando, ndayentše cha tojašbuachená tšabe bendicionënga jamama: “Acbe taitá y acbe mamá ndoñe stëtsoye catjéftsaquédaye,

<sup>3</sup> tšabe vida chacuetsobomñama y quem luarentše bayté chacuetsiyenama.”

<sup>4</sup> Taitanga, ndoñe šmattsama tšëngaftangbe básenga chauetënama; más tšabana, chënga šmochtsabëchaye jtsabuátambayëse y jucacánëse, ntšamo Bëngbe Utabná endbetsabu-atambaycá.

<sup>5</sup> Tšëngaftanga, chë nyets tempo nye inyabiamana oservénënga, tšëngaftangbe nduiñënga šmochtsayaunana; chca šmochtsama puerta respétoca, bëtscá cuedádoca y nyets ainaniñe tšabe juabnëngaca, mo cach Crístbioye cuaftseservencá.

<sup>6</sup> Y chca chë nduiñëngbioye šmochtsaserverna, ndoñe nye chënga chacmojtsënña ora, mo nda nye entsangbe delante tšabá joquédama cuaftsebošcá, ndayá Cristbe oservenëngcá, chënga nyets ainánaca jtsamana ntšamo Bëngbe Bëtsá tojtsebošcá.

<sup>7</sup> Nyetsca trabajotëmënga šmochtsama nyets tšëngaftangbe añémoca, mo Bëngbe Utabnabiamana cuaftsetrabajacá, y ndoñe nye entsangbiamana.

<sup>8</sup> Er tšëngaftanga ya šmondëtatšëmbo, cada ona, nyets tempo nye inyabiamana trabajayá o nye cachabiamana trabajayá tomna, ntšamo tšabe soyënga tojamcá Bëngbe Utabnábiocana yochjójyëngacñe.

<sup>9</sup> Y tšëngaftanga, ndëmuanyëngbiamana inyënga nyets tempo imoserverna, cachcá tšabá chëngaftaca šmochjamna, tondayama ntsaútatjnyëse. Smochtsenójuabnaye, Bëngbe Utabná chë celoca endmëná, tšëngaftanga y chëngbe mandayá yomnama, y chabiamana nyetscanga cachcá monduámamana.

*Ndayá Bëngbe Bëtsá entsanga tojatsatá Satanasbiamana jenëuyanama*

<sup>10</sup> Y morna, Bëngbe Utabnáftaca cányiñe mo canyáca jtsemnëse, ainaniñe bëtš añemo šmochtsebomna, chë Bëngbe Utabnabe bëtš obenanentšana óbocana añemo.

11 Mo canye soldadca, ba soyenga jtochëtjuana chë tmojtsentsjananga ora uayayëngbiana jenëuyanama, tsëngaftángnaca cachca, nyetsca chë Bëngbe Bëtsá cmojatšatá soyëngaca šmochtseprontana jenëuyanama, tsëngaftanga jáingñama Satanás ntšámnaca tojtsama ora, ndoñe chacmondáyënjanama.

12 Er bënga ndoñe quemuatenojuerzana cach quem luarentša entsángaftaca jenëyënjanama, ndayá bacna espíritënga mando bomnëngaftaca; bacna espíritënga obenana bomnëngaftaca; y quem luarentša entsanga, chë bacna juabna bomna causa y Bëngbe Bëtsabe soyënga nduabuatma causa, mo ibetiñe cuaftsoyencá oyena entsángbioye amëndaye espíritëngaftaca; y chë tsbanánoca luarënguñe imomna y bacna soyënga chaotsebínynama ama espíritëngaftácnaca.

13 Chiyeca, lempe ntšamo Bëngbe Bëtsá cmojatšatacá šmochjójyëngacñe y chë soyënga jtsamëse šmochtsiyena jtseprontánama, mo canye soldado jenëuyanama y jáyënjanama bëtsca soyënga tojtochëtjca. Chca šmochjama, chë uayayá Satanás tsëngaftangbioye jáingñama chaojtsama ora ndoñe chacmondáyënjanama, y jenëuyanama lempe jtsamëse, chašmobená cha jayënjanama.

14 Mo canye soldadca, jabuache jtasnayana y cochaca canye morocho soye jenácochjatsana jtsevalentiana y ndoñe chamondëyënjanama, tsëngaftángnaca cachca, ntšamo ndegombre yomncá jtsamëse šmochtsiyena, mo chë jabuache cuaftasnacá, y chë Bëngbe Bëtsabe bominyiñe tsabá yomna soyënga jtsamëse, mo chë morocho soye cochaca cuaftjenacochjatsca, chca, Satanás tsëngaftangaftaca tondaye chaondobená jamama.

15 Mo canye soldadca jtoshëcochëtjuana betesco jobónjuama jtseprontánama, tsëngaftángnaca cachca, Bëngbe Bëtsabe obenánaca sempre šmochtseprontana jtsabuayiyayama ntšamo Bëngbe Bëtsá inétsama entsanga tempcá tsabá cháftaca chamotsatsmënama.

16 Canye soldado escudo jtsebomnana chë uayayabe uajuinýinýana flechëjuangá chabe cuerpiñe ndoñe chaonduámashënguama. Cachca, tsëngaftanga cmontsamna Jesucristbeñe puerte jtsošbuáchiyana, mo escudo cuaftsebomncá, chca, chë bacna soyënga mandayá Satanás tsëngaftangaftaca tondaye chaondobená jamama, tsëngaftangbe ošbuáchiyana jabuajuánama cha tojtsama ora.

17 Mo chë soldadca, canye morocho buchtsanëse tojtabuchëtsëse chabe bestšaše jenëuyanama, tsëngaftángnaca cachca, sempre šmochjésejuabnaye Bëngbe Bëtsá cmojatšebacama, y chë juabna cmochanjújabuache, mo canye morocho buchtsanëse cuaftsabuchëtsancá. Mo canye soldadca, chë uayayábioye jayënjanana, chabe espadëjaca japéliase, cachca tsëngaftanga, Bëngbe Bëtsabe palabra šmochtsóyebuambnaye Satanás jayënjanama. Uámana Espiritu jtsamana, tsëngaftanga Bëngbe Bëtsabe palabra chašmotsebomnana.

18 Nyets tempo chë Uámana Espiritbe uajabuáchenanaca Bëngbe Bëtsáftaca šmochtsencuëntaye, lempe ntšamo Bëngbe Bëtsáftaca jencuëntama yomncá y chábioye jtseimpadánëse. Yëjuana šmochtsenójuabnaye ntšamo šmojtsichámuama, Bëngbe Bëtsáftaca chašmojtsencuënta ora, y chca šmochjama Bëngbe Bëtsábeñe sempre jtsobatmanëse, y Jesucristbeñe ošbuáchiyëngbiana nyetscangbiana cha šmochtseimpadana.

19 Atšbiámnaca Bëngbe Bëtsá šmochtseimpadana, atše jóyebuambayama chaijontsé ora, cha chë buayenana soye chašúyanama; y atše chayobená tondayama ntjatauatjca jóyebuambayana, y chca, entsanga chayinýanyé Jesucristbiana tsabe noticiënga, ndayá chënga tempo ndoñe monjántatšëmbo.

20 Bëngbe Bëtsá šojichmó mo canya chabe cuenta oyebuambnayacá, chë buayenánama entsángbeñe jóyebuambayama, y chca bëtsamama, mora atše utamená sëntsemna.

Atšbiamá Běngbe Bětsá šmochtseimpadana, atše chayobenama Cristbe buayenánama tondayama ntjatauatjca jóyebuambayana, ntšamo atše jamama šojtsemncá.

*Pablo chěnga jtadiósoftanama*

<sup>21</sup> Tíquico, Jesucristbeyeca běngbe bonshana catšata y canye entšá tšabe palabra bomná, Běngbe Utabnabe trabajo jamama oservéniñe, ntšamo atše stsemnama y ndayá stsamama tšěngaftanga chašmotsetatšěmbuama, lempe cmochanjácuntaye.

<sup>22</sup> Chama cha tšěngaftangbioye sěnjichmó, ntšamo muentše fstsemnama chacmėyanama, y tšěngaftanga ainaniñe añemo chašmotsebomnama chaomama.

<sup>23</sup> Atše sěntseimpadana Běngbe Bětsá chě Taitá y Běngbe Utabná Jesucristo, chaboma chě Jesucristbeyeca catšátangbe ainaniñe tšabe ebionana chašmotsebomnama, y Běngbe Bětsábioye y ínĵengbioye puerte chašmotsababuánĵeshanama, Jesucristbeñe tšěngaftangbe ošbuachiyánaca;

<sup>24</sup> y chaboma, chě Běngbe Utabná Jesucristbioye běts bonshanánaca imobobonshanéngbeñe tšabe bendicioněnga chaotsemnama, canye ndocná yondobena jatrócama bonshanánaca.

## Filipenses

### *Jacheuayama*

<sup>1</sup> Pablo y Timoteo, Jesucristbiamá oservénata, quem tsbuanácha fsèntsabiamná Filipos bèts pueblóca Bèngbe Bètsabe entšanga imomnènga, y Jesucrísoftaca cánÿiñe mo canÿacá imomnèngbiama. Fsèntsabiamná nÿetsca chë Jesucrístbeñe ošbuáchiyèngbiama, nÿetsca chentša uanatsanèngaftaca y chë inÿe ošbuáchiyènga ujabuáchaniñe trabajayèngaftaca.

<sup>2</sup> Atše sèntseimpadana Bèngbe Bètsá Bèngbe Taitá y Bèngbe Utabná Jesucristo, chaboma tšèngaftangbeñe tšabe bendicionènga chaotsemnama, y chaboma tšèngaftanga ainaniñe tšabe ebionana chašmotsebonnama.

### *Pablo Bèngbe Bètsábioye tbojtanchuá ošbuáchiyèngbiama*

<sup>3</sup> Cada tšèngaftangbiama stenojuabó ora, Bèngbe Bètsá tšèngaftangbiama sèndbètsatschuanaye;

<sup>4</sup> y Bèngbe Bètsá tšèngaftangbe tšabiamá stseimpadana ora, atše corente oyejuayá chca sèndbètsama,

<sup>5</sup> ntšamo tšèngaftanga atše šmojuájabuachama, tšabe noticiènga Jesucristbiamá entšanga abuayiynayiñe, tšèngaftanga Jesucrístbeñe jtsošbuáchiyama šmonjanbojatsé orscana y mèntscoñama.

<sup>6</sup> Atše corente sèntsetatšëmbo, Bèngbe Bètsá tojanbojatsé tšèngaftangbe ainaniñe tšabe soyènga jtsamama, y más tšabe soyènga yochtsamama. Y chca yochtsama, lempe ntšamo tšèngaftangbiama cha yojtsejuabnacá chaochnènguèntscuana, y chca, Cristo Jesús yochjésabèntscuana.

<sup>7</sup> Atše tšèngaftangbiama sempre ainaniñe sèndbètsenojuabnaye, chíyeca atšbiamá puerte tšabá entsemna chca tšèngaftangbiama jtsejuabnayana. Tšèngaftanga nÿetscanga atše šmonjuájabuache jamama chë Bèngbe Bètsá tša tšabia bétsemnayeca šonjanèntšabuaché trabajo. Atše chë Bèngbe Bètsabe trabajo sèndbomna jamama, mora sèntsétámena ora o natjèmbana shjoca stsana ora, nÿetscángbioye tšabá inÿinÿayiñe chë tšabe noticiènga ndegombre soyènga bétsemnama, y bètscá amiñe entšanga chë soyènguiñe corente chamotsošbuáchema.

<sup>8</sup> Bèngbe Bètsá yotátšëmbo ntšamo sèntsichamcá ndegombre bétsemnama. Atše tša sèntseboše tšèngaftanga jányama y cbontsababuanÿeshana cachcá ntšamo Cristo Jesús atše šondbobonshancá.

<sup>9</sup> Atše, Bèngbe Bètsá sèntseimpadana tšèngaftanga cada te más cha chašmotsebobonshánama y chë ínÿengbioynaca, chca, osertánana chašmotsebonnama ndayá chë ndegombre soye bétsemnama jtsetatšëmbuama, y chašmotsetátšëmbo ndayá tšabá o ndayá ndoñe tšabá tondmènama;

<sup>10</sup> y chca, chašmotsobena sempre jabocacayama chë puerte tšabá yojtsemna jamama soye. Chca, Cristo yochjésabo ora, tšèngaftanga puerte tšabe vida šmochántsebonna, bacna soyèngaca ndèmandánènga; y tondaye quešmochátama, chora chë entšanga chca ndoñe tšabá quenátsmèna ca chamuátichamuama.

<sup>11</sup> Y lempe ntšamo chašmojtsamcá ndegombre tšabá echántsemna, y nÿe Jesucristo endobena jamama entšanga chca chamotsamama. Nÿetsca chë tšabe soyènga echántsemna, Bèngbe Bètsá puerte bètsá y uamaná bétsemnama jinÿanÿiyama.

### *Atšbe vida endmèna Cristo jtseservénama*

<sup>12</sup> Jesucrístbeyeca atšbe catsátanga, atše sèntseboše tšèngaftanga chašmotsetátšëmbo, ntšamo atše tijapasama, más bètscá entšanga Jesucristbiamá tšabe noticiènguiñe chamotsošbuáchema tojoservema.

13 Chca, nyetsca chë romanëngbe mandadbe bëts yebna bojanýá soldadënga y chë inýe entsanga quem luarentse montsetatšëmbo atše utamená stsemna, atše Cristbiana tstrabája causa.

14 Atše utamená sëntsemnayeca, ošbuáchiyënguentsana banga ainaniñe más añemo montsebmna, y chíyeca chënga Bëngbe Bëtsabe palabra más y más añémoca y tondayama ntjatauatjca entsángbioye montsabuayiyná.

15 Ndegombre entsemna, báseftanga Cristbiana entsángbioye imojtsabuayiyná, pero chëngna nýe ntšamo tijashjachcá šmojtsántšabošama chca, y chënga imojtseboše, bëtscá jtsamëse, atše chayotjáyanama; chíyeca chca imojtsama. Pero ínýengna, entsángbioye montsabuayiyná tšabe soyënga ínýengbiana jamama ndegombre imojtsebóšeyeca.

16 Mënga chca montsama, atše šmondobonshánayeca y Bëngbe Bëtsá chë trabajo šojanëntšabuáchema mondëtatšëmboyecá, Jesucristbiana tšabe noticiënga ndegombre bëtsemnana entsanga jtsinýanýnáyana;

17 pero chë ínýengna chca imojtsama, ndoñe tšabe soyënga ínýengbiana imojtsebóšeyeca, ndoñe chënga chë ínýengbiana tšabe soyënga imojtsebóšeyeca. Chënga Jesucristbiana imojtsoyebuambná nýe entsanga chënga chamotsarrespetánama, y nýe cachëngbiana tšabe soyënga jtsebmnama imojtsebóšeyeca. Chënga jtsejuabnáyana mochjobenaye jamama atše más chašotsengménama ca, muentše utamená chjëftsemnëntscuana, chënga entsángbioye chca tmojtsabuatambá ora.

18 Pero ¿ndayase chë soye atšbiana? Masque ntšámnaca, tšabe soyënga ínýengbiana tmojtseboše o ndoñe, Cristbiana montsoyebuambná, y Cristbiana chënga montsoyebuambnama atše oyejuayá sëntsemna.

Y cabá más chanjóyejuaye,

19 er atše sëntsetatšëmbo quem utámenentsana atše chjësebocnama. Atše sëntsetatšëmbo muentšana chjësebocnama, tšëngaftanga Bëngbe Bëtsá šmoimpadánayeca y Jesucristbe Uámana Espiritu šujabuachánayeca.

20 Atše corente jtsošbuáchiyëse Bëngbe Bëtsábeñe sëndobátmana, atše ndocna te tondaye chanjëftsema y chama chjaisëuatjama, pero aiñe nyetscangbe delante becá añémoca chayoyebuambá, y nyets tempo pero más mora, lempe ntšamo stsamama y stsihámuama, atše chaima entsanga chaminýanýema Cristo puerte bëtsá y uamaná bëtsemnana, y chca chántsama masque ainá o obaná chaitsemnëse.

21 Chca entsemna, er atšbe vida Cristo jtseservénama endmëna, y nderado atše chajjóbanëse, nyetscanga puerte bëts soye mochanjëftsashjache.

22 Pero atše ainá stsemnëse, chanjobenaye más uámana trabajo Cristbiana jëftsemama. Chíyeca, atše ndoñe corente quetsátstatšëmbo ntšamo mora jobuáyanana, ainá jtsemnana o ndoñe.

23 Ndegombre mora puerte šontsëtëmnana ntšamo jobuáyanana: atše tša sëndboše ndoñe más quem luarentse ntjëftsemnana, Crísoftaca jtsatsmënana, y ndegombre chca atšbiana puerte tšabá nántsemna;

24 pero, ínýoicana tšëngaftangbiana šontsemna ainá jëftsemnana.

25 Atše corente sëntsetatšëmbo chca ndegombre yochtsemnana, y chíyeca sëntsetatšëmbo atše cabá ainá chjëftsemnana, tšëngaftanga jujabuáchama más Jesucristbeñe chašmotsošbuáchema, y chiñe bëtscá oyejuayana chašmotsebmnama.

26 Chca, atše tšëngaftanga jutsëtsayama choye chajjá ora, chašmobená inýe soyama más Cristo Jesús jëtschuayama.

27 Morna, chë más uámana soye entsemna, tšëngaftanga chašmotsama ntšamo jt-siyenama ntšamo chë Cristbiana tšabe noticiënguiñe endayancá. Y mëntsá, cachcá, jutsëtsayama chajjá o ndoñe, atše chántsetatšëmbo tšëngaftanga Jesucristbeñe ošbuáchiyama ndoñe šmontsajbanama, y aiñe becá ošbuáchiyana chábeñe šmotsobomñama; nyetscanga cachcá šmojtsejuabnáyeca y nyetscanga cach soye šmojtsebóšeyeca, cánýiñe nyetscanga

enutanánënga jtsenojuerzánëse, ndocná chë tšabe noticiënguifne tšëngaftanga šmobomna ošbuáchiyana chacmondábuajuanama.

<sup>28</sup> Tšëngaftangbe uayayëngbiama tondayama šmattsauatja, sempre bëtscá añemo šmochtsebomna. Chca tšëngaftanga šmochanjínjányiye chënga pochocánënga mochtsemnama, y tšëngaftangna atsebácanënga šmochtsemnama. Y chë soye Bëngbe Bëtsá tšëngaftangbiama echántsama, Crístbeñe šmošbuachéyeca.

<sup>29</sup> Chca echanjopása, er Bëngbe Bëtsá tšëngaftangtafaca puerte tšabia endmëna, Cristbiama oservénënga Bëngbe Bëtsá tcmojábiamana, pero ndoñe nje chábeñe chašmotsošbuáchema, ndayá chabiamana chašmosufrímnaca.

<sup>30</sup> Tšëngaftanga y atše cachca soyama montsenojuerzana. Tšëngaftanga ya šmonjinjyë ntšamo atše sënjánenojuerzana, entšanga jinjányiyama chë tšabe noticiënga ndegombre soyënga bëtsemnama. Y mora, tšëngaftanga noticiënga šmochanjóyëngacñe ntšamo atše cach soyama cachcá stsamama.

## 2

### *Ndoñe uámanënga šmattsenobiamnaye, ntšamo Cristo ndoñe tonjanmcá*

<sup>1</sup> Tšëngaftanga, Cristoftaca cánjiñe mo canjácá jtsemnëse, ainaniñe bëtscá añemo šmontsebomna. Cristo cmondábabuanjyëshana, y chë soye tšëngaftanga cmontsëjabuachana njetsca trabajënguentsana tšabá jabocanama. Y tšëngaftanga Cristbe Espíritoftaca cánjiñe mo canjácá šmontsemna; tšëngaftanga njetscanga šmondénbobonshana y njetscangbiama jóngmiamana šmonduamana.

<sup>2</sup> Tšëngaftanga lempe chca šmobómnyayeca, atše corente oyejuayá šmochjábema, er tšëngaftanga njetscanga cachcá cánjiñe šmondëjuabná, cachcá njetscanga šmondénbobonshana, njetscanga mo canjyë ainancá šmondbomna, y njetscanga cachca soye šmondboše.

<sup>3</sup> Tondaye šmattsama nje ínënga chë sóyeca chamotjáyana, o nje tšëngaftanga tša bëtš soyënga amënga šmomna ca entšanga chamotsejuabnama; pero ndoñe yapa uámanënga šmojtsemna ca šmochtsejuabnaye, y cada ona chaotsejuabná chë ínënga bëngbiama más uámanënga imomnana.

<sup>4</sup> Y ndocná tondaye chaondëtsama, nje chabiamana tšabe soyënga jónjënana, sinó ndayánaca chaotsama njetscangbiámnaca tšabe soyënga jónjënana.

<sup>5</sup> Tšëngaftanga cmontsamna jtsemnana ntšamo cach Cristo Jesús yojanjuabná y yojanamcá:

<sup>6</sup> Cha njets tempo yomna cach Bëngbe Bëtsacá y uamaná cach Bëngbe Bëtsacá, pero masque chca, ndocna te yonjanjuabná:

“Atše sëntseboše njetsca entšanga njets tempo atše chašmotserrespetana, ntšamo atšbe Taitá Bëngbe Bëtsá mondërrespetancá ca.”

<sup>7</sup> Pero cha mo nduamanacá tonjanóbema, njetsca chabe bomna soyënga jëftseboshjonëse, y ndegombre, mo canjyë oservenacá tojanóbema.

Cha canjyë entšacá tojanonjñá, y entšanga canjyë ndegombre entšacá tmojaninjyë.

<sup>8</sup> Cachá tojanlesenciá nduamaná jtsemnama, y sempre Bëngbe Bëtsábioye ibnayeunana, y jobanámnaca, cruciñe jóbänëse.

<sup>9</sup> Ndayá cha tonjanmama, Bëngbe Bëtsá, chë celoca más uámana luare tbojaninjyë y chë más uámana uabaina, chë más bëtšësangbe uabainënguentsa uabaina tbojabuajo;

<sup>10</sup> y chca, celoca imomnënga, y quem luarentse y fshantse jashenoye imomnëngnaca njetscanga chamóshamentšema,

Jesúsbiye jëtšchuayama, chabe uámana uabaina jayanëse;

<sup>11</sup> y chca, njetscanga chamuayana Jesucristo chëngbe Utabná yomna ca, chca, Bëngbe Bëtsá chë Taitá njetscanga chamotsatschuanama.



*Crístbeñe ošbuáchiyënga entsamna mo buashinÿinÿana estrellëngcá jtsemnana*

<sup>12</sup> Chcasna, atšbe bonshana catšátanga, ntšamo atše tšëngaftangaftaca sënjamna ora, atše sempre šmonjanëyeunancá, mora más šmochtsatënëyeunana, mora atše tšëngaftangbiana bënoca stsemna ora. Bëtsëtsanga ntjatenobiamnaycá y Bëngbe Bëtsá jtserrespetánëse šmochtsama soyënga, chca, tšëngaftangbe tšabe videntše, Jesucrístbeñe ošbuáchiyënga quetsomñecá, tondaye chacmondëtsabuáshebenama;

<sup>13</sup> er Bëngbe Bëtsá nÿets tempo tšëngaftangbe ainaniñe inétsama tšëngaftanga ndayánaca chašmotsebošama y chašmotsamama, ntšamo cha yojuabná y yobošcá chaotsemnana.

<sup>14</sup> Ndayánaca jamama chacmojtšëjaboto ora, chë soye šmochjama, chca jamama yapa totcá comna ca ntjatichamcá y ínÿengaftaca jabuachana ntjatenatsëtsnaycá.

<sup>15</sup> Chca cmontsamna, chca, tšëngaftanga šmojtšama soyënguiñe ndocná ndocna bacna soye chaondínÿenama, y puerte tšabe vida chašmotsebošnama. Bëngbe Bëtsabe puerte tšabe basengcá šmochtsiyena, tšëngaftanga chë šmojtsemnënga canÿe luarentše puerte bacna entšángbeñe y siempre bëtscá bacna soyënga jtšamana uamanëngbeñe. Chíyecna, tšëngaftanga šmochtsiyena puerte tšabe soyënga jtšamëse, y chca tšëngaftanga šmochántsemna mo canÿe ibetiñe luarentše buashinÿinÿana estrellëngcá.

<sup>16</sup> Chë tšabe soyëngaca entšángbioye chauinÿanÿé ntšamo muanjobenaye tšabe vida jtsebošnama. Chca chašmojamëse, Cristo cachiñe yochjésabo ora, atše chantsobena tšëngaftangbeyeca puerte oyejuayá jtsemnana, er ntšamo chašmojamcá echanjínÿanÿiye atše ndoñe nÿe bonamente jabuache tijatrabajá. Chca atše chántsemna mo nda bëtscá tojoprontá, y chentšana ínÿengaftaca tojótjajo ora, chëngbioye tojtsayënjanacá.

<sup>17</sup> Mo chë altaroca canÿe bachna buiñe tojuabuashanacá, Bëngbe Bëtsá jëtschuayama tmójoba ovesháftaca, cachcá nderado echántsemna atšbe buiñe, atše šmojóbase, chca, Bëngbe Bëtsábioye oyejuayá jabemama. Tšëngaftanga bëtscá šmojalemošná, Crístbeñe tša šmošbuachéyeca, y tšëngaftangbe ošbuachiyánënaca endmëna Bëngbe Bëtsábioye oyejuayá jabemama. Chë uta soye echántsemna mo chë buiñe y chë oveshacá, Bëngbe Bëtsábioye oyejuayá jabemama. Atše chca stjabanëse, puerte oyejuayá stsemna, y stjama tšëngaftangnaca cachcá chašmotsóyejuama.

<sup>18</sup> Chca, tšëngaftanga cmontsamna oyejuayënga jtsemnana, y šmochjama átšnaca oyejuayá tšëngaftangaftaca chaitsemnana.

*Timoteo y Epafrodito*

<sup>19</sup> Atše becá ošbuachiyánaca Bëngbe Utabná Jesúsbeñe jtšobátmanëse, sëntsejuabná pronto chjobenaye Timoteo tšëngaftangbioye jíchmuama, tšëngaftangbiana chašuabocuëntama, y chca, atše más añemo chaitsatsbošnama.

<sup>20</sup> Er nÿe cha endmëna canÿa cach atšcá ainaniñe juabnayá, y cha ndegombre puerte entseboše tšëngaftanga tšabá chašmuetsiyenama;

<sup>21</sup> chë ínÿengna nÿetscanga nÿe cachëngbe tšabiana ndayánaca jamama jtsejuabnayana, y tondaye ntsebošana Jesucristbiana jamama.

<sup>22</sup> Pero cach tšëngaftanga ya šmondëtatšëmbo, ntšamo Timoteo chë padecena soyënguentšana tšabá tonjétsobocñama, y ntšamo Timoteo y atše, mo canÿe uaquiñá chabe taitábioye cuaftsajabuachancá, cánÿiñe fsënjantrabája, más bëtscá entšanga chë tšabe noticiënga chamóyëngacñama.

<sup>23</sup> Chcasna, atše sëntsobátmana cha jíchmuana, ntšamo átšeftaca jopásama chaitsetátšëmbo y cachora;

<sup>24</sup> pero bëtscá ošbuachiyánaca sëntsobatmánayeca, sëntsejuabná, Bëngbe Utabná chašojtábocnëse, pronto átšnaca chjobenaye choye jama.

<sup>25</sup> Atše sëntsejuabná yojtsemna, Jesucrístbeyeca bëngbe catšata Epafrodítñaca choye jíchmuana, nda átšeftaca cánÿiñe endëtrabája y chë tšabe noticiënga ndegombre

soyënga bétsemnama jinÿanÿiyama endenojuerzana, nda tšëngaftanga šmojanichmó atše chašubëuájabuachama.

<sup>26</sup> Cha chanjíchmuá; cha puerte entseboše tšëngaftanga jányama, y yapa ngménaca entsemna, cha šocá enjamnama šmojátatšëmbonama.

<sup>27</sup> Y ndegombre cha šocá enjamna, y enjétsinÿna mo jtsobanamcá; pero Bëngbe Bëtsá tbonjalastemá, y ndoñe nÿe chábioye sinó átsbioynaca, atše ndoñe más ngmenanënga chayátsbomnama, ntšamo mora sëntsebomnama.

<sup>28</sup> Chíyeca atše más sëntseboše cha pronto jíchmuana, as tšëngaftanga cha chašmojtinÿe ora, puerte oyejuayënga chašmotsemnama, y atše ndoñe yapa chašondëtsengmenama.

<sup>29</sup> Smochjofja nÿets oyejuayánaca, Bëngbe Utabnábeyeca catšátanga quetsomñecá; y nÿets tempo chacá amëngbioye mo bëtsetsangcá šmochtsétabna,

<sup>30</sup> er batšatema más y matënjétsobana, Cristbiana trabajayiñe uajabuachaniñe. Cha chë trabajo tonjanma atše juajabuáchama, ntšamo cach tšëngaftanga ndoñe chešmatanobenacá, atše juajabuáchama.

### 3

#### *Ndayá Pablëbiana ndegombre corente yojanámana*

<sup>1</sup> Y morna, atšbe catšátanga, ndayá Bëngbe Utabná tojamama móyejuanga. Ndoñe bacá quešnatámana, ntšamo chë inÿe tsbuanáchañe tcbonjanëbuabiamcá cachcá cachiñe jtëtëyanama; y chë soye bëtscá cmochanjújabuache ndoñe resjuiñe chašmondëtsemnama.

<sup>2</sup> Cuedado šmochtsebomna chë ndoñe tšabe entsangbiana, mo quešëngcá imomnënga, chë puerte bacna soyënga mondbétsamënga, y entsangbe más delicadentše base bobachtema jatëtšana uamanënga;

<sup>3</sup> er bënga mondmëna y ndoñe ínÿenga, chë ndegombre uinÿnanánana bomnënga, bënga Bëngbe Bëtsabe entsanguentsënga bétsemnama, bënga chë Uámana Espíritbe uajabuáchenanaca Bëngbe Bëtsá mondadoránama, bënga chë Cristo Jesúsëftaca cánÿiñe mo canÿacá bétsemnama mondbétsoyejuama, y bënga chë ntšamo ínÿenga monduamancá bëngbe cuerpiñe jamama tondayama yondoservénama mondbétsejuabnayama.

<sup>4</sup> Masque atše razón sëndëtsóbomñe, ndayá atšbe cuerpiñe tmojamcá ndegombre iuámanama jtsejuabnayama; nderado nda tojtsejuabná razón yojtsebomna chë soyënga yoservena ca jtsejuabnayama, ndegombre atše chabiana más razón chama stsóbomñe.

<sup>5</sup> Sënjanonÿná y posufta tianoye base bobachtema chë más delicadentše šmojantëtše; atšbe nÿets uta bëtsetsata Israeloca entsanguentsata bonjamna, y atšna Benjaminbe bëtš pamillentsá sëndmëna; atšbe tempsca bëtš taitanga nÿetscanga hebreunga immamna. Atšna fariseo sënjamna. Atše sënjánama, lempe ntšamo judiëngbe leyënguñe endayancá, ndayá jamama šojanmëncá.

<sup>6</sup> Atše tša sënjánboše Bëngbe Bëtsá jtseservénama, chíyeca Jesúsbeñe ošbuáchiyënga bëtscá sënjanëcamena; y ndayá canÿe entšá ibnëtsemna jtsamama, Bëngbe Bëtsabe bominiñe tšabia jtsemnama, judiëngbe ley jtsocumplínëse, chama ndocná tondaye quenjátsbomna jayanama, atše ndoñe tšabá sëntsanama ca.

<sup>7</sup> Pero lempe chca ntšamo atše sënjamnama y ndayá sënjánamama, puerte sënjanjuabná atšbiana puerte yojanámana ca; pero mora, Cristo atšbe ainaniñe tonjámashëngoyeca, chë soyënga atšbiana ya ndoñe quenatámana.

<sup>8</sup> Y cabá más, tondaye atšbiana quenatámana, chë bëtš soye jtsonÿayëse, Cristo Jesús, Bëngbe Utabná jtsabuutmana. Chábeyeca, lempe chë nÿe quem luarentša soyënga sënjëseboshjona, y lempe chë soyënga atšbiana tondayama quenátoservena; y chca entsemna, chë bëtš soye jëftsashjáchama, Cristo jtsabuutmama,

<sup>9</sup> y cháftaca cánÿiñe mo canÿacá jtsemnama. Atše ya ndoñe quetsatsnguá Bëngbe Bëtsabe bominiñe tšabia jtsemnama, nÿe ntšamo atše tijamama chë judiëngbe ley

jtsocumplínese, pero Crístbeñe jtsošbuáchiyese aíñe; Bèngbe Bètsá entsama atše chabe bominiñe tšabia chaitsemnama, atšbe bacna soyèngama jtseperdónase, y lempe chca entsemna atše Crístbeñe sèndošbuachéyeca.

<sup>10</sup> Atše sèntseboše ndayá cha jtsabuatmana, chë obanènguentšana tojtayanenama cha tojaninñanýe obenana atše chaitsebomnama, atše cháftaca cánýiñe mo canýacá chaitsemna ora; y ntšamo bènga játsebacama ora cach Cristo tojansufricá, átsnaca cachcá chaisufrima. Y cha tojanóbana orcá atše chaitsemnama;

<sup>11</sup> y ntšámnaca, atše jèftsashjáchama Bèngbe Bètsá chaoma atše chaitayenama.

*Yejuana jtsentšénese, Bèngbe Bètsábiocana uacanánana josháchiñama*

<sup>12</sup> Pero atše ndoñe quetsátichamo lempe chca ya tijashjache ca, o atše ndocna bacna soye ndamá y puerte tšabia Bèngbe Bètsabe bominiñe stsemna ca, pero sempre natsanoye sèntsá, mo nda canýe luaroye jashjanguama cuaftsèchamancá; y puerte jtsošbuáchiyese sèntsobátmana atše chjobenaye jtsemnama, chë ndayama Cristo šojanchembo, er Cristo Jesús ya tonjama atše chabiamana chaitsemnama.

<sup>13</sup> Atšbe catšátanga, atše ndoñe quetsátichamo chca ya tijashjache ca. Pero chama canýe soye sèntsama: chë tempo atše sènjánbomna y sènjánama soyènga, mora lempe stètšoye sènjaquedá, y bètscá sèntsama jobenayama chë jashjanguama yojtsemnoye jashjanguama,

<sup>14</sup> chë ndémoca yojtsemna jashjanguama luaroye jobenayama jashjanguama, mo nda canýe luaroye jashjanguama ndayánaca juacánama bètscá jenujuérsase cuaftsèchamancá. Cachcá, átsnaca sèntsá chë Bèngbe Bètsá šojtsachembuana uacanánana josháchiñama, Cristo Jesúsbeyeca; y chë uacanánana entsemna chë nyetsca tescama yomna tšabe vida jtsebomnana.

<sup>15</sup> Chca bènga šontsamna jtsejuabnayana, chë Jesucrístbeñe puerte ošbuáchiyana y nyets tempo cha ústonènga; y nderado tšèngaftanga ndayíñnaca inýetsá šmojatsjuabná ora, Bèngbe Bètsá chë sóynaca tšabá cmochanjinñanýiye.

<sup>16</sup> Pero morna šontsamna jtseyenana ntšamo mèntscoñama Bèngbe Bètsabe soyèngama šojosertacá.

<sup>17</sup> Jesucrístbeyeca catšátanga, ntšamo atše sèndmèncá tšèngaftanga šmochtsemna, y chë ntšamo jtseyenama tcbonjaninñanýecá imojtseyenèngbioye šmochtsènyaye.

<sup>18</sup> Ntšamo cbochanjauyancá, ya ba soye tcbonjáuyana y mora cachiñe chca chanjayana, pero chca jayanamna atše puerte ngménaca sèndbètsemna. Banga mondmèna, y chènga ntšamo vida imojtsebomnama montsinñinñá, lempe ntšamo Cristo chë cruciñe jóbánese bèngbiamana iuayancá contra chènga imojtsemnama,

<sup>19</sup> y chèngbioye nyetsca tescama infiernoca mochántsapochocaye. Chèngbiamana chë más uámana soye yojtsemna jtsamana ntšamo cachènga tmojtsebošcá, nye cachèngbe cuerpiñe tšabá jtsonñama. Chènga nýa mo bèts soye cuaftamcá jtsemnana chë soyènga tmojtsama ora, pero ndegombre chènga entsamna cach soyèngama jtsèuatjama; y chènga sempre jèsejuabnayana chë nye quem luarama enójuabnayèngbe soyèngama.

<sup>20</sup> Chë cuenta bèngna, ndegombre celocama entsanga mondmèna, y mora montsobátmana, chë luarocana chauabo bèngbe atsebacayá, Bèngbe Utabná Jesucristo.

<sup>21</sup> Cha bèngbe cuerpènga, chë pronto jopochócama cuerpènga echanjátrocaye, jtsemnama mo chabe cuerpcá, chë obanènguentšana tojtayanabe cuerpcá; y cha chca echanjama, cha puerte obenana lempe jtsemándayama bómnayeca.

## 4

*Bèngbe Utabnáftaca cánýiñe mo canýacá jtsemnèse oyejuayana jtsebomnana*

<sup>1</sup> Chcasna, Jesucrístbeyeca atšbe catšátanga, Bèngbe Utabnábeñe ošbuáchiyana ntjajbanacá, y puerte chábeñe jtsošbuáchiyese, cháftaca cánýiñe mo canýacá šmochtsemna.

Corente cbondábabuanÿeshana y tša sěntseboše tšěngaftanga jányama. Tšěngaftangbeyeca atše puerte oyejuayá sěntsemna, y atše corente sěndbětsoyejuaye tšěngaftangbiama ínÿengbioye jáuyanama.

<sup>2</sup> Evodia sěntseimpadana y Síntiquenaca, chata chabuatenóyeunama, mo Běngbe Utabnábeñe ošbuachiyata quetsomñecá.

<sup>3</sup> Y ácnaca, nda puerte tšabá átšeftaca tconjatrabajá, cbontseimpadana chama chě shembásata chacújabuachama, er chata bětscá átšeftaca tbonjatrabajá tšabe noticiěnga entšanga abuayinayíñe. Clemente y inÿe entšanga átšeftaca tmonjatrabajá cach soye amiñe. Nÿetsca chěngbe uabaina entsábemana chě librěšañe, ndayentše yojtsábemana chě tšabe vida mochjónÿeněngbe entšangbe uabaina.

<sup>4</sup> Sempre oyejuayěnga šmochtsemna, Běngbe Utabnáftaca cánÿiñe mo canÿacá jtsemněse, y cachiñe šcutétayana: ¡Móyejuanga!

<sup>5</sup> Nÿetscanga chamotsetátšěmbo, tšěngaftanga tšabe juabna bomněnga šmomnama. Běngbe Utabná jésabama tempo ya entsobeco.

<sup>6</sup> Tondayama šmattsenócochinÿena, pero cada Běngbe Bětšáftaca chašmojtsencuěnta ora, ndayá cmojtsějabotama cha šmochjaimpáda. Y chca chašmojtsama ora, chánaca šochtsatschuanaye.

<sup>7</sup> Chca, Běngbe Bětšá echanjama chě chabe ainaniñe tšabe ebionana tšěngaftanga chašmotsebomnama; chě tšabe ebionana puerte bětscá endměna, y běnga entšanga quetsomñecá ndoñe ntsobenana chama jósertana; y chca tšabe ebionánaca, tšěngaftangbe juabněnguiñe y ainaniñe tondayama quešmochátenocochinÿena, er tšěngaftanga cánÿiñe mo canÿacá Cristo Jesúseftaca šmondměna.

#### *Lempe ntšamo tšabá yomncá soyěngama jtsejuabnayana*

<sup>8</sup> Cabana, atšbe catšátanga, lempe ntšamo ndegombre yomncá soyěnguiñe šmochtsejuabnaye, lempe chě respeto yomereceniñe, nÿetsca soyěnguiñe entšangbe bominÿiñe tšabá yomniñe, nÿets tempo corente tšabá yomniñe, nÿetsca soyěnga entšanga yogusetániñe, y lempe chě ndayama entšanga tmojtsejuabná tša iuámana ca soyěnguiñe. Lempe chě tšabá yomna soyěnguiñe y jtsatschuanayama yomna soyěnguiñe šmochtsejuabnaye.

<sup>9</sup> Sempre šmochtsama chě átšbentšana šmojuá bouinÿe soyěnga, chě atšbiajana šmojóyěngacñe soyěnga, chě atše šmojoyeuná soyěnga y ntšamo šmojinÿcá atše jtsamana. Chca šmochtsama y Běngbe Bětšá, chě běnga ainaniñe tšabe ebionana chamotsebomnama amá, tšěngaftangaftaca echántsemna.

#### *Pablo tojtanacheuá tmojanájabuachama*

<sup>10</sup> Atše corente sěndoyejuá Běngbe Utabnáftaca cánÿiñe mo canÿacá tsměnama, er tšěngaftanga ba ishinÿe chentšana, cachiñe šmojatobená atše jatinyinÿiyana ntsachetšá atšbe tšabiana tšěngaftangbiama iuámanana. Chca, atše ndoñe quetsátichamo tšěngaftanga atšbiama cmojtsanebnětjomba ca, ndayá ntšamo tšěngaftanga tšabá šmojuabnacá atše jinÿinÿiyama ndoñe yonjanopodena ca.

<sup>11</sup> Atše chca, ndoñe quetsátichamo ujabotá stsemna ca, er atše sěnjuatsjinÿe sempre oyejuayá jěftsemnana, nÿe ndaye soyiñe masque batšatěmnaca stsebomněse.

<sup>12</sup> Atše sěndětatsěmbo ntšamo yomna jtsiyenana chě vida jtsebomnama ujaboto soyěnga tojtsashbeněse, y ntšamo yomna jtsiyenana chě tcuajabótama más bětscá jtsebomněse. Atše tijuatsjinÿe oyejuayá jtsemnana masque nÿe ndaye soyěnguiñnaca stsemna ora, jasama bětscá stsebomna ora o masque nÿe shěntseca jtsemnama šojtsemna ora, atše jtsiyenama bětscá soyěnga stsebomněse o masque ndóñnaca.

<sup>13</sup> Atše lempe chca sěndobena, atše obenana jtsebomnama Cristo endbětšamayeca.

<sup>14</sup> Masque chcasna, tšěngaftanga tšabá šmonjama, atše padecena soyěnguiñe sěnjamna ora atše juajabuáchana.

<sup>15</sup> Tšëngaftanga, chë Filipos puebloca Jesucristbeñe ošbuáchiyënga, corente šmondétatsëmbo, Macedonia luarentšana sënjëftsanbocna ora, nÿe tšëngaftanga atše šmonjanájabuachama; inÿe ošbuáchiyënga ndoñe. Chora enjamna atšbe bojatsëna tempo tšëngaftangbe luarentše chë tšabe noticiënga entšanga abuayiynayiñe; y nÿe tšëngaftanga atše šmonjanájabuache.

<sup>16</sup> Ba soye atše Tesalónica puebloca sënjamna ora, y chašmuájabuachama šonjanájaboto ora, tšëngaftanga atšbe opresidëngama crocénana šmonjanafja.

<sup>17</sup> Chca ndoñe quenátayana atše tsjuabná nÿe tšëngaftangbentšana ndayánaca jóyëngacñama ca; chë sóyeca atše sëntseboše ndayá tšëngaftanga más tšabe soyënga chašmotsamama, Bëngbe Bëtsá tšëngaftangbiama más chaotsóyejuama.

<sup>18</sup> Er atše ya lempe sënjóyëngacñe, y chë šuajabótama cabá más sëntsebmoma. Atše chë ntšamo šjuajabotcá lempe sëntsebmoma, chë tšëngaftanga Epafrodítóftaca šmonjanichmó soyëngaca. Ndayá atše šmojanichmocá, Bëngbe Bëtsabe bominyiñe puerte tšabá entsemna, mo juatšëmbonama ndayá tcojóba y altaroca tcojajuinÿe y botamana tojtsonguëtšecá, chora cha oyejuayá chca jóyëngacñana.

<sup>19</sup> Atšbe Bëtsá, chabe bëtscá uámana y bëtš bomnánaca, echanjama tšëngaftanga lempe ntšamo cmëjabotcá Cristo Jesusbiajana chašmóyëngacñama.

<sup>20</sup> Entšanga nÿets tempo chamotsinÿanÿná Bëngbe Bëtsá y Bëngbe Taitá puerte uamaná bëtsemnama. Chca chaotsemna.

### *Chënga jtadiósoftanama*

<sup>21</sup> Atšbe cuenta, nÿetscanga chë Jesucristbeyeca Bëngbe Bëtsábenga imomnënga šmochjácheuaye. Atšeftaca montsemna Jesucristbeyeca catšátangnaca cmontsacheuaná.

<sup>22</sup> Nÿetscanga chë muentše Bëngbe Bëtsábenga imomnënga, y más chë romanëngbe mandadbe bëtš yebnoca oyenënga, cmontsacheuaná.

<sup>23</sup> Atše sëntseimpadana Bëngbe Utabná Jesucristo, chaoma tšëngaftangbeñe tšabe bendicionënga chaotsemnama.

## Colosenses

### *Jacheuayama*

<sup>1</sup> Atše Pablo, Jesucristbe ichmoná Bëngbe Bëtsá chca yobóseyeca, y Jesucristbeyeca bëngbe catšata Timotéoftaca,

<sup>2</sup> quem tsbuanácha sentsabiamná chë Colosas pueblaca Bëngbe Bëtsábenga imomnëngbiama. Tšëngaftanga bëngcá Jesucristbeñe ošbuáchiyënga šmondmëna, y chca, Jesucristbeyeca bëngbe catšátanga. Atše sëntseimpadana Bëngbe Bëtsá Bëngbe Taitá, chaoma tšabe bendicionënga tšëngaftangbeñe chaotsemnama, y chaoma tšëngaftangbe ainaniñe tšabe ebionana chašmotsebonnama.

### *Pablo, Bëngbe Bëtsábioye tbojanimpadá Colosas pueblaca ošbuáchiyëngbiama*

<sup>3</sup> Bëngbe Bëtsá, Bëngbe Utabná Jesucristbe Taitá tšëngaftangbiama fstseimpadana ora, cha sempre fchandbëtsatschuanaye,

<sup>4</sup> er bënga fsënjátatsëmbona ntšamo tšëngaftanga Cristo Jesúsbeñe tša šmojtsošbuáchema, y ntšamo tšëngaftanga nyetscanga chë Bëngbe Bëtsábenga imomnënga šmababuányëshanama.

<sup>5</sup> Natsanama, chë ndegombre buayenánama, chë tšabe noticiënga, tšëngaftanga tcmojanabuatambá ora, tšëngaftanga botamana šmojanuena ntšamo chë buayenániñe bejtsayancá, chë tšëngaftanga šmojtsoyena tšabe soyama jobátmana, Bëngbe Bëtsábeñe jtsošbuáchiyëse. Chë šmontsobatmana soye entsama tšëngaftanga Jesucristbeñe puerte chašmotsošbuáchema y nyetscanga chašmotsababuányëshanama. Bëngbe Bëtsá celoca enduaquëcñá chë tšëngaftanga šmojtsoyena tšabe soye.

<sup>6</sup> Chë tšëngaftanga tcmojanabuayená tšabe noticiënga más bëtscá entsanga montsuenana; y chca, nyets quem luarentše entsanga montsiyena más tšabe soyënga jtsamëse. Chca entsemna ntšamo tšëngaftangbentše tojopasacá, chë natsana te chë tšëngaftanga Bëngbe Bëtsabe tšabiánama šmojanuena orscana, y ntšamo Bëngbe Bëtsá puerte bonshanánaca y tšabiánaca bëngbioye šuanyënama ndegombre cmojanosérta orscana.

<sup>7</sup> Y chca Epafras tšëngaftanga tcmojanabuatambá, Bëngbe Bëtsabe bonshánama y tšabiánama. Epafras endmëna canya bëngaftaca Cristbiana oservená, y cha bënga fsëndbobonshana; cha Cristbiana endëtrabája bëngbe cuenta tšëngaftangbentše.

<sup>8</sup> Cha šonjáuyana ntšamo chë Uámana Espíritu yojtsama, nyetscanga Jesucristbeñe ošbuachiyëngbioye chašmotsababuányëshanama.

<sup>9</sup> Lempe ntšamo tšëngaftangftaca tojopasama, chë natsana te tšëngaftangbiama fsënjauena orscana y mëntscoñama, Bëngbe Bëtsá sempre tšëngaftangbiama fchandbëtseimpadana, cháftaca fstsencuënta ora. Bëngbe Bëtsá fsëndëimpadana, chabe Espíritu chaoma tšëngaftanga chašmotsoyena jtsetatšëmbuana y jtsosertánana, chca, ntšamo Bëngbe Bëtsá yobošcá chašmotsamama, tšëngaftanga tšabá chašmotsetatšëmbuama.

<sup>10</sup> Y chca, tšëngaftanga šmochantsobena jtsiyenana jtsamëse ntšamo Bëngbe Utabná yobošcá, y sempre šmochantsama ntšamo chabiama tšabá yomncá. Ntšamo tšëngaftanga chašmojtsoyencá tšabe soyënga jtsamëse, chentšana nyetsca tšabe soyënga echanjóbcna, y tšëngaftanga más tšabá Bëngbe Bëtsá šmochantsábuatma.

<sup>11</sup> Atše, Bëngbe Bëtsá sëntseimpadana, chabe puerte bëtscá obenánaca cha chaoma tšëngaftangbe ainaniñe bëts añemo chašmotsebonnama; y chca, tšëngaftanga chë pade-cena soyënguiñe chašmojtsemna ora, puerte uantadënga chašmotsemnama, y ainaniñe añémoca Bëngbe Bëtsábeñe becá chašmotsobátmanama.

<sup>12</sup> Y puerte oyejuayënga Bëngbe Taitá šmochantsatschuanaye, nda iuama bënga chamotsoyena ntšamo cha chabe entsanga jatšatayama tojašebuachenacá jtsebonnama.

Tšëngaftanga šmochanjóyëngacñe ntšamo cmojtsëtocancá celoca, chë corente buash-inÿinÿana luarentše.

<sup>13</sup> Bëngbe Bëtsá bënga šojatsebacá, Satanás, chë ibetiñe luarentša mandayabe cucuatšentšana, y tojama chë chabe bonshana Uaquiñabe amëndayana bëngbe ainaniñe chamotsebonnama;

<sup>14</sup> chábeyeca Bëngbe Bëtsá Satanasbe cucuatšentšana šojatsebacá; o mëntšá, chábeyeca Bëngbe Bëtsá bëngbe bacna soyënga šojtsaperdoná.

*Cristo tojanóbanayeca, entsanga Bëngbe Bëtsáftaca tšabá jtsatsmënana*

<sup>15</sup> Cristo tmonjáninÿe ora, bënga tmojánatšëmbona ntšamo Bëngbe Bëtsá yomnana; entsanga imojobena cha jinÿama, pero Bëngbe Bëtsábioye ndoñe. Cha, chë Bëngbe Bëtsabe Uaquiñá, ya natsana yojtsemna lempe chë Bëngbe Bëtsá tojanma soyëngama; y cha lempe chë soyëngama más uamaná endmëna.

<sup>16</sup> Chábeyeca Bëngbe Bëtsá tojama lempe ntšamo celoca y quem luarentše yobinÿncá, lempe ntšamo chë entsanga imobena o ndoñe mondobena jinÿama soyënga, y chë espíritëngnaca chë imobena ínÿengbioye jtsamëndayana y obenana imobomna. Bëngbe Bëtsá, chábeyeca y chabiamama tojama, lempe ntšamo quem luarentše yobinÿncá.

<sup>17</sup> Bëngbe Bëtsá cabá nÿetsca soyënga ndama ora, Cristo ya yojtsemna; y chábeyeca mora yomna, lempe ntšamo quem luarentše chaotsemnama yojamncá.

<sup>18</sup> Cha endmëna nda nÿetscanga Bëngbe Utabnábeñe ošbuáchiyënga iuamënda, ntšamo chë bestšaše nÿetsca chë cuerpentša soyënga jtsemmandayancá. Cha endmëna nda iuama ošbuáchiyënga tsëm tšabe vida chamotsebonnama, y cha endmëna chë Bëngbe Bëtsabe más bëts Uaquiñá. Bëngbe Bëtsá tojanma, chë cachiñe ainënga mocht-satsmënënguentšana, cha chë natsaná chaotsemnama; nÿe cha canÿa chë más uámana luare chaotsebonnama, nÿetscañe chaotsemándayama.

<sup>19</sup> Er Bëngbe Bëtsá yojanjuabná cachabiamama tšabá yojamna, lempe ntšamo cha yomncá, chabe Uaquiñábeñnaca chaotsemnama,

<sup>20</sup> y Bëngbe Bëtsá tojánbošena, Crístbeyeca nÿetsca soyënga quem luarentše y celoca, cháftaca tempcá tšabá chaotsatsmënama. Bëngbe Bëtsá chë soye tojanma, chabe Uaquiñá cruciñe tojanóbana ora y chabe buiñe tojanábuashana ora; y chca, Bëngbe Bëtsá tojanma nÿetsca soyënga quem luarentše y celoca, cháftaca tempcá tšabá chaotsatsmënama.

<sup>21</sup> Tempo, tšëngaftanga Bëngbe Bëtsá stëtsoye šmojanquedá y chábioye uayayënga šmojamna, bacna soyënga šmojanjuabná y šmojánama causa;

<sup>22</sup> pero mora chabe Uaquiñáftaca, cha mo canÿe entsacá jóbanëse, Bëngbe Bëtsá tojama tšëngaftanga tempcá tšabá cháftaca chašmotsatsmënama; y chca tojama, tšëngaftanga chabe delante nÿets tempo chašmotsemnama; chora tšëngaftanga, chabe entsanga, ainaniñe ndocna bacna soye ndbomnënga chašmotsemnama, y ndocná chaondayana ntšamo šmojamncá ndoñe tšabá yontsemna ca.

<sup>23</sup> Pero tšëngaftanga cmontsamna chë bëtscá ošbuáchiyana šmondobomnana nÿets tempo jtsebonnama, Bëngbe Utabnábeñe jtsošbuáchiyama ndocna te ntjajbanacá. Nÿets tempo chë tšabe noticiënguiñe šmochtsošbuáchiye, y ndoñe šmatjaleséncia ndocná tšëngaftangbe ošbuáchiyana chaotrocama; y nÿe chca puerte jtsošbuáchiyëse Bëngbe Bëtsábeñe šmochtsobátmana, ntšamo tšëngaftanga šmojanmncá, Jesucristbiamama buayenánama šmojanuena ora. Chë buayenánana endmëna ntšamo ba entsanga nÿetsca quem luarentša entsángbioye tmojabuayenacá, y atšbe trabajo endmëna cach tšabe noticiëngama entsanga jtsabuayinayana.

*Pablo, ošbuáchiyënga jasérviamama trabajo tmojanbonÿé*

<sup>24</sup> Atše corente sënjesoyejúa mora tšëngaftangbiamama jasúfriama stsobenama. Ba entsanga entsamna jasúfrianama Cristo jasérviamama, y atše sëntsesufrina ntšamo Cristo tojansufriacá, mora atše jtsesufrinëse chabe cuenta, ntšamo jasúfriama yomncá. Y

ntšamo sentsesufrincá entsemna Crístbeñe ošbuáchiyëngbe tšabiama, chë chabe cuerpcá imomnënga, chënga Crístbenga bëtsemnama.

<sup>25</sup> Bëngbe Bëtsá atše šojábema chë Jesucristbeñe ošbuáchiyëngbe canye ujabuachaná. Cachá chë trabajuama šojanábuayana, chca jamëse, tšëngaftangbe tšabiama chaotsemnama. Chë trabajo endmëna, lempe ntšamo cha tojayancá entšanga jábuayenana.

<sup>26</sup> Bëngbe Bëtsá nyetsca entšanga ndoñe tonjanalesenciá, quem luare jobojátšama orscana y nyets tempo chë buayenánama chamotsetatšëmbuama; pero mora, chábenga imomnënga chë soye cha tojinyanýé.

<sup>27</sup> Bëngbe Bëtsá yoboše, chabe entšanga imomnënga chamotsábuatmama ndayá tempo chënga ndoñe tonjaninyanýecá; y yoboše chë ndoñe judiënga jinyanýiyama tša bëts y tšabe soye yomna chë ndegombre buayenánana, ndayá tempo ínýenga ndoñe tonjaninyanýecá. Chë tempo ndoñe yonjanótatšëmbo buayenánana entsemna, Cristo tšëngaftangbe ainaniñe yojtsiyena, y chábeñe puerte jtsošbuáchiyëse šmojt sobena jtsobátmanana, Bëngbe Bëtsá puerte bëtsetsanga y uámanënga chácmbiamama, batšá ntšamo cachá yomncá.

<sup>28</sup> Bënga nyetscángbioye Jesucristbiamama fchandbëtsabuayinyaye; fchandbëtsëtsësnaye ndayá chënga ndoñe yontsamna jtsamana, y fsëndbëtsabuatambaye nyets osertánanaca ndayá chënga aiñe yojtsamna jtsamana, y chca, nyetscángbioye Bëngbe Bëtsabe delante junatsama, puerte ošbuáchiyënga y osertánënga Bëngbe Bëtsabe soyënguiñe, chënga Crísoftaca cánýiñe mo canýacá jtsemnëse.

<sup>29</sup> Chca chaotsemnama, atše bëtscá sëndëtrabája; y chca sentsama, chë Cristo yojtsama atše chaitsebomnama bëts obenánaca.

## 2

<sup>1</sup> Atše sëntseboše tšëngaftanga chašmotsetátšëmbo, Bëngbe Bëtsá becá tsimpadánama, tšëngaftangbioye jujabuáchama, chë Laodicea puebloquënga Jesucristbeñe ošbuáchiyënga y nyetscanga chë ndocna te atše šmonjinýe ošbuachiyëngnaca.

<sup>2</sup> Atše chca sëndama, tšëngaftanga y chënga ainaniñe bëts añemo chašmotsebomnama, y cánýiñe mo canýacá chašmotsemanama, nyetscanga jtsenbobonshánëse. Chca, nyets osertánana tšëngaftanga chašmotsebomnama, y chë tempo Bëngbe Bëtsá entšanga ndoñe tonjaninyanýé buayenánama chašmotsetatšëmbuama, y chë buayenánana Cristbe soye entsemna.

<sup>3</sup> Mo canye bëtscá bomnana iytëmena soycá pero mora ya uínýenana, cachcá Crístbeñe entsemna nyets osertánana y obenana Bëngbe Bëtsá jtsabuatumama. Chë soye tempo Bëngbe Bëtsá entšanga ndoñe tonjaninyanýé, pero mora Cristo yojtsama bënga chë uámana soyënga chamotsebomnama.

<sup>4</sup> Atše chca sentsichamo, botamana palabrëngaca ndocná chacmondáingñema.

<sup>5</sup> Er masque choca tšëngaftangaftaca atše ndoñe quetsátsmëna, atšbe ainana aiñe choca tšëngaftangaftaca entsemna; y atše puerte sëntsoyejuá tšëngaftanga šmatenëyeunanama y nyets tempo Bëngbe Bëtsábeñe šmojtsošbuáchema.

*Crísoftaca cánýiñe mo canýacá jtsemnëse, entšanga ndegombre tšabe vida jtsebomnana*

<sup>6</sup> Tšëngaftanga Jesucristbeñe ošbuáchiyënga šmojanóbiamama ora, šmojanayana: “Cristo Jesús, Bëngbe Utabná entsemna ca”. Chcasna, tšëngaftanga cmontsamna jtsiyenana soyënga jtsamëse mo chë cháftaca cánýiñe mo canýacá tojtsemnacá.

<sup>7</sup> Chca šmotsobena jamana, cháftaca cánýiñe mo canýacá nyets tempo jtsemnëse. Smochtsiyena jtsamëse ntšamo cha tojabuatëmbacá y cada te más chca. Cabá más šmochtsošbuáchiye chë Cristbiamama buayenana soyëngama, ntšamo tcmojabuatumambacá; y Bëngbe Bëtsá sempre šmochtsatschuanaye.

<sup>8</sup> Cuedado šmochtsebomna, ndoñe šmatjaleséncia ndocná chaondëtsamama tšëngaftanga jtsajbanama Crístbeñe ošbuáchiyana jtsebomnana. Chca entšanga montseboše juabnëngaca tšëngaftanga jáingñama, nye básefta entšangbe juabnënga y



tondayama ndoservena juabnënga. Chë juabnënga jtsóbocanana ntšamo bëts taitanga básengbioye mondbetsabuátambayentsana y chë espíritëngbentsana, ndëmuanÿengbiama entsanga jtsejuabnayana chënga nÿetsca soyënguifne imománda ca; pero Crístbentsana chë juabnënga ndoñe ntsóbocanana.

<sup>9</sup> Cristo endmëna cachcá ntšamo Bëngbe Bëtsá yomncá, masque mo canÿe entsacá quem luarentše yojëftsiyena;

<sup>10</sup> y Bëngbe Bëtsá tojama tšëngaftanga ndegombre tšabe vida chašmotsebomnama, Crísoftaca cánÿifne mo canÿacá bëtsemnayeca; y Cristo, nÿetsca chë mándayënga y obenana bomnëngbiama más uamaná endmëna.

<sup>11</sup> Tšëngaftanga Crísoftaca cánÿifne mo canÿacá bëtsemnayeca, mo uinÿnananëngcá šmontsemna, tšëngaftanga Bëngbe Bëtsabe entsanga šmomnama. Quem uinÿnanánana ndoñe quenátsmëna mo chë más delicadentše base bobachtema tmojatëtšcá, cach entsángbeyeca ntšamo judiënga monduamancá, pero aíñe entsemna cach Cristo nda tcmojauinÿnaná; y chë uinÿnanánana entsemna, tšëngaftangbe ainanentšana Cristo bacna juabnënga jabuajuánayana.

<sup>12</sup> Tšëngaftanga šmojánenabaye ora, enjamna mo ntšamo cach Cristo tmojanatbontsacá tšëngaftanga utebuantsánënga cuaftsemncá, er tšëngaftanga šmojanajbaná jtsamana chë tempo šmojánama bacna soyënga; y ntšamo Cristo cháuatayenama Bëngbe Bëtsá tojamcá, cachcá, tšëngaftanga šmojánenabaye ora, enjamna mo tšëngaftanga chašmatayenama Bëngbe Bëtsá cuafjamcá, er mora tšëngaftanga mo tsmëma entsangcá šmondoyena. Chca tojanopasá, Bëngbe Bëtsá obená bëtsemnama tšëngaftanga šmojtsošbuáchema, y chë obenana tojama Cristo cháuatayenama.

<sup>13</sup> Inÿe tempo tšëngaftanga Bëngbe Bëtsabiama mo obanëngcá šmojamna, yapa bacna soyënga jtsamama šmojanamana causa y uinÿnanánënga mo Bëngbe Bëtsabe entsangcá ndoñe šmonjámnayeca, pero aíñe šmojanamana bacna soyënga jtsamana nÿe ntšamo šmojanbošcá. Morna Bëngbe Bëtsá tojama tšëngaftanga tšabe vida chašmotsebomnama, Crísoftaca cánÿifne mo canÿacá jtsemnëse, y Bëngbe Bëtsá bëngbe nÿetsca bacna soyënga šojtsaperdoná.

<sup>14</sup> Mo nda ba ndebénënga tojtsabamna y chama tsbuanachangá tojtsamna y chiñe tojtsayana chënga obligaciönaca imojtsemna chë ndebénana pronto jtobocana ca, pero chë entsá chëchangá tojtsandbiama chë entsanga cha ndoñe más chamondëtsendebënana, Bëngbe Bëtsá cachcá tojama, bacna soyëngama bënga šojtsaperdoná ora. Jesús bëngbe bacna soyëngama cruciñe tojanóbana ora, enjamna mo Bëngbe Bëtsá bëngbe ndebénana tojtsanpochocá cuenta.

<sup>15</sup> Jesucristo cruciñe tojanóbanayeca, Bëngbe Bëtsá tojanayënjaná Satanás y chabe bacna espíritënga obenana bomnënga y ínÿengbioye amëndayënga; y nÿetsca entsangbe delante tojaninÿanÿé cha chënga jtsamëndayama yobenama, mo canÿe reycá chë ínÿenga to-jayënjaná ora, chabe entsángaftaca natsana jtsayana y chë ayënjanánëngna ústonoye.

*Ainaniñe becá jtsebošana chë ošbuáchiÿëngbiama celoca yomna soyënga*

<sup>16</sup> Ndoñe caso šmattsabiamnaye, ndoñe tšabá šmontsama ca ínÿenga tšëngaftangbiama tmojtsichamo ora, ndayá tšëngaftanga šmëtseye o šmëtsofsëšnayama, o ndayá aíñe o ndoñe šmondbétsamama Bëngbe Bëtsá jadórama fiestënga ora o shbojueta fiesta ora, o jóchnama tese.

<sup>17</sup> Bayté entsemna, Bëngbe Bëtsá entsangbe cucuatšifne chë mandënga tojánboshjona, chë soyëngama bënga jabuátambama. Chë mandëngaca Bëngbe Bëtsá yojaninÿanÿnaye ndayá más chcoye jopásama; entsángbioye yojaninÿanÿnaye ndayá Cristo yochjanmama.

<sup>18</sup> Báseftanga mondmëna y chënga mo nduamanëngcá entsángbeñe jtsebínÿnana, pero tsoye cachënga corente uamanënga jtsenobiamnayana y angelënga jtsadórayana, mo Bëngbe Bëtsá cuaftsemncá. Ndoñe caso šmattsabiamnaye, tšëngaftanga ndoñe tšabá

šmontsama ca chënga tmojtsichamo ora, ntšamo chënga tmojtsichamcá tšëngaftanga ndoñe šmontsámayeca. Chënga jtsichámuana bëts soyënga mo otjenayoquëcá tmojinýe ca, y nýe cachënga puerte jtsenábotamnayana, pero chca chamotsamama razón ndoñe quemátsbomna, er nýe ntšamo inýe entšanga imnetsejuabnaycá chëngnaca cachcá jtsejuabnayana.

<sup>19</sup> Chënga Jesucrístoftaca cánýiñe ndoñe tmonjoquedanga, y Cristo endmëna chë nýetsca ošbuáchiyëngbe amëndayá, mo chë bestšaše nýets cuerpo jtsemandayancá. Canýe cuerpiñe chë bestšaše jtsamana nýets cuerpo chaóbochema, ntšamo Bëngbe Bëtsá tojtsebošcá, chë cuerpo ndayá jasama chaotsebomnama jtsamëse, y nýetsca chë cuerpentša soyënga chamenefjnanama jtsamëse. Cachcá, Cristo jtsamana nýetsca ošbuáchiyënga cánýiñe mo canýacá cháftaca chamotsemnana, y cada te más tšabá cha chašmotsábuatmama.

<sup>20</sup> Cristo tojanóbana ora enjamna mo tšëngaftángnaca cuafjobancá, y Bëngbe Bëtsá tšëngaftanga cmojatsebacá chë quem luarentše imománda espíritëngbe cucuatšentšana. As, ¿tšëngaftanga ndáyeca šmojtseyena jtsamëse mo chë nýe quem luarama enojuabnayëngcá? ¿Ndayeca tšëngaftanga cabá šmobedecena chca mandënga, mo:

<sup>21</sup> “Chë soye ndoñe matsbanana, chca soye ndoñe catjase, o chë soye acbe cucuatšeca ndoñe catjaca ca”?

<sup>22</sup> Lempe chë mandënga, chë ndayá canýa ndoñe bontsemna jamana, nýe soyëngama jtsayanana, y tempo tojochnëngo ora, chë soyënga jtsopochócana y chora tondaye ntsámanana. Chë mandënga jtsemnana nýe ntšamo entšanga mondbetsamcá y ínýengbioye mondbetsabuatambaycá.

<sup>23</sup> Ndegombre, ba entšanga jtsejuabnayana chë mandënga tmojamëngbiana, puerte osertanáncaca chca tmojama ca, pero ndegombre chca ndoñe quenátsmëna; er chënga jtsichámuana, ntšamo Bëngbe Bëtsá jadórama yomncá imojtsabuatambá ca, jtsabuátambayana entšá cabnmëna uamaná ndoñe ntsenobiamnayana ca, y jabuache cachabe cuérpoca jtsamana ca. Pero chë mandënga tondaye ntsámanana, er chë mandënga entšangbe ainanentšana ndoñe ntjajuánana chë bacna soyënga jtsamama juabnënga.

### 3

<sup>1</sup> Cristo cháuatayenama Bëngbe Bëtsá tojanma ora, enjamna mo tšëngaftángnaca Crístbeñe ošbuáchiyënga, chašmatayenama cha cuafjamcá. Chíyeca, tšëngaftangbe ainaniñe puerte šmochtseboše ndayá Bëngbe Bëtsá celoca tšëngaftangbiana yobomncá; y choca, Cristo uámana puestentše endëtbemana, Bëngbe Bëtsabe catšbioica. Y šmochtsinýinýnaye chca šmojtsebošama, ntšamo jtsamëse mora šmojtseyenama.

<sup>2</sup> Tšëngaftanga nýets tempo chë celoca soyëngama šmochtsejuabnaye, ndoñe chë nýe quem luarentše yomna soyëngama.

<sup>3</sup> Tšëngaftanga Crísoftaca cánýiñe mo canýacá jtsemnëse, jtsemnana mo tšëngaftanga ya cuafjobancá, er mora ya ndoñe quešmátiyena tempcá jtsamëse. Cristo, Bëngbe Bëtsáftaca cánýiñe mo canýacá endmëna, y Cristo endmëna nda mora tšëngaftangbe vida yojtsinýena.

<sup>4</sup> Ndegombre, Cristo endmëna nda endama tšëngaftanga tšabe vida chašmotsebomnama; y quem luarentše cha cachiñe chaojtonýná ora, tšëngaftángnaca chentše cháftaca šmochántsemna, y chora ntšamo Cristo corente uamaná y bëtsá yomnama Bëngbe Bëtsá yochjinýanýiyá, tšëngaftangbiámncaca echanjínýanýiye más bëtsétsanga y uamanënga šmojtsemnana.

#### *Tempsca vida y morsca vida*

<sup>5</sup> Tšëngaftanga, ntšamo chë nýe quem luarama enójuabnayënga mondbetsebošcá bošana lempe šmochtsajbaná. Ndocná chaondëtseboše ndaye bacna soye boyabása o shembásaftaca jtsamana, ni chca soyënguiñe ndoñe chaondëtsejuabná; ndoñe chaondëtsiyena nýe ínýengbiana bacna juabnënga jtsebomnëse, y ndoñe chaondëtseboše

nÿe bÿetscá soyÿenga ínÿengbiama más jtsebomnama, er chca jtsamana jtsayanana, chabiama más yojtsámana soyÿenga jtsebomnana, Bÿengbe Bÿetsá jatsbobonshánama.

<sup>6</sup> Er entsanga mondmëna y chÿenga chca soyÿenga jtsamama jtsebošana, y Bÿengbe Bÿetsá ndoñe ntseyeunanana. Chca entsángaftaca Bÿengbe Bÿetsá puerte bochanjetna, y echanjamánda chÿe uabouana castigo chÿengbeñe chaotsemnama.

<sup>7</sup> Y tempo, tsÿengaftanga šmojaniyena jtsamëse, sempre nÿe chca bacna juabnÿengaca,

<sup>8</sup> pero mora tsÿengaftanga cmontsamna lempe quem soyÿenga stÿÿsoye jaquédana: ínÿengaftaca jetnana, ínÿengaftaca rábiaca jtsemnana, ínÿabioye ntšamo jáborlama jtsebošana, ínÿengbioye joyánguanguana, y ndoñe tsabe palabrenga jtsóyebuambnayana.

<sup>9</sup> Ndoñe šmattsenbuambnaye, er ntšamo tempo šmojamncá mora tsÿengaftanga ya ndoñe cachcá quešmátmëna, y mora ndoñe quešmátiyena jtsamëse ntšamo tempo šmojanamcá.

<sup>10</sup> Y mora tsÿengaftanga šmojashjache jtsemnama mo tsmëma entsangcá, y ntšamo tempo šmojanamcá ndoñe cachcá quešmátama. Bÿengbe Bÿetsá chca tsmëma entsangcá tcmojábiamana; y cha nÿets tempo yojtsama, tsÿengaftanga cada te más ntšamo cha yomncá chašmotsemnama, chca, corente tsabá cha chašmuábuatmanama.

<sup>11</sup> Chíyeca, ndayá Bÿengbe Bÿetsá tojamama, ndoñe judiÿenga y judiÿenga cachcanga mondmëna; chÿe más delicadentse base bobachtema tÿÿsenÿenga ndoñe más uámanÿenga quemátmëna chÿe ndoñe chca mondmÿenÿengbiama; chÿe inÿe luarÿengocana áshjajnÿenga, bÿen tjoye oyenÿenga, chÿe nÿe ínÿabiamana nÿets tempo oservÿenÿenga y chÿe cachÿengbiama trabájayÿenga, nÿetscanga cachcanga mondmëna. Chÿe nÿe ndayá iuámana endmëna Crístbeñe jtsošbuáchiyana y nÿetsca ošbuáchiyÿengbe ainaniñe cha yojtsemna jtsemándayama.

<sup>12</sup> Tsÿengaftanga Bÿengbe Bÿetsábenga šmondmëna. Cha cmondábabuanÿeshana y tcmojabacacá chabe entsanga chašmotsemnama; chíyeca, tsÿengaftanga cmontsamna ínÿenga jtsinÿanÿnayana nÿetscangbiama jóngmiamana šmuamanama, tsabe juabna ínÿengbiama sempre šmnÿetsebomnama, cada ona chÿe ínÿenga chabiamana más uámanÿenga cuaftsemncá imnÿetsejuabnayama, nÿetscanga puerte bonshanánaca šmnÿetsÿenÿayama, y nÿetsca padecena soyÿenguiñe corente uantadÿenga šmomnana.

<sup>13</sup> Nÿetscanga šmochtsenÿuantana y šmochjenperdóna, nderado ntšamo nda ínÿabioye tbojaborlá y chama cha tbojtsatsÿetsná ora. Ntšamo Bÿengbe Bÿetsá tsÿengaftanga tcmojaperdonacá, tsÿengaftángnaca cachcá ínÿenga šmochjáperdonaye.

<sup>14</sup> Lempe chÿe soyÿengama más enduámana nÿetscanga jtsenbobonshánana. Nÿetscanga šmojtsenbobonshánëse, tsÿengaftanga šmochantsobena sempre lempe chÿe inÿe soyÿenga corente tsabá jtsamana, ntšamo ndegombre chÿe soyÿenga jamama yomncá.

<sup>15</sup> Cristo endama tsÿengaftangbe ainaniñe tsabe ebionana chašmotsebomnama. Chÿe tsÿengaftangbe ainaniñe tsabe ebionánaca šmochtsiyena nÿetscanga natjÿembana, Jesucrístbeñe ošbuáchiyÿenga quetsomñecá. Bÿengbe Bÿetsá tcmojáchembo tsÿengaftanga nÿetscanga cánÿiñe mo canÿe cuerpcá chašmotsemnama, y chca, natjÿembana chašmotsiyenama. Bÿengbe Bÿetsá sempre šmochtsatschuanaye.

<sup>16</sup> Chÿe Crístbe puerte tsabe buayenana soyÿenga tsÿengaftangbe ainaniñe nÿets tempo šmochtsambaye. Nÿets osertanánaca šmochtsenbuátÿembaye y šmochtsenbuayiynaye. Nÿets ainánaca šmochjacánta chÿe Salmos librÿešañe uabemana cantÿenga, chÿe Jesucrístbe soyÿengama cantÿenga, y chÿe Bÿengbe Bÿetsabe Espíritu iuama tsÿengaftanga chašmotsobena jacántama soyÿenga; chca šmochjama Bÿengbe Bÿetsá jÿÿtschuayama.

<sup>17</sup> Y lempe ntšamo chašmojtsama o chašmotsichamcá, Bÿengbe Utabná Jesúsbeñe ošbuáchiyÿenga quetsomñecá chca šmochjama, siempre Bÿengbe Bÿetsá Bÿengbe Taitábioye, chábeyeca jtsatschuanayÿese.

*Ntšamo ínÿengaftaca jtsiyenama*

<sup>18</sup> Shémanga, šmochtsetátšëmbo tšëngaftangbe boyanga chë yebnentša mándayënga imomnama, y nyëts tempo chca jtsejuabnayëse šmochtsiyena, er tšëngaftanga Bëngbe Utabnábeñe ošbuáchiyënga quetsomñecá, chca cmontsamna.

<sup>19</sup> Boyanga, tšëngaftangbe shémanga sempre šmochtsababuánjeshana, y podesca palabrëngaca ndoñe šmattsëtsësnaye.

<sup>20</sup> Básenga, tšëngaftangbe bëtsëtsanga nyëtscañe šmochtsayaunana; chca šmojtsamëse, Bëngbe Bëtsá oyejuayá echántsemna.

<sup>21</sup> Taitanga, ndoñe šmattsama tšëngaftangbe básenga chauetënama, ainaniñe tondaye añémoca chënga ndoñe chamondëtsatsmënama.

<sup>22</sup> Tšëngaftanga chë nyëts tempo nye ínÿabiana oservénënga, tšëngaftangbe nduiñënga nyëtscañe šmochtsayaunana, y ndoñe nye chënga tcmojtsënÿa ora, mo nda nye entsangbe delante tšabá joquédama tojtsebošacá, ndayá chënga šmochtsayaunana nyëts ainaniñe ndegombre tšabe juabnéngaca, er tšëngaftanga Bëngbe Utabnabiana corente respeto šmond bomna.

<sup>23</sup> Lempe ntšamo chašmojtsamcá, nyëts tšëngaftangbe añémoca šmochtsama, mo Bëngbe Utabná ndegombre cuaftseservencá, y ndoñe nye entsangbioycá.

<sup>24</sup> Tšëngaftanga ya šmondëtatšëmbo, ntšamo cha chabe entsanga tojašebuachenacá mo uacaná, Bëngbe Utabná tšëngaftanga cmochjátšatayama. Er Cristo, chë Utabná, endmëna ndábenga tšëngaftanga šmomnana, y cha šmondëserveda.

<sup>25</sup> Pero chë ndoñe tšabe soyënga tontsamábioye, Bëngbe Bëtsá bochanjacastíga, ntšamo chë entsá bacna soyënga tojamcá, er Bëngbe Bëtsabiana nyëtscanga cachcá monduámána.

## 4

<sup>1</sup> Y tšëngaftanga, ndëmuanÿengbiana ínÿenga nyëts tempo imoserveda, nyëtsca soyënguiñe tšabá šmochtsama, y nyëtscangbiana cachcá šmochtsemna, chë nyëts tempo nye tšëngaftangbiana oservénëngaftaca, er tšëngaftanga šmondëtatšëmbo celoca canÿa endmëna, ndabiana tšëngaftángnaca oservénënga šmondmëna.

### *Osbuáchiyënga jábuayenama*

<sup>2</sup> Nyëts tempo Bëngbe Bëtsáftaca šmochtsencuéntaye, ntšamo šmojtsichámuama botamana jtsejuabnayëse y Bëngbe Bëtsá jtsatschuanayëse.

<sup>3</sup> Bëngbe Bëtsáftaca cha šmojtsencuénta ora, bëngbiámnaca chašmochtseimpadana, cha chaoma bënga fchayobenama Bëngbe Bëtsabe palabra Cristbiana entsanga jábuayenama, chë buayenana soye ndayama tempo entsanga ndoñe monjántatšëmbo. Atše chë buayenana soye entsanga abuátambaye causa, mora cárceloye sentsëtámëna.

<sup>4</sup> Chcasna, Bëngbe Bëtsá atšbiana šmochtseimpadana, atše chayobenama chë buayenana soyënga entsanga jabuátambama, y chë soye atše chaima chënga corente tšabá catafjosertaycá, er atše šontsemna chca jamana.

<sup>5</sup> Smochtsiyena nyëtsca soyënga osertanáncá jtsamëse chë Jesucristbeñe ndošbuáchiyëngaftaca, y chca, nyëts tempo ínÿenga šmochtsinÿanÿnaye tšëngaftanga Jesucristbeñe ošbuáchiyënga bëtsemnana.

<sup>6</sup> Inÿengaftaca chašmojtsencuénta ora, šmochtsama ntšamo šmojtsoyebuambnacá chëngbiana tšabá chaotsemnana, y soyënga šmochtsichamo nyëtscanga oyejuayana chamotsebomnana; y šmochtsetátšëmbo ntšamo cmojtsamna cada cánÿabioye jojuana.

### *Jtadiósoftanama*

<sup>7</sup> Jesucristbeyeca bëngbe bonshana catšata Tíquico, canÿe trabajayá tšabe palabra bomná y Bëngbe Utabnabiana bëngaftaca oservená, tšëngaftangbioye noticiënga echanjuamba ndayá átšeftaca tojopasama.

<sup>8</sup> Chíyeca cha tšëngaftangbioye sentsichamná, chca, tšëngaftanga chašmotsetatšëmbuama ndayá bëngaftaca yojtsopasana, y cha chacmañémuyama.

<sup>9</sup> Cháftaca Onésimo echanjá, Jesucristbeyeca bēngbe bonshana catšata; cha canýe tšabe palabra bomná endmēna, nda tšēngaftangbiocana tonjánabo. Chata tšēngaftanga cmochanjácuntaye lempe ntšamo muiñe yojtsopasancá.

<sup>10</sup> Aristarco, muentše átšeftaca cárceloje utamená, cmontsacheuaná. Y Marcos, Bernabebe primo, chánaca cmontsacheuaná. Tšēngaftanga ya buayenánēnga šmontsemna ndayá jamama cmojtsamnana, Marcos tšabá jofjama, cha tšēngaftanga jautsētsayama tojase.

<sup>11</sup> Jesús, chē Justo cánaca uabainá, chánaca cmontsacheuaná. Quem pueblentša nýetsca judiēnga ošbuáchiyēnguentšana, nýe chē unga átšeftaca mondētrabája, Bēngbe Bētsabe amēndayana entšángbioye chaóshjanguama, y chēnga mondama atše ainaniñe bēts añemo chaitsebomnama.

<sup>12</sup> Epáfrasnaca cmontsacheuaná, inýe tšēngaftangbiocá y cha Cristo Jesusbiana jatrabájama endoservena. Cha nýets tempo tšēngaftangbiana Bēngbe Bētsábioye tša bochandbétseimpadana, tšēngaftanga Bēngbe Utabnábeñe ošbuáchiyana ndocna te chašmondájbana, y nýets tempo chašmotsiyena lempe jtsamēse, ntšamo chē Jesucristbeñe corente ošbuáchiyēnga jtsiyenana yojtsamncá; y chca, tšēngaftanga corente šmochántsetatsēmo ntšamo šmojtsamcá ndegombre yomna ntšamo Bēngbe Bētsá yobošcá.

<sup>13</sup> Cach atše sēnjinye y sēntsobena jayanama ntšamo cha jabuache yotrabájama, tšēngaftanga jujabuáchama, chē Laodicea puebloquēnga y Hierápolis pueblaca oyenēgnaca.

<sup>14</sup> Lucas, bēngbe bonshana ashnayá, cmontsacheuaná; y Démasnaca.

<sup>15</sup> Chē Laodiceoca Jesucristbeyeca catšátanga bēngbe cuenta šmochjácheuaye. Ninfábioynaca šmochjachuaye, y nýetsca ošbuáchiyēnga chē Bēngbe Bētsá jētschuayama chabe yebnentše jénefnama imuamanēgnaca.

<sup>16</sup> Quem tsbuanácha chašmojualiá chentšana, Laodiceoca ošbuachiyēngbioye šmochjuíchmua, chócnaca mēcha chamualiamá; y tšēngaftángnaca šmochjualiá chē Laodiceoca ošbuachiyēngbioye tmonjanichmó tsbuanácha, chēcha tšēngaftangbioye chaojuášhjangora.

<sup>17</sup> Arquipo šmochjauyana yejuana chaotsantješna chē Bēngbe Bētsá tbojabonyé trabajo sempre tšabá chaotsocumplínama.

<sup>18</sup> Atše Pablo, nýe quem palabrēnga tšēngaftanga jacheuayama cach atšbe cucuátšeca sēntsabiamná. Smochtsenójuabnaye atše utamená stsemnama. Atše, Bēngbe Bētsá sēntseimpadana, cha chaoma tšabe bendicionēnga tšēngaftangbeñe chaotsemnama.

# 1 Tesalonicenses

## *Jacheuayama*

<sup>1</sup> Atše Pablo, Silvano y Timotéoftaca, quem tsbuanácha sentsabiamná tšëngaftangbiamá, chë Tesalónica bëts puebloca Jesucristbeñe ošbuáchiyëngbiamá, tšëngaftanga chë Bëngbe Bëtsá chë Taitá y Bëngbe Utabná Jesucristoftaca cányiñe mo canyáca šmomnënga. Atše sëntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnama, y tšëngaftanga ainaniñe tšabe ebionana chašmotsebomnama.

## *Pablo Bëngbe Bëtsábioye tbojtanchuá chë Tesalónica pueblentsa entsangbe ošbuáchiyama*

<sup>2</sup> Bënga sempre Bëngbe Bëtsá fsëndëtschuaná tšëngaftangbiamá, y bënga cháftaca ftsencuénta ora, tšëngaftangbiamá fchandbétseimpadana.

<sup>3</sup> Bënga, Bëngbe Bëtsá chë Taitáftaca ftsencuénta ora, fsëndbétseñojuabnaye ntšamo tšëngaftanga šmotrabájama, Jesucristbeñe ošbuáchiyana šmobómnayeca; ntšamo tšëngaftanga tša ínÿenga šmëjabuáchana, Jesucristo šmobobonshánayeca; y ntšamo tšëngaftanga, ndocna te ntjajbanacá, jtsošbuáchiyëse Bëngbe Utabná Jesucristbeñe šmobátmanama.

<sup>4</sup> Jesucristbeyeca catsátanga, bënga fsëndëtatšëmbo Bëngbe Bëtsá cmababuánÿeshanama, y cha tcmojábacacama chábenga chašmotsemnama.

<sup>5</sup> Bënga chë tšabe noticiënga Jesucristbiamá tcbonjanabuayená ora, ndoñe nÿe bënga jóyebuambayëse chca quenjatsmëna, ndayá chë Uámana Espíritbe obenanácna, y bënga corente jtsejuabnaye chë buayenánana ndegombre soye bétsemnama. Tšëngaftanga corente šmondëtatšëmbo ntšamo bënga ftsjamna tšëngaftangaftaca fsënjamna ora, tšabe soyënga tšëngaftangbiamá nguayiñe.

<sup>6</sup> Chora, ntšamo bënga fsënjanamcá y ntšamo Bëngbe Utabná enjaniyencá, tšëngaftanga šmonjanontsé amana; y chë buayenánana šmonjanóyëngacñe chë Uámana Espíritu tcmojanatšatá oyejuayánaca, masque ínÿenga tmojamna tšëngaftanga puerta chašmosufrima.

<sup>7</sup> Mëntsá, tšëngaftanga uánatsanënga šmonjanobiamá ntšamo ndegombre jtšiyenama, nÿetsca Macedonia y Acaya luarentša Jesucristbeñe ošbuáchiyëngbiamá.

<sup>8</sup> Tšëngaftanga šmojoyebuambá Bëngbe Utabná Jesucristbe palabrama. Mora, ndoñe nÿe Macedonia y Acaya luarentše entsanga chama quemátstatšëmbo —nÿets luarenache entsángnaca montsetátšëmbo ntšamo tšëngaftanga Bëngbe Bëtsábeñe šmojtsošbuáchema — y chca, bënga tondaye más quešnátëjamoto tšëngaftangbiamá jatichámuama.

<sup>9</sup> Cach entsanga montsoyebuambná chë bënga tcbonjánabuache ora tša tšabá tšëngaftanga šcojanëbuajama. Chëngnaca montsichamo ntšamo tšëngaftanga šmojtšajbaná chë šmojanjuabná diosënga yojamna soyënga adórayana y šmojanontsé chë tšabe benache jtishachama, y chë Bëngbe Bëtsá ndegombrá y ainá jaserviama,

<sup>10</sup> y chca, chabe Uaquiñá Jesús jobátmama; mua celocana echanjésabo; chabiamá Bëngbe Bëtsá tojanma obanënguentsana cháuatayenama, y cha šochanjátsebacaye chë uabouana castigüentsana, Bëngbe Bëtsá entsangbe bacna soyëngama chëngbiamá yobomentsana.

## 2

## *Ntšamo Pablo yojantrabája Tesalónica puebloca*

<sup>1</sup> Cach tšëngaftanga, Jesucristbeyeca catsátanga, šmondëtatšëmbo bënga tcbonjánabuache ora ndoñe nÿe bonamente quenjatsmënama.

<sup>2</sup> Tšëngaftanga šmondëtatšëmbo, bënga cabá tšëngaftangbioye nda ora, Filiposoca šonjanëyánguango y bacá šonjánaborlama; y masque tšëngaftangbioca bëngbe contra

entsanga monjamna, Bëngbe Bëtsá tonjanma bënga fchayobená chë tšabe noticiënga bëtsá añémoca jabuátambama.

<sup>3</sup> Er bënga entsángbioye bostero soyënga ndoñe queftsjatanabuayiyná, tšëngaftangbiama bacna soyënga ndoñe queftsjatanboše, y entsanga jáingñama ndoñe queftsjatanoyebuambná.

<sup>4</sup> Bëngna inyetsá; Bëngbe Bëtsá yojanjuabná bënga chabe trabajo jamama obenënga ftsjamna ca, y chca, šonjanëbuáyana chabe tšabe noticiënga entsanga jabuátambama, y chca bënga fsëndoyebuambná; chíyeca bënga ndoñe nye entsangbe bominyiñe tšabá chaotsinýnama queftsátama, ndayá nye Bëngbe Bëtsabiama, nda chë ndayá bëngbe ainaniñe yomnama yotátšëmbo.

<sup>5</sup> Ntšamo tšëngaftanga corente šmondëtatšëmbcá, bënga ndocna te tšëngaftangbiama tšabe soyënga tifjánayana, tšëngaftanga bëngaftaca oyejuayënga chašmotsemnama; y ntšamo tšëngaftanga cbonjanëtsëtsnacá ndoñe quenjatsmëna nye tšëngaftangbentšana ba soyënga bëngbiama josháchiñama. Bëngbe Bëtsá chama yotátšëmbo.

<sup>6</sup> Ndocna te bënga queftsatsnguá entsanga más uamanëngcá bënga chašotsabiamnama, ni tšëngaftangbentšana, ni ínýengbentšana.

<sup>7</sup> Masque bënga, Cristbe ichmónënga bëtsemnama, matifjanobená tšëngaftanga nye sempre jtsamëndayana, bënga ndoñe chca chibiátanma; bënga corente jtsababuánýeshanëse cbonjánanyëna, ntšamo canye mamá chabe básenga jtsabëchayana y corente bonshanánaca jtsanýenana.

<sup>8</sup> Tša cbonjánababuanýeshanayeca, bënga ndoñe nye chë Bëngbe Bëtsabe tšabe noticiënga checbënjatanabuayená, tšëngaftanga chiñe chašmotsošbuáchema ntšamo bënga fsëndošbuachecá, ndayá bëngbe vidënga jáshbiamnaca fsënjanprontana tšëngaftangbe tšabiama. ¡Tša cbondábabuanýeshana!

<sup>9</sup> Jesucristbeyeca bëngbe catšátanga, tšëngaftanga šmenabouínýna ntšamo bënga bëtsá y jabuache fsënjantrabajama, Bëngbe Bëtsabe tšabe noticiënga abuayiynayiñe y bëngbe vida onguayiñe, chca, tšëngaftanga ndoñe chacmondëtsamnama bëngbe uajabótama bënga jatatsatnayama.

<sup>10</sup> Cach tšëngaftanga šmondëtatšëmbo y Bëngbe Bëtsánaca, ntšamo bënga ftsjamna tšëngaftanga chë ošbuáchiyëngaftaca fsënjamna ora; fsënjaninyëna ntšamo Bëngbe Bëtsá tšabá tbojtsinýancá, nyetscángaftaca fsënjánama ntšamo jamama šojanamncá, y ndocná quenátobena jatichámuana ntšamo fsënjanamcá ndoñe tšabá yonjamna ca.

<sup>11-12</sup> Tšëngaftanga šmondëtatšëmbo, bënga bëtsá jóyebuambayëse cada ona tšëngaftanguentsá cbonjanëjabuachanama y cbonjánañemuama, ntšamo canye taitá chabe básëngaftaca endbetsamcá. Bënga bëtsá cbonjanëtsëtsná ntšamo Bëngbe Bëtsá tšabá tbojtsinýancá chašmotsiyenama; y Bëngbe Bëtsá cmontsëbuájajana chabe amëndayoye jamashënguama y chabe obenana y buashinýinýanana jinýama.

<sup>13</sup> Bënga, Bëngbe Bëtsabe tšabe soyënga cbonjanabuayiyná ora, ntšamo tcbonjanëyancá tšëngaftanga šmonjanuena y šmontsanošbuaché mo Bëngbe Bëtsábiocana buayenanancá, y ndoñe nye entsangbe oyebuambnayanancá. Y ndegombre Bëngbe Bëtsabe buayenánana endmëna, y chë palábraca, tšëngaftanga chë chábëñe ošbuachiyëngbeñe Bëngbe Bëtsá bëtsá soyënga yojtsama. Chama sempre Bëngbe Bëtsá fsëndëtschuaná.

<sup>14</sup> Jesucristbeyeca catšátanga, cach tšëngaftangbe luarentša entsanga cmonjanëcamena ora y šmonjansufrina, šmonjanpasá ntšamo chë Judeoca Bëngbe Bëtsábeñe ošbuachiyëngcá enefjuanënga tmonjanpasacá, y chëngna Cristo Jesusbe entsanga mondmëna. Chënga tmonjansufrí cach luarentša entsanga, chë judiënga, chëngbioye monjanëcamena ora.

<sup>15</sup> Chë judiëngbe bëts taitanga, Bëngbe Bëtsabe juabna oyebuambnayëngbioye tmojtsanëbaye, y ntšamo chëngbe bëts taitanga tmojanmncá, chëngnaca Bëngbe Utabná

Jesús bioye tmojanóba, y chënga mondama bënga chaftsesufrínama. Chënga ndoñe tšábënga Bëngbe Bëtsabe bominyiñe quemátsmëna, y nyetsca entsangbe contra montsemna.

<sup>16</sup> Chë ndoñe judiëngbioye, Bëngbe Bëtsá cháuatsebacama jábuayenama fstseboše ora, chë judiënga bëtsá jtsamana bënga ndoñe fchandobenama chca jamama. Judiënga nyets tempo bacna soyënga monjánama; pero chë entsanga jábuayenama bënga ndoñe fchandobenama jtsamana, entsemna chë último bacna soye ntšamo chë judiënga jamama imojtsobencá, más ya ndoñe; y mora, cabana, Bëngbe Bëtsá ya puerte chëngaftaca tbojetna y echanjácastigaye.

*Pablo tša yojánboše, Tesalónica puebloca entsanga jányama*

<sup>17</sup> Jesucristbeyeca catsátanga, bënga tšëngaftangbentsana baseftayté jëftseboचना şonjanotocá ora, masque ndoñe choca tšëngaftangftaca queftsjátanmëna, sempre tšëngaftangbiamas fsënjanenuabná, y tša fsënjánboše tšëngaftangbioye jtésana jautsëtsayama.

<sup>18</sup> Bënga fsënjánboše tšëngaftangbioye jésana; chíyeca cach atše Pablo, ba soye sënjanóshenguënja jobenayama choye jésama, pero Satanás yojantrabája bënga ndoñe fchandobenama chca jamama.

<sup>19</sup> Atše sentsanboše tšëngaftanga jautsëtsayama, er tšëngaftangbeyeca Bëngbe Utabná Jesusbe delante, cha yochjésabo ora, ntšamo tšëngaftanga şmoyenama, bënga puerte jtsoşbuáchiyëse fchantsobatmana, corente oyejuayënga fchtsemnana y más bëtsëtsanga fchtsemnana.

<sup>20</sup> Aíñe, ndegombre, ntšamo tšëngaftanga şmoyenama, bënga bëtsá añémoca ntšamo tšëngaftangbeñe tifjamama fsëndbëtsoyebuambnaye, y tša oyejuayënga fsëntsemna.

### 3

<sup>1</sup> Chíyeca ya ndoñe chibiatanobená más jatobátmanana tšëngaftanga jautsëtsayama; as fsënjanjuabó nye bëndata Atenas bëts pueblentše joquédana,

<sup>2</sup> y jíchmuana Jesucristbeyeca bëngbe catsata Timoteo, chë bëngaftaca trabajayá, Bëngbe Bëtsábioye oservéniñe, tšabe noticiënga Cristbiamas entsanga abuyayinayíñe. Fsënjanichmó chacmañémuayama y chaotsamama tšëngaftanga Jesucristbeñe más chaşmotsoşbuáchema;

<sup>3</sup> y chca, ndocná Jesucristbeñe oşbuáchiyana chaondájbanama, masque tšëngaftanga Jesúsbeñe oşbuáchiyënga bëtsemnana, ínÿënga imojtsama chaşmotsesufrínama. Er cach tšëngaftanga şmondëtatşëmbo bënga şojtsamna chca quem luarentše jëftsepadecénana.

<sup>4</sup> Y cabá tšëngaftangftaca fsënjëftsemna ora, tcbonjanéyana bënga şojánamna jasúfriana; y ndegombre chca tonjopasá, ntšamo tšëngaftanga ya şmondëtatşëmbá.

<sup>5</sup> As y chë tšëngaftangbiamas jtsetatşëmbuama más jatobátmanana ndoñe quetstëtsoebenayeca, sënjanjuabó şojëtsemna Timoteo jíchmuana. Sënjanichmó atše jtsetatşëmbuama aíñe bëtsá o ndoñe tšëngaftangbe oşbuáchiyana Jesucristbeñe tayojamnana, er atše yapa sënjanjuabná nderado Satanás tojanmas tšëngaftanga bacna soyënga chaşmotsamama, y chca, bëngbe trabajo tondayama chaondëtsoşservénama.

<sup>6</sup> Pero mora, Timoteo tšëngaftangbiocana tontashjango y tonjúshjango noticiënga, y bënga chama oyejuayënga fsëntsemna, ntšamo tšëngaftanga bëtsá Jesucristbeñe şmojtsoşbuáchema y nyetscanga şmenbobonshánama. Cha şonjacuntá ntšamo tšëngaftanga corente oyejuayënga bëngbiamas şmuatenajuabnama, y ntšamo tšëngaftanga tša şmojtseboše bënga jányama, cachcá ntšamo bënga tšëngaftanga jányama tša fsëntseboşcá.

<sup>7</sup> Quem sóyeca, Jesucristbeyeca catsátanga, y mora chë bënga nyetsca chë padecena soyënga fstsebomna ora y ínÿënga bënga jasúfriana imojtsama ora, bëts añemo fsëntsebomna, ntšamo tšëngaftanga tša Jesucristbeñe şmojtsoşbuáchema jtsetatşëmbëse.

<sup>8</sup> Jtsetatşëmbuana tšëngaftanga sempre puerte tšabá Bëngbe Utabnáftaca şmoyenama, entsama bënga más añémoca chaftsiyenama.



<sup>9</sup> Mora fchantsobena Bëngbe Bëtsá jtsatschuanayana tšëngaftangbiana, y chë tšëngaftangbeyeca chabe delante bënga oyejuayana ftsbomnámnaca.

<sup>10</sup> Cada te, bnëtë y ibeta, tša Bëngbe Bëtsá fsëndétseimpadana jobenayama tšëngaftanga jautsëtsayama chašualesenciama, Bëngbe Bëtsabe palabra tšabá chašmobedecema, chë buayenánana ntšamo yojtsashbencá jabuátambama.

<sup>11</sup> Bënga, Bëngbe Bëtsá fsëntseimpadana, cachá y Bëngbe Utabná Jesús, chašújabuache bënga fchayobenama tšëngaftangbioye jama jautsëtsayama.

<sup>12</sup> Y Bëngbe Utabná chaoma más bëtscá chašmotsenbobonshánama, y cachcá corente nÿetscángaftaca, ntšamo bënga cbondababuanÿeshancá.

<sup>13</sup> Chca, tšëngaftangbe ainaniñe bëtscá añemo šmochántsebmoma; y Bëngbe Utabná Jesús cachábengaftaca chaojésabo ora, Bëngbe Bëtsá Bëngbe Taitabe delante ndocná chaondayana, ntšamo tšëngaftanga šmojamcá ndoñe tšabá yontsemna ca, er tšëngaftanga šmondmëna Bëngbe Bëtsábenga, nÿe cha jtseservénama.

## 4

### *Ntšamo jtsiyenama, Bëngbe Bëtsá oyejuayá chaotsemnama*

<sup>1</sup> Y mora inÿe palabra šmochjatspaséncia. Jesucristbeyeca bëngbe catsátanga, tšëngaftanga bëngbentsana šmonjanatsjinÿe ntšamo jtsiyenana cmojánamna, ntšamo Bëngbe Bëtsábioye oyejuayá jabemama yomncá, y ndegombre chca tšëngaftanga šmondoyena. Y mora Bëngbe Utabná Jesusbe cuenta, cbontsaimpadana y becá cbontsëtsëtsná más chca chašmotsamama.

<sup>2</sup> Tšëngaftanga šmondëtatsëmbo ndayá tifjánayana ntšamo tšëngaftanga chašmotsiyenama, y chca fsënjanma Bëngbe Utabná Jesús chca jamama šonjanamëndáyeca.

<sup>3</sup> Bëngbe Bëtsá endboše tšëngaftanga chašmotsiyenama mo Bëngbe Bëtsabengcá, ndocná bacna soyënga boyabása o shembásaftaca chaondëtsamama,

<sup>4</sup> y nÿetscanga chamotsobena ntšamo canÿe shema jonguanguana, chë ntšamo canÿa Bëngbe Bëtsábia yomná jamama ibomncá, y ntšamo entsangbe bominÿiñe tšabá yomncá,

<sup>5</sup> y ndoñe chabondónguango nÿe cháftaca bacna soyënga chëngbe cuérpoca jamama, ntšamo chë Bëngbe Bëtsábioye nduabuátmënga mondbetsamcá.

<sup>6</sup> Chë palabriñe ndocná chabe catsátbioye chabondëingñé, chë catsatbe shémaftaca bacna soye jamëse, er chca amëngbioye Bëngbe Utabná corente echanjácastigaye. Chíyeca bënga ya bëtscá chama tcbonjabuayená.

<sup>7</sup> Er Bëngbe Bëtsá ndoñe šonjánachembo bacna soyënga boyabása o shembásaftaca jtsamama, ndayá ntšamo tšabá yomncá jtsamama, ntšamo chabe entsanga mondbetsamcá.

<sup>8</sup> Mëntšá, nda quem buatëmbana soyënga tojtsábotena, cha ndoñe nÿe entsanga jtsëbátenana, ndayá Bëngbe Bëtsábioye, nda tšëngaftangbe ainaniñe Uámana Espiritu cháuamashënguama tojama.

<sup>9</sup> Atše ndoñe quešnátsmëna juabuábiamana ntšamo cmojtsamna ínÿenga Jesucristbeñe ošbuáchiyënga jtsababuánÿeshanama, er cach Bëngbe Bëtsá tcmónjabuatambá nÿetscanga chašmotsenbobonshánama.

<sup>10</sup> Y ndegombre, tšëngaftanga chca šmondama nÿetsca Macedonia luarentše Jesucristbeñe ošbuáchiyëngaftaca. Pero cbontsaimpadana, Jesucristbeñe catsátanga, más chca chašmotsamama.

<sup>11</sup> Nÿa sempre quem soyënguiñe šmochtsentsëna: natjëmbana jtsiyenana, ínÿengbe soyënguiñe ndoñe ntsontrëmeténana, y ndoñe ntjatobátmanana nÿe ínÿenga tšëngaftangbiana chamotsetrabájama, ntšamo tcbonjanëyancá tšëngaftangaftaca fsënjanma ora;

<sup>12</sup> chca šmochtsama, chë ínÿenga Jesucristbeñe ndošbuáchiyënga chacmotsar-respetánama, y ndocnábeñe ntjatobatmancá šmochantsobena jtsiyenana.

### *Bëngbe Utabná quem luaroye yochjésabo ora*

<sup>13</sup> Bëngbe catsátanga, bënga fsëntseboşe tšëngaftanga ndegombre chašmotsetátšëmbo ntšamo chë obanëngaftaca yochjopásama, y chca, tšëngaftanga ndoñe ngmenánaca chašmondëtsemnana, mo chë inyëngcá, chë tcojóbanentsana ndoñe yontsemna jtayenama ca juabnayëngcá.

<sup>14</sup> Bënga fsëndošbuaché Jesús tojanóbana y tojtayanenama, y cachcá bënga fsëndošbuaché chë tmojóbanënga y Jesúsbeñe tmojtsošbuáchese, Bëngbe Bëtsá chëngbiama yochjama chë nyetsca tescama yomna tšabe vida Jesucrístoffaca chamotsebomnana, y quem luaroye cháftaca chamuatábama.

<sup>15</sup> Chë soyama bënga cbontsëtsëtsná ntšamo cach Bëngbe Utabná tojëftsanabuatambacá: Bëngbe Utabná chaojésabo ora, chë ošbuáchiyënga chë te cabá ainënga chamojtsemnënga, chábioye ndoñe quemochátinyëna tsbanánoca, más natsana chë ya obanënga chë te mochtayenëngbiama.

<sup>16</sup> Er entsanga mochanjouena canye mando juayebuáchenana, chë angelëngbe amëndayabe oyebuambnayana y chë Bëngbe Bëtsabe trompetéjua juajatétamnaca, y chora cach Bëngbe Utabná celocana echanjástjango. Y chë tmojóbanënga, Crístbeñe imojanošbuachenga, natsana mochántayena;

<sup>17</sup> chentsana, chë ainënga chamojtsemnënga chëngaftaca cányiñe Bëngbe Bëtsá šochanjúyamba, Bëngbe Utabná yochtsemnoca jashjanguama, chë celoca jantšetëshënga endmënoca; as chentsana nyetsca tescama cháftaca bënga mochántsemna.

<sup>18</sup> Quem palabrëngaca nyetscanga ndoñe más ngménana ainaniñe chašmondëtsebomna.

## 5

<sup>1</sup> Jesucrístbeyeca catsátanga, ndoñe quenátsiyta atše jubuábiamana mocna ora chë soyënga yochjopásama.

<sup>2</sup> Cach tšëngaftanga corente šmondëtatšëmbo, Bëngbe Utabná yochjésabo chama ndocná chaondëtsejuabná ora, mo canye atbëbanacá jashjanguana ibeta ndocná chama tonjat-sjuabná ora.

<sup>3</sup> Entsanga chamojayana: “Lempe tšabá endëtsomñe y tondayama quešnátamna játauatjana ca”, chora nye ndeolpe chë entsangbiama tša jasúfriama echanjóshjango, mo canye shembása šešona jtsebomnana ora nye ndeolpe jasúfriama jóntšancá; y ndegombre, entsanga chca jasúfriama quemochatotsbocá.

<sup>4</sup> Pero tšëngaftanga catsátanga, ndoñe quešmátiyena mo ibetiñcá, bacna soyënga jtsejuabnayëse y jtsemëse; y chca, Bëngbe Utabná chaojésabo ora, tšëngaftanga ndoñe auatjanánënga quešmochátsmëna, mo ndábioye canye atbëbaná tbojotbá ora, chábioye cuaftsauatjanacá.

<sup>5</sup> Nyetsca tšëngaftanga šmondmëna entsangbe juabna binynayabe básenga, y mo binyniñcá šmondoyena. Bënga ndoñe chë ibetiñe mandayabe básenga quemuátsmëna, y mo ibetiñcá ndoñe quemuátiyena;

<sup>6</sup> chíyeca bënga ndoñe quešnátamna jtsemnana mo chë cachëngbe cuerpo jenomándama ndobenëngcá, chë mo cuaftsemangcá oyenënga. Pero aíñe šontsamna mo chë fšnëngcá jtseyenana, bëngbe cuerpo jtsemándayëse y nyets tempo jtseprontánëse.

<sup>7</sup> Ibeta ora entsanga jtsemangana, y cach ibeta tojtsemna ora entsanga jotmenangana;

<sup>8</sup> pero bënga, chë binynentsëngna, šontsamna sempre bëngbe cuerpo jtsemándayana. Sontsamna Bëngbe Bëtsábeñe jtsošbuáchiyana y cha jtsebobonshánana, chë uayaná Satanasbiama jenéuyanama y cha jayënjanama, mo canye soldadcá, canye morocho soye cochaca jenáčochjatsana jtsevalentiana y ndoñe chamondëyënjanama. Y chë castigüentsana Bëngbe Bëtsá šochjátsebacamnaca puerte jtsošbuáchiyëse jtsobátmanana;

y chca, bēnga mochántsemna mo canye soldadca, cha canye casquēse juabuchētsana jenēuyanama.

<sup>9</sup> Er Bēngbe Bētsá ndoñe šonjáchembo bēnga chašotsamnama chē nyetsca tescama castigo jtsebmoma. Ndayá Bēngbe Bētsá šojabacacá, Bēngbe Utabná Jesucristbeyeca bēnga chamótsbocama.

<sup>10</sup> Cha bēngbiana tojanóbana, bēnga cháftaca cányiñe jtsiyenama chamotsobenama, masque ainēnga o obanēnga chamojtsemnēse, cha chaojésabo ora.

<sup>11</sup> Chiyeca, nyetscanga šmochtsenañēmuaye y šmochtsenájabuachana más jtsošbuáchiyama, ntšamo tšēngaftanga mora ya šmotsamcá.

### *Pablo choca ošbuáchiyēnga jábuayenama*

<sup>12</sup> Jesucristbeyeca catšátanga, cbontsaimpadana chašmotsarrespetana chē Bēngbe Bētsabiana tšēngaftangbeñe trabajayēngbioye, y chē Bēngbe Utabná tšēngaftanguentše tojábacanga uánatsanēnga chamotsemnana y ntšamo jtsiyenama cmojtsamnana chácmabuayenama.

<sup>13</sup> Cmotsamna chēnga jtsarrespetánana y jtsababuánjēshanana, ndaye trabajo chēnga imojtsamama. Natjēmbana nyetscángaftaca šmochtsiyena.

<sup>14</sup> Quem soyēnga chašmotsamámna cbontsaimpadana: jatrabájama ndoñe tmontsebošēngbioye šmochjucácana, añemo ndbomnéngbioye šmochjáñēmuaye, bētsca ošbuáchiyana ndbomnéngbioye šmochjújabuache, y uantadēnga nyetscángaftaca šmochtsemna.

<sup>15</sup> Cuedado šmochtsebmoma, nderado nda bacna soye tbojaborlase, ndocná ndoñe cachcá chabondētachnēnguama. Masna, nye šmochtsentšena nyets tempo tšabe soyēnga jtsamama cach tšēngaftanguentšēngaftaca y nyetsca entšangaftácnaca.

<sup>16</sup> Nyets tempo oyejuayēnga chašmotsemna.

<sup>17</sup> Sempre Bēngbe Bētsáftaca šmochtsencuéntaye.

<sup>18</sup> Nyetsca soyēnguiñe Bēngbe Bētsá šmochtsatschuanaye; er chca entsemna ndayá cha yojtseboše, bēnga Cristo Jesúsbeñe ošbuáchiyēngcá chamotsamama.

<sup>19</sup> Ndoñe šmattsama ntšamo chē Uámana Espíritu tšēngaftangbeñe yojtsamcá chaot-sopochocama.

<sup>20</sup> Ndoñe šmattsábotena chē Bēngbe Bētsabe juabna oyebuambnayēngbe buayenana soye.

<sup>21</sup> Yejuana šmochjúabuoye y šmochjayana, chē Bēngbe Bētsabe juabna oyebuambnayá yomna ca tojtsichamuabe buayenánama ndegombre Bēngbe Bētsábiocana tayóbocanama, y chentša tšabe soyēnga šmochjobuajo y sempre chca šmochtsama.

<sup>22</sup> Nyetsca bacna soyēnguentšana šmochtsojuánañe.

<sup>23</sup> Cach Bēngbe Bētsá, chē bēngbe ainaniñe tšabe ebionana chamotsebmoma endamá, nyetsca soyiñe tšábenga chacá chacmabiana, y nyets tšēngaftangbe espíritu, ainana y cuerpo chaotsinýena, Bēngbe Utabná Jesucristo chaojésabo orscama; y chora, ntšamo tšēngaftanga šmojamama bacna soyēnga yojtsemna ca ndocná chaondayanama.

<sup>24</sup> Nda tcmojúbuaja chábenga chašmotsemnana, cha sempre jtsamana ntšamo to-jayancá, y lempe cha echanjama.

### *Inye rueguēnga chēngbiana y jtadiósoftanama*

<sup>25</sup> Jesucristbeyeca catšátanga, Diosmanda, bēngbiámna Bēngbe Bētsá šmochtseimpadana.

<sup>26</sup> Nyetscángbioye mo Jesucristbeyeca catšatangcá šmochjácheuaye, jtenámochēse, ntšamo cach tšēngaftangbe pamíllanga puerta bonshanánaca šmondbetsacheuanaycá.

<sup>27</sup> Cbontsamēnda quem tsbuanácha nyetsca Jesucristbeñe ošbuáchiyēnga chašmēbuáliama, y chca séntsama, Bēngbe Utabná chca jamama šojanmandáyeca.

<sup>28</sup> Atše sěntseimpadana Běngbe Utabná Jesucristo, chaoma tšabe bendicioněnga tšěngaftangbeñe chaotsemnama.

## 2 Tesalonicenses

### *Jacheuayama*

<sup>1</sup> Atše Pablo, Silvano y Timotéoftaca, quem tsbuanácha sentsabiamná tšëngaftangbiana, chë Tesalónica bëts puebloca Jesucristbeñe ošbuáchiyëngbiana, tšëngaftanga Bëngbe Bëtsá chë Taitá y Bëngbe Utabná Jesucristoftaca cánÿiñe mo canÿacá šmomnënga.

<sup>2</sup> Atše sëntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnana, y tšëngaftangbe ainaniñe tšabe ebionana chašmotsebmoma.

### *Cristo chaojésabo ora, ntšamo entšanga tmojamama Bëngbe Bëtsá echanjayana*

<sup>3</sup> Jesucristbeyeca bëngbe catšátanga, šontsamna nÿets tempo Bëngbe Bëtsá tšëngaftangbiana jtsatschuanayana, ntšamo tšëngaftangbiana jamama šojtsëtocancá, er tšëngaftanga cada te más ošbuáchiyana šmontsebmoma, y ntšamo tšëngaftanga nÿetscanga šmojtsebomnana, tempscama más yojtsemna.

<sup>4</sup> Tšëngaftangbe ošbuáchiyama y bonshánama, bënga nÿets tempo oyejuayënga fchandbëtsemna, chë ínÿenache Bëngbe Bëtsábeñe ošbuachiyëngcá enefjuanëngbeñe tšëngaftangbiana jóyebuambayama. Bënga fchandbëtsoyebuambnaye ntšamo tšëngaftanga inÿetšá ntjatsjuabnycá Jesucristo šmëstonama, y ntšamo tšëngaftanga chábeñe tša šmošbuachémnaca, masque ínÿenga tša cmëcamena y chašmosufrima bëtscá imojtsama, tšëngaftanga Jesucristbeñe ošbuáchiyënga bëtsemnana.

<sup>5</sup> Tšëngaftanga chca Cristo šmëstonayeca, corente entsinÿinÿena Bëngbe Bëtsá nÿetsca soyënguiñe tšabá amá yomnana, y entšanga ntšamo tmojamama tšabá o ndoñe tšabá bëtsemnana jayanama ora, cha chca echanjayana ntšamo entšanga tmojtsemnana. Y chca entsayana tšëngaftanga aíñe merecido šmotsobuájoñe chabe amëndayoye jamashënguama ca; y mora, tšëngaftanga choye jobenayama jashjanguama šmojtsemnana, ínÿenga imojtsama chašmotsesufrinana.

<sup>6</sup> Bëngbe Bëtsá echanjama ntšamo jamama ibomncá; echanjama chë tšëngaftanga chašmosufrima imojtsamënga bëtscá chamosufrima;

<sup>7</sup> y echanjama tšëngaftanga y bënga chë mondësufrinëngbiana, ndoñe más chamondëtsesufrinana. Cha quem soyënga echanjama, Bëngbe Utabná celoca chaojábobocna ora. Cha chabe puerte obenana bomna angelëngaftaca echanjabo, y chora bëtscá inÿetšënga echántsemna.

<sup>8</sup> Cha echanjabo chë Bëngbe Bëtsábioye jtsabuatomama ndoñe montsebošënga jabácastigayama, y chë tšabe noticiënga Bëngbe Utabná Jesusbiana ndoñe montsuenanëngbioynaca.

<sup>9</sup> Chënga Bëngbe Bëtsá echanjácastigaye, nÿetsca tescama jtsapochócase; y Bëngbe Utabnáentšana bënoca mochantsemnënga, y ndocna te quemochatobenaye jinÿama Bëngbe Utabná tša bëtsá y obená bëtsemnana.

<sup>10</sup> Quem puerte uámana te, Bëngbe Utabná chaojésabo ora, nÿetsca chabe entšanga, nÿetsca chábeñe ošbuáchiyënga cha mochántatschuanaye y mochántichamo: “¡Tša obená cha yomna ca!” Y tšëngaftanga chëngaftaca šmochántsemna, er tšëngaftanga šmontsanošbuaché bënga ndegombre fsenjántatšëmbo soyënguiñe, chë bënga tcbonjanabuayená soyënguiñe.

<sup>11</sup> Chíyeca, chca chaotsemnana, nÿets tempo Bëngbe Bëtsábioye tšëngaftangbiana fsëndëimpadana merecido bomnënga chácmbiamama, chë vida chašmotsebmoma, ndayama cha tcmójúbuaja, y chabe obenánaca bëtscá chaoma tšëngaftanga chašmobená nÿetsca tšabe soyënga ntšamo šmojtsejuabnacá jamama, y chašmobená jamama ndaye soyënga ntšamo šmojtsemncá, Jesucristbeñe šmojtsošbuáchema.

<sup>12</sup> Chca jtsamëse, tšëngaftanga šmochanjínÿanÿiye Bëngbe Utabná puerte bëtsá y uamaná bëtsemnama, y cha echanjama tšëngaftanga más uámanënga chašmotsemnama. Chca echanjopása, er Bëngbe Bëtsá y Bëngbe Utabná Jesucristo tšëngaftangbiama tšabe juabna ibobomna.

## 2

### *Chë Bëngbe Bëtsabe contra yomná*

<sup>1-2</sup> Mora atše sëntseboše Bëngbe Utabná Jesucristo jésabama orscama jáuyanama, chë bënga cháftaca tsbanánoca jteninÿenama ora. Básefta entsanga imojtsichamo chë bëts uamana te, chë Bëngbe Utabná jésabama te, ya tojóshjango ca; pero cbontsaimpadana, Jesucristbeyeca catšátanga, bëtsá šmochtsentšena chënga ndoñe chamondobená jamana tšëngaftanga inÿetšá juabna tšëngaftangbe ainaniñe chašmátsbomnama. Ndoñe šmatjóyeunaye nderado nda mëntšá chacmojtsëtsëtsná ora: “Canÿe Bëngbe Bëtsabe juabna oyebuambnayá šonjáuyana chë Bëngbe Bëtsabe uamana te ya tojóshjango ca” o “canÿa chca šonjabuayená ca” o “Páblëbiocana tsbuanácha fsënjushache y chiñe entsayana chë te ya tojóshjango ca”.

<sup>3</sup> Bëtsá šmochtsentšena ndocná tondáyeca chacmondáingñema. Er chë Bëngbe Utabnabe uamana te cabá ndóshjango ora, mallajta entsanga Bëngbe Bëtsabe amëndayama contra mochántsemna, y chë Bëngbe Bëtsabe contra yomná echanjábocna. Y cha entsemna nda ibojtsemna infiernoca pochocaná jtsemnama.

<sup>4</sup> Cha Bëngbe Bëtsabe contra echanjóyebuambaye, chë ndëmuanÿengbiama y ndaye soyëngama entsanga imojuabná diosënga imomnama contra echanjóyebuambaye. Chentšana cha echanjayana chëngbiama más obená yomna ca. Y Bëngbe Bëtsabe bëts yebnóynaca cha echanjámashëngo, choca echanjót bema y entsanga echantsëtsëtsnaye ndegombre cha Bëngbe Bëtsá yojtsemna ca.

<sup>5</sup> ¿Chë soyama tšëngaftanga ndoñe šmondenabouínÿna? Atše cabá tšëngaftangaftaca sënjamna ora, chama sënjanoyebuambná.

<sup>6</sup> Y tšëngaftanga šmondétatšëmbo, nda mora yojtsama chë Bëngbe Bëtsabe contra yomná ndoñe chaondonÿnama, cabá chë tempo chca jopásama ndóshjango ora.

<sup>7</sup> Mora ya mallajta entsanga puerte bacna soyënga tmojontsé amana, ndoñe ntšamo Bëngbe Bëtsá tojayancá chënga jamama yojtsamna ca, y bënga chë soyënga josértama ndoñe quemuátobena, ndayá nÿe Bëngbe Bëtsá chca šojinÿanÿese; pero ntšamo tcbonjauyancá chë Bëngbe Bëtsabe contra yomnabiama ndoñe queochatëchnëngo, nÿa nda chë soyënga ndoñe chaondëtsemnama yojtsamábioye Bëngbe Bëtsá chabojtsejuaná ora aiñe.

<sup>8</sup> Chora chë Bëngbe Bëtsabe contra yomná echanjábocna; pero Bëngbe Utabná yochjésabo ora, echanjángouo y echanjama cha chaóbanama; y tša buashinÿinÿanánaca y obenánaca echanjábocnama, chábioye bochantsepochóca.

<sup>9</sup> Chë Bëngbe Bëtsabe contra yomná, Satanasbe obenánaca echanjabo, y entsanga bëts obenana echanjínÿanÿiye, y chë bëts soyëngaca entsanga ingñénënga mochántsemna.

<sup>10</sup> Cha ba bacna soyënga echanjama ntšamo Bëngbe Bëtsá ndoñe yondbošcá, chca, ba entsángbioye nÿetsca soyënguiñe jáingñama. Y chënga ndegombre pochocánënga mochántsemna; Bëngbe Bëtsá chca echanjama, chënga chë ndegombre soyënga Jesucristbiama chëngbe ainaniñe ndoñe tmonjanóyëngacñe causa, y chë soyëngama mo uamana soyëngcá ndoñe tmonjanjuabó causa, chca, atsebácanënga jtsemnama.

<sup>11</sup> Chca causa, Bëngbe Bëtsá enteleséncia entsanga ingñénënga chamotsemnama, y chë ndoñe ndegombre soyënguiñe chamotsošbuáchema.

<sup>12</sup> Bëngbe Bëtsá chca echanjama, nÿetscanga chë ndegombre soyënguiñe Jesucristbiama ndoñe tmontsošbuáchenga, chë bacna soyënga amama oyejuayënga tmojtsemnënga, chë nÿetsca tescama castigo chamotsebomnama jayanama.

### *Bëngbe Bëtsá šojabacacá atsebácanënga jtsemnana*

<sup>13</sup> Pero bënga šontsamna nÿets tempo Bëngbe Bëtsá jtsatschuanayana tšëngaftangbiama, Jesucristbeyeca catšátanga, Bëngbe Utabnabe bonshánënga. Bënga, Bëngbe Bëtsá fsëndëtschuaná cha quem luare cabá ndobojátša ora, atsebácanënga chašmotsemnana tcmojánabacacama. Bëngbe Bëtsá tcmojatsebacá er chë Uámana Espíritu Bëngbe Bëtsabe entšanga tcmojábiamana, y tšëngaftanga chë ndegombre soyënguiñe šmojtsošbuaché.

<sup>14</sup> Chë tšabe noticiënga bënga cbondábuayiyayeca, Bëngbe Bëtsá tcmojúbuaja chábënga chašmotsemnana. Cha tcmojúbuaja Bëngbe Utabná Jesucristbe obenana y buash-inÿinÿanánënaca chašmotsebomnana.

<sup>15</sup> Chcasna, ndocna te šmattsajbaná ošbuáchiyana chë ndegombre soyënguiñe ntšamo tcbonjabuatambacá, cach tšëngaftangbeñe jóyebuambayëse y tsbuanácha jubuábiamëse, y ndocna te inÿetsá šmatjátsjuabnaye.

<sup>16</sup> Bëngbe Bëtsá puerte tšabia endmënayeca, cha šuababuánÿeshana y tojama bënga sempre añemo ainaniñe chamotsebomnana y chë mochjóyëngacñe tšabe soyëngama corente jtsošbuáchiyëse chamotsobátmanana. Chábioye y Bëngbe Utabná Jesucristbioye fsëntseimpadana,

<sup>17</sup> chata chaboma tšëngaftanga bëtsá añemo ainaniñe chašmotsebomnana, y tšëngaftanga nÿets tempo chašmotsobena ntšamo tšabá yomncá jtsichámuama y jtsamama.

## 3

### *Bëngbiama Bëngbe Bëtsá šmochtseimpadana*

<sup>1</sup> Y morna, Jesucristbeyeca bëngbe catšátanga, Diosmanda bëngbiama Bëngbe Bëtsá šmochtseimpadana, nÿetsca luarenache más ba entšanga chamotsobenama Bëngbe Bëtsabe buayenánana jouenama, y chënga chë soye chamóyëngacñama, y puerte chamot-serrespetánama, ntšamo tšëngaftanga šmonjanmca.

<sup>2</sup> Bëngbe Bëtsánaca šmochtseimpadana cha chašotsëbuáuyayama, y chë puerte bacna entšanga ndoñe chamondobenama jamama bënga fchaisufrima, er nÿetscanga ndoñe quemochatošbuáchiye chë fsëndbuayiyá palabriñe.

<sup>3</sup> Pero Bëngbe Utabná sempre jtsamana ntšamo tojayancá, y cha echanjama tšëngaftanga más chábeñe chašmotsošbuáchema, y ndoñe nÿe cachcá quecmatënÿa chë bacna soyënga mandayá nÿe ntšamnaca ndoñe chacmondáborlama.

<sup>4</sup> Y Bëngbe Utabná entsama bënga ndegombre ainaniñe fchaitsejuabnana, ntšamo bënga tcbójanamëndacá mora šmojtšamama y cachcá sempre šmochtsamámncana.

<sup>5</sup> Bënga, Bëngbe Bëtsá fsëntseimpadana, Bëngbe Utabná benache chacmanÿanÿé bonshánana jtsebomnana ntšamo Bëngbe Bëtsá endbomncá, y chašmojtšesufrina ora, corente añemo chašmotsebomnana, ntšamo Cristo tojansufrí ora yojanbomncá.

### *Nÿetscanga entsamna jtsetrabájayama*

<sup>6</sup> Jesucristbeyeca catšátanga, Bëngbe Utabná Jesucristbe mándoca cbontsamënda, ndëmua Jesucristbeñe ošbuachiyá jatrabájama ndoñe tontseboše y ndoñe tontsiyena ntšamo bënga tcbonjabuatambacá, cháftaca ndoñe šmattsóyebuambnaye.

<sup>7</sup> Cach tšëngaftanga tšabá šmondétatšëmbo ntšamo cmojtšamna jtsiyenana, ntšamo bënga fsënjoyencá: bënga tšëngaftangbeñe fsënjaninyena ora, nÿe ntjatrabajacá oyënjayënga ndoñe queftsjatsmëna,

<sup>8</sup> ni ndocnabe saná chibiáisese, tondaye ntabuenaycá. Inÿetsá enjamna; cada te bnëté y ibeta jabuache fsënjantrabája, chca, tšëngaftanga ndoñe chacmondëtsamnana bëngbe uajabótama bënga jatatšatnayama.

<sup>9</sup> Y ndegombre, bënga derecho fsënjánbomna tšëngaftanga jamëndama chašcújabuachama; pero masque chca, bënga jabuache fsënjántrabája tšëngaftanga chašmotsetatšëmbuama ntšamo yomna jtsiyenama, y chca chašmotsamama.

<sup>10</sup> Bënga tšëngaftangaftaca fsënjamna ora, mëntsá tcbonjanamëndá: Nda ndoñe tontseboše jatrabájama, cha cach ndoñe chaondëtsesá.

<sup>11</sup> Chca fsëntsichamo, er bënga fsënjátatšëmbona, báseftanga tšëngaftanguentšënga imojtsiyena tondaye ntsamcá, pero tša chë ínÿengbe soyënguiñe jtsontremetënese.

<sup>12</sup> Chca oyena entšángbioye fsëntsabuayiyná y fsëntsamënda Bëngbe Utabná Jesucristbe mándoca, natjëmbana cachëngbe vida onguayiñe chamotsotrabájañama.

<sup>13</sup> Jesucristbeyeca catšátanga, ndoñe chacmondëumantšé tšabe soyënga amana.

<sup>14</sup> Nderado nda ntšamo quem tsbuanáchañe fsënjayancá ndoñe tontsuenana, šmochjarrepára nda cha yojtsemna y cháftaca ndoñe šmattsencuëntaye, chca, cha chaotsëuatjama.

<sup>15</sup> Mo canÿe uayayacá ndoñe šmattsonÿaye; šmochjabuayená mo canÿe catšatcá, chca ndoñe chaondëtsamama.

### *Jtadiósoftanama*

<sup>16</sup> Bëngbe Utabná fsëntseimpadana, cha, chë entšanga tšabe ebionana ainaniñe chamotsebomna iuamá, chaoma tšëngaftanga nÿets tempo y nÿetsca tescama chca chašmotsebomnama. Bëngbe Utabná tšëngaftangaftaca chaotsemna.

<sup>17</sup> Nÿe quem palabrënga tšëngaftanga jacheuayama cach atšbe cucuátšeca sëntsabiamná. Atše chca sëndbauapochóca atšbe tsbuanachangá juabemama; ntšamo muentše entsabemancá entsinÿinÿná quem tsbuanácha atšbiácha iuamnama.

<sup>18</sup> Atše, Bëngbe Bëtsá sëntseimpadana, Bëngbe Utabná Jesucristo chaoma tšabe bendicionënga tšëngaftangbeñe chaotsemnama.



# 1 Timoteo

## *Jachuayama*

<sup>1</sup> Atše Pablo, Jesucristbe ichmoná sēndmēna. Bēngbe Bētsá bēngbe atsebacayá endmēna y Bēngbe Utabná Jesucristo endmēna ndábeñe bēnga, puerte jtsošbuáchiyēse mondobátmana ba soyēnga bēngbiana cha yochjamama. Atše Jesucristbe ichmoná sēndmēna, er chata tbojanmandá atše chca jtsemnama.

<sup>2</sup> Timoteo, atše quem tsbuanácha cbontsabobiamná. Atše Bēngbe Bētsabe soyēngama entšanga sēnjanabuayiyná ora, aca Jesucristbeñe tconjanošbuaché, y chca, aca mo atšbe ndegombre uaquiñacá tconjanóbema. Atše sēntseimpadana, Bēngbe Bētsá Bēngbe Taitá, y Cristo Jesús Bēngbe Utabná, chaboma aca tšabe bendicionēga chacotsebomnama, chata chacmolastemama y ainaniñe tšabiana ebionana chacotsebomnama.

## *Pablo chē ndoñe ndegombre soyēnga abuatambayēngbiana chēnga tojanabuayená*

<sup>3</sup> Ntšamo chē Macedonia luaroye chocana sēnjēftsanbocna ora tcbonjanimpadacá, mora cachiñe cbochtētsimpáda. Efeso pueblota cochjoquéda, básefta entšanga chácuamēndama chē ndoñe ndegombre soyēnga ndoñe chamondētsabuatambama,

<sup>4</sup> ni nyets tempo ndoñe nye chamondetsejuabná anteungbe cuentēngama, ni chē ba uabemana uabáinēnga chē tempsca bēts taitangbiana. Er nye chca yapa jesejuabnayanentšana, jóbocnana nye ínñengaftaca jabuachana enatsētsnanyiñe, y chca chēngbioye tondayama ntjuabuáchana ntšamo Bēngbe Bētsá jamama yajuabnacá chaósertama. Chē soyna nye chábeñe jtsošbuáchiyēse jobenayana josértana.

<sup>5</sup> Chca mando entsemna nyetscanga chamotsenbobonshánama, y chē bonshánana endóbocana nda chabe ainantse ndocna bacna soyēnga tondbomnábentšana, ntšamo tojtsamcá tšabá yojtsemna ca ainaniñe tojtsejuabná y tojtsetatšēmbuábentšana, y Jesucristbeñe ndegombre ošbuachiyábentšana.

<sup>6</sup> Báseftanga tmojtsajbaná chca jtsemnana y inye soyēngama tmojontsé juabnayana; chíyeca chēnga mora imojtsentšena nye ndayámna ndoservena soyēngama enatsētsnayana.

<sup>7</sup> Chēnga jtsebošana Bēngbe Bētsabe ley abuatambayēnga jtsemnama, pero chēnga ndoñe yontsósertana ni ntšamo imojtsabuatambacá, ni mo ndayánaca ntšamo chēnga tmojtsichamcá, mo chē soyēnga ndegombre cuaftsemncá.

<sup>8</sup> Pero bēnga mondētatsēmba chē leyēnga tšabá yomnama; tšabá endmēna, chē ndayama chē leyēnga tmojuamcá entšá chē leyēngaca tojtsamēse.

<sup>9</sup> Bēngnaca mondētatsēmba, chē leyēnga ndoñe tmonjuama chē nyetsca soyēnguiñe tšabá amēngbiana. Chē leyēnga tmonjuama quemētša entšanga jácastigama: ntšamo leyēnguiñe ndoñe tontselesenciancá amēnga y ntšamo Bēngbe Bētsá yobošcá ndámēnga, chē Bēngbe Bētsá ndoñe imondadoránēnga y bacna soye amēnga, Bēngbe Bētsá ndoñe mondērrespetánēnga y Jesucristbeñe jtsošbuáchiyana y Bēngbe Bētsá jtsadoránana tondaye yondoservena ca juabnayēnga, cachabe taitá o mamá obánayēnga y ndēmuanñēnga imomna entšanga obánayēnga,

<sup>10</sup> boyabásaftaca o shembásaftaca bacna soye amēnga y boyabásēnga cach boyabásēngaftaca bacna soye amēnga, entšanga enēnga nye ínñabiana nyets tempo chamot-seservēnama, bosterēnga y chē nye bonamente Bēngbe Bētsabiana júrayēnga; chca entsayana, chē leyēnga yomna jácastigama nyetscanga ndēmuanñēnga ndoñe tmontsama ntšamo chē ndegombre buatēmbana soyēnguiñe iuayancá.

<sup>11</sup> Ntšamo muentse chē leyēngama tijayancá, entsebuatēmbana chē Bēngbe Bētsábiocana puerte tšabe noticiēnguiñe, chē ndegombre buatēmbana soye; Bēngbe Bētsá, chē corente bendición bomná, šonjichmó chē buayenánana entšanga jabuatambama.

*Pablo Bëngbe Bëtsábioye tbojtanchuá, tbojanlastemama*

<sup>12</sup> Atše, Bëngbe Utabná Jesucristo sëndëtschuaná, er cha tojanjuabó, ntšamo cha šojanmandacá jobedésama atše tsjétsseprontanama, y chíyeca šojanábuayana atše chabiamama chaitrabajama; y cha endmëna nda inétsama atše obenana chaitsebomnama chë trabajo jamama.

<sup>13</sup> Cha chca átseftaca tonjanma, masque tempo atše chabe contra ba soyënga sënjánichamo, chabe ústonënga sënjanëcamena, y chabiamama tondaye respeto ntsebomncá sënjánenobuena. Pero Bëngbe Bëtsá šonjanlastemá, er atše, Jesucristbeñe ošbuachiyá cabá ndoñe quetsjátanmëna, y chca, atše ndoñe quetsjátantatsëmbo ndayá tsjánamama.

<sup>14</sup> Y chca, Bëngbe Utabná ba tšabe bendicionënga atšbiamama tonjanma, y chábeñe ošbuachiyá šonjábema, y tonjanma atše cha chaitsebobonshánama y ínÿengbioynaca. Cha chca bëngbiamama tojama, bënga cánÿiñe mo canÿacá Cristo Jesúseftaca bëtsemnayeca.

<sup>15</sup> Ntšamo chanjayancá ndoñe nÿe bostero soye quenátsmëna, y nÿetscanga entsamna chca ndegombre bëtsemnama jtsejuabnayama: Cristo Jesús quem luaroye tonjánabo, bacna soye amënga jabátsebacama, y chë bacna soye amënguentše atše chë más bëts bacna soye amá sëndmëna.

<sup>16</sup> Chíyeca, Bëngbe Bëtsá šonjanlastemá, jinÿanÿiyama cha puerte uantado entšángaftaca yomnama. Y chë soye ínÿengbioye tojaninÿanÿé, chë nÿetsca tescama yomna tšabe vida jtsebomnama, chë chábeñe mochtsanošbuachëngbioye; chca tonjaninÿinÿé cachá átseftaca uantado jtsemnëse, atše nÿetscangbiamama chë más bëts bacna soye amá jtsemnëse.

<sup>17</sup> ¡Entšanga nÿets tempo chamotsinÿanÿná, chë Utabná nÿets tempo mandayá y puerte bëtsá y obená yomnama! Cha endmëna chë ndocna te echanjëftsobaná, chë entšanga ndoñe ntsoobenana jinÿamá y chë nÿe canÿe Bëngbe Bëtsá yomná. Chca chaotsemna.

<sup>18-19</sup> Timoteo, aca mo atšbe uaquiñacá condmëna. Atše tcbonjaimpadá, ntšamo tcbonjauyancá entšanga chacúyanama, ntšamo báseftanga Bëngbe Bëtsabe juabna oyebuambnayënga acbiamama tmojanayancá, y chiñe jtsejuabnayëse chë Jesucristbe soyëngama chacopeliá y nÿets tempo chca chacotsama, Jesucristbeñe puerte jtsošbuáchiyëse, y lempe ntšamo tcojtsamama tšabá yojtsemnama ainaniñe jtsetatsëmbëse. Báseftanga, chënga ndoñe tšabá imonjétsama ca chë ainanoca juabnënga tmojánayana ora, chë soye ndoñe tmonjanuena y chë causa, Jesucristbe soyënguiñe ošbuáchiyana tmojtsanajbananga y tmojanontsé inÿe buattëmbana soyënguiñe jtsošbuáchiyana.

<sup>20</sup> Chca tonjopasá Himeneo y Alejádroftaca, y atše sënjalesenciá Satanás chaoma chata chabosufrima; y chca, chata chabuatsjinÿe Bëngbe Bëtsabiamama ndoñe bacá ntsóyebuambnayana.

## 2

*Pablo tojanabuayená ntšamo Bëngbe Bëtsá jtsadoránama*

<sup>1</sup> Nÿetsca soyama más cbontsaimpadana ndayá chë Jesucristbeñe ošbuáchiyënga Bëngbe Bëtsáftaca chamojtsencuénta ora, nÿetsca soyëngama ntšamo tojtsëjabotcá cha chamotseimpadana, nÿetsca entšangbiamama, y cha sempre chamotsatschuaná.

<sup>2</sup> Entsemna, nÿetscangbe tšabiamama Bëngbe Bëtsá jtseimpadánama, pero masna quem luarentša reyëngbiamama y inÿe mándayëngbiamama, chca, nÿetscanga puerte natjëmbana jtsiyenama chamuetsobenama, y nÿetsca soyënguiñe tšabá jtsamëse, Bëngbe Bëtsá jt-satschuanayama, y entšangbe juabniñe tšabá chamotsemnama.

<sup>3</sup> Chca jtsamana tšabá endmëna, y Bëngbe Bëtsá, bëngbe Atsebacayá, chama jtsóyejuayana;

<sup>4</sup> y chca jtsóyejuayana, er cha endboše nÿetsca entšanga atsebácanënga chamotsemnama y chë ndegombre buayenánana chamotsábuatmama.

<sup>5</sup> Chca n̄yetsca entšangbiamā endmēna, er n̄ye can̄ye Bēngbe Bētsá n̄yetscangbiamā endmēna, y n̄ye can̄ya endmēna nda yobena jamama entšanga tempcá tšabá Bēngbe Bētsáftaca chamotsemnama; cha endmēna Jesucristo, cach entšá.

<sup>6</sup> Er Jesucristo, mo can̄ya ín̄yenga játsebacama cuaftopagacá, chabe derecho vida jtsobomñama cachcá tojanon̄yá y tojanóbana, chca, n̄yetsca entšanga chamotsobenama atsebácanēnga jtsemnama. Chē soye cha tonjanin̄yan̄yé, n̄ya chama tempo yojtsemna ora, chē Bēngbe Bētsá n̄yetsca entšanga atsebácanēnga chamotsemnama yobošama.

<sup>7</sup> Bēngbe Bētsá chca n̄yetsca entšangbiamā yobóseyeca, Jesucristo šojanábuayana chabe ichmoná jtsemnama, chabe soyēnga entšanga jtsabuayinayama; ndegombre soye sēntsoyebuambná, ndoñe quetsátsbostero. Sonjanmandá chē ndegombre buayenánana chē ndoñe judiēngbioye jabuátambama, y chēnga entsamna chiñe jtsošbuáchiyana.

<sup>8</sup> Ntšamo sēnjayancá, atše sēntseboše n̄yetsca chē Jesucristbeñe ošbuachiyēngcá enefjuana luarēnguenache, boyabásenga Bēngbe Bētsáftaca chamotsencuēnta, y chora celoye, Bēngbe Bētsábioye cucuatše chamatsbaná; pero chamna, ainaniñe bacna soyēnga ntse-bomncá, ín̄yengaftaca ntjatentjayanaycá, y ín̄yengaftaca jabuachana ntjatenatsētsnaycá chēnga chamotsemna.

<sup>9</sup> Y atše sēntseboše shembásenga entšayangá chamuatíchētjo, mo chē tšabe shembásenga mondbetsichētjoncá, ndoñe n̄ye entšanga chamotsēbuáuatjama y ntšamo tmojtsichētjonama chēngna uámanēnga imomna ca entšanga chamotsejuabnama. Ndoñe quenátamna jtsenóbotamnyana, n̄ya mo chca chquēcnēnga jtsemnēse, ni castellano soyēngaca o uámana fjantse ndētšbēngaca, o yapa uámana entšayangaca, chca, n̄ye entšanga jin̄yama tšabá jtsemnama.

<sup>10</sup> Pero aíñe mo chē Bēngbe Bētsá adóraye shembásenga mondbetsamcá jtsamēse, chē tšabe soyēnga jtsamana.

<sup>11</sup> Nderado nda tojtsabuatambá ora, shembása bontsemna jtsatsjēndayana, chca ora tondaye ntjatichamcá, y chentša mándayēnga chaotsayaunana.

<sup>12</sup> Atše ndoñe quichatsleséncia, can̄ye shembása boyabásenga chaotsabuatambá, ni chaotsamēnda. Can̄ye boyabása tojtsabuatambá o tojtsamēnda ora, shembása ndocá chaondētsichamo.

<sup>13</sup> Chca chaotsemna, er Bēngbe Bētsá natsana Adán tbojanpormá, y chentšana Eva;

<sup>14</sup> y er Satanás Adánbioye ndoñe tbonjaningñé, ndayá chē shémbioye; y chca tbojaningñé ora, chē shema tojanma ntšamo Bēngbe Bētsá ndoñe tbonjanlesenciá.

<sup>15</sup> Pero shembása atsbocaná echántsemna, básenga quem luaroye endbaúshejangoyeca, pero chamna, aíñe n̄yets tempo Bēngbe Bētsábeñe tojtsošbuáchese, n̄yetscanga tojtsababuán̄yeshanēse, cachá n̄yetsca soyēnguiñe jenomándama tojtsobenēse, y n̄yets tempo tšabe soyēnga tojtsamēse, ntšamo Bēngbe Bētsabe entšanga mondbetsamcá.

### 3

#### *Ntšamo ibojtsemna chē ošbuachiyēngcá enefjuanēngbeñe mandayá*

<sup>1</sup> Mēntšá ndegombre endmēna: nderado nda tojtseboše can̄ye trabajo jtsebonnama, cán̄yentše ošbuachiyēngcá enefjuanentše chē in̄ye ošbuáchiyēnga jtsamēndayama, cha ndegombre yojtseboše can̄ye puerte tšabe trabajo.

<sup>2</sup> Chíyeca, chē ošbuachiyēngcá enefjuanēngbe mandayá bontsemna jtsiyenana ba tšabe soyēnga jtsamēse, chca, cha ndoñe tšabá yontsama ca ndocná chaondētsichamuama. Y mēntšánaca cha bontsemna jtsemnama: n̄ye can̄ye shembásabe boyá; ntšamo jtsiyenama tšabá juabnayá chaotsemna, cachá n̄yetsca soyēnguiñe jenomándama chaotsobena, y chaotsetátšēmbo ndayá ibomna tšabá jtsamana; chaotseprontana chabe yebnentše posada entšanga júyentšamiamā, y chaotsobena botamana abuatambayá jtsemnama.

<sup>3</sup> Ndoñe yapa tmoyá o penzentsero chaondětsemna; pero chaotsemna tšabá mandbomná, entsanga natjěmbana chamotsiyenama bošá, y ndoñe chaondětsejuabná nje crocénana jěsebomnama.

<sup>4</sup> Chaotsetátšěmbo ntšamo njetšca chabe yebnentša entsanga botamana jtsaměndayama, y chaoma chabe básenga chě ntšamo cha tojayancá chamotsamama, ndocna te stětšoye chamonděquedama;

<sup>5</sup> er, nda cachabe yebnentša entsanga ndoñe tontsobena jtsaměndayama, chca, ¿ntšamo nantsobena chě ošbuachiyěngcá enefjuaněnga jtsanjenama?

<sup>6</sup> Cha ndoñe chaondětsemna cabá mora cuenta Jesucristbeñe ošbuachiyá; aĩne chca chě ošbuachiyěngcá enefjuaněngbe mandayá tojtsemnėse, nderado nje cachá uámana entsá nantsenobiamnaye, y ntšamo Běngbe Bětsá Satanásbioye tbonjancastigacá, chca bětsemnama, cach soyama Běngbe Bětsá chě entsábioye buanjacastíga.

<sup>7</sup> Chánaca bontsemna jtsiyenana jtsaměse, y chca chaojtsama ora, chě Jesucristbeñe ndošbuáchiyěnga tšabá chabiamama chamotsichamo. Chě entsá ndoñe chca tontsaměse, chěnga chabiamama mochanjayana ndoñe tšabá yontsama ca, y Satanás echanjama cha chabócochěngo bacna soyěnga jamama.

*Ntšamo ibojtsemna chě ošbuachiyěngcá enefjuaněnga ujabuachaná*

<sup>8</sup> Cachcá, chě mándayěngbe ujabuáchaněnga měntšá entsamna: uámana entsangcá njetšcanga chamotsětábna, uta palabra ndbomněnga; ndoñe yapa vínoye chamondětsetmó, y ndoñe chamondětseboše nje paselo becá crocénana jtsebomnama.

<sup>9</sup> Chěnga entsamna ndegombre jtsošbuáchiyana chě Běngbe Bětsá tojinjanyě soyěnguiñe, chě ndayĩne běnga mondošbuaché, chěngbe ainaniñe inyetšá juabněnga ntjatsbomncá.

<sup>10</sup> Natsana, chěngbiamama botamana šmochjshauarrepára jtsetatšěmbuama chěnga aĩne o ndoñe montsobena mo chě ošbuachiyěngbeñe mándayěngbe ujabuachaněngcá joserviama. Chěnga njetšca soyěnguiñe tšabá tmojtsemnėse, šmochjálesenciaye chiñe chamoservema.

<sup>11</sup> Cachcá, chě shémanga měntšá entsamna: njetšcangbiamama mo uámana entsangcá utabněnga, ndoñe uayátšenayěnga, cachěnga njetšca soyěnguiñe jenomándama obeněnga, y njetšcañe tšabe palabra bomněnga.

<sup>12</sup> Canje ujabuachaná chaotsemna nje canje shembásabe boyá, y chaotsetátšěmbo ntšamo chabe básenga y njetšca chabe yebnentša oyeněnga jtsaměndayana.

<sup>13</sup> Chě ujabuáchaněnga tšabá chiñe tmoservėnėse, canje uámana puesto mochanjashjache, y chěnga mochantsobena bětš añémoca jtsóyebuambnayama ntšamo Cristo Jesúsbeñe tmošbuáchema.

*Ndayá Běngbe Bětsá běnga šojinjanyěcá, canje bětš buatěmbana soye endmėna*

<sup>14</sup> Atše sěntsobátmana pronto chjjobenaye jama aca jauatsětšayama; pero chca cbontsabobiamná,

<sup>15</sup> nderado atše betesco jama ndoñe sěnjobenase, chacotsetatšěmbuama ntšamo canya ibojtsemna njetšca chě Běngbe Bětsábenga imomněngaftaca. Chěnga mondmėna chě Jesucristbeñe ošbuáchiyěnga, chě Běngbe Bětsá Ainabe básenga. Chěnga chě Běngbe Bětsabe ndegombre soyěnga mondbomna chě más uámana puestoca quem luarentše, y tša monděntšena chama ínյěngbioye jáyějanama.

<sup>16</sup> Nya ndegombre endmėna, Běngbe Bětsá soyěnga šojinjanyě, y chě soyěngaca běnga montsobena jtsiyenana, chě Běngbe Bětsabe entsanga imomněngcá; chě soyěnga běngbiamama ndegombre bětš buatěmbana soye endmėna, y chě buatěmbana soye měntšá endmėna:

Cristo quem luarentše cach entsacá entsángbioye tojánėbėbuacna.

Chě Uámana Espíritu tonjinjanyě cha njetšca soyěnguiñe tšabá amá yomnama.

Angelěnga cha tmojáninye, y chabiamama ba luarěnguentša entsángbioye tmojanabuayená.

Ba entšanga quem luarentše chábeñe montsanošbuaché, y Bëngbe Bëtsá celoye tbon-tanatsbaná, cha puerte bëtsá y obená yomnama jinÿanÿiyëse.

## 4

### *Báseftanga chë tšabe benachentsana mochtsojuánañe*

<sup>1</sup> Uámana Espíritu, nÿetscanga catafjosertaycá tojayana, quem luare jopochócama tempo chaojtsobeco ora, básefta entšanga camochtsajbaná ošbuáchiyana chë ndayiñe bënga Jesucristbiana mondošbuaché soyënguiñe ca. Chëngna, espíritënga entšanga áingñayënga mochántsayauana, y chë ndoñe ndegombre soyënga chë bacna bayëjënga entšangbioye mochtsabuátambaye soyënguíñnaca.

<sup>2</sup> Chca buatëmbana soye jtsóbocanana chë bacna entšanga ntšamo ndegombre tmojuabnacá ndinÿinÿayëngbentsana y chë bosterëngbentsana. Chënga chca bacna soye tmojtsama ora, ainanoca ndoñe ntsejuabnayana, ntšamo tmojamcá ndoñe tšabá yontsemna ca, er yapa bacna soyënga tmojama causa, chënga nÿe chca chëngbe ainaniñe jésejuabnayana.

<sup>3</sup> Quem entšanga ndoñe ntjalesénciana ínÿënga chamotsobouamama, y jtsemándayana básefta sananga entšanga ndoñe chamondétsesama. Ntšamo chënga chiñe tmojtsebutëmbacá ndoñe ndegombre soye ntsemnana, er Bëngbe Bëtsá chë sananga tojanma, Jesucristbeñe ošbuáchiyënga y chë ndegombre soyënga uabuátmënga chamóyëngacñama, Bëngbe Bëtsábioye chama jtsatschuanayëse.

<sup>4</sup> Er lempe ntšamo Bëngbe Bëtsá entšanga chamosama tojamcá tšabá entsemna. Ndoñe quešnátamna ndaye saná jtsaboténana, bënga chë saná tmojuáyëngacñe ora, Bëngbe Bëtsá chama tmojëtschuase;

<sup>5</sup> er chca saná Bëngbe Bëtsábioye tšabá jtsinÿnana, cachá chca tojayánayeca, y bënga chë sanama cha mondbatschuayama.

### *Jesucristbiana trabájayiñe canÿe tšabe oservená*

<sup>6</sup> Aca, chë soyënga ošbuachiyëngbioye chaojtsabuátambase, aca Jesucristbiana trabájayiñe canÿe tšabe oservená cochántsemna. Y mo nda bëtscá añemo jtsebomnama botamana tojtsesacá, cachcá, ácnaca puerte ošbuáchiyana y ainaniñe bëts añemo cochántsebomna; chca echántsemna, chë bënga mondošbuaché buayenana soye aca icuatsjendá y icoyeunánayeca, y ntšamo chë tšabe buatëmbana soyënguiñe endayancá sempre icuámayeca.

<sup>7</sup> Pero ndoñe nÿe quem luarentša entšangbe cuentënga y ndoservena cuentënga cattsuenana. Ba soyënga cochjama aca bëts añemo ainaniñe chacotsebomnama, mo nda bëts añemo jtsebomnama cachabe cuérpoca ba soyënga cuaftsamcá, ntšamo Bëngbe Bëtsá jadórama yomncá jtsiyenama jtsamëse;

<sup>8</sup> cachabe cuérpoca ba soyënga jamana más añemo jtsebomnama, aíñe batšatema endoservena; pero jtsiyenana Bëngbe Bëtsábioye jadórama yomncá jtsamëse, puerte enduámama y juajabuáchana nÿetsca soyënga tšabá chaotsemnama; chca jtsamana puerte tšabá endmëna cachabe vidama quem luarentše, y chë inÿe vidócnaca.

<sup>9</sup> Ntšamo tijayancá ndegombre entsemna, y nÿetscanga entsamna jtsejuabnayana chca ndegombre bëtsemnama.

<sup>10</sup> Y chë soyama bënga puerte mondëtrabája y mondësufrina, er chë Bëngbe Bëtsá Ainábeñe puerte mondošbuachéyeca, bënga mondobátmana cha yochjama soyënga bëngbe tšabiana. Cha endmëna chë nÿetsca entšangbe atsebacayá, pero ndegombre masna, chábeñe ošbuáchiyëngbe atsebacayá cha endmëna.

<sup>11</sup> Ntšamo quem soyëngama tcbonjauyancá entšanga cochtsamëndaye y cochtsabuátambaye.

<sup>12</sup> Ndoñe catjaleséncia, aca bobontse comnama, ndánaca chacmotsáboyenjama. Pero aíñe bētsá cochtsama, chēnga puerte chacmotserrespetánama, chca jtsamēse icoye-nama jtsonyāyēse, cachcá chamotsamama: botamana jtsóyebuambnayēse, nyets tempo tšabe soyēnga jtsamēse, nyetscanga jtsababuányēshanēse, Bēngbe Bētsábeñe corente jt-sošbuáchiyēse, y puerte tšabia jtsemnēse, ainaniñe ndocna bacna soye ndbomná.

<sup>13</sup> Atše choca chajashjanguēntscuana, cochtsentšena chē Bēngbe Bētsabe uabemana palabrenga entsángbeñe jtsaliayama, y chēnga jtsabuátambayama y jtsabuayiynayama.

<sup>14</sup> Acbioye Bēngbe Bētsá obenana tmojanatšetá tšabe soyēnga jamama chacotsobemana, ošbuáchiyēnga juabuáchama. Bēngbe Bētsabe juabna oyebuambnayēnga acbiama tmojanoyebuambá ora, y chē ošbuachiyēnguentša bētsējémēnga chēngbe cucuatšēnga ábeñe tmonjancjá y Bēngbe Bētsá acbiama tmonjanimpadá ora, chca tšetana obenana tcojanóyēngacñe. Chē soye sempre cochtsinyēna.

<sup>15</sup> As, aca cmontsemna sempre jtsamana chē soyēnga ntšamo tcbonjauyancá. Cochtsentšena chē soyēnga tšabá jtsamama, chca, entsānga chamobená jinýama, aca cada te más tšabá lempe cojtsamama.

<sup>16</sup> Botamana cochtsantješna, aca chē tšabe soyēnga jtsamēse cojtsiyenama, y chē tšabe buatēmbana soye ínýenga cojtsabuátambama. Cada te chca cochtsama, y chca, cach aca cochanjenájabuache atsbocaná jtsemnana y chē ácbioye ouenanēngnaca játsebacama.

## 5

### *Ntšamo Timoteo ibojtsemna chē inyē ošbuáchiyēngaftaca jtsemnana*

<sup>1</sup> Bētsējémēnga ndoñe catjucácana; chca játamamna, cochjábuaenaye, chēnga mo cach acbe taitá cuaftsemncá; y chē bobontsēngaftaca cochjama, mo chēnga acbe catšátanga cuaftsemncá.

<sup>2</sup> Chē bētsanana shembásengaftaca tšabá cochtsemna, chēnga mo cach acbe mamá cuaftsemncá; y chē tobiasēngaftaca cochjama, chēnga mo acbe uabénanga cuaftsemncá; chēngaftaca cmontsemna puerte tšabia jtsemnana, chēngbiamana ndocna bacna juabnēnga ainaniñe ntsebmncá.

### *Ošbuáchiyēngbenache viudanga tmojtsemna ora*

<sup>3</sup> Chē ndegombre viudanga, chē ndocná mondbomna chaújabuachama, chēnga cochtsarrespetana y cochtsējabuachana.

<sup>4</sup> Pero canýe viudá nderado básenga o nietēnga tuabamna, chēnga entsamna nat-sana jshauatsjínýana ndayá chēnga chamotsamama Bēngbe Bētsá yobošcá, cachēngbe pamíllanga chamotsarrespetánama, chēngbioye jtsanyēnēse, y chēngbe bētsētsangaftaca tšabá chamotsama, ntšamo chēnga chēngaftaca tmojanmcá, er chca jtsamama, Bēngbe Bētsá jtsóyejuayana.

<sup>5</sup> Chē ndegombre viudá, chē juajabuáchama ndocná tbondbomná, Bēngbe Bētsábeñe jtsošbuáchiyēse, cha bochjuájabuachama jtsobátmanana, y nyets tempo jtseimpadánana, bnēté y ibeta, cha chabuájabuachama.

<sup>6</sup> Pero canýe viudá, nyē quem luarentša entsāngaftaca oyejuayá jtsemnana soyēnga tojtsamēse, cha masque ainá tojtsemna, Bēngbe Bētsabe bominyiñe mo canýe obanacá jtsemnana, er chábioye ndoñe ntseeservénana.

<sup>7</sup> Lempe chē soyēnga chamotsamama ošbuáchiyēnga cochtsamēndaye, chca, ndocná ndocna bacna soye chēngbiamana jatichámuama chaondētsebmnama.

<sup>8</sup> Er, nda cachabe entsānga y más, cachabe pamíllanga ndoñe tontsacuedana, cha chca jtsinýinýayana chē buatēmbana soyēnga, ndayiñe bēnga mondošbuaché, ndegombre soyēnga ndoñe yondmēna ca yojtsejuabnama, y cha chē ndoñe ošbuáchiyēngbiamana más bacna entsá jtsemnana.

<sup>9</sup> Chë jujabuáchama viudanga imuábemana lístañe, chaotsábemana chë viudá chnënguana bnëtsana uatama más yobomná, y nÿe canÿe boyá ibnabomná.

<sup>10</sup> Entšanga cha chamotsábuatma mo canÿe tšabe soyënga amacá: chabe básenga botamana tojabëché, áshjajnënga chabe yebnentše posada júyentsamiama prontaná, Bëngbe Bëtsabe entšanga imomnënga tojushecjabebé, chë imosufrínënga tojújabuache; jayanana, nda sempre nÿetsca tšabe soyënga jamama yontšená.

<sup>11</sup> Pero chë lístañe, chë viudanga chnënguana bnëtsana uata cabá ndbomnënga ndoñe catjúbiama; er chë chëfta uata ndbomnënga, yapa nÿe cachënga tšabá jtsemnama juabnënga jtsebomnana y soyënga jtsamana. Chcase, chënga Jesucristbioye ya ndoñe ntseservénana, y chora jtsebošana cachiñe jtëtóbouamayama;

<sup>12</sup> y chca, ínÿenga chëngbiamá mochanjayana ndoñe tšabá montsama ca, chënga chë ntšamo tempo Bëngbe Bëtsá tmojanšbuachenacá chënga ndoñe tmonjamama.

<sup>13</sup> Y cabá más, tondaye ntsamcá tmojtsemna ora, chënga juabouinÿana oyënjayënga jtsemnama, y yebnënguenache jtsanama; y ndoñe nÿe oyënjayënga, sinó oinÿanëngnaca, ínÿengbe soyënguiñe jtseyentšbëtsjuanëse, y ndoñe yontsemna jayanama soyënga jt-sichámëse.

<sup>14</sup> Chíyeca, atše sëntseboše, chë viudanga cabá tobiašëngna chamuatobouamá, básenga chamotsabamna, y chamotsobena cachëngbe yebnënguenache jtsemándayana; y tondaye chamondëtsama, chca, bëngbioye uayayënga chamuayana, chënga chca ndoñe tšabá montsama ca.

<sup>15</sup> Atše chca sëntsichamo, er básefta viudanga cabá tobiašënga tmojtsajbaná Jesucristo obedecénana, y tmojontšé Satanás joyeunayana.

<sup>16</sup> Canÿe shembása, Jesucristbeñe ošbuachiyá, nderado chabe pamíllangbeñe viudanga tojtsabamna, cha bontsemna chënga jujabuáchana, chca, chë ošbuachiyëngcá enefjuanënga ndoñe chaondëtsamna chëngbiamá játantješnana; chca, chë ošbuáchiyënga mochanjobenaye chë ndegombre viudanga, chë chaújabuachama ndocná mondbomnëngbioye jujabuáchama.

### *Ntšamo cuantsemna chë ošbuachiyëngbeñe amëndayëngaftaca*

<sup>17</sup> Chë bëtsëjemënga, tšabá chë ošbuachiyëngcá enefjuanënga tmamëndangna, jt-somerecénana entšanga más chamotsarrespetánama, chca trabajo bétsamama, y más, chë sempre entšanga jtsabuayiynayama y jtsabuátambayama imontšenëngbioye.

<sup>18</sup> Er Bëngbe Bëtsabe uabemana palabrenguiñe endayana, mëntšá: “Aca canÿe toróftaca shajuana tmojtsatbaná luariñe chacojsetrabája ora, ndoñe catjuanguëtšenaye ca”; ínÿoca: “Chë trabajayá merecido jtsebuájonana juácanama ca”. Chíyeca, chë bëtsëjemëngcá amëndayënga jtsomerecénana entšanga chamotsarrespetánama.

<sup>19</sup> Nderado nda tcmojáuyana canÿe bëtsëjema bacna soye tojama ca; pero útata o unga entšanga más ndoñe tmontsemna, chca tojamama tmojinÿe, y chë bëtsëjema mal quedayá ndegombre soye yojsichamo ca ndoñe tmonjayana, ndoñe catjóyeunaye.

### *Inÿe soyëngama jábuayenama*

<sup>20</sup> Chë bëtsëjemënga nÿe bacna soyënga tmojtsamënga, nÿetsca entšangbe delante cochjucácana, chca nÿetscanga uatjana chamuishache, bacna soye amama castigo mocht-sebomnana.

<sup>21</sup> Atše cbontsemánda, Bëngbe Bëtsabe delante, Jesucristo y Bëngbe Bëtsabe bocacana angelëngbe delante, chë mandënga chacotsamama; pero ndoñe catjayana canÿe bëtsëjema tšabá o ndoñe tšabá tonjama ca, cabá ndoñe lempe botamana ndabonÿe ora, ni canÿe entšá ínÿengbiamá más tšabá ntjatabacacnycá.

<sup>22</sup> Ndocnabe bestšašiñe cucuatšënga catjajájua, Bëngbe Bëtsábioye chabiamá jaimpádama, jinÿinÿiyama cha mo canÿe bëtsëjema amëndayacá josérviamá yojsobenama, nÿe betscó, juabuáyanama botamana ntjenojuaboycá. Pero nÿe ntjenojuaboycá chca tcojamëse, y cha canÿe bacna soye amá tomnësna, ácnaca cochántsemna mo

chabe bacna soyënga cuafjamcá. Cochtsantješna ndocna bacna soyënga ainaniñe chacondëtsebomnana.

<sup>23</sup> Aca ba soye uafsbiaca condbétsesoca causa, ndoñe más nje ena búyeshe cattseftmana, sinó base vínoynaca.

<sup>24</sup> Entšanga mondobena tšabá jinýana, básefta entsangbe bacna soyënga, cabá chë soyëngama chëngbioye botamana ntjåtjaye ora; pero ínýengbe bacna soyëngama, nje tcojåtjayentšana entsanga chama jtsetatšëmbuana.

<sup>25</sup> Cachcá, báseftanga entsangbe delante tšabe soyënga jtsamana, y cachora chë soyëngama jtsotatšëmbuana; y ínýengna iytëmncá tšabe soyënga jamana, pero masque chca, ndayténaca chë tmojanma tšabe soyëngama ínýenga mochanjåtatsëmbona.

## 6

<sup>1</sup> Chë nýets tempo nje ínýabiana oservénënga entsamna, chëngbe nduiñëngbiana jtsejuabnayana, chënga uámana entsanga imomnana y nýets respeto jtsebomnana imomerecénana. Chca entsamna, Bëngbe Bëtsabe Uabainama y chabe soyëngama, ndayiñe bënga mondošbuaché y entsanga mondbëtsabuatambaye, ínýenga podesca ndoñe chamondëtsóyebuambnana.

<sup>2</sup> Y chë imobomna Jesucristbeñe ošbuáchiyënga nduiñënga, chëngbioye nje batšá ndoñe chamondëtsarrespetana, er chënga Jesucristbeyeca chëngbe catšátanga mondmëna, y entsamna más tšabá jtsaservénana, er chëngbe trabajuentša tšabe soyënga imóyëngacañe, Jesucristbeñe ošbuáchiyënga mondmëna, y Bëngbe Bëtsabe bonshánënga.

### *Jtsiyenana Bëngbe Bëtsá jadórama soyënga jtsamëse, endmëna chë ndegombre bomnana*

Quem soyënga cmontsamna entsanga jtsabuátambayana, y becá jtsëtsëtsnayana chca chacmóyaunama:

<sup>3</sup> Nderado nda inýe soyënga tojtsabuatambá, y ntšamo bënga mondëjuabnacá, chë Bëngbe Utabná Jesucristbiana ndegombre buatëmbana soyama, ni chë buatëmbánana ntšamo jtsiyenama Bëngbe Bëtsábioye jadórama yomna soyënga jtsamëse, ndoñe cachcá bëngcá tontsejuabnase,

<sup>4</sup> cha nje cachá puerte uámana entšá yojtšenobiamná, y tondaye ndosertaná yojtsemna. Cha tša jtsoğustánana ba soyëngama y palabréngama jabuachana jtseñatsëtsnayana, y cha nje chama vida jésebomnana. Cha chca yomna causa, nje jtsebošana chë inýa tojashjache soyënga jtsebomnana, nýetscanga ndoñe cachcá chamondëtsejuabnana jtsamana, ínýëngbioye joyáanguanguama jtsebošana, bacna soyënga ndoñe ndegombre soyënga ínýëngbiana jtsejuabnayana,

<sup>5</sup> y ínýëngaftaca nje sempre jtseñpenzëtsiayana, er chëngbe juabniñe nje bacna soyënga jtsebomnana, chë ndegombre soyënga quematábuatma, y jtsejuabnayana chë soyënga Bëngbe Bëtsá jadórama jtsamana, nje más soyënga jóyëngacñama yoservenaca.

<sup>6</sup> Ndegombre canýe entšá bëtscá tšabiana jëftsashjáchana, cha tojtsiyena Bëngbe Bëtsábioye jadórama soyënga jtsamëse, y sempre oyejuayá nje chë tojtsebomna soyëngaca tojtsemnëse.

<sup>7</sup> Er bënga tmojanonýná ora, quem luaroye bëngaftaca tondaye tmonjányëbo, y quem luarentšana cach tondaye quemochatobenaye jëftsocñama.

<sup>8</sup> As, bënga ndayá jasama y ndayá jtichëtjuama tmojtsebomnëse, chë soyëngaca oyejuayënga mochtsemna.

<sup>9</sup> Pero chë bomnënga jtsemnana tmojtsebošënga, bacna soyënga jamama tojócochëngo ora, ndoñe ntsemorochana y pronto chiñe jotsatšana, mo bayá uachmaniñe cuafjotsatšcá, chë entsanga Satanasbe cucuatšinë ndeolpe jotsatšana; chora chënga jtsamana



soyënga mo chë juabna ndbomnëngcá, y chë cachëngbiamana ndoñe tšabe soyënga tmojtsamëngbe juabnëngaca. Y mo chë uándbemana barco, bëts búyeshe asentoye tojtsen-atjëmbcá, cachcá, chë bacna juabnënga bomnana, chëngbioye mochántsapochocaye y nyëtsca tescama mochántscastigaye.

<sup>10</sup> Crocénana jtsebomnana yapa jtsebošana, jamana entšabe ainanentsana nyëtsca bacna juabnënga y soyënga chaóboconama; y básefta entšanga, crocénana jtsebomnana yapa jtsebošana causa, tmojtsajbaná ošbuáchiyana chë Bëngbe Bëtsabe soyënguiñe, chë bënga mondošbuaché soyënguiñe, y chca cachëngbiamana tmojama puerte chamosufrima y bëts ngménana jtsebomnana.

*Chë tšabe soyama jtsenojuerzánama, ošbuáchiyana sempre chaotsemnana*

<sup>11</sup> Pero aca, Bëngbe Bëtsabiamana oservená, chca benachentsana cochtsojuánañe. Nya cochtsentsena, chë Bëngbe Bëtsabe bominyiñe tšabá yomncá jtsamama, chë ndayá Bëngbe Bëtsá jadórama yomncá jtsamama, Jesucristbeñe puerte jtsošbuáchiyama, nyëtscanga jtsababuányeshanama, Bëngbe Bëtsábeñe jtsobátmanëse puerte uantado padecena soyënguiñe jtsemnana, y corente jtsababuányeshanëse nyëtscanga chacotsënyayama.

<sup>12</sup> Chë tšabe soyama, ošbuáchiyana joboguiyanama cochtsenojuerzana. Chë nyëtsca tescama yomna tšabe vida cochjashjache; chama Bëngbe Bëtsá tmojanchembo y bëtscá entšangbe delante tconjánayana tšabe soyënga Jesucristbiamana, ndayiñe aca icošbuaché.

<sup>13</sup> Y mora, Bëngbe Bëtsabe delante, nda endbama lempe ntšamo quem luarentšë yobinýncá vida chaotsebomnana, y Jesucristbe delante, ntšamo cachabiamana ndegombre bemncá Poncio Pilatbe delante lempe tojanayaná, chatbe delante cbontsemánda,

<sup>14</sup> lempe cochjama ntšamo tcbonjauyancá, ndocna soye chacmondëntšashbe jamama, y cochtsiyena, ntšamo ndocná tondaye chaondëtsebomna jayanama aca bacna soye tcojama ca. Y chca cochtsama Bëngbe Utabná Jesucristo quem luaroye yochjésabëntscuana.

<sup>15</sup> Y nya chë soyama chë tempo chaojóshjango ora, Bëngbe Bëtsá chca echanjínyanýiye, er cha endmëna chë corente bendición bomná y chë nye canye Mandado. Cha nyëtsca reyëngbiamana, chë más uámana Rey, y nyëtsca amëndayëngbiamana, chë más uámana Utabná.

<sup>16</sup> Nye cha ndoñe bondmëna ndocna te ntjóbanana, y cha canye bëts buashinýinýana luarentšë endoyena y choye ndocná yondobena jobéconana. Cha ndocná tbonjinýe y ndocná yondobena jinýana. ¡Entšanga nyëts tempo chamotsinýanýná cha puerte bëtsá y obená bëtsemnana! Chca chaotsemna.

<sup>17</sup> Chë quem luarentša soyëngaca bomnënga imomnënga, cochjámëndaye enábotamnayënga ndoñe chamondëtsemnana, ni lempe tšabá yochjóboconama, bëtscá soyënga bëtsebomnana ndoñe chamondëtsobátmana, er chë tcobomna soyëngama ndoñe ntsótatšëmbuana ndayëntscoñama chca mochtsebomnana; pero aiñe, Bëngbe Bëtsábeñe jtsošbuáchiyëse, chënga chábeñe chamotsobátmana. Cha endmëna chë sempre bëtscá soyënga šnetsatšatnayá; y chca, cha jamana bënga chamotsobena nyëtsca chë soyëngaca oyejuayënga jtsemnana.

<sup>18</sup> Ntšamo tšabá yomncá chënga chamotsama, ba tšabe soyënga chamotsama, y siempre tšabe ainánaca chamotseprontana entšanga ba soyënga jatšatayama, y ndaye tmobomna soye entšángaftaca jenájatayama.

<sup>19</sup> Mo nda bëtscá shajuana tojtsábuajo y jtsetatšëmbuana yochtsebomna más chcoye jasama, cachcá, quem bomnënga ba tšabe soyënga tmojtsamëse, mochántsetatšëmbo chënga bëtscá tšabe bendicionënga más chcoye mochtsebomnana. Y chënga chë soyënga tmojtsamëse, chënga chë ndegombre vida, chë nyëtsca tescama yomna tšabe vida mochanjéftsashjache.

*Inye soye Timotéobioye tbojanbonýé*

<sup>20</sup> Timoteo, ndayá Bëngbe Bëtsá tmojabonýecá, botamana cochtsinýena. Entšanga nye quem luarentša soyëngama encuéntayana, ndoñe cattsuenana, ni chë ndoservena

soyëngama jabuachana enatsëtsnayana, chë ndayama entšanga jtsichámuana becá osertánanentšana chca yóbocana ca, pero ndegombre chca ndoñe ntsemnana.

<sup>21</sup> Atše chca séntŝichamo, er báseftanga chca osertánana imobomna ca ichámënga, Jesucristbeñe ošbuáchiyana y chë bënga mondošbuaché soyënguiñe ošbuáchiyana tmojtŝajbaná.

Atše, Bëngbe Bëtsá sëntseimpadana, ácbeñe tšabe bendicionënga chaotsemnana.

## 2 Timoteo

### *Jachuayama*

<sup>1</sup> Atše Pablo, Jesucristbe ichmoná sēndmēna, Bēngbe Bētsá chca yobóseyeca. Jesucristo šonjichmó entšanga jábuayenama Bēngbe Bētsabe šbuachenánama, ntšamo cha inétsamama entšanga chē nýetsca tescama yomna tšabe vida chamotsebomnama; y chca vida montsebomna Cristo Jesúseftaca cánýiñe mo canýacá bétsemnayeca.

<sup>2</sup> Atše quem tsbuanácha cbontsabobiamná, acbiama Timoteo, aca mo atšbe bonshana uaquiñacá, Crístbeñe condošbuachema. Atše sēntseimpadana, Bēngbe Bētsá, Bēngbe Taitá, y Jesucristo, Bēngbe Utabná, chaboma ácheñe tšabe bendicionēnga chaotsemnama, chata ácbioye chacmolastemama, y acbe ainaniñe tšabe ebionana chacotsebomnama.

### *Ndoñe ntsēuatjana entšángbeñe Jesucristbiamá jóyebuambayama*

<sup>3</sup> Sempre Bēngbe Bētsáftaca stsencuēnta ora, acbiama sēndbétseñojuabnaye, y acbiama sēndbétsetschuanaye bnēté y ibeta; y Bēngbe Bētsá endmēna nda atše sēndēservena, ainánaca jtsejuabnayēse y jtsetatšēmbēse, ntšamo atše stsamcá tšabá bétsemnama, cachcá ntšamo atšbe bēts taitanga tmojanmcá.

<sup>4</sup> Atše sēndbētétenojuaboye ntšamo aca, chocana atše sēntanabo ora shēchbuiye tconjanoperdema, y chíyeca atše tša sēntseboše aca jtētínýama, atše puerte oyejuayá chaitsemnama.

<sup>5</sup> Bēngbe Bētsá acbiama sēndbatschuaye, er atše sēndbátenojuaboye aca Jesucristbeñe ndegombre ošbuáchiyana condbomnama. Natsana, acbe bēts mamá Loida, y chentšana acbe mamá Eunice chábeñe bontsanošbuáchiye, y ácnaca cachcá tcojamama atše puerte sēndētatšēmbo.

<sup>6</sup> Chíyeca sempre cochtsantješna quem uámana soyama: Mo nda canýe shinýañe tojtsajuinýinýnacá, chentše sempre chaotsoiñama, cachcá aca, chē Bēngbe Bētsá tcmojatšetá obenana tšabe soyēnga jamama, sempre cochtsinýena. Chē obenana aca conjanóyēngacñe, atšbe cucuatšēnga acbe bestšašñe sēnjanjajó y Bēngbe Bētsá acbiama sēnjanimpadá ora.

<sup>7</sup> Er Bēngbe Bētsá tonjama bēngbe ainaniñe Uámana Espíritu chaotsemándama, uatjana ndoñe ntsebomnama, ndayá obenana bēnga chamotsebomnama, bonshánana Bēngbe Bētsabiamá y nýetscangbiamá chamotsebomnama, y cabēnga jenomándama chamotsobemnama.

<sup>8</sup> Chíyeca, ndoñe cattseuatja entšanga jáuyanama, ntšamo tcojinýe y cojtsetatšēmbcá Bēngbe Utabnabiamá ndegombre bétsemnama; ni atšbiamá ndoñe cattseuatja, atše cárceloye sēndutámenama, chabiamá oserverna causa. Chamna, chē Bēngbe Bētsá cmochanjátsetaye obenánaca, sempre cochtseprontana jasúfriama, átšeftaca y ínýengaftaca, entšanga tšabe noticiēnga abuayiynaye causa.

<sup>9</sup> Bēngbe Bētsá endmēna nda bēnga šojatsebacá, y šojáchembo jtsiyenama mo chábenga imomnēngcá jtsamēse. Y cha chca tojama, ndoñe nderado bēnga ndaye tšabe soye tmojamama, ndayá cachá chca chaotsemnama inabóseyeca y bēngbe tšabiamá juabna bómnayeca. Cha chca inajuabnaye, cabá quem luare ndmēna orscana; y chca jamama Bēngbe Bētsá inajuabnaye, chē ndayá Cristo Jesús bēngbiamá jamama sóyeca.

<sup>10</sup> Y mora, Bēngbe Atsebacayá Jesucristo tojáboyeca, Bēngbe Bētsá šojinýanýé cha bēngbe tšabiamá juabna yobomnama. Jesucristo tonjama, entšanga nýetsca tescama obanēnga ndoñe chamondétsemnama, y tonjama bēnga chamotsetatšēmbuama, chē tšabe noticiēnga chabiamá jouenēse y joyeunayēse, bēnga chē nýetsca tescama yomna tšabe vida mochjábomnama, ndoñe nýe jopochócama cuerpēnguiñe.

<sup>11</sup> Bëngbe Bëtsá šojanábuayana tšabe noticiënga entšanga jábuayenama, Jesucristbe ichmoná jtsemnama y entšanga jabuátambama.

<sup>12</sup> Chë causa, atše mora cárceloca quem soyënga séntsesufrina; pero chama atše ndoñe quetsátëuatja, er atše sëndétatsëmbo ndábeñe atše stsošbuáchema, y corente sëndétatsëmbo cha yobena jtsinÿenana ndayá šojabonÿecá, chë ndayté cha yochjésabëntscuana.

<sup>13</sup> Nÿets tempo, chë ndegombre buayenánana, ndayá átsbentsana tconjanuencá, entšanga cochtsabuayinaye, entšanga jtsinÿanÿnayëse aca Jesucristbeñe icošbuáchema, y Bëngbe Bëtsá y nÿetscanga icuababuánÿeshanama, y chca yomna aca Cristo Jesúseftaca cánÿiñe mo canÿacá bétsemnayeca.

<sup>14</sup> Chë Uámána Espíritu, chë bëngbe ainaniñe endoyenabe uajabuáchenanaca, ntšamo Bëngbe Bëtsá tcmojabonÿecá sempre cochtsinÿena.

<sup>15</sup> Ntšamo ya condétatsëmbcá, nÿetsca ošbuáchiyënga Asia luaroquënga cachcá šmonjesonÿá, y chentše bontsemna Figelo y Hermógenes.

<sup>16</sup> Pero Bëngbe Utabná Onesíforbe pamíllanga chaotsalastemana, er cha ba soye šonjanañemó, y atše cárceloye utámenama cha ndoñe quenjatëuatja.

<sup>17</sup> Masna, Romoye tojabánashjango ora, cha botamana šojánguango y šonjáninÿena.

<sup>18</sup> Bëngbe Utabná lastemado cháftaca chaotsemna, ntšamo nÿetscanga tmojamcá tšabá o ndoñe tšabá yontsemnama cha yochjayana ora. Aca corente condétatsëmbo ntsachetšá Onesíforo Efeso puebloca šonjanéjabuachama.

## 2

### *Jesucristbiana canÿe tšabe soldado*

<sup>1</sup> Y aca, atšbe uaquiñá, chë Cristo Jesús acbiana tšabe juabna yobomnentšana, bëtscá añemo ainaniñe cochtsebmna.

<sup>2</sup> Ntšamo ba entšangbe delante šconjoyeunacá, cach buayenánana, boyabásenga nÿetscañe tšabe palabra bomnënga cochjábanÿiye, y chamotsobena ínÿenga cachcá jabuátambama.

<sup>3</sup> Aca, chë bënga fsëndbomna padecena soyëngama jasúfriama chacmojtsemna ora, Jesucristbe soyëngama entšanga abuayinaye causa, ainaniñe bëtš añemo cochtsebmna, mo canÿe tšabe soldadcá, cha chabe mándayabiama jasúfriana.

<sup>4</sup> Ndocna soldado ntjátanana shjoca soyënguiñe vida jtsebmnama o crocénana juácanama. Soldado chca jtsamana, chabe mandayá, chca chaotsemnama tbojabocacá cha, oyejuayá chaotsemnama.

<sup>5</sup> Y canÿe travisiayá, ínÿenga jáyëñjanama, canÿe soye juácanama; pero ntšamo chë uacanánana jocñama tomncá ndoñe tonjatravisiase, cha chë soye ndoñe ntjosháchiñama. Cachcá, acbe trabajo cochjama ntšamo cmojtsemncá.

<sup>6</sup> Chë jajañe trabajayá derecho jtsebmnama chë natsaná jtsemnama, chë tmojatbaná sananguentšana ndayánaca jtsebmnama. Acaftaca cachcá echanjopása, chë trabajo tšabá chacojamëse.

<sup>7</sup> Chë cbontsatsëtsnañe cochtsenójuabnaye, y Bëngbe Utabná echanjama lempe chacmósertama.

<sup>8</sup> Sempre cochtsenójuabnaye Jesucristbiana, ndabiama Bëngbe Bëtsá tojanma cháuatayenama y enjamna canÿa rey Davidbentsana entšá, ntšamo atše chabiama sëndabuayiná tšabe noticiënguiñe endmëncá.

<sup>9</sup> Chca abuayinaye causa, atše séntsesufrina, nÿa cadenëjuangácnaca utsbuaná, mo canÿe bëtš bacna soye ochjajnayacá. Pero masque atše chca séntsemna, chë Bëngbe Bëtsabe soyëngama buayenánana ínÿenga entšángbioye montsabuatambá.

<sup>10</sup> Chíyeca atše nÿetsca padecena soyëngaca sëndëtsóboyana, Bëngbe Bëtsabe bocacánëngbe tšabiama, chëngnaca atsebácanënga chamotsemnama, Crístbeñe

jtsošbuáchiyëse; y Cristo Jesús bëtsëtsanga cháuabiamama, y cháftaca nyëtsca tescama chamotsiyenama.

<sup>11</sup> Mëntsá ndegombre endmëna:

Cristo Jesús tojanóbana ora, enjamna mo bëngnaca cuafjobancá, er bënga tmontsajbaná oyenana ntšamo tempo monjanियencá y Jesucristbeñe montsošbuaché; y chca, bëngnaca cháftaca mochantsiyena;

<sup>12</sup> bënga chë padecena soyëngaca tmojtseufrina ora, tmojtsemorochëse, bëngnaca Jesucristoftaca mochántsemandaye.

Bënga tmojayana, cha ndoñe monduabuatma ca, as cha bëngbiámnaca cachcá echanjayana;

<sup>13</sup> bënga chábeñe ndoñe tmontsošbuáchese, masque chca, cha cabá echanjama ntšamo tbojašebuachenacá, er cha lempe jamana, ntšamo sempre iuetsemncá jtsinÿanÿnayëse.

*Canÿe trabajayá, ndáftaca Bëngbe Bëtsá jtsóyejuayana*

<sup>14</sup> Chë tcbonjauyana soyëngama, cochjama chë entšanga chamotsenójuabnama, y Bëngbe Bëtsabe delante cochjábuayenaye chënga ndoñe yontsamna nÿe palabrëngama jabuachana enatsëtsnayana; er chca, ndocna tšabe soye ntjamana, y chca tmojtse-natsëtsná ora, jamana chë soye ouenanënga más batšá chamotsošbuáchema, y ju-jabuáchana chëngbe tšabe juabnënga jtsondbiamama.

<sup>15</sup> Lempe ntšamo icobencá cochtsama, aca chacotsemnana mo canÿe entšá ndabiamama Bëngbe Bëtsá cháuayana nyëtsca soyënguiñe tšabá amá yomna ca; aca chacotsemnana mo canÿe trabajayacá, nda tondaye tontsebmna ndayama jatëuatjama; y chacotsemnana chë ndegombre buayenánana corente tšabá buatëmbayá.

<sup>16</sup> Entšanga nÿe quem luarentša soyëngama, ndoservena palabrënga tmojtseencuënta ora, chë soye ndoñe cattsuenana; er chë soye jamana entšanga puerte inÿetsá chamobocanama, ntšamo Bëngbe Bëtsá ndoñe yondmëncá, inÿetsá jtsejuabnayëse y jtsamëse.

<sup>17</sup> Chëngbe buatëmbana soyëngaca puerte bacá inÿengbioye jáborlana, nÿa mo canÿe uabouana šocana chamotsebmnama cuafjamcá. Chca buatëmbayënguentše Himeneo y Fileto bontsemna.

<sup>18</sup> Chata chë ndegombre benachentsana tbojtsojuánañe, y ibojtsichamo chë obanënga chámuatayenama Bëngbe Bëtsá ya catënjama ca, y Jesús chaojésabo ora, nyëtscanga chámuatayenama Bëngbe Bëtsá ndoñe yochanjama ca. Chë causa, chata bontsama básefta entšanga chë ntšamo Jesucristbeñe imojanošbuachecá, mora ya ndoñe chamondëtsošbuáchema.

<sup>19</sup> Pero Bëngbe Bëtsabe ndegombre buayenánana nyëts tempo cachcá endesomñe, y ndocná quenátobena chë soye jatrócama. Chca endmëna mo chë ndëtsbënga ndayiñe canÿe bëts yebna tojebncá, ndayiñe mëntsá yojtšábemana: “Bëngbe Utabná endëubuatma chë chábënga imomnënga”, y “Nyëtscanga chë Bëngbe Utabná bënga imomnënga ca tmojt-sichámënga, chamuajbaná nyëtsca bacna soyënga amana ca”.

<sup>20</sup> Canÿe uámana entšabe yebnentše, tsafjoca soyënga ndoñe nÿe castellano o midio soyënga ntsemnana, ndayá niñëse y fshantse soyëngnaca; chë natsana soyënga uámana tescama jtsebuájonana, pero chë inÿe soyëngna, nÿe nyëts tempo chauetsoservënama.

<sup>21</sup> Chca endmëna chë Jesucristbeñe imojtsošbuachëngbeñe, ndoñe nyëtscanga tmontsajbaná bacna soyënga juabnayana y amana, ni chë chca tmojtsama entšángbentsana ndoñe tmontsojuaná. Pero, chca jtsojuánañama tojtsebošá, echántsemna canÿa Bëngbe Utabnabiamama tšabe trabajayá; y chca, mo chë tsafjoca castellano y midio soyëngcá, canÿe uámana trabajuiñe echanjosérvia, y cha sempre echántseprontana ndaye tšabe soye jamama.

<sup>22</sup> Chiyeca, ntšamo básefta bobontsënga bacna soyënga jamama mondbošcá, ndoñe cattsama; pero aíñe cochtsiyena ntšamo Bëngbe Bëtsabe bominiñe tšabá

yomncá jtsamëse, Jesucristbeñe puerte cochtsošbuáchiye, Bëngbe Bëtsá y ínÿenga cochtsababuánÿeshana y nÿetscángaftaca natjëmbana cochtsomñe, chë chaújabuachama Bëngbe Utabná mondbetsotsëmbuanëngaftaca cánÿiñe, ndocna bacna soye ainaniñe ntsebmncá.

<sup>23</sup> Ndoservena soyëngama palabrénga y ndosertánentsana óbocana soyëngama ndoñe cattsuenana; aca corente condétatsëmbo chë soyënguentšana entsanga nÿe jabuachana enatsëtsnayañe jabocanana.

<sup>24</sup> Pero chë Bëngbe Utabnabiamana oservená ndoñe quebnátsmëna ínÿengaftaca jabuachana ntsenatsëtsnayana; chamna, cha bontsemna jtsababuánÿeshanëse nÿetscanga jtsënÿayana, jtsemnana tšabe buatëmbayá y ínÿengaftaca uantadá.

<sup>25</sup> Cha bontsemna, chë chabe contra y chabe buayenánama contra imomnënga, chë ndegombre soyënga jabuátambama, pero ndoñe ntjatenabotamnaycá. Chca bontsemna, nderado Bëngbe Bëtsá nanjama chca juabnayana chamotrocama, y chca, chënga chë ndegombre soyëngama chamotsetatsëmbuama;

<sup>26</sup> chënga botamana chamuatsjuaboma, y Bëngbe Bëtsá, Satanasbe cucuatšënguentšana cháuatsebacama. Satanás chënga tojanëtabá ntšamo cha tojtsebošcá jamama, mo bayënga canÿe uachmaniñcá.

### 3

#### *Ntšamo entsanga mochtsemna, Cristo jésabama chaojtsobeco ora*

<sup>1</sup> Pero aca cmontsemna jtsetatsëmbuana, Cristo jésabama tempo chaojtsobeco ora, entsanga echántsamna puerte padecena soyënguiñe jtsiyenana.

<sup>2</sup> Chca echántsemna, er entsanga, cada ona nÿe cachabe tšabiamana echanjésenuabnaye, crocénana jtsebmnama tša mochántseboše, mochántsemna enábotamnayënga y ínÿengbioye mo nduamanëngcá mochantsënÿaye. Bëngbe Bëtsabiamana y ínÿengbiamana bacá mochantsóyebuambnaye, chëngbe bëtsëtsangbioye ndoñe quemochátayaunana, ni chëngbiamana tšabe soyënga tmojtsamëngbioye quemochtëtacheuanaye, y Bëngbe Bëtsabiamana y chabe soyëngama ndoñe respeto quemochátsbomna,

<sup>3</sup> ni cachëngbe pamílangbioye quemochátatabuanÿeshana, mochántseboše ndoñe natjëmbana jtsiyenama, uayátsenayënga mochántsemna, cachënga jenomándama ndoñe quemochátobena, mo ainana ndbomnëngcá mochántsemna, y nÿetsca tšabe soyënga uabotënënga.

<sup>4</sup> Chënga, uayayëngbe cucuatšëne entsanga ayentsbáshejuanënga mochántsemna, mochántsama soyënga tondayama ntjatsrreparánëse, y cachënga uámana entsangcá mochántsenobiamnaye; chënga Bëngbe Bëtsá jatsbobonshana cuenta, cachëngbe cuerpiñe tšabá jtsomñama soyënga mochántseboše.

<sup>5</sup> Inÿenga echantsinÿana mo ndegombre Bëngbe Bëtsá adórayënga chënga cuaftsemncá, pero chë mochántsama soyëngaca mochanjínÿanÿiye, Bëngbe Bëtsá obená bëtsemnana chënga ndoñe mondošbuáchema.

Nÿa tondayama chëngaftaca cattsencuëntaye.

<sup>6</sup> Chënguentše báseftanga mondmëna, y chëngna botamana palabréngaca yebnënguenache jamashjnana, y chenache, chë paselo yomna jáingñama shembásënga jtsaíngñayana, chëngbe buatëmbana soyënguiñe chamotsošbuáchema. Chë shembásënga bëtscá bacna soyënga tmojama, y chë causa ndoñe corente natjëmbana montsiyena, y ba ndoñe tšabe soyënga imojtsama nÿe cachënga tšabá jtsemnana, ntšamo tmojtsebošcá.

<sup>7</sup> Chënga nÿets tempo nÿe ndaye tsëm soye jatóntšana jatatsjínÿana, pero ndocna te ntjobenayana Bëngbe Bëtsabe ndegombre soyënga josértama.

<sup>8</sup> Ntšamo Janes y Jambres Moisesbe contra ibojamncá, cachcá, chë ínÿenga jáingñama abuátambayënga nÿetsca ndegombre soyëngama contra jtsemnana. Chë entsanga chëngbe

juabniñe nÿe bacna soyënga jtsebomnana, y Bëngbe Bëtsá chënga tojtsëbaté, chënga chë ndegombre soyënguiñe ndoñe ntsošbuáchiyana causa.

<sup>9</sup> Pero chënga ndoñe quemochatobenaye bëtsá entšanga jáyëñjanama, er nÿetsca entšanga mochanjátatšëmbona chënga nÿe bacna soyënga juabnayënga imomnana, mo chë Israeloca entšanga tmojantatšëmboncá Janes y Jambres nÿe chca juabnayata bëtsemnana.

### *Inÿe soye Timotéobioye tbojanbonÿé*

<sup>10</sup> Pero acna, puerte tšabá condëtatšëmbo ntšamo atše tijabuatambacá, ntšamo jtsamëse atše tsiyena, ndayá jamama tsjuabná, ntšamo atše Jesucristbeñe puerte tsošbuaché, ntšamo ínÿengaftaca uantado tsmëna; ntšamo atše, Bëngbe Bëtsá y ínÿengbioye tsababuánÿeshana; ntšamo atše, Bëngbe Bëtsábeñe jtsobátmanëse,

<sup>11</sup> ínÿenga šmonjanacmena ora; y sënjansufrina ora, padecena soyënguiñe bëts añemo tsjánbomna. Acnaca condëtatšëmbo ntšamo atše chama Antioquía, Iconio y Listra bëts pueblëngoca tsjansufrínama. Pero masque entšanga tša šmonjanacmena, atše lempe sënjánauantana, Bëngbe Bëtsábeñe jtsobátmanëse, y cada ora, Bëngbe Utabná chëngbentšana šonjanatsbocá.

<sup>12</sup> Ndegombre endmëna, nÿetscanga chë Bëngbe Bëtsá jadórama soyënga jtsamëse jt-siyenama bošënga, y Cristo Jesúsftaca cánÿiñe mo canÿacá imomnënga, puerte mochan-jasúfria, chca bëtsemnana, chënga chamosufrima ínÿenga chamojtsama ora;

<sup>13</sup> pero chë bacna entšanga y chë ínÿenga áingñayënga, cada te más bacna entšanga mochántsemna, más bacna soyënga jtsamëse; chënga ínÿengbioye mochántsaingñaye, pero cachëngnaca ingñénënga mochántsemna.

<sup>14</sup> Pero aca, nÿets tempo cochtsejuabnaye y cochtsama lempe ntšamo tcojuatsjinÿcá, chë ndegombre soyëngcá cojtsošbuácheñe, er aca tšabá condëubuatma chë tmojan-buatëmbanga;

<sup>15</sup> y aca, cabá básetema conjamna orscana, chë Bëngbe Bëtsabe uabemana palabrëngama condëtatšëmbo, chë ndaye sóyeca aca contsobena juatsjínÿana, Bëngbe Bëtsá chacmatsbo-cama, Cristo Jesúsbeñe jtsošbuáchiyëse.

<sup>16</sup> Bëngbe Bëtsá, Uámana Espíritbeyeca tonjama, lempe ntšamo Bëngbe Bëtsabe uabe-mana palabrënguiñe yobinÿncá entšanga chamuábemama. Chë uabemana palabra endoservena, bëngbioye chë ndegombre soyënga jabuátambama; nderado ndaye soye ndoñe tšabá tmonjamama bënga chamotsetatšëmbuama, jinÿanÿiyama ntšamo más tšabá chë soyënga muanjobenaye jamama; y bëngbioye jabuátambama ntšamo jtsiyenama chë Bëngbe Bëtsabe bominÿiñe tšabá yomna soyënga jtsamëse;

<sup>17</sup> chca, canÿe entšá Bëngbe Bëtsabiama oservená y obená chaotsemnana, tšabá chaotsetatšëmbo y sempre chaotseprontana nÿetsca tšabe soyënga jtsamama.

## 4

<sup>1</sup> Bëngbe Bëtsabe delante y Cristo Jesús, nda echanjabo mo reycá jabomándama y jabáyanama chë ainëngbiama y chë ya mochjóbanëngbiama, ntšamo chëngbe vidënguiñe tmojëftsemcá tšabá o ndoñe tšabá bëtsemnana, chatbe delante cbomandá,

<sup>2</sup> Bëngbe Bëtsabe palabra entšanga chacotsabuayiyayama; sempre chca jamama cochtseprontana, masque entšanga aíñe o ndoñe jouenama tmojtsebošëse. Cochjama, ínÿenga bacna soyënga tmojtsamama chamotsetatšëmbo, chca tmojtsamama cochjucácana y cochjábuayenaye ndayá jamama yojtsamnana. Sempre chca cochtsabuátambaye, chca ora puerte uantado jtsemnëse.

<sup>3</sup> Chca cochtsama, er canÿe tempo echanjóshjango y chora entšanga chë nde-gombre buatëmbana soye ndoñe quemochátuenana; chamna, nÿe chë último tsëm soyënga jtsetatšëmbuama boše causa, ba abuátambayënga mochanjuánguango, y chënga mochántsicamo soyënga nÿe ntšamo cach entšanga jouenama tmojtsebošcá.

<sup>4</sup> Chënga chë ndegombre soyënga ndoñe quemochátuenana, y nÿe ndaye cuentënga mochántseyeunana.

<sup>5</sup> Pero aca, sempre botamana cochtsejuabnaye; chë padecena soyëngama chacojtsesuf-rina ora, añemo cochtsebomna; chë Jesucristbiana tšabe noticiënga entšanga abuayiy-nayabe trabajo cochtsama; y nÿa cochtsentsëna ndayá Bëngbe Bëtsá tcmojabonÿecá tšabá jtsamama.

<sup>6</sup> Er mo Bëngbe Bëtsábioye jëtschuayama, canÿe bayá obanáftaca tcojabuešcja vïnoye jtsopochocancá, cachcá atšbe vídnaca ya jopochócama entsemna. Atšë jóbanama bécoñe entsemna; chanjóbana ora echántsemna Bëngbe Bëtsá oyejuayá chaotsemnama.

<sup>7</sup> Cristo Jesusbe soyëngama corente sënjenojuerzá. Mo canÿe travisiayacá, chë jashjan-guama yomna luaroye ya tojashjangcá, átšnaca ya, ntšamo Bëngbe Bëtsá yobošcá atšë jtsamëse, atšbe trabajo ya tijapochocá. Atšë nÿets tempo Jesucristbeñe sëndošbuaché.

<sup>8</sup> Chcasna, atšbiana canÿe uacanana soye echántsemna, er Bëngbe Bëtsá tojama atšë chabe bominiñe tšabia chaitsemnama. Bëngbe Utabná endmëna chë ndegombre tšabá ichamuá entšanga aïñe o ndoñe tšabá tmonjamama, y cha chë uacanana soye šochántatšetaye, entšanga ntšamo tmojamama cha chaojabáyana ora. Pero cha nÿe atšë ndoñe chë uacanana soye quešochtétatšetaye, ndayá nÿetscángbioye chca, ndëmuanÿenga puerte imoboše cha cachiñe cháuesabama, cha imobobonshánayeca.

### *Inÿe soyënga Timoteobiana*

<sup>9</sup> Lempe ntšamo tcojobenacá cochjama betsko jabama atšë jabínÿama;

<sup>10</sup> er Demas, cha yapa nÿe quem luarentša entšangbe soyënga bošá enjamna, cha cachcá šonjesonÿá y Tesalónica puebloye tojtsoñe. Crescente Galacia luaroye tonjá y Tito Dalmacia luaroye.

<sup>11</sup> Nÿe Lucas, chë šmonjanájabuachanënguentshana, mora átšeftaca entsemna. Marcos cochjaftsenguango y ácaftaca cochjëftsbetše, er cha atšbe trabajuama puerte oservená endmëna.

<sup>12</sup> Tíquico, Efesoye sënjichmó.

<sup>13</sup> Chacojabo ora, uabonjanía šcochjesacñe, atšë Troas bëts puebloca, Carpbe yebnoca tijésaboshjona; chë librëšangánaca, pero chë uámana uabemana tsbuanachangá ndoñe chacmondétsebnatjëmbe.

<sup>14</sup> Alejandro, chë cobre soyënga pormayá, puerte bacá šonjaborlá. Bëngbe Utabná bochanjacastíga, ntšamo atšë šojaborlama.

<sup>15</sup> Chabiana cuedado cochtsebomna; cha tojobenase ntšámnaca cmatjabórla, er cha chë bënga mondabuayiyá soyëngama contra entsemna.

<sup>16</sup> Chë natsana soyama, mándayëngbe delante šonjanotocá jenëuyanama ora, atšë ndocná chešnátanajabuache; nÿetscanga cachcá šmonjésonÿaye. Pero atšë sentsobátmana, Bëngbe Bëtsá chama chënga chaotsaperdoná.

<sup>17</sup> Pero Bëngbe Utabná aïñe šonjanájabuache y tonjanma atšë bëts añemo jtsebomnama, y chcase, atšë sënjanobená Jesucristbiana nÿetsca chabe tšabe noticiënga entšanga jábuayenama, y chë luarentša ndoñe judiënga tmonjanobená chë soye jouenama. Mëntšá, Bëngbe Utabná canÿe uabouana resjuentshana šonjanatsbocá, mo canÿe león jtsosañamentshana ndábioye cuafjatsbocacá,

<sup>18</sup> y Bëngbe Utabná šochanjatsbocá, bacna soye ndocná chašondëborlama; y sempre jtsinÿenëse, celoye, chë ndayentše cha yománda luaroye šochanjesbetše. ¡Nÿetscanga nÿetsca tescama cha chamotsatschuaná! Chca chaotsemna.

### *Pablo Timotébioye jadiósoftanama*

<sup>19</sup> Atšbe cuenta cochjácheuaye Prisca y Aquila, y Onesíforbe pamílnaca.

<sup>20</sup> Erasto, Corinto puebloca tontsoquedañe, y Tróximo Mileto puebloca šocá sënjëftsebohshjona.



<sup>21</sup> Lempe cochjama, uaftena tempo chaondóshjango ora moye jabama. Acnaca cmontsechuaná Eubulo, Pudente, Lino, Claudia y nyetscanga muentše Jesucristbeñe ošbuáchiyënga.

<sup>22</sup> Atše sëntseimpadana, Bëngbe Utabná Jesucristo ácaftaca chaotsemna, y Bëngbe Bëtsá tšëngaftangbeñe tšabe bendicionënga chaotsemnama chaoma.

## Tito

### *Jachuayama*

<sup>1</sup> Atše Pablo, Bëngbe Bëtsabe oservená sëndmëna y Jesucristbe ichmoná entšanga jábuayenama, chë Bëngbe Bëtsá chabe entšanga chamotsemnama tojábacacanga, Jesucristbeñe chamotsošbuáchema y chë ndegombre soyëngama chamotsetatšëmbuama; chë soyënga endmëna ntšamo bënga, Bëngbe Bëtsabe básenga bëtsemnama, mondoyena jt-samëse.

<sup>2</sup> Lempe chca sëndama, er Bëngbe Bëtsábeñe jtsošbuáchiyëse, atše sentsobátmana chë nyetsca tescama yomna tšabe vida jtsebonnama. Bëngbe Bëtsá, chë ndocna te oboster-ayá, quem luare cabá ndmëna orscana tojanašebuachená entšanga chca vida jtsebonnama;

<sup>3</sup> y nÿa chama tempo tojóshjango ora, chë entšanga jábuayenama, soyëngaca Bëngbe Bëtsá chabe palabra šojinÿanyë, ndayá Jesucristo entšangbiamama yochjanmama; y chca jábuayenama atše palabra šmonjabonyë, Bëngbe Bëtsá, bëngbe Atsebacayabe mándoca.

<sup>4</sup> Tito, quem tsbuanácha chontsabobiamná. Atše Jesucristbe soyëngama entšanga sënjanabuayiyiná ora, aca chábeñe contsanošbuaché y nyets útata cachca ošbuáchiyana Jesucristbeñe bondbomna, y chca, aca mo atšbe ndegombre uaquiñacá condmëna. Atše sëntseimpadana, Bëngbe Bëtsá Bëngbe Taitá y Jesucristo Bëngbe Atsebacayá, ácheñe tšabe bendicionënga chaotsemnama chata chaboma, y chaboma aca ainaniñe tšabe ebionana chacotsebonnama.

### *Titbe trabajo Creta luaroca*

<sup>5</sup> Atše Creta luaroca tcbonjëftsanboshjona, ntšamo chentše jamama enjetsash-bencá chacomama, y nyetsca pueblënguenache chë ošbuachiyëngcá enefjuanëngbeñe bëtsëjemëngcá amëndayënga jtsemnama chacubuáyanama, ntšamo tcbonjajtsemandacá.

<sup>6</sup> Canÿa bëtsëjemamama uabuayaná mëntšá bontsemna: chaotsiyena ntšamo chabiamama ndocná chaondëtsichamo ndoñe tšabá yontsama ca; nÿe canÿe shembásabe boyá; chabe básengna, Jesucristbeñe ošbuáchiyënga chamotsemna, y chamotsiyena, ntšamo ndocná chaodayana chënga nÿe jenomándama ntsoyencá y nÿe ntšamo tmojtsebošcá imojtsiyena ca, o chënga chëngbe bëtsëtsanga o mándayënga ndoñe montsayaunana ca.

<sup>7</sup> Er cánÿentše ošbuachiyëngcá enefjuanëngbe mandayá, Bëngbe Bëtsabe trabajo jamama tmojabonyëyeca, cha bontsemna jtseyenana, ntšamo ndocná chaodayana cha ndoñe tšabá yontsama ca; ntjajuaboycá, nÿe ntšamo cha tojtsebošcá ndoñe chaondëtsama; ndoñe chaondëtsiyena nÿe rábiaca jtsemnama; ndoñe chaondëtsetmó; penzentsero ndoñe chaondëtsemna; y ndoñe chaondëtseboše nÿe paselo becá crocénana jtsebonnama.

<sup>8</sup> Pero chabe yebnentše posada entšanga júyentšamiamama sempre chaotseprontana, tšabe soyënga chaotsebinÿinama sempre chaotsentšena, botamana juabnayá chaotsemna, ntšamo Bëngbe Bëtsabe bominiñe tšabá yomncá chaotsiyena, nyets tempo Bëngbe Bëtsábioye chabotsadorana, y cachá nyetsca soyënguiñe jenomándama chaot-sobena.

<sup>9</sup> Cha bontsemna nyets tempo jtsošbuáchiyana y jtsoybedecénana chë ndegombre buayenana soye, ntšamo tmojabuatëmbacá, chca, chë ndegombre buatëmbana soyëngaca ínÿenga añemo chaotsatšatnama, y chë soyama contra tmojtsemnënga jáyënjanama, ndoñe tšabá montsamama.

<sup>10</sup> Cha chca bontsemna, banga nÿe ndëmandánënga jtseyenama bošënga mondmëna causa, y chënga mondmëna, nÿe ndaye ndoservena soyëngama yapa oyebuambnayënga y ínÿenga áingñayënga, y chcanga más mondmëna chë nyetsca ošbuáchiyënga

base bobachtema chë más delicadentse tëtšenënga jtsemnana yojsamna ca mondbétsichamënguëntse.

<sup>11</sup> Y entseyta chëngbioye jtayáchetana, er chënga jamana ba pamíllanguëntse nyetscanga Jesucristbeñe ošbuáchiyana chamotsajbanama. Chënga chca mondbétsama, chë ndoñe yontsamna jtsabuátambayama soyënga jtsabuátambayëse, nye paselo crocénana jongánama.

<sup>12</sup> Enjamna canya, ndabiama entsanga jtsichámuana cach Creta luarentša diosëngbiama oyebuambnayá canjamna ca, y cha cachabe luarentša oyenëngbiama mëntšá tonjánayana: “Creta luarentše oyenënga, nyets tempo bosterënga mondmëna, ainana ndbomnënga y oyënjayënga nye becá jasama bošënga ca.”

<sup>13</sup> Y chca ndegombre cha tonjánayana; chíyeca chënga jabuache cochjucácana, chca, chënga Jesucristbeñe chamotsošbuáchema y chamotsobedecena chë buatëmbana soyënga, chë ndayiñe bënga mondošbuaché;

<sup>14</sup> y cach judiëngbe cuentënga ndoñe chamondëtsuenana, ni chë ndegombre soyënga uabotenëngbe mandënga.

<sup>15</sup> Chë ainaniñe bacna juabnënga ndbomnënga y chca juabnëngaca ndëmandánënga, nyetsca soyëngama jtsejuabnayana mo ndegombre tšabe soyënga cuaftsemncá; pero chë bacna soyëngaca mandánënga y Jesucristbeñe ndošbuáchiyënga, nye ndayámnaca jtsejuabnayana mo bacna soye cuaftsemncá. Chca entsemna, er chëngbe juabno ca nye ena bacna soyënga jésebomnana, y ndaye bacna soye tmojama ora, chëngbe ainaniñe juabnënga ndoñe ntsebomnana, bacna soye tmojamama chaúyanama.

<sup>16</sup> Chënga jtsichámuana Bëngbe Bëtsá imuábuatma ca, pero ntšamo tmojtsama soyëngaca jtsinjinayana chca ndoñe ndegombre yondmënama. Chënga Bëngbe Bëtsabe bominiñe puerte bacna entsanga mondmëna, y ntšamo cha tomandacá ndoñe ntsamana; chë causa chënga ndoñe ntsobenana ndaye tšabe soye jamama.

## 2

### *Soyënga ntšamo chë ndegombre buatëmbánana endmëncá*

<sup>1</sup> Ntšamo chacojtsoyebuambnacá sempre chaotsemna ntšamo chë ndegombre bu-atëmbánana endmëncá.

<sup>2</sup> Cochjayana chë bëtsëjëmëngna chamotsemna cachënga nyetsca soyënguiñe jenomándama obenënga, nyetscangbiama mo uámana entsangcá utabnënga, ntšamo jtseyenama tšabá juabnayënga, nyets tempo chë ndegombre soyënguiñe chamotsošbuaché, Bëngbe Bëtsá y nyetscanga chamotsababuánjeshana, y padecena soyënguiñe puerte uantadënga chamotsemna.

<sup>3</sup> Cachcá, chë bëtsanana shembásënga chamotsiyena mo Bëngbe Bëtsábioye adorayëngcá, uayátsenayënga ndoñe chamondëtsemna, ni tmoyënga. Entsamna chamotsiyena tšabe soyënga jtsamëse;

<sup>4</sup> chë tobiasënga chamotsinjanyná y chamotsabuatambá ntšamo chëngbe boyanga y básënga jtsababuánjeshanana,

<sup>5</sup> ntšamo cachënga jenomándama jtsobenana, ainaniñe ndocna bacna soye ntsebomnana, yebnentša soyënga jtsamama jtsentšénana, nyetscángaftaca tšábënga jtsemnana, cachëngbe boyángbioye jtsayaunanana, chca, ndocná chaondëtsobena Bëngbe Bëtsabe palabrama bacá jatóyebuambnayana, ntšamo chë tobiasënga tmojamama.

<sup>6</sup> Cachcá, chë bobontsënga añemo cochtsatsatnaye cachënga jenomándama chamotsobenama,

<sup>7</sup> y chënga cochjínjanjiye ntšamo yomna jtseyenana, cach aca nyetsca soyënguiñe tšabá jtsamëse. Chca chacojtsabuatambá ora, nye chë ndegombre buayenánana cochtsabuátambaye y corente respétoca chca cochtsama,

<sup>8</sup> chë ndegombre soyënga jtsóyebuambnayëse; chca, ndocná chaondobená jayanana aca ndoñe tšabá tconjayana ca, y chca, chë acbe contra ichámënga chamotsëuatja, er ndocna bacna soye quemochatobenaye bëngbiana jayanama.

<sup>9</sup> Chë nyëts tempo nyë ínÿabiama oservénënga cochjábuayenaye, chëngbe nduiñëngbioye chamotsobedecénama, soyënga chamotsama chënga chamotsóyejuama, y yajuatsanënga ndoñe chamondëtsemnama.

<sup>10</sup> Ndoñe chamondëtsetbëbana, pero aíñe nyëtscañe tšabe palabra bomnënga chamotsemna. Chënga chca entsamna, chca, ínÿenga chámuiñye y chamojuabó tša botamana chë buatëmbana soyënga, Bëngbe Bëtsá bëngbe Atsebacayabiama yomna ca.

<sup>11</sup> Er Bëngbe Bëtsá bënga šonjinÿanÿé cha bëngbe tšabiama juabnënga yobomnama, y chca, cha tojama nyëtscá entsanga chamotsobena atsebácanënga jtsemnama.

<sup>12</sup> Chë Bëngbe Bëtsabe juabna bëngbe tšabiama, šontsabuatambá jtsajbanama oye-nana soyënga jtsamëse mo chë Bëngbe Bëtsá ndoñe mondadoranëngcá, quem luarentša bacna soyënga bošana jtsajbanama; y ntšamo mora quem luarentše jtsiyenámna šontsabuatambá, cabënga jenomándama jtsobenëse, ntšamo Bëngbe Bëtsabe bominiñe tšabá yomncá y cha jadórana soyënga jtsamëse.

<sup>13</sup> Y chca jtsamëse, y Bëngbe Bëtsabeñe ošbuachiyánaca jtsiyenëse, jtsobátmanana chë puerte oyejuayana jtsebomnama te, Bëngbe Bëtsá obená y Atsebacayá Jesucristo, buash-inÿinÿaniñe y canÿe corente uamanacá yochjésabo ora.

<sup>14</sup> Cha chabe derecho vida jtsobomñama cachcá tojanonÿá y bëngbiana tojanóbana, chë ntšamo Bëngbe Bëtsá bemandacá ndoñe yondmëncá jtsamëse oyenentšana bënga jätsebacama, ainaniñe ndocna bacna soye ndbomnënga jábiamama, bënga chábenga chamotsemnama, sempre prontánënga ntšamo tšabá yomncá jtsamama.

<sup>15</sup> Chca cmontsemna jtsabuátambayana, chënga becá añemo jtsatšatnayëse, y jtsinÿanÿnayëse chënga bacna soye tmojamama, chë nyëts condbomna mándoca jucácanëse. Ndoñe catjaleséncia ndocná chaundayana aca mando ndoñe condbomna ca.

### 3

#### *Ndayá Jesucristbeñe ošbuáchiyënga yojtsamna jamana*

<sup>1</sup> Cochtsama chënga chamuatenojuaboma chë mandadënga y inÿe mándayënga chamotsayaunanama, chamotsobedecénama, y tšabá yomncá jamama sempre chamotseprontánama.

<sup>2</sup> Ndocnabiama ndocna bacna soye chamondëtsoyebuambná, penzentserënga ndoñe chamondëtsemna, ndayá nyëtscángaftaca natjëmbana jtsiyenama bošënga, tšabá mándbomnënga, nyëtscanga tšabe ainánaca imojtsénÿama entsanga jtsinÿanÿnayëse.

<sup>3</sup> Er bëngnaca tempo monjamna Bëngbe Bëtsabe soyëngama ndosertánënga, ntšamo Bëngbe Bëtsá endëmandacá ndoñe quemjatanama, ingñénënga y mandánënga monjamna nyëtscá bacna soyënga jamama juabnëngaca y nyë quem luarentše tšabá jtsemnama juabnëngaca. Bënga monjaniyena nyë bacna soyënguiñe juabnaye, ínÿenga uantšaboše. Inÿenga bënga šonjanëbuayënja y bënga nyëtscanga monjanenáboyënja.

<sup>4</sup> Pero Bëngbe Bëtsá, bëngbe Atsebacayá, bëngbe tšabiama juabna yobómnyayeca y tša šuababuánÿeshanama šonjaninÿanÿé ora,

<sup>5</sup> cha šonjanatsebacá, pero ndoñe nderado bënga ndaye tšabe soye tmojanmama, ndayá cha bëngbiana tbojanongméyeca. Cha šonjanatsebacá, bëngbe bacna soyënga jabuajuánase, y chë Uámana Espíritu jujabuáchëse, bënga mo tsmëma entsangcá chamotsemnama, ntšamo tempo yojamncá ntjatsjuabnaycá y ntjatamcá.

<sup>6</sup> Bëngbe Atsebacayá Jesucristbeyeca, Bëngbe Bëtsá tojanma Uámana Espíritu bëngbe ainaniñe nyëts tempo chaotsemándama y bënga chašotséjabuachanama,

<sup>7</sup> chca bënga, Bëngbe Bëtsá bacna soyëngama šojaperdónanga y bëngbe tšabiama juabna bómnyayeca tojayana chabe bominiñe tšábenga imomnënga, chamotsobena cha

yobomna soyënguentshana bënga mo ndayá cuaftsëtocancá jóyëngacñama, y chca, chábeñe jtsošbuáchiyëse, chë nyetsca tescama yomna tšabe vida chamotsobátmanama.

<sup>8</sup> Chca, lempe ntšamo tijayancá nÿa ndegombre endmëna, y atše sëntseboše chë soyëngama bëtská chacotsabuatambá, chca, chë Bëngbe Bëtsábeñe tmošbuachenga chamotsentsena chë tšabe soyënga jtsamama. Chë buatëmbánana puerte tšabá endmëna y nyetscangbiana bëtská endoserverna.

<sup>9</sup> Inÿenga nÿe ndoserverna soyëngama jabuachana tmojtšenatsëtsná ora, y anteungbe cuentëngama chamojtsoyebuambná ora, ndoñe cattsontremetena; ndoñe cattsama cach tšëngaftanga ndoñe tšabá jtsenëyeunanamcá, y judiëngbe leyëngama ndoñe ínÿengaftaca cattsenpéliaye. Chca jtsamana tondayama ntoservénana, y nÿe bonamente chca jtsamana.

<sup>10</sup> Nderado nda tojtsama entsanga ndoñe cachcá nyetscanga chamondëtsejuabnama y chamotsenpéliama, canÿe o uta soye cochjabuayená ndoñe tšabá tonjamama; pero cha ndoñe tcmonjóyeunase, chentsana cháftaca ndoñe más cattsóyebuambnaye.

<sup>11</sup> Chca cochjama, er aca cochanjátatšëmbona canÿa chca tojtsemná, chabe juabna tojatrocá bacna soyënga jtsejuabnayama. Chë soye y chë inÿe bacna soyënga ntšamo cha tojtsamcá, jtsinÿanÿayana cha ibojtsemna castigáná chama jtsemnama.

### *Inÿe soyënga Titbiana*

<sup>12</sup> Atše, Artemas o Tíquico ácbioye chajichmó y choca chaojášhjangora, ndayánaca cochjama Nicópolis puebløye aca jama atše jinÿama, er atše sënjajuabó chentše chë uaftenëntscuana jëftsemnana.

<sup>13</sup> Lempe ntšamo chacojobenacá, cochjuájabuache chë ínÿenga obuauyayá Zenas, y Apólosnaca; lempe ntšamo chata ibojtsëjbotcá cochjátšataye, ínÿoye jama jatóntšama chamobenama y benachëjana tondaye chaondëtsabuáshebenama.

<sup>14</sup> Atše sëntseboše, bëngbe entsanga, chë bëngcá Jesucristbeñe ošbuáchiyënga, chamotsentsena chë tšabe soyënga jtsamama y chë puerte ujabótënga jtsëjabuáchanama, chca, chënga tondayama ndoserverna vidënga ndoñe chamondëtsebomnama.

### *Pablo Títbioye jadiósoftanama*

<sup>15</sup> Nyetscanga chë átšeftaca montsemnëngnaca cmontsechuaná. Atšbe cuenta cochjácheuaye nyetscanga chë bënga imuababuanÿeshanëngbioye, cach bëngcá Jesucristbeñe ošbuáchiyana bómnayeca. Atše, Bëngbe Bëtsá sëntseimpadana, cha chaoma ácbëne tšabe bendicionënga chaotsemnana.

## Filemón

### *Jachuayama*

<sup>1</sup> Atše Pablo, mora utamená Cristo Jesusbiana oservena causa, quem tsbuanácha sentsabiamná, Jesucristbeyeca bēngbe catsata Timotéoftaca, acbiana Filemón, bēngbe bonshana y nda bēngaftaca condētrabája Jesucristo jaserviama.

<sup>2</sup> Atše sēntsacheuaná, Jesucristbeyeca bēngbe uabena Apia y Arquípnaca, nda bēngaftaca cányiñe Jesucristbe soyēngama endenojuerzana; y nyetsca ošbuachiyēngnaca, ndēmuanýenga imuamana acbe yebnentše jénefnama Bēngbe Bētsá jētschuayama.

<sup>3</sup> Atše sēntseimpadana Bēngbe Bētsá Bēngbe Taitá y Bēngbe Utabná Jesucristo, chata chaboma tsabe bendicionēga tsēngaftangbeñe chaotsemnana, y chaboma tsēngaftangbe ainaniñe tsabe ebionana chašmotsebmoma.

### *Filemonbe bonshánana y ošbuáchiyana*

<sup>4</sup> Bēngbe Bētsáftaca stsencuēnta ora, acbiana sēndbētsenojuabnaye, y sempre acbiana Bēngbe Bētsá sēndbētsatschuanaye,

<sup>5</sup> er atše sēnjátatsēmbona ntšamo aca nyetsca chē Bēngbe Bētsábenga imomnēnga icuababuányeshanama, y ntšamo aca Bēngbe Utabná Jesúsbeñe tša icošbuáchema.

<sup>6</sup> Bēnga, Jesucristbeñe ošbuáchiyēnga quetsomñecá, ácaftaca mo canýacá fsēndmēna. Chca endmēnayeca atše Bēngbe Bētsá sēntseimpadana, tsēngaftanga chašmobená más botamana josértana nyetsca chē Bēngbe Bētsábicana tmojóyēngacñe tsabe bendicionēga, bēnga Cristo Jesúsēftaca cányiñe mo canýacá bētsemnayeca.

<sup>7</sup> Jesucristbeyeca atšbe bonshana catsata, aca chē Jesucristbeñe ošbuáchiyēnga tša condábabuanýeshanama, atše corente oyejuayá sēntsemna y bēts añemo sēntsebmoma. Y aca tcojama, nyetscanga chē Bēngbe Bētsábenga imomnēnga chēngbe ainaniñe ngmēnaca ndoñe chamondētsemnana, chēnga jujabuáchese.

### *Pablo, Filemónbioye Onésimbiana tbojanimpadá*

<sup>8</sup> Y chca, atše Cristbe ichmoná quetsomñecá sēntsobena, aca nye jamándana ntšamo yomncá chacotsamama, pero atše chca ndoñe quichatsma.

<sup>9</sup> Y cbondbobonshánayeca, chca játamamna, aca cbochanjaimpáda. Atše Pablo, Jesucristbe cuenta ichmoná jóyebuambayama y mora utamená, chabiana oservena causa,

<sup>10</sup> canýe ruego cbochanjábema, Onésimo chacuájabuachama. Atše utamená tsmēnēntscuana, Jesucristbe soyēngama cha sēnjanbuayiyná. Cha Cristbeñe tonjanošbuachéyeca, cha mo atšbe uaquiñacá tonjanóbema.

<sup>11</sup> Tempo, cha ácbioye tondayama quecmēnjátanservena, pero mora cha becá entsámama, acbiana y atšbiana.

<sup>12</sup> Mora ácbioye sēntsatichamná, y atše sempre chabiana sēndbētsenojuabnaye y sēndbobonshana.

<sup>13</sup> Atšbiana puerte tsabá manmēna cha átseftaca matēnjoquedase, acbe cuenta atše chašoservema, cárceloye utamená sēntsemnēntscuana, chē tsabe noticiēnga entšanga abuayiynaye causa.

<sup>14</sup> Pero atše ndoñe chiyatsma cha chaoquedama atše chašuájabuachama, er atše ndoñe quetsátsboše aca obligaciónaca chacotsemnana, atše juajabuáchama ndayánaca chacomama; y sēntseboše aca ndayánaca chacoma, cach aca chca jamama puerte tcojtsebošese. Chcasna, tondaye quichatsma, chē soye chca chaotsemnana aca cabá ndocá ntjayancá.

<sup>15</sup> Atše sēntsejuabná nderado Onésimo ácbentšana básefta tescama tojanoluaré, mora ácaftaca nyets tempo jtsatsmēnana ca,

<sup>16</sup> y ndoñe nÿe acbiamama mo nÿets tempo canÿe oservenacá, ndayá chama más uamanacá, mo Jesucristbeyeca canÿe bonshana catšatcá. Atše puerte Onésimo sëndbobonshana, y acna cmontsemna más cha jtsebobonshánana, er cha mora ndoñe quenátsmēna canÿa nÿe acbiamama nÿets tempo oservená, ndayá Bēngbe Utabnábeyeca canÿe catšata, ntšamo cach aca condmēncá.

<sup>17</sup> Chca, aca atšbiamama condējuabná mo ácaftaca cánÿiñe Bēngbe Utabnabiamama trabajay-acá; chíyecna cmontsemna cha jtoftjana, mo atše šcojofjcá.

<sup>18</sup> Nderado ntšamo cha tcmojanborlá o ndayánaca tcmondebena, atše chama cbochjētsēntšabuachiye.

<sup>19</sup> Atše Pablo, cach atšbe cucuátšeca quem soye sēntsabiamná. Atše chama cbochanjētsēntšabuachiye. Ndegombre, ndoñe quenátsiyta atše chachbēyana becá šcondebena ca, ntšamo atsbocaná jtsemnama atše tchojánbuayenama.

<sup>20</sup> Chcasna, Jesucristbeyeca atšbe catšata, Bēngbe Utabnáftaca cánÿiñe mo canÿacá quetsomñecá, Diosmanda chē pavor šcochtsebema. Diosmanda cochjama atšbe ainana ngmēnaca ndoñe chaondētsemnama.

<sup>21</sup> Atše chca cbontsabobiamná, er atše tšabá sēndētatsēmbo, ntšamo cbontseimpadancá cochjamama, y cabá más chama cochjatsmama.

<sup>22</sup> Y mora inÿe soye, Diosmanda posada šcochjabopróna, atše jáñyama chajábocna orscama, er atše puerte jtsošbuáchiyēse Bēngbe Bētsábeñe sēndobátmana, cha tšēngaftangbiamama yochjama lempe ntšamo atšbiamama chašmojtjañcá, y chca, cha šochjalesēncia atše tšēngaftangbioye jésama.

#### *Pablo Filemónbioye jadiósoftanama*

<sup>23</sup> Epafra, muentše átšeftaca cárceloye utamená, Cristo Jesusbiamama entšanga abuayiy-naye causa, chánaca cmontsechuaná.

<sup>24</sup> Y Marcos, Aristarco, Demas y Lucas, chē bēngaftaca mondētrabájanga Cristo jaserviama, chēngnaca cmontsechuaná.

<sup>25</sup> Atše sēntseimpadana Bēngbe Utabná Jesucristo, chaoma tšabe bendicionēnga tšēngaftangbeñe chaotsemnama.

## Hebreos

### *Bëngbe Bëtsá bëngaftaca tojoyebuambá, chabe Uaquiñáftaca*

<sup>1</sup> Tempo, Bëngbe Bëtsá ba soye y ba soyëngaca bëngbe bëts taitángbioye tojanëyana, chë chabe juabna oyebuambnayëngaftaca.

<sup>2</sup> Pero quem tempo bëngaftaca tojoyebuambá, chabe Uaquiñá jíchmuase, bëngbioye cha chašúyanama. Bëngbe Bëtsá tojama, lempe ntšamo chabe soye yomncá, chabe Uaquiñabiama chaotsemnama, y chábeyeca Bëngbe Bëtsá quem luare y nyetsca inye luarënga tojama.

<sup>3</sup> Cha endinÿanÿná Bëngbe Bëtsabe corente buashinÿinÿanana y uámanana, y cha endmëna cach Bëngbe Bëtsacá, y chábeñe bënga mondobena jinÿama ntšamo Bëngbe Bëtsá yomncá. Chabe bëts obenánaca endútabna lempe ntšamo quem luarentše yobinÿncá; cha tojayana y chca jtsemnana. Cha tojanóbana bëngbe bacna soyënga jabuajuánama, y chentšana Bëngbe Bëtsá tojaninÿanÿé cha puerte bëtsá y uamaná bëtsemnama, celoca játbemëse, Bëngbe Bëtsabe catšbioica, nyetscanga jtsamëndayama.

### *Bëngbe Bëtsabe Uaquiñá chë angelëngbiama más bëtsá yomna*

<sup>4</sup> Y chca, Bëngbe Bëtsá tbojánbema chë angelëngbiama más uamaná y obená, er Bëngbe Bëtsá tbojanbuajó canÿe más uámana uabaina y chë angelëngbiama canÿe más uámana trabajo tbojanbonÿé.

<sup>5</sup> Ndegombre chca endmëna, er Bëngbe Bëtsá ndocna te ndocna ángelbioye mëntšá tbonjaniana, ntšamo chabe Uaquiñábioye tbojaniancá:

Aca atšbe Uaquiñá condmëna.

Mënté entšanga sënjinÿanÿé aca atšbe Uaquiñá comnama ca.

Ni ndocna angelbiama mëntšá tojánayana, ntšamo chabe Uaquiñabiama tojanayancá:

Atše canÿe taitá chabiama chántsemna,

y cha canÿe Uaquiñá atšbiama ca.

<sup>6</sup> Quem Bëngbe Bëtsabe Uaquiñá endmëna nyetscangbiama más uamaná. Chca Bëngbe Bëtsá tojánayana, chabe natsana Uaquiñá quem luaroye cháúashjanguama cha tojanma ora:

Bëngbe Bëtsabe nyetsca angelënga cha chamotsatschuaná ca.

<sup>7</sup> Y chabe angelëngbiama, mëntšá tojánayana:

Atše sëndama atšbe angelënga, chë atšbe buayiynayënga, mo binÿiëngcá chamotsemnama,

y chënga, atšbe oservénënga, mo inÿëngcá ca.

<sup>8</sup> Pero chabe Uaquiñabiama Bëngbe Bëtsá tojánayana:

Utabná, acbe amëndayana nyetsca tescama echántsemna,

y aca nyetsca soyënguiñe condbëtsemmandaye, ntšamo tšabá yomncá jtsamëse.

<sup>9</sup> Aca icontšena ntšamo tšabá yomncá nyetsca soyënguiñe jtsamama, y sempre chca jtsamama tša icoboše,

pero nÿa tondayama cmondogustana bacna soyënga jtsamana, chë ndayá Bëngbe Bëtsá ndoñe yondboše soye;

chíyeca Bëngbe Bëtsá tcmojabocacá,

y tojama aca puerte oyejuayá chacotsemnama,

chë inÿengbiama más oyejuayá ca —Bëngbe Bëtsá tojánayana.

<sup>10</sup> Bëngbe Bëtsá mëntšánaca chabiama tojánayana:

Utabná, quem luare jobojátšama ora, aca quem luare tconjanma,

y lempe chë celoca yomna soyëngnaca.

<sup>11</sup> Lempe chë soyënga nyets tempo ndoñe queochátsmëna;



aca n̄yetsca tescama cochántsemna.

Lempe ch̄e soyēnga echanjopochóca, mo tojuatanguaná entšayacá.

<sup>12</sup> Aca ch̄e luarēnga cochanjátrocaye, mo tsm̄ecá cuafjabiamcá.

Chca, ch̄e luarēngaca cochanjama, mo entšayá tcojten̄ejon̄etse y tcojenotrocacá.

Pero aca n̄yets tempo cach aca cochandesom̄ne,

y n̄yets tempo vida cochandesóbom̄ne ca —cha tojánayana.

<sup>13</sup> Bēngbe Bētsá ndocna te ndocna ángelbioye m̄entšá tbonjanianyana, ntšamo chabe Uaquiñábioye tbojaniancá:

Atšbe catšbioica cochtsetbemana,

acbe uayayēnga acbe cucuatšīne chamoquedama atšbe obenánaca chjam̄entscuana ca.

<sup>14</sup> Ndegombre, n̄yetsca angelēnga esp̄iritēnga mondm̄ena Bēngbe Bētsá jaserviama, ndēmuan̄yēnga cha tojanichamó bēnga jabújabuachama, ch̄e atsebácanēnga mochtsemnēngbe tšabiama.

## 2

### *Can̄ye b̄ets soye endm̄ena atsebácanēnga jtsemnana*

<sup>1</sup> Chíyeca, bēnga šontsamna sempre Bēngbe Bētsabe soyēnga jtsuenanana, ch̄e bēnga tmonjouena soyēnga, ch̄e tšabe benachentšana ndoñe chamondojuánama.

<sup>2</sup> Ndayá Bēngbe Bētsá tempo angelēngaca entšanga tojanam̄endacá, can̄ye ndegombre soye endm̄ena, y entšanga entsamna chca jtsobedecénana; y ch̄e bacna soye tmojanm̄ēnga y ntšamo Bēngbe Bētsá tojanmandacá ndoñe tmonjanm̄ēnga castigo tojanatšatá, chca tmojanma causa; y chca,

<sup>3</sup> bēnga chca bacna soyēnga tmojtsam̄ese, ¿ntšamo mochjobenaye jtsejuabnayana Bēngbe Bētsá chama ndoñe šochanjacastígaye ca? Ndegombre cha chca echanjama, bēnga ch̄abeñe ndoñe tmontsošbuáchese, ch̄e b̄ets soye j̄eftsashjáchama, atsebácanēnga jtsemnana. Bēngbe Utabná ch̄e natsaná yojtsemna nda entšanga tojanabuayená Bēngbe Bētsá entšanga yochjánatsebacama; y ín̄yēnga bēnga šonjanabuayená cachcá ntšamo ch̄abioye tmojanoyeunacá.

<sup>4</sup> Y Bēngbe Bētsánaca tonjanin̄yan̄yé, ndayá chēnga tmojanabuayenacá ndegombre b̄etsemnana, chabe obenana jin̄yan̄iyama soyēngaca, entšanga chamenjnaná soyēngaca, b̄ets soyēngaca, y entšanga ch̄e Uámana Esp̄iritu ainaniñe chamotsebomnama cha jtsam̄ese. Chca jam̄ese, cada ona chaotsobena jamama ntšamo Bēngbe Bētsá yobošcá.

### *Bēngbe Bētsá tojanma Jesucristo entšangcá chaotsemnana*

<sup>5</sup> Bēngbe Bētsá angelēnga ndoñe tonjubuáyana chamotsemándama ndayá quem luar-entše yochtsemniñe, lempe mo tsm̄ecá chaotsemnana Bēngbe Bētsá chaojama ora, ch̄e ndayama mora bēnga montsoyebuambná.

<sup>6</sup> Chamna, ín̄yoca Bēngbe Bētsabe uabemana palabrēnguiñe m̄entšá endayana, ntšamo ch̄abioye can̄ya tbojaniancá tojánayana:

Entšanga ndoñe yapa uámanēnga quemátsm̄ena, as ¿ndáyeca tša chēngbeñe cuanjésejuabnaye?

Chēnga entšanga mondm̄ena. ¿Ndáyeca tša chēnga cuanjésan̄yena?

<sup>7</sup> Aca tcojama entšá puerte uamaná chaotsemnana, y ch̄e angelēngna n̄ye batšatema chabiama más uámanēnga mondm̄ena.

Aca tcojama cha puerte uamaná y respeto merecido bomná chaotsemnana,

<sup>8</sup> y cha chaotsemándama n̄yetsca ch̄e ín̄ye soyēnguiñe, ch̄e quem luarentše aca tcojamiñe —chiñe can̄ya tojánayana.

Entsá lempe chaotsemándama Bëngbe Bëtsá tojanma ora, tondaye tonjánboshjona entsáftaca ndëmandana soye ca. Pero mëntscoñama ndoñe nÿa chca quemëntinÿe, chë entsá lempe ntšamo quem luarentše yomncá jtsemándayana.

<sup>9</sup> Pero bënga mondétatsëmbo y corente mondonÿá Jesús aíñe chca tojanmama. Bëngbe Bëtsá tojanma cha nduamaná chaotsemnana, mo canÿe entsacá, baseftayté chë angelëngbiana más batšá uamaná. Bëngbe Bëtsá, entsangbe tšabiana jtsejuabnayëse, yojánboše Jesús chaóbanama, corente jasúfriase; Bëngbe Bëtsá yojánboše cha chca chaomama, nÿets luarentša entsangbe tšabiana. Y Jesús ya chca tojánmayeca, Bëngbe Bëtsá ya tojinÿanÿé cha puerte bëtsá y uamaná bëtsemnana.

<sup>10</sup> Nÿetsca soyënga yobinÿna Bëngbe Bëtsabiana y chábeyeca. Tšabá enjamna, Bëngbe Bëtsá jamana Jesucristo chaotsemnana lempe ntšamo entsanga tmojtsajabotcá, nda chëngbe bacna soyënguentšana cháuatsebacama. Bëngbe Bëtsá chca tojanma, Jesús, chë entsanga atsebácanënga jtsemnana unachayá, chaosufrima jamëse, chca, ba entsanga celoca, mo chabe basengcá, cháftaca bëtsétsanga chamotsemnana.

<sup>11</sup> Er Bëngbe Bëtsá cach Taitá nÿetscangbiana endmëna: Jesús, chë entsanga Bëngbe Bëtsábenga chamotsemnana iuamabiana, y chë entsanga chca chamojtsemnëngbiámnaca. Chíyeca Jesús, Bëngbe Bëtsabe Uaquiñá, ndoñe ntsëuatjana chëngbioye catšátanga ca jtsachembuanama.

<sup>12</sup> Bëngbe Bëtsabe uabemana palabrenguiñe Bëngbe Bëtsábioye cha mëntsá tbojaniana: Atšbe uabentsëngbeñe acbiana chanjóyebuambaye, y jacántase cbochanjës chuaye, ácbioye adórayënguentše ca.

<sup>13</sup> Y mëntsánaca cha Bëngbe Bëtsabiana tojánayana:

Atše atšbe Bëtsábeñe chantsošbuáchiye ca.

Y más chcoye mëntsá tojánayana:

Muentše Bëngbe Bëtsabe básengaftaca sëntsemna, chë atšbe cucuatšíñe tojábashesjuanënga, atše jtsanÿenama ca.

<sup>14</sup> Quem Bëngbe Bëtsabe básenga nÿetsca entsangcá mondmënayeca, Jesúsnaca canÿe entsá chëngcá tojanóbema. Cha chca tojanma, jóbanëse, chë entsanga jóbanama chaotsamnama obenana bomná Satanás, jayëñjanama.

<sup>15</sup> Y chca, cha tojama chë jóbanama y ndayá chentšana yochjopásama auatjënga ndoñe chamondëtsauatjama; chënga nÿets tempo corente ngmëñaca imnoyena, jóbanama auatja causa.

<sup>16</sup> Er ndegombre, cha ndoñe tonjánabo chë angelënga jabújabuachama, ndayá chë Abrahámbentsana entsángbioye.

<sup>17</sup> Y chama cha ibojamna jtsemnana nÿetsca soyënguiñe cachcá mo chabe uabentsëngcá, chë entsanga, chca, jobenayama jtsemnana chëngbiana mo bachnangbe canÿe más uámana amëndayacá, Bëngbe Bëtsá jtseimpadánama chëngbioye chëngbe bacna soyëngama cháuperdonama, puerte lastemado mëná y sempre ntšamo Bëngbe Bëtsá tbojauyancá amá. Chca, cha jóbanëse jamama entsanga chamobenama perdonánënga jtsemnana, y chca, jobenayama Bëngbe Bëtsáftaca tšabá tempcá jtsemnëngama.

<sup>18</sup> Y mora cha entsobena, ndëmuanÿënga bacna soye jamama tojócochenguënga jubabuáchana; cha chca entsobena, er cachánaca tojansufrí, cha bacna soye chaomama Satanás tša yojtsentšena ora.

### 3

#### *Cristo Moisesbiana más uamaná endmëna*

<sup>1</sup> Chíyeca, Jesucristbeyeca catšátanga, Bëngbe Bëtsábenga, ndëmuanÿënga Bëngbe Bëtsá tojáchembo chabe entsanga chamotsemnana, corente Jesucristbeñe šmochjësejuabnaye. Cha endmëna nda Bëngbe Bëtsá bëngbioye tbojanichmó, y nda bëngbiana yomna mo chë más uámana bachnangbe amëndayacá, Bëngbe Bëtsábioye jtseimpadánama

bacna soyëngama chašotsaperdonama. Cha chca endmëna chë bënga mondošbuaché soyënguiñe y chë mondbáyana ndegombre yomna ca soyënguiñe.

<sup>2</sup> Er Jesús nyets tempo tojanma ndayá chaotsamama Bëngbe Bëtsá tbojaniyancá, Bëngbe Bëtsá, nda tbojanábuayana chca chaoservema, cachcá ntšamo Moisés tojanma ntšamo Bëngbe Bëtsá tbojanmandacá, chabe entšángbioye cháuaservema.

<sup>3</sup> Canye yebna jebuaná chë yebnama más uamaná jtsemnana; cachcá Jesús, nda inétsama entšanga Bëngbe Bëtsábenga chamotsemnana, más jtsomerecénana Bëngbe Bëtsá cha puerte bëtsá y uamaná bëtsemnana cháuinýanyema, nye ntšamo Moisés, canya Bëngbe Bëtsabe entšanguentšá yojanomerecénama.

<sup>4</sup> Ndëmuanye yébnëna canye jebuaná jtsebmomna, pero Bëngbe Bëtsá endmëna nda tojanma lempe ntšamo yobinýncá.

<sup>5</sup> Moisés yojtsama ndayá chaotsamama Bëngbe Bëtsá tbojanmandacá, tšabe oserve-nacá nyetsca Bëngbe Bëtsabe entšángbeñe, y yojamna canya corente tatšëmbuá ndayá más chcoye yochjanopásama, ndayá Bëngbe Bëtsá yochjánayanama.

<sup>6</sup> Pero Cristo, ndayá Bëngbe Bëtsá tobošcá jamana, chë Bëngbe Bëtsabe entšángbeñe Uaquiñacá jtsemándayëse, ntšamo canye uaquiñá jtsemándayana ndayá nyetsca chabe pamíllanga tmojtsamiñe; cha, chë Uaquiñacá y chënga chë Bëngbe Bëtsabe pamillentsëngcá. Bënga chë pamillentsa entšanga jtsemnana, bënga chë ndayá tmošbuáchema bëts añémoca sempre tmojtsóyebuambnase, y siempre Bëngbe Bëtsá tšabe soyënga bëngbiama yochjamama tmojtsobátmanëse, y bënga chca jtsebmomna puerte oye-juayënga tmojtsemnëse.

### *Chë jóchnama uámana luare Bëngbe Bëtsabe entšangbiama*

<sup>7</sup> Chcasna, ntšamo chë Uámana Espíritu Bëngbe Bëtsabe uabemana palabrënguiñe tojanayancá:

Mënté tšëngaftanga ndayá Bëngbe Bëtsá tojtsichamcá šmojouenëse,

<sup>8</sup> ndoñe šmattsama, Bëngbe Bëtsabe buayenana soyënga tšëngaftangbe ainaniñe ndoñe chaondómashënguama,

mo chë entšanga ndoyena luaroca Moisésoftaca imojëftsemnëngcá, Bëngbe Bëtsabe contra nyetsca soyënguiñe imojtsemna.

Chënga bëtscá bacna soyënga tmojanma, mo ndayá cuaftsamcá jinýama ntsachetšá más muanjobenaye jamana y Bëngbe Bëtsá cabá uantado chëngaftaca tayojtsemnana.

<sup>9</sup> Bëngbe Bëtsá tojánayana: “Chentše, tšëngaftangbe bëts taitanga bëtscá monjánama jinýama ndayéntscoñe atše uantado chëngaftaca tsjamnama;

chca chënga tmonjanma, masque canta bnëtsana uatëntscuana chënga chentše tmonjáninýe chë atše sënjánama bëts soyënga.

<sup>10</sup> Chíyeca, atše chorsca entšángaftaca šonjánetna y sënjánayana:

‘Tšëngaftanga mora átšëftaca ndoñe quešmátajna, mo chë otšenënga tmojtsemnëngcá, y ndoñe šmonjábošena jtsiyenana ntšamo atše tsbošcá jtsamëse.’

<sup>11</sup> Chíyeca, atše chëngaftaca etonaná sënjánayana, mo nda cuafjajuracá,

chënga ndocna te mochjéftsashjache chë átšëftaca jóchnama uámana luaroye jashjan-guama ca” –cha tojánayana.

<sup>12</sup> Jesucrístbeyeca catšátanga, yejuana šmochtsantješna ndocná tšëngaftanguentšá chaondëtsebmomna canye ainana bëtscá bacna juabnëngaca, y chë causa chaotsemna Bëngbe Bëtsábeñe ndošbuachiyá, y Bëngbe Bëtsábentšana, chë sempre iuetsemnábentšana chaotsojuánañe.

<sup>13</sup> Chamna, nyetscanga añemo šmochtsatenatsetnaye cada te, chë bënga imobena Bëngbe Bëtsá joyeunayama tempo imoyenëntscuana, chë Bëngbe Bëtsabe uabemana palabrënguiñe “mënté ca” uabaina tempo. Chca cmontsamna, ndocná tšëngaftanguentšá

chaondétsamama, Bëngbe Bëtsabe buayenana soyënga ainaniñe ndoñe más chaondómashënguama, bacna soyënga jamama juabnëngaca ingñená.

<sup>14</sup> Er, ndayá Jesús chabe amëndayoca yobomnentšana bënga chamóyëngacñamna, bënga šontsamna sempre ainaniñe corente jtsetatšëmbuana Jesusbe soyënga ndegombre soyënga bëtsemnama, ntšamo bënga chábeñe jtsošbuáchiyama tmonjanontsé ora monjanamcá.

<sup>15</sup> Ntšamo Bëngbe Bëtsabe uabemana palabrenguiñe endayancá: Mënté tšëngaftanga ntšamo Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama, mo chë entšanga ndoyena luaroca Moisésoftaca imojëftsemnëngcá, Bëngbe Bëtsabe contra nyetsca soyënguiñe imojtsemna ca.

<sup>16</sup> ¿Y ndëmuanyënga imojamna, chë Bëngbe Bëtsá tojanëyancá tmojanuenentšana, nyetsca soyënguiñe chabe contra imojtsanmëna? Co chë Moisésbeyeca Egiptocana tmojânbocanënga.

<sup>17</sup> ¿Y ndëmuanyëngaftaca Bëngbe Bëtsá etonaná canta bnëtsana uatëntscuana yojtsemna? Co chë bacna soyënga tmojanmëngaftaca, ndëmuanyënga entšanga ndoyena luaroca tmojanóbana y chëngbe cuerpo chentše tojanoquedá.

<sup>18</sup> ¿Y ndëmuanyënga tojanëyana, mo nda cuafjajuracá, chënga ndocna te mochjéftsashjache chë cháftaca jóchnama uámana luaroye jashjanguama ca? Co chë ndëmuanyënga ntšamo cha tojanmandacá ndoñe tmonjanmënga.

<sup>19</sup> Y ndegombre, bënga montsobena jinyama chënga ndoñe tmonjéftsashjache chë cháftaca jóchnama uámana luaroye jashjanguama, Bëngbe Bëtsábeñe ndoñe imontsošbuaché causa.

## 4

<sup>1</sup> Chiyeca, bënga chë Bëngbe Bëtsáftaca jóchnama uámana luare jashjáchama cabá imobenëntscuana, ntšamo cha šojanašebuachenacá cachcá mëntscoñama iuëtsemna, puerte cuedado mochtsebomna, nderado ndánaca tšëngaftanguentšá ndoñe nanjobenaye chca jashjáchama.

<sup>2</sup> Er bëngnaca chë tšabe noticiënga tmonjouena, cachcá chë Bëngbe Bëtsabe buayenana soyënga chëngbe ainaniñe ndoñe chaondómashënguama tmojanmëngcá; pero chënga chë buayenana soyënga tmojanuena ora, ndocna tšabe soye chëngbeñe tonjanopasá, er chca tmojanuena ora, chë palabrenguiñe ndoñe montsanošbuaché.

<sup>3</sup> Pero bënga, chë Jesucristbeñe tmojošbuachengna, mochanjobenaye chë jóchnama uámana luaroye jashjanguama, chë ndayama Bëngbe Bëtsá tojánayana, chë tempo chábioye chca tmojtsanábotengbiana cha mëntšá tojánayana ora: Chiyeca, atše chëngaftaca etonaná, sënjánayana mo nda cuafjajuracá, ndegombre chënga ndoñe mochjéftsashjache chë jóchnama uámana luaroye jashjanguama ca.

Pero cha chabe trabajo tojanpochocá, quem luare tojanma ora;

<sup>4</sup> er Bëngbe Bëtsabe uabemana palabrenguiñe cányëntse mëntšá endayana, chë canyësëfta tianoye ndayá cha tojanmama:

Bëngbe Bëtsá nyetsca trabajëngama tonjanochná chë canyësëfta tianoye ca.

<sup>5</sup> Y cachentše Bëngbe Bëtsabe uabemana palabrenguiñe endayana, chë tempo chábioye chca tmojtsanábotengbiana:

Chënga ndocna te quemocháishashjache chë átseftaca jóchnama uámana luaroye jashjanguama ca.

<sup>6</sup> Chë entšanga monjamna chë natsanënga chë tšabe noticiënga jouenama, pero chë Bëngbe Bëtsáftaca jóchnama uámana luare ndoñe tmonjéftsashjache, ntšamo cha inabošcá chënga ndoñe tmonjanma causa. Chcasna, cabá ndegombre endëtsomñe báseftanga, chë

Bëngbe Bëtsá tojánayana soyënguiñe tmojtsošbuáchenga, mochjëftsashjache chë Bëngbe Bëtsáftaca jóchnama uámana luaroye jashjanguama.

<sup>7</sup> Chë entsanga ndoyena luaroca, Bëngbe Bëtsá entsanga tojánachembo chë cháftaca jóchnama uámana luaroye chámuamashjnama, y chentsana ba uatëse cha cachiñe canyë tempo tojuinýnaná, chora entsanga chamobenama chë cháftaca jóchnama uámana luaroye jashjajnama, chë cha “mënté ca” tojanabaye tempo. Cha chca tojanma Davidbijana jóyebuambayëse, David Bëngbe Bëtsabe uabemana palabrenguiñe mëntsá tojánayana ora:

Mënté tsëngaftanga, ndayá Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama ca.

<sup>8</sup> Josué, Israeloca entsanga Canaán fshantsëngoye yojtsënachaye ora, chë Bëngbe Bëtsáftaca jóchnama uámana luare jtsebomnama cha choca matënjanmëse, Bëngbe Bëtsá bayté chentsana, David yojëtsiyena ora, inyë tempuama ndoñe matënjanoyebuambá, chë ndaye ora entsanga muanjobenaye chë cháftaca jóchnama uámana luare jashjáchama.

<sup>9</sup> Y chca, cabá endmëna canyë uámana luare ndayentse Bëngbe Bëtsabe entsanga mochjobenaye cháftaca jóchnama, ntšamo Bëngbe Bëtsá tojanochnacá, chë quem luare jamama nyetsca trabajënga tojanpochocá ora;

<sup>10</sup> Er nda tojashjache chë Bëngbe Bëtsáftaca jóchnama uámana luaroye jashjanguama, cha jóchnana chë Bëngbe Bëtsá tbojanmandá jamama trabajëngama, ntšamo Bëngbe Bëtsá tojanochnacá, chë quem luare jamama nyetsca trabajënga tojanpochocá ora.

<sup>11</sup> Chíyeca, šontsamna lempe ntšamo tmojobenacá jamana chë jóchnama uámana luare jëftsashjáchama, ntšamo chë Bëngbe Bëtsábioye ndoñe tmonjanoyeunangcá ndocná chaondëtsamama, y chë causa chënga chë soye ndoñe tmonjëftsashjache.

<sup>12</sup> Er Bëngbe Bëtsabe palabra endmëna mo canyë aina soycá, nyets tempo entsángbioye ndayánaca jtsabuátambayana, y bëtscá jamana corente obenánaca, y ndocna te nyë bonamente chë palabra jóyebuambayana. Mo chë nyets utoicajana más efšana espadëjaquëcá, jobenayana puerte jashenoye jatëtsana canyë cuerpo tcojatëtse ora, cachcá y cabá puerte más Bëngbe Bëtsabe palábraca, cha bënga jinýanyiyana ntšamo bënga nyë bëngbe ainaniñe tmojtsejuabná y tmojtsebošcá, y chë ndocnábioye tmonjinýinyë sóynaca; y chë palábraca cha endobena jáuyanana ntšamo bënga tmojajuabó y tmojabošencá aiñe o ndoñe tsabá bëtsemnana.

<sup>13</sup> Ntšamo Bëngbe Bëtsá tojamentšana tondaye quenátopodena chabiamana iytëmenana jtsemnana. Bëngbe Bëtsá lempe bominyë iuetsequëcñá, y nyetsca soyëngama y nyetscangbiamana lempe yotátšëmbo; Bëngbe Bëtsá, ndábioye šojtsamna sempre jojuana ndáyeca canyë soye chca tmojamama.

### *Jesús endmëna chë más uámana bachnangbe bëts amëndayá*

<sup>14</sup> Jesús, Bëngbe Bëtsabe Uaquiñá celoye tojámashëngo, y mora cha endmëna nda chabe delante sempre bëngbiamana ibuëtseimpadana, mo chë bachnangbe canyë más uámana amëndayacá. Chíyeca, bënga šontsamna sempre chábeñe jtsošbuáchiyana, ntšamo bëngbe ndegombre ošbuáchiyana yomncá, chë ndayama bënga nyetsca entsángbeñe tmojayana.

<sup>15</sup> Er chë bëngbiamana impadaná, mo bachnangbe canyë más uámana bëngbe amëndayacá, Jesús, yobena bëngbiamana jóngmiana, bënga inyë ora ndoñe yapa obenana tmontsebomna ora, tsabe soye o ndaye sóynaca jamama. Chca endmëna, er Satanás tša yojtsentšena Jesúsbioye ba juabnënga chabotsontšáshjajuanama, jayënjanama bacna soye chaomama, nyetsca juabnënga ntšamo bëngnaca mondbetsebomncá, pero Jesús ndocna te ndocna bacna soye tonjëftsema.

<sup>16</sup> As, ndauatjca Bëngbe Bëtsá mochjótšëmbona, mo chábioye cuaftsobecocnangcá; cha canyë uámana themaniñe yojtsetbemana canyë bëts reycá; chca mochjama, bënga

chásuuastemama, y bēngbiamá tšabe juabna jtsebomnēse, chašújabuachama bēnga chca chašojtsējaboto ora.

## 5

<sup>1</sup> Ndēmuanýe bachnangbe más uámana amēndayánaca jtsemnana entšanguentšana bocacaná, y uabuayaná chēngbe cuenta Bēngbe Bētsá jaserviama, chábioye juatšēmbonama y bayēnga jobáyama Bēngbe Bētsá jētschuayama, chca, Bēngbe Bētsá chē bacna soyēnga entšanga tmojamama cháuperdonama.

<sup>2</sup> Chē bachna jtsobenana jóngmiana, chē bacna soyēnga amēngbiamá chama ntsetatšēmbcá, y chē bacna soyēnga jamama ingñénēnga imomnēnga, mo otšenēngcá imomnēngbiamá, er cachánaca inýe ora ndoñe yapa obenana ntsebomnana, chē bacna soyēnga jamama juabnēngama jtocochbuáchama.

<sup>3</sup> Y chíyeca cha jtsemnana bayēnga jobáyama Bēngbe Bētsá juatšēmbonama, ndoñe nýe entšángbioye bacna soyēngama cháuperdonama, ndayá chábioye chaboperdonámna.

<sup>4</sup> Ndocná quenátobena cachá quem uámana trabajo jentsetayana, bachnangbe más uámana amēndayá jtsemnana; cha jtsemnana, Bēngbe Bētsábeyeca uabuayaná chca uámana trabajo jamama, ntšamo ndegombre Aarónofaca tempo cha tojanmcá.

<sup>5</sup> Cachcá, Cristo ndoñe cachá tonjanenábuayana jtsemnana chē Bēngbe Bētsabe delante sempre bēngbiamá impadaná, mo bachnangbe canýe más uámana amēndayacá, ndayá Bēngbe Bētsá tbojanábuayana chē uámana trabajo jtsebomnana. Cha endmēna nda Jesúsbioye mēntšá tbojanianá:

Aca atšbe Uaquiñá condmēna.

Mēnté entšanga sēnjinyanýe aca atšbe Uaquiñá comnana ca.

<sup>6</sup> Y ínýocnaca, Bēngbe Bētsabe uabemana palabrenguiñe mēntšá tbojanianá:

Aca nýetsca tescama canýe bachna condmēna,

canýe bēts bachna ntšamo Melquisedec yojamncá ca.

<sup>7</sup> Jesús quem luarentše yojēftsiyenēntscuana, cha juayebuáchēse y shēchbuíyeca Bēngbe Bētsáftaca ibnécuentaye y ibnaimpadana, cha chē jobanámentšana jatsbocama yojanobená; y Jesús ntšamo Bēngbe Bētsá yojanbošcá tojánmayeca y tša respeto chabiamá bómnayeca, chábioye tbojanoyeuná.

<sup>8</sup> Chca, Cristo masque Bēngbe Bētsabe Uaquiñá inamna, jasúfriase tojanábouinýe ntšamo jamana ndayá Bēngbe Bētsá tojtsebošcá.

<sup>9</sup> Chca, Bēngbe Bētsá chábioye tbojánbema lempe ntšamo entšanga tmojtsajabotcá, nda chēngbe bacna soyēngama cháuatsebacama; chentšana cha, Cristo, tojanma lempe ntšamo yojaniytcá, nýetscanga chē entšanga chábioye imojánēyeunanēnga chamotsobemana nýetsca tescama atsebácanēnga jtsemnana;

<sup>10</sup> y Bēngbe Bētsá tbojanábuayana, chē chabe delante sempre bēngbiamá impadaná, mo bachnangbe canýe más uámana amēndayacá chaotsemnana, canýe bēts bachna ntšamo Melquisedec yojamncá.

### *Resjo endmēna, ošbuáchiyana jtsajbanana*

<sup>11</sup> Bētscá entsemna quem palabrama jóyebuambayama, pero chē soyēnga jayanama ntšamo tšēngaftanga catafjosertaycá, ndoñe paselo quenátsmēna, er tšēngaftangna nýa uenana Bēngbe Bētsabe soyēngama jósertana.

<sup>12</sup> Tšēngaftanga ya bayté Jesucristbe soyēngama šmotátšēmboyeca, tšēngaftanga cmontsamna ya jtsobenana ínýēngbioye chē soyēnga jtsabuátambayana; pero tšēngaftanga cmontsējaboto ndánaca Bēngbe Bētsabe soyēngama cachiñe chacmētētabuayená, chē jtsošbuáchiyama šmojontsé ora natsana jshauatsjínýana soyēngama. Y chca, tšēngaftanga šmojobiamá mo šešonatēmēngcá, jtsējabótana létšiyē jofšiyana y ndoñe jobenayana jasana chē jabmuánama ndoñe paselo tontsemna soyēnga.

<sup>13</sup> Chë nÿetsca soyënguiñe ntšamo tšabá yomncá jtsamama buatëmbana soyënga ndoñe tontsabuatmá cha, jtsemnana mo canÿe šešonatemcá, nda vida jtsebomnana nÿe létšiyë jtseftmanëse.

<sup>14</sup> Pero chë tmojtsobena jajuaboyana y jtsetatšëmbuana ndayá tšabá yomna o ndayá ndoñe tšabá jamama, chca jtsamëse tmoyenamna, chënga jtsemnana mo bëtsëtsangcá, ndëmuanÿenga ndayánaca jasana, chë ndoñe paselo jabmuánama soyëngnaca.

## 6

<sup>1</sup> Chcasna, bënga šontsamna jtsajbanana nÿe jésebošana jtsatsjédayana Cristbe bu-atëmbana soyënga, chë bënga chábeñe jtsošbuáchiyama tmojanontsé ora tmojanatsjinÿe soyënga, y šontsamna jtsatsjédayana chabiamana nÿetsca soyënga, más totcá josértama yomna soyënga. Chca, bënga mochántsemna mo chë bëtsëtsangcá, ndayánaca jtsesayana. Ndoñe más nÿe chë natsana buatëmbana soyëngama mattatsjédaye, mo chë ndayá yomna bacna soyënga jtsamana y chë bënga ndoñe vida ntsebomnana junatsana soyënga amana jtsajbanana, y chë tšabe benache jtishachana; o ntšamo Bëngbe Bëtsábeñe jtsošbuáchiyana;

<sup>2</sup> chë juabáyana ndayá yomna; chë ínÿabe bestšašiče cucuatšënga jacjayana Bëngbe Bëtsábioye chabiamana jaimpádama; chë obanënga jtayenama Bëngbe Bëtsá yochjamama; y mocna ora ntšamo entšanga tmojamama Bëngbe Bëtsá yochjayanama, chënga chë nÿetsca tescama yomna tšabe vida chamotsebomnana o nÿetsca tescama castigánënga chamotsemnana.

<sup>3</sup> Y bënga chca fchanjama, chë más totcá yomna josértama soyënga jtsabuátambayana, Bëngbe Bëtsá chca chašojálesenciase.

<sup>4</sup> Ndëmuanÿenga, canÿe ya chë Bëngbe Bëtsabe ndegombre soyënga tmojanóyëngacñe, y chë Bëngbe Bëtsabe ba tšabe soyëngnaca, chábënga bëtsemnana, y chë Uámana Espíritu chëngbe ainaniñe chaotsemándama imobomna,

<sup>5</sup> y chë Bëngbe Bëtsá ntšamo tojašebuachenacá sempre inétsamama tmojinÿe, y ndëmuanÿenga tmojáninÿe Cristo jtsamana bëts soyënga chabe bëts obenánaca, chë ndaye obenánaca cha puerte bëts soyënga yochjama cha quem luaroye yochjésabo ora,

<sup>6</sup> chënga Jesucristbeñe ošbuáchiyana lempe tmojtsajbanase, tondaye quenátsmëna ndayá jamama cachiñe Bëngbe Bëtsábioye jtobéconama; er Bëngbe Bëtsabe Uaquiñá chca stëtšoye jaquédana, y jtsemnana mo Bëngbe Bëtsabe Uaquiñábioye cachiñe chënga tmojt-secrucificacá, y entšanga cachiñe cha chamotsáboyejuanama chënga cuafjamcá.

<sup>7</sup> Smochjinÿe: fshantse jamana chë ba uaftëngë chine chaómashënguama, y chë chine trabájayëngbiamana bëtscá jaja sananga tojóboçnëse, Bëngbe Bëtsá jamana, chë fshantsentšana bëtscá tšabe soyënga entšangbiamana chaotsebínÿnana.

<sup>8</sup> Pero nÿe uchmašëshangá y matënga uchmëfjangaca chine tojuábocnëse, chë fshantse tondaye ntsámanana; y nderado Bëngbe Bëtsá nanjama chine ndocna tšabe mata chaon-duábocnana, y cabana, entšanga chine mochantsashaniñá. Cachcá, chë ošbuáchiyana tmojtsajbananga castigánënga mochántsemna.

*Bëngbe Bëtsábeñe sempre chamotsobátmanama y ainaniñe bëtscá añemo chamotsebomnana*

<sup>9</sup> Pero masque chca montsoyebuambná, atšbe bonshánënga, bënga tšabá fsëndëtatšëmbo tšëngaftangbeñe chë más tšabe soyënga echántsemna, chë atsbocaná jtsemnana tojtsá cha yobomna soyënga.

<sup>10</sup> Er Bëngbe Bëtsá sempre ntšamo tšabá yomncá nÿetsca soyënguiñe jtsamana, cha ndegombre echántsejuabnaye ndayá tšëngaftanga šmojamama, y chë chabiamana šmojinÿinÿé bonshánama, chabe entšangbioye jtsëjabuáchanëse, ntšamo mórnaca šmojtsama.

<sup>11</sup> Pero bënga fsëntseboše, cada ona tšëngaftanguentšá, nÿets tempo y Jesús chaojésabëntscuana chaotsinÿanÿná corente yoboše chca jtsamama, Bëngbe Bëtsábeñe

chca jtsošbuáchiyëse, chábeñe sempre chašmotsobátmanama, tšëngaftangbe tšabiamama cha chaomama.

<sup>12</sup> Ndoñe queftsátsboše tšëngaftanga oyënjayënga chašmotsobiamama chë Bëngbe Bëtsá tcmojabanýé trabajo jtsamama, ndayá Jesucristbeñe ošbuáchiyana bomnëngcá y padecena soyënguiñe uantado mënëngcá šmochtsama. Chca, chënga mochanjóyëngacñe ndayá Bëngbe Bëtsá jatšatayama tojašebuachenacá, chabe entšanga bëtsemnama.

<sup>13</sup> Bëngbe Bëtsá Abrahámbioye tbojanšbuachená ora, chca tbojaníyana cachabe uabaina jayanëse, er inýa chabiamama más uamaná ndoñe yontsemna ndabiamama jajúrama, ntšamo tbojanšbuachenacá ndegombre chaotsemnama;

<sup>14</sup> cha mëntšá tbojanšbuachená: “Aíñe, atše chanjama aca bëtscá tšabe bendicionënga chacotsebomnama, y chanjama acbentša pamillentšana mallajta entšanga chamotsemnama ca.”

<sup>15</sup> Y chca, Abraham Bëngbe Bëtsábeñe jtsošbuáchiyëse, puerte uantadiñe yojanobátmana ntšamo tbojanšbuachenacá Bëngbe Bëtsá yochjanmama, y pronto chca tojanóyëngacñe.

<sup>16</sup> Entšanga tmojajurá ora, chca jamana chëngbiamama canýe puerte más uámanabe uabaina jayanëse, y chca chëngbiamama más uamanabiamama tmojajurá ora, jtsayanana ntšamo tmojašbuachenacá pronto mochjamama, y chcasna, chama ya ndoñe más ntjatenátsëtsnayana.

<sup>17</sup> Y chca, Bëngbe Bëtsá tojánbošena botamana jinýanýiyana, ntšamo cha tojanašebuachenacá mochjanoyëngacñëngbioye, ntšamo tojanašebuachenacá cha ndegombre yochjanmama, y ndocna te chë ntšamo jamama yojanjuabnacá yochjantrócama. Chíyeca, botamana tojaninýanýé cha chca yochjanmana, cachabiamama jajúrase, chë ntšamo tojanašebuachenacá yochjanmama ndegombre bëtsemnama.

<sup>18</sup> Bëngbe Bëtsabe šbuachenana soye y chama jinýanýiyama ntšamo tojanayancá, ntšamo tojanašebuachenacá ndegombre yochjanmama, chë uta soye ndocná ntsoberenana jatrócama; y chca tojayana ora, ndoñe ntšopodénana Bëngbe Bëtsá chaobená jobostérama. Y chca, chë uta soyama, bënga bëtscá añemo ainaniñe jóyëngacñana, bënga chë Bëngbe Bëtsábioye tmojobéconanga, cha chásuatsebacama y chašotsanýenama, mo canýe bëtš resjuentšana tmojtsachetëngcá, ntšamo chentšana atsebácanënga jtsemnama cuaftsenguacá. Bëngbe Bëtsá šojáuyana bënga imojtsobena chábeñe jtsobátmanama ca, y bëtš añémoca chábeñe jtsošbuáchiyëse, cha yejuana šochtsanýenama mondobátmana.

<sup>19</sup> Mo ntšamo chë bėjaye asentoca cuedádoca tcojajajo anclama, chë barcuíñe enjaquenënga tšabá jtsetatšëmbuana chë barco ndoñe yochántšashatiyiyinama, cachcá bëngnaca, Bëngbe Bëtsábeñe imobátmanama, montsobena ainanoca jtsetatšëmbuana lempe tšabá yotsomñama. Bënga Jesucristbeñe mondobátmana, y Bëngbe Bëtsá yojtsemnoye celoca cha tojámashëngo y chabe delante entsemna mo chë bachnangbe más uámana amëndayacá. Chana jamashënguana chë Bëngbe Bëtsabe bëtš yebnoca, “chë más uámana ca” uabaina luaroye, entšëjua ujonýana stëtšoica, Bëngbe Bëtsabe delante jtsemnama,

<sup>20</sup> ndayentše Jesús celoca, Bëngbe Bëtsabe delante tojámashëngo bëngbe tšabiamama soyënga jamama, bëngnaca chamobenama chabe delante jamashënguama; chca, Jesús tojanóbema chë bachnangbe más uámana amëndayá nyetsca tescama, canýe bëtš bachna ntšamo Melquisedec yojamncá.

## 7

### *Jesús, canýe bëtš bachna ntšamo Melquisedec yojamncá*

<sup>1</sup> Quem Melquisedec yojamna Salem pueblaca rey y bachna chë celoca Bëngbe Bëtsabiamama; Bëngbe Bëtsá, chë nyetscangbiamama más uamaná. Abraham chë reyënga y chëngbe soldadëngaftaca imojentsjaná y tojanayënjaná chentšana yojtsatabó ora,



Melquisedec tojánbocna cha jajébenguama, y chora Běngbe Bětsábioye tbojanimpadá, Abraham bětscá tšabe bendicioněnga chaotsebomnama chaomama.

<sup>2</sup> Chora Abraham chábioye tbojanatšetá, chě reyěngaftaca imojentsjaná ora, lempe tojanosháchiñentšana, bnětsanentšana canye soye. Chě palabra Melquisedec endayana “nyetsca soyěnguiñe tšabá ama rey ca”; y chánaca yojamna Salem puebloca rey, y chca endayana “nyetscanga natjěmbana chamotsiyenama ama rey ca”.

<sup>3</sup> Chabe pamíllangbiana tondaye quenatótatšěmbo; chca cha endmēna mo ni taitá ni mamá ndoñe endbomnacá, ni bětš taitanga. Tondaye quenatótatšěmbo ntseco tojanonynama, ni ntseco tojanóbanama; chca, inye soyěnguiñe cha yojamna mo Běngbe Bětsabe Uaquiñacá, y endmēna mo nyetsca tescama bachna cuaftsemncá.

<sup>4</sup> Y mora, smochjájuaoye tša uamaná Melquisedec inamnana, er běngbe tempsca uámana bětš taitá Abraham chábioye tbojanatšetá, chě reyěngaftaca imojentsjaná ora lempe tojanosháchiñentšana bnětsanentšana canye soye.

<sup>5</sup> Ntšamo Moisesbe leyíñe enděmandacá, chě bachnangbe más uámana aměndayá Leví, Aaróněnaca ca uabainabe pamillentšana tmomna bachnanga, jtsamnana chě Israeloca entšángbioye nyetsca chě tmobomna soyěnguentšana bnětsanentšana canye soye jtsayěngacayana; y chca jtsamnana masque chě entšanga cachěngbe pamillentšěnga tmomna y Abrahám bentšana pamillentšěgnaca.

<sup>6</sup> Pero Melquisedec, masque Aaronbe pamillentšá ndoñe yonjamna, Abraham, chě ntšamo Běngbe Bětsá tbojanšbuachenacá tojanóyěngacñabentšana, cha tojanóyěngacñe nyetsca soyěnguentšana bnětsanentšana canye soye, y Běngbe Bětsábioye tbojanimpadá, Abraham bětscá tšabe bendicioněnga chaotsebomnama chaomama.

<sup>7</sup> Y ndocná quenátobena jayanama ndoñe ndegombre yondmēna ca, chě Běngbe Bětsábioye impadaná inyabiana tšabe soyěnga chaomama, más uamaná inětsemna chě chca tojóyěngacñabiana, inya chabiana Běngbe Bětsábioye tbojaimpadá ora.

<sup>8</sup> Quem tempo, bachnanga mochjóbaněnga, entšángbioye jtsayěngacayana nyetsca chě tmobomna soyěnguentšana bnětsanentšana canye soye, pero chě Běngbe Bětsabe uabemana palabra, Melquisedecbiana endoyebuambná cha mo canya cabá ainá totsomñcá.

<sup>9</sup> Y běnga montsobena jayanama, Abraham Melquisedécbioye chě nyetsca soyěnguentšana bnětsanentšana canye soye tbojanoyé ora, yojamna mo Leví, chě nyetscángbioye nyetsca soyěnguentšana bnětsanentšana canye soye ayěngacayá, Melquisedécbioye chca cuaftopagacá;

<sup>10</sup> er cha Abrahambe pamillentšá inamna. Melquisedec yojtsabó ora y chábioye chě lempe tojanosháchiñentšana bnětsanentšana canye soye Abraham tbojanatšetá ora, yojamna mo nyetscanga, chě Abrahám bentšana entšanga más chcoye mochtsaniyeněnga, chěngnaca chě bnětsanentšana canye soye cuaftajajocá, masque Abraham chca tojanma ora, Leví y chě Abrahám bentšana inye entšanga cabá ndoñe tmonjanonyná.

<sup>11</sup> Israeloca entšanga Moisesbe ley tmojanáyěngaca, chě bětš taitá Levibe pamillentšěnga bachnanga imojamněnga Běngbe Bětsá imojtseservena ora, y chěnga monjamna Aarónbentšana entšanga. Ntšamo chě leyíñe yomandancá imojánaměnga perdóněnga jtsemnama y Běngbe Bětsabe bominyíñe tšábenga jtsemnama quem bachnanga jamama matmēnjanobenase, ndoñe manjaněyta Běngbe Bětsá inye bachna chabutschembuama, nda ndoñe yonjamna mo chě bětš bachna Aaroncá, ndayá ntšamo chě bětš bachna Melquisedec yojamncá.

<sup>12</sup> Er, canye bachnanga Běngbe Bětsábioye jtseservěnama tmojajbaná y inye bachnanga chábioye jaserviama tmojatontsé ora, jtseytana chě natsana bachnanga imojanoservena ora mándaye leyěngnaca jtsetrócama.

<sup>13</sup> Běngbe Utabná, ndabiana quem soyěnga jtsóyebuambnayana, ndoñe Aaronbe pamillentšá quenjatsmēna, ndayá inye pamillentšá, y quem pamillentša entšanga ndocna

te bachnangcá Bëngbe Bëtsá tmonjanservé, chë altar ndirichiñe Bëngbe Bëtsabe bëts yebnoca.

<sup>14</sup> Er nyetscanga mondëtatšëmbo Bëngbe Utabná Judabe pamillentšana bëtsemnama, y chë pamíllama Moisés ndocá tonjánayana, Bëngbe Bëtsá mo bachnangcá chënga jt-seservénama.

<sup>15</sup> Y ntšamo tmojayancá montsobena más tšabá josértana, er chë tsëm bachna Cristo yojamna canya mo Melquisedec yojamncá.

<sup>16</sup> Cha bachna yojamna, ndoñe chë bachnanga chabe pamillentšana jabocanama yojánamnama canye ley tojánayanayeca, ndayá nyetsca tescama jëftsiyenama cha in-obénayeca.

<sup>17</sup> Er mëntšá endmëna, ndayá Bëngbe Bëtsá chabiamama tojánayana:

Aca bachna nyetsca tescama condmëna,  
canye bëts bachna ntšamo Melquisedec yojamncá ca.

<sup>18</sup> Cha tojánabo ora, Bëngbe Bëtsá tojanma chë nda bachna jtsemnama y ntšamo joserviama mandënga chaotsopochocama, er chë mandënga ndoñe ntjobenayana entšanga jujabuáchama atsebácanënga jtsemnama, y chca, chëngbiamama ndoñe bëtscá yonjanoservena.

<sup>19</sup> Er Moisesbe léyeca, entšanga ndoñe tmonjanobená Bëngbe Bëtsabe bominyiñe tšábenga jtsemnama, pero mora chama canye corente más uámana soye montse-bomna: Jesucristbeñe jtsošbuáchiyëse, chábeñe montsobátmana Bëngbe Bëtsáftaca tšábenga chásuabiamama, y chca, Bëngbe Bëtsábioye bënga jtobéconama.

<sup>20</sup> Y Bëngbe Bëtsá lempe chca tojanma, cachabiamama jajúrase, lempe ntšamo cha tojanayancá ndegombre chaotsemnama. Chë inye bachnanga, chë Aaronbe pamillentsëngbioye tmojanëbuáyana ora, Bëngbe Bëtsá ndoñe chca tonjánayana,

<sup>21</sup> pero mo bachnëcá chaoservema Bëngbe Utabnábioye tbojanábuayana ora aíñe; cach Bëngbe Bëtsabiamama jajúrase, Bëngbe Utabná canye bachna yochtsemna ca tojánayana. Ntšamo Bëngbe Bëtsabe uabemana palabrenguiñe endayancá:

Bëngbe Utabná Bëngbe Bëtsá, Jesucristbioye tbojaniyana, cachabiamama jajúrase, ntšamo tojanayancá ndegombre chaotsemnama,

y juabna ndoñe ntjatrócama:

“Aca bachna nyetsca tescama condmëna ca.”

<sup>22</sup> Bëngbe Bëtsá chca tojánayanama, Jesúsbeyeca bënga corente mondëtatšëmbo, ndayá Bëngbe Bëtsá bëngbiamama jamama tojanašebuachenacá, chë Jesúsbioye bëngbe bachna chaotsemnama juabuáyanana, más tšabá yojtsemna chë ndayá tempo cha chabe entšangbiamama tojanašebuachená soyama.

<sup>23</sup> Chë inye bachnanga banga imojamna, er ndocná yonjanobena Bëngbe Bëtsábioye nyetsca tescama chca jt-seservénana; cada ona básefta uatëngama tojëftsanoservé, tojanóbana y ínñabioye chë trabajo jatontšabuáchana.

<sup>24</sup> Pero Jesús ndocna te ntjobanámayecna, cha mo bachnëcá Bëngbe Bëtsábioye nyetsca tescama bochjëftseservena, y ndocna te chabe trabajo ínñabioye bochanjëftsinñinye, chë inya cachcá jtsamama chauatontšema.

<sup>25</sup> Chiyeca, cha yobena nyetsca tescama jätsebacana ndëmuanyënga chábeyeca Bëngbe Bëtsábioye tmojobeconá, er nyetsca tescama cha echanjëftsiyena Bëngbe Bëtsábioye chëngbiamama jtseimpadánama.

<sup>26</sup> Chcasna, Jesús ndegombre endmëna lempe ntšamo bënga imuajabotcá nda Bëngbe Bëtsábioye bëngbiamama chabotseimpadánama, mo chë bëngbe bachnangbe más uámana amëndayacá. Cha sempre uamaná endmëna, ndocna te ni mo canye juabna ínñabe contra yonjábomna, ainaniñe ndocna bacna juabna yonjábomna, chë bacna soyënga amënguentšana luaroca mëná, y Bëngbe Bëtsá tojanma celoca más bëtscá y obená nyetscangbiamama cha chaotsemnama.

<sup>27</sup> Cha ndoñe bonjanájaboto canye te y inye te bayenga jtsebánayana, Bëngbe Bëtsá chabe bacna soyëngama chaboperdonama y chë bacna soyënga entšanga tmojanmámna, mo chë inye bachnangbe más uámana amëndayënga mondbetsamcá, cachëngbiamama y chë judiëngbiámna. Cha tojanma lempe ntšamo yojaniytca canye soye y nyetsca tescama, entšanga bacna soyënga tmojanmama perdonánënga chamotsemnana. Cha chca tojanma, chabe derecho vida jtsobomñama cachcá tojanonýna ora; y tojanóbana entšanga chamotsobenama perdonánënga jtsemnana.

<sup>28</sup> Ntšamo Moisesbe leyiñe yojanmandacá, chëngbiamama mo chë bachnangbe más uámana amëndayëngcá tmojanëbuáyana entšanga inye ora bacna soye amënga; pero Bëngbe Bëtsá cabá chë ley entšangbe cucuatšinë tojanáboshjonentsana baytese, cha chabe Uaquiñábioye chë bachnangbe más uámana amëndayacá tbojanábuayana, cachabiamama jajúrase, ntšamo tojanayancá ndegombre chaotsemnana. Bëngbe Bëtsá tojanma chë Uaquiñá chaotsemnana lempe ntšamo entšanga tmojtsajabotcá, nda cháuatsebacama, ndocna te bacna soye ndamá, ni ainaniñe bacna juabnénga ndbomná.

## 8

### *Cristo, nda jóbanëse tojanma entšanga Bëngbe Bëtsáftaca mo canýacá chamotsemnana*

<sup>1</sup> Chë más uámana soye ndayama bënga montsichamo, chë Cristo mo bachnëcá yomnana montsoyebuambná ora, entsemna: Bënga chábeñe imojtsebomna canya nyetsca tescama Bëngbe Bëtsabe delante bëngbiamama impadaná, mo chë bëngbe bachnangbe más uámana amëndayacá, Bëngbe Bëtsabe catšbioica yojtsetbemana jtsemándayama, y Bëngbe Bëtsá chë más uámana tbemanentše.

<sup>2</sup> Chë inye bachnanga Bëngbe Bëtsabe bëts yebnentše tmojánamashjna chë “más uámana ca” uabaina luaroye, Bëngbe Bëtsabe delante jtsemnana; pero chë luare celoca ndayentše nyets tempo Cristo mo chë bachnangbe más uámana amëndayacá yoservena, entšanga ndoñe chca tmonjanpormá, ndayá Bëngbe Bëtsá.

<sup>3</sup> Nyetscanga chë bachnangbe más uámana amëndayënga tmojanëbuáyana, entšangbiamama soyënga y tmojóba bayënga Bëngbe Bëtsábioye juatšëmbonama, chëngbe bacna soyëngama perdonánënga chamotsemnana; chíyeca, jtseytana Jesucristo ndayánaca chaotsebomnana, Bëngbe Bëtsábioye juatšëmbonama.

<sup>4</sup> Cha quem luarentše tojtsetrabájase, cha ni mo bachna ndoñe nántsemna, er muentše ba bachnanga mondmëna, y chënga ba soyënga jamana Bëngbe Bëtsábioye jëtschuayama, ntšamo jamama Moisesbe leyiñe yomandancá. Y chca, ndoñe nantseyta cha chca chauatoservénama.

<sup>5</sup> Chë inye bachnanga imobomna luarënga Bëngbe Bëtsá jadórama, y ndaye soyëngaca chënga Bëngbe Bëtsá imoservena, ndoñe cachcá yontsemna chë ndayentše Jesucristo celoca yoservena luarcá, ni ntšamo cha yoservencá; nye batšatema bëngbioye šuinýanýná ntšamo chë celoca luare yomnana, ndayentše Cristo mo bachnëcá yoservena. Y bënga mondetatšëmbo quem luarentše chë soyënga chca yomnana, er chë Bëngbe Bëtsábioye jadórama yebna, chë jatsjacama opodena yebna Moisés japórmama ora, Bëngbe Bëtsá mëntšá tbojanianana: “Cuedado cochtsebomna chë atšbiamama yebniñe nyetsca soyënga jamama, ntšamo tcbonjaninýinýecá chacomama, chë tjoca bonjamna ora ca.”

<sup>6</sup> Pero bëngbe bachnangbe más uámana amëndayá Cristo, tojashjache canye más bëts trabajo jtsebomnana, ntšamo chë inye bachnanga imobomna trabajuama; cachcá, ndayá Bëngbe Bëtsá tojayancá Crísoftaca bëngbiamama jamama, bënga tempcá tšabá Bëngbe Bëtsáftaca jtsemnana jtsamëse, puerte más tšabá endmëna, chë ndayá tempo chabe entšangbiamama jamama tojanašebuachená soyama. Ntšamo mora cha tojayancá puerte más tšabá entsemna, er tojašebuachená más tšabe soyënga bëngbiamama jamama.

<sup>7</sup> Chë Bëngbe Bëtsá natsana tojanašebuachená soyëngaca matëñjanopodé entšanga chamotsamama ntšamo yojanamncá, ntšamo tojanašebuachenacá jóyëngacñama, as ndoñe manjanëyta Bëngbe Bëtsá cachiñe canye trato chauátsbemama entšangbiana.

<sup>8</sup> Pero Bëngbe Bëtsá tojáninye ntšamo yojanamncá entšanga ndoñe tmonjanmama, ntšamo cha tojanašebuachenacá jóyëngacñama, y Bëngbe Utabná Bëngbe Bëtsá chëngbiana mëntšá tojánayana:

Canye tempo echanjóshjango, y chora Israel y Judabe pamillentša entšangbiana básefta soyënga jamama chanjašebuachená, chënga átseftaca tempcá tšabá jtsemnama chamotsobenama.

<sup>9</sup> Chë chanjašebuachená soye ndoñe queochátsmëna cachcá ntšamo chë chëngbe bëts taitanga sënjanašebuachená soye enjamncá, atše chënga sënjanënatse ora, Egiptó luarocana sënjesanëbuacna ora; pero chëngna, ntšamo jamama enjanamncá, chë sënjanašebuachená soye jóyëngacñama ndoñe chemátanma causa,

atše cachcá chënga sënjesanëñyaye ca, Bëngbe Utabná tojánayana.

<sup>10</sup> Chë Israeloca entšangbiana ndayá jamama canye tempo chentšana chanjašebuachená soye,

mëntšá entsemna ca, Bëngbe Utabná tojánayana:

Atše chanjama chë chëngbe juabniñe chaitsemánda soyama chënga chamotsejuabnama, y chamotseboše jtsamana ndayá chëngbe ainaniñe chaitsemánda soye.

Atše chëngbe Bëtsá chántsemna, y chënga atšbe entšanga.

<sup>11</sup> Chë tempo ndoñe queochátsiyta cányënga ínÿënga chamotsabuátambama, cachabe luariñe oyenábioye o cachabe pamillentša entšábioye, atše chë chëngbe Utabná chašmotsábuatmama.

Ndoñe queochátsëyta, er nÿetscanga uámanënga y nduámanënga,

corente tšabá atšbe šmochantsábuatma.

<sup>12</sup> Chënga chanjálastemaye y chëngbe bacna soyëngama chanjáperdonaye, y ndocna te más chë bacna soyënga chënga tmojamama quichátsjuabnaye ca —cha tojánayana.

<sup>13</sup> Bëngbe Bëtsá, chë entšangbiana mora jamama tojášebuachenama tojtsichamo ora, chca jtsemnana, er cha tojama chë tempo entšangbiana jamama tojanašebuachená soye, mora ya ndoñe chaondëtsoservénama; ndayá mo tanguá soycá tojtsemna y ya ndoñe tontsoservena, chë soyna nÿe batšatema más y ya jtsopochócana.

## 9

### *Bëngbe Bëtsá jadórama muentša luare y chë celoca luare*

<sup>1</sup> Y morna, ndayá Bëngbe Bëtsá tojanašebuachenama y tojanmandá soyama, mandënga yojamna ntšamo cha jtsadoránama, y nÿa chabiana pormana yebnentše quem luarentše.

<sup>2</sup> Chíyeca, Bëngbe Bëtsá tojanmandá chaotsemna canye jatsjacama opodena yebna chábioye jadórama, mëntšá: Chë natsana tsañe quem Bëngbe Bëtsabiana yebnentše inauabaina “chë uámana luare ca”; chentše inamna chë canÿsëfta quinÿenëfjuangá castellano candelerešiniñe, y canye mesësha ndayiñe yojacjana chë luarentše Bëngbe Bëtsá bëtsemnama inÿinÿnaye tandëšënga.

<sup>3</sup> Inÿe ujonÿana entšëjua chentšana, inÿe luare inamna; inauabaina “chë más uámana luare ca”.

<sup>4</sup> Chentše inamna chë castellano altar, incienso jajuinÿiyama, y chë cajontema nÿetsiñe castellanoca pormánëtema. Quem cajontema yojaninÿanÿná ntšamo Bëngbe Bëtsá tojanašebuachenacá, chë Israeloca entšanga chabe uámana entšanga yochjánabiamama, y inauabaina “Bëngbe Bëtsabe šbuachenana soye inÿinÿnaye cajontema ca”; y chë tsoye

quem soyënga inabomna: canÿe castellano jarrëtema, maná ca uabaina tandëseca, chë Bëngbe Bëtsá tojanma celocana chabe entsangbiana chaótsatsama saná; Aaronbe varëfja, chë tojanantsëfjonëfja; y chë ndëtsbé tablëbenga ndayiñe Bëngbe Bëtsá tojanábema chë bnëtsana uámana mandënga.

<sup>5</sup> Chë cajontema juatsboca immamna chë juatëngmiásha uabomnënga, mo angelëngcá, “querubinënga ca” uabáinënga, y chënga imojaninÿanÿná chë Bëngbe Bëtsabe buashinÿinÿanana chéntsna bétsemnama. Chënga, chë juatëngmiáshangaca chë cajontémentsa nÿets ústonëtema imojanëtsbotsana; chë ústonëtema inauabaina “entsanga bacna soyënga tmojamama Bëngbe Bëtsá perdonaye luare ca”, er chentse, chë cajontema juatsboca chë bachnangbe más uámana amëndayá jtsamanana buiñe jabuëscjana, chë Bëngbe Bëtsábioye cha ibnaimpadana te, entsanga cháuperdonama. Pero mora ndoñe quenátsiyta chë soyëngama lempe jatóyebuambnayama.

<sup>6</sup> Lempe chca tmojanprontantsana, chë bachnanga sempre chë natsana luaroye imojánamashjuana, jamama ntšamo Bëngbe Bëtsá tojanamëndacá, chábioye jadórama.

<sup>7</sup> Pero nÿe chë bachnangbe más uámana amëndayá yojobena chë inÿe luaroye jamashënguana, y nÿe canÿe cada uata. Choye jamashënguama orna, cha ibojamna bayëngbe buiñe juabuyambana, Bëngbe Bëtsábioye juatšëmbonama, chca, chë bachnangbe más uámana amëndayá tojanma bacna soyënga Bëngbe Bëtsá chaboperdonama, y chë ntsetatšëmbcá entsanga tmojanma bacna soyëngnaca.

<sup>8</sup> Chca, chë Uámana Espíritu jamana bënga chaósertama, chë natsana luare cabá tojtsemnëntscuana y chë bachnanga cabá chë soyënga chentse tmojtsamëntscuana, nÿetscanga cabá ndoñe tmonjanobená chë inÿe luaroye jamashjnama, chë “más uámana luaroye”.

<sup>9</sup> Chë soyëngaca jtsopodénana bëngbioye jinÿanÿiyana, chë tempo, chë Bëngbe Bëtsábioye jadórama yebnentse entsanga uta luare imojábomna ora, ndoñe yonjopodena Bëngbe Bëtsabe delante nÿetscanga jatsmënana, mo chë bachnangbe más uámana amëndayacá. Y chë soyëngnaca jtsayanana, chë Bëngbe Bëtsabiana uátšëmbona soyëngaca y bachnanga tmojanóba bayëngaca, ndoñe tonjanopodé jamana canÿa Bëngbe Bëtsábioye adorayá, Bëngbe Bëtsáftaca tempcá tšabá chaotsatsmënana y Bëngbe Bëtsá chabe bacna soyëngama tbojaperdonama ainaniñe corente chaotsetatšëmbuama.

<sup>10</sup> Chënga, chë uátšëmbona soyëngaca y tmojanóba bayëngaca tmojanma nÿe ntšamo Moisesbe leyinë yojanayancá, ndayá chiñe yojanlesenciancá, ndayá jasama o jofšiyama, y chë cuerpo jabebiana mo tšabe entsangcá Bëngbe Bëtsabe delante jtsatsmënana; nÿetsca mandënga nÿe cuerpama, pero ainanama tondaye ntjamana. Pero chë entsanga chca yojánamna jtsamana, nÿe Bëngbe Bëtsá inÿe soyënga, más tšabe soyënga jamama tojamandantscuana, chë tsëm trato tojábema ora.

<sup>11</sup> Pero Cristo ya tojánabo, y cha yomna chë Bëngbe Bëtsabe delante bëngbiana impadaná mo chë bëngbe bachnangbe más uámana amëndayacá, chca, bëngbiana chaotsemnama chë tšabe soyënga ntšamo mochjoyëngacñëcá. Chë luare celoca ndayentse cha Bëngbe Bëtsabe delante mo bachnëcá yotrabája, puerte tšabe luare yomna, y chentse cha, ndoñe chë quem luarentse bachnanga imomnëngcá, cha yobena jamana lempe ntšamo Bëngbe Bëtsá entsangbiana jamama inajuabnaycá. Chë luare ndoñe entsangbe cucuátseca yondëpormana, y chca jtsayanana, quem luarentsa soye ndoñe yondmëna ca.

<sup>12</sup> Cha, canÿe y nÿetsca tescama chë luaroye Bëngbe Bëtsabe delante tojánamashëngo ora, cha ndoñe chivo o ternerbe buiñe tonjanabuyamba, ntšamo chë inÿe bachnanga imojuamancá; ndayá jóbanëse, chabe buiñe juabuáshanëse, cha tojanma entsanga atsebácanënga jtsemnama chamotsobenama; y chca tojanmëse, cha tojanobená chë luaroye Bëngbe Bëtsabe delante jamashënguama. Y Cristo chca choye tojanamashënguëse, tojanma bënga chë nÿetsca tescama yomna tšabe vida jtsebonnama chamotsobenama.

<sup>13</sup> Ndëmuanÿënga ndayámnaca chë leyama tmojanoquedá mo chë Bëngbe Bëtsabe delante ndoñe tšabengcá, chë bachnanga imojuamana chëngbioye toronga y chivëngbe

buiñe jabuéscacjana, y chë altaroca tcojajuinýe ternerabe jatinýá chëngbioye jatbótotana, chca, chënga jábiamama Bëngbe Bëtsabe delante mo tšabengcá. Chca tmojamentšana, chë bachnanga tmojánayana chënga imojtsobena chë ínýengaftaca jabama, Bëngbe Bëtsá jadórama, y cachiñe mo tšabengcá Bëngbe Bëtsabe delante imojtsatsmëna ca.

<sup>14</sup> Ndayá bachnanga tmojanmcá yojanámana entšanga cachiñe mo tšabengcá Bëngbe Bëtsabe delante imojtsatsmëna ca jayanama; y chca, chë ínýengaftaca Bëngbe Bëtsábioye jadórama tmojanobenase, ñtsachetšá más yojsámana Cristbe buiñe, ndëmuanýeye tojanábuashana bëngbiana cha tojanóbana ora! Chë nyets tempo vida bomná Espíritbe obenánaca, Cristo, chabe derecho vida jtsobomñama cachcá tojanonýá y bëngbiana tojanóbana. Cha, chë ndocna bacna soye ndbomná, tojanóbana ora yojamna mo canýe bayá tondaye ndbemaná chë bachnanga cuafjobacá juatsëmbonama, entšangbe bacna soyëngama; cachcá Cristo, chë ndocna bacna soye ndbomná, bëngbe bacna soyëngama jáperdonama tojanóbana. Bëngbiana tojanóbanayeca, Cristo yobena jamama bënga ainaniñe corente tšabá chamotsetátšëmbo, bacna soyënga bënga tmojamama, chë ndoñe vida jtsebomnama bënga junatsana soyënga, chama bënga perdonánënga imojtsemnama, y chca, bënga montsobena jtsiyenana, Bëngbe Bëtsá, chë ndegombre ainá yomná, jtseservénëse.

<sup>15</sup> Chíyeca, Cristo jóbanëse tojama entšanga Bëngbe Bëtsáftaca cánýiñe mo canýacá chamotsemnama, ntšamo Bëngbe Bëtsabe tsëm trato yomncá; y chca cha tojama, Bëngbe Bëtsá chabe entšanga chamotsemnama tojáchembënga perdonánënga chamotsemnama, chë Bëngbe Bëtsabe tempsca tratentša ley jtsocumplínama inamna ora imojyenëntscuana bacna soyënga tmojanmama; y chëngnaca chamotsobenama chë nyetsca tescama mochtsebomna soyënga jóyëngacñama, ntšamo Bëngbe Bëtsá chabe entšanga tojanašebuachenacá.

<sup>16</sup> Ntšamo canýe testamentiñe tojtsayancá chaopasamna, jtseytana chaotsótatšëmbo chë chca jamama tojašbuachená cha tojóbanama.

<sup>17</sup> Canýe testamento tondaye ntsámanana, chë chca jamama tojašbuachená cha cabá ainá totsomñëntscuana; nýa cha tojóbana orna aíñe.

<sup>18</sup> Chíyeca chë Bëngbe Bëtsabe natsana trato, entšángbeñe tojanoboajtšé, chora tmojanóba bayëngbe buiñe jabuéscjëse.

<sup>19</sup> Moisés chë leyentša nyetsca mandënga nyetsca entšanga tojánabuayenantšana, tojanca buángana boboshëshe y hisopo betiyentša buacuafja, chë ternerënga y chivëngbe buiñe búyeshca enajuabnëyiñe tojanfchecuacuá, y chora chë leyënga librësañe tojanbuéscacja, y nyetsca entšángbeñnaca.

<sup>20</sup> Y mëntšá tojánayana: “Quem buiñe entsinýinýná, ntšamo Bëngbe Bëtsá tojamandacá ndegombre yochtsemnama, y tšëngaftangbiana puerte yochtsámanama ca.”

<sup>21</sup> Moisésnaca buiñe tojanbuéscacja chë jatsjacama opodena yebniñe, y lempe chentša soyënguiñe, chë ndaye soyënga Bëngbe Bëtsábioye jadórama yojanoservena.

<sup>22</sup> Er ntšamo leyiñe iuayancá, yojtsemna nýa mo nyetsca soyënguiñe buiñe jabuéscacjana, Bëngbe Bëtsábioye jadórama tšabá chaoservema; y buiñe ndoñe tonjuábuashanëсна, ndoñe ntsopodénana entšanga bacna soyëngama perdonánënga chamotsemnama.

*Cristo jasúfriase y jóbanëse, tojanma entšanga bacna soyëngama perdonánënga chamotsemnama*

<sup>23</sup> Chíyeca jtseytana chë Bëngbe Bëtsábioye quem luarentše jadórama soyënga, chë bachnanga chamoma, Bëngbe Bëtsábioye jadórama tšabá chaoservema, chë Bëngbe Bëtsábioye jëtschuayama tmojóba bayëngbe buiñeca. Chë soyënga batsatema jtsinýanýnayana ntšamo chë celoca luare yomnana Bëngbe Bëtsabe delante, ndayentše Jesús yoservena. Lempe

ntšamo chë Bëngbe Bëtsábioye jadórama luarentše yomncá, chabe delante celoca, Jesucristo tojanma, chábioye jadórama tšabá chaoservema; pero chca tojanma más uámana soyënga jamëse, chë tmojóba bayëngaca bachnanga quem luarentše innétsama soyëngama.

<sup>24</sup> Er Cristo ndoñe tonjánamashëngo canye luarentše Bëngbe Bëtsá jadórama nye entsangbe pormánentše, ndaye luare nye batšatema jtsinÿanÿnayana ntšamo chë celoca luare Bëngbe Bëtsabe delante chábioye jadórama yomnana; ndayá cach celoye tojánamashëngo, Bëngbe Bëtsabe delante luaroye, bëngbiana jtseimpadánama.

<sup>25</sup> Chë bachnangbe más uámana amëndayana chë “más uámana luaroye” jamashënguana canye cada uata, bayëngbe buíñeca, ndoñe cachabe buíñeca, chca, ndayánaca jamama entsanga bacna soyënga tmojamama perdonánënga chamotsemnana. Pero Cristo chë luaroye celoca ndoñe tonjánamashëngo, chentšana jtésebocnama, y chabe buíñe juabuáshanëse cachiñe jatóbanama, y ba soye cachcá chauétsemnana.

<sup>26</sup> Chca tojtsemnëse, Cristbiana manjanmëna jasúfriana y jóbanana ba soye, chë Bëngbe Bëtsá quem luare tojanma orscana. Pero ntšamo tojopasacá entsemna, mora chë quem luare jopochócama tempo yojtsobeco ora, Cristo canye y nyetsca tescama tojenonÿinÿé quem luarentša entsanga bacna soyënga jabuajuánama, chëngbiana jóbanëse, mo entsangbe bacna soyëngama canye tmojóba bayá, Bëngbe Bëtsábioye uatšëmbonacá.

<sup>27</sup> Cachcá, ntšamo nyetsca entsanga jtsamnana nye canye jóbanama, y chentšana Bëngbe Bëtsá chëngbiana jayanana chë imojéftsiyenëntscuana ntšamo tmojanmcá tšabá o ndoñe tšabá bétsemnana, y chëngaftaca jamana ntšamo chora tojajuabocá,

<sup>28</sup> cachcá, Crístnaca, nye canye chabe derecho vida jtsobomñama cachcá tojanonÿá, chabe buíñe juabuáshanëse jóbanama, ba entsanga bacna soyëngama jáperdonama; y chentšana cachiñe yochjésabo, ndoñe bacna soyëngama entsanga jabáperdonama, ndayá chë cha cháuesabama tša tmobátmanënga jabátsebacama.

## 10

<sup>1</sup> Chë Moisesbe leyentša mandënga, ntšamo chë bachnanga yojánamnama Bëngbe Bëtsá jadórama tmojóba bayëngaca y inÿe soyëngaca, ndoñe ntsinÿanÿnayana lempe chë Bëngbe Bëtsá chabe entsanga jatsatayana puerte tšabe soyënga, pero aíñe batšatema jtsinÿanÿnayana ntšamo chë soyënga yochtsemnana. Chíyeca chë mandënga, chë uátšëmbona soyëngaca y Bëngbe Bëtsábioye jadórama tmojóba bayëngaca, ndocna te ntjopódiana jamana chë Bëngbe Bëtsábioye jobéconama tmojtsebošënga, chca soyënga tmojtsamama cada uata nyets tempo, chënga ainaniñe corente chamotsetatšëmbuama chëngbe bacna soyëngama nyetsca tescama perdonánënga imojtsemnana.

<sup>2</sup> Er ndayá tcojtsamama Bëngbe Bëtsabiama uátšëmbona soyëngaca y chábioye jëtschuayama tmojóba bayëngaca, entsanga Bëngbe Bëtsábioye adórayënga, chabe delante tšábënga jtsemnana matmëñanobenase, chënga chë bacna soyënga tmojanmama ainaniñe ngménaca ya ndoñe mamëñjëtsemna, y matmëntsana jbaná soyënga amana chë tmojóba bayëngaca.

<sup>3</sup> Pero juatšëmbonama entsanga bayënga tmojóba ora, josérviana entsanga bacna soyënga tmojamama cada uata chamuatenójuaboma;

<sup>4</sup> er chë toronga y chivënga tmojóbanëngbe buíñeca ndoñe ntsopodénana entsángbioye bacna soyënga jabuajuánama.

<sup>5</sup> Chíyeca, Cristo quem luaroye tojánabo ora, Bëngbe Bëtsábioye mëntšá tbojaniyana: Ndoñe tconjábosëna entsanga chacmátšëmbona soyënga, ni tmojobaye bayënga, pero aíñe tcojama atše canye entsacá chaitsemnana.

<sup>6</sup> Ndoñe tšabá quecmátinÿana chë tmojóba y tmojajuinÿé bayënga, entsanga bacna soyëngama chacotsaperdonama.

<sup>7</sup> As atše Bëngbe Bëtsá sënjaniana: “Bëngbe Bëtsá, muentše sëntsemna, ntšamo aca icobošcá atše chaimama, ntšamo acbe uabemana palabrënguine atšbiana endayancá, chë ndayá atše chjanmama ca.”

<sup>8</sup> Natsana, Cristo tojánayana, Bëngbe Bëtsá ndoñe tonjánbošena, ni tšabá tbonjanínynana entšanga chamuátšëmbona soyënga, ni Bëngbe Bëtsábioye jëtschuayama tmojóba bayënga, ni tmojóba ni tmojajuinýe bayënga, entšanga bacna soyëngama cha chaotsaperdonama ca, masque chënga chë Bëngbe Bëtsábioye jadórama soyëngaca jamana, ntšamo leyinë iuayancá ndayá chënga jamama yojtsamna.

<sup>9</sup> Y chentšana, Cristo Bëngbe Bëtsábioye tbojátaniyana: “Muentše sënjabo, chë ntšamo aca icobošcá atše chaimama ca.” Chca, Cristo tojinýanýe chë jtsamana soyënga tmojóba bayëngaca, tondaye yonduámama entšanga bacna soyënga jabuajuánama, y entšangbe bacna soyëngama jóbanëse tojaninýanýe chë ntšamo Bëngbe Bëtsá yobošcá jtsamana, más iuámama chë inýe soyënga játamama.

<sup>10</sup> Bëngbe Bëtsá tojama, bënga chabe entšanga y chabe delante tšábenga chamotsemnama, ntšamo Bëngbe Bëtsá yobošcá Jesucristo tojánmayeca, chabe derecho vida jt-sobomñama cachcá jonýayëse y entšangbe bacna soyëngama jóbanëse, canýe y nyetsca tescama.

<sup>11</sup> Judiëngbe nyetsca bachnanga nyets tempo ba soye altarentša natsanoica Bëngbe Bëtsá jtseservénana, y ba soye cachcá jtsamana tmojóba bayëngaca, pero chë soyëngaca ndocna te ntjopódiana entšanga bacna soyënga jabuajuánama.

<sup>12</sup> Pero Jesucristo entšangbe bacna soyëngama tojanóbana ora, yojamna mo canýe tmojóba bayacá, Bëngbe Bëtsá entšanga bacna soyëngama cháuaperdonama; nýe canýe y nyetsca tescama chca tojanma, y chentšana Bëngbe Bëtsabe catšbioica tojtanótbema, canýe uámama puententše, jtsemándayama.

<sup>13</sup> Chentše cha yobátmana, Bëngbe Bëtsá chabe obenánaca Cristbe uayayënga chabe cucuatšinë chamoquedama yochjamëntscuana.

<sup>14</sup> Er nýe canýe, entšangbe bacna soyëngama cruzoca jóbanëse, Jesucristo lempe tojama, entšanga chë Bëngbe Bëtsábenga jtsemnama chëmbonënga, chabe delante nyetsca tescama tšabengcá chamotsemnama.

<sup>15</sup> Y Uámama Espíritnaca, Bëngbe Bëtsabe uabenana palabrënguine šontsinýanýná chca ndegombre bëtsemnama, mëntšá tojánayana ora:

<sup>16</sup> Ndayá entšangbiana chjama, canýe tempo chentšana chanjašebuachená soye mëntšá entsemna ca, Bëngbe Utabná tojánayana:

Atše chanjama chënga chamotseboše jtsamana ndayá chëngbe ainaniñe chaitsemánda soye,

y chamotsejuabnama chë chëngbe juabniñe chaitsemánda soyama ca.

<sup>17</sup> Y chentšana mëntšá tojánayana:

Ndocna te más quichátsjuabnaye chënga bacna soyënga tmojamama, y ntšamo atše stsebošcá contra soyënga chënga tmojamama ca.

<sup>18</sup> Chcasna, Bëngbe Bëtsá nyetsca tescama entšanga bacna soyëngama tojaperdoná ora, ya ndoñe ntjásiytana inýe soyënga más játamama, mo bayënga cuafjobaycá, entšanga bacna soyëngama perdonánënga chamotsemnama.

### *Sontsamna Bëngbe Bëtsábioye jtobéconana*

<sup>19</sup> Y chca, Jesucristbeyeca catšátanga, Jesusbe buiñe tojanábuashanama y bëngbiana tojanóbanama, chábeñe jtsošbuáchiyëse, bënga montsobena, tondayama ntjatauatjca Bëngbe Bëtsabe delante jamashënguama.

<sup>20</sup> Bënga montsobena jamashënguama chë tsëm benachëjana, Cristo bëngbiana tojamëjana; cha nda inétsama chë nyetsca tescama yomna tšabe vida chamotsebomnama. Mo chë quem luarentše chë bachnangbe más uámama amëndayacá, chë ujonýana



entsějuajana jamashěnguana chě “más uámana ca” uabaina luaroye, Běngbe Bětsabe delante jtsemnama, cachcá, Cristo běngbe bacna soyěngama mo entsacá tojanóbana yeca, běngnaca montsobena Běngbe Bětsabe delante luaroye jamashěnguana.

<sup>21</sup> Běnga mondbomna canye běts bachnangbe más uámana aměndayá, Běngbe Bětsabe entsángbeñe jtsemándayama, y cha endmēna Jesús.

<sup>22</sup> Chíyeca, Běngbe Bětsá jaserviama ndegombre ainaniñe corente jtsebošese, y chábeñe puerte jtsošbuáchiyese, šontsamna Běngbe Bětsábioye jobéconana. Ntšamo chě bachnángbioye buiñeca tmojanabuešcá, Běngbe Bětsabe delante tšabengcá chamotsemnama cha jaserviama, cachcá, Cristbe buiñe juabuáshanese y běngbiamá jobanese, běnga ainaniñe corente montsetátšēmo Běngbe Bětsá nyetsca tescama běngbe bacna soyěngama šojtsaperdonama. Y běnga bėjayeca uabainěngnaca mondmēna; chíyeca běnga jtsobenana Běngbe Bětsábioye chca jobéconana.

<sup>23</sup> Běnga šontsamna nyets tempo Běngbe Bětsábeñe puerte jtsošbuáchiyana, y ndocna te nye ndayámna játajbanana entsángbeñe ichámuana, chě Běngbe Bětsábeñe jtsošbuáchiyese běnga imobatmana soyěnga cha yochjamama, er chě soyěnga šojašebuachená cha, sempre jamana ntšamo tojayancá.

<sup>24</sup> Běnga šontsamna janguanguana ntšamo muatjobenaye añemo jenatšetayana, nyetscanga jtsenbobonshánana, y ntšamo tšabá yomncá jtsamana;

<sup>25</sup> pero ndoñe quešnátamna játajbanana, Běngbe Bětsábioye jadórama enefjuanana mo Cristbeñe ošbuáchiyěnga quetsomñecá, ntšamo báseftanga imojtsamcá. Chamna, nyetscanga añemo mochtsenatšetnaye Cristo nyets tempo jtseservénama, y más mora, chě ndayá imojtsonyama, Běngbe Utabná yochjésabama ya yojtsobecuama montsetátšēmo ora.

<sup>26</sup> Er chě ndegombre soyěngama tšabá tmojátatšēmonentsana y chě soyěnga tmojoye-uná chentšana, bacna soyěnga jtsamese tmojtsiyena, nye chca jamama tmojtseboše causa, muattsaboté ndayá Cristo běngbiamá tojanmncá, běngbe bacna soyěngama cha tojanóbana ora, y ya tondaye nántsemna ntšamo Běngbe Bětsá běnga jtsaperdónama.

<sup>27</sup> Y chca, ndayá běnga muattsobena jobátmana soye nántsemna nye chě Běngbe Bětsábioyena castigo, chě ndayama šojtsamna uatjana jtsebonnana; y nye jobátmana chě tempo, ndaye ora Běngbe Bětsá puerte etonaná chabe uayayěnga bětscá íñesheca yochtsapochóca.

<sup>28</sup> Ndánaca chě Moisesbe leyama tojayana tondaye yondovalena ca, y útata o únganga chca tmojouena y aíñe cha chca tojayana ca chěnga tmojayanese, jtsemnana chě entsábioye jtsóbana, tondaye ntjalastemacá.

<sup>29</sup> Canya, nyets ainánaca Běngbe Bětsabe Uaquiñábioye tbojtsaboté; y tojayana Cristbe buiñe, chě ndémuanyeye tojanábuashana běngbiamá tojanóbana ora, tondaye yonduámana ca, ndayá nye ndaye entsabe buiñcá ca, chě buiñe chě ndémuanyeye šojtsinýanýná ndayá Běngbe Bětsá tbojašebuachenacá běngbiamá jamama, y ndáyeca Běngbe Bětsá chabe entsanga šojábiamá, cha jaserviama; chě entsá Uámana Espíritbioye tbojójyenguango, nda inétsama běnga tšabe soyěnga chamotsebonnana; y canya chca amá, ¿tšěngaftanga ndoñe šmontsejuabná cha ibojtsomerecena Běngbe Bětsábioyena canye puerte más uabouana castigo, chě Moisesbe leyama tondaye yondovalena ca tojayanabiama?

<sup>30</sup> Běnga nyetscanga mondětatšēmo Běngbe Bětsá měntsá tojánayanama: “Atše chanjama chěnga chamosufrima, ínýenga chamosufrima tmojama causa; y chěnga chanjácastigaye, ínýengbioye bacá tmojaborlá causa ca.” Y měntsánaca tojánayana: “Běngbe Utabná chabe entsángbiamá echanjaya ntšamo tmojěftsemcá tšabá o ndoñe tšabá bětsemnama, y chěngaftaca echanjama ntšamo chora chaojajuabocá ca.”

<sup>31</sup> ¡Tša uabouana, Běngbe Bětsá chě nyets tempo ainabe cucuatšine joquédana, castigáná jtsemnama!

<sup>32</sup> Pero ntšamo tempo yojamnama šmochtsenójuabnaye, chë ndegombre soyënga Jesu-cristbiana cabá chora šmonjanábuatmana ora, y chora tša jenojuérezana cmonjanotocá padecena soyënguiñe, y chë causa tša šmojansufrí.

<sup>33</sup> Báseftanga tšëngaftanguentsëngbioye entsangbe delante tcmojanoyáguango, y ínÿenga tmojanma puerte chašmotsesufrínama; y ínÿenga tšëngaftanguentsënga chca imojansufrinëngaftaca šmojanama, chënga jujabuáchama.

<sup>34</sup> Tšëngaftanga šmojánalastemana chë chënguentsënga cárceloye imojanëtámenënga; y oyejuayënga šmojanlesenciá ntšamo šmojanbomncá ínÿenga chacmotsabacama, er tšëngaftanga šmojátatsëmbona Bëngbe Bëtsábiocana más tšabe soyënga šmojtsebomnama, chë nÿetsca tescama šmochtsebomna soyënga.

<sup>35</sup> Chcasna, ndoñe šmatjajbaná ainaniñe bëtscá añemo jtsebomnana, ni Bëngbe Bëtsábeñe sempre jtsobatmanana; er chca šmobatmánayeca, Bëngbe Bëtsá echanjama tšëngaftanga bëtscá uacanana soyënga chábiocana chašmotsebomnama.

<sup>36</sup> Tšëngaftanga cmontsamna corente uantadënga jtsemnana, padecéniñe chašmojtsachnëjuana ora, chca, ntšamo Bëngbe Bëtsá yobošcá tšëngaftanga chašmotsamama, y ndayá Bëngbe Bëtsá tojanašebuachenacá chašmóyëngacñama.

<sup>37</sup> Er Bëngbe Bëtsabe uabemana palabrenguiñe cha mëntšá tojánayana:

Betsco, ndoñe bën, y chë jabama ibomná echanjabo.

Ndoñe bën quebochatóbema.

<sup>38</sup> Nÿe chë ndabiana atse chajama atšbe bominiñe tšabia chaotsemnana, átšbeñe cha betsošbuáchema, cha ndegombre chë nÿetsca tescama yomna tšabe vida echántsebomna;

pero uatjana causa, átšbeñe ošbuáchiyana tojtsajbanase, atse cháftaca ndoñe quichátoyejuaye ca —cha tojánayana.

<sup>39</sup> Pero bënga ndoñe quemátsmëna chë uatjana causa Bëngbe Bëtsábeñe ošbuáchiyana tmojtsajbananga, y chca, nÿetsca tescama pochocánënga jtsemnana imojtsajnënga; pero aiñe mondmëna chë Bëngbe Bëtsábeñe ndegombre ošbuáchiyënga, y chca, chë atsebácanënga jtsemnana mochjashjáchënga.

## 11

### *Bëngbe Bëtsábeñe ošbuáchiyana jtsebomnana*

<sup>1</sup> Ošbuáchiyana jtsebomnana endmëna corente jtsetatsëmbuana, ndayá tmojtsobamancá ndegombre chca yochjopásama; endmëna ainaniñe corente jtsetatsëmbuana, ndayá bënga mora ndoñe tmontsonÿacá ndegombre chca yomnama.

<sup>2</sup> Bëngbe Bëtsá tojánayana bëngbe bëtš taitanga tšabá imojánama ca, chënga chábeñe imojtsošbuachéyeca.

<sup>3</sup> Bënga, Bëngbe Bëtsábeñe mondošbuachéyeca, mondëtatšëmbo cha quem luare y nÿetsca luarënga tojanmama, chca chaotsemnana cha tojanmandá ora; chcasna, chë ndayá mora bënga jinÿama imobencá, cha tojanma bënga ndoñe mondobena jinÿama soyënguentsana.

<sup>4</sup> Abel Bëngbe Bëtsábeñe yojanošbuachéyeca, oveshatémënga chábioye tbojanátšëmbona, y chë soye Bëngbe Bëtsabiana más tšabá yojtsemna, chë ndayá Caín, chabe catsata, Bëngbe Bëtsá jëtschuayama tbojanátšëmbonama. Chíyeca, Bëngbe Bëtsá tojánayana Abel chabe bominiñe tšabia yojtsemna ca, ndayá Abel chábioye jëtschuayama tojanmcá oyejuayá tojanóyëngacñeyeca. Ntšamo Abel Bëngbe Bëtsábeñe yojanošbuachecá, masque cha ya obaná yojtsemna, chë soye cabá bënga šontsabuatambá.

<sup>5</sup> Enoc Bëngbe Bëtsábeñe puerte yojanošbuachéyeca, Bëngbe Bëtsá celoye tbojesanbëtšëñe, ntjobancá. Chentšana ndocná tonjanobená cha jtšinÿenana, Bëngbe Bëtsá tbojesanbëtšëñe causa. Y Bëngbe Bëtsabe uabemana palabrenguiñe endayana, Bëngbe

Bëtsá Enócaftaca oyejuayá canjamna ca, ntšamo jtsamëse yojoyenama, y chentšana celoye tbojtsanámbaife.

<sup>6</sup> Pero Bëngbe Bëtsábeñe ntsošbuachiycá, ndoñe quenátópodena cha oyejuayá bëngaftaca jabemama, er chábioye jobéconamna, entšá jtsemnana jtsošbuáchiyana cha ndegombre bétsemnana, y cha inétsamama chë cha jtsabuatmama tša tmobošëngbiana bëtsá tšabe soyënga chamotsebomnana, mo chábiocana uacanana soyëngcá.

<sup>7</sup> Bëngbe Bëtsá Noébioye tbojanbuayená uabouana soyënga yochjanopásama, cachora ndopodena jinýama soyënga, y cha Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá y barquëshá tojanapormá chabe pamíllanga jatsebacama. Cha chca tojanma ora, ošbuáchiyana bómnayeca, cha tojaninýanyé entšanga tša bacna soyënga tmojanmama y chë causa castigánënga jtsemnana yojtsemnana. Chabe ošbuachiyánamnaca Noé tojánashjache Bëngbe Bëtsabe bominiñe tšabia jtsemnana, y chca entšá jashjáchana, nýe Bëngbe Bëtsábeñe jtsošbuáchiyëse.

<sup>8</sup> Bëngbe Bëtsá Abrahámbioye tbojanchembo, inýe luaroye cháúama; Abraham Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá, y tojánbocna chë luaroye jama, chë Bëngbe Bëtsá tbojanšbuachená jatsetayama luaroye, masque Abraham ndoñe yontsetátšëmbo ndëmoye yochjánama.

<sup>9</sup> Bëngbe Bëtsábeñe yojanošbuachéyeca, yojobena mo inýe luarocana ashjangonacá jtsiyenana, cachabe luarentše ndoyená, chë Bëngbe Bëtsá tbojanšbuachená luarentše. Entšëjuaca pormana tambënguñe yojoyena, cachcá ntšamo chë chábentšana básenga Isaac y Jacob ibojëftsiyencá; y chátnaca Abrahamcá ibojanobátmana jójëngacñama ntšamo Bëngbe Bëtsá Abrahámbioye tbojanšbuachenacá.

<sup>10</sup> Er Abraham corente uantadá yojanobátmana chë canýe luaroye celoca jamashënguama tempo; chë luare inamna canýe bëts pueblo, puerte tšabe ucuatjoniñe pormana pueblo, canýe luare chë ndayentšama Bëngbe Bëtsá tojanjuabó ntšamo chaotsemnana, y cachabe pormana luare inamna.

<sup>11</sup> Sara, Bëngbe Bëtsábeñe yojanošbuachéyeca, Bëngbe Bëtsá tojanma cha canýe šešona chabotsebomnana, masque chora ya bëtsanánëjema yojtsemna, šešona jtsebomnana. Bëngbe Bëtsá chca tojanma, er Sara corente yojanjuabná, cha chë canýe šešona yochtsanbomnana tbojanšbuachená cha, nýets tempo ntšamo tojayancá amá yojamna ca.

<sup>12</sup> Y chca, quem entšá Abraham, chë šešonga jtsabamnana ya ndobenábentšana, ba básenga tmojanonýná, tša mallajta mo chë celoca estrellëngcá, y tša chëftanga mo chë mar bëjayoca chënyañentša cascajcá, ndocná jacúntama ntjobenayana.

<sup>13</sup> Nýetsca quem entšanga imojëftsiyena jtsamëse ntšamo chëngbe ošbuáchiyana yojamncá, y chca tmojanóbana, masque cabá ndoñe tmonjanóyëngacñe chë Bëngbe Bëtsá tojanašebuachená soyënga. Pero chëngbe ošbuachiyánama corente imojtsetátšëmbo, Bëngbe Bëtsá chentšana baytese ntšamo tojanašebuachenacá yochjánatšatayama y chë soyënga ndegombre yochtsemnana, y chama oyejuayënga chënga imojtsemna. Chënga tmojánayana quem luarentše chënga imojoyena mo cachëngbe luarentše ndoyenëngcá, y quem luarëjana mo nýe achnëjuanëngcá ca.

<sup>14</sup> Y chca tmojtsichámëngna, puerte jtsinýanýnayana chënga tša imojtseboše inýe luaroa joyéanama, canýe luare cachëngbiana.

<sup>15</sup> Chënga nýe chë ndayentšana tmojëftsanbocna luarama manjánjuabnase, matmënjanobená tšabá cachoye jesshéconama.

<sup>16</sup> Pero chëngna canýe más tšabe luare imnaboše, canýe luare celoca. Chíyeca Bëngbe Bëtsá ndoñe yonjanëuatja, chëngbe Bëtsá ca chënga chamotsechembuanama, er celoca canýe bëts luare, mo canýe bëts pueblëcá chëngbiana tojanprontá.

<sup>17</sup> Bëngbe Bëtsá Abrahámbioye jinýama, ndegombre aíñe o ndoñe Bëngbe Bëtsábeñe tayojtsanošbuachema, tbojanmandá chabe uaquiñá Isaac chabuánatse jóbama, chábioye jëtschuayama, ntšamo Abraham chë tojóba bayëngaftaca jamama yojanamancá. Cha

Bëngbe Bëtsábeñe yojanošbuachéyeca, yojtseprontana chë nýe canýe uaquiñá ibn-abomná jóbama, Bëngbe Bëtsábioye jëtschuayama, masque Bëngbe Bëtsá mëntšá tbojanšbuachená:

<sup>18</sup> “Chë ácbentšana entsanga nýe Isaacbiajana mochanjabo ca.”

<sup>19</sup> Abraham corente yojanjuabná y yojátatsëmbo, Bëngbe Bëtsá ndegombre obenana bomná bëtsemnama, chë obanënga chámuatayenama jamama. Chýyeca, Bëngbe Bëtsá Abrahámioye tbojtsanauyaná Isaac jóbama ora, yojamna mo Abraham obanënguentšana chábioye cuaftoyëngacñëcá. Y chca, ntšamo Isaácraftaca tojanopasacá, batšá yojtsinýanýnaye ntšamo Jesucristoftaca yochjanopasacá.

<sup>20</sup> Isaac Bëngbe Bëtsábeñe yojanošbuachéyeca, Bëngbe Bëtsábioye tbojanimpadá chabe uaquiñátbiana, Jacob y Esaú, bëtscá tšabe bendicionënga chabotsebomnama, chë joshjanguama tempënga ora.

<sup>21</sup> Jacob Bëngbe Bëtsábeñe yojanošbuachéyeca, ya jóbanama ora, tbojanimpadá cada ona chë Josebe básengbiana, Bëngbe Bëtsá chaoma bëtscá tšabe bendicionënga chamotsebomnama. Cha chca tojanma, jotsejbénase Bëngbe Bëtsábioye jadórama, y chabe jatjonëfjiñe tsbanánoca jojuáchase.

<sup>22</sup> José Bëngbe Bëtsábeñe yojanošbuachéyeca, ya jóbanama ora, tojánayana más chcoye chë Israeloca entsanga Egiptó luarentšana mochjëftsanbocna ca, y tojëftsanmandá ndayá jamana chabe óbana cuérpoca.

<sup>23</sup> Moisesbe bëtšétsata Bëngbe Bëtsábeñe ibojanošbuachéyeca, cha tojanonýná ora, unga shinýëntscuana cha tmojtsaniytëme, er chata tbojáninýe cha canýe botamana básetema bëtsemnama, y ndoñe tbonjanëuatjaná chë reybe mandama, chë nýetsca judiënga basetëmënga boyabásetëmënga jtsëbáyana.

<sup>24</sup> Moisés Bëngbe Bëtsábeñe yojanošbuachéyeca, ya bëtšá yojtsemna ora, ndoñe tonjánbošena chë Egiptoca reybe bembëbe uaquiñacá chamotsábuatmama.

<sup>25</sup> Chamna, tojánbošena cha jasúfriama ínýenga chamotsamama, cánýiñe chë Bëngbe Bëtsabe entsángaftaca, y ndoñe nýe baseftayté tšabá jatsmënana, bacna soyënga jtsamëse, ntšamo cachá tojtsejuabnacá, nýe cachá tšabá jtsomñama.

<sup>26</sup> Chamna, cha yojanjuabná, chë padecena soyënguiñe jasúfriana ntšamo Cristo tojan-sufricá, más tšabá yojamna chë Egiptoca uámana soyëngama, er cha Bëngbe Bëtsábeñe jtošošuachiyëse chábeñe yojanobátmana, ba tšabe soyënga mo canýe uacanana soycá cha ibochjanatšetayama.

<sup>27</sup> Bëngbe Bëtsábeñe yojanošbuachéyeca, Moisés Egiptocana tojëftsanbocna, chë luarentša rey cháftaca chábuatnama ntjatauatjácá. Cha ainaniñe nýets tempo añemo yojtsebomna, y chca yojáninýna mo chë ndocná jinýama tondobenacá, Bëngbe Bëtsábioye cuaftsonýacá.

<sup>28</sup> Bëngbe Bëtsábeñe yojanošbuachéyeca, ntšamo Bëngbe Bëtsá tbojanmandacá, Moisés chë judiënga tojanabuayená Bashco fiesta jamama, y chë Israeloca entsángaftaca yebnëngoye amashjuaniñe buíñeca tojanbuëscacja, chca, chë ángel obanayá, chë Israeloca pamíllangbeñe Egiptoca chë mayor uaquiñënga ndocá chaondámama.

<sup>29</sup> Moisés y Israeloca entsanga Bëngbe Bëtsábeñe imojanošbuachéyeca, chë “Buángana ca” uabaina mar bejayëjana tmojánenachnëngo, mo chiñe bojojo fshantse cuaftsomñcá; chentšana, chë Egiptoca entsanga cachcá jamama tmojánbošena ora, nýetscanga chiyiñe tojtsanatajo.

<sup>30</sup> Israeloca entsanga Bëngbe Bëtsábeñe imojanošbuachéyeca, chë Jericó bëtspueblentša tapiëšënga shëconana canýsëfta tentscuama chënga imojánajnentšana, chëšënga yojtsáshajaye.

<sup>31</sup> Rahab, chë pueblentša bacna vida bomna shembása, Bëngbe Bëtsábeñe yojanošbuachéyeca, ndoñe tonjanóbana chë ínýengaftaca, chë bëtspueblentše oyenënga, chë ntšamo Bëngbe Bëtsá tojanmandacá ndoñe tmonjanmënga; y ndoñe tonjanóbana, er chë

Israeloca entsanguentsana ichmónënga tšabá tojanébuaja, chë jarrepárama tmojánanga ntšámose chë luarentše oyenënga jáyënjanama jobenayama.

<sup>32</sup> Atše sentsobena bangbiana más jóyebuambayama, Bëngbe Bëtsábeñe ošbuáchiyëngbiana, pero luare šattsëshbe chchangbiana jóyebuambayama, mo Gedeoncá, Barac, Sansón, Jefté, David, Samuel y Bëngbe Bëtsabe juabna oyebuambayacá.

<sup>33</sup> Chënga Bëngbe Bëtsábeñe imojanošbuachéyeca ínÿengbe mandadëngbe entsángbioye tmojanayëñaná, bëtscá imojánama nÿetsca entsángaftaca ntšamo tšabá yomncá jtsamama y nÿetscanga cachcá chamotsámanama, ndayá Bëngbe Bëtsá chënga tojanašebuachenacá tmojanóyëngacñe; y Bëngbe Bëtsá tojanma chënga leóngaca imojtsemna ora, chënga chamuatenáyebengoma, chentšana báseftangbioye ndocá chamondámama.

<sup>34</sup> Ošbuáchiyana bómnyeyeca, Bëngbe Bëtsá tojanma lempe chaotsefsanama, chëngbioye íñeshiñe tmojanacjá ora, chënga ndocá chamondëpasama; tmojanotsbocá espadéjaca jobanámentšana; ya tondaye añemo béntsebomna ora, Bëngbe Bëtsá tojanma bëts obenana y puerte añemo chamotsebomnama; tmojánashjache bëts obenana jtsebomnama ínÿenga jáyënjanama, chëngaftaca imojtsentsjaná ora; y tmojanobená ínÿe mandadënga y chëngbe soldadënga jáyënjanama, chamotsachetama jamëse.

<sup>35</sup> Ošbuáchiyana bómnyeyeca, básefta shembásenga chëngbe óbana pamíllangbioye cachiñe ainënga tmojtananÿe, chënga ainënga chamotsatsmënama Bëngbe Bëtsá tojanma ora.

Ošbuáchiyana bómnyeyeca, ínÿenga tmojanma básefta ošbuáchiyënga, puerte chamofufirima, y jobanámnaca; er chënga más tmojánbošena jashjáchana chë nÿetsca tescama yomna tšabe vida jtsebomnana, y ndoñe nÿe chë jótsbocana batšatema más vida jtsebomnana.

<sup>36</sup> Ošbuáchiyana bómnyeyeca, ínÿenga corente tmojansufrí, ínÿenga chëngbioye tmojanoyánguango ora y tmojanatsetšená ora; y ínÿenga tmojansufrí y cárceloje cadenéjuangaca utámenënga joquédamnaca.

<sup>37</sup> Inÿengbioye ndëtsbéngaca tmojtsanatëchënganja, serruchëshhaca tmojtsanëjácacaye, espadéjaca tmojtsanëbaye. Inÿenga imojánajna cánÿentsana ínÿecnoye nÿe oveshá y chivëbe bobáchecha uichëtjonënga, ujabótënga, ainana tsetšanënga, y ínÿengbeyeca mocá borlánënga.

<sup>38</sup> Chë nÿe quem luarama enójuabnayënga ndoñe monjanomerecena chënga mëngaftaca jtsiyenama, chënga chë vida imojábomna cánÿentsana ínÿecnoye aniñe, entsanga ndoyena luarënguenache, tjañenache, fshantsiñe atëbëfjniñe y cuevëshënguiñe.

<sup>39</sup> Nÿetsca quem entsanga, ndëmuanÿengbiana muentše tmonjoyebuambá, Bëngbe Bëtsá tšabá chëngbiana tojánayana, ošbuáchiyana imojánbomna ca; pero ni canÿa chënguentšá tonjanóyëngacñe, ndayá Bëngbe Bëtsá chëngbe entsanga jatšatayama tojanašebuachenacá, nÿetsca tescama jtsebomnana.

<sup>40</sup> Bëngbe Bëtsá, bëngbeñe jtsejuabnayëse, tojanjuabó canÿe más tšabe soye bëngbiana jamama, chca, Bëngbe Bëtsá canÿe ora jamama, bënga nÿetscanga, chënga y bënga chamotsemnama lempe ntšamo Bëngbe Bëtsá yobošcá, ntšamo Bëngbe Bëtsá tojanašebuachenacá jóyëngacñëse.

## 12

### *Bënga mochtsejuabnaye ndayá Jesús tojanmama*

<sup>1</sup> Chíyeca, bënga mochtsejuabnaye ba entsangbiana, chë bëngbiana más natsana imojaniyenënga, ndëmuanÿenga puerte tšabá bënga jtsinÿanÿnayana ntšamo ndegombre yomnana Bëngbe Bëtsábeñe ošbuáchiyana jtsebomnana, mo chënga ndayá bënga tmojtsamama cuaftsonÿangcá. Chcasna, mo chë tmochamanëngcá, ínÿengaftaca jenëyënjanama, chë jashjanguama tojtsemna luaroye natsana jashjanguama, chënga jotjajuamna, chë chorscama nduaserverna entsayá jtsenátsejcana, y lempe ndayá tojt-sama más uenana chamotjajuama soyëngnaca jtsenójacana; bëngnaca cachcá, ndoñe

matjaleséncia bënga Crístbioye ndoñe tšabá ndëtsosevénama, ni chë bacna soyënga jamama juabnënga, chë bëngbioye paselo jáyëñjanama juabnënga cachcá chamotsamama. Chamna, šontsamna sempre Bëngbe Bëtsá jtseservénana, puerte uantadënga jtsemnëse masque padecena soyënguiñe tmoyena, bënga chamobená chë trabajo jamama, chë ndayama Bëngbe Bëtsá šojáchembo.

<sup>2</sup> Jesusbiamama mochtsejuabnaye, nda šuebënatsana bënga ošbuáchiyana chamotse-bomnana, y šuinýanýná ntšamo nyëts tempo nyëtsca soyënguiñe Bëngbe Bëtsábeñe jtsošbuáchiyama. Cha chë cruzoca jóbanama sufrinana lempe tojanoboyá, er cha yojanobátmana chë chentšana yochtsanbomna bëts oyejuayánama; y yojanjuabná, chë más bacá uamana entšangcá jóbanana, chabiamama ndoñe canýe uámana soye yonjamna ca; y chentšana chë uámana puestentše tojtánótbema, Bëngbe Bëtsabe catšbioica, jtsemándayama.

<sup>3</sup> Chíyeca, šmochtsejuabnaye ntšamo Jesús Bëngbe Bëtsábeñe jtsobátmanëse, puerte uantado yojamnama, chë bacna soye amënga corente chabe contra imojtsemna ora. Chca chábeñe šmochtsejuabnaye, tšëngaftanga Crístbiamama oservéniñe ndoñe chacmondëumantšema, ni ainaniñe añemo jtsebomnana ndoñe chašmondájbanama.

<sup>4</sup> Tšëngaftanga padecena soyënguiñe šmojachnëngo, entšanga bacna soyënga imojtsama causa, pero mëntscoñama ndoñe cmontsamna jóbanama, Crístbe soyëngama enojuerzániñe;

<sup>5</sup> y tcmojtsébnëtjomba ndayá Bëngbe Bëtsá tšëngaftangbioye, chabe básenga quetsomñecá tcmojábuaenama. Chë Bëngbe Bëtsabe uabemana palabrënguiñe mëntšá endayana: Atšbe uaquiñá, Bëngbe Utabná aca jábuayenama tojtseboše ora, aca jasúfriase y padecena soyënga jauántase,

chora ndoñe catjátsjuabnaye chiñe mo canýe nduámana soye cuaftsemncá; y cha chacmojuácacana ora, ndoñe cattsajbaná ainaniñe añemo jtsebomnana.

<sup>6</sup> Er Bëngbe Utabná jábuayenana nda cha tbobobonshanábioye, y jacastígana chë mo chabe uaquiñacá tbojofjábioye ca –chiñe endayana.

<sup>7</sup> Padecena soyënguiñe chašmojtseufrina ora, šmochtsejuabnaye chë soye yojtsemna tšëngaftangbioye jábuayenama, y chca, Bëngbe Bëtsá tšëngaftangta jtsamana mo chabe básenga quetsomñecá. ¿Nderado nántsemna canýe uaquiñá, y chábioye chabe taitá ndocna te buanjuácacana, más tšabá chaotsamama?

<sup>8</sup> Nderado Bëngbe Bëtsá tšëngaftanga ndoñe tcmonjabuayená, ntšamo nyëtsca chabe básengaftaca cha endbetsamcá, as tšëngaftanga ndoñe ntsemnana ndegombre chabe básenga.

<sup>9</sup> Y bënga básenga monjamna ora, bëngbe bëtsétsanga quem luarentše monjanamana bënga jácastigana, y bënga chëngbioye ndoñe stëtsoye ntjaquédana. Y mora, bënga más šontsamna, jtsobedecénana y más bëts respeto jtsebomnana celoca Bëngbe Taitabiamama, nda tojama entšanga espíritu chamotsebomnana, y chca, bënga tšabe vida chamotsebomnana.

<sup>10</sup> Bëngbe bëtsétsanga quem luarentše, nýe básefta tescama, bënga jëftsabuayiynayana, y chca jamana chënga tšabá tojtsinýana ora; pero Bëngbe Bëtsá bënga šojtsabuayiyná ora, siempre chca jtsamana bëngbe tšabiamama, bënga chabe entšanga jábiamama, cachacá puerte tšábenga, ntšamo cha nyëts tempo yomncá.

<sup>11</sup> Siempre bënga ndaye castigo tmojtsebomna ora, chora bënga chama ndoñe oyejuayënga ntsemnana, pero aiñe cochtsetšenánënga. Pero bënga chë castigüentšana tmojuatsjinýe ndayá Bëngbe Bëtsá chë sóyeca tbojtsabuayiynacá, as chentšana jóbocnana natjëmbana oyenana, nyëtsca soyënguiñe ntšamo tšabá yomncá jtsamëse.

*Bëngbe Bëtsábioye jtsabotena, entšangbiamama ndoñe tšabá ntsemnana.*

<sup>12</sup> Mo nda puerte uamëntšnayacá, jatrabájama tondaye añemo ntjtsebomncá, tsátšena buacuatsëngaca y puerte uamëntšena ntsamiašëngaca, tšëngaftangbentše báseftanga ya

uamëntšnayënga šmojtsemna Bëngbe Utabnabiamama trabájayiñe, y ainaniñe ndoñe añemo šmontsebmoma. Cachiñe bëts añemo šmochtishache, y Bëngbe Bëtsabe obenana cachiñe šmochtsatsbmoma.

<sup>13</sup> Mo chë canye benache tšabá y ndericho chaotsemnama tmojtsemëngcá, chca, chë coshetënga chiñe jama chamotsobenama y más tšabá jtsatanama chamuatatsjinyama, y chë benachentsana ndoñe chamondëtsebocanama; cachcá tšëngaftanga, chë bëtscá ošbuáchiyana y Cristo jaserviama corente añemo šmobomnënga, chë nye batsatema ošbuáchiyana y chca jatrabájama nye tondaye añemo ndbomnënga šmochjújabuache; chë soye šmochjama, ntšamo Cristo tšabá jaserviama yomncá jinyanjyeyese, y ntjalesenciaca ndocna soye chaotsama chë tšabe benachentsana tšëngaftanga chašmotsojuánañama.

<sup>14</sup> Lempe ntšamo chašmojobenacá šmochjama nyetscángaftaca natjëmbana jtsiyenama, y ntšamo Bëngbe Bëtsabe entšanga mondbetsamcá jtsamëse chašmotsiyenama, cha jtseservënëse; er chca ntjamcá, canya ndoñe ntsoobenana Bëngbe Utabnábioye jinyama.

<sup>15</sup> Yejuana šmochtsantješna, ndocná Crístbeñe ošbuáchiyana chaondëtsajbanama, y chca, chë Bëngbe Bëtsá chabe entšángbioye yochjatsataye tšabe soyënga chënga ndoñe chamondashjache. Smochtsantješna, tšëngaftanguentše ndocná chaondëtsemna, mo canye untja tbëtëjca, chë chcaja sayëngbioye jásocayana, nda chaotsama, ingyenga natjëmbana ainana ndoñe chamondëtsebmoma y bacna soyënga jtsamëse chamotsiyenama.

<sup>16</sup> Yejuana šmochtsantješna ndocná tšëngaftanguentše shembása o boyabásaftaca bacna soye amá chaondëtsemnama, ni canya ndabiamama Bëngbe Bëtsabe soyënga tondaye chaondëtsámana. Esaú chca tojanma, chë lempe yochjanashjachcá, mayor uaquiñá bëtsemnama, chabe uabentsábioye canye šcena sanama tbojtaname ora.

<sup>17</sup> Y tšëngaftanga šmondëtatšëmbo, chca tojanopasá chentsana, Esaú tojánbošena chabe taitá Bëngbe Bëtsábioye chaboimpadama, chabiamama tšabe bendicionënga chao-mama, chë mayor uaquiñá bëtsemnama yojanobena jtsebmoma soyënga; pero chora chabe taitá ndoñe tbonjanoyeuná, er masque Esaú chora juabna tojantrocá, cha ndoñe tonjanobená ntšamo yojtsopasancá jëtsjandmanana. Masque cha tša tojánbošena, shëchbuíyeca chabe taitábioye jaimpádase, ya ndoñe yontsopodena ntšamo tojanopasacá jëtsjandmanana.

<sup>18</sup> Tšëngaftanga ndoñe chešmatobeconá, mo chë entšanga Israeloca Sinaí ca uabaina tjoye tmojanobeconacá, ndayá chënga imojobena jabojuama, y íñesheca yojtsángbototjuana, tondaye binyniñe luare, tša ibetiñe y puerte jabuache binjyëngaca;

<sup>19</sup> ni chešmatuena chëngcá, canye trompetëfjua uajatëtanana, ni Bëngbe Bëtsabe oye-buambnayana. Chë oyebuambnayana tmojanuenënga, imojtseimpadana ndoñe más chëngbioye chaondëtsóyebuambnama.

<sup>20</sup> Chca tmojanma, jauántama ndoñe tmonjanobená causa, ntšamo Bëngbe Bëtsá tojanamëndacá: “Nda quem tjoca chaojoyená, masque canye bayá chaotsomñe, entsemna chana ndëtšbéngaca chamotsatëchënjanga jtsóbama ca.”

<sup>21</sup> Ndegombre, ntšamo tmojaninycá tša uabouana yojtsemna, cach Moisésnaca mëntšá tojánayana: “Tša šontsengmëmná auatjananá sëntsemna causa ca.”

<sup>22</sup> Pero tšëngaftanga Bëngbe Bëtsábioye šmojobeconá, y chca endmëna mo tšëngaftanga canye Sión ca uabaina tjoye celoca cuafjobeconacá, chë Bëngbe Bëtsá nyets tempo vida bomnabe bëts puebloye, mo celoca Jerusalén cuenta; y ba uaranga angelëngbioye šmojobeconá, cányiñe oyejuayënga enefjuanënga imojtsemnëngbioye, Bëngbe Bëtsá jt-satschuanayama.

<sup>23</sup> Endmëna mo tšëngaftanga chë Bëngbe Bëtsabe entšángbioye cuafjobeconangcá, chentše enefjuanënga mo Bëngbe Bëtsabe basengcá, chënga ndayá chë Taitá tojašebuachenacá jýëngacñama, ndëmuanyënga Bëngbe Bëtsá chabe librëšañe tojúbiamama.

Tšëngaftanga šmojobeconá Bëngbe Bëtsábioye, ntšamo nyetsca entsanga tmojamcá tšabá o ndoñe tšabá bétsemnama yochjayanábioye. Endmëna mo tšëngaftanga cuaftjobeconacá, chë entsanga mora ya obanënga y ntšamo tšabá yomncá jtsamëse imojëftsiyenëngbe espiritëngbioye, chë entsanga ndëmuanÿengbiama Bëngbe Bëtsá tojanma chamotsemnama lempe ntšamo chabe entsangbiama yojanjuabnacá, chca, cháftaca sempre vida jëftsebomnama.

<sup>24</sup> Tšëngaftanga Jesúsbioye šmojobeconá, chë jóbanëse, entsanga Bëngbe Bëtsáftaca mo canÿacá chamotsemnama tojanmá, ntšamo Bëngbe Bëtsabe tsëm trato yojamncá; y endmëna mo chë bëngbiama cha tojanóbana ora tojanábuashana buiñoye tšëngaftanga cuaftjobeconacá; chca tojanábuashana, bëngbioye Bëngbe Bëtsabe delante mo tšabengcá jábiamama, mo ntšamo entsángbeñe buiñe jabuéscacjama chë bachnanga imojuamancá. Caín chabe catšata Abélbioye tbojanóba ora, yojamna mo chë Abelbe uabuáshanana buiñe Bëngbe Bëtsábioye cuaftseimpadancá, chë bacna soyama castigo chaotsemnama; pero Jesucristbe buiñe ndoñe chca ntsamana, ndayá chíyeca bënga más tšabe soyënga jashjáchana; Jesusbe buiñeca, bënga montsobena atsebácanënga jtsemnama.

<sup>25</sup> Cuedado smochtsebomna, bëngbioye tojtsoyebuambná ora cha joyeunayama. Chë Israeloca entsanga ndoñe tmonjánbošena Bëngbe Bëtsá joyeunayama, chë Sinaí tjoca quem luarentše tojanabuayená ora; chëngbioye cha tojanacastigá. Y mora más, Bëngbe Bëtsá, chë celocana bënga abuayiynayá, ndoñe cachcá ndëcastigánënga quešochátabashejuana, ntšamo cha šojtsëtsëtnacá ndoñe tmontseyeunanëse.

<sup>26</sup> Bëngbe Bëtsá Sinaí tjoca chë entsángbioye tojanoyebuambá ora, chabe oyebuambnayanaca tojanma quem luare chauangmëmanama, pero mora cha chabe uabemana palabrënguiñe tojašebuachená: “Atše cachiñe chanjatsma chauangmëmanama, ndoñe nÿe quem luare, sinó celócnaca ca.”

<sup>27</sup> Bëngbe Bëtsá “cachiñe ca” tojánayana ora, chë sóyeca yojsichamo, chë ndayté lempe chaongmëmanama cha cachiñe yochjama ora, chë quem luarentše tmojama soyënga y chë jatrócama yopodena soyënga yochtsejuána ca, chca, nÿe chë nyetsca tescama yomna soyënga y ndoñe jatrócama soyënga chaoquedama.

<sup>28</sup> Chcasna, Bëngbe Bëtsabe amëndayoca, chë cha yochjama bënga chamuamashënguama luare, yomna cachcá nyetsca tescama y ndocna te ntjotrócana. Bëngbe Bëtsá chama mochjëtschuaye, y ntšamo cha tšabá tbojtsinÿancá mochtsadorana, chabiamama bëts respeto jtsebomnëse, y nyetscangbiama más bëtsá cha yomnama jtsejuabnayëse.

<sup>29</sup> Er Bëngbe Bëtsá puerte etonaná chë chabiamama nduauenanënga jabuache echanjácastigaye, y chca, cha jtsemnana mo canÿe íñeshe lempe jtsepochoacamcá.

## 13

### *Ntšamo jtsiyenama, Bëngbe Bëtsá oyejuayá bëngaftaca chaotsemnama*

<sup>1</sup> Sempre nyetscanga smochtsenbobonshana, Jesucristbeyeca catšátanga quetsomñecá.

<sup>2</sup> Sempre tšabá chë tšëngaftangbe yebnoye inÿe luarëngocana tmojáshjajnënga smochjúbuaja, er chca jamëse, ntsetatšëmbcá báseftangna angelënga chëngbe yebnentše tmojanëbuaja.

<sup>3</sup> Chë utámenëngbiama sempre smochtsenójuabnaye, mo tšëngaftángnaca chëngaftaca utámenënga cuaftsemncá. Chë ínÿenga tmojtsama chamotsesufrinëngbiama smochtsenójuabnaye, er tšëngaftángnaca nderado cachcá šmatjatspása.

<sup>4</sup> Boyabása y shembása tbojanobouamá ora, ntšamo tbojanenšbuachenacá nyetscanga chamotserrespectana; y chë útata chabotsama nÿe ndayá y nÿe ntšamo Bëngbe Bëtsá bouamnátbioye tojanamëndacá, er Bëngbe Bëtsá echanjácastigaye chë shembása o boyabásaftaca bacna soye amënga, y chë shema o boyábioye ínÿaftaca ingñayëngnaca.



<sup>5</sup> Ndoñe šmattsiyena jtsejuabnayëse nÿe mallajta crocénana jëftsebomnama. Nÿe chë šmobomna soyëngaca oyejuayënga šmochtsomñe, er Bëngbe Bëtsá tojánayana: “Ndocna te cachcá quebochatonÿaye, ni canÿa quebocháiseboshjona ca.”

<sup>6</sup> Y chca, bënga montsobena corente añémoca jayanama:

Bëngbe Utabná endmëna nda atše šonduájabuachana; tondayama quichátauatja.

¿Ndayá canÿe entšá nanjobenaye átšeftaca jamama ca?

<sup>7</sup> Tšëngaftangbe amëndayëngbiama, chë Bëngbe Bëtsabe buayenana soyënga tcmojábuatambangiama, sempre šmochtsenójuabnaye. Sempre šmochtsenójuabnaye chë ntšamo chënga imojaniyentšana tojanóbocna tšabe soyëngama, y šmochtsiyena jtsamëse ntšamo chënga imojanamcá, Jesucristbeñe ošbuáchiyënga bëtsemnama.

<sup>8</sup> Jesucristo cachá nÿets tempo iuëtsemna, tempo, mora y nÿetsca tescama.

<sup>9</sup> Ndoñe šmatjaleséncia ínÿenga chamotsamama tšëngaftanga chë benachentšana chašmotsojuánañama, ndayá chënga tmojtsabuátambama, y chë Cristo tojánabuatambama contra soyëngaca. Más tšabá endmëna bënga ainaniñe añemo jtsebomnana, Bëngbe Bëtsá tšabe juabna bëngbiama yobómnyeca, y ndoñe chë sanama, chë ndayá aiñe o ndoñe šontsamna jtsesayana soyëngama mandënga tcojtsamëse. Chca mandënga ndocna te chë Israeloca entšangiama tempo tonjanoservé.

<sup>10</sup> Bënga chë Jesucristbeñe mondošbuáchenga, canÿe soye mondbomna mo chë Bëngbe Bëtsábioye jëtschuayama altaroca juinÿena soycá, bacna soyëngama perdonánënga jtsemnama. Bënga mondbomna chë Jesucristo bëngbiama tojanma soye, cruzoca tojanóbana ora, bëngbe bacna soyëngama; y chë nÿe tmojóba bayëngaca soyënga tmojtsama bachnanga ndoñe ntsebomnana, chë Cristo tojanóbana ora, ndayá tojanmentšana tojanóbocna tšabe soyënga.

<sup>11</sup> Er chë judiëngbe más uámana bachnangbe amëndayá, chë tmojóba bayëngbe buiñe chë “más uámana ca” uabaina luaroye juabuyambana, Bëngbe Bëtsá entšangbe bacna soyëngama cháuaperdonama, y chë bayëngbe cuerpënga jtsejuinÿiyana entšanga tmoyena luarentšana chaboca.

<sup>12</sup> Cachcá, Jesúsna tojansufrí y tojanóbana bëts pueblentšana chaboca, chabe buiñe tojanábuashana ora jóbanëse, entšanga Bëngbe Bëtsábënga chamotsemnama, y chabe delante mo tšabengcá chamotsemnama.

<sup>13</sup> Chíyeca bënga šontsamna Jesúsbioye jobéconana, nda entšanga tmojtsanaboté y bëts pueblentšana chaboca tojanóbana. Cha mochjuasto, y ntšamo cha tojansufricá bëngnaca mochjasúfria.

<sup>14</sup> Er quem luarentše bënga ndoñe quemátsbomna canÿe bëts pueblo bëngbiama, nÿets tempo chausomñe bëts pueblo, ndayá bëngna tša mondboše y puerte mondobátmana bënga joyéanama chë celoca yochtsemna Bëngbe Bëtsabe bëts pueblentše.

<sup>15</sup> Chíyeca, šontsamna sempre Bëngbe Bëtsábioye jtsatschuanayana, Jesucristbiajana. Bëngbe Bëtsá chca tmojtsadorana ora, jtsemnana mo chábioye jëtschuayama canÿe soye cuafjuatšëmboncá. Chcasna, jtsóyebuambnayëse cha mochtsadorana.

<sup>16</sup> Sempre ntšamo tšabá yomncá šmochtsama, y chë šmobomncá inÿengbiámnaca chaotsemna. Chca šmochtsama, er chca tcojama ora, Bëngbe Bëtsá oyejuayá jtsejuabnayana chca chabiama tcojama ca, y jtsinÿnana bënga Bëngbe Bëtsá imojtsatschuanama, ndayá cha tojamama.

<sup>17</sup> Sempre šmochtsama ntšamo chë tšëngaftanga ošbuachiyëngcá enefjuanëngbeñe amëndayënga tmojayancá, y sempre šmochtsiyena jtsamëse nÿe ntšamo chënga tmojtsebošcá. Chënga sempre tšëngaftangbioye jtsanÿenana, tšëngaftangbe tšabiama, ntšamo cmojánanÿenama Bëngbe Bëtsábioye jojuama yojtsamnama chënga jtsetatšëmbëse. Jtsayaunanëse, šmochjama chënga chëngbe trabajo oyejuayánaca y ndoñe ngménaca chamotsamama, er ndoñe chca šmonjamëse, chë trabajo tšëngaftangbe tšabiama ndoñe nántsemna.

<sup>18</sup> Bëngbe Bëtsá bëngbiana šmochtseimpadana, er bënga ainaniñe corente fsëndëtatšëmbo tšabá tifjamama, y tša fsëntseboše jtsiyenana ntšamo tšabá yomncá lempe jtsamëse.

<sup>19</sup> Tsëngaftanga bëtsá cbontsaimpadana, Bëngbe Bëtsá chašmoimpadama, atše chašolesenciama tsëngaftangaftaca cachiñe jtsatsmënama.

*Bëngbe Bëtsábioye chëngbiana jaimpádama y chënga jacheuayama*

<sup>20</sup> Atše, Bëngbe Bëtsá sëntseimpadana, cha chë nda endbétsama bënga natjëmbana chamotsiyenama, y nda tojanma Bëngbe Utabná Jesús cháuatayenama, nda bënga šondányena mo oveshëngbe tšabe abujënyáca; y Bëngbe Bëtsá chca tojanma, Jesús, chabe buiñe juabuáshanëse tojanóbanayeca, chca, entsanga jinýanýiyama ndegombre bëtsemnama ntšamo Bëngbe Bëtsá chabe entsangbiana tojanašebuachenacá nyetsca tescama jamama.

<sup>21</sup> Cha sëntseimpadana chaoma tsëngaftanga chašmotsebomnama nyetsca tšabe soyënga ntšamo cmojtsëjabotcá, chca, lempe ntšamo cha yobošcá tsëngaftanga chašmotsamama; y cha Jesucrísoftaca chaboma bëngaftaca ntšamo cha tšabá tbojtsinýancá. ¡Nyetscanga nyetsca tescama Cristo chamotsatschuaná! Chca chaotsemna.

<sup>22</sup> Jesucrístbeyeca catšátanga, tsëngaftanga cbontsaimpadana, jábuayenama ntšamo tcbonjauyancá, puerte uantádoca tšabá chašmóyëngacñama, er nye básefta palabréngaca chama tcbonjubuábiana.

<sup>23</sup> Atše sëntseboše tsëngaftanga chašmotsetátšëmbo, Timoteo Jesucrístbeyeca bëngbe catšata, ya ndoñe utamená yontsemnama, y cha betsko átšbioye chaojtabëse, átšeftaca chanjëftsbetše tsëngaftanga jányama chajjá ora.

<sup>24</sup> Tsëngaftanga ošbuachiyëngbeñe nyetsca amëndayënga šmochjácheuaye, y nyetsca Bëngbe Bëtsabe entságnaca choca. Chë Italia luaroquënga ošbuachiyënga tsëngaftanga cmontsacheuaná.

<sup>25</sup> Atše, Bëngbe Bëtsá sëntseimpadana, cha chaoma tšabe bendicionënga tsëngaftangbeñe chaotsemnama.

## Santiago

### *Jacheuayama*

<sup>1</sup> Atše Santiago, Bëngbe Bëtsá y Bëngbe Utabná Jesucristbe canye oservená, tšëngaftanga cbontsëbuabiamná, tšëngaftanga chë bnëtsana uta Israeloca bëts pamíllangbioye nyëts luarëjana ujquëshenënga. Atše cbontsacheuaná.

### *Chë Bëngbe Bëtsábiocana osertánana*

<sup>2</sup> Jesucristbeyeca atšbe catsátanga, tšëngaftanga ndaye padecena soyënguiñe chašmojtsiyena ora, chiñe šmochjájuaoye mo chca tšëngaftangbe tšabiana cuaftsemncá y šmochjóyejuaye;

<sup>3</sup> er tšëngaftanga šmondëtatšëmbo, chcañe chašmojtsajna ora, šmochtsetátšëmbo cach tšëngaftanga Jesucristbeñe puerte šmošbuaché o ndoñe. Chca ora bëts ošbuáchiyana chašmojtsebomñese, šmochanjobenaye, Bëngbe Bëtsábeñe jtsobátmanëse añémoca jtsemnana, masque padecena soyënguiñe chašmotsomñese.

<sup>4</sup> Pero chca chašmojtsemñese, šmochtsentsena jashjáchama ntšamo canye entšá Bëngbe Bëtsabe soyëngama corente osertaná yomncá chašmotsemnana, ntšamo Bëngbe Bëtsá yobošcá chašmotsiyenama, chiñe ni mo canye soye jamama chacmondëtsabuashebenëse.

<sup>5</sup> Nderado nda tšëngaftanguentšana ndoñe tontsobena corente osertánana jtsebomnana, cha bontsemna Bëngbe Bëtsá jaimpádana cha chaoma aíñe chana jtsebomnana, y Bëngbe Bëtsá chana bochanjátsetaye; er Bëngbe Bëtsá nyëtscanga bëtscá endbëtsatsatnaye y ndocnábioye jatáboyënjana.

<sup>6</sup> Pero cha bontsemna, Bëngbe Bëtsábeñe puerte jtsošbuáchiyëse chama cha jaimpádana, y cha nderado ndoñe bochanjóyeunayama ntjatatëmnancá. Nda mëntšá tojtsamëse, inye ora aíñe Bëngbe Bëtsábeñe cuaftsošbuachecá y inye ora ndoñe, cha entsemna mo canye olëshcá, mar béjayoca binýia nye cáatoye jtsambayana.

<sup>7</sup> Chca ama entšá ndoñe chaondëtsejuabná, Bëngbe Utabnábentšana ndayánaca jatóyëngacñama.

<sup>8</sup> Cha jtsemnana canye entšá, mora canye soye juabnayá, pero chentšana inyëtsá jatójuabnañana. Chca, cha jtsiyenana nyëtsca soyëngama uta soye jtsejuabnayëse, y chca cha ndoñe ntsobenana tondaye puerte tšabá jamama.

<sup>9</sup> Chë Jesucristbeñe ošbuachiyá, ndbomñëjema y ndoñe yapa uámana entšá tomná, corente oyejuayá chaotsemna, er Bëngbe Bëtsabe bominyiñe cha canye uámana entšá jtsemnana;

<sup>10</sup> y chë bomnánaca puerte oyejuayá chaotsemna, Bëngbe Bëtsá chábioye nduámana entšá chabojábema ora, er mo chë shacuaníñe uantšëfjushacá, cha ndoñe nyëts tempo quem luarentše ntjëftsiyenana.

<sup>11</sup> Shinye tojábocna y becá tojojënyana ora, chë shácuana jtsebuashana, chë uantšëfjúsha jtsátsatšana y chabe uabótamanana ya ndoñe más ntsebínynana. Cachcá chë bomná, echanjóbana nye cachabiana más becá crocénana onguayíñe chaojtsemna ora.

### *Bacna soye ocochënguentšana tšabá jabocnana*

<sup>12</sup> Oyejuayá chaotsemna chë entšá chë padecena soyënguentšana tšabá tojëtsbocná, cabá Jesucristbeñe ošbuachiyá; chama Bëngbe Bëtsá chabiana oyejuayá echántsemna y echanjama chë nyëtsca tescama yomna tšabe vida cha chaotsebomnana, mo uacananancá chabe ošbuáchiyama. Chë soye Bëngbe Bëtsá tojašebuachená nyëtscanga cha imobobonshánëngbioye.

<sup>13</sup> Nderado nda bacna soye jamama tbojócochëngo, ndoñe chaondëtsejuabná Bëngbe Bëtsá chca cháftaca yojtsama ca; er Bëngbe Bëtsá ndocna te bacna soye jamama jócochënguana, y cha ndoñe ntsamana ínÿenga bacna soye jamama chaócochënguama.

<sup>14</sup> Inÿetšá endmëna, canÿa bacna soye jamama jócochënguana, bacna juabnënga tojtse-bomna ora; cha chiñe nÿe jésejuabnayana y chë soye jtsasjayana cha chca jamama.

<sup>15</sup> Nda yapa bacna soyënga tojtseboše, cabana cha pronto chë bacna soye jamana; y nda sempre bacna soyënga tojtsama, chama Bëngbe Bëtsá nÿetsca tescama bochanja-castíga.

<sup>16</sup> Atšbe bonshana catsátanga, ndoñe matenoíngñana, jtsejuabnayëse Bëngbe Bëtsá yojtsama tšëngaftanga bacna soyënga chašmotsamama ca.

<sup>17</sup> Nÿetsca tšabe soyënga y chë puerte tšabe soyënga tsbanánocana endobá, Bëngbe Bëtsá chë Taitábocana. Y cha chë shinÿe, juashcona, y nÿetsca chë celoca yobuashinÿinÿana soyënga tojamá, nÿets tempo nÿe cachá iuesomñe y ndoñe inÿa ntjátsmënana.

<sup>18</sup> Cachá jamama tojánbošenayeca, bënga chábenga šojánabiama, bënga chabe ndegom-bre palabrenga jouenëse. Cha chca tojama, lempe ntšamo Bëngbe Bëtsá quem luarentše tojamentšana, bënga chë natsanënga chábenga chamotsemnana.

### *Ntšamo ndegombre yomna Bëngbe Bëtsábioye tšabá jadórama*

<sup>19</sup> Atšbe bonshana catsátanga, quem soyama šmochtsenójuabnaye: nÿetsca tšëngaftanga cmontsamna sempre jtseprontánana jouenama; pero jóyebuambayamna jobátmana y ínÿengaftaca jetnámna.

<sup>20</sup> Inÿaftaca tbojetna ora, canÿe entšá ndoñe ntsamana ntšamo Bëngbe Bëtsá yobošcá, chë nÿetsca soyënguiñe tšabá jtsamana.

<sup>21</sup> Chcasna, šmochtsajbaná bacna soyënga jtsamëse oyenana, y amana nÿetsca soyënga ndoñe ntšamo Bëngbe Bëtsá yomandacá; y chë Bëngbe Bëtsá tojama tšëngaftangbe ainaniñe chaómashënguama buayenánana, ntjatosoberbnaycá šmochjóyëngacñe. Chë buayenánana chašmojóyeunase, echanjopódia tšëngaftanga atsebácanënga jtsemnana.

<sup>22</sup> Ndoñe quecmátamna nÿe chë Bëngbe Bëtsabe buayenánana jouenana, ndayá ntšamo cha tojayancá aíñe jtsamana; ndoñe chca šmontsamëse, cach tšëngaftanga šmontsenoíngña.

<sup>23</sup> Nda nÿe chë buayenánana tojouena, pero betesco tbojtsebnatjëmbe y ndoñe tontsama ntšamo chiñe tojtsayancá, cha jtsemnana mo canÿe entšá chabe jubiá espejuiñe tojt-senonÿacá:

<sup>24</sup> chana cachá jtsenónÿayana, pero chë espejo tojabuertaná ora, jtsebnatjëmbana ntšamo cha bëtsemnana.

<sup>25</sup> Pero nda ntšamo tojouencá ndoñe tbonjebnatjëmbe, y sempre tojtsejuabná chë entšanga játsebacama Bëngbe Bëtsabe puerte tšabe mando chabosertama, y tojtsiyena ntšamo chë mandënguentše endayancá, lempe ntšamo chë entšá chaojtsamiñe oyejuayá Bëngbe Bëtsá bochanjábema.

<sup>26</sup> Nderado nda tojtsejuabná Bëngbe Bëtsábioye ibojtsadorana ca y chë Bëngbe Bëtsábioye adorayá ntšamo ibomncá cha yojtsama ca, pero ndoñe tontsobena bacna soye oyebuambnayana jtsajbanana, cachá yojtsenoíngña, y nÿetsca soyënga ntšamo tojtsamcá Bëngbe Bëtsá jadórama, chabiama tondaye ntsámanana.

<sup>27</sup> Bëngbe Bëtsá chë Taitabe bominÿiñe, chë puerte tšabe y ndegombre soyënga, ndayá entšá ibojtsemna jamana endmëna: chë uajchonga y viudanga corente ngmënënga tmojtsemna ora jujabuáchana, y ndoñe bacna soyënga játamana, mo chë nÿe quem luarama enójuabnayënga mondbetsamcá.

## 2

<sup>1</sup> Tšëngaftanga, Jesucristbeyeca atšbe catsátanga, šmondošbuaché Bëngbe Utabná Jesucristo, chë puerte bëtsá y uamanábeñe; chíyeca tšëngaftanga cmontsamna nyetsca entsanga cachcá jtsatenonyayëngana.

<sup>2-3</sup> Nderado tšëngaftanga cánÿentšë šmojënefjna, y chora canÿe bomna entsá tojáshjango castellano ntšabuchëtjonëfjangaca y uámana entsáyëjuangaca bopormaná, cha botamana šmojúmashëngo y mëntšá šmojayuana: “Moca quëfseroca mabesótbema ca”. Pero cachca ora, canÿe ndbomnjëjema tojáshjango uandocuenta entsáyá uichëtjoná, y cha šmojayuana: “Acna choca tsanana cochtsemna o chafjoca mótbema ca”.

<sup>4</sup> Chca tšëngaftanga ya šmontsama cach tšëngaftanguentšë báseftanga más uámanënga ínÿengbiana chamotsemnama, y chca šmojt sama, ana bacna juabnënga šmojtsebomna causa.

<sup>5</sup> Atšbe bonshana catsátanga, quem soye šmochjouena: Bëngbe Bëtsá quem luarentšë ndbomnënga imomnënga tojabacacá, chënga canÿe puerte uámana soye chamotsebomnama, Jesucristbeñe puerte chamotsošbuáchema; y mo otocana soyca Bëngbe Bëtsabe amëndayama chamosháchiñama. Cha imobobonshánëngbioye chë soye jatsatayama tojašebuachená;

<sup>6</sup> pero tšëngaftanga chë cuenta, mo ndoñe cach tšëngaftangcá entsanga bendmëncá chëngbioye jtsënyayana. Ndegombre, chë bomnënga mondmëna chë nÿe sempre cmondbétsamëndayënga y chë sjojonana chë pueblentsa mandadëngbioye cmondbánatsënga.

<sup>7</sup> Y cach bomnëngnaca mondmëna chë Cristbiana podescas oyebuambnayënga, ndábenga tšëngaftanga šmondmëna, y chabe uabaina tšëngaftangbiana puerte enduámana.

<sup>8</sup> Bëngbe Bëtsabe uabemana palabrenguiñe mëntšá endayana: “Ndëmua entsánaca cochtsebobonshana ntšamo cach aca cuenobobonshancá ca.” Tšëngaftanga ntšamo chë Bëngbe Utabnabe mandiñe endayancá ndegombre šmojt samëse, tšabá šmochántsama.

<sup>9</sup> Pero tšëngaftanga ndoñe cachcá šmontsenonÿase, chcana bacna soye jtsamana y šmojama ntšamo Bëngbe Bëtsabe leyënguiñe ndoñe yondëlesenciancá.

<sup>10</sup> Y mora, canÿe entsá nyetsca chë leyentsa mandënga tojtsobedecena, pero ndoñe tontsama ntšamo nÿe mo canÿe mando ntšamo iuayancá, cha Bëngbe Bëtsabiana jtsemnana canÿa ntšamo nyetsca chë leyentsa mandënguiñe ndoñe yondëlesenciancá amá.

<sup>11</sup> Cach Bëngbe Bëtsá, chë “acbe shema o boyábioye ínÿaftaca ndoñe cattseíngñaye ca” tojanayaná, cachá mëntšánaca tojánayana, “ínÿabioye ndoñe catjóba ca”. Chca, nda cachabe shëmbioye ínÿaftaca ndoñe tbonjaingñé, pero aiñe ínÿabioye tbojóba, chca, Bëngbe Bëtsabiana cha jtsemnana canÿa nyetsca chë leyentsa mandënga ndocumpliná.

<sup>12</sup> Tšëngaftanga cmontsamna jtsóyebuambnayana y jtsamana ndayá Cristo šojanamëndacá, atsebacana entsangcá, er Bëngbe Bëtsá echanjayana ntšamo tmojamcá aiñe o ndoñe tšabá bëtsemnama.

<sup>13</sup> Er chë ínÿengbiana ndoñe ngmënanana bomnëngbiana, Bëngbe Bëtsá ntjongmiacá echanjayana ntšamo tmojamcá aiñe o ndoñe tšabá bëtsemnama; pero chë ínÿengbiana aiñe ngmënanana bomnëngbiana, ntšamo tmojamcá aiñe o ndoñe tšabá bëtsemnama Bëngbe Bëtsá chaojayana ora, chënga tšabá chentšana mochanjábocana.

### *Chë ndegombre ošbuáchiyana, soyëngaca jinÿanyiyana*

<sup>14</sup> Atšbe catsátanga, ¿ndayama cánÿabioye buanjoservia jayanana aiñe Jesucristbeñe sëntsošbuaché ca, pero cha ínÿengbiana tšabe soyënga ndoñe tontsama, y chca, ntšamo cha tojtsamcá ndoñe tontsinÿanÿná cha Jesucristbeñe yošbuáchema? Ndegombre, cha nÿe chca tojtsichámëse, ndoñe ntšopodénana cha atsbocaná chaotsemnama.

<sup>15</sup> Nderado canÿe boyabása o shembása ošbuachiyá entsáyá tbojtsabuáshbena y saná chë te jasámnaca tbojtsebuáshbena,

16 y canya tšëngaftanguentšá tbojayana: “Diošoftá, sēsnama ndoñe chacondétsepadecena y beca chacuatoshachá ca”, pero chca chaotsemnama chábioye tondaye tbonjatšetase, ¿ndayama nantsoservena chca jayanana?

17 Cachcá, nda tojayana Jesucristbeñe yošbuaché ca, pero ndocna tšabe soyënga tontsama, chë ošbuáchiyana bomnama jinñanñiyama, nñe chca ošbuáchiyana jtsebomnana tondayama ntsoservénana.

18 Pero nderado ndánaca mēntšá echanjayana: “Aca Jesucristbeñe icošbuaché, pero atšna ínñengbiama tšabe soyënga sēntsama ca.” Chora atše stjojuá: “Sminñinñé ntšamo canya nantsobena Jesucristbeñe jtsošbuáchiyana, chca chaotsinñnama tondaye ntsamcá, y chora, ndayá tijamama atšbe ošbuáchiyana cbochjinñinñiye ca.”

19 Aca condošbuaché nñe canye Bëngbe Bëtsá yomnama y chca tšabá contsama; pero chë bacna bayëjēgnaca chiñe jtsošbuáchiyana, y chë causa chënga uatjana jtsebomnana y jtsangmēmñayana.

20 Ndoñe obējema cattsemna; ndegombre cbochanjinñinñiye nderado nda Jesucristbeñe tojtsošbuaché, pero tondaye tontsama chca chaotsinñnama, chabe ošbuáchiyana tondayama ntsoservénana.

21 Bëngbe Bëtsá tojánayana chabe bominñiñe Abraham, bëngbe tempsca bēts taitá, tšabia yojamna ca; chca tojánayana, er Bëngbe Bëtsá tbojanmandá ora, yojtseprontana chabe uaqiñá altariñe jóbama, cach Bëngbe Bëtsábioye jëtschuayama.

22 Aca contsobena Abrahámbeñe jinñama, cha Bëngbe Bëtsábeñe yojanošbuáchema, y soyënga yojánama chca chaotsinñnama; y ndayá cha tojanmama entsinñinñena, cha ndegombre puerte bētscá yojanošbuáchema.

23 Chca tojanopasá ntšamo Bëngbe Bëtsabe uabemana palabrënguiñe endayancá, mēntšá: “Abraham Bëngbe Bëtsábeñe yojtsošbuáchiye, y chama Bëngbe Bëtsá tojánayana chabe bominñiñe cha tšabia yojamna ca.” Y Abraham entsanabaina Bëngbe Bëtsabe amigo ca.

24 Y tšëngaftanga šmontsetátšēmo, Bëngbe Bëtsá ináyana canye entšá chabe bominñiñe tšabia yomna ca, chë entšá ndayá tojtšamama, chabe ošbuáchiyana chaotsinñnama, y ndoñe nñe ošbuáchiyana tojtsebomnana.

25 Cachcá tojanopasá Rahab, chë bacna vida bomna shembásaftaca; Bëngbe Bëtsá tojánayana chabe bominñiñe cha tšabia yojamna ca, er cha canye tšabe soye tojanma. Cha chë noticia uambaye judiënga posada tojanëyentsame, y chentšana tojanëjabuache inñe benachëjana chamuáisebocanama, chë pueblentša soldadëngbiama chamotsachetama.

26 Lempe básefta palabrënguiñe jayanamna mēntšá entsemna: ntšamo canye cuerpo, espíritu ndbomna cuerpo, pronto jóbana, cachcá chë ošbuáchiyana, ndocna soyëngaca tontsemna, chca chaotsinñnama, tondayama ntsoservénana.

### 3

#### *Bichtájaca tšabá jóyebuambayama endmēna*

1 Jesucristbeyeca atšbe catšátanga, ndoñe yapa buátëmbayënga tšëngaftangbeñe chamondétsemna; er tšëngaftanga ya šmondétatšēmo, bënga, chë entšanga abuatambayëngbiama, chë castigo más bētscá yochtsemnama, Bëngbe Bëtsá ndoñe tmonjóyeunase, ntšamo entšanga tmojamama aiñe o ndoñe tšabá bétsemnama cha chaojayana ora.

2 Bënga nñetscanga nñetsca bacna soyënga mondbétsama. Nderado nda oyebuambnayıñe ni mo canye bacna soye tonjama, chë entšá puerte tšabia jtsemnana, ntšamo Bëngbe Bëtsá yobošcá jtšiyenëse, y cha yojtšobena cachá sempre jtšenomándayama.

<sup>3</sup> Chë couayëngbioye freno tmojuayashbé ora, ntšamo bënga tmojtsebošcá chënga mochántsama, y bënga cachora jtsobenana ntšamo nyets chëngbe cuérpoca tmojtsamcá jtsemándayana, y ndoñe nye chëngbe bestšaše.

<sup>4</sup> Barquëshamnaca šmochjenójuaboye. Masque tša bëtsëtsacuemëngá y tša jabuache binyiënga chë barco jtsëjuatsëntšnayana, chë uamanéjayënga chë barco juyambana ndayëjana tmojtsebošcá, y chca, nye canye base soyetémaca, timón ca uabainëtémaca.

<sup>5</sup> Cachcá, chë bichtaja cuerpiñe canye base soyetema endmëna, pero chë bichtájaca entšanga jtsenábotamnayana bëts soyënga tmojamama. Smochjouena, canye base íñeshe jtsobenana canye bëts tjañe juangbotjuama.

<sup>6</sup> Y chë bichtaja endmëna mo canye íñeshcá, mo canye luare ndayentše puerte bacna soyënga tobinýncá. Chë bichtaja jtsobenana bëngbe cuerpentše puerte bacna soyënga bëngbiamama jamama. Mo canye íñeshe becá tojtsendbiamnacá, chë bichtájaca tcojtsichamo ndoñe tšabe soye, jtsobenana bacna soyënga bëngbiamama jamama nyets tempo quem luarentše tmuetsiyenëntscuana; y mo nda ndayá tojtsangbotjuacá, Satanás jtsobenana chë bichtaja jtsemándayana, bacna soyënga chaotsamama.

<sup>7</sup> Entšá endobena jtsamëndayana nyetsca tjoica bayënga, shloftšënga, osjojnayënga y buyeshiñe oyena bayënga; y ndegombre mora entsamënda;

<sup>8</sup> pero ndocná tonjobená chë bichtaja jtsemándayana, chca, bacna soyënga amana chaotsajbanama. Chë bichtaja jtsamana bëtscá bacna soyënga cada te chauétsebinýnama, y mo canye mëtscuaycá veneno jtsebomnana jóbama, chë bichtájaca cachcá endmëna.

<sup>9</sup> Bichtájaca bënga puerte tšabá Bëngbe Bëtsá y Taitabiamama jtsichámuana, y cach bichtájaca bënga puerte bacá entšangbiamama mondbëtsichamo, masque Bëngbe Bëtsá cachacá enoparecëngë chënga tojábiamama.

<sup>10</sup> Cach uayášentsšana jtsóbocanana Bëngbe Bëtsabiamama tšabe palabrenga y entšangbiamama bacna palabrenga. Jesucristbeyeca atšbe catšátanga, chca ndoñe chaondëtsemna.

<sup>11</sup> Canye béjaye obocanentsšana ndoñe ntsopodénana tšabe búyeshe chaóbocnama y cachentsšana untja búyeshnaca.

<sup>12</sup> Ntšamo canye higo betiyentsšana ndoñe ntsopodénana olivosëšënga jashacama, y canye uvas betiyentsšana ndoñe ntsopodénana higuëbënga jashacama, cachcá, atšbe catšátanga, tamona búyeshentsšana ndoñe ntsopodénana tšabe búyeshe chaóbocnama.

### *Bëngbe Bëtsábiocana óbocana osertánana*

<sup>13</sup> Nderado tšëngaftanguentše tojtsemna canye puerte tatsëmbuá y osertaná, cha bontsemna, chca yomnama entšanga jinýanýiyana, tšabe soyënga amana jtsiyenëse y chë ntjatosoberbnaycá tojama soyëngaca; y cha chca jamana, puerte osertaná bëtsemnama.

<sup>14</sup> Pero tšëngaftangbe ainaniñe yapa ínýabioye šmojtsántšaboše y nye ínýënga chamotjáyana soyënga šmojtsama, as ndoñe šmattsenábotamnaye osertánënga y tšábënga šmomnama, er ndegombre Bëngbe Bëtsabe osertánana tšëngaftanga ndoñe šmontsebmna.

<sup>15</sup> Er chca osertánana, Bëngbe Bëtsábiocana ndoñe ntsóbocanana, ndayá nye quem luarama enójuabnyëngbentsšana, nye entšangbe juabnentsšana, y canye bacna bayëjbentsšana.

<sup>16</sup> Ndayentše entšanga yapa tmojtsenántšaboše, y nye ínýënga chamotjáyana soyënga tmojtsama, chentše tondayama quemochátenëyeunana y nyetsca bacna soyënga mochántsama.

<sup>17</sup> Pero chë Bëngbe Bëtsábiocana óbocana osertánana bomnënga, nyetsca soyamna, natsana puerte tšabe vídaca jtsiyenana, bacna soyëngaca ndëmandánënga; y chënga jtsemnana chë ínýënga ndoñe chamondëtsentsjanama amënga, tšábënga y sempre jtseprontánana ínýënga joyaunayama. Y cach quemënga jtsemnana ínýëngbiamama ngmënanama bomnënga, sempre tšabe soyënga jtsamana, cachcá nyetsca entšangbioye jtsënyayana, y ntšamo ndegombre tojtsemncá jtsichámuana y jtsamana.

<sup>18</sup> Ntšamo canye jená, botamana shajuana jtsebomnama tšabe jénaye jájena, cachcá, sempre natjěmbana jtsiyenama bošěngna, natjěmbana ínġengaftaca jtsiyenana, chca, nġetsca entšanga chamotsamama ntšamo Běngbe Bětsabe bominġiġe tšabá yomncá.

## 4

### *Smochtsiyena Běngbe Bětsá tšěngaftangbeġe jtsemándayěse*

<sup>1</sup> ĶNdayentšana chě tšěngaftanga jtsentsjanayama y jtsepenzěntsiayama yóbocana? Endóbocana chě tšěngaftangbe bacna juabněnguentšana, nġe cach tšěngaftanga tšabá jt-somġama; y chě soyěnga tšěngaftangbe ainaniġe sempre chě tšabe juabněngama contra jésemnana.

<sup>2</sup> Tšěngaftanga ndayánaca jtsebomnama šmojtseboše, pero chca jtsebomnama ndoġe šmontsobena, as jtseprontánana ínġengbioye jtsěbáyama. Inġa ntšamo tobomncá tšěngaftanga tša jtsántšabošana, y chě soye jashjáchama ndoġe šmontsobena ora, ínġengaftaca jentjáyangana y jtsepenzěntsiayana. Ntšamo šmojtsebošcá ndoġe ntjobe-nayana jtsebomnama, Běngbe Bětsá chama ndoġe šmondbotjaġe causa;

<sup>3</sup> y chě soye šmojtjaġe ora, tšěngaftanga ndoġe ntjójěngacġana, ndoġe botamana chě soye šmondbotjaġe causa, er tšěngaftanga chě soye jtsebošana nġe chaoservema oyejuayěnga bacna soyěnguiġe jtsomġama.

<sup>4</sup> ĶTšěngaftanga, Běngbe Bětsá bobonshánana šmojtsajbananga! ĶNdoġe šmondětatšěmbo, chě jtsebošana nġe quem luarama enójuabnayěngbe amigo jtsemnana y nġe quem luarentša soyěnga jtsebomnama, chca, canġe entšá Běngbe Bětsabe uayayá jtsemnana? Ndánaca tojajuabó nġe quem luarama enójuabnayěngbe amigo jtsemnana, chca, canġe Běngbe Bětsábioye uayayá jóbemana.

<sup>5</sup> Ndoġe nġe bonamente Běngbe Bětsabe uabemana palabrenguiġe měntšá endayana: “Chě Běngbe Bětsá tbojanichmó běngbe ainaniġe chaotsiyenama Uámana Espíritu, puerte entseboše nġe Běngbe Bětsá canġa běngbe aměndayá chaotsemnana ca.”

<sup>6</sup> Pero Běngbe Bětsá, běngbe tšabiamma jtsejuabnayěse běnga jtsejabuáchanana, chíyeca Běngbe Bětsabe uabemana palabrenguiġe měntšá endayana: Běngbe Bětsá chě nġe cachěnga uámaněnga tmojtsenobiamnangbe contra entsemna, y chě ndoġe uámaněnga montsenobiamnangbiamna, Běngbe Bětsá más tšabe juabna entsebomna ca.

<sup>7</sup> Asna, tšěngaftanga šmochtseprontana nġe Běngbe Bětsá chacmotsaměndama; ntšamo Satanás tcmojtsaměndacá ndoġe šmattsama, y cha cachora tšěngaftangbentšana echantsachá.

<sup>8</sup> Běngbe Bětsábioye šmochtobeconá, y cha echanjama tšěngaftanga ntšamo cha yomnama chacmotsěsertánama. Tšěngaftanga bacna soye aměnga, cach tšěngaftangbe cucuatsěngaca tšabe soyěnga šmochtsama, bacna soyěnga ndoġe. Tšěngaftanga chě inġe ora jtsejuabnayana Běngbe Bětsá jtsebobonshánama, y inġe orna, nġe quem luarentša soyěnga jtsebomnama, šmochtsajbaná bacna soyěnga jamama bošana, chca, nġe tšabe juabněnga tšěngaftangbe ainaniġe chašmotsebomnama.

<sup>9</sup> Tšěngaftangbe bacna soyěngama ngmėnaca šmochtsemna, šmochjenóbošachna y cochtsetšenáněnga šmochjójebuambaye. Jatenbiajuayamna, šmochjenóbošachna; y joye-juayěngamna, ngmėnaca šmochtsemna.

<sup>10</sup> Běngbe Bětsabe delante bětsětsanga ndoġe šmattsenobiamnaye, y cha más uámaněnga cmochanjábiamma.

### *Inġengbiamma ndoġe ntsichámuana ndoġe tšabá tmonjama ca*

<sup>11</sup> Jesucristbeyeca catšátanga, ínġengbiamma bacna soyěnga ndoġe šmattsójebuambnaye. Nda cachabe catšatbiamma bacna soye tojtsichamo o tojayana ntšamo cha tojamcá ndoġe tšabá yontsemna ca, cha chora chě leyentša manděnga ndoġe ntsocumplínana y jtsichámuana chě leyentša manděnga tondayama yontsoservena ca. Y chě leyama chca



tcojtsichámese, cach ley jocúmplia cuenta, contsobiamná canye ichamuá chë ley aíñe o ndoñe yondoservénama, y chca ndoñe quecmátsmëna jtsamana.

<sup>12</sup> Chë ley tojuapormá cha nye canya endmëna, Bëngbe Bëtsá, y cachá endmëna ntšamo entšanga tmojamcá aíñe o ndoñe tšabá bëtsemnama ichamuá, y cachánaca entsobena entšanga játsebacama o nyetsca tescama jácastigama. Y acna, ¿ndase cmëna ndëmua entšabiámnaca jobenayama jatichámuama ntšamo tojamcá aíñe o ndoñe tšabá bëtsemnama?

*Ndayá yëfse yochjatëchnënguama ndoñe ntsótatsëmbuana*

<sup>13</sup> Y mora quem soye šmochjouena, tšëngaftanga chë šmondbétsichamo: “Mënté o yëfse quemoye o chë inye bëts puebloye fchanjanga, y chentse canye uata fchanjëftsemna ba soyënguiñe trabájayiñe, y ndegombre becá fchanjónyena ca.”

<sup>14</sup> ¡Pero ni mo ndayá yëfse tšëngaftangataca yochjochnënguama ndoñe quešmátstatšëmbo! Tšëngaftanga ndoñe quešmátstatšëmbo ndayëntscuana vida šmochjëftsebmna, y chca, tšëngaftanga šmondmëna mo canye jantšetëshcá, chëshe mora jónynana y nye ndeolpe jatenatjëmbana. Tšëngaftangataca cachcá echanjopása.

<sup>15</sup> Tšëngaftanga mëntšá cmontsamna jayanama: “Bëngbe Bëtsá quešojalesenciase, ainënga fchántsemna y quem soye o chë soye fchanjama ca.”

<sup>16</sup> Pero chë cuenta, tšëngaftanga bëts soyënga šmochjamama sempre jtsenábotamnyana, ndayá tšëngaftanga chašmomama Bëngbe Bëtsá yochjalesenciaca ntsetatšëmbcá; y chca jtsamana ndoñe tšabá quenátsmëna.

<sup>17</sup> Nda tojtsobena ntšamo tšabá yomncá jamama, pero ndoñe chca tonjama, cha canye bacna soye jtsamana.

## 5

*Chë bomnënga jábuayenama*

<sup>1</sup> ¡Quem soye šmochjouena, tšëngaftanga chë bomnënga! ¡Chë tšëngaftanga šmochtseufrínama šmochjenóbošachna y uatjananënga šmochtseyoye!

<sup>2</sup> Tšëngaftangbe bomnana buajónana janguánana entsemna, tondayama quenátoservena, y chë entšayëjuangá mejëjonga montsasá.

<sup>3</sup> Tšëngaftangbe castellano y midio tojtsengúsheshe; y chë ngúsheshna echántsinÿinÿynaye tšëngaftanga chë crocenánaca ndoñe šmonjanmama ntšamo ínÿenga jujabuáchama yojamncá; chë causa, nyetsca tescama cmochántsapochocaye, ntšamo chë íñeshe canye soye endbetsepochoacá. Tšëngaftanga quem tempo bomnana šmojtsejuabá, y mora quem luare jopochócama ya entsobeco.

<sup>4</sup> Tšëngaftanga chë tšëngaftangbe fshantsënguiñe tmojëftsetrabajanga ndoñe šmontanëbuénaye, y mora šmochjouena, chënga chama cmontsachembuanama. Bëngbe Utabná nyets obenana bomná, chë trabajayëngbe chembuanana ya tojouena.

<sup>5</sup> Quem luarentse tšëngaftanga šmondoyena ba botamana soyëngaca y nye ntšamo cach tšëngaftanga šmobošcá jtsamëse. Ntšamo canye uacná jóbana, minÿicá tojtsemna ora, cachcá tšëngaftangbiana entsobeco chë te, ndaye ora Bëngbe Bëtsá echanjama castigánënga chašmotsemnama, er puerte bacna soyënga šmojama. ¡Chë castigo jtsebínÿinama tempo ya entsobeco!

<sup>6</sup> Tšëngaftanga, chë puerte tšabá amëngbiana šmojayana jóbana yojtsamna ca y šmojtsëbaye, chca ndoñe chaondëtsemnama chënga ndocá jamama ntobencá.

*Chë uantado jtsemnana y chë Bëngbe Bëtsáftaca jencuéntama ora*

<sup>7</sup> Pero tšëngaftanga, catšátanga, uantádoca šmochjobátma Bëngbe Utabná yochjésabo orscama. Chë jajañe trabajayá tojtsobátmana bëtscá tšabe shajuanënga jobuátbanama, jtstocánana natsana uantádoca jobátmana chë jajañama uaftena tempo chaóshjanguama.

<sup>8</sup> Tšëngaftángnaca uantadënga šmochtsemna, y tšëngaftangbe ainaniñe añemo chaotsemna, er Bëngbe Utabná mëntescana ndoñe bën y moye echanjésabo.

<sup>9</sup> Jesucristbeyeca catsátanga, ntšamo ínÿenga tmojtsamama ndoñe nÿe šmattsoquejana, Bëngbe Bëtsá tšëngaftangbiana ndoñe chaodayanama, ntšamo šmojóyebuambama ndoñe tšabá šmonjama ca. Y nda yochjayana ntšamo entšanga tmojamcá aiñe o ndoñe tšabá bëtsemnama, ya entsebeconá.

<sup>10</sup> Atšbe catsátanga, chë tempsquënga Bëngbe Bëtsabe juabna oyebuambnayënga, ndëmuanÿenga entšanga tmonjanabuayená Bëngbe Utabná jótšëmbonëse, chënga bëngbioye šonjëftsaninÿanÿiye ntšamo tmojansufrima, ntšamo šojtsamna uantadënga jtsemnana tmojtsesufrina ora; y chca tšëngaftanga cmontsamna jtsamana.

<sup>11</sup> Bënga chëngbiana fsëndbëtsejuabnaye oyejuayënga imojamna ca, chë tmojansufrí ora Bëngbe Bëtsábeñe imojanobátmana ainaniñe añemo jtsebonnëse. Tšëngaftanga šmojouena ntšamo Job ainaniñe añémoca Bëngbe Bëtsábeñe yojanobátmana, puerte padecena soyënguiñe yojasufrina ora; y šmondétatšëmbo ntšamo Bëngbe Bëtsá cabana chábioye tbojancuedama, y chca yojamna Bëngbe Utabná entšangbiana puerte ngmená yómnyeyca.

<sup>12</sup> Pero masna, atšbe catsátanga, ndayá jamama chašmojašbuachená ora, chca ndoñe šmatjama jajúrase ni celocama, ni quem luarama, ni ndocna inÿe soyama. Tšëngaftanga aiñe ca jayanama šmojtsebošëse, nÿe aiñe ca šmochjayana, y ndoñe casna nÿe ndoñe; chca, Bëngbe Bëtsá ndoñe chaodayana ndoñe tšabá šmonjama ca júraye causa.

<sup>13</sup> Nderado nda tšëngaftanguentšá puerte ngménaca tojtsemna, cha bontsemna Bëngbe Bëtsá chama jaimpádama. Y nderado nda oyejuayá tojtsemna, cha bontsemna jacántana Bëngbe Bëtsá jëtschuayama.

<sup>14</sup> Nderado nda šocá tojtsemna, cha bontsemna chentša ošbuachiyëngcá ene-fjuanëngbeñe bëtšëjemëngcá amëndayënga jáchembuana, chënga Bëngbe Bëtsá chabiana chamoimpadama, y Bëngbe Utabná jótšëmbonëse aceitiye chamuanëtjuama.

<sup>15</sup> Y tšëngaftanga, puerte jtsošbuáchiyëse Bëngbe Bëtsá chašmojaimpadá ora, chë šocá salud echántinÿena, y Bëngbe Utabná echanjama cha tšabá cachiñe chaotsatsmënama; y nderado cha bacna soyënga tojamëse, Bëngbe Bëtsá bochantseperdóna.

<sup>16</sup> Chíyecna, chë bacna soyënga šmojtsamama šmochjobuambaye, y Bëngbe Bëtsá nÿetscangbiana šmochtseimpadana, chca, tšabá mo shnanëngcá chašmotsemnama. Canÿa ndabiana Bëngbe Bëtsá tojayana chabe bominÿiñe tšabia yomna ca, cháftaca tbojencuentá ora, chánaca ba tšabe soyënga jóyëngacñana, y jobenayana bëtš soyënga jamama.

<sup>17</sup> Bëngbe Bëtsabe juabna oyebuambnayá Elías, mo cach bëngcá canÿe entšá inamna, y puerte jtsošbuáchiyëse ndoñe chaonduaftema Bëngbe Bëtsábioye tbojanimpadá ora, quem luariñe mo unga uata y tsëntsañe ndoñe tonjanafté.

<sup>18</sup> Chentšana, Bëngbe Bëtsábioye cachiñe tbojtanimpadá ora, quem luariñe tojanafté y cachiñe chë jajañenache bëtscá saná yojtsatsbinÿna.

<sup>19</sup> Atšbe catsátanga, nderado nda tšëngaftanguentšá tojtsajbaná chë ndegombre soyënga jtsamana, pero inÿa chábioye tbojuájabuache cachiñe chë tšabe benache cháuatishachama,

<sup>20</sup> tšëngaftanga šmochtsetátšëmbo, ndánaca chë bacna soye amábioye tbojuájabuache chabe ndoñe tšabe videntšana cháuissebocnama, cha chë nÿetsca tescama castigüentšana chábioye jatsbocana, y jamana ba bacna soyëngama cha perdonaná chaotsemnama.

# 1 San Pedro

## *Jacheuayama*

<sup>1</sup> Atše Pedro, Jesucristbe ichmoná, quem tsbuanácha sentsabiamná chë cachëngbe luarentše ndoñe mondoyenëngbiamá, chë Ponto, Galacia, Capadocia, Asia y Bitinia luarënguenache ujquëshenënga imoyenëngbiamá.

<sup>2</sup> Sentsabiamná chë Bëngbe Bëtsá Bëngbe Taitá tojánabacacangbiamá, ntšamo cachá jamama yojanjuabnacá y ntšamo jopásama yojantatsëmbcá, cabá chca ndochnëngo ora; Uámana Espíritbeyeca, Bëngbe Bëtsá tojama tsëngaftanga chabe entšanga chašmotsemnama, Jesucristo chašmotseyeunanama y Bëngbe Bëtsabe delante tsabá chašmotsatsmënama, bacna soyënga abujauánënga. Y Bëngbe Bëtsá chca tojanma, Jesucristbe buiñe juabuáshanëse, cha tojanóbanayeca. Atše bëtscá sëntseimpadana Bëngbe Bëtsá, chaoma tsabe bendicionënga tsëngaftangbeñe chaotsemnama, y chaoma tsëngaftangbe ainaniñe tsabe ebionana chašmotsebomnama.

## *Bëngbe Bëtsábeñe jtsošbuáchiyëse vida jtsebomnana, atsebácanënga jtsemnama*

<sup>3</sup> Bëngbe Bëtsá y Bëngbe Utabná Jesucristbe Taitábioye matschuanga; cha puerte lastemado ínÿëngaftaca yómnyayeca, tojanma bënga tsëm juábnaca vida chamotsebomnama, bëngbioye bacna soyënga jabuajuánase, Jesucristo cháuatayenama tonjánmayeca. Chiyeca bënga montsobena chábeñe jtsobátmanana sempre y nÿetsca tescama, ndayá cha sochjátšatayama.

<sup>4</sup> Ndayá bënga sochjátšatayacá ndoñe quenátsmëna jëftsopochócama opodena soyënga, ndayá nÿets tempo tsabe soyënga. Y bënga mondobátmana jóyëngacñama ndayá Bëngbe Bëtsá chabe entšanga jatšatayama tojašebuachenacá, ndayá celoca bëngbiamá cha yo-jtsinÿena.

<sup>5</sup> Chë soyënga tsëngaftangbiamá entsemna, Bëngbe Bëtsábeñe šmošbuáchema; cha chabe obenánaca cmondánÿena, tsëngaftanga játsebacama. Cha chca jamama ya tojaprontá y echanjínÿanÿiye, Cristo jésabama tempo chaojóshjango ora.

<sup>6</sup> Chiyeca tsëngaftanga tša oyejuayënga šmojtsemna, masque nderado jtseytana inÿe ora, nÿetsca padecena soyënguiñe jasúfriase chašmuachnënguama.

<sup>7</sup> Mo chë castellanama jtsetatsëmbuama aíñe o ndoñe tsabe castellano tomnama inñe fjuchnëngcá, padecena soyënguiñe tsabá chašmojachnënguse, Bëngbe Bëtsá echanjínÿanÿiye tsëngaftanga ndegombre taišmošbuáchema. Chë castellano pronto endbetsopochóca, masque chca, chana puerte endbetsámana. Y tsëngaftangbe ošbuáchiyana chë castellanama puerte más enduámana. Tsëngaftanga padecena soyënguentšana bëts ošbuachiyánaca chašmojábocnëse, Jesucristo chaojésabo ora, entšanga mochanjinÿe tsëngaftanga šmojtsomerecena chacmotsatacheuanama, más bëtsetsanga y obenënga chácmabiamama y uámanëngnaca.

<sup>8</sup> Tsëngaftanga Jesucristo šmondobobonshana, y chábioye ndoñe chešmátaninÿe; masque mora cha ndoñe quešmatonÿá, tsëngaftanga chábeñe šmontsošbuaché, y šmontsebomna canÿe puerte tsabe oyejuayana, y ntsachetšá chana yomnana ndoñe quešmátobena jayanama, tša bëtscá causa.

<sup>9</sup> Chca oyejuayana tsëngaftanga šmontsebomna, er ndayá tsëngaftanga jtsošbuáchiyëse šmobatmancá, ya šmojtsosháchichana, chë Bëngbe Bëtsá tsëngaftanga jtsatsebacayana.

<sup>10</sup> Bëngbe Bëtsabe juabna oyebuambnayënga ya imojanatsjendá y imojanguá jtsetatsëmbuama, ntšamo Bëngbe Bëtsá entšanga játsebacama, y tmojanoyebuambá ndayá Bëngbe Bëtsá tsëngaftanga jatšatayama, tsëngaftangbiamá tsabe juabna cha yobómnyayeca.

<sup>11</sup> Chëngbe ainaniñe yojtsemna Cristbe espíritu, y ntšamo tojanëyancá, cabá chca ndochnëngo ora, yojamna Cristo jasúfriama y ntšamo chentšana Bëngbe Bëtsá chábioye

puerte bĕtsá bochjánbemama, Bĕngbe Bĕtsabe juabna oyebuambnayĕnga imojanjuabná y imojanatsjendá jtsetatšĕmbuama chĕ soyĕnga yochjanopása ora, ndaye tempo y ntšamo chĕ tempo yochtsemnama.

<sup>12</sup> Pero tempo Bĕngbe Bĕtsá chĕngbioye tojaninĕyĕ, chca jtsamana ndoñe cachĕngbe tšabiama yonjamnama, ndayá chca jtsamana yojamna tšĕngaftangbe tšabiama. Chĕnga tmojanoyebuambá, ntšamo chĕ tšabe noticiĕnga oyebuambnayĕnga tšĕngaftanga tcmojauyancá. Y chca tcmojáuyana chĕ Uámana Espíritbe obenánaca, nda Bĕngbe Bĕtsá celocana tbojichmó. Chĕ soyĕnga endmĕna ndayá chĕ angelĕnga muantseboše tšabá jinĕyama, chĕnga chaósertama.

*Bĕngbe Bĕtsá entsanga jtsachembuanana chabe entsangcá chamotsiyenama*

<sup>13</sup> Chíyeca, botamana jtsejuabnayĕse tšabá jatrabájama, y cach tšĕngaftanga jenomándama jtsobenĕse, yejuana šmochtsobátmana, Bĕngbe Bĕtsá soyĕnga cmochjátšatayama tšĕngaftangbe tšabiama jtsejuabnayĕse, Jesucristo quem luaroye yochjésabo ora.

<sup>14</sup> Tšĕngaftanga Bĕngbe Bĕtsabe básenga uauenanĕnga quetsomñecá, ndoñe šmattsiyena ntšamo cach tšĕngaftangbe bacna juabnĕnga yomncá nĕ tšabá jtsomñama, ntšamo Bĕngbe Bĕtsábioye cabá nduabuatma ora šmonjanbomncá.

<sup>15</sup> Chamna, šmochtsiyena mo chĕ Bĕngbe Bĕtsabe entsangcá, puerte tšabe entsangcá jtsamĕse, er Bĕngbe Bĕtsá, nda tcmojáchembo chca chašmotsemnama, sempre uamaná endmĕna.

<sup>16</sup> Er Bĕngbe Bĕtsabe uabemana palabrĕnguiñe mĕntšá endayana: “Tšĕngaftanga Bĕngbe Bĕtsábeñe uámanĕnga šmochtsemna, er atše uamaná sĕndmĕna ca.”

<sup>17</sup> Tšĕngaftanga Bĕngbe Bĕtsábioye šmondbuyana “Taita ca”, šmondbótšĕmbona ora. Bĕngbe Bĕtsabiama nĕyetscanga cachcá mondmĕna. Chíyeca, ntšamo nĕyetscanga tmojamama tšabá o ndoñe tšabá yontsemna ca cha yochjayana ora, cha chca echanjama nĕy ntšamo chĕnga tmojamcá jtsonĕyĕse. “Taita ca” chábioye šmondbuyánayeca, quem luarentše šmochtsiyenĕntscuana sempre šmochtsejuabnaye cha nĕyetscangbiana más bĕtsá yomnama, chĕ šmojt sama sóyeca chca jtsinĕyĕyĕse.

<sup>18</sup> Tšĕngaftanga šmondĕtatšĕmbo, Jesucristo, mo nda ínĕyngbioye játsebacama crocánana cuafjĕtsajocá, tonjanóbana tšĕngaftanga játsebacama, chĕ nĕyetsca soyĕnga nĕy bonamente jtsamĕse oyenentšana, ntšamo jtsiyenama tšĕngaftangbe bĕts taitángbentšana šmojanatsjinĕcá. Cristo ndoñe checmatanatsebacá, yopodena jtsopochócama soyĕnga jĕtsjájuase, mo crocánana o castellancá,

<sup>19</sup> ndayá cachá jóbane, chabe uámana buiñe juabuáshanĕse. Cristo chĕ ndocna bacna soye ndbomná, tonjanóbana ora enjamna mo canĕy oveshatemcá, tondaye ndbemaná, ni tsengana ndbomná, Bĕngbe Bĕtsábioye jĕtschuayama altaroca obaná.

<sup>20</sup> Chama Bĕngbe Bĕtsá Crístbeñe tojanjuabó y tbojanábuayana, cabá quem luare ndĕtsemna ora; pero quem tempo, Cristo entsángbeñe tonjábocna tšĕngaftangbe tšabiama.

<sup>21</sup> Crístbeyeca, tšĕngaftanga šmondošbuaché Bĕngbe Bĕtsábeñe, nda tonjanma Cristo cháuatayenama y puerte uamaná tbojánbema. Mĕntšá, ndábeñe tšĕngaftanga šmošbuaché y šmobátmana, Bĕngbe Bĕtsábeñe endmĕna.

<sup>22</sup> Tšĕngaftanga šmojama ndocna bacna soyĕnga ainaniñe ntsebomnama, Jesucrístbeyeca catšátangbioye ndegombre jtsababuánĕyeshanama, er tšĕngaftanga ntšamo ndegombre yomncá jtsamĕse, Bĕngbe Bĕtsá šmoyeunana. Chcasna, sempre nĕyets ainánaca nĕyetscanga šmochtsenbobonshana.

<sup>23</sup> Bĕngbe Bĕtsá tojama tšĕngaftanga tsĕm vida chašmotsebomnama; pero tšĕngaftanga tsĕm vida šmontsebomna, ndoñe nĕy quem luarentša entsanga ndayá tmojamama, sinó ndayá Bĕngbe Bĕtsá chĕ ndocna te jóbamamá tojamama. Cha chca tojama cachabe palábraca, ndayá endoyebuambná ntšamo entsanga muantsobena tšabe vida jtsebomnama y chĕ palabra ndocna te queochaisopochóca.

<sup>24</sup> Ntšamo Bëngbe Bëtsabe uabemana palabrënguiñe endayancá:  
 Njetsca entsanga mondmëna mo shacuaná,  
 y chënga imobomna tšabe soyënga, endmëna mo chë shacuanentša uantšefjushangacá.  
 Chë shácuana jtsanctana y chë uantšefjushangá jtsatquécjanana;  
 entsanga cachcá, njets tempo quem luarentše ndoñe quemochátiyena;  
<sup>25</sup> pero Bëngbe Bëtsabe palabra njets tempo echanjesomñe ca —chiñe endayana.  
 Y chë palabra endmëna chë Jesucristbe tšabe noticiënga, chë buayenánana ntšamo  
 ínÿenga tcmojabuayenacá.

## 2

<sup>1</sup> Chcáyecna, njetsca tescama šmochtsajbaná njetsca bacna soyënga amana, ínÿengbioye  
 áingñayana, bacna entsanga chë ntšamo ndegombre šmojuabnacá ndinÿinÿayënga  
 ntsemnana, ínÿengbioye untšabošana, y ínÿengbiama uayátsenayana.

<sup>2</sup> Mo cabá mora onÿnana šešoncá, tša jtsebošana chabe mamabe létšiyë, cachcá  
 tšëngaftanga cmontsamna puerte jtsebošana njets tempo Bëngbe Bëtsabe soyënga jt-  
 sebomnama, chë soyëngaca Jesucristbeñe corente chašmotsošbuáchema, y chca, at-  
 sebácanënga chašmotsemnana;

<sup>3</sup> ntšamo Bëngbe Bëtsabe uabemana palabrënguiñe endayancá: “Tšëngaftanga  
 šmojátatšëmbona Bëngbe Utabná puerte tšabia njetscángaftaca yomnama ca.”

### *Cristo, chë mo aina ndëtsbecá endmëná*

<sup>4</sup> Bëngbe Utabnábioye šmochtobeconá, nda endmëna mo canÿe aina ndëtsbecá,  
 ndëmuanyëse tojtsama entsanga tšabe vida chamotsebomnama. Báseftanga cha tmo-  
 jtsaboté, mo ntšamo chë ndëtsbéngaca canÿe yebna tmojtsejebuana ora, luaroca tmojtse-  
 jajó ndëtsbecá; pero Bëngbe Bëtsá chábioye tbojuábuayana, y chabe bominiñe cha puerte  
 uamaná endmëna.

<sup>5</sup> Chábioye šmochtobeconá, tšëngaftanga chë tšabe vida šmojóyëngacñënga, cánÿiñe mo  
 aina ndëtsbéngcá, Bëngbe Bëtsabiamajajebuama canÿe yebnentšama chašmotsemnana;  
 mo Bëngbe Bëtsabiamabachnangcá chašmotsemnana, nÿe Bëngbe Bëtsábioye  
 jtseservénama jtsentsénëse, chábioye jtsatschuanayama. Ntšamo Bëngbe Bëtsábioye  
 jtseservénama šmojtsamcá, chábioye tšabá jtsinÿanana, ndayá Jesucristo tojanmama.

<sup>6</sup> Chca ndegombre endmëna, er Bëngbe Bëtsabe uabemana palabrënguiñe, Bëngbe Bëtsá  
 Jesucristbiama mëntšá tojánayana:

Smochjinÿe, atše sënjama Jerusalenentše canÿa chaotsemna,  
 y cha endmëna mo chë canÿe yebna jajebuámentše chë más bëts uashacuanësentše  
 jajona ndëtsbecá.

Cha atšbe Uabuayaná endmëna, y atšbiama puerte enduámana.

Nda chábeñe tojtsosbuaché, ndocna te nÿe bonamente chábeñe queochátobatmana ca.

<sup>7</sup> Tšëngaftanga, chábeñe ošbuáchiyëngbiama, nda endmëna mo chë yebna jajebuámentše  
 más bëts uashacuanësentše jajona ndëtsbecá, cha puerte enduámana; pero chábeñe  
 ndošbuáchiyëngbiama, entsopasana ntšamo Bëngbe Bëtsabe uabemana palabrënguiñe  
 Cristbiama endayancá:

Chë yebna jebuanënga tmontsanaboté ndëtsbé,  
 mora chë más bëts uashacuanësentše entsejájona ca.

<sup>8</sup> Inÿoca, Bëngbe Bëtsabe uabemana palabrënguiñe mëntšánaca chabiamana endayana:

Cha endmëna mo ndëtsbé ndayentše jtsojestjyamcá;

y mo peñëscá yomna chënga chamotsótsámana ca.

Chënga Jesucristo jtsabotena, chabe buayenánana ndoñe ntjoyeunaycá; Bëngbe Bëtsá  
 cabá chca ndopása ora tojanjuabó chca chaotsemnana.

<sup>9</sup> Pero tšëngaftanga šmondmëna Bëngbe Bëtsábeyeca bocacánënga, y mo canÿe rey  
 tmojtserverna bachnangcá, y šmondmëna Bëngbe Bëtsabe entsanga nÿe chabiamana

jtsetrabájayama, y chë nÿe Bëngbe Bëtsábenga šmomnënga. Y chca endmëna, tšëngaftanga chë bëts soyënga ntšamo Bëngbe Bëtsá tojamcá chašmotsabuayiynama. Cha endmëna nda tcmojáchembo chašmotsajbanama oyenana mo ndoñe binÿniñcá jtsejuabnayëse y jtsamëse, cháftaca jtsemnama chašmotsobenama, chë tšëngaftangbe juabnënga puerte binÿnayáftaca.

<sup>10</sup> Tempo tšëngaftanga ni mo cánÿentša entsangcá ndoñe quešmënjatsmëna, nÿe ujquëshenënga; pero mora, Bëngbe Bëtsabe entsanga šmontsemna; tempo šmonjamna entsanga ndocná tonjánalastemanga, pero mora, Bëngbe Bëtsá aiñe lastemado tšëngaftangftaca entsemna.

### *Bëngbe Bëtsá jtseservénama jtsiyenana*

<sup>11</sup> Atšbe bonshánënga, ndayentše tšëngaftangbe ndegombre luare yomna, celoca endmëna, y muentše quem luarentše, tšëngaftanga šmondmëna mo ínÿoicana ash-jajnëngcá, y mo canÿe luarëjana nÿe achnejuanëngcá, cach tšëngaftangbe luaroye átaiñe. Chíyeca cbontsaimpadana, ndoñe chašmondétsama soyënga ntšamo chë šmobomna bacna juabnënga tomncá, ainaniñe bacna soyënga bomna causa; chca juabnënga ainaniñe jtsepenzéntsiayana, chentše jtsemándayama y Uámana Espíritu ndoñe chaondëtsemándama.

<sup>12</sup> Chë Bëngbe Bëtsábioye nduabuatomëngbeñe sempre šmochtsiyena tšabá jtsamëse; chca chënga, masque mora tšëngaftangbe contra imojtsoyebuambná, tšëngaftanga mo bacá uamana entsanga cuaftsemnëngcá, chë tšabe soyënga ntšamo tšëngaftanga šmojtsamcá chamuinÿama, y chca, Bëngbe Bëtsá chëngbioye chaojenonÿinÿé te, chábioye chënga chamotsatschuanama.

<sup>13</sup> Bëngbe Bëtsá šmoyeunanama, nÿetsca entsanga mando bomnëngbioye šmochtsobedecena; chë Romoca bëts mandádbioye, cha chë quem luarentša más uámana puesto jtsemándayama endbómnyayeca;

<sup>14</sup> y chë tšëngaftangbeñe mandadëngbióynaca, ndëmuanÿënga cha jíchamuana chë bacna soyënga amënga jácastigama, y chë tšabe soyënga amëngbiamna tšabá imojtsama ca chamuayanama.

<sup>15</sup> Chë mando bomnëngbioye šmochtsobedecena, er Bëngbe Bëtsá endboše tšëngaftanga tšabe soyënga chašmotsamama, chca, chë ndosertánënga chë tšëngaftangbiamna podësca ichámënga, ntšamo ndegombre yomncá ntsetatšëmbcá, tondaye chamondëtsebomna tšëngaftangbe contra jayanama.

<sup>16</sup> Šmochtsiyena tšabá jtsamëse, mo chë ya ndoñe más bacna soyëngaca y bacna juabnëngaca ndëmandanëngcá; pero chca šmojtsemnama ndoñe šmattsejuabnaye nÿe ndaye bacna soye jamama šmojtsobena ca, y nÿe chca šmochjátama. Más tšabá endmëna jtsiyenana, mo chë Bëngbe Bëtsá imoservenëngcá.

<sup>17</sup> Nÿetscangbiamna respeto šmochtsobomna, chë Jesucristbeyeca catšátangbioye šmochtsababuánÿeshana, sempre šmochtsiyena Bëngbe Bëtsabiamna jtsejuabnayëse cha chë más bëtsá yomnama, y chë Romoca bëts mandado šmochtsesrespetana.

### *Cristo chabe entsanga tojinÿanÿé ntšamo yomna jasúfria*

<sup>18</sup> Tšëngaftanga, chë nÿets tempo ínÿabiamna canÿe yebnentše oservénënga, tšëngaftangbe nduiñëngbioye šmochtsayaunana, puerte respeto chëngbiamna jtsebomnëse; y ndoñe nÿe chë tšábëngbioye y nÿe tšabá mandbomnëngbioye, ndayá chë bacá mandbomnëngbioynaca.

<sup>19</sup> Nderado nda, ntšamo Bëngbe Bëtsá yobošcá jamama bošama, tojoboyá chabe nduiño cha chaosufrima tojtsama ora, masque chama jasúfria ndoñe tbondmëna, chca jamëse, Bëngbe Bëtsá corente tšabá jtsinÿanana.

<sup>20</sup> Er nderado tcmojtsacastigá ndaye bacna soye šmojama causa, y chora tša uan-tadënga chiñe šmojachnëngo, chë soye ndoñe yapa ntsámanana. Pero tšabe soyënga

šmojtsama y chë causa šmojtseufrina, y tša uantadënga chiñe šmojachnëngo, chë soye cocayé Bëngbe Bëtsá corente tšabá jtsinÿanana.

<sup>21</sup> Chca cmontsamna, er Bëngbe Bëtsá tcmojánachembo tšabe soyënga jamama y chca jasúfriama; chca ndegombre endmëna, er Cristo tšëngaftangbiamama tonjansufrí, y chca cha tcmonjaninÿanÿé, ntšamo jamama cmojtsamna, tšëngaftanga chca chašmotsamama.

<sup>22</sup> Cristo ndocna te ndocna bacna soye chenáisema, ni ndocnábioye chebnaiseingñé.

<sup>23</sup> Chábioye tmojtsoyenguá ora, chëngbioye ndoñe ntëyánguanguana. Cha chaosufrima tmonjanma ora, cha ndocá ntjatëtsësnayana jaútatjayama, ndayá Bëngbe Bëtsábeñe jtošbuáchiyëse, chábeñe yojanobátmana. Bëngbe Bëtsá ntšamo nÿetscanga tmojamama tšabá o ndoñe tšabá yonjamna ca yochjayana ora, chca echanjama nÿe ntšamo chënga tmojamcá jtsinÿayëse.

<sup>24</sup> Cristo cruciñe tonjanóbana ora, cha tonjansufrí chë castigo, chë bëngbe bacna soyëngama cach bënga šojánamna jasúfriama castigo, bënga chë bacna soyënga jamama juabnëngaca ndoñe más mandánënga chamondëtsemnama, y bënga ntšamo Bëngbe Bëtsabe bominiñe tšabá yomncá jtsamëse chamotsiyenama. Er Crístbioye chënga tmonjanlisiá chaóbanama y tonjansufrí jobanëntscuana, y chca, bënga šonjanatsebacá.

<sup>25</sup> Er tšëngaftanga, tempo Bëngbe Bëtsábentšana bënoca šmonjamna, mo ótsena oveshëngcá; pero mora Cristbe benache šmojtishache, y cha cmontsanÿena, mo oveshëngbe canÿe abujenÿacá, y cha entsantješna tšëngaftanga tšabá chašmotsemnama.

### 3

#### *Ntšamo iuamna chë bouamnëngbioye jtsiyenana*

<sup>1</sup> Cachcá mo chë oservenëngcá, tšëngaftángnaca shémanga, tšëngaftangbe boyángbioye šmochtsayaunana, chca, chë Bëngbe Bëtsabe buayenana soyënguiñe ndošbuáchiye boyángbioye chašmobená jáyëñanama, Jesucristbeñe chamotsošbuáchema, ntšamo tšëngaftanga šmojtsiyenama. Ndoñe queochátsiyta chë buayenánama chënga jatëtsësnayana,

<sup>2</sup> er chënga mochanjinÿe tšëngaftanga šmojtsiyena, Bëngbe Bëtsá nÿetscangbiamama más bëtsá yomnama sempre jtsejuabnayëse, y ntšamo šmojtsamcá chca yojtsinÿinÿáyeca.

<sup>3</sup> Cach tšëngaftangbiamama ndoñe mëntsá šmattsejuabnaye: “Entšanga atše botamaná tsmëna ca chamotsejuabnama atše nÿa mo chca chantenochquëca, chantenóbotamaye ba castellano soyëngaca o ba uámana entšayangá chantichëtjo ca”;

<sup>4</sup> ndayá chca chaotsemna, ntšamo tšëngaftanga chë Uámana Espíritbeyeca mandánënga jtsemnëse ainaniñe šmojuabnama, cmëbionama y šmobošama; ndocna te ndopochócaye botamanana jtsebomnama, ainaniñe nÿe cach tšëngaftanga uámanënga jenobiamama juabnënga ntsebomncá, pero aiñe ainaniñe tšabe ebionana jtsebomnëse. Chë soyënga Bëngbe Bëtsabe bominiñe puerte enduámana.

<sup>5</sup> Tempo chca, chë puerte tšabe shembásenga, chë Bëngbe Bëtsabe bocacanënguentsënga, imojanamana jtenóbotamayana; chënga Bëngbe Bëtsábeñe imojtsanošbuaché y chábeñe imojanobátmana, y nÿetscanga chëngbe boyángbioye imojánayaunana.

<sup>6</sup> Chca yojamna Sara, Abrahábioye ibnayeunana y chábioye “Taita ca” ibojanábobuatma. Tšëngaftanga Sarabe bembangcá jtsemnana, tšabe soyënga šmojtsamëse, y tondayama uatjana šmontsebomnëse.

<sup>7</sup> Cachcá, tšëngaftanga boyanga, cada ona cachabe shémaftaca chaotsiyena, tšabá jtsenëyeunanëse, y cha respeto buajoná chaotsemnama jtsamëse; pero chca, ndoñe nÿe cha acbiamama más batšá obenana bomná bëtsemnama, ndayá Bëngbe Bëtsá chabiamama tšabe juabna yobómnyayeca, ntšamo cach aca tšabe vida tcmojašbuachenacá chábioynaca tbojašbuáchenama. Chca šmochtsama, Bëngbe Bëtsáftaca jencuéntama totcá chaondëtsemnama.

*Chë tšabe soyënga amama jasúfriama yojtsamnënga*

<sup>8</sup> Y morna, nyetsca tšëngaftanga cachcá šmochtsejuabnaye, ínÿenga šmochtsalastemana, chë Jesucristbeyeca catšátangbioye šmochtsababuánÿeshana, ínÿengbiana chacmóngmiaye, y cada ona chaotsejuabná chë ínÿenga chabiana más uámanënga imomna ca.

<sup>9</sup> Inÿenga tšëngaftangbiana ntšamo tcmojaborlá ora, ndoñe šmattëchenanguaye; ni chacmojtšëyanguá ora, chëngbioye ndoñe šmattoyáanguango. Chca játamama cuentna, Bëngbe Bëtsá šmochjaimpáda, chëngbeñe tšabe bendicionënga chaotsemnama cha chaomama, er Bëngbe Bëtsá tcmojáchembo chca chašmotsamama, y Bëngbe Bëtsábíocana tšabe bendicionënga chašmosháchiñama.

<sup>10</sup> Ntšamo Bëngbe Bëtsabe uabemana palabrenguiñe endayancá: Nda toboše tšabe vida jëftsebomnama y puerte oyejuayá tempënga jtsebomnama, yejuana chaochtsenojuabná bacna soyëngama ndoñe chaondëtsóyebuambnama, y ndoñe chaondëtsebošterama.

<sup>11</sup> Bacna soyënguentsana chaotsojuánañe y tšabe soyënga chaotsama, natjëmbana nyetscángaftaca jtšiyenama chaotseboše, y chca chaotsemnama sempre chaotsentšena.

<sup>12</sup> Chca bontsemna jamana, er Bëngbe Utabná, chabe bominÿiñe tšabe soyënga amëngbioye jtšanyenana, chëngbiana sempre jtšantješnëse; y sempre chëngbioye jtšayaunanana, chábioye ndayámnaca tmojtšotjanañe ora; pero chë bacna soyënga jamana uamanëngbe contra cha jtsemnana ca –chiñe endayana.

<sup>13</sup> ¿Nda nanjobenaye tšëngaftangbiana bacna soyënga jamama, tšëngaftanga chë tšabe soyënga jamama sempre šmojtšentšënëse?

<sup>14</sup> Pero masque tšëngaftanga cmojtšamna jasúfriama tšabe soyënga šmojtšamama, Bëngbe Bëtsá chama tšabe soyënga cmochántatšataye. Chë tšëngaftanga chašmosufrima amëngbiana ndoñe matauatjëngana, ni ainana tsetšenanënga ndoñe matsmënëngana,

<sup>15</sup> ndayá ainaniñe sempre šmochtsejuabnaye Cristbiana mo Bëngbe Utabnacá y chabiana respeto šmochtsebomna; y sempre šmochtseprontana jojuama ndëmuanÿenga tcmojtsatjaná ndáyeca tšëngaftanga Bëngbe Bëtsábeñe jtsošbuáchiyëse, chabiana ainaniñe šmobátmanama.

<sup>16</sup> Pero chca šmochjama tšabe ainánaca jtšënyayëse y Bëngbe Bëtsabiana respeto jtsebomnëse. Smochtsiyena tšabá jtšamëse, y chama ainaniñe ndoñe chašmondëtsebomna juabnënga y chamuayana chca ndegombre ndoñe tšabá šmontsama ca, chca, ínÿenga tšëngaftangbiana podesca chamojtsoyebuambná ora, tšëngaftanga Crístbeñe ošbuáchiyënga quetsomñecá tšabe soyënga šmojtšamama, chënga chamotsëuatja chca tmojtšóyebuambnama.

<sup>17</sup> Más tšabá endmëna jasúfriana tšabe soyënga tcojamama, nderado Bëngbe Bëtsá chca chaotsemnama tojtsebošëse, y ndoñe chë jasúfriana ndaye bacna soye tcojamama.

<sup>18</sup> Er Cristo nÿe canÿe tonjanóbana bënga bacna soyëngama jáperdonama; chë nyetsca soyënguiñe tšabá amá, chë Bëngbe Bëtsabe bominÿiñe ndoñe tšabá yondmëna soyënga amëngbiana, tšëngaftanga Bëngbe Bëtsáftaca chašmotsatsmënama. Entšacá, Cristo tonjanóbana, pero Bëngbe Bëtsá tonjanma, cha cachiñe vida chabe espiritiñe chaotsatsbomnama.

<sup>19</sup> Pero Cristo cháuatayenama Bëngbe Bëtsá cabá ndëma ora, chabe espiritiñe cha tojána chë ndoñe tšabe entšanga imonjamnëngbe espíritënga utámenënga imojamnoye, chëngbiana castigo tojtsemnëntscuana; y cha tojanayënjanama chënga tojanabuayená.

<sup>20</sup> Quem espíritënga bayté entsemna, Bëngbe Bëtsábíoye ndoñe monjánëyeunana, Noebe yojëftsiyena ora, chë bacna soyënga amënga chca amama chamotsajbanama y tšabe benache chámuatishachama Bëngbe Bëtsá bën yojanobátmana ora, barquësha canduapor-mantscuana. Chentšana chë barquëshañe báseftanga tmojanotsbocá, posufta entšanga, búyeshë juatsbuacá chë barquësha yojtsámnyeca.



21 Chë chënga chamótsbocama tojanëjabuache béjaye, enjamna mo chë mora jenábayama buyeshcá, chca, atsebácanënga bënga chamotsemnama. Pero tmojenábaye ora, bënga atsebácanënga jtsemnana, ndoñe chë cuerpentša tsengá tmojtseñóbolimpiama, ndayá bëngbe ainaniñe ndocna bacna juabnënga ntsebmnama Bëngbe Bëtsá tmojtseimpadánama; y bënga atsebácanënga mondmëna, Jesucristo cháuatayenama Bëngbe Bëtsá tojánmayeca.

22 Cristo celoye tojtantsjuá y Bëngbe Bëtsabe catšbioica yomna jamándama. Cha endmëna chë amëndayá angelëngbiama y espíritënga mando y obenana bomnëngbiama.

## 4

### *Entšanga entsamna jtsiyenana ntšamo Bëngbe Bëtsá yobošcá*

1 Chcasna, ntšamo Cristo tojansufricá, chabe cuerpiñe mo entšacá játsetšenëse, tsëngaftángnaca cmontsamna jtseprontánana chca jasúfriama. Er chë Crístbeñe ošbuachiyá nda chabe cuerpiñe tojasufri, chë bacna soyënga amentšana tojtsojuánañe,

2 chca, chabe vidiñe, morscana y jobanëntscuana, jëftsiyenama ntšamo Bëngbe Bëtsá yobošcá, y ndoñe nye entšangbe bacna juabnëngaca, nye quem luarentše tsabá jëftsemnama.

3 Tempo, bayté enjamna, ndayëntscuana tsëngaftanga šmonjánama soyënga, mo chë Bëngbe Bëtsábioye nduabuátmënga mondbetsamcá; nya ndoñe más. Chë tempo, tsëngaftanga šmonjaniyena nyetsca bacna soyënga jtsamëse, jenomándama ntsoyencá; tsëngaftanga šmonjánama soyënga nye ntšamo šmojanbošcá, nye tsëngaftanga tsabá jt-somñama; šmonjanamana jotmenangana y ba fiestënga jtsebmnama, y chora chë ófjanënga tša jtsetmoyana y tša jtseyoyana, y ba uabouana soyënga šmonjanamana jtsamana chë diosënga yojamna ca šmojanjuabná soyënga jadórama.

4 Morna, chë Bëngbe Bëtsábioye nduabuátmënga montsenjaná, tsëngaftanga ya ndoñe más bacna soyënga jtsamëse šmojtsiyenama, ntšamo tempo šmonjaniyena, ntšamo chënga jtsamëse mondoyena, jenomándama ntsoyencá; y chë causa, chënga bacna soyënga tsëngaftangbiama jtsóyebuambnayana.

5 Pero chënga echanjótocaye jayanama ndáyeca chca tmojamama, chë entšangbiama, chë ainënga y chë ya mochjóbanëngbiama, ntšamo tmojamama, aíñe o ndoñe tsabá bëtsemnama jayanama entseprontanabe delante.

6 Chíyeca, Crístbeñe ošbuáchiyënga, chë mora obanënga imojtsemnënga, ainënga monjamna ora, ínÿenga chë tsabe noticiëngama chëngbioye monjanabuayiyná, chënga chamobenama chë nyetsca tescama yomna tsabe vida chëngbe espíritoftaca jtsebmnama, ntšamo Bëngbe Bëtsá yobomncá; masque mora quem luarentše, chëngbe cuerpo tojóbana, er Bëngbe Bëtsá tojayana nyetsca entšanga yojtšamna jóbanama ca.

7 Ndoñe bayté y nyetsca soyënga echanjopochóca. Chíyeca, tsëngaftanga cmontsamna botamana jtsejuabnayana y jenomándama jtsobenana, Bëngbe Bëtsáftaca jencuëntama chašmotsobenama.

8 Nyetsca soyëngama, masna, sempre nyetscanga puerte šmochtsenbobonshana, er nda ínÿenga puerte tojtšababuanÿeshaná, sempre jtseprontánana ínÿenga jáperdonama, chëngbiama bacna soyënga tmojamama.

9 Nyetscanga šmochtsamana tsëngaftangbe yebniñe jenofjana, chca jamama totcá yojtsemna ntjatichamcá.

10 Nyetsca tsëngaftanga Bëngbe Bëtsá tcmojatšatá obenana tsabe soyënga jamama; chca, chë obenánaca cmontsamna jtsamana soyënga chë ínÿengbe tsabiama, chë Bëngbe Bëtsá cmojatšatá nyets obenánaca ínÿengbioye jujabuáchama, nyets tempo tsabe soyënga jtsamëse.

11 Nda tojtšabuayiyná, Bëngbe Bëtsabe palabra chaotsabuayiyná mo Bëngbe Bëtsá chabijana cuaftsoyebuambnacá; nda ínÿenga tojtšaserverna, chca chaotsama chë

Bëngbe Bëtsá yojtsama cha chaotsebomnama obenánaca. Njetsca soyënga ntšamo šmojtsamcá chaotsinýanýná Bëngbe Bëtsá puerte uamaná y obená bétsemnama, Jesucristbeyeca. Chca šmochtsama, er Bëngbe Bëtsá puerte uamaná endmëna y obenana endbomna njets tempo y njetsca tescama. Chca chaotsemna.

*Puerte tšabá endmëna, Crístbeñe tcošbuáchema, jasúfriama tbojtsemnëse*

<sup>12</sup> Atšbe bonshana entsanga, ndoñe šmattsenjanaye padecena soyënguiñe šmojtseufrínama; chiñe jtsinýnana ntsachetšá ošbuáchiyana šmobomnama. Chca ora ndoñe šmattsejuabnaye, tšëngaftanga ndoñe cmondamna chca soyiñe jtsachnëjuanana ca;

<sup>13</sup> chamna, šmochjóyejuaye chë ntšamo Cristo tojansufricá šmojtseufrina ora, chca, Cristo corente obenánaca y uamanacá entsángbeñe chaojtonýná te, tšëngaftanga puerte chašmotsóyejuama.

<sup>14</sup> Puerte šmochtsóyejuaye, nderado nda tcmojoyánguango Cristbiana bétsosevenayeca, er Bëngbe Bëtsabe Espíritu, chë corente bëtsá endmëná, sempre tšëngaftangbe ainaniñe iuétsemna.

<sup>15</sup> Tšëngaftanguentše ndocná chabondëtsemna jasúfriama inýa óbanaye causa, atbëbanama, bacna soyënga ínýengbiana amama, o ínýengbe soyënguiñe ontremetënana.

<sup>16</sup> Pero Cristbe ustoná tomnama tojasufrí, chama ndoñe chaondëtsëuatja; chamna, Bëngbe Bëtsábioye chabotsatschuaná, cha Cristbe ustoná bétsemnama.

<sup>17</sup> Er chë tempo ya tojobuache, Bëngbe Bëtsá jayanama, cach Crístbeñe ošbuáchiyëngbiana, chabe entsangbiana, tšabá o ndoñe tšabá tmonjamama. Cha chca bëngbiana jayanama tojontšese, chë chabe palabra ndobedecenëngaftaca yochjanopasacá puerte uabouana echántsemna, cha chëngbiana chca chaojayana ora.

<sup>18</sup> Y chca, chë Bëngbe Bëtsabe bominýiñe tšabá amabiana ndoñe paselo atsbocaná jtsemnana tontsemnëse, ¿ntšamo yochjopása chë Bëngbe Bëtsábioye ndoñe adórayënga y chë bacna soye amëngaftaca?

<sup>19</sup> Chcasna, chë imosufrínëngaftaca Bëngbe Bëtsá chca yobóseyeca, entsamna chë tšabe soyënga jtsamana y Bëngbe Bëtsabe cucuatšiñe chëngbe espíritu chamoboshjona cha chaotsinýenama, er cha chënga tojánabiana, y njetsca soyënguiñe tšabe palabra bomná cha endmëna.

## 5

*Crístbeñe ošbuáchiyënga jábuayenama*

<sup>1</sup> Y mora, chë tšëngaftangbentše ošbuachiyëngcá enefjuanëngbeñe bëtšëjemëngcá amëndayënga chanjabuayená, atše cach tšëngaftangcá bëtšëjema, canýa ntšamo Cristo tonjansufricá tonjaninýá y chama ínýenga tonjanéyana, y canýa ndábioye cach tšëngaftangcá Bëngbe Bëtsá bochjábema más uámana y bëtšá, Cristo entsángbeñe chaojtonýná ora; tšëngaftanga cbaruayená.

<sup>2</sup> Ošbuáchiyënga šmochtsanýena; chënga chašotsanýenama Bëngbe Bëtsá chca tcmojábiana. Chca, chentša ošbuachiyëngbeñe šmochtsama ntšamo canýe tšabe abujëñýa chabe oveshëngaftaca endbetsamcá. Bëngbe Bëtsabe trabajo ndoñe šmattsama, nýe cmojtsétocanama, ndayá chca jamama šmojtsebóseyeca. Chca ndoñe šmatjama nýe paselo crocénana juácana, ndayá ínýengbioye jujabuáchama tša šmobóseyeca.

<sup>3</sup> Chë cmojtsamna jtsanýenama ošbuáchiyënga ndoñe nýe bëtscá šmattsamëndaye, mo chëngbe nduiñënga cuafjatsmëngcá, ndayá ntšamo tšëngaftanga šmojtšiyenama, chënga šmochjínýanýiye ntšamo yojtsamna jtšiyenana.

<sup>4</sup> Chca, chë bënga njetscanga, mo chë tšabe abujëñýacá šuanýená, quem luaroye yochjésabo ora, mo canýe uabuashinýinýana coronëshana ndocna te tontsandbemëshacá, tšëngaftanga canýe bëtš uacanana soye šmochanjóyëngacñe, y chë soye endmëna njetsca

tescama; Bëngbe Bëtsá uámanënga y bëtsétsanga cmochanjábiana, cháftaca nyets tempo oyejuayënga jtsemnëse.

<sup>5</sup> Cachcá, tšëngaftanga chë bobontséngnaca cbabuayená, sempre šmochtsejuabnaye chë bëtsëjémënga tšëngaftangbe amëndayënga imomnama, y chca šmochtsama. Cada ona tšëngaftanguentsá bontsemna jtsejuabnayana chë ínÿenga tšëngaftangbiana más uámanënga cuaftsemncá, ínÿengbioye šmojtsaservena ora; er ntšamo Bëngbe Bëtsabe uabemana palabrenguiñe endayancá:

Bëngbe Bëtsá chë nÿe cachënga uámanënga tmojtsenobiamnangbe contra entsemna, y chë ndoñe uámanënga montsenobiamnangbiamna, Bëngbe Bëtsá más tšabe juabna entsebmna ca.

<sup>6</sup> Sempre šmochtsejuabnaye Bëngbe Bëtsá chë más bëtsá nyetscangbiana yomnama, y nyets mando y obenana bomná yomnama, y chabe delante ndoñe uámanënga šmattsenobiamnaye, cha más uámanënga chácmabiamama, chama chë tempo chaojobuache ora.

<sup>7</sup> Nyetsca soyënga ndayama šmuenócochinÿenama Bëngbe Bëtsabe cucuatšinë šmochjáboshjona, er cha tšëngaftanga yejuana cmondánÿena.

<sup>8</sup> Cach tšëngaftanga jenomándama chašmotsobena y sempre šmochtseprontana, er tšëngaftangbe uayayá Satanás, mo canÿe león tojtsejató, nda jtsósañama tojtsana orcá, chë diablo, sempre jtsebošana jamama, tšëngaftanga Jesucristbeñe ošbuáchiyana chašmotsajbanama.

<sup>9</sup> Puerte šmochtomorócha, Jesucristbeñe bëtscá jtsošbuáchiyëse, chë uayayá tondaye chaondobená tšëngaftangftaca jamama, cach tšëngaftangcá Jesucristbeñe ošbuáchiyënga nyets luarënguenache cachcá jasúfriama yojtsamnama jtsetatšëmbëse.

<sup>10</sup> Pero tšëngaftanga baseftayté chašmojasufri chentšana, Bëngbe Bëtsá cmochanjábiana nyetsca soyënguiñe puerte tšábenga, puerte chašmotsemorochama, bëtscá ošbuáchiyana y bonshánana bomnënga jtsemnëse, y ainaniñe corente añemo bomnënga chašmotsemnama; Bëngbe Bëtsá, chë bëngbiana tšabe juabna bomná, bënga nyetsca tšabe soyënga šonjatšatá, y nda bënga šojáchembo nyetsca tescama bëtsétsanga jtsemnama, chca echanjama.

<sup>11</sup> Cha nyets obenana nyets tempo y nyetsca tescama chaotsebmna. Chca chaotsemna.

### *Jtadiósoftanama*

<sup>12</sup> Silvano, ndabiana sëndëjuabná atšbiana canÿe tšabe palabra bomná Jesucristbeyeca catšata yomnama, cháftaca quem base tsbuanácha tcbonjubuábiana. Atše sëntseboše tšëngaftanga añemo jatšatayana y jáuyanana, ndegombre ntšamo tcbonjubuabiamcá yojtsoyebuambná ntšamo Bëngbe Bëtsá tšabe bendicionënga cmatšatnama. Chíyeca, sempre šmochjëftsiyena jtsamëse ntšamo chabe tšabe juabna tšëngaftangbiana yomncá.

<sup>13</sup> Ošbuáchiyënga muentše átšeftaca montsemnënga cmontsacheuaná. Chënga quem bëts pueblentše mondoyena bacá uamana entšangftaca, mo chë tempo, Babilonia bëts pueblota imojoyena entšangcá, pero Bëngbe Bëtsá muentša ošbuáchiyënga tojabacacá cach tšëngaftangbioycá. Marcos, chë atšbiana mo uaqiñacá endmëná, chánaca cmontsacheuaná.

<sup>14</sup> Nyetscanga Jesucristbeyeca catšatangcá šmochjenchuaye, jtenámochëse tša šmojtsenbobonshánama.

Atše, Bëngbe Bëtsá sëntseimpadana cha chaoma tšëngaftanga chë Jesucristoftaca cánÿiñe mo canÿacá šmomnënga, nyetscanga ainaniñe tšabe ebionana chašmotsebmnama.

## 2 San Pedro

### *Jacheuayama*

<sup>1</sup> Atše Simón Pedro, Jesucristbe oservená y chabe ichmoná, quem tsbuanácha sentsabiamná tšëngaftangbiamá, ndëmuanýënga šmojashjache jtsebomnama canýe ošbuáchiyana Jesucristbeñe, cach bëngbe ošbuachiyancá uámanana, er Bëngbe Bëtsá y Atsebacayá Jesucristo, jtsebošana ndánaca y nýetscanga chábeñe chamotsošbuáchema.

<sup>2</sup> Atše sëntseimpadana, tšëngaftanga Bëngbe Bëtsabiamá y Bëngbe Utabná Jesusbiamá cada te más jtsetatšëmbëse, Bëngbe Bëtsá chaoma tšabe bendicionënga tšëngaftangbeñe chaotsemnama y chaoma tšëngaftanga ainaniñe tšabe ebionana chašmotsebomnama.

### *Chë Jesucristbeñe ošbuáchiyëngbe tšabe soyënga*

<sup>3</sup> Bëngbe Bëtsá chabe obenánaca tojama bënga chamobená jtsebomnama, lempe ntšamo tmojtsejabortcá tšabe vida jtsebomnama y jtseyenama, Bëngbe Bëtsá jadórana soyënga jtsamëse. Cha chca tojama bënga chábioye chamotsábuatmama tojanma ora. Cha bënga šojáchembo, cachá obená y uamaná bëtsemnama y bëtš soyënga jamëse, chabe entšanga chamotsemnama.

<sup>4</sup> Chca, Bëngbe Bëtsá šojatšatá ntšamo bënga jatšatayama tojanašebuachenacá, bëtš y uámana soyënga, chca, quem luarentša bacna soyënguentsána chašmotsojuánañama. Chë bacna soyënga quem luarentše jtsebínýnana, entšanga nýe cachëngbe bacna juabnëngaca jtseyenama yapa boše causa. Chánaca chë tšabe soyënga šojatšatá, tšëngaftanga cháftaca cánýiñe mo canýacá chašmotsemnama, cachacá jtsemnama jashjáchëse.

<sup>5</sup> Chca, ndoñe quenátsmëna nýe Jesucristbeñe ošbuáchiyana jtsebomnana; chiñe šmochjenobuáshjache, bëtscá tšabe soyënga jtsamëse; chora bëtscá šmochtsama Bëngbe Bëtsabe soyëngama chacmotsësertánama;

<sup>6</sup> chora bëtscá šmochtsama cach tšëngaftanga jenomándama chašmotsobenama; y chca, tšëngaftanga masque padecena soyënguiñe chašmojtsachnëjuana, ainaniñe puerte añemo jtsebomnëse, puerte uantadënga chašmotsemnama; y chentšana bëtscá šmochtsama, tšëngaftanga Bëngbe Bëtsá šmojtsadoránama jinýanýiyama; y

<sup>7</sup> chca, nýetsca tšëngaftanga ošbuáchiyënga chašmotsenbobonshana; y chca, nýetsca entšanga chašmotsababuánýeshana.

<sup>8</sup> Tšëngaftanga lempe chë soyënga šmojtsebomna, y bëtscá chca šmojtsamëse, šmochantsiyena becá oservena soyënga jtsamëse, y chentšana puerte tšabe soyënga echantsóbocana, corente tšabá Bëngbe Utabná Jesucristo chašmotsábuatmama.

<sup>9</sup> Pero nda quem soyënga ndoñe tontsama, Bëngbe Bëtsabe soyëngama ndoñe ntsoertánana; y chca, cha mo canýe jtaná o nduabinýnacá jtsemnana; cha tbojtsebnatjëmbe Bëngbe Bëtsá chabe tempsca bacna soyënga tbojtsebojuánama, y Bëngbe Bëtsabe delante cachiñe tšabá chaotsatsmënama tojamama.

<sup>10</sup> Chíyeca, Jesucristbeyeca atšbe catšátanga, nýa šmochtsentšena chca tšabe soyënga jtsamama, y chca, corente tšabá šmochanjátatšëmbona, Bëngbe Bëtsá chabe entšanga chašmotsemnama tcmojáchembuama y tcmojábacacama; y chca jtsamëse, Jesucristbeñe ošbuáchiyana ndocna te quešmochatajbaná.

<sup>11</sup> Chca, Bëngbe Bëtsá oyejuayá tšëngaftangbiamá echanjama, Bëngbe Utabná y Atsebacayá Jesucristbe amëndayoye jamashënguama ndegombre chašmobenama.

<sup>12</sup> Chcáyecna, atše sëntsejuabná tšëngaftangbioye sempre chë soyëngama jtsabuayiy-nayana, masque chë soyëngama ya šmotátšëmbo, y tša šmojtsošbuaché Bëngbe Bëtsabe ndegombre soyënguiñe y chca šmojtsiyena, chë mora šmojtsetátšëmbo soyënguiñe.

<sup>13</sup> Sëntsejuabná, chaijëftsainëntscuana tšabá yojtsemna jamana, ainaniñe bëtscá añemo chašmotsebomnama chë soyënga jtsamama, ntšamo tijayancá jtsabuayiynayëse.

<sup>14</sup> Atše sëntsetatšëmbo, ndoñe baytese y atšbe ainana Bëngbe Bëtsábioye yochtá, ntšamo Bëngbe Utabná Jesucristo šonjëftsanbuayenacá;

<sup>15</sup> pero bëtscá chanjëftsema, atše chaijóbana chentšánënaca tšëngaftanga nyets tempo chë soyëngama chašmotsenójuabnama.

### *Cristo corente uamaná y obená yojamnama tmojáninýe ora*

<sup>16</sup> Bëngbe Utabnabe obenanama y cha yochjésabama ntšamo tcbonjanabuatambacá, ndoñe quenjatsmëna entšangbe osertanánaca pormana cuentëngaca, er cach bënga botamana fsënjáninýe chabe uámanana y obenana.

<sup>17</sup> Bëngbe Bëtsá chë Taitá, Jesucristo puerte obenana bomná bëtsemnama y cha corente bëtscá y uamaná bëtsemnama tonjaninýinýe ora, bënga fsënjáninýe. Chca fsënjáninýe Bëngbe Bëtsá, chë puerte uámana y bëtscábiocana oyebuambnayana Jesúsbioye mëntšá tbonjanianya ora: “Mua atšbe bonshana Uaquiñá endmëna, atše chabiamana sëntsoyejuá ca.”

<sup>18</sup> Cach bënga chë oyebuambnayana fsënjanuena, chë celocana tonjanóbocnana, er bënga Bëngbe Utabnáftaca fsënjánmëna, chë uámana tjoca.

<sup>19</sup> Chë sóyeca bënga fsëntsobena corente jtsetatšëmbuana, ntšamo chë Bëngbe Bëtsabe juabna oyebuambnayënga tmojanayancá ndegombre bëtsemnama, y tšëngaftanga tšabá šmochántsama, ntšamo chënga tmojanayancá šmojtseyeunanëse. Chca, chëngbe palabrëngaca entsopodena Bëngbe Bëtsabe soyëngama tšëngaftanga jinýanýiyana, y echántsemna mo canýe uajuinýanësha canýe ibetiñe luarentše tojtsebinýnacá. Chë soyënga šmochtsuenana Jesucristo yochjésabëntscuana; chora, cha nyetsca soyënga cmochanjínýanýiye, mo tšëngaftangbiamana canýe tsëm te cuafjabinýncá, y chë jabínýnama ora bínýnaye estrella tojábocna tšëngaftanga jabuabinýnamcá.

<sup>20</sup> Pero natsana chacmësertá, ndocna palabra Bëngbe Bëtsabe uabemana palabrënguiñe tojayana canýe soye yochjopása ca, cabá chca ndopása ora, nye cach Bëngbe Bëtsabe juabna oyebuambnayëngbe juabnentšana tojanóbocnana;

<sup>21</sup> er Bëngbe Bëtsabe juabna oyebuambnayënga ndoñe monjanoyebuambná nye chënga chca jamama innabóseyeca, ndayá Bëngbe Bëtsabe cuenta tmojanoyebuambá, chë Uámana Espiritu chënga chca chamóyeuambama tojánmayeca.

## 2

### *Chë ndoñe ndegombre soyënga buátëmbayënga (Jud 4-13)*

<sup>1</sup> Chë Bëngbe Bëtsabe juabna oyebuambnayëngbe tempo, Israeloca entšángbeñe baseftángnaca imojamna, ndëmuanýënga imojichamo chënga ndegombre chca juabna oyebuambnayënga imojamna ca, pero ndegombre ndoñe chcanga imojamna; cachcá, tšëngaftangbeñe abuatambayënga mochántsemna, y chënga ndoñe ndegombre soyënga mochántsabuatambaye, pero ndegombre soyëngaca cánýiñe, chca, chënga chca imojtsabuátambama entšanga ndoñe chamondëtatšëmbonama. Chë buátëmbana soyënga echanjama, entšanga ndoñe ndegombre soyënga y bacna soyënga chamotsamama. Ntšamo chënga mochántsama y mochántsabuatambaye soyëngaca, mochántsama Jesucristo ndoñe chëngbe Utabná chaondëtsemnama, cha nda chënga tojatsebacá, mo nda ínýënga játsebacama crocénana cuafjëtsajocá. Y chca, nye ndeolpe, chë Bëngbe Bëtsábiocana uabouana castigo nyetsca tescama mochántsebomna.

<sup>2</sup> Banga chëngbioye mochantsësetona, nyetscna bacna soye, jenomándama ntsobencá jtsamëse; y chëngbe causa, ínýënga ndoñe tšabá quemochátoyebuambnaye chë tšabe benachama, chë ndegombre soyëngaca benache jtishachama.

<sup>3</sup> Chënga bëtská crocénana jtsebmnama yapa mochántseboše causa, ba bostero soyëngaca cmochántsaingñaye; pero Bëngbe Bëtsá tempo chëngbiamna tojánayana, ndoñe tšabá imojtsamama y chëngbiamna castigo nyëtsca tescama chaotsemnámna.

<sup>4</sup> Bëngbe Bëtsá chë bacna soyënga tmojanma angelëngbioye ndoñe tonjanaperdoná, ndayá infiernoye tojtsanatsatše y puerte íbetiñe tojtsanabáshejuana, chë uabouana tboca chamoquedama, Bëngbe Bëtsá chëngbiamna nyëtsca tescama castigo chamotsebmnama yochjayana orscama.

<sup>5</sup> Y cach ndoñe quem luarentša entsángbioye tonjanaperdoná Noé yojëftsiyena ora, y chënga jácastigama aiñe tojanma chë uabouana uaftena chëngbeñe chaotsemnana, chë nduauenana y bacna entsanga jtsapochócama. Chentšana, nye Noébioye, tbojanatsbocá, nda entsanga yojanabuayiyná ntšamo jtsiyenana, Bëngbe Bëtsabe bominiñe tšabá yomncá jtsamëse; cha y inye canyëftangnaca tojanatsebacá.

<sup>6</sup> Bayté entsemna, Bëngbe Bëtsánaca tojánayana chë Sodoma y Gomorra bëts pueblentša entsanga, yapa bacna entsanga imojamnama, bëts castigo jtsebmnama yojánamnama; y íñesheca tojtsanapochocá, chë pueblënga y chentša entsanga jatinyá jtsabiamëntscuana. Y chë sóyeca Bëngbe Bëtsá tojaninyanyé ntšamo bacna entsángaftaca yochjama, chë chentšana mochsiyena bacna entsangbiamna.

<sup>7</sup> Pero Bëngbe Bëtsá Lótbioye tbojanatsbocá, chë bëts pueblënga pochócaentšana. Cha yojamna Bëngbe Bëtsabe bominiñe tšabá amá, y ntšamo chë luarentša entsanga imojaniyenama, nyëtsca bacna soye jtsamëse, jenomándama ntšobencá, cha puerte ngménana inabomna.

<sup>8</sup> Er quem tšabe entsá, chëngbeñe oyená, chë entsanga imojtsama bacna soyënga cada te yojanonýaye y yojanuenana ora, puerte chabe tšabe ainaniñe inasufrina.

<sup>9</sup> Chca, Bëngbe Utabná endobena chë Bëngbe Bëtsábioye adórayënga játsebacana padecena soyënguentšana y bacna soyënga jamama juabnënguentšana, y chë bacna soyënga jamama uamanëngna castigánënga jtsabamnama, chë ntšamo chënga imojaniyenëntscuana imojanamcá ndoñe tšabá yonjamna ca Bëngbe Bëtsá yochjayana tescama, y chënga nyëtsca tescama chë bëts castigo chamotsebmnama jamándama.

<sup>10</sup> Chca ndegombre endmëna, y más chë ndëmuanýënga nye cachëngbe cuerpëngama bacna juabnëngaca jtsamëse imoyenëngbiamna, chënga chë Bëngbe Utabnabe mando jtsaboténana. Chënga bacá buátšenanënga mondmëna y jtsebošana nye ntšamo cachënga tmojtsejuabnacá chaotsemnana, y ndoñe ntšauatjana chë espíritënga obenana bomnëngbiamna puerte bacna soyënga jtsóyebuambnayama.

<sup>11</sup> Chamna chë angelënga, masque más añemo y obenana bomnënga mondmëna, ndoñe jenñémuana chë espíritënga obenana bomnëngbiamna chca jayanama, chëngbiamna ndoñe tšabe soyënga jtsóyebuambnayëse, Bëngbe Utabnabe delante.

<sup>12</sup> Pero chë buátëmbayënga, chë cachënga ndoñe tontsësertana soyëngama puerte bacá jtsóyebuambnayana, y chca, chënga mondmëna mo tja bayëngcá, soyënga tšabá josértama juabna ndbomnënga; chënga jtsiyenana nye ntšamo tojtsebiona y tmojtsebošcá, y chënga jónynana, chámuashebuayama y chamëbáyama. Chë buátëmbayënga mo chë bayëngcá mochántsapochocaye.

<sup>13</sup> Chënga mochanjasúfria, ínýënga chamosufrima tmojama causa. Chëngbe oyejuayana endmëna nye chora chënga tšabá jtsemnana soyënga. Tšëngaftangftaca cánýiñe mo ošbuachiyëngcá tmojtšesá ora, tšëngaftangbiamna ouatjca jtsemnana y chëngbe causa, ínýënga tšëngaftangbiamna podësca mochántsicamo, er chënga chentše oyejuayënga jtsemnana, nye chënga tšabá jtsemnana jtsamëse; y chënga tšëngaftangbeñe jtsemnana, tšëngaftangbioye jtsaíngñase.

<sup>14</sup> Chënga ndoñe ntšobenana canye shembása jinýana, cháftaca bacna soye jamama ntsebošcá, y sempre jtsenguayana ntšamo bacna soye jamama. Chënga chë Jesucristbeñe nye batšá ošbuachiyana bomnënga jtsaíngñayana, y sempre jtsentšénana nye más soyënga

jésebošama y jésebomnama, ínŷenga tmobomnama más soyënga jashjáchama; chënga montsemna pochocánënga jtsemnama.

<sup>15</sup> Chënga chë tšabe benachentšana tmojtsojuánañe, y mora mo otšenëngcá montsemna. Chca chënga imojtsiyena jtsamëse, mo chë Bëngbe Bëtsabe juabna oyebuambnayá Balaamcá, cha ndoñe tšabá tonjanma orcá; Balaam Beorbe uaquiñá. Cha yapa inaboše bëtscá crocénana juácánama ínŷengbiamama bacna soyënga jtsamëse;

<sup>16</sup> y Bëngbe Bëtsá, chábioye chabe bacna soyëngama tbojanácacana, cachabe asno chábioye chabuatsëtsama jamëse; y chca, ndoñe tbonjanlesenciá jama chë ndocna juábnaca soye jamama.

<sup>17</sup> Entšanga jtsobátmanana chënga bëtscá tšabe soyënga chamotsamama, pero chë tmojt sama soyënga tondayama ntoservénana, y chca, chënga jtsemnana mo búyeshe obocantšë tojtsebuashjá; y chënga mora canŷe soye jtsejuabnayana y chentšana inŷetšá; chca chënga jtsemnana mo jantšetëshënga bëtš bínŷiaca bonjnëshëngcá. Chëngbiamama Bëngbe Bëtsá tojayana castigo chamotsebomnama, chë más ibetoca, tondaye binŷniñe luarentšë.

<sup>18</sup> Chënga ba botamana palabrëngaca jtsenábotamnayana, pero tondayama ntoservénana; y chë cabá mora Jesucristbeñe tmojtsošbuachëngbioye jtsaíngñayama, chënga ntšamo chëngbe enutënga Bëngbe Bëtsábioye nduabuátmënga imoyencá jtsiyenama imojtsajbananga. Chë buátëmbayënga chë soye jtsamana, chëngbioye jáyëñanase, nŷe cachënga tšabá jtsomñamama bacna juabnëngaca soyënga chamotsamama, cachënga jenomándama ntosobencá.

<sup>19</sup> Chë abuátambayënga jašebuachenana tšabe vida jónŷenama, nŷe ntšamo chënga tmojtsebošcá jtsejuabnayëse y jtsamëse; pero cachënga mondoyena cachëngbe bacna juabnëngaca mandánënga, y chca, chënga montsajna pochocánënga jtsemnama, er ndaye entšánaca mandaná jtsemnana, chë nŷets tempo tobedecena sóyeca.

<sup>20</sup> Er ndëmuanŷënga, Bëngbe Utabná y Atsebacayá Jesucristo tmojtsábuatmama, tmojtsajbaná oyenana mo chë nŷe quem luarama enójuabnaye entšangcá, nŷetsca bacna soye amana y tša bacna juabnënga ainaniñe bomnana, pero mora cachiñe chë soyënguiñe tmojtésajna, y cachiñe mandánënga tmojtsemna chë bacna juabnëngaca, chënga mora más bacá tempscama jabocanana.

<sup>21</sup> Chëngbiamama más tšabá manjamna ndoñe ntjobenayana jtsetatšëmbuana ntšamo Bëngbe Bëtsabe bominiñe tšabá yomncá inétsamama, chë soye jatabuátmanana y chentšana játajbanana chë buatëmbana soyënga y chë abuayiynayëngaftaca chëngbioye Bëngbe Bëtsá tojanoyé mandënga jtsobedecénana.

<sup>22</sup> Pero chëngaftaca tojopasá ntšamo entšanga mondëntšayancá chca ndegombre bëtsemnama: “Chë queše chabe ashconánana tojtsemnoye jesshéconana ca” y “chë cotšë cabá chora bebená, ngüichetšoye jana jetsójanuouoyama ca”.

### 3

#### *Jesucristo quem luaroye jésabama ora*

<sup>1</sup> Jesucristbeyeca atšbe bonshana catšátanga, móraca ya uta soyama cbontsëbuabiamná. Quem uta tsbuanáchaca atšë sënjábošena jamama tšëngaftangbe juabna nŷe ena tšabe soyëngaca chaotsemnama, y chca chaotsemnamna atšë jtsabuayiynayëse chë tcmo- janabuatambá soyëngama.

<sup>2</sup> Atšë sëntseboše tšëngaftanga chašmotsenojuabná, ntšamo chë inŷe tempënga ora, chë nŷe Bëngbe Bëtsábioye jtsoservënëse, chabe juabna oyebuambnayënga tmojánayanama, y chë Bëngbe Utabná y Atsebacayabe buatëmbana soyëngama y mandëngama, ndayá chabe ichmónëngaftaca tšëngaftanga šmojanóyëngacñe.

<sup>3</sup> Pero masna quem soye chacmotsésertana: Jesucristo quem luaroye jésabama tempo chaojtsobeco ora, mochántsemna entšanga y chënga mochantsiyena nŷe cachënga tšabá

jtsomñama bacna juabnëngaca, y cmochantsëbuayajuana, chë Cristo yochjésabama šmošbuáchema.

<sup>4</sup> Chënga mëntšá mochántichamo: “Cristo tcmojanašebuachená quem luaroye jésabama. ¿Ndegombre chca? Chcase, ¿ndayentse cha yojtsemna? Bëngbe bëtsësanga, ndëmuanyëngbioye cha tojanašebuachená quem luaroye jésabama, ya tmonjóvana, y quem luarentse lempe cachcá endesomñe, ntšamo quem luare tojanobojatšë orscana enjamncá ca.”

<sup>5</sup> Chë entšanga ndoñe ntsebošana jtsejuabnayana ya bayté yojtsemna, Bëngbe Bëtsá tojanmandá y chca tojanma celoca y quem luare chaotsemnama. Cha quem luare tojanma búyeshentsana y búyesheca;

<sup>6</sup> y cach búyeshecnaca, chë uabouana uafnentša béjayeca, ya bayté yojtsemna, cha lempe quem luarentse yojanbinýncá tojtsanpochocá.

<sup>7</sup> Pero chë mora entsemna celoca y quem luare, cach Bëngbe Bëtsabe mándoca, ndoñe quenáttopodena chamotseepochocama, chë Bëngbe Bëtsá jayanama chábioye ndoñe mondadoránënga ntšamo tmojamcá ndoñe tšabá yonjamnama, y chë bacna soyënga tmojamama nyetsca tescama castigo chamotsebomnama jamándama tempo candóshjanguentscuana. Chora Bëngbe Bëtsá, celoca y quem luare íñesheca echantse-pochóca.

<sup>8</sup> Pero, atšbe bonshánënga, canye soye endmëna y chë soye ndoñe chacmondébnëtjomba: Bëngbe Utabnabe juabnama, canye te endmëna mo canye uaranga uatcá, y canye uaranga uata mo canye tecá.

<sup>9</sup> Ndoñe quenátsmëna, ntšamo báseftanga jtsejuabnayana, ntšamo tojašebuachenacá cha ndoñe betesco yochanjama ca, chë cha quem luaroye jésabama, ndayá chana puerte uantado tšëngaftangafaca comna; er cha jtsebošana ndocná nyetsca tescama castigo chaondëtsebomnama, ndayá nyetscanga bacna soyënga amana jtsajbanase, Bëngbe Bëtsabe tšabe benache chamuashjáchama.

<sup>10</sup> Pero Bëngbe Utabná echanjésabo ndocná chama chaondëtsejuabná ora, mo canye atbëbanacá jashjanguana, ndocná chama tontsejuabná ora. Chora celoca echanjopochóca, canye jabuache shauenanáncaca, y quem luare ndaye soyënguentsana yomnana íñesheca echántsefjatëjo, y ndayá Bëngbe Bëtsá y entšanga quem luarentse tmojamcá, lempe echántsejuinýe.

<sup>11</sup> Lempe chca japochócama entsémnyayeca, ndegombre tšëngaftanga cmontsamna jtsiyenana ntšamo chë Bëngbe Bëtsabe entšanga jtsiyenana entsamncá, y nyets tempo jtsamëse chë Bëngbe Bëtsábioye jtsatschuanayama yomna soyënga,

<sup>12</sup> tšëngaftanga chë Jesucristo quem luaroye jésabama chaóshjanguama šmojtsobátmanentscuana; y nýa šmochtsentsena cha más betesco cháuesabama. Chë te íñesheca celoca echántsejuinýe, y ndaye soyënguentsana quem luare yomnana cach íñesheca echántsefjatëjo.

<sup>13</sup> Pero bënga mondobátmana ntšamo cha sojašebuachenacá: canye tsëm luare, mo canye tsëm celoca y tsëm fshantscá, y chentse nyetscanga mochantsiyena ntšamo Bëngbe Bëtsabe bominiñe tšabá yomncá jtsamëse.

<sup>14</sup> Chíyeca, atšbe bonshánënga, chë soyënga chaotsemnama šmojtsobátmanentscuana, nýa chiñe šmochtsentsena, chca, cha yochjésabo ora, chacmanýena oyeniñe tšabá Bëngbe Bëtsáftaca jtsatsmënëse, ínýengaftaca natjëmbana jtsiyenëse; chacmanýena ainaniñe ndocna bacna soye ndbomnënga, y puerte tšabá jtsamëse oyeniñe; chca, ndocná chaondobená jayanama tšëngaftanga ndaye bacna soye šmojama ca.

<sup>15</sup> Quem soye šmochtsejuabnaye: Bëngbe Atsebacayá ndoñe yapa betesco tonjésabësna, chca jtsemnana cha puerte uantado nyetscángafaca yómnyayeca; chca cha yomna, ba entšanga chë bacna soyënga amana chámajbanama y chabe benache chámuatishachama y chca, atsebácanënga chamotsemnama. Cach quem soyëngámncaca, Jesucristbeyeca bëngbe



bonshana catšata Pablo tcmónjanëbuábiamá, chë Bëngbe Bëtsá tojanma cha chaotsebomnama osertanáca.

<sup>16</sup> Chë soyëngama, Pablo nyetsca chabe tsbuanáchangañe tonjanoyebuambá. Chëchangañe endmëna soyënga totcá josértama; y chë soyëngama, chë Bëngbe Bëtsabe soyëngama ndoñe tmonjuatsjínÿënga, y chë mora canÿe soye jtsejuabnayana y chentsana inÿetsá juabnayënga, jtsejuabnayana y ínÿengbioye jtsabuayiynayana ndoñe ndegombre yondmëna ca. Y cachcá jtsamana inÿe soyëngaca, Bëngbe Bëtsabe uabemana palabrënguiñe. Chca chënga montsajna pochocánënga jtsemnama.

<sup>17</sup> Chíyeca, atšbe bonshánënga, tšëngaftanga chë ya šmojtsetátšëmbo chë ndoñe ndegombre soyënga abuátambayënga mochtsemnama, yejuana šmochtsantješna; chca, chë Bëngbe Bëtsá ntšamo yomandacá ndobedecenëngbe soyëngaca ínÿënga jáingñama, tšëngaftanga ndoñe chašmondëtsemna mo uambanëngcá, ndoñe chašmondëtsajbanama jtsebomnana chë Bëngbe Bëtsabe soyënga ntšamo šmojashjachcá.

<sup>18</sup> Pero atšna, Bëngbe Utabná y Atsebacayá Jesucristo sëntseimpadana, tšëngaftanga chašmotsiyena jtsamëse, chë chábentšana šmojóyëngacñe ba soyënga ntšamo tomnama jtsejuabnayëse, y chaoma tšëngaftanga cada te más tšabá cha chašmotsábuatmama. ¡Nyetscanga cha chamotsatschuaná, mora y nyetsca tescama! Chca chaotsemna.

## 1 San Juan

*Cristo, chë nyetsca tescama yomna tšabe vida entsanga chamotsebomnama amá*

<sup>1</sup> Bënga cbontsëbuabiamná chë Bëngbe Bëtsá ndabiajana inétsoyebuambnabiama, chë nyetsca tescama yomna tšabe vida entsanga chamotsebomnama iuamabiama, chë Bëngbe Bëtsá cabá quem luare ndëma orscana ya yojamnabiama. Bëngbe matscuašëngaca chabe oyeambuayana fsënjouena y bëngbe bomínýeca cha tonjama soyënga fsënjinyë. Aíñe bënga cha fsënjinyë y bëngbe cucuátšeca fsënjábojajo.

<sup>2</sup> Cha bëngbentše tonjanonýná y fsënjáninyë; chíyeca bënga chabiama cbontsëtsësná y cbontsabuayiná, nda sempre vida yobomna y nda chë nyetsca tescama yomna tšabe vida entsanga chamotsebomnama iuama. Chana, chë Taitá Bëngbe Bëtsáftaca inamna, pero mora bëngbioye šojinýané.

<sup>3</sup> Bënga tšëngaftanga cbontsabuayiná ntšamo tifjinýe y tifjouencá, tšëngaftanga cánýiñe mo canýacá bëngaftaca chašmotsemnama. Bënga cánýiñe mo canýacá fsëndmëna chë Taitá Bëngbe Bëtsáftaca y chabe uaquiñá Jesucristoftaca.

<sup>4</sup> Bënga quem soyënga tšëngaftanga cbontsëbuabiamná, bëngbe oyejuayana corente bëtsá chaotsemnama.

*Bëngbe Bëtsá endmëna chë entsangbiama binýnayá*

<sup>5</sup> Mëntšá entsemna ntšamo Jesucristbentsana tifjouencá y chca tšëngaftanga cbontsabuayiná: Bëngbe Bëtsábeñe lempe binýniñe, lempe tšabá endmëna, y chábeñe tondaye ndoñe chca quenátsmëna.

<sup>6</sup> Bënga tmojtsichamo cháftaca cánýiñe mo canýacá fsëntsemna ca, pero cabá ndoñe Bëngbe Bëtsabe cucuatsiñe, chë binýniñe tmontsemna, y chca, bacna soye juabnayënga y amënga tmojtsiyena, asna, bënga mojtsebobero y ndoñe montsama ntšamo ndegombre yomncá.

<sup>7</sup> Pero bënga chë binýniñe tmojtsiyena, tšabe soye juabnayënga y amënga ntšamo Bëngbe Bëtsá iuamcá, as nyetscanga cánýiñe mo canýacá mochántsemna, y chabe uaquiñá Jesucristbe uabuáshanana buíñeca, Bëngbe Bëtsá bëngbe bacna soyënga sempre šochántsabuanaye, y echanjama bënga chabe delante tšabá chamotsatsmënama.

<sup>8</sup> Bënga bacna soyënga ndoñe queftsátsbomna ca tmojtsichámëse, chca cabënga jt-senoíngñayana y ainaniñe chë ndegombre soyënga ndoñe tmonjýëngacñe;

<sup>9</sup> pero bënga ndegombre bacna soye amënga fsëndmëna ca, Bëngbe Bëtsá tmojauyanëse, cha bënga šochanjínýanyíye cachá chë ntšamo šojiytsašebuachecá amá y nyetsca soyënguiñe tšabá amá yomnama; y chca, nyetsca bëngbe bacna soyënga šochanjáperdonaye y nyetsca bacna soyënga šochanjábuajuanaye.

<sup>10</sup> Bënga tmojtsichamo, bacna soyënga ndoñe chibiatsma ca, chca bënga muattsichamo mo Bëngbe Bëtsá canýe bobero cuaftsemncá, y ntšamo Bëngbe Bëtsá bënga šojauyancá ainaniñe ndoñe tmonjýëngacñe.

## 2

*Cristo, bëngbe obuauyayá*

<sup>1</sup> Tšëngaftanga mo atšbe basengcá, er atše tcbonjanëjabuache Jesucristbe tšabe noti-ciënguiñe chašmotsošbuáchema, quem soyënga cbontsëbuabiamná bacna soyënga ndoñe chašmondëtsamama. Pero ndánaca Crístbeñe ošbuachiyënguentšá bacna soye tojamëse, bënga canýe obuauyayá Bëngbe Bëtsabe delante montsebomna, y cha endmëna Jesucristo, chë nyetsca soyënguiñe tšabá amá.

<sup>2</sup> Jesucristo tonjanóbana ndoñe nye Bëngbe Bëtsá bënga chásuaperdonama bëngbe bacna soyëngama, ndayá quem luarentša nyetsca entságnaca chëngbe bacna soyëngama cháuaperdonama.

<sup>3</sup> Bënga ntšamo Bëngbe Bëtsá šojtsamëndacá tmojtsamëse, ndegombre mochántsetatsëmbo bënga cha imuábuatmama.

<sup>4</sup> Pero nda tojayana: “Atše Bëngbe Bëtsá sënduábuatma ca”, pero ndoñe tontsama ntšamo Bëngbe Bëtsá ibuamëndacá, cha canye bostero jtsemnana y ainaniñe chë Bëngbe Bëtsabe ndegombre soyënga ndoñe tonjóyëngacñe.

<sup>5</sup> Pero nda ntšamo Bëngbe Bëtsá ibuamëndacá tojtsama, jtsinñanñayana chabe ainaniñe Bëngbe Bëtsabiama corente bonshánana yomnama, y chca, mochántsetatsëmbo bënga sempre cányiñe mo canyáca cháftaca imomnama.

<sup>6</sup> Nda tojtsichamo Bëngbe Bëtsáftaca cányiñe mo canyáca yojtsemna ca, bontsemna jtsiyenana soyënga jtsamëse ntšamo Jesucristo yojëftsiyencá.

### *Canye tsëm mando*

<sup>7</sup> Atšbe bonshana entsanga, ntšamo mora cbontsëbuabiamnacá, ndoñe canye tsëm mando quenátsmëna, pero aiñe canye tempsca mando; entsemna cach tsëngaftanga Cristbe ústonënga šmonjanobiama ora šmonjanóyëngacñe mando. Quem tempsca mando entsemna ntšamo tsëngaftanga bëngbentsana šmonjouencá.

<sup>8</sup> Pero masque chca endmënëse, quem cbontsëbuabiamná soye tsëngaftangbiama echántsemna mo canye tsëm mandcá. Cristo enjëftsiyena ntšamo quem Bëngbe Bëtsabe mando ndegombre yomncá y tsëngaftágnaca cachcá šmondoyena, er chë bacna juabnënga jtsebomnëse mo ibetiñcá jtsiyenana tempo ya echanjochnëngo, y chë entsangbe juabna ndegombre binñayá ya entsebuashinñinñana.

<sup>9</sup> Nda tojayana chë binñayáftaca yojtsemna ca, pero cha chabe catsátbioye tbojtsáboyënja, cha cabá tempcá, bacna juabnënga jtsebomnëse yojtsiyena, mo ibetiñcá.

<sup>10</sup> Nda chabe catsátbioye tbojtsebobonshana, cha chë binñayáftaca jtsiyenana, y tondaye queochátsmëna cha bacna soye chaotsamama.

<sup>11</sup> Pero nda chabe catsátbioye tbojtsáboyënja, cha bacna juabnënga jtsebomnëse jtsiyenana, mo canya ibetiñe oyenacá. Cha ndoñe ntsetatsëmbuana chë ndayá tojamama ntšamo chentšana yochjopása, er chë bacna juabnënga jtsebomnëse jtsiyenana chábioye ndoñe ntjalesénciana ntšamo tšabá yomncá chaotsamama.

<sup>12</sup> Básenga, atše cbontsëbuabiamná Bëngbe Bëtsá tsëngaftangbe bacna soyënga tcmojáperdonama, ndayá Jesús tojanma sóyeca.

<sup>13</sup> Taitanga, tsëngaftanga cbontsëbuabiamná, er tsëngaftanga ya šmonjuábuatmana chë quem luare jobojátsama orscana ya inamná. Tsëngaftanga bobontsëgnaca cbontsëbuabiamná, er tsëngaftanga ya chë nyetsca bacna soyënga mandayá Satanás šmonjayëñaná.

<sup>14</sup> Básenga, tsëngaftanga tcbonjubuábiana, er tsëngaftanga chë Taitá ya šmonjuábuatmana. Taitanga, tsëngaftanga tcbonjubuábiana, er tsëngaftanga ya šmonjuábuatmana chë quem luare jobojátsama orscana ya inamná. Bobontsënga, tsëngaftágnaca tcbonjubuábiana, er tsëngaftanga bëtscá añemo ainaniñe šmambá, y Bëngbe Bëtsabe palabrama sempre tsëngaftangbe ainaniñe šmondëjuabná, y chë nyetsca bacna soyënga mandayá šmonjayëñaná.

<sup>15</sup> Ndoñe matsbošana oyejuayënga jtsemnana nye quem luarentša soyëngaca, ni nye chë soyënga jtsebomnama. Nda yapa tojtseboše quem luarentša bacna soyënga jtsebomnama, cha ndoñe chë Taitábioye bondbobonshana.

<sup>16</sup> Er chë nye quem luarama enójuabnayënga mëntsá juabnënga mondbomna: yapa jtsebošana jtsebomnama ntšamo chë ainaniñe bacna juabnënga bomnënga mondbetsebošcá; yapa jtsebošana nye ndayá tmojátinñe soye; y yapa jtsenábotamnayana chë

tmobomna soyëngama. Chë juabnënga Bëngbe Bëtsábiocana ndoñe ntsóbocanana, ndayá nyë chë quem luarama enójuabnayëngbentsana.

<sup>17</sup> Pero quem luare echanjopochóca y nyetsca chentša soyënga, chë entsanga bacna juabnëngaca yapa imoboše jtsebmomna soyëngnaca. Pero nda ntšamo Bëngbe Bëtsá yobošcá tojtsama, cha chë nyetsca tescama yomna tšabe vida echántsebmomna.

### *Chë Cristbe contra yomná*

<sup>18</sup> Básenga, quem luare jopochócama tempo ya entsobeco. Ntšamo tšëngaftanga šmonjouencá, quem tempo echanjabo chë Cristbe contra yomná. Pero morna banga Cristbe contra imomnënga tmonjábocana. Chca bënga montsetátšëmbo chë quem luare jopochócama tempo ya yojtsobecuama.

<sup>19</sup> Chënga cach bëngbentsana tmonjábocana. Pero chënga Jesucristbeñe ndoñe tmonjanošbuachená ntšamo bënga mondošbuachecá, er chënga ntšamo bënga montsošbuachecá mamojtsošbuachese, cach bëngaftaca matmënjoquedanga. Pero chca tonjopasá, ndegombre jtsotatšëmbuama ntšamo bënga Jesucristbeñe mondošbuachecá, chënga nyetscanga ndoñe mondošbuáchema.

<sup>20</sup> Pero Cristo, chë Uamaná, tšëngaftanga tcmónjabacacá, y cha tonjama chë Uámana Espíritu tšëngaftangbe ainaniñe cháumashënguama; y nyetsca tšëngaftanga chë ndegombre soyënga šmondëtatšëmbo.

<sup>21</sup> Atše cbontsëbuabiamná, ndoñe chë ndegombre soyëngama ndoñe šmondëtatšëmbuama, ndayá aiñe šmotatšëmbuama; er tšëngaftanga šmondëtatšëmbo chë ndegombre soyënga y ndoñe ndegombre soyënga cányiñe jtsemnana ndoñe yondopodénama.

<sup>22</sup> Nda tojayana Jesús chë Bëngbe Bëtsabe Uámana Uabuayaná, chë Cristo ndoñe yondmëna ca, chana jtseboosterana. Cha jtsemnana chë Cristbe contra yomná, nda iuichamo Cristo Bëngbe Bëtsabe Uaquiñá ndoñe yondmëna ca, y chca, cha Bëngbe Bëtsabiamna ndoñe ntsejuabnayana cha chë Taitá bëtsemnana.

<sup>23</sup> Nda tojtsichamo Cristo Bëngbe Bëtsabe Uaquiñá ndoñe yondmëna ca, cha chë Taitáftaca cányiñe mo canyácá ndoñe ntsemnana. Pero nda entsángbeñe tojayana, Cristo aiñe Bëngbe Bëtsabe Uaquiñá endmëna ca, chana aiñe chë Taitáftaca cányiñe mo canyácá jtsemnana.

<sup>24</sup> Tšëngaftanga, chë Cristbe ústonënga šmojanóbiamna orscana šmojanuena soye, tšëngaftangbe ainaniñe šmochtsambaye. Chca chašmojtsamëse, tšëngaftanga chë Uaquiñá y chë Taitáftaca cányiñe mo canyácá šmochántsemna.

<sup>25</sup> Y quem soye entsemna ntšamo Cristo šojëftsasëbuachená: chë nyetsca tescama yomna tšabe vida jtsebmomnana.

<sup>26</sup> Atše chca cbontsëbuabiamná, chë tšëngaftanga jáingñayama imojtsebošëngbiama chašmotsetatšëmbuama.

<sup>27</sup> Pero Cristo tcmójanabacacá ora, Uámana Espíritu šmojanóyëngacñe, y mora tšëngaftangbe ainaniñe Uámana Espíritu šmontsebmomna, y ndoñe quenátsiyta ndocná más chacmotsabuátambama, er chë Uámana Espíritu lempe cmontsabuatambá; y cha end-abuatambá ndegombre soyënga, y bostero soyënga ndoñe. Mëntsá, ntšamo chë Uámana Espíritu tcmojabuatambacá jtsiyenëse, Crístoftaca cányiñe mo canyácá šmochtsemna.

<sup>28</sup> Y mora básenga, Crístoftaca cányiñe mo canyácá šmochtsemna, chca, cha chaojabáisebocna ora, chábeñe jtsošbuáchiyëse, bënga añémoca chamotsemnana y ndoñe chamondëtsëuatjama, bënga chabe delante chamojtsemna ora.

<sup>29</sup> Tšëngaftanga šmontsetátšëmbo Jesucristo nyetsca soyënguiñe tšabá amá yomnana. Chcasna, cmontsamna jtsetatšëmbuana, nyetscanga ntšamo Bëngbe Bëtsá yobošcá tmojtsamënga, Bëngbe Bëtsabe básenga imomnana.

## 3

*Cristbeñe ošbuáchiyënga, Bëngbe Bëtsabe básenga*

<sup>1</sup> Menójuabonga, ntsachetsá Bëngbe Bëtsá chë Taitá šondábabuanjeshanama. Chabe bonshánana tša bëtscá endmënyeca, bënga šondëubuabuatma chabe básenga ca, y ndegombre bënga chca mondmëna. Chë causa chë nÿe quem luarama enójuabnayënga ndoñe quenátësertana ntšamo bënga imomnana, er chënga cha ndoñe tmonjanábuatmana.

<sup>2</sup> Atšbe bonshana entšanga, mora bënga ya Bëngbe Bëtsabe básenga montsemna. Y masque cabá ndoñe quemuátstatsëmbo ntšamo más chcoye bënga mochjamnana, aíñe mondëtatšëmbo, Jesucristo chaojabáisebocna ora bënga cachacá mochtsemnana, er bënga mochanjobenaye jinÿama ntšamo cha ndegombre yomncá.

<sup>3</sup> Y nda chca chábeñe puerte jtsošbuáchiyëse tojtsobátmana, bacna soyënga amana jtsajbanana, más tšabia jtsemnana, ntšamo cach Cristo yomncá, lempe tšabia y bacna soye ndbomná.

<sup>4</sup> Pero nda bacna soye tojama, chana ntšamo Bëngbe Bëtsá tojëftsemandacá jtsaboténana; er bacna soye jamana endmëna, jtsabotena ntšamo Bëngbe Bëtsá tojëftsemandacá.

<sup>5</sup> Tšëngaftanga ya šmondëtatšëmbo Jesucristo quem luaroye tojánabo bëngbe bacna soyënga jabëtsabuajuanama, y cha ni mo canÿe bacna soye ndoñe yondbomnana.

<sup>6</sup> Chcasna, nda cánÿiñe mo canÿacá cháftaca nÿets tempo tojtsemna, ndoñe ntsiyenana bacna soyënga jtsamëse. Pero nda tojtsiyena bacna soyënga jtsamëse, Jesucristbiana ndoñe tbonjosertá y ndoñe yondëtatšëmbo ntšamo cha bëtsemnana.

<sup>7</sup> Atšbe básenga, ndocná chacmondaingñé: nda nÿetsca soyënguiñe tšabá tojtsama, cha canÿe tšabá mándbomna entšá jtsemnana, ntšamo Jesucristo yomncá;

<sup>8</sup> pero nda tojtsiyena bacna soyënga jtsamëse, chabe ainaniñe Satanás jtsemándayana, er Satanás quem luare jobojátšama orscana bacna soyënga iuëtsama. Bëngbe Bëtsabe Uaquiñá nÿa quem soyama tojabo: chë Satanabe soyënga jabëtsepochocama.

<sup>9</sup> Ndocná Bëngbe Bëtsabe uaquiñá tojtsemná jtsiyenana bacna soyënga jtsamëse, er cha jtsebomnana chë Bëngbe Bëtsá tbojuántšame tšabe vida, y Bëngbe Bëtsá chabe Taitá endmëna. Chíyeca cha ndoñe ntsiyenana bacna soyënga jtsamëse.

<sup>10</sup> Corente jtsotatsëmbuana ndëmuanÿenga Bëngbe Bëtsabe básenga imomnana y ndëmuanÿenga Satanabe básenga; ndëmuanÿëgnaca ntšamo tšabá yomncá ndoñe tmontsama o chabe catšata ndoñe tmontsebobonshana, ndoñe ntsemnana Bëngbe Bëtsabe básenga.

*Nÿetscanga jtsenbobonshánana*

<sup>11</sup> Quem buayenana entsemna ntšamo tšëngaftanga šmojanuena, tšëngaftanga Cristbe ústonënga šmonjanobiana orscana: nÿetscanga šontsamna jtsenbobonshánana.

<sup>12</sup> Ndoñe Caincá muatjama. Chabe ainaniñe Satanás yojamánda, y chíyeca, chabe uabentsábioye tbojtsanóba. ¿Y ndáyeca tbojtsanóba? Cha ndoñe tšabá yonjánama; chabe uabentsana aíñe; chíyeca tbojtsanóba.

<sup>13</sup> Jesucristbeyeca atšbe catšátanga, ndoñe šmattsenjnanaye chë nÿe quem luarama enójuabnayënga cmojtsëbuayënjama.

<sup>14</sup> Bënga mondëtatšëmbo, bënga tempo monjaniyena chë nÿe quem luarama enójuabnayënga mondoyencá, y chca, Bëngbe Bëtsabiana mo obanëngcá monjamna, er bënga monjaniyena ntšamo Bëngbe Bëtsá ndoñe yondëmandacá. Pero Bëngbe Bëtsá tonjama mora bënga tsëm vida chamotsebomnana, y chca, mo ndegombre ainëngcá montsemna. Chca mondëtatšëmbo, er bënga bëngbe catšátangbioye mondábabuanjeshana. Nda chabe catšátbioye ndoñe tbontsebobonshana, cha cabá mo obanacá jtsiyenana.

<sup>15</sup> Nda cachabe catsátbioye tbojtsáboyënja, cha jtsemnana mo entsanga obanayacá. Y tsëngaftanga šmondétatsëmbo entsanga obanayá ndoñe ntsoybenana jtsiyenana, chë nyetsca tescama yomna tsabe vida chabe ainaniñe jtsebomñese.

<sup>16</sup> Ndayá chë jtsebobonshánana bétsemnana mëntsá montsetatsëmbo: Jesucristo chabe derecho vida jtsobomñama cachcá tojanonyá y bëngbiama tojanóbana; cachcá bënga šontsamna jtsemnana, sempre jtseprontánana chë Jesucristbeyeca bëngbe catsátangbiama jóbanama.

<sup>17</sup> Canya bomnana tojtseboyna y catsátbioye uajabotá tbojtsonyá, pero chabiama ndoñe tbonjongmé y ndoñe tbonjuájabuache, cha ndoñe ntsoybenana Bëngbe Bëtsabiama ainaniñe bonshánana jtseboyna.

<sup>18</sup> Atsbe básenga, ndoñe quešnátamna nye bëngbe catsátanga imuababuányeshana ca jatichámuana, y nye chë bonshánama jatóyebuambnayana; pero ndegombre šontsamna ndayánaca jamana, chca, jinyanjyama, bënga ndegombre inyengbiama imuababuányeshanama.

### *Bëngbe Bëtsabe delante natjëmbana ainánaca entsanga*

<sup>19</sup> Chcase bënga mochántsetatsëmbo, ntšamo chë Bëngbe Bëtsabe ndegombre soyënga yomncá bënga imojtsamama. Y bënga ndoñe quemochátenocochinjena, Bëngbe Bëtsábioca jtsemnana merecido ndoñe mondbuájona ca tmojtsejuabná ora; y bëngbe ainana natjëmbana Bëngbe Bëtsabe delante echántsemna.

<sup>20</sup> Bënga chca bëngbe ainaniñe tmojtsejuabná ora, bënga montsobena natjëmbana ainana jtseboyna, er Bëngbe Bëtsá corente jtsotatsëmbñana ntšamo bëngbe ainana yomnana, y cha lempe yotatsëmbo.

<sup>21</sup> Atsbe bonshana entsanga, bënga ndoñe bacna soye tmonjama ca bëngbe ainaniñe tmojtsejuabnase, jtsobenana añémoca jtsemnana y tondayama ntsauatjca Bëngbe Bëtsabe delante jtsemnana.

<sup>22</sup> Y cha lempe ntšamo chamojotjañcá sochanjatsataye, er bënga montsama ntšamo Bëngbe Bëtsá ibuamandacá y ndayá chabe bominjyine tsabá yomncá.

<sup>23</sup> Y chabe mando endmëna: bënga chabe Uaquiñá Jesucristbeñe jtsošbuáchiyana, y bënga nyetscanga jtsebobonshánana ntšamo Jesús šojëftsamëndacá.

<sup>24</sup> Ntšamo Bëngbe Bëtsá tojëftsemmandacá amënga, Bëngbe Bëtsáftaca cánjyine mo canyacá jtsemnana, y cha sempre chëngaftaca cánjyine mo canyacá echanjëftsemna. Y quem sóyeca bënga montsobena jtsetatsëmbuana cha bëngaftaca iuétsemnana: Uámana Espiritu bëngbe ainaniñe cháumashënguama cha tojama.

## 4

### *Chë Bëngbe Bëtsabe Espiritu y chë Cristbe uayayabe espiritu*

<sup>1</sup> Atsbe bonshana entsanga, nyetscanga chë Bëngbe Bëtsabe juábnaca imoyebuambná ca ichámëngbioye ndoñe šmattsayaunana; botamana šmochjuarrepára corente jtsetatsëmbuama chënga aíñe o ndoñe chë Bëngbe Bëtsabe juábnaca imoyebuambnana. Quem tempo banga Bëngbe Bëtsabe ndoñe ndegombre juabna oyebuambnayënga quem luarëjana mondajna. Chë causa tsëngaftanga cmontsamna botamana chëngbiama juarrepárana.

<sup>2</sup> Chë Bëngbe Bëtsabe Espiritu ndegombre imobomnëngbiama tsëngaftanga mëntsá šmontsobena jtsetatsëmbuana: nda tojayana Jesucristo quem luaroye aíñe entsacá tojánabo ca, cha ndegombre chë Bëngbe Bëtsabe Espiritu yojtseboyna.

<sup>3</sup> Pero nda ndoñe chca Jesucristbiama tonjayana, cha Bëngbe Bëtsabe Espiritu ndoñe yontseboyna; inyetsá, chana chë Cristbe contra yomnabe espiritu yojtseboyna. Tsëngaftanga šmojouena chë espiritu yochjabama; pero ndegombre cha ya quem luarëntse entsemna.

<sup>4</sup> Atšbe básenga, tsëngaftanga Bëngbe Bëtsábenga šmondmëna y ndoñe šmonjalesenciá chë Bëngbe Bëtsabe ndoñe ndegombre juabna oyebuambnayënga tsëngaftangbioye chacmaingñema, er chë nyets tempo tsëngaftangbe ainaniñe vida endbomná, chë nye quem luarama enójuabnayëngbe ainaniñe mándayabiama más obená endmëna.

<sup>5</sup> Chë Bëngbe Bëtsabe ndoñe ndegombre juabna oyebuambnayëngna chë nye quem luarama enójuabnayënguentšana mondmëna, chíyeca chënga nye quem luarentša soyëngama jtsóyebuambnayana, y chë nye quem luarama enójuabnayënga chënga jtsayaunanana.

<sup>6</sup> Pero bënga Bëngbe Bëtsábenga mondmëna. Nda Bëngbe Bëtsábioye tbojtsabatma, bëngbioye jtsayaunanana; pero nda Bëngbe Bëtsábioye ndoñe tbontsabatma, cha bënga ndoñe ntsayaunanana. Chiñe bënga montsobena jtsetatsëmbuana nda chë ndegombre soyënga jóyebuambayama ama espíritu yobomnabiama, y nda chë ínÿëngbioye jáingñama ama espíritu yobomnabiámnaca.

### *Chë bonshánana Bëngbe Bëtsábiocana yóbocana*

<sup>7</sup> Atšbe bonshana entsanga, chë bonshánana Bëngbe Bëtsábiocana endóbocana; chcase, bënga šontsamna nyetscanga jtsenbobonshánana. Nda Bëngbe Bëtsábioye y chë inÿe entsángbioye tojtsababuánÿeshana, cha Bëngbe Bëtsabe uaquiñá jtsemnana y Bëngbe Bëtsábioye jtsabatmana.

<sup>8</sup> Nda ndoñe chca tontsebbonshana, cha Bëngbe Bëtsábioye ndoñe ntsábatmana, er Bëngbe Bëtsá bonshanánaca nyetsca soyënga jamana.

<sup>9</sup> Bëngbe Bëtsá šonjinÿanyé bënga šuababuánÿeshanana, cha chë nye canÿe Uaquiñá ibobomná quem luaroye jíchmuase; cha tbojanichmó, bënga chábeyeca chë nyetsca tescama yomna tsabe vida chamotsebomnama.

<sup>10</sup> Bëngbe Bëtsabe bonshánana mëntšá endmëna: ndoñe quenátsmëna bënga Bëngbe Bëtsá imobobonshánayeca, ndayá cha bënga šojánababuanÿeshanayeca, y chabe Uaquiñá tbojanichmó, cha jóbanëse, bënga bëngbe bacna soyëngama perdonánënga chamotsemnana.

<sup>11</sup> Atšbe bonshana entsanga, Bëngbe Bëtsá chca šuababuánÿeshana; chcasna, bëngnaca šontsamna nyetscanga jtsenbobonshánana.

<sup>12</sup> Ndocná ndocna te Bëngbe Bëtsábioye tbonjinÿe. Bënga nyetscanga tmojtsenbobonshánëse, Bëngbe Bëtsá nyets tempo bëngaftaca echántsemna, y chabe bonshánana puerte bëtská bëngbeñe echántsemna.

<sup>13</sup> Bënga mëntšá montsobena ndegombre jtsetatsëmbuana bënga Bëngbe Bëtsáftaca imomnama y cha bëngaftaca: cha tonjanma chabe Espíritu bëngbe ainaniñe cháuamashënguama.

<sup>14</sup> Y cach bënga fsënjinye y entsanga fsëntsëtsëtsná, chë Taitá chabe Uaquiñá tbojichmoma, quem luarentša entsanga jabátsebacama.

<sup>15</sup> Ndánaca tojayana Jesús Bëngbe Bëtsabe Uaquiñá yomna ca, cha Bëngbe Bëtsáftaca cánÿiñe echántsemna y Bëngbe Bëtsánaca sempre cháftaca cánÿiñe mo canÿacá.

<sup>16</sup> Chcase bënga montsetátšëmbo y montsošbuaché ndegombre Bëngbe Bëtsá bënga šuababuánÿeshanama. Bëngbe Bëtsá nyetsca soyënga bonshanánaca jamana y nda Bëngbe Bëtsá y chë inÿe entsanga sempre tojtsababuánÿeshana, cha Bëngbe Bëtsáftaca cánÿiñe mo canÿacá jtsemnana y Bëngbe Bëtsánaca sempre cháftaca cánÿiñe mo canÿacá.

<sup>17</sup> Chca, Bëngbe Bëtsabe bonshánana puerte bëtská bëngbeñe echántsemna, bënga bëts añémoca y tondayama ntsauatjá chamotsemnana, chë tsabá o ndoñe tsabá tmonjamama entsangbiama jayanama Cristo yochjésabo orscama; er bënga Jesucrístoftaca cánÿiñe mo canÿacá jtsemnëse, quem luarentše mondmëna ntšamo Jesucristo endmëncá.

<sup>18</sup> Nda Bëngbe Bëtsá y chë inÿe entsanga tojtsababuánÿeshana, tondayama ntsauatjana; bënga corente tmojtsebbonshana ora, ndoñe ntsopodénana uatjana jtsebomnana. Canÿe entsá tojtsauatja ora, jtsemnana mo chabe castigo ya cuafjobjatšecá. Chca,

nda uatjana tojtsebomna, Bëngbe Bëtsábioye y chë inye entsanga cha ndoñe corente yondábabuanyeshana, ntšamo Bëngbe Bëtsá bënga šuababuanyeshancá.

<sup>19</sup> Natsana Bëngbe Bëtsá šojánababuanyeshana, y chíyeca bënga, cha y chë inye entsanga imuababuányeshana.

<sup>20</sup> Nda tojayana: “Atše Bëngbe Bëtsábioye sëndbobonshana ca”, pero cachca ora cachabe catsábioye tbojtsáboyënja, cha canye bostero jtsemnana. Canya aíñe jtsobenana chabe catsata jinýama; y cha chë catsábioye ndoñe tbontsebobonshana, ndegombre cha Bëngbe Bëtsábioye ndoñe bondbobonshana, ndábioye jinýama ndoñe ntsoebenana.

<sup>21</sup> Y bënga quem mando chábentsana tmonjanóyëngacñe: nda Bëngbe Bëtsábioye tbojtsebobonshana, cachabe catsábioynaca chabotsebobonshana ca.

## 5

### *Chë Jesucristbeñe ošbuachiyá endobena Satanasbe soyënga jayënjanana*

<sup>1</sup> Nda tojtsošbuaché Jesús chë Uámana Uabuayaná, chë Cristo yomnana, cha Bëngbe Bëtsabe uaquiñá jtsemnana; y nda canye taitábioye tbojtsebobonshana, chë taitabe uaquiñábioynaca cha jtsebobonshánana.

<sup>2</sup> Bënga Bëngbe Bëtsá tmojtsebobonshana y ntšamo cha tojtsemandacá tmojtsamëse, bënga ndegombre mochántsetatsëmbo, chë Bëngbe Bëtsabe basengbioynaca bënga imuababuányeshanama.

<sup>3</sup> Bënga Bëngbe Bëtsábioye imobobonshánama quem soyiñe jtsinýnana: bënga ntšamo Bëngbe Bëtsá tomandacá tmojtsamëse. Y ndayá Bëngbe Bëtsá yomandacá ndoñe yapa totcá quenátsmëna bënga chamotsamama.

<sup>4</sup> Nda Bëngbe Bëtsabe uaquiñá tomna, chana jáyënjanana quem luarentša entsanga y soyënga ntšamo Satanás yomandacá. Quem luarentša entsanga y soyënga ntšamo Satanás yomandacá, Crístbeñe bënga imošbuachéyeca montsobena bënga jayënjanana.

<sup>5</sup> Nye nda, Jesús Bëngbe Bëtsabe Uaquiñá yomnana tojtsošbuaché, cha jtsobenana chë entsanga y soyënga ntšamo Satanás yomandacá jayënjanana; ndocná más.

### *Bëngbe Bëtsá tojinýanýé ntšamo chabe Uaquiñabiama ndegombre yomncá*

<sup>6</sup> Cach Jesucristo endmëna nda quem luaroye tojánabo y mëntšá tojanenonýinýé: búyeshca cha tmojanabaye ora, y buiñe juabuáshanëse cha tonjanóbana ora. Cha ndoñe tonjanenonýinýé nye búyeshca, ndayá búyeshca y buiñeca. Cach Uámana Espíritu entsobena jayanana chca ndegombre bëtsemnana Jesusbiamá, er chë Espíritu endmëna chë sempre ndegombre oyebuambnayá.

<sup>7</sup> Endmëna unga soyënga, ndayá iuinýanýná ntšamo ndegombre yomncá Jesusbiamá:

<sup>8</sup> Espíritu, búyeshca y buiñe; y chë unga soyënga lempe cachcá Jesusbiamá jtsinýanýnayana.

<sup>9</sup> Bënga mondbétsejuabnaye, ndayá entsanga tmojinýe ca tmojtsichámuama mo ndegombre cuaftsemncá, pero ndayá Bëngbe Bëtsá tojtsichamcá chë ndegombre soye jtsemnana y puerte jtsámanana, er chë ndegombre soye ntšamo cha tojtsichamcá, endmëna ndayá chabe Uaquiñabiama iuichamcá.

<sup>10</sup> Nda Bëngbe Bëtsabe Uaquiñábeñe tojtsošbuaché, cha chca nyets tempo chabe ainaniñe jtsejuabnayana; nda Bëngbe Bëtsábeñe ndoñe tontsošbuaché, cha chca jtsamana mo Bëngbe Bëtsá canye bostero cuaftsemncá, er chë Bëngbe Bëtsá chabe Uaquiñabiama tojayana soyama cha jtsejuabnayana ndoñe ndegombre yontsemna ca.

<sup>11</sup> Ntšamo Bëngbe Bëtsá chabe Uaquiñabiama tojayancá mëntšá entsemna: Bëngbe Bëtsá bëngbiamá tojama chë nyetsca tescama yomna tšabe vida chamotsebomnana; y quem vida chabe Uaquiñábeñe entsemna.



<sup>12</sup> Nda Bëngbe Bëtsabe Uaquiñáftaca cánýiñe mo canýacá tojtsemna, cha chë tšabe vídnaca jtsebmónana; pero nda chë Bëngbe Bëtsabe Uaquiñáftaca cánýiñe mo canýacá ndoñe tontsemna, cha chë nyetsca tescama yomna tšabe vida ndoñe ntsebmónana ca.

*Inýe soyëngama jábuayenama y jtadiósoftanama*

<sup>13</sup> Tšëngaftanga, chë Bëngbe Bëtsabe Uaquiñábeñe šmošbuachéngbioye quem soyënga cbontsëbuabiamná, ndegombre chašmotsetatšëmbuama chë nyetsca tescama yomna tšabe vida šmojtsebmónama.

<sup>14</sup> Bënga bëts añémoca y ndauatjá Bëngbe Bëtsabe delante mondmëna, er bënga mondetatšëmbo, nderado ntšamo chaotsemnana cha tojtsebošcá bënga tmojtotañe ora, cha bënga šnétsayaunanama.

<sup>15</sup> Nderado ndayá chca Bëngbe Bëtsábioye tmojtsotjanañe ora, cha bënga joyaunayana; bënga mondetatšëmbo chca ndegombre yomnana, y chca, bëgnaca montsetatšëmbo, ndayánaca chábioye bënga chamojtotañcá cha šochjátšatayama.

<sup>16</sup> Nda cachabe catšátbioye tbojinýe canýe bacna soye tojtsamama, pero chë bacna soye tojamentšana cha perdonaná jtsemnana cabá tojtsopodénëse, chábioye bontsemna Bëngbe Bëtsá jaimpádana, y chca, Bëngbe Bëtsá echanjama chë catšata chë nyetsca tescama yomna tšabe vida chaotsebmónama, cha chca tojamentšana perdonaná jtsemnana cabá tojtsopodénëse. Pero canýe bacna soye endmëna, y chca tojamama canýa ndoñe ntsobenana perdonaná jtsemnana, y chca, cha jabocnana canýa nyetsca tescama castiganá chaotsemnana, y atše ndoñe quetsátichamo chë bacna soyama yojtsemna Bëngbe Bëtsá jtseimpadánana chaboperdonama ca.

<sup>17</sup> Nda tojtsama ntšamo Bëngbe Bëtsá ndoñe yondëmandacá, cha bacna soye jtsamana; pero nyetsca bacna soyënga ntšamo canýa tojtsamcá, ndoñe ntjamana cha ndëperdonaná chaotsemnana.

<sup>18</sup> Bënga mondetatšëmbo, nda Bëngbe Bëtsábioye mo taitacá tbojtsebmóna, cha ndoñe ntsiyenana bacna soyënga jtsamëse, er chë Bëngbe Bëtsábentšana Onýnaná chábioye jtsinýenana, y Satanás, chë nyetsca bacna soyënga amëndayá, tondaye ntsobenana chábioye jabórlana.

<sup>19</sup> Bënga mondetatšëmbo, bënga chë Crístbeñe ošbuáchiyënga Bëngbe Bëtsábënga imomnana, y chë quem luarentša inýe entšanga Satanasbe cucuatšinë imomnana.

<sup>20</sup> Bëgnaca mondetatšëmbo Bëngbe Bëtsabe Uaquiñá tojabama, y cha iuama bënga osertánana chamotsebmónama, chë ndegombre Bëngbe Bëtsá yomná jtsabuatmama. Bënga chë ndegombráftaca cánýiñe mo canýacá mondmëna, bënga chabe Uaquiñáftaca cánýiñe bëtsemnayeca. Cha chë ndegombre Bëngbe Bëtsá endmëna, y nda chë nyetsca tescama yomna tšabe vida entšanga chamotsebmónama iuamá.

<sup>21</sup> Atšbe básënga, ndoñe šmattsadorana cach entšangbe pormana soyënga, chë ndayama inýënga mondbëtsejuabnaye diosënga yomna ca.

## 2 San Juan

### *Jtsiyenana ndegombre soyëngaca y nyetscanga jtsenbobonshánëse*

<sup>1</sup> Atše chë bëtsëjema, quem tsbuanácha sentsabiamná, chë uámana mamá, chë Bëngbe Bëtsabe bocacáná y chabe basengbiámnaca, ndëmuanÿenga atše ndegombre sëndábabuanÿeshana. Y ndoñe nÿe atše chënga quetsátababuanÿeshana, ndayá nyetscanga chë Bëngbe Bëtsabe ndegombre soyënga uabuátmëngnaca.

<sup>2</sup> Atše cbontsababuanÿeshana, chë ndegombre soyënga bëngbe ainaniñe mondbómnyayeca, y chë soyënga bëngbe ainaniñe sempre echántsemna.

<sup>3</sup> Atše sëntseimpadana Bëngbe Bëtsá chë Taitá, y Jesucristo chë Taitabe Uaquiñá, chaboma tsëngaftangbeñe tsabe bendicionënga chaotsemnama, chata tsëngaftangbioye chácmalastemama, y chaboma tsëngaftangbe ainaniñe tsabe ebionana chašmotsebomnama. Quem soyënga, bënga chë ndegombre soyënga uabuátmënga y nyetscanga mondenbobonshánëngaftaca echántsemna.

<sup>4</sup> Puerte sënjoyejuá, er atše acbe básenguentše báseftanga sënjánÿena chë ndegombre soyënga ntšamo Bëngbe Bëtsá chë Taitá šojamëndacá jtsamëse.

<sup>5</sup> Y mora, uámana mamá, cbontseimpadana Diosmanda nyetscanga chamotsenbobonshana. Chë cbontsëbuabiamná soye ndoñe canÿe tsëm mando quenátsmëna, ndayá cach Cristbe ústonënga tmonjanobiama ora tmonjanóyëngacñe mando.

<sup>6</sup> Bënga, Bëngbe Bëtsá y chë inÿe entšanga imababuanÿeshanama jtsinÿnana, bënga ntšamo Bëngbe Bëtsá tojamandacá jtsamëse tmojtsiyenama. Y chabe mando, ntšamo Cristbe ústonënga šmonjanobiama ora šmojanuencá, mëntšá endmëna: jtsiyenana Bëngbe Bëtsá y chë inÿe entšanga jtsababuánÿeshanëse.

### *Chë entsángbioye áingñayënga*

<sup>7</sup> Quem luarëjana banga entsángbioye áingñayënga mondajna, y chënga jtsejuabnayana Jesucristo quem luaroye ndoñe mo canÿe ndegombre entšacá tonjánabo ca. Nda chca tojtsejuabná, cha jtsemnana chë aingñayá y Cristbe contra yomná.

<sup>8</sup> Chëngbiama cuedado šmochtsebomna. Ndoñe chcace, tsëngaftanga ndoñe quešmochátsbomna chë Cristbiama cach tsëngaftangbe trabajuentšana tojóbocna soyënga, y ndoñe quešmochatosháchiñe lempe ntšamo Bëngbe Bëtsá tsëngaftangbioye jatšatayama yojtsebošcá.

<sup>9</sup> Ndánaca chë Cristo tojanabuatambá soyëngama inÿe soyënga tojatabuatambá, cha ndoñe Bëngbe Bëtsáftaca cánÿiñe mo canÿacá ntsemnana; pero nda sempre ntšamo Cristo tojanbuatëmbacá tojtsabuatambá, cha aíñe chë Taitáftaca y chabe Uaquiñáftaca cánÿiñe mo canÿacá jtsemnana.

<sup>10</sup> Ndánaca tsëngaftangbioye tojá jabuátambama, pero ndoñe ndayá Cristo tojanabuatambacá tojtsebuátëmbase, cha ndoñe šmatjofja, ni mo šmatjachuaye.

<sup>11</sup> Er nda chábioye tbojachuase, chábioye jtsajabuáchanana chë bacna soye chaomama.

### *Jtadióšoftanama*

<sup>12</sup> Atše ba soyënga sëntsebomna tsëngaftanga jáuyanama, pero ndoñe quetsátsboše tsbuanáchañe jubuábiamama. Atše sëntsejuabná aíñe chjobenaye tsëngaftangbioye jama, jobenayama nyetscángaftaca jencuéntama, chca, bëngbe oyejuayana puerte bëtsacá chaotsemnama.

<sup>13</sup> Crístbeyeca acbe quenata, chë Bëngbe Bëtsabe bocacáná, chabe básenga cmontsacheuaná.

## 3 San Juan

### *Juan Gaybiama puerte tšabá tojanoyebuambá*

<sup>1</sup> Atše chë bëtsëjema, quem tsbuanácha atšbe bonshana amigo Gaybiama sentsabiamná. Chábioye atše ndegombre sëndbobonshana.

<sup>2</sup> Atšbe bonshaná y Crístbeyeca atšbe catšata, Bëngbe Bëtsá sëntseimpadana aca tšabia nyetsca soyënguiñe chacotsemnama y salud bomnánaca. Atše sëntsetatšëmbo aca ainaniñe tšabá cotsomñama, Bëngbe Bëtsabiamna bëtská tšabe juabnënga chentše jtsebonnëse.

<sup>3</sup> Er báseftanga Jesucristbeñe ošbuáchiyënga átšbioye tmonjabo y šmonjacuentá ntšamo aca chë ndegombre soyënga yomncá icuamama, aca chë ndegombre soyënga jtsamëse icoyenama. Chíyeca atše bëtská sëntsoyejuá.

<sup>4</sup> Tondaye jamana atše nyetšá oyejuayá chaitsemnama, ndayá nye jouenana chë atšbe basengcá imoquedánënga ntšamo chë ndegombre soyënga yomncá jtsamëse imoyenama.

<sup>5</sup> Atšbe bonshaná, aca contsama ntšamo Jesucristo tonjanbuatëmbacá, aca chë ínÿenga Jesucristbeñe ošbuáchiyënga jujabuáchama ndayánaca tcojama ora, y masna, chë inÿe luaroquëngocana ashjajnëngbiama ndayánaca tcojtsama ora.

<sup>6</sup> Chë átšbioye tmonjabënga tmonjoyebuambá, chë Jesucristbeñe ošbuáchiyënga quem luarentše mondbenenefjnëngbe delante, aca tša chënga icuababuányëshanama. Dios-manda, ntšamo tojtsëjabotcá chënga cochjújabuache, chca, chënga chamobená tšabá inÿe luarëngoye játama. Chënga mondmëna Bëngbe Bëtsabiamna trabájayënga; chcasna, chëngaftaca cochjama ntšamo chënga chama merecido imobuajoncá.

<sup>7</sup> Chca cochjama, er chënga chëngbe pueblënguentsana tmojëftsebocana Jesucristbe soyëngama entsángbioye jábuayenama, y chënga chama tondaye crocénana quematóyëngacañe chë Jesucristbeñe ndošbuáchiyëngbe cucuatšentsana.

<sup>8</sup> Chíyeca bënga šontsamna chëngbiama jtsantješnana y jtsëjabuáchanana, chca, bënga chamobená cánÿiñe chëngaftaca jatrabájana, entsángbioye chë ndegombre soyëngama jábuayenama, ndayá chënga mondama.

### *Diótrfes ndoñe tšabá tonjanma; Demetrio aïñe*

<sup>9</sup> Atše canÿe tsbuanácha chë Jesucristbeñe ošbuáchiyënga chentše mondbenenefjnëngbioye sënjubuábiamna, pero Diótrfes ndoñe yontsuenana ntšamo atše sentsichamcá, er cha yojtseboše chë ínÿëngbioye nye jtsamëndayana.

<sup>10</sup> Chíyeca atše choye chajjá ora, ndayá cha yojtsamama chanjauácacana. Cha sempre bacá yojtsoínÿana y uayátsenaye soyënga bëngbe contra yojtsichamo. Y chë soye chábioye ndoñe bontsobastana; chana chë Jesucristbeñe ošbuáchiyënga chabe puebloye tmojáshjajnënga ndoñe ntjúbuajana, y chënga júbuajama tmojtsebošëngbioye ndoñe yontsalesenciana chca chamomama, y chë Jesucristbeñe ošbuáchiyënga bëtsemnama innétsenefjuana luarentšana yojtsatëbuacana.

<sup>11</sup> Atšbe bonshaná, ndoñe cattsama chë ndoñe tšabá yontsamacá, ndayá chë tšabe soyënga tmojtsamëngcá cochtsama. Nda ntšamo tšabá yomncá tojtsama, cha Bëngbe Bëtsábia jtsemnana; pero nda ndoñe chca tontsama, cha cabá ndoñe yondëtatšëmbo ntšamo Bëngbe Bëtsá yomnama.

<sup>12</sup> Jesucristbeñe ošbuáchiyënga nyetscanga tšabe soyënga Demetriëbiama montsichamo, y Jesucristbe ndegombre soyënga entsinÿna ntšamo cha soyënga yojtsiyenama. Bëngnaca chabiamna tšabá fsëntsichamo, y aca condëtatšëmbo ntšamo bënga fsëntsichamcá, ndegombre yomnama.

*Jadiósoftanama*

<sup>13</sup> Atše ba soyënga sëntsebomna aca jauyanama, pero ndoñe quetsátsboše ts-buanáchañe juábobemana.

<sup>14</sup> Atše sëntsejuabná betesco chjobenaye ácbioye jama jauatsëtsayama y jobenayana ácaftaca jencuéntama.

<sup>15</sup> Puerte tšabe ebionana ainaniñe chacotsebomna. Quem luarentša amiguënga cmontsechuaná. Diosmanda, bëngbe amiguëngbioye choca cada ona cochjácheuaye.

## San Judas

### *Jacheuayama*

<sup>1</sup> Atše Judas, Jesucristbe oservená y Santiagbe catšata, quem tsbuanácha sentsabiamná, ndémuanýengbioye Běngbe Bětsá, chě Taitá chabe entšanga chamotsemnama tojáchembo, chabe bonsháněnga, y ndémuanýenga Jesucristo endánýena.

<sup>2</sup> Atše, Běngbe Bětsá sěntseimpadana, cha puerte lastemado tšěngaftangaftaca chaotsemnama, cha chaoma tšěngaftanga ainaniñe tšabe ebionana chašmotsebonnama, y chaoma tšěngaftanga cada te más Běngbe Bětsábioye y ínýengbioye chašmotsababuánýeshanama.

### *Chě ndoñe ndegombre soyěnga buátěmbayěnga*

<sup>3</sup> Atšbe bonsháněnga, atše tša sěndboše tšěngaftanga jubuábiamama, ntšamo Jesucristo běngbe bacna soyěnguentšana šojátsebacama, tšěngaftangbioye y běngbioynaca; pero atše sěntsejuabná atše šojtsemna tšěngaftanga jubuábiamana, jáimpadama bětsá chašmotsama Jesucristbe soyěngama, chě mondošbuaché soyěngama jenujuérezama, ndoñe chaondopochocama. Chě soyěnga Běngbe Bětsá chabe entšanga canýe tojatsatá, y nýetsca tescama.

<sup>4</sup> Er tšěngaftanga ntšamo ínýenga imomnama ntjatatsěmboncá, básefta entšanga tšěngaftangaftaca tmojenutaná. Chěnga mondměna Běngbe Bětsá ndoñe adórayěnga, y chě buátěmbana soyěnga tmojtsetrocá. Běngbe Bětsá běngbe tšabiamana juabna yobómnayeca, chěnga jtsichámuana tšěngaftanga šmojtšobena nýetsca bacna soyěnga jtsaměse jtsiyenana, jenomándama ntšobencá ca; y chca, chěnga montseboše jinýanýiyama, Jesucristo ndoñe běngbe canýe Nduiño y Běngbe Utabná chěngbiamana yondměna ca. Y bayté, Běngbe Bětsabe uabemana palabrénguiñe tmojanábema, chě chca aměngna jtsamnana nýetsca tescama castigáněnga jtsemnama ca.

<sup>5</sup> Masque tšěngaftanga lempe quem soyama ya šmondětatšěmbo, atše sěntseboše jamama tšěngaftanga chašmotsenojuabná, Běngbe Utabná, Israeloca entšanga Egip-toquěngbe cucuatšentšana tojanatsebacá chentšana, cachá chě Israeloquěnguentšě chábeñe ndošbuáchiyěnga tojánapochocama;

<sup>6</sup> y cachcá chě angelěngbiámna, ndémuanýenga ndoñe tmonjanoquedá chě tmojanóyěngacñe mándoca, pero aiñe chěngbe luarěnga cachcá imojěftsonýaye. Chě causa, Běngbe Bětsá tojanmandá cadenějuangaca nýetsca tescama chamoquedama, chě más ibetiñe, tondaye binýniñe luarentše, chěnga bacna soyěnga tmojanmama nýetsca tescama castigáněnga jtsemnama yojtšamna ca, cha jayanama tescama.

<sup>7</sup> Y chě Sodoma y Gomorra, y chě béconana pueblěnguentše entšangbiámna; chěngnaca cach angelěngcá ndoñe tšabá monjánama, y nýetsca bacna soyěnga imojánama boyabása o shembásaftaca, y ínýengaftaca y bayěngaftácnaca. Chíyeca chěnga tmonjansufrí chě íñesheca castigo nýetsca tescama, y chca, nýetsca entšangbioye tmojaninýanýé, ndayá yochjopása chě chca Běngbe Bětsábioye ndoñe tbontsobedecenáftaca.

<sup>8</sup> Cachcá, chě ndoñe ndegombre soyěnga buátěmbayěngnaca chě mo otjenayoquécá tmojaninýe soyěngama jtsichámuana, y chě causa cachěngbe cuerpěngama bacna soyěnga jtsamana, chě mando bomněngbioye jtsěbátenana, y chě espíritěnga obenana bomněngbiamana ndoñe tšabá ntsichámuana, mo chěngbioye cuafjoyanguangcá.

<sup>9</sup> Pero ni mo chě angelěngbe mandayá Miguel quem buátěmbayěngcá tojanma. Cha chě díabłoftaca ibojentsjaná ora, Moisesbe cuerpama cháftaca jabuachana ibojane-natsětsnaye ora, ndoñe tonjanenñemó jayanama chě diablěbiamana podesca soyěnga, jóyenguanguse, ndayá nýe měntšá ibojauyana: “Běngbe Utabná chacmácacana ca.”

10 Pero quem buátëmbayëngna, chë ndoñe tontsësertana soyëngama podesca jtsichámuana, y ntšamo tojtsebionama y tmojtsebošama, nýe mo bayëngcá, chë soyëngama tšabá josértama juabna ndbomnënga, ndayá chentšana tmojtsësertancá jtsamëse, jamana chënga nýetsca tescama castigánënga jtsemnana chamotsajnama.

11 ¡Tša lastema quem buátëmbayëngbiana! Er chënga ndoñe tšabá tmojanma, mo Caincá; cha tojanaboté ntšamo Bëngbe Bëtsá inétsama bacna soyënga japerdónama, y cabana chabe catsátbioye tbojanóba. Chënga crocénana juácánama, mo Balaam yojanamcá, Bëngbe Bëtsabe tšabe benachentšana tmojtsojuánañe, bacna soyënga jamama. Chënga chë amëndayëngcá Bëngbe Bëtsá tojanabacacángbioye ndoñe ntsayaunanana, ntšamo Coré, Moisés y Aarónbioye joyaunayama ndoñe tonjanbošencá; y chë causa chënga pochocánënga mochántsemna, ntšamo Coré pochocaná chaotsemnana Bëngbe Bëtsá tojanmcá.

12 Chëngna tšëngaftangbiana jtsemnana mo canýe ndëtsenga luarentše canýe bëts tsengacá, tšëngaftangaftaca tmojenutaná ora, cánýiñe jasama mo Jesucristbeñe ošbuachiyëngcá. Chënga chca jtsemnana, er chca fiestënguiñe chënga oyejuayënga jtsemnana, nýe chënga tšabá jtsomñama soyënga jtsamëse, y chënga chama ndoñe ntsëuatjana. Chënga nýe cachëngbiana jtsantješnana, ínýengbiana ndoñe. Chënga tša jtsašebuachiyana, pero chëngbe buátëmbana soyënga ínýengbiana tondayama ntososervénana; y chca, chënga jtsemnana mo chë tša jënýá ora jantšetëshëngcá, tondaye ntjuaftena, bínýiaca ochñëjuanëshënga; y mo betiyeshënga jashtsnëshenga y buashanëshëngcá, chë jashacama tojtsemna ora tondaye shajuana causa.

13 Chënga nýets tempo bacna soyënga jtsamana cachëngbe bacna juabnëngaca, y chë bacna soyënga ntšamo tmojtsamcá jtsinýanýnayanana chënga chë bacna juabnënga imobomnana. Chca, chënga jtsemnana mo mar béjayoca oleshëngcá, chentšana es-pumushënga bëtscá tsenguéshëca jtsóbocanana. Y cabana, chënga jtsemnana mo estrellëngcá chëtemëngbe benachentšana tmojtsebocna, y chentšana jtsefsanana. Bëngbe Bëtsá tojamandá, chë buátëmbayënga ntšamo tmojamamna, chë más ibetoca, tondaye binýiñe luarentše nýetsca tescama chënga chamoquedama.

14 Adánbentšana chñënguana pamillo entšanga tmojánachñëjna chentšana Enoc tojánashjango. Chánaca Bëngbe Bëtsabe juabna tojanoyebuambá chë bacna buátëmbayëngbiana, mëntšá tojánayana ora: “Smochjinýe, Bëngbe Utabná echanjabo bëtscá uaranga angelëngaftaca,

15 nýetsca entšangbiana jabáyanama ntšamo tmojamcá tšabá o ndoñe tšabá bëtsemnana; y cha echanjamánda chë Bëngbe Bëtsábioye ndoñe adórayënga nýetsca tescama castigánënga chamotsemnana, tša bacna soyënga chabe contra tmojamama, y bacna soyënga chabe contra tmojayanama, chënga, chë puerte bacna soyënga amënga ca” –tojánayana.

16 Chënga mondmëna chë tšabe soyëngama nýets tempo podesca ichámënga, y ndocna te tondáyeca oyejuayënga ntsemnana. Chënga jtsiyenana bacna soyënga jtsamëse nýe cachënga tšabá jtsomñama, y puerte botamana palabrënga jtsichámuana uámanënga jtsenobiamnayëse, y tšabe soyënga ínýengbioye jtsëtsënyana, chënga tšabá joquédama y chëngbentšana ndayánaca josháchiñama.

### *Ošbuachiyënga jábuayenama*

17 Pero tšëngaftanga, atšbe bonshánëngna, šmochtsenójuabnaye ndayá chë Bëngbe Utabná Jesucristbe ichmónënga tmojanéyanama, mëntšá:

18 “Jesucristo quem luare jésabama tempo chaojtsobeco ora, mochántsemna entšanga, y chënga mochantsiyena jtsamëse nýe cachënga tšabá jtsomñama bacna juabnëngaca, y tšëngaftanga cmochantsëbuayajua ca.”

<sup>19</sup> Chënga mondmëna chë ošbuáchiyënguentsë nyetscanga ndoñe cachcá chamondëtsejuabnama amënga; chënga mondoyena jtsamëse cachëngbe bacna juabnëngaca y ndoñe quemátsbomna Uámana Espíritu, chëngbe ainaniñe chaotsemándama.

<sup>20</sup> Pero tsëngaftanga, atšbe bonshánënga, nyets tempo, cada te más Jesucristbeñe ošbuáchiyana šmochtsebomna, chë Bëngbe Bëtsábiocana endóbocana ošbuáchiyana, y Bëngbe Bëtsáftaca šmochjencuénta, ntšamo Uámana Espíritu tcmojtsamëndacá.

<sup>21</sup> Yeuana šmochtsantješna tsëngaftanga nyets tempo chašmotsiyenama, Bëngbe Bëtsá cmababuányëshanama jtsejuabnayëse, y šmochtsobátmana chë tempo ndaye ora Bëngbe Utabná Jesucristo, tsëngaftanga jtsalastemánëse, yochjama tsëngaftanga chë nyetsca tescama yomna tsabe vida chašmotsebomnama.

<sup>22</sup> Chë inye ora aiñe y inye ora ndoñe Jesucristbeñe ošbuáchiyana bomnënga šmochtsalastemana.

<sup>23</sup> Bëtscá šmochtsama, báseftanga chë uabouana castigüentsana atsebácanënga chamotsemnama, mo chënga íñeshentsana cuaftëbuacancá. Inyëngbiamana chacmot-sangmena, pero cuedado šmochtsebomna, chënga chašmojtsëjabuachana ora, ntšamo chënga bacna soyënga tmojtsamcá ndoñe chašmondëtsamama; y chë bacna soyënga ntšamo chënga tmojtsiyena jtsamëse, chëngbe bacna juabnëngaca, nya tondaye chacmondëtsogusetana.

*Judas, Bëngbe Bëtsá jëtschuayama*

<sup>24-25</sup> Chë nje canye Bëngbe Bëtsá, bëngbe Atsebacayá obenana endbomna tsëngaftanga jtsanýenama, chca, tondaye chaondëma tsëngaftanga Jesucristbeñe ošbuáchiyana chašmotsajbanama; y obenana endbomna tsëngaftanga ainaniñe ndocna bacna soye ndbomnënga chašmotsemnama y puerte oyejuayënga cachabe delante chašmotsemnama, cha canye puerte uamaná y obená bëtsemnama chaojinýanyé ora. Bëngbe Utabná Jesucristbeyeca, nyetscanga Bëngbe Bëtsá chamotsatschuaná; y cha puerte bëtsá chauesomñe, nyets obenana bomná y nyets mando bomná, nyets tempscana, tempo, mora y nyetsca tescama. Chca chaotsemna.

## Apocalipsis

### *Ndayá quem librěsañe yomna*

<sup>1</sup> Quemuentše entsábemana ndayá Běngbe Bětsá Jesucristbioye tbojaninñinýé, chě Běngbe Bětsabe oservéněnga cha cháuinñanýema, ndayá jopásama yojtsobecuama chěnga chamotsetatšěmbuama. Jesucristo chama chabe ángel tbojichmó, chě soyěngama atše, Juan, chě Jesucristbe oservenábioye chašuinñinýema.

<sup>2</sup> Y atše sěnjayana lempe ntšamo ndegombre yomncá lempe chě tijinýe soyěngama, chě Běngbe Bětsabe buayenana soyěngama y chě Jesucristo šonjanianana ndegombre bétsemna soyěngama.

<sup>3</sup> Oyejuayá nda tojtsalía, y oyejuayěnga ndēmuanñyenga botamana tmojtsuenana quem yochjopása soyěngama, chě muentše entsabemancá ndegombre tmojóyeunanga, er chca jopasa tempo entsobeco.

### *Asia luaroca ošbuachiyěngcá enefjuaněnga jacheuayama*

<sup>4</sup> Atše Juan, sěntsabiamná chě Asia luaroca canýsěftañe ošbuachiyěngcá enefjuaněngbiama. Atše, Běngbe Bětsá sěntseimpadana, tšabe bendicioněnga chábiocana chašmosháchiñe y ainaniñe puerte tšabe ebionana chašmotsebomna, Běngbe Bětsábentšana, chě canýsěfta espíritěngbentšana y Jesucristbentšana. Běngbe Bětsá, chě mora endmėná, enjamná y sempre echantsemná; chě canýsěfta espíritěnga, chabe uámana puesto natsanoica mondmėněnga;

<sup>5-6</sup> y Jesucristo, chě ntšamo Běngbe Bětsabiana yotatšěmbcá ndegombre oyebuamb-nayá, chě natsaná ndabiana Běngbe Bětsá tojama obaněnguentšana cháuatayenama, y nýetsca quem luarentša mandaděngbe amėndayá. Cristo šondábabuanñeshana y běngbe bacna soyěnguentšana šojatsebacá, cha tonjanóbanayeca, chabe buiñe juabuáshaněse. Cha tojama běnga chamotsobena cháftaca jtsemándayana y uámaněnga chamotsemnama, y Běngbe Bětsá chabe Taitá mo bachnangcá chamotseservěnama. ¡Nýetscanga nýets tempo chamotsinñanýná Cristo puerte bětsá y uamaná bétsemnama y obenana nýetsca tescama yobomnama! Chca chaotsemna.

<sup>7</sup> Moueněnga. Cristo jantšetěshěnguiñe echanjėsabo.

Chábioye nýetscanga mochanjinýe,

chě tmonjancrucificágnaca;

y quem luarentša nýetsca entsanga puerte ngmėnaca mochántsemna

y mochantsošachna chábeyeca.

Ndegombre, chca chaotsemna.

<sup>8</sup> “Atše sěndmėna chě nýetsca soyěnga bojatsáy y pochocayá ca,” Běngbe Utabná Běngbe Bětsá tojayana. Cha chě sempre endmėná, enjamná, nýets tempo echantsemná, chě nýets obenana bomná.

### *Juan mo otjenayoquěcá Cristbiana tojaninýe*

<sup>9</sup> Atše Juan, Jesucristbeyeca tšěngaftangbe catšata, cháftaca cánýiñe mo canýacá bétsemnama, cach tšěngaftangcá sěnděpadecena, tšěngaftangcá chanjěftsashjache Běngbe Bětsabe amėndayoye jamashěnguama, y tšěngaftangcá Běngbe Bětsabeñe jtsobátmaněse, uantado sěndmėna chě padecena soyěnguiñe. Běngbe Bětsabe palabra sěnjánabuayinama y Jesusbiana ntšamo ndegombre endmėncá sěnjánóyebuambnama, atše šmonjetsanětšena mar bėjayoca canýe fshantsentše, Patmos ca uabáinoca.



10 Y tonjanopasá, canye tmengo, chë ošbuáchiyënga Bëngbe Utabnábioye cányiñe jëtschuayama te, atše sënjanoquedá chë Uámana Espíritbeyeca corente mandaná, mo otjenayoquécá soyënga sënjëtsonyaye, y atšbe stëtsoica canye jabuache oyebuambnayana sënjanuena, mo canye trompetéfjua cuafjuajatëtcá;

11 mëntšá šontsanatsëtsná: “Canye librëšañe mábema lempe ntšamo contsonyáca y cochjuíchmua chë Asia luaroca canyësëftañe ošbuachiyëngcá enefjuanëngbioye: Efeso, Esmirna, Pérgamo, Tiatira, Sardis, Filadelfia y Laodiceoquëngbioye ca.”

12 Sënjanobuértana jinýama nda chca šojtsanatsëtsná, y chca sënjanma ora, sënjáninýe canyësëfta castellano candelerëšënga;

13 y chë canyësëfta castellano candelerëšënguiñe tsëntsaca canya sënjáninýe, mo entšacá inýná, canye bën entšayá uichëtjoná, y cochóntscoca canye tëntša castellano uasnanëjaca.

14 Chabe stjënashana uafjantsësha, puerte uafjantsësha mo canye oveshabe boshëshacá, y chabe fšnëbenga mo iñeshcá enjëtsinýna.

15 Chabe shecuatšënga enjëtsëbuashinýinýana mo bronscá, ndaybé natsana iñëjana tcojuchnëngo enabé chaotsemnama y chentšana entšëjuaca becá tcojajojó corente chaotsebuashinýinýanama; y chabe oyebuambnayana jabuache enjëtsenana mo bëtscá béjaye cuaftsebuachquëcjancá.

16 Chabe catšbioica cucuatšinë enjëtsatbëna canyësëfta estrellënga, y chabe uayoicana enjëtsobocana canye espadëja, nyëts utoicajana puerte efšánëja, y chabe jubiá tša enjëtsëbuashinýinýana, mo chë shinýe corente, lempe ntšamo tojobenacá tojtsebuashinýinýana orcá.

17 Cha sënjáninýe ora, chabe shecuatšëntše mo obanacá sënjánshajaye. Pero cha, chabe catšbioica cucuatšë átšbeñe jajájuase, šonjaniyana: “Ndoñe matauatjana; atše sëndmëna chë nyëtsca soyënga bojatsayá y pochocayá,

18 chë sempre vida bomná. Atše obaná sënjamna, pero mora nyëtsca tescama vida sëntsebomna. Atše obenana sëndbomna, y chë obenánaca entšángbioye ndoñe quenátamna infernoca nyëtsca tescama castigánënga jtsemnana, mo nyëts tempo cuaftsobancá.

19 Ntšamo tconjinýcá mábema, chë quem tempo endmëna soyëngama y chë más chcoye echántsemna soyëngama.

20 Mëntšá endmëna chë atšbe catšbioica cucuatšinë tconjinýe canyësëfta estrellëngaca y chë canyësëfta castellano candelerëšëngaca: chë canyësëfta estrellënga montsinýinýná chë canyësëftañe ošbuachiyëngcá enefjuanëngbeñe chamotsemándama uámana ichmónënga, y chë canyësëfta candelerëšënga chë canyësëftañe ošbuachiyëngcá enefjuanënga.”

## 2

### *Efesoca ošbuachiyëngcá enefjuanënga jábuayenama*

1 Mëntšánaca cha šonjaniyana:

“Mëntšá mabobema chë Efesoca ošbuachiyëngcá enefjuanëngbeñe chaotsemándama uámana ichmonábioye:

Mëntšá entsichamo chë chabe catšbioica cucuatšinë canyësëfta estrellënga entsatbëná y chë canyësëfta castellano candelerëšënga luarëjana entsaná:

2 Atše lempe sëndëtatšëmbo ntšamo tšëngaftanga šmoyenana; atše corente sëndëtatšëmbo tšëngaftanga jabuache šmotrabájama, y ntšamo tšëngaftanga Bëngbe Bëtsábeñe jtšobátmanëse šmnëtsauantana padecena soyënguiñe šmojtsemna ora. Y átšnaca sëndëtatšëmbo tšëngaftanga ndoñe šmontsobena jtsëuantánana ntšamo bacna entšanga tmojtsamcá. Atšnaca sëndëtatšëmbo tšëngaftanga yejuana šmojarrepará y becá šmojenojuabó jinýama chë Jesucristbe ichmónënga imomna ca tmojtsichamëngbiama; pero ndegombre chënga ndoñe chca quemátsmëna; y chca šmojámayeca, tšëngaftanga mora šmontsetátšëmbo chënga bosterënga imomnana.

<sup>3</sup> Padecena soyënguiñe becá šmojoboyá y chca ora, Bëngbe Bëtsábeñe šmobátmana. Chë soyënguiñe šmojasufrí, tšëngaftanga atše šmoservénama; y tšëngaftanga chca šmondëserveda, ainaniñe añemo jtsebomnama ntjajbanacá.

<sup>4</sup> Pero canye soye séntsebomna tšëngaftangbe contra jayanama: Tšëngaftanga mora ya ndoñe cachca bonshánana quešmátsbomna ni atšbiana ni nyetsca entšangbiana, ntšamo átšbeñe jtsošbuáchiyama šmonjanbojatsé orcá.

<sup>5</sup> Menójuabonga ntšamo chë tempo šmonjánbobonshanama, juabnayana motrocanga y cachiñe šmochtsama ntšamo chë átšbeñe jtsošbuáchiyama šmonjanbojatsé orcá. Ndoñe chcase, atše tšëngaftangbioye chanjá jabuache jetsacastígama, jtsapochócantscuana, mo chë tšëngaftangbe cuenta entsemna candelerëse chabe puestentšana cuaftsejuanacá. Chca chanjama, tšëngaftanga juabnayana ndoñe chašmonjatrocuse.

<sup>6</sup> Pero tšëngaftangbe pavor quem tšabe soye šmontsebomna: Tšëngaftanga šmonduábotena lempe ntšamo chë nicolaíta ca uabaina entšanga tmojtsamcá, ndayá átšnaca sënduábotena.

<sup>7</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsësnacá. Chë padecena soyënguentsana tšabá chamojábocana mo ayëñjanayëngcá, chëngbiana chanjama chë nyetsca tescama yomna tšabe vida chamotsebomnama, y chca chënga mochántsemna mo chë nyetsca tescama yomna tšabe vida jtsebomnama betiyeshentsana cuaftsesacá, chë entšanga sempre oyejuayënga mondbetsemnoca ca” —cha šonjaniyana.

#### *Esmirnoca ošbuachiyëngcá enefjuanënga jábuayenama*

<sup>8</sup> Mëntšánaca cha šonjaniyana: “Esmirna bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntšá entsichamo chë nyetsca soyënga bojatsáyá y pochocayá, chë tonjanobaná y ndabiana Bëngbe Bëtsá tonjama cháuatayenama:

<sup>9</sup> Atše sëndétatsëmbo tšëngaftanga tša jabuache šmojasufrima y ndbomnjëmënga šmomnama, pero ndegombre Bëngbe Bëtsábiocana bëtscá tšabe soyënga šmondëtsóbomñe. Y sëndétatsëmbo tša bacá tšëngaftangbiana mondoyebuambná chë judiënga imomna ca ichámënga, pero ndoñe ntsamana mo chë Bëngbe Bëtsabe bocacana entšangcá; chca, chënga mondmëna mo Satanasbe entšangcá, nye chábioye jtseservënese y jtsatschuanayëse.

<sup>10</sup> Ndoñe matauatjëngana chë ndoñe yapa bën y tšëngaftanga šmochjasufrima, er Satanás echanjama tšëngaftanguentsënga báseftanga cárceloje ínÿenga chacmëtámiamia, jinÿama ntsachetšá Crístbeñe ošbuáchiyana šmobomnama, padecena soyënguiñe šmojtsemna ora; y entsamna baseftayté jasúfriana. Siempre bëtscá ošbuáchiyana, y ainaniñe bëts añemo šmochtsebomna, masque jobanámnaca chacmotsamna, Crístbiana trabájaye causa. Chca chašmojtsamëse, atše chanjama tšëngaftanga chašmotsebomnama mo canye uacanana soycá, chë nyetsca tescama yomna tšabe vida.

<sup>11</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsësnacá. Chë padecena soyënguentsana tšabá chamojábocana mo ayëñjanayëngcá, ndegombre chënga ndoñe queochátamna játauatjana nyetsca tescama castigánënga jatsmënama ca” —cha šonjaniyana.

#### *Pérgamoca ošbuachiyëngcá enefjuanënga jábuayenama*

<sup>12</sup> Mëntšánaca cha šonjaniyana: “Pérgamo bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntšá entsichamo chë nyets utoicajana puerta efsana espadëja entsatbëná:

<sup>13</sup> Atše sëndétatsëmbo ntšamo yomna tšëngaftangbe oyenentše, canye luare ndayentše Satanás entšangbioye puerta iuamënda. Masque chca, tšëngaftanga siempre

nÿe atſe ſmondéſeserverna, y ndocna te cheſmáisayana átſbeñe ndoñe ſmondoſbuaché ca, ni mo Antipas, chë canÿe nÿets tempo atſbe uſtoná y atſbiamana ndegombre oyebuambnayá, ínÿenga tmonjanóba ora. Y lempe chca tojopasá tſëngaftangbe pueblentſe, ndayentſe Satanás bëſcá entsana.

<sup>14</sup> Pero báſefta ſoyënga ſëntſebomna tſëngaftangbe contra jayanama: Chentſe tſëngaftangbeñe báſeftanga montſemna, ſoyënga montſabuatambá ntſamo bayté entſemna Balaam enjanabuatambacá. Cha rey Balácbioye tbojanbuayená ntſamo jamana Israeloca entſángbioye jáingñama, chënga chë ntſamo ndoñe tſabá yomncá chamotsamama; y chca, Balac tojanma chë ínÿenga diosënga yojamna ca imojanajuabná ſoyënga jadórama uátſëmbona saná chë Israeloca entſanga chamosama, y ſhembáſa o boyabáſaftaca bacna ſoyënga chamotsamama.

<sup>15</sup> Chéntſnaca ínÿenga montſemna, y chëngna chë nicolaitëngbe buatëmbana ſoyënguiñe mondoſbuaché, y chca buatëmbana ſoyënga ndoñe tſabá quenátſmëna.

<sup>16</sup> Smochtſejuabnaye ntſamo ſmojtsamama, chëngbioye tſëngaftangbeñe ſmojtsëuantana ora, y chca jtsamana ſmochjajbaná; er ndóñese, atſe betſco tſëngaftangbioye chanjá, y chë chca buatëmbana ſoyënguiñe oſbuáchiyana ndoñe tmonjajbanángaftaca chanjéſtsja chë atſbe uayoicana endóbocana espadéjaca.

<sup>17</sup> Chë jouenama tmojtsobenënga, chamouena ndayá Espíritu chë ndayenache oſbuachiyëngcá enefjuanënga yojtsëtsëſnacá. Chë padecena ſoyënguentſana tſabá chamojábocana mo ayëñanayëngcá, chëngbioye maná chanjátſataye chamosama, chë celoca tandëſe, ndayá Bëngbe Bëtsá tempo entſángbioye ndoñe tonjinÿanÿé; y canÿe fjantſe ndëtſëtëma chanjáyentſbuachiye, chënga oyejuayënga ſmojábemama. Chiñe canÿe tsëm uabaina echantsábemana; ndocná chë uabaina quenátabuátma, ndayá nÿe chë chamojóyëngacñënga ca” —cha ſonjaniana.

### *Tiatiroca oſbuachiyëngcá enefjuanënga jábuayenama*

<sup>18</sup> Mëntſánaca cha ſonjaniana: “Tiatira bëts puebloca oſbuachiyëngcá enefjuanëngbeñe chaotſemándama uámana ichmonábioynaca mëntſá mabobema:

Mëntſá entſichamo Bëngbe Bëtsabe Uaquiñá, chë mo iñeſhcá uafſná y mo entſëjuaca jojona puerte chaotſebuashinÿinÿanama bronze ſhecuatſënga bomná:

<sup>19</sup> Atſe ſëndëtatsëmbo ntſamo tſëngaftanga ſmoyenama; ſëndëtatsëmbo ntsachetſá tſëngaftanga Bëngbe Bëtsábioye y nÿetſcángbioye ſmababuánÿeſhanama, ntſamo tſëngaftanga Bëngbe Bëtsábeñe puerte ſmoſbuáchema, ntſamo chábioye ſmoservénama, ntſamo tſëngaftanga ínÿenga ſmojujabuache y ntſamo Bëngbe Bëtsábeñe jtsobátmanëſe becá ſmojoboyá padecena ſoyënguiñe; y ſëntſetatſëmbo mora más bëſcá tſabe ſoyënga ſmojtsama, ntſamo tſëngaftanga átſbeñe jtſoſbuáchiyama ſmonjanbojatſé orscama.

<sup>20</sup> Pero canÿe ſoye ſëntſebomna tſëngaftangbe contra jayanama: Tſëngaftangbeñe ſmondëuantana chë ſhembáſa, mo chë bacna reiná Jezabelcá endmënábioye. Chë ſhembáſa entſichamo Bëngbe Bëtsabe juabna oyebuambnayá canmëna ca; pero chabe buatëmbana ſoyëngaca atſbe oſervënënga entſaíngña, ſhembáſa o boyabáſaftaca bacna ſoyënga chënga chamotsamama, y chë ínÿenga diosënga yojamna ca imojanajuabná ſoyënga jadórama uátſëmbona saná chamosama.

<sup>21</sup> Cha ſënjuená atſe chjacastíga ca, chca juabnayana ndoñe tonjatrocasa, y canÿe boyabáſaftaca bacna ſoyënga amana ndoñe tontſajbanase. Cha jacastígama batſá ſënjobatma, nderado chca amana nanjatróca, pero ndoñe chenátſboſëna.

<sup>22</sup> Mora atſe chanjama bëts ſocana cha chaboſhachama, y chë cháftaca bacna ſoye tmojamënga, juabnayana ndoñe tmonjatrocá y chca jtsamana ndoñe tmontſajbanase, chëngbiamana chanjama puerte chamoſufrima;

<sup>23</sup> y chë ſhembásabe básënga chantsëbaya. Chca, nÿetſquénache oſbuachiyëngcá enefjuanënga mochántſetatſëmbo, ndayá entſanga juabniñe y ainaniñe tmojuabnacá atſe

tsuábuatmama; y cada ona tsëngaftanguentsá, chca bacna soye cháftaca tojamá, ntšamo ibojtsomerecencá chanjacastíga.

<sup>24</sup> Pero tsëngaftangbentše, ínÿenga Tiatira pueblentše šmojtsemnënga, chë shembásabe buatëmbana soyënguiñe ndoñe šmontsošbuachenga, y chë ínÿenga imuábuatma Satanasbe soyënga, chë ndoñe paselo josértama soyënga ndoñe šmonjuabuátmanënga, tsëngaftanga ndoñe quebochatamënda inÿe más toto soye chašmotsamama.

<sup>25</sup> Pero nÿe sempre šmochtsama ntšamo mora šmojtsamcá, y šmochtsiyena ntšamo chë Bëngbe Bëtsábiocana šmojóyëngacñe soyënga yomncá, atše quem luaroye jesabámëntscuana.

<sup>26</sup> Chë padecena soyënguentsana tsabá chamojábocana mo ayënjanayëngcá y ntšamo atše sëndëmandacá chamojtsamënga, chë quem luarentše ya ndoñe más vida jesebomnámëntscuana, atšbe obenana chanjátšataye nÿetsca mándayëngbentša entšángbeñe jtsemándayama,

<sup>27</sup> ntšamo atšbe Taitá chabe obenana šojatšetacá; y chënga entšángbioye puerte obenánaca mochántsamëndaye, mo canÿe hierro varëfjaquécá, y chëngbe contra chamojtssemnëngbioye mochántsapochocaye, mo nÿe matbajënga tmojtsëtsjanjncá.

<sup>28</sup> Y chë jabínÿnama ora bínÿnaye estréllnaca chanjátšataye.

<sup>29</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniyana.

### 3

#### *Sardisoca ošbuachiyëngcá enefjuanënga jábuayenama*

<sup>1</sup> Mëntšánaca cha šonjaniyana: “Sardis bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë Bëngbe Bëtsabe canÿsëfta espíritënga y chë canÿsëfta estrellënga bomná: Atše lempe sëndëtatšëmbo ntšamo tsëngaftanga šmoyenama; atše sëndëtatšëmbo tsëngaftangbiamá ínÿenga tša jtsichámuana Bëngbe Bëtsá jaserviama bëtscá šmojtsama ca, pero ndegombre tsëngaftanga nÿe batšatema šmontsama, y chca, chabiamá mo obanëngcá šmondmëna.

<sup>2</sup> Botamana šmochjenóbobonÿe y más šmochtsama chë Bëngbe Bëtsá jaserviama cabá šmondama básefta soyënga. Ndoñe yapa quenatájamna chë tsabe soyëngnaca chašmotsajbanama, er atše sënjinÿe chë Bëngbe Bëtsábioye jaserviama ntšamo jtsamëse šmoyencá, atšbe Bëtsabiamá ndoñe yapa tsabá quenátsmëna.

<sup>3</sup> Asna, šmochtsenójuabnaye ndayá Bëngbe Bëtsábiocana šmojóyëngacñama, y chabiamá šmojouena soyënguiñnaca. Ntšamo chë soyënga yomncá šmochtsiyena, juabnayana šmochjatróca y šmochjónťša bëtscá jtsamana Bëngbe Bëtsá jaserviama. Ndoñe tsabá cach tsëngaftanga chašmonjenójuabose y juabnayana ndoñe chašmonjatrocasa, nÿe ndeolpe chanjá tsëngaftangbioye, mo canÿe atbëbanacá, chabiamá ndocná tontsejuabná ora, y ndegombre tsëngaftanga ndoñe quešmochátstatšëmbo mocna ora atše tsëngaftangbioye chjama.

<sup>4</sup> Masque chca, Sardisentše tsëngaftangbeñe básefta entšanga mondmëna, chënga ndoñe chematajbaná oyenana tsabe soyënga jtsamëse, bacna soyënga játamama. Chëngna átšeftaca mochántsjana uafjantsëjuangá uichëtjonënga, chënga chca merecido montsebuajónayeca.

<sup>5</sup> Chë padecena soyënguentsana tsabá chamojábocana mo ayënjanayëngcá, chca uafjantsëjuangá uichëtjonënga mochántsemna, y chëngbe uabaina ndoñe quichatsjuána chë tsabe vida mochjónÿenëngbe uabaina enduábemana librëšentsana, ndayá atše, Bëngbe Bëtsabe delante y chabe angelëngbe delante, chënga atšbe entšanga imomna ca chanjayana.

<sup>6</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsësnacá ca” –cha šonjaniyana.

*Filadelfioca ošbuachiyëngcá enefjuanënga jábuayenama*

<sup>7</sup> Mëntšánaca cha šonjaniyana: “Filadelfia bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë uamaná y ndegombre oyebuambnayá, chë jtsemándayama puerte obenana bomná, ntšamo Rey David enjanbomncá, chë nda ndayá chaotsemnama tojamandá ora, ndocná ntsoobenana jamama chca ndoñe chaondëtsemnama, y ndayá ndoñe chaondëtsemnama tojamandá ora, ndocná ntsoobenana jamama aíñe chaotsemnama:

<sup>8</sup> Atše lempe sëndétatšëmbo ntšamo tšëngaftanga šmoyenama. Minyënga, atše sënjama tšëngaftanga bëtscá tšabe soyënga chašmotsebomnama, y ndocná quenátobena jamama chca ndoñe chaondëtsemnama; y chca entsemna mo atše tšëngaftangbiamu canyë bëšáša cuafjatëfjá, y chëša jtatámiamu ndocná quenátobena. Atše sëndétatšëmbo tšëngaftanga batšatema obenana šmobomnama, pero šmojouena ntšamo jtsamama tcbonjauyancá, y ndocna te chešmátayana atšbe entšanga ndoñe šmondmëna ca.

<sup>9</sup> Atše chanjama, chë mo Satanasbe entšangcá imomnënga, nýe chábioye jt-seservénëse y jtsatschuanayëse, chë judiënga imomna ca ichámënga, pero chë Bëngbe Bëtsabe bocacana entšangcá ndámënga y bosterënga, chënga tšëngaftangbioye chamua y tšëngaftangbe delante chamoshamentšé, tšëngaftangbiamu respeto jinýanýiyama, y chca, chënga chamotsetatšëmbo atše sempre cbababuánýeshanama.

<sup>10</sup> Atše tcbonjanamëndá, Bëngbe Bëtsábeñe jtsobátmanëse, lempe chašmotsoboyá padecena soyënguiñe, y tšëngaftanga chca šmonjama. Chíyeca, atše puerte tšabá cbochántsanýena, chë quem luarentše oyenënga nýetscanga jasúfriama y padecena soyënguiñe jtsemnama chaojtsemna ora, Bëngbe Bëtsábeñe aíñe o ndoñe mondošbuáchema jinýanýiyama.

<sup>11</sup> Cachiñe quem luaroye betscu chanjésabo. Sempre šmochtsama ntšamo mora šmondamcá, y Bëngbe Bëtsábocana šmojóyëngacñe soyënga šmochtsinýena; chca ndocná chaondobená ndayá jamana, y chë sóyeca chaoma tšëngaftanga ndoñe chašmondóyëngacñe ndayá Bëngbe Bëtsá chë chábioye jt-seservénama ndoñe tmontsajbanángbioye yochjatsataycá, chëngbe uacanana soye.

<sup>12</sup> Chë padecena soyënguentšana tšabá chamojábocana mo ayënjanyëngcá, chëngbiamu atše chanjama sempre Bëngbe Bëtsabe delante chamuesomñama, y chca, chënga mochántsemna mo chë Bëngbe Bëtsabe bëts yebnentša ucuatjoniñcá; ndocna te Bëngbe Bëtsábentšana quemocháisebocana; y chëngbeñe atšbe Bëtsabe uabaina chanjuábema y atšbe Bëtsabe bëts pueblentša uabaina, chë tsëm pueblo Jerusalén, chë celocana yobá pueblo, Bëngbe Bëtsábocana. Y chëngbeñnaca chanjuábema atšbe tsëm uabaina. Lempe chca chanjama jinýanýiyama chënga Bëngbe Bëtsábenga mochtsemnama.

<sup>13</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsësnacá ca” –cha šonjaniyana.

*Laodiceoca ošbuachiyëngcá enefjuanënga jábuayenama*

<sup>14</sup> Mëntšánaca cha šonjaniyana: “Laodicea bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë sempre Ndegombrá endmëná, chë Bëngbe Bëtsabe soyëngama ndegombre oyebuambnayá, y chë ndábeyeca Bëngbe Bëtsá quem luare tojanmá:

<sup>15</sup> Atše lempe sëndétatšëmbo ntšamo šmoyenama. Atše sëntsetatšëmbo tšëngaftanga ndoñe yapa šmontseboše Bëngbe Bëtsá jasérviamu, pero Bëngbe Bëtsabe buayenana

soyënga ndoñe lempe šmotsaboté. Y chca, nÿe batsatema šmojtseboše Bëngbe Bëtsá jasérviana; chca, tšëngaftanga šmontsemna mo tibiye buyeshcá, ni ntšniñiye, ni shécbaniye. ¡Atše sëntseboše tšëngaftanga chašmotsemna mo ntšniñiye o shécbaniye buyeshcá, tšabá jtsamëse o tondaye!

<sup>16</sup> Chca, tšëngaftanga tibiye buyeshcá šmondmëna, y ndoñe quešmátsboše bëtscá jamama, pero Bëngbe Bëtsabe soyënga ndoñe lempe šmotsaboté. Chíyeca atše sëntsejuabná jtsëbatena, mo nda tibiye búyeshe tojëtsbuashëtjca, chcaye ndoñe bondogustana causa.

<sup>17</sup> Er tšëngaftanga jtsichámuana bomnënga šmomna ca, puerte tšabá šmojábocana y tondaye cmontsabuáshebena ca, pero ndoñe quešmátstatsëmbo Bëngbe Bëtsabe soyënga bëtscá cmojtsabuáshebenama. Chca, tšëngaftanga šmontsemna nÿa ndoñe tšabá, ínÿenga ngmënana chacmotsabamna, mo ndbomnjemëngcá, mo jtanëngcá, Bëngbe Bëtsabe soyëngama ntosertancá, y mo enašëngcá, bëtscá Bëngbe Bëtsabe soyënga ntsebomncá.

<sup>18</sup> Chíyeca cbabuayená, átšbentsana chašmuatsjinÿe chë Bëngbe Bëtsabe soyënga y uámana soyënga, mo chë ena castellano jabemama, iñëjana fjëchnënguëse castellano átšbioye šmojtsontšabuamnañcá. Tšëngaftanga Bëngbe Bëtsabe delante mo enašëngcá šmondmëna, er cha endonÿá chë ba bacna soyënga ntšamo tšëngaftanga šmojtsamcá. Smochjaleséncia atše chacbéjabuache tšëngaftanga Bëngbe Bëtsabe bominÿiñe tšábenga chašmotsemnama, mo juichëtjuama uafjantse entsáyá átšbioye šmojtsantšabuamnañcá. Chca šmochjama, tšëngaftanga Bëngbe Bëtsabe delante ndoñe chašmondëtsëuatjama. Smochjaleséncia atše chacbéjabuache tšëngaftanga Bëngbe Bëtsabe soyëngama chacmósertama, mo tšëngaftanga bominÿe šocanama shnana átšbioye šmojtsontšabuamnañcá. Chca šmochjama, Bëngbe Bëtsabe soyëngama puerte tšabá chacmósertama.

<sup>19</sup> Atše chë sëndábabuanÿeshanënga sëndbaucácana y sëndbábuayenaye. Chíyeca, lempe ntšamo šmojobenacá šmochtsama Bëngbe Bëtsá jasérviana, y juabnayana šmochjatróca, y nÿets tempo puerte šmochtseboše Bëngbe Bëtsá jtseservénana.

<sup>20</sup> Nderado canÿe tšabe amigo yebnoye tojabo y tojachembo, tšëngaftanga šmojouenëse y bëšáša šmojebiatëfjëse, cha jamashënguana, y cánÿiñe cháftaca joyejuayana y jasana. Cachcá, atše entsanga sëntsachembuana chašmolesenciá chëngbe ainaniñe jtsiyenama. Nderado nda šojóyeunase, atše chanjámashëngo chabe ainaniñe jtsiyenama, y nÿets tempo cháftaca cánÿiñe mo canÿacá chanjëftsemna.

<sup>21</sup> Chë padecena soyënguentsana tšabá chamojábocana mo ayënjanayëngcá, atše chanjama chënga puerte bëtsétsanga chamotsemnama ntšamo atše sëndmëncá, y átšeftaca chamótbemama, atšbe uámana tbemanentše jtsemándayama, ntšamo atše atšbe uayayëngbioye sënjayënjanacá, y atšbe Taitáftaca chabe uámana tbemanentše tijotbemcá.

<sup>22</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtnacá” —cha šonjaniana.

## 4

### *Chë Ainënga Bëngbe Utabnabe uámana tbemanentša natsana imojtsechuanaye*

<sup>1</sup> Chentšana mo otjenayoquëcá sënjáninÿe. Sënjanrrepará y sënjáninÿe celoca canÿe bëšáša enjëtsatëfjna, y chë natsana sënjanuena oyebuambnayana, chë enjamna mo canÿe trompetëfjua cuafjuajatëtcá, mëntšá šonjëtsatsaye: “Moye másëngo, atše chochanjinÿinÿiye ntšamo más chcoye yochjopasacá ca.”

<sup>2</sup> Cachora, chë Uámana Espíritbeyeca, mo atšbe ainana celoca cuaftsemncá atše sënjanoquedá, y sënjáninÿe celoca enjëtsemna canÿe reybe uámana puesto, y chentše canÿa enjëtsetbemana.

<sup>3</sup> Chentše enjetsetbemaná enjamna, puerte tëshinýná mo jaspe ndëtsbecá, puerte buanganá mo cornalina ndëtsbecá, y chë uámana puesto shëconana canýe tsëfcuácuatjo enjamna, y enjëtsebuashinýinýana mo canýe esmeralda ndëtsbecá.

<sup>4</sup> Chë reybe uámana puesto juachajana, inýe uta bnëtsana y canta puesto sënjaninýe, y chiñe uta bnëtsana y canta bëtsëjemënga amëndayënga monjëtsetbiamana, uafjantsëjuangá uichëtjonënga, y castellano coronëshangá monjëtstabestšajona.

<sup>5</sup> Chë uámana puestentšana enjët sobocana tcuinýejënga, becá shauenanana y juesasanana; y chë uámana tbemaniñentša natsanoicna, canýsëfta uajuinýanëshha enjët sangbototjuana; chë uajuinýanëshangá entsayana chë Bëngbe Bëtsabe canýsëfta espíritënga.

<sup>6</sup> Y chë uámana puestentša natsanoica enjëtsemna mo canýe mar bejaycá, tëshínýniye mo canýe cristal ca uabaina ndëtsbecá.

Chë luariñe tsëntsaca, chë uámana puesto enjëtsemnentše y chë shëconánëjana monjëtsemna canta Ainënga, nýëtsañe fšněbëngaca, natsanoica y stëtšoica.

<sup>7</sup> Chë natsana Ainá enjamna mo canýe leoncá, chë inýe Ainá mo canýe torošcá, chë inýe Ainá enjánbomna mo canýe entsabe jubiácá, y chë inýe Ainá mo canýe águila tojt songüefjnácá.

<sup>8</sup> Chë canta Ainënga, cada ona chnënguana juatëngmiášha enjanábomna, y tsoicajana y shjoicajana nýëtsañe fšněbënga monjánbomna. Y chënga nýets tempo, ntjochnacá mëntšá monjánichamo:

¡Uamaná, Uamaná, Uamaná, Bëngbe Utabná,  
Bëngbe Bëtsá nýets obenana bomná,  
nda enjamná, endmëná y sempre echanjëtsemná ca!

<sup>9-10</sup> Chca chë Ainënga Bëngbe Bëtsá bëtscá tmontanchuá, Bëngbe Bëtsá chë uámana puestentše tbemaná, chë nýets tempo y nýetsca tescama oyená. Chënga puerte respeto chabiamana monjëtsebomna y bëtscá tmontanchuá. Cada ora chënga chca tmontanma ora, chë uta bnëtsana y canta bëtsëjemënga amëndayënga, chë uámana puestentše tbemanabe shecuatšentše joshamentšiyana y chábioye jtsatschuanayana, chë coronëshangá chë natsanoica jutšanana, y mëntšá jtsichámuana:

<sup>11</sup> Aca nýets mercedo condëtsobuájoñe, Bëngbe Utabná y Bëngbe Bëtsá, entsanga chamotsinýanýnama, aca puerte bëtsá comnama, y chamotsichamo aca nýets respeto buajoná comna, y nýets obenana bomná comna ca, er aca nýetsca soyënga tcojama; aca icnabóseyeca chë soyënga yojtsemna y aca chca tcojanma ca.

## 5

### *Chë uabemana uándmanana tsbuanácha y chë Oveshatema*

<sup>1</sup> Chë uámana puestentše enjetsetbemanabe catsbioica cucuatšiče canýe uándmanana tsbuanáchanaca sënjaninýe, y nýëtsañe enjët sabemana tsoicajana y shjoicajana, y canýsëfta tsengájaše sellëngaca enjët sajandmanana.

<sup>2</sup> Y canýe ángel puerte obenana bomná sënjaninýe, y cha mëntšá enjët sayebuache: “¿Nda mercedo yobuájona, quem uándmanana tsbuanácha jutëfjonama y chë sellënga jutsécama ca?”

<sup>3</sup> Pero, ni celoca, ni quem luarentše, ni quem luarentša jashenoye, ndocná quen-jat smëna obenánaca chë uándmanana tsbuanácha jutëfjonama, ni juinýama.

<sup>4</sup> Y atše puerte sënjanenobošachna, er ndocná ntjónýnana mercedo buajoná chë uándmanana tsbuanácha chautëfjonama, ni chauinýama.

<sup>5</sup> Pero canýa chë bëtsëjemënguentšá šonjanianana: “Ndoñe más matenóbošachena; mouena, chë Judabe pamillentsá, León ca uabobainá, mando y obenana bëtsebomnama,

chë rey Davídbentšana Entšá, tonjayënjaná; cha entsobena chë uándmanana tsbuanácha jutëfjonama, y chë canýsëfta sellënga jutsécama ca.”

<sup>6</sup> Chora sënjaninýe, chë uámana puesto y chë canta Ainënga y chë bëtsëjémëngbe tsëntsaca, canýe Oveshatema tsanana, pero enjétsinýna mo cuaftsobacá. Chë Oveshatema enjánbomna canýsëfta tsëtjonëse y canýsëfta fšněbé. Chë canýsëfta fšněbé monjaninýinýná chë Bëngbe Bëtsabe canýsëfta espíritënga, chë Bëngbe Bëtsá nýets quem luarëjana tojánichamonga.

<sup>7</sup> Chë Oveshatema tonjanobeconá y chë uándmanana tsbuanácha tonjanaca, chë uámana puestentše tbemanabe catsbioica cucuatšentšana;

<sup>8</sup> y chabe cucuatšinë tonjanaca ora, chë canta Ainënga y chë uta bnëtsana y canta bëtsëjémënga amëndayënga chë Oveshatembe shecuatšentše tmonjanoshamentšé. Nýetscanga monjétsëtbëna arpangá y castellano copbenga jútjena inciensiýeca; chë copbenga inciensiýeca enjamna chë Bëngbe Bëtsabe entšanga tmojayana palabrënga, cháftaca jencuéntama ora.

<sup>9</sup> Y quem tsëm canto montsancántaye:

Aca merecido condëtsobuájoñe, chë uándmanana tsbuanácha chacuacama y chë sellënga chacutsécama;

er acbe buiñe juabuáshanëse tconjanóbana, y chca enjamna mo crocénana cuafjëtsjajocá, Bëngbe Bëtsabiamama chamotsemnana,

entšanga nýetsca cachca buiñe bomnënguentsana, nýetsca biyana bomnënguentsana, nýetsca canýe entšanguentsana, y nýetsca mándayëngbentša entšanguentsana.

<sup>10</sup> Aca tcojama chënga chamotsobena ácaftaca jtsemándayama

y uámanënga chamotsemnana, Bëngbe Bëtsábioye mo bachnangcá chamotseservénama, y quem luarentše chënga montsemánda ca —chënga monjëtseversiaye.

<sup>11</sup> Y chca sënjëtsonýaye ora, mallajta angelëngbe oyebuambnayana sënjanuena, y chënga monjëtsemna chë uámana puestentše, chë Ainënga y chë bëtsëjémënga amëndayëngbe shëconana. Nýetsá bëtscá angelënga monjëtsemna, corente mallajta;

<sup>12</sup> y chënga mëntšá monjëtseyebuache:

¡Chë Oveshatema cuafjobacá endmëná,

merecido endëtsobuájoñe, nýets obenana, nýets bomnana,

nýets osertánana y nýets añemo chaotsebomnana,

y entšanga chabiamama chamotsichamo cha nýets respeto buajoná yomna ca,

y chamotsinýanýnama cha puerta bëtsá y uamaná yomnana,

y nýetscanga chamotsatschuanama ca! —chënga monjëtseyebuache.

<sup>13</sup> Y sënjanuena, lempe ntšamo Bëngbe Bëtsá tojanmcá aina soyënga, celoca, quem luarentše, quem luarentša jashenoye y chë mar béjayoca, chëngnaca mëntšá monjëttsichamo:

¡Chë uámana puestentše tbemanábioye y chë Oveshatema nýetscanga nýets tempo y nýetsca tescama chamótsatacheuanaye

y chamotsichamo chata puerta uámanata y nýets respeto buajonata ibomna ca,

y chamotsinýanýná chata puerta bëtsétsata y obenata bëtsemnana ca!

<sup>14</sup> Y chë canta Ainëngna monjëttsichamo: “Chca chaotsemna ca.” Y chë bëtsëjémënga amëndayëngna tmonjanoshamentšé y chátbioye monjëttsatacheuanaye.

## 6

### *Chë Oveshatema chë canýsëfta sellënga tonjanëtsécá*

<sup>1</sup> Chentšana más sënjaninýe; chë Oveshatema chë canýsëftentšana natsana sello tonjanëtsécá ora, sënjanuena canýa chë canta Ainënguentsana puerta jabuache, mo cuafjajuesascá, mëntšá enjëttsichamo: “¡Mabo ca!”



<sup>2</sup> Sënjanrrepará y sënjáninÿe canÿe fñantse couaye, y chábeñe enjetsenjaquená canÿe arquëja enjétsatbëna. Chábioye canÿe coronësha tmonjaníyë, y mo canÿe ayënjanayacá tonjëftsanbocna, y cabá más jatsÿënjanámnaca.

<sup>3</sup> Chë Oveshatema chë inÿe sello tonjanëtsëcá ora, sënjanuena chë inÿa chë canta Ainënguentsana mëntsá enjétsichamo: “¡Mabo ca!”

<sup>4</sup> Y inÿe couaye tonjánbocna, canÿe buanganá; y chë enjetsenjaquená obenana tonjanóyëngacñe jamama chë fshantsentša natjëmbana vida chaotsopochocama, entšanga chamotsenóbama; y canÿe bëts espadëja tmonjanoyé.

<sup>5</sup> Chë Oveshatema chë inÿe sello tonjanëtsëcá ora, sënjanuena chë inÿa chë canta Ainënguentsana mëntsá enjétsichamo: “¡Mabo ca!” Sënjanontjësé y canÿe ftsenga couaye sënjáninÿe, y chë enjetsenjaquená canÿe romanësha enjétsëtbëna.

<sup>6</sup> Y chë canta Ainëngbeñe canÿe oyebuambnayana mëntsá sënjanuena: “Nÿe canÿe kilo trigo canÿe tesca trabajuama, y unga kilo cebadá canÿe tesca trabajuama; pero chë aceitiye y chë vínoyna ndoñe cattsepochoçaye ca.”

<sup>7</sup> Chë Oveshatema chë inÿe sello tonjanëtsëcá ora, chë ústonoca Ainá enjétsichamo: “¡Mabo ca!”

<sup>8</sup> Sënjanontjësé y canÿe shatsësiye couaye sënjáninÿe; chë enjetsenjaquená Obanana ca enjanabaina, y stëtsoica bonjëtsëstona canÿa, Obanënga imomna luare ca uabainá; y chátbioye obenana tmonjanatšatá cántañentsana cánÿentše quem luarentše jtsepochoçama, chentša entšanga jtsapochócase, entšanga tmojtsentsjanama, bëts shëntsánëngaca, šocanëngaca y quem luarentša tšátjaye bayëngaca.

<sup>9</sup> Chë inÿe sello tonjanëtsëcá ora, sënjáninÿe chë altarentša tajsoye chë tmojanóbanëngbe espíritënga, chë Bëngbe Bëtsabe palabra entšanga abuayiynayama tmojanóbanënga.

<sup>10</sup> Chora chënga tmonjanontsé tša uayebuáchana: “Uamaná y ntšamo tojašebuachenacá lempe amá bëngbe Nduño, ¿ntseco quem luarentša entšangbiama cochjayana ndoñe tšabá tmonjamama, y chë bëngbioye obanayama cochjácastigaye ca?”

<sup>11</sup> Chentšana nÿetscángbioye uafñantse entšayá tmonjaníyë y tmonjanëyana batšatema más chamobatmá ca, chë cachëngcá Crístbeyeca catšátanga y oservënënga, chë cachëngcá mochjanóbanënga, nÿetscanga choca chamojtsemnëntscuana.

<sup>12</sup> Y más sënjáninÿe; chë inÿe sello cha tonjanëtsëcá ora, jabuache fshantse tontsanangmëmana; shinÿe tontsanftšënganga, mo chë obaná tojtsemnana juichëtjuama entšayacá, y nÿets juashcona mo buiñcá enjëtsinÿna,

<sup>13</sup> y estrellatëmënga celocana fshantsoye tontsantquëcjana, mo canÿe higo betiye jabuache bínÿiaca tojtseshatíyeyna ora, chë nguëfshna higuëbenga cuafjatquëcjancá.

<sup>14</sup> Y celoca luare tontsanenatjëmba mo canÿe tsbuanácha cuafjuandmanacá, y nÿetsca tjañe y béjayoca fshantsënga, chë ndayentše enjamnentšana tontsanojuaná;

<sup>15</sup> y nÿetscanga, fshantsoca reyënga, uámanënga, soldadëngbe amëndayënga, bomnënga, obenana bomnënga, y nÿetscanga chë nÿets tempo nÿe inÿabiama oservënënga y chë cachëngbiama trabájayëngnaca, chë cuevëshënguiñe y bëts ndëtšbenguenache tjañe tmontsanóitana;

<sup>16</sup> y chë tjañëngoye y chë ndëtšbengoye montsanichamo: “¡Bëngbioye šmotsëtebuantsá y šmotsaitame, chë uamana puestentše tbemanabe bominÿentšana, y chë Oveshatembe uabouana castigo, cha bëngaftaca tbojetnama, bëngbeñe ndoñe chaondëtsemnana!”

<sup>17</sup> Er chë uachuana te chabe castigo jtsebínÿnama te tojóshjango; y mora ¿nda nanjobenaye chë sóyeca ndoñe chamondëtsepochoçama ca?” —chënga montsanichamo.

## 7

*Chë Bëngbe Bëtsábioye oservënënga chë uabouana castigüentsana mochántsatsebacana*

<sup>1</sup> Chca tonjanopasá chentsana, canta angelënga sënjánanÿe, monjétsatsana chë quem luarentša canta opochócayenache; chënga ndoñe quemënjatanleséncia chë canta binÿiënga jtsebínÿnama, ndoñe chaondëtsebinÿiyama, ni fshantsentše, ni mar béjayoca, ni ndocna betiyeshënguiñe.

<sup>2</sup> Inÿe ángelnaca sënjáninÿe, shinÿe bocana luaroicana enjetsabó, y chë Bëngbe Bëtsá Ainabe sello enjétsiyëboye. Chë ángelna chë inÿe canta angelëngbioye, ndëmuanÿengbioye obenana tmojanatšatá chë fshantsentše y mar béjayoca lempe jtsepochócama, chëngbioye jabuache tonjánabachembo:

<sup>3</sup> “¡Tondaye šmatjapochóca, ni fshantsoca, ni mar béjayoca, ni betiyeshënguiñe, chë Bëngbe Bëtsabiama oservénëngbioye chë sélloca juentsaca fchayauínÿnanantscuana, ndoñe chamondëtsapochocama ca!”

<sup>4</sup> Y sënjanuena buétanga chë sélloca tmojánauinÿnanayama: canÿe patse, canta bnétsana y canta uaranga entšanga uinÿnanánënga nÿetsca Israeloquentša bëts pamíllanguentšana.

<sup>5</sup> Judabe pamillentsana, bnétsana uta uaranga uinÿnanánënga;

Rubenbe pamillentsana, bnétsana uta uaranga;

Gadbe pamillentsana, bnétsana uta uaranga;

<sup>6</sup> Aserbe pamillentsana, bnétsana uta uaranga;

Neftalibe pamillentsana, bnétsana uta uaranga;

Manasesbe pamillentsana, bnétsana uta uaranga;

<sup>7</sup> Simeonbe pamillentsana, bnétsana uta uaranga;

Levibe pamillentsana, bnétsana uta uaranga;

Isacarbe pamillentsana, bnétsana uta uaranga;

<sup>8</sup> Zabulonbe pamillentsana, bnétsana uta uaranga;

Josebe pamillentsana, bnétsana uta uaranga;

y Benjaminbe pamillentsana, bnétsana uta uaranga entšanga.

### *Chë mallajta entšanga uafjantsëjuangá uichëtjonënga*

<sup>9</sup> Chentsana, sënjanrepará y mallajta entšanga sënjánanÿe, ndocná quentaisobenaye jacúntana, nÿetsca mándayënguentsana, nÿetsca cachca buiñe bomnënguentsana, nÿetsca canÿe entšanguentsana, y nÿetsca biyana bomnënguentsana; chënga monjétsatsana chë uámana puesto chë Oveshatembe natsanentše, uafjantsëjuangá uichëtjonënga y ramëshangá monjétsëtbëna.

<sup>10</sup> Nÿetscanga tša monjétsayebuache:

¡Bënga atsebacayana endobá, Bëngbe Bëtsá,

chë uámana puententše entsetbemanábentsana,

y chë Oveshatémbentsana ca!

<sup>11</sup> Y nÿetsca angelënga, chë uámana puesto y chë bëtsëjëmënga amëndayënga y chë canta ainëngbe shéconana monjétsatsanënga, chë uámana puententša natsanoica tmonjanoshamentšé, fshantsóntscoñe jotsejbënase, y Bëngbe Bëtsá tmonjanadorá,

<sup>12</sup> mëntšá jayanëse:

¡Chca chaotsemna!

Bëngbe Bëtsábioye nÿets tempo y nÿetsca tescama chamotsadorana

y nÿets ainánaca cha chamotsatschuaná.

Entšanga chamotsinÿanÿná cha puerte bëtsá y uamaná bëtsemnama;

cha endmëna nÿets osertánana bomná, y nÿets respeto buajoná, y nÿets obenana y añemo bomná.

¡Chca chaotsemna ca! —chënga monjétsichamo.

<sup>13</sup> Chentsana, canÿa chë bëtsëjemënguentsá tonjanoyebuambá y šonjantjá: “¿Ndëmuanÿënga imomna chë uafjantsëjuangá uichëtjonënga, y ndëmocana tmojabo ca?”

<sup>14</sup> “Taita, aca chëngbiana cotátšëmbo ca” —atše sënjanjuá.

Y cha šonjaniana: “Chënga montsemna chë jabuache ngmenënguentšana tšabá tmojábočanënga; chë Oveshatema chëngbiana tojóbana y chëngbe bacna soyëngama perdonánënga montsemna; chëngbe uichëtjonëjuangá tmojtsaboshabé y chë Oveshatembe buíñeca tmojtabofjantsé.

<sup>15</sup> Chíyeca chënga chë Bëngbe Bëtsabe uámana puestentša natsanoica montsemna, y chábioye nyets tempo chabe delante mondëserveda, y chë uámana puestentše entsetbemaná, chëngbenache jtsemnëse, chënga echántsanýena, mo cuafjutsebotscá.

<sup>16</sup> Ya ndoñe más shëntsana, ni uajuendayana quemochátsbomna; shinýama, ni yapa jënýama ya ndoñe más quemochátssufrina;

<sup>17</sup> er chë Oveshatema, chë uámana puestentša natsana tsëntsaca entsemná, chëngbioye mo oveshëngcá echantsabuajënýa, y echanjunatse béjaye vida bomniye yóbocana luaroye, y Bëngbe Bëtsá echanjama ya ndoñe más ngménana chamondëtsebomnama ca” –cha šonjanjuá.

## 8

### *Chë ústonoca sello*

<sup>1</sup> Chë Oveshatema chë uándmanana tsbuanáchañe chë ústonoca sello tonjanëtsécá ora, celoca ndocá quentétsënëna mo tsëntsa hora nyetsá.

<sup>2</sup> Chora sënjánanye chë canýsëfta angelënga, chë Bëngbe Bëtsabe delante monjétsatsanënga; chëngbioye canýsëfta trompetëfjuangá tmonjaníyë.

<sup>3</sup> Chentsana inýe ángel tonjánashjango, canýe castellano matbëtémaca incienso jajuinýiyama, y altar natsanoica tonjantsá; chábioye bëtscá incienso tmonjanoyé chaojuinýema chë castellano altaroca, chë uámana tbemana natsanoica enjëtsemnoca. Chë ángel incienso tonjanjuinýë Bëngbe Utabná jëtschuayama, cánýiñe nyetsca chë Bëngbe Bëtsabe entšanga tmojoyebuambá palabrëngaca, cháftaca jencuëntama ora.

<sup>4</sup> Y chë incienso juinýnentša ngona, chë ángelbe cucuatšentšana Bëngbe Bëtsabe delante tonjanótsjua, cánýiñe chë Bëngbe Bëtsabe entšanga cháftaca jencuëntama palabrëngaca.

<sup>5</sup> Chentsana chë ángel chë incienso jajuinýiyama matbëtëma tonjanca, chë altarentša chebánbengaca tonjanajutjé, y quem luaroye tonjanëtsana. Chora enjëtsemna tša jue-sasanana, corente shauenanana, bëtscá tcuinýënga, y quem luare tontsanangmëmëna.

### *Chë trompetëfjuangá*

<sup>6</sup> Chora chë canýsëfta angelënga, chë canýsëfta trompetëfjua uabomnënga, tmonjanoprontá chëfjuangá juajatëtama.

<sup>7</sup> Chë natsana ángel chabe trompetëfjua tonjanájatëto, y quem luaroye tmonjanëtsana bëntstá y íñeshe, cánýiñe buíñeca. Ungañentšana cánýentše quem luarentše tontsanjuinýe, úngañentšana cánýentše betiyeshënguiñe y nyetsca nguëfshna shacuanënguíñnaca.

<sup>8</sup> Chë inýe ángel chabe trompetëfjua tonjanájatëto, y chora chë mar béjayoye tmonjanëtsana canýe soye mo canýe bëts tjañe tojtsangbototjuancá, y chë mar béjayiñe úngañentšana cánýentše buíñe tontsanóbema.

<sup>9</sup> Chë mar béjayiñe vida imobomnëngbeñe úngañentšana cánýentše tontsanopochocá, y chë barquënguëntšnaca úngañentšana cánýentše.

<sup>10</sup> Chentsana chë inýe ángel chabe trompetëfjua tonjanájatëto, y canýe bëts estrella, mo canýe uajuinýanëshacá enjëtangbototjuana, celocana tonjanótsatše chë úngañentšana cánýentše béjayënguiñe, y béjaye óbocanenache.

<sup>11</sup> Chë estrella enjanabaina Untjana ca; y chë úngañentšana cánýentše buyeshënguiñe untjiye tontsanóbema, y chë untja búyeshe causa ba entšanga tmonjanóbana.

12 Chë inye ángel chabe trompetéjua tonjanájetëto, y chora tontsanóndbema chë úngañentsana cánÿentse shinÿiñe, y chë úngañentsana cánÿentse juashconiñe y chë estrellenguíñnaca. Chca, nÿetsca chentsa úngañentsana cánÿentse ibetiñe tonjanoquedá, y chë causa ndoñe queméntétebinÿnaye posufta horéntscuana, bnété canta hora y ibeta canta hora.

13 Chentsana, sënjanrrepará y sënjanuena canÿe águila, tsbanánoca celoca enjet-songüefjná, jabuache mentsá enjétsichamo: “¡Tsa lastema, tsa lastema, tsa lastema quem luarentsa entsangbiama, chë inye trompetéjjuangá chë inye unga angelenga chamo-juájetëto ora ca!”

## 9

1 Chentsana chë inye ángel chabe trompetéjua tonjanájetëto, y sënjáninÿe canÿe ángel quem luaroye jastjanguana y enjétsinÿna mo canÿe estrella celocana quem luaroye cuaftsotsatsaná; y moye tonjánashjango ora, tmonjanoyé chë uabouana tboca atëfjñentša llavëfja.

2 Chë uabouana tboca atëfjñentse tonjánatëfjo, y chentsana becá ngona tonjanótsjua, mo bëts hornentsa ngoncá; y chë uabouana tboye atëfjñentse ngona causa shinÿe tontsanibétata y nÿets celoca ena ngona enjétssemna.

3 Chë ngonentsana ba tsátjaye chapulinga tmonjánbocana, y nÿets quem fshantsëjana tmonjanáshana; y chëngbioye obenana tmonjanatsatá, chánaca jándbemama, mo chë juetjuama alacranëngbe obenancá.

4 Chëngbioye tmonjanamëndá tondaye ntjándbemana chë shacuanënguiñe, ni ndocna nguëfshna matënguiñe, ni ndocna betiyeshiñe; nÿe chë juentsaca chë Bëngbe Bëtsabe sëlloca nduinÿnanana entsangna aíñe.

5 Pero ndoñe chematanalesenciá entsángbioye jobáyana, ndayá nÿe jamama chënga shachna shinÿéntscuana tsetshanana chamotsebomnama; y chë chënga monjánama chamotsebomnama tsetshanana enjamna mo canÿe alacranbe uetjoniñcá.

6 Chca tempo chaojtsemna ora, entsanga mochántseguaye ntšamo jtsóbanama, chë tsetšanënga jauántama ndoñe quemochátobena causa, pero ndoñe quemochátinÿena ntšamo jamése jtsóbanama; y masque tsa mochántseboše jóbanama, chora chëngaftaca ndoñe chca queochatopása, mo jóbanama ndoñe tmontsobencá.

7 Chë tsátjaye chapulinga monjétsinÿna mo couayëngcá prontánënga jama entsángaftaca jétsjama; chëngbe bestšašiñe monjanábomna mo castellano coronëshangacá, y chëngbe jubiá enjamna mo entsabe jubiácá.

8 Stjënashë monjánbomna mo shembásabe stjënashacá, y chëngbe juatsašënga mo leonbe juatsašëngcá.

9 Chëngbe cuerpënga jenëuyanama cochaca monjánbomna morocho soyënga, mo hi-erro soyëngcá, y chëngbe juatëngmiashangá tmojt sabonjná ora, chë shauenanana bëtscá enjamna, mo ba cochëshangá couayënga cuaftsasjojnacá, chë inÿengaftaca jétsjama tmojëftsátjajo ora tojtseshauenancá.

10 Chënga monjanábomna mo alacranbe uascuatšëjuacá, ba uetotjëfjangaca, y chë uascuatšëjuaca obenana monjánbomna shachna shinÿéntscuana entsanga mal chamot-sepasama.

11 Chë tsátjaye chapulinga canÿe amëndayá monjánbomna, chë uabouana tboca mándaye ángel; hebreo biyañna cha uabainá Abadón ca y grieguiñna Apolión o pochocayá ca.

12 Chë natsana pochócayana ya tocjochnëngo, pero más chcoye cabá inÿe uta soye más pochócayana cachcá echántsemna.

13 Chentsana chë inye ángel chabe trompetéjua tonjanájetëto, y canÿe oyebuamb-nayana sënjanuena, chë Bëngbe Bëtsabe delante enjétssemna castellano altarentša juats-boica lado sibienache obocanentsana enjétsbocana.

14 Y chë oyebuambnayana, chë trompetëfjua tonjanájetëto y enjétsëtbëna ángelbioye tbonjanianyana: “Chë canta angelënga chë Eufrates bëts fshájaye tsachoca utsbuanënga mëjafjoná ca.”

15 Y chë canta angelënga tmonjanëjafjoná; y nÿa chë ora, chë te, chë shinÿe y chë uatama chëngbioye tmojanaprontá, chë quem luarentsa entsángbeñe úngañentšana cánÿentšënga jtsëbáyama.

16 Atše sënjanuena buétanga imojamna chë angelëngaftaca tmojána soldadënga, couayënguiñe: uta patse millonënga ca.

17 Mëntšá sënjánanÿe mo otjenayoquëcá chë couayënga y chë chëngbeñe enjaquenënga: Chë enjaquenënga monjánbomna morochó soyënga cochaca, jenëuyanama, y chë soye buanganana enjáninÿna, mo iñcá, y fchendana mo chë uámana ndëtšbé jacintcá y tsësiyana inÿnana mo azufrcá; y chë couayënga monjánbomna mo leonbe bestšašcá, y chëngbe uayoicana enjétsobocana iñe, ngoná y azufrana.

18 Y chë úngañentšana cánÿentše entsánga tmonjanóbana quem unga uabouana pochócaye soyëngaca, chë couayëngbe uayoicana enjétsobocanana: iñe, ngoná y azufrana.

19 Er chëngbe obenana entsánga japochócama monjánbomna uayáshañe y uascuatšëjuañe; er chëngbe uascuatšëjua enjuamna mo mëtscuayëngcá, bestšašëngaca, y chëjuanga causa entsánga mal montsanpásaye.

20 Pero chë inÿe entsánga, chë uabouana pochócaye soyëngaca ndoñe tmonjanopochocanga, juabna ndoñe chematantrocá, y ndoñe chematanajbaná amana chë bacna soyënga ntšamo monjanamcá; ndoñe chematanajbaná adórayana chë bacna bayëjënga, ni chë mo diosënga cuaftsemncá jtsejuabnayëse imojánadorana castellano soyënga, midio soyënga, bronce soyënga, ndëtšbé y niñëbé soyënga; y chca soyënga ndoñe quemënjatobena ni jinÿama, ni jouenama, ni jtsanama.

21 Juabna ndoñe chematantrocá y ndoñe chematanajbaná entsánga obanayana, encjuanayana, bacna soyënga boyabása o shembásaftaca jtsamëse oyenana, ni atbëbanana.

## 10

### *Chë ángel base uándmanana tsbuanáchaca*

1 Chentšana sënjáninÿe inÿe ángel, puerte obenana bomná; celocana enjétsastjajuana, y chabe shëconana canÿe jantšetëshe enjétsëmna; chabe bestšaše tatsëtsacá canÿe tsëfcuácuatjo. Chabe jubiá shinÿcá enjétsëbuashinÿinÿana, y chabe shecuatšënga mo úcuatjona niñëbenga cuaftsoiñcá.

2 Chabe cucuatšëñe enjétsëtbëna canÿe base uándmanana y utëfjna tsbuanácha. Chabe catšbioica shecuatšëca chë mar béjayoca tonjantsá, y chë uañicuayóicatšëcna, quem fshantsentše.

3 Y jabuache tonjanoyó, mo canÿe león cuaftseyocá; y tonjanoyó ora, canÿsëfta juesasanentša jabuache shauenanana sënjanuena.

4 Chë canÿsëfta juesasana chca tmonjanoyebuambá ora, atše sënjanoprontá ntšamo chënga tmonjanayancá juabemama; pero canÿe oyebuambnayana celocana sënjanuena, mëntšá šonjétsatsaye: “Nÿe aca cochtsójuabnañe ntšamo chë canÿsëfta juesasana tmonjayancá, ndocnábioye catjauyana, y chë soye ndoñe catjuábema ca.”

5 Chora chë ángel, chë mar béjayoca y quem fshantsentše atsaná sënjaninÿá, chabe catšbioica cucuatšë celoye tonjanatsbaná,

6 y tonjanjurá Bëngbe Bëtsabiama, chë nÿets tempo y nÿetsca tescama oyenabiama, chë celoca, quem luare, chë mar béjaye, y lempe chë luarënguiñe yobinÿncá tojanmabiama. Tonjánayana: “Ya ndoñe más quemochatobatma; mora Bëngbe Bëtsá echanjama ntšamo tojašëbuachenacá,

<sup>7</sup> er chë tempo chaojóshjango, chë ústonoye ángel chabe trompetéfjua juajatëtama chaojontsé ora, chora ya echanjochnëngo ntšamo Bëngbe Bëtsá jamama yojuabnacá; chë soye nyetsca entsángbioye cha ndoñe chenatinýanyé, ntšamo tempo cha chabe oservénëngbioye, chë chabe juabna oyebuambnayëngbioye tojanabuayenacá ca” —cha tonjánayana.

<sup>8</sup> Chë atše sënjanuena oyebuambnayana celocana enjétsobocanana, cachiñe šonjanatsëtsá y šonjaniyana: “Motsa y mauaca chë mar bėjayoca y quem luarentše ángel entsemnabe catsbioica cucuatšiñe base uándmanana y utëfjna tsbuanácha ca.”

<sup>9</sup> As atše chë ángelbioye sënjána; chë base uándmanana tsbuanácha chašuíyema sënjaniyana, y cha šonjanjuá: “Quemécha, motsásañe. Acbe uayoye uamešquénëcha mo tjouangbe meloycá echántsamna, pero acbe uafsbioyna puerte uauntjécha echantsábema ca.”

<sup>10</sup> As chë base uándmanana tsbuanácha chë ángelbe cucuatšentsana sënjanaca, y sentsanásañe; y atšbe uayoye meloycá enjétsamna, pero sënjanabmuaná y atšbe uafsbioyna puerte uauntjécha tontsanábema.

<sup>11</sup> Chora šmonjaniyana: “Aca cmontsemna cachiñe jtétabuayenana, ntšamo Bëngbe Bëtsá tojayancá chë ntšamo yochjopásama, ba canye luarentša entsángaftaca, ba mándayëngbentša entsángaftaca, ba biyana bomna entsanguentsëngaftaca y quem luar-entša reyëngaftaca ca.”

## 11

### *Chë útata Bëngbe Bëtsabe juabna oyebuambnayata*

<sup>1</sup> Chentšana canye medídaye niñëfja šmonjanoyé, mo jatšëmbonëfjá, y šmonjaniyana: “Motsa y Bëngbe Bëtsabe bëts yebna y chentša altar cochjamedída, y cochjácuntaye bueta entsanga chentše Bëngbe Bëtsábioye imojtsadorana.

<sup>2</sup> Pero chë Bëngbe Bëtsabe yebnentše más shjoica luarna cachcá cochjonýaye, ndoñe catjamedída, er chiñe chë ndoñe judiëngbiama endmëna; y chënga, chë uámana ca uabaina bëts pueblama, canta bnëtsana y uta shinýentscuana soyënga mochántsama chiñe jtsepochoćama, mo cuaftsebotajnacá.

<sup>3</sup> Pero atše, útata atšbiama tatsëmbuata y oyebuambnayata chanjichamuá atšbe cuenta entsángbioye jábuayenama, canye uaranga y uta patse y chnënguana bnëtsana tentscuana. Chatna uajojësha entsayangá uichëtjonata bochántsemna, chca, ngmena bomnama jinýanýiyama ca” —chata tbonjánayana.

<sup>4</sup> Quem útata atšbiama tatsëmbuata y oyebuambnayata bontsinýinýena chë uta olivos betíyeca y chë uta candelerešeca, ntšamo Bëngbe Bëtsá, chë quem luarentše mandayabe delante endmëncá.

<sup>5</sup> Nderado nda tojtseboše chatbiama bacna soye jamama, ndoñe quentatobeyenaye ntšámnaca jáborlana, er uayoicana íñeshe nanjóbcna y chë uayayëngbioye nantsapochóca; nderado nda tojábosena chatbiama bacna soye jamama, cachcá cha buántsemna jóbanama.

<sup>6</sup> Chë útata obenana bondbomna celoca jtsachtama, ndoñe chaonduaftema, entsángbioye Bëngbe Bëtsabiama chabojsabuayiná tese; obenana bėjayënga buiñe jtsebiama, y jamama quem luarentše chaotsóndbemama, nyetscna pochóca soyëngaca, bueta sóynaca ntšamo chata tbojtsebošcá.

<sup>7</sup> Pero ntšamo Bëngbe Bëtsabiama ibotatsëmbcá entsángbioye jábuayenama chata chabo- japochoća ora, chë uabouana bayá, chë corente bëts tboicana chaojabocná, chátbioye echántatsjaye, echantsayëñaná y echantsëbaye.

<sup>8</sup> Y chatbe óbana cuerpo, chë corente bëts pueblentša tsáshenañe echanjoquéda, chë chatbe Utabná tmojancrucificá luarentše, y chë bëts pueblo inýetšá juabáyamna

nántsemna mo chë Sodoma y Egiptó luaroycá. Chentše endmëna mo chë bëts pueblënga Sodoma y Egiptcá, er chentše chë entsanga yapa bacna soyënga jtsamana.

<sup>9</sup> Y unga y tsëntsa tentscuana, chë obanatbe cuerpo mochantsonyaye, nyetsca canye luarentša entsanga, nyetsca cachca buiñe bomna entsanga, ba biyana bomna entsanguentsana y ba mándayëngbentša entsanga; ndoñe quenátslesenciana chata jutabuantsama.

<sup>10</sup> Chata bochjóbanama, quem luarentše oyenënga mochanjóyejuaye; tša oyejuayënga mochantsemnama, ndayánaca mochanjénatsëtaye, er ntšamo chë Bëngbe Bëtsabe juabna oyebuambnayata tbojanayancá, tojanma quem luarentše oyenënga puerte chamo-sufrima.

<sup>11</sup> Pero chë unga y tsëntsa te tonjanochnëngo ora, Bëngbe Bëtsá tonjanma chë obanata chábuatayenama; chentšana tbontantsata, y chë monjétsantješnënga tša uatjana tonjanëbuache.

<sup>12</sup> Chora canye jabuache oyebuambnayana tbonjanuena, celocana mëntšá enjétsétsétnaye: “Moye mašënguata ca.” Y chatna canye jantšetëshiñe tbonjántsjua, y chatbe uayayënga chca monjétsonyaye.

<sup>13</sup> Cachora quem fshantse jabuache tontsanangmëmana, y chë bëts pueblentše bnëtsanentsana cányentše tontsanáshajaye, y canyëfta uaranga entsanga tmonjanóbana. Chë ainënga tmonjanoquedanga, tša auatjanánënga, chë celoca Bëngbe Bëtsábioye montsanadorana.

<sup>14</sup> ¡Chë inye uabouana soye quem luare japochócama, mora tocjóchnëngo, pero betscó chë ústonoye uabouana pochócaye soye echanjóshjango!

### *Chë ústonoye ángelbe trompetëfjua*

<sup>15</sup> Chë ústonoye ángel chabe trompetëfjua tonjanájatëto ora, celoca tša monjétsayebuache, mëntšá monjétsichamo:

Ora tocjobuache, Bëngbe Utabná y chabe Uámana Uabuayaná Jesucristbe amëndayana quem luarentše chaotsemnama,

y chë amëndayana echántsemna nyets tempo y nyetsca tescama ca.

<sup>16</sup> Y chë uta bnëtsana y canta bëtsëjëmënga amëndayënga, chë chëngbe uámana puestiñe Bëngbe Bëtsabe delante monjétsëbiamanënga, tmonjanoshamentsé, fshantsóntscoñe jot-sejbénase, y Bëngbe Bëtsá tmonjanadorá,

<sup>17</sup> mëntšá jayanëse:

Bëngbe Utabná, Bëngbe Bëtsá nyets obenana bomná,  
aca chë mora cha condmëná y chë tempo cha conjamná cbontsatschuaná,  
er nya mora acbe bëts obenánaca soyënga cochjama, acbe amëndayana jóntšama.

<sup>18</sup> Ba luarentša entsanga ácaftaca tmonjanotšatjayaná;  
pero chëngaftaca cmojetnama chë uabouana castigo jtsebínynama te tocjóshjango,  
chë tempo tmojanóbanëngbiama jayanama tšabá o ndoñe tšabá tmonjëftsemama.

Tonjóshjango chë hora, uacanána jtatšatayama chë acbiama oservëngbioye,  
chë acbe juabna oyebuambnayëngbioye, chë acbe entsángbioye,  
y chë acbe uabaina nyetscangbiama más bëts uabainana yomnama juabnayëngbioye,  
uámanënga y nduámanënga;

y chë tempo tonjóshjango, quem luare pochocayënga jtsapochócayama ca —chënga tmonjánayana.

<sup>19</sup> Chora, Bëngbe Bëtsabe bëts yebna celoca tonjantëfjo, y choye enjëtsebinyna chë cajontema, ndayëtëma yojaninyanyná ntšamo Bëngbe Bëtsá chabe entsángbioye to-janašebuachenacá; y chora enjëtsemna tcuinyënga, tša shauenanana, juesasanana, quem fshantse tontsanangmëmana y bëtscá bëntstá tonjantquécjana.

## 12

### *Chë shembása y chë uabouana bayá*

<sup>1</sup> Chentsana, canye bêts soye celoca tonjanonýná entsanga canye soye jinýanýiyama: canye shembása, shinýe mo chabe uichëtjoniaca, juashcona chabe shecuatšentša tajsoye, y chabe bestšašifne canye coroněsha bnětsana uta estrelléngaca.

<sup>2</sup> Chë shembása ngomamaná enjětsemna, y chë šešona jónýnama yojétsobecuama jabuache enjětseyoye, chë šešona jónýnama cha puerta jasúfriama ibojamna causa.

<sup>3</sup> Y chora inýe bêts soye celoca tonjanonýná, entsanga inýe soye jinýanýiyama: canye uabouana dragón buanganá, canýsěfta bestšašéngaca y bnětsana tsětjoněšéngaca y chë bestšašénguiñe enjanábomna canýsěfta coroněshangá.

<sup>4</sup> Chabe uascuatšéjuaca úngañentšana cányentše chë estrellatéménga celocana tontsan-sjojó, y quem fshantsoye chétéménga tontsanětsana. Y chë dragón chë šešona jtsebom-nama shembásabe delante tonjantsá, chë šešonatémbioye jtsósañama, cha tojonýná ora.

<sup>5</sup> Chora chë shembása canye šešona boyabásetema bontsanbomna, nda nýets lu-arenache entsángbioye yochtsaméndaye mo canye hierro varěfjaquécá. Pero chë šešona chábentšana tmontsanjuaná y Běngbe Bětsábioye, chabe uámana puestoye tmontsanámbañe.

<sup>6</sup> Chë shembásana entsanga ndoyena luaroye tontsanachá, Běngbe Bětsá canye luare ibojaboprónta choye, chentše saná chamocaredadoma, canye uaranga y uta patse y chnénguana bnětsana tentscuana.

<sup>7</sup> Chentsana celoca canye entsjanayana enjětsemna: Miguel, chë angeléngbe améndayá, y chabe angelénga chë dragónaftaca monjétsentsjanaye. Chë dragón y chabe angelénga monjétsatsjanaye,

<sup>8</sup> pero ndoñe chematanobená jáyénjanama, y chéngbiama ya ndoñe más luare celoca quentětsemna.

<sup>9</sup> Chcase, chë uabouana dragón chocana tmontanábocna, chë tempsca mětšcuaye, chë Diablo y Satanás ca uabainá, y chë bětská entsángbioye aingñayá; quem fshantsoye cha tmontsantsatše, y chë cha yojanaménda angeléngnaca.

<sup>10</sup> Chora canye jabuache oyebuambnayana celoca sēnjanuena, mēntšá enjétsichamo: Chë Běngbe Bětsá entsanga játsebacama tempo ya tonjóshjango.

Mora Běngbe Bětsá echanjínýanýiye chabe obenana y mándayana, y chabe Uámana Uabuayaná Jesucristbe obenana jtsemándayama; er chë Cristbe delante bēngbe catšátanga mal aquedayá ya tmontábocna, nda nýets tempo Běngbe Bětsabe delante mal enjanaquedayá.

<sup>11</sup> Běngbe catšátanga cha tmonjayénjaná, er Cristo, chë mo tmojóba Oveshatemcá, Běngbe Bětsá bacna soyéngama entsanga cháuaperdonama,

tonjanóbana, chabe buiñe juabuáshaněse, y chë ndegombre soyéngama chénga monjanóyebuambnáyeca; er chéngbe vida chéngbiama ndoñe quenjatámana; Jesucristo jaserviama jóbanama chénga monjanprontana.

<sup>12</sup> ¡Chcasna, celoca corente oyejuayana chaotsemna, y tséngaftanga chë choca oyenéngbeñnaca!

¡Pero tša lastema chë fshantsoca y mar bėjayoca oyenéngbiama, er chë diablo tséngaftangbioye tonjástjango, corente tsatjayá, er cha entsetátšémbo ya nýe batšá yojtsábojamna chë chábioye mochjacastígama ca! — enjétsichamo.

<sup>13</sup> Chë dragón quem fshantsoye tmojtsantsatsama tonjáninýe ora, chë šešona boy-abásetema tbonjaněshjango shembásabioye tbontsanacmé.



14 Pero uta juatëngmiáša, chë bëts aguilbeshá, chë shembásabioye tmonjaníyé, chabíama tmojanprontá luaroye chaongüefjoma, entsanga ndoyena luaroca, chë dragónbentsana bënoca; y chentše enjamna chë shembásabioye saná chamuájuatšema, unga y tsëntsa uatëntscuana.

15 Chora chë dragón, chabe uayoicana bëts béjaye tonjanbuashëtjo chë shembásabe stëtšoica, chaobuama y chabotsambama;

16 pero quem fshantse chë shembásabioye tbonjanájabuache, er chë fshantse mo uayašacá tonjantëfjo, y chë dragonbe uayoicana béjaye obocniye tontsanobmuánañe.

17 Y chë dragón chë shembásabioye tondaye jamana chenatanobená causa, corente cacháftaca tbonjánetna, y tonjána chë ínÿenga, chë shembásabe basengcá mondmënënga játsjayama, ntšamo Bëngbe Bëtsá yomandacá imobedecënënga, y ntšamo Jesucristo tonjanabuayená ndegombre soyëngaca sempre imoyenënga.

18 Y chë dragón chë mar béjaye tsachañe tonjantsá.

## 13

*Chë dragón tonjanma, chë mar béjayoca uabouana bayá chabe obenana chaotsebomnama*

1 Chentsana atše sënjanínÿe, canÿe uabouana bayá chë mar bejajoicana tonjánbocna; enjánbomna canÿsëfta bestšašënga y bnëtsana tsëtjonëšënga, y chëšënguiñe bnëtsana coronëshangá, y chë bestšašënguiñe bañe enjëtsabemana Bëngbe Bëtsabíama contra oye-buambnaye uabaina.

2 Chë uabouana bayá sënjanínÿá enjamna mo canÿe leopardcá, mo osbe shecuášangaca, y chë uayáshana mo leonbeshacá. Chora chë dragón tonjanma chë uabouana bayá chaotsebomnama chabe obenana, y chabe uámana puesto jtsemándayama, y chabe bëts mando.

3 Canÿe chabe bestšašënguentše enjëtsinÿna mo jóbanama tëtšeniñcá; pero chentše tbontanóbema; y chora quem luarentša nÿetsca entsanga ojnanánënga monjëtsemna, y chë uabouana bayábioye montsanëyeunana.

4 Y chë dragón montsanadorana, chë uabouana bayábioye obenana tbojánatšetama; y chë uabouana bayábioynaca montsanadorana, mëntšá jayanëse: “Ndocná obenana quenátsbomna quem uabouana bayacá, y ndocná quenátobena chábioye jayënjanama ca.”

5 Chë uabouana bayábioye tbonjanlesenciá corente podesca Bëngbe Bëtsabíama chaotsóyebuambnama, y obenana tbonjanatšetá, canta bnëtsana y uta shinÿëntscuana chaotsemándama.

6 Y podesca Bëngbe Bëtsabíama tonjánayana, soyënga chabe contra, chabe bëts yebnama y chë celoca oyenëngbe contra.

7 Chábioynaca tbonjanlesenciá chë Bëngbe Bëtsábenga imomnënga játsjayama, jáyënjanantscuana; y obenana tbonjanatšetá chaotsemándama nÿetsca cachca buiñe bomna entsángbeñe, nÿetsca canÿe entsángbeñe, nÿetsca biyañe bomnëngbeñe, y nÿetsca mándayëngbentša entsángbeñe.

8 Chë uabouana bayá nÿetsca quem luarentša entsanga mochántadorana. Chë entsanga mondmëna ndëmuanÿengbe uabaina ndoñe yontsábemana, chë Bëngbe Bëtsábioye jëtschuayama mo canÿe oveshatemcá, tojanóbanabe librëšañe. Bëngbe Bëtsá quem luare cabá ndëma ora, quem librëšañe tojanábema nÿetscanga chë tšabe vida mochjónÿenëngbe uabaina.

9 Chë jouenama obenënga, chamouena.

10 Chë cárceloye jama ibomná, cárceloye bochanjotóca jama; chë espadējaca jobanamá, espadējaca echanjóbana.

Chíyeca quem luarentše entseyta, chë Bëngbe Bëtsábenga imomnënga padecena soyënguiñe tmojtsemna ora, puerte uantadënga jtsemnana y Bëngbe Bëtsábeñe jtsošbuáchiyana, mo chë Bëngbe Bëtsabe entšangcá.

<sup>11</sup> Chentsana inye uabouana bayá sënjáninye, quem fshantsentsana enjétsébocana; uta tsëtjonëse mo oveshabešcá enjánbomna, pero mo canye dragoncá, mo canya Satanásbeyeca mandanacá enjétsoyebuambnaye.

<sup>12</sup> Y enjánama soyënga chë natsana uabouana bayabe nyets obenánaca, chabe delante. Chë fshantsentsa bayá tonjanma nyetsca luarentše oyenënga chamotsadoránama chë natsana uabouana bayábioye, chë jóbánama tëtšeniñe tbontanobemá.

<sup>13</sup> Cha ba bëts soyëngnaca enjánama chabe obenana entšanga jinýanýiyama, entšangbe delante jamana iñe celocana fshantsoye chaótsatsamnaca.

<sup>14</sup> Y cha tbonjanlesenciá chaoma chabe obenana jinýanýiyama chë natsana uabouana bayabe delante. Chë soyëngaca entšanga tonjanaíngñé, y quem luarentša entšanga tonjanéyana canye soye chamopormá, y chë soye cháotsinýna mo chë natsana uabouana bayacá, chë espadéjaca tëtšená enjamná, y chora tšabá enjetsatsmëná.

<sup>15</sup> Y chë inye uabouana bayábioye tmonjanlesenciá obenana chaotsebomnama jamama, chë natsana uabouana bayábioye jadórana entšanga tmonjanma soye vida chaotsebomnama, y chë soye jóyebuambayama chaotsobenámna, y jamama chë chábioye ndoñe tmontsadoránënga chamóbanama.

<sup>16</sup> Y tonjanma, nyetscángbioye, básenga y bëtsëtsanga, bomnënga y ndbomnënga, cachëngbiama trabájayënga y nye ínýabiama nyets tempo oservénënga, catšbioica cucu-atšíñe o juentsaca chamuínýnanama.

<sup>17</sup> Y ndocná quenjátanobena ni jiyama, ni jobuámiñama, chë uinýnanánana ndoñe tontsebomnëse; chë uabouana bayabe uabaina o chë chabe uabainama yomna número.

<sup>18</sup> Chë número jinýenamna bëtscá osertánana jtseytana. Chë becá osertánana bomná cháuinýena ntšamo chë uabouana bayabe número iuayancá, er canye entšabe número endmëna. Chë número endmëna chë chñënguana patse y chñënguana bnëtsana y chñënguana.

## 14

### *Chë canye patse y canta bnëtsana y canta uaranga entšangbe canto*

<sup>1</sup> Y más sënstanonýá. Sënjáninye, chë Oveshatema, enjétsatsjabna Sión ca uabaina tjoca, y cháftaca monjétssemna canye patse y canta bnëtsana y canta uaranga entšanga, y chëngbe juentsaca enjétsabemana chë Oveshatembe y chabe Taitabe uabaina.

<sup>2</sup> Chora sënjanuena celocana canye shauenanana, mo bëtscá bėjayënga y bëts juesasana shauenanancá; y chë shauenanana enjamna mo chë arpësha uenanayënga chëngbe arpëshangá tmojtsabuastocá.

<sup>3</sup> Chënga canye tsëm canto montsancánta Bëngbe Bëtsabe delante, chë chabe uámana puesto y chë cháftaca canta Ainënga y chë bëtšëjëmënga amëndayëngbe natsanentše. Y ndocná quenjátanobena chë canto juatsjínýana, nye chë canye patse y canta bnëtsana y canta uaranga quem luarentšëngbentšana atsebácanëngna aíñe.

<sup>4</sup> Chënga monjanmëna chë shembásaftaca ndocna bacna soye tmonjanmënga, er chënga imojanenománda chca bacna soyënga ndoñe ntsamama; chë Oveshatema ndëmoye tojtsá y chëngnaca choye jtsëstonana. Chënga imojamna chë natsanënga chë quem luarentša entšanguentše atsebácanënga jtsemnana, y chënga atsebácanënga imojtsemna Bëngbe Bëtsá y chë Oveshatema jtsaservënama.

<sup>5</sup> Chënga ndocna te tmonjanobosteró; ndocná quenátobena jayanama chënga bacna soye tmojanma ca.

*Ntšamo chë unga angelënga tmojánayana*

<sup>6</sup> Chentsana inye ángel sēnjáninye, tsbanánoca celējana enjétsongüefjnaye. Cha enjánbomna canye nyets tempscama oservena buayenana soye, entsángbioye jáuyanama, nyets quem luarentse oyenēnga, nyetsca mándayēngbentša entsanga, nyetsca cachca buiñe bomna entsanga, nyetsca biyañe bomnēngbeñe y nyetsca canye entsangbiana.

<sup>7</sup> Y jabuache mēntšá enjétsichamo: “¡Bēngbe Bētsabiana smochjajuaboye cha nyetscangbiana chē más uamaná endmēnama, y cha smochtsatschuanaye, er ya tonjóshjango chē tempo ntšamo entsanga tmojamama tšabá o ndoñe tšabá bētsemnama cha cháuyanama! ¡Chē celoca y quem luare, chē mar bējaye y nyetsca chē fshantsentšana óbocana bējayēnga tojamá smochtsadorana ca!”

<sup>8</sup> Chábentšana inye ángel mēntšá enjétsichamo: “¡Ya bēts castigo, ya bēts castigo chē Babilonia bēts puebloca entsángbeñe echántsemnal, ndēmuanñyēnga tmojinñanñé ntšamo puerta bacna soyēnga shembása o boyabásaftaca jtsamama y inye corente bacna soyēngnaca, y chentsana nyets quem luarentša entsanga mo cach Babilonioquēngcá tmojama. Chē causa, Bēngbe Bētsá echanjama chēngbiámnaca chabe uabouana castigo chaotsemnama ca.”

<sup>9</sup> Chē útatbentšana inye ángel jabuache mēntšá enjétsichamo: “Nderado nda chē uabouana bayábioye y chē chábioye jadórama pormana soye tojtsadorana, y tojalesenciá chabe uinñanana soye juentsaca o cucuatšñe chamojajoma,

<sup>10</sup> chánaca bontsemna, chē Bēngbe Bētsabe uabouana castigo jasúfriana. Entsanga puerta bacna soye tmojamama, Bēngbe Bētsá puerta tbojetna, y chē causa echanjama chē castigo chēngbeñe chaotsemnama. Y chē uámana angelēnga y chē Oveshatembe delante, chē bayá adorayábioye puerta mochanjatssetšená, íñeshe y azúfrecá.

<sup>11</sup> Chca chamojtsesufrina ora, becá ngona echantsóbocana, y chē ngona nyets tempo chca echantsótsjuaye; y chēnga, chē uabouana bayá y chábioye jadórama pormana soye adórayēnga, y chabe uinñanana soye bomnēngbiana, ndocna te chē tsetšanana queochatējbana ca” —cha enjétsichamo.

<sup>12</sup> Chíyeca quem luarentse entseyta, chē Bēngbe Bētsabe mandēnga obedecēngna y Jesúsbeñe puerta ošbuáchiyana bomnēnga, chē Bēngbe Bētsabe entsanga, padecena soyēnguiñe tmojtsemna ora, puerta uantana jtsemnana.

<sup>13</sup> Chentsana canye oyebuambnayana celocana sēnjanuena, mēntšá šonjétsatsaye: “Mēntšá mábema: ‘Tša oyejuayēnga mochántsemna chē mēntescana mochjóbanēnga, Bēngbe Utabnáftaca cánñiñe mo canñacá jtsomñēse ca.’ ”

“Aíñe ca” —chē Uamana Espíritu tonjayana—, “chēnga ya ndoñe más queochátamna jatrabájana, ni jasúfriana, er chēnga tmojama tšabe soyēnga Jesús jaserviama, y chē soyēngama chēnga tšabe bendicionēnga mo uacanancá celoca mochanjóyēngacñe ca.”

### *Ndayá chē angelēnga quem luarentse tmojanatbaná*

<sup>14</sup> Chora más sēnjáninye; sēnjáninye canye fjantse jantseteshe, y chēshiñe canya enjétsatbemana. Cha enjamna mo canye entsacá; chabe bestšašñe enjanábomna canye castellano coronēsha, y cucuatšñe canye puerta efšana mētšá enjétsatbēna.

<sup>15</sup> Chentsana, chē celoca Bēngbe Bētsabe bēts yebnentšana inye ángel tonjánbocna, y jabuache bonjétsatsaye chē jantsetēshiñe tbemanábioye: “¡Acbe mētštaca machbonja y shajuanaēnga matbaná, er chē játbanama tempo ya tonjóshjango; chē quem luarentša shajuana ya tonjaboche ca!”

<sup>16</sup> Y chē jantsetēshiñe enjantbemaná chabe mētštaca quem luariñe tonjánachbonja, y nyets quem luarentse atbanániñe tonjanoquedá.

<sup>17</sup> Chentsana inye ángel chē celoca Bēngbe Bētsabe bēts yebnentšana tonjánbocna; chánaca canye puerta efšana mētštaca.

18 Y chë altarentšana inye ángel tonjánbocna, chë mando bomná íñesheca castigo entsangbiana jamama; y chë puerte efšana mëtstá bomna ángelbioye jabuache tbonjaniyana: “¡Acbe mëtstaca machbonja y chë fshantsoca nyetsca uvas betiyeshënguentša uvasëshangá mátabe, er ya uabochenëshangá entsamna ca!”

19 Y chë ángelna chabe mëtstaca quem luariñe tonjánachbonja, y nyetsca quem luarentša uvasëshangá tonjanátabe, y lempe chë juantšëtetjiana luaroye tonjanëshana. Chë soye entsinýinýná ntšamo yochtsemnana Bëngbe Bëtsabe uabouana castigo.

20 Chë uvasëshangana, chë bëts pueblentsana chaboye tmonjanantsëtetje, y chë luarentsana tša buiñe tonjanóbocna; tonjanojutjé couayëngbe uayashbenëshantscoñe y mo unga patse kilómetrënga tonjanábuashana.

## 15

### *Chë angelënga chë canýsëfta pochócaye soyëngaca*

1 Chentshana, inye bëts soye entsanga inye soyama jinýanýiyama, celoca sënjáninýe, canýe puerte bëts soye: canýsëfta angelënga canýsëfta pochócaye soyëngaca, chë ústonoye pochócaye soyënga. Chë soyënga chaojtsemnentsana ya ndoñe inye pochócaye soye yochántsemna, er chëntscoñe Bëngbe Bëtsá yochjacastíga, lempe ntšamo cha jamama tojanjuabocá.

2 Canýe mar béjaynaca sënjáninýe, mo cristalcá enjétsinýna íñeca enájuabniye; y chë béjaye juachaca monjétsatsana chë tšabá tmojanbocnënga, y ni chë uabouana bayá, ni chë chábioye jadórama pormana soye ndoñe tmonjánadoranga, y chë uabouana bayabe uabainama yomna número chëngbeñe chaotsemnana ndoñe tmonjanlesencianga. Nyetscanga chënga monjétsabomna Bëngbe Bëtsá tojanëshatá arpangá.

3 Chënga, canýe canto monjétsacantaye ntšamo Moisés, chë Bëngbe Bëtsabe oserverná tojancantacá, y ntšamo chë Oveshatema tojancantacá. Mëntsá monjétsacantaye: Puerte bëts soyënga y tšabe soyënga entsemna lempe ntšamo aca tcojamcá, Bëngbe Utabná Bëngbe Bëtsá nyets obenana bomná; lempe ntšamo jtsamëse aca icoyena, acbe bominiñe puerte tšabe y ndegombre soyënga yomna,

nyets luarënguenache entsangbe Rey.

4 Bëngbe Utabná, ¿nda nanjájuaboye aca nyetscangbiana ndoñe más bëtsá condmëna ca, o ndoñe cmantsatschuanaye?

Nýe aca uamaná condmëna;

nyetsca mándayëngbentsa entsanga ácbioye mochanjabo,

ácbentše mochanjoshamentsiye aca jadórama,

er ntšamo tcojamcá lempe entsángbioye mora tcojinýanýé,

y lempe ntšamo aca tcojamcá tšabá jtsemnana ca –monjétsacantaye.

5 Chca chentshana sënjanontješé y sënjáninýe chë celoca Bëngbe Bëtsabe bëts yebna tonjantëfjo, chë Bëngbe Bëtsá Moisésbioye tbojaníyé leyënga uajajóntëse.

6 Y Bëngbe Bëtsabe bëts yebnentsana tmonjánbocna chë canýsëfta angelënga, chë canýsëfta pochócaye soyënga uambayënga, uafjantse lino entsëjuangá uabuashinýinýanëjuangá uichëtjonënga, y tëntsa castellano uasnanëjëngaca cochóntscóñe.

7 Chentshana, canýa chë canta Ainënguentšá chë canýsëfta angelëngbioye tonjanoyé canýsëfta castellano copbenga jútjena chë Bëngbe Bëtsabe uabouana castígoca; Bëngbe Bëtsá chë nyets tempo y nyetsca tescama vida bomná.

8 Chorna, chë Bëngbe Bëtsabe bëts yebna celoca becá ngónaca tonjanojutjé, y chë ngona enjétsobocana Bëngbe Bëtsábentsana, chabe buashinýinýanana y obenana jtsinýanýayëse; y Bëngbe Bëtsabe bëts yebnoye ndocná quenjátanobena jamashënguana, chë canýsëfta angelëngbe canýsëfta pochócaye soyënga candochnëngüentscuana.

## 16

*Chë castígoca copbenga*

<sup>1</sup> Chentsana, canÿe jabuache oyebuambnayana sënjanuena, chë celoca Bëngbe Bëtsabe bëts yebnentsana enjétsobocana, y chë canÿsëfta angelëngbioye mëntšá enjétsëtsësnaye: “Motsajna y quem canÿsëfta copbenga, chë Bëngbe Bëtsábiocana endóbocana uabouana castígoca, fshantsoca šmochjabuashcja ca.”

<sup>2</sup> Chora chë natsana ángel tonjána y chabe copbé quem luariñe tonjanbuashcja, y nÿetsca entsanga chë uabouana bayabe uinÿnanana soye bomnënga y chë chábioye jadórana pormana soye adórayëngbe cuerpiñe bañe bacna nguayanana tonjanóbocna, puerte tsetšénana.

<sup>3</sup> Chentsana, chë inÿe ángel chabe copbé mar béjayoca tonjanbuashcja, y choca búyeshe buiñcá tontsanóbema, mo canÿe entsá obanabe buiñcá, y nÿetscanga chë mar béjayoca vida bomnënga tmontsanóbana.

<sup>4</sup> Chora chë inÿe ángel chabe copbé béjayënguiñe y béjaye obocanënguiñe tonjanbuashcja, y buiñe tontsanobiama.

<sup>5</sup> Chentsana sënjanuena, chë béjayënguiñe mando bomna ángel mëntšá enjétsichamo: Aca nÿetsca soyënguiñe tšabá amá condmëna, er aca tcojayana chë quem luarentša entsanga chca castigánënga chamotsemnama. Bëngbe Bëtsá, Uamaná, mora chca condmëna y chca conjamna;

<sup>6</sup> er chënga tmonjama, chë acbe entsanga y acbe juabna oyebuambnayëngbe buiñe chauábuashanama, jtsëbáyëse; y mora tconjama chënga buiñe chamofšema.

Nÿets merecido imobuájona chca japásama ca —cha enjétsichamo.

<sup>7</sup> Altarocánënaca canÿe oyebuambnayana sënjanuena, mëntšá enjétsichamo: “Aíñe, Bëngbe Utabná, Bëngbe Bëtsá, nÿets obenana bomná condmëna, y ntšamo entsanga contsacastigacá, ndegombre y tšabá entsemna ca.”

<sup>8</sup> Chentsana, chë inÿe ángel chabe copbé shinÿiñe tonjanbuashcja; chë shinÿe corente tontsanobonÿaná y chíyeca entsángbioye iñesheca tontsanajuinÿé.

<sup>9</sup> Y nÿetscanga uabouancá juinÿnënga tmonjanoquedá; pero chënga ndoñe chemátanbošena bacna soyënga amana jtsajbanana, ni Bëngbe Bëtsabe benache jtishachana, ni chábioye quemëntétsatschuanaye, más chabe contra ba soyënga montsanichamo; cha nda obenana yobomna chëngbioye chë pochócaye soyënga jíchmuama, chënga chamosufrima.

<sup>10</sup> Chentsana chë inÿe ángel chabe copbé chë uabouana bayabe uámana puestiñe tonjanbuashcja, y nÿets chabe amëndayiñe ibetiñe tonjanoquedá. Chë entsanga bichtaja montsanenójantsnaye, yapa tsetše causa;

<sup>11</sup> pero ni chca, chë entsanga chematanajbaná bacna soyënga jtsamana, ndayá chë yapa tsetšama y chë chëngbe cuerpiñe bacna nguayanana causa, chë celoca Bëngbe Bëtsabe contra ba soyënga montsanichamo.

<sup>12</sup> Chentsana chë inÿe ángel chabe copbé chë bëts fshájaye Eufrates ca uabáiniyiñe tonjanbuashcja y chë béjaye tontsanbuashjo, japróntama chë shinÿe bocanoica luarënguentša reyënga y chëngbe soldadënga chëjana chámuachnëjnama.

<sup>13</sup> Atše sënjáninÿe, chë dragonbe uayáshoicana, chë uabouana bayabe uayáshoicana y chë ndoñe ndegombre Bëngbe Bëtsabe juabna oyebuambnayabe uayoicana tmonjánbocna unga bacna espíritënga; mo saposëngcá monjétsinÿna.

<sup>14</sup> Chënga monjamna bayëjëngbe espíritënga; bëts soyënga monjánama obenana jinÿanÿiyama, y montsanbocana nÿets luarentša reyënga jáchembuama, chë uámana te, ndayté Bëngbe Bëtsá, chë nÿets obenana bomná yochjabo entsangbiamna jabáyanama ntšamo chënga tmojamama, chë te chënga chabe contra chamotsetsjama.

<sup>15</sup> Bëngbe Utabná Jesucristo mëntšá tojayana: “Smochjinÿe, atše nÿe ndeolpe chanjabo, mo canÿe atbëbanacá, chabiana ndocná tontsejuabná ora; chíyeca oyejuayënga mochántsemna atše jabama tmojtseprontanënga, mo nda tojtsefsna y chabe entšayá totsaboprontañacá, nÿe enaşá ndoñe chaondëtsemnama, y entšanga chca tmojinÿe ora ndoñe chaondëtsëuatjama ca.”

<sup>16</sup> Y chë bacna espíritëngna chë reyëngbioye tmonjanënatse canÿe luare, hebreuiñe Armagedón ca uabáinoye.

<sup>17</sup> Chentšana, chë ústonoye ángel chabe copbé quem luarentša tsbanánoca tonjanbuashcja, y chë celoca Bëngbe Bëtsabe bëts yebnentša uámana puestentšana canÿe jabuache oyebuambnayana tonjanóbocna, mëntšá enjëtsichamo: “¡Chë jopásama enjamna soye ya tojochnëngo ca!”

<sup>18</sup> Chora enjëtsemna tcuinÿënga, shauenanana y juesasanana, y quem luariñe tontsanangmëmana, yapa jabuache quem luare tontsanëbanjó causa; quem luarentše entšanga imobinÿna orscana, ndocna te nÿa chca quem luare tontsanëbanjó.

<sup>19</sup> Chë puerte bëts pueblo úngañe tontsanajatá, y nÿets luarentša bëts pueblënga tontsanáshajaye, y Bëngbe Bëtsá tojanenojuabó chë puerte bëts pueblama, Babilonia ca uabaina pueblama, chentša entšanga chë uabouana castigo chamotsebomnama, Bëngbe Bëtsá tša tbojánetna causa, tša bacna soyënga chentše tmojanmama. Y chca, chë chëngbe bëts pueblo úngañe tontsanajatá ora, cha chënga tonjanacastigá.

<sup>20</sup> Mar béjayoca nÿetsca fshantsënga y quem luarentša nÿetsca tjañe tontsanenatjëmbe.

<sup>21</sup> Celocana bëtsëtsa bëntstbenga entšángbeñe tonjantquécjana, chëbenga canta bnëtsana kilama más utbenga; y entšanga Bëngbe Bëtsabe contra ba soyënga tmonjánayana, er chënga tša montsansufrina chë bëts pochócaye bëntstá causa, y chë pochócaye bëntstá chëngbiana puerte jabuache castigo enjamnama.

## 17

### *Chë puerte bacna vida bomna shembásabe castigo*

<sup>1</sup> Canÿa chë canÿsëfta angelënguentsá, chë canÿsëfta copbenga monjanatbënënguentsá, tonjánabo y šonjanियana: “Mabo; cbochanjinÿinÿiye ntšamo yochtsemna chë puerte bacna vida bomna shembása, chë béjayënguiñe entsetbemanabe castigo.

<sup>2</sup> Quem luarentša mandadënga cháftaca puerte bacna soyënga tmojama, y quem luarentša oyenënga puerte tmojóyejuanga chë cháftaca bacna soyënga amama, mo chë bacna vida bomna shembásabe vínoyeca puerte cuafjotmenangcá ca.”

<sup>3</sup> Chentšana chë ángel, atše chë Uámana Espíritbeyeca corente mandaná jtsemnëse, šonjanánatse entšanga ndoyena luaroye. Choca sënjaninÿe canÿe shembása, canÿe uabouana buángana bayábeñe enjaquená; chë bayabe cuerpiñe nÿëtsañe Bëngbe Bëtsabiana puerte bacá oyebuambnaye uabaina enjëtsabemana, y enjánbomna canÿsëfta bestšaše y bnëtsana tsëtjonëse.

<sup>4</sup> Chë shembása enjanichëtjona uámana shbuenda uafjatsenga y buángana entšayá, y entsanbotamana castellánoca, uámana botamana ndëtšëtémëngaca y pérlica. Chabe cucuatšinë canÿe castellano copbé enjëtsatbëna, jútjena puerte uaboyënja soyëngaca, y chë boyabásengaftaca cha tojanma puerte bacna soyëngaca.

<sup>5</sup> Y chabe juentsaca canÿe uabaina enjëtsabemana, ndoñe josërta soye, mëntšá: “Chë puerte bëts pueblo Babilonia, tša bacna entšanga chentše, mo chë puerte bacna vida bomna shembásengbe bebmá cuaftsemncá; chentšana tojanóbocna quem luarentša nÿetsca puerte uaboyënja soyënga ca.”

<sup>6</sup> Atše sënjaninÿe chë shembása tëmiá, er cha tojanofsé chë Bëngbe Bëtsábenga imojamnëngbe buiñe, ndëmuanÿengbioye tmojanëbaye Jesusbiana oyebuambnaye causa.

Chca sënjaninÿe ora, tša sënjanenjananá.

<sup>7</sup> Chora chë ángel šonjaniyana: “¿Ndáyeca tcojenjnaná ca? Atše chochanjauyana ntšamo yojtsayana chë shembása y chë chábioye bontsambá uabouana bayá, chë canýsëfta bestšaše bomná y bnëtsana tsëtjonëše; chë soye ndocná quenátstatšëmbo.

<sup>8</sup> Chë tconjinýe uabouana bayá, tempo chca enjamna, pero mora ya ndoñe. Chë corente bëts tboicana cha echanjesetsjuá, pero lempe pochocaná jtsemnama chca echántsaye. Quem luarentše oyenënga, ndëmuanýengbe uabaina quem luare jobojátšama orscana ndoñe yonduábemana, chë tšabe vida mochjónýenëngbe uabaina iuábemana librësañe, chënga mochanjenjnaná, chë bayá chë tempo enjaniyená y mora ya ndoñe, pero cachiñe yochjésabama chamojinýe ora.

<sup>9</sup> “Muentše canýe soye entsemna chë chca josértama chamojobenangbiama: chë bayabe canýsëfta bestšaše endmëna canýsëfta tjañe ndayiñe chë shembása entsetbemana; chë bestšašëngnaca mondmëna canýsëfta mandadënga.

<sup>10</sup> Chentšana, shachnëngbe amëndayana ya tonjochnëngo, canýa mora entsetbemana jtsamëndayama y chë inýa cabá ndoñe tonjášhango. Y cha chaojášhango ora, ndoñe bënama cha queochaisemánda.

<sup>11</sup> Chë tempo enjaniyena uabouana bayá pero mora ya ndoñe, endmëna chë canýsëfta mandadënguentsana inýe mandado, pero chánaca chë inýe canýsëftangcá endmëna y lempe pochocaná jtsemnama entsá.

<sup>12</sup> “Chë tconjinýe bnëtsana tsëtjonëše mondmëna bnëtsana mandadënga, jamëndama cabá ndoñe tmonjóyayenga; pero básefta tescama cánýiñe chë uabouana bayáftaca, mando mo reyëngcá mochanjóyëngacñe.

<sup>13</sup> Quem bnëtsanënga nýetscanga cachcá mochántsejuabnaye, y chë uabouana bayábioye chëngbe obenana y mando mochanjátsetaye.

<sup>14</sup> Chë Oveshatembe contra mochántsestsjanaye; pero chë Oveshatema echantsayëjnaná, er chë Oveshatema endmëna nýetsca amëndayëngbiama chë más uámana Utabná y nýetsca reyëngbiama chë más uámana Rey. Chë bnëtsana mandadënga cháftaca mochántsestsjanaye ora, cha chentše chabe entšángaftaca cánýiñe echántsemna. Chënga mondmëna chë cha tojáchembo y tojubuáyanënga y chábeñe sempre ošbuáchiyënga ca” —cha šonjaniyana.

<sup>15</sup> Chë ángel mëntsánaca šonjaniyana: “Chë tconjinýe béjayënga, ndayiñe chë bacna vida bomna shembása entsetbemana, mondmëna nýetsca canýe luarentša entšanga, enutanana entšanga, nýetsca biyañe oyebuambnaye y nýetsca mándayëngbentsa entšanga.

<sup>16</sup> Y chë uabouana bayábeñe tcojinýe bnëtsana tsëtjonëše y chë uabouana bayá, chë bacna vida bomna shembásabioye mochantsáboyënja; enašá cachcá mochanjesonýaye; chabe cuerpentša mëntsena mochantsósañe y íñesheca mochántsejuinýiye, chaopochocantscuana.

<sup>17</sup> Bëngbe Bëtsá tojama chë bnëtsanënga ainaniñe tša chamotseboše, ntšamo cha yo-bošcá chamotsamama. Chca, chënga mochanjenóyeunaye chëngbe mando chë uabouana bayábioye jantšabuáchiyana, ntšamo Bëngbe Bëtsá tojayancá chaojopasantscuana.

<sup>18</sup> Chë tconjinýe shembása chë puerte bëts pueblo endmëna, chë ndayentša mandadënga nýets quem luarentša mandadëngbeñe mando mondbomna ca” —cha šonjaniyana.

## 18

### *Babilonia japochócoma*

<sup>1</sup> Chentšana inýe ángel sënjáninýe, celocana enjétsastjajuana, puerte obenana bomná, y chabe buashinýinýanánaca nýets quem luariñe entsanbinýna.

<sup>2</sup> Chë ángel jabuache mëntsá enjétsichamo:

¡Ya mochantsepochóca, ya mochantsepochóca chë uámana pueblo Babilonia!

¡Chentše tojtsóbema diablëngbe oyeniñe,

nýetsca bacna espíritengbe oyeniñe,  
y ndoñe tšabe y uaboyënja shloftšëngbe oyeniñe!

<sup>3</sup> Er nýetsca quem luariñe mándayëngbentša entsanga puerte bacna soyënga tmojama chentša entsangbe causa,

mo chë bacna vida bomna shembásaftaca bacna soyënga cuafjamcá,  
mo puerte cuafjotmenangcá chë bacna vida bomna shembásabe vínoyeca.

Nýetsca luarënguentša mandadënga puerte bacna soyënga tmojama,  
mo chë shembásaftaca bacna soye cuafjamcá,

y quem luarentša obuámnañënga y enënga, bomnënga tmojobiama chentša entsanga yapa crocénana nýe ndayíñnaca ntsejuabnaycá gástaye causa ca —cha enjétsichamo.

<sup>4</sup> Chentšana, celocana inýe oyebuambnayana sënjanuena, mëntšá enjétsichamo:

¡Chë bëts pueblentšana maisebocana!, tšëngaftanga chë atšbe entsanga šmomnënga,

chë chentša entsanga mondbëtsama bacna soyënga ndoñe chašmondëtsamama,

ni chë chëngbioye japochócama soyënga tšëngaftangbiama cach ndoñe chaondëtsemnama.

<sup>5</sup> Chënga tša bacna soyënga tmojama, tša bëtscá nýa mo celóntscoñe cuafjotjtecá,

y Bëngbe Bëtsá mora entsejuabná chënga tša puerte bacna soyënga tmojama causa, chë soyëngama jácastigama.

<sup>6</sup> Ntšamo chentša entsanga ínýëngbiama ndoñe tšabá tmonjamcá,

chë entsangbiámnaca cachcá chaotsemna;

ntšamo tmojamama, cabá uta soye más cachca soye chëngbiama chaotsemna;

ntšamo chentša entsanga ínýënga chamosufrima tmojamcá,

chëngnaca cachcá uta soye más chamosufrí.

<sup>7</sup> Chënga corente jtšenábotamnyana y yapa crocénana nýe ndayíñnaca ntsejuabnaycá jtsegástayana;

chë causa, chënga entsamna puerte jasúfriama y becá tsetšanana jtsebomnama.

Er chëngbe ainaniñe mëntšá jtsejuabnayana:

“Muentše mo reyëngcá mondëtbiámana.

Viudacá ngmënaca ndoñe quemuátsmëna; tondayama quemochátssufrina ca.”

<sup>8</sup> Chíyeca, canýe ora pochócaye soyënga chëngbiama echanjóshjango:

jóbanama šocanënga, puerte ngmënana y jabuache shëntsana,

íñsheca lempe chëngbeñe echántsejuinýe;

er Bëngbe Bëtsá corente obenana bomná endmëna,

Bëngbe Utabná chë chënga chca castigo chamotsebomnama tojayaná ca —cha enjétsichamo.

<sup>9</sup> Quem luarentša mandadënga, chentša entsángaftaca puerte bacna soyënga tmojamënga, y chëngaftaca nýe ndayíñnaca yapa crocénana, ntsejuabnaycá tmojagastanga, mochanjošachna y puerte ngmenánaca mochántsemna, chë bëts pueblo chaojtsangbototjuanentša ngona chamojinýe ora.

<sup>10</sup> Chentšana bënoca mochanjoquéda antješna, chë uabouana castiguama auatja causa, y chentša entsangbiama mochanjayana:

¡Tša lastema, tša lastema tšëngaftanga chë uámana bëts pueblo, Babilonientše oyenëngbiama, chë tša obenana binýnentše!

Canýe ora tšëngaftangbe castigo tojóshjango ca —mochánttsichamo.

<sup>11</sup> Chë quem luarentša obuámnañënga y enëngnaca mochanjošachna y ngmenánaca mochántsemna chë pueblentša entsangbiama, er chora ya ndocná queochátsmëna chë chënga tmojúshjango soyënga chamobuámiñama:

<sup>12</sup> tmojúshjango castellano soyënga, midio soyënga, uámana y botamana ndëtšbenga, perlënga, uámana lino y shbuenda uafjatsenga entsáyá y sedëjua y uámana uabuángana



entsáyá; nyetsca botamana uanguëtse betiyënga, marfiloca pormana soyënga, uámana niñëshëngaca pormana soyënga, bronce soyënga, hierro y marmol soyënga;

<sup>13</sup> bëtscá canela y inye botamana uanguëtse y tamna soyënga, botamana uanguëtse béjayënga, incienso y mirra; vínoye, aceitiye, uámana arninjá, trigo; bayënga ndayánaca uasmëmnayënga, oveshënga, couayënga, cochëshangá y entsanga nyets tempo nye ínÿabiamana oservenëngnaca.

<sup>14</sup> Y chë pueblentsa entsangbiamana mochanjayana:

¡Chë tsa cmonjanogúsetana jtsebomnama soyënga, mora ya ndoñe quešmátsbomna; chë uámana y buashinÿinÿana soyënga y tsa bomnana lempe šmojobuetse, y ndocna te más cachca soye quešmochátsbomna ca!

<sup>15</sup> Chë soyënga enënga, chë bëtš pueblentsa entsángbeyeca bomnënga tmojanobiamënga, bënoca mochanjoquéda antješna, chë bëtš pueblentsa entsangbiamana tsa bëtš castiguama auatja causa; mochanjošachna, puerte ngmenánaca mochántsemna.

<sup>16</sup> Y mëntšá chentša entsangbiamana mochanjayana:

¡Tsa lastema, tsa lastema tšëngaftanga chë uámana bëtš pueblentse oyenëngbiamana! Chë enjáninÿna mo canÿe shembasacá, uámana lino entséjua uichëtjoná, uámana shbuenda uafjatsenga y uabuángana entsáyá uichëtjoná, botamananá castellánoca, perlënga y uámana botamana ndëtšbéngaca.

<sup>17</sup> ¡Y canÿe ora chabe tsa bomnana lempe tojtso pochocá ca! —mochanjayana.

Nyetsca chë barquënguentša mándayënga, chentša entsanga inye luaroye ajnënga y chentša trabájayënga, y nyetscanga chë vida onguayinÿe mar béjayoca trabájayëngnaca, chentšana bënoca mochanjoquéda antješna,

<sup>18</sup> y chë bëtš pueblo chaojtsangbototjuanentsa ngona chamojinÿe ora, jabuache mochanjayana: “¡Quem uámana bëtš pueblécá ndocna inye pueblo cachcá quenátsmëna ca!”

<sup>19</sup> Chca chamojinÿe ora, ngménama bestšašinÿe polvëshe mochántsenotboto, y mëntšá mochántseyona ošachiyënga y puerte cochtsetšenánënga:

¡Tsa lastema, tsa lastema tšëngaftanga chë uámana bëtš pueblentse oyenëngbiamana! Chentša bomnánaca bomnënga tmojanobiamana nyetscanga chë mar béjayoca barco bomnënga.

¡Canÿe ora lempe tojtso pochocá ca! —chënga mochántseyona.

Chora chë ángel tonjánayana:

<sup>20</sup> ¡Celoca oyenënga móyejuanga chë pueblo chca tojapasama;

y tšëngaftángnaca móyejuanga, Bëngbe Bëtšabe entsanga, Jesucristbe ichmónënga y Bëngbe Bëtšabe juabna oyebuambnayënga,

er chca jacastígase, Bëngbe Bëtšá tojama chënga chamosufrima, ntšamo tšëngaftanga chašmosufrima chënga tmojanmcá ca! —cha tonjánayana.

<sup>21</sup> Chentšana, canÿe ángel puerte obenana bomná, canÿe ndëtšbé tonjanatsbaná, mo canÿe bëtš nantsnëbé ndëtšbecá, mar béjayoye tonjanashbuetse y mëntšá tonjánayana: Mëntšá, nye ndeolpe y jabuache, Babilonia chë uámana bëtš pueblo mochántsetsatše, y ndocna te más quem pueblo queochátsmëna.

<sup>22</sup> Chentše, ndocna te más quemochátuenana arpanzá uabuástoyana, ni cantayana, flautëfjënga y trompetëfjuangá cach ndoñe; ndocna te más quemochátsmëna obrerënga, ni chë nantsnëbeñe trabájayana quemochátuenana.

<sup>23</sup> Chentše, ndocna te más ndocna uajuinÿanëshá queochátsbinÿnaye, ni casamento fiestentsa enbouenanana quemochátuenana. Er chë bëtš pueblo chca mochantse pochocá,

masque chentša obuámnañënga y enënga nyets quem luarentše chë más bomnënga monjamna,  
y chentša bocjuanánaca nyetsca luarënguentsä entsanga ingñénënga monjamna ca –cha tonjánayana.

<sup>24</sup> Bëngbe Bëtsá chca chë bëts pueblentše echanjama, er chentše tmojínÿena chë Bëngbe Bëtsabiana trabájaye causa tmojanóbanëngbe buiñe; chë chabe juabna oye-buambnayënga, chabe entsanga, y chë chábioye oservénama nyets quem luarentše tmojtsëbayëngbe buiñe.

## 19

<sup>1</sup> Chentšana celoca sënjanuena mo mallajta entsanga cuaftsayebuachcá, mëntsá monjétsichamo:

¡Bëngbe Utabná matschuanga!

Bëngbe Bëtsá endmëna nda chabe entsanga tojatsebacá;  
cha puerta uámanana, buashinÿinÿana y mando endbomna,

<sup>2</sup> er ndayama cha tojayancá ndegombre jtsemnana,  
y ntšamo tšabá chama tojtsemncá.

Cha chë uachuana bacna vida bomna shembásabioye tbojacastigá.

Chë shembásabe puerta bacna soyënga causa,  
nyets luarentša entságnaca bacna soyënga tmojama.

Chábioye chca jacastígase,

Bëngbe Bëtsá tojama ntšamo jamama ibomerecencá,

chábioye oservénënga chë shembásabeyeca tmojóbana causa ca –chënga monjétsichamo.

<sup>3</sup> Y cachiñe mëntsá tmonjánayana:

¡Bëngbe Utabná matschuanga!

¡Chë bëts pueblo japochócama uangbototjuanentsä ngona nyetsca tescama chca echanjótjuaye ca!

<sup>4</sup> Y chora, chë uta bnëtsana y canta bëtsëjémënga amëndayënga y chë canta Ainënga tmonjanoshamentsé, y Bëngbe Bëtsá, chë uámana tbemanentše enjëtsetbemanabioye tmonjanadorá, mëntsá jayanëse: “¡Chca chaotsemna! ¡Bëngbe Utabná matschuanga ca!”

<sup>5</sup> Y chë uámana puestentsana canÿe oyebuambnayana tonjanóbocna, mëntsá:

Bëngbe Bëtsá matschuanga, nyetsca chabe oservénënga

y chë nyetscangbiama cha chë más uamaná yomnama juabnayënga,

básenga y bëtsétsanga ca.

### *Chë Oveshatembe casamento fiesta*

<sup>6</sup> Y sënjanuena mo mallajta entsangbe oyebuambnayancá, mo bëtscá béjaye cuaft-sobonjncá y mo bëts juesasanana shauenanancá; mëntsá monjétsichamo:

¡Bëngbe Utabná matschuanga!

Er Bëngbe Utabná, Bëngbe Bëtsá nyets obenana bomná tojontsé jamándana.

<sup>7</sup> Puerte móyejuanga y mochjínÿanÿiye

Bëngbe Bëtsá puerta bëtsá y uamaná bétsemnana,

er mora entsemna mo chë Oveshatembe casamento te cuaftoshjangcá;

chabe shema yochjabocná puerta tojtenobotamá;

<sup>8</sup> tmojalesenciá cha chauatíhëtjo uámana, nduatsenga uafjantse y uabuashinÿinÿana lino entsáyá.

Chë shema entsinÿinÿná chë Bëngbe Bëtsabe entsanga;

y chë lino entsáyá jtsichëtjonana entsinÿinÿná

chënga lempe ntšamo tšabá yomncá jtsamëse imoyena ca –chënga monjétsichamo.

<sup>9</sup> Chentsana chë ángel šonjanianya: “Měntsá mábema: ‘Oyejuayënga chë Oveshatembe casamento fiestama ófjanënga ca.’ ” Y mẽntsánaca šonjanianya: “Chca, ndegombre Bëngbe Bëtsabe palabrenga endmëna ca.”

<sup>10</sup> As chabe shecuatšentše sënjanoshamentšé cha jadórama, pero cha šonjanianya: “Ndoñe, átšeftaca ndoñe chca mátamana, er atše Bëngbe Bëtsabe canye oservená sëndmëna, ntšamo aca condmëncá, y chë Crístbeyeca acbe catšátanga, ntšamo chabiana motatšëmbcá y chabe ndegombre palabrenga nyets tempo imabuayiyanga mondmëncá. Aca cmontsemna Bëngbe Bëtsá jadórama ca.”

Ndayá Jesús tojanma y tojanayancá, endama chë Bëngbe Bëtsabe juabna oyebuamb-nayënga chëngbe ainaniñe osertánana y añemo chamotsebomnama, chë soyëngama entšángbioye jábuayenama.

### *Chë fjantse couayíne enjaquená*

<sup>11</sup> Chora sënjáninye celoca atëfjniñe; canye fjantse couaye enjëtsemna y chë chábeñe enjaquená enjanabaina “Ntšamo tojašebuachenacá amá” y “Ndegombre oyebuamb-nayá ca”, er ntšamo tšabá yomncá cha tojanjuabó y tojanma entšángaftaca; y chca chabe uayayëngaftaca monjánentsjanaye.

<sup>12</sup> Chabe fšnëbenga mo iñeshcá enjáninyna, bestšašíñe ba uabuashinýinýana coronëshangá enjanábomna, y canye uabaina chábeñe enjanábemana; nye cha chë uabaina yojanábuatma.

<sup>13</sup> Cha enjanichëtjona buíñeca unëtjona entsáyá y chabe uabaina enjamna “Bëngbe Bëtsabe palabra ca”.

<sup>14</sup> Y chabe ústonoye monjétsajna mallajta soldadënga celoquënga, nduatsenga uafjantse y uámana lino entsáyá uichëtjonënga, fjantse couayënguiñe enjaquenënga.

<sup>15</sup> Chë enjëtsebnatsanabe uayoicana enjanóbocana canye puerta efsana espadëja, chë Bëngbe Bëtsábeñe ndošbuáchiyënga játatsetšama. Cha puerta obenánaca echántsamëndaye, mo canye hierro varëfjaquécá. Cha echanjama entšángaftaca mo nda uvasëšangá juantsëtetjiana tojtsabotajná ora cuafjamcá; y echanjama chënga chamotsebomnama chë puerta uabouana castigo, Bëngbe Bëtsá chë nyets obenana bomná tbojetna causa.

<sup>16</sup> Chabe uabonjaníyañe y chabe mëntjoca canye uabaina enjanábemana: “Nyetsca reyëngbiana chë más uámana Rey, y nyetsca amëndayëngbiana chë más uámana Utabná ca”.

<sup>17</sup> Chentsana canye ángel sënjáninye, shinýiñe enjétsatsana, chë celoca tsbanánoca nyetsca monjanongüefjná shloftšënga jabuache mẽntsá enjétsëtsëtsnaye: “¡Mabënga, menefjna chë Bëngbe Bëtsá tojaprontá bëts saná jasama;

<sup>18</sup> chašmosama reyëngbe mẽntsëna, soldadënga amëndayëngbe mẽntsëna y valente entšangbe mẽntsëna, couayënga y chëngbeñe enjaquenëngbe mẽntsëna, y nyetsca entšangbe mẽntsëna, cachëngbiana trabájayënga y nye ínýabiana nyets tempo trabájayënga, básesenga y bëtsëtsanga ca!”

<sup>19</sup> Chora atše sënjáninye chë uabouana bayá y quem luarentša reyënga chëngbe soldadëngaftaca tmojánenefjna, chë fjantse couayíne enjaquená y chabe soldadëngaftaca jéntsajama.

<sup>20</sup> Chë uabouana bayá tmonjanotbá, y cháftaca chë Bëngbe Bëtsabe ndoñe ndegombre juabna oyebuambnayá, chë bayabe delante ba bëts soyënga tonjanmá obenana jinýanýiyama; y cha chë soyëngaca tojanaingñé chë uabouana bayabe uinýnanana soye chamuayentsjajoma tmojanlesencianga, y chë chábioye jadórama pormana soye adórayënga. Y chë útatbioyna ainata tmontsanatmetše chë iñeshca uafjónayoye, chë azufre endëjuinýinýanentše.

<sup>21</sup> Chë ínýëngbioyna tmontsanapochocá chë fjantse couayíne enjaquenabe uayoicana enjanóbocana espadëjaca, y nyetsca shloftšënga chëngbe mẽtsënaca yapa tmon-tanoshachá.

## 20

### *Chë uaranga uata*

<sup>1</sup> Chentšana canye ángel sënjaninye celocana entsanastjajuana chë corente asentoye tboca llavëfjaca, y canye bëts cadenëjua entsanëtvena.

<sup>2</sup> Chë ángel tbontsanbá chë dragónbioye, chë tempsca mëtscuaye, chë Diablo y Satanás endméná, y canye uaranga uatama tbontsanbátsëca.

<sup>3</sup> Chë corente asentoye tboye tbontsantsatše, chentše tbontsanëtame, y chentše bëšáša tsengájašeca tonjaninynaná, ndotatsëmbcá jatëfjuama ndocná chaondobenama; y chca, chë dragón ndoñe chaondobená jabocnama entsanga jáingñama, chë uaranga uata candochnënguëntscuana; y chora, básefta tescama chë dragón mochanjëtshjona.

<sup>4</sup> Uámana puestënga sënjaninye, y chiñe tmonjanotbiama chë entsanga tšabá o ndoñe tšabá tmonjamama jayanama obenana tmojanóyëngacñënga. Chë bestšaše jtsëstjanguëse tmojanóbanëngbe espíritëngnaca sënjaninye. Chënga chca tmojanóbana, Jesús tojánayana soyënguiñe y chë Bëngbe Bëtsabe buayenana soyënguiñe sempre ošbuáchiye causa. Chënga ndoñe tmonjanadorá ni chë uabouana bayá, ni chë chábioye jadórama pormana soye, y ndoñe tmonjanlesenciá chë bayabe uinynanana soye juentsaca o cucuatšinë chamuayentsjajoma. Y sënjaninye chëngna tmontanayena y Crísoftaca canye uaranga uatama montsanmánda.

<sup>5</sup> Chë entsanga mondmëna chë natsanënga jtayenama, pero chë tempo chë inye obanënga ndoñe chemëntëtanayena, ndayá nye chë canye uaranga uata chentšana.

<sup>6</sup> ¡Oyejuayënga y Bëngbe Bëtsabe entsanga, chë tmojtanyenënga chë obanënga chámuatayenama Bëngbe Bëtsá tojanma ora! Chënga ndoñe quenátamna chë nyetsca tescama castigo jtsebomnana, ndayá Bëngbe Bëtsá y Crístbioye mo bachnangcá chënga mochántseserverna, y Crísoftaca chë uaranga uatama mochántsemdaye.

### *Satanás japochócama*

<sup>7</sup> Chë uaranga uata chaojochnëngo ora, Satanás chabe utámenocana mochanjëtshjona;

<sup>8</sup> y cha echanjábocna nyets luarentša entsángbioye, chë Bëngbe Bëtsabe soyëngama contra imomnëngbioye jáingñama, chë ntšamo Bëngbe Bëtsabe contra Gog y Magog tempo ibojamncá imomnënga. Satanás, chë entsanga echanjáchembo Bëngbe Bëtsabe contra jéntsjava, y tša chëftanga cha echanjáchembo, nya mo chë mar béjaye chënyoca cascajca mochántsemna.

<sup>9</sup> Chënga nyetscanga nyets luarëjana mochanjátsjua, y chë Bëngbe Bëtsabe entsanga oyentše y chabe bonshana entsangbe bëts pueblo shëconana mochanjotsaye. Pero celocana iñe echanjatquécjana y chë Bëngbe Bëtsabe contra imomnënga lempe echántsjuinye.

<sup>10</sup> Y Satanás, chë aingñayá, mochántsatmetše chë iñeshe y azúfreca uafjajónayoye, ndayentše chë uabouana bayá y chë Bëngbe Bëtsabe ndoñe ndegombre juabna oye-buambnayá tmontsanatmetše. Chentše bëts castigo nyets tempo, bnëté y ibeta mochanjasufrina.

### *Chë obanëngbiama tmonjánayana ntšamo chëngaftaca jamama yojtsemnana*

<sup>11</sup> Chentšana sënjaninye canye bëts uámana fjantse puesto jamándama y nda chiñe enjetsetbemaná. Celoca y quem luare chabe delante lempe tonjanenatjëmbe, y ndócnentše más chenatanobinyná.

<sup>12</sup> Y chë obanënga sënjaninye, bëtsëtsanga y básesenga, chë uámana puestentša natsanoica monjétsatsana; y chë librëšangá tmonjanëtëfjo, y inye librëšanaca, ndëmuanyënga nyetsca tescama tšabe vida mochjónyëngbe uabaina uabemana librëša. Chë obanëngbiama tmonjánayana ntšamo chëngaftaca jamama yojtsemnana, cachënga vida

imójábomna ora ntšamo tmojëftsema soyëngaca, ntšamo chë librëšangañe yojanabemancá.

<sup>13</sup> Chë mar béjayoye tmojanóbanënga choicana tmontanbocna, y chë obanënga tmojanoquedanga luarënguentsana tmontanbocna, y cada cánÿabiama tmonjánayana ntšamo cháftaca jamama yojtsemnana, cachënga vida imójábomna ora ntšamo tmojëftsema soyëngaca.

<sup>14</sup> Chentsana ya ndoñe más obenana quentëtsemna entsanga chamóbanama chao-mama, mo chë obenana chë ññeshca uafjónayoye cuaftsëtšencá; quem ññeshca uafjónayoye endmëna chë nÿetsca tescama castigo jtsebonnama luare; chë choca castigánënga jtsamnana yojtsamnëngbiama entsemna mo chënga cachiñe cuafjatobancá;

<sup>15</sup> y ndëmuanÿengbe uabaina chë tsabe vida mochjónÿenëngbe uabaina iuábemana librëšañe ndoñe yonjanabemana, chë ññeshca uafjónayoye tmontsanatmetše.

## 21

### *Celoca tsmiñe y fshantse tsmiñe*

<sup>1</sup> Chentsana atše sënjáninÿe canÿe celoca tsmiñe y canÿe fshantse tsmiñe, ndoñe ntšamo tempo enjamncá, er chë tempo enjamna celoca y fshantse chora ya ndoñe quentëtsemna, y chë mar béjaye chora cach tondaye.

<sup>2</sup> Sënjáninÿe chë “uámana ca” uabaina bëts pueblo, chë tsëm bëts pueblo Jerusalén, Bëngbe Bëtsábocana celocana enjëtsostjajuana, puerte botamaniñe, mo canÿe shembása puerte botamananacá, chabe boyá jábocnabiama.

<sup>3</sup> Y chora canÿe jabuache oyebuambnayana Bëngbe Bëtsabe uámana puestentšana sënjanuena, mëntšá: “Mouena. Bëngbe Bëtsá entsángaftaca echántsemna y cha chëngbeñe echantsiyena. Chënga chabe entsanga mochántsemna, cach Bëngbe Bëtsá chëngaftaca echántsemna, y cha chëngbe Bëtsá echántsemna.

<sup>4</sup> Cha echanjama chënga ndocna te más ngmënënga chamondëtsemnama, y ndoñe más chamondóbanama, ndoñe más chamondošachema, ni ngmënaca ndoñe chamondëtsóyebuambnama y ndoñe más tsetšanana chamondëtsebonnama; er ntšamo chënga entsangcá fshantsoca tempo imojëftsiyena ora enjamncá, chora ya ndoñe chca queochátsmëna ca.”

<sup>5</sup> Chë uámana puestentše enjantbemaná šonjaniyana: “Atše lempe mo tsëm soyëngcá sëndbama ca.” Y mëntšánaca tonjánayana: “Chë soyënga mábema, er chë palabrenga endmëna ntšamo ndegombre yomncá, y nÿetscanga mondobena chiñe corente jtsošbuáchiyana ca.”

<sup>6</sup> Chentsana šonjaniyana: “Lempe tonjochnëngo. Atše sëndmëna chë nÿetsca soyënga bojatsayá y pochocayá, chë natsaná y chë ustonoyá. Mo nda tša uajuendayana tojtsebonná canÿe béjaye fshantsiñe obocanentsana cuafjofšecá, cachcá nda tša tojtseboše atšbe soyënga jtsebonnama, atše chanjama cha chë soyënga chaotsebonnama, y chë nÿetsca tescama yomna tsabe vídnaca, chca jtsebonnama chábioye tondaye ntsojtjañcá.

<sup>7</sup> Nda nÿetsca soyënguentsana tsabá chaojabocná mo ayëñjanayacá, lempe echanjóyëngacñe ntšamo atšbe entsángbioye jatšatayama tijašebuachenacá, y atše chabe Bëtsá chántsemna y cha atšbe uaquiñá.

<sup>8</sup> Pero chë auatja causa Crístbioye ndoñe mondëservénënga, chábeñe ndošbuáchiyënga, chë bacna soyënga causa Bëngbe Bëtsabiama puerte uaboyëñjanënga imomnënga, chë ññyëngbioye obánayënga, chë shembása o boyabásaftaca bacna soye amënga, chë bocjuana soyënga amënga, chë soyënga adórayënga díosënga yomna ca jtsejuabnayëse, y nÿetscanga bosterënga imomnëngbiama, chënga entsamna chë ññeshca uafjónayoca jasúfriana, chë azufre yojuínÿinÿanentše. Chentše puerte castigánënga sempre mochanjëftsemna, mo uta soyama cuafjobancá ca.”

### *Chë tsëm bëts pueblo Jerusalén*

<sup>9</sup> Chentšana canya chë angelënguentsá, chë canysëfta codbenga bomnënga jútjena chë canysëfta ústonoye pochócaye soyëngaca, átšbioye tonjánabo y šonjanijana: “Mabo, cbochanjinjinye chë tojobouamá shembása, chë Oveshatembe shema ca.”

<sup>10</sup> Y atše chë Uámana Espíritoftaca corente mandaná jtsemnëse, chë ángel šonjanánatse canye bëts y tsbanana tjoye, y šonjaninjinýe chë tsëm bëts pueblo Jerusalén, chë “uámana ca” uabaina pueblo, celocana Bëngbe Bëtsábiocana enjétsostjajuana.

<sup>11</sup> Chë bëts pueblo enjétsebuashinjinýana Bëngbe Bëtsabe buashinjinýanáca; enjétsebuashinjinýana mo canye uámana botamana ndëtsbecá, mo jaspe ndëtsbecá, pero mo cristalca tëshinýnië.

<sup>12</sup> Chë bëts pueblo shëconana canye bëts y tsbanana tapiëse enjamna, chë tapiësië bnëtsana uta bëshashangá y cada bëshashentše canye ángel, y chë bëshashangañe enjanábemana chë Israeloca bnëtsana uta bëts pamíllangbe uabaina.

<sup>13</sup> Shinýe bocanoica unga bëshashangá, shinýe uenatjémbambanoica ungashá, tsjuanoica unga bëshashangá, y tsmanoica ungashá.

<sup>14</sup> Chë tapiëse enjanëcuatjona bnëtsana uta ndëtsbenguië, y chëbenguië enjanábemana Jesucristo chë Oveshatembe bnëtsana uta ichmónëngbe uabaina.

<sup>15</sup> Chë ángel átšeftaca oyebuambnayá canye castellano juinýnanëšëfja enjánatbëna jamedídama chë bëts pueblo, chentša bëshashangá y chentša tapiëse.

<sup>16</sup> Chë bëts pueblo cach medida enjánbomna nyëts cantoica, cach medida tëntsoye y nyanëjoye. Chë ángel chabe juinýnanëšëfjaca chë bëts pueblo tonjanmedidá: enjánbomna uta uaranga y uta patse kilómetrënga; tëntsoye, tsbanánoye y nyanëjoye cach medida enjánbomna.

<sup>17</sup> Chentšana chë tapiëse tonjanmedidá, enjánbomna chnënguana bnëtsana y shachna metrënga; ntšamo entšanga chca soyënga jamedídama mondëtatšëmbcá chë ángel tonjanmedidá.

<sup>18</sup> Chë tapiëse enjanpormana jaspe ndëtsbeca, y chë bëts pueblo ena castellánoca, tša chca nýa mo cristalca tëshinýnië enjáninýna.

<sup>19</sup> Chë ndëtsbenga ndayië chë tapiëse enjanëcuatjona enjánbotamanana nyëtsca uámana botamana ndëtsbéngaca: canyëbé jaspe ndëtsbeca, chë inyëbé zaffiroca, chë inyëbé ágata ndëtsbeca, chë inyëbé esmeráldaca,

<sup>20</sup> chë inyëbé ónice ndëtsbeca, chë inyëbé cornalina ndëtsbeca, chë inyëbé crisólito ndëtsbeca, chë inyëbé berilo ndëtsbeca, chë inyëbé topácioca, chë inyëbé crisoprasa ndëtsbeca, chë inyëbé jacíntoca y chë inyëbena amatista ndëtsbeca.

<sup>21</sup> Chë bnëtsana uta bëshashangá enjuamna bnëtsana uta perlënga; cada bëshášha nýe canye pérlaca uapormanëshha. Y chë más bëts tsáshenëjana enjamna ena castellánoca; mo cristalca tëshinýnië enjáninýna.

<sup>22</sup> Chë bëts pueblentše ndocna Bëngbe Bëtsabe bëts yebna chiyátaninýe, er Bëngbe Utabná, chë Bëngbe Bëtsá nyëts obenana bomná y chë Oveshatema chentše bonjamna, y chata nyëtscangbiana chë bëts pueblentše ndayéntsñaca adoránata bonjëtsemna.

<sup>23</sup> Chë bëts pueblentše ndoñe quenjatsiyta shinýe o juashcona chaotsebínýnaye, er Bëngbe Bëtsabe buashinjinýanana chentše enjétsubinýnaye, y chë Oveshatembe buashinjinýanana mo uajuinýanëshacá enjamna chë bëts pueblama.

<sup>24</sup> Chentša binýnayánaca, entšanga nyëtsca mándayëngbentše mochantsiyena, y quem luarentša mandadënga chëngbe uámana y bëts soyënga chë bëts pueblöye mochanjiyëbo.

<sup>25</sup> Chë bëts pueblentša bëshashangá ndocna te quemochtëtatame, y chentše ndocna ora ibeta queochátsmëna.

<sup>26</sup> Chë bëts pueblöye mochanjiyëbo chë nyëtsca luarënguentsá entšangbe uámana y bëts soyënga, y chë nyëtsca luarënguentsá entšangbeñe bëtsëtsanga y uámanënga iuabiamná soyëngaca.

<sup>27</sup> Pero ndocna te queochatómashëngo ndayánaca, y chë soye chaotsama entšanga ndoñe tšábenga chamotsemnama Bëngbe Bëtsá jadórama; ni ndocná queochátamashëngo, Bëngbe Bëtsabiana nÿa tondayama ogustana soyënga amá o ínÿengbioye jáingñama soyënga amá. Choye mochanjámashjna nÿe chë ndëmuanyëngbe uabaina yojtsábemana chë Oveshatembe librëšañe, chë nÿetsca tescama tšabe vida mochjónÿenëngbe uabaina uábemanentše.

## 22

<sup>1</sup> Chë ángel šonjaninÿinÿé chë enjanobëjna bėjaye vida bomniye. Chë búyeshe enjamna ndëtsenguie y tëshinÿniye mo cristalca. Enjanóbocana chë Bëngbe Bëtsá y chë Oveshatembe uámana puestocana,

<sup>2</sup> y chë más bëts tsashená tsëntsajana enjanobëjna. Chë fshajayentša catoica lado enjanójuajna betiyeshënga chë nÿetsca tescama yomna tšabe vida jtsebomnama, canÿe uatiñe bnëtsana uta soye jashájonana, canÿe cada shinÿe; chë betiyeshentša tsbuanáchënga josérviana nÿetsca mándayëngbentša entšanga jáshnama.

<sup>3</sup> Choca ndocna soye queochátsmëna chë ndayama Bëngbe Bëtsá tojayana ndoñe tšabá yondmëna ca, y ndaye bacna soye japásama chaotsemna soye. Chë Bëngbe Bëtsá y chë Oveshatembe uámana puesto chë bëts pueblentše echántsemna, y chatbe oservénënga mochántadorana.

<sup>4</sup> Chënga mochanjinÿe Bëngbe Bëtsabe jubiá, y chabe uabaina chëngbe juentsaca mochantsambaye.

<sup>5</sup> Chentše ndocna ora ibeta queochátsmëna, y chentša oyenënga ndoñe queochátëjaboto canÿe uajuinÿanësha o shinÿe chaotsebínÿnaye, er Bëngbe Bëtsá Bëngbe Utabnabe buashinÿinÿanana chëngbiana echantsebínÿnaye, y chënga mochántsemna mo reyëngcá uámanënga, y Bëngbe Bëtsáftaca nÿetsca tescama mochántsemandaye.

### *Jesucristo jésabama entsobeco*

<sup>6</sup> Chentsana chë ángel šonjaniyana: “Quem palabrenga endmëna ntšamo ndegombre yomncá, y nÿetscanga mondobena chiñe corente jtsošbuáchiyana. Bëngbe Utabná, cach Bëngbe Bëtsá, nda endbama chabe juabna oyebuambnayënga, chëngbe ainaniñe osertánana y añemo chamotsebomnama jóyebuambayama, chabe ángel tbojichmó chabe oservénëngbioye jinÿanÿiyama ndayá betscó yojtsemna jopásama ca.”

<sup>7</sup> Chora Jesús tonjánayana: “Mouena. ¡Atše cachiñe betscó chanjésabo! Oyejuayá nda quem buayenana soyënga, ntšamo ndegombre jopásama, chë Bëngbe Bëtsabe juábnaca oyebuambana soye tojoyeuná, chë ndayama quem librëšañe entsábemana ca.”

<sup>8</sup> Atše Juan, chë soyënga sënjanuena y sënjaninÿe. Y chca sënjanuena y sënjaninÿentšana, chë chca šonjaninÿinÿé ángelbe delante atše sënjanoshamentšé, cha jadórama.

<sup>9</sup> Pero cha šonjaniyana: “Ndoñe, átšeftaca ndoñe chca mátamana, er atše canÿe Bëngbe Bëtsabe oservená sëndmëna, ntšamo aca condmëncá, y ntšamo chë Crístbeyeca acbe catšátanga, chë Bëngbe Bëtsabe juabna oyebuambnayënga y nÿetscanga chë ndayá quem librëšañe endayanama tmojóyeunanga mondmëncá. Aca cmontsemna Bëngbe Bëtsá jadórama ca.”

<sup>10</sup> Chora mëntsánaca šonjaniyana: “Ndoñe mo iytëmencá catjáboshjona ndayá quem librëšañe entsabemancá, chë ndegombre jochnënguama soyënga, er chca jopásama chë tempo ya entsobeco.

<sup>11</sup> Cachcá monÿá chë bacna entsá bacna soyënga chaotsama; chë puerte bacna soyënguiñe jtsiyenama bošá, cachca soyënga chaotsama; pero chë tšábiana ntšamo tšabá yomncá chaotsama, y chë Bëngbe Bëtsabe entsá, nÿets tempo nÿets ainánaca chábioye chabotseserverna ca” —cha šonjaniyana.

<sup>12</sup> Chora Jesús cachiñe tonjánayana: “Mouena. Atše quem luaroye betesco chanjésabo, y átseftaca chanjiyëbo chë uacanana soye, y cada ona tšëngaftanguentsábioye chanjoyiye ndayá tojamama ntšamo tbojtsomerecencá.

<sup>13</sup> Atše sëndmëna chë nyetsca soyënga bojatsayá y pochocayá, chë natsaná y ustonoyá, chë ndábeyeca y ndabiama lempe yomna ca” –šonjaniyana.

<sup>14</sup> Oyejuayënga chë bacna soyëngama perdonánënga imojtsemnënga, mo chënga chëngbe entsayá botamana cuaftsaboshabecá. Chca chënga mochantsobena chë nyetsca tescama yomna tšabe vida jtsebomnama uacanána jashjáchama, mo chë nyetsca tescama yomna tšabe vida jtsebomnama betiyeshentsana cuaftsesacá, y mochanjobenaye chë tsëm bëts puebloye bësásajana tšabá jamashjnama.

<sup>15</sup> Pero ndoñe quemochatobenaye jamashjnana chë ba ndoñe tšabe juabnënga ainaniñe bomnënga, chë bocjuanënga, chë shembása o boyabásaftaca bacna soye amënga, chë ínÿenga obánayënga, chë soyënga adórayënga diosënga yomna ca jtsejuabnayëse, y nyetscanga chë bostero soyënga ogusetánënga y chca jtsamëse oyenënga.

<sup>16</sup> Chora Jesús cachiñe tonjánayana: “Atše Jesús, atšbe ángel tijichmó chë ntšamo atše sëntsejuabnacá ndayenache ošbuachiyëngcá enefjuanëngbioye lempe chámabuayenama. Atše sëndmëna chë Rey Davídbentsana Entšá. Atše sëndmëna mo chë bínÿanoye puerte bínÿnaye estrellcá ca.”

<sup>17</sup> Chë Uámana Espíritu y chë Oveshatembe shema bondbétsichamo: “¡Mabo ca!” Y nda chca chaojouená cháuyana: “¡Mabo ca!” Y mo nda tša uajuendayana tojtsebomna, tojabo y bëtscá béjaye cuafjofšecá, cachcá nda tša tojtseboše Jesusbe soyënga jtsebomnama, chábioye chaobeconá y cha echanjama chë soyënga cha chaotsebomnama y chë nyetsca tescama yomna tšabe vídnaca, chca jtsebomnama tondaye ntsotjañcá.

<sup>18</sup> Nyetscanga ntšamo quem librësañe entsabemancá, chë ndegombre echanjopásama chamojouenëngbioye šcuabuayená. Nderado nda chë soyëngama más chaojboté, Bëngbe Bëtsá echanjama cha chaosufrí chë quem librësañe entsábemana pochócaye soyënga.

<sup>19</sup> Y nderado nda ntšamo quem librësañe entsabemancá, chë ndegombre echanjopásama soyënguiñe ndayánaca tojajuaná, Bëngbe Bëtsá chábioye bochantsebojuána ntšamo chabiama yomncá chë nyetsca tescama yomna tšabe vida jtsebomnama betiyeshentsana y chë tsëm bëts pueblentsana, chë ndayama quem librësañe entsábemana.

<sup>20</sup> Quem soyënga oyebuambnayá, chë lempe ndegombre echantsemnama tonjayaná, atše, Jesús sëntsichamo: “Aíñe, betesco chanjésabo ca.”

Chca chaotsemna. ¡Cochjabo, Bëngbe Utabná Jesús!

<sup>21</sup> Bëngbe Utabná Jesús chaoma tšabe bendicionënga tšëngaftangbeñe chaotsemnama.